


# God Da Geka Seka



The New Testament and Psalms in the Korafe-Yegha Language of  
Oro Province, Papua New Guinea

**God Da Geka Seka**  
**The New Testament and Psalms in the Korafe-Yegha Language of Oro Province,**  
**Papua New Guinea**

**Nupela Testamen na Buk Song long tokples Korafe-Yegha long Niugini**

copyright © 1984, 2023 Wycliffe Bible Translators, Inc.

Language: Korafe-Yegha (Korafe)

Dialect: Yegha

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-03-12

---

PDF generated using Haiola and XeLaTeX on 15 May 2025 from source files dated 15 May 2025  
e1416d38-ee9c-5ff6-9c71-09b912e1853b

## Contents

|                              |     |
|------------------------------|-----|
| Yaru Divariri . . . . .      | 1   |
| Matthew . . . . .            | 132 |
| Mark . . . . .               | 203 |
| Luke . . . . .               | 245 |
| John . . . . .               | 312 |
| Ekaresia . . . . .           | 364 |
| Rome Embokena . . . . .      | 428 |
| 1 Corinth Embokena . . . . . | 459 |
| 2 Corinth Embokena . . . . . | 489 |
| Galesia Embokena . . . . .   | 511 |
| Efesas Embokena . . . . .    | 523 |
| Filipai Embokena . . . . .   | 533 |
| Kolosi Embokena . . . . .    | 541 |
| 1 Tesalonaika Embokena       | 549 |
| 2 Tesalonaika Embokena       | 555 |
| 1 Timothy . . . . .          | 559 |
| 2 Timothy . . . . .          | 568 |
| Titus . . . . .              | 574 |
| Philemon . . . . .           | 578 |
| Hebrew Embokena . . . . .    | 580 |
| James . . . . .              | 603 |
| 1 Peter . . . . .            | 611 |
| 2 Peter . . . . .            | 620 |
| 1 John . . . . .             | 626 |
| 2 John . . . . .             | 634 |
| 3 John . . . . .             | 636 |
| Jude . . . . .               | 638 |
| Amboda Sirorarira . . . . .  | 641 |

## Banungari Da Yaruri

Buku einda jokáda yaru divari 150 ri. Israel embo totofo banunguse o God dae sakai sise divudo ghuseri. Kotugo God da Tafaroro Kambo Jerusalem aminda o sifo amboda dengoro indari kambo aminda tafaroro use divudo ghuseri, a oroko didiverera o tegeraera. Namonde Iesu tumonderaera evetu genembo buka einda yaru divari barago tegeraera a divuraera.

Yaru divari daba daba mave gefusira, namonde jo kasama aeri. Daba daba, Yaru 23, 51 Kini (king) David nune gembariá koterera. Dabako Yaru 90 Moses gembariá koterera. Avata namonde jo kasama e gogoghombaeri.

Geka da jiro Baiboro mendeni aminda tamburaera, Hebrew geka aimi genembo ana eni gembiri jovereghuseri. Avata jo evetu genembo yaru gefusera aimi gambaeri, kotugo jo sifo ghousa geka Psalm daba daba jokáda irira, jo ijugae eraera.

Ainde dabade yaru mendeni da geka da jiro aminda foyago da geka “of David” tamburaera. Ainda beká jo dabako iraeri. Sifo mendeni ainda tuka mo, “David ai gefusira”, sifo mendeni “David kotise gefuseri.” Ainde dabade, sifo mendeni David da imendi eni kini edo irei kotise, ne “of David” gembudo ghuseri.

Kau daba aminga ava “of Asaph”, “to the sons of Korah” tamburaera amo, Asaph nengae Korah ghae tofo mandi yaru mendeni gefuseri, tano. Avata ainghae dabade nenda imemesiri, Levi ondi yaru God da Tafaroro kambo aminda kaifa edo ghuseri. Ava sedo “of Asaph” kotugo “to the sons of Korah” da beká mo, Asaph da imemesiri o Korah da imemesiri “gasegi edo divoro dae” gefuseri, tano. Avata, namonde oroko aminda sonemba bari jo inono iraeri.

Kau daba ava, yaru mendeni da geka da jiro aminda, Hebrew geka

mendeni tamburaera, (shiggaion, maskil, miktam, gittith) ainda tuka beká mave oroko jo kasama ae eraera. Babojegari da kotari ne divari da aito o dubo ijuguse fifituseri. Aminga ava Psalm mendeni ainda geka da jiro aminda geka, “to the director of music” o “with stringed instruments” gefuseri. A evevari, avata namonde oroko aminda sonemba eni jo bae arera. Aindae sedo, Baiboro mendeni *Good News Bible* avavaga geka da jiro ana dodo, totofo geka Psalm daba daba jokáda irira kotise, geka da jiro seka simbugedo fifituseri. Namane daba ava useri.

Geka *Selah* yaru mendeni jokáda tamburaera, Hebrew geka eniri. Namonde oroko ainda tuka berefori. Ekaresia da babojegari yaru didivuse ojagho baoro dae sise sariá o songhe koto dae sariá ava koterera. Avata jo gi gogoghombaeri. Ava sedo namane fitari dotutuseri.

## 1

*Ivuga Beká da Kau Isagha Resira.*

<sup>1</sup> Genembo mave ari ekoko embo da dengoro indari ava jo ningae arira,

dubo ekoko embode dabade jo umo ae arira,

a ari ekoko embode dabade jo tatedo, God dere jirae arira,

genembo amo, nu ivugaghae a dubo jamaghae irarira.

<sup>2</sup> Genembo amo, nu BAJARI da Agho Dari uju eraira.

Sifo a tumba evia inono, nu dubo evevaghae BAJARI da Agho Dari tegutuse, dubo kotise irira.

<sup>3</sup> Nu kau ika uvu betuda govetero viviterira, amingori.

Nunda igi baduru use, a sifo furureari beká jighiraira.

Jo sifo reda gharasa edo avae arira.

Nu rea eraira amo, isambu eveva bekári.

<sup>4</sup> O ari ekoko embo mo, ne jo kau amingo iraeri.

- Ne kau roera eni, susu beká tefori, anoso a ifu vanembori. Ne sena yaurai fuseari ghumburaira, ainda kaugori.
- <sup>5</sup> God bekáda bekáda ategi ururari, ne jo fetae arera. Evetu genembo God kotae erera amo, ne esike yarera. Ne jo evetu genembo eveva ainde dabade irae arera.
- <sup>6</sup> Ainda beká mo: BAJARI nu ari eveva embo ava bu tavo use, nu ari ekoko embo ava fuge kotae ari, ya sirivo arera.

## 2

*Evetu Genembo Gogore Arera Ava, God Nunda Mandi Mutari Foa Ne Darira.*

- <sup>1</sup> Endada oro oro redae God dodo janje ekoko eraeri? Ne redae manaka beká irae ava gayeraeri?
- <sup>2</sup> Endada kini (king) mane God ighagha use irera. Nenda kokotofu, BAJARI a nunda Genembo gategusira aikená, osogo ari dae sedo dabade tatedo irera.
- <sup>3</sup> “Namonde nenda agho dari do bu-vore!”  
“Nenda sari fuge doyore!”  
aminge seraera.
- <sup>4</sup> Bajari nunda anumba vasa utuda anumbirise, gegha jise, ne tefo tefo manaka gayeraera aindae dere jiraira.
- <sup>5</sup> God nu dubo eko edo oju aoro dae resira.
- <sup>6</sup> “Nanda kini ututu kakara Saion,\* aminda fiteno irira,” BAJARI aminge resira.
- <sup>7</sup> Kini doriri aminda irira, aimi resira,  
“Nu nandae sisira, ” Ni nanda Mandiri.  
Na oroko nimokena resena,  
“Na ninda Afa bekári.

\* **2:6:** Saion mo, ututu ijoghako eini bogu begaya Jerusalem jokáda irira. Avata, *Banungari da Buku* mave gefusera, kotugo feroveta mane mendeni bogu begaya Jerusalem dae sise, Saion gefuseri. Kau daba aminga ava, sifo mendeni, God da Tafaroro Kambo kakara use, Saion gefuseri.

- <sup>8-9</sup> Benunu saresa, na natofu isambu ninda ungodá fitarena. Ne kefata aurimi ari aimi de bejaresa.  
Kau okia fugeoro, du de fusuruma eraira, aminga ava aso itatama arera. Enda isambu ninda tofo arira.
- <sup>10</sup> Avori, endada kini mane a giti jighari nemokena resena, erá mema eove dae sise, dubo kotise nanda geka ningivu!”
- <sup>11</sup> Oju igheghi ghae Bajari tumonde bainghaore!  
Ghamo dadada ghururari nunda dae ivuga aore!
- <sup>12</sup> Nu janje eko totoi totoi eraira. Ava sedo, erama janje eko edo nimo sari totoi totoi ambeoso dae sedo,  
God da Mandikena kauboi dadarigedo tumonde bainghe!  
Mave numokena ambo sose feteraira amo,  
ivugaghae irarira.

## 3

*Sonemba Da Benunuri*

- <sup>1</sup> Arie, BAJARI, nanda gitofu digarigo eredo,  
namokena osogo bu refera.
- <sup>2</sup> Ne namoá ava sise eminge resera,  
“God ni jo sonembae arira.”
- <sup>3</sup> Avata arie, BAJARI, ni sifo ghousa evia inono nanda dara jokáda nanda beredae buraena. Ni nandae ninda duró muturaesa. Edo nanda fakina mutari kato nimori.
- <sup>4</sup> Na BAJARI da sonembadae kori sirureono,  
nu nunda doriri kakara aminda irise,  
nanda kori ningiraira.
- <sup>5</sup> Na tumba ghousa eveva aviraena da beká mo,  
BAJARI nu na kaifa eraira.
- <sup>6</sup> Nanda gitofu nanjogoimi na jimbe birurugherera aindae,  
na jo oju ae arena.

- <sup>7</sup> Arie, BAJARI, ere fu! Namu sonembase, nanda God!  
Nanda gitofu sovoda dege,  
nenda fakina rojare!
- <sup>8</sup> Sonemba mo, BAJARI kena ghe foa gheraira.  
Nunda esimbugari nunda natofokena irare!

#### 4

#### *Bajari Kena Nunda Sonembadae Benunu Saore!*

- <sup>1</sup> Arie God, nanda sorega kato, na nimokena benunu sarena, ningi!  
Na dara jokáda tereteno, nine sonembusesi.  
Oroko eminda nandae joka edo nanda banungari ningi!
- <sup>2</sup> Ne ghousa mavega ava nanda binodae  
bengoso arevu?  
Ne ghousa mavega ava god beká irae dubo ruruse, amboda amboda arevu?
- <sup>3</sup> Kasama evu, evetu genembo eveva ava,  
BAJARI nunda tofodae sedo gategusira.  
Ava sedo na numokena kori seraena amo, nu ningiraira.
- <sup>4</sup> Erá janje ekoghae irise, aimi ari ekoko eose!  
Aindae ninda avari vasada fase irise nanda geka evia durumugedo kote gogoghombe!
- <sup>5</sup> BAJARI da joba beká ava mutaresa.  
Aminguse, ninda tumondari numokena fitaresa.
- <sup>6</sup> Natofu digari benunu seraera,  
“Arie, BAJARI, ninda esimbugari mokogo namanekena bofu!  
Arie, BAJARI, ninda kavevera aimi, namane fuge garesa.”
- <sup>7</sup> Avata, ivuga nine nandae futusesa amo, teriagori.  
O ne faravada vuji a asi vaini da muká bambudo kirumo use, ivuga eraera amo, jo amingo iraeri.
- <sup>8</sup> Arie, BAJARI, na nanjigo fasarena, dubo jamaghae avarena.

Ai resira amo, nisuka, nine na kaifa tavo eraesa.

#### 5

#### *Gagara Ari Da Banungariri.*

- <sup>1</sup> Arie BAJARI, nanda geka memaghae setena, ava ningi!
- <sup>2</sup> Nanda God a Kini, na sonembadae koko resena, ningi! Arie BAJARI, na nimokena banungarena.
- <sup>3</sup> Ataeghae beká nanda beka niningeresa. Na tofo simbugedo, iji kosughiri,  
na nimokena benunu sise, mino saso ningari dae kaifa erena.
- <sup>4</sup> God, ari ekoko embo rea eraera ava ni imboe eraesa. Ari eko da aito ninda dombuda itako jo fetae arira.
- <sup>5</sup> Ni ivuga kakato imboe eraesa, kotugo ari ekoko embo gari beghagha beká eraesa.
- <sup>6</sup> Ni gungubo kakato isasambu urureaso, sirivo eraera. Kotugo, mave kokomana de gogorogheraera,  
nébarago imboe beká ava eraesa.
- <sup>7</sup> Avata, ninda dubo bari tomanako aindae na ya ninda kamboda tereraena.  
Na ninda kambo kakarada tere banunguse, igheghighae tumonde baingheraena.
- <sup>8</sup> BAJARI, nanda gitofu digari bekári.  
Giti jijighururaso, ninda uju ava aone!  
Ninda emboro namokena ijugaso isagha ururari gosuse, ainda amboda amboda aone!
- <sup>9</sup> Nanda gitofu da geka jo itako tumondari da kaugo iraeri.  
Ne, reju irira isambu, de tisari dae kotise  
irá gheraera.  
Nenda geka mo, vivi futo bekári.  
Avata, nanda kokomana dederuse daoro sirivo aoro dae kotise  
irá gheraera.
- <sup>10</sup> Nenda dara aindae nemoá bu memakena fitaso itatama use, ghamo baeteri.

- Ne reju ari kotise manaka gayer-  
aera aimi, totofo nemoa gam-  
bari sirivo aeteri.  
Ne ari ekoko futo use, nimo-  
kena osogo eraera ágido, ondi,  
ninda dombuda do darigaore!  
11 O evetu genembo nimokena ambo  
sose fetarera amo, ivugaghae  
irore dae resena.  
Sifo ghousa evia dubo jamaghae  
yaru sise irá ghedo ghaore!  
Mave ni dubo buraira ava ivuga  
aoro dae sise, tavo e!  
12 Geka bekári, BAJARI, mave ninda  
sari ava eraera amo, nine es-  
imbugeraesa.  
Ninda dubo bari bere amingo  
aimi ne gagara eraesa.

## 6

### *Dara Itatama Use Sonemba Bari Da Benunuri.*

- 1 Arie BAJARI, erá nandae janje eko  
use na dombuda seose!  
Ninda dubo ekoko ariimi erá  
nandae mema muteose!  
2 Arie BAJARI, namokena fakina dad-  
abetira, nandae joka aetesi.  
Na gofedo irena, ava sedo fakina  
bofu baone.  
3 Nanda jebuga isambu  
fakarago, dara bouvugo beká  
ava itatama eraena.  
Arie BAJARI, ni nanjigo nembo na  
sonembaresi?  
4 Fu, na sonembase!  
BAJARI, nandae joka use, erá am-  
beono dae sise, na saghimbe  
bu!  
5 Ambari embo da vasa aminda  
mave ni jo kotae eraera.  
Aminda mave eniimi nindae jo  
sakai sae eraera.  
6 Na dubo mema aimi tumba evia  
mema itatama use, gevei er-  
ena. Nanda avari vasa jivui  
safegeraira.  
Nanda guto jivuimi sasaka  
eraira.  
7 Gitofuimi mema futero  
na sorara eno diti babojegetiri,  
gari erebunena.

- 8 BAJARI, nanda sorara ningira. Ava  
sedo, ari eko embo nemokena  
resena, na do darige esike  
fetevu!  
9 Namu sonembare dae sorara  
eraena, nu nininguse,  
nanda benunu da mino mutu-  
raira.  
10 Nanda gitofu mo, ne meka gosuse  
manamana arera.  
Edo, dudukughe manamana  
ururoro, ondari darigarera.

## 7

### *God Nange Evetu Genembo Inon- oda Ijujaetira, Ainda Benunuri.*

- 1 Arie BAJARI, nanda God, na nimo-  
kena ambo sose fetari dae  
refena.  
Mave na ondi dari dae erera ava,  
na saghimbe bu, darigaone!  
2 O jo sonembae aresa amo,  
nanda gitofu raiyoni (lion)  
da kaugo use,  
na bu ya sonemba irae vasa  
aminda gambu torere tarere  
ghaoro ambarena.  
3-4 Arie BAJARI, nanda God, nanda ko-  
manakena dara o aito aetena,  
o susu tefo nanda gitofu sosighi  
aetena,  
avavaga aetena amo,  
5 ninda ghabu sokinimbe, gitofuimi  
na ondi sandi budo,  
atai fati gitoro fonja dikai gambu  
fase ambaeteni.  
6 Arie BAJARI, nanda gitofu dubo  
ekoko use, namokena isoro ari  
dae erera.  
Ava sedo, ere fetedo ninda janje  
eko da fakinaimi sorega fum-  
baetesi.  
Arie God ere, na soraetesi! Inon-  
oda ijujaso dae resena!  
7 Aminguse, evetu genembo  
isambu bu fu tatedo,  
ukuge gosuse, kaifa ase!  
8 Bajari nine fu, endada natofo  
isambu ijujase!  
Arie BAJARI, na ijujaresa amo,  
nanda eveva mavego eregos-  
esa ava kotaetesi.

- Arie, God Iká Bekáda, na dara  
eni jo ae ava kotise, nandae  
“eveva” saetesi.
- <sup>9</sup> Arie, God evevago a numo beká  
nimori.  
Namanenda kotari a uju ava go-  
suse ijujairaira da God barago  
nimori.  
Evetu genembo ari eko eraera amo,  
se doyore!  
Aminguse, ari eveva embo ava  
sonembe!
- <sup>10</sup> God Iká Bekáda amo, nanda  
bereri.  
God daba aimi, mave nunda  
geka ningiraira ava, sonem-  
beraira.
- <sup>11</sup> God nu bekáda bekáda ijujuse,  
ari ekoko embo da mino sifo evia  
inono muturaira.
- <sup>12</sup> Nenda ari ekoko jo doyae arera  
amo,  
God nemoa dari dae sise, nunda  
kaiya vegedo,  
nunda feva jighi otombe asi bu  
asugedo,  
<sup>13</sup> isoro da ambi goroba sim-  
bugedo,  
feva da goroba mendo  
buburaghae aimi kato arira.
- <sup>14</sup> Givu! Ari ekoko embo ne ari eko  
da emboro rerebuse irera, ko-  
tugo, dara use komana derari  
dae sedo manaka garuse irá  
gheraera.
- <sup>15</sup> Avata nenda geka gunguboimi  
evetu genembo mendeni  
deraetera aimi, jovereghedo  
nemoa gambarira.
- <sup>16</sup> Ainda mino ava buraera.  
Kotugo nenda dara eraera ainda  
bouvuu ava jovereghe nemo-  
kena asugeraira.
- <sup>17</sup> BAJARI dambu ijujuse, bekáda  
bekáda mino muturaira ain-  
dae, aiyakoe resena.  
Na BAJARI Iká Bekáda aikena  
yaruimi didivuse sakai  
sarena.

## 8

- <sup>1</sup> Arie, BAJARI namanenda Bajari  
Ninda javo teria ainda bino  
ava ivegedo iri, reighi isambu  
niningerera.  
Nindae sakai seraera amo, viti ya  
utuda buvuraira.
- <sup>2</sup> Sasingako a ami mindari aimi,  
nindae sakai sise yaru divu-  
raera.  
Ninda gitofu isambu, jo eniimi inono  
edo, ni dae arera.  
Evetu genembo mave nimokena  
osogo eraera, avata ninda fak-  
inaini buregeraesa.
- <sup>3</sup> Utu nine usesa ava,  
a inua a damana nine nunda  
vasada ffitusesa ava,  
na fuge gido,  
<sup>4</sup> yove seraena!
- Ata, genembo mo, rejori?  
Nu jo rejo eni iraeri, ava sedo, ni  
redae nu koteraesi?  
Nu taká tefo genembo ava sedo,  
nu redae bu tavo tatau eraesi?
- <sup>5</sup> Avata ni eteso genembo sirorusira  
amo, ninda duruda, bajari edo  
irira.  
Numokena usasa, duró, a bino  
ava, nine kavevera edo futus-  
esi.
- <sup>6</sup> Ni nu gatedego seteso, nu roera  
isambu nine eteso sirorusira,  
ainda bajari ava, nune edo irira.
- <sup>7</sup> Roera resena emo, sifi burumakava  
a sino fuka taima jokáda irá  
gheraera,
- <sup>8</sup> rika ikáda ghumburaera, oka, a eva  
da roera isasambu,  
ainda bajari, nune edo irira.
- <sup>9</sup> Arie, BAJARI, namanenda Bajari.  
Ninda javo teria ainda bino  
ava ivegedo iri, reighi isambu  
niningerera.

## 9

*God Inonoda Ijujeraera Aindae,  
Sakai Saore!*

- <sup>1</sup> Arie BAJARI, na janje isambuimi  
nindae sakai sarena.



- Nanda gae gitida rea eteso sirorusira ava osa sarena.
- <sup>2</sup> Arie, BAJARI, God Iká Bekáda Iresa na nindae ivugaimi tamo erari beká erira.  
Na nindae sakai sise, ninda javo jighono erarira.
- <sup>3</sup> Ni nanjigo buvuraesa amo, nanda gitofu ojuimi sumbudo du ambu fafaseraera.
- <sup>4</sup> Ainda susu mo, ninda anumba vasada  
anumbedo, bekáda bekáda ijujuse,  
nanda sari ava bekáva kasama edo na sonembetesi.
- <sup>5</sup> Nunda oro oro ekoko use, ni jo tumondae eraera ava, ni bu ambari kena fitesi.  
Ne sosighi beká ava etesi,  
nine nenda javo ghaje fugeteso binó irae beká ava etira.
- <sup>6</sup> Arie, namanenda gitofu makoe vek-  
aghae museteri,  
nine nenda reighi sosighi e jighi jovereghari beká etesi.  
Ne amboda eniimi jo kotae arera.
- <sup>7</sup> O BAJARI mo, nu kini (king) edo, evovodae irira.  
Nu evetu genembo ijujari da vasa e vatetena etiri fetirira.
- <sup>8</sup> Nune evetu genembo isasambu dambu dambughae ijujuse,  
evetu genembo isasambu bekáda bekáda use kaifa arira.
- <sup>9</sup> BAJARI mo, nu evetu genembo babate binó tefo ainda ambo sosari vasari,  
evetu genembo mendeniimi nemokena mema muturaera ainda sifoda,  
numo nenda jungari vasa kíkanghari bekári.
- <sup>10</sup> BAJARI mave ni kasama erera amo, nenda tumondari nimokena fifierera,  
Ai resira amo, mave nimokena furaria amo, eni jo imboe ae aresa.
- <sup>11</sup> Arie! BAJARI ututu Saion\* aminda anumbirise, nunda natofo kaifa eraira aindae, isimbaore!  
Nu rea usira ava, natofo isambu kena isagha saore!
- <sup>12</sup> Kikita mo, God da tofori, ororo gutuse sorara eraera aindae kotise, mino mutarira.  
Nenda mema mave erefutira ainda mino ava, God nune mutarira.
- <sup>13</sup> Arie BAJARI, nanda gitofu nandae mema muturaera, ava gaetesi!  
Arie BAJARI, nandae joka edo, erá doyeoso ambeone!
- <sup>14</sup> Aso, na Jerusalem embo da dombuda fete,  
nindae sakai resena da beká saono ne ningarera.  
Edo, na sonembusesa aindae, ivuga arena.
- <sup>15</sup> Oro mendeni mave ni jo tumondae eraera aimi,  
bako ghambudo, aminda totofo du vovosegeteri.  
Ne totofo nenda vaghoda teretero nemoá fatira.
- <sup>16</sup> BAJARI nange bekáda bekáda ijujeraira aimi, nu mavejuri, ava ijugeari kasama eraera.  
Nune etiri, ari ekoko embo ava, totofo nenda vaghoda teretero, aimi fatira.
- <sup>17</sup> Ari ekoko embo isasambu ambari embo da vasada vosarera.  
Oro mave God imboe eraera isambu, aminda vosarera.
- <sup>18</sup> Avata makasi embo da mema amboda God kote simbugarira.  
Kotugo  
makasi embo da gigitari ava beká arira, jo dadabae arira.
- <sup>19</sup> Arie BAJARI, ere fu! Erá doyeoso, natofoimi ninda geka bu fugeure!  
Oro mave ni jo tumondae eraera ava, bu fiti, ninda dombuda fetoro, nenda ari ekoko ainda mino ava mutu baore!

\* **9:11:** Afige, geka eni Saion dae gefusera, tuturo 2:6 duruda tege, garesa!

20 Arie BAJARI, nemoá jo God iraeri,  
ne taká tefo  
evetu genembo ava kasama aoro  
dae sise,  
aso ne ojuimi ghamo  
takeghari itatama aeteri.

## 10

*God Nange Evetu Genembo Inonoda Ijujaetira, Ainda Benunuri.*

1 Arie BAJARI, ni redae soka beká  
fefeteresi?  
Namane dara itatameraera da  
sifoda, ni redae tofo junger-  
aesi?

2 Ari ekoko embo gogore use, evetu  
genembo vagho fitiraera  
aminga ava use,  
makasi embo nenda derariimi  
sandido, nemokena mema  
erefutera.

3 Ari ekoko embo amo, ne oduso use,  
dighighi eraera, aindae totofo  
sakai seraera.  
Dighighi kakato amo, BAJARI dae  
jijivu sise, numokena gukai  
muturaira.

4 Ari ekoko embo nenda gogoreimi  
misurugururari, BAJARI dae jo  
igheghi ae eraera,  
Ne gogore use, God iraeva ser-  
aera.

5 Ari ekoko embo roera reju er-  
aera, ainda beká isambu siror-  
eraera.  
God evetu genembo nange iju-  
jeraera ava jo kasama ae use,  
kokomanekena dere jiraera.

6 Ne totofo koteraera, “Namane jo  
nanjigo gofae arera.  
Namane sifo ghousa ivuga use  
irarera, dara á itako jo foa  
namane bae arira.”

7 Nenda sarida mo, simbora ari, gun-  
gubo sari, kotugo katiyavara  
ari aimi bedo edo irira.  
Ne rea seraera aimi, dara bu foa  
gheraera.

8 Ne reighi tinguda jungedo iritirise,  
dara tefo embo ava daoro am-  
boro dae kaifa gigita eraera.  
Ne mavejoá ufena daoro ambarera  
ava kato eraera.

9 Ne raiyoni (lion) da kaugo ava use,  
jungedo kato use kaifa eraera.  
Ne junge kato urureoro makasi  
embo foa,  
nenda vaghoda teterrureoro,  
sandi bu jumbu ya gheraera.

10 Nene, evetu genembo gogofegari  
ava sandeoro, du de sirivo e  
fafaseoro  
nenda fakina dadaberaira.

11 Ne totofo koteraera, “Namonde  
rea eraera ava, God jo kotae  
ari ava,” seraera.  
“Nu diti gajedo itako jo gae  
eraera.”

12 Arie BAJARI, ari ekoko embo oindae  
mema mutu!  
Arie God, mave mema eretafera  
ava kotaetesi!

13 Ari ekoko embo nange nange ko-  
tise, God ighagha use,  
eminge seraeri, “Namokena  
mema jo mutae arira.”

14 Avata geka bekári: God, nene dara  
rea eraera,  
kotugo mema muturaera ava  
isambu ni gido, ainda mino  
mutari koteraesa.

Evetu genembo gogofegari ne  
totofo ninda ungodá fiti-  
raera. Sasingu babate ainda  
sonemba kato nimori.

15 Evetu genemboá ari ekoko eraera,  
ainda  
fakina ava de bejedo,  
nenda kosasa ainda mino ava  
futturaso, sirivo aore!

16 BAJARI mo, kini edo evovodae irira.  
Evetu genembo god mendeni tu-  
monderaera ava, nune sari,  
nunda reighi do dumbarera.

17 Arie, BAJARI, ni gogofegari da be-  
nunu ava jave ningiraesa.  
Nenda sorara ningido nine ne  
sonembedo, fakina futuse  
eghovo deraesa.

18 Ari ekoko embo ava, nene  
katiyavara edo  
ghusera ava doyorodae sise,  
ni bate bagha a sabua da sorara  
ningido sonemberaesa.

## 11

### *Dara Furarira Da Sifoda, Bajari Tumondaore!*

- <sup>1</sup> Na Bajari tumonduse numokena ambo sose fetarena.  
Agido, na gitofukena eminge saeteni, “Erá gogovara use, namokena eminge seose: ‘Rika da kaugo edo doririda ghumbu ya jungase!’ ”
- <sup>2</sup> Ai resira amo, gi! Ari ekoko embo itumuda jungutuse, nenda goroba fevada fiftige afedo, evetu genembo eveva ava gayari dae kato eraera.
- <sup>3</sup> Irari isambu beje soesa arira da sifoda genembo eveva nange ari?
- <sup>4</sup> BAJARI nunda kambo kakara jokáda irira,  
BAJARI nunda anumba vasa utuda irira.  
Aminda irise, evetu genembo tano reda reda endada irise, rejo eraera ava, ditimi gosuse kasama eraira.
- <sup>5</sup> Nu evetu genembo eveva a eko ava dere gosuse,  
mave agho dari bejise, de goroghari uju eraira ava, gari imboe beká eraira.
- <sup>6</sup> Nu imo buburago, imbosi eko masaghae ava muteari ari ekoko embokena vose foa gheraira.  
Nu yaura veverago aimi avari ghamo baoro dae muturaira.
- <sup>7</sup> Ainda beká mo, BAJARI mo kosasa tefori, nu aito fugari eveva ava dubo buraira.  
Mave amingarira aimi, ne nunda dombu gosuse ivuga use irarera.

## 12

### *Sonemba Bari Da Banungariri.*

- <sup>1</sup> BAJARI, namane sonembe! Nimo tumondari embo endada eni jo iraeri.  
Kotugo geka beká sari embo barago, eni jo tambari da kaugo iraeri.

- <sup>2</sup> Ne isambu tofo tofo gungubo sise irá gheraera.  
Ne kokomana dedeuse, geka vivi futo seraera.
- <sup>3-4</sup> Arie BAJARI, mave geka vivi futo seraera, ava daso ambarera.  
Kotugo, mave tofofo sakai sise eminge seraera, “Namondeda sari aimi namondeda uju ava barera.  
Namonde rea ava sarera, jo mave eniimi gajari da kaugo iraeri.” nembarago daso ambarera.
- <sup>5</sup> Avata BAJARI resira, “Na furari dae javi erena. Ainda beká mo, evetu genembo mendeni, makasi embo ava sosighi edo mema muturaera,  
katiyavara urureoro gogofegari memaghae aoro sise irá gheraera.  
Na oroko eredo, sonemba uju eraera ava futuse, ne gagara arena.”
- <sup>6</sup> Kau auri siliva (silver) umbu 7 ava itioro avi jeka voseari,  
siliva beká isagha eraira, aminga ava BAJARI rea beka gagojuse setiri fetirira ava foa isagha arira.
- <sup>7-8</sup> Ari ekoko embo reighi isambu nemo vanembori.  
Ne meka gari da ari eraera, aindae sakai futo seraera.  
Arie BAJARI, sifo ghousa namane kaifa use,  
evetu genembo avavagaikena kosegaetesi.

## 13

### *Sonemba Bari Da Banungariri.*

- <sup>1</sup> Arie BAJARI, ni ghousa kau mavega ava na kotae aresi?  
Ai, kotae beká usesi.  
Ghousa mavega ava na nimo geono dae sise jungeraesi?
- <sup>2</sup> Atá ghousa mavega ava mema bouvu ghae irareni?  
Sifo tumba evia inono nanda ghamo joká memaimi bedo

- edo, irá gheraira amo, maveg-ori?  
Nanda gitofui na de atai fafotusera ava, na ghousa mavega irareni?
- <sup>3</sup> Arie BAJARI, nanda God, namoá fuge gido, nanda benunu ningido, mino saetesi!  
Nanda fakina sekago mutaso baeteni, erá doyeoso na ambeone!
- <sup>4</sup> Erá doyeoso, nanda gitofuimi, “Naname nu de atai fateri!” seore!  
Kotugo, doyeoso, nandae, “Makoede, durira!” seore!
- <sup>5</sup> O ni nandae veka eveva use, na dubo buraesa, aminda gaiga gayeraena.  
Na saso jebugarena aindae, na riria arena.
- <sup>6</sup> Arie BAJARI, na nindae yaru divarena da beká mo, namokena veka eveva eraesa.

## 14

### *Mave God Ighagha Arira Aikena Mo, Kotari Tefori.*

- <sup>1</sup> Mave tofo mandi “God tefo” erekotira amo, nu daghe irise, sari garera.  
Evetu genembo avavaga nenda dubo joká bebeta edo irera.  
Ne tafasara beká ava eraera.  
Eni jo ari eveva ae eraira.
- <sup>2</sup> BAJARI utuda irise, evetu genembo fuge gosuse,  
evetu genembo dubo kotise numoa tumonde baingheraera ava, tava eraira.
- <sup>3</sup> Avata ne isasambu emboro eveva do dariguse ari ekoko eraera.  
Ne totofo bebeta edo irera.  
Jo dabakoimi ari eveva ae eraira, eniko tefo bekári.
- <sup>4</sup> BAJARI resira, “Ari ekoko embokena kotari tefori?  
Ne nanda natofokena bagia use, namokena jo banungae eraera.”

- <sup>5</sup> Avata amboda ne ghamo takegha arira.  
Ainda beká mo, God evetu genembo nunda sari ava eraera ainde dabade,  
fetirari garera.
- <sup>6</sup> Ari ekoko emboi evetu genembo eveva ainda kotari a uju ava buregeraera.  
Avata evetu genembo eveva nenda ambo sose fetari da vasa BAJARI numori.
- <sup>7</sup> Arie, jebuga Saion\* ghedo foa Israel embo kena sirorare!  
BAJARI nenda ati ghayafa sekago mutari barera amo,  
Jacob da imemesiri, Israel embo, isasambu ivuga use irarera.

## 15

### *God Evetu Genembo Nange Aoro Dae Uju Erira, Amo Eviri.*

- <sup>1</sup> BAJARI, ninda irari vasa kakara jokáda mave terari?  
Mave ninda ututu Saion\* aminda viti ya tumonde bainghari mo, inonori?
- <sup>2</sup> Genembo mave God da geka isambu ningido, sifo ghousa evia geka beká sise,  
ari dambo vanembo eraera, a nu avori.
- <sup>3</sup> Genembo amo nu kokomanakena aji jo sae eraira,  
a nemokena ari ekoko jo ae eraira. A nu nano namendi-dae unongu jo sae eraira.
- <sup>4</sup> Genembo amo, mave God imboe eraira, numbarago imboe eraira.  
Avata mave BAJARI tumonduse, nunda sari avanembo eraera, genembo amo ne kakara eraira.  
Genembo amo evovodae nu rea beka gagojusira, ava eraira.  
Nunda beka gajari ava use, mema bouvu mavega itatama eraira aindae,

\* **14:7:** Afige, geka eni Saion dae gefusera, tuturo 2:6 duruda tege, garesa!

\* **15:1:** Afige, geka eni Saion dae gefusera, tuturo 2:6 duruda tege, garesa!

nu jo kotae eraira. Nu rea ari beka gagojusira, ava ari siro-rarira.

<sup>5</sup> Genembo amo, nunda sonemba eraira ainda etoda, mino ainghae jo bae arira.

Genembo amo, nunda komana eni ava koto sifoda genembo eni dara jo ae,

aikena gungubo sare dae sise, moni mutari sarira amo, itako jo bae arira.

Genembo mave ari avavaga use irarira amo, nu evovodae evevada fetarira.

## 16

*Genembo, God Da Sonembadae Ivuga Use, Yarué Gefusira.*

<sup>1</sup> Arie, God! Sonembe, gagara aso, na nimokena ambo sose fetone! Na ninda sonemba a kaifa tavo ari ava tumonderena.

<sup>2</sup> Na BAJARI kena eminge seraena, “Ni nanda Bajariri, roera eveva namokena irira ava, isambu nimokena-ghe foa gheraira!”

<sup>3</sup> BAJARI da natofo endada irise, nu tumonde gogoghomberaera amo, ne evevago a numo bekári.

Nemo kotise, na ivuga e gogoghomberaena.

<sup>4</sup> Evetu genembo mave god a sukaru mendeni tumonduse, nenda sonembadae sise, aminda sufuse irá gheraera amo, ne dara digari tamburaera.

Avata ainda susu mo: nemori! Ava sedo, god a sukaru mendeni setena aikena, na jo joba futuse, ororo ava jo averegae arena, a kotugo na jo ne tumonde bainghae arena.

<sup>5</sup> BAJARI, nanda jebuga a sonemba ainda susu isasambu, nisuka nimori!

Nine, reja namokena daiva eraira ava, nine muturaesa.

A kotugo, rea namokena amboda siro-rarira ava, ninda un-goda irira ava sedo, nine kaifa eraesa.

<sup>6</sup> Ni kavevera use, namokena joba muturaesa amo, eveva bekári. Ava kotise, eveva seraena.

<sup>7</sup> Na BAJARI dae sakai seraena.

Ainda susu mo: na erá dara eone dae sise, nu nanda emboro ijuguse,

tumbaghae nanda dubo jokáda geka sise, dengoro indiraira!

<sup>8</sup> BAJARI namokena sifo ghousa irira ava, na kasama use irá gheraena.

Nu namokena ojira, utua fetirira ava sedo, jo reja enii derari, na jo gofae, fete gogoghombarena.

<sup>9</sup> Aindae sedo, na aiyako sise, ivuga beká ava use, dara a mema foa gheraira aindae, na jo itako oju ae eraena.

<sup>10</sup> Ainda susu mo: ni na kaifa ururaso, ambari da fakinaimi jo namoá derae arira.

Na ni tumonde gogoghombuse, ninda saramana eraena ava sedo,

na jo doyasos ambari embode dabade sifo ghousa irá ghae arena.

<sup>11</sup> Na nange jebuga tambaetena ava kotise, nine nanda emboro ijugaresa.

Ni namonde dabade irá gheraera ava itatamuse, na ninda dombuda irise, riria beká ava use, evovodae ivuga use irarena.

## 17

*Genembo Eveva Eniimi, God Da Sonembadae Benunu Sisira.*

<sup>1</sup> Arie BAJARI, na rea ava nimokena koko sise resena ava, ningi!

Na geka beká seraena, ava sedo nanda benunu resena evia, jave ningi!

<sup>2</sup> Koto sifoda namo ijuguse, nandae “kosasa tefo” saresa.

- Ai resira amo, ari eveva a eko mave eraera, isambu ni kasama eresa.
- <sup>3</sup> Ni tumbaghae fesa, nanda kotari a nanda janje joká fuge gosuse ijujusesa amo, nanda eko eni jo tambae usesi.
- Kotugo, nanda aviva kaifa use, reju seraena aminda barago, sembae eni jo sirurono ningae ri.
- <sup>4</sup> Na ninda sari ava use, evetu genembo ekoko a gogore a tafasara kakato ainda amboda jo yae eraena.
- <sup>5</sup> Na ninda kotuda fetirise, jo roimi dimbari durae edo ghuseni.
- <sup>6</sup> Arie God, na nimokena banungerena.  
Ai resira amo: na kasama erena, ni mino namokena saresa.  
Ava sedo, dengoro javuse, nanda geka ningase!
- <sup>7</sup> Arie, nanda Sonemba Kato, ninda dubo bari duroghaeimi iju-guse, na gitofuda ungodá saghimbe bu!  
Ai resira amo, mave ninda ungo gimandukena ambo sose fetarira amo, gitofudae jo oju ae arira.
- <sup>8-9</sup> Evetu genembo nenda yeye kaifa eraera aminga ava, na kaifa edo gagara e!  
Erá, evetu genembo ekoko namokena tataya eraera, namoa deoro dae sise, ninda ghabuimi na gagara e!  
Ai resira amo, ne na daoro ambono dae sise, jimbi birurughedo irera.
- <sup>10</sup> Nemokena joka ari tefori.  
Ne totofo sakai futo sise, gogore eraera.
- <sup>11</sup> Ne na anakora jimbe birurughedo, namoa fugoro endada durono dae, goroto tava use irera.
- <sup>12</sup> Nemo kau laiyoimi (lion) ari guse, namoa sosighi ari dae kato eraera.

Kau raiyoni fakina kato ari guse, namoa ufena sandari dae kato eraera.

- <sup>13</sup> Arie, BAJARI, ere foama, evetu genembo namoa, katiyavara eraera ava,  
nemoa dedo, atai fati fetaso dae resena.  
Ninda kaiya dika soveni soveni aimi, ari ekoko embo dege, dari-gaoro jebugaone!
- <sup>14</sup> Arie BAJARI, ninda sonemba da fakina aimi,  
na evetu genembo enda da irari ava nembo kotise,  
irá gheraera ainda ungodá saghimbe bu, jebugaone!  
Mino eko nendae sedo simbugusesa ava mutaso, mema ruruse itatama aore!  
Nemo, kotugo nenda sasingu barago, mino daba ava itatama ururoro,  
a kotugo nenda imemesiri barago ainda mema itatamara.
- <sup>15</sup> Avata na ninda dombuda fetirise ni garena.  
Ainda susu mo, nanda irari dambugori.  
Na avi eroruse, dombu basari nangae minonde minonde guse,  
ivuga beká ava use irarena.

## 18

*David Gitofu De Sosighi E Rurusira Da Yaruri.*

- <sup>1</sup> Arie BAJARI, ni dubo ererurena.  
Nanda sorega a fakina mutari kato nimori.
- <sup>2</sup> BAJARI mo, nu nanda sorega mutari katori.  
Numokena tere fetono, na gagara arira.  
Nanda God mo, sorega mutari kato bekári.  
A nu nanda sonemba kato fakinagori.  
Na numokena junge feteraena.  
Nanda bere mo, numori, a fakina nune futureari jebuga eraena.

- <sup>3</sup> BAJARI dae sakai resena.  
Na numokena kori seteno, na gitofuda ungodá ava sonembusira.
- <sup>4</sup> Ambari da fakina evagoimi na kosege birurughedo afurusira.
- <sup>5</sup> Ambari da fakina aimi namoa kosege jimbe birurughedo, namoa ivasi fiti bari dae kato usira.
- <sup>6</sup> Na nanda dara jokáda irise, BAJARI dae kori siseni.  
Nanda God kena sonemba dae soraraghae kori seteno, nunda kambo kakara jokáda irise, nanda beka niningusira.
- <sup>7</sup> Amingetiri, enda javi use daradaraghiri, doriri susu javi javi use, ginoginoghusira.  
Ainda beká mo, God janje ekoko usira.
- <sup>8</sup> Imbosi nunda mendo tokáda gubighiri, nunda bekada avaraka buburaghae oeno veverago ava buvurutusira.
- <sup>9</sup> Utu jighi torere afigedo, foroga ingago nunda ata duruda fiti ainghae vose fusira.
- <sup>10</sup> Nu nunda Serubim aminda anumbetiri, yauraimi bu ghufusira.\*
- <sup>11</sup> Numo tumba jokáda afuregedo, borija da foroga ingagoimi doghusira.
- <sup>12</sup> Usasa nunda dombukena jaragheraira aminda ghedo biria avaraka buburago avavagai tarighiri,  
borija dombu eni yaurago tamo ghamanago, foroga ingago jokáda ghe beje buvurutusira.
- <sup>13</sup> Aminguse, BAJARI Iká Bekáda nunda beka duka utuda ghe gururu didiviri nininguseri.
- <sup>14</sup> Nunda feva da goroba aimi afetiri, nunda gitofu sisigaga useri. Nu setiri biria tarighiri, ne oju e sufuseri.
- <sup>15</sup> Arie BAJARI, ninda gitofu dombuda sise, kovionoghae koko seteso, eva kafuru da duru saghe fasedo enda susu isagha usira.
- <sup>16</sup> BAJARI nu ikáda ghe sirige, na karaje kafuruda ghe jumbarigetiri vivituseni.
- <sup>17</sup> Nanda fakina dadabetiri, na nanda gitofu fakina kakato da ungodá ireno, God na saghimbe rurusira.
- <sup>18</sup> Dara ainda sifoda, ne na dari dae sufusera, avata BAJARI na gagara usira.
- <sup>19</sup> BAJARI nandae riria eraira andae, nune sonembedo na budo jebuga vasada fitiri jebuguseni.
- <sup>20</sup> Na ari dambu use irá gheraena, andae, BAJARI nandae mino eveva muturaira.  
Namokena kosasa jo tambaeri, ágido na esimbugusira.
- <sup>21</sup> Na BAJARI da Agho Dari rea resira ava useni.  
Na nanda God kena jo ari eko eni edo, gukai mutaeri.
- <sup>22</sup> Na nunda Agho Dari rea resira isambu kaifa useni. Na nunda sari eni jo kosasaghaeri.
- <sup>23</sup> Na ari eko eni jo ae eraena amo, nu kasamari.

\* **18:10:** Tamo foyagoda geke etoto naká *seraphim* nengae *cherubim* irira. Ne avose aneyada mendeniri. Ne fakina kakatori. Nenda irari mo, ne God da dombuda irá geraera. Ezekiel tano dabako aminda, a tano ghabu soveni soveni aminda tegutuse *cherubim* da kau itako kasama arera. Ava edo, namonde geke mendeni Amboda Sirorari aminda tamburaera, ava kotarera. John nunda gekai tano 4 aminda *living creature* gefusira. Korafe geke aminge sarera amo, namonde *sifo fuka da eni* kotaeteri, tano. Avata, *seraphim* nengae *cherubim* ghae jo sino fuka irara. Ne God da geke ningia, mino bekami seraera, a nunda uju ava eraera. Ava sedo namane Amboda Sirorari aminda geke *serubim* gembudo ghuseri. Avori, Baibel jokada *serapim* vasa dabako tamburaera, Isaiah tano 6 aminda irira. Ne God da dombuda fetedo nundae sakai sise irera, a nunda uju use irera. Ne ajagha, *cherubim* ajagha, aĩ daba avori. Namonde jo gi gogogombae irera. *Cherubim* aminga ava, ne God da dombuda fetedo nu kakara use unda uju edo gherera. A Korafe gekami javo etoto naká da duka utuako bekári. Ava sedo, namane *seraphim* nengae *cherubim* ghae kotise geke dabako *serubim* gefuseri.

- Amo na tofo ari sembae ari ava reeta eraena.
- 24 Na ari dambu use irá gheraena aindae, nu nandae mino eveva muturaira.
- Ai resira amo, na dara jo ae eraena, nu kasamari.
- 25 Arie BAJARI, evetu genembo mave ni tumonduse irá gheraera, nemokena ninda beka gajari ava eraesa.
- Nimokena mave bekáda bekáda use, irá gheraera aikena, veka eveva eraesa.
- 26 Mave da irari forosogo beká ava irarira aikena, ni kavevera beká eraesa.
- O genembo mave aito eko fugeraira aikena mo, ni aito fugari eko beká eoso itatama eraira.
- 27 Ni tumbari embo ava sonemberaesa,  
o ivuga use tofo sakai seraera amo, eoso tumberaera.
- 28 Arie BAJARI, nine nanda tumba emo jighi tonenembedo, nanda usasa muturaesa.
- 29 Gitofu nanjogo irera, ava daono dae sise, fakina nine muturaesa. Kotugo, gitofu da furu jarigari da fakina barago, nine muturaesa.
- 30 God emo nu rea eraira amo, dambugo bekári!
- Nu rea seraira, ainda beká siroreraira.  
Mave numokena junge feteraera, ainda bere mo, numori.
- 31 BAJARI nusukako numoa God ri, eni tefori.
- Namondeda sorega mutari kato, God nusuka numori.
- 32 God nune eari, na fakina eraena. Nune eari, na emboroda kotae kotae ya foa gheraena.
- 33 Nune eari, na ata fete simbuger-aena.  
Nune kaifa urureari na doririda jebuga deingheraena.
- 34 Isoro tataya aono dae sedo, nune na ijugeraira.  
Feva auri ari ava jighi otombedo goroba afari da aito ava ijugeraira.
- 35 Arie BAJARI, nine gagara use, na sonembusesi.  
Na kaifa eso, binode edo irena. Ninda fakina tomanakoimi namoa kosegiri irena.
- 36 Na ondi kosege sandaetera ava, nine tavo eso, na jo gofae useni.
- 37 Nanda gitofu ondi sandi bambu tefo edo, isambu deteno sirivu useri, eni jo doyono jebuga yae usira.
- 38 Nane ne deteno du fafasusera amo, sekago jo erae arera.  
Nanda dombuda du ambu fafasedo irera.
- 39 Nine isoro ari da fakina ava, namokena futusesa aimi, gitofu de atai fati fefetuseni.
- 40 Nine eoso, nanda gitofu na do sumburaera.  
Mave na imboe gambue usera ava,  
nane de sosighi useni.
- 41 Ne sonembadae koko siseri, avata mave jo sonembari jebugae useri.  
BAJARI kena kori siseri, avata nu jo ningae usira.
- 42 Ne fati jaseteno, kau fonja yauraimi fuseari ya dadaberaira, ainda kaugo useri.  
Ne, kau emboroda tauya fatiraera, aminga ava useni.
- 43 Evetu genembo gogore kakato eredo, namoa dari dae kotisera ainde isoro eno, na sonembeteso jebuguseni.  
Nine seteso na oro mendeni mendeni da bajari edo irena.
- Evetu genembo na berefoá isambu nanda sari ava eraera.
- 44 Teana embo nandae igheghi edo, nanda dombuda tumoi bainghuse, nane rea seraena, ava eraera.
- 45 Ne rojedo, ungo ata dadara garuse, nenda jungari vasa do buvuraera.
- 46 BAJARI evovo dae irira, nanda sorega mutari katodae sakai saore!  
God namo sonembeari jebuger-aena, ainda binó ava sakai



- sise, nunda javo jighono ikáda erare!
- 47 God nandae gitofu de atai fati fetari da fakina ava muturaira. Oro mendeni mendeni nune fi-tiari vosedo, nanda ata duruda irá gheraera.
- 48 Nune namoa gitofu kena sonembeari jebugeraena.
- Arie BAJARI, nine na gagara urureaso, nanda gitofu janje ekoko ari kakato de atai fati feteraena.
- 49 Ava sedo, BAJARI, na oro mendeni mendeni jokáda irise, nindae sakai seraena. Yaruimi didivuse ninda javo jighi eono ereraira.
- 50 God nune de atai fati fetari da fakina ava nunda kini dae muturaira.
- Kotugo nunda dubo bari ava,  
Kini David edo nunda imendi gamendikena evovodae ijugudo yaraira.

## 19

- 1 Utu enda God etiri sirorusira ainda jokáda, God da usasa iri eregosena!  
Nu kau nangega etiri sirorusira amo, isagha beká iri eregosena!
- 2 Eri! Ungobu use tumba jireari, inua a damana janimberaira, a sifoghae sifo ate areghurureari ainda jokáda,  
na God da duro ava gosuse koteraena.
- 3 Iji, inua, a damana mo, geka vironu jo sae eraira.
- 4 Avata nenda duro, evetu genembo reda irera,  
isambu gi kasama erera.
- Utu mo, iji da irari vasadae God esimbugusira.
- 5 Iji da duro mo, kau gimasa nunda datu gagara unumbari dae sedo,  
gogho edo, kamboda ghe foa bu-vuraira, ainda kaugori.
- 6 Nu sovenikena vitido, ya jarige sovenikena voseraira.
- Nunda usasa a vevera mo, ave jo darigari da kaugo iraeri.
- 7 Bajari da Agho Dari jo sembae iraeri, isambu eveva vanembori.  
Ningarena amo, na ivugaghae irá ghedo gharena. Ningido tumondarena amo, na jo gofae arena.  
Genembo kotari tufako ningarira amo, jiro afigari dubo kotarira.
- 8 Bajari da Agho Dari isambu, beká avanembori.  
Na Agho Dari amo ningido amin-garena amo, na ivugaghae irá ghedo gharena.  
Bajari da Agho Dari amo, inono a dambu bekári.  
Kotarena amo, munju afigarira.
- 9 Bajari da tumonde bainghari mo, evevagori.  
Sifo ghousa, aminguse irarena.  
Bajari ijujeraira amo, nu inononda ategi eraira.  
Geka beká seraira amo, evovodae irarira.
- 10 Bajari dae uju use, mamaso ari mo, jo kau auri “gold” evevago a finje da firukago iraeri.  
Roera resena emo, kikitakori.  
Nu mindafu bekári.
- 11 Na ninda saramana katori.  
Na ninda Geka a Agho Dari tegarena amo, kotari seka sirorari barena.  
Ninda Geka jokáda rea resira ava arena amo, na jebugarena.
- 12 Na ari ekoko mendeni usena ava kotae edo, jo vujegae irena ava, nine giraesa amo, joka edo, kote doyaso dae resena.
- 13 Na tavo use buregururaso, erá eko eniimi foa dereuri, na gofedo gogore eone!  
Amingururaso, na ari eveva avanembo aone!  
Erá ari eko teria irira aimi, na unumbeuri eko beká ainda jokáda teredo ambeone!
- 14 Sonembururaso, na dubo kotise, geka eveva avanembo

sirurono ningido, ivuga  
aetesi!  
Arie, Bajari, ni nanda jebuga  
kaifa eraesa, a na sonember-  
aesa.

## 20

### *Gitofu Sosighi E Bari Da Benunuri.*

- <sup>1</sup> Namanenda kini (king), ni sifo reda  
dara jokada fetaresa, BAJARI ni  
sonembare!  
Namanenda abua Jacob da God tu-  
mondedo ghusira aimi, nimoa  
gitofukena  
kosege fetare!
- <sup>2</sup> Nunda Tafaroro Ari Kambo kakara  
aminda ghe sonemba nimo-  
kena mutare!  
Nunda sonemba ututu Saion\*  
aminda ghe mutari fuse, ni  
sonembare!
- <sup>3</sup> Nu, ninda fuyo erefutesa isambu  
eindae dubo eveva are!  
Kotugo, ninda sino fuka de ojedo  
joba dunguteresasambu ein-  
dae, dubo jama use ivuga are!
- <sup>4</sup> Ninda janje jokáda rea uju eraesa,  
edo rea ari dae koteraesa ava,  
isambu futururari beká siro-  
rare!
- <sup>5</sup> Nine gitofu dedo atai fati fetaresa  
aindae, namane ivugaimi  
fumbu aruguse,  
divu fusedo ghuse, namondeda  
God dae sakai saore!  
Ni rejudaes benunu saresa, ainda  
mino mutare!
- <sup>6</sup> Oroko ava na kasama erena, BA-  
JARI nunda kini gategusira ava  
sonemburureari gitofu de atai  
fati fetairaira.  
God nunda irari vasa kakara utuda  
irise ningido, nunda fakina  
tomanako ava futurureari,  
nunda kiniimi gitofu de atai  
fati fetairaira.
- <sup>7</sup> Evetu genembo mendeni mo,  
isoro sifoda nenda tumondari  
nenda founa ghasemo javo  
sariot (chariot),  
a nenda sino fuka javo hosi  
aminda fifituse irera.

\* **20:2:** Afige, geka eni Saion dae gefusera, tuturo 2:6 duruda tege, garesa!

- O namonde mo, gitofu dari da  
fakina bari dae sise,  
BAJARI namondeda God ava tu-  
monduse irera.
- <sup>8</sup> Mave tumondari nenda ghasemo  
sariot seraera,  
o nenda sino fuka hosi ser-  
aera aikena fitiraera, ne dudo  
gogofegarera.
- O namonde mo, ere fetedo, fakina e  
fetarera.
- <sup>9</sup> Arie BAJARI, namanenda kini  
sonembaso, gitofu de atai  
fetare dae resera.  
Namane sifo reda nimokena banun-  
garera, ningi!

## 21

### *Gitofu Sosighi E Rurusera, Ainda Sakai Sari Da Yaruri.*

- <sup>1</sup> Arie BAJARI, ninda fakina futusesa  
aindae, kini ivuga erira.  
Ni sonembeteso, gitofu sosoghi  
e rurusira aindae, ivuga  
tomanako beká erira!
- <sup>2</sup> Nunda janje jokáda rea uju usira  
ava futusesi. Rejodae benunu  
sisira ava, jo jighi jijinimbaeri.
- <sup>3</sup> Nu buvurutiri, ni ghaito tero  
fugutuse joba numo bekáimi  
esimbugusesi.  
Aminguse, kotofu da kekesa auri  
goldi (gold) numo beká aimi  
ari ava bu, nunda jiroda asu-  
gusesi.
- <sup>4</sup> Nu nimokena jebugadae benunu  
setiri, ni jebuga evovodae irari  
ava futusesi.
- <sup>5</sup> Ni sonembusesa aimi, nu duró  
usira. Nine sonembeteso, nu  
binó a duró budo irira.
- <sup>6</sup> Geka bekári: ninda esimbugari  
evovodae numokena irira. Nu  
ninda dombuda irira aindae,  
ivuga use irá gheraira.
- <sup>7</sup> Kini nu BAJARI Iká Bekáda ava tu-  
monderaira.  
BAJARI nu kini barago dubo  
buraira aindae,  
jo rejoimi nu derari durae arira.
- <sup>8</sup> Nunda gitofu isambu sandi barira.  
Natofu numokena osogo futo

- use irera isambu sandi bambarira.
- 9 Numo buvarira da sifo aminda ne avaraka bubura da vevera aimi dungari avarera.
- BAJARI, janje eko edo, avaraka mutari, ne avarira.
- 10 Kini nune, nenda sasingu isambu dari sirivo e tefo arera.  
Enda eminda nenda imemesiri gamemisiri ava eniko jo irae arera.
- 11 Kotugo, numokena osogo use, kotari ekoko ava manaka gayeraera, avata beká jo sirorae arira.
- 12 Nunda feva aimi nemokena afari gido, ne jovereghe oju sumbarera.
- 13 Arie, BAJARI, ninda fakina tomanako aindae, ni jighoro eraresa.  
Namane ninda fakina aindae sakai sise, yaru divarera.

## 22

### *Genembo Eni Nu Mema Bouvu Jokáda Ireira, Avata Nu God Kena Sakai Sisira.*

- 1 Nanda God, nanda God, redae na dotutusesi? Namu sonembaso dae sorara janjagughae use janje gagojusira,  
avata ni redae na jo sonembaeri?
- 2 Arie, nanda God, na ijighae nimokena kori seraena.  
Avata, nanda kori jo ningae eraesa. A na tumbaghae barago kori sise, jo avae eraena.
- 3 Avata Kini kakarago beká nimori.  
Israel embo nindae sakai sise, ninda javono gatise jigheoro eraesa.
- 4 Namanenda abua mane nimoa tumondedo ghuseri.  
Nenda tumondari nimokena fititureoro, nine sonembeoso jebugedo ghuseri.
- 5 Ne dara jokáda fete irise, nimokena seoro, sore bu esike ya ghedo ghusesi.  
Nenda tumondari nimokena fititusera, aindae beká siroretiri ivuga useri.
- 6 O namoako mo, jo genembo iraeri, sivorro da kaugori. Evetu genembo isambu namoa gi sari futo use dere jiraera.
- 7 Evetu genembo mave namo giraera amo, ne  
isambu namoa dere jise, aviva sanambughuse gifo  
gitorotoro eraera.
- 8 Gegha jise seraera, “Genembo nunda bouvu mema BAJARI kena ffituse,  
gaiga numokena gayeraira, nangetirai jo sari jebugaeri? BAJARI nundae ivuga ariá seraira.  
Nangetirai nu sonembaeri?”
- 9 BAJARI, bebede ninda sonemba namokena emingusesi!  
Namu nine aya da tini jokáda bu fesa jebuga siroruseni. Kotugo, na ami rise ireno, nine tavo eso babojuseni.
- 10 Na sirorusena ai tano, nanda gaiga nimori, kotugo God na sifo ghousa tumondudo refena amo,  
nisuka nimori.
- 11 Dara buvari dae erira. Erá na do darige esike yeose! Mave eni na jo sonembae arira.
- 12 Nanda gitofu kau burumakava da kandana aminga aimi na gayari dae erera.  
Namo nene jimbe birurugheteri, kau burumukava babaigo Basani Frovensi iritirira, aimi ari gerera.
- 13 Nenda beka fafangegerera ava kau laioni (lion) imi oka bayau budo gangara sise,  
gambu torere tarere gheraira, namokena amingerera.
- 14 Nanda fakina dadabetira. Kau uvu endáda averegari getira.  
Nanda etu isambu didisugaetira, aminga ava, nanda kotari dadabetiri, bune jarutuse irena.
- 15 Nanda fakina kikisa gharaseraira aminga ava dadabetira.  
Nanda aviva saghedo viti beka ikáda takegha erira. Amingiri,

- namoa ambono dae fonjada fuge dotesi.
- 16 Gegenembo ekoko aimi na kosege, sino maneimi ariguse, nanda ungu ata gae babasigerera.
- 17 Nanda tamo jokáda etu isambu tege tefo ari inonori. Nanda gitofu namoa tataseguse irera.
- 18 Ne nanda tamo asugari dae kikin-doro garuse soroé barera.
- 19 Arie, BAJARI, erá na do esike yeose! Tavaraghe fu, na sonembase!
- 20-21 Gitofu amo isoro da kaiyaimi na jaoro ambono dae eraera aikena, na sainghimbe bu!  
Mendeni gambari sino o laioni (lion) da kaugo namoa gambari dae use irera.  
Mendeni, burumukava kanda aminga ava na kor-  
eimi gayari dae use irera.  
Namokena nenda dombuda fak-  
ina tefori. Ágido, na sonem-  
baso jebugaone!
- 22 Aso, na nanda natofo da dombuda nindae sakai sise, ninda javo jighono erare!  
Na natofo totorugarera ainda jokáda ere fetedo, nindae sakai sise, ni rea usesa ava osa sarena.
- 23 “BAJARI da saramana kakato, nemokena resena, nundae sakai sevu!  
Jacob da imendi gamendi numoa kakara evu! Natofo Israel embo numoa tumonde bainghevu!
- 24 Nu mave mema aimi jarutuse sorara eraera ava, jo imboe use, gi gagairego ae eraira.  
Nu nemokena gukai mutarigo itako jo ae eraira.  
Nanjigo sonemba dae kori seraera amo, nu ningido sonemberaira.”
- 25 Beká resena, natofo ninda dombuda totorugururoro, ainda jokáda na ere fetedo, ni rea usesa,  
aindae ninda javo jighono erarira.  
Natofo nimoa tumonde baingheraera ainda dombuda,
- na ere nimokena sino fuka rea joba mutari beka gagojusena, ava futuse dungono avarira.
- 26 Amingaono, makasi embo nenda uju ava inonoda mindarera.  
Mave BAJARI uju use foa totorugarera aimi, nundae sakai sarera. Nenda janje joká ivugaimi bedo are!
- 27 Endada evetu genembo BAJARI kotae usera, aimi sekago kotarera.  
Evetu genembo utu gambari utu gambari irera, aimi jovereghe numokena furarera.  
Endada oro oro isasambu numoa tumonde bainghedo gharera.
- 28 Ainda beká mo, reighi isasambu da kini mo, BAJARI numori. Ne isambu nune kaifa eraira.
- 29 Gogore kakato endada irera isambu aimi numokena tumoi baingharera.  
Kotugo, evetu genembo endada irera isambu nébarago, numoa tumonde baingharera.
- 30 Maveju maveju sifo amboda siro-rarera, nébarago numoa tumonde baingharera.  
Ai resira amo, evetu genembo oroko irera aimi BAJARI da binó ava nenda sasingukena siruroro ningido,  
nenda imemesiri amboda siro-rarera aikena, osa saoro ningarera.
- 31 BAJARI nange nunda natofokena jebuga futusira ava, evetu genembo amboda sirorarera, aikena barago,  
nene osa saoro ningarera.

## 23

### *Namondeda Kaifa Kato Eveva, BAJARI Numori.*

- 1 BAJARI nu nanda kaifa katori, namokena isambu inonoda muturaira.
- 2 Nu nundae vasa eveva simbugeari janguteraena.

- Janguteono, nanda Giti Jighari nune nanda emboro ava ijugeraira.
- <sup>3</sup> Emboroda, uvu bayau futurureari, jebuguse dubo jama eraena. Na nange nange ari eveva aetena ainda emboro ava ijugeari, aminda irureono natofo fuge gido, nundae sakai seraera.
- <sup>4</sup> Na aminguse, ambari dae use, tumba da fakina aindae jo oju ae arena. Ainda beká mo: ni nangae dabade deinghaeraera. Nanda ambari da sifo aminda, sonemba eveva mutaresa.
- <sup>5</sup> A eni mo: nanda gitofu da uju ekoko ava bureguse, na unumbedo seaso, nenda dombuda ninda kirumo mindiraena. Na ivuga eraena. Na furureono gido, na ategi use, usu da mukaimi nanda jiroda averegeraesa aindae sedo, na ivuga beká ava eraena. Namu esimbuguse, ninda sonemba a dubo jama muteaso foa, nanda dubo jokáda vasa bedo edo fumbu fetare!
- <sup>6</sup> Geka bekári. Na endada irono, ni na tavo use kavevera ururaso, ninda kamboda irá ghedo gharena.

## 24

*Kini Durode A Tomanako Beká Mo, BAJARI Numori.*

- <sup>1</sup> Reju endada irira isambu BAJARI da tofori. Endada mave irira nébarago isasambu nunda fitariri.
- <sup>2</sup> Enda mo, kafuru irira ainda etoda simbugetiri aminda ghedo vivitusira. Enda da susu nune eva jokáda dadurusira.
- <sup>3</sup> BAJARI da doriri ominda mave vitiyari da kaugori? Nunda banungari kambo kakara ominda mave ya terari?
- <sup>4</sup> Mave nu aito fugarikená a kotarikená kosasa jo ae eraera.

Mave beka gajari jo tefo tefo ae eraera.

- A mave god beká irae jo tumonde bainghae eraera aimi ya terarera.
- <sup>5</sup> BAJARI ne esimbuguse nemokena nunda jebuga mutarira. God kotua gatise, nendae “eveva” sarira.
- <sup>6</sup> Evetu genembo God kena foa gheraera, Jacob da God tava edo nunda dombuda feteraera nendae resena.
- <sup>7</sup> Guro tomanakoó fugevu ya afige fetare, guro anakora itero irira amo, dovu afige fetari, Kini (king) teria durode foa terare!
- <sup>8</sup> Kini teria durode resera emo, mavejori? BAJARI fakinago a Iká Bekáda numori. Isoro tataya jokáda gitofu de atai fati feteraera, amo numori.
- <sup>9</sup> Guro tomanakoó fugevu ya afige fetare, guro anakora itero irira amo, dovu afige fetari, BAJARI teria durode foa terare!
- <sup>10</sup> Kini teria durode resera emo mavejuri? BAJARI isoro kakato da giti jighari, Kini teria durode amo, numori.

## 25

*BAJARI Nu Nange Emboro Ijuguse Tavo Aetira, Ainda Benunuri.*

- <sup>1-2</sup> Arie, BAJARI, na nimokena benunu sise resena: arie God, na ni tumonderena. Meka geono dae sise, na sonembaso dae resena. Erá doyeóso, gitofui na dedo ivuga use gegha jiriore!
- <sup>3</sup> Mave ni tumonderaera amo, ne meka jo gae arera. Avata, nimokena mave osogo futo arera, ainda evetu genembo ne meka garera.
- <sup>4</sup> Arie, BAJARI, ninda emboro eveva ijugaso gaone!
- <sup>5</sup> Ninda geka da beká ava ijugaso, ainda amboda amboda aone! Ainda beká mo, God namokena jebuga mutarira, amo nimori. Na sifo

- ghousa evia nimoa tumonderaena.
- 6 Arie, BAJARI, ninda kavevera a dubo bari ijugudo refesa, ava kotedo sekago amingaso dae resena.
- 7 Ninda dubo bari evovoda udo refesa, kotugo ninda veka eveva udo refesa ava kotise, na nange babojuse ari ekoko use, kosasaghudo fusena, ava nandae kote doyasoda dae resena.
- 8 BAJARI nu dambugo a evevatori. Ava sedo, ari ekoko embo emboro ningi aminda yaetera, ava nune ijugeraera.
- 9 Tumbari embo ava giti jijighuse bu emboro evevakena ise, nunda uju ava nemokena ijugeraera.
- 10 Mave nunda evovo sari ava use, nunda Agho Dari kaifa eraera, kotugo nu rea sisira ava use irera ava, ne nune dubo ruruse, giti jighiraera.
- 11 BAJARI, ninda beka gajari kaifa use, nanda ari ekoko kote do! Ai resira amo, nanda ari ekoko digarigori.
- 12 Mave BAJARI igheghi eraera ava, nune kaifa use, emboro ningi aminda yaetera, ava ijugeraera.
- 13 Evetu genembo amo susu iti fafode edo evovoda aminguse irarera. Amingururoro, nenda sasingu enda evia nenda tofoda barera.
- 14 BAJARI, mave igheghi eraera, nemokena nune komana edo nunda evovo sari da beka ava ijugureari ningiraera.
- 15 Na sonemba BAJARI kena bari dae gigiturureono, nune na sifo ghousa evia dara memaghae da jokada saghimbe buraira.
- 16 BAJARI, jovereghe namoa gosuse, nandae joka e! Ai resira amo, na bate beka use eregofena.
- 17 Mema namokena refira ava baji tomanako beka etira, ava saso dubo jama aone!

- Kotugo, na mema bouvu itatama eraena ava, bu fugaetesi!
- 18 Nanda ghama vevera a bouvu mema itatama eraena ava kotise, nanda ari ekoko isambu kote do!
- 19 Nanda gitofu nanjogo irera ava fuge gi! Na imboe gamboe beka eraera, ava gasoda resena.
- 20 Meka geone dae sise, na nimokena ambo sose fefetururono, na gagara edo sonembuse, kaifa asoda resena.
- 21 Na nimoa tumonduse, nanda aito eveva fugeraena, a nanda beka beka beka seraena aindae, na gagara e!
- 22 Arie, BAJARI, ninda natofo Israel embo dara itatama eraera ava, sonembaso dae resena!

## 26

### *Genembo Kosasa Tefo Ainda Banungariri.*

- 1 Arie BAJARI, na kosasa tefori, na jo mana managhae ni tumonda eraena. Ava sedo, nandae "eveva" saresa.
- 2 Arie BAJARI, nanda ari rea eraena ava, ijujedo na dere gi! Nanda janje jokada rea uju eraena, a reju koteraena ava ijuje gi!
- 3 Ninda dubo bari evovoda irira aimi, nanda emboro isagha erira. Ninda beka beka tumonduse deingheraena.
- 4 Na jo derari kakatode tatae eraena. Kotugo, evetu genembo nenda gunguboimi natofo dereraera ainde dabade, jo anumbedo umo gaumo ae eraena.
- 5 Na ari ekoko embode tatari beghagha eraera, kotugo ari ekoko embode jo anumbedo umo gaumo ae eraena.
- 6 Arie BAJARI, na jo dara embo irae ava ijuguse, nanda ungo seghedo viti ya ninda olta dombuda yaru divari jokada tere ya foaghuse,

- nimoa tumonde baingheraena.
- <sup>7</sup> Aminguse, na aiyakoe sise yaruimi didivuse, nine ari eveva gaveva ututeraesa, ava isimberaena.
- <sup>8</sup> Arie BAJARI, ni kambo eminda ireaso, ninda fakina duroghae isagha eraira ava na dubo bu gogoghombraena.
- <sup>9</sup> Ari ekoko embo a kotugo kokomana de babarigari kakato daso amboroda aresa, ainda sifoda, na erá deose!
- <sup>10</sup> Evetu genembo resena amo, ne evovoda ari ekoko use, komana da mendo bari dae sise ufena moni muturaera.
- <sup>11</sup> Avata nasukako namo jo amingae eraena, na emboro sokumako a dambugo beká aminda yari dae inini eraena, ava sedo nandae joka use na sonembaso jebugarena.
- <sup>12</sup> Na vasa evevada fetirise daradae jo oju ae eraena.  
Nunda natofo tafaroro ari dae totorugururoro, na jokáda ere fetedo, BAJARI dae sakai sarena.

## 27

### *God Dae Sakai Sari Da Banungariri.*

- <sup>1</sup> Bajari nu nanda usasa a nanda sonemba ava, nune edo irira.  
Na jo mavedae oju ae arena.  
Dara dombu eni dombu eni namokena foa ghaetira avata, Bajari nune kosegedo na sonembeari, sifo evia inono na jo oju ae eraena.
- <sup>2</sup> Ari ekoko embo isoro ari dae beje buvudo, namo dari dae kato eraera amo,  
ne ata dimbeari duraera.
- <sup>3</sup> Isoro embo dabade tatedo isambu aimi, foa na jimbe birurughera amo,  
na jo oju ae arena, na taká God tumonduse irarena.
- <sup>4</sup> Roera dabako aindae, Bajari kena benunu sido refena.

- Dabako aindae, na uju beká ava eraena.
- Amo eviri. Na nange enda eminda jebuga irise,  
sifo ghousa Bajari da kambo iraeteni!  
Aminguse, na nunda eveva ava itatamuse, benunu saono, nu nandae dengoro indaeti!
- <sup>5</sup> Dara da sifoda, nune gagara ari, na numokena ambo sose fetarena.  
Nunda Kambo Kakara aminda, na kaifa ururari eveva irarena.  
Na kaifa use, nune na ghamana mindafu ainda etoda fitari fetedo, gitofudae jo oju ae arena.
- <sup>6</sup> Aminguse, nanda gitofu namoá jimbe birurugheraera ava, nane dedo atai fati fetarena.  
Na ivuga use koko sise, joba nunda Kambo Kakara jokáda mutarena.  
Na yaru didivuse, Bajari dae sakai sarena.
- <sup>7</sup> Bajari, na kori nimokena sarena amo, ningaetesi!  
Nanda benunu ningido, joka edo mino use sonembaetesi!
- <sup>8</sup> Ni eminge sisesi, “Fu, nandae tumonde bainghase!” aminge sisesa amo,  
nanda ghamo eretiri, mino eminge siseni, “Bajari, na erenare!”
- <sup>9</sup> Erá namokena jungeose!  
Erá namokena janje eko eose!  
Erá dirigeóso ninda saramana kato esike yeure!  
Arie, Bajari, nanda sonemba kato, ni nanda sonemba edo iriasi.  
Erá oroko na dodo dumbudo yeose!
- <sup>10</sup> Nanda aya afa na dodo dumbudo yarera,  
avata Bajari mo, nu na kaifa use irarira.
- <sup>11</sup> Bajari, ninda uju, na rea aono dae seraesa ava, namokena ijugaetesi!  
Ijuguse, giti jijighururu, erá nanda gitofu digari foa namo tambeore dae sise,

- nangae emboro evevada deing-  
haore!
- 12 Erá na doyeóso, gitofu nenda uju  
namokena eore!  
Ainda beká mo: nanda gitofu foa  
nandae gungubo sise,  
namokena katiyavara eraera.
- 13 Na kasama erena, na jebuga irono,  
ni kavevera ururaso,  
na gosuse irarena.
- 14 BAJARI tumonduse irivu!  
Numoa tumonduse, erá  
bunarigo eove!  
BAJARI tumonduse irivu!

## 28

### *Sonembada Banungariri.*

- 1 Arie BAJARI, nanda sorega kato,  
nanda kori ningaso dae re-  
sena.  
Erá dengoro gajeose! Ai resira  
amo, nanda kori mino jo sae  
aresa amo,  
na ambudo natofo amomon-  
jegedo irera, aminga ava edo  
irarena.
- 2 Na sonemba dae sorara erena,  
ningi! Na nanjigo benunu sise,  
ninda vasa kakara ava fuge  
gosuse, ungo jighono erarira  
amo, nanda kori ningi!
- 3 Erama eóso, evetu genembo ekoko  
mave tefo bekaimi nano na-  
mendide eveva irari da geka  
sise, nenda janje joká mo  
imboe gamboe ari ava irira,  
ainde dabade ambeóne!
- 4 Ne reju eraera, mino ava mutu  
baore! Nenda ari ekokoda  
mino mutu baore!  
Nenda ari reju eraera, ainda  
mino beká ava mutu bu  
ghamo baore!
- 5 BAJARI rea usira, a rea etiri  
sirorusira ava, evetu genembo  
amo ne beká irae ariá koter-  
aera.  
Ava gido, BAJARI ne dari sirivo e  
dadabarera.

- 6 Na sonembadae kori seteno  
ningusira andae, BAJARI  
dae sakai saore!
- 7 BAJARI mo, nanda bereri. Namu  
gagara use, kosege feteraira.  
Nanda tumondari isambu  
numokena futurureono na  
sonemberaira.  
Nanda janje joká ivuga use  
yaruimi dubo jeuro use, sakai  
seraena.
- 8 Nunda natofo da fakina ainda susu  
mo, BAJARI numori. Nunda  
kini gategusira ava, gaga
- 9 Arie BAJARI, evetu genembo ninda  
tofo ava esimbuge! Ne nine  
kaifa use, tavo ururaso, evovo-  
dae irore!

## 29

### *BAJARI Da Beka Duka Mo, Borija Biria Barara Amingori.*

- 1 Ne maveju maveju utuda ireva,  
nemokena resena: BAJARI dae  
sakai sevu!  
Nunda duró a fakinadae sakai  
sevu!
- 2 BAJARI da Javo durode andae sakai  
sevu!  
God kakarago beká ai fururari  
garesa amo, nunda dombuda  
tumonde bainghevu!
- 3 BAJARI da beka duka mo, evada  
sirurari ningarera.  
God durode ainda beka  
mo, barara evakena fugari  
tatarigho ningarera.
- 4 BAJARI da beka duka fakina a  
duroghaeimi sirurari ningar-  
era.
- 5 BAJARI da beka dukaimi ika saoro\*  
ava dari jorarira,  
Lebanon da saoro barago nunda  
bekai dari jorarira.
- 6 Nunda bekaimi fugari, doriri  
Lebanon Frovensi aminda  
dadaragaruse,  
borumakava mandiimi joru-  
jorugharigo urureari,  
Doriri Hermon mo, borumakava  
kandana seka bajariimi

\* 29:5: Eminda ika saoro resira, mave Psalm 29 gefusira, nu jo saoro gembae. Nenda reighida ika eni javo cedar gefusira. Cedar mo, ika mindafu fakarago a garigori. Kini (king) Solomon ika cedar aimi God da tafaroro kambo itutusira.



- vurari garira.
- 7 BAJARI da beka dukaimi fugari, biria tarigharira.
- 8 Nunda bekaimi sari reighi evetu genembo a uvu iraeda vasa dara gharira, kotugo reighi uvu bayau iraeda vasa Kadesh aminda dara gharira.
- 9 BAJARI da beka dukaimi ari ika odemo† ava jajovururari, nunda igi dore vosarira.
- Aminge ururari, natofo nunda kamboda irera aimi koko sise, “Arie God Da Duro sirorerira evia, givu!” sarera.
- 10 Usegha gisi mo, BAJARI nunda tofori. Nune king edo, evovodae kaifa use irarira.
- 11 BAJARI nunda natofokena fakina futuse, nunda dubo jama aimi ne esimbugarira.

### 30

#### *Aiyakoe Sari Da Banungariri.*

- 1 Arie BAJARI, nine na sonembeteso jebuguseni. Ni jo aso, nanda gitofu na bu nenda gegha yarukena fitaeri. Aindae na sakai sise, ninda javo jighono erare!
- 2 Arie BAJARI, nanda God, na nimokena sonembadae sorara eteno, nine eteso nanda kae dadabusira.
- 3 Nanda dangio uro bekada ghe saghimbe rurusesi. Na janje dodo ambari emboda bako jokáda vosari dae itako useni. Avata nanda dangio nine dirigeteso, sekago jovereghe fusira.
- 4 Arie God da natofo kakara, nemo-kena resena. “Yaru didivuse sakai sevu!” God kakara, nunda ari rea usira, ava kotise, nundae aiyakoe sevu!

- 5 Ainda beká mo, nu janje ekoko jo ghousago ae eraira. Avata, nu sifo ghousa kavevera use, irá gheraira.
- Tumbaghae jivu gutarera, avata sifo atarira amo, dubo jama tambarera.
- 6 Na fakina budo nasukako siseni, “Na jo itako gofono de atai fatae arera.”
- 7 Arie BAJARI, namokena veka eveva edo ghusesi. Na nine eteso, doriri susu gambu fefetusira, aminga ava useni. Avata ainda amboda ni tofo jungeteso, na gae irise, oju useni.
- 8 Arie BAJARI, na mema use, nimokena benunu siseni. Nandae joka edo sonembaso dae sise, eminge siseni.
- 9 “Na jo sonembae aso, ambono furugarera amo, nimokena eveva eni rea sirorari baetesi? Ambari embo jo nimokena sakai sari da kaugo iraeri. Kotugo, ne ninda kavevera eraesa aindae, itako jo osa sae arera.”
- 10 Arie BAJARI, na resena evia ningido, nandae joka aso dae resena! Arie BAJARI, namo sonembe!
- 11 Na to rovarova usena ava, nine bu fugeteso divu fusedo gherena. Nine vujeteso, ivuga use atai fefeterena.
- 12 Ava sedo na jo itako beka dodo irae arena. Na beka afigedo, nindae sakai yaruimi isimburse irarena. Arie BAJARI, nanda God, nimoa tumonde bainghuse, evovodae nindae aiyakoe sise irá gharena.

### 31

#### *Mema Jokáda Irise God Da Sonembadae Tumondaore!*

- 1 Arie, BAJARI na ambo nimokena sose fetari refena.

† 29:9: Eminda ika odemo resira, mave Psalm 29 gefusira, nu jo odemo gembraeri. Nenda reighida ika eni javo oak gefusira. Oak ika fakara einri. Kambo itari da ika eveva eniri.

- Erá doyeoso, gitofuimi na dere-ore!  
 God ari dambu beká ari kato nimori, ágido namoa gitofukena bu darige!
- <sup>2</sup> Na nange resena ningi!  
 Oroko nembo tavaraghe fu, sonembaso jebugaone!  
 Nanda ambo sose fetari vasa nimori, ava sedo na gagara e!  
 Nanda sorega kato aso jebugaone!
- <sup>3</sup> Beká resena, nanda ambo sose fetari vasa, a sorega kato nimori.  
 Nine nanda emboro ijuguse, giti bu iruraso,  
 yaono dae beka gagojusesi. Amin-guse, iruru yaone!
- <sup>4</sup> Erá doyeóso, vagho nanda bega se ffitusera, aminda yeóne!  
 Ainda beká mo, nanda jungari vasa nimori.
- <sup>5</sup> Tofo nanda jebuga nine tavo aso dae sise,  
 ninda ungodá fifiterena.  
 Arie BAJARI God, ni rea seraesa, ava eraesa.  
 Ava sedo, na sonembaso jebugarena.
- <sup>6</sup> Evetu genembo ove mane a god beká irae  
 tumonde bainghuse irá gheraera ava,  
 ni gari beghagha beká eraesa.  
 Avata namo, nanda tumondari BAJARI nisuka nimokena fiftuse irá gheraena.
- <sup>7</sup> Ninda dubo bari teriágo aindae, ivuga use, riria arena.  
 Na mema itatama urureono, ni giraesa.  
 Nanda ghamo jokáda bouvu itatama eraena, ni kasama eresa.
- <sup>8</sup> Ni na jo doyasó gitofui sandi bu yaeri.  
 Na emboro evevada fiteso, dubo jamaghae ya foa gheraena.
- <sup>9-10</sup> Arie, BAJARI, nandae joka e! Ai resira, na dara beni.  
 Na sorara teria futo use, diti kokoi edo yaya resira.
- Nanda etu jorujara ghetiri, gevei use, ambari dae urogho erena.  
 Ainda susu mo, nanda irari isambu memai janje gagojuru-rari,  
 na jivu menjuga gutise, gofeteni.  
 Na dubo mema use, fakina dadabebetiri rojeteni.  
 Na geveiiimi etu goghorogo erena.
- <sup>11</sup> Nanda gitofu isasambu, kotugo mokogo mo nanda nano namendi barago nandae seraera, “Foká tamonda!”  
 O nanda kokomana mendeni na emboroda tamburaera, nandae oju sumburaera.
- <sup>12</sup> Ambari embo kotae eraera aminga ava, evetu genembo isasambu na kotae useri.  
 Namoa kau sena fugari guseri.
- <sup>13</sup> Beká resena, nandae gitofu use, isi basi sirureoro ningiraena.  
 Tingu tanga isambu gitofu vanembori.  
 Ne nandae osogo use, namoa ufena daoro ambono dae manaka eregarera.
- <sup>14</sup> Avata, BAJARI, nanda God nimori.  
 Ava sedo, nanda tumondari isambu nimokena fifiterena.
- <sup>15</sup> Na sifo ghousa ninda kaifada irá gheraena. Namoa sonembedo, nanda gitofukena bu darige! Mave nandae mema erefutura aikena, bu darige.
- <sup>16</sup> Na ninda saramana katori. Nandae mendo vivi use, kavevera e!  
 Ninda dubo bari udo refesa aimi, na sonembe jebugaone!
- <sup>17</sup> Arie, BAJARI, ninda sonembadae kori resena. Ava sedo, erá doyeoso na meka geone!  
 O ari ekoko embo mo, do meka gaore! Nenda beka jighi gotaso guga use ambudo,  
 ambari embo da vasada yaore!
- <sup>18</sup> Gungubo kakato isasambu da beka jighi gotaso guga aoro dae resena. Na, ivuga kakato mave meka irae tamoi tamoi use, evetu genembo eveva dere

- jise, jijivu seraera, aindae re-sena.
- 19 Arie, evetu genembo ni igheghi use, irá gheraera ainda e simbugari eveva nanjogo fiteso irira!  
Amboda mutaso barera.  
Ninda natofo ni tumonderaera, ava nine gagara edo tavo use nemokena eveva eraesa ava, evetu genembo isambu kasama eraera.
- 20 Evetu genembo mendeni ninda natofo daoro amboro dae manaka gayeraera aikena, nine bu, ninda jungari vasada fitaresa.  
Gitofuimi nendae jijivu ekoko saetera aikena, ne nine bu darigedo, ninda sasoro eveva aminda jungaresa.
- 21 BAJARI dae sakai saore! Gitofui na dari dae sedo,  
jimbe birurughusera, avata, nunda dubo bari tomanakogo bekáimi  
namokena ijuguse, na sonembetiri jebuguseni.
- 22 Na nune ondari nunda dombu do darigariá kotise, oju useni.  
Avata, nunda sonembadae kori seteno ningido sonembusira.
- 23 Mave BAJARI tumonderaeva, nemokena resena ningivu!  
Numoa dubo buvu! Evetu genembo numoa tumonderaera ava BAJARI nune gagara eraera.  
O ivuga kakato, aikena reju baetera, ava mutarira.  
Amo nu mema mutari itatamara.
- 24 Ne maveju maveju BAJARI gigituse ireva, nemokena resena.  
Ghamo gambari fakina eve!
- Mave dara aoro gido, BAJARI kote dotutuse mino mutari jo sae arira amo,  
nembarago dubo jama use ivuga arera.
- 2 Genembo maveda ari Bajari jo ijujuse,  
nunda dara jo tava ae arira amo, nu ivuga arira.  
Mave nunda komana jo itako de-rae eraira amo, nu ivuga arira.
- 3 Avata namo, nanda ari ekoko jo vujegae irise,  
na isonga numberu sorara jan-jagughae use iriana, tamo ro-roghotetiri sifo dadabusira.
- 4 Bajari, sifo a tumba evia inono, nine na deaso nanda fakina dadabe gogoghombedo ghusira.  
Kau borija da sifo aminda, mungo voseari iji totoí aveari kaingheraira aminga ava, nanda fakina dadabusira.
- 5 Dadabetiri, nanda ari ekoko nimokena vujeguseni.  
Nanda ari sembae ava, jo jungae useni.  
Nanda dubo jovereghetiri, nanda ari ekoko nimokena vujegeteno ningido,  
ni nanda ari ekoko isasambu kote dotutusesi.
- 6 Ava sedo, kau nimokena banungusena aminga ava,  
ninda evetu genembo tumondari kakato dara jokáda fetirise itatamarera amo,  
nimokena banungaeteri.  
Amingarera amo, dara kau usegha gisi aminga ava foa nemokena bejarira amo,  
ne jo derari itatamae arera.
- 7 Ni nanda tere jungari vasa fakaragori.  
Ni na sonembeaso, dara da mema eniko jo itatamae eraena.  
Ni na gagara easo, na nimokena ambo sose feteraena ava sedo, na beka fainghedo, ninda sonemba ava kotise, yaru divuraena.

## 32

*Namonde Da Ari Ekoko God Kena Vujegedo, Kote Doyare Dae Saore!*

- 1 Evetu genembo maveda ari ekoko BAJARI kote doyeraira amo, ne ivuga beká ava arera.

- 8 Bajari eminge resira, “Ni reda yaetesa ainda emboro ava nane ijugaono garesa. Na ninda dengoro induduse, emboro eveva ijugarena.
- 9 Erá gogore ease! Hosi (horse) o sino fuka ‘mule’ seraera, ainda kiki mo eviri: nu kotae kotae eraira. Ava sedo, ninda uju ava are dae sedo, auri nunda bekada dighido fakinaghae jumbaso, mema itatamuse, ninda uju aminda yarira. Erá hosi (horse) da gogorego ease!”
- 10 Ari ekoko embo nenda dara da bouvu ava fumbarera, avata evetu genembo mave BAJARI tumonderaera amo, nunda dubo bari evovodae irira aimi, ne gagara ari evevada irarera.
- 11 Ne mave ari eveva a dambu eraeva amo, ne riria use ivuga evu! BAJARI nu rea nendae usera ava kotise, ivuga evu! Ne mave nunda geka ningiraeva amo, ne ivuga use, koko sevu!
- 5 Evetu genembo mave ari dambugo use bekáda bekáda eraera ava, BAJARI nu uju beká eraira. Nu evovodae dubo buraira, aimi endae bedo edo irira.
- 6 Utu mo, BAJARI nunda bekaimi setiri sirorusira. Iji, tambuno, a damana mane nune setiri sirorusira.
- 7 Karaje nune doregetiri fira, vasa dabako fefetusira. Kafuru teria nunda bogu bogu usira.
- 8 Evetu genembo endada ireva isambu, BAJARI dae oju use, igheghi evu! Endada nunda oro oro isambu nemokena resena. Numoa kakara evu!
- 9 Ainda beká mo, geka nune sisira aimi, enda sirorusira. Nune setiri, roera isambu sirorusira.
- 10 Enda da oro oro rea ari kotise manaka gayeraera ava, BAJARI nune buregeraira. Ne rea ari seoro feteraira ava, nune gajeari, beká jo sirorae eraira.
- 11 O nune manaka garuse, rea ari sarira, ainda beká siroredo evovodae irarira, jo sifo nanjigo tano ae arira.
- 12 Oro mave BAJARI nenda God dae sedo budo irera, ivugaghae irarera. Nune natofo nunda tofodae gategusira, ne ivuga use irarera.
- 13 BAJARI, utuda ghe diti duruda use, evetu genembo isasambu giraira.
- 14 Nunda anumba vasada anumbirise, dombu durukena use, endada evetu genembo rea eraera ava, nu giraira.
- 15 Evetu genembo isasambu nenda janje joká nune etiri sirorusira. Ava sedo, ne rea eraera a koteraira isasambu ava, nune gi kasama urureari siroreraera.
- 16 Kini jo nunda isoro kakato da fakina aimi gitofu de sosighi e bae arira. Isoro embo jo nunda

### 33

#### *Sakai Sari Da Yaruri.*

- 1 Ne maveju mavejuimi kosasa tefo ireva, nemokena resena. BAJARI rea usira aindae ivuga use fumbu arugevu! Ne maveju mavejuimi nunda sari ava eraeva, isambu nundae sakai sevu!
- 2 Gita aimi doruse, BAJARI dae aiyakoe sevu! Yuka doruse, nundae yaru sevu! \*
- 3 Yaru seka nundae gate divuvu! Gita doruse, asi fativu, duka garigo ururari, ivugai fumbu arugevu!
- 4 Ai resira amo, BAJARI da geka mo beká ava nembori. Kotugo, nu rea eraira amo, isambu numo bekári.

\* 33:2: Israel embo jo namondeda *gita o uka* mane agho ghoghousa dae edo ghuseri. Nemokena mendeni ijoghako, genembo fetirise dari da kaugo aindae foyagoda gekaimi *lyre* seraera. O mendeni mindafu, avo anumbarida anumbedo dari da kaugo aindae *harp* seraera.

- fakina aimi gitofu de duboda fatae arira.
- 17 Hosi da fakina barago amingori. Mave hosi da fakina tumonduse isoro arira aimi jo gitofu de sosighi e bae arira. Roera isambu tegetena, ainda fakina tomanakogo aimi jo ari jebuga tambae arera.
- 18 BAJARI, evetu genembo mave nundae oju use, igheghi eraera ava gosurari irá gheraera, evetu genembo mave nunda dubo bari tomanakogo ava tumonduse irá gheraera ava,
- 19 nune sonemburureari ne jebuga irá gheraera. Baimara sifoda nune kaifa urureari, ne uvu bayaughae irá gheraera.
- 20 Namondeda gigitari isambu BAJARI kena fitiraera. Namondeda gagara ari kato a sonemba kato numori.
- 21 Nune eari, namonde dubo jama eraera. Namondeda tumondari nunda javo kakara aminda fitiraera.
- 22 Arie, BAJARI, ninda dubo bari namanekena evovodae irira, aimi namane esimbuge! Namane nimoa gigituroro esimbugaso dae resena.
- nanda oju isambu dadabe tefo usira.
- 5 Evetu genembo mave gitofuimi deoro, dara jokáda irise mema itatameraera amo, ne BAJARI kena dombu fainghedo ivuga eraera. Aminguse, ne jo sifo nanjigo aminda dubo mema ae arera.
- 6 Evetu genembo fakina tefo embo aimi, numokena kori seoro, nu ningiraira. Ningido, ne dara ainda jokáda ava sonembuse, saghimbe buraira.
- 7 Evetu genembo mave BAJARI kakara use tumonderaera ava, nunda aneyaimi kaifa use, saghimbe buraera.
- 8 BAJARI da kavevera ava, ni tofo mandi, itatame gi! Evetu genembo mave numokena ya nunda sonemba itatururoro ne kaifa arira amo, ne ivuga beká ava arera.
- 9 BAJARI da natofo isambu, nemokena resena. BAJARI kakara use tumondevu! Evetu genembo mave nunda geka ningiraera amo, ne rejo baetera ava budo, inono edo irera.
- 10 Raiyoni (lions) bayaudae ighoi itatamuse tava eraera, avata evetu genembo mave BAJARI da geka ningiraera amo, ne inono beká ava arera, roera eveva enidae dubo mema jo ae arera.
- 11 Nanda kokomana, evetu genembo seseka, fuvu, sirurono ningove! Niningururovo, ne nange BAJARI kakara use tumondaeteva ava, ijugaono ningareva!
- 12 Ne endada ivugaghae irari uju eraeva, ai? Ne eminda ghousa jebuga irise, ivugaghae irari uju eraeva, ai?
- 13 Avori, erá aji seove, a erá gungubo seove!

### 34

#### *God Da Sonembadae Sakai Saore!*

- 1 Na sifo evia inono, God kena aiyakoe sise irarena. Na nundae sakai sise irarena, sifo nanjigo aminda nundae sakai sari jo doyae arena.
- 2 Nu rejo nandae usira ava kotise, nundae sakai sise irarena. Evetu genembo mave gitofuimi deoro dara jokáda irise mema itatameraeva amo nembarago, nundae sakai sirurono ningido, ivuga evu!
- 3 BAJARI nu teria beká ava sedo, ne na sonembedo, BAJARI da bino andae osa sise sakai saore! Nunda javo andae sakai dabade saore!
- 4 Na BAJARI kena benunu seteno ningido, na vujegetiri,

- 14 Ari eko da emboro ava imboe edo  
gukai futuse,  
ari eveva avanembo use irivu!  
Mainungari da emboro ava,  
fakina use ininighae tava evu!
- 15 BAJARI nu, evetu genbembo ari  
eveva a dambu eraera ava,  
kaifa use, nenda kori ningi-  
raira,  
a nenda irari ava, giraira.
- 16 Avata evetu genembo mave ari  
ekoko eraera ainde, nu osogo  
edo tataya use deraira.  
Amingurareari, ne amburaera  
amo, evetu genembo ne jo  
kakara use kotae eraera.
- 17 Avata evetu genembo ari eveva  
a dambu eraera amo, ne Ba-  
jari kena kori sirureoro ningi-  
raira.  
Aminguse nu, ne dara ainda  
jokáda ava sonembuse,  
saghimbe buraira.
- 18 Evetu genembo mave dubo mema  
use irera aikena, BAJARI foa  
utua fetairaira,  
a evetu genembo mave bune  
jarutuse, fakina jo bae eraera  
ava, nune sonemberaira.
- 19 Genembo eveva mo, nu dara digari  
ainda mema itatameraira,  
avata dara isambu rea itatam-  
eraira ainda jokáda, BAJARI  
foa nu budo sonemberaira.
- 20 BAJARI nu sonembuse kaifa  
e gogoghomburureari, nu  
eveva irá gheraira,  
jo nunda etu eniko degagae  
arira.
- 21 Ekoimi foa, evetu genembo ari  
ekoko eraera ava, dearu ambu-  
raera.  
A evetu genembo mave ari  
eveva embo imboe eraera  
amo, ne ainda bouvu fufuse  
mino eko buraera.
- 22 Avata BAJARI nunda natofo sonem-  
baraira.  
Mave numokena ya, nunda  
sonemba a kaifa ari aindae  
uju eraera amo,  
ne nunda sonemba ruruse, mino  
eko jo bae arera.

## 35

### *God Da Sonembadae Benunu Saore!*

- 1 BAJARI, evetu genembo mave namo-  
kena osogo futo erera ainde  
osogo e!  
A kotugo, evetu genembo mave  
namokena isoro erera ainde,  
isoro aso dae resena.
- 2 Ninda bere bu jighido, ere fu,  
namoa gagara use dom-  
bukena kosege fetase!
- 3 Gitofu namoa ondi utua erera, ain-  
dae ninda gika vara ghae jighi  
erari nandae sorega fumbu!  
“Ninda sonemba kato namori,”  
ava saso ningido, dubo jama  
aone!
- 4 Evetu genembo mave namoa daoro  
ambono  
dae ufena manaka garuse  
kato erera ava,  
nine dedo atai duboda fafati-  
gaso, mana mana use meka  
gaoro dae resena. Ondi dubo  
bunedo jovereghaore!
- 5 BAJARI, nine se, ninda Aneya ne  
ondirari, kau kikisa gharasa  
yauraimi fuseari ghumbu ya  
gheraira aminga ava, sumbu  
ya baghimbaore!
- 6 BAJARI, nine aso, nenda dombukena  
tumba  
jinjanghururari a emboro seris-  
eri ghari,  
ninda aneyaimi ne ondi dari  
du fafasaore!
- 7 Ai resira amo, na nemokena dara  
jo aeri. Avata, ne susu tefo  
namoa ufena daoro ambono  
dae sise,  
bako ghafuse a ivasi fitari  
guseri.
- 8 Avata ne kotae kotae iroro, nemoa  
sosighi aso itatamarera.  
Ne totofo nemoa nenda  
vaghoimi dorurari a kotugo  
totofo nene nenda bakoda du  
vovoseguse sirivo e tefo arera.
- 9 Amingaoro, na BAJARI dae ivuga  
arena. Na sari, jebugarena  
aindae, na ivuga arena.

- 10 Na nanda janje joka isambuimi BAJARI kena sarena, “Arie BAJARI, endada a utuda nimongo eni tefori.  
Rorojegari amo, nine fakina kakatokena kosegeraesa.  
A makasi irari jarutuse irera barago, nine evetu genembo nemoa degi degi eraera, aikena kosegeraesa.”
- 11 Natofuimi aji sise, nane dara ariá gesire eraera, avata na berefo bekári.
- 12 Na nendae ari eveva urureono, ne namokena mino ari ekoko ututeraera.  
Amingeoro, na dubo mema bekáimi bune jarutuse irá gheraena.
- 13-14 Sifo reda ne kae tambudo ghusera, nanda aya, koro mandako  
a kotugo komana eni kae bu ambari dae ururoro, joka use banungaetena aminga ava use, BAJARI nemo sonembari jebugaoro dae sise, na nendae rovarova use, nendae sedo banungedo ghuseni,  
a kotugo, uvu bayau kanangara use janje joka isambuimi nendae sedo banungedo ghuseni.  
Na nendae sedo dubo mema use, tumo darido ya foa ghedo ghuseni.
- 15 Avata dara namokena sirorusira, da sifo aminda, ne isambu ivuga useri.  
Evetu genembo na berefoimi totorugedo, namo dere jise dedo ghuseri.
- 16 Inono daguna embo dere jiraera aminga ava use, ne namokena dombu fakara futo use, dere jiseri.
- 17 Arie BAJARI, rekato sifo ghousa goursaso nandae emingeraeri?  
Evetu genembo amo laioni (lion) da ari aminga use,  
namo daoro ambono dae eraera, aikena na sainghimbe bu!
- 18 Amingaresa amo, na nindae aiyakoe sarena. Ninda natofu tomanako totorugarera ainda dombuda fetedo, nindae sakai sarena.
- 19 Erá eoso, evetu genembo gungubo kakato namokena gitofu eraera aimi,  
na nenda dere jirarikena fiteore!  
Erá eoso, evetu genembo susu tefo na imboe gamboe eraera aimi,  
dubo mema arena sifoda gi mendó fainghuse ivuga eore!
- 20 Nano namendi da geka ava jo sae eraera.  
Ne tatera genembo dubo jamada irera,  
ainda javoda geka gungubo kau eni kau eni ava sise undeoro,  
baji tomanako eraira.
- 21 Ne namoa gesire use, koko siseri, “Namane, rea etesa, geri!”
- 22 Avata, BAJARI, ni ava gosusesi. Ava sedo, erá namokena tumbedo, ya tofo mandi soka beká eose!
- 23 Arie BAJARI, tofo ere fete, nandae sorega fumbu!  
Nanda God, tofo nandae enjise, namo sonembuse sorega fumbu!
- 24 Arie BAJARI, nanda God, nimo dambugo bekári, ava sedo, nandae “kosasa tefori” saso dae resena. Era doyeoso, nanda gitofuimi na dedo gegha jiriore!
- 25 Erá doyeoso ne totofo seore, “Makoe! Nu sandi beri! Amo namonde rea uju usera ava, beká etira!”
- 26 Evetu genembo mave, na mema tafurureono, namoa dere jiraera ava dedo, atai duboda fati tefo edo aso dubo bunarera.  
Evetu genembo mave nesuka nemoa nembo eveva sise, na ighagha eraera ava aso, nenda javo eko ari mekai jarutarera.
- 27 Evetu genembo mave, ijujari kato nandae

“kosasa tefori” sare dae uju  
arera aimi, ivugai fumbu  
arugedo ghuse eminge  
sarera,

“BAJARI mo nu teriagori! Nunda  
saramana kato koto sifoda  
jebugetira aindae, nu ivuga  
erira!”

<sup>28</sup> Sifo aminda, ni bekáda bekáda  
eraesa aindae, na osa sise,  
evovodae nindae sakai sise  
irarena.

### 36

*Evetu Genembo Da Dubo Joká  
Ekoimi Bedo Edo Iriira.*

<sup>1</sup> Ari ekoko embo da janje jokáda ari  
eko aimi misurugururari,  
nu God imboe use, God dae  
igheghi itako jo ae eraira.

<sup>2</sup> Ainda susu mo, nu tofo numokena  
sarira, “Na jiro raugo bekári,  
ágido,  
na rea eraena, God jo tam-  
budo dombuda sari da kaugo  
iraeri.”

<sup>3</sup> Nunda geka isambu ekoko beká  
sise,  
gungubo teria futo seraira.  
Nu dubo kotari da emboro  
kosasaghuse, nu sifo nanjigo  
aminda kotofu da ari ava jo ae  
eraira.

<sup>4</sup> Nu kambo jokáda fase irise, kotari  
ekoko kotise fase irá gheraira.  
Nu tofo numoa bu sembaeda fiftuse,  
ari eko ari da goroto nanjogo  
foa gheraira ava, itako jo dari-  
gae eraira.

*God Veka Eveva Eraira Kau  
Emingori!*

<sup>5</sup> Arie BAJARI, ninda dubo bari  
teriago bekári, utu tambudo  
irira.

Ninda beka gajari nanjogo aresa, ava  
evovodae kaifa udo yaresa,  
tano tefori.

<sup>6</sup> Doriri ghousa vitaira utuda  
vaghuse fetirira, ainda ghousa  
jo ave kasama arigo iraeri.  
Aminga ava, God ari dambu ava  
nembo eraira ainda kafuru,

jo mave tambae arira. Kotugo,  
nu evetu genembo bekáda  
bekáda ategi eraira da aito  
fugari mo,

amingori, tano tefori. Sino fuka  
a evetu genembo barago nine  
kaifa eraesa.

<sup>7</sup> Arie God, ninda dubo bari evovo-  
dae eraesa amo, numo bekári.  
Evetu genembo isambu ninda ghabu  
duruda tereoro, nine gagara  
eraesa.

<sup>8</sup> Kirumu nine berugeraesa ava nene  
mindiraera.

Nine seoso, ninda esimbugari,  
usegha buvuraira aminga  
ava namanekena bejedo foa  
gheraira.

<sup>9</sup> Jebuga da susu mo nimori, nimo-  
kena ghedo foa gheraira.  
Ninda usasa jarageraira aimi,  
namane sifo sevo eregoserá.

<sup>10</sup> Evetu genembo ni kasama erera  
ava evovodae dubo budo ghe!  
Kotugo evetu genembo ari dambugo  
eraera aikená ninda jebuga  
ghasido yaresa!

<sup>11</sup> Erá doyeoso, gegenembo ivuga  
kakatoimi na deore!

Evetu genembo ekoko barago,  
erá doyeoso, na ondioro  
sumbione!

<sup>12</sup> Arie givu! Evetu genembo ekoko  
reda du fafasetera. O, gi!  
Omindá burudughe fafasedo, er-  
ari erebunera.

### 37

*Ari Ekoko Embo Vasa Ekoda  
Iriroro, Ari Eveva Embo Vasa Eveva  
Da Yarera.*

<sup>1</sup> Erá ari ekoko embo rea arera ain-  
dae, mema use, kotari futo  
eove!

Ari ekoko ari kakato rea arera ain-  
dae, erá bengoso futo eove!

<sup>2</sup> Ai resira amo, kau kikisa gharasa  
edo aviraira, ne aminga ava  
use, totoi nembo manje tefo  
arera.

Kotugo, vive gharasa edo aviraira  
aminga ava, ne ambu tefo ar-  
era.



- 3 Tumondari isambu BAJARI kena ffituse, ari eveva nembo edo ghevu!  
Amingareva, ne nenda enda nane futusena aminda irise, mema eni tefo, dubo jamaghae irareva.
- 4 Ninda ivuga BAJARI kena bari dae kotise iraresa amo, ninda janje jokáda rea uju beká use koterasesa ava, nune mutari baresa.
- 5 Ninda kotari a uju isambu BAJARI da ungodá fiti!  
Tumondari isambu numokena ffitururaso, nune sonembarira.
- 6 Nune ari, ninda irari dambugo beká, kau isonga iji janimberaira aminga ava use, ijugururari isagha ari natofo ghera.
- 7 Erá, evetu genembo ari ekoko ururoro nenda gugua nanjogo dige fasarira,  
o evetu genembo mave dara ari dae manaka gayeraera aindae, janje takegha eure!  
Durumugedo BAJARI sonembari dae, gigita use iri!
- 8 Nimokena dubo mema futo ari, o janje eko ari avaga erá afigeuri fureure!  
Roera avavagaimi dara undiari siroreraira.
- 9 Evetu genembo mave nenda tumondari BAJARI kena ffituse irá gheraera aimi, enda nene tofo arera.  
O ari ekoko embo mo, ondari do buvarera.
- 10 Ari ekoko embo mo, totoi manjarera.  
Nemo gari dae kakova aresa, avata ne itako jo tambae aresa.
- 11 O tumbari embo aimi enda nene budo, gugua ghayafade edo, ririaghae irarera.
- 12 Genembo ari ekoko ari kato aimi genembo eveva ava ambare dae aito use, imboe gamboe use,  
ababa gambu bainbaingheraira.
- 13 Avata, BAJARI ari ekoko ari kakato aindae gegha jiraira.
- Ainda susu mo, nemo sosighi ari da sifo utua ari dae erira ava, nu kasama erira.
- 14 Ari ekoko embo nene eredo, makasi a jarutari embo, kotugo evetu genembo aito eveva fugeraera ava isambu, dedo gaedo ghaoro amboro dae sise,  
nenda isoro da kaiya jigheoro erorureari, a nenda feva jighi otomberaera.
- 15 Avata, God nenda feva jighi joredó, tofofo nenda isoro da kaiya aimi nemoa jari ambarera.
- 16 Genembo eveva ainda gugua jo anjaga iraeri, avata eveva use irá gheraira, ava sedo, ivuga tambarira.  
O ari ekoko embo mo, nenda ghayafa digarigo, avata ekoko use irá gheraera aindae, ivuga jo tambae arera.
- 17 Ainda susu mo, BAJARI nune ari, ekoko embo da fakina, ava dadabarira.  
O evetu genembo eveva da mo, nune gagara arira.
- 18 Evetu genembo BAJARI da sari ava nembo eraera amo, nune kaifa tavo eraira.  
Kotugo enda nene anumbirera amo, evovodae nenda tofodae barera.
- 19 Baimara sifoda ne jo mema itatama use, meka gae arera.  
Baimara sifoda ne inono beká irarera.
- 20 O ari ekoko embo mo, ambu tefo arera.  
BAJARI dae osogo ari kakato mo, manjarera.  
Kau vare joka gharasedo dore dudurugeraira, amingari ghera.
- A kau imbosi yauraimi bu ghumbu irureari dadaberaira, ava arera.
- 21 Genembo ari eko ari kato roera se bambudo, mino jo mutae eraira.  
O genembo ari eveva embo mo, kavevera use nunda gugua soro eraira.

- 22 Evetu genembo mavejoa BAJARI esimbugarira, aimi enda nenda tofodae barera.  
O evetu genembo mavejoa nune simbora arira amo, ondari buvarera.
- 23 Evetu genembo da emboro mo, BAJARI nune ijugeraira.  
Evetu genembo nune uju eraira ava, nu gagara eraira.
- 24 Ne ata de fokugharera amo, ne jo du burudughe fasae arera.  
Ainda susu mo, BAJARI nune jighururari, totoi erarera.
- 25 Na bajido ghousago iriani. Ava oroko na genembako eteni.  
Avata, BAJARI genembo eveva ava jo doyari na gaeri.  
Kotugo, nunda sasingu barago, bayaudae benunu sise, deinghururoro jo gaeri.
- 26 Genembo amo sifo ghousa soro vesa use, kokomana rejudae benunu sarera, sonembarira.  
God genembo amo esimbuguse, sasingu mutari barira.
- 27 Ari ekoko da ari amo dodo, ari eveva vanembo use irareva amo,  
nenda imemesiri gamemisiri sifo ghousa enda eminda irarera.
- 28 Ainda beká mo, BAJARI ari dambu aindae uju use,  
natofo nunda sari ava eraera aikena, gukai jo mutae arira.  
Nemo evovodae nune gagara eraira.  
O ari ekoko embo da imemisiri gamemisiri mo, nune ondari darigarera.
- 29 Ari eveva gaveva embo aimi enda nenda tofodae budo, aminda dighi anumbedo evovodae irarera.
- 30 Genembo eveva mo, nu geka evovago a kotofu geka ava seraira.  
Nu rea eraira, ava evetu genembo isambukena inonoda inonoda eraira.
- 31 Nu God da Agho Dari ava bu nunda janje jokáda fiti kaifa use,  
jo sifo nanjigo emboro kosasaghedo, ajagha yae eraira.
- 32 Ari eko embo mo, genembo eveva ava dari ambare dae sise,  
kato use irá gheraira.
- 33 Avata, BAJARI genembo eveva amo jo itako doyari, nunda gitofu da vaghoda terae arira.  
Aminguse, koto ari sifoda jo doyari, genembo eveva amo mema tambae arira.
- 34 Nenda gigitari isambu BAJARI kena fiftuse, nunda sari ava edo ghevu!  
Amingururovo gido aindae, ne kakara use, enda nemokena mutari bareva.  
Budo gosururovo, ari ekoko embo God nune ondari darigarera.
- 35 Anakora na genembo ghambura, geka ningae tambuno ava gosuseni.  
Nu kau Lebanon da beriberiya aminga ava use, ika mendeni do darige viti ikáda vagheraira.  
Aminguse, evetu genembo digari ava nune kateyavara edo ghusira.
- 36 Avata amboda, na sekago aminda buvudo, nu jo aminda irari gaeri.  
Na numoa gari dae kakova usena, avata nu jo itako tambaeri.
- 37 Genembo eveva ava gi gogoghombaresa, a genembo ari dambugo ava kote garesa.  
Ai resira amo, genembo mainugarighae irá gheraira, ainda imemesiri gamemisiri digari sirorarera.
- 38 O, ari ekoko ari kakato mo, God nune dari amomonjegarera.  
Kotugo nenda imemisiri gamemisiri barago vekaghae musarera.
- 39 BAJARI gegenembo dambugo ava, dara sifoda nune gagara use sonembeari jebugeraera.
- 40 Ne ambo numokena sosiroro, nune ne sonembuse, darakena saighimbe buraira.  
Nune nemoa ari ekoko embokena saighimbe bu darigeari jebugeraera.

## 38

### *Kae Tambudo Mema Itatama Use Banungariri.*

- <sup>1</sup> Arie, BAJARI, erá ninda janje ekoimi na dombuda seose!
- <sup>2</sup> Ai resira amo, na ninda feva da gorobaimi na gaetesi.  
Na nine deteso du faseteni.
- <sup>3</sup> Ninda janje eko etesa, aimi na tamo mema teria futo itatama erena.  
Nanda ari ekoko teria futo aindae, nanda tamo isambu gambisi gambisi etira.
- <sup>4</sup> Ai resira amo, nanda ari ekoko teriágo beká aimi afurugetiri, usegha jokáda mindi ambari gerena.  
Nanda ari ekoko da mema ava bouvugori, jo nane fumbarigo iraeri.
- <sup>5</sup> Nanda gogore tamonda tamo gambisi futo edo masa use metegerira.
- <sup>6</sup> Na kukurufa use, otombedo, isonga numboro sorara urureono, tumba jiraira.
- <sup>7</sup> Kae tambudo, tamo veriveri teria beká iri, ambari dae erena.
- <sup>8</sup> Na rojari beká edo, fakina dadabeteri, nanda janje feriferi ghuse, mema siri, aoro sise fasirena.
- <sup>9</sup> Arie, BAJARI, na rea uju eraena, ni isambu kasama eresa.  
Na aoro sise fasirena ábarago, isambu niningeresa.
- <sup>10</sup> Nanda janje feriferi ghiri, na rojari beká eteni. Namokena ivuga isambu dadabetira.
- <sup>11</sup> Na tamo gambisi beda etiri, aindae nanda kokomana a nano namendi itako jo foa nanda tinguda fetae eraera.  
Nanda ambo bego ajagha beká irá gheraera, jo foa na gae eraera.
- <sup>12</sup> Evetu genembo namo daoro ambono dae uju use, ivasi fiftigeraera.  
Evetu genembo mendeni na mema itatama use gofono dae sise, manaka gayeraera.

- <sup>13</sup> Namó dengoro gajetiri a guga embo da kaugo use, beka jo sae eraena.
- <sup>14</sup> Na guga a dengoro irae embo mave geka jo ningae irise, mino jo sae eraira da kaugori.
- <sup>15</sup> Avata, BAJARI, nanda tumondari nimokena fiftuse irá gheraena.  
Kotugo, BAJARI nanda God, nanda benunu ningido sonembaresa.
- <sup>16</sup> Erá doyeoso, na mema eretafena aindae, gitofu na dere jiriore!  
Erá doyeoso, nane dara aono, nandae “makoede” sise, na bu gego yaru kena fiftuse, dere jireore!
- <sup>17</sup> Ai resira amo, nanda kae teria beká saviri, na durari dae itatako erena.
- <sup>18</sup> Na nanda ari ekoko vujegeraena. Nanda kosasa aindae mema use irena.
- <sup>19</sup> Nanda gitofu fakina kakatori, ne kae itako jo tambae eraera.  
Ne susu tefo na imboe gamboe eraera.
- <sup>20</sup> Na ari dambugo ari dae inini use irá gheraena aindae, evetu genembo mendeni nandae osogo eraera.  
Na nendae ari eveva eraena, avata namokena ari ekoko eraera.
- <sup>21</sup> Arie, BAJARI, erá na doyeose!  
Nanda God, erá na darige, soka yeose!
- <sup>22</sup> Arie, BAJARI, namo saso jebugari kato nimori, oroko namo sonembe!

## 39

### *Namonde Endada Jo Ghousa Irae Arera!*

- <sup>1</sup> Na siseni, “Na rea arena, kaifa e gogoghombuse arena.  
Kotugo nanda beka kaifa use, geka eko eni jo saono buvae arira.  
Ava sedo, na evetu genembo ekoko da dombuda irise, geka itako eni jo sae arena.”
- <sup>2</sup> Na beka gotedo, geka eni itako jo saeri.  
Eveva geka barago jo saeri.

- Avata, nanda mema ava baji tomanako usira.
- <sup>3</sup> Amo nanda mema aindae oju useni.  
Na kotari futo usena, avata eko beká useni.  
Na ghousa mavega irari bunise ategi useni:
- <sup>4</sup> “Bajari, na ghousa mavega ava irareni? Na nanjigo ambareni?  
Nanda ambari da sifo saso ningaeteni.
- <sup>5</sup> Nange eteso, na jo ghousa irae areni?  
Na ninda dombuda jo ghousa irae arena.
- Geka bekári, namane evetu genembo jebuga irá gheraera amo, inono ghamo asegeraera amingori.
- <sup>6</sup> Namanenda irari mo, dangio da kaugori, beká tefori.  
Namane tefo janjagu eraera.  
Namane gugua bambu dabade eraera, avata mave rete bambarira amo, namane berefori.
- <sup>7</sup> BAJARI, nanda gigita ari mo, jo soesa ae eraena.  
Nanda kaifa gigita ari mo, nimokenari.
- <sup>8</sup> Nanda ari ekoko bu fugaso, jebugaone!  
Kotugo erá eoso, evetu genembo gogovara use God imboe eraera aimi, na dere jiriore!
- <sup>9</sup> Na beka gotedo, geka eni itako jo sae arena. Ainda susu mo, nine eteso na mema tafuse irena.
- <sup>10</sup> Erá, nanda ari ekoko da mino futuse, na sekago deose! Na deteso ambari dae itako erena.
- <sup>11</sup> Ni evetu genembo da ari ekoko ainda mino futuse, ghoghora sise dombuda seraesa.  
Aminguse, ne rea dubo buraera ava, kau jiriko aimi mindeari bakomba eraira, aminga ava sosighi eraesa.  
Geka bekári, namane evetu genembo jebuga irá gheraera amo, inono ghamo asegeraera amingori.

- <sup>12</sup> Arie, BAJARI, nanda banungari ningi! Namonembaso dae sorara erena, ningi!  
Na sorara ururono ningaresa, fu, na sonembase!  
Ai resira amo, nanda afamane abuamane usera avavaga, namo ninda esa embori, sifo tufako ava nembo irarena.
- <sup>13</sup> Ninda ungu sokinembaso dae resena. Doyaso, na jo ambae irise, ivuga itako edo, na ambono dadabare!”

## 40

### *Sakai Sari Da Yaruri.*

- <sup>1</sup> Na durumugedo, BAJARI da sonemba dae kaifa use ireno, nu nanda sorara jave nini-gusira.
- <sup>2</sup> Na bako eko beká tauya aminda ghe jumbiri vivituseni. Eteno, na budo enda fakarada fitiri fetedo jebuguseni.
- <sup>3</sup> God dae sakai sari da yaru seka eni ava divono dae sedo, namokena ijugusira.  
Natofo digari evia gosuse, ne dudukughedo, nenda tumondari BAJARI kena fitarera.
- <sup>4</sup> Mave, natofo ove keveraera, a god gungubo tumonde bainghari kakatode dabade jo tatae irise, God beká ava tumonduse irarera amo, ne ivuga ghae irarera.
- <sup>5</sup> Arie BAJARI, namaneda God, ni namanendae roera digari ambari usesi.  
Mave eni jo ninda tega iraeri. Namane ninda eveva ava tamboro dae sise, manaka gayeraesa.  
Ni rea eraesa da digari ava, jo nane tege sari da kaugo iraeri.
- <sup>6</sup> Ni fuyo a joba mutari ava jo uju ae eraesa. Sino fuka olta (altar) da dungoro dae ni jo uju ae, a ari ekoko kote doyasoda sedo, sino fuka dungoro dae barago, ni jo uju aeri.  
Ninda uju mo, na ninda geka ningaeteni. Ava sedo, ninda

- geka ningono dae sise, namo-  
kena dengoro futusesi.
- <sup>7</sup> Eteso, “Na evirere,” siseni. “Ninda  
Agho Dari jokáda, rea aono  
dae sisesa, ava irira.”
- <sup>8</sup> Ava ari dae sedo refena. Ninda uju  
ava ivugaghae arena. Nanda  
God, ninda ijuga nanda janje  
jokáda fiteno irira.
- <sup>9</sup> Arie BAJARI, namane sonemberaesa  
ainda  
bino eveva ava, ninda natofo  
isambu totorugusera da dom-  
buda osa siseni,  
kotugo sise irarena. Jo itako  
doyae, sise irarena, ava ni  
kasama eresa.
- <sup>10</sup> Na jebuga da bino ava jo kivo edo,  
nasuka bu jighiraeri. Na sifo  
ghousa ninda sonemba andae  
sise, irá gheraena.  
Ni rea ari sisesa, ava eraesa ain-  
dae barago, osa sise irá gher-  
aena.  
Ninda natofo totorugeraera  
ainda jokáda na eredo ninda  
sari nange eraesa ava, a  
evovodae namane dubo bu-  
raesa,  
ava osa sise, itako jo beka gotae  
eraena.
- <sup>11</sup> Arie BAJARI, na kasama erena, ni  
nandae joka eraesa.  
Ni rea ari sisesa ava use, na  
dubo buraesa aimi, na gagara  
ururaso irarena.
- Sonemba Da Benunuri.*
- <sup>12</sup> Na dara digari futo, jo tegari da  
kaugo irae aimi jimbe biru-  
rughetira.  
Nanda ari ekoko jo daba  
etoto irae aimi nanda irari  
kosasaghetiri, na emboro  
erebunena.  
Nanda kosasa da digari nanda  
beo amingori. Aimi etiri,  
nanda fakina dadabetiri, dubo  
bunise irena.
- <sup>13</sup> Arie BAJARI, oroko nembo  
tavaraghe fu, na sonembase  
jebugaone!
- <sup>14</sup> Mave na daoro ambono dae eraera  
ovia, sosighi urururaso dubo  
bunore!

- Mave nanda dara andae ivuga er-  
aera amo, buregaso ne meka  
gosuse jovereghe darigaore!
- <sup>15</sup> Mave namoa dere jiraera amo, aso  
oju edo ungu ata dadadaghu-  
rurari, meka garera.
- <sup>16</sup> Nimokena mave furarera isambu,  
ivuga use riria aore!  
Mave ninda sonembadae ivuga er-  
aera, ne aiyakoe sise eminge  
sise irarera, “BAJARI teriagio  
beká nimori!”
- <sup>17</sup> Na makasi edo jarutuse irena,  
avata BAJARI, ni na kotise irá  
gheraesa.  
Arie nanda God, nanda sonemba  
kato nimori, tavaraghe fu, na  
sonembase jebugaone!

## 41

### *Kae Embo Mema Bouvu Itatamer- aera, Ainda Banungariri.*

- <sup>1</sup> Mave makasi embo sonembuse irá  
gheraera, God ne esimbuguru-  
rari ivugaghae irarera.  
Ne dara barera, BAJARI ne  
sonembarira.
- <sup>2</sup> BAJARI, ne sonembuse gagara uru-  
rari jebuga irarera. Nu jo do-  
yari, ne gitofu da sari ningari  
ae arera.  
Nune sonembari, ne enda  
nune futusira aminda,  
ivuga ghae irarera.
- <sup>3</sup> Ne kae barera amo, BAJARI sonem-  
bururari jebugarera.
- <sup>4</sup> Na tofo nandae eminge siseni, “BA-  
JARI, na nimokena dara useni.  
Nandae joka use saso na je-  
bugarera.”
- <sup>5</sup> Nanda gitofu nane mema itatama  
use ambono dadabare dae uju  
use,  
geka mendeni mendeni seraira.
- <sup>6</sup> Mave namo gari foa gheraera amo,  
ne jo geka bekáda bekáda sae  
eraera.  
Nanda kae da bino eko eni  
ningarera amo, ne totoi totoi  
nati do buvudo osa sarera.
- <sup>7</sup> Nanda kae nange bouvu digaetira,  
ava kotise, nandae mave im-  
boe eraera,

- aimi unongu tofo tofo den-  
goroda se ningiraera.
- <sup>8</sup> Aminguse seraera, “Nu kae budo  
ambari dae urogho erira, itako  
jo jebugedo erae arira.”
- <sup>9</sup> Nanda eni, nundae nanda komana  
beká irariá sise, nangae uvu  
bayau dabade sore mindido  
ghusera aimi,  
na gukai futusira.
- <sup>10</sup> Arie BAJARI, joka edo, nandae fak-  
ina sekago mutaso budo aimi  
nanda gitofu kena mino aone!
- <sup>11</sup> Nanda gitofu na jo dedo atai fati  
fetae usira, aindae na kasama  
erena,  
ni nandae ivuga eraesa.
- <sup>12</sup> Ni na sonemberaesa ainda beká  
mo, na rea eraena isambu  
beká vanembori.  
Na kaifa ururaso, ninda dom-  
buda evovodae irarena.
- <sup>13</sup> BAJARI, Israel embo da God dae  
sakai saore! Oroko a evovo-  
dae nundae sakai sise irore!  
Ai bekári. Ai bekári.

## 42

### *Genembo Eni Gitofuimi Sandi Budo Isera, Ainda Banungariri.*

- <sup>1</sup> Sino fuka eni diya (deer) seraera,  
aimi dubo sagheari uvu tava  
eraira aminga ava,  
God, na nimo tava erena.
- <sup>2</sup> God jebuga iresa, nimoa tava erena.  
Na nanjigo ya ninda  
dombuda tumonde baing-  
haeteni?
- <sup>3</sup> Nanda gitofu nandae eminge sise  
irera,  
“Ninda God nangetirai ni  
sonembaeri?” Sifo tumba evia  
soraraghae irena.  
Jivu nanda bayauri.
- <sup>4</sup> Anakora na giti jighido, natofode  
yaru didivuse  
vuredo jasedo ghuse,  
God dae sakai sise,  
nunda Kamboda ya teredo  
ghuseri. Ava kotise aindae,  
mema eraena.
- <sup>5</sup> Na redae mema ereni?

- Na redae bune jarutereni?  
Avari, jo amingae arena.
- Na sekago nanda tumondari nanda  
God a sonemba katokena fifi-  
tuse,  
nundae sakai sarena.
- <sup>6-7</sup> Janje gagojurreari, na sekago nu-  
moa koterana.
- Dubo mema nanda janje jokáda mo,  
kau voru viti bari gerira.
- Dubo bunari kau uvu usegha  
doriri Hermon nengae Mizar  
ghaekena ghedo jorughuse,  
vose foa Jordan buvuraira,  
amingaimi na fatira.
- <sup>8</sup> Ijighae BAJARI da kavevera a dubo  
bari namokena irá gheraira.
- Tumbaghae, God nandae jebuga mu-  
turaira aikena, nunda yaru  
muturaira aimi yaru, didivuse  
banungeraena.
- <sup>9</sup> God namokena sorega muturaira,  
numokena resena. “Redae na  
kotae eteso,  
nanda gitofuda ari ekoko einda  
bovu fufuse irareni?”
- <sup>10</sup> Evovodae nandae koviono sise,  
“Ninda God nangetirai ni  
sonembaeri?”  
sirureoro, na ambaetena,  
ava koterana.
- <sup>11</sup> Na redae mema ereni?  
Na redae bune jarutereni?  
Avari, jo amingae arena.
- Na sekago nanda tumondari nanda  
God a sonemba katokena fifi-  
tuse,  
nundae sakai sarena.

## 43

### *Genembo Eni Gitofuimi Sandi Budo Isera, Ainda Banungariri. (Yaru 42 da mendori.)*

- <sup>1</sup> Arie God, evetu genembo ni buner-  
aera, gungubo kakato,  
a evetu genembo ekoko ainda  
dombuda ere, na sonembuse,  
“Embavokena kosasa tefo  
beká”, ava saetesi.
- <sup>2</sup> Nimo nanda sonemba katori,

\* **43:3:** Afige, geka eni Saion dae gefusera, tuturo 2:6 duruda tege, garesa!

- ava redae na doteso, gitofu mema namokena futero, ainda bouvu erefufeni?
- <sup>3</sup> Ninda Geka Beká a usasa mutu foa, na giti jijighuse bu ya Saion,\* ninda doriri kakara aminda buvudo, ninda banungari kambo nimo irá gheraesa, aminda terone!
- <sup>4</sup> Aminda teredo, na ninda olta (altar) da yaone!  
Arie God, nimoa nanda ivuga da susuri.  
Arie God, nanda God, na gita bu doruse,†  
nindae sakai sise, yaru divarena.
- <sup>5</sup> Na redae mema ereni?  
Na redae bune jarutereni?  
Avori, jo amingae arena.  
Na sekago nanda tumondari nanda God a sonemba katokena fiftuse,  
nundae sakai sarena.
- 44**
- God Genembo Eni Gagara Aetira,  
Ainda Banungariri.*
- <sup>1</sup> Arie God, anakora beká avia abua agira mane da sifoda, ni ari tomanako rea usesa ava setero,  
totofo namanenda dengoroi niniguseri.
- <sup>2</sup> Ni aminguse, evetu genembo ni jo tumondae usera ava, nine tofo ondeso buvu dariguseri.  
O ninda natofo mo, seteso, nenda enda futusesa aminda dighi anumbuseri.  
Aminguse, oro mendenikena fakarago eso, tofo ninda natofo sonembeteso aimi iti fafode useri.
- <sup>3</sup> Ninda natofo jo nenda misi gandigha aimi isoro edo enda baeri.  
A ne jo totofo nenda fakina gitofu dedo enda baeri.  
Ni ne dubo budo ghusesa ava ijuguse, tofo mandi nemonde ise enda sanghimbe rurusevu.
- <sup>4</sup> Nanda Kini a nanda God, Jacob da imemesiri Israel embo da gitofu de atai fati feteraera amo, nimori.
- <sup>5</sup> Ninda fakinaimi namane gitofu ava dedo atai fati feteraera.
- <sup>6</sup> Na jo nanda feva, O nanda misi gandigha ava tumondururono, aimi na sonembaeri.
- <sup>7</sup> Tefo, namanenda sonemba kato namane gitofu jokáda sorisira, a evetu genembo namane imboe eraera ava, de atai fati fefetusira, amo nimori.
- <sup>8</sup> Namane evovodae nindae sakai sise a aiyakoe sise irarera.
- <sup>9</sup> Avata oroko mo, ni nange namane gukai muteso, gitofu namane de atai fati fefetumutari. Namane isorodae ya gheraera ainda jokáda, ni tefori.
- <sup>10</sup> Ni eteso namane gitofu dae oju sufero, namanenda gugua rea irira ava, nene sosighi e barimutari.
- <sup>11</sup> Ni ghabu sokinimbeteso, namane sino fuka de ojarigo umutari.  
Kotugo, namane mendeni kotae fuge doteso, teana embo da reighi aminda sisigaga edo irera.
- <sup>12</sup> Tofo ninda natofo, jo mino kitako oriri ari da kaugo irae avata, mino kitako da oriri umutasi.
- <sup>13</sup> Namanenda kokomana tinguda irá gheraera aimi, namanendae rea umutasa ava gido, dere jise gegha seraera.
- <sup>14</sup> Nine eteso, natofo nunda oro oro namane gi derejise gegha seraera. Ne namanendae fakina tefova sise, mendó faingheraera.
- <sup>15-16</sup> Nanda gitofui unongu sise, nandae mendo kininje kananje ghuse dere jiraera,  
a evetu genembo na imboe eraera, aimi koviono seraera aindae, na sifo ghousa evia meka giraena.

† 43:4: Afige, geke eni gita o uka dae gefusera, tuturo 33:2 duruda tege, garesa!

- 17 Namane ni jo kotae eraera, a ninda evovo geke jo bejae eraera. Avata, ari avavaga namanekena sirorerira.
- 18 Namane nimokena jo gukai mutaeri, a ninda Agho Dari ava jo bejaeri.
- 19 Avata ni namane bu, taima sino evetu genembo gamburaera da vasa aminda fiteso, tumba jinjanghari jokáda irera.
- 20 Namane nimokena gukai futuse, teana embo da god kena banungaetera amo,
- 21 ni anakora namane tambaetesi. Ai resira amo, namanenda kotari jungarida mo, isasambu ni kasama eraesa.
- 22 Avata, namane ni tumonduse irera aindae, gitofuimi namane kau sifi (sheep) de ojari geraera, aminga ava use, namane sifo ghousa evia dorureoro sirivo eraera.
- 23 Arie BAJARI, diti fange ere! Ni redae ravesi? Diti fange ere, namane erá do-yari beká ease!
- 24 Ni redae namanekena junguteresi? Namanenda dara a mema erá kotae ease!
- 25 Namane endada du degigitege fafaseteri. Sonemba eni tefo gido, namane gofedo, fonja jokáda fafaseteri.
- 26 Fu, namane sorase! Namane evovodae dubo burasesa aindae, fu, namane sonembase!
- 2 Gegenembo iritirera ainda jokáda, genembo mendode sovode beká nimori. Nimo geke seoso ghamo be-ungheraera. Sifo ghousa God nimoa esimbugeraera.
- 3 Nanda kini fakinago, gogho use, ninda isoroda kaiya ifuda dighi. Ai bekári, ni duroghaeri.
- 4 Kini da aito fugari ava fugutuse, ninda isoro kakato da giti jighido, evetu genembo nanjogo geke bekáda bekáda seraera, a ari bekáda bekáda eraera ava sorise, ninda gitofu sosighi e baresa. Ninda fakinaimi ninda gitofu de atai fati fetaresa.
- 5 Ninda feva da goroba isambu sikhonogori, aimi ninda gitofu da gomoda gayeraesa. Oro oro irera, a isambu ninda ata duruda du fafasegeraera.
- 6 God nimokena kini da anumba vasa futusira, ainda fakina jo nanjigo dadabae arira, evovodae irarira. Ninda natofo inonoda kaifa eraesa.
- 7 Ni ari dambu beká ava uju use, ari ekoko mo, gari imboe eraesa aindae, God nine tumonde baingheraesa aimi, nimoa gategedo, usu muká ninda jiroda avereguse, nunda ivuga barago, mutiri itatama use iresa. Kini eni nunda ivuga avavaga jo bae irira.
- 8 Ika moor (myrrh) a alo (aloe) a kotugo kásia (cassia) jasisera, ainda muká muno futo ava ninda embo boka aimi muno yavegeraera. Kini da kambo Sino fuka elefanti (elefant) da kore aimi gogho usera aminda, yaru didivururoro umo aresa.
- 9 Ninda kaifa kakato totorugetera ainda jokáda, kini mendeni da ade jamena ojighera fetirera.

## 45

### *Kini Evetu Fiftusira Da Yaruri.*

- 1 Na kini da javoda nanda duboda yaru eveva gaveva irira, aimi gate divarena. Gembono dae sise, nanda kotari geke eveva gavevaimi bedo erira. Buku gembari kato nunda sonemba susufikena buraira aminga ava, nanda aviva aimi na sonembari kini da yaru gembarena.
- 8 Ika moor (myrrh) a alo (aloe) a kotugo kásia (cassia) jasisera, ainda muká muno futo ava ninda embo boka aimi muno yavegeraera. Kini da kambo Sino fuka elefanti (elefant) da kore aimi gogho usera aminda, yaru didivururoro umo aresa.
- 9 Ninda kaifa kakato totorugetera ainda jokáda, kini mendeni da ade jamena ojighera fetirera.



- Ninda avo anumba ainda ungo gimandukena ninda datu gagara, ninda evetu seka ereruresa, aimi fetirira. Datu gagara ainda gogho mo isambu goldi (gold) numo bekáimi ariri.
- 10 Arie Kini da Datu Gagara, oroko dengoro indari dae erena, ningi!  
Kini kena vai edo, ninda natofo a kotugo nano namendi dodo, ninda kotari irari sekakena fitaresa.
- 11 Ni eveva gagara andae kini sereregharira, ninda bajari numori, ava sedo nunda sari ava edo ghe!
- 12 Bogu nati Tyre seraera aimi ninda dombu doruse, fuyo fitarera. Kokotofu susu iti fafode nanjogo iritirera barago, ninda dombu darera.
- 13 Arie! Kini da datu gagara kini da kamboda teteriri eregoserá!  
Nunda embo duroghae amo, goldi (gold) imi arigo firiseri.
- 14 Kini da datu gagara amo nunda embo gembari gegembaghaeimi avido irurari, nunda ade jamena tamo sandi iruroro, ne isambu unumbe bu yaoro kini kena terarera.
- 15 Ne ivugaghae riria use foa kinida kamboda terarera.
- 16 Arie nanda kini, nimokena resena, ningi!  
Ninda sasingu vide jamena ghagurugo sirorarera aimi, nembua maneda vasa nene budo kini arera.  
Nine aso, enda da frovensi isambu ainda kini nene edo, kaifa arera.
- 17 Nanda yaru gembena evia sise, ninda bino jighoro eroruse irarira evovodae, a kotugo evetu genembo isasambu sakai nindae sarera, kotugo evovodae sido yarera.  
Nanda yaru gembena evia didivururoro ninda binó ivegedo irurari,

evetu genembo isambu ninda sakai sido evovodae yarera.

## 46

### *Namondeda Sorega Mutari Kato God Numori.*

- 1 God nu namondeda tere jungari vasa fakaragori a fakina ava, nune edo irira.  
Nu namonde dabade irise, sifo evia inono, namonde sonembari dae kato eraira.  
Dara rea sirorarira amo, nu anakora sumbudo namonde sonembarira.
- 2 Ava sedo, namonde jo oju ae arera.  
Enda daradaragharira,  
o doriri gigisedo ya eva jokáda tifugharira,
- 3 o eva teria eredo, duka didivuse, sumbu viti founada beje foró arira,  
o reighi jajovurari aimi, doriri daradaragharira, avata namonde andae jo oju ae arera.
- 4 God da reighi aminda, uvu eni eresufira.  
Aimi, God Iká Bekáda irira ainda kambo kakara kena dubo jama muturaira.
- 5 God reighi aminda irá gheraira ava sedo, jo nanjigo aminda daoro bejae arira.  
Nu sifo ataeghae eredo, reighi ava sonembarira.
- 6 Natofo endada irera, oju teria beká use, ungo ata dadaragayeraera.  
Frovensi a reighi isambu nenda gavanaghae dabade, ere fetedo ungo ata dadaragayeraera.  
God nunda bekaimi barara fugeari, enda munjeraira.
- 7 BAJARI Fakina Kato namondeda jokáda irira,  
Jacob da God mo, nu namondeda tere jungari vasa fakaragori.
- 8 Fuvu, BAJARI rea etiri sirorusira ava, fuge gaove!

- Nu nange nunda fakina iju-guse, enda da reighi mendeni dorusira, ava kote givu!
- <sup>9</sup> Evetu genembo endada isoro use irera ava, nune gajedo seari doyeraera.  
Nu nenda feva ava jighi joredo, nenda goroba fafaki ava fati jore fagedo, nenda bere ava dungeari aviraira.
- <sup>10</sup> Aminguse, nu eminge seraira, “Tataya dovu! Durumuguse, sunghe fete evia kasama evu: Nasuka namoá, na God! Enda jokáda a enda da natofo jokáda, jo eni namongo iraeri. Na teria bekári. Na giti jighari edo irena.  
Ava natofo kasama edo nandae sakai sarera”.
- <sup>11</sup> BAJARI Fakina Kato namondeda jokáda irira,  
Jacob da God mo, nu namondeda tere jungari vasa fakaragori.

## 47

### *Namondeda Bajari Iká Bekáda, God Numori.*

- <sup>1</sup> Natofo isambu ivugai ghabu foku foku ghevu! Yaru divu fumbu aruguse, God dae sakai sevu!
- <sup>2</sup> Ai resira amo, BAJARI iká bekáda mo, igheghi ari da kaugori.  
Kokotofu isambu irera ainda iká bekáda, numori.  
A enda utu gambari utu gambari isambu ainda giti nune jighiraira.
- <sup>3</sup> Nune etiri, namane oro nunda nunda atai de fati fefetuseri. Kotugo, nune setiri, natofo endada irera, namondeda sari ningari useri.
- <sup>4</sup> God namonde dubo ruruse, enda nune gategate futusira.  
Enda nune futusira aindae, namane Jacob da imemesiri ivuga erera.

- <sup>5</sup> God nunda anumba vasada vitiya gheraira aminda, ivugai fumbu aruguse tavuya fusiroro, BAJARI viti ya gheraira.
- <sup>6</sup> Namondeda God kena sakai sise, yaru divore! Namondeda Kinikena sakai sise, yaru divore!
- <sup>7</sup> God mo kini iká bekádari. Nu enda da numamori. Yaruimi nundae sakai saore!
- <sup>8</sup> God nunda anumba vasa kakarago aminda anumbirira.  
Aminda anumbirise, oro mendeni mendeni ava tavo eraira.
- <sup>9</sup> Oro isambu da babojegari, Abraham da God da natofo de dabade totorugedo irera.  
Ai resira amo, nunda fakina tomanako mo, jo isoro embo da amingo iraeri.  
Nunda giti jighari mo, fakina ghaeri.

## 48

### *Reighi Jerusalem, Ututu Saion Ghae\* da Yaruri.*

- <sup>1</sup> BAJARI mo iká bekádari. God da reighi aminda, nunda doriri kakara aminda fetirise, numoa sakai sarera, evevari. Amingaore!
- <sup>2</sup> Saion, God da ututu mo, ikáda a numo bekári. Enda da oro oro isambu,  
Kini tomanako ainda bogu begaya gosuse, ivuga eraera.
- <sup>3</sup> Reighi Jerusalem da furu aminda mave terarira amo,  
ambo sose fetari da vasa eveva God kena tambarira ava, nune ijugusira.
- <sup>4</sup> Kini nanjogo totorugedo, ututu Saion ava sosighi ari dae fuseri.
- <sup>5</sup> Avata, ne ava gi dudukughedo, beka sari bunise, oju sufuseri.
- <sup>6-7</sup> Aminda ne ojuimi biri jarutuse, kau evetu mandi sasingu fumbari dae use, mema itatameraira,

\* 48:: Afige, geke eni Saion dae gefusera, tuturo 2:6 duruda tege, garesa!

- o bouti da natofo eva dika kan-  
jijigo da jokáda ise oju eraira,  
ava useri.
- 8 O namonde mo, God rea usira ava  
namonde nininguseri.  
Avata, oroko namondeda God,  
BAJARI fakina kato ainda  
reighida teredo, totofo na-  
mondeda ditiimi eregoserá.
- Reighié, nune evovodae  
tavo ururari dara eni jo  
tambae arira.
- 9 Arie God, ninda kamboda tere irise,  
namane dubo rurudo refesa  
ava koteráera.
- 10-11 Evetu genembo isasambu irera,  
nindae sakai sise irera.  
Ninda binó tomanakoi ivegedo  
ira utu gambari utu gambari  
tafusira.  
Ni bekáda bekáda use,  
natofo kaifa eraesa ain-  
dae, ututu Saion da natofo  
ivuga arera!
- Natofo ijujuse aito eveva fuger-  
aesa aindae, Judah frovensi  
aminda reighi nanjogo iritir-  
era ava ivuga arera!
- 12-13 God da natofo, na nemo-  
kena resena, namonde furu  
fakarago ututu Saion eminda  
dighi birurughusera,  
aminda viti denghe biru-  
rughuse, ainda duró ava  
tege givu!
- Aminda birurughuse, isoro  
embo da jungari vasa nanjogo  
irira, ava tege gae budo kotise  
irivu!
- Amingaovo dae resena da beká  
mo, sasingu amboda sirorar-  
era aikena eminge sareva.
- 14 “God roeraé isambu etiri  
sirorusira, namondeda God ri.  
Evovodae irarira.  
A namondeda giti evovodae ji-  
jighuse irarira.”
- 1-2 Gekaé ninguvu! Sabua kotofu,  
makasi embo, evetu genembo  
iti fafode isambu, nemokena  
resena,  
dengoro jave ningivu!
- 3 Ghuna basetiri, na oroko ge-  
ka is-  
agha sari dae erena, ningivu!
- 4 Na gita\* doruse ge-  
ka jungarida ava  
saono vosarira.  
Amingedo, ge-  
ka da tuka se dis-  
ugaono ningareva.
- 5-6 Evetu genembo ekoko, nenda  
gugua ghayafadae sakai sise,  
sonemba aminda tambari  
dae kotise irera aimi,  
nanda gitofu edo irera.  
Gitofu resena, aimi na jimbe  
birurugharera, o mema  
dombu eni dombu eni nanjigo  
sirorarira amo,  
na jo oju ae eraena.
- 7 Genembo eni jebuga irari dae sise,  
God kena ghamanai ombu  
bari da kaugo iraeri.  
Jebuga irari da mino tambudo,  
God kena mutari jo genembo  
eni ae arira.
- 8 Ainda tuka mo, evetu genembo da  
jebuga ainda mino mo, teria  
bekári.  
Jo itako tambudo, mutari da  
kaugo iraeri.
- 9 Mino rea mutaetira, aimi jo itako  
sonembari, nu ofofo darige je-  
buga evovodae irari tambae  
arira.
- 10 Namonde isambu kasama erera,  
genembo eni jo ambudo  
nunda gugua bu yae arira.  
Evetu genembo isasambu, eveva  
a ekoko, dubo kotari kakato  
a jiro fafakara embo isambu  
ambudo,  
nenda gugua gayafa nenda  
imemesiridae do dariger-  
aera.
- 11 Ne jebuga iriara da sifo aminda  
mo, ne enda nenda tofodae bu  
jighiriari.  
Avata oroko mo, ofofo nemo  
evovodae irari da vasari.  
Aminda evovodae irarera.

## 49

*Tumondari Ati Ghayafa Kena  
Fitarera, Jebuga Kosasagharera.*

\* 49:4: Afige, ge-  
ka eni gita o uka dae gefusera, tuturo 33:2 duruda tege, garesa!

- 12 Genembo binóde aikena kau daba avori. Nu binonde irira aimi jo sonembari jebugae arira. Nu sino fukai ambarigo arira.
- 13 Evetu genembo mave totofo nemoa tumonderaera ava kote givu.  
Mave nesuka nenda gugua tumonderaera, aikena eminge sirorarira.
- 14 Ambari mo, evetu genembo setena, ainda giti jighari use, nune unumbe bu ya dari, sifi ambari garera.  
Evetu genembo kosasa tefo aimi ne de atai fatoro, ambudo totoi masa arera.  
Nenda reighi dodo ofofo vasada irarera.
- 15 Avata, God namoa nune ambari da fakina aminda ava saghimbe bari jebugarena.
- 16 Erá, genembo eni gugua de arira aindae, dubo mema eove!  
Komana ati ghayafade ururarira ainda sifoda, erá mema eove!
- 17 Ai resira amo, nu ambarira, nunda gugua jo bu yae arira. Jo nunda gugua dabade ya ofofoda vosae arira.
- 18 Genembo mave endada irise, nunda irari aindae ivuga ururari natofo nundae sakai sarera,
- 19 numoa barago nombua mane ambudo, ningaminda isera, daba aminda vosarira.  
Vosedo, usasa jo gae irise, evovodae tumbada irarira.
- 20 Genembo binode aikena kau daba avori. Nu binonde irira aimi jo sonembari jebugae arira.  
Nu sino fukai ambarigo arira.
- 1 BAJARI God fakina tofo aimi beka afigedo, evetu genembo iji vitarida a iji vosarida irera, ava isambu numokena furoro dae aghi erira.
- 2 God nunda ututu Saion\* gari duróde aminda ghedo, nunda usasa janimberaira.
- 3 Namondeda God refira, a jo sainghe furaeri. Nu avaraka buburaghae dombuda aviri, yaura vovoga aimi jimbi birurughiri refira.
- 4 Nunda natofo kau nange ijujarira ava, utu endaghae foa gosuroro ijujari dae resira.
- 5 “Nanda natofo nanda geka ningiraera, a nanda evovo geka† kaifa ari dae sise, joba namokena de dungedo futusera, ava aghi aovo furore!”
- 6 Utu da duróimi ijugerira, God mo, ari bekáda bekáda ava nembo eraira.  
A ijujari kato beká, numori.
- 7 Nanda natofo Israel embo, nininguruvu, saone! God, nenda God namori.  
Nenda kosasa rea eraeva isambu, tegono ningareva.
- 8 Ne dombuda sari dae erena, avata, nenda joba muturaeva ekori o sinofuka de dunge muturaeva jo inono irae ava erá koteóve!
- 9 Eregoseva? Borumakau da kandananda nenda karoda irira, a gouti unduraeva barago, redae bareni?
- 10 Ai resira amo, taimada sino fuka a borumakava nanjogo jiro fumbari aminda unduraeva isambu nanda fitariri.
- 11 Taima da rika a roera endada jebuga irera ábarago nanda tofori.
- 12 Na ighoi ambaetena, jo nendae bayau dae benunu sae aeteni.

## 50

*Namonde God Tumonde Bainghari Da Emboro Bekáda Ise, Nundae Aiyakoe Saore!*

\* **50:2:** Afige, geka eni Saion dae gefusera, tuturo 2:6 duruda tege, garesa! † **50:5:** God Da Geka seka afige ya geka se disugari da vasa aminda geka “emboro” afige tegaso dae resera. Eminda “evovo geka” irira ainda tuka daba avori.

- Ainda beká mo, enda da roera reju irera, isambu nanda tofori.
- <sup>13</sup> Na burumakauva kandana ainda fisi, o gouti da ororo mindarena, aĩ?
- <sup>14</sup> Ava sedo, God fakina kato, na ne dombuda resena ainda beká mo eviri.  
Ne rea namokena mutari siseva ava, mutareva.  
Avata nenda joba beká namokena mutareva amo, beka afigedo nandae aiyakoe sareva, avori.
- <sup>15</sup> Dara nanjigo furarira amo, nandae kori sevu, ne sonembururono nandae sakai saove!
- <sup>16</sup> Avata God ari ekoko embokena eminge resira, “Nanda Agho Dari redae teguterevu?  
Kotugo nanda evovo geka nombua manekena futusena, aindae redae sakai resevu?”
- <sup>17</sup> Aminge resena da beká mo, ne dengoro indiraena ava bu fugeraeva. Nanda geka itako jo bae eraeva.
- <sup>18</sup> Ne bagia kakato tambudo, nemonde komana usevu. Aminguse, yagera kakato ainde dabade tatedo, umo use ireva.
- <sup>19</sup> Ne evovodae besiga use, geka eko sari dae kaifa use irá gheraeva. Ne kotae kotae gungubo seraeva.
- <sup>20</sup> Ne totofo nenda nano namendi dae aji seraeva. A nenda irari gosuse ijujeraesa.
- <sup>21</sup> Ne amingudo fuseva ava, na reju eni jo saeri. Amingudo feno gido, na nemongo ava kotisevu.  
Avata oroko ne dara eraeva ava isagha sise, dombuda resena, ningivu!
- <sup>22</sup> Na ningi ningaego eraeva, ava dengoro afige ningivu!  
Jo nanda geka ningae areva amo, ne sosighi aono, jo mave ne sonembae arira.
- <sup>23</sup> Na kakara ari sareva amo, beka afigedo, nandae aiyakoe sareva.

- Ainda beká mo, nenda joba beká namokena mutareva, aiyakoe sari avori.  
Mave nanda geka ningido amingarira amo, ne na sonembuse jebuga mutarena.

## 51

*David Mema Use, God Nunda Ari Eko Kote Doyare Dae Benunu Sisira.*

- <sup>1</sup> Arie, God, ninda dubo bari sifo ghousa ijugeraesa aindae sise, na joka aetesi!  
Ninda joka ari tomanako aimi, nanda ari ekoko isasambu ghaje fugaetesi.
- <sup>2</sup> Nanda ari ekoko isambu seghaso, na eveva aone!
- <sup>3</sup> Nanda dara ava, na kasama erena.  
Nanda ari ekoko ainda bouvu ava, sifo evia inono, na itata-muse irá gheraena.
- <sup>4</sup> Na nimokena ari eko useni, nisuka ninda dombuda ari eko eteno gido, aindae ni nandae “eko” sisesi.  
Ava sedo, namo ijujeresa amo, evevada eresa.  
Ã kotugo, nanda dara da bouvu ava fumbono dae resesa amo, geka bekári.
- <sup>5</sup> Na sirorusena amo, ari eko jokáda siroredo refena.  
O saone, na aya tambuno ambo tafusegusira ai tano ghedo, na ari eko jokáda siroredo refena.
- <sup>6</sup> Ni geka beká sari ã ari beká ari ava uju eraesa.  
Avori, ninda dubo kotari ava namokena mutaso sembudo, nanda dubo joká bedo are!
- <sup>7</sup> Nanda ari ekoko bu darigaso, na eveva aone!  
Nanda ari ekoko seghe kosughe fugaso, na eveva aone, nanda asisi forosogo beká ava are!  
Avata rofoma amo jo foyago beká iraeri.  
O namo segharesa amo, nanda dubo joká foyago beká ava arira.
- <sup>8</sup> “Avori” saso, na sekago divu fuse, sino tavuya da duka nininguse, riria aone!

- Ni nanda jebuga fati munjisesi, a kotugo, nanda fakina ava jighi bejisesi.  
Avata sonembaso, na sekago dubo jama arena.
- 9 Ninda diti gajaetesi! Erá fuge, nanda ari ekoko geose!  
A nanda ari ekoko isasambu ghaje fugaetesi!
- 10 Arie, God, nanda dubo aso, eveva ã kakara are.  
Ã kotugo, asisi seka eni, ni tumonde gogoghombarira ava, nanda dubo jokáda fitaso irare.
- 11 Erá na dirigeóso, ni do buvu ya esike irione!  
Ninda Asisi Kakara namokena erá bu dirigeóso yeure!
- 12 Ninda sonemba muteaso, namane ivuga eraera. Ainda ivuga ava, sekago mutaso itatamaone!  
Ã kotugo, na nange ninda geka ningido, sekago ava ari uju arena ava kotise, ni sonembaso dae resena.
- 13 Amingaresa amo, na ninda agho dari ari ekoko embokena iju-gaono kasama use, ne dubo jovereghari, foa ni tambarera.
- 14 Arie, God, na genembo deteno ororo gutusira ainda bouvu ava,  
joka edo erá namokena muteose dae sise,  
benunu resena.  
Sonembaso, na jebuga irarena.  
Aminguse, na ninda kavevera aindae,  
ivugaghae osa sarena.
- 15 Bajari, sonembaso, na beka fainghedo, nindae sakai sarena.
- 16 Na joba nimokena mutaetena, avata ni joba amo jo uju ae eraesa.  
Joba futuse dungeoro avirureari ni gido, jo ivuga ae eraesa.
- 17 O joba nane mutarena amo, na tumo darido,

nanda ari ekoko vujeguse, nanda asisi ninda ungodá fitarena.

- Arie, God, evetu genembo namoá avaga tumo darido nimokena ya gheraera, nenda asisi ava, ni jo imboe use ighagha ae aresa.
- 18 Arie, God, ututu Saion\* gido, veka eveva ururaso fakina barira. Jerusalem da furu ava, sekago dighaso, namane gajari irarera.
- 19 Amingaso gido, joba nine mutoro dae sisesa ava mutarera.  
Mutoro gido, ni ivuga aresa.  
Amo, burumakava (bulls) ninda oltada fiti dungoro gido, ni ivuga aresa.

## 52

*God, Genembo Ari Ekoko Udo Fusira, Ava Detiri Ambududurusira.*

- 1 Arie kotofuko, ni redae ninda dara eraesa aindae sakai seraesi?  
Ni rekato evovodae evetu genembo God tumonderaera, ava katiyavara use, tofo sakai seraesi?
- 2 Ni kokomana sosighi ari dae man-aka garuse irá gheraesa.  
Ni aji, a unongu ava seraesa, gharita da dikagori.  
Ni sifo ghousa tefo tefo gesire use irá gheraesa.
- 3 Ni ari eveva gaveva imboe use, ari ekoko ari ava ninda uju bekári.  
Kotugo geka beká jo sae irise, gungubo teria futo seraesa.
- 4 Arie, ni genembo aviva fotatari!  
Ni nanjigo gekaimi mema mutaso,  
komana itatama arira aindae, ivuga aresa.
- 5 Ava sedo, God ni dari ghamo ruruse iraresa.  
Ni reda iresa, aminda ghe God ni saghimbe bu fugarira. Ni diti jebuga iresa, ava sandi bu fugari du degite ambaresa.

\* 51:18: Afige, geka eni Saion dae gefusera, tuturo 2:6 duruda tege, garesa!

- 6 Avaga nimokena sirorari, evetu genembo irari dambugo ava gido dudukugarera.  
Amingedo, ne tuturo edo, nimoa dere jise eminge sarera,
- 7 “Givu, genembo eregoseva emo, nunda tumondari tofo nunda guguakena fiftuse, nu gugua aimi sonembari, jebuga tambaetira ava kotise, irá ghusira.  
Nu jo God kena ambo sosise, fakina bae usira.”
- 8 Avata namo ika orivi da kaugo, God da kamboda viti irise, igi bababaghuse javuji eraira, amingori.  
God na evovodae dubo buraira, ava tumonduse irena.
- 9 Ni rea usesa ava kotise, na sifo ghousa aiyakoe sise sakai sarena.  
Ninda natofo da dombuda na ere fetedo, ni eveva eraesa ava, osa saono ningarera.

### 53

#### *Mave God Ighagha Arira Aikena Mo, Kotari Tefori.*

- 1 Mave “God tefo” kotarira amo, nu gogovara ai sari garira.  
Evetu genembo avavaga nenda dubo jóká bebeta edo irera.  
Nenda ari isambu foká da kaugori. Eniimi jo ari eveva ae eraira.
- 2 God utuda irise, evetu genembo fuge gosuse, evetu genembo dubo kotise,  
numoa tumonde baingheraera ava, tava eraira.
- 3 Avata ne isasambu emboro kosasaghedo ari ekoko eraera.  
Ne totofo bebeta edo irera.  
Jo dabakoimi ari eveva ae eraira, eniko tefo bekári.
- 4 God resira, “Ari ekoko embokena kotari tefori.  
Ne nanda natofokena bagia use, namokena jo banungae eraera.”
- 5 Giti ne jo oju ae, avata ne amboda ghamo takegha arera.

Giti amingo ava jo itatama aeri.  
Ai resira amo, God nunda natofo Israel embo da gitofu ava dari sirivu aoro,

nenda etu bu mainge mainge arira.

Bajari anakora ne imboe use, gukai futusira, ágido, Israel embo eredo,  
ne de atai fati fetarera.

- 6 Arie, jebuga Saion\* ghedo foa Israel embo kena sirorare!  
God nenda ati ghayafa sekago mutari barera amo,  
Jacob da imemesiri, Israel embo, isasambu ivuga use irarera.

### 54

#### *Bajari Nu Nange Gitofukena Gagara Aetira, Ainda Banungariri.*

- 1 Arie, God, ninda javo fakinagoimi na sonembuse, vujege jebugaone!
- 2 Arie, God, nanda benunu resena evia, ningaso dae resena!
- 3 Ivuga kakato namo dari dae refera.  
Evetu genembo joka ari tefo, God ningi ningae eraera,  
aimi namo tambu doaro ambono dae refera.
- 4 Avata, nanda sonemba a sorega fumbari kato mo, God numori.
- 5 Gitofu nandae ari ekoko ari ser-aera, aimi jovereghe nemoa gayare! Nu rea ari sisira ava use, ne sosighi arira.
- 6 Arie BAJARI, na ivugaghae joba nimokena mutarena.  
Ni kavevera eraesa aindae, na nimokena aiyakoe sise sakai sarena.
- 7 Na dara nanjogo da jókáda ireno, na bu darigeteso jebuguseni.  
Nanda gitofu doreso, nanda diti mokoi gosuseni.

### 55

#### *Genembo Nunda Komanaimi Aito Usira, Aindae God Numo Sonembare Dae Banungusira.*

\* 53:6: Afige, geka eni Saion dae gefusera, tuturo 2:6 duruda tege, garesa!

- 1 Arie God, nanda benunu ningi!  
Erá, nanda benunu resena  
evia imboe use, ninda den-  
goro gajeose!
- 2 Nanda benunu ningido na  
sonembe! Na mema itatama  
use, kotari tomanako futo use,  
garoro eteni.
- 3 Gitofuimi na daoro ambono dae  
setero ningido, ungu ata  
dadadagherira.  
Ari ekoko emboimi na kateyavara  
urureoro, dubo vevera use  
irena. Ne namokena dara bu  
refera.  
Aminguse, ne janje ekoghae  
na gari imboe eraera.
- 4 Na ghamo takegha erena. Na daoro  
ambaetena aindae oju use, go-  
fari beká edo irena.
- 5 Beká resena, na ojuimi duduku  
dudukughuse ungu ata  
dadadagherira.  
Nanda tamo ghaunja bambari-  
guse, ghamo kenkenghedo  
gherira.
- 6 Namokena ungu kau rika ribo da  
ghabu iraeli! Na ghumbu  
esike yama ghamo asegaeteni.
- 7 Na ghumbu soka beká yama reighi  
evetu genembo a uvu irae da  
vasada iraeleni.
- 8 Na bibitaimi ghumbu yama, nasuka  
nanda jungari vasa tambu  
jungaeteni.  
Yaura vovoga eko beká darige ya  
esike jungaeteni.
- 9 Arie BAJARI, aso nanda gitofu beka  
soesa saore!  
Ainda susu mo, reighi begaya  
aminda kaera tataya a tit-  
igho ari avanembo urureari  
giraena.
- 10 Kaera tataya a titigho ariimi biru-  
rughuse, sifo tumba ava, ku-  
sia bagia a dara dombu eni  
dombu eni bu refera.
- 11 Sosighi ariimi vasa isambu bedo  
edo irira.  
Maketa vasada, kokomana  
katiyavaraimi a kotugo  
kokomana derariimi gan-  
jimberira.
- 12 Gitofu eniimi namoa dere jise  
gegha yaruda fitaetira amo, na  
fakina edo fetaeteni.  
O nanda vasai namoa e  
darigedo, totofo sakai sise  
na dere jiraetira amo, na  
numokena jungaeteni.
- 13 Avata genembo namokena mema  
bouvu erefutira, amo nimori.  
Ni nanda karona, nanda ambo  
bego, a kotugo nanda komana  
beká edo iriasi.
- 14 Nangae kiki eveva gaveva dabade  
se ningido ghuseri, a kotugo  
God da tafaroro kamboda  
teredo,  
tafaroro dabade edo  
ghuseri.
- 15 BAJARI, aso nanda gitofu isambu  
evetu genembo seka irise  
amomonjegarera.  
Aso, nenda ofofoda diti jebuga  
furugaoro dae resena!  
Nenda ofo kambo mo ari  
ekokoimi bedo edo irira a  
nenda janje joká barago  
ekokori.
- 16 Avata namo, BAJARI God kena  
sonemba dae kori saono,  
nune namoa saghimbe bari  
jebugarena.
- 17 Ataeghae, isonga a kotugo tumba  
evia inono nanda bouvu,  
mema numokena osa sise a  
aoro sirureono,  
nu nanda banungari ningi-  
raira.
- 18 Gegenembo digari futo namo  
daoro ambono dae eraera,  
avata God na gagara urureari,  
na jebuga jovereghe foa gher-  
aena.
- 19 Ne God jo igheghi ae irise, dubo  
jovereghari imboe eraera.  
Ava sedo, God roera isasambu  
reju irira ava kaifa eraira,  
aimi nanda benunu ningido,  
ne dedo atai duboda fa-  
tarira.
- 20 Nanda komana manai nunda beka  
gajari ava bejise, nunda koko-  
mana ava dedo gaedo ghari  
dae usira.



- 21 Nunda geke mo nu vivigori, avata nunda janje jokáda kokomana imboe ariimi bedo usira.  
Nunda geke mo, ferukogori, avata rea sisira aimi, garureari mema siroredo ghusira.
- 22 Nenda bouvu mema BAJARI kena fiti dovu, nendae sorega nune fumbarira.  
Nu jo itatako doyari, evetu genembo bekáda bekáda eraera ava, gitofuimi de atai fatae eraera.
- 23 Avata God, evetu genembo kokomana aito use daoro ambarera, ava seka iroro,  
nine rete budo foama nenda ofofoda gorogharesa.
- O namo, na God nisuka nimoa tumondarena.

## 56

### *Tumondari God Kena Fitarera, Ainda Gekari.*

- 1 Arie God, nandae joka aresa. Ai resira amo, nanda gitofu na de babasigeraera.  
Sifo evia inono namokena mema bouvu muturaera.
- 2 Osogo ari kakato sifo evia inono namokena mema bouvu muturaera.  
Namokena tataya eraera amo, jo daba etoto iraeri.
- 3 Arie, BAJARI, na sifo reda oju eraena amo, nanda tumondari nimokena fitiraena.
- 4 God nunda sari nanjogo ava eraira aindae, na sakai seraena.  
Na nanda tumondari God kena fitiraena, ava sedo, genembo eni namokena reja arira, na redae oju areni?
- 5 Nanda gitofu sifo evia inono namokena dara dombu eni dombu eni eraera.  
Nenda kotari namokena eko vanembori.
- 6 Namoa daoro ambono dae uju use, ne foa dabade junge fetedo,  
nanda yari furari fuge gose, namoa kato eraera.

- 7 Arie, God, nenda ari eko ari dae koteramera aindae, daso ghamo barera!  
Ninda janje ekoimi ururaso kasama edo, ghamo barera.
- 8 Nanda irari jarutarigo amo, ni kasama eraesa. Nanda diti jivu ninda roroda averege kaifa aso dae resena.  
Nanda jivu nanjogo vovoserira tegedo, ninda bukuda gembeso irira, tano.
- 9 Na nimokena sonembadae kori sarena amo, nanda gitofu kosegaso jovereghe yarera.  
Aimi na kasama arena, God nangae irera.
- 10 BAJARI nunda sari nanjogo urureari na sakai seraena amo, nangae irera ava kasama erena.
- 11 Na nanda tumondari numokena fitiraena, ava sedo, genembo eni namokena reja arira, na redae oju areni?
- 12 Arie God, na nimokena joba rea mutari dae beka gagojusena, ava mutarena.  
Nindae aiyakoe sise nanda joba nimokena mutarena.
- 13 Ai resira amo, na tataya jokáda ambaeteni, avata na saghimbe beso jebuguseni.  
Ni jo doyasogitofuimi na de atai fati fetae useri.  
Ágido, ninda dombuda usasa gose, jebuga irena.

## 57

### *Genembo Eni God Sonembare Dae Banungusira.*

- 1 Arie God, nandae joka beká, joka beká aetesi, ainda susumo na nimokena ambo sose fetari refena.  
Ninda ghabu duruda terono, yaura vovoga ekoimi na afuregaetira, ava darigari ghamo asegarena.
- 2 Na God ika bekáda aikena kori seraena.  
God, namokena rea aono dae uju eraira, ava nune ari beká sirorarira.

- 3 Nune utuda irise nanda benunu da mino futuse sari na jebugarena.  
Evetu genembo namoa kateyavara eraera ava, nune dedo atai duboda fatarira.  
Aminguse, God namokena rea ari sisira ava use, na evovodae dubo buraira ava ijugarira.
- 4 Nanda gitofu, raioni (lion) genembo mindiraera da kakaugo aimi na jimbe birurugheteri.  
Nenda dika mane mo, kau goroba a feva da goroba amingori. Nenda aviva mo, kaeya da dikagori.
- 5 Arie God, ninda teria kau mavega ava utu aminda ijuge, isagha are! Ninda usasa mutaso vose endaé beda are!
- 6 Nanda gitofuimi nane ombono bari dae sedo, futo bariseri. Na dubo bunise irena.  
Na vosono sandari dae sedo, nanda emboroda bako ghaghambuguseri, avata makoe,  
ne totofo du vovoseguseri.
- 7 Arie God, nanda tumondari nimo-kenana amo jo roimi ari doyaere arena. Na yaru didivuse, ninda javo jighono erarira.
- 8 Arie namoako, erone! Nanda gita\* a yuka ghae, divari dae erena! Nane giti yaru didivururono, iji vitarira.
- 9 Arie BAJARI, evetu genembo utu gambari utu gambari irera, ainda dombuda nindae aiyakoe sarena.  
Natofo isambu irera, ainda dombuda fetedo, ninda javo jighono erarira.
- 10 Ni dubo rurudo refesa aimi, enda beda edo viti ya utu tamburaira.  
Ni rea ari seraesa ava, bekáda bekáda eraesa, aimi viti ya utu tamburaira.
- 11 Arie God, ninda teria kau mavega ava utu aminda ijuge, isagha are!  
Ninda usasa mutaso vose endaé beda are!

## 58

### *God Kena Banungaoro, Mino Mutari, Ari Ekoko Embo Ghamo Baore!*

- 1 Reighi da babojegari ne geka bekáda bekáda vegeraeva, ai? Ne evetu genembo isambu inonda ijujeraeva, ai?
- 2 Tefo! Nenda kotarida mo ari ekoko nanjogo aeteva ava kotise ireva.  
Aminguse, kusia bagia reighi eminda ututuse kaera tataya eraeva.
- 3 Ari ekoko embo ne tini jokáda siroredo buvurutusera, ai tano ghedo kosasa udo refera. Ne sirorusera, ai tano ghedo, gungubo sise irá gheraera.
- 4-5 Jingabu da kakaugo ava nenda beka kae aimi beda edo irira. Avata, ne jo, jingabu mendeni genembo kosimi urureari tamo dedo jo gambae eraera, aminga ava iraeri.  
Ne geka ningaego use, sifo ghousa eko use irá gheraera, iji nanjigo jo dababae eraera.\*
- 6 Arie God, gegenembo ekoko setena, raioni (lion) ekoko aikena eraera, aminga ava use,  
nenda bekada dika de jorege. Arie BAJARI, raioni fakina kato einda dika jighi sosofughe!
- 7 Gegenembo amo uvu usoro sagheraira amingo ava use, manje tefo aore!  
Kau vive a kikisa emboroda fati jasivi geraera ava, nemokena amingari gaso dae uju erena.
- 8 Nine aso, ne kau tutubia ambu toto tive enda jineraira amingari gaore dae uju erena, o kau

\* 57:8: Afige, geka eni *gita o uka* dae gefusera, tuturo 33:2 duruda tege, garesa! \* 58:4-5: Genembo yarué gefusira, jingabu *cobra* seraera kotise gefusira. *cobra* mo evetu genembo mendeni fekuimi fuseari jingabué tamo dedo, nenda uju ava use genembo tofo o evetu genembo dengesida umo eraera, jo gambae eraera.

- kokoiya ambari ava siroredo  
sifo sevo jo gae eraira amin-  
gari gaoro dae uju erena.
- <sup>9</sup> Na uju erena, ne jo itatama ae  
iroro,  
kau vive firirigheoro, gha-  
rasa eari, yaurai bu fuse-  
ari manjeraira aminga  
ava,  
God janje ekoko edo, ne dari  
ambore!
- <sup>10</sup> God ari ekoko embo sifo reda  
nenda ari ekoda mino futuse,  
ne dari ambarera amo,  
dambu irari emboimi gido,  
dubo jama ghae vure ja-  
sise, ari ekoko emboda  
ororo yausi gutuse ya foa  
gharera.
- <sup>11</sup> Ava gosuse, natofoimi eminge sar-  
era, “Geka bekári, evetu gen-  
embo dambugo irá gheraera,  
nenda mino sirorari barera.  
Geka bekári, God amboda  
enda da evetu genembo  
ijujarira seraera amo,  
beká seraera.”

## 59

### *Bajari Nu Nange Gitofukena Gagara Aetira, Ainda Banungariri.*

- <sup>1</sup> Arie, nanda God, nanda gitofukena  
namo sonembe!  
Mave namoa dari dae erera aikena,  
kosege fete!
- <sup>2</sup> Evetu genembo ari ekoko ari kakato  
aikena na sonembe!  
Evetu genembo kokomana anakora  
detero amomonjegusera evia,  
erá doyeoso, na deore!
- <sup>3-4</sup> BAJARI, gi! Evetu genembo setena,  
nemokena joka ari tefo bekári,  
aimi na daoro ambono dae,  
junge kaifa erera.  
Arie BAJARI, na kosege dari dae sise,  
junge fetari dae eresufero da  
beká mo, jo nanda ari eko eni  
usena,  
o dara usena, o kosasa eni usena,  
aindae sise erera.
- <sup>5</sup> BAJARI God fakina isambu da tofo,  
Israel da God, ere fu, na so-  
rase!

- Evetu genembo ni ighagha edo,  
namane dari dae sise, aito  
usera aikena, erá joka eose!  
Ne rea usera ainda mino ava  
mutu, budo itatama aore!
- <sup>6</sup> Ne ungobu evia inono jovereghe  
foa, bogu begaya eminda sino  
maneimi gangara sise dein-  
dangheraera,  
aminga ava eraera.
- <sup>7</sup> Evetu genembo setena buvudo,  
kateyavara use, jijivu ekoko  
resera ningi!  
Geka ekoko nenda bekáda buyu-  
ruterira amo, tataya da kaiya  
ainda kaugori.  
Ne rea resera amo, mave enii jo  
ningae ari ava kotise, resera.
- <sup>8</sup> Avata BAJARI, ni nendae gegha ji-  
raesa,  
evetu genembo ni ighagha eraera  
ava, dere jise gegha seraesa.
- <sup>9</sup> Arie God, na ambo nimokena  
sose feteono, fakina nine futu-  
ruraso, na fete gogoghomber-  
aena.
- <sup>10</sup> Nanda God na dubo buraira aimi,  
namokena fuse,  
nanda gitofu de atai fati fefetuse,  
ijugururari garena.
- <sup>11</sup> Arie God, namanenda Ba-  
jari a sorega kato,  
namanenda gitofu daso am-  
barera amo,  
nanda natofo ninda sonemba  
kotae arera. Ava sedo, ninda  
fakinaimi, ne ondido bu soesa  
fugaresa.
- <sup>12</sup> Nenda bekaimi dara eraera, nenda  
geka isambu ekoko vanem-  
bori.  
Totofu nenda gogore ariimi  
jovereghe nemoa gayari am-  
bore!  
Gitofu resena aimi, gungubo  
sise, jijivu teria futo seraera  
aindae,
- <sup>13</sup> ninda janje ekoimi ne sosighi aso  
manjarera.  
Amingaso, evetu genembo utu  
gambari utu gambari aminda  
isambu kasama arera, God  
ni Israel tavo use kaifa er-  
aesa.

- 14 Ne ungo bu evia inono jovereghe foa,  
 bogu begaya eminda sino maneimi gangara sise deindangheraera,  
 aminga ava eraera.
- 15 Kau sino mane bayau tava use, jo mindoro inono ae urureari, gangaraghae deindanghuse eraera, amingeraera.
- 16 Avata namo, ninda fakina aindae yaru divarena.  
 Sifo evia inono nindae beka fainghedo, na evovodae dubo buraesa aindae, yaruimi koko fuge divarena.
- Ni na gagara urureaso, nanda dara sifoda nimokena ambo sose feteraena.
- 17 Na nindae sakai sarena. Nimo nanda bereri.  
 Arie God, nanda sorega kato nimori. God, nine na evovodae dubo buraesa.

## 60

### *Mema Itatama Use, God Ne Sonembare Dae Benunu Siseri.*

- 1 Arie God, ni namane imboe use namane de atai fati fefetusesi. Ni namanekena janje ekoko use iriasi. Avata oroko mo, dubo jama edo jovereghe, namane jighaso erore!
- 2 Nine eteso, reighi Israel eminda enda daradara ghuse, sasarigedo betira betira ari usira.  
 Enda benbanghuse embebejerira. Ava sedo oroko ava, aso, fa nunda ari fatonga ava are!
- 3 Nine eteso, namanekena roera fakarago siroriri, mema teriogo beká eretafera.  
 Namanekena uvu fakara mutari geteso, namane teteteghuse ya foa gheraera.
- 4 Evetu genembo ni igheghi eraera, aikena tataya refira ava dari-gaoro dae sise,  
 ninda sonembada tano jigheso eretira.
- 5 Ninda natofo dubo buraesa ava,

- nange darakena darige jebugaetera ava kotise resena, namanenda benunu ningi!  
 Ningido, ninda fakina tomanakoimi namane saghimbe, bu darige jebugaore!
- 6 God nunda tafaroro kambo kakarago aminda irise sisira, “Reighi Sekem nane sosighi e budo, tano ghoreda, nanda natofokena soro vesa arena. Enda uvu ghajughu tevisa Sukot seraera, ábarago nane sosighi e budo, tano ghoreda, soro vesa arena.
- 7 Gilead frovensi mo, nandari, a kotugo Oro Manasseh ningiaminda anumbirera, ábarago nanda tofori.  
 Ephraim ondi da jokáda mo, nanda isoro embo sirorudo refera,  
 kotugo Judah ondi da jokáda nanda kini (king) sirorudo refera.
- 8 O Moab mo, nanda uvu dimbu gutari agha dae ererurena.  
 A kotugo natofo Edom da vasa nanda tofori.  
 Ata anoso goroghusena amo, nanda yoyovari, aimi imbarara ururono irarira.  
 Filistia embo da enda sosighi e ruruse, na sosighi e bari da kuvai koko fuge resena.”
- 9 Arie God, na mave unumbari ya Edom embo da reighi begaya beká Sela, karo iti kinkanghusera,  
 aminda beje terareni? Na mave giti jighi bu ya aminda teredo sosighi areni?
- 10 Arie God, ni namane mo, imboe beká usesi, ai?  
 Arie God, ni namaneda isoro embo tataya ari dae yarera, ni yaresa, ai?
- 11 Arie! Sonemba futuru, gitofude isoro aore! Evetu genembokena sonemba bari sarera amo,

- beká eni jo sirorari bae arera.
- 12 Namonde God sonembururari tataya arera amo, gitofu de sosighié atai duboda fafatigarera.  
Amo nune namondeda gitofu firirighari, du fafasarera.

## 61

### *Genembo Eni God Numoa Kaifa Tavo Are Dae Benunu Sisira.*

- 1 Arie God, nanda sorara ningi! Nanda benunu ningaso dae resena!
- 2 Na vasa ajagha beká aminda fetirise, nimokena kori resena. Mana mana use resena, na budo fitaso, ambo sose fetari vasa eveva aminda jungase!
- 3 Ainda susu mo, ni nanda jungari vasa evevari. Aminda nanda gitofu na jo tambae arera.
- 4 Na do evovodae ninda vasa kakarago aminda irone! Arie, namoako, ninda ghabu duruda afurugaso, eveva irone!
- 5 Arie God, ni nanda beka gajari ningesi. Ningido, natofo ni igheghi eraera, aikena rea mutaresa ava,  
anakora namokena muteso ruruseni.
- 6 Kini da irari da ghaeko do ghousago yare! Nunda jebuga erá totoi gombu eure!
- 7 Arie God, nu evovodae ninda dombuda irise, namane kaifa edo ghare!  
Nu dubo buraesa, ágido nu nange kaifa ari sisesa ava use, nu kaifa edo ghe!
- 8 Amingururaso, nindae sakai sise, evovodae ninda javoda yaru didivuse sakai sarera.  
Sifo evia inono, nanda beka gajojuse rea mutari sisena, ava mutono baresa.
- 1 Na durumugedo, God da sonemba kaifa use irena, God nusuka na sonemburureari,  
dara a mema jokáda jebugeraena.
- 2 Namu nusukako nune gagara urureari irá gheraena.  
Nanda sorega nune fufurureari, evevada irá gheraena.  
Numokena ambo sose fefetureono, gitofuimi jo fua na de atai duboda fatae eraera.
- 3 Na karo bununughari amingori, namokena fakina dadabetira. Ne rekato na sifo ghousa de babasegari dae eraevu?
- 4 Na sifo ghousa fitovo vosono dae manaka garuse irá gheraeva. Ne nandae aji sise irá gheraeva. Nenda bekaimi nandae sakai seraeva.  
Avata nenda janje jokaimi na simbora eraeva.
- 5 Na nanda tumondari isasambuimi God kena fifituse irá gheraena. Namu sonembari jebugari dae sise, nusukako numoa gigituse irá gheraena.
- 6 Namu nusukako nune gagara urureari irá gheraena.  
Nanda sorega nune futurureari, evevada irá gheraena, numokena ambo sose fefeturureono,  
gitofuimi jo fua na de atai duboda fatae eraera.
- 7 Nanda jebuga nengae binóghaeda susu mo, God numori.  
Namu gagara ari kato fakinago mo, numori. Numo nanda bereri.
- 8 Arie, nanda natofo, nenda tumondari sifo ghousa God kena fifituse irá ghedo ghevu!  
Nenda bouvu mema ava numokena sedo ghevu! Ainda susu mo, namondeda bere numori.
- 9 Endada evetu genembo isasambu mo, eni jo ghousago irae arera. Kokotofu kotugo sabua isasambu God da dombuda eveva eni tefori.

## 62

### *God Namonde Kaifa Eraira, Ágido Nusuka Numoa Tumondaore!*

- Nenda bouvu kau mavego ava sikere aetesa amo, isambu tefo bekári.
- <sup>10</sup> Kokomana dedeuse, nenda gugua baresa ava, erá koteove!  
Erá komanada gugua bagia bareva aindae tofo sakai seove!  
O nenda gugua moni roera diguturarira amo, erá gido ghamo beove!
- <sup>11</sup> Avori, fakina isambu God da tofori, ava nune sirureari na umbo nanjogo ningido ghuseni.
- <sup>12</sup> Kotugo ni evetu genembo isasambu dubo buraesa.  
Arie Bajari, nisukako nine evetu genembo isambu da ari rea eraera aminda gosuse, mino mutaso barera.

## 63

### *God Dae Uju Beká Aore!*

- <sup>1</sup> Arie God, nanda God nimori.  
Nanda janje nimokena afigedo gherena.  
Nanda janje joka isasambuimi nindae uju beká erena.  
Kau enda kareva irae kainghari beká betira sasarigari-guse nanda asisi nindae uju use angasa angasa gherira.
- <sup>2</sup> Ninda vasa kakara aminda isagha aso gaeteni.  
Ninda fakina, a duro kakaraghae ava ijugaso gari uju erena.
- <sup>3</sup> Ninda dubo bari, a kotugo kavevera mo, numo bekári, jo roera eni enda eminda amingo iraeri.  
Na aindae sedo nindae sakai sarena.
- <sup>4</sup> Na sifo ghousa nindae aiyakoe sido ya ambarena.  
Na nanda ungo jighono erorurari nimokena banunguse irá gharena.
- <sup>5</sup> Ninda dombuda fetirise, nanda asisi kirumu berugaso mindi inono arira. Nindae roro use yaruimi sakai sise irarena.
- <sup>6</sup> Na avari vasada fasirise, nimoa koteraena, tumba soro ghousa

- nimoa kotise fase irá gheraena.
- <sup>7</sup> Ni sifo ghousa na sonemberaesa aindae, ninda ghabu itumo duruda irise, na ririaghae yaru seraena.
- <sup>8</sup> Na nimokena gangono ururono, ninda ungoimi na kaifa e tavo ururaso, jebuga irá gheraena.
- <sup>9</sup> Mave namoa daoro ambono dae kato eraera, ne ambari embo da vasada ya vovosegarera.
- <sup>10</sup> Ne isoro tataya use, daoro sirivo arera. Nenda tamo gambari sino maneimi mindarera.
- <sup>11</sup> God sonembureari nunda gitofu de atai fatiraira aindae, kini (king) riria use irá gheraira.  
Mave God da javoda beka gajarera aimi, nundae sakai sise, nunda javo jighoro erarira.
- O gungubo kakato mo, God sari ambarera.

## 64

### *God Gagara Are Dae Benunu Sisira.*

- <sup>1</sup> Arie God, nanda memadae resena, ningi! Nanda gitofudae oju erena. Namu sonembaso jebugari dae resena!
- <sup>2</sup> Ari ekoko emboimi manaka garuse irera. Namoa ufena daoro ambono dae kato erera ava sedo, kosege fete!
- <sup>3</sup> Ne avivaimi mema mutari dae sise, kotise irá gheraera. Geka seraera, kaiya siverego afari aminga ava,  
seoro mema siroreraira.
- <sup>4</sup> Ne meka jo gae irise, gungubo seoro ivege ya gheraira.  
Ne ufena evetu genembo eveva gaveva aindae aji sise, nenda bino eoro sembae eraira.
- <sup>5</sup> Ne totorugedo, kokomana daoro sirivo aore dae tofo tofo ghamo dedorse manaka gayeraera.  
Nenda ivasi reda fiftigarera ava kotise, eminge seraera, "Ifu mave jo fumbae arira."
- <sup>6</sup> Ne dara ari dae manaka garuse seraera, "Namonde taká tafasara

- ari da manaka beká ava gae-  
teri.”  
Ai resira amo, genembo da janje  
jokáda kotari rea irá gheraira  
amo, jungari bekári.
- 7 Avata God nunda goroba nemo-  
kena afuse, ne totói nembo  
gayegeraira.
- 8 Aínda susu mo, ne rea sisera ain-  
dae, ne sosighi arira. Evetu  
genembo nemoa gido gifua gi-  
torotoro edo gharera.
- 9 Aínda beká sirorari gido, evetu gen-  
embo isasambu oju edo,  
God rea usira a etiri  
sirorusira ava kotise,  
aindae osa sarera.
- 10 Eveva gaveva irari embodae re-  
sena. BAJARI rea usira aindae  
riria evu! Numokena ambo  
sose fetevu!  
Evetu genembo eveva gaveva  
isasambu sakai numoa saore!

## 65

### *1-13 Sakai Sise, God Da Javo Jighoro Erare!*

- 1 Arie God, Saion\* aminda iresa, na-  
mane rejo ava ari dae beka  
gagosusera ava use,  
nindae sakai sarera, amo  
evevari.
- 2-3 Ni evetu genemboda benunu  
ningido sonemberaesa.  
Ágido, endada iritirera nenda  
ari ekoko da bouvu aindae  
nimokena furarera.  
Namaneda ari ekokoimi na-  
monde bu fatiraira, avata ni  
ari ekoko amo kote doyerasesa.
- 4 Ni mavejua gatededo unumbedo,  
ninda vasa kakarago aminda  
iroro dae fitaresa, aimi dubo  
jamaghae irarera.  
Namane ninda kambo kakarago  
ainda roera eveva gaveva ava  
barise, ivuga ghae iritirera.
- 5 Arie God, namaneda jebuga mutari  
kato, ninda ari babaigo gae  
gitida eregoserá aimi,
- namanenda benunu ningido,  
namane gitofu kena  
sorega fumburaesa.  
Endada evetu genembo reighi  
isasambu da iritirera, a soka  
beká evada a butuda iritirera,  
nenda tumondari isambu  
nimokena fitiraera.
- 6 Ninda fakina teriágo beká ava  
ijuguse, doriri isasambu nine  
ututusesi.
- 7 Nine eva anje gugugugheraira ava,  
eoso binono gamburaira,  
a kotugo evetu genembo  
gogore use nimokena os-  
ogo futo eraera ava, nine  
eoso songheraera.
- 8 Endada evetu genembo tano  
reda reda isambu ninda tano  
babaigo eraesa,  
ava gosuse oju use, ghamo  
takegha eraera.  
Ninda ari ututeraesa aindae,  
utu gambari utu gambari  
ivugaghái fumbu aruguse irá  
gheraera.
- 9 Enda nine tavo tatau use, borija  
muturaesa. Nine eso, enda  
raugo use bayau roera digari  
futo vivitigeraera.  
Arie God, nine ninda sasaka  
averegeeso, uvu isambu  
bedo ututeraera.  
Nine enda esimbuguse seeso,  
roera veka vivitegeraera. Emo  
ninda ariri.
- 10 Nine borija muteoso enda gae dur-  
eraera aminda dise, sasaka  
aimi enda safegeraira.  
Nine borija muteoso enda raugo  
use, roera veka seka vivitig-  
eraera.
- 11 Nimo kavevera katori ava sedo  
ghaeko sifoda bayau dige  
faseraira. Ninda yari furari  
aminda dige faseraira.
- 12 Oka mane ningaminda kaifa eso,  
mamandi digari fumburaera.  
Ganasa, enda fumbári aminda  
ivuga siroreraira.

\* 65:1 Afige, geka eni Saion dae gefusera, tuturo 2:6 duruda tege, garesa!

13 Eke vasada sifi aimi dige faseari,  
enda tevisa farava vujiimi  
dige fasedo gherira,  
isambu aimi ivugaghae  
fumbu aruguse yaru  
divuraera.

## 66

*Genembo Eni God Numoa Nange  
Sonembusira Aindae, Aiyakoe Sisira.*

1 Evetu genembo isambu, God da  
javo jighoro erorurari, ivugai  
fumbu arugaore!

2 Yaruimi isimbuse, God nunda javo  
durode ava jighoro erorurari,  
nundae sakai saore!

3 Sevu, “Arie God, ni rea ututer-  
aesa evia gido, ghamo keng-  
hari ungo ata dadadagheraira.  
Ninda fakina teriagio beká  
ava gido, ninda gitofu  
ojuimi ninda dombuda tumoi  
baingheraera.

4 Evetu genembo endada iritirera  
isasambu, nimoa tumonde  
bainghaeraera.  
Ne nindae yaru sise, sakai ser-  
aera, ne yaruimi javono ni-  
moa gatise seraera.”

5 Fuvu gaove, God rea evetu gen-  
embo dae etiri,  
nenda gae gitida gi  
dudukughusera, ava ko-  
tovo dae sise resena.

6 Nune etiri, eva gasumbetiri atai  
enda bekáda fete sembiseri.  
Susu aindae namane aminda  
fete ivugaimi vure jasiseri.

7 Nu fakinago bekári, ava sedo  
nu evovodae irise, oro nunda  
nunda ava ditimi jighi jijinim-  
beraira.  
Gogore, osogo ari kakato nimo-  
kena osogo jo ae aoro dae re-  
sena.

8 Arie, endada nunda oro oro nemo-  
kena resena, ningivu, God  
tumonde bainghuse, sakai  
saore!  
Sakai beka teriagio siruroro,  
isambu ningore!

9 Nune kaifa iri namonde jebuga ir-  
era, a kotugo namonde jo do-  
yari duraeri.

10 Arie God, ni namane bu dere  
gosusesi. Kau siliva (silver)  
avarakada itioro,  
jeka voseari beká vanembo  
buraera amingava,  
nine namane dere gosusesi.

11 Nine namane bu feso, ninda  
vaghoda teteruseri. Nama-  
nenda gukada mema bouvugo  
ava fiftigusesi.

12 Nine eteso, namane gitofuimi fati  
jasedo iseri,  
mema tafusera evia in-  
ono evetu genembo  
avarakada mema a ko-  
tugo usegha da mema  
tamburaera amingori.

Avata oroko nine eteso namane  
digutuse, iti susu fafode irera.

13 Na ninda kambo Jerusalem  
aminda joba nimokena dun-  
gari dae tige yarena,  
na nimokena joba rea mu-  
tari beka gagojusena, ava  
mutarena.

14 Na dara jokáda irise, nimokena rea  
mutari sisena ava, mutarena.

15 Na sino fuka unduse irena, ava  
olta (altar) da dungoro dae  
joba bu furarena.

Na borumukava da kandana o  
gouti (goat) eini ava de ojedo  
dungono, imbosi nimokena  
utuda viti yarira.

16 Fuvu, ningove! Natofu  
maveju maveju God tumonde  
baingheraeva, fuvu, ningove!  
Na nemokena God nandae rea  
usira ava sarena.

17 Na numokena sonembadae kori  
siseni. Na yaru nunda javoda  
sakai sise, didivuseni.

18 Nanda dara jo vujegae aetena  
amota, BAJARI nanda benunu  
jo ningae aetira.

19 Avata na geka beká resena, God  
na sonembusira, na rea sise  
banungusena, nu niningusira.

20 God dae sakai resena, ainda beká  
mo, na banungusena amo, nu  
jo ningi ningae da kaugo aeri,



a nunda dubo bari a kavevera namokena jo doyaeri.

## 67

*God Kena Aiyakoe Sari Da Yaruri.*

- 1 Arie God namanendae joka use esimbugase! Namanendae kavevera ase!
- 2 Amingaresa amo, natofo tomanakogo endada irera ninda uju ava kasama arera.  
Kotugo, jebuga mutari da fakina ninda tofo edo irira, ábarago natofo isambu kasama arera.
- 3 Arie God, nanda uju mo, evetu genembo isasambu nindae sakai sise,  
ninda javo jighoro erarira.
- 4 Na uju erena amo, oro oro isasambu dubo jeuro use vurejasore.  
Ainda susu mo, ni natofo isambu inono da ijujeraesa.  
Kotugo endada oro isasambudae emboro eveva nine ijugeraesa.
- 5 Arie God nanda uju mo, evetu genembo isasambu nindae sakai sise, ninda javo jighoro erarira.
- 6 Namondeda vasada bayau eveva gaveva ava beká jijighusira. God, namondeda God, namonde esimbugusira.
- 7 Beká resena, God namonde esimbugusira. Oro nunda nunda utu gambari utu gambari aminda irera,  
nundae igheghi aoro dae resena.

## 68

*God Nunda Natofo Sonembari Inonori.*

- 1 Arie God, ere fete! Ondi, ninda gitofu sumbu taraghaore!  
Evetu genembo ni imboe gamboe eraera ava, ondi bera beraghe, rojedo sumbu taraghaore!
- 2 Ondi bera beraghe, ne kau imbosi rave ise dadaberaira aminguse,

a kotugo tavaya avaraka dombuda tiveraira avavaga use, ya tefo aore!

Arie God, ari eko embo ninda dombuda ambu tefo aoro dae uju erena.

- 3 Kotugo nanda uju eni mo, evetu genembo God da sari vanembo eraera aimi,  
nunda dombuda fetirise, ivugaghae ivisa kavisa arera.  
Aminguse, ne divu fusedo ghuse, ivugaimi fumbu arugarera.
- 4 God kena yaru divore! Javono numoa gatise, yaru divore!  
Nunda emboro rerebevu, nu foroga nunda ghasemodae budo, etoda anumbe furare!  
Nunda javo mo BAJARI ri. Nunda dombuda fete ivuga aore!
- 5 God, nunda tafaroro kambo kakara jokáda irise, babate da afa edo, roriri kaifa eraira.
- 6 Totofo irae a babate ainda kambo nune simbuge muturaira,  
a kotugo dibura embo nune unumbeari buvu, dubo jama eraera.  
O gogore osogo futo ari kakato baimara a memaghae irarera.
- 7 Arie God, ninda natofo giti beso uvu bayau irae vasada sefusera da sifo aminda,
- 8 Israel embo da God, doriri Sinai aminda isagha etiri nunda natofo gosusera,  
aimi fusira aindae, enda daradaragiri borija utudaghe ati tino tafusegarigusira.
- 9 Arie God, nine borija mokogo dirari dae eteso dise,  
ninda reighi fanotedo irei ava, jovereghedo fira, ari fatonga ava usira.
- 10 Ninda natofo Israel embo aminda dighi anumbuseri.  
God, ni kavevera use, makasi embokena reju daiva usira ava, nine muteso ruruseri.
- 11 BAJARI aghi aoro dae setiri, evevetu reighida iritiriseri aimi, bino budo era siseri,

- 12 “Kini (King) mane nenda isoro embode namonde sosighi ari fusera, aimi oju sumberi.”  
Amingusera amo, Israel embo evevetu natida iritiriser aimi, roera bagia barise fera oju sufuse goro ghusera, ava soro e bariseri.
- 13 Ainda jokáda, rika ribo da ove nunda tamo mo, auri siliva (silver) aimi gutuseri, ghabu mo auri goldi (gold) garigoimi gutuseri.  
(Avata ne mendeni meka givu! Ne redae isoro sifoda sifi da karoda jungutusevu?)
- 14 God fakina kato doriri Salmoni aminda kini mane ondiri, oju sufusera da sifo amo, nune etiri borija dombu eni yaughari beká aimi rururughe vovosusira.
- 15 Arie, doriri Bashan, ninda mendo digari futo, ninda natofo barago amingori!
- 16 Arie Bashan embo, ne redae God nunda doriri Saion\* gategusira ava, tataseguse, dere erejirevu?  
BAJARI aminda dighi anumbusira,  
a kotugo evovodae aminda irarira.
- 17 BAJARI, nunda isoro ghasemo digarigo jo tegari da kaugo irae ainde Sainai ghedo ira, vasa kakarago aminda teterusira.
- 18 Nu utuda vitise, evetu genembo mendeni sandi bundisira ava unumbe budo vitisira.  
Evetu genembo gogore kakato barago numokena joba muturaera.  
BAJARI God aminda irá gheraira.
- 19 BAJARI dae sakai saore! Nu sifonono evia namondeda mema bouvu nune fumburaira.
- Namonde nune seari jebugeraera.
- 20 Namondeda God mo, sari jebugari katori.  
Mave seari namonde ambarida vaghodaghe buvuraera amo, BAJARI numori.
- 21 O ari eko embo numokena osogoe eraera, ainda jiro ava nune dari bebejegarira.
- 22 Bajari aindae eminge sisira,  
“Nenda gitofu nane sandido, doriri Bashan ghedobu fua nenda ungodafitarena.  
A kotugo nenda gitofu mendeni eva kafurudaghe sandi bu fuanenda ungodafitarena.
- 23 Fitono, nenda gitofu daovo gitofuda ororoimi gaunghe vitari aminda sive sembiyareva.  
Kotugo nenda sino mane aimi gitofu da ororo ava sosofuse mindoro inono arera.”
- 24 Arie God, nine gitofu sosighi usesa ainda totorugari tomanakogoe erera evia,  
natofo isambu eregosera.  
Arie God, ni giti jijighururaso, natofo ninda amboda ya, ninda vasa kakarago jokáda tetetero eregosera.
- 25 Yaru divari kakato giti etero, gita† dari kakato ambo gaetero,  
a kotugo ade jamena ghasaghasa eredorera aimi, soroda fetedo refera.
- 26 Arie, Jacob da veka beká Israel embo nemokena resena, eminda totoruge ireva, BAJARI God dae sakai saovo dae resena.
- 27 Oro veveyako Benjamin ondi giti Judah ondi nenda giti jigharide  
nenda oro oro ava ambo gayoro, Sebulun ondi nenda giti jigharide fitoro

\* **68:16:** Saion mo, ututu ijoghako eini bogu begaya Jerusalem jokáda irira. Avata, David da Yaru buku mave gefusera, kotugo feroveta mane mendeni bogu begaya Jerusalem dae sise, “Saion” gefuseri. Kau daba aminga ava, sifo mendeni, God da Tafaroro Kambo kakara use, “Saion” gefuseri.

† **68:25:** Afige, geka eni gita o uka dae gefusera, tuturo 33:2 duruda tege, garesa!

- a kotugo Naphtali ondi nenda giti jigharide ambo gaedo refera.
- 28-29 Arie BAJARI, kini (king) mane ninda fuyo tige,  
kambo Jerusalem bu foa gheraera, eminda namane sorise,  
ninda fakina nange ijugusesa, kau daba aminga ava sekago ijugaso gaore!
- 30 Arie BAJARI, Egypt embo ava dombuda sase!  
Oro oro mendeni burumakava da kandana nenda mamandi da kaugo use,  
gogore eraera barago, dombuda saso, oju edo nenda siliya (silver)  
nimokena joba mutore!  
(Evetu genembo isoro uju eraera ava,  
soesa ondi bera beraghe taraghaore!)
- 31 Egypt embo nenda gavana mane mendeni dirigaoro furarera.  
Ethiopia embo nenda ungo jighoro erorurari God kena banungarera.
- 32-33 Enda da oro oro isasambukena eminge resena, God dae yaru divuvu!  
Bajari utu etoda, utu anakora etiri sirorusira da etoda, anumbedo ya gheraera aikena, yaru didivuse sakai sevu!  
Nunda beka teriagio utuda barara fugeraira aminga ava ningivu!
- 34 God nu fakina isambu da tofo ava isuri basuri evu! Nu kini (king) ri.  
Nunda usasa Israel embokena futuse, kaifa e tavo eraira.  
Utuda mo, nunda fakina tomanakogo isagha erira.
- 35 God nunda vasa kakarada ghe fururari evetu genembo itatamedo,  
ghamo kengheraera. God Israel embo tumonde baingheraera aindae resena.

Nunda natofokena nunda fakina tomanakogo ava futurureari, ne fakina eraera.  
Ava sedo, God dae sakai sevu!

## 69

*Genembo, God Numo Sonembare Dae, Benunu Resira.*

- 1 Arie God, na sonembe, uvu ganganghe viti ojira, na duboi tatano erira.
- 2 Na fororo basusuda tifugherena, enda fakara eminda gegori.  
Na uvu kafuru sorodari, a kotugo eva fumbasa futo use, fatari mindi ambono dae erira.
- 3 Na sonembaso dae kori sise irana, fakina dadaberira, dubo ghoré ghoré mema resira,  
kotugo ninda sonemba kakovuse, sorara eno, nanda diti yaya iri, gari erebunena.
- 4 Evetu genembo susu tefo namoa imboe eraera ava,  
genembo eni da beo tegaetera amo, darige vitaetira.  
Nanda gitofu gungubo futo sise namokena osogo eraera.  
Ne fakina beká use, namoa daoro ambono dae eraera.  
Ne kateyavara etero, roera nanda tofo, na jo bagia ae, ava nemokena futuseni.
- 5 Arie God, nanda ari ekoko mo jo nimokena jungarigo irairi.  
Na gogovara da ari use irena ava, ni kasamari.
- 6 Arie BAJARI God Fakina kato, erá doyeoso nane eono,  
evetu genembo nimo tumonderaera ava, meka geore!  
Arie God, Israel embo da tofo, erá doyeoso nane eono,  
evetu genembo nimoa tumonde baingheraera,  
ainda javo sembae eure!
- 7 Na nimoa tumonde baingheraena aindae,  
namokena geka ekoko sesegero, na mekai jaruterena.

- 8 Nanda nano namendikena na kau mo teano embogo edo irena, nanda ambo begoimi namokena kau oro enidae arigo eraera.
- 9 Nanda kotari enikena jo fitae, nanda kotari a uju isambu ninda tafaroro kambokena fiftuse irá gheraena. Jijivu ekoko nimokena sesegeraera, ainda bouvu ava, nane fumburaena.
- 10 Na uvu bayau reta use tofo fitiono vovosurureari, natofo nandae geka ekoko sesegeraera.
- 11 Na tou rovarova urureono, ne nandae gegha jiraera.
- 12 Emboro soró soró ava nenda kiki namoa nembo sariva nembori, a kotugo uvu fakara mindi jiro birurughari yaru namoa isimberaera.
- 13 O namo, BAJARI, nimokena banungarena. Nine sifo reda uju arena aminda, na sonembe. Ni na dubo bu gogoghombereaesa, kotugo na sonembari dae sisesa aindae, na sonembaso dae resena.
- 14 Erá na tauya basusuda tifugheono dae sise, na sonembe! Erá gitofuimi na deoro dae sise, na kaifa ururu! Kotugo uvu kafuru aminda na kaifa ururu, jebuga irone!
- 15 Erá doyeoso, na useghami viti jarigiure! Erá doyeoso, na ghighi eminda mindi ambeone, o tifughe ambari emboda bakoda voseone!
- 16 Arie BAJARI, nandae evovodae kavevera use, dubo buraesa aindae, na sonembe! Nandae joka eraesa aindae, namokena jovereghe!
- 17 Na ninda saramana katori. Erá nanda dombuda jungeose! Na dara eko beká eretafena. Tavaraghe fu, na sonembase.
- 18 Fu namokena utua edo sonembaso jebugaone! Gitofu da ungodá na saghimbe bu darige.
- 19 Nandae jijivu ekoko seraera, ava ni kasama eresa. Kotugo, nanda gitofu nange eoro, na meka giraena a nanda javo sembae eraira, ava ni eregosesa. Nanda gitofu isambu ni kasama eresa.
- 20 Jijivu ekoko futo sari aimi na ghamo gaetiri bune jaruterená. Nandae joka edo sonembaetira aindae, gigitusena, avata aminda eni gegori. Mave na eghovo daetera ava kotise kakovusena, avata gegori.
- 21 Na ighoi usira, nandae kae ava futuseri. Na dubo saghusira, nandae vaini dokegha ava futuseri.
- 22 Na uju erena, nenda kirumu karumu rise, aimi ari kosasaghedo sirivu aeteri. Kau daba aminga ava, ne God kena sino fuka dungarera ava rise, aimi ari gofe dudo ghuse irore.
- 23 Aso, nenda diti digoi are, kotugo nenda guka degagururari, evovodae gofuse irore!
- 24 Ninda janje ekoko averege nomena vosare! Aso ninda girivaita aimi asugari itatama arera.
- 25 Na uju erena, ne reda dighi anumbusera, aminda natofo sirivu aeteri, kotugo nenda dobo do dumbaeteri.
- 26 Ai resira amo, evetu genembo nine ghamo baoro dae usesa aikena, ne mema bouvu erefutera. Kotugo, evetu genembo nine eteso, mema eretafera aindae unongu seraera.
- 27 Nenda ari ekoko isambu gembu fitido ghe! Erá doyeoso, ninda jebuga muturaesa, ava tambu beore!

- 28 Na uju erena, nenda javo jebuga evovodae irarida buku aminda ghajaresa.  
Ninda natofoda javo gembaresa ainghae dabade, itako jo gembae aresa.
- 29 Avata namo mema itatama use, mana mana beká ava erena.  
Arie God, na sainghimbe bu fiti jebugaone!
- 30 Na yaru didivuse, God dae sakai sarena.  
Na nundae aiyakoe sise irarena aimi, nunda fakina tomanako isagha arira.
- 31 Sino fuka da mamandi o burumakava da kandana eni bu oje dungedo joba mutarera amo,  
BAJARI ivuga itako arira. O nundae sakai sarena amo, nu ivuga ambari ava arira.
- 32 Evetu genembo mave mema itatama use irera aimi,  
God da sonemba garera, ne ivugai jarutarera.  
Evetu genembo God tumonde baingheraera aikená ghamo erarira.
- 33 Ai resira amo, BAJARI makasi embo da benunu ningiraira,  
a kotugo nunda natofo diburada irera ava, kotise irá gheraira.
- 34 Arie utu, enda a karaje a kotugo sino fuka, oka, a rika nanjogo ainda jokáda ireva,  
ne isambu God dae sakai sevu!
- 35 Ai resira amo, God nune sari Jerusalem embo jebugarera, a kotugo sonemba futuse,  
Judah frovensi da reighi nanjogo nune sekago itarira.  
Nunda natofo aminda dighi anumbedo, enda ava nene tofo arera.
- 36 God da saramana kakato Israel embo da imemisiri gamemisiri aimi  
enda ava nene tofo arera.  
Kotugo, evetu genembo mave numoa dubo buraera aimi, aminda irarera.

## 70

### *Genembo Eni God Kena Sonemba Dae Banungusira.*

- 1 Arie God, nine namoa dara kena sainghimbe baso jebugaone.  
BAJARI,  
oroko nembo foa na sonembase!
- 2 Gegenembo mendeni namoa daoro ambono dae erera, ava dedo atai dubo da fatido aso,  
dubo bunedo meka gaore!  
Kotugo gegenembo mendeni, na dara jokáda irena aindae,  
ivugai jaruterera, ava ondaso jovereghe yaoro, aso nenda binó dadabare!
- 3 Gegenembo aimi namoa sise dere jido gherera, ava fugaso gofedo meka gaore!
- 4 O evetu genembo nimokena ya gheraera amo, aso ne dubo jama use vure jasedo ghaore!  
Evetu genembo nine saghimbe beso jebugusera aimi,  
nindae aiyakoe sise eminge sise irore,  
“God nusukako numóá teriagori!”
- 5 Arie God, na rojari a kotugo na makasi bekári. Ava sedo tavareghe, namokena fu!  
Arie BAJARI, nanda sonemba kato eni tefori. Erá gaimbo eose, totoigo fu, na sonembase!

## 71

### *Evetako Embako Da Banungariri.*

- 1 Arie BAJARI, na nimokena ojeni.  
Namo kaifa aso dae resena.  
Erama doyeoso, gitofuimi na de atai duboda fatiore!
- 2 Ni ari dambugo beká eraesa, ágido na sonembaso dae resena,  
a kotugo na darakena saghimbe bu! Nanda benunu ningido, na sonembaso jebugaone!
- 3 Saso na nimokena junge fetarena!  
Nine se, nimokena tere fetono, na gagara ase!

- Nanda ambo sosari vasa a kotugo bere mo, nimori.
- 4 Arie nanda God, namoa ari ekoko ari kakato aikena saghimbe bu darige!  
Evetu enembo sembae use, namokena mema mutari koteratera aikena, na saghimbe baso dae resena!
- 5 Arie BAJARI, fakina isambu da tofo, nanda gigitari isasambu nimokenari.  
Na sasingako irise tuturo edo nanda tumondari nimokena fiftuseni.
- 6 Nanda gaiga nimokena garuse irá gheraena.  
Na sirorusena, ai tano, nine kaifa e tavo eso irena.  
Na evovodae nindae sakai sise, irá gheraena.
- 7 Nanda sorega fumbari kato fakingo nimori.  
Ninda sonemba namokena gosome, ni mavega ava natofoto manako kasama useri.
- 8 Na sifo evia inono ava nindae sakai sise, ninda duro usasaghae aindae osa seraena.
- 9 Jo, na embako usena aindae, na imboe ae aresa!  
Erá, namokena fakina dadabariá sise, na doyeose!
- 10 Nanda gitofu na daoro ambono dae uju eraera.  
Aminguse, ne se ningido irise, namo daoro ambono dae, manaka gaeyeraera.
- 11 Ne eminge seraera, "God nundae guka futusira.  
Erevu, namonde sumbu nu sandi baore! Nunda sorega fumbari kato eni tefori." seraera.
- 12 Arie God, erá soka iriose! Arie nanda God, oroko nembo foa na sonembase!
- 13 Evetu genembo mave namoa dedo gaedo ghari dae arera, ava dedo atai duboda fafatigedo sosighi aso dae uju erena.
- Evetu genembo mave namokena mema mutari dae kato erera amo, aso meka gosuroro, nenda binó sembae are dae uju erena.
- 14 Na sifo evia inono ava nanda gigitari nimokena fitido gharena.  
Na giti nindae sakai sedo ghuse, oroko mo, tuturo edo, teria beká sido yarena.
- 15 Ninda ari eveva gaveva mo, jo tegari da kaugo ututeraesa aindae, vironu sedo gharena.  
Sifo evia inono ava nine sonembeoso namane jebuga tamburaera ava, sedo gharena.
- 16 BAJARI God, ninda fakina muturaesa ava budo, aimi fuama, na ninda kavevera tomanakogo aindae sakai sarena.
- 17 Na sasingu ireno ai tano, na nine ijugedo usesi.  
A ninda tano gae gitida gidudukugharigo ututeraesa aindae, osa sise irá gheraena.
- 18 Arie God, oroko na embako eteno, beo furigha mongago etira evia, erá na doyeose!  
Nangae irise, na ninda ari babaigo ututeraesa, a kotugo ninda fakina tomanakogo ava sirurono, nanda sasingu imemesiri gamemisiri ningido ghaore!
- 19 Arie God, ari eveva gaveva ututeraesa amo, jo tegari da kaugo iraeri.  
Ninda fakinaimi ututusesa aminga ava, evetu genembo eniimi jo ari da kaugo iraeri.
- 20 Nine namokena dara a mema itatama aono dae futusesi.  
Avata nanda fakina sekago nine mutudo, na kaifa ururaso jo ambae irarena.
- 21 Nine sekago sonembaso na genembo binode ava arena.  
Ni nandae kavenu sekago saresa.

- 22 Arie nanda God, geka bekári, na nindae gita doruse sakai sarena.  
Arie, Israel embo da God kakarago, ni rea seraesa, isambu urureaso beká siroreraira aindae, nanda gita\* doruse yaru nimokena divarena.
- 23 Na nine sonembeteso jebugusena aindae, na nindae dubo jeuro use, gita doruse ivugai yaru sise fumbu arugarena.  
Dubo joka isambuimi nindae yaru sarena.
- 24 Evetu genembo namokena mema mutari dae kato usera ava, nine dedo atai duboda fafatigeteso, nenda bino sembae usira ágido, na sifo evia inono ninda ari dambugo ututeraesa aindae, vironu sedo gharena.
- 4 Na uju erena, sonembururaso namanenda kini makasi embo ava sorise, bekáda bekáda use kaifa arira! A kotugo evetu genembo mave makasi embo kateyavara eraera, aikena gitofu use dari itatama arera.
- 5 Na uju erena, iji nengae tambunoghae utuda ghousa mavega janimbuse irarera, ainghae dabade kini nunda natofo kaifa use irarira.
- 6 Na uju erena, borija kikisa etoda dise nunda esimbugari bu foa gheraira, kotugo ghasisi vareda dise esimbugari muteari bayau vitiraira aminga ava, kini nunda natofo kaifa use esimbugari bu furarira.
- 7 Na uju erena, kini nu ghousa mavego irarira, evetu genembo aito dambugo beká fugutuse irarera.  
A kotugo tambuno ghousa mavega janimbuse irarira, nunda natofo kena gugua ghayafa sirorari ivugaghae irá ghedo ghaore!
- 8 Na uju erena, kini da kaifa ari tano eva sovenikena ghedo ya sovenikena buvarira.  
Kotugo, uvu (Euphrates) Eiferate ghedo ya enda tano reda irira, aminda buvarira.
- 9 Na uju erena, nunda gitofu reighi evetu genembo a uvu irae vasada irari emboi nunda dombuda kauboi dadarigedo numoa tumoi baingharera.  
Nundae osogo eraera aimi, foama fororoda dombuimi dari fafasarera.
- 10 Na uju erena, Spain embo da kini a kotugo reighi butu butu ainda kini mane

## 72

### *God Nange Kini (King) Esimbugae-tira Da Banungariri!*

- 1 Arie God, ni nange sifo ghousa ari dambugo beká use ijujeraesa, ainda aito ava ijuge, namanenda kini kasama edo aimi ijujare!  
Ni nange bekáda bekáda use, natofo ijujeraesa ava, dengoro induduraso, namanenda kini (king) ningido amingare!
- 2 Nanda uju, God, ni amingaso, kini nu bekáda bekáda use, ninda natofo kaifa tavo arira.  
A kotugo, makasi embo sonemba tefo, nenda sorega kato mo, kini nu kavevera use, ne kaifa e gogoghombare dae, uju erena.
- 3 Nanda uju, nunda kaifada vare aminda bayau dighi fasarira, a kotugo evetu genembo da irari barago ivu durari irarera.

\* 71:22: Afige, geka eni gita o uka dae gefusera, tuturo 33:2 duruda tege, garesa!

- a reighi Sheba nengae Seba  
ghae da kini mane ainde  
dabade,  
numokena fuyo mutarera.
- 11 Beká resena, kini mane nanjogo  
irera isambu,  
nunda dombuda kauboi  
dadariguse tumoi baing-  
harera.  
Nunda oro oro ainda evetu gen-  
embo isasambu nunda du-  
ruda iritirise,  
nunda sari ava edo gharera.
- 12 Makasi embo numokena sonem-  
badae kori seraera ava,  
nune bu darigeari jebuger-  
aera.  
Natofo mavekena gitofuimi  
kateyavara eraera,  
nébarago numokena sonem-  
badae kori sirureoro  
sonemberaira.
- 13 Kini nu joka ari katori, rojari  
embo a kotugo makasi embo-  
dae joka eraira.  
Sonemba tefo embo ava sonem-  
beari jo ambae eraera.
- 14 Natofo sonemba tefo setena ava  
gitofuimi mema futero tafuse  
irera ava,  
nune seari jebugeraera. A  
mavekena gitofuimi dari  
gayari dae eraera,  
nébarago dara jokáda  
saghimbe bu darigheraera.  
Ainda beká mo, nenda jebuga  
numokena teriago bekári.
- 15 Kini ghousago irare! Na uju erena,  
reighi Sheba da goldi (gold)  
ava nundae mutoro barira.  
A nundae banungururoro, God  
numo evovodae esimbuguru-  
rari irare!
- 16 Na uju erena, vare isambu eminda  
bayau dige fasarira.  
A kotugo enda jiro fumbari  
aminda barago, bayau dige  
fasarira.  
Kau Lebanon frovensi iritirira  
aminga ava vitari garera.  
Na uju erena, reighi bogu  
begaya isasambu, kau ekeda  
badurugo ava use,
- natofo digari beká sirorar-  
era.
- 17 Na uju erena, kini da binó evovo-  
dae irare!  
Nunda binó evovodae, kau  
iji janimbariguse irira,  
aminga ava irare!  
Na uju erena, evetu genembo  
isambu nunda jokáda esim-  
bugari baeteri,  
nunda oro oro isambu sakai  
numoa sarera.
- 18 BAJARI, Israel embo da God, aindae  
sakai saore! Nusukako roera  
durode ava ututeraera.
- 19 Nunda javo duro usasaghae ava  
sifo ghousa sakai sise jighoro  
eredo ghare!  
Nunda duró usasaghaeimi enda  
isasambu afurugare! Ai  
bekári, a kotugo, Ai bekári!
- 20 (Eminda tano erena. Jesse da  
mandi David da banungari  
tano eviri.)

## 73

### *God Nange Evetu Genembo Bekáda Bekáda Ijugarira Ainda Gekari!*

- 1 Geka bekári, natofo Israel embo  
jokáda mave janje joká  
keosogo beká eraera aikena,  
God ari eveva beká eraera.
- 2 O namo, nanda tumondari feghako  
usira.  
Jo soka irae, nanda tumondari  
dadabe tefo aetira.
- 3 Ainda tuka mo, na evetu genembo  
God da Agho Dari ighagha use,  
“A jo rejo eni iraeri,” sise, ivuga  
futo usera aindae bengoso  
useni.  
Ari eko embokena roera isambu  
eveva siroreraera, siseni.
- 4 Ne fakinago a tamo mema eni  
tefori. Ne jo totoi kae tambae  
eraera.
- 5 Nemokena mema eni tefori,  
jo evetu genembo mendenigo  
memaghae iritirá gher-  
aera amingo iraeri.  
Evetu genembo mendeni mema  
tamburaera avaga nemokena  
tefori.



- 6 Susu aindae nenda ivuga amota,  
kau guri duboda dighido is-  
agha beká giraera ava gareva.  
A kotugo meka irae titigho ari  
ava nenda gogho.
- 7 Evetu genembo amo rea koteraera  
aimi misurugurureari eko  
vanembo eraera.  
Ne ari ekoko dombu eni dombu eni  
ari dae manaka garuse irá  
gheraera.
- 8 Ne God dere jise, itatako jo oju ae  
eraera, a kotugo nunda natofo  
ava kateyavara beká eraera.  
Nemo ivuga kakatori. A  
kotugo ne evetu genembo  
mendenikena  
mema mutari dae manaka  
gayeraera.
- 9 Ne God utuda irira aikena, geka  
ekoko seseguse ivuga ututer-  
aera.  
A kotugo God da Agho Dari  
ighagha use, “A jo rejo eni  
iraeri.” sise,  
evetu genembo endada irera  
aikena, katiyavara use irera.
- 10 Susu aindae, nene rea seraera ava,  
God da natofo barago amin-  
guse,  
nenda ambo gayeraera, a  
kotugo nene rea seraera  
ava totoi tumonderaera.
- 11 A kotugo ari ekoko embo setena,  
eminge seraera, “Namonde  
rea eraera evia,  
God jo gae eraira. God ika  
bekáda irira jo kasama ae  
arira.”
- 12 Ari ekoko embokena gugua  
diguterira, a kotugo sifo  
ghousa digutuse irá gheraira.
- 13 Arie namoako, redae soro ghoua  
ari eko darigari dae korai use  
ireni?  
Redae korai janjago use ari  
eveva vanembo udo refeni?
- 14 Arie God, nandae mo, sifo  
ghousa mema ava muturaesa,  
sifo inono evia ataeghae nan-  
dae mema ava ghamo baono  
dae eraesa.
- 15 Na avaga saetena amota, a jo ninda  
natofo da kaugo iraeri. Ava  
sedo, na ainda kotari ighagha  
ari dae sise, resena.
- 16 Na ari evia nange kasama aetena  
aindae inini useni. Avata  
nanda munju jo inono ae etiri,  
mana mana udo fena,
- 17 amboda, na ena, ninda tafaroro  
kambo jokáda teredo, nanda  
kotari afigetiri,  
ari ekoko embokena am-  
boda rea sirorarira amo,  
kasama useni.
- 18 Arie Dara! Ari ekoko embo amo,  
God seriri vasada fitari,  
jo numbo irae, ne gosasaghe  
vovosegedo ambu tefo arera.
- 19 Ne totoigo amomonjegarera. Ne  
ya ambari embo da vasa eko  
aminda vovosegarera.
- 20 Nemoa taká aturu avavagori.  
Tumbaghae aturu edo, sifo  
ateari, kotae eraera amingori.  
Arie Bajari, ni nanjigo eraresa  
amo, ne manjarera.
- 21 Na kotari ekoko use itatamari  
sembae beká use, dubo mema  
useni.
- 22 Na kavakava edo kotari dad-  
abeari, sino fuka da ari ava  
edo ghuseni. Na ni itatako jo  
kasama aeri.
- 23 Avata na sifo ghousa ninda tin-  
guda irá ghedo ghuseni.  
A kotugo, nine namoa ungodá  
bu jighi irá ghedo ghusesi.
- 24 Ninda ijugaimi namoa giti bu-  
raesa, a kotugo sifo gombuda  
nine namoa nati joká doruse  
unumbaresa.
- 25 Nisukako nimoa nanda uju bekári.  
Utuda a kotugo, endada eni  
nimongo tefo gido,  
nanda uju isambu nimo-  
kena fifituse irá gheraena.
- 26 Nanda fisíkenu a kotugo asisikenu  
rojaetenu, avata God nu irira.  
Numo nanda fakinari, nusukako  
numoa evovodae nanda tofo  
bekári.
- 27 O evetu genembo mave God tu-  
monde bainghari imboe gam-  
boe eraera amo ambarera.

Ainda tuka mo, evetu genembo mave ni dodo, ove kevari ava tumonde baingheraera amo, nine daso sirivo arera.  
 28 O namo taká God da tinguda irarena amo, evevago bekári. Namu BAJARI God ava nanda ambo sose fetari vasadae ruruseni. Nune rea ututusira, ava osa sedo gharena.

## 74

### *God Nunda Natofo Darakena Saghimbe Bu Darigari Da Banungariri!*

- <sup>1</sup> Arie God, namane mo, ninda natofo bekári. Susu redae namane doyari beká usesi?  
 Namanekena redae evovodae janje ekoko eraesi?
- <sup>2</sup> Ninda natofo anakora gategusesa ava sekago kotaso dae resena. Namane sabua use irero, ninda natofo beká aoro dae sedo, namane nange saghimbe bu darigusesa,  
 a kotugo ututu Saion\* irá ghedo ghusesa, aindae barago sekago kotedo, joka aso dae resena.
- <sup>3</sup> Reighié sosighi e de bebejegusera, ainda jokáda deinghuse fuge garesa, titigho beká useri.  
 Gitofuimi ninda tafaroro kambo jokáda roera isambu titigho beká useri.
- <sup>4</sup> Gitofu ninda tafaroro kambo sosighi use javono gatise, koko fumbu aruguseri.  
 A kotugo ninda vasa sosighi e rusera aindae, nenda sobeya dadarigetero fefetuseri.
- <sup>5</sup> Ne kau faragho sarari embo karivako aimi ika mane je dive gafeoro vose fafaseraira.  
 Aminguse roera reju irei ava, dive gafetero vovosusira.
- <sup>6</sup> A kotugo nenda karivako nengae koroba (crowbar) ghae aimi ika faiyaghae botou dae tendi birurughusera,  
 ava isasambu de bunununguseri.
- <sup>7</sup> Ne ninda tafaroro kambo jighi bununghetero vosetiri, avarakaimi dungutuseri.  
 Ne vasa nimo tumonde baingheraera ava bebeta etero, ninda bino sembae usira.
- <sup>8</sup> Nenda uju mo, namane ava fati bebetegaeteri.  
 Enda eminda God da Tafaroro vasa isasambu nene dungetero aviseri.
- <sup>9</sup> Ninda fakinaimi tano eni aso gaetera ava gigitusera. Avata tefori. Feroveta eni jo fetaeri.  
 A kotugo, ari amo sifo nanjigo tano arira ava, mave eni jo kasama aeri.
- <sup>10</sup> Arie God, namanenda gitofuimi nimoa ghousa mavega dere jirarereri?  
 Ne sifo ghousa nindae jijivu sise irá gheraera.
- <sup>11</sup> Susu redae namane sonembari imboe eraesi? Ni redae tumbe taunghe irá gheraesi?  
 Ne daso sirivo aoro dae uju eraera!
- <sup>12</sup> Arie God, bebede beká ni namanenda kini (king) edo, umbu nanjogo namane sonembudo fusesi.
- <sup>13</sup> Ninda fakina tomanakogo aimi nine eva jighi sarigusesi.  
 A kotugo, evada gambauva mane irera, ainda jiro fati mumunjegusesi.
- <sup>14</sup> Nine eva gambauva da giti jighari ainda gifua fati mumunjegedo,  
 reighi evetu genembo a uvu irae vasada nunda tamo soro vesa eteso, sino fuka aimi riseri.
- <sup>15</sup> Uvu veveyako karevada a kotugo ghamana tokáda kirikara gheraera ava nine eteso siroredo sumburaira.  
 Kotugo nine eteso uvu babai amo gasumbedo irira.

\* 74:2: Afige, geke eni Saion dae gefusera, tuturo 2:6 duruda tege, garesa!

- 16 Nine seteso, sifo nengae tum-  
baghae siroruseri.  
Nine seteso, iji nengae tam-  
bunoghae nenda vasada fe-  
feteguseri.
- 17 Enda da tano nine ffitigusesi.  
Baimara sifo nengae ghaeko  
sifo ghae nine usesi.
- 18 Avata, BAJARI, ninda gitofu nindae  
gegha jiraera, a kotugo gogo-  
vara embo nimoa ighagha  
urureoro ninda javo eko  
eraira, ava kotaso dae resena.
- 19 Arie BAJARI erá, ninda natofo  
da asisi ribogo rojari beká  
ava, gitofu ekoko eikena fuge  
doyeose!  
Ninda natofo nindae sedo mema  
eretafera ava, erá kotae eose!
- 20 Beka gajari nine namanekena us-  
esa ava kotedo ghe!  
Enda eminda vasa tumba  
aminda isambu titigho ari  
vanembori.
- 21 Arie BAJARI, evetu genembo  
mendeni gitofuimi kateyavara  
ero, mema tafuse irera ava,  
erá doyeoso,  
meká geore! Sonembu-  
ruraso, bate foivo nin-  
dae sakai sise, ninda javo  
jighoro erarira.
- 22 Arie God, javi e fu, ninda  
gitofu ava koto use iju-  
jase!  
Evetu genembo ni ighagha  
baghagha use, sifo ghousa  
gegha jiraera ava, kotaso dae  
resena.
- 23 Ninda gitofu janje ekoghae fumbu  
aruguse irera ava, erá kotae  
eose!  
Ninda gitofu gogore use, koko se  
doyae tambuno erera ava, erá  
kotae eose!

## 75

### *Ijujari Kato Beká, God Numori.*

- 1 Arie God, namane nimokena  
aiyakoe—aiyakoe beká resera.  
Namane ninda binó teria aindae  
osa resera. Nine tano nanjogo  
urureoso gi dudukugheraera,

- aindae vironu seraera.
- 2 God resira, “Na evetu genembo iju-  
jari da sifo seteno fetirira,  
a kotugo na evetu genembo  
nenda ari rea eraera  
aminda bekáda bekáda  
ategi arena.
- 3 Endada evetu genembo a roera  
nanjogo jebuga iritirera,  
ojuimi ungo ata dadadaghu-  
ruroro,  
enda barago dara dara  
gharira, avata nunda  
susu nane anakora fiteno  
fefetusira ava,  
aono gambu kinghari beká  
edo irarira.
- 4 Ari ekoko ari kakato, erá gogore  
eoro dae sise, irá gheraena!
- 5 Totofo sakai sise, nenda binodae  
bengoso futo eraera, doyoro  
dae sise irá gheraena.”
- 6 Evetu genembo ijujari da fak-  
ina mo, jo iji vitarikena o  
iji vosarikena, jo ningaminda  
tambari da kaugo iraeri.
- 7 Tefo, God nusukako ijujari inonori.  
Evetu genembo mendeni seari  
darige buvuraera,  
a mendeni nune seari, vose  
mema itatama eraera.
- 8 Ai resira amo, BAJARI nunda un-  
goda agha eni bu jighirira.  
Agha amo nunda janje ekoko da  
vaini (wine) fakinaghae aimi  
bedo edo irira.  
Nune averegeari vovosurureari  
ari ekoko embo ai rise,  
ghaghonoko ainghae mindi  
tefo eraera.
- 9 O namo, God Jacob tumonde  
bainghedo ghusira, ainda bino  
ava evovodae osa sise nundae  
sakai sido yarena.
- 10 Ari ekoko embo da fakina ava  
nune dari bejarira, o ari eveva  
gaveva embo da fakina ava,  
nune ambisegari bají  
tomanako arira.

## 76

### *Gitofu Sosighi Ari Da Tofo God Numori.*

- 1 God da binó Judah Frovensi aminda mindafu bekári. Israel Frovensi aminda nunda Javo kakara eraera.
- 2 Nunda dobo Salem o Jerusalem seraera aminda fitiri fetirira. Nunda irari vasa ututu Saion\* aminda irá gheraira.
- 3 Vasa aminda gitofu da feva goroba mane ava nune fati jojorusira, nenda bere,  
a kotugo nenda isoro da kaeya mane, nenda ambi goroba isasambu ava, nune fati jojorusira.
- 4 Arie God, duro usasago beká mo, nimori.  
Ni doriri aminda ninda gitofu dedo, atai duboda fafatigusesa amindaghe jovereghe fuse,  
ninda duró, kini (king) da gogho aminga ava asugedo deinghe refesa.
- 5 Nenda isoro embo da genembo fak- inago beká ainda gugua ava nine sosighi e rurusesi.  
Oroko mo, ne isambu ambu fafase irera. Nenda fakina kotugo nenda kasama isasambu dika irae ututusira.
- 6 Arie Jacob da God, nine katiyavara use seteso, hosi (horse) mane isoro embo nenda etoda anumbe sufuse,  
isoro usera ainde dabade isambu du fafasedo amomonjeguseri.
- 7 Avata BAJARI, evetu genembo isasambu nindae oju eraera.  
Nine janje ekoko aresa da sifo aminda, mave eniko ninda dombuda jo fetae eraera.
- 8-9 Gitofuimi kateyavara ero, mema tafuse iritirera ava, sonembaso jebugaoro dae sise, ni utuda irise,  
ategi ari erorusesa amo, ni reju ava ari dae kotisesa ava seteso,

endada evetu genembo isasambu oju beká use beka gotiseri.

- 10 Evetu genembo nu janje ekoko eraera, avata nine eoso, nindae sakai seraera.  
Evetu genembo nimokena isoro tataya doyeraera aimi, ninda kirumu sifo seteso fefetusira aminda tafaroro use, nimoa tumonde bainghedo gheraera.
- 11 Nenda BAJARI God kena rea mutari beka gagojuseva ava mutuvu!  
Ne oro mendeni tinguda iritireva isasambu, numokena fuyo tige fuvu!  
God nune seari natofo isambu nundae oju eraera.
- 12 Gavana da kokotofu nenda babojegaride, ivuga ari kakato amo nune fitiari vovosegeraera,  
a kotugo nune eari kini mane binonde amo ojuimi ungo ata dadadagheraera.

## 77

### *Nange Dara Tafuse, Dubo Jama Tambari Da Benunuri.*

- 1-2 Na God kena sorara eraena. Ningare dae sedo, sorara use irá gheraena.  
Na dara tamburaena da sifo aminda na BAJARI kena benunu seraena,  
tumba ghousa ava nanda ungo jigheono ikáda erorureari benunu seraena, avata dubo jama jo tambae eraena.
- 3 Na God koterana, avata kote jo tambae use Jaredo, ghosio seraena.  
Nu nanangedo tambaetena ava kote simbuguse irá gheraena, avata na dubo buneraena.
- 4 Arie BAJARI, nine tumba ghousa ava na jo doyaso fase avi jebugae eraena aindae,  
na ghamo vevera tafuse, geka sari buneraena.

\* 76:2: Afige, geka eni Saion dae gefusera, tuturo 2:6 duruda tege, garesa!

- 5 Na reju ava anakora namokena siroredo ghusira ava koter-aena,  
a kotugo ghaeko ana ainda irari ava erekotena.
- 6 Na tumbaghae kotari tomanakogo beká ava kotise irá ghraena.  
Kote simbugari dae use, nasuka namokena eminge ategi er-aena,
- 7 “BAJARI namonde sifo ghousa gukai mutarira ai? Nu jo sekago namondekena ivuga ae arira, tano?”
- 8 Namonde dubo buraira amo, dotira, aĩ? Nunda beka gajari namondekena usira amo, oroko fugetira, aĩ?
- 9 Avose, God namondedae joka ari dae sisira ava, kotae usira, tanojo?  
Avose, namondedae joka edo ghusira ava, nunda janje ekoimi etiri dadabusira, tanojo?”
- 10 Aminge kotise, na eminge siseni, na roera reimi iri, dubo mema tomanakogo eretafena amo,  
God namondekena rea edo ghusira ava oroko jo ae eraira.
- 11 BAJARI, na nine roera babaigo edo ghusesa ava kote tambarena.  
Tano dombu eni dombu eni anakora eteso dudukuhusera, ava kotedo gharena.
- 12 Ni roera rea usesa isambu kotarena. Nine tano dombu eni dombu eni eteso dudukuhusera, ava kotedo gharena.
- 13 Arie God, roera isambu nine eraesa amo kakaragori, God babaigo a nimongo eni tefori.
- 14 God, nine tano mendeni mendeni easo siroreraira.  
Ninda fakina ava oro mendeni mendenikena ijugeteso isagha usira.
- 15 Ninda fakinaimi ninda natofo Jacob nengae Joseph ghaeda imemisiri ava sonembeteso jebuguseri.
- 16 Arie God, evetu genembo oju use ungo ata dadadagheraera

aminga ava, uvu ninda dom-buda fetirise,  
aju edo tiro taraghuseri.  
Karaje kafuru ghighi ábarago nindae oju use aminguseri.

- 17 Foroga borija dise, utu gambari utu gambari biria tarighuse, barara fugutusira.
- 18 Ninda barara gururu gararaghuse kerere karara ghiri a kotugo biria tarighuse  
usasa tomanako use, jaraghetiri enda isagha usira.  
Amingiri, dumo firi, enda barago daradaraghusera.
- 19 Ni eva anjeraira ainda jokada tere deinghedo isesi.  
A kotugo karaje ghighi aminda sive sembesa sovenikena bu-vurutusesi. Avata ninda ata kotu mave jo gaeri.
- 20 Ni sifi kaifa kato aminga ava use, ninda evetu genembo unumbedo isesi,  
Moses nengae Aron ghae giti bero nemonde isevu.

## 78

*God Nunda Natofo Eveva Iro-ro Dae Sonembedo Ghusira, Avata Nunda Geka Imboe Edo Ghuseri.*

- 1 Nanda evetu genembo dengoro javevu! Nanda ijuga erena evia ningido, bu jighi fetevu!
- 2 Na kotofuda dubo kotari ava sari dae erena. Aminguse, tuka sufurono geke jungarida anakora sirorusira,  
ava se disugari dae arena.
- 3 Roera abuamane setero niningusera a kasama usera ava,
- 4 namondeda sasingukena jo jungae arera.  
Namondeda imemesiri amboda sirorarera nemokena barago saoro ningarera.  
Amo Bajari da fakina a roera rejua ava edo ghusira, kotugo nunda taño dombu eni dombu eni etero,

- dudukughusera, ainda bino  
ava saoro ningarera.
- <sup>5</sup> Nunda evovo Israel embokena futusira, a nunda Agho Dari Jacob da imendi gamendikena futusira.  
Amingedo, namondeda abua mane kena, nunda agho dari nanjogo nenda sasingukena ijugaoro dae sisira.
- <sup>6</sup> Ainda beká mo, imendi gamendi seka sirorarera ningi kasama edo, nenda sasingu sirorarera barago,  
saoro kasama aeteri.
- <sup>7</sup> Emboro eminguse, néambarago nenda tumondari God kena fitaeteri.  
Aminguse, God reava nemokena usira ava kote gosuse, evovodae nunda Agho Dari ava edo ghaeteri.
- <sup>8</sup> Ne jo nombuamane da ari ava ae aeteri. Nombuamane gogore use, geka bu fugari kakatori.  
Ne God jo tumonde gogoghombae edo ghuseri, a nunda sari ava jo evovodae ae edo ghuseri.
- <sup>9</sup> Ephraim ondi nenda feva nunda gorobaghae bambudo, iseri.  
Avata tataya sirorusira ainda sifoda, ne oju edo do sufuseri.
- <sup>10</sup> Ne God de dabade beka gagojusera, ava bejedo, nunda Agho Dari imboe use, jo kaifa ae useri.
- <sup>11</sup> Nu rea ava nemokena usira amo, kotae useri, a tano mendeni mendeni nemokena etiri gosusera,  
ábarago ne kotae useri.
- <sup>12</sup> Nenda nombuamane gosero, vasa tevisa Soan aminda, amo reighi Egypt ainda jokáda, nu tano mendeni mendeni etiri gosuseri.
- <sup>13</sup> Nune etiri, karaje sarige furu digharige fetetero, Israel embo sembera, betu sovenikena vivituseri.
- <sup>14</sup> Ijighae mo, emboro kasama aoro dae sedo, God foroga muteari,  
giti irureari ne gosuse amboda amboda ya ghedo ghuseri.  
A tumba ghousa mo, God avaraka buburaghae muteari, giti irureari, ne gosuse amboda amboda ya ghedo ghuseri.
- <sup>15</sup> Reighi evetu genembo a uvu irae vasa aminda nune setiri, ghamana sarigusira.  
Sarigetiri, uvu duru bekáda ava fira vitiri riseri.
- <sup>16</sup> Nune etiri, uvu ghoghorro ava aroroda kirighe fira buvudo, uvu tomanako dukaghae sufusira.
- <sup>17</sup> Avata, ne God kena ari eko doyae tambuno edo ghuseri,  
ne reighi uvu a evetu genembo irae vasa aminda God Ika Bekáda irá gheraira aikena, osogo edo ghuseri.
- <sup>18</sup> Ne avito sise, bayau mutari mindari dae sise, God dere gosuseri.
- <sup>19</sup> Ne God dae bauso use geka eminge siseri, “Reighi uvu a evetu genembo irae vasa eminda God bayau mutari inonori, aĩ?”
- <sup>20</sup> Geka bekári, nune ghamana de sarigetiri, uvu tomanako ava averege fira vovosusira.  
Avata, nu oka bayaughae nunda evetu genembodae mutari inonori, aĩ, tefo?”
- <sup>21</sup> Ava ningido, BAJARI dubo ekoko usira. Edo, nunda natofo mendeni setiri avarakai dungetiri ambubuduruseri.  
Aminguse, nunda dubo ekoko nemokena baji tomanako beká usira.
- <sup>22</sup> Ai resira amo, nenda tumondari God kena tefori. Nu sari ne jebugaetera, ava ne jo tumondae edo ghuseri.
- <sup>23</sup> Avata, nu utu iká ominda kena setiri afigetiri

- 24 utuda farava da vuji futuse, mena\*  
mindoro dae sedo setiri vose  
firi riseri.
- 25 Agido, ne anera da bayau ava ris-  
eri, a nanjogo mindari sisera,  
isambu God nune futusira.
- 26 Kotugo, nu etiri, yaura iji vitarike-  
naghe sufusira, a nunda faki-  
naimi etiri,  
yaura beina doririkenaghe†  
tuturo e sufusira.
- 27 A nunda evetu genembokena mo,  
rika mane da digari mo, inono  
kora da ghonesa aminga  
ava mutiri vosefusira.
- 28 Rika mane du fafasusera amo,  
dobo itutugusera ainda  
soroda a demo damo isas-  
ambu  
du birurughe fafasuseri.
- 29 Amingetiri, evetu genembo mindi  
tini babojusira.  
God ne reju ava uju usera ava  
futusira.
- 30 Avata, nenda bayau da oduso,  
jo tukughae iriri, ne mokogo  
mokogo rero,
- 31 God nemokena dubo ekoko edo,  
nenda gegenembo fakina  
kakato,  
amo Israel da gegenembo  
seseka gari garigo ava detiri  
amomonjeguseri.
- 32 God nu amingusira, avata, ne ari  
ekoko jo doyae, udo fuseri.  
Aminguse, God tano nanjogo  
ututusira ava jo gi tumondae  
useri.
- 33 Ava sedo, ne iji nanjogo jebuga  
iraetera ava, God gafugetiri tu-  
foko etiri ambubuduruseri.  
Nenda jebuga irari da ghaeko  
ava dara a ojuimi gafugetiri,  
amomonjeguseri.
- 34 Sifo mendeni mendeni ne deari  
amomonjegedo ghusera ainda  
sifoda,  
nenda mendeni dubo  
joveregheari, sekago God  
kena fa ghuseri. Amin-  
guse,
- ne sororaghae numokena  
vujeguse, benunu sedo  
ghuseri.
- 35 Sifo aminda, God mo nenda bere  
ava, a God fakina kato nemo  
sonembari jebugaoro dae  
sedo fusira,  
ava sekago kotiseri.
- 36 Avata, nenda geka mo, isambu  
gungubori. Geka rea ava sedo  
ghusira amo, beká eni tefori.
- 37 Ne numokena jo dubo dabako aeri.  
Ne God de dabade beka gago-  
juse, rea ari dae sisera ava,  
nene jo kaifa ae useri.
- 38 Avata, God nunda evetu genembo-  
keno joka edo ghusira. Nenda  
ari ekoko kote dotutuse,  
jo dari amomonjegaeri. Sifo  
mendeni mendeni nu  
janje ekoko edo ghusira,  
avata, fati fetedo ghusira.
- 39 Nemo ambari embori, a kotugo  
ne taká yaura sumbu ya dad-  
aberaira, amingo ava kotedo  
ghusira.
- 40 Sifo digari beká reighi uvu a evetu  
genembo irae vasa aminda  
numokena osogo edo ghuseri.  
ifo digari beká ava urure-  
oro, nu mema edo  
ghusira!
- 41 Sifo ghousa rea edo ghusera, ne ari  
daba ava use, God dere gido  
ghuseri.  
Aminguse, Israel embo da God  
kakara aikena ghamo vevera  
bu foa ghedo ghuseri.
- 42 Nunda fakina teriango ava ne kotae  
useri. Ne nanjigo gitofu da un-  
goda saghimbe rurusira, ava  
ne jo kotaeri.
- 43 Nu nange enda tevisa Soan Egypt  
provensi aminda nunda fak-  
ina ijuguse, roera mendeni  
mendeni usira,  
kotugo tano mendeni  
mendeni etiri dudukughusera,

\* **78:24:** Roera javo “mena” (manna) amo, God muteari, mungoghae dabade sifo ava inono vose furiari, Israel embo reighi evetu genembo a uvu irae da vasa aminda deinghuse, rete mindido ghuseri. † **78:26:** Eminda “doririkenaghe” resira mo, foyagoda geka aimi “south wind” resira.

- ábarago kotae edo  
ghuseri.
- 44 Nune etiri, uvu ororo jinisira.  
Etiri, Egypt embo uvu reda bu  
mindaetera ava buniseri.
- 45 Soini mutiri fera, nemokena  
buvu etero vevera teria beká  
itatama useri,  
a gerakuimi nenda reighi  
bebeta usira.
- 46 A sisi mutiri fera, nenda bare baka  
mindi tefo useri.  
Amingetero, bayau beká usira  
amo, jo digarigo sirorari bam-  
budo mindaeri.
- 47 Nune nenda vaini da asi ava borija  
dombu eni aisi yaurago aimi  
detiri amomonjeguseri,  
a nenda ika kayuyu barago  
ais (ice) imi etiri amomon-  
jeguseri.
- 48 A nenda buramakau barago boriji  
aisi avavaga setena, aimi de-  
tiri amomonjeguseri,  
a nenda sino fukamane  
mendeni biria barara  
aimi detiri amomonje-  
guseri.
- 49 Nu dubo eko beká ava usira nemo-  
kena. Aminguse, nunda janje  
eko nemokena bu fuse setiri,  
nunda anera mane ambari  
budo fero, itatama useri.
- 50 Nu nemokena janje ekoko beká  
usira, ava jo jighi fetaeri.  
Jo avori sari jebugae useri. Nu  
tauno eko mutiri, iri bambu  
sirivo useri.
- 51 Nu Egypt embo da ofo kambo  
daba daba da vide jamena be-  
bego siroredo irara, ava detiri  
amomonjeguseri.
- 52 Inono sifi kaifa kato eraira aminga  
nunda evetu enembo unumbe  
bu buvurutusira.  
Buvu, reighi uvu a evetu gen-  
embo irae vasa aminda tavo  
udo budo fusira.
- 53 Nune emboro ijuguse, eveva je-  
buga budo isira aindae, ne jo  
oju aeri.  
Avata, nenda gitofu mo, evaimi  
viti fira, fatiri amomonje-  
guseri.
- 54 Ne budo, nunda enda kakara  
aminda, a doriri nune gito-  
fukena isoro e rurusira  
aminda fira buvurutusira.
- 55 Nune setiri, evetu genembo  
aminda giti dighi iriara ava,  
nunda evetu genemboimi  
ondero buvutero,  
ne era teteruseri. Nenda  
enda budo, Israel embo  
dae ghasedo, nenda ofo  
kambo barago  
nunda natofodae futusira.
- 56 Avata, ne God Iká Beká aikená  
osogo bu fuseri. Aminguse, nu  
dere gosuse, nunda Agho Dari  
jo kaifa aeri.
- 57 Aminguse, ne osogo use, nom-  
bua mane nange edo ghusera  
aminga ava use, God da sari  
ava ighagha useri.  
Ne rea sedo ghusera amo,  
goroba otombari amingori.
- 58 Ne eteni emboda tumondari ava  
eoro, nu dubo ekoko edo  
ghusira.  
Ove kave ava tumondeoro  
gido, nu dubo eko beká  
ava edo ghusira.
- 59 God ava gosusira amo, nu dubo  
eko usira. Amingedo, nunda  
natofokena guka mutudo  
ghusira.
- 60 Nunda dobo reighi Sailo aminda  
namonde Israel embode  
dabade irá ghedo ghusira ava  
gukai futusira.
- 61 Nu ungo bebesugetiri, namondeda  
gitofui nunda fakina a usasa  
da tano,  
amo Agho Dari da Mauva  
ava, nene ruruseri.
- 62 Nu nunda natofodae dubo ekoko  
usira. Amingedo,  
ungo sokinembetiri, gitofui  
namonde dedo gaedo  
ghuseri.
- 63 Genembo gimasa seka bajari  
isambu isoroda de tefo useri.  
Etero, ade jamena mavekena  
vai ari?
- 64 Gitofui fristi mane de tefo useri.  
Amingedo, jo doyoro, nenda  
roriri sorara rovarova jo aeri.



- 65 Avori, Bajari kau genembo eni inono avise irara, erari da kaugo arira, o vaini da fakinaimi derari,  
diti fangarira aminga ava nune usira.
- 66 Aminge eredo, nunda gitofu ondi detiri, tukughedo amboi iseri. Ne de duboda fati fetetiri, nunda gitofu meka gosuse irá ghedo ghuseri.
- 67 Avata, nu Joseph da imendi gamendi gukai futusira. A Ephraim ondi mo, eni jo gatege baeri.
- 68 Ainda vasada mo, Judah ondi, a ututu Saion‡ dubo bu gogoghombedo ghusira ava gatege rurusira.
- 69 Reighi aminda nunda Tafaroro Kambo inono nunda irari vasa utuda amingo ava itutusira. Inono enda evovodae fakina e fetirira, aminga ava usira.
- 70-71 God da saramana kato, David, nunda sifi ekeroro jokáda kaifa use iriri, God nune David gatededo,  
Israel embo da kini (king) a kotugo nenda sifi kaifa kato aminga ava are dae sisira.
- 72 Etiri, David natofo kaveveraimi unumbusira. Kaifa use, dubo kotise ne giti jighido ghusira.

## 79

*God, Natofo Israel Embo Ava Nange Gitofukena Saghimbe Bu Darigaetira Ainda Banungariri.*

- 1 Arie God, gitofu ni jo tumondae eraera aimi, ninda enda ava bari dae fera namanekena isoro useri.  
Edo, nene ninda Kambo Kakarago ava bebeta edo, reighi Jerusalem ava basa eko beká jijighuseri.
- 2 Ne ninda natofo Israel embo ava dedo,  
tamo rika riduna mane aimi mindoro dae dodo iseri.

Ninda saramana kakato da tamo ava taima sino fukaimi mindoro dae useri.

- 3 Ne ninda natofo Israel embo ava dive gafetero ororo vose gaunghusira.  
Ororoimi reighi Jerusalem isambu yausa gaghari gusira. Kokomana bu furugari embo eniko jo fetaeri.
- 4 Oro mendeni God jo tumonde bainghae eraera tinguda iritirera aimi,  
namanendae jijivu ekoko sesegeraera. Ne namanendae gegha jise,  
ã kotugo namanedae makoede sise, dere jise gegha yaru eraera.
- 5 Arie BAJARI, namanekena evovodae janje eko use iraresa, ai?  
Ninda janje eko beká namanekena eraesa ava, nanjigo tukughari?  
6 Namane dodo, oro mendeni ni jo tumonde bainghae eraera aikena janje eko aetesi.  
Natofo nimokena jo tumonduse banungae eraera aikena, ninda dubo eko ava ijugaetesi.
- 7 Ai resira amo, nene ninda natofo Israel embo ava detero amomonjeguseri.  
Ninda reighi teria ava, nene basa eko beká ava jijighuseri.
- 8 Erá avia abua da ari ekoko aindae sedo namanedae mema mutudo, ghamo baoro dae eose!  
Oroko namanendae joka aetesi. Namanenda gigitari isasambu dadabetira.
- 9 Arie God, namane sonembuse, a kotugo namane gitofukena bu darige jebugaore!  
Ninda binódae sedo, namane dara jokáda saghimbe ruruse, namanenda ari ekoko kote doyasoda dae resena.
- 10 Redae oro mendeni mendeni namanekena eminge sareri,

‡ 78:68: Afige, geka eni Saion dae gefusera, tuturo 2:6 duruda tege, garesa!

- “Nenda God da sonemba mo, redari?”  
 Ninda saramana kakato ava oro mendeni mendeniimi dive gafetero,  
 ororo yausa gaghari gusira aindae nine daso ghamo baoro dae resena.
- 11 Dibura embo aoro sise irera, ava ningaso dae resena.  
 Evetu genembo amboro dae setero diburada iritirera ava, ninda fakina teriago aimi vujege, buvu jebugaore!
- 12 Arie BAJARI, namanenda gitofu dengesida irá gheraera aikena,  
 ninda javoda jijivu ekoko sisera, ainda mino futuse, etoda mokogo mutaso, itatamudo yarera.
- 13 Amingaso, namane ninda tofofo, ninda sifi (sheep) mane kaifa eraesa, nindae aiyakoe sise irarera.  
 A namane, namanenda sasingu, imemesiri gamemesiride nindae sakai sido yarera.
- 2 Oro Ephraim, Benjamin a Manasseh ondikena isagha aso gaore!  
 Fu, ninda fakina namanekena ijuguse, namane sonembaso jebugaore!
- 3 Arie God, sonembaso, namaneda irari nunda ari fatonga aeti. Namanekena joka ururaso, namane jebugaore!
- 4 Arie BAJARI God, fakina isambu da tofo, ni ghousa mavega ninda evetu genembo kena dubo eko use,  
 namanenda banungari jo ningae aresi?
- 5 Ni namaneda bayau dubo vevera ava futusesi, jivu ava agha tomanakoda averege mindoro dae futusesi.
- 6 Ni doteso, oro mendeni namanenda tinguda iritirera aimi, namanenda enda soro vesa ari dae tataya use irera.  
 Aminguse, namanendae jijivu ekoko seraera.
- 7 Arie God, fakina isambu da tofo, sonembaso namaneda irari nunda ari fatonga aeti.  
 Namanekena joka ururaso, namane jebugaore!
- 8 Ni vaini da asi veka Egypt aminda ghe bu fesa, oro mendeni mendeni ondeso,  
 nenda enda do buvurutero nenda endada govusesi.
- 9 Ni aminda govvari dae sedo, enda jedo goveteso, nunda besisi enda jokáda vose gogogho edo,  
 reighi isambu bedo usira.

## 80

### *Bajari Nange Jovereghe Sekago Joka Aetira Ainda Benunuri.*

- 1 Arie, Israel embo tavo tatau ari kato, namane Joseph da imendi gamendi Israel embo da giti jijighuse,  
 tavo tatau eraesa. Ni kini (king) edo Serubim\* maneda ikáda anumber- aesa aimi,  
 dengoro namanekena fiti!

\* **80:1:** Tamo foyagoda geka etoto naká *seraphim* nengae *cherubim* irira. Ne avose aneyada mendeniri. Ne fakina kakatori. Nenda irari mo, ne God da dombuda irá geraera. Ezekiel tano dabako aminda, a tano ghabu soveni soveni aminda tegutuse *cherubim* da kau itako kasama arera. Ava edo, namonde geka mendeni Amboda Sirorari aminda tamburaera, ava kotarera. John nunda gekai tano 4 aminda *living creature* gefusira. Korafe geka aminge sarera amo, namonde *sifo fuka da eni* kotaeteri, tano. Avata, *seraphim* nengae *cherubim* ghae jo sino fuka iraeri. Ne God da geka ningia, mino bekami seraera, a nunda uju ava eraera. Ava sedo namane Amboda Sirorai aminda geka *serubim* gembudo ghuseri. Avori, Baibel jokada *serapim* vasa dabako tamburaera, Isaiah tano 6 aminda irira. Ne God da dombuda fetedo nundae sakai sise irera, a nunda uju use irera. Ne ajagha, *cherubim* ajagha, aĩ daba avori. Namonde jo gi gogogombae irera. *Cherubim* aminga ava, ne God da dombuda fetedo nu kakara use unda uju edo gherera. A Korafe gekami javo etoto naká da duka utuako bekári. Ava sedo, namane *seraphim* nengae *cherubim* ghae kotise geka dabako *serubim* gefuseri.

- 10 Enda jiro fumbari isambu nunda itumuimi gajojusira, ika babai Lebanon frovensi ami
- 11 Nunda fafatuimi siregetiri era, eva Mediterranean aminda buvurutuseri,  
a kotugo era uvu Euphrates aminda barago buvurutuseri.
- 12 Ni redae furu dighi birurughetero ireira ava, de bejeteso vovosusi?  
Oroko mave vare aminda ya buvu darige yari dae arera, aimi ninda vaini da vuji kotae kotae bagia ari inonori.
- 13 Bao fukaimi fati beteraera. Kotugo taima sino fukaimi ainda vuji mindiraera.
- 14 God, fakina isambu da tofo, dombu namanekena jovereghe!  
Utudaghe diti fuge vose fururari namane gase! Aminguse fu, ninda natofo sonembaso jebugaore!
- 15 Fu, asi seka evia govedo, tavo eteso baji fakina usira ava, sonembaso jebugaore!
- 16 Namanenda gitofuimi divetero fasetiri avarakai dungutuseri. Gi, dombuda sise, dege amomonjegaore!
- 17 Evetu genembo nine gategusesa, a oro nine eteso fakina usera ava, tavo use, gagara e fete!
- 18 Amingaresa amo, namane sifo nanjigo aminda ni jo sekago gukai mutae arera.  
Namane tavo ururaso jebuga irarera amo, ni jighoro erase!
- 19 BAJARI God, fakina isambu da tofo, namanekena joka ururaso, namane jebugaore!
- 2 Foyago da ghasaghasa (tambourine) doruse, yaru tuturo edo divore!  
A yaru ningari vivi ava gita\* dombu eni dombu eni aimi doruse divore!
- 3 Tambuno seka jorugharira ainda kirumudae, a tambuno vosiya tifughe jorughedo gharira, ainda kirumudae barago tavuya fusevu!
- 4 Emo Israel embo da agho dariri. Geka emo Jacob da God kena ghe fusira.
- 5 Agho dari setena ava, Egypt embo dedo gaedo ghusira da sifo aminda Israel embodae futusira.  
Genembo eni na jo kasama ae, geka eminge siri niningusena, amo eviri:
- 6 “Na ango bouvu nenda sagada ava bu fiteno vovosusira. Egypt aminda kanda fumbudo ghuseva barago, nane seteno fitevo vovosusira.
- 7 Ne dubo mema use, javono namoa gatetevo sonembuseni. Nanda junge irari vasa, biria barara jokada irise,  
nenda tumondari uvu Meribah dengesida dere gosuseni.
- 8 Nanda natofo, ningivu! Dombuda sari dae erena. Israel embo nanda geka ningaeteva, aindae uju erena.
- 9 Ne jo sifo nanjigo aminda oro eninda god tumonde bainghae areva.
- 10 BAJARI God ne unumbe Egypt ghedo bu fusira amo, namori. Ava sedo nenda beka fangevu, bayau mutono mindove!
- 11 Avata nanda natofo nanda geka jo ningae eraera. Israel embo nanda geka jo bae eraera.
- 12 Ava sedo na ungo bebesugeteno ghambura da irari ava use irá ghuseri, kotugo reju uju usera ava, edo ghuseri.

## 81

### *Kirumu Gaso Da Yaruri.*

- 1 Namondeda sonemba kato God dae ivuga ghae fumbu arugaore!  
Jacob da God dae sakai sise, yaru didivuse fumbu arugaore!

\* 81:2: Afige, geka eni gita o uka dae gefusera, tuturo 33:2 duruda tege, garesa!

- 13 Nanda natofo nanda geka ningaetera aindae, uju erena. A Israel embo nanda geka baetera, aindae uju erena.
- 14 Amingaetera, na nenda gitofu to-toigo de atai duboda fataeteni, nenda isoro embo isambu barago de atai duboda fataeteni.
- 15 Mave na imboe eraera amo, ne ojuimi tumo taroroda sire nanda dombuda anosegaeteri. Nenda dara eraera da mino mo, evovodae tafudo yaeteri.
- 16 Avata ne nanda natofori. Ava sedo, na farava evevago bekáimi undaeteni  
a taimada finje firukago aimi undono, tini bajaetira.”

## 82

### *God Nu Kini (King) Iká Bekádari.*

- 1 Enda da babojegari babai babai nanjigo totorugeraera einda jokáda God nu giti jighiraira. Amo, enda da kokotofu nenda oro oroimi gungubo sise “namondeda god”\* sedo ghusera, nenda dombuda God nunda kotari seari voseraira.
- 2 Ne evetu genembo ari ekoko eraera ava ijujareva amo, bekáda bekáda use ijujevu!  
A ari ekoko embo ava ijujaraesa amo, erá nemo sonembuse, eko arera ava, kivo eose!
- 3 Ne makasi embo a babate embo gagara use irareva!  
Kotugo iti fafo iraede embo barago inonoda kaifa tavo use irareva!
- 4 Makasi a fakina tefo embo ava ari ekoko embo da ungodá sainghimbe baovo ne jebugarera.
- 5 Ne rekato bunari a daghari bekári! Ne ghaghi garuse, evovodae kosasa eraeva.

\* **82:1:** Natofo mendeni nenda kokotofu kakara use ne ategi use *Arie*, *namondeda god* sedo gherera. Avata amo gungubori. Nenda kini o kokotofudae aminge seraera, avata jo God beká eini iraeri.

- Koto da sifoda geka beká eini jo isagha ae eraira, gungubo vanembori.
- 6 “Ne god maneri” siseni. Ne isasambu God tomanako iká bekáda irá gheraira ainda sasinguri.
- 7 Avata ne isambu endada gegen-embo amburaera aminga ava ambareva.  
Kini nanjogo enda eminda irera aminga ava ambu tefo areva.
- 8 Ava sedo, Afa God fu, enda é nine ijujase! Oro nanjogo enda eminda irera, isasambu ninda tofori.

## 83

### *God Nange Israel Embo Da Gitofu De Atai Duboda Fati Fetaetira, Ainda Benunuri.*

- 1 Arie God, erá beka gote iriose. Erá tumbe tauntaunghe irise, beka baka sae use iriose!
- 2 Gi! Ninda gitofu osogo nimokena bu refera. Mave ni imboe eraera ábarago nemonde tataya ari dae erera.
- 3 Ninda natofokena ufena manaka eregarera. Ne ninda natofo tavo tatau eraesa ainde, tataya ari dae sise, agho ituterera.
- 4 “Fuvu,” resera, “Oro Israel embo daoro vekaghae sirivo aore!  
Amingaoro, Israel embo da javo manjarira.”
- 5 Ne dubo dabako edo manaka gae, oro mendenide tatedo, nemonde tataya ari dae sise resera.
- 6 Oro nanjogode tatari sisera, amo eviri: Edom ondi, Ishmael ondi, Moab ondi á Hakri embode dabade.
- 7 A kotugo Gebal ondi, Ammon ondi, Amalek ondi, Philistia ondi á Tyre embode dabade.
- 8 Assyria ondi barago kotugo Lot da imendi gamendi Amori embo edo Moab embo seraera ainde tatedo tataya ari dae resera.

- 9 Midia embo dae rea ava usesa, a kotugo uvu Kislon aminda Sisera nengae Jabin ghaekena rea usesa aminga ava, oro oroko nembo tegetena aikena, kau daba ava aso dae resena.
- 10 Ne reighi Endor aminda deteso amomonje getero, nenda tamo bete endada vovosegusira.
- 11-12 Nenda giti jijighigari Oreb nengae Zeeb ghae kena usesa, kau daba ava e!  
Zebah nengae Zalmunna ghae siseri, “Namonde enda é God da tofori ava namondeda tofo-dae baore!”  
Avori, gegenembo etoto naká ava setero ningido, rea usesa, oro tegetena, ainda babojegari kena avavaga use, daso amomonje gaoro dae resena!
- 13 God natakoé inono fonja o farava vuji anoso yauraimi bambu kotae kotae gorogheraira aminga ava e!
- 14 Kau avaraka taimada gambu aviraira aminga ava, a enda fumbarida gambu bubura eraira aminga ava,
- 15 ninda yaura vovoga aimi ondasosumbarera, a ninda yaura fakinago bekáimi ondi, oju aore!
- 16 Arie BAJARI, nenda dombu mekai afuruge, ninda fakina ava gido kasama e gogoghombaore!
- 17 Ne isoroda dedo gaedo ghaoro evovodae ojughae irore! A meka gosudo ya ambore!
- 18 BAJARI iká bekáda, utu enda kaifa eraira, nisuka nimori, ava kasama aore!
- 2 Na nanangedo Bajari da Banungari Kambo jokáda iratena, aindae uju erena!  
Arie, BAJARI God, evovodae irá gheraesa, nanda tamo a asisi isambuimi ivugaghae nimokena yaru seraena.
- 3 Arie BAJARI Fakina Isambu da Tofo, nanda kini (king) a nanda God, rika veveyako barago ninda kamboda moghá fitiraera a kaughoros barago nenda mamandi fumbudo, ninda olta (altar) dengesida kaifa eraera.
- 4 Mave ninda banungari kamboda irá gheraera amo, ivuga use irera.  
Ne evovodae yaru sise ninda javo jigheoro ereraira.
- 5 Evetu genembo mave nimokena fakina buraera amo, ne ivuga use irera, a mave evovodae doriri Saion\* aminda yari dae uju eraera, nembarago ivuga use irera.
- 6 Ne govi eni uvu tefo javo Baka aminda deinghe sembi yarera amo, reighi aminda, uvu kirikara gharira, a ghaeko sifo dadaba ururari borija tuturo edo dise, uvu sirorarira.
- 7 Aminguse, ne fakina rurudo yarera. Ne ya Saion buvudo, god mendeni irera nenda God bekáava, aminda irari garera.
- 8 Arie BAJARI God Fakina Isambu da Tofo, Jacob da God, nanda benunu ningi!
- 9 Arie God, namane da kini nine gategusesa ava, esimbuge!
- 10 Iji dabako ninda tafaroro kamboda anumbiraetena a nu evevagori, iji 1,000 ava reighi mendeni kena irari mo, jo amingo iraeri.

## 84

### *God Da Kambo Dae Uju Beká Eraera, Ainda Gekari!*

<sup>1</sup> BAJARI Fakina Isambu da Tofo, na ninda banungari kambo dae dubo ererurena.

\* 84:5: Afige, geka eni Saion dae gefusera, tuturo 2:6 duruda tege, garesa!

- Arie nanda God, ninda kambo guro bekada fetaetena amo, evevari,  
jo kusia bagia ari kakato da kamboda irari amingo iraeri.
- <sup>11</sup> BAJARI mo, namondeda bere a Kini usasago bekári.  
Nunda kavevera a tumondari namonde kena eraira, aimi namonde esimbugeraira.  
Ari eveva embokena roera eveva reju ava uju eraera, ivugaghae muturaira.
- <sup>12</sup> BAJARI Fakina Isambu da Tofo, mave ni tumonderaera amo, ne ivuga use irera.

## 85

### *God Nange Israel Embo Da Irari Esimbugaetira, Ainda Banungariri.*

- <sup>1</sup> BAJARI, ni ninda natofo da enda dae joka usesi. Ni sifo aminda sonembeteso, Israel sekago ati ghayafade useri.
- <sup>2</sup> Ninda natofo da ari ekoko kote dotutusesi, a nenda dimbari isambu kote dodo gukai futusesi.
- <sup>3</sup> Dubo ekoko nemokena edo ghusesa tukughusesi.  
Aminguse, ninda dubo ekoko da fakina jigghi fefetusesi.
- <sup>4</sup> Arie God, namanenda jebuga da susu nimori. Namane bu jovereghe fu!  
Aminguse, namanekena bauso sosou eraesa, ava dodo, dubo jama e!
- <sup>5</sup> Are! Ni evovodae namanekena dubo ekoko use iraresa, ai? Ninda dubo ekoko jo nanjigo fua tukughae arira, ai?
- <sup>6</sup> Sonembe, namane ninda natofo sekago fakina edo, ni jighoro erase!
- <sup>7</sup> Arie BAJARI, namane nange evovo dae dubo buraesa ava, aso isagha ari gaore!  
Namane sonembuse, ninda jebuga mutaso baore!

- <sup>8</sup> BAJARI God reava resira ava, na niningerena: namonde nunda totofori.  
Ágido, namonde jo sekago jovereghe yama daghari da ari ae arera amo, nunda mainungari namonde kena mutarira.
- <sup>9</sup> Geka bekári, nu simbuge fetedo, mave numo igheghi eraera ava sonembari jebugarera.  
Kotugo namonde sonembeari jebugeraera ainda duro ava, namondeda reighi eminda irarira.
- <sup>10</sup> God rea ari dae sisira ainda beká ava nune ari nunda dubo bari ainghae dabade isagha ari garera.  
Akotugo dambugo irari nengae mainungari ghae barago sifo daba aminda isagha ari garera.
- <sup>11</sup> Namonde Israel embo God tumonde baingheraera aimi ungo God kena sirigaoro,  
God aito kakara fugeraira aimi nunda ungo sirige namonde unumbarira.
- <sup>12</sup> BAJARI namonde esimbugari susu iti fafode arera.  
Aminguse, namondeda enda emo oka bayau digutururari mindarera.
- <sup>13</sup> Ari dambugo ari aimi, BAJARI da emboro rerebe, giti irurari, nu amboda yarira.

## 86

### *Sonemba Da Benunuri.*

- <sup>1</sup> Arie BAJARI, na gofari bekári. Na tofo sonembari da emboro eni tefori.  
Ava sedo, nanda benunu ningido, na sonembe!
- <sup>2</sup> Na ni tumonduse, ninda sari ava eraena, na ninda saramana katori.  
Ava sedo, ambari dae erena ava sonembe, jebugaone!
- <sup>3</sup> Nanda God nimori. Na banungurureono sifo ate fa ya tumba jiraira. Ava sedo, nandae joka aso dae resena.

- 4 Arie Bajari, nanda benunu nimo-  
kena viti ya gheraira. Na  
ninda saramana katori.  
Ava sedo sonembaso, na ivuga  
aone!
- 5 Ni namanekena veka eveva use, na-  
manenda ari ekoko kote doy-  
eraesa.  
Mave nimokena banungeraera  
aindae, ni evovodae dubo bu-  
raesa.
- 6 BAJARI, nanda benunu ningi!  
Nanda kori nininguse, na  
sonembe!
- 7 Ni nanda banungari ningiraesa,  
ava sedo na dara tafuse, nimo-  
kena kori seraena.
- 8 Arie BAJARI, god eni nimongo tefori.  
Nine usesa avavaga enimi jo  
ae eraera.
- 9 Oro isasambu nine eteso sirorusera  
aimi, fua tumoi bainghuse ni  
tumondarera.  
Ninda javo tomanako ava  
jighoro erarira.
- 10 Ni fakinago bekári, a ni tano  
dombu eni a ari gae gitida ava  
eoso siroreraira. God nisuka  
nimori.
- 11 Arie BAJARI, ni rejoa aono dae uju  
eresasava, ijugasasamingaone!  
Ijuge, na dubo dabako use nin-  
dae farago jighone!
- 12 Arie BAJARI, nanda God, nanda  
janje joká isambu aimi ni  
jighono eraresa.  
Ninda javo tomanakogo kau  
mavegasava natofoisambu  
kenae evovodae osasise  
irarena.
- 13 Evovodae ninda dubo bari  
tomanakoi na dubo buraesa!  
Aminguse, na ujeda avasone-  
mbe besojebuguseni.
- 14 Arie God, evetu genembo ivuga  
kakato aimi eredo, namoa  
dari dae refera.  
Tafasarakakato, ninda ge-  
kajoningae eraeraaimi, na daoro  
ambono dae erera.
- 15 Avata, Arie Bajari, ni joka ari a  
dubo bari da God ri.

- Ni evovodae durumuguse kavevera  
eraesa, kotugo ni rea ari dae  
beka gajeraesaava,  
isambu urureoso bekásiror-  
eraira.
- 16 Jovereghe namogose, joka  
e! Ayanindae farago edo  
ghusira, amingaava use irena.  
Avasedo, fakina futururaso  
jebugaone!
- 17 BAJARI, ninda kavevera eraesa,  
ainda bekáava ijugururaso is-  
agha are!  
Amingarira amo, evetu gen-  
embo na imboe gamboe  
eraeraava,  
na nange sonembuse yove  
sisesaava gose, meka  
garera.

## 87

### *Jerusalem Dae Sakai Sisira Ainda Gekari.*

- 1 Enda jiro fumbari kakara aminda  
BAJARI nunda bogu begaya  
didighusira.
- 2 Israel jokáda reighi mendeni  
mendeni iritirira, avata BA-  
JARI Jerusalem avadubo bu  
gogoghomberraira.
- 3 God da bogu begaya aminda dighi  
ireva, nemokena resena.  
Gekaeveva gaveva nendae setiri  
vovoserira, ningivu!
- 4 Oro ningiami nanda sari avae-  
raera, tege nanda bukuda gem-  
barena amo,  
na oro Egypt nengae Baby-  
lon ghae da javoava,  
nébaragogembarena.  
Evetu genembo Jerusalem  
aminda siroredo irera, tege  
nanda bukuda gembarena  
amo, na Philistia embo, Taia  
embo  
Ethiopia embo da javoava  
gembarena.
- 5 Saion\* dae mo, eminge sarera,  
“Nunda oro oro nanjogo ainda  
sirorari vasa mo, Jerusalem  
numori.

\* 87:5: Afige, geke eni Saion dae gefusera, tuturo 2:6 duruda tege, garesa!

Ainda sedo, God iká bekáda aimi sari fakina e fetarira.”

- 6 BAJARI nunda oro oro nanjogoda javo gefuse, ne isasambu Jerusalem aminda siroredo, Jerusalem embo beká irarira ava gembarira.
- 7 Amingari, Jerusalem embo divu fusedo ghuse eminge sise irarera,  
“Arie Jerusalem, namanenda jebuga a esimbugari da susumo nimori.”

## 88

### *God Numo Sonembaetira Da Benunuri.*

- 1 Arie BAJARI God, nanda jebuga mutari kato, sifo ate refira evia inono,  
na nimokena sonembadae koko seraena a tumbaghae barago foa nimokena banungeraena.
- 2 Nanda banungari ningi! A na ninda sonemba dae kori seraena barago, ningi!
- 3 Dara digari beká namokena foa gheraira aimi, na ambari dae itako erena.
- 4 Namu evetu genembo nanjogo ambari dae erera, amingori. Nanda fakina isambu dadabettira.
- 5 Na fitero aena, ambari embode feteteni. Na ambari embo ambu ujo da fafasirera ainda kaugori.  
Na evetu genembo kotae eteso nimokena ajagha irise ninda sonemba jo bae eraera, amingori.
- 6 Na bu fugeteso, ujo jokáda vose faseteni. Bako ghousago a tumba jinjagharigo beká, aminda vosedo irena.
- 7 Ninda dubo ekoko da bouvu aimi fatiri faseteni!  
Na ninda janje eko da bouvu inono eva da kaugoi fatiri vose duruda fasirena.
- 8 Nine eteso, nano namendi na gukai mutudo, na gari imboe eraera.

Na nange buvu jebugaetena da emboro, gaje tefo etira.

- 9 Ninda janje eko ava itatamuse, sorara eno diti jivu aimi afurugetiri, roera garikena fakara erira.  
BAJARI, sifo evia inono nindae kori sise, nanda ungo jigheono erorureari benunu seraena.
- 10 O ambari embo kote gi! Ni ambari embokena tano mendeni mendeni eraesa, ai?  
O ne eredo yaru sise, ninda javo jigheoro ereraira, ai?
- 11 O ambari embo ninda dubo bari itatama edo, aindae osa seraera, ai?  
O ambari embo bete dadaberaera ainda jokáda ninda sonemba a kavevera eraesa aindae osa jo sae eraera, ai?
- 12 Aminga ava, ambari embo aimi ninda tano mendeni mendeni tumba jinjagharida irera,  
aimi jo gae eraera. A ambari embo ofofo da kotari dadabusira, aimi ninda veka eveva gaveva eraesa,  
ava ne jo kotae eraera.
- 13 Avata BAJARI, na jo amingo iraeri. Sifo atuterira evia inono, nimokena sonembaso dae kori sise  
banungeraena.
- 14 BAJARI, ni redae na imboe eresi? Ni redae na gukai erefutesi?
- 15 Na mandi seka sirorusena aitanano ghedo, na tamo vevera itatamuse ambari dae ghosuguseni.  
Nandae mema muturaesa da bouvu ava fufuse, nanda tamo eregofira.
- 16 Ninda janje ekoko teria bekáimi na afuregetira. Na dari beká deteso, ambududurerena.
- 17 Sifo tumba evia ninda mema muturaesa, kau useghai na jimbe birurughari getira.  
Jebuga da gorota isambu gaje doindanghetira.
- 18 Nine eteso, nanda kokomana utua beká isambu na imboe eteri. Amingetero, tumba aimi nusuka nanda karoneraera.



## 89

*God Teria Bekáda Fakina Inono  
Beká Ainda Gekari. Natofo Da Bouvu  
Mema Sifoda Yaru Divari*

- <sup>1</sup> Arie BAJARI, ni evovodae na dubo buraesa aindae, nimokena yaru didivuse irarena.  
Ninda beká gajari namokena isambu eraesa aindae, osa sarena.
- <sup>2</sup> Na kasama erena ninda dubo bari evovodae irira.  
A ninda sari bekava nembori jo dombu eni ae arira, kau utu fakinaé fetirira aminga ava evovodae irarira.
- <sup>3</sup> Ni sisesi, “Na genembo eni gatededo nangae tofo tofo beka gagojuseri.  
Nanda saramana kato David kena beka gagojuse eminge siseni,
- <sup>4</sup> ‘Ninda imendi gamendiimi evovodae kini nene edo gharera.  
Na evovodae nine kini edo irari da vasa ava kaifa ururono irarira jo eniimi bae arera’ ”.
- <sup>5</sup> Tano fakina ghae garigo beká eraesa aindae ninda natofo aneya utuda irera aimi yaru divuraera.  
BAJARI, ninda sari isambu kaifa udo refesa aindae, ninda aneya kakarago osa sise yaru divuraera.
- <sup>6</sup> BAJARI, mave utuda irera amo, jo nimongo iraeri. Aneya mane utuda irera á jo nemonde fitoro inono ari iraeri.
- <sup>7</sup> Aneya da giti jighari kakato totorugedo irera isambu, nindae oju eraera.  
A mave ni jimbe birurughe fetirágheraera aimi, isambu nindae oju eraera.
- <sup>8</sup> Bajari, God Fakina Isambu da Tofo, ninda fakina ava jo enií ghae inono arigo iraeri.

Evovodae ni reava seraesa ava aminge eoso siroreraira.

- <sup>9</sup> Karaje fakina kato emo ninda sari ningariri. Eva anje foa gheraira, nine seaso binono eraira.
- <sup>10</sup> Ni eva da gambauva nombua teria ava nine deteso ambududurusira.  
Ninda fakina aimi gitofu de atai duboda fafotusesi.\*
- <sup>11</sup> Utu a enda amo ninda tofori. Utu gambari utu gambari aminda reju irera ava, nine eteso sirorusira.
- <sup>12</sup> Reighi utu gambari utu isambu ninda fitariri.†  
Doriri Tabor nengae Hermon ghae ivuga use nimokena yaru divuraera.
- <sup>13</sup> Ni fakinago bekári! Ninda fakina mo, tomanako bekári!
- <sup>14</sup> Ni geka bekáda bekáda sise ari bekáda bekáda use irágheraesa aindae,  
ninda avo anumba fete gogoghombedo irira.  
Ni rea eraesa aimi ijugeraira, dubo bari kato nimori, a ko-tugo ni rea seraesa ava eoso beká siroreraira.
- <sup>15</sup> Evetu genembo mave ninda dumbuda usasa jokáda deinghuse, nindae yaru divu fumbu aruguse tumonde baingheraera, ne ivuga use irarera.
- <sup>16</sup> Nindae sise ne sifo ghousa evia ivuga eraera. Ninda kavevera aindae sakai sise ninda javo jighioro ereraira.
- <sup>17</sup> Tataya sifoda namane sonembeoso gitofu de atai fati feteraera.  
Ninda dubo bari tomanako bekáimi namane sonembeaso gitofu fakinago ava dedo gaedo gherera.
- <sup>18</sup> Arie Bajari, namane kaifa arida genembo ava, nine gategusesi.

\* **89:10:** Eminda “gambauva” resira amo, Hebrew geka aimi Rahab resira. Jo Jericho evetu Rahab dae saeri. Jo Egypt embodae saeri. (87:4 aminda Egypt embo dae sisira) † **89:12:** Foyago da gekaimi tuturo eminda “north” nengae “south” resira, avata Korafe geka beká tefori.

- Namane Israel emboda God kakara nimori. Namane da kini (king) ava nine gatege futusesi.
- God Rea David Kena Ari dae Sise, Beka Gagojusira, Amo Eviri.*
- 19 Anakora beka saramana kakato ninda sari ava edo ghusera aikena, eminge sisesi,  
“Na isoro embo binonde eni Israel embo jokáda ghe gatege sonembuse, numo kini are dae siseni.”
- 20 Nanda saramana kato David ava, usu kakarai jijighuse eteno, kini (king) usira.
- 21 Nanda fakina evovodae numo-kena irarira, nanda fakina aimi sonembururari nu fakina edo fetarira.
- 22 Gitofu numo dari dae arera amo, nu jo dae arera.  
Ari ekoko embo nemonde tataya arera amo nu jo dedo atai fati fetae arera.
- 23 Nunda gitofu nane daono sirivo e tefo arera, a mave nu imboe eraera, ábarago daono amomonje garera.
- 24 Na nu dubo ruruse, rea nunda sisena ava, jo kotae edo gharena.  
Amingururono, nu evovo dae sosighi use, fati fetedo gharira.
- 25 Nunda enda mutarena amo, eva Mediteranian seraera, aminda ghe ya, uvu tomanako Eupharates seraera, aminda tano arira.
- 26 Nu nandae eminge sarira,  
“Nanda God a afa mo, nimori. Ni nanda gagara a sonembari katori.”
- 27 Nu nanda mandi bego dae barena. Kini mane nanjogo irera, einda jokáda kini tomanakogo beká nune arira.
- 28 Na numokena beka gagojusena ava evovodae ava udo yarena, a nanda agho dari reava usena,  
amo evovo dae irarira.
- 29 Nunda sasingu reighié nene kaifa udo yarera.  
Utu evovodae irá gheraira aminga ava, nunda imendi gamendi nene kini udo yarera.
- 30 “Avata, nunda imendi gamendi nanda agho dari imboe use, nanda agho dari jo amboda amboda ae arera.
- 31 A nanda ijuga gukai mutudo, nanda agho dari jo kaifa ae arera amo,
- 32 avori, nenda ari eko dae na ne daono ghamo barera, a nenda kosasadae bouvu mutono, nene barera.
- 33 Avata nanda dubo bari David kena jo nanjigo tano ae arira. A na beka rea ava gagojusena amo jo bejae arena.
- 34 Na agho reava nangae dabade sise dorusera, ainda geka da mendó eni jo kote doyae arena.  
Na beka gagojuse rea sisena, ainda geka eni jo kosasaghaono durae arira.
- 35 Nanda javo kakaragoimi javono tofo gatise, beka gajeteno fetedo evovodae irarira.  
Na jo sifo nanjigo aminda David kena gungubo sae arena.
- 36 Nunda imendi gamendi evovodae sirorudo yarera.  
Nunda natofo kaifa ururono, iji janimbuse irá gheraira aminga ava ne kini udo yarera.
- 37 Tambuno evovodae irira amingudo yarira. Utu evovodae irira, aminga ava kini (king) udo yarera.”
- Nenda Kini Gitofuimi De Atai Duboda fafotusera, Aindae God Da Dombuda Sorara Useri.*
- 38 Avata ninda kini gategusesa aikena dubo ekoko edo, nu imboe use, gukai muteso, nusuka fetetira.
- 39 Ninda saramana kato ghae rea ava tofo tofo beka gagojuseva ava, nine bejedo,

- nunda kini (king) da  
gogho kekesa avavaga  
bu fugeteso, fororoda du  
fasetira.
- 40 Nunda bogu begaya furu dighi  
birurughusera ava, ninda fak-  
ina aimi de bejisesi.  
Nunda isoro embo da jungari  
vasa isambu barago nine de  
bejeteso, bununughuseri.
- 41 Amingetiri, aminda mave ya fa  
gheraera aimi nunda gugua  
bagia eraera,  
a oro mendeni tinguda iri-  
tirera, aimi nundae gegha  
jiraera.
- 42 Ni sonembeteso, gitofui nu  
dedo atai duboda fafotuseri.  
Amingeteso, ne isambu ivuga  
useri.
- 43 Nine eteso, nunda ambi goroba  
mendo baumba usira.  
Ni ungo sokinimbeteso, gito-  
fuimi isoroda nu de duboda  
atai fafotuseri.
- 44 Aminguse, nunda kini da kotofu  
ungo jighari, kefata avavaga  
ava saghimbe bu babaregus-  
esi.  
Nunda kini da avo anumba  
barago jighi rokombeteso du  
fasusira.
- 45 Nine bouvu futeso, nu genembo  
seka ava, nunda sifo jo buvae  
iriri totoi embako usira.  
Amingedo, meka gosuse irira.

*God Ne Nange Sonembaetira, Ain-  
dae Banungusira.*

- 46 Arie BAJARI, ni redae evovodae  
na gi gagaerego eraesi? Junge  
iraresa ai?  
Ninda dubo ekoko ghousa  
mavega ava avaraka avari-  
guse iriri? Gi gagaerego  
eraesi.
- 47 Nanda jebuga tufako beka erira,  
ava kotaetesi!  
Namane endada evetu genembo  
isambu nine eteso siroruseri,  
ava kotaso dae resena!
- 48 Mave jo ambae jebuga iriri? Na-  
mane evetu genembo eni jo  
uje da fakina darigae arera.

- 49 Arie Bajari, ni giti namane dubo  
budo ghusesa da beká oroko  
redari?  
A ni David kena beka gagojuse  
sonembari sisesa, ábarago  
redari?
- 50 Ninda saramana kato namori.  
Nandae jijivu sisera ava, erá  
kotae eose!  
Gitofui nandae jijivu sisera ava  
na gambu tainghuse irena.
- 51 Arie BAJARI, ninda gitofui kini nine  
gategusesa, aindae jijivu sise  
“nimoá” seraera.  
Nu reda ya foa gheraira aminda, ne  
aminge seraera.
- 52 BAJARI da javo evovodae jighoro  
erarira! Ai bekári, Ai bekári.

**90**

- 1 Arie, Bajari, ni evovodae nama-  
nenda irari vasa, namanenda  
nati ava, nine edo iresa.
- 2 Ni doriri a enda jo aso sirorae iriri  
ainda gitida, ni evovodae iri-  
asi.  
A kotugo, ni iresa, a evovodae  
iraresa.
- 3 Ni seaso evetu genembo jovereghedo  
sekago fonja jineraera.
- 4 Ghaeko 1,000 tegaresa amo, nimo-  
kena mo, kau sifo dabako da  
kaugori.  
Ghaeko a sifo amo, inono  
sife irara jiriri dadabumuta,  
aminga ava dadabarira.  
O kau tumba jokáda sifo  
goroto tufako ya dadaberaira,  
aminga ava dadabarira.
- 5-6 Kau usegha o gisi foa, roera  
isambu bu yeari dadaberaira  
aminga ava,  
ni namane beoso dadaberaera,  
amo kau aturu da kaugori.  
Namane mo, kau vive sifoghae vitido  
vuji gatedo,  
kotugo tumba jireari gharasa  
edo aviraira aminga ava er-  
aera.
- 7 Ninda janje ekoimi namane deaso  
sirivo eraera.  
Ninda janje eko teria beká ain-  
dae, namane oju beká ava use,  
ungo ata dadadagheraera.

- 8 Ni namanenda ari ekoko ninda dombuda fitiraesa.  
Namanenda ari ekoko ufena eraera ava, ninda usasada fiti gosuse irá gheraesa.
- 9 Ni janje eko eari seaso namane amburaera, jo ghousa irá ghae eraera.  
Namanenda jebuga, kau beka roboghoi sirureoro ya dadaberaira aminga ava eraira.
- 10 Ghaeko 70 edo irarera amo, inonori, namanenda boandari.  
O namane fakina beká ava arera amo, ghaeko 80 edo iria ambarera.  
Avata ainda jokáda, dara a mema avanembo itatamuse iria gheraera.  
A kotugo, namane totoi namanenda jebuga dodo ambeoro dadaberaira.
- 11 Mave eniimi, ninda janje eko ainda bouvu isambu jo itatamae usira!  
Mave eniimi, oju ninda janje eko teria beká bu foa gheraira ava, jo itatame gogoghombae eraira!
- 12 Namanenda irari enda eminda, sifo tufako irarera ava ijugaso, namane gi kasama use, dubo kote gogoghombarera.
- 13 Arie, BAJARI, ninda janje eko namanekena nanjigo dadabari?  
BAJARI, jovereghe fu, namane ninda saramana kakato, namanekena joka aetesi!
- 14 Sifo ava inono, ninda dubo bari averegaso, namanenda dubo joká bedo beká are!  
Amingaresa amo, namane yaru didivuse, namanenda jebuga jokáda sifo ghousa ivuga use irarera.
- 15 Giti, ni namanekena dubo mema muteaso, namane ghaeko ghousa dubo mema tafuse irá ghedo ghuseri.  
Ava sedo, kau giti dubo mema begogo futusesa aminga ava, oroko dubo jama a ivuga begogo mutaso itatamuse irore!

- 16 Sonembaso, namane ninda saramana kakato ninda ari fakina ava gaore!  
A kotugo sonembaso, namanenda imemesiri nembarago ninda fakina duroghae ava gaore!
- 17 BAJARI namanenda God, sonembaso ninda esimbugari namanekena irare!  
Namane rea ari dae erekotera ava, sonembururaso inononda aoro beká sirorare!

## 91

### *God Namondeda Gagara Ari Katori.*

- 1 Mave BAJARI Iká Beká irira, aikena ya nunda sonemba bari dae sise irá gheraira amo,  
BAJARI Fakina Isambu da Tofo, aimi genembo amo, tavo ururari eveva irarira, BAJARI da dombuda.
- 2 Aminguse, nu BAJARI kena eminge sarira,  
“Nanda ambo sose fetari vasa amo, nimori.  
Ni nandae sedo isoro edo, namo kaifa urureaso, nanda gitofu jo foa na dae eraera.  
Ni nanda God, na nimo tumonduse irena,” aminge sarira.
- 3 God ni kaifa ururari, ni jo ya vagho jungetero irira aminda teraso fatae arira.  
A kotugo, ambari da kae jo foa ninda tamonda vitae arira.
- 4 Nunda ghabuimi ni gagara edo kaifa ururari, ni eveva iraresa.  
Nunda kaifa ari mo, jo nanjigo aminda dadabae arira.  
Kau bere tamo gajeraira aminga ava, nu ni kaifa use gajari, ni ambo numokena sose fetaresa.
- 5 Dara tumbaghae foa gheraira aindae, jo oju ae aresa.  
O gitofu isonga ufena foa, isoro ari dae beje buveoro gi dudukugheraesa aindae, jo oju ae aresa.
- 6 O taono ambari tumbaghae bu foa gheari, natofo digari buraera,

- aindae jo oju ae aresa.  
 O ambari da kae aimi isonga sosighi  
 eari amburaera,  
 aindae jo oju ae aresa.
- <sup>7</sup> Gegenembo 1,000 ninda dengesida fetarera, avata ne isambu ambu fafasarera.  
 O saone, gegenembo 10,000 ninda ungo gimandu kena fetarera, avata isambu ambududurororo,  
 ni eveva fetaresa, jo mema eni ninda tamonda sirorae arira.
- <sup>8</sup> Aminguse, ni ditii fuge gosuse, ari ekoko embo mino rejo buraera ava kasama aresa.
- <sup>9</sup> Avata nimo, ni benunu seteso BAJARI gagara etiri, ni ambo numokena sose fetedo iresa.  
 BAJARI Iká Bekáda ninda tavo kato edo irira.
- <sup>10</sup> Ava sedo, dara eniko jo foa nimokena sirorae arira,  
 mema dombu eni dombu eni ava, jo foa ninda kamboda buvae arira.
- <sup>11</sup> Ainda beká mo: God nunda aneya ni kaifa aoro dae sedo dengoro indari,  
 ni reda yaresa amo, ne gagara ururoro deingharsa.
- <sup>12</sup> Aneya nenda ungoimi ni unumbe bu ya foa ghururoro,  
 ninda ata jo ghamanai de fokughari mema sae arira.
- <sup>13</sup> Aminguse, ni raiyoni (lions) a jingabu ava dedo atai fati fetaresa.  
 Raiyoni (lions) tataya kakato a jingabu kaeghae ava dedo atai fati fetaresa.
- <sup>14</sup> God eminge resira, “Evetu genembo mave na dubo buraera amo, na sonembarena.  
 Na, evetu genembo mave nandae sise, ‘Bajari’ seraera amo, na ne sonembuse gagara eono, ne namokena ambo sose fetarera.
- <sup>15</sup> Ne namokena kori sarera amo, sifo daba aminda, na mino sarena.  
 Ne dara jokáda fetarera amo, na namonde dabade fetarera.

A kotugo, na nemo sonembuse, dara da ungodá ava saghimbe budo, vasa evevada fitido, nenda javo jighono erarira.

- <sup>16</sup> Na nanda mino eveva, sifo ghousago enda eminda irari, ava mutono, ivuga use dubo jama arera.  
 A nanda sonemba ijugaono garera,” God aminge resira.

## 92

### *Sakai Sari Da Yaruri.*

- <sup>1</sup> Arie BAJARI, nimokena aiyakoe sari mo, evevago bekári.  
 Arie God ika bekáda iresa, javono nimoa gatise yaru sarera, evevari.
- <sup>2-3</sup> Ninda kavevera eraesa aindae, gita\* dombu eni dombu eniimi doruse evovodae sifoghae osa sedo gharera,  
 a kotugo ninda geka seteso irira isambu eraesa aindae osa sedo gharera, ábarago evevari.
- <sup>4</sup> Arie BAJARI, ninda ari babaigo eraesa aimi eari, na dubo eveva beká eraena.  
 Nine rea ututusesa aindae na ivugaghae yaru sise dubo jeuro edo gharera.
- <sup>5</sup> Arie BAJARI, ninda aito fugari ava babaigo bekári. Ninda kotari mo, kafurugori.
- <sup>6</sup> Geka sari dae erena ava, genembo ghuna irae jo kasama ae arira.  
 Genembo kotari tufako aimi mino jo bae arira, amo eviri:
- <sup>7</sup> Ari ekoko embo, vive totoi vitiraira aminga ava, ne digeraera.  
 Aminga ava, evetu genembo kosasa teria futo eraera, aikena gugua dige faseraira.  
 Avata sifo amboda Bajari sari ne ambu tefo arera.
- <sup>8</sup> Ainda tuka mo, BAJARI, nimo God ikada bekári, evovodae iresa.
- <sup>9</sup> Namane kasama erera, nindae osogo ari kakato amomonjegerera, a kotugo ari ekoko embo

\* 92:2-3: Afige, geka eni *gita o uka* dae gefusera, tuturo 33:2 duruda tege, garesa!

- da fakina ava nine daso bejarira.
- <sup>10</sup> Nine eteso, nanda fakina kau borumakava babaigo ainda fakinago avavago edo irira.  
Na esimbugeteso, ivugaghae irá gheraena.
- <sup>11</sup> Nanda gitofu da fakina deteso bejisira amo na gosuseni,  
a kotugo ari ekoko embo mema dae dimbia sorara ero nininguseni.
- <sup>12</sup> O irari dambugo irari embo ninda sari ava eraera amo,  
kau ika goroba totoigo viteraera aminga ava, ne digarigo eraera.  
A kotugo nenda bajari kau ika beriberia babaigo Lebenon iritirera aminga ava, bajarera.
- <sup>13</sup> Nemo kau ika mane BAJARI da kambo jokáda govetero iritirera, ainda kakaugori.  
God da tafaroro kambo aminda irise, eveva itatamuse irera.
- <sup>14</sup> Ana edo irera, avata beká jighuse irera, a kotugo evovoda baduru use, igi yauya ghuse fakinago beká iritirera.
- <sup>15</sup> Aminda fuge gosuse kasama erera, BAJARI numo dambugo bekári.  
Nanda gagara katokena, kosasa eni tefori.

## 93

*God Numo Namondeda Kiniri (king).*

- <sup>1</sup> BAJARI numo Kiniri (king). Nunda fakina duroghae, inono embo asugeraera aminga ava, asugedo irira.  
Enda nune fitiri, fete gogoghemberira.
- <sup>2</sup> Arie BAJARI, utu enda ae gitida ni iriasi. Ni sifo aminda kini edo, amingudo refesa.  
Ninda avo anumba da fakina jo nanjigo dadabae arira.
- <sup>3</sup> Arie BAJARI, kafuru ghghi beka duka javi eraira, eva anje gugugheraira.

- <sup>4</sup> Avata, BAJARI, fakinago beká utuda irá gheraira, nunda fakina mindafugo bekári,  
jo kafuru eva da guguguhari amingo iraeri. Eva fumbasa eraira da fakina barago, jo numongo iraeri.
- <sup>5</sup> Arie BAJARI, ninda Agho Dari mo evovoda irarira.  
Ninda tafaroro kambo kakara kakarago beká edo irira, a evovoda amingudo yarira.

## 94

*Evetu Genembo Isasambu Da Ijujari Kato Mo, God Numori.*

- <sup>1</sup> Arie BAJARI, God ari ekoko embo ghamo baoro dae eraira, nimori. Nendae janje eko eraesa ava, ijugaso gaore!
- <sup>2</sup> Evetu genembo isasambu ainda ijujari kato nimori. Arie, ere fu!  
Evetu enembo totofo sakai sise, ivuga futo eraera, ainda mino ava, mutaso baore!
- <sup>3</sup> Arie BAJARI, ari ekoko embo amoghousa mavega ivuga ghae irareri?
- <sup>4</sup> Tafasara embo ghousa mavega totofo sakai sido yareri, ákotugo nenda tafasara eraera andae sakai seraeri?
- <sup>5</sup> Arie BAJARI, ne ninda natofo ava fati bebetegerera, ne ninda totofo ava kateyavara futo use mema erefutura.
- <sup>6</sup> Ne roriri a babate ava dorureoro amomonjegeraera, a kotugo oro mendeni esa fera,  
namondeda endada iritirera ava, de goregheraera.
- <sup>7</sup> Aminguse seraera, “BAJARI namonde jo gae eraira.  
Namonde rea eraera ava, Israel embo da God jo kasama ae eraira.”
- <sup>8</sup> Aminge seraeva andae resena, ne daghariri. Ne kasama nanjigo barevu?
- <sup>9</sup> God namondeda dengoro mane ututusira, ava nenda geka ningari jo inono iraeri?

- God namondeda diti  
ututusira, aikena gari  
fakarari? Givu!
- 10 Enda da natofo nanjogo irera, ain-  
dae ghoghora nune seraira.  
Avata jo ghoghora vanembo sae  
arira. Nenda aito fugari da  
mino barago mutari, itatama  
arera.  
Evetu genembo isasambu ainda  
ijuga kato numori. Ágido,  
kasama nunda tofori.
- 11 Evetu genembo rea koteraera amo,  
BAJARI nu kasamari. Ne jo  
kote simbugae eraera, ava nu  
kasamari.
- 12 Arie BAJARI, evetu genembo nine  
dengoro induduse, ninda agho  
dari ijugeraesa, aimi ivuga use  
irera!
- 13 Gitofu aimi nemokena dombu  
kosero refera ainda jokáda,  
ninda natofo dae goroto mu-  
taso jangutururoro,  
ni gitofu da vagho sim-  
bugaso vosarera.
- 14 Ainda tuka mo, BAJARI nunda  
natofo, jo doyae arira.  
Evetu genembo nunda tofo dae  
gategusira aikena, gukai jo  
mutae arira.
- 15 Sifo aminda, aito fugari sembae  
use koto edo ghusera, ava  
dodo geke bekáda bekáda sise  
koto udo yarera.  
Avavaga sirorarira amo, natofo  
eveva isambu ivugaghae am-  
boda amboda udo yarera.
- 16 Gitofu osogo ari dae sedo fusera  
amo, na mave sonembari dae  
erorusi? Na mave sorise, gito-  
fude osogo usi?
- 17 BAJARI, na jo sorae aetira amota, na  
ambudo, totoi vosiya, ambari  
embode dabade fasaeteni.
- 18 Arie BAJARI, “Na durariá” kotiseni.  
Avata ninda kavevera eraesa  
aimi na jigheso eroruseni.
- 19 Na mana mana use dubo  
buneraena amo, nandae  
kavenu nine seoso na saga  
faingheraira.
- 20 Ni itako jo, gavana mane ari eko  
ari da emboro rerebuse agho

deraera ainde dabade, fetae  
aresa.

- 21 Gavana mane resena, evetu gen-  
embo eveva derari dae sise,  
manaka gayeraera, kotugo  
nenda ujuda use,  
evetu genembo dara jo ae  
usera ava, seoro deoro  
amburaera.
- 22 Avata BAJARI, namoa soreraera,  
nanda God nane tumonde  
baingheraena aimi nandae  
sorega nune eraera.
- 23 Ari ekoko embo resena, nenda  
ari ekoko aindae sari ghamo  
barera.  
A kotugo nenda ari ekoko edo  
ghusera aindae nemoa basa  
eko beká ava jigharira.  
Namondeda BAJARI God, aimi dari  
sirivo arera.

## 95

- 1-2 Fuvu, ya totorugaore! BAJARI kena  
dubo jeuro use, yaru divore!  
Namondeda kaifa a sonemba  
katokena, ivugaghae beka  
fainghe sakai saore!  
Aminguse, ya BAJARI kena  
tere nunda dombuda fetedo,  
“aiyakoe” saore!  
Ivugaghae aruguse, sakai sise  
yaru numokena divore!
- 3 Ainda tuka mo: BAJARI God nu iká  
bekádari.  
Nu god mendeni irera, nenda  
dombu bekádari.
- 4 Enda isambu nunda tofori. Beku  
enda jokáda irira amo, nunda  
fitariri.  
Endada doriri fetirira a barago,  
nunda fitariri.
- 5 Eva a enda mo, nune setiri  
sirorusira ava sedo, nune  
kaifa eraera.
- 6 Ava sedo, fuvu ya totorugaore!  
BAJARI namonde setiri sirorusira  
ainda dombuda, tumoi  
bainghuse kauboi dadari-  
gaore!
- 7 Nu namondeda God, a kau sifi  
(sheep) kaifa kato nunda sifi  
(sheep) kaifa eraera,  
daba aminga ava,  
God namonde kaifa eraera.

Oroko God beka sirurari ningareva amo,

8 erama gogore edo, God ighagha eove dae resena.

“Kau nembuamane reighi Meriba aminda usera aminga ava, eove dae sise resena.

Ne reighi uvu a evetu genembo irae vasada,

Masa aminda usera, aminga ava eove!”

9-10 Nembuamane usera aindae, God eminge resira:

“Ne na ighagha edo, nanda fakina ava dere gosuseri.

Ne ghaeko 40 ainda jokáda, nange nanda fakinaimi tavo eno gosusera ava kotae edo, nanda fakina sekago dere gosuseri.

Na aindae sedo nembua manedae janje eko etiri siseni,

‘Ne na sifo ghousa ighagha eraera, a nanda sari ava jo ningae eraera.’

11 Aminge sedo, na dubo eko etiri, durumuguse beka gagojuse eminge siseni,

‘Ne jo ya, reighi ne jangutaoro dae sedo, nemokena mutari dae kotisena aminda, namonde dabade tere jangutae arera,’ aminge siseni.”

## 96

*God Nu Kini (King) Tomanakogo Endada Evetu Genembo Isambu Kaifa E Tavo Ari Katori.*

1 Arie, endada evetu genembo isambu! BAJARI dae yaru seka saore!

BAJARI kena yaru saore!

2 BAJARI kena yaru sise, nunda javo jighoro erare!

Nune sonembetiri namonde jebugusera ainda binó ava, sifo evia inono vironu sedo ghaore!

3 Nu duroderi a nunda ari isambu fakinagori. Ainda binó ava oro isambukena vironu siruroro dudukughaore!

4 Airesira, BAJARI numo teriagori, a kotugo sakai teriago mo nundae saore!

Ove keveraera aindae igheghi jo ae arera. BAJARI nusuka nundae igheghi aore!

5 Ai resira amo, oro mendeni mendeni ne isambu god mendeni ava, tumonde baingheraera, fakina tefori.

O BAJARI, numo utuda roera isambu nune ututusira.

6 Numo duró a usasa aimi doghedo irira, fakina tomanakogo a usasa garigo beká aimi nunda tafaroro kambo beda edo irira.

7 Arie, endada evetu genembo nenda ghagurude isambu, BAJARI da javo jighivu, erare!

Nunda duró a fakina tomanakogo aindae numokena sakai sise jighoro erare!

8 BAJARI da javo durode ava jighoro erare! Ango fayaya bambu fuvu, nunda tafaroro vasada terove!

9 God kakarago beká ai fururari garesa amo, nunda dombuda tumonde bainghevu!

Endada evetu genembo isasambu, nemokena resena, nunda dombuda igheghi ojughae tumonde bainghevu!

10 Endada oro oro isambukena saore, “BAJARI numo Kini (king) ri! Enda mo, nune fitiri susu gambu fetirira, jo itako gisighae arira.

Nu evetu genembo isasambu ava nenda ari ekoko a eveva eraera, aminda gosuse ijujarira.”

11 Utu endaghae nemokena resena, dubo eveva use, ivuga aovo dae resena.

Eva a eva da roera gindovi gandovi isambu, nemokena resena, duka aovo dae resena.

12 Vare a vare jokáda reju iritireva, nemokena resena, ririaghae koko sevu!



Ika mane taimada iritireva  
isambu, nemokena resena,  
ivugaimi fumbu arugevu!

<sup>13</sup> Ai resira amo, BAJARI endada evetu  
genembo ijajari dae refira.

Nu endada evetu genembo  
isasambukena inono use, ne  
bekáda bekáda ijujarira.

## 97

*God Numo Evetu Genembo Isasambu Ainda Kaifa Arikato Fakinagori.*

<sup>1</sup> BAJARI numo kiniri, enda riria aso  
dae resena!

Butu utu gambari utu gam-  
bari aminda fugedo ireva  
isambu ivuga aovo dae re-  
sena.

<sup>2</sup> Foroga aimi a tumba jinjangharigo  
aimi nu doghedo irira.

Roera isambu nune bekáda  
bekáda use kaifa e goghomberaira.

<sup>3</sup> Avaraka aimi nunda dombukena  
ise, evetu genembo numokena  
osogo use irágheraera ava,  
dungiyari aviraera.

<sup>4</sup> Nunda biria tarighuse usasa  
jaraghurureari, enda aimi  
gido ungo ata dadadagheraira.

<sup>5</sup> Enda jiro fumbari kau tavaya  
tiveraira aminga ava,

endada oro oro iritirera,  
ainda BAJARI da dombuda  
tivarira.

<sup>6</sup> Utu da roeraimi ijugerira, God  
numo, ari bekáda bekáda  
vanembo eraira.

Evetu genembo nunda oro oro  
isasambu nunda duro giraera.

<sup>7</sup> Evetu genembo mave ove keve  
ava tumonde baingheraera,  
ne meka garera.

Ainda beká amo, ove mo, fakina  
tefori, nenda god mane amo  
isasambu

BAJARI da dombuda numoa  
tumonde baingharera.

<sup>8</sup> Arie BAJARI God, nenda gitofu iju-  
juse easo ghamo buraera ava  
ningido,

evetu genembo Saion\* iritir-  
era a evetu genembo Ju-  
dah bogu begaya digari  
futo aminda iritirera,  
riria aimi jaruteraera.

<sup>9</sup> Arie BAJARI Fakina Kato, natofo  
isasambu endada iritirera  
ainda kaifaé tavo arikato amo  
nimori.

Nimo ika bekadari, god mane  
ninda duruda iritirera jo ni-  
mongo iraeri.

<sup>10</sup> Mave ari ekoko imboe eraera ava,  
BAJARI nune dubo buraira.

Nunda natofo da jebuga nune  
tavo eraira. Kotugo ari ekoko  
ari kakato ainda fakinkena  
saghimbe buraira.

<sup>11</sup> Evetu genembo mave God da sari  
ava eraera aikena, God da us-  
asa janimberaira,

a kotugo nunda ivuga futu-  
rurareari itatama eraera.

<sup>12</sup> Arie, ari eveva gaveva embo, BA-  
JARI nendae rea usira andae,  
riria use irivu!

God kakarago beká rea usira ava  
kotise, nundae aiyakoe sedo  
ghevu!

## 98

*God Numo Endada Kini Numori Aindae, Numokena Sakai Saore!*

<sup>1</sup> Arie, BAJARI kena yaru seka saore!  
Ainda susu mo, nu tano a ari  
fakinago etiri sirorusira.

Tofo nunda fakina aimi a nunda  
ungo kakarago aimi, nune  
gitofu sosighi usira.

<sup>2</sup> Nunda gitofu sosighi usira ava, BA-  
JARI nusuka osa sisira.

Nunda natofo nange sonembe-  
tiri jebugusera ava, nune osa  
setiri, endada oro oro isambu  
ne kasama useri.

<sup>3</sup> Nunda natofo Israel embokena  
beka gagojuse rea ari sisira  
ava kotise, ne dubo ruruse ava  
usira.

\* 97:8: Afige, geka eni Saion dae gefusera, tuturo 2:6 duruda tege, garesa!

- God namanenda gitofu sosighi usira ava, evetu genembo endada irera isasambu, ne gosuseri.
- 4 Evetu genembo endada ireva, nemokena resena, ivugaghae BAJARI kena yaru sise dubo jeuro evu!  
Nunda yaruimi sakai sise dubo jeuro use ivugaghae arugevu!
- 5 BAJARI dae sakai sise, yaru dubo jeuro evu! Gita\* mane da duka aimi numokena yaru sise sakai sevu!
- 6 Tavuya dombu eini dombu enimi fusise, BAJARI, namondeda kinikena ivugaghae koko fuge arugaore!
- 7 Eva, nimokena kotugo reju ava ninda jokáda iritirira nemokena resena, BAJARI kena duka use yaru sevu!  
Enda akotugo roera ninda etoda iritirera isasambu nemokena resena, BAJARI kena yaru divuvu!
- 8 Uvu mane barago, nemokena resena, kotugo enda jiro fumbari mane nemokena resena, ungo de fokufoku ghuse, BAJARI da dombuda dabade ivuga use yaru sevu!
- 9 Ainda tuka mo, BAJARI nune enda kaifa ari dae refira.  
Nu endada evetu genembo isasambukena inonoda use, bekáda bekáda use ne kaifa arira.
- 2 BAJARI Saion† aminda anumbetiri nunda duro aminda ghedo refira.  
Evetu genembo isasambu da Bajari fakinago nusuka numori.
- 3 Evetu genembo isambu nunda javo tomanakogo akotugo duroghae ava javono gatise, sakai sarera.  
Kakarago beká amo, numori.
- 4 Arie, Kini fakina kato, ari dambugo irari embo ava dubo buraesa. Nine Israel eminda ari eveva avabu fusesi. Nine Israel kaifa use inono beká edo ari bekáda bekáda eraesa.
- 5 Namondeda BAJARI God kena sakai saore, kakarago beká mo numori.  
Nunda anumba vasa da dombuda tere tumonde bainghevu! Kakarago beká mo numori!
- 6 Nunda fristi mane mo, Moses nengae Aaron ghae useri,  
a kotugo Samuel barago numokena banungedo ghusira. BAJARI kena nene seoro, nu ningido ghusira.
- 7 Nu foroga darido irurari ainda jokádaghe nemokena geka seari,  
ne nunda Agho Dari kotugo rea aoro dae sisira, ava edo ghuseri.
- 8 Arie BAJARI namaneda God, ni ninda natófo Israel emboda benunu ningido ghusesi.  
Geka bekári, ni nenda kosasa da mino nu futusesi, avata nenda ari ekoko kote dodo ghusesi.
- 9 Namondeda BAJARI God kena sakai saore! Namondeda BAJARI God kakarago bekári.  
Ágido nunda doriri kakara aminda numoá tumonde bainghevu!

## 99

### *God Numo Kini Kakarago A Iká Bekádari.*

1 BAJARI, numo kini evovodae irira, susu aindae evetu genembo isasambu oju aimi ungo ata dadadagheraera.

Nunda anumba vasada serubim\* soroda anumburureari enda daradaragheraera.

## 100

### *Aiyakoe Sari Da Yaruri.*

\* 98:5: Afige, geka eni *gita o uka* dae gefusera, tuturo 33:2 duruda tege, garesa! \* 99:1: Afige, geka eni *Serubim* dae gefusera, tuturo 18:10 duruda tege, garesa! † 99:2: Afige, geka eni *Saion* dae gefusera, tuturo 2:6 duruda tege, garesa!

- 1 Namonde isambu endada irera, dubo evevaghæ beka fainghedo, Bajari kena yaru divore!
- 2 Nunda geka ningido, ivugaghæ yaru didivuse,  
nunda dombuda tere fetore!
- 3 Aminguse, namonde kasama arera: God nu Bajariri! Namonde jo namondeda kotariimi siroraeri. Namonde, God nune setiri siroruseri. Namonde nunda natofori, nu namonde kaifa eraira.
- 4 Nunda kambo guro teria afigetiri irira aminda, “aiyakoe” sise, ya terore!  
Ya nundae sakai sise, jokáda terore!  
Nundae “aiyakoe” sise, nunda javo kakara aore!
- 5 Ainda beká mo: Bajari sifo ghousa evia veka eveva use irira. Nu kavevera ari kato a joka ari katori. Nu namonde joka use, dubo budo ghusira, dubo buraira, a dubo ruruse irarira. Nunda kaifa ari mo, namondeda imemesiri siroruse itatamudo yarera.
- 5 Mave evetu genembo mendenidae unongu kivuimi siruroro ningarena amo, saono ne daoro ambarera. Genembo mave riria use, tofo nunda javo jighari erarira amo, ondono darigarira.
- 6 Nane evetu genembo God tumonderaera  
a geka bekáda bekáde sise irá gheraera ava, nemokena, “avori” saono, nanda kamboda teredo irarera.  
Mave aroro kaifa ari da gorotoda kosasa jo ae eraera, avanembo doyono nandae saramana arera.
- 7 Gungubo futo seraera aimi, nanda kamboda jo irae arira. Geka vivi sise, gesire use irari embo eni, jo nanda dombuda fetæ arira.
- 8 Evetu genembo ekoko BAJARI da reighi begaiya namonde irera eminda amo,  
sifo evia inono nanjigo tambarena ava, daono sirivo arera.

## 101

*Kini (King) Eni God Kena Nange Beka Gagojusira, Amo Eviri.*

- 1 Arie BAJARI, nanda yaru mo, namane dubo ruruse bekáda bekáda eraesa aindæ, yaru divarena.
- 2 Nanda aito fugarena, kosasa eni tefori. Ni nanjigo namokena furaresi?  
Nanda kamboda na irari dambugo beká ava arena.
- 3 Aminguse, na jo doyono, ari sembaego nanda kamboda siroræ arira.  
Mave God gukai muturaera, rea eraera ava, na imboe beká ava eraena.  
Na jo itako nemonde dabade tatedo umo gaumo ae arena.
- 4 Na aroro kaifa ari da gorotoda jo kosasaghæ arena. Na jo ari eko enimi bebæta ae arena.

## 102

*Genembo Seka Bajari Kæ Bu Irise Kæ Saviri Banungusira.*

- 1 Arie BAJARI, nanda banungari ningaetesi, sonemba dae sorara erena, ningi!
- 2 Na kæ budo irise resena erá ningi ningaego eóse!  
Na nanjigo nimokena kori sarena, dengoro jave ningaso dae resena!
- 3 Ai resira amo, nanda jebuga kau imbosi aminga ava rave ise dadabari gerira.  
Nanda tamo kau avarakai veri vara gheraira, amingori.
- 4 God na detiri taká, kau eke gharasa e muse vosari guse rojari beká erena. Na bayau mindari jo uju ae erena.
- 5 Na kæ saviri aoro sise, gevei etu yavarara gerena.

- 6 Namoako kau rika reighi uvu a evetu genembo irae vasada irari gerena.  
Kau rika kafu reighi do dumboro notuda irari gerena.
- 7 Na itako jo avae eraena, namoa kau rika dabako tainako aimi nati enoda anumbirari gerena.
- 8 Sifo inono evia isonga numboronandae osogo ari kakatonamoa dere jise,  
namokena geka ekokomendeni mendeni sesegeraera.  
Dere jirari kakato amo simborouse eminge seraera, "Mave embavo jighiri nunda kae dika etiri,  
kae saviri aoro sise irira, aminga ava namondeda kae dika aeti!"
- 9-10 Ainda susu mo, nandae janje ekoko edo na esike fugeteso,  
na bayau avegha ava rise, a nanda uvu diti jivughaebaingoro ururari ava rise irena.
- 11 Nanda jebuga kau ungobu use tutumbageraira amingori. Namoa kau kikisa gharasa ari gerena.
- 12 Avata, arie BAJARI, kini (king) kotofuko mo nimori, evovodaesiresa.  
Evetu genembo ghaeko ghaeko evia siroruse irarera aimi ninda binó nininguse irarera.
- 13 Nine sifo gategusesa ava ojighirabuvira aindae, ni orokoé foa tuturo edo Saion\* dae joka arena.
- 14 Ai resira amo, reighié gitofuimi sosighi edo de bejisera,  
avata ninda saramana kakato ava jo kotae irise, Saion dubo buraera.  
De bejetero tise fasirira gido, ninda saramana kakato mema use irá gheraera.
- 15 BAJARI, endada oro oro isambu ninda duró gido ungo ata dadadagharira.  
Enda da kini isambu ninda dombuda ojuimi ungo ata dadadagharera.
- 16 Ainda tuka mo, BAJARI nu sekago Saion itarira.  
Nu sifo aminda ari ainda duró isagha ururari garera.
- 17 Nunda natofo imboe e fugetiri yabayaba ghuse irera, ainda banungari ava jave ningarira.
- 18 BAJARI rea ari dae erira ava gosuse, gembovo, evetu genembo sifo amboda sirorudo yarera aimi, tege nundae sakai sise irore!
- 19 Eminge sevu ningore, "BAJARI nunda irari vasa kakarago iká beká utudaghe nunda natofo gari dae diti fugetiri vovosusira amo,  
20 nunda natofo Israel embo ava gitofui kateyavara ero, sabua use ambari da aoro sero niningusira.  
O gotofuimi daoro amboro dae sisera, ava nune vujegetiri jebuguseri."
- 21-22 Amingari, natofo nanjogo averege foa Jerusalem tafaroro kamboda teterruro,  
enda da babojegari gavana mane isasambu ainde dabade teredo,  
Saion aminda tumonde bainghuse, BAJARI da javoda sakai sise irarera.
- 23 Na endada jo ghousago irae aono dae sedo, BAJARIimi nanda fakina de bejedo, nanda sifo soroda gafugusira.
- 24 Avata na sorara use, numokena siseni, "Arie nanda BAJARI God evovodaesiresa, nimokena kori resena:  
erá eosona genembo seka irise ambeone!"
- 25 Anakora beká giti tuturoda ni enda edo, utu ninda ghabui eteso sirorusira.
- 26 Nemo manjarera, o nimo, tano tefori, evovodaesiresa.  
Ne taká kau embo boka manai edo bununungheraera

\* **102:13:** Afige, geka eni Saion dae gefusera, tuturo 2:6 duruda tege, garesa!

- aminga ava, aoro gaghe fugaresa.  
 Kau genembo eni nunda asugari manai kosughe fugutuse, seka asugeraira aminga ava aresa.
- 27 O nimo jo genembako ae, taká ava iresa. Nimokena tano tefori, evovodae iresa.
- 28 Kotugo ninda tofofo Israel embo da imemesiri gamemisiri mo, kaifa e gagara ururaso, nimokena ambo sose fetirise irarera.”

### 103

#### *David Da Yaru Divari Eniri.*

- 1 Arie, namoáko, nanda dubo jokáimi, Bajari kena sakai saone!  
 Arie, namoáko, nanda kotari a nanda fakina isambuimi, nunda javo kakara aindae sakai saone!
- 2 Arie, namoáko, nunda kavevera namokena eraira ava, isasambu kotise irarena.  
 Ava kotise, nanda dubo jokáimi, Bajari kena sakai saone!
- 3 Nu emingeraira. Nu nanda ari ekoko isasambu kote doyeraira.  
 Nu nanda kae a tamo vevera isasambu seari darigeari, na jebugeraena.
- 4 Na ambaetena, avata nune kosegedo na dubo ruruse nunda joka ariimi na afurugeari,  
 jebuga irá gheraena.  
 5 Roera eveva nune muteari, nanda irari eveva use irá gheraena.  
 Aminguse, na jovereghe genembo seka bajari da kaugo use, riduna da fakina aminga ava eraena.
- 6 Evetu genembo makasi embokena mema a bouvu muturaera ava, Bajari nune bekáda bekáda ijujuse, makasi emboá sonemberaira.
- 7 Nunda uju a kotari ava, Moses kena afigedo,  
 nunda ari fakinaghae, Israel embokena ijugeari gido ghuseri.
- 8 Bajari nu joka use, namonde dubo ruruse irá gheraira. Nu jo totoi janje eko ae eraira.  
 Nu sifo evia inono, namonde dubo bu gogoghomberraira. Nunda dubo bari amo, jo nanjigo aminda dadabae arira.
- 9 Nu jo sifo ghousa namonde dombuda sae eraira.  
 Janje eko nu eraira avata, jo evovodae ava kotise irae eraira.
- 10 Namondeda ari ekoko a dara eraera ava ijujuse, nu jo aindamino beká ava inono use, mutae eraira.  
 Mino eko rea baetera avata, nu kote doyeraira.
- 11 Utu enda ikáda irira, aindagomboidarari jo tege bari da kaugo iraeri.  
 Kotugo Bajari da dubo bari, mave nu kakara eraera aikena, amingori.  
 Jo namonde tege kasama ari da kaugo iraeri.
- 12 Utu gambari utu gambari soveni soveni da soró jo tege bari da kaugo iraeri.  
 Kotugo BAJARI namonde da ari ekoko fugeraira aindasoró ghousa amingori.  
 Fugeari ya dadaberaira, jo tege bari da kaugo iraeri.
- 13 Kau genembo eni nunda sasingukena veka eveva eraira aminga ava,  
 God namonde mave nu kakara eraera aikena barago, veka eveva eraira.
- 14 Nu namonde kasama e gogoghomberraira.  
 Nu nange endaimi budo namonde etiri sirorusera ava, nu kotise irá gheraira.
- 15 Namonde evetu genembo da irari a jebuga mo, kau kikisa da kaugori.  
 Kau taima joka vitido, vuji gateraira aminga ava, namonde siroredo bajiraera.
- 16 Avata yauraimi fuseari, joka vuji dore vose dadabeari jo gae eraera.

- 17 Avata mave BAJARI igheghi use tu-  
monde baingheraera amo, nu  
sifo ghousa dubo buraira.  
A kotugo, nenda sasingu a nenda  
imemesirikena  
kavevera sifo ghousa eraira.
- 18 Nenda sasingu a imemesiri re-  
sena emo, na mave nunda em-  
boroda ise,  
nunda agho dari ningi kaifa er-  
aera aindae resena.  
Nunda kavevera ari, sifo ghousa  
nemokena muturaira.
- 19 BAJARI nunda kini (king) da avo  
anumba durode utuda fitiri  
irira, aminda anumbirise,  
natofo a roera isambu ava,  
nune kaifa eraira.
- 20 Aneya fakina kakato, BAJARI da  
geka a agho dari ningido er-  
aeva, nemokena resena:  
BAJARI dae sakai sevu!
- 21 Utu da fakina isasambu, a ko-  
tugo, BAJARI da saramana a  
aghi kakato nunda uju eraeva,  
nemokena resena:  
BAJARI dae sakai sevu!
- 22 Evetu genembo, sifo fuka, a roera  
isasambu, nune etiri siroru-  
seva, nemokena resena.  
Ne reda irise nunda kaifa ari  
itatameraeva aindae,  
BAJARI dae sakai sevu!  
Na barago nanda dubo jóká isam-  
buimi BAJARI kena saone!
- 4 Yaura mo, ninda aghi kakatori, edo  
avaraka bubura mo,  
ninda saramana kakatori.
- 5 Nine simbugeteso endae nunda  
vasada susu gambu takegha  
edo, javi itatoko jo ae arira.
- 6 Enda mo, ni evaimi emboi afuru-  
garigo usesi. A doriri barago  
evaimi afurugusira.
- 7 Avata, ni uvu isambu dombuda  
avito sisesa ainda sifoda ne  
oju sufuseri.  
Ni koko fuge sisesa da sifo  
aminda ne sumbudo era  
dadabuseri.
- 8 Uvu doriri mane do gisighe vose  
tevisada fetetiri, doriri mane  
isagha ututusira.  
Oroko nunda vasa nine simbu-  
gusesa aminda irira.
- 9 Ni enda sekago afurugeure dae  
tano garusesa ava, nu itako jo  
jarigari da kaugo iraeri.
- 10 Nine eoso, enda tevisa karevada  
uvu kirikara ghuse sumbu-  
raira,  
kotugo enda jiro fumbari da  
soróda barago uvu sum-  
buraira.
- 11 Taima da sino fuka uvu daba  
aminda mindiraera,  
taima da donki (donkey)  
uvu daba ava rise, dubo jo  
saghae eraira.
- 12 Ika mane uvu tinguda iritirira  
ainda jokada, rika mane  
mogha fafatu da fitido beka  
sise, iritirá gheraera.
- 13 Ni utuda ghe borija muteaso  
enda jiro fumbari etoda  
vovosegeraira,  
eoso endada ninda esim-  
bugari aimi bedo eraira.
- 14 Borumakava mindore dae sise  
nine eoso kikisa vivitigeraira,  
kotugo namane roera veka  
mane vareda govedo bayau bu  
mindoro dae sedo, enda esim-  
bugeaso vivitigeraira.
- 15 Aminguse, asi vaini govedo bambu  
rise dubo jama tafuse, orivi  
muka bu dombu jighoro  
jaraghurari,

## 104

*God Utuda, Evada A Endada,  
Roera Nanjogo Setiri Sirorusira  
Aindae, Sakai Saore!*

- 1 Arie namoako! BAJARI dae sakai  
saone! Arie BAJARI, nanda  
God, tomanakogo mo, nimori.  
Ninda tamo asugari mo, usasa  
duroghae aimi asugedo iresa.
- 2 Ni tofo usasa aimi doghedo iresa. Ni  
utu kau sasoro darari gusesi.
- 3 Ninda nati da gima mo, foroga  
ikáda iti simbugusesi.  
Kotugo foroga mo, ninda  
ghasemo dae budo, yaura da  
ghabuda vose deingheraesa.

- kotugo farava inge rise, fak-  
ina baore dae sedo amin-  
gusesi.
- 16 Lebanon aminda ika mainada  
babai BAJARI nunda tofodae  
sedo govusira, borija teriagio  
buraera.
- 17 Rika mane, nenda mogha aminda  
itiraera. O rika ebena da  
kakaugo mane  
maina ainda ikada nenda  
mogha ffitigeraera.
- 18 Taima gouti babaigo ne kunika da  
iritirá gheraera,  
kotugo kaisi aroro tokáda  
junge iritirá gheraera.
- 19 Tambuno mo, ghaeko baimara  
da tano ijugare dae sise, nine  
seteso sirorusira.  
Kotugo iji sifo reda ya voseraira  
ava nine seoso, nu kasama use  
ya voseraira.
- 20 Nine seoso tumba ainda jokada  
taima sino fuka isambu foa  
buvudo ghatagheraera.
- 21 Raiyoni seka babojegari gangara  
ghae nenda oka bayau God  
nine muturaesa ava bu min-  
dari dae, kakova eraera.
- 22 Iji vitiraera amo, ne sekago  
jovereghe ya nenda tokáda  
fafaseraera.
- 23 Amingurureoro, evetu genembo  
eredo ya buvu nenda sara-  
mana eraera,  
kotugo saramana use iroro,  
ungobu eraera.
- 24 Arie BAJARI, roera digari futo emo  
nine usesi!  
Roera isasambu dubo kotise e  
gogoghombusesi!  
Sino fuka, sivorro kororo mane  
dombu eni dombu eni nine  
eteso, aimi enda bedo edo  
irira.
- 25 Eva barago kotore, teria kotugo  
beraghari. Oka, kotugo roera  
dombu eni dombu eni,  
babaimi a veveyako ava  
jokáda iritirera, jo tegari  
da kaugo mo iraeri.
- 26 Bouti mane eva etoda sumbu  
ya foa gheraera, kotugo gam-  
bauva
- nombura da kaugo babaigo  
ava eteso aminda yaru  
use irira.
- 27 Ne isasambu nenda ighoi sifoda ni-  
moa gigitururoro, nenda uvu  
bayau nine muturaesa.
- 28 Nenda bayau rea muturaesa, ne  
ava mindiraera.  
Sino fuka nine unduraesa,  
isambu inono beka irá gher-  
aera.
- 29 Ni gukai muturaesa ainda sifoda,  
ne oju eraera.  
Ninda janje asegari nemokena  
buraesa amo, ne amburaera,  
kotugo fonja aimi usesa,  
aminda jovereghe fonja jin-  
eraera.
- 30 O ni enda eminda jebuga seka siro-  
rare dae saresa amo, ninda  
Asisi mutaso ne siroredo fetar-  
era.
- 31 Nanda uju enda eminda, BAJARI da  
duroimi beda edo evovo dae  
iraeti!  
Nu rea setiri sirorusira aindae  
BAJARI nune ivuga are dae re-  
sena.
- 32 Nu fuge enda giraira amo, enda  
daradara gheraira.  
Nu doriri mane nunda ungoimi  
dereraera amo, ne imbosi  
gombe gambe geraera.
- 33 Na enda eminda ghousa mavega  
irarena, BAJARI kena yaru sise  
irarena.  
Sifo ghousa God kena yaruimi  
sakai sise irarena, ambari  
tano.
- 34 Nanda yaru sarena aindae nu  
ivuga aeti, ai resira amo,  
nanda ivuga BAJARI kena  
ghe foa gheraira.
- 35 Nanda uju ari eko embo enda  
eminda ava sosighi aetesi.  
Ari ekoko embo ava ambu tefo  
aeteri.
- Arie namoako! BAJARI dae sakai  
saone!  
BAJARI dae sakai saore!

## 105

*God Nunda Natofo Kaifa Use Tavo  
Eraira.*

- 1 Namonde BAJARI dae aiyakoe saore!  
Nu teria beká irira aindae, osa saore!  
Nune rea usira aindae, endada oro oro isambukena osa siruroro ningore!
- 2 BAJARI dae yaru sise, sakai saore!  
Nune roera eveva gaveva nanjogo ututusira aindae,  
numokena yaruimi sakai saore!
- 3 Namonde mo, nunda tofo ágido ivuga aore! Namonde maveju maveju numoa tumonde baingeraera,  
nundae ivugaghae vure jasedo ghaore!
- 4 BAJARI kena yasivu, sonemba tambove! A kotugo, sifo ghousa numoa tumonde bainghuse irivu!
- 5-6 God da saramana kato Abraham da imemisiri gamemisiri kena resena, ningivu!  
Kotugo nunda imendi Jacob da veka nune gategusira ava, eminge kotovo dae resena, ningivu!  
God da tano gi dudukugharigo, a kotugo nu nange Abraham ondi da gitofu ijujari dae sisira, ava kotevu!
- 7 BAJARI mo, namonde God ri. Nunda Agho Dari mo, reighi isasambudae sisira.
- 8 Nu kotua gatise, rea ari sisira ava evovodae amingudo yarira. Nunda beka gajari mendeni isambu barago ghaeko evia inono evovodae nune use irarira.
- 9 Nune Abraham ghae kotua gatise rea setero fefetusira,  
kotugo nunda beka gajari Isaac kena sisira ábarago edo gharira.
- 10 BAJARI Jacob ghae dabade sekago kotua gatise, emingari sisira, amo eviri:
- 11 “Reighi Keinani (Canaan) ava nane mutono, ninda tofodae baresa.” sisira.
- 12 Sifo amo God da natofo reighi Keinani (Canaan) aminda mo,  
jo anjaga iraeri, ne esa embo amingo ava iriari.
- 13 Ne yabayaba ghuse, oro eninda reighida ghe ya reighi enikena ghedo ghuseri.  
Ne kotofu enikena buvudo, kotugo ya kotofu enikena buvudo ghuseri.
- 14 Avata, God jo doyari mave eniimi bouvu mema nemokena mutaeri.  
Ne kaifa use, nune kini (king) nanjogokena nange ghoghora sedo ghusira, amo eviri:
- 15 “Nanda saramana kakato gategusena evia, erá deove!  
Kotugo nanda feroveta barago erá dereove!” God aminge sedo ghusira.
- 16 Avori BAJARI setiri baimara ava reighi Keinani aminda sirorusira.  
Kotugo nenda bayau isambu nune saghimbe rurusira.
- 17 Nu amingusira, avata anakora nunda natofo gategusira ainda genembo eni Joseph, sabua are dae oriro usera ava, giti dirigetiri isira.
- 18 Nunda ata seni (chains) auri arimi bundiseri a kotugo nunda dubo auri eniimi bundiseri.
- 19 Aminge iriri, nune gimasa irise, rea osa sisira amo, beká sirorusira.  
Joseph geka beká vanembo sedo ghusira ava, geka BAJARI numokena sisira, ai siroretiri gosuseri.
- 20 Sifo aminda, Egypt emboda kini (king) oro oro nanjogo kaifa edo ghusira aimi setiri, dibura do buvurutusira.
- 21 Etiri, kini setiri, Joseph Egypt da gavana a roera isambu reighi Egypt aminda ainda bajari edo irei.
- 22 Kini amingusira amo, nune setiri gavana da babojegari a kini da dengoro indari kakato barago,



- Joseph da sari ningari edo irero, nunda geke da amboda amboda aoro dae sisira.
- 23 Aminge fetetiri, Joseph numamo Jacob ningi eredo, núbarago ira,  
Noah da mandi Ham da imemesiri jokáda Egypt aminda buvudo, esa embo da kaugo ava edo irá ghedo ghusira.
- 24 BAJARI setiri, Jacob da imemesiri digarigo siroruseri.  
Amingusera aindae, nenda fakina aimi gitofuda fakina avado darigusira.
- 25 Nune etiri, Egypt emboimi natofo Israel embo ava imboe gamboe useri. Aminguse,  
Israel embo deredo ghuseri.
- 26 Amingero, nunda saramana kato Moses diriguse God Moses da koro Aaron barago,  
gategedo dirigetiri nengae jovereghe Egypt iseri.
- 27 Nene God da tano gi dudukughari ava ututeoro gido ghuseri,  
a tano gae gitida ava reighi Egypt aminda ututedo ghuseri.
- 28 God setiri reighi aminda tumba jinjanghusira, avata, Egypt embo nunda geke jo ningae useri.
- 29 Nune setiri, nenda uvu isambu ororo jinetiri, oka mane isasambu amomonjeguseri.
- 30 Nenda reighi tomanako isambu gerakuimi bedo usira. Amin-giri, kini da nati barago nemo vanembo usira.
- 31 A kotugo God setiri, soinimi a jejeraimi funghuse reighi tomanako nemo vanembo useri.
- 32 Nune borija beká bureguse setiri, borija dombu eni yaughari kau ghamana da kaugo aimi diríri,  
biria tarighusira.
- 33 Nune sosighi use, nenda vaini da asi a ika figi seraera isambu de bunununghetiri vovoseguseri.
- 34 Nune furore dae aghi etiri, sisi mane, jo tegari da kaugo irae aimi fera buvurutuseri.
- 35 Nene ika igi mane reighi jokáda isasambu mindi tefo useri. Vareda bayau barago isambu mindi tefo useri.
- 36 Ainda amboda God Egypt embo da vide jamena bebego detiri sirivo useri. Aminguse nu Egypt embo da fakina da susu ava de tisisira.
- 37 Amingetiri, Israel embo era, Egypt embokena nenda guri sosighi use, ruruseri.  
Bero, God ne unumbetiri, Egypt do buvurutuseri. Ne tamo kae gego, fakinaghae buvurutuseri.\*
- 38 Egypt embo nendae oju usera aindae, Israel embo ne do darigetero, dubo jama beká useri.
- 39 God forogaimi nunda natofodae sasoro dadudurureari, tum-baghae usasa mutare dae sedo,  
avaraka mutudo ghusira.
- 40 Ne benunu setero, rika ribo da kaugo avavago futusira,  
kotugo roera farava da kaugo utuda ghe muteari bu mindido ghuseri.†
- 41 Nune ghamana afigetiri, uvu jojojoghe vovosusira ava,  
reighi uvu a evetu genembo irae vasada uvu teria eni sumbari gusira.
- 42 Ainda beká mo, nunda saramana kato Abraham kena rea ari

\* **105:37:** Tuturo 37 eminda geke “guri” tambaresa amo, ainda beká tamo foyago da geke “silver” nengae “gold” dae sisira. † **105:40:** “farava da kaugo” eminda resira amo, “mena” (manna) dae resira. Mena (manna) amo, God muteari, mungoghae dabade sifo ava inono vose furiari, Israel embo reighi evetu genembo a uvu irae da vasa aminda deinghuse, rete mindido ghuseri.

- dae sise beka gagojusira ava kotise, amingusira.
- 43 Aindae sedo, nunda natofo gategusira ava nune unumbiri, ne yaru sise,  
ivugaghae fumbu aruguse reighi Egypt dodo buvurutuseri.
- 44-45 Avori, nunda natofo nange nunda Agho Dari kotugo nu rea aoro dae sisira,  
kaifa aetera ava kotise, nune oro mendeni da enda bu mutiri nene ruruseri.
- A kotugo, nenda vareghae daba ghabuda bariseri.

BAJARI dae sakai saore!

## 106

*BAJARI Nunda Natofoda Veka Eveva Eraera Aindae, Sakai Saore!*

- 1 BAJARI da javo jighoro erare! Erorurari, nunda dubo bari gombu tefo,  
nu eveva vanembo eraira aindae numokena aiyakoe sevu!
- 2 Mave eni jo BAJARI roera babaigo eraira isasambu tege tefo use, osa sari da kaugo iraeri.
- Mave nundae sakai sari saetira amo, jo nunda ari eveva eraira, ainghae inono ae aetira.
- 3 Evetu genembo mave nunda uju ava use, evovodae ari eveva gaveva use irá gheraera amo, ivugaghae irarera.
- 4 Arie BAJARI, ni sifo reda ninda natofo sonembarasa amo, nábarago kotaetesi!  
Sifo reda sonembururaso jebuga tambarera, nábarago kotaso dae resena!
- 5 Ninda natofo gategusesa ava, nanjigo saso ati ghayafade arera amo, saso, ne redae ivuga arera, na ainda jokáda irarena.  
Aminguse, ninda natofode dabade tatedo, nindae sakai sise irarera.
- 6 Afa, abua mane ari ekoko usera aminga ava, namane barago kotari ekoko kotise, ari ekoko edo ghuseri.
- 7 Namanenda avia abua Egypt aminda ninda tano gi dudukugharigo ututusesa ava, ne jo kote simbugae useri.  
Umbu nanjogo nemokena kavevera edo ghusesa, ava ne kotae edo ghuseri.  
Arie God, Fakina Tofo, ne amingedo, eva kokoigo aminda osogo nimokena bu fuseri.
- 8 Avata, nunda fakina tomanakogo ava ijugari gaoro dae sise,  
nu rea ari dae sedo, beka gagojusira ava use setiri, ne jejebuguseri.
- 9 Nune dombuda sise setiri, Eva Kokoigo saghedo kainghusira.  
Etiri, nunda natofo unumbedo bu enda kaingharida sefuseri.
- 10 Nune, evetu genembo ne gari imboe edo ghusera aikena sonembetiri, ne jebuguseri.  
Nenda gitofukena ne sainghimbe bu darigusira.
- 11 O nenda gitofu mo, uvuimi fatiri mindi sirivuseri, eniko jo fetieri.
- 12 Amingetiri, nunda beka gajari isambu ava nunda natofo tumonduseri. Edo, yaru didivuse, nundae sakai siseri.
- 13 Avata, nu nundae sedo rea usira ava ne totoi nembo kotae useri.  
Amingedo nenda uju use, God da kotari ningari dae sedo jo kaifa aeri.
- 14 Reighi uvu a evetu genembo irae da vasa aminda ne masaru useri. Aminguse, ne God ava bu derarikena fifituseri.
- 15 Amingusera aindae, ne rejodae uju usera ava nune futusira.  
Avata, ainghae dabade tauno eko ava setiri nenda jokáda itatama useri.
- 16 Aminda evetu genembo uvu bayau irae vasada ne Moses dae mendó mendó useri,

- kotugo genembo God gategusira, Aaron dae barago, mendó mendó useri.
- 17 Amingero, enda beka fangedo, osogo ari kakato da giti jighari, Dathan dukughedo, a kotugo, nenda giti jighari eni, javo Abiram, nunda ambo jimbide dabade dukughusira.\*
- 18 Amingiri, avarakai vosefira, evetu genembo mendeni nengae da geke ningido ari ekoá usera aında etoda, vose dungetiri aviseri.
- 19 Nene doriri Sainai aminda goldi (gold) budo, ove kevuse, borumakava mandi da kaugo ava edo, tumonde bainghedo ghuseri.
- 20 Ne God duro usasaghae ava ighagha use, borumakava kiki isa mindiraira aında dangio ava budo tumonde bainghedo ghuseri.
- 21-22 Aminguse, God Noah da mandi Ham da imemesiri jokáda Egypt aminda, nunda tano fakinagoimi sonembetiri jejebugusera ava, ne ko-tae useri. Amo roera gi dudukugharigo Egypt aminda a kotugo eva kokoigo aminda usira, aında resena.
- 23 God ava gido, janje eko edo nunda natofo sosighi ari dae sisira amo, beká siroraetira. Avata God nunda saramana kato, javo Moses, gategusira aimi eredo, erá natofo ambeure dae sise, nu God buregusira.
- 24 Aında amboda, ne reighi uvu bayau da vasa nemokena mutaetira ava, imboe useri. Aında susu mo, ne God da beka gajari ava jo tumondaeri.
- 25 Aminguse, nenda dobo jokáda iri-tirise, BAJARI dae isi basi sise, ningi ningaego useri.
- 26 Aında sedo, nu koveonoghae eminge sisira, “Ne na uvu a evetu genembo irae vasa eminda saono, sirivu ututareva.
- 27 Nenda imendi gamendi barago, na nenda gitofu, na jo tumonde bainghae eraera, aında jokáda goroghaono ya, oro mendenida reighi aminda sirivu ututarera.”
- 28 Amboda, reighi Peor aminda God nunda natofo Israel embo god eni Baal seraera, aında tumodari embode tatedo, Baal tumonde bainghuse, ove kevari jebuga tefo, aında dombuda bayau joba dungutusera, ava bu riseri.†
- 29 Amingetero, BAJARI da janje ekoko ava nenda aito fugutusera aimi etiri, tauno eko beká nenda jokáda bejetiri sirivo useri.
- 30 Avata, Aaron da mandi Phinehas ere fetedo, ari eko gagara mandighae amo gaetiri ambududurusera aında, tauno eko amo tukughusira.
- 31 Avori, nune amingetiri gido, God nundae “ni eveva” sisira. Aminge sisira aında binó ava, ai tano ghedo refira, kotugo evovodae ivigedo yarira.
- 32 Uvu ghoghorro Meriba aminda evetu genembo isi basi setero BAJARI janje ekoko usira aında, Moses barago dara tafusira.
- 33 Ne rea usera aında, Moses janje eko beká etiri, ghoghora sisira amo, jo itako durumugedo kotise saeri.

\* **106:17:** Ni Dathan Abiram ghae da kiki bunaresa, Afige Numbers 16:1-35 aminda yasi, gase!

† **106:28:** Ove kevari Baal da tafaroro jokáda aito fugari etoto naká God imboe beká usira amo eviri: eni mo tafaroro jokáda ne komana da evetu o genembo sandi yagera edo ghuseri. O eni mo, nenda sasingu vide seka sirorari ava jebuga iroro muteoro Baal da fristimane dungioro avido ghuseri.

- 34 Ainda amboda, BAJARI oro mendeni daoro amboro dae sisira, ava ne jo ae irise,
- 35 oro resena ainde dabade minode minode fiftuse teana embo da tumondari eko, kotugo kiki eko  
ainda amboda amboda edo ghuseri.
- 36 Aminguse, God da natofo ove kevari dombu eni dombu eni ava tumonde bainghedo ghusera aindae,  
ne God da bouvu ava itatama e sirivo useri.
- 37 Ne totofo nenda sasingu veveyako ade vide ava jebuga irioro,  
Keinani embo da ove kevari da dombuda joba dungoro dae mutudo ghuseri.
- 38 Nenda sasingu dara iritiraede ava Keinani da ove kevusera aindae joba futuseri.  
Amingero, enda bebeta usira.‡
- 39 Ne aminguse totofo bebeta useri. Ne aminguse God nusuka numoa tumonde bainghoro dae sisira ava,  
gukai futuseri.
- 40 Amingetero, BAJARI nunda natofo Israel embokena janje ekoko use, nemoa gari beghagha beká usira.
- 41 Nu do darigetiri, oro mendeni ove kevari dombu eini dombu eni tumonde bainghedo ghusera,  
aimi sero nenda sari ningari use iritiriari a kotugo, nenda gitofu mendeniimi ne katiyavara use kaifa edo ghuseri.
- 42 Gitofuimi nemoa kateyavara urureoro, nendae bouvu mema tambudo ghuseri.  
Gitofuda sarida nembo iritirise, nenda sari ava use iriá ghuseri.
- 43 Sifo nanjogo BAJARI nune sonembeari, dara darigedo ghuseri.  
Avata nene geredo osogo numokena bu fuse ari ekoda tofo edo iriari.
- 44 Avata sifo reda numokena koko fuge sorara usera amo, BAJARI niningusira.  
A kotugo, ne nanjigo mema bouvu fufuse, kori sisera, nu kasama usira.
- 45 Nemoa kotise nu beka gagojuse rea ari sisira ava kotisira.  
Ne dubo bu gogoghomberraira aindae, nu joka usira.
- 46 Nune setiri, teana embo nunda natofo Israel embo sandido katiyavara edo ghusera,  
aimi tuturo edo nendae joka useri.
- 47 Arie BAJARI God, namane sonembe jebugaore!  
Ninda javo kakara jighoro erare dae sise, namane ningiaminda gorogheteso oro mendenida jokáda irera,  
amindaghe namane ava bu jovereghe fu!
- 48 Namonde Israel embo da BAJARI God dae sakai saore!  
Sakai saore nundae oroko a kotugo evovodae. Evetu gen-embo isambu sevu,  
“Ai bekári”. Sakai saore, BAJARI dae!

## 107

### *God Evevagori, Aindae Sakai Saore!*

- <sup>1</sup> BAJARI da dubo bari gombu tefo, nu eveva vanembo eraira aindae, numokena aiyakoe sevu!
- <sup>2-3</sup> Mave BAJARI sonembetiri jebuguseva, ne isambu geke setena ava sise, nundae sakai sevu!  
Ne teana embo da reighida irevo, ne nune gitofu kena saghimbe budo,  
utu gambari, utu gambaridaghe jovereghe fusira.
- <sup>4</sup> Mendeni reighi uvu a evetu gen-embo irae vasada baghimbedo yabayaba ghuse,  
reighi bogu begaya aminda ya anumbari emboro bunedo iritiriari.

‡ 106:38: Yasi gase! Sasingu dungari avari da geke tuturo 38 da duruda itako se disugedo irira.

- 5 Ne uvu bayaudae baimarai sirivo use, ambari dae ghosuguseri.
- 6 Aminguse, ne dara jokáda irise, BAJARI nemo sonembare dae sorara etero, nenda bouvu nune itimbetiri jebuguseri.
- 7 Nune giti biri, reighi bogu begayada ningia aminda dighi anumbaetera, ava kasama edo, emboro dambu aminda iseri.
- 8 Arie, ne nunda dubo bari a kavevera teriago a tano gi dudukugharigo nendae ututusra aindae, aiyakoe saovo dae resena!
- 9 Ai resira amo, mave uvu bayaudae baimara itatameraera aikena, uvu bayau nune muturaira.
- 10 Mendeni seni (chains) auri arimi bundetero dibura use vasa tumba jinjanghari beká aminda iritiriari.
- 11 Ainda susu mo, ne God Iká bekáda irira, ainda Agho Dari ava ighagha use, nu rea aoro dae sisira ava, gungubo sariá sise, jo ae edo ghuseri.
- 12 Susu aindae, nemokena saramana teria futo futiri, janjagu use janje gajedo ghuseri. Ne du fafasedo ghusera, mave jo sonembae edo ghuseri.
- 13 Sifo aminda, ne dara jokáda irise, BAJARI nemo sonembare dae sorara etero, nenda bouvu nune itimbetiri jebuguseri.
- 14 Ne vasa tumba jinjanghari jokáda irero, ne nune unumbe bu buvudo, seni auri aimi bundisera ava, nune detiri bunununghe vovosusira.
- 15 Arie ne, BAJARI da dubo bari a kavevera teriago a tano gi dudukugharigo nendae ututusra, aindae aiyakoe saoro dae resena!
- 16 Ainda susu mo, gitofoda furu da guro babai auri bronsi (bronze) ari ava nune de bununugheari voseraira. A kotugo, kamboda boraga auri ari barago, nune dive gafeari voseraira.
- 17 Evetu genembo mendeni geka ningi ningaego use ari ekoko edo ghusera aimi daghari gogovara edo, ne rea edo ghusera aindae, mema bouvu itatama use iria ghuseri.
- 18 Ne oka, uvu bayau gari beghagha use, ambari dae ghosuguseri.
- 19 Aminguse, ne dara jokáda irise, BAJARI nemo sonembare dae sorara etero, nenda bouvu nune itimbetiri jebuguseri.
- 20 Ne ambaetera, avata geka nune sisira aimi sonembetiri jo ambae useri.
- 21 Arie ne, nunda dubo bari a kavevera teriago a tano gi dudukugharigo nendae ututusra, aindae aiyakoe saoro dae resena!
- 22 Ne nundae aiyakoe sise, joba futuse, yaru sise, nu rea usira aindae, divu fusedo ghaovo dae resena.
- 23 Mendeni ghasemoda vovosegedo evada, ghamana bari dae use, ya foa ghuse gugua oriro use eva teriada deinghedo ghuseri.
- 24 Ne BAJARI evada rea edo ghusera, a nunda tano gi dudukugharigo edo ghusera, isambu gi tefo useri.
- 25 Nune seari yaura vovoga fakinago usumbeari, karaje dereari eva babai eredo ghusera.
- 26 Ghasemo babai bu fugeari ikáda viti ya, evada tifughe vosedo, viti foa kounghedo ghusera. Amingiri, bouti da saramana kakato oju use beka dad-abuseri.
- 27 Ne uvu sembae mindi jiro birurughari kavakava ariguse teteteghe ya foa ghuseri.

- Nenda kasama kau mavega  
isambu beká irae usira.
- 28 Aminguse, ne dara jokáda irise,  
BAJARI nemo sonembare dae  
sorara etero, nenda bouvu  
nune itimbetiri jebuguseri.
- 29 Eva yaura vovoga nune setiri,  
songhedo binono gafugusira.
- 30 Binono etiri, ne dubo jama ero,  
fafa reda ya terari dae uju  
usera aminda, ne nune unum-  
betiri jebuga era,  
aminda tere dadoruseri.
- 31 Arie ne, nunda dubo bari a  
kavevera teriágo a tano gi  
dudukugharigo nendae utu-  
tusira,  
aindae aiyakoe saoro dae re-  
sená!
- 32 Natofo tafaroro ari totorugarera  
ainda jokáda fetedo, nunda  
javo jighoro eredo ghaetira.  
Kotugo babojegari totorugarera  
ainda jokáda barago, nundae  
sakai saoro dae resena.
- 33 BAJARI etiri, uvu mane gasumbedo,  
kareva da uvu kainghedo,  
kainghari beká usira.
- 34 Evetu genembo aminda iritirise,  
ari ekoko edo ghusera aindae,  
nune etiri,  
enda karevagháe ava  
jovereghe enda karajemi  
bebeta usira avaga edo  
irei.
- 35 Nune etiri, reighi uvu a evetu  
genembo irae vasada uvu  
gaunghuse,  
enda kainghari aminda uvu  
kirikara ghuse tuturo edo  
sufusira.
- 36 Nune evetu genembo baimarai  
sirivo ari dae usera ava, bu  
vasa aminda dighi anum-  
baoro dae sedo, bu fitiri,  
nene bogu begaya dighido  
anumbuseri.
- 37 Nene je govedo ghuse,  
bayau goveoro beká di-  
garigo jigheari bu min-  
dido ghuseri.

- Nene enda je govedo vaini  
(wine) da asi govetero vuji  
digarigo jighi vosetiri bariseri.
- 38 Nunda natofo nune esimbugetiri,  
ne ghagurugo sirorero, nune  
setiri, fuka borumakava mane  
digituseri.
- 39 God da natofo nenda gitofuimi  
fera ne de atai fati fefe-  
tuse, sino fuka dae ari guse  
katiyavara ero,  
mema tambudo jarutusera  
da sifoda,
- 40 God katiyavara ari kakato yarata  
aikena nunda janje ekoko ava  
averegetiri,  
savavara uvu bayau irae  
vasada yabayaba ghuseri.
- 41 O makasi embo dae kavenu sise,  
nenda bouvu nune itimbetiri  
jebuguseri.  
Ainghae dabade, nune setiri  
nenda mandi sasingu digarigo  
siroruseri.
- 42 Avavaga sirorusira amo, evetu  
genembo eveva irá gheraera  
ava gosuse ivuga useri,  
o ari ekoko embo ava gido  
ne beka dadabuseri.
- 43 Mave dubo kotaride irá gheraera  
amo, na geka setena emo ko-  
tise irarera.  
BAJARI da dubo bari a kavevera  
teriágo ava kotise iroro dae  
resena.

## 108

### *Gitofu Kosegari Jebugari Da Ba- nungariri.*

- 1 Arie God, nanda tumondari nimo-  
kena jo nanjigo dadabae arira.  
Nanda dubo isambuimi nindae  
sakai sise, yaru divarena.
- 2 Arie, nanda gita yukagháe\* erevu!  
Sifo nane karigaone!
- 3 Arie BAJARI, na reighi isasambu da  
oro mendeni mendeni jokáda  
fetirise, nindae sakai sarena.  
Na reighi isasambu da oro  
mendeni mendeni aikena  
nindae sakai sarena.

\* 108:2: Afige, geka eni gita o uka dae gefusera, tuturo 33:2 duruda tege, garesa!

- 4 Ai resira amo, ninda dubo bari a kavevera amo, teriago bekári, utu viti darigedo irira.  
Ninda beka gajari namanekena isambu kaifa eraesa, aimi aira utu tambudo irira.
- 5 Arie God, utuda ninda javo jighi erorurari, enda evia ninda duro aimi afurugedo ijuge, gaore!  
Arie God, utuda ninda fakina a duró ava ijugururu!
- 6 Ninda natofo dubo buraesa ava ninda fakinaimi sonembe!  
Namanenda benunu ningido, ninda fakinaimi namane gitofukena saghimbe bu darigaso jebugari dae resena.
- 7 God nunda tafaroro kambo kakarago aminda irise sisira, “Reighi Sekem nane sosighi e budo, tano ghoredo, nanda natofo-keno soro vesa arena.  
Enda uvu ghajughu tevisa Sukot seraera, ábarago nane sosighi e budo, tano ghoredo, soro vesa arena.
- 8 Gilead frovensi mo, nandari, a kotugo Oro Manasseh ningiaminda anumbirera, ábarago nanda tofori.  
Ephraim ondi mo, nanda jiro gagara ari kato da kaugori, kotugo Judah ondi mo, nane kotofu edo irena da tanogori.
- 9 O Moab mo, nanda uvu dimbu gutari agha dae ererurena.  
A kotugo Edom aminda nanda ata anoso goroghari da vasari. Ata anoso goroghusena amo, nanda yoyovari, aimi imbara ururono irarira.  
Filistia embo da enda sosighi e ruruse, na sosighi e bari da kuvai koko fuge resena.”
- 10 Arie God, na mave giti bari ya reighi karo kinghari ominda terareni? Nanda giti mave bari Edom yareni?
- 11 BAJARI, ni namane imboe fugutus-esi, aĩ? Ni namanenda isoro embo unumbedo ya tataya aresa, aĩ?
- 12 Arie, sonembaso isoro ari dae resena, ai resira amo, endada evetu genembokena sonemba bari eni tefori.
- 13 Sonemba God kena ruruse, isoro arera inono arira.  
Namondeda gitofu nune de atai duboda fatarira.

## 109

### *God Gitofu Dari Ambare Dae Benunu Sisira.*

- 1 Arie God, na sakai nindae seraena. Erá beka gote tauntaungheose!
- 2 Ai resira amo, ari ekoko embo, nandae osogo use, geka gungubo nanda javoda sesegerera.
- 3 Nandae jijivu ekoko beká resutera. Na eko eni jo ae ava, susu tefo resera.
- 4 Na ne dubo ruruse, nemoá sonembaso dae banungedo ghuseni. Avata, na gofono dae sise, unongu seraera.
- 5 Na ne dubo ruruse, nendae ari eveva beká urureono, ne mino namoá imboe use, namokena ari ekoko beká ava eraera.
- 6 Genembo eko eni gatege, nundae aji sare! Unongu sari kato eni dirigaoro ya, numoa kotoda fitare!
- 7 Koto sifoda nu gofaetira. Nunda benunu seraira barago, ijujari katoimi gungubo sariá sise, sari gofarira.
- 8 Genembo amo oroko nembo ambaeti! Nunda saramana da vasa ava, genembo eniimi baeti!
- 9 Nu ambari, nunda sasingu babate aoro, noaro rori baetira.
- 10 Nunda sasingu nati do bayaudae benunu sise deinghaore!  
Evetu genembo mendenimi ne ondoro, numamo da kambo bunununghari ava do dari-gaore!
- 11 Nu mavekena moni benunu se bambudo, jo mutae usira aimi, numoa koto use nunda gugua soesa baeti!

- Teana emboimi nunda gugua ghayafa korai use budo irira ava, soesa barera.
- 12 Nundae mave enimi jo joka ae aetira. Kotugo mave enimi nunda sasingu babatedae kavevera itako jo ae aetira.
- 13 Nunda sasingu amboro dae resena. Amingaoro, nunda oro manje tefo aeti.
- 14 Numamo nombua mane da ari ekoko usera, kotugo noi da ari eko ava,  
erá BAJARI kote doyeure dae sise resena, evovodae kotise irare!
- 15 Genembo ainda natofo da ari ekoko ava BAJARI sifo ghousa kotise,  
ne dari amboro, nenda binó barago ya dadabaeti.
- 16 Ai resira amo, genembo amo nu evetu genembo mendeni dae joka ari berefori,  
evetu genembo tofo irae embo ava, evetu genembo gugua roera dae jarutuse irera ava,  
nemokena mema bouvu futuse detiri sirivuseri.
- 17 Giti nu evetu genembo mendeni girivaita ari ava uju beká edo ghusira, avori,  
nunda girivaita ari aimi tofo numoa bare. Nu esimbugari da emboro imboe usira,  
ágido numokena esimbugari eni erá sireoreure!
- 18 Nu evetu genembo mendeni girivaita ari ava nembo use irei, eveva mo uvá gae baseari,  
fisi yaya eraira aminga ava,  
nunda girivaita aimi tofo nunda tamonda gambare!
- 19 Kotugo, nunda girivaita aimi tofo numokena asuge, kikifu edo evovodae irare!
- 20 BAJARI, nanda gitofu namokena osogo use, jijivu seraera,  
ainda beká ava jovereghe nemokena ururaso,  
ghamo baore dae resena.
- 21 Arie BAJARI God, ni nange sonembari beka gagojusesa ava use, na sonembe!  
Ni na dubo bu goghombuse, kavevera eraesa aindae, na sonembaso jebugari dae resena.
- 22 Na tofo iraede kotugo makasi bekári, nanda janje joka mema ai jaruterena.
- 23 Kau ungobu use, reighi tutumbe geraira, na amingari gerena.  
Kau sisi ambari yaurai fuseari ya gheraira, amingari gerena.
- 24 Uvu bayau tefo etiri, na kaubo roroghoterira, na kau irae, gevei etu yavarara geteni.
- 25 Evetu genembo na sifo reda garera, namoa dere jise, nandae gifua gitorotoro use, gegha jiraera.
- 26 Arie BAJARI God, na dubo buraesa aindae, na sonembaso dae resena.
- 27 Arie BAJARI, nisuka nine na sonembedo, sanghimbeoso jebuger-aena ava ijugaso,  
nandae osogo ari kakato kasama aore!
- 28 Ne namoa girivaita arera amo, namoa esimbugaresa.  
Evetu genembo namokena ari eko arera ava, sosighi aso itatama arera.  
Amingururaso, ninda saramana kato, dubo jama arira.
- 29 Mave namokena gitofu eraera ava aso, meka gaeteri. Mekavata meka garera.
- 30 O namo, taká koko fuge BAJARI kena aiyakoe sise, nundae sakai sarena,  
nunda natofo tafaroro ari dae totorugarera ainda jokáda fete, nunda javo jighono erarira.
- 31 Ainda susu mo, tofo irae embo ava nune soreraira,  
kotugo mave gitofuimi daoro amboro dae seraera ava, nune sanghimbe beari jebuger-aera.



**110**

*Kini (King) BAJARI Nune Gategusira, Ava Sonembari Dae Resira.*

- <sup>1</sup> BAJARI nu nanda bajari aikena sisira,  
 “Fu, nanda ungu gimanduda anumbiraso,  
 ninda gitofu ninda fakina ava gosururoro  
 ne de bundedo bu foama, ninda ata duruda  
 fitono fafasaore!”
- <sup>2</sup> BAJARI nune ari, ninda kini (king)  
 edo reighi kaifa eraesa ava tuturo edo,  
 Saion\* eminda ghe beraraghe ya foa ghururari, ninda gitofuda  
 kini barago nine edo ne kaifa aresa.
- <sup>3</sup> Ninda gitofude isoro aresa ainda sifoda,  
 ninda natofo nenda ujuda foa ninda ambo gayarera.  
 Kau sifoda mungo rurugheraira,  
 aminga ava ninda gigimasa seka bajari ninda ambo gayari dae,  
 Doriri Kakara aminda nimo sonembari dae fufuregarera.
- <sup>4</sup> BAJARI, beka gagojuse kotua gatisira,  
 ava sedo nu jo ighagha ae arira.  
 “Ni kau Melchizedek avavaga fristi edo,  
 evovodae amingedo iraresa.”
- <sup>5</sup> BAJARI mo, ninda ungu gimandukenari.  
 Amboda nunda janje ekoko arira ainda sifoda,  
 nu kini (king) nanjogo dedo duboda fatarira.
- <sup>6</sup> Nune oro mendeni ava, ambu dadabaore dae use,  
 de goroghari isoro vasa ganjimbe fafasarera,  
 endada kokotofu nune dedo atai duboda fafategarira.
- <sup>7</sup> Kini (king) emboro tinguda kareva da uvu ava rise, aimi fakina arira.  
 Nunda gitofu isambu dedo duboda atai fafategarira.

\* **110:2:** Afige, geka eni Saion dae gefusera, tuturo 2:6 duruda tege, garesa!

**111**

*Bajari Ari Rea Eraira Aindae, Sakai Saore!*

- <sup>1</sup> BAJARI dae sakai saore!  
 Nunda natofo tafaroro ari totorugarera ainda jokada teredo,  
 nanda janje joká isambuimi BAJARI dae aiyakoe sarena.
- <sup>2</sup> BAJARI da ari ava roera garigarigo ava ututeraira!  
 Maveju maveju nu uju eraera, aimi nunda ari ovia kotise irágheraera.
- <sup>3</sup> Nunda ari rea ututeraira ava isambu bino ghaeri, kotofu da ari ava nembo eraira,  
 nunda irari dambugo beká ava jo nanjigo tano ae arira.
- <sup>4</sup> BAJARI da ari garigarigo eraira ava, koto dae eraira. Kavevera a joka ari kato, numori.
- <sup>5</sup> Evetu genembo mave nu kakara eraera, ainda uvu bayau nune muturaira. Nu nunda kotua gatari ava jo sifo nanjigo kote doya arira.
- <sup>6</sup> Nunda fakina ava nunda natofo kena ijuguse, teana embo da enda ghabuda bambu nendae futusira.
- <sup>7</sup> Nu rea ari dae sisira ava, bekáda bekáda use irágheraera.  
 Nunda natofo rea aoro dae sise, nenda fakina mavega ava, kote simbugedo sisira.
- <sup>8</sup> Namonde rea aoro dae sisira amo, nu ari dambugo use geka bekáda bekáda sisira.  
 Kotugo geka sisira amo, evovodae irarira, tano tefori.
- <sup>9</sup> Nu nunda natofo vujegetiri, jebuga irera.  
 Nemokena beka gajari rea usira ava, evovodae irarira, tano tefori.  
 Kakarago, a fakina kato amo, numori!
- <sup>10</sup> Dubo kotari bari da emboro amo, BAJARI kakara use nundae igheghi aresa.

Evetu genembo mave nunda sari ava kaifa use, irágheraera aikena, nune kotari eveva muteari buraera.

Evovodae numokena sakai sise irarera!

## 112

### *Ivugaghae Irari Da Emboro Mo, Emingori*

<sup>1</sup> BAJARI dae sakai saore! Evetu genembo mave BAJARI kakara use, nunda sari ava ari dae mamasa use irá gheraera amo, ivugaghae irarera.

<sup>2</sup> Genembo eveva einda mandi sasingu reighi Israel aminda susu iti fafode edo kokotofu nene arera. Aminguse, nunda imemesiri gamemesiri aikena esimbugari sirorari barera.

<sup>3</sup> Nunda ghaguru aikena moni guguade nene arera, nemo-kená evovodae digutuse irarira.

<sup>4</sup> Gegenembo eveva gaveva emingori, joka ari kakato, kavevera ari kakato, a kotugo ari dambugo use irá gheraera aikena, tumba jinjanghari ainda jokada usasa janimberaira.

<sup>5</sup> Evetu genembo mave komana da benunu ningido totoi sonemberaera, kotugo mave nenda bisinisi bekáda bekáda use komana jo derae eraera amo, ne ivugaghae irarera.

<sup>6</sup> Eveva evetu genembo itako jo gofae arera, nenda binó jo nanjigo dadabae arira.

<sup>7</sup> Mema bouvu da binó aindae jo oju ae eraera, ne tumonde gogoghombuse nenda kotari isambu BAJARI kena fifituse irá gheraera.

<sup>8</sup> Ne janje jo bunedo kotari futo ae eraera, a oju jo ae eraera. God nenda gitofu de sosighi ari garera.

<sup>9</sup> Ne babate embokena ivugaghae soro use, jo daghae eraera. Ne genembo kotofuko binoderi.

Ne kakara ururoro irá gheraera.

<sup>10</sup> Evetu genembo setena ava, natofu ekoko aimi gido janje ekoko arera,

ne imboe gamboe use, dika gambu ghininji ghananja gharera, avata ne manje tefo arera.

Ne rejodae gigitusera, ainda beká eni jo sorarari baeri.

## 113

### *BAJARI Da Kavevera Aindae Sakai Saore!*

<sup>1</sup> BAJARI dae sakai saore! Ne BAJARI da saramana eraeva, emboimi nunda javo jighivu, erare!

<sup>2</sup> Namonde isambu oroko a evovodae BAJARI da javo jighoro erare!

<sup>3</sup> Iji vitari kena kotugo iji vosari kena BAJARI da javo jighivu erare!

<sup>4</sup> BAJARI nune endada oro oro isambu kaifa eraira. Nunda duro aimi utu da roera isasambu darigedo iká bekáda irira.

<sup>5</sup> Evetu genembo eni BAJARI namonde tumonde baingheraera, ainda kaugo tefori. Nu ika bekáda irá gheraira.

<sup>6</sup> Avata nu ukuge, utu enda giraira.

<sup>7</sup> Makasi embo beká sena vasada iritirá gheraera ava nune jigheari ereraera.

Irari dae jarutuse irá gheraera, rejodae mema eraera ava, nune futuse, ne jigheari ereraera.

<sup>8</sup> Aminguse, evetu genembo ava nune sonembeari ne vitido, nenda natofoda kokotofude umo gaumo edo gheraera.

<sup>9</sup> Nune seari, evevetu erova mandi sasingu fufuse, dubo jama edo ivugaghae nenda ofo kamboda irá gheraera.

BAJARI dae sakai saore!

## 114

### *Jarige Yari Da Kirumoda Yaruri.*

- 1 Jacob da imemisiri gamemisiri Israel embo oro eni geke dombu eni tinongu tanongu seraera, ainda reighi Egypt iriara ava dodo isera da sifo aminda,
- 2 Judah ondi God da natofo kakarago useri. Israel embo tofo nunda natofo bekádae rurusira.
- 3 God isagha etiri, Eva Kokoigo gido gasumbusira, kotugo Jordan uvu tukughe fefetusira.
- 4 Doriri gouti vurari guseri, kotugo enda jiro fumbari ne kau sifi kandana ai jorujoru ghari guseri.
- 5 Arie, Eva, roi nangetiri, ni gasimbusesi? Arie, Jordan, níambarago, ni redae sumbari tukughusesi?
- 6 Arie, Doriri, ne redae gouti vurari gusevu? Arie, Enda Jiro Fumbari mane, ne redae sifi kandana aimi jorujoru gharigusevu?
- 7-8 Arie, Enda, Bajari God Jacob tumonde bainghedo ghusira, aimi etiri ghamana uvu jinando, nunda bogu bogu usira, a kotugo ganasa sarigedo uvu jojoghusira, nune furarira ainda sifoda nundae ojuimi daradara ghaso dae resena.

## 115

### *God Beká Mo Dabakori.*

- 1 Arie BAJARI, ninda beka gajari nanjogo eteso fefetusira, kotugo namanedae ghamo burraesa aindae, namane nisuka nimoa kakara use ninda javo jighoro erarira. Jo evetu genembo eni kakara ae arera.
- 2 Redae oro mendeni namanekena ategi emingeraeri? “God nene tumonde baingheraeva amo reda iri?”

- 3 Namondeda God mo utuda irira. Nu rea uju eraira, amo ava eraira.
- 4 O evetu genembo mendeni da god mane beká iritiraeri, siliva (silver) kotugo goldi (gold) imi ariri, evetu genemboimi tefo ghabuimi ututuseri.
- 5 Ne beka ghaeri, avata beka jo sae eraera, ne diti ghaeri, avata diti jo gae eraera.
- 6 Ne dengoro ghaeri, avata jo ningae eraera, ne mendo ghaeri, avata masa jo fumbae eraera.
- 7 Ne ungo ghaeri, avata jo sire bae eraera, ne ata ghaeri, avata jo fete ya foa ghae eraera, ne ghoreghore duka tefori.
- 8 Ove mave kevarira, kotugo mave nenda tumondari aminda fitarira amo, nenda ove mane da kakaugo aoro dae sise resena.
- 9 Arie, natofo Israel embo, nenda tumondari BAJARI kena fitivu! Ne nune sonembuse, gagara eraira.
- 10 Arie, God da fristi mane, nenda tumondari BAJARI kena fitivu! Ne nune sonembuse, gagara eraira.
- 11 Arie, ne mave BAJARI dae igheghi use, numoa tumonde baingheraeva, nemokena resena. Nenda tumondari BAJARI kena fitivu! Ne nune sonembuse, gagara eraira.
- 12 BAJARI nune namonde kotise esimbugarira. Namonde Israel embo a God da fristi mane dabade isambu nune esimbugarira.
- 13 Evetu genembo isasambu numoa kakara eraera ava, binode kotugo bino iraede dabade nune esimbugarira.
- 14 Na uju erena BAJARI nemokena mandi sasingu digarigo nemo-kena, kotugo nenda imemisiri gamemisiri amboda siro-rarera aikenamutaeti.

- 15 Na uju erena, BAJARI utu a enda usira aimi ne esimbugaeti!  
 16 Utu mo, BAJARI nusuka nunda reighiri. O enda mo, namonde evetu genembo kena futusira.  
 17 Evetu genembo amomonjegedo, ambari embo da vasada vosedo irera amo, ne BAJARI dae sakai jo sae eraera.  
 18 O namonde jebuga emboimi numokena aiyakoe sarera, oroko a evovodae!

BAJARI dae sakai saore!

## 116

### *Genembo Ambari Dae Urogho Use Jebugedo, God Kena Aiyakoe Sisira.*

- 1 BAJARI nanda kori ningiraira aindae, na nu dubo buraena. Beká resena, na benunu sirureono ningiraira.  
 2 Na kori seraena ningiraira. Ava sedo, na sifo ghousa jo ambae iris e, numokena banungedo gharena.  
 3 Ambari na asimi ivasi arigusira. Na rekato ambono furugarera kotise, ghamo takegha etiri, oju beka use, kotari futo useni.  
 4 Aindae sedo na BAJARI kena kori sise eminge siseni, "Arie BAJARI, benunu resena. Namoa ambari kena sainghimbe baso jebugaeteni."  
 5 BAJARI mo joka ari kato, ari dambugo beká eraira. Kavevera kato beká God numori.  
 6 BAJARI evetu genembo sasinguko da tumondari avaga tofo mandi gagara eraira. Giti evetu genembo na sosighi ari dae etero, nune na sainghimbe biri jebuguseni.  
 7 Arie namoako, dubo jama ase, ainda susu mo, BAJARI nandae eveva usira.  
 8 Arie BAJARI, ambaetena ava, na saghimbe beso jebuguseni. Nanda diti jivu nine ghajisesi. Nine kaifa eso, gitofuimi na jo de atai fataeri.

- 9 BAJARI amingusira aindae, na oroko nunda dombuda enda eminda jebuga ya foa gherena.  
 10 Na kotiseni, "Na dara eko beka beni." Avata nanda tumondari God kena jo doyaeri.  
 11 Na manamana use eminge siseni, "Evetu genembo eni jo tumondae arena."  
 12 BAJARI nandae kavevera eraira aindae, numokena rea mutareni?  
 13 BAJARI namo setiri jebugusena aindae, aiyakoe sise, vaini ava jobadae numokena mutarena.  
 14 Nunda natofo totorugedo tafaroro ururoro jokada, na rea beka gagojuse, numokena mutari dae sisena, ava mutarena.  
 15 BAJARI God da natofo, nunda dombuda dambugo beká irá gheraera, eni nanjigo ambarera amo, nu mema teriango ava itatama arira.  
 16 Arie BAJARI, na ninda saramana katori, nanda aya nimokena saramana usira, aminga ava eraena. Na asiimi bundisira ava nine vujeteseno na jebuguseni.  
 17 Na nimokena aiyakoe sise, sino fuka de oje dungedo mutarena. Kotugo nanda benunu barago, joba mutarena.  
 18-19 Ninda natofo isasambu ninda tafaroro kambo Jerusalem aminda totorugedo iroro, nimokena rea beka gagojuse mutari dae sisena ava, nenda dombuda mutono baresa.

BAJARI dae sakai saore!

## 117

### *BAJARI Dae Sakai Saore!*

- 1 Enda da oro oro isambu, BAJARI dae sakai sevu! Evetu genembo isasambu, nunda javo jighivu erare!  
 2 Ai resira amo, BAJARI, nu namonde dubo bu gogoghomberraira.

Kotugo, nunda sari ava evovoda  
 dae aminguse irarira.  
 BAJARI dae sakai saore!

## 118

### *Gitofu Sosighi Edo God Kena Aiyakoe Siseri.*

- 1 Arie, BAJARI dae aiyakoe sevu,  
 ainda susu mo nu evevago  
 bekári, a nunda dubo bari a  
 kavevera evovoda irira.
- 2 Natofo Israel embo geka eminge  
 sevu, “Nunda dubo bari a  
 kavevera mo evovoda irira.”
- 3 God da fristi mane isambu eminge  
 sevu, “Nunda dubo bari a  
 kavevera mo evovoda irira.”
- 4 Evetu genembo God dae igheghi  
 use, numoa tumonde baingher-  
 aeva, isambu eminge sevu,  
 “Nunda dubo bari a kavevera  
 mo evovo dae irira.”
- 5 Na memai jarutuse BAJARI namo  
 sonembare dae seteno, nune  
 sonembedo na vujegetiri ko-  
 tae ya foa gherena.
- 6 BAJARI mo nangae dabade irera, na  
 jo itako oju ae arena, mave  
 eni jo namokena mema mutae  
 arera.
- 7 BAJARI mo nanda tofori. Namu  
 nune sonemberaira.  
 Na gosurono, mave namokena  
 gitofu ututeraera ava dedo  
 atai duboda fafategarira.
- 8 BAJARI tumonduse sonemba tam-  
 bari mo evevagori.  
 Endada evetu genembo kena  
 gaiga gayari mo jo eveva  
 iraeri.
- 9 BAJARI tumonduse sonemba tam-  
 bari mo evevagori.  
 Endada giti jijighigari kena gaiga  
 gayari mo jo eveva iraeri.
- 10 Gitofu digarigo aimi namoa kose-  
 guseri, avata BAJARI da fakina  
 aimi nemoa sosighi useni.
- 11 Nene kosekase guse, namoa jimbe  
 birurughuseri, avata BAJARI  
 da fakina aimi nemoa sosighi  
 useni.
- 12 Namoa kosekaseguse, kau fafak-  
 ena aimi ari guse burughe bu-  
 vurutuseri.  
 Avata arivo gambu burughedo  
 sekago totoigo soana eraira  
 aminga ava use dadabuseri.  
 BAJARI da fakina aimi  
 nemoa sosighi useni.
- 13 Namokena teria futo fati fero, aimi  
 na rojiseni, avata BAJARI na  
 sonembusira.
- 14 BAJARI mo nanda fakina da susuri  
 a na javono numoa gateraena.  
 Nune sonembetiri na jebu-  
 guseri.
- 15 Ningivu! God da natofo nenda  
 dobo jokáda iritirise gitofu  
 sosighi e bari da kuvai sise  
 fumbu arugerera,  
 “BAJARI da fakina tomanakogo  
 beká aimi sonembetiri na-  
 maneda gitofu sosighi useri.”
- 16 BAJARI da fakina tomanakogo isoro  
 jokada sonembetiri gitofu  
 dedo, atai duboda fafatiguseri.
- 17 Na jo ambae irise, BAJARI rea usira  
 ava, vironu sido yarena.
- 18 Na dara usena andae, BAJARI etiri  
 na mema itatama useni, avata  
 jo doyari na ambaeri.
- 19 God da tafaroro kambo da guro  
 mane nandae affigevu, ya  
 jokada tere BAJARI dae aiyakoe  
 saone!
- 20 Emo BAJARI da gurori. BA-  
 JARI mavedae “eveva” sarira,  
 ainembo foa terarera.
- 21 BAJARI, nanda benunu ningido  
 sonembusesa andae, nimo-  
 kena sakai resena.  
 Nine eteso, na gitofu dedo atai  
 duboda fafatiguseri.
- 22 Ghamana eni, kambo itari kakatoi  
 imboe edo fugutusera ava,  
 Bajari nune budo tutumbi dae  
 sedo fiti simbugedo, aminda  
 tuturo edo, nunda kambo itari  
 dae erira.
- 23 Emo BAJARI da ariri. Namonde  
 gido dudukugherera.
- 24 Sifo emo BAJARI nunda gitofu dedo  
 atai duboda fafatusira,

- namonde isasambu ivuga  
use dubo jamaghae yaru  
divore!
- 25 Arie BAJARI, namane sonembe je-  
bugaore! Arie BAJARI, namane  
sonembururu, rea gigheterera  
ava beká sirorare!
- 26 Orokaiva, buvuruteresare! God  
ni esimbugetiri, nunda javoda  
refesa.  
BAJARI da tafaroro kambo  
eminda fetirise, namane ne  
isasambu esimbugerera.
- 27 BAJARI mo nu God ri. Nunda usasa  
namondekena janimberira.  
Ika fafatu jore ungoi bambu  
ambo gaya ambo gaya gaedo,  
olta kakara aminda jimbe  
birurughuse divore!
- 28 God nane tumonde baingheraena,  
amo nimori. Nindae aiyakoe  
resena.  
Na evetu genembo isasam-  
bukena ninda eveva kau  
mavego ava vironu sarena.
- 29 Evetu genembo isambu, BAJARI  
dae aiyakoe sevu!  
Ainda susu mo nu evevagori, a  
nunda dubo bari a kavevera  
mo evovodae irira.
- 6 Amingarena amota! Na nimo-  
kena fuse, ni rea sisesa isambu  
arena amo, na meka jo gae  
arena.
- 7 Ninda agho dari dambugo ava  
kasama arena amo, nanda  
dubo joká forosagoimi nindae  
sakai sarena.
- 8 Na ninda sari, ava tumonduse,  
kaifa arena. Ava sedo, na erá  
doyeose!
- 9 Genembo seka bajari kau nange  
nange irari keosogo beká  
irari? Amo, ninda geke ainda  
amboda amboda use irarira.
- 10 Nanda janje joká isambuimi ninda  
saramana ari dae egiraena.  
Erá, ni agho dari rea sisesa ava  
kosasaghedo doyeone! Ain-  
dae, na kaifa e!
- 11 Erá nimokena ari eko eono dae  
sise, ninda geke nanda janje  
jokáda fiteno irira.
- 12 Arie BAJARI, nindae sakai re-  
sena. Ninda emboro namo-  
kena ijuge!
- 13 Na ninda Agho Dari gefusesa  
ava isambu tegutuse evetu  
genembo kena vironu sise  
irarena.
- 14 Na ninda Agho Dari ava ari dae,  
ivuga beká eraena, moni a  
gugua roera kena jo kotae er-  
aena.
- 15 Na ninda sari ava, nane tegutuse  
irena. Na ninda kau mavega  
ava kotise irá gheraena.
- 16 Na ninda sari ava uju beká eraena.  
Ninda geke ava, na itako jo  
kote doya arena.
- 17 Na ninda saramana katori. Nan-  
dae ari eveva edo ghe! Amin-  
gururaso na irise, ninda geke  
ava kaifa edo ghaone!
- 18 Aso, nanda diti basari, ninda Agho  
Dari jokáda geke beká gari-  
garigo nanjogo iritirira ava  
garena.
- 19 Namu eminda endada sifo tufako  
irarena. Ninda uju rea aoro  
dae seraesa ava, erá namo-  
kena jungeose!

## 119

### *Genembo Eni God Da Geka Tege Ainda Amboda Amboda Ari Da Ivuga Tafusira Aindae Gefusira.*

- 1 Mave BAJARI da Agho Dari jokada  
irise, nunda uju ava nembo  
eraira amo, nu ivugaghae irá  
gheraira.
- 2 God da Agho Dari ava mave  
nininguse, dubo joká isambu  
numokena muturaira amo, nu  
ririaghae irá gheraira.
- 3 Ne Bajari da emboro da ise, ari eko  
eni jo ae eraera.
- 4 Bajari, ninda agho dari namane dae  
mutudo, dubo joká isambuimi  
tumonduse kaifa aoro dae sis-  
esi.
- 5 Na nange dubo joká isambuimi  
ninda sari ava tumonduse,  
ininighae kaifa areni?

- 20 Nanda ghamo beunghetiri itatamerena, ninda agho dari sifo ghousa ningari uju eraena.
- 21 Ivuga kakato anakora nine girivaita eteso irera, a ni rea seraesa ava mave aindae emboro kosasagherae
- 22 Na ninda dengoro indari kaifa eraena. Ava sedo, evetu genembo setena, dere jise, a jijivu seraera nemokena, namoa bu darigase!
- 23 Reighi da babojegari totorugedo namoa ufena daoro ambono dae manaka gayeraera, avata namo ninda sari futusesa ava tegutuse irarena.
- 24 Ninda geka gefusesa ava, tegetuse, na dubo jama eraena, ninda agho dari gefusesa, aimi namoa ijuguse jighi dambu eraira.
- 25 Namoa atai duboda fatero ambari dae erena, ninda beka gajari ava use na sonembe, janje asegaone!
- 26 Na rea isambu usena ava, vujeguseni. Eteno, ni "avori" sisese. Ninda sari ava ijugaso, gaone!
- 27 Ninda sari da tuka ava kasama aono dae sise, na sonembe! Amingaso, ninda ijuga garigarigo ava dubo jokai kotedo ghaone.
- 28 Namoa dubo mema aimi afurugetira. Ni rea ari dae beka gagojusesa ava use, namokena fakina bofu baone, ninda geka ava e!
- 29 Erá emboro sembae da yeone dae sise, na Kaifa e! Kotugo ninda kavevera eraesa aimi, ninda Agho Dari ava ijugaso gaone!
- 30 Na tofo ninda sari ava ari dae gateguseni. Ninda agho dari kau mavega ava, tege tuka kasama useni,
- 31 Arie BAJARI, na ninda agho dari ava tegedo aminguseni.
- Erá eoso, na evetu genembo mendeni da dombuda meka geone!
- 32 Ni rea seraesa ava nembo edo gharena. Ainda susu mo, nanda kasama teriago mo, nine mutaresa.
- 33 Arie BAJARI, ninda sari da tuka ava ijugururaso, na sifo ghousa evia kaifa edo ghaone!
- 34 Ninda Agho Dari ava se disugaso gaone, gido nanda janje jóká isambuimi kaifa edo ghaone!
- 35 Giti jijighururu, na ni rea sisesa da emboro aminda fetedo yaone! Ainda susu mo, ninda sari aminda na dubo jama tamburaena.
- 36 Giti jijighururu, moni gugua ghayafa da dighighi ari jo ae, ni rea sisesa ava nembo kaifa aone!
- 37 Eráma doyeso, na god beká iritirae ava tumondeone! Ninda geka ava use, nandae ari eveva e!
- 38 Na ninda saramana katori, evetu genembo ninda sari eraera aikena, beka gagojusesa ava namokena aso dae resena!
- 39 Natofuimi namokena jijivu ekoko seoro oju eraena ava kosege, ghamo asegaone! Ninda agho dari gari garigo bekári.
- 40 Na ninda sari ava ari dae uju eraena. Nimo numo bekári. Ágido, nandae jebuga seka ava bufu baone!
- 41 Arie BAJARI, ninda dubo bari kau mavegori ava, ijugaso gaone! Ni beka gagojuse nange ari sisese ava use, na sonembe jebugaone!
- 42 Amingaso, evetu genembo namokena jijivu seraera ne mino saono sari bunarera. Ainda susu mo, nanda tumondari ninda geka kena fitiraena.

- 43 Nanda gigitari mo, ninda agho dari kenari. Ava sedo, sonembururaso, na sifo ghousa evia  
geka bekáda bekáda sarena.
- 44 Na sifo ghousa evia ninda Agho Dari rea resira,
- 45 Na gitofudae jo mema ae arena, ainda susu mo, ninda sari ava ari dae, inini eraena.
- 46 Ninda agho dari ava kini (king) nanjogo kena vironu sise, itako jo meka ae arena.
- 47 Ni rea seraesa ava na dubo bu-raena. Ava sedo na aminguse, ivuga eraena.
- 48 Ni rea seraesa ava, na dubo ruruse kakara eraena. Ninda sari futusesa ava, na dubo jokai kotedo gharena.
- 49 Na ninda saramana katori. Namokena geka sisesa, aimi etiri namokena gigitari sirorusira, ava kotedo aso dae resena.
- 50 Na bouvu mema jokáda fefeteno, ninda beka gajari aimi etiri jebugusena aindae, dubo jama useni.
- 51 Ivuga kakato sifo ghousa evia nandae aji sise fiteoro voseraena, avata na ninda Agho Dari jo gukai mutae arena.
- 52 Arie BAJARI, ninda agho dari abua manekena futusesa, aimi ghamo jama bu foa gheraira, ava koterana.
- 53 Sifo reda ari ekoko embo ninda Agho Dari bejoro garena, na janje ekoko beká eraira.
- 54 Nanda irari sifo tufako enda eminda irise, ninda sari ava kotise, na yaru mane gaterana.
- 55 Arie BAJARI, tumba ghae na nimoa koterana.  
Ninda Agho Dari ava amboda amboda arena.
- 56 Nanda makoe mo, ninda sari nanjogo ava udo refena.
- 57 Arie BAJARI, nisuka nimoa nanda ujuri. Ninda geka kaifa are dae beka gagojerena.
- 58 Nanda janje joká isambuimi nimokena benunu resena, ni beka gagojusesa aminguse,  
nandae joká edo esimbugaso dae, resena.
- 59 Nanda irari ava fuge gosuse resena. Ninda geka ava use irari dae, beka gagojerena.
- 60 Jo itako gaimbo ae, na totoigo ni rea sisesa ava ari dae eraena.
- 61 Ari ekoko ari kakato namoa ninda Agho Daro doyono dae sedo, nenda vagho simbugeteri.  
Avata, ninda Agho Dari jo kotae ae arena.
- 62 Ninda Agho Dari dambugo eraesa aindae, na tumba soroda nindae sakai sari dae ereraena.
- 63 Nanda umo gaumo kokomana mo, evetu genembo nindae saramana use, ninda sari kaifa eraera, avori.
- 64 Arie BAJARI, enda mo, ninda dubo bari a kavevera aimi beda edo irira. Ninda sari ava namokena ijuge, gaone!
- 65 Arie BAJARI, na ninda saramana katori. Nandae ari eveva eraesa. Ni geka seteso, beká namokena siroretira.
- 66 Namokena ijugururaso na dubo kotise, kasama égogogho arena. Ainda susu mo, ni rea sisesa,  
na ava tumonderana.
- 67 Na sembae use, kosasaghedo ghusena, aindae eoso, na ghamo budo ghuseni.  
Avata oroko mo, na rea sisesa ava kaifa eraena.
- 68 Nimo evevagori, kavevera katori. Ijuge, ninda sari ava aone!
- 69 Ivuga kakato nanda bino sembae are dae, nanda javoda aji siseri.  
Avata nanda kotari isambuimi na ninda sari ava ningido amingeraena.
- 70 Ninda Agho Dari rea resira, ainda kasama nemokena tefori.  
Avata ninda Agho Dari aindae na ivuga erena.



- 71 Nane ghamo baono dae usesa aimi namokena eveva usira.  
Ainda susu mo, amingeteso, ninda sari ava, na kasama useni.
- 72 Agho Dari nine futusesa, ainda tuka namokena teriagori.  
Jo moni nanjogo endada iritirira amingo iraeri.
- 73 Nine eteso na siroruseni, a nine kaifa urureaso, jebuga irá gheraena.  
Ninda rea sisesa ava kasama aono dae sise, nanda kotari afige!
- 74 Nanda tumondari ninda geka kena fitiraena, ava gosuse, evetu genembo nimoa kakara eraera, aimi ivuga use irera.
- 75 Arie BAJARI, ninda agho dari ava eraesa andae resena.  
Ni namoa ijujuse, seteso ghamo rurusena amo, eveva ava usesi.
- 76 Na ninda saramana katori. Nine beka gagojuse rea sisesa, ava use,  
ninda dubo bari tomanakogo aimi aso, dubo jama aone!
- 77 Nandae joka edo, sonembaso, na jebugaone! Ainda susu mo,  
ninda Agho Dari aimi namokena ivuga bu foa gheraira.
- 78 Evetu genembo ivuga kakato namoa tefo tefo gesire eraera, nemokena aso, meka gaoro dae resena.  
O namo, ninda sari nanjogo ava, nanda kotari isambuimi kotide irarena.
- 79 Evetu genembo isasambu mave ninda Agho Dari kasama edo nimoa kakara eraera, ava saso, namokena furore!
- 80 Erá meka geono dae sise resena: na nange, ninda sari nanjogo ava,  
isambu kaifa e gogoghombaetena, ava uju eraena!
- 81 Arie, BAJARI, namo saso jebugarena ainda sifo kaifa use irana, na garoro buvira.  
Na ninda Geka ava tumonderaena.
- 82 Ni rea ari dae beka gagojusesa ava kaifa use, diti emboro use irana bunedo, ategi erena,  
“Ni nanjigo nandae kavenu saso, na ghamo asegareni?”
- 83 Na jo evetu genembo eni da kaugo iraeri. Namoa kau amingori, vaini da kofiri manai bununughedo irira.  
Avata, ninda sari ava jo itoko kotae ae eraena.
- 84 Na ghousa mavega ava kaifa ururono, evetu enembo namokena mema muturaera ava, aso ghamo bareri?
- 85 Evetu genembo ivuga kakato ninda Agho Dari jo ningido kaifa ae eraera aimi, namo sandi bari dae  
vagho bako simbuguseri.
- 86 Ni rea seraesa ava, geka beká vanembori. Evetu genembo namokena mema futuse, gungubo tefo tefo resera,  
ainda dombuda na sainghimbe bu!
- 87 Ne na detero ambari itako useni. Avata, ninda sari ava jo itako gukai mutaeri.
- 88 Ni na dubo bu gogoghombaeraesa andae, nandae veka eveva ururaso, na ninda Agho Dari ava, ningido kaifa arena.
- 89 Arie BAJARI, ninda geka evovodaeraerarira, utuda susu gambudo irira.
- 90 Ni geka nanjogu seteso fetirira ava amingudo yaresa.  
Enda é nine seteso susu gambu fefotusira aminge irira.
- 91 Roera isasambu ninda agho dari da irira. Ainda susu mo nemo isasambu ninda sari ningariri.
- 92 Ninda Agho Dari dae jo ivuga use irae aetena amo, mema bouvu itatama eraena, ai ambaeteni.

- 93 Na jo itatako ninda sari kotae ae arena. Ainda susu mo, aimi na kaifa eso, jebuga irena.
- 94 Nasukako namo nindari, sonembe, jebugaone! Ninda sari ava ari dae edo giraena.
- 95 Ari ekoko embo namoa ufena daoro ambono dae kato erera. Avata, ninda Agho Dari ava nanda janje jokáda fitono irari kotedo gharena.
- 96 Na kasama erena, roera isasambu nenda tano ghaeri. Avata, ni rea sisesa amo, evevago bekári, tano tefori.
- 97 Ninda Agho Dari mo, nange nanda dubo bari bekári. Sifo tumba evia kotise irá gheraena.
- 98 Ninda uju rea aoro dae sisesa ainghae irena. Sifo ghousa aimi urureari na dubo kotaride erena amo, jo nandae gitofu eraera ainda dubo kotarigo iraeri.
- 99 Na dubo kotari kasama teriagori, jo nanda ijuga kakato isasambu ainda kotari kasamago iraeri. Ainda susu mo, na ninda agho dari tegutuse, dubo jokai kotise irá gheraena.
- 100 Nanda dubo kotari kasama teriagori, jo afa koro da dubo kotari kasamago iraeri. Ainda susu mo, ninda sari ava ningido amingeraena.
- 101 Na ari ekoko da emboro do dari-guseni. Ainda susu mo, ninda geke rea resira ava ari dae uju use irá gheraena.
- 102 Na ninda agho dari isambu futusesa ava, eni jo bu fugaeri. Ainda susu mo, nisuka nimoa nanda ijuga katori.
- 103 Geka ninda bekada buvuruterira ava jeurugo bekári, jo finjeda firukago iraeri.
- 104 Ninda sari aminda na dubo kotari buraena. Ava sedo, na ari ekoko da emboro aminda yari imboe eraena.
- 105 Nanefa aminga ava, ninda Geka aimi nanda emboro ijugeraira. A kotugo na ningia aminda yaetena, ninda Gekaimi jaraghurureari ya gheraena.
- 106 Ninda agho dari eveva gaveva ava ari dae sedo javono gatise, beka gagojusena ava aono beká sirorarira.
- 107 Arie BAJARI, nanda tamo gambisi futo edo kae saviri ambududurerena. Beka gagojusesa aminga ava use, kaifa ururu, na jebuga irone!
- 108 Arie BAJARI, nindae banunguse, aiyakoe resena, ningi! A kotugo, ninda agho dari aono dae resesa ava, ijuge!
- 109 Na dara ambari jokáda fetirise, ambari dae jo oju aeri. Ninda Agho Dari kotido yarena.
- 110 Ari ekoko emboimi namoa daoro ambono dae vagho useri. Avata, ninda sari ava, na jo itako bu fugaeri.
- 111 Ninda sari ava, nanda jebuga evovodae irari da yeyeri. Aimi nanda janje dereari erorureari riria eraena.
- 112 Na tofo mandi kotiseni, ninda Agho Dari rea resira, ava use iria ambarena.
- 113 Evetu genembo dubo etoto eraera ava, na gari imboe beká eraena. Avata, na ninda Agho Dari ava uju beká eraena.
- 114 Nimoa nanda ambo sosari vasari akotugo nanda bereri. Ninda geke sisesa, ava gigituse irágheraena.
- 115 Ari ekoko embo nemokena resena, na dodo darige ajagha yasivu! Na God tumonde baingheraena, aimi rea sisira ava amin-garena.
- 116 Nine beka gagojusesa ava use, fakina nandae bofu bu jebugaone!

- Erá eóso, na rea gigiteraena ava,  
jo sirorae euri na meka geóne!
- 117 Na jighi fete, jebugaone! Ninda sari ava ningi kaifa use irarena.
- 118 Evetu genembo mave ninda sari bejeraera ava ondeaso darigeraera. Beká resena,  
ne reju ava ari dae manaka gayarera, ava de tiasaso beká jo sirorae arira.
- 119 Ari ekoko embo ava inono sena a susunda avavago babarageraesa.  
Aindae sedo, ninda Agho Dari ava ghamo buraena.
- 120 Nindae oju beká eraena. Ninda agho dari usesa aimi etiri na ojuimi jaruteraena.
- 121 Na rea etena amo, dambu a evavagori. Erá na gitofu jokada doyeóse!
- 122 Na ninda saramana katori. Namo sonembari dae beka gajaso dae resena!  
Erá doyeóso gegenembo totofo sakai sari kakato aimi na kateyavara use, nandae mema muteóre!
- 123 Namoa gitofukena sanghimbe baso jebugaono dae beka gagojusesa ava diti emboro use irena.
- 124 BAJARI, na dubo buraesa aindae, ninda sari aono dae sisesa, ava ijugaso gaone!
- 125 Na ninda saramana katori. Nanda kotari afigaso, ninda sari ava kasama aone!
- 126 BAJARI, oroko mo, eredo javi aso dae resena. Aina susu mo, natofo ninda Agho Dari erebejera.
- 127 Geka bekári, na goldi (gold) nu uju eraena. Avata ni rea seraesa ava, uju beká eraena.  
Nanda uju goldi o goldi numo beká aikena jo amingo iraeri.
- 128 Ninda sari eveva gaveva iririá seraena susu aindae, emboro sembaeda yari na imboe eraena.
- 129 Ninda Agho Dari amo garigarigori. Nanda kotari isambu aimi ava eraena.
- 130 Ninda geka se didisugarera aimi, usasa janimburrari bunari emboá dubo kotarera.
- 131 Dubo sagheari uvudae beka angasa angasa eraera, aminga ava ni rea seraesa ava, ari dae use irá gheraena.
- 132 Natofo nimoa dubo buraera aikena eraesa aminga ava use, dombu namokena edo, nandae joka aso dae resena.
- 133 Ni beka gagojuse rea ari sisesa, ava ururaso, na ari ekoimi jo bajari ururari gofae arena.
- 134 Ninda sari ava aetena ava kotise, evetu genembo namoa kateyavara use,  
namokena mema bouvu erefutura aikena, namoa saghimbe baso dae resena!
- 135 Na esimbuguse, fu nangae irore! Irise, ninda sari ava ijugaso gaone!
- 136 Natofo ninda Agho Dari jo kaifa ae use, erebejera aindae, nanda diti jivu rururarakuse uvui sumbari gerira.
- 137 Arie BAJARI, nimo dambugo bekári, a ninda Agho Dari isambu eveva gavevari.
- 138 Agho Dari futusesa amo, beká ava nembori. Inono a dambugo bekári.
- 139 Nanda gitofu ninda geka itako jo budo amboda amboda ae eraera aindae,  
nanda janje eko janje jokáda avarakai avarigerira.
- 140 Na kasama erena: ninda beka gajari nanjogo aida beká siroririra. Ava sedo na ghamo buraena.
- 141 Namo jo genembo mindafu eni iraeri. Akotugo na derejiraera. Avata, na ninda Sari ava kotise irá gheraena.
- 142 Ni evovodae ari eveva vanembo use irágheraesa akotugo,

- ninda Agho Dari ainda beká sifo ghousa siroreari giraera.
- 143 Na ganjibetiri jarutuse bouvu mema teria fufuse irena, avata, nine rea sisesa aindae, ivuga use irena.
- 144 Ninda Agho Dari beká ava nembori. Nanda kotari afige, jebuga tambone!
- 145 Arie BAJARI, nanda kotari isambuimi nimokena benunu resena. Mino saresa amo, ninda sari ava use irarena.
- 146 Ninda sonemba a jebuga ghae mutaso dae kori resena. Amingaso, ninda Agho Dari rea resira ava aone!
- 147 Iji jo vitae iriari, na ninda sonemba dae benunu seraena. Ninda geka rea resira ava kaifa gigita use irena.
- 148 Tumba soro ghousa ninda beka gajari dubo jokai kotari dae sise, na jo avae irise fase irá gheraena.
- 149 Arie BAJARI, na sifo ghousa dubo buraesa aindae, ningaso dae resena. Nandae joka use sonembururaso jebugaone!
- 150 Evetu genembo namokena mema mutari dae sise, manaka gaedo ojera utua erera. Avata, evetu genembo amo ninda Agho Dari itako jo kaifa ae eraera.
- 151 Arie BAJARI, nimo nanda tinguda ireda, a kotugo, ninda geka rea sisesa ava isambu beká ava nembori, tano tefori.
- 152 Giti beká na ningi kasama useni, ninda Agho Dari sifo ghousa irare dae sise, seteso fefetusira.
- 153 Na mema eretafena emoko fuge gosuse, saso jebugaeteni. Ainda susu mo, ninda Agho Dari ava na kotise irá gheraena.
- 154 Nandae sorega fufuse, namoa gitofukena bu darige! Sonembe, ni rea ari dae beka gagojusesa, ava e!
- 155 Ari ekoko embo ne jebuga jo tambae arera. Ai resira, ne ninda sari ava, jo ae eraera.
- 156 BAJARI, nimo kavevera katori. Ninda joka ari kau mavega ava ijuguse na sonembe, jebugaone!
- 157 Natofu, namokena gitofu use kateyavara eraera, digariri. Avata, na jo gofedo, ninda Agho Dari itako imboe aeri.
- 158 Evetu genembo tumondari tefo sifo reda giraena, na bero tugari dae eraena. Ainda susu mo, ne ninda Geka ava jo kaifa ae eraera.
- 159 BAJARI, namoa gi, ninda sari ava, na uju beká eraena. Ni na dubo buraesa ava, jo itako nanjigo aminda doyarigo iraeri. Ava sedo, na sonembe jebugaone!
- 160 Ninda geka isambu beká vanembori. Akotugo, ninda Agho Dari kosasa tefori, isambu evovodaer irarira.
- 161 Reighi da babojegari a giti jijighigari namoa susu tefo osogo use mema mutari dae eraera, avata na ninda Geka kakara beká eraena.
- 162 Ninda beka gajari ututusesa aindae ivugai jaruterena. Kau evetu genembo gugua sosighi ea budo ivuga beká eraera, aminga ava eraena.
- 163 Na geka gungubo ningari beghagha use, imboe beká ava eraena. Avata, na ninda Agho Dari seteso fefetusira ava, uju beká eraena.
- 164 Na sifo evia inono ninda Agho Dari kosasa tefo aindae aiyakoe sise irágheraena.\*

\* **119:164:** Genembo tuturoé gefuse jo “sise irá gheraena” gembaeri. Nu Israel emboda kotarimi use “umbu 7” gefusira.

- 165 Evetu genembo ninda Agho Dari uju eraera, nemo dubo jama mindafugo tambarera.  
A kotugo, roera eni aimi jo nemokena ari gofari da kaugo iraeri.
- 166 Arie BAJARI, namo sonembaso jebuga tambarena da sifo kaifa use irena. Akotugo, ni rea seraesa, ava eraena.
- 167 Nanda kotari isambu aimi ninda Agho Dari dubo buraena, ágido amboda amboda eraena.
- 168 Ninda sari ava use, ninda Agho Dari futusesa ava eraena.  
Ainda beká mo, na rea eraena isambu, nine giraesa.
- 169 Arie BAJARI, nanda sorara emo, nange ya nimokena buvari ningaetesi.  
Ni rea ari dae beka gagojusesa, ava use nanda kotari afigaso, kasama baeteni!
- 170 Nanda benunu nimokena erena ningaetesi. Ni rea ari dae beka gagojusesa, ava use, na sonembaso jebugaeteni!
- 171 Na sifo ghousa nindae sakai sise irarena. Ainda susu mo, ninda sari ava namokena ijugeoso giraena.
- 172 Ninda geke yaruimi isimbuse irarena. Ainda susu mo, ni rea seraesa aminda, kosasa tefori.
- 173 Sifo ghousa namo sonembari dae iriro use iratetsi! Ainda susu mo, na ninda sari aminda feteraena.
- 174 Arie BAJARI, nine saso jebugarena da sifo ava kaifa use irena.  
Ninda Agho Dari amboda amboda use ivuga eraena.
- 175 Doyaso, na jebuga irise, nindae sakai saone! Na uju erena ninda Agho Dari aimi na sonembaeti!
- 176 Kau sifi enimi baghimbari gedo irira, aminga ava na emboroda yaba yaba ghuse irena.

Avata ni rea sisesa ava, na jo kotae useni. Ava sedo, foa namoa kakova edo unumbaso dae resena!

## 120

### *Sonemba Dae Banungariri*

- 1 Na darada fetedo ghusena da sifo aminda,  
BAJARI namo sonembare dae banungedo ghuseni.  
Banungeono ningido na nune sonembedo ghusira.
- 2 Arie BAJARI, namoa gungubo kakato  
a derari kakato eikena bu dari-gaso dae resena.
- 3 Gungubo kakato, God nendae nange ari?  
Nu nendae kau nange ari ghamo barevu?
- 4 Ne taká isoro emboda feva da goroba mendó sighonogo aimi gae babasiguse,  
avaraka imo kokoigo beká aimi dungari avareva.
- 5 Nenda jokáda irari mo, eko bekári, kau esa yavai ya,  
evetu genembo nenda otu ekoko reighi Meseki o Keda\* embo ainda irari da kaugori.
- 6 Na evetu genembo beisiga tataya kakatode ghousa futo irana,  
imboe beká erira.
- 7 Na dubo jama da genembari,  
avata ne nanjigo beisiga tataya dodo iroro dae sarena amo,  
ne isoro ari dae sarera.

## 121

### *Namondeda Gagara Ari Kato BAJARI Numori.*

- 1 Na doriri fuge gosuse, god a sukaru mendeni tumonde bainghari dae sise,  
ove aminda keve dadorusara aikena, dombu fainghedo banungarena, ai tefo?

\* **120:5:** Meseki o Keda: reighi etoto naká emo jo utua iraeri, sokari. Evetu genembo aminda iritirera amo ekoko beká, nenda otu ekokori.

- Avata na jo amingae arena! Ainda susu mo: nanda sonemba jo aminda ghe furae eraira.  
Avata nanda sonemba reda ghe foa gherai?
- <sup>2</sup> Nanda sonemba mo, BAJARI utu a enda etiri sirorusira, numo-kena ghedo foa gheraira.
- <sup>3</sup> Nu ni jo doyarari gofae aresa.  
Nimo tavo ari kato mo, nu diti fangedo, sifo evia inono ni kaifa use irá gheraira.
- <sup>4</sup> Amo, Israel embo da tavo ari kato mo,  
nu jo diti bainghae eraira, a kotugo, nu jo avae eraira.
- <sup>5</sup> BAJARI nune, ni bu kaifa use tavo e gogoghomberraira.  
Nu ninda dengesida fetirise, ninda gitofu da fakina ava gagojuse ni kaifa eraira.
- <sup>6</sup> Sifo ateraira ainda jokáda, iji aimi dara o mema eni jo bu furae arira.  
A kotugo, tumba jiraira ainda jokáda, inua aimi barago dara a mema eni jo bu furae arira.
- <sup>7</sup> Ainda beká mo: dara rea furarira ava,  
isasambu BAJARI nune koseguse kaifa e gogoghombururari, ni eveva irá gharesa.
- <sup>8</sup> Nune ni kaifa tavo e gogoghombururari,  
ni oroko a sifo ghousa evia, eveva ya foa ghuse irá gharesa.

## 122

### *Jerusalem Dae Sakai Sari Da Yaruri.*

- <sup>1</sup> Nandae eminge sisera aindae, ivuga useni,  
“Javi e namonde BAJARI da tafaroro kamboda yaore!”
- <sup>2</sup> Arie Jerusalem ko, namane refara buveri,  
ninda furu jokada fetirera!
- <sup>3</sup> Jerusalem sekago bogu begaya beká dighi anumbuseri,  
garigo beká takegha takegha ituseri.

- <sup>4</sup> BAJARI Israel da oro oro aikena rea sisira, ava use,  
BAJARI da natofo isasambu nunda sakai saridae,  
vasa eminda viti foa gheraera.
- <sup>5</sup> David da imemisiri kini (king) edo ghusera,  
vasa eminda anumbedo, nenda natofo Israel embo da mema bouvu ijujeoro  
dambu edo ghusira.
- <sup>6</sup> Jerusalem aminda dubo jama siro-rare dae banungaore!  
“Evetu genembo nindae ghamo buraera aikena, fakina siro-rare!”
- <sup>7</sup> Ninda furu jokáda natofo nange dubo jamaghae iroro,  
kotugo ainghae dabade kokotofu da kambo babai iritirera aminda,  
dara a mema bouvu eni erá tereure dae benunu resena.
- <sup>8</sup> Nanda nano namendi a kokomana Jerusalem irera kotise,  
Jerusalem dae resena, “Dubo jama nimokena irare!”
- <sup>9</sup> Namondeda BAJARI God da tafaroro kambo eminda irira aindae kotise, reighi einda jokáda irari eveva siro-rare dae banungerena.

## 123

### *BAJARI Nange Joka Aetira, Ainda Banungariri.*

- <sup>1</sup> Arie BAJARI, ni utu ominda irise utu enda kaifa eraesa aindae,  
nanda dombu nimokena faingherena.
- <sup>2</sup> Arie BAJARI, namaneda God, kau sabua kakato gegenembo o evevetu bayau a sonemba nenda babojegarikena buraera aminga ava, namaneda dombu nimokena fiftuse iroro, namanendae joka edo sonembaetsi!
- <sup>3</sup> Arie BAJARI, namanendae joka e! Namanendae joka beká aso dae resena.

Ai resira, evetu genembo namane ighagha use, sino fukadae ari geraera.

<sup>4</sup> Iti fafo gugua ghayafade aimi namane ava teria futo ighagha use, jo evetu genembo irae sise, sero, namane irari barago erera.

Ainghae dabade, meka irae ivuga tefo tefo ari kakatoimi namane ava kateyavara beká use irera.

## 124

*Nunda Natofu Da Gagara Ari Kato, God Numori.*

<sup>1</sup> BAJARI, namonde jo sorae aetira amo, namonde nange aeteri? Arie, Israel embo sevu!

<sup>2-3</sup> “Gitofui janje ekoko beká use, namonde dedo gaedo ghari dae isoro edo ghusera ainda sifo aminda, BAJARI namonde jo sorae aetira amo, ne namonde diti jebuga dukunghaeteri.

<sup>4</sup> Useghai roera bu sivari guse, uvuimi fati tifughari geraira aminga ava, gitofuimi namondekena aeteri.

<sup>5</sup> O eva babai aimi ghasemo fatari, natofu mindi sirivo arigaetera aminga ava, gitofuimi namondekena aeteri.”

<sup>6</sup> Avata erevu! Namonde BAJARI dae aiyakoe saore, nu jo doyarit gitofui namonde sosighi aeri.

<sup>7</sup> Namonde kau rika vatafa fitari kakato da vatafada kosughe buvari guseri, vatafa da asi tafusegetiri, namonde jebuguseri.

<sup>8</sup> Namondeda sonemba BAJARI utu enda ari katoimi nusuka nune eraira.

## 125

*God Nunda Natofu Ovinimbedo Kaifa Eraira.*

\* **125:1:** Afige, geka eni Saion dae gefusera, tuturo 2:6 duruda tege, garesa!

<sup>1</sup> Evetu genembo mave tumondari BAJARI kena fiftuse irá gheraera amo, nemo kau doriri Saion\* amingori. Amo jo itako dara daraghuse gisighe yae arera, ne susu gambudo irera.

<sup>2</sup> Kau doriri mane aimi Jerusalem jimbe birurughe fefetegirera aminga ava, BAJARI oroko nunda natofu jimbe birurughedo evovoda aminguse irarira.

<sup>3</sup> Ekoko emboi jo sifo ghousa eveva emboda endada irise, giti nene jo jighae arera. Ainda beká mo, ekoko emboi ghousago giti jighari nene aetera amo, eveva embo nembarago, avose, tuturo edo ari ekoko aeteri.

<sup>4</sup> BAJARI, mave ari eveva eraera aikena ari eveva e, mave ninda sari ava nembo eraera aikena!

<sup>5</sup> O ni sifo nanjigo ari ekoko embo daso ghamo baoro dae aresa, mave ninda uju eraera ava dodo, ekoko erera nemoa nembo daso ghamo barera.

Dubo jama Israel embokena irare!

## 126

*Gitofukena Bu Darigusera Aindae Sakai Siseri.*

<sup>1</sup> BAJARI namonde gitofu reighida ghedo bu jovereghe sekago Jerusalem eminda, bu fusira amo, namonde jo tumondaeri. Kau aturu ari guseri.

<sup>2</sup> Amingedo, namonde ava ivuga use, ivugai gegha kekeku sise jighi fumbu aruguseri. Aminguse irero, oro mendeni gido namondeda eminge siseri, “BAJARI, nendae roera babaigo erira.”

- <sup>3</sup> “Ai bekári,” siseri. Nu namondedae roera babaigo ava usira.  
Etiri, namonde dubo jama erera.
- <sup>4</sup> Arie BAJARI, kau iji feteari uvu saghedo iriari borija sekago dise,  
uvu gaunghe viti betu bambu-  
raira aminga ava, namane  
enda eminda irari kena esim-  
bugaso sekago iti fafode aore!
- <sup>5</sup> Mave soraraghae govusera, ivu-  
gaghae je gamedo gharera.
- <sup>6</sup> Mave jivu menjuga gutuse, roera  
veka fumbu govani dae isera,  
je gamedo sigina sagina edo,  
jovereghe kuvai ghae furar-  
era.

## 127

### *God Da Ari Evevago Aindae Sakai Saore!*

- <sup>1</sup> BAJARI kambo jo itae arira amo,  
kambo itari embo nenda fak-  
ina soesa arera.  
Reighi bogu begaya ava BAJARI jo  
gagara ae arira amo,  
gitofu kato ari embo nenda fakina  
soesa arera.
- <sup>2</sup> Oka bayaudae sifo ataeda ere  
tumba jirari soroda avido  
ghari mo,  
jo eveva iraeri. Ai resira, BAJARI  
mavejoa dubo buraira aikena,  
ne aviroro nune muturaira.
- <sup>3</sup> Mandi sasingu mo fuyori, BAJARI  
muturaira. Esimbugari beká  
nemori.
- <sup>4</sup> Vide jamena genembo seka ba-  
jarikena siroreraera amo,  
kau isoro embo feva da goroba eni  
afari dae sise, fitiri irira, amin-  
gori.
- <sup>5</sup> Genembo mave vide jamena digari  
sari sirorarera amo,  
koto sifoda, nunda geka bouvu  
arira.

## 128

### *BAJARI Da Uju Mave Arera, Aikena Mino Mutarira.*

- <sup>1</sup> Mave BAJARI da uju ava use, nunda  
amboda amboda arira amo,

ne ivugaghae irarera.

- <sup>2</sup> Ni rejodae saramana eraesa,  
ainda beká ava sirorari baresa.  
Budo, susu iti fafode edo, ivugaghae  
iraresa.
- <sup>3</sup> Nearo kau vaini da asi jigharigo  
amingori,  
sasingu ghagurago beká fum-  
barira.  
Ni bayau mindari dae anumbaresa  
amo, ninda vide jamena gh-  
aguruimi anumbe jimbe biru-  
rugharera ava,  
kau ika orivi tamonda batuno  
sasangi birurugheraira, amin-  
gori.
- <sup>4</sup> Genembo mave BAJARI da uju ava  
use irá gheraira amo,  
BAJARI nu setena ava, aminguse  
esimbugarira.
- <sup>5</sup> BAJARI Saion irise,\* ni esimbugare!  
Ni jo ambae ghousa mavega  
ava  
iraresa, Jerusalem aminda  
gugua ghayafa iti fafode arira  
gasó dae resena!
- <sup>6</sup> A kotugo, ni jo ambae irise, ninda  
imemesiri siroraoro gasó dae  
resena.

Dubo jama Israel embokena irare!

## 129

### *Israel Embo Gitofu Sosighi Ari Dae Banunguseri.*

- <sup>1</sup> Israel ondi, ne seka babojevo  
gitofu nendae kau nange use  
mema bouvu futero baboju-  
seva ava,  
sevu ningore!
- <sup>2</sup> “Namane seka babojero, namane  
da gitofu namanekena ari  
ekoko use,  
mema bouvu futero itatamuseri.  
Ne amingusera avata namane  
fakina edo jo gofaeri.
- <sup>3</sup> Ne namane da guka ambi aimi  
ghinjebuse deoro rabijuse  
sasarigedo ghusira ava,  
namane da guka isambu buvá aimi  
bedo edo ghusira.

\* **128:5:** Afige, geka eni Saion dae gefusera, tuturo 2:6 duruda tege, garesa!



- 4 Avata BAJARI, bekáda bekáda seraira aimi, gitofu da dombuda nenda asi vujegetiri, namane do buvudo jebuge irera.”
- 5 Evetu genembo isambu mave Saion\* gari imboe eraera ava, nange ondi bere bereghaso meka gosuse jovereghe yaeteri.
- 6 Ne kikisa veka ghamana etoda vose batuno edo, jo vitae gharasa eraira, amingari gaeteri.
- 7 Jo evetu genembo eni aimi rete dabade ae arera, o jo sijari sijari edo, fumbu yae arera.
- 8 Evetu genembo mave jo foa ne gi dariguse, “BAJARI, ne esimbugare!” o  
“Namane ne BAJARI da javoda esimbugerera,” avavaga itako jo sae aeteri.

### 130

#### *Genembo Eni Sonembadae Banungusira.*

- 1 Arie BAJARI, na dara kau irae, eko beká ainda jokáda irise, namo sonembaso dae sorara erena.
- 2 Arie BAJARI, nanda sorara ningaso dae resena, nandae joka use sonembaso dae sorara erena, ningi!
- 3 Ni namanenda ari ekoko gembu fiftuse irá edo, namane ijujari dae saetesa amo, mave jaunghe vatafaghe jebugari?
- 4 Avata, ni ari ekoko kote doyeraesa aindae, namane nindae oju igheghi use, tumonde baingheraera.
- 5 Na BAJARI da sonemba ava kaifa gigita use, nunda geka rea setiri fefetusira, ava tumonduse irá gheraena.

- 6 Na BAJARI foa sonembarira, na aindae ivuga ghae, kaifa eraena. Isoro embo da kaifa kato ivugaghae sifo atare dae kaifa eraira da ivuga, jo nanda ivuga amingo iraeri. Sekago resena, ituru embo setena, ainda ivuga jo nanda ivuga amingo iraeri.
- 7 Arie Israel embo, nenda gigitari BAJARI kena fitivu!  
Ainda susu mo, nunda dubo bari teriagori.  
Aimi namonde dubo bu gogoghom-buse evovo dae namonde sonembari dae kato use irá gheraira.
- 8 Nune, nunda natofo Israel embo, nenda ari ekokoda mino mutudo sari jebugarera.

### 131

#### *Tumbedo Irise Tumondari Da Banungari.*

- 1 Arie BAJARI, na ivuga use, nandae sakai saore dae edo ghusena ava imboe edo dotutuse, meka irae namo gaore dae jajghedo ghusena ava dotutuseri.  
Na roera babaigo garigarigo kokotofu kasama kakato da ari jo nanda ari da kaugo irae ava ari dae jo kotari futo ae eraena.
- 2 Tatera, na durumugetenonanda janje joká jama etira.  
Kau sasingu ami mindari noi da ami gambu beka do songhe fase irá gheraira aminga ava, nanda janje joká isambu songhetira.
- 3 Arie Israel embo, oroko eitano sifoghousa evovodaenenda tumondari BAJARI kena fiftuse irivu!

### 132

#### *Tafaroro Kamboda Duró Aindae Sakai Saore!*

\* 129:5: Afige, geka eni Saion dae gefusera, tuturo 2:6 duruda tege, garesa!

- 1 Arie BAJARI, David, kotugo nunda mema ambarako beká itatama edo ghusira ava, erá kotae ease!
- 2 BAJARI, God fakina kato Jacob tumonde bainghedo ghusira, nimokena resena:  
David rea ari beka gagojusira ava kotaso dae resena.
- 3 “Na jo nanda natida ya nanda avari vasada fase avae arena.
- 4 Na itatako jo jangutae a jo avae irise,  
5 BAJARI God fakina kato Jacob tumonde bainghedo ghusira, ainda kambo itarena.”
- 6 Namane Bethlehem irise, Agho Dari nunda mauvaghae da binó ningido era,  
vare jokáda reighi Jearim dengesi aminda torughuseri
- 7 Namane siseri, “Avata oroko mo tafaroro kambo jokáda irira.  
Fuvu, BAJARI da irari vasada yaore! Ya, nunda anunbedo irari vasada teredo numoa tumonde bainghaore!”
- 8 Arie BAJARI, ere, ninda fakinada tano, ninda Agho Dari da mauvadae resera ainghae,  
fu, ninda kamboda tere evovodae iraso dae resera.
- 9 Sonembe, ninda fristi mane ari eveva vanembo aore!  
Sonembe, ninda natofo fumbu aruguse irore!
- 10 BAJARI, ninda saramana kato David kena kotua gatisesa ava kotise, ninda kini gategeteso oroko irira ava,  
erá ighagha ease!
- 11 Ai resira amo, BAJARI, ni David kena kotua gatisesa, jo doyaie aresa.  
Ni kotua eminge gatisesi, “Nane aono, ninda mandi enimi ninda vasa budo, kini arira.
- 12 A kotugo, ninda sasingu vide jamena nanda beka gajari a nanda agho dari futusena ava, amboda amboda arera amo, nenda sasingu nébarago
- evovodae numamoda vasa budo,  
kini udo yarera.”
- 13 BAJARI, nu reighi Saion\* ava gatededo, eminda irari dae sisira.
- 14 Nu sisira, “Nanda uju, na vasa eminda irise, nanda natofo kaifa udo yarena.”
- 15 Reighi Saion embo reju baetera, ava nane esimbuguse, reighi ainda makasi emboda uvu bayau nane mutarena.
- 16 Nane esimbugururono reighi ainda fristi maneda aito eveva fugutudo yarera.  
Nane aono reighi ainda natofo tumondari embo dubo jama use ivugai divu fusedo gharera.
- 17 Nane aono, David da imendi eni siroredo Kini fakinago edo fetarira.  
Kini resena ava, gatededo sonembururono reighié kaifa udo yarira.
- 18 Nane aono, nunda gitofu meka gosuse mekai jarutarera.  
Avata nane sonembururono, nunda reighi nunda natofo isambu nune kaifa ururari, riria use irarera.

## 133

### *Dubo Dabako Edo Irarera, Ainda Jokáda God Da Esimbugari Barera.*

- 1 Arie, God da natofo dubo dabako edo irarera, namonde mino eveva itatama use ivugaghae irarera.
- 2 Amo kau usu muno yavegari Aaron da jiroda averegetero yoyaghuse vose  
nunda besosoda ghe vose fira, nunda tamo asugari dubo-kena vovosusira.
- 3 Dubo dabako edo irari nunda esimbugarighaeri, kau doriri Hermon da mungo doriri Saion kunikada vosari garira.  
BAJARI nunda esimbugari aminda mutari sisira,

\* 132:13: Afige, geka eni Saion dae gefusera, tuturo 2:6 duruda tege, garesa!

jebuga evovodae irari tano tefori.

## 134

### *God Dae Sakai Saore!*

- <sup>1</sup> BAJARI da saramana kakato, isambu fuvu!  
BAJARI dae sakai saore! Mave nunda tafaroro kambo jokada tumbaghae saramana eraeva isambu nenda dae resena.
- <sup>2</sup> Tafaroro kambo jokada nenda ghabu jighivu erorurari, BAJARI dae sakai sevu!
- <sup>3</sup> BAJARI, utu a enda ari kato, Saion\* aminda irise, ne esimbugare dae resena.

## 135

### *God Dae Sakai Sari Yaru Eniri.*

- <sup>1-2</sup> BAJARI dae sakai saore! BAJARI da saramana embo nunda kambo jokada fetireva, nunda Tafaroro Kamboda dendegu aminda ireva, nenda dae resena. BAJARI da javo jighivu, erare!
- <sup>3</sup> BAJARI kavevera kato, ágido nundae sakai saore! Numo evevagori, ava sedo nunda javo jighoro erare!
- <sup>4</sup> Ai resira, BAJARI Jacob ava gategusira. Natofu Israel embo ava nunda tofo aoro dae rurusira.
- <sup>5</sup> Na kasama erena, BAJARI namonde tumonde baingheraera, nu teriari. Eini numongo tefori.
- <sup>6</sup> Nu nusuka nunda uju rea koteraira, utuda kotugo endada, eva jokada kotugo kafuru duru bekada ava eraira.
- <sup>7</sup> Nune eari, utu gambari utu gambari aminda borija da foroga dariraira, nune eari, biria tarighuse, borija diraira.  
Kotugo nune yaura nunda serukuda afigeari buvu ya foa gheraira.
- <sup>8</sup> Egypt aminda bebego sirorusera ava, evetu genembo kotugo

sino fukade dabade, isasambu detiri sirivuseri.

- <sup>9</sup> Kotugo, Egypt aminda nenda kini nunda kokotofude ari ghamo baore dae use,  
nunda tano kotugo ari gae gitida ava, ijugedo ghusira.
- <sup>10</sup> Nune oro mendeni mendeni titighedo, kotugo nenda kini fakina kakato detiri sirivuseri.
- <sup>11</sup> Sihon, Amorite embo da kini, Og, Bashan da kini,  
kotugo Kainan embo da kini mane iritiriara isambu detiri sirivuseri.
- <sup>12</sup> Nune kini mane enda enda isambu nunda natofokena futusira, nunda natofu Israel embokena futusira.
- <sup>13</sup> Arie BAJARI, ninda binó evovodae irarira, ninda binó evovodae sise irarera.  
Evetu genembo sifo amboda sirorudo yarera, ni jo bunae arera.
- <sup>14</sup> Ai resira, BAJARI, nunda natofu sonembuse, nenda vara nune jifegarira. Nunda saramana embodae joka arira.
- <sup>15</sup> Oro mendeni mendenida god mane ove nu genembori, siliva (silver) kotugo goldi (gold) imi ariri.  
Evetu genemboimi ungoi eraera.
- <sup>16</sup> Ne beka ghaeri, avata beka jo sae eraera. Ne diti ghaeri, avata jo gae eraera.
- <sup>17</sup> Ne dengoro ghaeri, avata jo ningae eraera. Ne janje itatako jo asegae eraera.
- <sup>18</sup> Nanda uju evetu genembo mave god gungubo ove mane eraera,  
kotugo evetu genembo mave nenda tumondari ove god gungubo aikena fitiraera amo,  
ove god gungubo aida kakaugo aminga ava aeteri.
- <sup>19</sup> BAJARI dae sakai sevu! Israel embo nundae sakai sevu! God da

\* **134:3:** Afige, geka eni Saion dae gefusera, tuturo 2:6 duruda tege, garesa!

- fristi mane, nébarago nundae sakai sevu!
- 20 Ne Levi ondi, BAJARI dae sakai sevu! Mave nundae igheghi use,  
numoa tumonde baingheraeva barago, nundae sakai sevu!
- 21 BAJARI dae sakai sevu! Ne mave Saion\* ireva, nunda irari vasa Jerusalem aminda ireva, nemokena resena.

BAJARI dae sakai sevu!

## 136

### *Ayakoe Sari Da Yaruri.*

- 1 Aiyakoe saore, BAJARI dae, ainda susumo nu evevagori, *nunda dubo bari evovodae irira.*
- 2 Arie namondeda God, nu god mendeni irera, ainda iká bekáda irira, aikena aiyakoe sevu,  
nunda dubo bari evovodae irira.
- 3 Babojegari isambu ainda Bajari aikena aiyakoe sevu, nunda dubo bari evovodae irira.
- 4 Nusuka tano babaigo eari gi duduku gheraera, ainda susumo nunda dubo bari evovodae irira.
- 5 Nunda kotari kasamade aimi utu etiri sirorusira, nundae sakai sevu,  
ainda susumo nunda dubo bari evovodae irira.
- 6 Nune setiri kafuru etoda enda sirorusira, nundae sakai sevu, ainda susumo nunda dubo bari evovodae irira.
- 7 Iji nengae tambuno ghae nune etiri jaragheraera,  
nundae sakai sevu, ainda susumo nunda dubo bari evovodae irira.
- 8 Iji mo sifo kaifa are dae usira, ainda susumo nunda dubo bari evovodae irira.
- 9 Tambuno damanade tumba kaifa aore dae usira, ainda susumo nunda dubo bari evovodae irira.
- 10 Egypt embo vide jamena bebego isambu nune detiri sirivusera, aindae sakai sevu, ainda susumo nunda dubo bari evovodae irira.
- 11 Nune giti biri namonde Israel embo Egypt ghedo buvurutuseri, ainda susumo nunda dubo bari evovodae irira.
- 12 Nunda ungo fakinagoimi namonde unumbetiri buvurutuseri,  
ainda susumo nunda dubo bari evovodae irira.
- 13 Nune setiri eva kokoigo Israel embo da dombuda sarigusira, ainda susumo nunda dubo bari evovodae irira.
- 14 Sarigetiri, Israel embo nune unumbetiri sefuseri, ainda susumo nunda dubo bari evovodae irira.
- 15 O Egypt embo da kini fero nunda isoro embode nune fatiri mindi sirivuseri, ainda susumo nunda dubo bari evovodae irira.
- 16 Nune giti beari, nunda natofo Israel embo evetu genembo a uvu irae vasa aminda deinghedo ghusera,  
aindae numokena sakai sevu, ainda susumo nunda dubo bari evovodae irira.
- 17 Kini mane fakina kakato nanjogo ava, nune detiri sirivusera aindae, sakai sevu,  
ainda susumo nunda dubo bari evovodae irira.
- 18 Kini mane binode binode ava nune detiri sirivuseri, ainda susumo nunda dubo bari evovodae irira.
- 19 Amo Sihon, Amorite embo da kini avo, ainda susumo nunda dubo bari evovodae irira,
- 20 kotugo Og, Bashan embo da kini detiri ambududurusira aindae barago sakai sevu,  
ainda susumo nunda dubo bari evovodae irira.
- 21 Kini mane resera, ainda enda nune bambu nunda natofokena soro usira, nunda dubo bari evovodae irira,

\* 135:21: Afige, geka eni Saion dae gefusera, tuturo 2:6 duruda tege, garesa!

- 22 namondeda natofu Israel embo, nunda saramana kakato, aikena soro etiri nenda tofo-dae rurusera,  
 aindae sakai sevu, ainda susumo nunda dubo bari evovodae irira.
- 23 Namonde gitofu kena gofedo ghusera ainda sifoda, nu namonde itatako jo kotae ae edo ghusera, ainda susumo nunda dubo bari evovodae irira.
- 24 Namonde gitofukena sainghimbe beari, namonde jebugedo ghusera,  
 aindae sakai sevu, ainda susumo nunda dubo bari evovodae irira.
- 25 Evetu genembo isambu a roera isambu endada, utukena a kotugo evada jebuga irera,  
 ainda uvu bayau nune muturaira, aindae numokena sakai sevu, ainda susumo nunda dubo bari evovodae irira.
- 26 Arie, God utuda irá gheraira aikena sakai sevu, ainda susumo nunda dubo bari evovodae irira.

## 137

*Israel Embo Teana Embo Da Reighida Iri, Mema Iri, Ghasegai Isimbuseri.*

- 1 Namonde gitofu reighida buvurutuse, ututu Saion\* kotise, Babylon aminda uvu iritirera, ainda betuda anumbedo dimbiya useri.
- 2 Amingedo, namaneda gita† mane ika fatu da esege dodo, jo sekago bu divae edo ghuseri.
- 3 Ai resira amo, Babylon embo namonde sandi budo isera, aimi yaru eminge saoro dae siseri, “Saion da yaru eni ava siruruvu, ningore!” siseri.
- 4 Namonde teana embo da reighida nange BAJARI kena yaru gatise divareri?

\* **137:1:** Afige, geka eni Saion dae gefusera, tuturo 2:6 duruda tege, garesa! † **137:2:** Afige, geka eni gita o uka dae gefusera, tuturo 32:2 duruda tege, garesa!

- 5 Arie Jerusalem ko, na ni kotae arena, BAJARI aso nanda ungo gimanduimi gita dari jo inono ae aeteni.
- 6 Arie Jerusalem ko, na nindae ivugai jarutusena ava kotae arena mo.  
 Na yaru sari bunaeteni!
- 7 Arie BAJARI, Jerusalem gitofuimi rurusira da sifo aminda Edom embo nange usera ava kotaetesi!  
 Ne eminge sise, jo itako doyae tambuno use,  
 “Jighi torerevu, vose endada fasare!” resera ava kotaetesi.
- 8 Babylon, nimoa titigho arera. Namanendae nange usesa aindae,  
 mino evetu genembo mave arera ivugaghae irarera!
- 9 Evetu genembo mave nenda sasingu veveyako bambudo, ghamana tamonda dari fuseruma arira, ivugaghae irarera!

## 138

*Aiyakoe Sari Da Yaru Divariri.*

- 1 Arie BAJARI, nanda janje joká isambuimi na nindae aiyakoe sarena.  
 Ove kevarida god evetu genemboimi eraera, einda dombuda yaruimi nimoa sakai sarena.
- 2 Na dombu ninda kambo kakara ava fuge gosuse, tumoi bainghuse, ninda javo jighono erarira.  
 Ainda susu mo, nimo dubo bari bekári.  
 Ni rea sisesa ava eraesa. A kotugo ninda javo jigheso ikáda eroriri, ninda geka da fakina isagha erira.
- 3 Namonembaso dae kori siseni, ni ningido mino sisesi. Ninda fakina aimi eteso na fakina useni.
- 4 Arie BAJARI, kini (king) kokotofu endada irera,  
 isambu nindae sakai sise, ninda javo jighono erarira.

Ainda susu mo, ni rea ari dae beka gagojuse sisesa amo, ne nininguseri.

<sup>5</sup> BAJARI, nine rea usesa, a kotugo ninda duró tomanakogo ava nene yaruimi isimbarera.

<sup>6</sup> BAJARI, nimo iká bekáda iresa, avata makasi embo nine kaifa tavo ururaso irá gheraera, o ivuga kakato mo, ninda dombuda jo jungae arera.

<sup>7</sup> Namokena dara digari futo siror-eraira ainda sifoda, nine kaifa urureaso jebuga irá gheraena. Gitofu namokena janje ekoko er-  
aera amo, nine namo soredo, ninda fakina tomanakogo aimi sonembeoso na jebugeraena.

<sup>8</sup> Ni rea ari dae beka gagojusesa ava, isasambu aresa. BAJARI ninda dubo bari mo, evovodae irira.

Ni saramana rea ari dae tuturo garusesa, amingudo yasi tano ase!

## 139

### *God Da Dubo Bari Jo Itako Dari-gari Da Kaugo Iraeri.*

<sup>1</sup> BAJARI, ni na dere gido kasama e gogoghomberaesa.

<sup>2</sup> Na rea eraena ava, isambu ni kasama eresa. Ni soka fetedo, anakora nanda kotari gi tefo eresa.

<sup>3</sup> Na saramana arena o jangutarena amo, ni na giraesa. Nanda ari rea eraena ava, isambu kasama eresa.

<sup>4</sup> Na beka jo sae iriono, ni giti kasama easo gido, amboda na geka seraena.

<sup>5</sup> Ninda ungoimi, na gagara edo kosegeraesa. Ninda fakinaimi na gajeaso, dara jo itatamae eraena.

<sup>6</sup> Nane resena, ni na kasama eresa, avata ninda kasama mo, jo nane dubo kotise kasama ari da kaugo iraeri.

Ainda beká mo: ninda kasama teria a jungarida ava sedo, jo nane dubo kotise kasama ari da kaugo iraeri.

<sup>7</sup> Na jo reda ya jungono ni tava ae aresa!

Na ninda dombuda jo reda ya jungari da kaugo mo iraeri.

<sup>8</sup> Na utuda vitiyaetena amo, ni aminda iraso tambaeteni.

O na ambari embo da vasada vosaetena amo, ni aminda iraso tambaeteni.

<sup>9</sup> O na rika da kaugo edo ghumbudo, eva da butu isambu darigedo, soka ya aminda irasetena amo,

<sup>10</sup> ni aminda irise, ninda ungoimi nanda emboro ijuguse, na sonembaetesi.

<sup>11</sup> Na tumbakena eminge saeteni, “Fu, namo gagara ase!”

O na usasa janimberaira aikena eminge saeteni, “Jovereghe, tumba jine!”

<sup>12</sup> Aminge saeteni, avata ni tumba aindae jo kotae eraesa.

Tumba jirarira o iji janimbarira, nimokena inonori.

Tumba a usasa mo, nimokena inonori, jo dombu eni iraeri.

<sup>13</sup> Ni na eteso, nanda tamo isambu sirorusira.

Ni na budo fesa dabako eteso, na aya da tinida siroruseni.

<sup>14</sup> Na nimokena aindae sakai ser-aena. Ainda susu mo: na jungarida ava eteso siroruseni.

Ni rea eraesa amo, isambu eveva bekári, evetu genembo gi bunedo dudukugheraera.

Ava, nanda dubo isambuimi itatamuse kasama erena.

<sup>15</sup> Ni durumuguse kotise, nanda etu aya da tinida esimbugeteso sirorusira.

Na jokáda irise babojusena ainda sifo aminda, ni kasama usesa amo, na amindari.

Na jo sirorae ireno ainda gitida,

<sup>16</sup> ni na gosusesi.

Nanda sifo nanjogo enda eminda jebuga irarena ava, ni anakora tegedo ninda bukuda gefusesi.

Tegedo gefusesa amo, na jo sirorae ireno ainda sifo aminda, ni nanda sifo tegedo gefusesi.

- 17 Arie, God, ninda kotari mo, eveva bekári, jo nane kasama e bari da kaugo iraeri.  
Kotugo, ni na koteraesa amo, jo umbu dabako o etoto aminda ava,  
jo kotae eraesa, ni na sifo evia inono koteraesa.
- 18 Na ninda kotari namokena irira, ainda inono tege bari dae aetena amo, kora da ghonesa irira omo, tege tefo aeteni!  
Na fase avido diti fange eraena ainda sifo aminda, na itatameraena, ni nangae dabade irera,  
na jo avirureono ni na jo doyae eraesa.
- 19 Arie, God, nanda uju mo, eviri. Ni nange ari ekoko embo daso ambaeteri!  
Nange gegenembo tataya kakato na do darigaoro, na nasukako iraiteni!
- 20 Ne nindae sise, geka eko seraera, ninda javo eoro eko eraira.
- 21 Arie, Bajari! Na ne imboe beká ava eraena! Mave ni imboe eraera ava, na imboe beká eraena.  
Mave ninda geka jo ningae irise, nimokena isoro ari dae seraera amo, na aindae imboe beká use, ningari mo beghagha eraira.
- 22 Ne nanda gitofu sise, na ne imboe beká use, ningari mo, beghagha eraira.
- 23 Arie, God! Nanda irari ijuje dere gaetesi!  
Nanda kotari kasama edo, na dere gido, nanda kotari tambaetesi!
- 24 Nanda dubo joká dere gaetesi. Ari eko eni aminda iraitira amo, tambu seghe fugedo,  
na unumbe bu giti jijighururaso, na jebuga evovodae irari ainda emboro ava tambaeteni!
- 1 Arie BAJARI, namoa ari eko embo aikena sonembe bu darige!  
Evetu genembo jiro ghambura aikena na kosege fete.
- 2 Ne evovodae ari sembae ari dae manaka garuse, sifo ghousa nene gayeoro,  
mendeni avo ghoghora tataya kunumberaera.
- 3 Nenda aviva kau jingabu ekoko ainda kae amingori, geka nenda bekada buvuraira ava,  
jingabu jumi da kae da kau-gori.
- 4 Arie BAJARI, namoa jiro ghambura embo da ari ekoko aminda kosege fete,  
nandae janje ekoko tefo tefo use, namo ambono dae manaka eregarera.
- 5 Meka irae ivuga kakato namoa ufena dari dae vagho junge fiti simbugerera,  
ne asi aimi ivasi ututedo nanda emboro aminda namoa ivasi e bari dae fiftuseri.
- 6 Na BAJARI kena resena, “Nanda God nimori.” Arie BAJARI, mema use namo sonembaso dae sorara erena, ningi!
- 7 Arie BAJARI, nanda Bajari, nanda sorega ari kato nimori. Isoro jokada na daetera ava, nandae sorega nine usesi.
- 8 Arie BAJARI, ari ekoko embo nenda kotari da uju beká rejo dae use manaka eregarera ava, erá eoso, beká sireoreure!
- 9 Erá eoso, ari eko emboimi nandae ivugai atai feteore!  
Namoa kateyavara use, geka ekoko resuterera, nange geka daba aimi jighi jovereghe nemoa gambare!
- 10 Avaraka imo kokoigo veriverigo ava mutu nenda etoda dudurugare!  
Ne bambu goroghe, bako eko aminda vovosegedo vitari bunedo iritirore!
- 11 Evetu genembo mave kokomana dae aji sise, nenda javoda geka gungubo gesire eraera,

## 140

*Genembo Eni God Numoa Kaifa  
Gagara Are Dae Benunu Sisira.*

- ava aso gogofe gaore! Aso,  
ghambura evetu genembo  
aikena, dara dombu eni  
dombu eni aimi ari sirivo  
aore!
- 12 BAJARI, namo kasamari, makasi  
embo rejo dae mema eraera,  
nine sorise sonembaresa.  
A kotugo evetu genembo mave  
makasikena katiyavara er-  
aera, aikena nine gitofu edo,  
vara jifegeraesa.
- 13 Beká resena, mave ni tumonduse  
ninda sari ava nembo eraera,  
ne ninda dombuda jebuga fe-  
tirise, nindae aiyakoe sise irar-  
era.

## 141

### *Genembo Eni Nunda Irari Kotise, God Da Sonembadae Benunu Resira.*

- 1 Arie BAJARI, na nimokena kori re-  
sena, na oroko nembako sen-  
embaso dae resena!  
Na sifo reda senembaso dae be-  
nunu sarena, ningi!
- 2 Ungobughae joba nimokena  
dungutuse, yabiyabina dun-  
goro muno viviturureari,  
ivuga eraesa aminga ava, na sifo  
reda benunu sise, ungo nimo-  
kena jighono erarira,  
ivuga aminga ava aso dae  
resena.
- 3 Arie BAJARI, erá geke sembae seono  
dae sise, nanda beka tavo aso  
dae resena! Kaifa kato eini  
gategaso,  
fetedo nanda avivi kaifa  
are!
- 4 Erama sembae kotise ari ekoko  
eono dae sise, nanda dubo  
joká kaifa aso dae resena.  
Erá doyeoso, na ari eko embo da  
kirumo aminda ya nemonde  
dabade tatedo,  
nenda aito ava fugeone!
- 5 Genembo eveva aimi na dengoro  
induduse, dombuda sarira  
amo,  
nandae kavevera use aminge  
sarira.  
Avata, ari ekoko embo nan-  
dae sakai sari sarera amo,  
na itoko jo ningae arena.

- Ainda beká mo, nenda ari ekoko  
beká eure dae sise benunu ser-  
aena.
- 6 Nenda babojegari sifo reda bambu  
ghotaghaoro, fanada duduru-  
garera, evetu genembo gido,  
kasama arera, BAJARI da  
geka mo bekári.
- 7 Kau ika faragho sare gafe kiro  
karo eraera aminga ava, gito-  
fui etero,  
namaneda etu mane ofofo bako  
bekada soesa mainge mainge  
edo iritirera.
- 8 Avata, arie BAJARI nanda God,  
nanda tumondari nimokena  
fifituse irena.  
Namo gagara aso dae sise, er-  
aena. Erá doyeoso, na deoro  
ambeone!
- 9 Namu ivasi ari dae vagho fifiter-  
era aminda, na gagara e! Ari  
ekoko embo da ivasi fitari  
aminda na kosege fete.
- 10 Aso, ari ekoko embo totofo nenda  
vaghoda tetururoro, nemoa  
ivasi ururari na jo dae doyoro  
yari resena.

## 142

### *Sonemba Dae Benunu Sisira.*

- 1 Na BAJARI namo sonembare dae  
koko fuge sorara use,  
ghasegai isimberaena.
- 2 Nanda mema janje jokáda isambu  
numokena averegeono, ningi-  
raira.  
Nanda mema isasambu numo-  
kena se tefo eraena.
- 3 Na sifo reda gofedo ghamo takegha  
urureari, na nange aetena  
ava, nu kasama eraira.  
Nanda emboro evovodae  
aminda ya gheraena aminda,  
gitofu namoa ufena sandari dae  
vagho junge fifituseri.
- 4 Nanda tingu tanga fuge gosuse,  
imana samana eraena,  
avata tofo da kaugo eni jo gae  
eraena.  
Ne na bunariri, namo sorari embo  
eni tefori.  
Nandae genembo mave jo sae  
eraira.



- <sup>5</sup> Arie BAJARI, na sonembadae mema use, nimokena resena,  
 “BAJARI nanda gagara ari kato nisuka nimori.  
 Enda eminda irise nisuka nimoa uju eraena.”
- <sup>6</sup> Namu sonembaso dae ghasega resena, ningi sonembe!  
 Na gofedo, rojari beká erena.  
 Nanda gitofu fakina kakatori. Na jo nemongo iraeri. Ágido namoa sonembe bu darigaso dae resena.
- <sup>7</sup> Na memai bundetiri irena, vujegaso jebugaone!  
 Amingaresa, ni nandae kavevera tomanako beká eraesa aindae,  
 na ninda natofo tafaroro ururoro, ainda jokáda fete irise, nindae sakai sarena.

## 143

### *Sonemba Dae Benunu Sisira.*

- <sup>1</sup> Arie BAJARI, nanda banungari ningi! Ninda natofokena bekáda bekáda eraesa.  
 Aminguse, nanda benunu ningi!  
 Ninda sari ava nembo eraesa.  
 Aminguse, na sonembe!
- <sup>2</sup> Na ninda saramana katori. Avata, erá nanda eko ijujeose!  
 Ai resira amo, ninda dombuda jo evetu genembo eniimi fetari inono iraeri.
- <sup>3</sup> Nanda gitofuimi na ondi sandi budo fugetiri dureno, atai fati gitetiri faseteni.  
 Na bu vasa tumbago ainda jokáda fitiri na kau ambari embo anakora ambududurusera, aminga ava erena.
- <sup>4</sup> Ava sedo, na kotari dadabetiri ambari dae itako erena.  
 Arie namoako, na nange aeteni, ava erebunena.
- <sup>5</sup> Ni nange edo ghusesa, ava kotide irena. Na ninda tano duroghae udo refesa, isambu kotedo gherena.  
 Ni nange usesa isambu ava erekotena.
- <sup>6</sup> Na banunguse, nanda ungo jigheono ereraira. Kau dubo

sagheari, uvu mindari dae angasa angasa eraera aminga ava, nanda asisi nimoa tambari dae uju erira.

- <sup>7</sup> Arie BAJARI, tavaraghe foa, nanda benunu ningaetesí! Erá nandae jungeose!  
 Ninda dombu namokena jungaresa amo, na anakora ambudo ambari embo da vasada vosarena.
- <sup>8</sup> Ni tumonduse irena, ágido sifo ghousa ataeghae ninda dubo bari ava ijugururu, gaone!  
 Nanda asisi isambu futuse nimokena benunu sise irá gheraena, ava sedo nanda emboro ijugururu, yaone!
- <sup>9</sup> Arie BAJARI, na nimokena afote fetari ya gheraena. Namoa gitofukena saghimbe bu darige!
- <sup>10</sup> God nane tumonde baingheraena amo, nimori. Ninda uju ava ijuge, ava aone!  
 Ninda asisi eveva aimi na ununbe, emboro evevada yaone!
- <sup>11</sup> Arie BAJARI, ni nange ari sisesa ava use, namoa gitofukena saghimbe bu darige!  
 Ninda kavevera eraesa aimi na sonembe, mema namokena foa gheraira ava darigaone!
- <sup>12</sup> Ni na dubo buraesa aindae, nanda gitofu isambu dive gafe sirivu e tefo aore!  
 Na ninda saramana kato, ava sedo evetu genembo na daoro ambono dae aito eraera, isambu sosighi e!

## 144

### *Kini (King) Gitofu Sosighi Edo, God Nunda Sonembadae Aiyakoe Sisira.*

- <sup>1</sup> BAJARI, namo gagara ari katodae sakai saore! Na ambi goroba jighono dae nune ijuguse,  
 isoro aono dae fakina muturaira.
- <sup>2</sup> Nu sifo ghousa namoa dubo ruruse, na gagara eraira.  
 Nu nandae sorega fumburaira, na nunda itumuda iriono, nune seari jebugeraena.

- Nanda tumondari numokena fituse, na jebuga irá gheraena. Nune oro oro isambu fiteari vose, nanda duruda irioro, nane kaifa eraena.
- 3 Arie BAJARI, genembo mo, rejori? Nu jo rejo eni iraeri, ava ni redae koteraesi? Nu taká tefo genembo, ágido redae bu tavo tatau eraesi?
- 4 Numo taká kau janje asegeraera, ainda kaugori, nunda jebuga, foroga iji gajeari, yaurai bu fuseari itumu totoi totói ya dadaberaira, amingori.
- 5 Arie BAJARI, utu jighi torere afige vose fu! Kunikada doriri mane sire jighi imbosi gubighare!
- 6 Biria barara mutu tarighuse, ninda gitofu ondari taraghaore! Ninda feva aimi afuse ondiruru, oju sumbore!
- 7 Ninda ungo utudaghe sirege vosefurari, na kafurudaghe jumbu vitone! Bu darigaso jebugaone! Oro mendeni da fakina kau irae aikena na bu darige!
- 8 Gitofuá geke beká eni itako jo sae eraera. Nenda geke tumondaoro dae God da javono gatise, beka gajeraera, avata aminda beká eni tefori.
- 9 Arie God, na nindae yaru seka gate divarena. Na gita\* doruse nimokena yaru sarena.
- 10 Mave seari, kini (king) mane nenda gitofu sosighi e atai fati fateraera, amo nimori. A kotugo mave, ninda saramana kato, David, bu darigeari jebugedo gherira, ábarago nimori.
- 11 Oro mendenida fakina kau irae aikena na bu darige! Gitofuá geke beká eni itako jo sae eraera.
- Nenda geke tumondaoro dae God da javono gatise, beka gajeraera, avata aminda beká eni tefori.
- 12 Amingaresa amo, namanenda vide jamena seka bajarera amo, faragho faragho eveva ikai bajarigarera. Namanenda sasingu ade jamena mendode sovode gari garigo kini (king) da nati botou da faiya gembari gengebago aminga ava bajarigarera.
- 13 Namanenda bayau seruku vasa bayau nunda dombu dombu aimi bedo ururari, namanenda sifi da mamandi ghagurugo 10,000 darigedo siroruse irarigarera.
- 14 Namanenda burumakau da mamandi nunda sifoda eveva fumbu averegarera. Namanenda reighi jokáda jivu menjuga jo gutae aeteri.
- 15 Geke isuru erena evia, oro mavekena beká arira amo, ivuga ghae irivu! Evetu genembo BAJARI nenda God dae budo numoa tumonde baingharera amo, ivugaghae irarera!

## 145

### *Sakai Sari Yaruri.*

- 1 God nane tumonde baingheraena, a kotugo, nanda kini mo nimori. Nindae sakai sise, ninda javo teria ava jighono iká bekáda erarira. Na nindae sifo ghousa a kotugo, evovodae aiyakoe sise, irá gharena
- 2 Sifo ghousa na nindae aiyakoe sedo gharena. Nindae sifo ghousa a kotugo evovodae sakai sise irarena.
- 3 BAJARI mo, nu teriagori. Sakai numoa sari evevari. Numo teriagó bekári jo kasama arida kaugo iraeri.

\* 144:9: Afige, geke eni gita o uka dae gefusera, tuturo 32:2 duruda tege, garesa!

- 4 Nine rea usesa aindae, namane oroko jebuga irera, nindae sakai sido iruroro, namaneda sasingu ningido, némbarago eredo, nenda sasingukena saoro ningido osa sarera.
- 5 Ninda duró usasaghae ava osa siruroro ningido, ninda ari gae gitida ututeraesa ava, nanda janje jokai kotedo gharena.
- 6 Ninda ari gae gitida ututeraesa setena, ava natofoi osa siruroro, ninda bino teria aindae nane barago vironu sedo gharena.
- 7 Evetu genembo isasambu ninda aito eveva aindae osa sise, ninda kavevera teriago ava yaruimi isimbarera.
- 8 BAJARI mo, dubo bari a kotugo, joka ari katori. Nunda dubo bari mo, evovodae irira, a kotugo gaimboghae janje ekoko eraira.
- 9 Nu evetu genembo isasambudae kavevera eraira, a kotugo roera isasambu nune usira aindae joka eraira.
- 10 Arie BAJARI, endada utuda a kotugo, evada roera nine usesa isasambu nindae sakai sarera. A kotugo, ninda natofo isasambu nindae aiyakoe sarera.
- 11 Ni kini (king) edo iresa da duró ainda binó ava osa sarera. Aminguse, ninda fakina teriago aindae isagha sarera.
- 12 Evetu genembo isasambu ninda tano babaigo gae gitida ututusesa ava kasama aoro dae sise, a kotugo, ni kini edo iresa ainda duró fakinaghae kasama aoro dae sise, amingarera.
- 13 Nimo utu enda a kotugo, eva da kini edo evovodae iresa. BAJARI, rea beka gagojuse, ari dae sisira ava, nune eraira. Nu rea eraira amo, joka use eraira.
- 14 BAJARI mave mema use goferaira ava, nune sonembeari jebugeraira. Gogofegedo irera, ava jijighurureari ere feteraera.
- 15 Endada evetu genembo, sino fuka, sivoro kororo, eva da oka mane gindovi gandovi isasambu diti nimoa gosuse gigiturureoro, nenda baimara sifoda nenda bayau inononda muturaesa.
- 16 Ni ungo isambukena javoregheoso nenda uvu bayau inonoda buraera.
- 17 BAJARI da aito fugari isambu dambugo bekári. Nu rea eraira amo, joka use eraira.
- 18 Evetu genembo mave bekáda bekáda janje isambuimi BAJARI dae kori sarera, nu anakora utua edo irira.
- 19 Evetu genembo mave BAJARI kakara eraera aikena reju ava daiva eraira, nune nemokena muturaira. Ne nanjigo numokena kori serera, nune ningido sonembeari jebugeraera.
- 20 Evetu genembo mave BAJARI dubo buraera ava gagara eraira. Avata, ari ekoko use irá gheraera ava dearai sirivo eraera.
- 21 Namó sifo ghousa BAJARI dae sakai sise irá gharena. Utuda endada evada reju ava jebuga irira, aikena resena, evovodae nunda javo kakara aindae sakai sise, nunda javo jighovo erare.

## 146

### *God Jebuga Mutari Kato Dae Sakai Saore!*

- 1 BAJARI dae sakai saore! Arie namoako, nanda dubo jokáimi BAJARI dae sakai saone!
- 2 Na BAJARI dae sakai sise irá ambari tano, na sifo ghousa God nane tumonde baingheraena aikena, yaruimi sakai sise irarena.

- <sup>3</sup> Nenda tumondari erá endada evetu genembo da babojegari kena fitiove!  
Endada evetu genemboimi jo saoro jebugae areva.
- <sup>4</sup> Ne sifo reda ambarera, ne jovereghe fonja jinarera,  
sifo aminda ne rea ari dae kotisera, isambu soesa tefo arira.
- <sup>5</sup> God, Jacob tumonde bainghedo ghusira aimi maveju ava sonembarira amo, ne ivugaghae irarera.  
A mave nenda gigitari God kena fitarera, nébarago ivugaghae irarera.
- <sup>6</sup> God, utu, enda a eva, kotugo roera ainda jokáda iritirira, isambu nune etiri sirorusira,  
aimi rea ari dae seraera ava, nune edo gherira.
- <sup>7</sup> Nu ijujuse, evetu genembo gitofuimi mema futero, mema itatamuse irera, ava soreraira.  
Kotugo baimara eretafera ainda bayau, nune muturaira.
- BAJARI, nune dibura embo seari dibura do buvututururoro,
- <sup>8</sup> diti digoide seari sifo sevo giraera.  
Evetu genembo gofedo irera, ava, BAJARI nune jighiari eraera.  
Evetu genembo dambugo mo, BAJARI nune dubo buraira.
- <sup>9</sup> Teana embo namondeda reighida irera ava, BAJARI nune kaifa eraira.  
Roriri nenda sasingu babatede nenda sonemba nune eraira.  
O ari ekožo embo da kotari nune eari beje soesa eraira.
- <sup>10</sup> BAJARI mo kini (king) edo evovodae irira. Arie Israel embo, reighi Saion\* ireva,  
nenda God ne evovodae kaifa use irarira.

BAJARI dae sakai saore!

\* **146:10:** Afige, geka eni Saion dae gefusera, tuturo 2:6 duruda tege, garesa! \* **147:7:** Afige, geka eni gita o uka dae gefusera, tuturo 32:2 duruda tege, garesa!

## 147

*God Fakina Isambu Da Tofo, Aindae Sakai Saore!*

- <sup>1</sup> BAJARI dae sakai saore! Ainda susu mo,  
namondeda God ava yaruimi sakai sise sari mo, evevagori!
- <sup>2</sup> BAJARI nune Jerusalem gitofuimi bejisera ava, ari fatonga arira. Israel embo gitofui bambu isera ava,  
sekago bu jovereghe refira.
- <sup>3</sup> Ghamo memai bunedo irera, ainda gambisi ava nune doghedo seari jebugeraera.
- <sup>4</sup> Nu damana nanjogo uju usira ava, setiri siroretiri, isambu nenda javo javo  
nune jijighusira.
- <sup>5</sup> Namondeda BAJARI mo teriago a fakinago bekári.  
Nunda dubo kotari jo maveda tega iraeri.
- <sup>6</sup> Tumo darido irari embo nune soredo jighiari ereraera.  
O eko embo mo, nune endada kambata eraera.
- <sup>7</sup> Nenda bekaimi BAJARI dae aiyakoe sise yaru sevu! Gita\* doruse, nundae yaru gatevu!
- <sup>8</sup> Nune forogaimi utu doghedo simbugeari,  
borija endada dido eari, kunikada eke batuno use vivitigeraira.
- <sup>9</sup> Bao oka da bayau nune muturaira.  
A ogha mamandi bayaudae kori sirurureoro nune unduraira.
- <sup>10</sup> Hosi da tutu ava numokena jo rejo eni iraeri,  
kotugo isoro genembo da fakina aindae,  
nu jo kotae eraira.
- <sup>11</sup> O mave nundae igheghi use,  
nu kakara eraera aikena, ivuga eraira.  
Kau daba aminga ava, mave nunda dubo bari a kavevera tumonduse irera, nendae ivuga eraira.

- 12 Arie! Jerusalem embo, BAJARI dae sakai sevu!  
Saion† aminda ireva, nenda God dae sakai sevu!
- 13 Ai resira amo, nenda furuda guru mane ava isambu nune kaifa urureari eveva irá gheraeva.  
Nenda natofo aminda isambu, nune esimbugeraira.
- 14 Nenda reighida tano nune kaifa urureari, gitofu terari manamana use irá gheraera.  
Nenda farava vuji garigarigo ava nune futurureari, inonoda budo gheraeva.
- 15 Nune endada nunda uju ava siro-rare dae seari  
nunda uju seraira ava, totoi nembo siroreraira.
- 16 Aisi (ice) yaurago ava nune muteari borija dirarigo use vose enda afuregeraira.  
Sifo daba daba aisi muteari, mungaghae vose avegha fonja raraghari ghedo  
enda afurugeraira.
- 17 Nu borija dombu eni aisi babai yaurago ava averegeari jeviri da udumu aminga ava vose faseraira.  
Yaura nune nanjigo muturaira, mave ainda jokáda fetari jo inono iraeri.
- 18 Avata nune seari aisi amo tiveraira. Yaura vevera sumbare dae seari tivedo uvu sumburaira.
- 19 Nunda geka nunda natofo Jacob da sasingukena mutudo gheraira.  
Nunda ijuga kotugo Agho Dari ghaseari nunda natofo Israel embo buraera.
- 20 Nu oro mendenidae jo amingaeri, nunda Agho Dari ne bunariri.  
BAJARI dae sakai saore!
- 1 BAJARI dae sakai saore!  
Ne utu iká bekáda iritireva, aimi utudaghe BAJARI dae sakai sevu!
- 2 Nunda aneya mane isambu, nunda isoro embo utuda ireva, nunda dae sakai sevu!
- 3 Iji nengae tambunoghae, nundae sakai sevu! Damana mane jaraghuse nundae sakai sevu!
- 4 Utu iká bekáda kotugo borija utu ikáda jungedo irira, aimi nundae sakai sevu!
- 5 Ne isasambu BAJARI da javo jighovo erare dae resena!  
Ainda susu mo, nune setiri, ne sirorusevu.
- 6 Nunda sarida, ne nenda vasada siroredo, evovodae aminda iritirera.  
Nu nange setiri fetirera, ainda geka ava ne jo bu fugae arera.
- 7 Enda emindaghe, eva da oka mane, kotugo karaje kafuru jokáda gambauva iritirera aimi, BAJARI dae sakai sevu!
- 8 Biria barara, borija dombu eni aisi yaurago diraira,  
a kotugo yaura vovoga isambu ne nunda sari ava ningiraeva.
- 9 Enda jiro fumbari, doriri mane, taima da ika mane,  
kotugo mindari vuji da ika mane nanjogo, aimi nundae sakai sevu!
- 10 Sino fuka tamo dari tamo dae isasambu, jingabu, sivorokororo, kotugo rika mane aimi nundae sakai sevu!
- 11 Kini mane isasambu, natofo nanjogo ireva, gavana mane,  
sabua kokotofu nanjogo ireva isasambu aimi, nundae sakai sevu!
- 12 Ade mose, yarata seka bajari, evevetako embabako,  
kotugo sasingako barago isasambu aimi nundae sakai sevu!
- 13 Ne isasambu BAJARI da javo jighivo erare dae resena!  
Nunda javo mo, javo isasambu ainda iká bekádari.

## 148

*Genembo Eni Roera Nanjogo Utuda, Endada Evada Irira Aimi God Dae Sakai Saore Dae Resira.*

† 147:12: Saion dae gefusera, tuturo 2:6 duruda tege, garesa!

- Nunda duró mo, utu enda ainda iká bekádari.  
 14 Nunda dubo bari natofo Israel embo mo, nune etiri fakina edo irera.  
 Susu aindae nunda natofo isas-ambukena resena,  
 BAJARI dae sakai sevu!

## 149

*Tafaroro Use, BAJARI Dae Sakai Saore!*

- 1 BAJARI dae sakai saore!  
 Arie, endada evetu genembo isambu, BAJARI dae yaru seka sevu!  
 Nunda natofo tafarorodae totorugarera,  
 ainda jokáda nunda javo jighoro erare!  
 2 Israel embo, nune setiri siroruseva aindae, ivuga evu!  
 Ainda susu mo, Saion\* embo nu nenda kini (king) edo irira aindae, gogho edo,  
 divu fusedo ghevu!  
 3 Divu fusedo ghuse, nunda javo jighivu erare!  
 Sino da dukaimi gita† da javimi nundae sakai saore!  
 4 Ai resira amo, BAJARI nunda natofo dae ghamo buraira.  
 Nu tumbari embo ava binóde aoro dae sise, nenda gitofu sosighi eraera.  
 5 God da natofo gitofu da vasa sosighi usera aindae, ivugai jarutuse, tumba soró aminda yaru ivugai roro bambarera.  
 6 God dae sakai koko fuge sise, saoro dae resena.  
 Nenda isoro da kaiya dika soveni soveni siverego ungoi bambu jighirise,  
 7 oro mendeni ava atai duboda fatido, natofo mendeni daoro ghamo barera.  
 8 Ainda natofoda kini (king) kokotofu ava seinimi bundarera.  
 Nenda babojegari seini auri arimi bundarera.

\* **149:2:** Afige, geka eni Saion dae gefusera, tuturo 2:6 duruda tege, garesa! † **149:3:** Afige, geka eni gita o uka dae gefusera, tuturo 32:2 duruda tege, garesa! \* **150:3:** Afige, geka eni gita o uka dae gefusera, tuturo 32:2 duruda tege, garesa!

- 9 God da sari ava use, ne oro mendeni ava daoro ghamo barera.  
 Setena amingarera aimi God da natofo da duró isagha arira.  
 BAJARI dae sakai sevu!

## 150

*BAJARI dae Sakai Sari Yarure.*

- 1 BAJARI dae sakai sevu!  
 God nunda Kambo Kakara jokáda irira, nundae sakai sevu!  
 Nu utuda irise, nunda fakina ijugeraira aindae, nundae sakai sevu!  
 2 Nunda ari fakina rea edo ghusira aindae, nundae sakai sevu!  
 Numo teria bekári aindae, nundae sakai sevu!  
 3 Tavuya bu fusise, nundae sakai sevu!  
 Gita\* dombu eni dombu eni roera mendeni avavaga bu doruse, nundae sakai sevu!  
 4 Divari sino bu doruse ivisa use, nundae sakai sevu!  
 Sino (guitars) bu doruse, a feku fusise, nundae sakai sevu!  
 5 Roera ghasaghasa, baighara avavaga bu ivisa use, nundae sakai sevu!  
 Roera eni simbaro (cymbals) seraera, mereki da kaugo ava ungo soveni-soveni bu doruse, fumbu aruguse,  
 nundae sakai sevu!  
 6 Evetu genembo, sino fuka, ã roera jebuga irise,  
 ghamo asegeraera isambu, nundae sakai sevu!  
 Bajari dae sakai sevu!

## Matthew Kakara

Namondeda ‘Gospels’ isambu, avononde nakári, Matthew, Mark, Luke, a John. Matthew, Mark, a Luke nenda geke giti gefuseri. O John mo, nunda geke amboda beká gefusira. Evetu genembo digari erekotera amo: buku emo Iesu da ambo jimbi Matthew (o Levi seraera) nune gefusira. Iesu da sifo aminda, evetu genembo totofo kivo use, geke ‘na’ o ‘namane’ jo gembudo bukuda fitoro terae edo ghusira. Avata namonde oroko jo amingae eraera. Namonde kiki dise, totofo seraera amo, namondedae sedo, dambu ‘na’, ‘namane’, o ‘namonde’ gemburaera. Ava sedo, Iesu da ambo jimbi usera, ainda geke Korafe-Yegha aimi jovereghusera amo, Matthew mo nemonde dabade iriari. Ava kotise, namane dambu ‘na’, ‘namane’, o ‘namonde’ gefuseri.

Jusi embo da kini (king) anakora ireira, javo David, ainda imendi eni amboda foa natofu kaifa arira, amo Iesu ri. Ava ijugari dae sedo, Matthew nunda geke evia gefusira.

*Matthew Geka Gefusira, Ainda Mendo Mendo Mo Eviri.*

1:1–2:23 Iesu nange sirorusira.

3:1-12 John Bafaito Ari Kato saramana edo ghusira.

3:13–4:11 Iesu bafaito etiri ainda amboda, Satan ira Iesu dederusira.

4:12–18:35 Iesu Frovensi Galilee aminda deinghuse, vironu sedo ghusira.

19:1–20:34 Iesu Frovensi Galilee ghedo, ira Jerusalem buvurusira.

21:1–27:66 Fura Kakara (Holy Week) aminda, rejo ava sirorusira.

28:1-20 Iesu ambarida ghe jebuge eredo, nunda natofokena isagha etiri, ne gosuseri.

*1:1-17 Iesu Keriso Da Nombuamaneri.*

*(Luke 3:23-38)*

<sup>1</sup> David nengae Abraham ghae da imendi, Iesu Keriso ri. Nunda nombuamane da kiki mo eviri.

<sup>2</sup> Abraham da mandi mo Isaac ri. Isaac da mandi mo Jacob ri. Jacob da vide jamena mendeni, ne Judah de dabade siroruseri.

<sup>3</sup> Judah da vide jamena etoto naká, Perez nengae Zerah ghaeri. (Perez nengae Zerah ghae da noi javo mo, Tamar ri.) Perez da mandi mo Hezron ri. Hezron da mandi mo Ram ri.

<sup>4</sup> Ram da mandi mo Amminadab ri. Amminadab da mandi mo Nahshon ri. Nahshon da mandi mo Salmon ri.

<sup>5</sup> Salmon da mandi mo Boaz ri. (Boaz da noi javo mo, Rahab ri.) Boaz da mandi mo Obed ri. (Obed da noi javo mo, Ruth ri.) Obed da mandi mo Jesse ri.

<sup>6</sup> Jesse da mandi mo David ri. Nu namonde Israel embo da kini (king) nune usira.

David da mandi mo Solomon ri. (Solomon da noi mo, giti Uriah kena vai edo iriri, David saghimbe rurusira).

<sup>7</sup> Solomon da mandi mo Rehoboam ri. Rehoboam da mandi mo Abijah ri. Abijah da mandi mo Asa ri.

<sup>8</sup> Asa da mandi mo Jehoshaphat ri. Jehoshaphat da mandi mo Joram ri. Joram da mandi mo Uzziah ri.

<sup>9</sup> Uzziah da mandi mo Jotham ri. Jotham da mandi mo Ahaz ri. Ahaz da mandi mo Hezekiah ri.

<sup>10</sup> Hezekiah da mandi mo Manasseh ri. Manasseh da mandi mo Amon ri. Amon da mandi mo Josiah ri.

<sup>11</sup> Josiah da vide jamena mendeni, ne Jechoniah de dabade siroruseri. Sifo aminda, Babylon emboimi fera namonde Israel embo da abumane ava, sosighi edo nenda reighi Babylon aminda budo iseri.

<sup>12</sup> Budo ero, Jechoniah da mandi Shealtiel aminda sirorusira. Shealtiel da mandi mo Zerubbabel ri.

<sup>13</sup> Zerubbabel da mandi mo Abiud ri. Abiud da mandi mo Eliakim ri. Eliakim da mandi mo Azor ri.

<sup>14</sup> Azor da mandi mo Zadok ri. Zadok da mandi mo Achim ri. Achim da mandi mo Eliud ri.

<sup>15</sup> Eliud da mandi mo Eleazar ri. Eleazar da mandi mo Matthan ri. Matthan da mandi mo Jacob ri.

<sup>16</sup> Jacob da mandi mo Joseph ri. Joseph mo nu, Iesu da noi Mary da nuvuri. Iesu resena eindae, natofoimi seraera, "God Genembo eni mutari sisira amo, numori," aminge seraera.

<sup>17</sup> Avori, Abraham tano ghe fira David kena buvurutusira ainda soro aminda, Iesu da nombuamane 14 ava sirivo udo fuseri. Tano David tano ghe fusira aminda, Babylon emboimi fera namonde Jusi embo da abuamane ava sosighi usera, ainda soro aminda barago, Iesu da nombuamane 14 ava sirivo udo fuseri. A kotugo, sifo aminda ghedo fira Iesu sirorusira, a barago, nunda nombuamane 14 ava sirivo udo fuseri.

*1:18-25 Iesu Nange Nange Sirorusira, Amo Eviri.  
(Luke 2:1-7)*

<sup>18</sup> Iesu Keriso nange nange sirorusira, amo eviri. Iesu da noi Mary ava, genembo Joseph kena datu didighuseri. Datu dighero, nengae nunda nunda irise, Mary nu Asisi Kakara da fakinaimi kauri usira ava, itatamusira.

<sup>19</sup> Mary nu kauri etiri gido, nunda datu genembo Joseph, bune Jaredo Mary doyari kotisira. Avata nu genembo evevari, a nu sifo ghousa koto-fuko da ari ava edo ghusira. A gido, erá meka geure dae sise, nu ufena doyari kotisira.

<sup>20</sup> Nu ava kotise, aturu usira. Aturuda, aneya numokena isagha etiri gosusira. Giri, aneya Joseph kena sisira, "David da imendi, iresa. Ninda datu gagara Mary, ava fitarésa! Jo oju ae aresa. Ainda beká mo: nu jo emboroda kauri aeri. Nu Asisi Kakara da fakinaimi, kauri edo irira.

<sup>21</sup> Nu mandi fumbarira amo, nunda javo Iesu, ava jighareva!

(Javo Iesu da tuka mo: 'Sari Jebugari Katori'.) Iesu jighareva, ainda beká mo: nunda natofo da ari ekoko da bouvu, nune fumbarira," aminge sisira.

<sup>22-25</sup> Setiri dadabetiri, Joseph diti fangedo erorusira. Eredo, Bajari da aneya rea numokena sisira ava use, Mary fifitusira. Fifitusira avata, nengae jo dabade avae irise, nu mandi fufusira. Fumbiri, Joseph mandi ainda javo Iesu jijighusira. Ari evia sirorusira amo, jo tefo siroraeri. Susudae sirorusira. God nu rea nunda ferovetakena setiri gefusira, ava beká are dae sedo sirorusira. God setiri, geka gefusira amo eviri:

"Gagara seka eni genemboghae jo avae irise, kauri edo mandi fumbarira.

Fumbari, natofo mandi ainda javo Emmanuel jigharera. (Emmanuel da tuka mo: 'God Namonde Dabade Irera'.)"

## 2

*2:1-12 Kokotofu Mendeni Iji Vitari Da Ghedo Fuseri.*

<sup>1</sup> Iesu nu frovensi Judia aminda, reighi javo Bethlehem ainda jokáda sirorusira. Genembo javo Herod, nu kini (king) edo frovensi Judia, nune kaifa edo ghusira. Iesu siroretiri ainda amboda, gegenembo mendeni damana da aito ava gi kasama edo ghusera aimi, iji vitarikena ghedo fera, reighi Jerusalem aminda buvudo

<sup>2</sup> ategi useri, "Kokoi Jusi embo da kini (king) ari dae sedo, siro-rumutara amo, redari? Nunda damana iji vitarikena ominda, vivitiri gido, namane numo tambudo tumonde bainghari dae sedo referere," aminge siseri.

<sup>3</sup> Aminge setero, Kini (King) Herod manamana usira, Jerusalem embo isambude dabade.

<sup>4</sup> Manamana edo, Herod setiri fristi+ da babojegari, Moses da Geka ijuga kakatode+ dabade fera torugetero, Herod nemokena ategi



usira, “God Genembo eni dirigari furare dae sisira amo, reda siroraeti?” aminge sisira.

<sup>5</sup> Aminge setiri, ne siseri, “Nu frovensi Judia ainda jokáda, reighi Bethlehem aminda siroraeti. God setiri nunda feroveta eniimi geke aindae, eminge gefusira:

<sup>6</sup> ‘Frovensi Judia aminda, reighi Bethlehem ainda bajari jo kitako iraeri. Frovensi Judia ainda babojegari mendeni, ne jo numongo iraeri.

Ainda beká mo: Bethlehem jokáda Bajari tomanako eni siroredo, nanda natofo Israel embo kaifa arira.’”

Fristi+ da babojegari a Moses da Geka ijuga kakato+, aminge siseri.

<sup>7</sup> Setero dadabetiri, Herod ufena aghi etiri, kasama kakato iji vitarikena ghedo fusera amo, fera Herod de dabade geke siseri. Kokoi da damana nanjigo isagha etiri gosusera ava, nene setero Herod niningsira.

<sup>8</sup> Ningido, ne diriguse sisira, “Yasivu, tava e gogoghombedo kokoiá tambove! Tambareva amo, fuvu saovo, nambarago yama kokoiá tambudo tumonde bainghaonasi!” aminge sisira.

<sup>9</sup> Setiri, ne Herod do eredo era soroda, damanaá sekago gosuseri. Damana, ne giti nenda reighi iji vitarikena aminda gosusera, daba ava gosuseri. Gido, damana da amboda amboda udo iseri. Era, damana mo, kokoi da irari vasa ainda ikáda jaraghiri gosuseri.

<sup>10</sup> Damana aminda jaraghiri gido, ivuga ambari ava useri.

<sup>11</sup> Ivuga use, kambo aminda teredo mandia noi Mary ghae gosuseri. Gido, kauboi dadarigedo, mandia tumonde bainghuseri. Amingedo, nenda javo afigedo, joba mandikena

futuseri. Auri ‘gold’, ika javo frankinsens (frankincense) ainda muka, a ika eni javo moor (myrrh)<sup>11</sup> ainda muka ava futuseri.

<sup>12</sup> Mutudo, ne aminda avise aturu useri. Aturuda God nemokena sisira, “Ne jo Herod kena jovereghe yae areva. Ne Herod dodo, emboro eninda yasivu!” aminge sisira. Setiri ningido, ne aminguseri.

*2:13-15 God Setiri Joseph Noaroghae, A Nenda Mandide Eredo, Reighi Egypt Aminda Iseri.*

<sup>13</sup> Kokotofu eredo ero, Joseph aturu usira. Aturuda, Bajari da aneya numokena isagha edo sisira, “Eredo, nearo mandighae budo, reighié dodo, Egypt aminda sumbu yasivu! Aminda buvudo irovo, amboda saono jovereghe furareva. Ainda beká mo, Herod mandia dari ambare dae tava erira.”

<sup>14</sup> Aminge setiri, Joseph eredo noaro mandighae budo, tumba daba aminda reighi Egypt iseri.

<sup>15</sup> Era buvudo aminda irero, Herod ambiri gido ainda amboda, jovereghe fuseri. Bajari setiri ne amingusera amo, jo tefo aeri. Nunda geke rea setiri feroveta eniimi gefusira ava, beká are dae sedo, nune setiri ne aminguseri. Nunda geke ferovetakena setiri gefusira amo, eviri:

“Nanda Mandi dae kori seteno, Egypt ghedo buvudo fusira,” feroveta aminge gefusira.

*2:16-18 Isoro Kakato Ne, Bethlehem Da Sasingu Kikitako Ava Detero Amomonjeguseri.*

<sup>16</sup> Herod kokotofu iji vitarida ghe esa fera numo dederusera, ava kasama edo, janje eko usira. Janje eko etiri, reighi Bethlehem a reighi mendeni ainda tinguda irera, ainda vide jamena ghaeko etoto jo darigae

<sup>11</sup> **2:11:** Roera eni tamo foyago da gekaimi ‘frankincense’ seraera amo, nu ika kitako ainda mukari. A roera eni javo ‘moor’ (myrrh), ábarago ika kitako ainda mukari. Ika etoto naká resena einda tamo ava jeoro, muká buvudo dingheari budo, orivi da muká ainghae dabade baingoro edo aimi, tamo a roera daveraera. Muká ainda muno eveva beká, ava sedo nunda mino mindafu bekári. Sifo aminda, ne kokotofudae joba mutari dae use, roera avavaga mutudo ghuseri. Avori, kokotofu ne Iesu kakara use, roeraá numokena futuseri.

iriara, ava daoro amboro dae sisira. (Kokotofu damanadae rea Herod kena sisera ava kotise, nu ghaeko etoto sisira.)

<sup>17</sup> Setiri amingero, feroveta Jeremiah rea sisira ava, sirorusira. Jeremiah nu eminge sisira:

<sup>18</sup> “Reighi Rama aminda, dimbia sorara ero nininguseri.

Novia Rachel nunda sasingudae dubo mema use, sorara janjagu usira.

Nunda sasingu isambu amomonjegusera aindae, dubo mema fira nu fure gagojusira.

Mave foa nu jo eghovo dari irae beka ava usira,”

Jeremiah aminge sisira.

*2:19-23 Joseph Eredo Mary Nengae Iesu Ghae Bu Jovereghe Fera, Reighi Nasareth Aminda Buvurutuseri.*

<sup>19</sup> Joseph nu reighi Egypt aminda iriri, Herod ambiri ainda amboda, Joseph aturu usira. Aturuda, Bajari da aneya sekago numokena isagha edo,

<sup>20</sup> geke sisira, “Evetu genembo, mandi daoro ambare dae kotisera amo, ambududuruseri. Ava sedo, eredo nearo mandighae budo, reighi tomanako Israel aminda, jovereghe yasivu!” aneya aminge sisira.

<sup>21</sup> Setiri, Joseph eredo mandia noighae budo, nemonde jovereghedo reighi tomanako Israel aminda iseri.

<sup>22</sup> Archelaus nu, numamo Herod da vasa budo kini (king) edo, reighi tomanako Israel da frovensi eni javo Judia ava, nune kaifa edo ghusira. Ava ningido, Joseph aminda anumbari oju usira. Oju use iriri, aturuda, geke mendeni ijugetero ningido, eredo noaro mandighae budo, nemonde frovensi Galilee aminda iseri.

<sup>23</sup> Era, reighi Nasareth aminda dighi anumbuseri. Joseph nu jo tefo amingaeri. God nunda geke ferovetakena setiri gefusera, ava beka sirorare dae sedo, God setiri Joseph amingusira. Feroveta rea gefusera amo, eviri:

“Natofoi nundae, ‘Nu Nasareth embori,’ sarera.”

aminge gefuseri.

### 3

*3:1-12 John Bafataito Ari Kato Aimi, Bajari Da Emboro Rerebusira.*

*(Mark 1:1-8; Luke 3:1-18; John 1:19-28)*

<sup>1</sup> Ainda amboda, John Bafataito Ari Kato ira reighi, uvu a evetu genembo irae da vasa frovensi Judia aminda, tuturo edo vironu sedo ghusira.

<sup>2</sup> Vironu eminge sedo ghusira, “God nunda natofo+ kaifa ari da sifo ojighira utuako erira. Ava sedo, fuvu eminda, nenda ari ekoko vujegedo doyove!” aminge sedo ghusira.

<sup>3</sup> Feroveta Isaiah anakora beka nunda buku jokada John da saramana aindae, eminge gefusira:

“Mave reighi uvu a evetu genembo irae da vasa aminda fetirise, beka fainghedo geke resira:

‘Bajari da emboro rerebevu dambu are!’ ”

aminge gefusira.

<sup>4</sup> John nu sino fuka javo kamero (camel), ainda anoso ava firedo, asugedo ghusira. A nunda ifu dighari barago, kau daba ava edo, dighido ghusira. John nu aminda irise, sisi a finje ava, bayaudae rise ira ghusira.

<sup>5</sup> John nu vironu sirureari, evetu genembo isambu eredo, nenda frovensi Judia da reighi mendeni, nenda reighi Jerusalem, a kotugo nenda reighi mendeni uvu Jordan tingu aminda ghedo foa John kena totorugedo ghuseri.

<sup>6</sup> Totorugedo, nenda ari ekoko vujegeero, John ne uvu Jordan aminda bafataito edo ghusira.

<sup>7</sup> Umbu eni, Moses da Geka kaifa kakato+ a Sadusi embo+ mendeni, ne dabade fera, John nemo bafataito are dae sedo totorugetero gido, nu

eminge sisira, “Ne Satan da sasinguri.<sup>7</sup> Ne na jo derae areva. Ne dubo jo jovereghae ireva. God nenda ari ekoko aindae, janje eko use mino mutari erekotira ava, ne jo reda darige yae areva.

<sup>8</sup> Ágido dubo jovereghe veka eveva use irivu! Amingururovo gido, ne dubo joveregheteva, ava God a natofu isambu kasama arera.

<sup>9</sup> Erá eminge seove, ‘Abraham namanenda abua gido, God namane uju eraira,’ aminge erá seove! God nu uju aetira amo, nu sari ghamana iritirira eimi, Abraham da sasingu jinaeteri. God jo evetu genembo da oróda, jo kotae eraira. Maveju Israel embo o oro eni amo, God jo kotae eraira.

<sup>10</sup> God nu, ika karivakoi susuda jari dae, simbugedo refira. (Ika resena emo, nemori.) Ika vuji eveva jigharira, a nu irarira. O jo eveva jighae arira amo, God ika amo jedo avarakada dungari avarira.

<sup>11</sup> Nenda dubo jovereghari da tano ava ijugari dae sedo, ne tefo uvu vanemboimi eraena. Avata Genembo eni, nanda amboda refira amo, nu nenda mendeni ava, Asisi Kakara nengae avarakaghae aimi bafataito arira. Nu genembo teria bekári. Na jo numongo iraeri. Na taká sabua+ bekári.

<sup>12</sup> Genembo amo, nu vare numamo eninda kaugori. Nune farava veka budo, soro ari dae sedo, simbugedo refira. Nu soro edo farava da beká ava simbuge budo, nunda kamboda fitari irarira. O veka da anoso nengae farava da ifu amo budo, avarakada fugari vosedo evovodae aminda irarira,” John nu Moses da Geka kaifa kakato+ a Sadusi embo+, nemokena aminge sedo ghusira.

*3:13-17 John Nu Iesu Ava Bafataito Usira.*

*(Mark 1:9-11; Luke 3:21-22)*

<sup>13</sup> Sifo aminda, Iesu frovensi Galilee aminda ghedo ira, uvu

Jordan aminda, John kena buvurusira. Buvudo, numokena sisira, “Namo bafataito aso dae refena!” aminge setiri,

<sup>14</sup> John nu bureguse sisira, “Nane, ni bafataito aono dae resesa. Amo jo inono iraeri. Geka bekári: namoá, nine bafataito aetesi,” aminge sisira.

<sup>15</sup> Setiri, Iesu mino sisira, “Avata do, refira ava furare! Ni, na bafataito aresa! Aminguse, nangae God da uju ava arera,” Iesu aminge setiri, John ‘avori’ sedo, nu eredo Iesu bafataito usira.

<sup>16</sup> Etiri dadabetiri, Iesu uvuda ghe vivitiri ainghae dabade, utu afigetiri, Asisi Kakara kau, ribo avavaga isagha edo numokena vovosusira. John nu gosiri, vose fira Iesu kena asugusira.

<sup>17</sup> Asugetiri, beka utuda ghe isagha siri ne nininguseri, “Emo nanda dubo bari Mandiri. Na, nundae ivuga beká use, aiyakoe resena!” geke aminge setiri dadabusira.

## 4

*4:1-11 Satan Nu, Iesu Da Fakina Dere Gari Dae Usira.*

*(Mark 1:12-13; Luke 4:1-13)*

<sup>1</sup> Ainda amboda, God da Asisi imi Iesu unumbe budo ira, reighi uvu a evetu genembo irae da vasa aminda isira. Satan foa nunda fakina ava dere gare dae sedo, budo isira.

<sup>2</sup> Ira buvudo aminda irise, sifo a tumba 40 ainda jokáda, Iesu nu bayau eni jo mindaeri. Aminguse, ighoi itatamiri,

<sup>3</sup> Satan fira numokena sisira, “Ni God da Mandi iraresa amo, se ghamanaé farava jinari mindase!”

<sup>4</sup> Aminge setiri, Iesu mino sisira, “God da Geka eminge resira:

‘Evetu genembo oka bayau vanembo kotarera amo, God da jebuga beká jo tambae arera.

God da Geka rea resira aimi, evetu genembo jebugarera.’ ”

Iesu aminge sisira.

<sup>7</sup> **3:7:** Tuturo eminda, ekaresia+ da babojegari a kasama kakato mokogo erekotera amo, eminda Satan dae sise resira. Ava sedo, namane tamo foyago da geke ‘snake’ dodo, Satan da javo isagha sisiri.

<sup>5</sup> Setiri dadabetiri, Satan nu Iesu unumbe budo, God da reighi kakara Jerusalem aminda ira teredo, God da Kambo+ ainda enoda viti ira fetedo,

<sup>6</sup> Satan jovereghe Iesu kena sisira, “Ni God da Mandi iraresa amo, jaunghe gaone! Jaunghaso dae resena ainda susu mo, God da Geka eminge resira:

‘God nunda aneya, ni kaifa aoro dae sari,  
nene ni kaifa ururoro, ni vosiya nenda ungodá desembedo vose fetaresa.

Ninda ata jo ghamanai de fokughuse, jorae arira,’ ”

Satan aminge sisira.

<sup>7</sup> Setiri, Iesu mino numokena sisira, “Resesa amo, geka bekári. Avata vasa eninda, God da Geka eminge resira:

‘Nenda Bajari God ava, jo dere gari dae, ae areva,’ ”

Iesu aminge sisira, numokena.

<sup>8</sup> Setiri dadabetiri, Satan nu Iesu unumbe budo ira, doriri mindafu eni aminda buvurutusira. Buvu aminda fetedo, reighi a frovensi isasambu endada irira, ainda fakina a duro ava ijugetiri gosusira.

<sup>9</sup> Gosiri, Satan sisira, “Iesu, ni kauboi darido na tumonde baingharesa amo, reighi einda duro oroko eregosesa evia, nindae mutono baresa,” aminge setiri,

<sup>10</sup> Iesu mino numokena sisira, “Na dodo yasi! God da Geka eminge resira:

‘Nenda Bajari God nusuka numoá, tumonde bainghuse, nunda uju avanembo areva!’ ”

Iesu aminge sisira.

<sup>11</sup> Setiri ningido, Satan nu dodo iri, aneya mendeni fera Iesu sonembuseri.

*4:12-17 Iesu Tuturo Edo Frovensi Galilee Aminda, Vironu Sedo Ghusira. (Mark 1:14-15; Luke 4:14-15)*

<sup>12</sup> Sifo aminda, Kini (King) Herod setiri nunda mendeni era, John Bafaitaito Ari Kato ava sandi diburada fiftuseri. Etero ava ningido, Iesu eredo frovensi Galilee aminda isira.

<sup>13</sup> Nu reighi Nasareth aminda jo sekago irá ghae edo ghusira. Nu ya reighi javo Kaponiam, aminda irá ghusira. Kaponiam mo, uvu da teria javo Galilee, ainda betuda irira. Namonde Israel embo nunda oro oro aimi enda soro vesa edo rurusera da sifo aminda, namondeda oro etoto, Zebulun a Naphtali ondide dabade, reighi amo nene ruruseri.

<sup>14</sup> Iesu amingusira amo, nu jo tefo aeri. God da feroveta Isaiah rea sisira ava beká are dae sedo, nu amingusira. Isaiah geka sisira amo, eviri:

<sup>15</sup> “Zebulun ondi nengae Naphtali ondighae da reighi ava, Israel embo da gitofuimi sosighi edo bu jighirera. Uvu Jordan beina onakena a emingekena isambu, gitofuimi sosighi edo bu jighirera. Frovensi Galilee da enda isambu, gitofuimi sosighi edo nenda tofodae ruruseri.

<sup>16</sup> Gitofu frovensi Galilee aminda tumbaghae iriara ava, ne usasa tomanako gosuseri.

A mendeni ambari dae uroghe usera nembarago, God da usasa jaraghiri gosuseri.”

God setiri Isaiah aminge sisira. Ainda beká mo: Iesu amboda foa vironu sarira, ava kotise sisira.

<sup>17</sup> Sifo aminda, Iesu tuturo edo geka emo vironu sedo ghusira, “God nunda natofo+ kaifa ari da sifo ojighira utua erira. Ava sedo, nenda ari ekoko vujegedo dovu!” aminge sedo ghusira.

*4:18-22 Oka Bambari Kakato Avononde Naká Ava, Iesu Aghi Usira.*

<sup>18</sup> Sifo eni, Iesu nu ira, Galilee uvu da teria irira aminda buvudo, ainda dengesida deinghudo ise, Simon (o Peter seraera) nunda namendi Andrew ghae, ne voto voyuvaimi oka barero gosusira. Nemo oka bambari embori.

<sup>19</sup> Avo gido, nemokena sisira, “Nengae fuvu, namonde dabade irise, dengoro indono ningido, oka bamburaeva aminga ava, nengae

ya evetu genembo unumbedo, God Afakena bu furove!” aminge sisira.

<sup>20</sup> Aminge siri ainghae dabade, nengae javi e eredo nenda voto voyuva aminda dodo, nunda amboda iseri.

<sup>21</sup> Era, Zebedee da sasingu etoto naká, James nengae John ghae, ava tafuseri. Nengae numamode dabade, ghaka+ jokáda voto voyuva toka difero gosuseri. Gido, Iesu nemokena kori siri ainghae dabade,

<sup>22</sup> nengae eredo numamo ghaka+ aminda dodo, Iesu da amboda iseri.

*4:23-25 Iesu Reighi Mendenikena Ise Vironu Sise, Seari Kae Evetu Genembo Jejebugedo Ghuseri.*

*(Luke 6:17-19)*

<sup>23</sup> Iesu frovensi Galilee aminda birurughudo ise, dengoro indari kamboda+ teredo vironu sedo ghusira. God nunda natofo+ nange kaifa eraira, ainda Bino Eveva ava ijuguse seari ningido ghuseri. Aminguse, evetu genembo mendeni kae ekoko dombu eni dombu eni budo iriara ava, seari jejebugedo ghuseri.

<sup>24</sup> Amingiri, nunda bino iri, evetu genembo frovensi Syria aminda iriara, nembargo nininguseri. Ningido, kae evetu genembo Iesu kena budo fuseri. Mendeni mo, sukaruimi asugetero iriari. Mendeni mo, jinongu tambudo ghuseri. A mendeni mo, ungo ata dimbiri iriara ava, isambu unumbe budo fera Iesu kena buvero gido, setiri ne jejebuguseri.

<sup>25</sup> Amingetiri, nunda bino iri, evetu genembo digari ningido eredo, numo gari dae sedo nunda amboda iseri. Frovensi Galilee embo, Frovensi Judia embo (Jerusalem embo ainde dabade), Frovensi Dekapoles embo, a Frovensi Perea embode dabade, isambu totorugedo Iesu da amboda iseri.

## 5

*5:1-12 Dengoro Induduse, Iesu Ivuga Da Susu Ava Ijugusira.*

*(Luke 6:20-23)*

<sup>1</sup> Iesu evetu genembo totorugusera ava gido, nu enda jiro fumbari aminda vitíra anumbusira. Anumbetiri, nunda mendeni fera numokena totorugetero,

<sup>2</sup> nu tuturo edo nemokena dengoro induduse, eminge sisira:

<sup>3</sup> “Evetu genembo mave eminge koteraera: ‘Namokena eveva eni tefori,’ mave aminge koteraera amo, ne endada irise, ivugaghae iraeteri. Ainda beká mo: ne sifo amboda God da vasa eveva aminda teroro, God ne kaifa<sup>3</sup> ururari irarera.

<sup>4</sup> “Evetu genembo mave sorara a dubo memaghae irá gheraera amo, ne endada irise, ivugaghae iraeteri. Ainda beká mo: God ne sifo amboda, eghovo de budo kaifa ururari, ivugaghae irarera.

<sup>5</sup> “Evetu genembo mave enda eminda irise durumugedo, jo totofo nemoá nembo kotae eraera amo, ne ivugaghae iraeteri. Ainda beká mo: God nunda sonemba a esimbugari rea mutari sisira ava, sifo amboda mutari nene barera.

<sup>6</sup> “Evetu genembo mave enda eminda irise geke beká vanembo uju use, ari eveva use irá gheraera amo, ne ivugaghae iraeteri. Ainda beká mo: sifo amboda, ivuga a dubo jamaimi, nenda ghamo joká bedo arira.

<sup>7</sup> “Evetu genembo mave enda eminda irise, nenda kokomanadae joka use sonemberaera amo, ne ivugaghae iraeteri. Ainda beká mo: sifo amboda, God evetu genembo amo joka edo unumbarira.

<sup>8</sup> “Evetu genembo mave enda eminda irise, nenda dubo joká simbugedo, kotari eveva avanembo kotise irá gheraera amo, ne ivugaghae iraeteri. Ainda beká mo: sifo amboda, ne ya God da dombu garera.

<sup>3</sup> 5:3: Afige, **Geka Se Disugari Da Vasa** aminda, geke *Natofo* dae rea gefusera, ava tege garesa.

9 “Evetu genembo mave enda eminda irise, mainungari da emboro ava tava use irá gheraera amo, ne ivugaghae iraeteri. Ainda beká mo: sifo amboda, God nemokena, ‘Ne nanda sasinguri,’ sarira.

10 “Evetu genembo mave enda eminda irise, geka eveva siruroro, o ari eveva ururoro aindae, gitofuimi nemokena fakarago use bouvu futururoro mema itatamarera amo, ne ivugaghae iraeteri. Ainda beká mo: sifo amboda, ne God da vasa eveva aminda ya teroro, God ne kaifa ururari irarera.

11 “O ne namo tumondururovo aindae sedo, evetu genembo mendeni nendae aji sise jijivu sarera, o dedo gaedo ghuse gungubo sarera amo,

12 ne endada irise, ivugaghae iraetevu. Ainda beká mo: ne mema itatamuse, kau God da feroveta mema itatamedo ghusera aminga ava, itatamareva. Amo, evetu genembo mendeni ne God da feroveta aikena, fakarago use bouvu muteoro mema itatamedo ghuseri. Ava sedo, ne sifo amboda God da vasa aminda, mino eveva ava bareva,” aminge sisira.

*5:13-16 Kuristini Ne, Kau Karaje A Usasa Ainda Kaugori.*

*(Mark 9:50; Luke 11:33; 14:34-35)*

13 Aminge sise, Iesu sisira, “Evetu genembo isambu endada irera emo, ne kau bayau okia jokáda vendido itiraera, ainda kaugori. A nemo, kau karaje bayau etoda averegeraera, ainda kaugo ava edo ireva. Karaje bayauda fitido mindiraera aimi, dubo eveva itatameraera. Kau daba aminga ava, ne natofo jokáda ari eveva ururovo gido, evetu genembo isambu, ne God da emboro+ eveva ava kotise, itatamuse irarera. O karaje sasaka edo tive janje dadabarira amo, emboroda fugoro evetu genembo ise kotae fatarera. Kau daba aminga ava, nenda ari ekoko dotutuseva ava, sekago tuturo edo use, ne God doyareva amo,

evetu genembo jo foama nemokena sonemba a eveva eni jo bae arera.

14 “Ne natofo isambu da usasa da kaugo ava edo irevva. Kote givu! Reighi doririrda dighido irera ovia, jo jungari da kaugo iraeri.

15 A kotugo, namonde arivo injibarera amo, jo bu ya ambokena ae arera, o jo bu gagara ae arera. Namonde, emboro ijugari dae sedo, arivo injibe jigheoro jaragheraira.

16 Kau daba aminga ava, erá nanda usasa bu jungeove dae resena. Ari eveva use a geka beká sise, nanda usasa natofo isambu kena ijugururovo nemokena gosuse, God Afa utuda irira, nunda javo jighoro erarira!” aminge sisira.

*5:17-20 God Da Geka Moses Gem-budo Sisira Amo, Namonde Iesu Da Amboda Amboda Use Iraeteri.*

17 Aminge sise, Iesu sisira, “God da Geka Moses a feroveta mendeninde dabade gefusera amo, oroko irira. Erá nandae eminge seove: Iesu nu, God da Geka Moses gefusira ava, sari dadabare dae sedo ojighira, ava erá seove dae sise resena! Na, God da Geka Moses gefusira ava, jo nane saono dadabare dae sedo furaeri. Na ijugaono, Geka gefusira ainda beká ava, sirorare dae sedo refena.

18 Kotovo dae sise, eminge resena. Utu endaghae jo ya tano tambae irari, God da Geka Moses gefusira amo, jo dabako reda kosasaghae arira. God da Geka ainda mendo mendo irira ava isasambu, ainda beká ava sirorari gido, God amboda sari utu endaghae isambu dadabarira.

19 Ava sedo, mave God da Agho Dari da mendo kitako beká eni ava bejise, evetu genembo mendeni nune unumbe bu yarira amo, nu sifo amboda God da vasada, mandi ijoghako beká ava arira. O mave God da Agho Dari ava kaifa use, evetu genembo mendeni amingaoro dae sarira amo, nu sifo amboda God da vasa aminda, genembo kotofuko arira.

20 Moses da Geka ijuga kakato+ a kaifa kakato+, ne God da Agho Dari ava kaifa eraera. Avata ne, jo inononda kaifa ae eraera. Ava sedo, na nemokena eminge resena. Ne, Moses da Geka ijuga kakato+ a kaifa kakato+ rea eraera ava, nene e darigedo, God da Agho Dari kaifa e gogoghombareva. Ne jo amingae areva amo, ne God da vasada jo terovo, nune kaifa ae arira,” aminge sisira.

*5:21-37 Namondeda Dubo Joká Kaifa E Gogoghombaeteri.*

21 Aminge sedo, Iesu sisira, “Abua Moses<sup>21</sup> nu abuanekena geke mendeni mendeni sisira ava, ne kasama ereva. Aina geke eni mo eviri:

‘Erama komana deóso ambeure! Komana daso ambarira amo, ni sandi bu ya jaji (judge) da dombuda koto arera,’

Moses abuanekena aminge sisira.

22 Avata na oroko nemokena eminge resena, ningivu! Mave nunda namendighae beisiga use, janje eko arira amo, God nunda ari eko oimi, kau komana dari ambari da kaugo ava kotarira. Nu aindae sedo, amboda numokena ategi arira. O mave nunda namendikena jijivu sarira amo, nu budo ya kaniseremane da dombuda koto arera. O mave jijivu sise nunda namendikena sarira, ‘Nane saono bu mindase! Guka dagaya futo!’ aminge sarira amo, nu ari ekoko mino mutari vasa a aindae avaraka ava utua beká arira.

23 Erá amingava sireure dae sise, ni emingatesi! Ni olta (altar) da

dombuda fetedo, ninda joba God kena mutari dae use, dara eni ninda namendikena usesa ava kotaresa amo,

24 eveva mo, ninda joba olta (altar) da dombuda fiti dodo, ni jovereghe ya buvudo, ninda namendighae ategi edo mainungareva. Aina amboda, ni sekago jovereghe foama teredo, ninda joba God kena mutaresa.

25 “O ninda komana nimokena koto ari sarira amo, emboroda tambudo ategi use, geke eveva sise mainungareva. O jo amingae aresa amo, ni ya koto vasada buvaso, komana ni budo jaji (judge) kena mutari, nune budo sari, forisi (police) ni budo ya diburada fitarera.

26 Amingarera amo, ni jo totói doyoro buvudo ya dubo jama ae aresa. Jaji ninda dara da mino rea sarira, ava aso dadabari, amboda foa buvaresa.

27 “Moses geke eni sisira ava, namonde ninigudo refera. Amo eviri: ‘Kombo yagera ava erá eove!’ aminge sisira.

28 Avata na oroko nemokena eminge resena, ningivu! Mave fuge evetu eni gido, yagera ari dae kotarira amo, a darari. Amo, ni aminge kotiruraso, ninda janje jokáda, ari eko anakora sirorarira.

29 Avori, ninda diti gimandukena aimi gosuse, ni ari eko aso sirorarira amo, gunumbe fugaresa. Eveva mo: ni tamo tomanako da roera dabako bu fagedo, iria ambu ya God kena buvaso, nune ni kaifa arira. O ni diti etoto aminge irise, ari ekoko use iria ambudo, ya ari ekoko mino mutari

21 **5:21:** God da Geka Moses imi gefusira amo, Baiboro (Bible) jokáda fitero teredo, buku ghabu soveni ava sirorusira. Buku aindae javo mo: Genesis (Tuturoda), Exodus (Reighida Ghe Ya Buvuri), Leviticus (Levi Ondi+ da Saramana), Numbers (Javo Tegari Da Buku), a Deuteronomy (Agho Dari Sekago Isagha Sisira), Avori, namonde oroko ‘Moses da Geka’ seraera amo, namonde buku 5 setena avanembo kotise, aindae seraera. O Israel embo mo, ne umbu mendeni ‘Moses da Geka’ o tufako ‘Moses’ sedo ghusera amo, ne jo God da Geka Moses gefusira, avanembo kotise, sae edo ghuseri. Nenda kiki mendeni a nenda ijuga kakato mendeni da kotari ábarago kotise, ne aindae ‘Moses da Geka’, o ‘naneanenda agho dari’, o ‘naneanenda kiki’ sedo ghuseri. Avori, eminda tuturo 5:21, a kotugo tuturo 5:27; 5:31; 5:33; 5:38; a 5:43 aindae jokáda, namane Moses da javo isagha gefuseri. Avata, Matthew gefusira amo, nu Moses da javo jo isagha saeri. Nu eminge gefusira, “Naneanenda abuanekena eminge sireureoro ningido ghuseri,” avanembo gefusira. Geke beká: geke eminda teguterera emo, Moses nune gefusira. Namane aindae sedo, Moses da javo isagha gefuseri.

vasa aminda teraresa amo, eko a bouvugori.

<sup>30</sup> O ninda ungo gimandu aimi dara aso, ari eko sirorarira amo, gafuge fugaresa. Eveva mo: ni tamo tomanako da roera dabako bu fugedo, irá ambu ya God kena buvaso, nune ni kaifa arira. O ni ungo etoto aminge irise, ari ekoko use iria ambudo, ya ari ekoko mino mutari vasa aminda teraresa amo, eko a bouvugori.

<sup>31</sup> “Moses Geka eni sisira ava, namonde niningudo refera. Amo eviri:

‘Mave nunda evetu doyarí sarira amo, nu giti nunda geka gembu mutari yari, noaro bu gosururari, nu doyarira,’  
aminge sisira.

<sup>32</sup> Avata na oroko nemokena eminge resena, ningivu! Nearo dara jo ae ava, tefo doyaresa amo, a darari. Ni amingaso, nearo ya genembo enikena vai edo irarira amo, ainda javo yagerari. Amingarira ainda susu nimori.”

<sup>33</sup> “Moses geka eni abuananekena sisira ava, namonde niningudo refera. Amo eviri:

‘Ni Bajari da javoda rea ari saresa amo, amingaresa. Jo doyae aresa.’

Abuanane aminge sedo ghuseri.

<sup>34-36</sup> Avata oroko na nemokena eminge resena, ningivu! Ninda geka tumondaoro dae sedo beka gagojuse, jo Bajari da javoda beka gajae aresa. Ni tefo ‘Ai, amingarena.’ sedo amingaresa, o ‘Tefo, jo ae arena,’

<sup>34</sup> **5:34-36:** Tuturo 34-36 aminda, namane Korafe-Yegha da irari ava kotise, namonde beka gagojuse, ‘Baiboro’ (Bible) seraera, ava gefuseri. O Iesu nu, Jusi embo da irari a kiki kotise, a ne rea sise beka gajedo ghusera, ava kotise, eminge sisira: <sup>34</sup> “Avata, na oroko nemokena eminge resena, ningivu! Ninda geka tumondaoro dae sedo beka gajaresa amo, ni jo Bajari da javoda beka gajae aresa. Ni tofo ninda javoda beka gajaresa. A beka gajaresa amo, ni jo utu da javoda beka gajae aresa. Amo, God da anumba vasari, jo ninda iraeri. <sup>35</sup> A kotugo, beka gajaresa amo, ni jo enda einda javoda beka gajae aresa. Emo God da ata fitari da vasari, jo ninda tofo iraeri. A ni jo reighi Jerusalem da javoda beka gajae aresa. Amo namondeda Kini (King), God Afa nunda reighiri, jo ninda tofo iraeri. <sup>36</sup> Ni jo tofo ninda beo da javoda beka gajae aresa. Ainda beká mo: ni jo saso beo ingago ae arira o furigha vitae arira. Ni jo ainda bajari iraeri.” <sup>38</sup> **5:38:** Afige, **Matthew 5:21** ainda duruda tege garesa.

<sup>41</sup> **5:41:** Sifo aminda, Jusi embo nenda reighi ava, Rome emboimi kaifa edo ghuseri. Avori, Rome embo da agho dari eni mo eviri. Nenda isoro kakatoimi ujuda seari nati embo nenda gugua fumbudo ututu (kilometres) etoto naká jarigaeti.

sedo doyaresa. Ni jo Baiboro (Bible) <sup>34</sup> da javo sise, beka gajae aresa.

<sup>37</sup> Amo, ni eminge saresa, ‘Ai, amingarena,’ o ‘Tefo, jo amingae arena.’ Tufako aminge saresa amo, inono arira. O ni evetu genembo mendeni da javoda beka gajaresa, ainda susu mo Satan ri,” Iesu aminge sisira.

*5:38-48 Mino Mutari Da Gekari.  
(Luke 6:27-30,32-36)*

<sup>38</sup> “Moses<sup>38</sup> geka eni sisira ava, namonde niningudo refera. Amo eviri:

‘Komana nimokena dara arira amo, ni minonda mutaresa. Ni jo kote doyae aresa,’  
aminge sisira.

<sup>39</sup> Avata na, nemokena eminge resena! Mave dara nimokena arira amo, ainda mino jo ae aresa. Ninda sovo gimandukena megha arira amo, jovereghe, umbefukena barago megha are!

<sup>40</sup> Mave ninda tamo asugari kosughe bari dae sedo, ni bu ya koto arira amo, ninda javo desamugedo iraresa ábarago, mutaso barira.

<sup>41</sup> Rome embo da isoro kato genembo eni, nimo tambudo, nunda gugua fumbu yaso dae sarira amo, ni jo ututu (kilometres) etoto<sup>41</sup> avanembo fumbu jarige fitae aresa. Ni ivugaghae sonembuse, genembo ainda gugua ututu (kilometres) avononde avavaga fumbudo, nengae yareva.

<sup>42</sup> O mave nimokena roera enidae benunu sarira amo, tefo mutu bare! A mave roera eni uju ari bu ya edo,



sekago bu foa mutari sarira amo, mutu bare!

<sup>43</sup> “Moses<sup>43</sup> geka eni sisira ava, namonde niningudo refera. Amo eviri:

‘Evetu genembo ni uju eraera amo, ne dubo baetesi. O mave ni imboe eraera amo, nimbarago ne imboe aetesi,’  
aminge sisira.

<sup>44</sup> Avata na nemokena eminge resena, ningivu! Nenda gitofu dubo buvu! Mave nemokena dara eraera, o nendae aji seraera amo, nendae sedo banungevu!

<sup>45</sup> Amingareva amo, ne God Afa da sasingu beká ava areva. Amo, ne kasama ereva: evetu genembo eveva a ekoko ainde dabade, God nunda usasa muteari janimberaira, a boriya muteari diraira. Ne kau daba aminga ava use, evetu genembo eveva a ekoko ainde dabade, veka eveva aetevu.

<sup>46</sup> Evetu genembo mave ne dubo bu-raera, avanembo dubo bareva amo, God aindae ne jo esimbugae arira. Evetu genembo ekoko beká, takesi bari kakato avavaga, ne amingeraera. O evetu genembo ne imboe eraera, ava dubo bareva amo, God aindae ne esimbugarira.

<sup>47</sup> Evetu genembo maveghae komana areva, aikena nembo geka sareva amo, jo nene seka tuturo edo aeri. Evetu genembo mave God da Geka jo ningae irera, nembargo kau daba ava eraera. O nemo, nenda gitofu dubo budo nemonde dabade geka saovo dae sise resena!

<sup>48</sup> Afa utuda irira ai, evetu genembo isambukena veka eveva eraira. Ne kau daba aminga ava, evetu genembo isambukena veka eveva use irareva!” Iesu aminge sisira.

## 6

*6:1-4 Namonde Evetu Genembo Nange Nangedo Sonembaetera, Ainda Geka Mo Eviri.*

<sup>1</sup> Iesu eminge sisira, “Ni erama, natofo nimo sakai saoro dae sise,

evetu genembo sonembeose! God kotise, evetu genembo mendeni sonembari saresa amo, ni junjugai sonembaresa. O natofo gosururoro, ni evetu genembo sonembaresa amo, God Afa, amingaresa aindae, ni jo esimbugae arira.

<sup>2</sup> Evetu genembo mendeni, ne dubo etoto use sonemberaera. Amo ne, dengoro indari da kamboda+ o emboroda ise, makasi embo sonemburureoro, natofo giraera. A nu geka bekári, avata ne jo evetu genembo sonembari dae sise, amingae eraera. Nemo gungubo kakatori! Amo natofo nemoá sakai saoro dae sise eraera. Amingeraera amo, nenda mino mo, evetu genembo nemoá sakai seraera, avakori. Amboda, God Afakena, mino eni jo bae arera.

<sup>3-4</sup> Ava sedo, ni evetu genembo mendeni sonembari saresa amo, ni junjugai sonembaresa. Ninda mendeni a ninda kokomana beká, ne jo kasama ae iroro, evetu genembo sonembaresa. Amingedo, junjugai sonembururaso, God Afa gido, ainda mino eveva ava nimokena mutari baresa,” Iesu aminge sisira.

*6:5-15 Emo Banungari Da Gekari. (Luke 11:2-4)*

<sup>5</sup> Aminge sise, Iesu sisira, “Evetu genembo mendeni nemoá sakai saoro dae sise, natofo gosururoro, ne dengoro indari kamboda+ o emboro dengesida fetirise, banungeraera. Amingeraera amo, nenda mino mo, evetu genemboi nemoá sakai seraera, avakori. Amboda, God Afakena, mino eni jo bae arera.

<sup>6</sup> Ava sedo, ni banungari dae areva amo, ni ya ninda kamboda tere guro gajedo, banungaresa. Ni ditiimi God Afa jo gae eraesa, avata junjugai banungururaso nu gido, aindae mino eveva ava nimokena mutari baresa.

<sup>7</sup> “Eni mo: ni banungari dae areva amo, erá babotuse kotae kotae banungeose! Namonde Jusi embo da gitofu God da Geka jo ningae irera, nene koteraera amo: ne kotae kotae

<sup>43</sup> 5:43: Afige, **Matthew 5:21** ainda duruda tege garesa.

sise, ghousea futo banunguse irarera amo, God nenda geka ningariá koter-aera.

<sup>8</sup> Ni erá amingeose! Ni jo tuturo edo benunu sae iresa avata, God ninda irari anakora gido, nimokena rejo daiva erira ava, nu kasama use irira.

<sup>9</sup> Ava sedo, ne eminge banungareva:

‘Namanenda Afa, utuda iresa!

Ninda javo kakara use jighoro erare!

<sup>10</sup> Utuda ninda uju avanembo siroreraira. Kau daba aminga ava, enda eminda sirorare!

Amingare dae sedo, fu namane kaifa<sup>10</sup> ururaso, namonde irore!

<sup>11</sup> Oroko eminda, namanendae bayau mutaso baore!

<sup>12</sup> Evetu genembo namanekena ari ekoko urureoro, namane gido kote doyerara.

Aminga ava, namanenda ari ekoko eraera amo, kote doyasao dae resera!

<sup>13</sup> Erama namane derarikená budo yeose! A Satan da derari aminda, namanendae kosege fetaetesi!’  
Kau aminge banungevu!

<sup>14</sup> “Avori, evetu genembo nimokena dara eraera, ava kote doyaresa amo, ari ekoko nine eraesa amo, Nimamo utuda irira ai, kote doyarira.

<sup>15</sup> O ni evetu genembo mendeni da ari ekoko jo kote doyae aresa amo, ninda ari ekoko barago, Nimamo jo kote doyae arira,” Iesu aminge sisira.

*6:16-18 Emo, God Tumonduse Bayau Kanangara Ari Da Gekari.*

<sup>16</sup> Aminge sise, Iesu sisira, “Evetu genembo mendeni gungubo ava use, bayau kanangara eraera. Nemo natofo nemoá gido sakai saoro dae sise, amingeraera. Amingeraera amo, nenda mino mo, evetu genemboi nemoá sakai seraera, avakori. Amboda, God kena mino eni jo bae arera.

<sup>17</sup> Ava sedo, ne God kena ya buvari dae sedo, bayau kanangara ari dae areva amo, ne God kotise, junjugai

areva. Jo isagha rovarova ururovo natofo gae arera. Ne bayau kanangara ari sareva amo, eveva mo: ne dombu seghuse, beo gae simbuguse iraetevu!

<sup>18</sup> Erama natofo kasama eore dae sise, amingaetevu. God Afa nu nusuka kasama use, ainda mino eveva ava nemokena mutarira,” Iesu aminge sisira.

*6:19-34 Ni God Tumonde Gogoghombaresa! Jo Ninda Gugua Kotise, Ainghae Tumondae Aresa.*

*(Luke 11:34-36; 12:22-34; 16:13)*

<sup>19</sup> Aminge sise, Iesu sisira, “Erama nenda gugua enda eminda dabade use iriove! Nenda gugua enda eminda dabade use irareva amo, jirikoimi mindarira, karakarajeka arira, a tafasara kakatoimi foama beje bagia arera. Ava sedo, ne enda eminda irise, erá gugua eveva bari dae kotise, dubo mema eove!

<sup>20</sup> Eveva mo, ne God da uju avanembo ururovo gido, ainda beká utuda siroraeti! Utuda mo, jiriko a karakarajeka aimi jo rururari eko ae eraira, a tafasara kakatoimi jo beje bagia ae eraera. Dara avavaga, utuda eni tefori. Ava sedo, ne God da uju avanembo ururovo gido, ainda beká utuda siroraeti.

<sup>21</sup> Ainda beká mo: nenda gugua reda irá gheraira aminda, nenda dubo joká muturaeva. Ava sedo, nenda gugua utuda bari kotareva amo, nenda dubo joká isambu God kena futuse iraetevu!

<sup>22</sup> “Ninda diti amo, inono ninda tamo da arivori, arivo injibeoro jaragheraira, avavagori. Ni gi gogoghombaresa amo, ninda emboro usasa ari garesa.

<sup>23</sup> O ninda diti digoi arira amo, ni tamo isambu tumba arira. Kau daba aminga ava, ninda dubo joká ari ekokoimi bedo arira amo, ni tumba eko beká ainda jokáda iraresa.

<sup>24</sup> “Ni bajari etoto aikena, jo saramana ae aresa. Amingari saresa amo, eni dubo bu gogogho aresa,

<sup>10</sup> **6:10:** Afige, **Geka Se Disugari Da Vasa** aminda, geka *Natofo* dae rea gefusera, ava tege garesa.

eni imboe aresa. Bajari eninda geke ningido, nunda saramana e gogoghombaresa. Aminguse, bajari eninda geke imboe use, nunda saramana imboeghae aresa. Ninda dubo monikena mutaresa amo, God kena jo mutae aresa. O God kena dubo mutaresa amo, moni jo kotae aresa.

<sup>25</sup> “Namonde uvu bayau jo mindae arera amo, ambarera. A namonde tamo asugari bu asugaeteri. Avata na, uvu bayau a tamo asugari dae, erama teria futo koteove dae sise resena. Ainda tuka mo eviri: ninda jebuga mo susuri. Bayau jo susu iraeri. A tamo mo, susuri. Tamo asugari mo, jo susu iraeri.

<sup>26</sup> Rika ghumburaera, ava givu! Ne jo vare je govae eraera, a vuru-kuda bayau jo fitae eraera. Avata God ne kaifa use, nenda bayau muturaira. Avori, God nu rika itako koteraira. Avata evetu genembo mo teriago kotise, tavo e gogogho eraira, ne asisighae ava sedo. Avori, God rika kaifa use bayau muturaira amo, nemokena kau daba aminga ava, bayau mutari bareva.

<sup>27</sup> Geka setena, daba ava sari dae erena. Ni baimara buvari bayau dadabarira aindae, oju use teria futo kotaresa o jo kotae aresa, avata, ninda ambari da sifo furarira amo, ni ambaresa. Ava sedo, ne uvu bayau era' teria futo koteove dae sise resena.

<sup>28</sup> “Kotugo tamo asugari reda bareva aindae sedo, jo dubo mema ae aetevu. Vare joka kote givu! Vare joka mo, jo saramana use fire asugae eraira.

<sup>29</sup> Avata vare joka mo, gari evevago bekari. O Kini (King) Solomon ava kote givu! Nu iti fafode ava sedo, nunda tamo asugari isambu evevatori. Avata nunda tamo asugari jo vare joka amingo iraeri. Vare joka mo, evevago bekari.

<sup>30</sup> Kikisa ava kote givu! Oroko irira. Avata sifode gaforo gharasa ari dungoro avarira. Nu roera veyako

bekari. Avata God nunda gari evevago fiftusira. Ava sedo, kasama evu! God vare joka kote simbugarira amo, nembarago kaifa use, nemokena tamo asugari mutari bareva, ne asisighae ava sedo.

<sup>31</sup> “Ava sedo, uvu bayau reda bu mindareva, o tamo asugari reda bu asugareva aindae, erama dubo mema eove!

<sup>32</sup> (Namondeda gitofu mave God da Geka jo bae irera, ne roera aindae kotise dubo mema eraera.) Avata nemo jo amingae areva. Ainda susu mo: God Afa nenda irari ava gosome, nemokena rejo daiva eraira, nu anakora kasama use irira.

<sup>33</sup> Ava sedo, ne giti nunda saramana a uju ava areva. Amingururovo, uvu bayau a tamo asugari, nune mutari bareva.

<sup>34</sup> “Avori, era' dara amboda furarira aindae kotise, nenda fakina soesa eove! Ainda beka mo: dara amboda kau mavega sirorarira ava, ne jo kasama aeri. Ava sedo, eveva mo: bouvu oroko erefufesa avanembo kotaresa. Redae ni dara amboda kau mavega sirorarira ava kotise, dubo memaghae iraresi?

## 7

*7:1-6 Erama Kokomana Da Ari Ekoko Ijujeove!*

*(Luke 6:37-38,41-42)*

<sup>1</sup> “Era' ninda komana da ari ekoko ijujeose! Amingaresa amo, God ninda ari ekoko barago ijujarira.

<sup>2</sup> Evetu genembo mendeni da ari ekoko ijujaresa amo, God kau daba ava ni ijujarira. A evetu genembo mendenikena mino kau nangego mutaresa amo, God nimokena kau daba avaga mutarira.

<sup>3</sup> A eni mo: erama ninda ari ekoko mindafu irarira amo dotutuse, ninda komana<sup>3</sup> da ari eko kitako ava ijujeose!

<sup>4</sup> Ni redae faragho ninda ditida gae fetirira amo sofughae irise, ni

<sup>3</sup> 7:3: Matthew eminda 'namendi' gefusira. Namane Korafe-Yegha da geke dukadae sise, 'komana' gefuseri.

komanada ditida fonja ava fusaso buvare dae eresi?

<sup>5</sup> Nimo gungubo katori! Faragho ditida fetiriri ainghae iresa avata, nangetiraimi komana da ditida fonja ava fusaso buvare dae resesi? Eveva mo, giti ninda ari eko tomanako ava vujegaso eveva ari gido, amboda ya ninda komana sonembaresa.

<sup>6</sup> “Geka eni mo: namonde roera kakara o roera eveva amo, jo sino fukadae mutae eraera. Ainda beká mo: sino fukakena kotari tefori. Ava sedo, sino fuka roera eveva amo atai fati fetedo, jovereghe namonde gambarira. Kau daba aminga ava, evetu genembo God da Geka imboe eraera aikena, God da roera a Geka jo kotae kotae mutae areva,” Iesu aminge sisira.

*7:7-12 Benunu Saso Afa Mutarira.  
(Luke 11:9-13)*

<sup>7</sup> Aminge sise, Iesu sisira, “God Afakena benunu sareva amo, bareva. Tava areva amo, tambareva. Goinginghareva amo, God nendae guro afigarira.

<sup>8</sup> Ainda beká mo: mave benunu sarira amo, mutari barira. Mave tava arira amo, tambarira. A mave goingingharira amo, God Afa nundae guro afigarira.

<sup>9</sup> Kote givu! Ne mendeni ghaguruderu. Ninda mandi isiadae benunu sarira amo, ni ghamana ava mutaresa, ai?

<sup>10</sup> O okadae benunu sarira amo, ni jingabuá mutaresa, ai?

<sup>11</sup> Tefo, ni jo amingae areva. Ne ari ekoko embori, avata nenda sasingu tavo eveva eraeva. God Afa nu veka eveva bekári. Ava sedo, kau nenda sasingu tavo eveva eraeva aminga ava, mave God Afakena benunu sarira amo, God nemoá tavo e gogoghombuse, roera evevago beká ava mutarira.

<sup>12</sup> “God setiri, Moses a feroveta nene geke rea gefusera, ainda tuka mo eviri:

‘Ni rea evetu genembo nimokena aoro dae koteraesa, kau daba aminga ava, ni nemokena edo ghaetesi!’ ”

Iesu aminge sisira.

*7:13-14 Evetu Genembo Daba Daba Aimi, Jebuga Tambarera.*

*(Luke 13:24)*

<sup>13</sup> Aminge sise, Iesu sisira, “Guro etoto naká ainda geke sari dae erena. Guro eni sokumakori, a eni beraghari. Guro sokumako aminda terari dae fakina evu! Ainda susu mo: guro eni beraghari, a ainda emboro teriari. Ava sedo, evetu genembo digari aminda ya terarera. Avata aminda ya terareva amo, eko tambudo sirivo areva.

<sup>14</sup> O guro eni sokumako irira, aminda yari mo fakaragori. Ava sedo, evetu genembo daba daba aimi ya aminda terarera. Avata aminda ya terareva amo, jebuga evovodae irari ava tuve bareva.

*7:15-27 God Da Sasingu Beká Kau Mavegori?*

*(Luke 6:43-44; 13:25-27; 6:47-49)*

<sup>15</sup> “Kote gogoghombevu! Evetu genembo mendeni nemokena yama, gungubo sise eminge sarera, ‘Naname God da ferovetari,’ aminge sarera. Nenda gari kau evevatori, sifi (sheep) da kakaugori. Avata nenda dubo joká mo, eko bekári, gambari sino da kaugori.

<sup>16</sup> Nenda gari a nenda geke rea sarera amo, isambu eveva vanembori. Avata amo erá koteove! Nenda ari rea arera amo, kote gogoghombuse gareva! Kaura, jo ya asi buaretifa aminda jighido irari, bu mindae arera. A mofi da vuji mo, jo ya ika fokono aminda jighido irari, bu foa mindae arera.

<sup>17-18</sup> Kau daba aminga ava, ika evevai vitarira amo, nu vuji eveva a babaigo jigharira. O ika ekoi vitarira amo, vuji sembae jigharira. Ika eveva aminda, jo vuji eko bambae eraera. A ika eko aminda, vuji eveva jo bambae eraera.

<sup>19</sup> Vare jokáda, ika o roera eni vuji jo jighi gogoghombae arira amo, namonde jeoro gharasa edo aveari dungeraera.

<sup>20</sup> Avori, feroveta setena amo, ne, kau ika vuji jigheari, ika ainda kau mavega kasama eraera aminga ava, nenda ari avega ururoro gido, nenda kau aminda kasama areva.

<sup>21</sup> “Oroko evetu genembo digari namokena kori sise, eminge seraera, ‘Bajari! Bajari!’ seraera, avata jo andae sedo, doyono God da vasada terae arera. Mave God Afa da uju beká ava use irarera ainembo, God da vasa eveva aminda teroro, God ne kaifa<sup>21</sup> ururari irarera.

<sup>22</sup> Sifo aminda, evetu genembo digari namokena eminge sarera, ‘Bajari, namane ninda javoda God da Geka sedo ghuseri. Ninda javoda sukuru ondeoro, evetu genembo da jokáda ghe foa buvudo ghuseri. A ninda javoda tano a ari mendeni mendeni eoro, evetu genembo jo gae iriara ava, nenda gitida siroreari gido dudukughedo ghuseri,’ aminge sarera.

<sup>23</sup> Avata Sifo aminda, na mino nemokena eminge sarena, ‘Na ne erebunena. Yasivu, ajagha fetove! Ne ari ekoko embori,’ aminge sarena.

<sup>24</sup> “Avori, mave nanda geka evia ningido amingarira amo, nu kau genembo eni dubo kotaride amingori. Genembo amo, nu kambo itari dae sedo, vasa eveva tambudo aminda simbugedo, bako ghambu gogoghombe tutumbi darido, ghamana endaghae vendi gaetiri fakara e gogoghombetiri, ainda etoda nunda kambo iti dotiri fetetira.

<sup>25</sup> Ainda amboda, yaura tuturo edo sufiri, boriya tomanako dido usegha buvira, avata kambo amo jo gofaeri, nunda kambo eveva itira ava sedo.

<sup>26</sup> O mave nanda geka evia ningido jo ae arira amo, nu kau genembo eni kotari irae de amingori. Genembo resena emo, nunda kambo ghonesada itira, bako jo ghambu simbugae.

<sup>27</sup> Etiri, amboda yaura tuturo edo sufiri, boriya tomanako dido usegha

bejetira. Beje tutumbi ghambu osin-imbetiri kamboá du de bunununghe fasetira,” Iesu aminge sisira.

*7:28-29 Evetu Genembo Iesu Da Geka Ava Ningido, Kote Gogoghom-buseri.*

<sup>28</sup> Iesu aminge setiri dadabetiri, natofo isambu ningi dudukughuseri.

<sup>29</sup> Ainda beká mo: Moses da Geka ijuga kakato+ dengoro indido ghusera, a kau eniri. O Iesu dengoro indudusira amo, geka nunda faki-naghae dabade sisira.

## 8

*8:1-4 Iesu Setiri Genembo Bedode Amo Jebugasira.*

*(Mark 1:40-45; Luke 5:12-16)*

<sup>1</sup> Iesu eredo, enda fumbari ainda jiroda ghe vose fira iri, natofo digari ambari eko nunda amboda amboda iseri.

<sup>2</sup> Ero, genembo eni bedode aimi, ira Iesu kena buvudo kauboi dadarigedo sisira, “Bajari, na kasama erena, ni uju aresa amo, na saso jebugarena,” aminge sisira.

<sup>3</sup> Setiri, Iesu nunda ungoi sirege tamonda jijighuse sisira, “Ai, na uju erena. Jebugaresa!” Iesu aminge siri ainghae dabade, gambisi dadabetiri jebugasira.

<sup>4</sup> Etiri, Iesu numokena sisira, “Seteno jebugetesa emo, erá osa seose! Ere yasi, fristikena+ ninda tamo ijugaso gari, Moses da Geka aminda, God kena joba rea mutaso dae resira, ava mutaresa! Amin-garesa amo, ni jebugetesa ava, evetu genembo isambu kasama arera,” aminge sisira.

*8:5-13 Iesu Setiri Rome Embo Da Saramana Kato Eni Jebugasira.*

*(Luke 7:1-10)*

<sup>5</sup> Aminge sedo, Iesu ira reighi javo Kaponiam aminda tetetiri, Rome embo da isoro kakato da giti jighari eni fira nu tafusira. Tambudo, benunu sisira,

<sup>21</sup> **7:21:** Afige, **Geka Se Disugari Da Vasa** aminda, geka *Natofo* dae rea gefusera, ava tege garesa.

<sup>6</sup> “Bajari, nanda saramana kato eni kae tambudo, kamboda fasirira. Ungo ata ambiri, dubo mema teriango eretafira,” aminge setiri, Iesu mino sisira,

<sup>7</sup> “Avori, na ya saono jebugarira,” aminge sisira.

<sup>8</sup> Setiri, isoro kakato da giti jighari eminge sisira, “Bajari, ni genembo teriari. Na genembo ijoghakori. Jo nine foa nanda kamboda terari da kaugo iraeri. Na kasama erena, saso jebugari da fakina mo, nimokena irira. Ni taká soka fetedo bekai saresa amo, nanda saramana kato jebugarira.

<sup>9</sup> Na, nanda babojegari da geka ningiraena, kotugo nanda mendeni nanda geka ningiraera. Nanda isoro kato enikena, ‘Yasi!’ sarena amo, yarira. O enikena, ‘Fu!’ sarena amo, furarira. A kotugo, nanda saramana katokena saramana eni are dae sarena amo, nu amingarira.” aminge sisira.

<sup>10</sup> Giti jighari amo, aminge siri nunda geka ava ningido, Iesu dudukughusira. Dudukughe jovereghedo, evetu genembo nunda amboda isera aikena sisira, “Na eminge saono ningivu! Namu irena evia, tumondari kau évavaga ava jo gae iriana ava, nanda tuturoda orokoá eregosenere. Israel embo da jokáda barago, tumondari kau évavaga ava jo gae irena.

<sup>11</sup> Geka emo kote gogoghombaetevu! Namonde Israel embo da gitofu digari, iji vitari a iji vosarikena ghedo yama God da vasa aminda teredo, Abraham, Isaac, a Jacob de dabade anumbaoro, God Afa ne kaifa<sup>11</sup> ururari irarera.

<sup>12</sup> Avata, Abraham da sasingu mendeni God da vasada ya teraetera avata, ne tumondari tefo gido, God ne ajagha fugari dika ghininji ghananja ghuse tumbada irarera,” Iesu aminge sisira.

<sup>13</sup> Aminge sedo, nu jovereghedo isoro kakato da giti jigharikena

sisira, “Avori, jovereghe kamboda yasi! Rea tumonderesa, ava siro-rarira,” aminge siri ainghae dabade, giti jighari ainda saramana kato jebugusira.

*8:14-17 Iesu Setiri Evetu Genembo Digari Ava Jejebuguseri.*

*(Mark 1:29-34; Luke 4:38-41)*

<sup>14</sup> Iesu ira Peter da kamboda teredo, Peter da imboti kae tambudo, tamo veriveri iri fasiriri gosusira.

<sup>15</sup> Gido, sire ungodu jighiri tamo jama etiri, nu jebuge eredo bayau simbugedo numokena futusira.

<sup>16</sup> Sifo daba aminda tumba jiriri, evetu genembo reighi aminda, evetu genembo kae dombu eni eni budo iriara ava, Iesu kena budo fuseri. Fera buvero, Iesu setiri sukaru evetu genembo mendeni da tamonda asugetero iriara ava, vose darigetero jebuguseri, a kae evetu genembo mendeni ainde dabade, isambu jejebuguseri.

<sup>17</sup> Iesu amingusira amo, jo tefo aeri. Susudae usira. God nu rea nunda feroveta Isaiah kena setiri gefusira ava, beká isagha are dae sedo, nu amingusira. Isaiah gefusira amo, eviri:

“Nu tofo mandi namonde da kae da bouvu fufuse, setiri namonde jebuguseri.”

*8:18-22 Iesu Da Ambo Jimbi Ari Mo, Jo Raugako Iraeri.*

*(Luke 9:57-62)*

<sup>18</sup> Evetu genembo digarigo totorugusera ava gido, Iesu jovereghe nunda ambo jimbikena, nemonde dabade sirige uvu da teria aminda sembi yari dae sisira.

<sup>19</sup> Aminge siri, Moses da Geka ijuga kato eni fira buvudo, numokena sisira, “Ijuga Kato, Na ni tumonderena. Ni reda yaresa amo, nangae yarera,” aminge setiri,

<sup>20</sup> Iesu mino sisira, “Agari a rika, ne moghaghaeri. Avata, Evetu Genembo da Koro+, nunda kambo a avari vasa eni tefori. Ni nangae

<sup>11</sup> **8:11:** Afige, **Geka Se Disugari Da Vasa** aminda, geka *Natofo* dae rea gefusera, ava tege garesa.

dabade deingharera amo, ni avari vasa jo tambae aresa,” Iesu aminge sisira.

<sup>21</sup> Setiri, nunda ambo jimbi eni eminge sisira, “Bajari, nanda afa nu embako beká etira. Nu ambari gido irise, nangae deingharera,” aminge sisira.

<sup>22</sup> Setiri ningido, Iesu mino numokena eminge sisira, “Dodo fu, nangae oroko yaore! Evetu genembo mave God da Geka jo ningi tumondae eraera amo, ne kau ambari embo da kaugori. Ava sedo, mave ambarira amo, dovu, nene bu ya furugaore! Avo gido, ni fu, nangae yaore!” aminge sisira.

*8:23-27 Iesu Setiri Eva Yaura Tukughedo Binono Usira.*

*(Mark 4:35-41; Luke 8:22-25)*

<sup>23</sup> Aminge sedo, Iesu nunda ambo jimbide dabade ghakada+ vosedo sembiseri.

<sup>24</sup> Sembero, eva yaura vovogoghae eko beká ava erorusira. Eredo, ghaka+ de rosari dae usira. Avata Iesu nu fase aviri,

<sup>25</sup> nunda ambo jimbi era nu deretero eretiri, numokena siseri, “Bajari, sonembe! Namonde sirivo ari dae erera!” aminge siseri.

<sup>26</sup> Setero, Iesu kovionoghae sisira, “Ne redae oju erevu? Nemokena tumondari tefori!” aminge sedo, nu eredo eva yaura tukughare dae sedo, kovionoghae beka fuge setiri, eva yaura tukughedo binono usira. Amingetiri, ne isambu dudukughuseri.

<sup>27</sup> Dudukughedo, ne tofo tofo se nininguseri, “Arie! Genemboé kau avegorai, nune setiri eva yaura nunda geka ningi? Ari emo, jo evetu genemboi ari da kaugo iraeri!” aminge siseri.

*8:28-34 Iesu Setiri Gegenembo Etoto Ainda Tamonda, Sukaru Vose Darigetero Nengae Jebuguseri.*

*(Mark 5:1-20; Luke 8:26-39)*

<sup>28</sup> Amingetiri dadabetiri, ne sembera Gedara ondi da reighi aminda tere dadoruseri. Dari

vivitero, gegenembo etoto naká, bekuda ghe buvudo vose fera Iesu tafuseri. (Beku resena emo, ambari embo aminda furugedo ghuseri.) Gegenembo amo, nengae sukarui asugetero daghedo iriari. Nengae evetu genembo ondi soesa dedo ghuseri. Amingedo ghusera aindae, evetu genembo emboro aminda jo ya foa ghae edo ghuseri.

<sup>29</sup> Nengae Iesu nunda mendeninde ava tambudo, koko eminge siseri, “Arie, God da Mandi! Ni redae namanekena refesi? Namanekena mema mutari dae refesa, ai? Sifo mo, jo foa buvae irira,” aminge siseri.

<sup>30</sup> Vasa aminda, fukamane digarigoimi bayau rise ya foa ghero gosuseri.

<sup>31</sup> Gido, sukaruimi Iesu kena benunu siseri, “Ni namane ondaso buvoro dae saresa amo, se, namane yama fukamane da jokáda terore!” aminge setero,

<sup>32</sup> Iesu “Yasivu!” Setiri, sukaru gegenembo ainda tamonda iriara ava, vose darigedo era, fukamane da jokáda tere asugetero, fukamaneá isambu sumbu fusi kenana sedo era, reighi ganasa aminda ghasaghe vosedo, uvuda mindi sirivo useri.

<sup>33</sup> Amingetero gido, fuka ainda kaifa kakato, sumbudo era reighi bogu aminda buvudo, Iesu rea etiri gosusera, ainda bino ava isambu osa setero natofo nininguseri.

<sup>34</sup> Ningido, reighi ainda natofo isambu eredo, Iesu tambari dae sedo fuseri. Fera, nu gido benunu siseri, “Eveva mo, ni namanenda reighi a endaé dodo yaetesi.”

## 9

*9:1-7 Iesu Setiri, Genembo Ungo Ata Dimbaride Ava Jebuguseri.*

*(Mark 2:1-12; Luke 5:17-26)*

<sup>1</sup> Aminge benunu setero, Iesu eredo nunda ambo jimbi ainde dabade ghakada+ vosedo jovereghe sovenikena aminda sembiseri. Sembera, nunda reighi aminda tere dadoruseri.

<sup>2</sup> Darido vitero, evetu genembo mendeniimi, genembo eni ava budo, Iesu kena fuseri. Genembo amo, nu ungo ata dimbarideri. Ava bu ghaghada fitero fasetiri, fumbudo fuseri. Iesu kae genembo ainda kokomana da tumondari ava gido, kae genembo aikena sisira, “Nanda mandi, fakina edo ivuga aso dae resena! God ninda ari ekoko kote dotira,” sisira.

<sup>3</sup> Aminge siri, Moses da Geka ijuga kakato+ mendeni aminda anumbirisera aimi ningido, minonde minonde se nininguseri, “Genembo omo, God da javo etiri eko erira. Numo namonde daba avori. Nu jo dombu eni iraeri. Ava sedo, nu nange nange God da javoda resi? Amo ekori!” aminge siseri.

<sup>4</sup> Ne rea kotisera a sisera ava, Iesu kasama usira. Kasama edo nemokena sisira, “Ne redae kotari ekoko erekotevu?”

<sup>5</sup> Kote givu! Ne erekoteva: na benunu sarena amo, God genembo einda ari ekoko jo kote doya e ari, ava erekoteva? A nenda kotari eni mo: nu jebugare dae saetena amo, jo jebugae aeti?

<sup>6</sup> Avori, nanda fakina ijugaono gareva. Evetu Genembo da Korokena+ mo, ari ekoko kote do-yari da fakina ava irira. Ava kasama aovo dae sedo, saono genemboé jebugarira,” aminge sedo, nu jovereghedo genembo ungo ata dimbaride aikena sisira, “Eredo, ninda ghaito gaghe budo, kamboda yasi!” aminge sisira.

<sup>7</sup> Setiri, genembo amo eredo, kamboda isira.

<sup>8</sup> Etiri gido, natofo isambu oju edo God dae sakai siseri. Sakai sisera da beká mo: God nu fakina avavaga evetu genembokena futusira.

*9:9-13 Iesu Nu Matthew Aghi Usira.*

*(Mark 2:13-17; Luke 5:27-32)*

<sup>9</sup> Nanda javo Matthew. Na takesi bari kato edo iriana ainda sifo aminda, Iesu reighi aminda ghe eredo fira, nanda saramana kamboda buvurutusira. Buvudo, na aminda anumbireno gido, namokena sisira, “Fu, nangae yaore!” setiri, na eredo nunda amboda iseni.

<sup>10</sup> Ainda amboda, namonde bayau dabade mindari dae sedo, Iesu fira nanda kamboda teredo anumbusira. Nane seteno, takesi bari kakato mendeni a ari ekoko embo mendeni fera, namane namonde dabade anumberi.

<sup>11</sup> Etero, Moses da Geka kaifa kakato+ mendeni ava gido, Iesu da ambo jimbikena ategi useri, “Takesi bari kakato, ne gegenembo ekokori. A evetu genembo mendeni, takesi bari kakatode dabade ojera anumbirera omo, nembarago ari ekoko embori. Ava sedo, nenda ijuga kato redae takesi bari kakato a ari ekoko embode dabade anumbedo bayau rereri?” aminge sero, Iesu tofo niningusira.

<sup>12</sup> Ningido sisira, “Evetu genembo tamo kae iraede amo, ne dogetadae jo uju ae eraera. Avata evetu genembo tamo kaede amo, ne dogetadae uju eraera.<sup>12</sup> Ari ekoko embodae joka aovo dae sedo, na nemokena eminge resena, ningivu! God kena joba muturaeva amo, evevari.

<sup>13</sup> Avata kotugo yasivu, God da Geka emo kotise kasama e gogoghombaove!

‘Nanda uju beká mo, joka ariri. Jo namokena joba mutari iraeri.’ Ava sedo, ari ekoko embodae joka use irareva! Evetu genembo mendeni nenda kotari mo, ‘Ne jo ari ekoko embo irae,’ ava koteraera. Evetu genembo amo, na jo aghi ae arena. O evetu genembo mendeni ne kasama eraera, ‘Ne ari ekoko embori.’ Evetu genembo amo, na uju use aghi eraena,” Iesu aminge sisira.

<sup>12</sup> **9:12:** Iesu geka evia sisira ava, Matthew, Luke, Mark ne geka daba ava gefuseri. (Jighi jovereghe, Luke 5:31 aminda, a Mark 2:13 aminda, tege garesa.) Geka da tuka dabakori, avata Matthew da geka da gharogho nange eresufira ava kotise, itako dombu eni jovereghuseri.



**9:14-17 Kanangara Ari A Irari Seka Da Geka Amo Eviri.**

(Mark 2:18-22; Luke 5:33-39)

<sup>14</sup> Ainda amboda, John Bafataito Ari Kato da ambo jimbi Iesu kena fera buvudo ategi useri, “Namane a Moses da Geka kaifa kakato+ de dabade God dae bayau kanangara use banungeraera. Avata ninda ambo jimbi, ne nange jo amingae eraeri?”

<sup>15</sup> Aminge setero, Iesu mino nemo-kena sisira, “Kote givu! Mandi gimasa eni, nu evetu ffitururari kirumo arera da sifo aminda, nunda kokomana ne jo sorara ae arera. O genembo evetu fitira ava, gito-fui sandi bu ya daoro ambarira ainda sifoda, ne dubo mema use, tuturo edo nundae kanangara arera,” aminge sisira.

<sup>16</sup> Aminge ijuguse sisira, “Embo boka eni manai edo toka basarira amo, namonde jo embo sogho seka ava gafugedo aimi, tauta gayae arera. Ainda susu mo: tauta gayarera amo, ainda bekada torerarira.

<sup>17</sup> Kau daba ava, vaini (wine) seka jo budo kofiri manai aminda, avere-gaoro vosedo irae arira. Amingarera amo, vaini (wine) seka da fakinaimi fumbari, kofiri bejari vaini (wine) averege vose soesa arira. Ava sedo, vaini (wine) seka kofiri sekada averegeraera. Amingururoro, vaini (wine) kofirighae eveva irarira,” aminge sisira.

**9:18-26 Iesu Evetu Eni Setiri Jebugusira. A Gagara Eni Setiri Ambarida Ghe Jebuge Erorusira.**

(Mark 5:21-43; Luke 8:40-56)

<sup>18</sup> Iesu nu aminge siri, Jusi embo da kotofu eni fira, Iesu kena buvudo nunda dombuda kauboi dadarigedo, eminge sisira, “Nanda gagara oroko nembo ambira. Avata fu nange yama, ninda ungoimi tamonda jighaso jebugare!” aminge sisira.

<sup>19</sup> Aminge setiri, Iesu eredo kotofuko ainda amboda iri, namane nunda ambo jimbi barago nunda amboda iseri.

<sup>20</sup> Namane ero, evetu eni fira namane emboro soroda tafusira. Evetu resena emo, nu kae budo tambuno gosuse irise, ghaeko 12 ava dadabusira. Evetu aimi Iesu da gukakena ira buvudo, ungo sirege nunda tamo asugari tinguda jijighusira.

<sup>21</sup> Nu amingusira da beká mo: nu eminge kotisira, “Na tefo Iesu da tamo asugari aminda jigharena amo, na jebugarena,” aminge kotise, tamo asugari tinguda jijighusira.

<sup>22</sup> Jijighiri, Iesu evetu genembo da jokáda jovereghedo, fuge eventuá gido numokena sisira, “Nanda gagara, fakina edo ivuga aso dae resena. Ainda beká mo: ninda tumondariimi jebugatesi,” Iesu aminge siri ainghae dabade, eventuá jebugusira.

<sup>23</sup> Amingetiri, namane sekago javi edo, kotofuko ainda kamboda iseri. Era buvudo kamboda teredo, feku fusari kakato a natofo digari, gagara furugari dae sedo totorugusera amo, ne dubo memai ghamo gajetiri dimbia sorara use, fugedo irero namane gosuseri.

<sup>24</sup> Gido, Iesu nemokena sisira, “Ne isambu eredo yasivu buvove! Gagara emo jo ambaeri. Nu ravira,” aminge setiri, ne numoá dere jiseri.

<sup>25</sup> Aminge sero, nu ondiri ne eredo, era buvurutuseri. Buvero, Iesu gagara da avari vasada tere fetedo, sirege gagara ainda ungodá jighiri nu erorusira.

<sup>26</sup> Iesu amingusira, ainda bino iri, reighi digari frovensi aminda nininguseri.

**9:27-38 Iesu Evetu Genembo Mendeni Aindae Joka Usira.**

(Matthew 20:29-34; Mark 10:46-52; Luke 18:35-43)

<sup>27</sup> Iesu nu reighi amo dodo iri, gegenembo etoto diti digoide aimi eredo, Iesu da amboda iseri. Nengae ise, koko sise eminge siseri, “Kini (King) David da Mandi God mutari sisira amo, nimori. Ava sedo, namane joka eyo!” aminge sido iseri.

<sup>28</sup> Aminge sido ero, namane era dabade kambo eninda teredo, gegenembo etoto naká amo fera Iesu kena buvero, nu nemokena ategi usira, “Ne nange erekotevu? Na sarena amo, nengae jebugareva, ai tefo?” aminge setiri, nengae siseri, “Ai, namane tumonderera. Saresa amo, namane jebugarera,” aminge siseri.

<sup>29</sup> Aminge setero, Iesu ungo sirege ditida dedeuse sisira, “Ne rea tumondereva ava, nemokena sirorare!” aminge setiri,

<sup>30</sup> diti eveva usira. Etiri, Iesu kovionoghae nemokena sisira, “Erama jebugeteva ava, osa seove!” aminge sisira.

<sup>31</sup> Ne buregusira, avata nengae reighiá dodo era, nenda diti eveva usira ava, osa setero, reighi digari frovensi aminda nininguseri.

<sup>32</sup> Gegenembo etoto naká jebugedo yari dae javi ero, kotugo evetu genembo eni budo fera teteruseri. Genembo resena emo, nu sukari asugetiri guga edo irei.

<sup>33</sup> Iesu setiri, sukari genembo aında jokáda ghe fira buviri beka afigetiri, genemboá tuturo edo beka sisira. Beka siri, evetu genembo ningido dudukuguseri. Dudukughedo, siseri, “Namondeda reighi Israel eminda namonde eminga jo gae iriara ava, namondeda gitida siroretiri eregoserá!” aminge siseri.

<sup>34</sup> Avata Moses da Geka kaifa kakato+ eminge sedo ghuseri, “Sukari da bajari javo Satan imi, nunda fakina muteari, Iesu budo, sukari bu fugeraira,” aminge sedo ghuseri.

<sup>35</sup> Iesu aminguse, frovensi aminda birurughudo ya foa ghuseri, reighi isambu aminda. Dengoro indari kambo aminda, God Afa nunda natofo+ nange kaifa eraira, aında Bino Eveva ava vironu sedo ghuseri. A kae evetu genembo, kae dombu eni dombu eni, ava seari isambu jebugedo ghuseri.

<sup>36</sup> Evetu genembo a natofo numokena totorugedo ghuseri, ava guse, nendae joka edo ghuseri. Aında beká mo: ne kau sifi (sheep) giti jighari iraede aında kakaugo ava use, dubo mema use jebuga da sonemba eni jo tambaeri.

<sup>37</sup> Ava gido, nunda ambo jimbikena sisira, “Ghaeko da sifo buviri, vare beká etira. Avata bayau bambari embo jo digari iraeri.

<sup>38</sup> Ava sedo, vare Numamokena bayau bambari embodae benunu sevu!” namanekena aminge sisira.

## 10

*10:1-15 Iesu Nunda Ambo Jimbi Beká 12 Ava Diriguse, Dengoro Indudusira.*

*(Mark 3:13-19; Luke 6:12-16)*

<sup>1</sup> Iesu aghi etiri namane totorugetero, fakina namanekena futusira. Amo nu, sukari bu fugari a saoro kae evetu genembo jebugari aında fakina ava, namanekena futusira. ‘Namane’ sise resena emo, Bajari namane nunda ambo jimbi beká 12 ava gategusira, aında resena.

<sup>2</sup> Amo, namanenda javo eviri. Giti mo, Simon (o Peter seraera), a nunda namendi Andrew ri. Mendeni mo, ne Zebedee da sasingu James nengae John ghaeri.

<sup>3</sup> Mendeni mo, Philip nengae Bartholomew ghaeri. Mendeni mo, namane Thomas ghaeri. (Namo, giti takesi bari kato edo iriani). Mendeni mo, Thaddaeus nengae Alphaeus da mandighaeri. Alphaeus da mandi resena emo, nu James da nunombori.

<sup>4</sup> A kotugo eni mo, Simon da nunombo o Simon ‘Reighi Susu’ seraera, a eni mo, Keriot embo javo Judas. Judas resena emo, nune aito etiri Iesu doruseri.

<sup>5</sup> Javo setena amo, namane isambu 12 evia, Iesu dirigari yaoro dae sise, eminge sisira, “Namonde Israel embo da gitofukena o Samaria embokena, ne jo yae areva.

<sup>6</sup> Ne namondeda natofo, Israel em-bokena ya vironu sareva. Ainda beká mo: ne God da natofori+. Avata ne God da emboro+ kosasaghedo, ambari dae erera.

<sup>7</sup> Yasivu! God nunda natofo+ kaifa arira da sifo ojira utua etira ava, osa saovo ningore!

<sup>8</sup> Saovo, kae evetu genembo jejebugaore! Saovo, ambari embo sekago jebuge erore! Saovo, evetu genembo tamo bedode jejebugaore! A sukuru evetu genembokena asugedo irarera amo, ondovo vose darigaoro, jejebugaore! Ne ainda fakina ava, mino tefo bevu. Kau daba aminga ava, tefo sonembegu, evetu genembo jejebugaore!

<sup>9</sup> Ne esa yareva. Avata moni eni, ghamana (gold, silver o copper), jo budo ainghae deinghae areva.

<sup>10</sup> Erá nenda javo, tamo asugari da tuka, ata asugari, a nenda ketua budo yeove! Ainda susu mo: saramana kato nu saramana ururari, nati embo nunda uvu bayau tefo mutoro baeti.

<sup>11</sup> “Ne ya reighi eninda buvareva amo, genembo evevago tambudo ya numokena avareva. Erá ya kambo eninda aveove! Kambo daba aminda irise, saramana aovo dadabari, javi edo yareva.

<sup>12</sup> Ne kambo ningiaminda buvareva amo, eminge sise ategi evu, ‘Bajari da dubo jama nemokena furare!’ aminge ategi evu!

<sup>13</sup> Kambo resena, ainda natofo ivugaghae nati joká doruse unumbarera amo, ne Bajari da dubo jama ategi use mutareva ava, dovu nemokena irare! O ne imboe arera amo, ne Bajari da dubo jama saghimbe buvu!

<sup>14</sup> A eni mo: kambo o reighi eninda natofo ne ighagha edo, nenda geka jo ningae edo nendae nati joká jo dae arera amo, reighiá do buvurutuse, nenda ata danghevu, fonja aminda vosare!

<sup>15</sup> Kotovo dae sise resena. Amingareva amo, Ategi da Sifo aminda, God nu Sodom a Gomora embodae

itako joka arira. O reighi aindae, jo joka ae arira,” Iesu aminge sisira.

*10:16-25 Tumondari+ Embo Da Irari Kau Emingori.*

*(Mark 13:9-13; Luke 21:12-17)*

<sup>16</sup> “Ningi gogoghombevu! Ne kau sasingako amingo ava, na ne dirigeteno gegenembo ekoko aikena yari dae ereva. Ne kote gogoghombaetevu. Avata erá ari ekoko ari dae sedo manaka garuse aindae, fakina eove!

<sup>17</sup> Diti gosuse kaifa evu! Ainda beká mo: evetu genembo mendeni-imi, ne sandi bu yaoro, nenda dengoro indari kambo+ aminda terovo koto use, ne ambíi daoro mema itata-mareva.

<sup>18</sup> Ne nanda natofo edo ireva ava sedo, ne sandi dedo bu jumbu yaoro, gavana da babojegari a kini (kings) mendeni da dombuda fetovo koto arera. Koto ururoro, ne nanda Bino Eveva ava, osa sirurovo ne nenda natofode ningarera.

<sup>19</sup> Nenda koto ari da sifoda, geka rea sareva a nange saeteva aindae, erá teria futo koteove! Ainda beká mo: sifo aminda, ne rea sari dae areva, Asisi Kakara ai ijugururari ne geka sareva.

<sup>20</sup> Ne jo totofo nenda kotari ava sae areva. God Afa da Asisiimi, sonembururari nunda geka ava sareva.

<sup>21</sup> “Sifo ava fururarira amo, gegenembo nenda jamena ava sandi mutoro daoro ambarera. Kau daba aminga ava, gegenembo nenda sasingu ava sandi mutoro daoro ambarera. A sasingu barago, noi numamo ava sandi mutoro daoro ambarera.

<sup>22</sup> Ne namo tumonderaeva aindae sedo, evetu genembo isambu ne imboe arera. Avata mave fakina edo, namo tumonduse jo ighagha ae iria, ambari tano arira amo, jebuga evovodae irari ava, nune tuve barira.

<sup>23</sup> Ne nanda natofo edo ireva aindae sedo, ne daoro mema itata-mareva amo, avori, reighi amo dodo, reighi eninda ya aminda saramana areva. Aminguse, reighi tomanako

Israel einda jokáda birurughuse, vironu sise Israel embo da reighi mendeni aminda jo ya buvae irovo, Evetu Genembo da Koro+ jovereghe furarira.

<sup>24</sup> “Ijuga kato mo, nu teriari. O nunda ambo jimbi mo, ne kikitakori. Kau daba aminga ava, kotofu nu teriari. O nunda sabua+ mo, ne kikitakori. Evetu genemboimi ijuga katoá o kotofuá jo kakara ae arera amo, nenda ambo jimbi barago jo kakara ae arera.

<sup>25</sup> Ne namoá avavaga ari dae sedo, nanda ambo jimbi edo ireva. Ava sedo, evetu genembo nandae siruroro ningiraeva aminga ava, amboda nandae siruroro ningareva amo, ne ivuga aetevu! Evetu genembo mendeni ‘na Satan va’ seraera. Ava sedo, nandae, ‘ne sukaruva’ siruroro ningareva amo, erá aindae manamana use dubo mema eove!” Iesu aminge sisira.

*10:26-42 Namonde, Bajari Jo Ighagha Ae Arera.*

*(Luke 12:2-9; 12:51-53; 14:26-27; Mark 9:41)*

<sup>26</sup> Aminge sise, Iesu sisira, “Avori, evetu genembodae erá oju eove! Oroko rea ufena use jungeraera amo, amboda isaghada garera. Oroko rea kivo eraera amo, amboda isagha saoro ningarera.

<sup>27</sup> Na oroko rea sainghe seraena amo, amboda ne vironuda sareva. Eminda namonde rea kikiako se ningeraera amo, ne amboda ofotighida fetedo koko sise sareva, evetu genembo da dombuda.

<sup>28</sup> Avori, evetu genembo ne imboe arera amo, ne daoro ambareva. Avata amo, tamoi ambarira. Asisi nu irarira. O God ne imboe arira amo, ne dari tamo a asisighae dabade ya, ari ekoko mino mutari vasada teredo evovodae irareva. Aindae sedo, God nusuka nundae oju aetevu!

<sup>29</sup> “Eni mo: rika kaghá ajamena kote givu! Ne rika isambu etoto ombari saeteva amo, toea dabako avavagai ombaetevu. Amo, ne roera kikitakori. Avata God Afa jo

doyae arira amo, eni jo ambae arira. God nu rika kaghá ajamena kaifa e gogoghomberaira.

<sup>30-31</sup> Ava sedo, ne God tumonduse ambari dae oju jo ae aetevu. Ainda beká mo: God nu rika kaghá ajamena itako dubo buraira. Avata God da dubo bari namonde evetu genembokena mo, teriago bekári. Nenda jiroda, beo anakora afige gi tege tefo usira. Ava sedo, ne jo kosasaghari da kaugo iraeri. Erá oju eove! God Afa nu rika kaghá ajamena kaifa eraira amo, kau daba aminga ava, ne kaifa e gogoghomberaira.

<sup>32</sup> “Na eminge resena: mave nanda tofo edo irise, natofo da dombuda Evetu Genembo da Koro+ da javo jighari erarira amo, Evetu Genembo da Koro+ genemboá, nu God Afa da aneya da dombuda jo ighagha ae arira.

<sup>33</sup> O mave na natofo da dombuda imboe edo ighagha arira amo, numbarago God Afa da aneya da dombuda, Evetu Genembo da Koro+ nu imboe edo ighagha arira.

<sup>34</sup> “Ne erekoteva, na mainungari bu furariá reseva. Tefo. Ne erá aminge koteove! Na beisiga a ghoghora tataya ava bu refena.

<sup>35</sup> Evetu genembo namoá tumondaoro dae, o ighagha aoro dae sedo, refena. Amingururono, vide jamena nenda numamomanede dabade beisiga edo sarigarera. Ade jamena nenda noimanede dabade beisiga edo sarigarera. A mamandisiri nenda imbobotide dabade beisiga edo sarigarera.

<sup>36</sup> Sifo aminda, genembo ainda natofo beká aimi, numokena gitofu arera.

<sup>37</sup> “Mave noi numamo dubo ruruse aindae, na kotae arira amo, nu jo nanda natofo ari da kaugo iraeri. Kau daba aminga ava, mave nunda mandi o nunda gagara dubo ruruse aindae, na kotae arira amo, nu jo nanda natofo ari da kaugo iraeri.

<sup>38</sup> Mave nanda ambo jimbi edo, namonde dabade deinghari sarira amo, nu emingarira. Nu namoá

tumonderaira andae sedo, gitofuimi nu daoro ambare dae sarera amo, nu jo oju ae arira. A nane rea eraena ava, nu ari kau daba ava udo yarira. Nu jo amingae arira amo, nu jo nanda ambo jimbi ae arira.

<sup>39</sup> Mave nu enda da gugua kotise, nanda javodae ambari dae oju edo na doyarira amo, nu sifo amboda ambarira. O mave nandae sedo ambarira amo, nu amboda jebuga evovodae irari ava tuve barira.

<sup>40</sup> “Mave nindae nati joká doruse, bu tavo arira amo, nu inono, namoá nati joká doruse, bu tavo arira. Kotugo, mave nandae nati joká doruse, bu tavo arira amo, nu inono, God Afa namo dirigetiri fusena, ava nati joká doruse, bu tavo arira.

<sup>41</sup> Kau daba aminga ava, mave God da aghi kato nati joká doruse, nu God da javoda refira andae sedo, bu tavo arira amo, God Afa amboda rea nunda aghi kato aikena mutarira, kau daba ava mutari, genembo nati joká dorusira, ábarago barira. Kau daba aminga ava, mave genembo evevadae nati joká doruse, nu genembo eveva andae sedo bu tavo arira amo, God Afa amboda rea genembo eveva aikena mutarira, kau daba ava mutari, genembo nati joká dorusira, ábarago barira.

<sup>42</sup> A geke kau daba ava kotovo dae resena. Mave nanda ambo jimbi ijoghako eni gido kotarira, ‘Genembo omo, nu Iesu da ambo jimbi ava sedo, na sonembe uvu mutarena,’ aminge kotise, uvu mutarira amo, na numokena mino mutono barira. Jo kosasaghae arira. Emo, geke beká nemokena resena,” Iesu aminge sisira.

## 11

*11:1-19 Iesu Nu John Bafataito Ari Kato Da Bino, Aindae Geka Sisira. (Luke 7:18-35)*

<sup>1</sup> Iesu nunda ambo jimbi 12 ava dengoro indiri dadabetiri, nu eredo reighiá dodo, ainda tinguda, reighi mendeni aminda deinghuse vironu sise ijugedo ghusira.

<sup>2</sup> John Bafataito Ari Kato sandi diburada fitero irise, Iesu rea edo ghusira, ainda bino ava niningusira. Ningido, nunda ambo jimbi dirigetiri, Iesu gari dae sedo iseri.

<sup>3</sup> Era, Iesu kena buvudo, ategi useri, “Ni, se ningore! God Genembo eni dirigari furarira ava, John vironu sise sedo ghusira amo, nimori, ai? O namane genembo eni kaifa aore?” aminge ategi useri.

<sup>4</sup> Etero, Iesu nemokena sisira, “Ne jovereghe yasivu! Na rea eno erego-seva, a seno niningereva, ava osa sevu, John ningare!

<sup>5</sup> Na seteno evetu genembo diti digoide ava, fangetiri sifo sevo eregoserá. Seteno evetu genembo daguna, jebuge eredo atai fete deingherera. Seteno evetu genembo tamo bedode a isode, utetegetiri jebugeteri. Dengoro gajari embo amo, seteno dengoro afigetiri, geke niningerera. Seteno ambari embo uroda ghe, jebuge ereteri. A vironu seno, makasi embo ne God da Bino Eveva ava niningerera.

<sup>6</sup> Mave nandae sedo meka gosuse andae, na jo imboe ae arira amo, nu amboda dubo jama tambarira,” aminge setiri ningido, John da aghi kakato jovereghe iseri.

<sup>7-9</sup> Ne jovereghe ero, nu tuturo edo natofokena John da geke ava vironu eminge sisira, “Ne giti redae reighi uvu ã evetu genembo irae da vasa aminda isevu? Ne jo reighi gari dae sedo yaeri. Ne John gari dae sedo isevu. A ne, genembo kau mavega ava tambari dae sedo isevu? Genembo dubo kotari irae, ai, dubo kotaride? Ne jo nunda tamo asugari ã gogho ava gari dae sedo yaeri. Ava gari kotaeteva amo, ne ya kotofu da kamboda tava aetevu. Ava sedo, rejo tambari dae sedo isevu? Avori, saono ningivu! Nemo, God da feroveta ava tambari dae sedo isevu. Emo, na geke beká sari dae erena. Feroveta digari irera ainda teriagomo, John ri.

10 A God Afa, John nanda emboro rerebare dae sedo, numoá gategusira. God nunda Geka John dae sise, setiri gefusera amo, eviri:

‘Kote gi! Nanda aghi kato ava, giti dirigaono ya ninda emboro rerebururari, ni amboda yaresa,’ aminge gefuseri.

11 Kotugo na eminge resena. John Bafataito Ari Kato nu genembo teria bekári. enembo eni numongoá jo sirorae irera. Avata na emboro+ seka God kena afigaono, mave aminda ise a tumonduse God da natofo+ arira amo, nunda dubo kotari a ivuga amo teria arira. Aimi, John da dubo kotari a ivuga amo darigarira.

12 John tuturo edo geka sisira, ai tano ghedo ojira oroko eminda buvira. inda jokáda, evetu genembo God kena teredo nunda natofo+ ari dae sise, utu da guro ava ininighae eresorerera.

13 John jo sirorae iriri, God nunda natofo+ kau nange nange kaifa arira ava, Moses a God da ferovetaimi gefudo fero John sirorusira.

14 Ava sedo, geka evia ningido tumondaovo dae sise resena. God da feroveta Elijah jovereghe furariá, sedo ghusera amo, John dae sedo ghuseri.

15 Geka emo, dengoro jave ningi gogogho aovo dae sise resena.

16 “Evetu genembo oroko endada siroredo ireva emo, kau mavegori? Ava sari dae erena. Ne John Bafataito Ari Kato imboe usevu, a kotugo na imboe ereva. Nemo sasingako da kakaugori. Sasingako mo, ne ofotighida yaru use tofo tofo beisiga use, ghoghora eminge sirureoro ningiraera,

17 ‘Ne imboe kakatori! Namane esimbuguse yaru divari da kau etera, ne jo namonde divaeri. Amboda, kau ambari budo sorara arigetera, ne jo namonde sorara aeri. Ne beisiga a imboe kakatori!’ amo sasingui eraera. Evetu genembo oroko endada siroredo ireva emo, ne kau daba ava eraeva.

18 John Bafataito Ari Kato fira, vaini (wine) reeta use God tambari dae sise, bayau kanangara edo ghusira. Eari, ne sedo ghusevu, ‘Sukarui John kena asugetiri daghusira,’ aminge sedo ghusevu.

19 O Evetu Genembo da Koro+ foa bayau rise vaini (wine) rirureari gido seraeva, ‘Genemboé givu! Nu bayau mindari kato, a vaini (wine) da oduso katori. Nu evetu genembo eko beká aikena, komana eraira.’ Evetu genembo oroko endada siroredo ireva emo, ne aminguse beisiga eraeva. Avata na eminge resena. Na mavejori, a John mavejori, ava evetu genembo duboi kotarera amo, ne kasama arera,” Iesu aminge sisira.

### *11:20-24 Iesu Reighi Mendenikena Ghoghora Sisira.*

*(Luke 10:13-15)*

20 Iesu tuturo edo, reighi mendenikena ghoghora sisira. Nu reighi mendeni aminda ise, tano isagha eari siroreari, evetu genembo ne jo gae iriara ava, nenda gitida siroreari gido dudukughedo ghuseri. Nu evetu genembo aindae, ghoghora sisira. Ainda tuka mo: ne nunda tano eari gido ghusera, avata nenda ari ekoko jo vujegedo dubo jovereghaeri. Ghoghora sise, eminge sisira,

21 “Arie, Korasin embo a Betsaida embo! Nemokena sari dae erena! Ne sifo amboda mema teria beká ava itatamareva. Ainda beká mo: ne nanda tano a ari mendeni mendeni eono gido ghuseva, avata ne dubo jo jovereghae, kau daba ava ireva. O nanda fakina a tano evia, namondeda gitofu da reighi Taiar a Saidon aminda, ijugaono gaetera amo, ne anakora nenda ari ekoko vujeguse, dubo jovereghari da tano ijuguse, bovara fire asuge vaya gutaeteri.

22 Ava sedo, Ategi da Sifo aminda, Taiar a Saidon embokena God joka ari, ne mema itako tambarera. O

reighi Korasin a Betsaida embo resena emo, ne mema teria beká ava tambarera.

<sup>23</sup> “Kaponiam embo, nemokena kau daba ava resena. Ne tofofo nenda javo jighovo erare dae erekoteva. Avata jo amingae areva. Amo, God sari ne bako eko aminda dudo ya vosareva. Ainda beká mo: ne nanda tano a ari mendeni mendeni eono gido ghuseva, avata ne dubo jo jovereghae, kau daba ava ireva. O nanda fakina a tano evia, namondeda gitofu da reighi Sodom aminda, ijugaono gaetera amo, ne anakora nenda ari ekoko vujegedo dubo jovereghaoro, God joka ari ne jo sirivo ae, oroko iraeteri.

<sup>24</sup> Evia kotovo dae resena: Ategi da Sifo foa buvarira aminda, Sodom embo nenda ari ekokodae God anakora dorusira amo, ne mema itako tambarera. O Kaponiam embo nemokena eminge resena: God nemokena mema teria beká ava mutari bareva,” Iesu aminge sisira.

*11:25-30 Bajari Da Dubo Jama Kau Emingori.*

*(Luke 10:21-23)*

<sup>25</sup> Sifo aminda, Iesu banunguse sisira, “Afa, ni utu a enda da Bajari nimori. Na nimokena aiyakoe resena. Ainda susu mo: ninda geka kivo edo evetu genembo diti basari kena jo ijugae usesi, avata evetu genembo kotari veveyako a diti basae embo aikena ijugeteso isagha usira.

<sup>26</sup> Amo, ni amingari dae uju usesi,” Iesu aminge banungetiri dadabetiri, nu tuturo edo sekago natofokena vironu sisira,

<sup>27</sup> “Nanda Afa roera isasambu evia, nane kaifa aono dae sedo, futusira. God nusuka nunda Mandi kasama erira. Kau daba aminga, God da Mandi nusuka nune, numamo kasama erira. A evetu genembo

mendeni nune gategarira amo, nune ijugururari, ne God Afa kasama arera.

<sup>28</sup> “Namokena fuvu! Mave irise bouvu erefufira amo, namokena fururovo, nanda dubo jama nemokena futurono, dubo eveva use jangutareva.

<sup>29</sup> Nanda ango sagada evia budo fufurovo, na ijugaono kasama areva. Na sabua+ da ari ava use, veka eveva edo durumuguse ijugururono, nenda asisi jokáda aimi, dubo jama torughuse jangutareva.

<sup>30</sup> Ai resira amo: nanda ango mo feghakori, a saramana nane muturaena amo, jo bouvu iraeri,” Iesu aminge sisira.

## 12

*12:1-8 Iesu Nu Jangutari Da Sifo Ainda Bajariri.*

*(Mark 2:23-28; Luke 6:1-5)*

<sup>1</sup> Ainda amboda Jangutari da Sifo aminda, namane Iesu de dabade, genembo eninda vare begatada sembise, namane ighoi etiri, farava da vuji ava bambudo,<sup>1</sup> ungoi jase rido iseri.

<sup>2</sup> Namane amingero, Moses da Geka kaifa kakato+ mendeni ava gido Iesu kena siseri, “E gi! Ninda ambo jimbi namondeda agho dari ava bejise, farava omo bambu rerera. Jangutari da Sifoda, ari ovia use saramana arigetera omo, jo ae aeteri,” aminge siseri.

<sup>3</sup> Setero, Iesu eredo nemokena mino sisira, “Ne namondeda abua David da kiki eni tegutusevu, ai? David nunda mendeninde dabade, ighoi sirivo use, nange usira amo, tegutusevu, ai tefo?

<sup>4</sup> Nu ira God da Kamboda+ teredo, farava God kena futusera aindae, benunu setiri fristi+ mutiri, David nunda mendeninde dabade budo

<sup>1</sup> **12:1:** Ari ambo jimbiimi usera amo, jo bagia iraeri. Afige, **Mark 2:23** ainda duruda tege garesa.

<sup>4</sup> **12:4:** Jusi embo da agho dari mo, eviri. Ne joba (farava, sifi, a roviravi mendeni avavaga) God kena mutudo ghuseri. Muteoro, fristi+ joba amo God kena ijugedo, bu mindido ghuseri. Amo bayau kakara ava sedo, fristi+ nesukako mindido ghuseri. Evetu genembo isambu, ne bayauá jo mindae edo ghuseri. Avata David mane era, fristi+ da bayau ava bu riseri. Aminguse, ne Jusi embo da agho dari bejiseri.

riseri. Amingusera amo, ne namondeda agho dari ava bejiseri. Agho dari bejisera <sup>4</sup> amo, eviri: ‘Fristi+ nesuka farava kakara amo mindaeteri,’ agho dari aminge resira.

<sup>5</sup> O eni mo kote givu! Geka God setiri Moses gefusira, ainda jokáda eminge ijugerira: God da Kambo+ ainda saramana use, fristi+ ne Jangutari da Sifo jo kotae eraera. Ne God da Kambo+ jokáda saramana mendeni eraera amo, namondeda agho dari ava bejeraera. Avata ne God da saramana ava use bejeraera aindae, God nu jo janje eko ae eraera,”

<sup>6</sup> Iesu aminge sise, nu tofo numoá kivo use eminge sisira, “Genembo eni eminda irira, a nu genembo teriari. O God da Kambo+ mo kitakori.

<sup>7</sup> O God da Geka eni mo eviri: ‘Nanda Agho Dari kotise, joba namokena mutareva amo, evevari. Avata, nanda uju beká mo: ne tofofo nenda ghamo jokáda, joka ari a kote dovari ava irari iriaetevu,’

God da Geka aminge resira. God da Geka evia kasama e gogoghombaeteva amo, evetu genembo mendeni, kotari a ari eveva eraera aikena, ne jo ghoghora sae aetevu.

<sup>8</sup> “Geka beká mo eviri: Jangutari da Sifo aminda rea ava aetera amo, ábarago, Evetu Genembo da Koro+ nunda sari ningariri,” Iesu aminge sisira.

*12:9-14 Iesu Genembo Eni Ungo Dimbaride Ava, Setiri Jebugusira.*

*(Mark 3:1-6; Luke 6:6-11)*

<sup>9</sup> Setiri dadabetiri, Iesu vareá dodo ira, nenda dengoro indari kamboda+ teterusira.

<sup>10</sup> Genembo eni ungo gimandu dimbaride amo, aminda anumbiriri, Iesu ira teterusira. Teretiri, evetu genembo mendeni aminda anumbiriserai, ne Iesu dederuroro geka sembae sari ningido koto ari dae sedo, numokena ategi useri, “Se ningore! Namondeda Agho Dari nange resi? Jangutari da Sifo

aminda, sonembaoro kae evetu genembo jebugedo ghaeteri, ai? Jo sonembedo ghae aeteri? Ava se ningore!”

<sup>11</sup> Aminge setero, Iesu mino eminge sisira, “Kote givu! Nenda sifi (sheep) eni Jangutari da Sifo aminda, ya bakoda vosaetira amo, ne nangaetevu? Ya jumbovo vitaeti? Ai, doyoovo aminda iriaeti?”

<sup>12</sup> God nu sifi (sheep) itako koteraira, o evetu genembo mo, nu dubo bu gogoghomberraira. Ava sedo, namondeda Agho Dari ijugerira amo, namonde evetu genembo Jangutari da Sifo aminda barago sonembaeteri,”

<sup>13</sup> Iesu aminge sedo, jovereghedo genembo ungo dimbaride aikena sisira, “Ninda ungo jujurege, gaone!” aminge setiri, genemboá nunda ungo Iesu kena siregiri eveva usira, ungo soveni avavaga usira.

<sup>14</sup> Avata Moses da Geka kaifa kakato+ mo, ne ava gido eredo era buvudo, ne Iesu nange daoro ambaetira aindae, manaka garuse se nininguseri.

*12:15-21 Isaiah Rea Iesu Dae Gefusira Ava, Isagha Usira.*

*(Mark 3:7-12; Luke 6:17-19)*

<sup>15-16</sup> Ne manaka garero, Iesu ava ningido reighiá dodo isira. Iri, evetu genembo digari nu tambudo, nemonde dabade iseri. Ise, Iesu setiri kae evetu genembo isambu jejebuguseri. Jejebugetero, Iesu kovionoghae nemokena sisira, “Ne seteno jejebugeteva amo, erá osa seóvo ningore!” aminge sisira.

<sup>17</sup> Aminge sisira da beká mo: God da feroveta Isaiah rea nundae sisira ava beká sirorare dae sedo, Iesu aminge sisira. Isaiah nu eminge sisira:

<sup>18</sup> “Nanda Saramana Kato gategusena amo, eviri. Na nundae ivuga beká use, dubo bu gogoghomberraena.



Na numokena nanda Asisi mutono budo, nanda javoda evetu genembo bekáda bekáda ategi arira.

<sup>19</sup> Avata aminguse, nu durumugarira. Nu jo bibita ae arira. Beka fakara jo sae arira. Nu emboroda ise, sainghiako roboghoi sido yarira.

<sup>20</sup> Tumondari o jebuga kitakatako ava tambarira aimi, undari mindafu arira.

Aminguse, geka beká a God da Geka beká ava jighari baji mindafu beká ari,

<sup>21</sup> evetu genembo isambu nu tumondarera,”

Isaiah da geka Iesu dae aminge sisira.

*12:22-32 Iesu Mave Da Fakinaimi, Seari Sukaru Vose Darigedo Ghuseri? (Mark 3:20-30; Luke 11:14-23; 12:10)*

<sup>22</sup> Ainda amboda, evetu genembo mendeni genembo eni ava, Iesu kena budo fuseri. Genembo amo, sukari asugetiri guga edo diti sembae etiri irei. Ava gido, Iesu setiri nu jebugedo, beka sise ditii fuge gosusira.

<sup>23</sup> Etiri, natofo isambu fuge nu gido, manamana use se nininguseri, “Kini (King) David da Mandi God mutari sisira amo, numori tanojo.”

<sup>24</sup> Ava sero ningido, Moses da Geka kaifa kakato+ eredo eminge siseri, “Genembo omo, jo tofo nunda fakinaimi o God da fakinaimi, sukaru bu fugae eraira. Omo nu, sukaru da bajari javo Satan, nunda fakina ava muteari budo aimi, sukaru bu fugeraira,” aminge siseri.

<sup>25</sup> Avata ne rea kotise sisera, Iesu anakora kasama usira. Kasama edo aindae sisira, “Frovensi eni ainda natofo beisiga edo, soroda sarigarera amo, frovensi ainda fakina soesa arira. Kau daba aminga ava, reighi eni o oro eni beisiga edo, soroda sarigarera amo, reighi o oro amo jo fakina edo fetae arera.

<sup>26</sup> Na Satan da fakina budo aimi, nunda sukaru bu fugeraena ava sedo, na Satan da eniva reseva. Avori, saono ningivu! Satan da natofo tofo tofo beisiga edo, soroda sarigarera amo, fakina edo fetarera, ai? Ava kote givu!

<sup>27</sup> Eni mo: ne eminge sise reseva, Satan namokena fakina muteari budo aimi, na sukaru bu fugeraena. Avata, nenda ambo jimbi tofo aghi useva, nenda ari ava kote givu! Nenda ambo jimbi sukaru ondiraera amo, mave da fakinaimi ondiraeri? Kote givu! Ava sedo, tofo nenda ambo jimbi eraera ava kotise, kasama evu! Ne nandae aji sise gungubo setevu!

<sup>28</sup> Geka beká mo: na God da Asisi da fakinaimi, sukaru bu fugeraena. Sukaru bu fugeteno, God da fakina isagha etiri eregoseva. Evia gosuse, God evetu genembo tofo kaifa ari<sup>28</sup> sisira, ainda sifo orokoá ojira nemokena buvira, ava kotaetevu!

<sup>29</sup> “Mave jo kotae kotae, genembo fakina kato ainda kambo beje teredo, nunda roera a gugua bagia ae arira. Nu giti, genembo fakina kato amo, sandi bundedo amboda nunda roera a gugua sosighi arira. Kau daba aminga ava, na Asisi Kakara da fakinaimi, Satan da fakina gajedo, seono nunda sukaru vose darigeraera.

<sup>30</sup> Mave na jo sonembae arira amo, nu inono, Satan sonembarira. Kau daba aminga ava, mave na jo sonembae, a evetu genembo unumbae arira amo, nu inono, evetu genembo ondari soesa ururoro, Satan foa ne barira.

<sup>31</sup> Na aindae sedo nemokena resena. Mave ari eko eni edo o geka eko eni sedo, amboda God kena vujegarira amo, God nunda ari eko amo kote doyarira. Avata mave Asisi Kakara da javo eko arira amo, God nunda ari eko amo jo kote doyae arira.

<sup>32</sup> Kau daba aminga ava, mave Evetu Genembo da Koro+ da javo eko

<sup>28</sup> **12:28:** Afige, **Geka Se Disugari Da Vasa** aminda, geka *Natofo* aindae rea gefusera, ava tege garesa.

arira amo, God nunda ari eko amo kote doyarira. O mave Asisi Kakara da javo eko arira amo, God nunda ari eko amo jo kote doyae arira, evovo-dae irarira,” Iesu aminge sisira.

*12:33-37 Namonde Nange Veka Eveva Use Iraeteri.  
(Luke 6:43-45)*

<sup>33</sup> Aminge sise, Iesu sisira, “Vuji eveva bambari saresa amo, ya ika eveva aminda bambaresa. O ika eko aminda, vuji eveva eni jo bambae aresa. Ainda beká mo: ika kau mavego amo, nunda vujida gi kasama aresa.

<sup>34</sup> Ne kau daba avori. Ne Satan da sasinguri.<sup>34</sup> Ava sedo, geka eko avanembo seraeva. Ainda tuka mo: genembo nunda dubo jokáda rea kotise irá gheraira amo, avanembo sise irá gheraira.

<sup>35</sup> Genembo eveva amo, nunda dubo jokáda eveva vanembo ava koteraira. Aminge kotise, geka eveva vanembo sise, veka eveva use irá gheraira. O genembo eko amo, nunda dubo jokáda eko vanembo ava koteraira. Aminge kotise, geka eko vanembo sise, nunda irari a evetu genembo mendeni da irari aimi bebeta eraira.

<sup>36</sup> Na nemokena resena: Ategi da Sifo aminda, God nu evetu genembo isambu da geka ava ijujarira. Evetu genembo ne, geka rea kotae kotae seraera, ava ijujarira.

<sup>37</sup> Geka rea nine sedo ghusesa, ava ijujedo, God nimokena mino eveva o eko ava mutarira,” Iesu aminge sisira.

*12:38-42 Evetu Genembo Mendeni, Iesu Tano Ari Gari Dae Sedo Ategi Useri.*

*(Mark 8:11-12; Luke 11:29-32)*

<sup>38</sup> Sifo eni, Moses da Geka ijuga kakato+ a kaifa kakato+ eredo benunu siseri, “Ijuga Kato, ni tano eni aso gari dae resera!” aminge siseri.

<sup>39</sup> Setero, Iesu ningido sisira, “Evetu genembo siroredo oroko endada irera, ne taká ekoko bekári.

Ne God itako jo kotae eraera. A ainda mendeni nemori. Ne tano ijugaono gari dae reseva. Avata na jo ururono gae areva. Nu dabako, Jonah rea usira ava ururono, ne gido dudukughareva.

<sup>40</sup> “Jonah nu, sifo tumba etodaba naká, oka da tini jokáda ireira edo, fira buvurutusira. Kau daba aminga ava, Evetu Genembo da Koro+ sifo tumba etodaba naká, enda jokáda iria edo erarira.

<sup>41</sup> A Ategi da Sifo aminda, Nineva embo eredo God da dombuda fetedo, nenda ari ekoko eraeva aindae, osa sarera. Ainda beká mo: Jonah vironu setiri ningido aindae, nenda kotari eko a nenda ari ekoko vujeguseri. O nemo, genembo fetirise geka resira, einda geka ningari imboe eraeva. Avata, Jonah nu genembo ijoghakori. O genembo oroko fete geka resira emo, nu teria bekári.

<sup>42</sup> “Frovensi Siba ainda evetu kotofuko amo eredo, Ategi da Sifo aminda God da dombuda fetedo, nenda ari ekoko eraeva aindae, osa sarira. Ainda beká mo: nu reighi soka beká aminda ireira ava dodo, Kini (King) Solomon da dubo kotari a ijuga ava ningari dae sedo fusira. O nemo, genembo oroko fetirise resira einda geka ningari imboe eraeva. Avata, Solomon nu genembo ijoghakori. O genembo oroko fetirise geka resira emo, nu teria bekári. Ava sedo, ne redae nanda geka jo tumondae erevu? Amingereva amo, eko bekári!” Iesu aminge sisira.

*12:43-45 Evetu Genembo Ekoko Kau Emingori.*

*(Luke 11:24-26)*

<sup>43</sup> Aminge sise, Iesu sisira, “Sukaru genembo enikena asugetiri ireira aimi eredo, genembo da jokáda ghe buvudo, jangutari da vasa tambari dae, ya reighi uvu irae da vasa aminda birurughuse deingharira.

<sup>44</sup> Tava e bune Jaredo eminge sarira, ‘Na eminda birurughuse iria jararena amo, jovereghe ya nanda

<sup>34</sup> 12:34: Afige, **Matthew 3:7** ainda duruda tege garesa.

kambo manai aminda terarena.' Aminge sedo, jovereghe ya nunda kambo manaiá tambarira. kambo amo, nasara tafono etero eveva edo irira. Kau, kambo joká seghe gogho eraera aminga ava, genembo da dubo jokáda tambarira.

<sup>45</sup> Tambudo, jovereghe ya nunda kokomana 7, sukaru ekoko beká ava, unumbe budo foama, genembo aikena asugarera. Giti mo, genembo amo, mema itako itatamuse irei. Avata, sukaru dabako aimi yama, nunda kokomana 7 ekoko beká ava unumbe nemonde 8 edo foama, genembo aikena asugarera amo, nu mema teria beká ava itatamarira. Evetu genembo oroko siroredo endada irera eikena, kau daba aminga ava sirorarira," Iesu aminge sisira.

*12:46-50 Iesu Da Ai Ghasovu A Nano Namendi Mavejori?*

*(Mark 3:31-35; Luke 8:19-21)*

<sup>46</sup> Iesu aminge siri, nunda noi a nunda jamenade fera buvudo isaghada fetedo, numokena geke sari dae sisiri.

<sup>47</sup> Setero, enii eredo ira Iesu kena sisira, "Nei a ninda jamenade dabade isaghada fetirise, nimokena geke sari dae kaifa erera," aminge sisira.

<sup>48</sup> Setiri, Iesu jovereghe ategi usira, "Nanda aya a nanda jamena mavejori?"

<sup>49</sup> Iesu aminge sedo, ungo namakena sireguse sisira, "Givu! Nanda ambo jimbi eregoseva emo, nanda aya a nanda jamenari.

<sup>50</sup> Mave nanda Afa utuda irira, ainda uju ava use irarera amo, nanda ai ghasovu, nanda nano namendi, a nanda aya mo, nemori," Iesu aminge sisira.

## 13

*13:1-9 Vare Govari Kato Ainda Kasiari.*

*(Mark 4:1-9; Luke 8:4-8)*

<sup>1</sup> Sifo daba aminda, Iesu kamboda ghe ira, uvu da teria irira ainda betuda anumbedo, tuturo edo ijugusira.

<sup>2</sup> Ijugiri, evetu genembo digari numokena fera totorugedo vasa ganjibuseri. Etero Jaredo, nu ghaka+ feghiri gido, ghaka+ jokáda vose anumbetiri, evetu genembo isambu fera buvudo, uvu betuda fefetuseri.

<sup>3</sup> Fetetero, Iesu nemokena kasi-aimi sise, geke mendeni mendeni ijuguse, eminge sisira, "Genembo eni eredo, farava veka govori dae sedo, aira nunda varenda buvudo,

<sup>4</sup> tuturo edo, veka giririghe budo jife jafe getira. Etiri, veka mendeni mo, begatada vosetiri, rikamanei ojighera minderi.

<sup>5</sup> Veka mendeni mo, aroro etoda vosedo totoi batuno etiri,

<sup>6</sup> ijiimi aviri gharasa etira. Enda jo teria irae ava sedo, besisi jo baeri.

<sup>7</sup> Veka mendeni mo, vive titifaghae ainda jokáda vosedo, viveghae dabade itira. Ainghae vitido, vivei gaetiri dadabetira.

<sup>8</sup> A veka mendeni mo, enda eveva aminda vosedo vitira. Vitido, beká jighira amo, mendeni 100, mendeni 60, a mendeni 30, avavaga jighira.

<sup>9</sup> Kasia setena amo, dengoro jave ningi gogoghombevu!" Iesu aminge sisira.

*13:10-17 Iesu Kasia Sisira, Ainda Beká Mo Eviri.*

*(Mark 4:10-12; Luke 8:9-10)*

<sup>10</sup> Setiri dadabetiri, namane Iesu kena era ategi useri, "Ni redae, evetu genembo mendenikena geke vironu kasiai seraesi?" namane aminge setero,

<sup>11</sup> Iesu sisira, "God Afa, kau nange nunda natofo+ kaifa eraira, ainda geke mendeni ava kivo usira. Ne nanda ambo jimbiri. Ava sedo, nu rea kivo usira ava, nemokena isagha saono ningi kasama aovo dae ser-aena. O mendenikena jo amingae eraena.

<sup>12</sup> Ainda beká mo: mave God da Geke ningido kotari eveva koteraira amo, God sonembari nu kote gogoghombarira. Avata mave God da Geke jo kotae eraira amo, God nunda kotari isambu bari dadabarira.

13 Ava sedo, na mendenikena kasi-aimi ijugeraena da beká mo eviri: ne ditiimi gosuse jo gi gogogho ae arera, a dengoroi nininguse jo kasama ae arera.

14 Ne amboda amingarera aindae, Isaiah gekaé gefusira. Geka evia, orokoá beká siroretiri eregosevere. Amo eviri:

‘Ne dengoroimi ningido, tuka jo kasama ae areva. Ne ditiimi gaovo, diti jo basae arira.

15 Ainda beká mo: natofo eikena kotari jo afigae irira. Erama nanda geka ningeore dae sise, nenda dengoro gagojuseri.

Erama nanda Geka tege kasama eore dae sise, nenda diti gagojuseri.

Ava jo ae aetera amo, dengoroimi ningido, ditiimi gosuse tege kasama e gogoghombedo,

ne dubo namokena jovereghaoro, na saono jebuga tambaeteri,’

Isaiah aminge gefusira.

16 Na nemokena resena. Emo nenda makoeri! Ne diti fangedo dengoro afigetevu.

17 Emo kotoyo dae resena. Ne rea giraeva a ningiraeva ava, God da natofo+ digari a God da feroveta digari, ne ningari dae a gari dae uju edo ghuseri. Avata ne jo gaeri a ningaeri. Avata orokoé, ne giraeva a ningiraeva aindae sedo, ne ivuga aetevu!” Iesu aminge sisira.

*13:18-23 Iesu Nu, Vare Govari Kato Ainda Kasia Da Beká Ava, Ijugusira.*

*(Mark 4:13-20; Luke 8:11-15)*

18 Aminge sise, Iesu sisira, “Genembo aira vare govetira, ainda kasia da beká ava ningi kasama aovo dae sise resena.

19 Mave God da Bino Eveva, nange God nunda natofo+ kaifa eraira, ava ningido tuka jo kasama ae eraira amo, nu rea ningiraira ava, amboda Satan foama, nunda dubo jokáda ufena saghimbe buraira. Amo inono, farava veka begatada vosetira, ainda kaugori.

20 Veka mendeni aroro etoda vosetira, ainda tuka mo eviri. Mave God da Geka ningido ivugaghae buraira,

21 avata nunda dubo jokáda tumondari jo inono ae arira. Ava sedo, nu sifo tufako tumonduse irari, dara sirorarira, o nu God da Geka tumonderaira aindae, gitofu numokena fakarago use mema mutarera amo, nu oju use fakina jo ae irise totoi gofarira.

22 Veka mendeni vive titifaghae ainda jokáda vosetira, ainda tuka mo eviri. Mave God da Geka ava ningido, nunda irari ava kotise, a enda da gugua ava bari dae koteraira aimi, God da Geka ava gajeari bunedo kotae eraira. Amingeraira amo, nunda tumondari da beká ava jo sirorae eraira.

23 O veka mendeni, enda evevada vosetira, ainda tuka mo eviri. Mave God da Geka ningido kasama eraira. Ainda beká jighiraira amo, 100, 60, a 30 avavaga jighiraira,” Iesu aminge sisira.

*13:24-30 Vive Tusari Ainda Kasiari.*

24 Iesu aminge sise, kasia eni eminge sisira, “God da natofo+ nenda irari kau emingori. Genembo eni farava veka eveva budo, aira nunda vareda govetira.

25 Etiri, tumba eninda, nunda gitofu eniimi ojira, farava jokáda vive eko ava gove dodo aira. Vive amo, nunda tamo a ifu kau farava da tamogori. Jo totoi kasama edo tuse fugari da kaugo iraeri.

26 Viveá govetiri, farava viveghae jinemba edo viti mindafu edo, beká jighari da sifo ava utua etira. Etiri, vive mendeni ainda kau isagha beká ava etiri gido,

27 vare numamo da saramana kakato mendeni aera numokena seteri, ‘Arie, Bajari! Nimoá vare eveva govetesi. Avata, vive eko jokáda emo, nange siroreti?’ ne aminge setero,

28 genemboá mino nemokena setira, ‘Nanda gitofu eniimi ojira govetira,’ aminge setira. Setiri, ne numo-

kena seteri, ‘Ya vive tusore, ai? Namane nangareri?’

<sup>29</sup> Aminge setero, nu setira, ‘Tefo, dovu irare! Ainda beká mo: ne vive tusareva amo tususe, farava veka eveva ainghae dabade tusareva tanojo.

<sup>30</sup> Aminge dovu, farava vive eko ainghae dabade irise, safufu ari gido, na bambari kakatokena eminge saono ningarera, ‘Giti yama vive eko tusedo, avarakada dungari dae sedo, sijareva. Amboda yama farava bambudo, nanda kamboda fitareva!’ vare numamoá aminge setira. Kotugo God da natofo+, nenda iriri kau amingori,” Iesu aminge sisira.

*13:31-33 God Da Natofo+ Nange Digarigo Siroreraera, Ainda Kasia Etoto Naká Sisira.*

*(Mark 4:30-32; Luke 13:18-21)*

<sup>31-32</sup> Iesu aminge sise, kasia ika mainekena fiftuse sisira, ‘God da natofo+ digarigo eraera amo, kau ika maine da vujiimi vose batuno edo vitiraira, ainda kaugori. Maine da vuji mo, veveyako bekári. Nu jo ika mendeni da vujigo iraeri. Avata vuji avavaga, genembo enii bu yama nunda vareda govarira amo, nu viti vareda roera isambu darigedo mindafu ari, rikamane foa nenda mogha ainda fafatuda fitarera. Kau daba aminga ava, God da natofo+ tuturo edo digarigo sirorarera,” Iesu aminge sisira.

<sup>33</sup> Iesu aminge sise, kasia yistikena fiftuse sisira, “Kasia eni mo eviri. God da Bino Eveva urureari, evetu genembo ningido nunda natofo+ eraera amo, kau yisti farava jokáda tiveraira, ainda kaugori. Yistiá, evetu eni okia mindafu budo farava averegari vosari, yisti itatako bu ainghae gae joveregharira amo, yisti tive ya aimi, farava isambu bajji vitido okia bedo arira. Amo inono, God da Bino Eveva urureari, evetu genembo ningido God da natofo+ digarigo siroreraera, amingori,” Iesu aminge sisira.

*13:34-43 Vive Tusari Da Kasia Ava Se Disugusira.*

*(Mark 4:33-34)*

<sup>34</sup> Iesu natofokena vironu sise, kasia ainembo ijugedo ghusira.

<sup>35</sup> Geka feroveta enii sisira ava, beká are dae sedo, Iesu amingedo ghusira. Geka amo eviri:

‘Nemokena dengoro induduse, kasiai sarena. Enda jo saono sirorae iriri, na irise,

rea kotedo kivo usena ava, kasiai nemokena saono ningarera,’ feroveta aminge sisira.

<sup>36</sup> Iesu kasia mendeni setiri dadabetiri ainda amboda, nu evetu genembo numokena totorugusera ava dodo ira, kambo eninda teterusira. Etiri, namane era numokena buvudo siseri, “Se ningore! Kasia vive eko eni govári setesa, ainda tuka mo, rejori?” aminge siseri.

<sup>37</sup> Namane aminge setero, Iesu mino sisira, “Genembo farava veka eveva govetira amo, Evetu Genembo da Korodae+ seteni.

<sup>38</sup> Vare setena amo, kau namondeda enda eviri. Veka eveva mo, inono, evetu genembo dubo jovereghedo God da natofo+ arera. Kotugo vive eko setena amo, inono, evetu genembo Satan da geka ningarera.

<sup>39</sup> A gitofu mave vive eko govetira amo, Satan numori. Vive eko tusari a farava vuji bambari da sifo setena amo, inono, God Afa sari enda dadabari da sifori. Vive tusari kakato a vuji bambari kakato setena amo, ne inono, God da aneyari.

<sup>40</sup> Kau namonde vive tusedo avarakái dungeraera aminga ava, enda dadabari da sifo aminda sirorarira.

<sup>41</sup> Evetu Genembo da Koro+ nunda aneya dirigari, evetu genembo jokáda deingharera. Deinghuse, evetu genembo mendeni nenda nano namendi ari ekoko aoro dae sedo dereraera, ari ekoko embo mendeninde dabade, ava gatege bundedo,

<sup>42</sup> avaraka mindafu ainda jokáda fugoro vosedo, sorara use dika ghinjinji ghananja ghuse irarerera.

<sup>43</sup> Amingururoro sifo aminda, God nunda natofo+ bu vasa evevada fifitururari, nenda duro kau iji da usasa aminga ava janimbarira. Geka emo, ningi kote gogoghombaovo dae sise resena,” Iesu aminge sisira.

*13:44-46 Roera Evevago Tambari Ainda Kasia Mendeniri.*

<sup>44</sup> Aminge sise, Iesu sisira, “Ne nange edo gido, God da jebuga torughaeteva, ainda geka eni eviri. Sifo eni, evetu genembo mendeni, nenda roera koana doghe vendi budo aera, vare jokáda jungedo doteri. Junge dodo ero, genembo eni amboda deinghudo erara tambira. Tambudo, ivuga beká ava use, doghariá sekago bu vasa daba aminda jungetira. Jungedo, koana barira ava kotedo aindae, riria ambariá edo, aira nunda gugua a roviravi isambu budo, oriro edo ainda moniimi budo, vare amo ombira. Kau daba aminga ava, ne God da jebuga ava, bari dae sedo, nenda roera a gugua isambu tefo fugareva, amo avori.

<sup>45</sup> A kasia eni mo eviri: God da jebuga kau nange nange tava aetevu? Kau genembo eni guri evevago, a roera garigo ava tava edo ghetira, ainda kaugori.

<sup>46</sup> Umbu eni nu deinghudo aira, guri eni evevago beká ava tambira. Guri mendeni isambu jo amingo iraeri. Ava tambudo, genemboá eredo aira, nunda gugua a roviravi isambu ai budo oriro edo, ainda moniimi, guriá ombira. Avori, ne kau daba ava use, God da jebuga tava aetevu.

*13:47-50 Oka Bambari Da Kasiari.*

<sup>47</sup> “Geka eni sari dae erena. God nu, evetu genembo nunda dombuda iroro kaifa ari dae sedo, aghi eraira. Nunda aghi mo kau, oka bambudo foa gatege bairoba buraera, ainda kaugori. Oka bambari kakato voto barido ragho arera amo, ne oka kau

dombu eni dombu eni ava bambarera.

<sup>48</sup> Bamборо dadabari, ya ghaka+ darido, oka kasama use gategarera. Eveva mo sovenikena vendarera, a ekoko amo fugarera.

<sup>49</sup> Enda tano ari da sifo aminda, kau daba ava arera. Aneyamane yama, evetu genembo eveva ainda jokáda vosedo, ijujudo ise evetu genembo ekoko gatege ambudo,

<sup>50</sup> avaraka mindafu ainda jokáda fugoro vosedo, sorara use dika ghinjinji ghananja ghuse irarerera,” Iesu aminge sisira.

*13:51-52 God Da Geka Manai A Seka Ainghae Dabade Tegutuse Iraeteri.*

<sup>51</sup> Iesu aminge sise, namanekena sisira, “Ne, geka setena amo, kasama ereva?” Setiri, namane, nunda ambo jimbii siseri, “Ai, kasama erera.”

<sup>52</sup> Setero, nu sekago namanekena sisira, “Avori, ne eregoseva: God nu, Moses da Geka ijuga kato+ eni ava aghi ari ningido, nunda natofo+ jokáda teredo nunda mandi beká arira amo, nu kau kambo numamo, ainda kaugo arira. Kambo numamoá, nu saramana da mendo gosuse, umbu eni nunda roera manai ava vege simbugedo aimi, saramana arira. Kotugo umbu eni, roera seka keve simbugedo o vege simbugedo aimi, saramana arira. Ainda tuka mo: nu, God da Geka manai Moses gefusira, a kotugo geka seka bu refena ébarago, isambu kasama erira,” Iesu aminge sisira.

*13:53-58 Iesu Da Natofo Nasareth Emboimi Eredo, Nu Ighagha Useri.*

*(Mark 6:1-6; Luke 4:16-30)*

<sup>53</sup> Iesu kasia amo setiri dadabetiri, nu eredo reighiá dodo,

<sup>54</sup> jovereghedo nunda reighi Nasareth aminda isira. Ira buvudo, nu tuturo edo nenda reighi da dengoro indari kambo+ aminda, natofo dengoro indudusira. Amingiri, evetu genembo mendeni nunda geka ava ningido dudukughuseri. Dudukughedo siseri, “Nu nange

dubo koterai? A mave seari, nu tano a ari mendeni mendeni urureari namondeda gitida giraeri?

<sup>55</sup> Nu jo genembo teria o kotofu eni iraeri. Numo taká kau namondegori. Nunda noi mo Mary, a nunda jamena James, Joseph, Simon, a Judas, ne isambu reighi ei embori.

<sup>56</sup> Nunda ghaghasovu barago, ne eminda irá gheraera. Avata nu nange emingerai?”

<sup>57</sup> Nasareth embo ne Iesu ighagha use aminge siseri. Amingero, Iesu eredo nemokena sisira, “Feroveta da geka ava, evetu genembo isambu, ningido nu kakara eraera. Avata feroveta totofo nunda natofoi, ne nu jo tumonduse kakara ae eraera. Kau daba aminga ava, ne namokena eraeva. Namu nenda eniri, avo gido, ne na jo tumondae eraeva,” Iesu aminge sisira.

<sup>58</sup> Ne nu jo tumondae usera aindae, nu ari a tano digarigo reighi aminda, jo ururari gae edo ghuseri.

## 14

*14:1-12 John Bafataito Ari Kato Detero Ambududurusira, Ainda Kikiri.*

*(Mark 6:14-16; Luke 9:7-9)*

<sup>1</sup> Sifo aminda, Frovensi Galilee ainda kotofuko javo Herod, nu Iesu da bino ava niningusira.

<sup>2</sup> Ningido, nunda mendenidae eminge sisira, “John Bafataito Ari Kato seteno dorusera ava, ambarida ghe jebuge erorusira amo, numori tano. Ambarida ghe jebuge erorusira aimi, nu fakina tomanako budo saramana eraira,” Herod aminge sisira.

<sup>3</sup> Ainda beká mo: Herod giti setiri nunda mendeni era John sandi bundedo diburada ffituseri. Nu amingusira da susu mo: nunda koro Philip noaro javo Herodias,

<sup>4</sup> ava saghimbe bu ffitusira aindae, John nu Herod kena ghoghora eminge sedo ghusira, “Ni evetué bu ffitusesa amo, agho dari bejisesi,” aminge sedo ghusira.

<sup>5</sup> Amingiri, Herod nu John dari ambare dae kotisira. Avata Jusi embo John nu ferovetava sedo ghusera aindae, Herod oju usira.

<sup>6</sup> Avori, Herod da sirorari sifo aminda, nu evetu genembo mendeninde dabade kirumo useri. Kirumo ero, Herodias da gagara ira teredo yaru didiviri gido, Herod ivuga beká ava usira.

<sup>7</sup> Ava sedo, gagara aikena beka gagojuse sisira, “Ninda uju ava se ningone! Ni rejodae benunu saresa amo, mutarena,” Herod aminge setiri,

<sup>8</sup> Herodias da gagara, noi rea uju usira ava kotedo, eminge sisira, “John Bafataito Ari Kato da gifua ava, gafuge rooróda vendi mutaso, oroko eminda barena!” sisira.

<sup>9</sup> Setiri ningido, Kini (King) Herod dubo mema ambarako usira. Avata nunda esa embo da dombuda beka gagojusira aindae, nu bouvu edo, nunda mendeni amingaoro dae sisira.

<sup>10</sup> Setiri, ne era dibura da vasa aminda teredo, John duboda divegedo,

<sup>11</sup> gifua ava rooróda vendi budo fera gagara aikena futuseri. Mutero budo ira, noikena mutiri rurusira.

<sup>12</sup> Eteri dadabetiri, John da ambo jimbi fera, nunda tamo budo era ofofoda furuguseri. Furugedo, era Iesu kena osa siseri.

*14:13-21 Iesu Setiri Bayau Dige-tiri, Gegenembo 5,000 Mindero Inono Usira.*

*(Mark 6:30-44; Luke 9:10-17; John 6:1-14)*

<sup>13</sup> Ava osa setero ningido, Iesu namane budo era ghakada+ vosedo, reighi evetu genembo irae da vasa aminda sembiseri. Sembisera ainda bino ava, evetu genembo ningido, nenda reighi isambu dodo Iesu da amboda era, uvu da teria ainda den-gesida atai giti era buvurutuseri.

<sup>14</sup> Namane amboda buvudo, ghaka+ dari vitido, evetu genembo natofogo ava, totorugedo irero gosuseri. Gido, Iesu nendae joka

edo, setiri nenda kae evetu genembo jejebuguseri.

<sup>15</sup> Amingero ungo bu etiri, namane Iesu kena era buvudo siseri, “Iji dadabetira, a eminda evetu genembo a kambo tefori. Ava sedo, natofo dirigasao yama reighi mendeni mendeni aminda, bayau ombu mindarera!” siseri. Setero, Iesu namanekena sisira,

<sup>16</sup> “Redae yareri? Bayau nene mutuvu mindore!”

<sup>17</sup> Setiri, namane numokena siseri, “Namanekena farava ghabu soveni a oka etoto naká ava irira. Rejo eni tefori,” aminge siseri.

<sup>18</sup> Setero, Iesu sisira, “Averi, namokena bofuvu!” aminge sedo,

<sup>19</sup> nu natofo kikasada anumbaoro dae sisira. Setiri, ne fuge anumbetero, Iesu nu farava ghabu soveni a oka etoto naká ava budo, dombu utuda fainghuse, God kena ‘aiyakoe’ sisira. Sedo, farava jighi embebegedo namanekena mutiri, budo era evetu genembokena soro useri.

<sup>20</sup> Soro etero, evetu genembo isasambu mindero inono etiri, mendeni dotero fasusira. Ava namane rete budo, kanda babai isambu 12 ava vevenduseri.

<sup>21</sup> Gegenembo bayau risera amo, inono 5,000 avavagori. Evevetu a sasingu jo tegaeri.

*14:22-33 Iesu Nu, Vose Eva Etoda Fete Deinghede Isira.*

*(Mark 6:45-52; John 6:15-21)*

<sup>22</sup> Mindero dadabiri ainghae dabade, Iesu setiri namane ghakada+ vosedo, giti sembi yari dae ero, nu fetedo evetu genembo isambu dirigusira.

<sup>23</sup> Dirigetiri ero, nu nusuka enda jiro fumbari aminda, banungari dae sedo vitisira. Tumba jiriri, Iesu nusuka vasa aminda iriri,

<sup>24</sup> namane sembu fera soroda buvuruteri, yaura dombuda fusira aimi, eva yaura ai ghaka+ jighi jovereghari dae usira.

<sup>25</sup> Sifo da tumba aminda, Iesu vose eva etoda fete deinghe namanekena sembu fusira.

<sup>26</sup> Firi gido, namane oju beká ava edo, “Omo sukaruri!” sise, koko siseri.

<sup>27</sup> Namane koko sero nininguse ainghae dabade, Iesu namanekena sisira, “Fakina evu! Namori! Erá oju eove!” Iesu aminge setiri,

<sup>28</sup> Peter eredo numokena sisira, “Geka beká, ni Iesu gido resesa? Nimo iraresa amota, se, nambarago vose eva etoda fete, nimokena yaone!” Peter aminge sisira.

<sup>29</sup> Setiri, Iesu, “Fu!” setiri, Peter ghakada+ ghe vose, eva etoda fete Iesu kena isira.

<sup>30</sup> Ise, soroda eva yaura ava itatamedo, oju edo fati basedo vovosusira. Vovosuse, kori sisira, “Arie, Bajari, namo sonembe!” aminge siri,

<sup>31</sup> ainghae dabade Iesu nunda ungo sirege Peter rurusira. Budo, sisira, “Ninda tumondari jo inono iraeri. Ni redae dubo bunetesi?” aminge sedo,

<sup>32</sup> nengae ghakada+ vítero, yaura tukughedo binono usira.

<sup>33</sup> Etiri, namane ghakada+ kaifa erusera amo, kauboi dadarigedo Iesu tumonde bainghuseri. Use, siseri, “Geka bekári: ni God da Mandiri!”

*14:34-36 Iesu Kae Evetu Genembo Mendeni Setiri Jejebuguseri.*

*(Mark 6:53-56)*

<sup>34</sup> Aminge sedo, namane Iesu de dabade sembera reighi Genesaret aminda tere dadoruseri. Genesaret resena emo, reighi savavarari. Kotugo ainda jokáda, reighi veveyako mendeni irei.

<sup>35</sup> Ghaka+ dari vitero, evetu genembo ne fuge Iesu gido kasama useri. Kasama edo, kae evetu genembo bu furoro dae sedo, aghi mutero reighi mendeni mendeni aminda era, kae evetu genembo unumbedo budo fuseri.

<sup>36</sup> Budo fera buvudo, evetu genembo aimi, ne Iesu kena benunu siseri, nange kae embo Iesu da tamo asugari da tingu ava deredo jejebugaeteri. Aminge setero, mave sire dederusira amo, nu jebugusira.



# 15

## 15:1-20 *Bebeta Ari Da Gekari.* (Mark 7:1-23)

<sup>1</sup> Ainda amboda, Moses da Geka kaifa kakato+ a ijuga kakato+ mendeni, Jerusalem ghedo fera Iesu kena buvudo, numokena namanenda ategi useri,

<sup>2</sup> “Namondeda abumane rea edo ghusera a ijugedo ghusera ava, ninda ambo jimbi jo amingae eraera. Ne abumane da kiki ava kakara use, nenda ungo giti seghedo, bayau amboda bu mindido ghaeteri. Ne redae jo amingae eraeri? Se ningore!” aminge siseri.

<sup>3</sup> Setero, Iesu mino nemokena sisira, “Nanda ambo jimbi ne, abumane da agho dari doyaría reseva. Avata na nemokena resena. Nenda kotari a nenda uju ava use, nene God da Agho Dari ava dotutusevu.

<sup>4</sup> God eminge sisira:

‘Nei nimamo kakara use, nenda geka ava ningivu!’

A eni mo:

‘Mave noi o numamokena jijivu sarira amo, devu ambare!’

<sup>5</sup> Avata nemo, eminge ijugeraeva: genembo mave, noi numamo ighagha use, nunda gugua budo God kena mutari sise, noi numamo jo sonembae arira amo, avori. Ne aminge ijugeraeva.

<sup>6</sup> Evetu genembo avavaga use, noi numamo jo sonembae eraera amo, ne ‘avori’ seraeva. Aminguse, ne God da Geka ava dotutuse, nenda kotari ava seovo buveari, geka bekáva sise eraeva.

<sup>7</sup> Ne gungubo kakatori! God da feroveta Isaiah nendae sise, geka beká eminge gefusira:

<sup>8</sup> Bajari resira, ‘Evetu genembo emo, bekaimi na kakara eraera. Avata nenda dubo jokáda mo, ne soka bekári.

<sup>9</sup> Ne na tumonde baingheraera, avata beká eni tefori. Ne aminda sonemba eni jo bae arera.

Ainda beká mo: ne evetu genembo da kotari ava, God da Agho Dariva sise ijugeraera,’

Geka amo God setiri, Isaiah nendae sedo gefusira,” Iesu aminge sisira. Ainda beká mo: ne sembae kotedo ghuseri.

<sup>10</sup> Setiri dadabetiri, Iesu evetu genembo isambukena kori setiri, fera numokena totorugetero, Iesu nemokena sisira, “Ne erekoteva, evetu genembo ungo jo seghae iria edo, bayau bu mindarera aimi, tamo bebete arira. Eva ningido, kasama aovo dae sise resena.

<sup>11</sup> Evetu genembo rea mindarera aimi, nenda tamo jo bebete ae arira. O geka sembae evetu genembo da bekáda buvarira aimi, ne bebete arira. Ava ningido, kasama aovo dae sise resena!” Iesu aminge sisira.

<sup>12</sup> Setiri dadabetiri, namane era numokena buvudo siseri, “Nine setesa, ava ningido Moses da Geka kaifa kakato+ meka geri,” namane aminge setero,

<sup>13</sup> Iesu mino sisira, “Amo dovu! Moses da Geka kaifa kakato+ erá koteove! Amboda, nanda Afa utuda irira aimi eredo foama, geka bekáda bekáda sise, evetu genembo ijujarira. Kau genembo vare vive eraira aminga ava, arira. Ijuga kakato jo nune govári fetae usera ava, tuse babarigarira. O ijuga kakato nune govetiri fefetusera, avanembo doyarí fetarera.

<sup>14</sup> Ava sedo, Moses da Geka kaifa kakato+ mo, erá koteove! Ne diti digoideri. A ne eregoseva: genembo diti digoide aimi, jo ya nunda komana diti digoide ava unumbedo, nengae emboro evevada yae arera. Nengae dabade emboro kosasaghedo ya bakoda durarera,” aminge sisira.

<sup>15</sup> Setiri, Peter eredo sisira, “Kasia da tuka ava ijugaso ningore!” Peter aminge setiri,

<sup>16</sup> Iesu namanekena sisira, “Ne nangetiraimi geka setena da beká ava jo kasama ae erevu? Nemo nanda ambo jimbiri. Avata na

eregosena, nenda kotari kikitakori, evetu genembo mendeni da kotarigori.

<sup>17</sup> Ne anakora geke evia kasama aetevu! Genembo bayau rea mindarira amo, tininda vosiyari ya foká ari dadabarira.

<sup>18</sup> Avata nu geke rea bekaimi seraira amo, dubo joká isambuimi seraira. Aimi nu bebeta eraira.

<sup>19</sup> Ainda tuka mo: nu rea dubo jokáda koteraira aimi, nu derari komanana dari ambarira, kombo yagera arira, bagia arira, gungubo sarira, aji sarira, a ari ekoko mendeni arira.

<sup>20</sup> Aimi genembo da dubo joká bebeta eraira. Avata Moses da Geka kaifa kakato+ da ijuga ava kotae edo, ungo jo seghae iria edo bayau mindareva aimi, nenda dubo joká jo bebeta ae arira,” Iesu aminge sisira.

*15:21-28 Jusi Embo Da Gitofu Evetu Eniimi, Iesu Tumondusira. (Mark 7:24-30)*

<sup>21</sup> Iesu nu reighiá dodo, ira gitofu da reighi etoto, javo Taiar a Saidon, ainda frovensi aminda teterusira.

<sup>22</sup> Teteriri, oro Keinan embo da evetu eni fira numokena buvudo sisira, “Bajari, David da Mandi God mutari sisira amo, nimori. Ava sedo, na joka aso dae resena. Sukarui nanda gagarakena asugetiri, mema teria ava itatamuse irira.”

<sup>23</sup> Aminge sisira avata, Iesu numokena geke mino eni jo sae usira. Namane numokena era siseri, “Evetué dirige yare! Nu namondeda amboda amboda fuse beisiga udo refira.”

<sup>24</sup> Aminge setero, nu sisira, “Na jo oro mendeni mendeni ava sonembari dae sedo furaeri. Namondeda natofu Jusi embo God dodo irera, ava sonembaono dae sedo, God na dirigetiri fuseni,” nu aminge sisira.

<sup>25</sup> Namane Iesu de dabade aminge sero ningido, evetuá fira dombukena buvudo, kauboi dadarigedo Iesu kena sisira, “Bajari, namo sonembe!”

<sup>26</sup> Aminge setiri, Iesu mino numokena eminge sisira, “Ne namanenda gitofuri. Namane nendae ‘sinova’

seraera. God namanenda abua Abraham gategusira, a namanenda oro barago gategusira. Ava sedo, God da sasingu giti bayau mindaeteri. Nenda bayau budo sinodae fugarena amo, jo eveva iraeri. Ava sedo, ni redae sonembareni?” aminge sisira.

<sup>27</sup> Setiri, evetuá sisira, “Ai, Bajari! A nu beká resesa. Avata evetu genembo beká bayau rirureoro, susunda dudurugeari, sinomane ne ava mindiraera. Ava sedo, na joka edo sonembaso dae resena.”

<sup>28</sup> Aminge setiri, Iesu mino numokena sisira, “Aiya, evetugo! Ni na tumonde gogogho eresa! Ava sedo, benunu setesa, ava nimokena siro-rare!” Iesu nu aminge siri ainghae dabade sukaru darigetiri, evetu ainda gagara jebugusira.

*15:29-31 Evetu Genembo Digari Ava, Iesu Setiri Jebuguseri.*

<sup>29</sup> Iesu namane budo reighiá dodo ira, uvu da teria javo Galilee ainda tinguda isira. Aminda ise, Iesu enda jiro fumbari aminda viti ganasa ifuda anumbusira.

<sup>30</sup> Anumbetiri, evetu genembo digari fera numokena totoruguseri. Evetu genembo ata sembaede, diti digoide, ungo ata ambaride, beka guga, a kae evetu genembo mendeni ainde dabade ava budo fera, Iesu da dombuda buvudo fitero anoseguseri. Anosegetero, Iesu setiri jebuguseri.

<sup>31</sup> Jebugedo, evetu genembo beka gugaá tuturo edo beka siseri. Ata sembae eveva useri. Ungo ata ambari jebuguseri. A diti digoideá diti eveva usira. Amingiri, evetu genembo isasambu ava gido dudukughuseri. Dudukughedo, ne Israel embo da God dae sakai siseri.

*15:32-39 Iesu Setiri Bayau Dige-tiri, Gegenembo 4,000 Mindero Inono Usira.*

*(Mark 8:1-10)*

<sup>32</sup> Amboda, Iesu kori setiri, namane era numokena buvero sisira, “Evetu genembo namonde sifo etodaba naká deinghuse bayau dadabetiri gido, na nendae joka erira.

Erama dirigeóno kambo da ise, emboroda ighoi sirivo eore dae sise resena!” Iesu aminge setiri,

<sup>33</sup> namane numokena siseri, “Namonde nange nange farava budo mutoro mindareri? Reighi eminda, evetu genembo a nati tefo ava sedo, bayau tefori,” namane aminge siseri.

<sup>34</sup> Setero, Iesu namanekena ategi usira, “Nemokena farava nanjogo iri?” setiri, namane siseri, “Namanekena farava 7 a oka veveyako etoto naká ava irira,” aminge setero,

<sup>35</sup> Iesu natofo endada anumbaoro dae sisira.

<sup>36</sup> Setiri, ne fuge anumbetero, Iesu farava 7 okaghae budo God Afakena ‘aiyakoe’ sedo, jighi embebedo namanekena mutiri budo, evetu genembo isambukena soro useri.

<sup>37</sup> Etero budo, ne isasambu mindero inono usira. Etiri, mendeni dotero fasusira ava rete budo, kanda babaimi isambu 7 ava vendero bedo usira.

<sup>38</sup> Gegenembo bayau risera amo, inono 4,000 avavagori. Evevetu a sasingu jo tegaeri.

<sup>39</sup> Etiri dadabetiri, Iesu natofo amo dirigetiri ero, nu ghakada+ vosedo, Megadan embo da reighida sembisira.

## 16

*16:1-12 Iesu Moses Da Geka Kaifa Kakato+ Ava, Erá Tumondeóro Dae Sisira.*

*(Mark 8:11-13,14-21; Luke 12:54-56)*

<sup>1</sup> Moses da Geka kaifa kakato+ mendeni nemonde Sadusi embo+ ainde dabade, Iesu deroro beka sembae sari ningari dae sedo, numokena fuseri. Geka sembae sari ningido, numoá bu koto ari dae sedo, Iesu kena fera siseri, “Ni God da fakina aimi, tano aso gari dae resera!”

<sup>2-3</sup> Aminge setero, Iesu mino eminge sisira, “Nenda kotari kikitakori. Yaura sufurureari gido, ‘Eva

erari dae erira,’ ava koteraeva. O foroga dadorureari gido, ‘Reighi eko arira,’ ava koteraeva. Ne yaura a foroga gido, ainda tuka kasama e gogoghomberaeva. Avata roera a tano oroko sireari giraeva amo, redae buneraevu?

<sup>4</sup> Evetu genembo siroredo oroko endada irera, ne taká ekoko bekári. Ne God itako jo kotae eraera. Ainda mendeni mo, nemori. Ne tano iju-gaono gari dae reseva. Avata na jo ururono gae areva. Nu, dabako ururono gareva. Jonah ambarigedo iji etodaba naká oka da tini jokáda ireira edo, fira buvurutusira. Kau daba aminga ava namokena siro-rari gido bunareva,” Iesu aminge sedo, Moses da Geka kaifa kakato+ a Sadusi embo+ aminda dodo isira.

<sup>5</sup> Namane uvu da teria aminda sembisera amo, namane kasama useri, farava kotae dodo sembiseri.

<sup>6</sup> Amingetero, Iesu namanekena sisira, “Diti gi gogoghombevu! Moses da Geka kaifa kakato+ a Sadusi embo+ nenda yisti (yeast)<sup>6</sup> ava imboe edo, darigaovo dae resena.”

<sup>7</sup> Nu aminge setiri, namane farava bekáva kotise, tofo tofo se nininguseri, “Omo rejodae resi? Namonde farava kotae dotera aindae resira, tanojo,” namane aminge bunise se nininguseri.

<sup>8</sup> Namane rejodae se niningusera ava, Iesu kasama edo namanekena sisira, “Nemokena tumondari tefori! Ne redae faravadae resevu?”

<sup>9</sup> Ne nangetirai anakora kasama ae iriavu? Kote givu! Na giti farava ghabu soveni jighi embebedo ghaseteno, gegenembo 5,000 mindero inono etiri, kanda babai nanjogo ava vevendusevu? A kote givu!

<sup>10</sup> A kotugo, amboda farava 7 ava jighi embebedo ghaseteno, gegenembo 4,000 mindero inono etiri, kanda babaimi nanjogo ava vevendusevu? A barago kote givu! Ai

<sup>6</sup> **16:6:** Iesu nu, Moses da Geka kaifa kakato+ da ijuga aindae ijugaboro ‘yisti’ (yeast) kena fifituse sisira. Ainda tuka mo: yisti nu farava jokáda teredo dereari farava bajairaira aminga ava, Moses da Geka kaifa kakato+ da gungubo natofokena bajii teria usira.

resira amo: farava saono sirorari da fakina namokena irira. Ava ko-taetevu!

<sup>11</sup> Ne anakora kasama aetevu: na Moses da Geka kaifa kakato+ a Sadusi embo+ da yisti setena amo, na jo farava beká aindae sise saeri,” Iesu aminge sisira.

<sup>12</sup> Aminge setiri, namane kasama useri: nu jo farava ingari da yistidae saeri. Nu kasia sise, Moses da Geka kaifa kakato+ a Sadusi embo+ da ijuga erá ningeore dae sisira.

*16:13-20 Iesu Nu God Da Mandi Beká, Ava Peter Kasama Edo Isagha Sisira.*

*(Mark 8:27-30; Luke 9:18-21)*

<sup>13</sup> Amboda, namane Iesu da karonu edo era, reighi javo Sesaria Filipai ava utua edo, Iesu tofo nundae sedo ategi usira, “Sevu ningone! Evetu genembo nange erekoteri? Evetu Genembo da Koro+ mavejori?” aminge ategi usira.

<sup>14</sup> Ategi etiri, namane eminge sis-eri, “Mendeni koteraera, John Bafa-taito Ari Kato ambarida ghe, je-bugedo erariá seraera amo, nimori. A mendeni mo, Elijah, Jeremiah, o feroveta eni ambudo ambarida ghe jebugedo erariá seraera amo, ni-mori. Evetu genembo ne aminge kotise seraera.”

<sup>15</sup> Namane aminge setero, Iesu sekago ategi usira, “Atá, ne nange erekotevu? Na mavejori? Sevu ningone!” setiri,

<sup>16</sup> Peter mino eminge sisira, “God evovodae irira aimi, nunda Mandi mutari sisira, amo nimori. Nama-nenda ari ekoko kote doyari dae sedo, ni dirigitiri fusesi.”

<sup>17</sup> Aminge setiri, Iesu Peter kena sisira, “Arie, Simon, Jonah da mandi! Geka setesa ava, God ijugetiri kasama etesi. Ainda tuka mo: jo evetu genembo nene kasama ari da kaugo iraeri. Nanda Afa utuda irira aimi, setiri kasama etesi.

<sup>18</sup> Nimokena resena: ninda javo seka Peter jijigherena. Ainda tuka mo: ghamanari. Ghamana amo, nu

susu ari ainda etoda, nanda ekare-sia+ nane itarena. Nanda ekaresia+ resena emo, fakina ururari, Ambari imi jo foa nanda ekaresia gajari in-ono ae arira.

<sup>19</sup> Na nimokena ki (key) eni mu-tari dae erena. Aimi guro afigaso, natofo God kena ya buvoro nune kaifa arira. Ni endada irise rea digharesa amo, God Afa utuda irise digharira. Kau daba aminga ava, ni endada irise rea vujegaresa amo, God Afa utuda irise vujegarira.”

<sup>20</sup> Aminge sedo, Iesu kovionoghae namane erama nu Keriso numoá, osa seóro evetu genembo ningeore dae sedo buregusira.

*16:21-28 Iesu Nu Nange Ambarira Aindae Osa Sisira.*

*(Mark 8:31–9:1; Luke 9:22-27)*

<sup>21</sup> Iesu aminge sisira ainda am-boda, nu tuturo edo isagha beká den-goro induduse, namanekena eminge sedo ghusira, “Na yama Jerusalem aminda terono, evetu genembo da babojegari, fristi+ da kokotofu, a Moses da Geka ijuga kakato+ na san-dido, namokena mema tomanako mutoro itatamarena. Amo emingar-era. Ne saoro evetu genembo mendeniimi na daoro ambudo, sifo etodaba naká dadabari ainda am-boda, na sekago ambarida ghe je-buge erarena.”

<sup>22</sup> Setiri dadabetiri, Peter nu eredo Iesu budo nengae era ajagha fetedo, Peter tuturo edo Iesu dombuda sisira, ‘Bajari, seteso ningera ava, erama siroureure dae sedo, God buregaeti. Amo nimokena jo sirorae aeti,” Peter aminge sisira.

<sup>23</sup> Avata Iesu jovereghedo Peter kena eminge sisira, “Satan, na dari-gaso dae resena. Ni namo buregari dae eresa. Kotari resesa emo, jo God da kotari iraeri. Amo evetu genembo da kotariri,” Iesu Peter kena aminge sedo,

<sup>24</sup> namane isambukena sisira, “Mave nanda ambo jimbi edo, namonde dabade deinghari sarira amo, nu emingarira. Nu nunda uju amo dodo, nanda uju avanembo

arira Nu namo tumonduse, gitofudae jo oju ae, mema ã bouvu fufudo ya ambarira, a nu avori. A nane rea eraena ava, nu ari kau daba ava udo yarira. Amingarira amo, nu nanda ambo jimbi edo, namonde dabade deingharera.

<sup>25</sup> Ainda tuka mo: mave nu enda einda gugua kotise, a ambari dae oju use na doyarira amo, nu sifo amboda ambarira. O mave nandae sedo ambarira amo, nu amboda jebuga evovoda irari ava tuve barira.

<sup>26</sup> Mave nu enda da gugua ava dubo ruruse, roera isambu nunda tofo sise, jebuga evovoda irari ava kosasaghedo ambarira amo, givu! Aimi nu sonembarira, ai? Avata aimi, nu jo sonembae arira.

<sup>27</sup> Ainda tuka mo: Evetu Genembo da Koro+, jovereghe aneyade dabade a God Afa da usasa ainda jokáda vose furarira. Sifo aminda, nu evetu genembo isambu nenda irari ava ijunedo, ainda mino mutarira. Ari ekoko usera, ainda mino eko mutarira. O ari eveva usera, ainda mino eveva ava mutarira.

<sup>28</sup> A na geka beká nemokena resena. Ne mendeni eminda fetireva emo, ne jo ambae irovo, Evetu Genembo da Koro+ nunda fakina budo, kau kini (king)<sup>28</sup> da kaugo ava edo fururari gareva,” aminge sisira.

## 17

*17:1-13 Iesu Dombu Jovereghedo, Usasa Beká Ava Usira.  
(Mark 9:2-13; Luke 9:28-36)*

<sup>1</sup> Sifo 6 ava dadabetiri ainda amboda, Iesu nu eredo, Peter, James, a nunda mandako John, gatege budo nemonde esike era, doriri mindafu eni aminda vitiseri. Vasa aminda evetu genembo eni tefori.

<sup>2</sup> Doririda viti fetedo gosero, Iesu nu jovereghedo kau eni usira. Nunda dombu mo, kau iji da usasa aminga ava edo jaraghusira. A nunda tamo asugari barago, foyago beká ava use, usasa beká ava usira.

<sup>3</sup> Etiri, Moses Elijah ghae, ne giti beká endada iriara ava, nengae fera isagha edo Iesu de dabade geka se niningero, nunda ambo jimbi etodaba naká ne gosuseri.

<sup>4</sup> Gido, Peter Iesu kena sisira, “Bajari, namane budo ojesa aindae sedo, na ivuga erena. Ni nange erekotesi? Eveva mo, na dobo etodaba naká eminda itone? Eni nindae, eni Moses dae, a eni Elijah dae itone, ai?”

<sup>5</sup> Peter aminge siri, foroga eni foyago beká ava fira, nenda jiro agada fefetusira. Fetiriri, foroga ainda jokáda beka siri ne niniguseri, “Emo nanda dubo bari Mandiri. Na, nundae ivuga beká use, aiyakoe resena. Nunda geka ava ningivu!” beka aminge sisira.

<sup>6</sup> Siri, nunda ambo jimbi etodaba naká ne oju beká ava edo endada du fafasuseri.

<sup>7</sup> Du fafasetero, Iesu nemokena ira tamonda deredo sisira, “Erevu! Erá oju eove!”

<sup>8</sup> Setiri, ne dombu fainghedo, Iesu nusuka fetiriri gosuseri.

<sup>9</sup> Gido, ne jovereghe Iesu de dabade vose fuse, Iesu nemokena sisira, “Oroko rea geva amo, erá osa seove! Evetu Genembo da Koro+ daoro ambudo, ambarida ghe jebuge erarira, ainda amboda osa sareva, a nu avori,” aminge sisira.

<sup>10</sup> Setiri, Peter, James, a John numokena ategi useri, “Moses da Geka ijuga kakato+ eminge seraera: ‘Elijah giti endada ireira ava, sekago jovereghe furarira ainda amboda, God Genembo eni mutari sisira amo, sirorarira.’ Amo redae aminge ser-aeri?” ne aminge ategi useri.

<sup>11</sup> Etero, Iesu nemokena sisira, “Aminge seraera ainda beká mo: Elijah giti foama Evetu Genembo da Korodae+, emboro rerebuse roera simbugaetira.

<sup>12</sup> Avata, na nemokena resena: amo anakora sirorusira. Elijah anakora jovereghe fira iriri, evetu genembo mendeniimi nu bunedo,

<sup>28</sup> **16:28:** Afige, **Geka Se Disugari Da Vasa** aminda, geka *Natofu* dae rea gefusera, ava tege garesa.

budo nenda uju ava useri. Amboda Evetu Genembo da Korokena+, kau daba aminga ava use, mema numokena mutoro itatamarira,” aminge sisira.

<sup>13</sup> Setiri, nunda ambo jimbi kasama useri: nu Elijah sisira amo, John Bafataito Ari Kato dae sisira.

*17:14-21 Sukaru Mandi Enikena Asugedo Ireira Ava, Iesu Setiri Dari-gusira.*

*(Mark 9:14-29; Luke 9:37-43)*

<sup>14</sup> Ne vose fera namanekena, a evetu genembo mendeni totorugedo irisera aikena, buvurutuseri. Buvoro, genembo eni ira, Iesu da dombuda kauboi dadarigedo sisira,

<sup>15</sup> “Arie, Bajari! Nanda mandidae joka aetesi! Nu jinongu tambudo eko beká ava eraira. Umbu mendeni, nu ungo ata dadadagheari, endada du fasedo, afufe ya avaraka etoda vitiraira o uvuda tifugheraira.

<sup>16</sup> Amingeraira ava, budo ojena ninda ambo jimbikena ijugetena ava, ne jo aoro jebugaeri. Etiri, na bune Jaredo, nimokena bu refena.”

<sup>17</sup> Setiri, Iesu eminge sisira, “Ne isambu sembae eraeva. Nangetiraimi ne tumondari tefori? Eveva mo: na ne doyaetena ava avori! Na erebunena. Avori, mandi reseva, namokena budo fuvu gaone vae!”

<sup>18</sup> Aminge setiri budo fera buvero, Iesu nu sukarukena kovionoghae setiri, sukaru mandi ainda jokáda ava vose darigetiri, mandiá jebugusira.

<sup>19</sup> Amingetiri dadabetiri ainda amboda, namane kikiako era, Iesu de dabade se nininguseri, “Namane ondera amo, nangetiraimi sukaru jo vose darigaeri?”

<sup>20</sup> Aminge setero, Iesu namanekena sisira, “Nenda tumondari jo inono irae, ava sedo, seteva, nu jo jebugaeri. Kotovo dae resena. Nenda tumondari itako, kau ika maine ainda vuji da kaugo ava iratira amo, ne doriri oindae, ‘Darige yasi, sovenikena fetase!’

saeteva amo, nu amingaeti. Ne rejo saeteva amo, siroraeti.

<sup>21</sup> Avata sukarudae eminge resena. Sukaru eviviga ondari sareva amo, bayau kanangara use God kena utua fetedo, banunguse irareva. Emboro eni tefori,” Iesu aminge sisira.

*17:22-23 Iesu Nu Nange Ambarira Ava, Sekago Osa Sisira.*

*(Mark 9:30-32; Luke 9:43-45)*

<sup>22</sup> Sifo eni, Iesu da dorevare isambu namane namonde dabade, Frovensi Galilee aminda totorugetero, Iesu namanekena sisira, “Evetu Genembo da Koro+ ava sandido, gegenembo mendeni da ungodá fitoro

<sup>23</sup> daoro ambarira. Avata sifo etodaba naká dadabari ainda amboda, God sari nu ambarida ghe jebuge erarira,” nu aminge setiri, namane ningido bate dombu useri.

*17:24-27 Iesu Nengae Peter Ghae, God Da Kambo+ Da Takesi Ofuseri.*

<sup>24</sup> Iesu namonde dabade era reighi Kaponiam aminda teretero, God da Kambo+ ainda takesi bari kakato Peter kena era ategi useri, “Nenda ijuga kato God da Kambo+ da takesi omburaira, ai tefo?” aminge setero,

<sup>25</sup> Peter sisira, “Ai, omburaira. Redae resevu?” aminge sisira. Sedo, kamboda ira teretiri, Iesu giti tuturo edo andae ategi usira, “Simon, ninda kotari ava se ningone! Enda eminda kini (kings) a kokotofu mavekena takesi buraeri, nenda sasingukena, ai, gitofukena?” setiri,

<sup>26</sup> Peter, “Gitofukena buraera,” setiri, Iesu sisira, “Beká resesa. Kini (king)da sasingu ne takesi jo ombae eraera. Ava sedo, na God da Kambo+ da takesi jo ombae aeteni.

<sup>27</sup> Avata erá dumo eore dae sedo, ombarena. Avori, emingaresa. Yasi, uvu da teria ainda betuda fetedo, kimai fugaso, oka eni giti foa gambari jumbaresa, ainda békada, moni+ eni tambaresa. Amo, nangaeda takesi da inono ava baresa. Avori, moni

21 **17:21:** Tuturo 21 da geka, Baiboro (Bible) ana mendeni ainda jokáda fitero iriri tafuseri. O Baiboro (Bible) mendeni ainda jokáda, jo fitero teraeri.

ava budo yama, nangaeda takesi ai ombaresa,” Iesu aminge sisira.

## 18

*18:1-5 Genembo Teria Ari Dae Aresa Amo, Emingaresa.*

*(Mark 9:33-37; Luke 9:46-48)*

<sup>1</sup> Sifo daba aminda, namanenda mendeni era Iesu kena buvudo ategi useri, “God da natofo+ ainda jokáda, genembo teria beká mavejori?” namanane aminge setero,

<sup>2</sup> Iesu nu mandi kitako eni setiri fira buviri, namanenda soroda fitiri fefetusira.

<sup>3</sup> Fetetiri, Iesu eminge sisira, “Geka emo kotovo dae resena. Sasingu ne ivuga use geka ningi tumonderaera. Ava sedo, ni jo dubo jovereghedo, sasingakoi eraera, ainda kaugo ava ae aresa amo, ni jo God da natofo+ eni ae aresa.

<sup>4</sup> Mave tofo fitari vosedo, kau mandi ijoghako eminga ava arira amo, nu God da natofo+ jokáda teria beká ava arira.

<sup>5</sup> A geka eni mo: mave, nanda javoda sasingu evivaga ava nati joká doruse, bu tavo arira amo, nu inono, namoá nati joká doruse, bu tavo arira,” Iesu aminge sisira.

*18:6-9 Erá Kokomana Dereóvo Ari Ekoko Eore!*

*(Mark 9:42-48; Luke 17:1-2)*

<sup>6</sup> Aminge sise, Iesu sisira, “O genembo mave foa, sasingako evavagoimi namo tumonderaera, ava derari, ari ekoko arera amo, derari kato amo, amboda mema mindafugo ava tambarira. Eveva mo: genemboá nanda sasingu jo derae irari, gitofui foa, ghamana mindafu budo genembo ainda duboda dighido, bu fugari kafuruda tifughari dadabaeti. O nu, sasingu namo tumonderaera eminga ava, derari gido, God aindae mema mutari tambarira amo, eko a bouvugori.

<sup>7</sup> Enda eminda derari foa gheraira amo, eko bekári. Jo darigari da

kaugo iraeri. A enda da natofo isambukena derari foa gheraira amo, mará, bouvu a veverago ava itatamuse irera. Avata genembo mave nunda kokomana derari ari ekoko arera amo, nu mema teria beká ava tambarira.

<sup>8</sup> “Ninda ungo o ata aimi, dara aso ari eko sirorarira amo, gafuge fugaresa. Eveva mo: ni ungo o ata soveni taukaka iria ambudo, ya God kena jebuga tambaetesi. O ni ungo a ata etoto aminge irise, ari ekoko use iria ambudo, ya ari ekoko mino mutari vasa avarakaghae aminda teraresa amo, eko a bouvugori.

<sup>9</sup> O ninda ditiimi gosuse, ni ari eko aso sirorarira amo, gunumbe fugaresa. Eveva mo: ni diti soveni taukaka iria ambudo, ya God kena jebuga tambaetesi. O ni diti etoto aminge irise, ari ekoko use iria ambudo, ya ari ekoko mino mutari vasa avarakaghae aminda teraresa amo, eko a bouvugori,” Iesu aminge sisira.

*18:10-14 Iesu Namonde Sonembari Dae Uju Erira.*

*(Luke 15:3-7)*

<sup>10</sup> Aminge sise, Iesu namanekena sisira, “Na eminge resena. Erá sasingu emingako ava kotae use imboe eove! Ainda susu mo: God ne dubo bu gogoghomberaira. A sasingu emingako amo, nenda aneya sifo ghousa God Afa utuda irira, ainda dombuda fetirá gheraera.

<sup>11</sup> “Evetu Genembo da Koro+, evetu genembo sirivo use irera ava, sonembari dae sedo fusira.<sup>11</sup>

*18:15-17 Namondeda Namendi Dara Arira Amo, Namonde Emingarera.*

*(Luke 17:3)*

<sup>15</sup> Aminge sise, Iesu sisira, “Ninda namendi eni nimokena dara arira amo, yasi nengae kikiako dabade anumbedo, ninda dubo mema saso ningare! Ninda geka ningido nu dubo jama arira amo, avori, nengae dubo dabako edo irareva.

<sup>11</sup> **18:11:** Tuturo 11 da geka, Baiboro (Bible) ana mendeni ainda jokáda fitero iriri tafuseri. O Baiboro mendeni ainda jokáda, jo fitero teraeri.

<sup>16</sup> O ninda geka jo ningae arira amo, God da Geka rea aso dae resira, ava aresa. Evetu genembo etoto o etodaba ava budo ya, ninda namendide dabade anumbedo, dubo kotare dae sedo, geka sekago sirurovo ningarira!

<sup>17</sup> O nu evetu genembo ainda geka barago jo ningae arira amo, ni dara ainda susu ekaresiakena+ isagha saso ningarera. Nu tumondari+ embo da geka barago jo ningae arira amo, ne kau gitofu da kau aminga ava, nu imboe use, nemonde jo dabade umo gamo ae areva,” Iesu aminge sisira.

*18:18-20 Banungari Da Fakina Mo, Kau Emingori.*

<sup>18</sup> Aminge sise, Iesu sisira, “Na andae sedo, kasama aovo dae eminge resena. Ne endada irise rea dighareva amo, God Afa utuda irise digharira. Kau daba aminga ava, ne endada irise rea vujegareva amo, God Afa utuda irise daba ava vujegarira.

<sup>19-20</sup> “Eni mo, evia sari dae erena. Etoto o etodaba nanda javoda totorugareva amo, na namonde dabade totorugarera. Ava sedo, nengae komanaghae dabade dubo dabako edo, nanda javoda rejodae banungareva amo, nanda Afa utuda irira aimi ningido sari, nenda uju amo siorarira,” Iesu aminge sisira.

*18:21-35 Saramana Kato Eni Nunda Komanadae Jo Joka Ae Etira, Aında Kasiari.*

<sup>21</sup> Amboda, Peter Iesu kena ira ategi usira, “Bajari, nanda namendi dara namokena arira amo, na umbu nanjogo kote doyaereni? Umbu 7 ava kote doyaarena, ai? Nange areni?”

<sup>22</sup> Peter aminge setiri, Iesu sisira, “Tefo, umbu 7 ava jo sae aresa. Ni umbu 500 saresa ava, avori. Aında susu mo: ninda namendi da dara ni jo tegae aresa.

<sup>23</sup> God da natofo dara eraera, nange tofo tofo kote doyaetera ava, kasama aovo dae sedo, kiki eni sari dae erena. Kini (king) eni tuturo edo,

nunda natofo numokena moni rea mutaetera ava, dere gira.

<sup>24</sup> Nu tuturo edo amingiri, nunda mendeni genembo eni unumbedo budo ojeri. Genemboá nu kini kena K600,000,000 ava mutaetira.

<sup>25</sup> Avata nunda moni+ ava daiva etira. Etiri, kini (king) eminge setira, ‘Avori, genemboé noaroghae, nunda sasingude, a nunda roera isambu oriro aovo, aında moni+ ava barena,’ kini aminge setira.

<sup>26</sup> Setiri, genemboá nu kini da ata duruda kauboi dadarigedo setira, ‘Nandae joka use durumugururaso, na moni tambudo, mutono isambu baresa,’ nu aminge setiri,

<sup>27</sup> kini genembo andae joka edo setira, ‘Ni dara usesi. Avata rea mutaetesa ava, na kote dotutuse, jo bae arena,’ kini aminge sedo, genemboá dotiri aira.

<sup>28</sup> “Avata genemboá aira, nunda komana eni tambira. Nunda komana amo genembo aikena K1,000 avavaga mutaetira. Genemboá nunda komana ava tambudo, duboda safuse setira, “Nanda moni+ bofu baoneta!”

<sup>29</sup> Setiri, nunda komanaá du fasedo setira, ‘Nandae joka use durumugururaso, na moni tambudo, isambu mutono baresa,’ aminge setira.

<sup>30</sup> Avata genembo amo, nu jo joka aeri. Nunda moni mutari bari dae sedo, setiri nunda komana diburada fiteri.

<sup>31</sup> Genembo diburada fitera aında kokomana mendeniimi ava gido bune Jaredo, kinikena aera osa seteri.

<sup>32</sup> “Setero ningido, kini aghi etiri, genemboá ojira buviri, numokena setira, ‘Ni genembo ekori! Ni namokena benunu seteso, moni isambu namokena mutaetesa ava, na kote dotutuse jo baeri.

<sup>33</sup> Na nindae joka etena, kau daba aminga ava, ni komanadae joka aetesi.’

<sup>34</sup> Kini nu janje eko beká ava edo, aminge sedo, dibura kaifa kakatokena setira, ‘Genembo emo bu ya-



sivu! Kaifa ururovo, moni isambu mutari baono gido, doyovo ya buvarira,' kini aminge setira," Iesu aminge sise, kiki tano ari dae sedo, eminge sisira, "Avori, kini da kiki ainda tuka ava kotovo dae resena. Ninda namendi nimokena dara arira ava, ni jo dubo isambuimi kote doyaes aresa amo,

<sup>35</sup> nanda Afa utuda irira aimi, ninda ari ekoko barago jo kote doyaes arira," Iesu aminge sisira.

## 19

### *19:1-12 Evetu Doyari Da Gekari. (Mark 10:1-12)*

<sup>1</sup> Iesu aminge setiri dadabetiri, nu Frovensi Galilee dodo, uvu Jordan sembudo betu soveni iji vitarikena, aminda ira, Frovensi Judia aminda teterusira.

<sup>2</sup> Aminda, evetu genembo digari totorugedo, nunda amboda amboda ero, nu setiri ne jebuguseri.

<sup>3</sup> Moses da Geka kaifa kakato+ mendeni fera, numo deroro geka sembae sari ningari dae sedo, ategi useri, "Namondeda Agho Dari nange resi? Se ningore! Genembo kotae kotae nunda ujuda noaro doyaeti, ai?"

<sup>4</sup> Aminge setero, Iesu sisira, "God geka setiri Moses gefusira amo, tegutusevu, ai? Geka amo eviri:

"Tuturoda, God utu enda etiri sirorusira. Ainda sifoda, nu setiri, genembo evetughae siroruseri.'

<sup>5</sup> A geka eni mo: 'Aindae sedo, genembo noi numamo dodo evetu fitido, nengae tamo fisi dabako arera.'

Amo God da Gekari.

<sup>6</sup> Ava sedo, evetu genemboghae nenda irari, jo nunda nunda iraeri. Nenda irari dabakori. Aindae sedo, God setiri dabade tatisera ava, jo evetu genemboi vujegari da kaugo iraeri. Ava sedo, genembo noaro jo doyaes arira," aminge sisira.

<sup>7</sup> Setiri, Moses da Geka kaifa kakato+ sekago ategi useri, "Ni resesa amo, namane kasama erera.

Avata Moses eminge sisira, 'Nearo doyari saresa amo, ninda geka gembudo mutaso nearo bu gosururari, doyaes,' Moses nu aminge sisira. Ava sedo, ni evetu jo doyaes ari da geka resesa ava, geka beká irae-tira amo, Moses redae aminge sisi? Nengae Moses ghae da geka jo foa dabako aeri."

<sup>8</sup> Ne aminge setero, Iesu mino nemokena eminge sisira, "Ne gogore vanembori, a ijuga jo bae eraeva; ava sedo, Moses aminge gefusira. Avata tuturoda, God utu enda etiri sirorusira ainda sifoda, gegenembo nenda evevetu jo doyaes edo ghuseri.

<sup>9</sup> Ava sedo, geka emo ningido kasama aovo dae resena. Genembo, noaro yagera jo ae irarira, ava dodo ya, evetu eni fitarira amo, nu evetu giti fiftusira aikena dara arira. Ainda javo mo yagerari," Iesu aminge sisira.

<sup>10</sup> Setiri, namane numokena siseri, "Evetu genemboghae amingaoro dae saresa amo, namane evevetu jo fitae arera, tanojo."

<sup>11</sup> Aminge setero, Iesu sisira, "Ari emo jo evetu genembo isambui ari da kaugo iraeri. Nu, mavekena God fakina mutarira amo, nu amingarira.

<sup>12</sup> Gegenembo mendeni evetu jo fitae eraera da susu, jo dabako iraeri. Mendeni mo, jebure tefo siroruseri. Mendeni mo, evetu genembo ungoimi eoro amingedo irá gheraera. A mendeni mo, God da saramana a nunda natofo sonembari dae kotise, evetu jo fitae eraera. Mave inono arira amo, nu amingare!" Iesu aminge sisira.

### *19:13-15 Iesu Nu Sasingako Ava Esimbugusira.*

*(Mark 10:13-16; Luke 18:15-17)*

<sup>13</sup> Evetu genembo mendeni nenda sasingu, Iesu banunguse esimbugare dae sedo budo fuseri. Budo fera buvero gido, namane ghoghora siseri.

<sup>14</sup> Avata Iesu ava gido, namanekena sisira, "Sasingako emo, erama buregeove! Dovu namokena furore! Ainda tuka mo: ne ivuga

use nanda geke ningi tumonderaera. Mave amingarira amo, nu God da natofo+ arira,”

<sup>15</sup> Iesu aminge sise, nunda ungo sasingu da tamonda fitiri dadabetiri, reighiá dodo isira.

*19:16-30 Kotofuko Eni Nunda Guguadae Ghamo Ruruse, Iesu Ighagha Usira.*

*(Mark 10:17-31; Luke 18:18-30)*

<sup>16</sup> Sifo eni, genembo eni Iesu kena fira ategi usira, “Ijuga Kato, na eveva rejo ava edo, jebuga evovodae irari amo tambareni?”

<sup>17</sup> Aminge setiri, Iesu sisira, “Ni redae namokena ari eveva andae ategi eresi? God nusuka numoá evevari. Jebuga evovodae irari ava tambari dae saresa amo, God da Agho Dari ava kaifa use iraresa,” Iesu aminge sisira.

<sup>18</sup> Setiri, genemboá ategi usira, “Agho Dari ningaindae resesi?” aminge setiri, Iesu mino numokena sisira:

“Erama komana deóvo ambeure!  
Erama yagera eove! Erama,  
bagia eove! Erama ko-  
manakena dedeuse gungubo  
seove!

<sup>19</sup> Nei nimamo kakara use, nenda geke ningido ghevu!

Ni tofo dubo buraesa, kau daba ava, ninda komana dubo baresa!”

<sup>20</sup> Iesu aminge setiri, genemboá numokena eminge sisira, “Resesa amo, na kaifa edo ghuseni a kaifa eraena. Avata amo jo inono iraeri tanojo. Ava sedo, ainda etoda sekago rea aetena, ava se ningone!”

<sup>21</sup> Aminge setiri, Iesu sisira, “Ni edo gido, jebuga tambari saresa amo, jovereghe ya kamboda buvudo, ninda roera a gugua isambu oriro edo, ainda moni ava budo, makasi embokena ghasaresa. Ghasedo ni furaso namonde dabade deinghara. Amingaresa amo, ni amboda ya gugua evevago utuda baresa.”

<sup>22</sup> Iesu aminge setiri ningido, genemboá dubo memaghae Iesu dodo

isira. Ainda beká mo: genembo ainda gugua jo daba etoto iraeri.

<sup>23</sup> Iri gido, Iesu namanekena sisira, “Evetu genembo susu iti fafode amo, foa God da natofo+ arikena, fakarago bekári.

<sup>24</sup> Setena, daba ava sari dae erena. Sino fuka javo kamero (camel), ava kote givu! Nu jo totoi ningu toka aminda tere ya sovenikena buvae arira. Avata nu aminda tere yari mo, raugakori. O evetu genembo guguae aimi God da natofo+ ari dae sarera amo, fakarago bekári.”

<sup>25</sup> Iesu aminge setiri, namane ningi dudukughedo siseri, “Aminge saresa amo, God da natofo+ mave ari?”

<sup>26</sup> Ava setero, Iesu namane tataseguse sisira, “Amo jo, evetu genembo endada irera ainda ari da kaugo iraeri. Ne jo tofofo nenda fakinaimi, God da natofo+ ae arera. Avata God mo inonori. Nune roera isambu ari sirorarira.”

<sup>27</sup> Setiri, Peter eredo minonda eminge sisira, “Kote gi! Namane nindae sedo, namanenda kambo a roera isambu dodo namonde deinghara. Namane andae sedo rejo eni barera, ai?”

<sup>28</sup> Aminge setiri, Iesu namanekena sisira, “Na geke beká nemokena resena. Utu a enda seka aminda, Evetu Genembo da Koro+ kotofu edo, nunda avo anumba durode aminda anumbururari, nembarago kokotofu da avo anumba 12 aminda anumbirise, Israel embo da oro isambu 12 ava, nene kaifa edo ghareva.

<sup>29</sup> A mave nandae sedo, nunda kambo, nunda nano namendi, nunda ghaghasovu, nunda noi numamo, nunda sasingu, o nunda enda doyarira amo, natofo a roera resena emo, aminga ava, siroruse digutururari ruruse, jebuga evovodae irari, ábarago tuve barira.

<sup>30</sup> Avata mendeni ne oroko kokotofu edo irera amo, ne sifo amboda vose sabua+ edo irarera. O mendeni ne oroko sabua+ edo irera amo, sifo amboda, ne viti kokotofu edo irarera,” aminge sisira.

## 20

*20:1-16 Mino God Muturaira, Ainda Kasiari.*

<sup>1</sup> Aminge sise, Iesu sisira, “God nunda natofo+ kaifa eraira amo, kau emingori. Asi vuji da vare eni ainda numamo eredo, sifoghae saramana kakato ava tava ari dae sedo aira.

<sup>2</sup> Aira, gegenembo mendeni tambudo, nene foa saramana aoro dae sise, nenda mino+ K10 avavaga mutari dae setira. Aminge sedo, ne dirigitiri nunda vareda aera.

<sup>3</sup> Aera, saramana tuturo edo ero, vare numamoá iji vitiri, (9 koroko) eredo aira, ombari vasa aminda buvudo, gegenembo mendeni tefo irero tambira.

<sup>4</sup> Tambudo, setira, ‘Ne ya nanda vareda saramana ururovo ungobu ari, nenda mino kasama use mutarena,’ aminge setira.

<sup>5</sup> Setiri, ne javi edo aera, saramana tuturo edo eteri. Amingero, vare numamoá isonga (12 koroko) edo, kotugo iji aira vekenengetiri (3 koroko) sekago aira, kau daba aminga ava, gegenembo mendenikena setira.

<sup>6</sup> Ainda amboda ungobu (5 koroko) ari dae iri, vare numamo daba ai sekago aira, ombari vasada gegenembo mendeni irero ava tambira. Tambudo, setira, ‘Ne redae isonga ghousa evia, vasa daba eminda fuggedo irevu?’ aminge setiri,

<sup>7</sup> ne mino numokena seteri, ‘Ainda beká mo: mave eni jo foa, namane saramana aoro dae saeri. Ava sedo, namane fuggedo irera,’ setero, nu sekago setira, ‘Averi, na ne mutono ya, evetu genembo giti seteno aera saramana erera, aminda buvudo nemonde dabade saramana areva,’ aminge setira.

<sup>8</sup> Aminge sedo, nu iriri ungobu etiri aira, saramana kakato da giti jighari aikena setira, ‘Saramana kakato amboda ungobu (5 koroko) ari dae iri ojighera tuturo edo saramana etera ava, giti se furore!’ aminge setiri, giti jighariá jovereghe aira setiri, ne javi edo ojeri.

<sup>9</sup> Ojero, nenda mino+ K10 mutira.

<sup>10</sup> Ava futiri, saramana giti tuturo etera aimi, gido koteteri, ‘Avoise, namonde mino+ itako teria barera tanojo.’ Avata nu mino kau daba ava, nemokena mutira.

<sup>11</sup> Mutiri budo, ne dubo ekoko use vare numamo aikena seteri,

<sup>12</sup> ‘Gegenembo amboda tambu seteso ojera amo, ne saramana jo umbu ghousago aeri. Ne sifo tufako saramana eteri. O namane, sifoghae tuturo edo, saramana ero ojira ungobu etira. Ava sedo nangetiraimi nene bera, kau daba ava namanekena mutesi?’ aminge seteri.

<sup>13</sup> Setero, vare numamoá eredo nenda genembo enikena sisira, ‘Nanda komana, resena evia, ningaresa tano! Na ni jo deraeri. Ni saramana aso mino+ K10 mutari setena amo, ni ‘avori’ setesi. Ava sedo, aminge muteni.

<sup>14</sup> Averi, ava budo kamboda yasi! Gegenembo amboda saramana etera, nembarago mino kau daba ava mutari uju eteni.

<sup>15</sup> Moni mo nandari. Ava sedo, na bajariri. Nanda uju ava arena. Avoise, na kavevera etena aindae, ni dubo mema eresa tanojo.”

<sup>16</sup> Tano ari dae use, sisira, “Ava sedo, mave giti edo erira amo, nu foa ambo gayarira. A mave ambo gaedo refira amo, nu ya darige giti arira,” Iesu aminge sisira.

*20:17-19 Iesu Numo Ambarira Ava, Sekago Ijuguse Sisira.*

*(Mark 10:32-34; Luke 18:31-34)*

<sup>17</sup> Iesu nu Jerusalem vitise, namane 12 gategusira avanembo budo, dabade tatedo esike ise, eminge sisira,

<sup>18</sup> “Ningivu! Namonde reighi Jerusalem yari dae viti refera. Reighi ominda, evetu genembo mendeniimi Evetu Genembo da Koro+ ava sandi bundedo, fristi+ da kokotofu a Moses da Geka ijuga kakato+ da ungodita fitarera. Fitoro budo, numoá daoro ambare dae sarera.

<sup>19</sup> Daoro ambare dae sedo, nu budo namonde Israel embo da gitofukena mutoro, budo dere jise

ambiimi dedo, budo yama arafa daoro ambarira. Ambudo, sifo etodaba naká dadabari ainda amboda, God sari nu sekago ambarida ghe jebugedo erarira,” Iesu aminge sisira.

*20:20-28 Zebedee Noaro Iesu Kena Fira, Nunda Sasingu Etoto Aikena Bajari Mutari Baore Dae Sedo, Benunu Sisira.*

*(Mark 10:35-45)*

<sup>20</sup> Iesu aminge sisira ainda amboda, Zebedee noaro nunda vide jamenade dabade fera Iesu kena buvudo, evetuá kauboi dadarigedo, numo sonembare dae benunu sisira.

<sup>21</sup> Setiri, Iesu numokena ategi usira, “Na rea aono dae resesi?” setiri, evetuá sisira, “Ni amboda kini (king) aresa ainda sifoda, nanda sasingu etoto nakáé saso, eni ninda ungo gimandukena, a eni umbefukena anumbarera,” aminge sisira.

<sup>22</sup> Setiri, Iesu nangedo ambaetira ava kotise, mino nemokena sisira, “Ne rea benunu reseva ava, ne jo kasama use sae ereva. Ne erekoteva: na agha Afa mutari bu fumbu rise mema itatamarena amo, ne kau daba ava areva, ai? O gitofuimi bouvu a mema namokena mutarera amo, ne kau daba ava fumbareva, ai?” aminge setiri, ne mino siseri, “Ai, namane aoro inono arira.”

<sup>23</sup> Ne aminge setero, nu nemokena sisira, “Resevare. Ne agha nane fumbu rise mema itatamarena ava budo, kau daba aminga ava areva. Avata mave nanda ungo gimandukena a kotugo umbefukena anumbarira ava, jo nane gategari da kaugo iraeri. Nanda Afa mavejoá gatedo simbugetiri irera amo, ne aminda anumbarera,” Iesu aminge sisira.

<sup>24</sup> Ne aminge benunu sisira ava, namane ghabu sovenisoveni aimi ningido, John nengae James ghae kena dubo ekoko useri.

<sup>25</sup> Etero, Iesu namane isambukena kori setiri fera totoruguseri. Totorugetero, nu sisira, “Enda da gavana mendeni nange eraera ava, ne

eregoseva. Enda da kokotofu a babojegari mendeni, ne kovionoghae seoro nenda natofo nenda geka ningido ava eraera.

<sup>26</sup> Avata ne, jo amingae areva. Mave nenda jokáda bajari ari dae sarira amo, ne isambu nune sonembarira.

<sup>27</sup> A mave nenda giti jighari dae sarira amo, nu tofo sabua+ da ari ava use, ne kaifa arira.

<sup>28</sup> Amo nu, kau namongo ava arira. Evetu Genembo da Koro+ nu evetu genembo sonembuse, nenda ari ekoko da mino futuse, ambari dae sedo fusira. Jo evetu genembo numoá sonembaoro dae sedo furaeri,” Iesu aminge sisira.

*20:29-34 Iesu Nu Gegenembo Etoto Naká Diti Digoide Ava, Setiri Jebuguseri.*

*(Matthew 9:27-31; Mark 10:46-52; Luke 18:35-43)*

<sup>29</sup> Namane Iesu de dabade reighi Jericho dodo yari dae ero, natofo digari fera totorugetero, namane namonde dabade iseri.

<sup>30</sup> Ero, gegenembo diti digoide etoto, emboro tinguda anumbirisera aimi, Iesu fira utua iri, ava setero ningido, ne tuturo edo koko sedo ghuseri, “Kini (King) David da Mandi God mutari sisira amo, nimori. Ava sedo, namane joka eyo!” aminge siseri.

<sup>31</sup> Setero, natofo isambu ghoghora sise, beka doyoro dae bureguseri. Buregusera avata, nengae jo itako doyae, nengae sekago koko sise beka teriago beká kori siseri, “Kini David da Mandi God mutari sisira amo, nimori! Ava sedo, namane joka eyo!”

<sup>32</sup> Aminge setero, Iesu ava ningido fete kori setiri, nengae eredo numokena fuseri. Fera buvero, sisira, “Na rea aono dae uju erevu?” aminge sisira.

<sup>33</sup> Setiri, ne siseri, “Bajari, saso namanenda diti eveva use, afigari sifo sevo gaeteri!”

<sup>34</sup> Aminge setero, Iesu nu joka edo ungo sirege ditida jijighusira. Jijighiri ainghae dabade diti eveva edo

afigetiri, fuge gosuseri. Gido, nengae eredo Iesu da amboda iseri.

## 21

*21:1-11 Evetu Genembo Nati Joká Dorero, Iesu Ira Jerusalem Teterusira.*

*(Mark 11:1-11; Luke 19:28-40; John 12:12-19)*

<sup>1</sup> Iesu nunda ambo jimbide era, reighi Jerusalem utua use, reighi Betfeij aminda buvurutuseri. Betfeij resena emo, nu enda jiro fumbari javo Orivi seraera, aında ganasa ifudari. Aminda buvudo, Iesu namanenda jokáda, gegenembo etoto naká gatededo diriguse,

<sup>2</sup> eminge sisira, “Reighi dombukena eregoseva? Ominda ya buvurutuse, gareva. Donki (donkey) nunda mandighae buri edo dighero fetirera, ava tambareva. Amo vujegedo, nengae namokena bu furovo dae resena.

<sup>3</sup> Nengae amingururovo, mave nendae ategi arira amo, eminge sevú, ‘Bajari donki (donkey) evia uju erira.’ Aminge sareva amo, nu ‘avori’ sari nengae budo furareva,” Iesu aminge sisira.

<sup>4</sup> Feroveta rea kotise gefusira ava, beká sirorare dae sedo, Iesu nu amingusira. Geka gefusira amo, eviri:

<sup>5</sup> “Saion+ embokena saso ningore! Givu! Oroko nenda kini (king) foa buvari dae erira.

Nu donki (donkey) da mandi aında gukada viti anumbedo refira. Sainghiako durumugedo refira,”

feroveta aminge gefusira.

<sup>6</sup> Avori, Iesu rea uju use sisira ava, nengae era aminguseri.

<sup>7</sup> Donki (donkey) nunda mandighae ava budo fera, nenda tamo asugari mendeni ava kose javureghedo,

donki nunda mandighae aında gukada fiftuseri. Fitero, Iesu viti donki mandi aında gukada anumbusira.

<sup>8</sup> Anumbedo javi iri, natofo digari ambari aimi, nenda tamo asugari mendeni ava kosedo emboroda dudo ero, nu aında etoda fetedo isira. A mendeni, ika fafatu joredo emboroda dudo ero, nu aında etoda fetedo isira.

<sup>9</sup> Evetu genembo ambo garusera, a giti edo isera aimi, tuturo edo koko sise a nati joká doruse, eminge siseri, “Orokaiva, oroikaiva! David da Mandi God mutari sisira amo, nimori. Buvurutesare! Bajari da javoda refira, aındae sakai saore! Orokaiva, iká bekádari!” aminge sise, nati joká doruse sero, reighi Jerusalem aminda era teteruseri.

<sup>10</sup> Iesu de dabade teterero, Jerusalem embo isambu dudukughedo manamana use eminge siseri, “Omo mavejori?”

<sup>11</sup> Aminge setero, evetu genembo Iesu de dabade fusera aimi, mino siseri, “Emo Frovensi Galilee a reighi Nasareth embori. Feroveta javo Iesu seraera amo, numori,” ne aminge siseri.

*21:12-17 Iesu Ira God Da Kambo+ Aminda Tere Fetedo, Ghoghora Sisira.*

*(Mark 11:15-19; Luke 19:45-48; John 2:13-22)*

<sup>12</sup> Iesu ira God da Kambo+ aminda tere fetedo, evetu genembo oriro use, a ofuse irisera<sup>12</sup> ava, isambu ondiri buvurutuseri. A gegenembo moni oriro edo ghusera, nenda ghagha jighi jovereghusira, a gegenembo rika ribo oriro edo ghusera, nenda avo anumba ábarago jighi rokombusira.

<sup>12</sup> **21:12:** Matthew nu geka, ‘roera oriro usera a ofusera’ sisira, aında tuka mo eviri. Natofo nenda joba, sifi (sheep), burumakava (cattle), ribo, o roera mendeni God kena mutaeteri. Avata ne reighi soka aminda ghe fuse, roera avavaga bu furari jo inono aeri. Ava sedo, fristimane+ ‘avori’ setero, evetu genembo mendeni God da Kambo+ dendege aminda, roera mendeni tegetera ava, maketa edo ghuseri. A evetu genembo mendeni, God da Kambo+ dendege aminda irise, Rome embo da moni a reighi mendeni da moni ava oriro edo muteari joba mutudo ghuseri, o roera tegetena ava ombudo ghuseri.

<sup>13</sup> Aminguse, nemokena sisira, “God setiri nunda Geka jokáda rea gembero irira amo, eviri:

‘Nanda Kambo+ mo, banungari da kambori,’  
God aminge sisira. Avata ne teredo emingevo, Kambo+ emo kau tafasara kakato da dobo, a beku da kau avavaga edo irira,” aminge sisira.

<sup>14</sup> Iesu nu God da Kambo+ jokáda iriri, evetu genembo diti digoide a ungo ata dimbaride ava, numokena fera buvero, setiri ne jejebuguseri.

<sup>15</sup> Avata fristi+ da kokotofu a Moses da Geka ijuga kakato+, ne janje ekoko useri. Sasingako ne koko a kori sise eminge siseri, “David da Mandi God mutari sisira amo, nimori. Orokaiva!” aminge sero nininguse, a Iesu tano dombu eni dombu eni etiri sirorusira ava gido, fristi+ da kokotofu a Moses da Geka ijuga kakato+ janje ekoko useri.

<sup>16</sup> Edo, Iesu kena siseri, “Ni, sasingakoimi resera omo, niningeresa?” aminge setero, Iesu mino nemokena sisira, “Ai, niningerena. Amo jo eko iraeri. Ne emingerera amo, anakora God da Geka jokáda gembero irira, ava erera. Amo eviri:

‘Ni seteso, sasingako a ami mindari amo, ne nindae sakai evevago beká ava seraera,’ ”  
Iesu aminge sisira.

<sup>17</sup> Aminge sedo, Iesu ne dodo Jerusalem ghedo buvudo, ira reighi Bethany aminda avisira.

*21:18-22 Iesu Ika Kayuyudae Simbora Usira.*

*(Mark 11:12-14,20-24)*

<sup>18</sup> Ravisira eredo, sifoghae jovereghe namane namonde dabade, Jerusalem yari dae ise, Iesu nu emboro soroda ighoi usira.

<sup>19</sup> Etiri, nu diti fuge ika kayuyu emboro tinguda fetiriri gosusira. Gido, nu vuji tosimbe mindari dae terisira. Avata beká tefori. Igi vanembo ava gido, nu sisira, “Sifo amboda, ikaé, beká jo sekago jighae arira,” aminge

siri ainghae dabade, ika kayuyu gharasa edo avisira.

<sup>20</sup> Namane ava gido manamana use siseri, “E kau nange nange etirai? Ika emo nange totoi gharasa edo ravi?” aminge sise ategi useri, numokena.

<sup>21</sup> Ategi etero, nu sisira, “Na geka beká nemokena resena. Ne tumondareva, a jo itako manamana ae areva amo, na rea eteno kayuyukena siroretira, kau daba aminga ava, nene saovo sirorarira. A eni mo: ne tumonduse, doriri oindae, ‘Darige yasi evada tifughase!’ saeteva amo, God sonembari, doriri omo darige ya evada tifugharira.

<sup>22</sup> Ne tumondareva amo, rejodae benunu sise banungareva, ava sirorari bareva,” Iesu aminge sisira.

*21:23-27 Iesu Nu Mave Da Javoda Saramana Edo Ghusira, Aindae Ategi Useri.*

*(Mark 11:27-33; Luke 20:1-8)*

<sup>23</sup> Iesu ira God da Kamboda+ teterusira. Teredo ijugiri, fristi+ da kokotofu, a namonde Jusi embo da babojegari, fera numokena ategi use siseri, “Se ningore! Mave setiri ni saramana emo eresi? Ni mave da javoda geka emo vironu resesi?” aminge siseri.

<sup>24</sup> Setero, Iesu mino nemokena sisira, “Nambarago nemokena geka dabako ategi arena. Einda mino sareva amo, na mave da javoda ojena amo, isagha saono ningareva.

<sup>25</sup> Sevu ningone! John Bafataito Ari Kato, mave da javoda evetu genembo bafataito edo ghusi, evetu genembo da javoda ai, God da javoda?” aminge setiri, ne tuturo edo tofo tofo beisiga use, se nininguseri, “Namonde kau nange nange sareri? Namonde, ‘God da javoda bafataito edo ghusira,’ sarera amo, nu, ‘Ne redae John jo tumondae usevu?’ sarira.

<sup>26</sup> O namonde, ‘Evetu genembo da javoda bafataito edo ghusira,’ sarera amo, natofo eminda totorugetera eimi, namonde darera. Ainda tuka mo: evetu genembo isambu ne

koteraera amo, John nu God da feroveta eniri. Ava sedo, namonde aminge sarera amo, natofoé namondekena rea arera, aindae oju erera.”

<sup>27</sup> Ne aminge sise, Iesu kena mino eminge siseri, “Namane erebunera,” aminge setero, Iesu nemokena sisira, “Avori, nambarago mave da javoda saramana eraena, nemokena jo saono ningae areva,” aminge sisira.

*21:28-32 Ambo Begoghae Da Ijugaborori.*

<sup>28</sup> Aminge sise, Iesu sisira, “Nenda kotari ava sevu ningone! Genembo eni nunda vide jamena etoto naká iriara ava, sifo eni nu eredo begokena eminge setira, “Yasi, nanda vareda saramana ase!”

<sup>29</sup> Aminge setiri, nunda mandi begoá setira, “Resesa ava, na imboe erena,” aminge sedo, amboda nu dubo jovereghetiri, aira saramana etira.

<sup>30</sup> Kotugo ainda amboda, genemboá eredo nunda mandi ambodae, kau daba ava setira. Setiri, nunda mandi ambo numamokena, ‘Avori, amingarena,’ setira. Aminge setira, avata nu jo yaeri.

<sup>31</sup> Ava sedo, numamo da uju amo, mave eti? Begoi eti, ai, amboi eti? Sevu ningone!” Iesu aminge setiri, ne, “Begoí etira,” siseri.

Setero, Iesu sekago fristi+ da kokotofu a Jusi embo da babojegari aikena sisira, “Ava sedo, na nemokena eminge resena: takesi bari kakato a evevetu saghere kakato, ne giti God da natofo+ aoro, God ne kaifa ururari irarera. O nemo, ambo gayareva.

<sup>32</sup> Ainda beká mo: John Bafataito Ari Kato fira, nemokena embo eeva ijugusira amo, ne nu jo tumonda usevu. Avata takesi bari kakato a evevetu saghere kakato, ne John da geka ava tumonduseri. Tumondusera ava gido, nembarago tumondaetevu. Avata ne jo tumonda usevu,” Iesu aminge sisira.

*21:33-46 Vare Kaifa Kakato Da Kasiari.*

*(Mark 12:1-12; Luke 20:9-19)*

<sup>33</sup> Iesu aminge sise, sekago fristi+ da kokotofu a Jusi embo da babojegari aindae sisira, “Kasia eni ningovo dae resena. Genembo eni aira vare simbugedo vaini da asi ava govetira.<sup>46</sup> Govedo, furu dighi birurughetira. Ainda amboda, nu asi vuji da muka ava simbari vosari bari dae sedo, bako ghambira. Ghambudo, kaifa kakato da vasa iti vitira. Itiri dadabetiri, nunda vare amo, evetu genembo mendeniimi saramana use moni futururoro bari dae sedo, mutira. Evetu genembo aimi vare ava kaifa ero, nu reighi eninda aira.

<sup>34</sup> Avori, asi vuji bambari da sifo ojira buviri gido, vare numamoá nunda boanda bari dae sedo, nunda saramana kakato mendeniimi dirigetiri kaifa kakato aikena aera.

<sup>35</sup> Aera buvero, kaifa kakatoá eredo, vare numamo ainda saramana kato eni ava sandi de babasegeteri, eni detero ambira, a eni ghamanai afe doruse onderi.

<sup>36</sup> Etero ainda amboda, vare numamoá saramana kakato mendeni dirigetiri aera. Digarigo dirigetiri aera buvero, vare kaifa kakato ne sekago kau daba ava eteri.

<sup>37</sup> “Amboda beká, tofo nunda mandi diriguse, eminge kotetira, ‘Avose, nanda mandiva kakara arera tanojo,’ aminge kotise, nunda mandi ava dirigetiri aira.

<sup>38</sup> Avata vare kaifa kakato ne mandiá gosuse tofo tofo se ningeri, ‘Mandi omo, vare ainda numamo da mandiri. Amboda vare emo, nune barira. Ava sedo fuvu, namonde nu daoro ambari, vare emo namondeda tofodae baore!’ ne aminge seteri.

<sup>39</sup> Aminge sedo, ne eredo, mandiá vare jokáda sandi jumbudo aera isaghada buvudo, detero ambira.

<sup>40</sup> “Avori, kote givu! Vare numamoá eredo foama, vare kaifa

<sup>46</sup> **21:33:** God nunda ferovetakena seari, ne nunda geka jokáda umbu mendeni kasia ai gembudo ghuseri. Kasia sise, ne Israel embodae, ‘vaini da vare’ sedo ghuseri.

kakato aikena nange ari? Sevu ningone!” Iesu aminge setiri, ne mino numokena siseri,

<sup>41</sup> “Nu kaifa kakato ekoko amo dari ambarera. Amboro, kaifa kakato eveva ava gategari, vare kaifa e gogoghombuse, nunda boanda ava vuji bambari da sifo aminda, mudu gharera,” aminge siseri.

<sup>42</sup> Setero, Iesu tofo numoá ijuguse nemokena sisira, “God da Geka emo tegutusevu tanojo:

‘Ghamana eni, kambo itari kakato imboe edo fugutusera ava, Bajari nune budo

tutumbidae sedo fiti simbugedo, aminda tuturo edo, nunda kambo itari dae erira.

Emo Bajari da ariri. Namonde gido dudukugherera,’

God da Geka aminge resira.

<sup>43</sup> “Ava sedo, nemokena saono ningovo dae resena. Amboda God da natofo+ ava, jo nene kaifa ae areva, a kotugo ne totofo jo nunda natofo+ ae areva. O evetu genembo mendeni, God da natofo+ da eveva ava kotise, God da uju avanembo eraera ava, Bajari sari nunda natofo, nene kaifa arera.

<sup>44</sup> 44 “Eni mo: ghamana kasia da setena, ainda geka mendeni eviri. Mave ghamana etoda durarira amo, nu de gite ambarira. O ghamana aimi maveda etoda du fatarira amo, nunda tamo fati tafere ari ambarira,” aminge sisira.

<sup>45</sup> Setiri, fristi+ da kokotofu a Moses da Geka kaifa kakato+, ne vare da kasia ava ningido kasama useri, Iesu kasia amo nendae sisira.

<sup>46</sup> Ava kasama edo, numoá sandi bundari dae kotiseri, avata jo inono aeri. Ainda tuka mo: evetu genembo natofogo ainda kotari mo, Iesu nu feroveta eniri. Fristi+ da kokotofu a Moses da Geka kaifa kakato+, ne ava kasama edo, evetu genembo totorugusera andae oju edo, Iesu jo sandaeri.

## 22

*22:1-14 Evetu Fitari Da Kirumo, Ainda Kasiari.  
(Luke 14:15-24)*

<sup>1</sup> Aminge sise, Iesu sekago kasia eni eminge sisira,

<sup>2</sup> “Evetu genembo nange God da natofo+ arera amo, kau emingori. Kini (king) eninda mandi evetu fitari setiri andae, numamo kirumo simbuguse irei.

<sup>3</sup> Aminguse, nunda aghi kakato dirigetiri aera, kirumo da sifo ava osa setero, nunda natofo gategetira, ai ningeri. Amboda sifo ojira buviri gido, nunda saramana kakato mutiri evetu genembo gategetira aikena, aghi ari dae sedo aera. Aera aghi etera avata, evetu genembo mavejoá kini gatededo furore dae setira, ne imboe eteri.

<sup>4</sup> Etero, kini nu saramana kakato mendeni sekago diriguse, eminge setira, ‘Eminge sevu, evetu genembo ningore, “Nanda kirumo simbugeteno irira. Burumakava (steers) a burumakava da mamandi (calves) evevago ava de ojetero irira. Roera isasambu simbugetero irira. Ava sedo, evetu fitari da kirumo ari dae erera. Ne fuvu!” aminge sevu!’ kini aminge setira.

<sup>5</sup> Setiri, ne aera evetu genembo-kena aminge seteri. Avata evetu genembo amo, ne kini da geka jo ningaeri. Eni eredo, nunda vareda aira. Eni kini da geka kotae edo, nunda bisnis (business), moni saramana ari dae sedo, aira.

<sup>6</sup> A mendeni ne, kini (king) ainda saramana kakato ava, sandi de babasegetero amomonjegeteri.

<sup>7</sup> Etero, kini janje eko beká ava etiri, nunda isoro kakato dirigetiri aera, evetu genembo kini da saramana kakato detero amomonjegetera, ainda reighi sosighi edo, nati dungetero avira.

<sup>8</sup> Etiri, kiniá kori setiri, nunda saramana kakato totorugetero

<sup>44</sup> **21:44:** Tuturo 44 da geka, Baiboro (Bible) ana mendeni ainda jokáda fitero iriri tafuseri. O Baiboro mendeni ainda jokáda, jo fitoro teraeri.



nemokena setira, ‘Kirumo simbugetero irira, avata evetu genembo giti furoro dae setena amo, jo nene mindae arera. Ne ekokori.

<sup>9</sup> Oroko emo yasivu, emboro teria aminda ise, evetu genembo mavejuá tambareva, ava aghi evu!’ aminge setira.

<sup>10</sup> Setiri, nunda saramana kakato buvudo aera, evetu genembo isambu mavejoá tambera, ava unumbe budo ojeri, evetu genembo eveva a ekoko ainde dabade. Etero, aimi ojera buvudo, kini (king) da kambo bedo etira.

<sup>11</sup> “Nunda kamboda totorugetero, kini (king) nunda esa embo gari dae sedo aira teretira. Teredo, genembo eniá fuge gira. Genembo amo, nu jo gogho edo, nunda asugari evevago eni jo asuge furaeri.

<sup>12</sup> Kini (king) ava gido, nundae ategi etira, ‘Nanda komana, ni nangetirai ninda tamo asugari ekoi asugedo ojesa teretesi? Aminguse, namondeda agho dari erebejesa, aminge setiri, genemboá geke rejo eni jo saeri.

<sup>13</sup> Etiri, kini (king) nunda saramana kakatokena setira, ‘Genembo emo, jo inono iraeri. Ava sedo, nu sandi ungo ata bundedo, bu yasivu, ajagha fitovo, tumba jokáda irise, sorara use dika ghininji ghananja ghuse irare!’ ”

<sup>14</sup> Iesu aminge sise, tano ari dae use sisira, “God evetu genembo digari ava kori seraira, avata daba daba gategeraira,” Iesu aminge sisira.

*22:15-46 Evetu Genembo Mendeni, Iesu Geka Sembae Sari Ningari Dae, Dederuseri.*

*(Mark 12:13-37; Luke 20:20-44; 10:25-28)*

<sup>15</sup> Kasia ava ningido, Moses da Geka kaifa kakato+ eredo Iesu geke sembae sirurari ningido, numoá bu

koto ari dae, esike era fetedo manaka garuseri.

<sup>16</sup> Manaka gaedo, nenda ambo jimbi mendeni nemonde Kini (King) Herod da ambo jimbide dabade, ava dirigetero, Iesu kena iseri. Era, Iesu dederuseri, “Ijuga Kato, namane kasama erera, ni geke beká avanembo sifo ghousa ijugeraesa. Ni evetu genembo da kotari amo jo oju ae use, God da uju avanembo ijugeraesa.

<sup>17</sup> Ava sedo, se ningore! Namondeda Agho Dari nange resi? Namondeda gitofu Rome embo da koto-fukena takesi ombarera, ai tefo? Ava se ningore!” aminge siseri.

<sup>18</sup> Avata numo dederuse sisera, ava itatamusedo, Iesu eminge sisira, “Ne gungubo kakatori. Ne redae na dedererevu?”<sup>18</sup>

Setiri, moni budo ijuguseri.

<sup>20</sup> Ijugetero gido, Iesu ategi usira, “Moni tamonda, dangio a javo emo, mavedari?” aminge ategi etiri,

<sup>21</sup> ne siseri, “Rome embo da kotofu, namonde Caesar seraera, nundari,” aminge setero ningido, Iesu sisira, “Avori, Caesar da tofo amo, Caesar dae mutuvu bare! A God da tofo amo, God dae mutuvu bare!” Iesu aminge setiri,

<sup>22</sup> ne ningido buniseri. Bunedo, ne Iesu dodo iseri.

<sup>23</sup> Sifo daba aminda, Jusi embo da mendeni, aindae Sadusi embo+ seraera aimi eredo, Iesu kena fuseri. (Sadusi embo+ resena emo, ambari embo jo sekago jebugedo erae arera, ava koteraera.)

<sup>24</sup> Aimi fera Iesu kena ategi use siseri, “Ijuga Kato, Moses eminge ijugedo ghusira:

‘Genembo mave evetu fitari, mandi sasingu jo sirorae iroro genemboá ambari nunda rori irarira amo, nunda ambo bego

<sup>18</sup> **22:18:** Moses da Geka kaifa kakato+ da uju mo, Iesu nange fitoro vosatira ava kotise, nu ategi useri. Iesu nu, “Tefo, takesi jo ombae areva,” saetira amo, ne nu budo, Rome embo da dombuda koto edo diburada fitaeteri. Sifo aminda, Rome embo ne gavanari. O, “Ai, takesi ombareva,” saetira amo, nati embo digari nunda geke imboe use, nu jo tumonda aeteri.

eniimi roriá fitarira. Genembo ambarira ainda veka sirorare dae sedo, fitarira, Moses aminge ijugedo ghusira.

<sup>25</sup> “Avori, kiki eni sari dae erera. Ningi! Ambo bego isambu 7 ava namondeda jokáda iriara ava, bego beká ai evetu ffitusira, ava sasingu eni jo sirorae irero nu ambududurusira. Ambiri, rori amo nunda diroruimi ffitusira.

<sup>26</sup> Aminguse, ffitero refara, ambo nemboi bu fitido ireira ambududurusira.

<sup>27</sup> Ainda amboda beká, roriá ambududurusira.

<sup>28</sup> Avori, se ningore! Amboda sifo eninda, evetu genembo isambu jebuge erarera, seraesa. Gegenembo isambu 7 aimi evetu dabako ava ffituseri. Ava sedo, iria edo, erari da sifoda, evetu amo maveda evetu ari? Bego aindari, o ambo aindari, ai maveda evetu ari? Ava se ningore!” aminge siseri.

<sup>29</sup> Setero, Iesu mino nemokena sisira, “Ne sembae beká ava erekoteva. Ainda tuka mo: ne God da Geka rea resira, a God da fakina ava, ne erebuneva.

<sup>30</sup> Evetu genembo ambarida ghe jebuge erarera ainda sifo aminda, ne kau aneya da kau aminga ava irise, genembo evetu jo fitae arira, a evetu genembokena jo vai ae arira.

<sup>31</sup> Kotugo ambari embo, ambarida ghe jebugedo erarera, ainda geka eni sari dae erena. Ningivu! God nu Geka evia ningovo dae sisira, amo tegutusevu, ai? Kote givu!

<sup>32</sup> ‘God, nembuamane Abraham, Isaac, a Jacob anakora endada irise tumonduse iriara,

a kotugo oroko tumonduse irera amo, namori.’

God aminge sisira aindae, namonde kasama erera: ambari embo mo jo amboro dadabaeri. Ava sedo evetu genembo isambu, ambari embo a jebuga embo isasambu, God da dombuda jebuga irera,” Iesu aminge setiri,

<sup>33</sup> evetu genembo aminda totorugedo irisera amo, nunda ijuga ava ningido dudukuguseri.

<sup>34</sup> Iesu geka evevago setiri ningido, Sadusi embo+ mino sari buniseri. Sadusi embo+ mino sari buniseri, ainda bino ava iri, Moses da Geka kaifa kakato+ ningido, Iesu kena fera totoruguseri.

<sup>35</sup> Totorugedo, nenda ijuga kato eni, Iesu geka sembae sirurari ningari dae ategi usira,

<sup>36</sup> “Ijuga Kato, God da Agho Dari jokáda, geka mindafu beká ningia- vori?” aminge setiri,

<sup>37</sup> Iesu mino sisira: “ ‘Ninda Bajari God kena, ninda dubo a ninda kotari isasambuimi futuse, nusuka numoá ava, dubo bu gogoghom- baresa!’

<sup>38</sup> Amo God da Agho Dari mindafu bekári.

<sup>39</sup> Nunda Agho Dari setena ainda kaugo eni mo, eviri:

‘Ni tofo dubo buraesa, kau daba aminga ava, ninda komana barago dubo baresa.’

<sup>40</sup> God rea setiri Moses gefusira, a feroveta mendeni gefusera, ainda susu mo eviri,” Iesu aminge sisira.

<sup>41</sup> Setiri dadabetiri ainda amboda, Moses da Geka kaifa kakato+ numokena totorugusera aikena ategi usira,

<sup>42</sup> “Nenda kotari sevu ningone! God evetu genembo sonembuse, Genembo eni mutari dae sisira amo, mavejori? Oro mavekena sirorari?” Iesu aminge setiri, ne mino siseri, “Amo, nu David da sasingu a imemesiri ainda jokáda sirorarira. Nu David da Mandi eniri,” aminge siseri.

<sup>43</sup> Setero, Iesu nemokena sisira, “Ne geka reseva, a kotugo David tofo mandi gefusira ava, jo foa geka dabako ae irira. God da Asisi imi David sonembiri Genemboá tumonduse, ‘Nu nanda Bajari,’ gefusira. Geka David gefusira resena amo, eviri:

<sup>44</sup> ‘Bajari nu nanda Bajarikena sisira,

“Fu, nanda ungo gimanduda anumbiraso, ninda gitofu ninda fakina ava gosururoro, ne de bundedo bu foama, ninda ata duruda fitono fafasaore!” Bajari aminge sisira, ava David gefusira.

<sup>45</sup> Avori, genembo mo, nunda sasingu da bajariri. Mandi eni jo viti numamo da bajariri bae aeti. Ava sedo David, Genembo amboda furarira ava kotise, ‘Nu nanda Bajari,’ sisira amo, nu jo nunda mandi ava kotise saeri. Nu Genembo aindae igheghi use, nunda Bajari arira ava sise sisira. Ava sedo, nenda geka seteva amo, jo inono iraeri.”

<sup>46</sup> Iesu aminge setiri, ne manamana edo geka da mino sari buniseri. Bunisera ai tano aminda, mave eni jo fakina edo, sekago Iesu kena ategi use, gisae edo ghuseri.

## 23

*23:1-12 Moses Da Geka Ijuga Kakato+ A Kaifa Kakatokena+, Iesu Ghoghora Sisira.*

*(Mark 12:38-39; Luke 11:43,46; 20:45-46)*

<sup>1</sup> Iesu aminge setiri dadabetiri ainda amboda, nu namane a evetu genembo totorugusera aikena eminge sisira,

<sup>2</sup> “Moses da Geka ijuga kakato+ a kaifa kakato+, ne Moses da vasa budo ijugeraera.

<sup>3</sup> Ava sedo, ne rea seraera a ijugeraera ava, amingareva. Avata ne rea eraera ava, erá eove dae sise resena. Ainda beká mo: ne rea aovo dae seraera ava, ne totofo jo use sae eraera. Ne sembae eraera.

<sup>4</sup> Ne agho dari digari simbugedo, seoro natofo janjagu use irá gheraera. Avata Moses da Geka ijuga kakato+ a kaifa kakato+, ne totofo nenda agho dari jo kaifa use, ainda bouvu jo itako fumbae eraera.

<sup>5</sup> Moses da Geka ijuga kakato+ a kaifa kakato+, ne rea eraera ava, natofo nemo gido nendae sakai saoro dae sise eraera. Moses da Geka kotise, ne God da Geka mendeni

gembudo, ungodá a dombuda dighido deingheraera, a tamo asugari da embo, sori babai ghoghousa gateraera. Avata ne jo God kotise amingae eraera. Evetu genembo mendeni, nendae sakai saoro dae sedo, eraera.

<sup>6</sup> Kirumoda yarera o banungari dae yarera amo, ne vasa evevada anumbari dae uju eraera.

<sup>7</sup> Kau daba aminga ava, ne uju eraera, ne ya ombari vasada buvurururoro gido, evetu genembo ne kakara use, ‘Ijuga Kato’ sise ategi aoro dae uju eraera.

<sup>8</sup> Ne jo amingae areva. Mave ni ategi use, jo ‘Ijuga Kato’ sae arira. Ainda beká mo: ne isambu nano namendide inonori. Nenda Ijuga Kato dabako irira.

<sup>9</sup> A ni genembo eni ategi use, jo ‘Afa’ sae aresa. Ainda beká mo: nenda Afa dabako utuda irira.

<sup>10</sup> A mave ni ategi use, jo ‘Bajari’ sae arira. Ainda beká mo: nenda ari ekoko kote doyari dae sedo, God nenda Bajari dabako mutari sisira.

<sup>11</sup> Mave nenda jokáda giti jighari arira amo, ne isambu nune sonembarira.

<sup>12</sup> Mave tofo nunda javo jighari erarira amo, nu foa ambokena arira. O mave nu tofo fitari vosarira amo, amboda natofoi fitoro nu vitarira,” Iesu aminge sisira.

*23:13-36 Moses Da Geka Ijuga Kakato+ A Kaifa Kakato+, Ne Amboda God Da Bouvu Ava Barera.*

*(Mark 12:40; Luke 11:39-42,44,47-52; 20:47)*

<sup>13</sup> Aminge sise, Iesu sisira, “Arie, Moses da Geka ijuga kakato+ a kaifa kakato+! Ne taká amboda mema itatamareva. Ne gungubo kakatori! Ne totofo God da natofo+ jo ae ireva. A evetu genembo mendeni God da natofo+ ari dae uju eraera ava, nene buregeraeva.

<sup>14</sup> “Arie, Moses da Geka ijuga kakato+ a kaifa kakato+! Ne taká amboda mema itatamareva. Ne gungubo kakatori! Ne dedeuse, roriri da kambo a gugua ava nenda tofodae

ruruse, natofu nemoá gido nendae sakai saore dae sedo, ya God da Kambo+ tere fetedo ghousa futo banungeraeva. Aindae sedo, ne mema eko beká ava tambareva.

15 “Arie, Moses da Geka ijuga kakato+ a kaifa kakato+! Ne taká amboda mema itatamareva. Ne gungubo kakatori! Genembo eni nangedo nenda ambo jimbi aetira aindae sedo, ne e gogoghombereva. Avata, mave nenda ambo jimbi arira amo, nu nenda ijuga sembae ava nininguse, ari eko beká ava arira. Ne aindae sedo, mema tambareva.

16 “Arie, ne ijuga kakato sembaeri! Ne amboda taká mema mindafu beká ava itatamareva. Ne diti digoide mamaneri. Ava nange edo evetu genembo mendenidae emboro ijugeraevu? Ne sembae ijuguse eminge seraeva, “Genembo eni, God da Kambo+ aindae javoda beka gajedo irise, ya nunda beka gajari ava bejarira amo, ne ‘avori’ seraeva. O genembo daba aimi, auri eni ‘gold’ seraera God da Kambo+ irira, aindae javoda beka gajedo irise, ya nunda beka gajari ava bejarira amo, ne ‘agho dari beká ava bejariá’ seraeva.

17 Amo, ne daghedo sarigeraeva. God da Kambo+ da ‘gold’ o moni amo, God da Kambo+ da fakinaimi etiri kakara edo irira. Ava sedo, erá ‘God da Kambo+ kitako’ sise, ‘God da Kambo+ moni mindafu’, ava seove! God da Kambo+ da javoda rea beka gajaresa amo, amingaresa. A God da Kambo+ da moni aindae javoda rea beka gajaresa amo, amingaresa.

18 “Eni mo, ne eminge ijugeraeva. Genembo eni olta (altar) da javoda beka gajedo irise, ya nunda beka gajari ava bejarira amo, ne ‘avori’ seraeva. O genembo daba aimi, joba eni oltada ffitusera, aindae javoda beka gajedo irise, ya nunda beka gajari ava bejarira amo, ne ‘agho dari beká ava bejariá’ seraeva.

19 Amo, na sekago resena: ne daghedo ireva. Olta da fakinaimi joba kakara arira. Ava sedo, erá ‘olta

kitako’ sise, ‘joba olta etoda fitiraera, teriava,’ seove!

20 Aindae beká mo: mave olta da javoda beka gajarira amo, nu olta (altar) da javoda a joba oltada fasirira, aindae javoda beka gajarira. Jo dombu eni iraeri.

21 Mave God da Kambo+ aindae javoda beka gajarira amo, nu jo God da Kambo+ aindae javoda nembo beka gajae arira. God nu aminda irá gheraira ava sedo, nu God da javo ainghae dabade beka gajarira. Jo dombu eni iraeri.

22 Kau daba aminga ava, mave utu da javoda beka gajarira amo, nu utu da javoda, God da avo anumba da javoda, a tofo God da javoda beka gajarira. God nu aminda anumbirá gheraira ava sedo, jo dombu eni iraeri. Ne natofokena beka gajari da emboro sembae ijugeraeva, aindae sedo, ne mema tambareva.

23 “Arie, Moses da Geka ijuga kakato+ a kaifa kakato+! Ne taká amboda mema mindafugo itatamareva. Ne gungubo kakatori! Nenda gugua tomanako a nenda roera veveyako kau mosou, yabiyabina, a karaje ava budo, diti ghabu sovenisoveni fitido, diti eni budo God kena muturaeva. A nu evevari. Ne amingareva. Avata, amo kitakori. O Agho Dari da geka tomanako mo: inono da ari, joka ari, geka bekáda bekáda sari a ari bekáda bekáda ariri. Roera kikitako ava, nene eraeva. Avata roera teriango evia, ne jo ae eraeva.

24 Ne diti tefori. Ne emboro sembae ava ijugeraeva. God da Geka mendeni, ne kaifa eraeva. Avata geka mindafu evia, ne kotae eraeva. Ne aindae sedo mema tambareva.

25-26 “Arie, Moses da Geka ijuga kakato+ a kaifa kakato+! Ne taká mema mindafugo ava, amboda tambareva. Ne gungubo kakato a diti tefori! Ne kau genembo eni, nunda agha kofiri fokakena seghuse, jokakena jo seghae etira. Avavaga, ne gogho etevo nenda tamo eveva etira. Avata nenda dubo joká jo simbugae ireva. Ne ari ekokoi doghetiri

jokáda ireva. Nenda dighighi ari a sosighi ari amo dodo, nenda ari ekoko vujegedo dubo joká ava simbugareva amo, ne gegenembo eveva edo irareva, dubo jokáda a kotugo nenda irari tamo isaghada. Ava jo ae eraeva aindae sedo, ne mema tambareva.

<sup>27</sup> “Arie, Moses da Geka ijuga kakato+ a kaifa kakato+! Ne taká mema itatamareva. Ne gungubo kakatori! Nemo kau ambari embo da ofofo gomogori. Isaghakena mo, simbuge gogoghombetevo gari eveva erira. Avata jokáda mo, anakora betedo masa erira.

<sup>28</sup> Kau daba aminga ava, natofo ne gido ‘evevava’ seraera, ne tamo gogho eraeva aindae. Avata nenda dubo joká mo, gunguboimi a ari ekokoimi bedo edo irira. Ne aindae sedo mema tambareva.

<sup>29-30</sup> “Arie, Moses da geka ijuga kakato+ a kaifa kakato+! Ne taká amboda mema mindafugo ava itatamareva. Evetu genembo evevago a God da feroveta, nenda ofofo ava esimbuguse, totofo eminge seraeva, ‘Namane abumane da sifo aminda siroredo iraetera amo, namane God da feroveta jo daoro sirivo ae aeteri. Abumane edo ghusera avavaga, namane jo ae aeteri,’ aminge sise seraeva.

<sup>31</sup> Aminge seraeva avata, e givu! Nombumane rea koteraera, kau daba aminga ava, nenda imemesiri koteraera. Ava sedo, geka beká mo: nembumane rea kotedo ghusera a edo ghusera, ne kau daba aminga ava eraeva. Nemo, nembumane feroveta dedo ghusera, ainda imemesiri bekári.

<sup>32</sup> Ava sedo, nembumane rea edo ghusera avavaga, oroko eminda evu ya dadabare!

<sup>33</sup> Ne ekoko, Satan da sasinguri!<sup>33</sup> Ne nange nange ari ekoko mino mutari da vasa omo darige yarevu? Amo jo nene darige yari da kaugo iraeri.

<sup>34</sup> “Nene dara eraeva, ainda bouvu fumbovo dae sedo, na

feroveta, evetu genembo dubo kotari kakato, a God da Geka ijuga kakato+ mendeni dirigaono nemokena yarera. Yama, nanda javoda siruroro, nene mendeni sandi daovo sirivo arera, mendeni arafa daovo ambarera, mendeni sandido nenda dengoro indari da kambo+ aminda koto areva, a mendeni ondovo ya, reighi mendeni mendeni ominda, emboroda deinghuse irarera.

<sup>35-36</sup> Amingururovo, God da natofo evevago detero sirivo usera ainda mino isambu ava, God nemokena mutari, nene ruruse itatamareva. Tuturoda, Abel detiri ambududurusira, tano aminda ghe fira, Barachiah da mandi Zechariah, God da Kamboda+ detero olta (altar) dombuda ambududurusira, ainda mino isambu, ne oroko siroredo ireva, nene ruruse itatamareva. Geka beká resena. Ainda mema ne jo darigae areva,” Iesu aminge sisira.

*23:37-39 Iesu Nu Jerusalem Embodae Dubo Mema Usira.  
(Luke 13:34-35)*

<sup>37</sup> Aminge sise, Iesu sisira, “Arie mará, nanda natofo Jerusalem emboko! Ne God da feroveta deovo amburaera, a nunda aghi kakato ghamanai deovo sirivo eraera. Kau kokora nunda mamandi ghabui doghe sandi faseraira aminga ava, ne nane kaifa use, undari dae uju edo ghuseni, avata ne na buregu-sevu.

<sup>38</sup> Ava sedo, God nunda Kambo+ nenda jokáda irira ava, do dumbari, ne tefo irareva.

<sup>39</sup> Geka beká: amboda ne na jo gae irovo, na reighi emo doyono, nesuka irise dubo jovereghedo, nati joká dorurovo gido, na jovereghe foa buvono, ne ategi emingareva, ‘Orokaiva! God ni esimbugetiri, nunda javoda refesa! Orokaiva!’ nandae aminge ategi use nati joká dorurovo, furono gareva,” Iesu aminge setiri dadabusira.

<sup>33</sup> **23:33:** Afige, **Matthew 3:7** ainda duruda tege garesa.

## 24

*24:1-14 Enda Dadabururari, Tano Mendeni Sirorari Garera. (Mark 13:1-13; Luke 21:5-19)*

<sup>1</sup> Iesu javi edo, God da Kambo+ dodo yari dae iri, namane numokena era, God da Kambo+ ainda vasa mendeni ainde dabade ijugari dae sedo, buvurutuseri.

<sup>2</sup> Buvero, nu namanekena sisira, “Ne God da Kambo+ ovia gosuse reseva, ai? Avori, ningivu! Na nemokena eminge resena. Gito-fuimi foama Kambo+ omo de bejoro, oinda ghamana aveverege vose dadabarira ainda amboda, ghamana eniko jo nunda vasa ireira, aminda irae arira,” Iesu aminge sisira.

<sup>3</sup> Iesu nu enda jiro fumbari javo Orivi, aminda ira anumbiriri, namane numokena era, namonde kiki-ako anumbedo, ategi useri, “Ni, ‘God da Kambo+ de bejarera,’ setesa amo, nanjigo areri? Enda dadabari da sifo a ninda jovereghe furari da sifo ava, namane nange kasama areri? Rea sirorarira amo, nange kasama aeteri?” aminge siseri.

<sup>4</sup> Setero, Iesu mino namanekena sisira, “Diti gosuse kaifa evu! Erama, nemo dederuse gungubo sarera, ava tumondeove!

<sup>5</sup> Ainda tuka mo: evetu genembo digari foa, gungubo sise, eminge sarera, ‘God evetu genembo da ari ekokodae, Genembo eni mutari sisira amo, namori,’ ne aminge sise, evetu genembo digari ava deroro, nemoá tumondarera.

<sup>6</sup> Tataya ururoro ningareva, a soka beká isoro ururoro, ainda bino ava ningareva. A nu sirorarira avata, erá oju eove! Ainda beká mo: aminge siruroro ningareva, avata enda emo, jo sifo aminda dadabae arira.

<sup>7</sup> Natofo mendeni mendeni a gavana mendeni mendeni eredo, tofo tofo isoro ururoro ningareva. Endada, baimara eko sirorurari, dumo fururari itatamedo ghareva.

<sup>8</sup> Ava sirorarira amo, inono, evetu tamo bouvu edo iriama edo, mandi

sasingu javi urureari mema itatam-eraira aminga ava, enda da mema sifo aminda tuturo arira.

<sup>9</sup> “Sifo aminda, evetu genembo mendeniimi foa ne sandido, gavana nemokena fakarago are dae sedo, a nemo dari ambovo dae sedo, gavanakena mutoro barira. Ne namo tumonderaeva andae sedo, enda da natofo isambu ne imboe arera.

<sup>10</sup> Sifo aminda, natofo digari namoá giti tumondusera aimi, na ighagha use, nenda tumondari doyarera. Aminguse, ne imboe edo tofo tofo aito arera.

<sup>11</sup> Sifo aminda, feroveta gungubo kakato foama, evetu genembo digari ava derarera. Foa gungubo sise, eminge sarera, ‘God da feroveta eni mo namori,’ sarera. Aminge sise, evetu genembo digari ava dederururoro, ne ‘bekáva’ sise tumondarera.

<sup>12</sup> Ari ekoko viti mindafu ururari aimi, evetu genembo digari ainda dubo bari amo dadabarira.

<sup>13</sup> Avata mave fakina edo, namoá tumonduse jo ighagha ae iria ambarira amo, nu jebuga evovodae irari ava tuve barira.

<sup>14</sup> A kotugo, God nange nunda natofo+ kaifa eraira, ainda bino ava vironu siruroro, natofo nunda oro oro isasambu ningoro inono ari gido, enda sifo aminda tano arira,” Iesu aminge sisira.

*24:15-28 Sifo Amboda, Reighi Israel Ava, Gitofuimi Foa Sosighi Arera. (Mark 13:14-23; Luke 21:20-24)*

<sup>15</sup> (Iesu da geke eregefena evia, mave tegarira amo, nu ningido kote simbugare dae sise resena.) Aminge sise, Iesu sisira, “God da feroveta Daniel nu eminge sisira, ‘Amboda roera eko beká ava bu foa fitoro, God da vasa kakara nunda Kambo+

joká<sup>15</sup> aminda fetari, aimi bebeta arira.' Ava bu foa fitoro fetirari,

<sup>16</sup> ne Frovensi Judia eminda irise gareva amo, ne eredo sumbu yasivu, doriri ominda jungove!

<sup>17</sup> Mave nunda ofoda <sup>17</sup> anumbirari, sifoá foa buvari garira amo, nu jo ere kambo jokáda, gugua eni bari dae jo terae arira. Nu taká eredo sumbarira.

<sup>18</sup> A mave vareda saramana ururari, sifoá foa buvarira amo, nu jo nunda tamo asugari bari dae sedo jovereghe kamboda yae arira. Nu taká sumbarira.

<sup>19</sup> Mará! Na evevetu mave sifo aminda tamo bouvu edo irarera aindae, dubo mema erena. Ainda beká mo: evevetu sifo aminda tamo bouvu edo irarera, o sasingu veveyako unduse ami futuse irarera amo, ne sumbari dae ató barago use, mema mindafugo ava itatamarera.

<sup>20</sup> God kena banunguruvu, erama dara resena evia, yaura teria da sifoda o Jangutari da Sifo aminda siroure! Ainda susu mo: sifo aminda siroraetira amo, sumbu darigari fakarago aeti.

<sup>21</sup> Ainda beká mo: mema a bouvu sifo aminda sirorarira amo, teria bekári. Enda sirorusira ai tano ghedo ojira orokoé, mema aminga ava jo sirorae irira. Kotugo mema a bouvu resena emo, ainda amboda barago, jo sekago aminga ava sirorae arira.

<sup>22</sup> Avata jo ghousa irae arira. God setiri fetirira amo, eviri. Dara furarira amo, jo ghousa irae arira. Ghousago iraretira amo, evetu genembo isambu sirivo aeteri. Avata

God nunda natofu gategusira, nenda kotise sari, dara furarira amo, jo ghousago irae arira.

<sup>23</sup> "Sifo aminda, mave nemokena sarira, 'God namondeda ari ekokodae, Genembo eni mutari dae sisira amo, eviri. Fuvu gaove!' sarira. O 'Numo omindari,' aminge sarira amo, erá tumondeove!

<sup>24</sup> Ainda beká mo: gegenembo mendeni eredo, foa gungubo sise, 'Genembo eni God mutari sisira amo, namori,' sarera. Nemo feroveta gungubo kakatode dabade foama, God da natofokena dederururoro, 'bekáva' sise, nemoá tumondaeteri. Aminguse, ne tano a ari mendeni mendeni ururoro evetu genembo ne jo gae iriara ava, nenda gitida sirorari garera.

<sup>25</sup> Dara resena emo, jo sirorae iriri, nu mavega ava kasama edo, fakina aovo dae sedo, orokoá seteno niningereva.

<sup>26</sup> "Setena, daba ava sari dae erena. Evetu genembo mendeni eredo eminge sarera, 'Keriso reighi uvu irae da vasa aminda irira.' Aminge sarera amo, erá aminda gari dae yeove! O eminge sarera, 'Keriso ominda jungedo irira.' Aminge sarera amo, nenda geka erá tumondeove!

<sup>27</sup> Ainda beká mo: Evetu Genembo da Koro+ jovereghe furarira amo, nu jo ufena furae arira. Nu, kau biria tarighedo sovenisoveni sarige feteari giraera aminga ava, Evetu Genembo da Koro+ fururari, evetu genembo isambu garera.

<sup>15</sup> **24:15:** Tamo foyago da gekaimi gefuse, 'nunda Kambo+ joká' ava jo sae usira. Amo tufako sise, 'roera eko beká vasa kakara aminda' avanembo sisira. Evetu genembo mendeni da kotari mo, Iesu geka ava sise, God da Kambo+ aindae sariá seraera. O mendeni erekotera, nu reighi tomanako Israel, o reighi Jerusalem aindae sariá seraera. Kau daba ava, namonde geka 'roera eko beká' ainda tuka jo kasama e gogoghombae eraera. Evetu genembo mendeni da kotari mo: nu 'God da gitofu eko beká eni' aindae sariá seraera. O mendeni da kotari mo, nu 'Rome embo da isoro kakato' aindae sariá seraera. O evetu genembo mendeni erekotera amo, 'gode eninda dangio bu foa God da Kambo+ jokáda fitoro fetirari' aindae sariá sise seraera. <sup>17</sup> **24:17:** Matthew tamo foyago da gekaimi, 'kambo eno ikáda' gefusira. Iesu nu kambo da anumbari vasa kotise sisira. Israel aminda, borija jo teria dirae eraira. Ava sedo, nenda kambo itido ghusera amo, ne eno jo fitae edo ghuseri. Ne ghamanai itutuse, vasa beragha kambo ikáda simbugedo ghuse ofodae budo ghuseri. O namonde mo, kambo enoghae itiraera. Ava sedo, namonde eminda, 'kambo eno ikáda' tegarera amo, namonde anumba vasa jo kotae arera.

<sup>28</sup> “Ambari embo da tamo reda betirarira, rika riduna aminda josarera,” Iesu aminge sisira.

*24:29-31 Evetu Genembo Da Koro+, Eminguse Jovereghe Furarira. (Mark 13:24-27; Luke 21:25-28)*

<sup>29</sup> Aminge sise, Iesu sisira, “Dara setena dadabarira ainda amboda mo, utu da fakina raugo edo javi ururari, iji da usasa dadabururari, inua jo janimbae arira. A damana utuda dore vosarira.

<sup>30</sup> Ainda amboda, Evetu Genembo da Koro+ da tano, utuda isagha ururari, evetu genembo isasambu endada irera, ne ava garera. Gido, sorara ururoro, Evetu Genembo da Koro+ vose fururari garera amo, foroga etoda fetedo nunda fakina a usasa tomanako ainghae, vose fururari garera.

<sup>31</sup> Gosururoro, tavuya fusari, Evetu Genembo da Koro+ nunda aneya dirigari endada vose foa, iji vitarikena a vosarikena, kotugo foriforimanakena a yavatakena, aminda yama, nunda natofo gategusira ava unumbe budo yarera,” Iesu aminge sisira.

*24:32-35 Ika Kayuyu Da Kasiari. (Mark 13:28-31; Luke 21:29-33)*

<sup>32</sup> Aminge sise, Iesu sisira, “Ika kayuyu da ijugaboro ava kasama evu! Ika amo tuturo edo, tunó seka yaughururari gareva amo, ne kasama areva, ‘Borija da sifo buvira ava sedo, beká jighari da sifo utua erira.’

<sup>33</sup> Kau daba aminga ava, roera setena ava sirorurari gareva amo, ne kasama areva, ‘Sifo utua iri, tuturo ari dae erira.’

<sup>34</sup> “Geka evia kotovo dae sise resena! Roera setena ava sirorurari, evetu genembo oroko siroredo endada irera, mendeni garera. Mendeni ambarera, avata mendeni jo ambae iroro sirorari garera.

<sup>35</sup> Utu a enda dadabarira avata, nanda geka jo dadabae arira, evovoda dae irarira.”

*24:36-44 Iesu Furari Da Sifo Ava, God Nusuka Kasama Erira.*

*(Mark 13:32-37; Luke 17:26-30,34-36)*

<sup>36</sup> Aminge sise, Iesu sisira, “Avata Evetu Genembo da Koro+, nanjigo jovereghe furarira ainda Sifo amo, mave jo kasama aeri. Aneya ne jo kasama aeri, a God da Mandi barago, nu jo kasama aeri. God Afa nusukako kasama erira.

<sup>37</sup> Kau evetu genembo Noah da sifoda edo ghusera aminga ava, evetu genembo amboda kotae kotae ururoro, Evetu Genembo da Koro+ jovereghe furarira.

<sup>38</sup> Usegha a gisi jo furae iriri ainda gitida mo, umo gamo use, kirumo use, evetu fifitero a vai ero, Noah nunda ghakada+ vivitusira.

<sup>39</sup> Vitiri, rea sirorarira ava, ne bunari gido kotae kotae ero, usegha a gisi fira buvudo gaunghetiri mindi sirivo useri. Evetu genembo kau daba aminga ava ururoro, Evetu Genembo da Koro+ jovereghe furarira.

<sup>40</sup> Furarira da sifo aminda, genembo eni nunda komanaghae vareda saramana ururoro, foama eni ruruse eni doyarera.

<sup>41</sup> Evetu eni nunda komanaghae farava jasiroro, foama eni ruruse eni doyarera.

<sup>42</sup> Ava sedo, kaifa use gigitivu! Ainda susu mo: nenda Bajari sifo reda furarira ava, ne erebuneva.

<sup>43</sup> Avata geka evia kasama areva. Ainda sifo kau emingori. Kambo numamo, tafasara kato foa buvari da sifo ava ningi kasama aetira amo, nu diti fangedo kaifa aeti, jo doyari foa nunda Kambo+ bejae aeti.

<sup>44</sup> Ne andae sedo, nandae tefode numonde kaifa esimbuguse irivu! Ainda susu mo: Evetu Genembo da Koro+ jovereghe furarira da sifoá, ne bunise irovo jovereghe furarira,” Iesu aminge sisira.

*24:45-51 Saramana Kato Eveva, A Saramana Kato Eko Amo, Kau Emingori.*

*(Luke 12:41-48)*



<sup>45</sup> “Saramana kato dubo koteraira, a saramana e gogoghomberraira amo, kau emingori. Saramana kato amo saramana e gogoghombeari gido, nunda bajari seari saramana kato amo viti bajari da duruda fetedo, saramana kakato mendeninde, nenda saramana gatededo, nenda bayau soro edo, kambo a roera isambu kaifa urureari, bajariá ya deingheraira.

<sup>46</sup> Kaifa e gogoghombururari nunda bajari jovereghe furarira amo, saramana katoá aindae ivuga beká ava arira.

<sup>47</sup> Na eminge resena: bajariá nunda kambo a nunda roera isambu saramana kato aikena mutari, evovodae kaifa edo gharira.

<sup>48</sup> O saramana kato nu genembo eko iratira amo, nu eminge kotaeti, ‘Nanda bajari jo totói furae, ghousa futo irarira, tano.’

<sup>49</sup> Nu aminge kotedo tuturo edo, nunda bajari da saramana kakato mendeni ava, soesa ondi dedo, nu uvu fakara aindae oduso kakato mendeninde dabade anumbedo, uvu amo mindido ghaeteri.

<sup>50</sup> Aminguse, nunda bajari da furari sifo ava kotae edo irari, nunda bajari amo foa buvarira.

<sup>51</sup> Buvudo gido, saramana kato amo, dedo dive gafari ambarira. Gungubo kakatokena eraera, avavaga numokena ari ambarira. Gungubo kakatode dabade sorara use, dika ghininji ghananja ghuse irarera,” Iesu aminge sisira.

## 25

### *25:1-13 Ade Jamena Ghabu Sovenisoveni Aindae Ijugaborori.*

<sup>1</sup> Aminge sise, Iesu sekago sisira, “Sifo aminda, evetu genembo nange God da vasa evevada teroro ne kaifa<sup>1</sup> arira, aindae kasia eni sari dae erena. Amo eviri. Genembo eni nu evetu fifituse, kirumo ari dae sedo aira. Iri, ade jamena ghabu sovenisoveni aimi nenda nanefa

budo, genemboá unumbe bu furari dae sedo aera.

<sup>2</sup> Ade jamena ghabu soveni mo, nenda munju kikitakori. A ghabu soveni mo, nenda munju evevatori.

<sup>3</sup> Munju kikitako amo, ne nanefa da uvu jo teria baeri.

<sup>4</sup> O munju evevago amo, ne uvu botoro eni budo aera.

<sup>5</sup> Aera, emboro soroda fete kaifa eteri. Avata genemboá jo totói furae etira. Etiri, ne diti bainghetiri fafasedo averi.

<sup>6</sup> “Tumba soroda, ‘Fuvu! Genembo evirere, tambove!’ kori aminge siri ningido,

<sup>7</sup> ade jamena diti fange eredo, nanefa da vuiki (wick) jighero vitira.

<sup>8</sup> Vitiri, munju kikitako amo, ne eredo nenda kokomanakena seteri, ‘Nenda uvu itako namane sonembevu!’ ne aminge setero,

<sup>9</sup> ade jamena munju eveva amo, ne seteri, ‘Tefo. Emo jo namonde dabade baoro inono ae arira. Ne yasivu, bisnis (business) embokena seka ombove!’ ne aminge seteri.

<sup>10</sup> Setero, ade jamena munju kikitako amo, ne uvu ombari dae sedo ero, genemboá ojighira buvira. Buviri, ade jamena uvu budo aera amo, ne eredo genembo aindae dabade kirumo ari dae aera, kambo teretero guro gajetira.

<sup>11</sup> “Guro gajetiri aindae amboda, ade jamena mendeni amo ojera buvudo, ajagha fetedo kori seteri, ‘Bajari, Bajari, guro afige, namane terore!’ aminge seteri.

<sup>12</sup> Setero, nu nemokena setira, ‘Geka bekári: ne mavejori, na erebunena,’ genemboá aminge setiri dadabetira.”

<sup>13</sup> Iesu aminge sedo, tano ari dae use eminge sisira, “Kaifa use irivu! Aindae beká mo: Evetu Genembo da Koro+ sifo nanjigo jovereghe furarira ava, ne bunariri,” Iesu aminge sisira.

*25:14-30 God Joba Muturaira,*

<sup>1</sup> 25:1: Afige, **Geka Se Disugari Da Vasa** aminda, geka *Natofu* aindae rea gefusera ava, tege garesa.

*Ainda Kasiari.**(Luke 19:11-27)*

<sup>14</sup> Aminge sise, Iesu sisira, “Setena, daba ava sari dae erena. Sifo amo kau emingori. Genembo eni esa yari dae kotetira. Kotise, aghi etiri nunda saramana kakato torugetero, nunda gugua a moni+nene kaifa aoro dae sedo, mutiri beri.

<sup>15</sup> Amo, nenda irari kau mavegoá, a nenda munju kau mavega ava gi kasama edo, nunda roera ghasetiri beri. Eni K30,000 bira, eni K12,000 bira, a eni K6,000 bira. Mutiri bero, genemboá javi edo aira.

<sup>16</sup> Iri, saramana kato K30,000 bira amo, nu eredo aira, aimi bisnis (business) a oriro use sekago K30,000 bira.

<sup>17</sup> Saramana kato K12,000 bira amo, nu kau daba ava use, aimi saramana use sekago K12,000 bira.

<sup>18</sup> Avata, nenda komana eni K6,000 bira amo, nu eredo aira bako ghambudo, nunda bajari da moni+aminda fiti fatira.

<sup>19</sup> “Sifo ghousa ambari ava dadabetiri aında amboda, bajari jovereghe ojira. Ojira setiri, nunda saramana kakato etodaba naká ojera buvero, nunda moni+ futusira aimi rea usera, aında ategi etira.

<sup>20</sup> Saramana kato K30,000 bira amo, aira teredo, K30,000 etiri sirorusira ava, futuse setira, ‘Ninda K30,000 futusesa amo, eviri. Kotugo K30,000 emo, nane saramana eteno siroretira.’

<sup>21</sup> “Aminge setiri ningido, nunda bajari numokena setira, ‘Aiyakoe beká resena! Ni e gogoghombetesi. Ni saramana kato evevagori. Nanda roera jo digari iraeko mutena ava, nangedo eteso digetiri besi. Ava sedo, oroko nanda roera digari ava mutono, nine kaifa aresa. Fu, nange dabade ivuga aore!’ aminge setira.

<sup>22</sup> “Kotugo setiri, saramana kato K12,000 bira amo, aira teredo setira, ‘Ninda K12,000 futusesa amo, eviri. Kotugo K12,000 emo, nane saramana eteno siroretira.’

<sup>23</sup> “Aminge setiri ningido, nunda bajari numokena setira, ‘Aiyakoe beká resena! Ni e gogoghombetesi. Ni saramana kato evevagori. Nanda gugua jo digari iraeko mutena ava, nangedo eteso digetiri besi! Ava sedo, oroko nanda roera digari ava mutono, nine kaifa aresa. Fu, nange dabade ivuga aore!’ aminge setira.

<sup>24</sup> “Kotugo setiri, nenda komana K6,000 bira amo, aira teredo setira, ‘Bajari, na kasama erena, ni genembo fakaragori. Evetu genembo mendeni roera goveoro, aında vuji nine ya bamburaesa. A evetu genembo mendeni roera veka goveoro, aında beká nine ya buraesa.

<sup>25</sup> Na aında oju edo, ninda moni+budo ena endada ghambu fiti fateni. Gi! Ninda moni mutesa amo, evirere,’ aminge setira.

<sup>26</sup> “Setiri, saramana kato aında bajari eredo setira, ‘Ni saramana kato ekori! Ni imboe kato, guka dagaya bekári! Ninda kotari mo: evetu genembo mendeni roera govoro, aında vuji ava nane ya bambariri, a evetu genembo mendeni roera veka govoro, aında beká ava nane ya bambari ava, koterasesa.

<sup>27</sup> Ava sedo, ni nange nanda moni evia bu ya banikada (bank) fitaso, aminda irari saramana ururoro, aında baako sirorari, na jovereghe foa bae eteni!’ aminge sedo,

<sup>28</sup> nu jovereghedo nunda mendenikena setira, ‘Ne moni numokena saghimbe budo, genembo eni K25,000 rurusira, aikenamutuvu bare!

<sup>29</sup> Aında beká mo: mavekena rea irarira amo, mendeni mutoro, nune bari inono beká ava arira. O mavekena tefo beká, o itako irarira amo, ábarago saghimbe baoro, nu makasi beká ava arira.

<sup>30</sup> Avori, genembo guka dagayaó sandi bu yasivu, fugovo ajagha ya tumbada irise, aminda sorara use dika ghininji ghananja ghuse irare!’ saramana kakato da bajari aminge sedo tano etira,” Iesu aminge sisira.

*25:31-46 Ategi Da Sifo Mo, Kau Emingori.*

<sup>31</sup> Aminge sise, Iesu sisira, “Evetu Genembo da Koro+ kini (king) arira ainda sifoda, nu nunda aneya isambude dabade foama, nunda avo anumba usasago aminda viti anumbarira.

<sup>32</sup> Anumbirari, saoro enda da natofo a evetu genembo isambu foa, nunda dombuda totorugarera. Totorugaoro, kini tuturo edo, eveva gatege budo nunda ungo gimanduda fitarira, a ekokoá nunda ungo umbefukena fitarira. Kau sifi (sheep) kaifa kato, nunda sifi gatege ruruse gouti (goats) doyeraira, aminga ava arira.

<sup>33</sup> Evetu genembo eveva amo, gatege budo nunda ungo gimandukena fituse, ekoko amo nunda ungo umbefukena doyarira.

<sup>34</sup> Amingedo, kini, evetu genembo ungo gimandukena fetarera aikena sarira, ‘Fuvu, God Afa utu a enda use, vasa eveva nendae sise esimbugusira, aminda yaovo, ne esimbugedo kaifa ari dae resira. Fuvu, ya aminda terove!

<sup>35</sup> Na uvu bayaudae ighoi itatameno, mutevo ruruseni. Na jo nenda tofo iraeri. Avata feno gido, joka etiri na bu kaifa usevu.

<sup>36</sup> Na embo boka tefo ireno, mutevo na tamo gagara useni. Na kae bu fasireno, ne feva uvu ika sonembedo futusevu. Na diburada fitero teredo ireno, ne feva buvevo, na nenda dombu gido, ghamo aseguseni,’ kini (king) aminge sarira.

<sup>37</sup> Sari dadabari gido, evetu genembo eveva aimi eminge sarera, ‘Bajari, nange resesi? Ni nanjigo ighoi itatameso, namane gido uvu bayau futuseri?

<sup>38</sup> O ni nanjigo teana embo da kaugo edo fesa buveso, namane gido ni bu kaifa useri? O ni nanjigo embo boka tefo ireso, namane gido sonembuse futuseri?

<sup>39</sup> O ni nanjigo kae bu fasireso, namane gido uvu ika budo era sonembuseri? O, ni nanjigo diburada ireso gido, namane era buvero, ni nama-

nenda dombu gido dubo jama usesi?’ aminge sarera.

<sup>40</sup> “Aminge saoro, kini (king) sekago nemokena sarira, ‘Sonemba evia nanda nano namendi, foivo batekena edo ghuseva amo, ne namokena edo ghusevu,’ kini nu aminge sedo,

<sup>41</sup> evetu genembo ekoko ungo umbefukena fetarera aikena eminge sarira, ‘God Satan nunda aneyade dabade ya terore dae sedo, vasa eninda avaraka simbugusira. Nembarago vasa daba aminda ya terovo dae resena. Ava sedo, yasivu terove!

<sup>42</sup> Na uvu bayaudae ighoi itatameno, ne na jo sonembuse mutae usevu.

<sup>43</sup> Na teana embo da kaugo edo fena buveno, ne na jo bu kaifa ae usevu. Na embo boka tefo ireno tambudo, na jo sonembedo mutae usevu. Na kae bu fasireno, ne uvu ika jo sonembedo mutae usevu, a na diburada ireno, ne jo furovo na nenda dombu gido ghamo asegae useni,’

<sup>44</sup> kini nu aminge sari dadabari, ne mino numokena sarera, ‘Bajari, nange resesi? Ni vasa reda ighoi itatameso, namane ni gido jo sonembae useri? Ni nanjigo feso gido, namane ni jo sonembae useri? Ni nanjigo embo boka tefo ireso o kae budo fasireso o diburada ireso, namane jo joka edo ni sonembae useri? Se ningore!’ aminge sarera.

<sup>45</sup> Aminge saoro, kini sekago nemokena sarira, ‘Nanda nano namendi, foivo bate da mema a dubo mema gido, jo joka edo sonembae edo ghuseva, amo namokena edo ghusevu,’ kini nu aminge sari dadabari,

<sup>46</sup> nu evetu genembo amo dirigari yama, vasa eninda mema evovodae itatamuse irarera. O evetu genembo eveva amo, ne vasa eninda yama jebuga evovodae irari ainda vasada buvudo, dubo jamaghae evovodae irarera,” Iesu aminge sisira.

## 26

*26:1-5 Iesu Daoro Ambare Dae Sedo, Manaka Garuseri.*

*(Mark 14:1-2; Luke 22:1-2; John 11:45-53)*

<sup>1</sup> Iesu aminge ijugetiri dadabetiri, nu namanekena sisira,

<sup>2</sup> “Sifo etoto dadabari ainda amboda, namonde Jusi embo da kirumo javo Jarige Yari da Kirumo+, ava foa buvarira. Sifo aminda, evetu genembo mendeni, ne Evetu Genembo da Koro+ sandido daoro ambare dae sedo, gitofukena mutarera,” aminge sisira.

<sup>3</sup> Sifo daba aminda, fristi+ da kokotofu a Jusi embo da babojegari era, fristi+ da giti jighari javo Caiaphas da kamboda totoruguseri.

<sup>4</sup> Totorugedo, Iesu ufena sandi daoro ambare dae sedo, manaka garuse

<sup>5</sup> eminge siseri, “Namonde Jarige Yari da Kirumo+ da sifo aminda, jo ae arera. Ainda tuka mo: amingarera amo, natofo tomanako kirumodae totorugarera aimi, ne janje eko edo titigho arera tanojo,” aminge siseri.

*26:6-13 Evetu Eni Fira, Usuimi Iesu Da Jiroda Averegusira.*

*(Mark 14:3-9; John 12:1-8)*

<sup>6</sup> Iesu nu ira reighi javo Bethany aminda buvudo, genembo javo Simon Refero aikena

<sup>7</sup> iriri, evetu eni usu da muka aimi budo fira, Iesu kena teterusira. Botoro ghamana arabasta aimi usera, ainda jokáda usu ava vendero iriri budo fusira. Usu muka reşena emo, munonderi, a nunda minó mo teria bekári. Ava bu fira teredo, Iesu bayau riri, usuimi nunda jiroda averegusira.

<sup>8</sup> Averegetiri dadabetiri gido, namanenda mendeni janje eko useri. Edo siseri, “Omo nange edo soesa averegetiri dadabeti?”

<sup>9</sup> Omo budo oriro aetera amo, ainda moni digarigo sirorari budo makasi embokena ghasaeteri,” aminge siseri.

<sup>10</sup> Avata namane aminge sero, Iesu itatamedo namanekena sisira, “Redae evetué dombuda resevu? Nu namokena veka eveva etira.

<sup>11</sup> Eregoseva: makasi embo ne sifo ghousa, nemonde dabade irá gheraeva; ava sedo, nemo sonembari sareva amo, sonembuse irá ghareva. O namo, jo namonde dabade sifo ghousa irae arera.

<sup>12</sup> Averegetira emo, nanda tamo simbugedo namo bu furugarera ain-dae sedo, etira.

<sup>13</sup> Na geka beká resena. Ningivu! Nanda Bino Eveva reda ya buvari ningarera amo, evetué rea namokena etira ava, erá kotae eore dae sedo, vironu sise, nunda bino evia sise irarera,” aminge sisira.

*26:14-16 Judas Nu Ira, Iesu Dari Dae Sedo, Gitofude Dabade Manaka Garuseri.*

*(Mark 14:10-11; Luke 22:3-6)*

<sup>14</sup> Ainda amboda, namane 12 namanenda jokáda, genembo eni Keriot embo javo Judas aimi eredo, fristi+ da kokotofukena ira,

<sup>15</sup> eminge sisira, “Na Iesu nenda ungodá fitarena amo, ne rejoá nandae mutarevu?” aminge setiri, ne moni+ babai 30, inono K1,200 avavaga tegedo, numokena futuseri.

<sup>16</sup> Mutero budo, Judas tuturo edo, Iesu nange ufena budo nenda ungodá fitaetira, ainda emboro ava kakova usira.

*26:17-25 Iesu Nunda Ambo Jimbide Dabade, Jarige Yari Da Kirumo+ Useri.*

*(Mark 14:12-21; Luke 22:7-13,21-23; John 13:21-30)*

<sup>17</sup> Yisti Kanangara Ari da Kirumo+ ainda sifo kakara tuturo iri, sifo daba aminda, namane Iesu kena era ategi useri, “Namane Jarige Yari da Kirumo+ reda esimbugaoro dae uju eresi?”

<sup>18</sup> Aminge setero, nu sisira, “Jerusalem aminda yasivu! Genembo eni aminda irirare. Numokena yasivu eminge saove, ‘Ijuga kato eminge setira, “Nanda sifo buvira. Ava sedo, nanda ambo jimbide ninda

kamboda Jarige Yari da Kirumo+ ava dabade mindarera,” ’ ’ Iesu aminge sisira.

<sup>19</sup> Setiri, namane eredo era, Iesu rea sisira amo, isagha etiri Jarige Yari da Kirumo+ simbuguseri.

<sup>20</sup> Simbugetero dadabetiri ungobu iri, namane 12 a Iesu de dabade bayau mindari dae sedo, era anum-buseri.

<sup>21</sup> Anumbedo, bayau rise ainda jokáda, Iesu eminge sisira, “Na nemokena geka beká sari dae erena. Namonde anumbirera ainda jokáda, genembo eniimi, namoá gitofukena aito arira,” aminge sisira.

<sup>22</sup> Setiri, namane dudukughedo dubo mema use, tuturo edo daba daba numokena ategi useri, “Bajari, ni mavedae resesi? Se ningore! Ni namokena resesa, ai?” namane isambu aminge siseri.

<sup>23</sup> Setero, Iesu mino sisira, “Genembo mave nangae ungo dabade, bayau sukada fati bu rerera, amo numori.

<sup>24</sup> God da Geka jokáda rea gembero irira, amo eviri:

‘Evetu Genembo da Koro+ ambarira,’ aminge gefuseri. A aminge siro-rarira. Avata, genembo mave nu aito ari ambarira amo, nu mema a bouvu teriagó beká ava barira. Eveva mo, nu jo sirorae aeti!”

<sup>25</sup> Iesu aminge setiri dadabetiri, genembo mave amboda Iesu aito usira aimi eredo, Iesu kena ategi usira. Amo, na Judas dae resena. Avori, Judas nu eredo ategi usira, “Ijuga Kato, ni mavejodae resesi? Nandae resesa, ai?” aminge setiri, Iesu mino numokena sisira, “Resesa, avori!”

*26:26-30 Bajari Da Kirumori.*

*(Mark 14:22-26; Luke 22:14-20; 1 Corinth Embokena 11:23-25)*

<sup>26</sup> Setiri dadabetiri, ne bayau rise, Iesu nu farava budo, God Afakena ‘aiyakoe’ sedo, esimbugedo jighi embebedo, namanekena futusira. Futuse sisira, “Emo nanda tamori. Bu mindivu!” aminge sedo

<sup>27</sup> ainda amboda, nu agha bu jighiri eretiri, God kena ‘aiyakoe’ sedo, namanekena futuse sisira, “Ne isambu mindivu!

<sup>28</sup> Emo nanda ororori. Nanda oro-roimi, God nu, numokena ya bu-vari da emboro+ seka, afigari dae erira. Evetu genembo digari da jebugadae sedo, nanda ororo avere-gaono vosedo emboro+ afigari, God nenda ari ekoko kote doyarira.

<sup>29</sup> Na nemokena resena: na vaini (wine) jo mindae irono, Afa sari ne nunda vasa<sup>29</sup> eveva aminda ya terovo, namonde dabade anumbedo, na vaini sekago aminda mindarena,” aminge sisira.

<sup>30</sup> Iesu aminge setiri dadabetiri, namane eredo yaru eni divudo, kambo dodo enda jiro fumbari javo Orivi, aminda iseri.

*26:31-35 Peter Iesu Ighagha Arira Ava, Iesu Nu Giti Osa Sisira.*

*(Mark 14:27-31; Luke 22:31-34; John 13:36-38)*

<sup>31</sup> Aminda ise, Iesu namanekena sisira, “Tumba erejirira ainda jokáda, ne isambu na dodo sumbareva. God da Geka jokáda rea aindae sedo gembero irira amo eviri: ‘God sifi (sheep) kaifa katoá dari ambari gido, sifi sarigedo nunda nunda sumbarera,’

God da Geka aminge resira.

<sup>32</sup> Avata kotugo, God sari na ambarida ghe jebugedo erarena ainda amboda, na ya Frovensi Galilee aminda buvuruturono, ne amboda furareva,” aminge sisira.

<sup>33</sup> Setiri, Peter numokena sisira, “Bajari, ninda mendeni ni ighagha edo doyarera, tanojo. Avata namo, ni itako jo doyae arena.”

<sup>34</sup> Peter aminge setiri, Iesu numokena sisira, “Na nimokena geka beká resena. Sifode, kokora sifo jo kari-gae irari, ni na umbu etodaba naká ighagha aresa.”

<sup>35</sup> Aminge setiri, Peter numokena sisira, “Na ni jo ighagha ae beká

<sup>29</sup> 26:29: Afige, **Geka Se Disugari Da Vasa** aminda, geka *Natofó* dae rea gefusera, ava tege garesa.

arena. Na nangae dabade ambarera amo, avori,” Peter aminge sisira. Kotugo namane isambu geka daba ava sisiri.

*26:36-46 Iesu Ira Reighi Javo Getsemani Buvudo, Vare Jokáda Banungusira.*

*(Mark 14:32-42; Luke 22:39-46)*

<sup>36</sup> Ainda amboda, Iesu namane namonde dabade era, reighi javo Getsemani aminda buvudo, nu namanekena sisira, “Ne eminda anumbirovo, na ya ominda banungarena,” aminge sisira.

<sup>37</sup> Aminge sedo, nu Peter a Zebedee da vide jamena etoto naká ava budo, nemonde era fetedo, Iesu nu dubo mema ambarako usira.

<sup>38</sup> Etiri, nemokena sisira, “Nanda dubo jokáda, bouvu mindafu beká ava erefufena. Fufuse, na ambududurerena. Ne diti fakara edo, eminda fetedo namo kaifa ururuvu!” aminge sisira.

<sup>39</sup> Aminge sedo, ne dodo itako ira, dombui du fasedo banunguse sisira, “Arie, nanda Afa! Emboro eni tambaetesa amo, mema oroko namokena refira evia, saso dari-gaeti! Avata, na jo nanda uju ava ari dae sae erena. Ninda uju ava arena!”

<sup>40</sup> Aminge sedo, nu ere jovereghedo namanenda mendeni etodaba naká, Peter, James, a John kena ira buvudo, ne fafase avéro tambudo, Peter kena eminge sisira, “Fasireva, ai raveva? Ne redae sifo tufako jo diti fakara edo, na itako kaifa aeri?”

<sup>41</sup> Erá Satan foa nemo dereuri ari eko eove dae sise, diti fakara edo banungevu! Nenda uju a kotari namokenari. Avata nenda tamo imboe edo, diti bouvu etiri, ne fakina jo ae ereva,” Iesu aminge sisira.

<sup>42</sup> Aminge sedo, nu jovereghe ira banunguse sisira, “Arie, nanda Afa! Emboro eni jo inono ae aetira amo, na, emboro simbugusesa aminda ise, ninda uju ava use ambarena. Ninda uju ava sirorare!” aminge sedo,

<sup>43</sup> jovereghedo ira buvudo, ne sekago diti bainghetiri fafasedo avéro tafusira.

<sup>44</sup> Ava gido, nu sekago jovereghe ira, kau daba aminga ava sekago banungetiri dadabusira.

<sup>45</sup> Dadabetiri, ira Peter, James, a John kena sisira, “Ne ravava amo, nangetiraimi kotugo sekago fase ravevu? Givu! Sifo buvira! Oroko Evetu Genembo da Koro+ ari eko embo da ungodá fitarira.

<sup>46</sup> Erevu namonde ya gaore! Givu! Genembo namo aito erira amo, evia buvirere!” aminge sisira.

*26:47-56 Iesu Sanduduseri.*

*(Mark 14:43-50; Luke 22:47-53; John 18:3-12)*

<sup>47</sup> Iesu aminge siri, namanenda eni javo Judas, fira buvurutusira. Fristi+ da kokotofu a Jusi embo da babojegari, ne evetu genembo mendeni dirigetero, kaiya a gandigha ava budo, Judas de dabade fera buvurutuseri.

<sup>48</sup> Giti ne jo javi edo furae irise, gitofu Iesu kau nange kasama aetera aindae, Judas nu eminge sisira, “Sandi muno arena amo, numora avori. Ururono aminda kasama edo, nu sandareva!” aminge sisira.

<sup>49</sup> Judas gitofude dabade fera buvudo, Judas dambu Iesu kena ira sisira, “Ijuga Kato, iresa,” aminge sedo, Iesu sandi muno usira.

<sup>50</sup> Etiri, Iesu numokena sisira, “Nanda komana, ni rea eresa amo, totoi e!” aminge setiri, gitofu fera Iesu sanduduseri.

<sup>51</sup> Sandudero, namanenda eni ungoimi nunda kaiya budo jighiri eretiri, fristi+ da giti jighari ainda saramana kato da dengoro ava, kaiyaimi je gafugetiri dudurusira.

<sup>52</sup> Etiri, Iesu numokena sisira, “Erá amingeose! Ninda kaiya voruda vendi! Ai resira amo: isoro kakato ne, isoro udo ya sirivo arera.

<sup>53</sup> Ne kasama aetevu: nanda Afa sonembare dae sedo benunu sarena amo, nu aneya 70,000 avavaga mutari foama na sonembarera.

<sup>54</sup> Avata na amingaetena amo, God da Geka rea resira, ainda beká jo siroraē aeti. Ava sedo dovu na sandore!” Iesu aminge sedo,

<sup>55</sup> jovereghe gitofukena eminge sisira, “Ne redae kaiya a gandigha budo, namo sandari dae sedo refevu? Na jo tafasara kato iraeri. Na namonde sifo ghousa God da Kamboda+ ijugedo ghusea amo, ne nangusirai na aminda jo sandae edo ghusevu?”

<sup>56</sup> Avata ne emingereva da beká mo: God da Geka rea resira, ava beká are dae sedo, nene etevo sirorerira,” Iesu aminge sisira.

Aminge setiri ningido, namane isambu oju edo, nu do sufuseri.

*26:57-68 Iesu Koto Ari Dae Sedo, Budo Iseri.*

*(Mark 14:53-65; Luke 22:54-55,63-71; John 18:13-14,19-24)*

<sup>57</sup> Natofu Iesu sandudusera amo, budo era, fristi+ da giti jighari javo Caiaphas, ainda kamboda buvurutuseri. Moses da Geka ijuga kakato+ a Jusi embo da babojegari totorugedo irero, Iesu bu teteruseri.

<sup>58</sup> O Peter mo, nu itako ambokena fetiriri, Iesu budo ero, nu amboda amboda udo ira, fristi+ da giti jighari javo Caiaphas, nunda kambo da furu aminda teredo, ofotighida buvudo fefetusira. Fetedo, ne Iesu kena rea arera ava, itatame gari dae sedo, Peter isoro kakato mendeni ainde dabade anumbusira.

<sup>59-60</sup> Avori, fristi+ da kokotofu a kaniseremane isambu aminda totorugusera aimi, Iesu daoro ambare dae sedo, susu kakova useri. Susu tambari dae sedo, setero evetu genembo mendeni fera teredo, Iesu dae aji siseri. Ne gungubo teria futo siseri. Avata numo saoro ambari da susu eni jo tambaeri. Ainda amboda, gegenembo etoto ere fetedo,

<sup>61</sup> eminge siseri, “Genembo emo, nu eminge sisira, ‘God da Kambo+ nane jighi bejedo, sifo etodaba naká ainda jokáda sekago itono fetarira. Amingari mo, namokena inonori,’” etoto nakái aminge setero ningido,

<sup>62</sup> fristi+ da giti jighari eredo, Iesu kena ategi usira, “Geka setera aindae, ni reju eni saresa? Evetu genembo resera emo, geka bekári?”

<sup>63</sup> Aminge sisira, avata Iesu nu geka reju eni jo saeri. Etiri, fristi+ da giti jighari sekago Iesu kena sisira, “God irira, ainda javoda resena. Ni mino se ningore! God evetu genembo da ari ekoko kote doyari dae sedo, nunda Mandi mutari sisira amo, nimori, ai? O, jo nimo iraeri? Se ningore!”

<sup>64</sup> Nu aminge setiri, Iesu mino numokena sisira, “Resesa, avori. Kotugo nemokena resena: amboda ne, Evetu Genembo da Koro+, God Fakina Kato ainda ungo gimandukena anumbirari gareva, a kotugo utu da foroga etoda fetedo vose fururari gareva,” Iesu aminge sisira.

<sup>65</sup> Setiri ningido, fristi+ da giti jighari janje eko etiri, nunda tamo asugari ava jighi ijejegusira. Aminguse, sisira, “Nu aminge siri, God da javo eko erira. Geka eni redae ningareri? Nunda ari eko ava, tofo siri niningerevere!”

<sup>66</sup> Ava ne nange erekotevu?” aminge sisira. Setiri, ne siseri, “Geka evia siri ningera aindae sedo, nu daoro ambarira,” aminge sedo,

<sup>67</sup> ne tuturo edo nunda dombuda kosiva useri, a nunda sovoda ungo joghai megha useri.

<sup>68</sup> Aminguse, nu dere jise eminge siseri, “Ni God dirigari furariá seraes. Ava sedo, javo se, namane ningore! Ni mave eredori?” aminge siseri.

*26:69-75 Peter Nu Iesu Ighagha Usira.*

*(Mark 14:66-72; Luke 22:56-62; John 18:15-18,25-27)*

<sup>69</sup> Peter nu kambo ofotighida kaifa use anumbiriri, gagara saramana kato eniimi fira Peter kena sisira, “Ni, Galilee embo genembo javo Iesu sedo ghusera, ainde dabade deinghedo ghusesi. Amo nimori,” aminge setiri,

<sup>70</sup> Peter natofu isambu da dombuda ighagha use sisira, “Ni geka resesa amo, na bunariri,” aminge sisira.

<sup>71</sup> Aminge sedo, nu eredo ira, emboro békada fefetusira. Aminda fetiriri, gagara saramana kato enii fira numoá gido, kau daba ava, gegenembo aminda fetiriser akena sisira, “Genembo emo, Nasareth embo Iesu de dabade deinghedo ghusira,” aminge setiri,

<sup>72</sup> Peter sekago ighagha use kovionoghae sisira, “God da dombuda nemokena resena. Genembo reseva amo, na bunari bekári,”

<sup>73</sup> Aminge setiri, itako fetedo ainda amboda, genembo eni aminda fetirisira aimi eredo fira buvudo, Peter kena sisira, “Geka bekári. Nunda eni nimori. Ainda beká mo: ni Galilee embo da geka duka ava seso ningido, na kasama erena, ni taká Galilee embori,” aminge sisira.

<sup>74</sup> Setiri, Peter God da javoda, beka gagojuse sisira, “Na gungubo sarena amo, God na darira. Genembo reseva amo, na bunari bekári!” Peter aminge siri, kokora sifo karigusira.

<sup>75</sup> Karigiri, Iesu rea numokena sisira ava, Peter kotisira. Iesu sisira amo, eviri: “Kokora sifo jo karigae irari, ni na umbu etodaba naká ighagha aresa,” Iesu rea numokena sisira ava kotise, Peter buvudo ira isaghada fetedo, sorara janjagughae usira.

## 27

*27:1-2 Iesu Mo, Pilate Da Ungoda Fifituseri.*

*(Mark 15:1; Luke 23:1-2; John 18:28-32)*

<sup>1</sup> Sifo atetiri, fristi+ da kokotofu a namonde Jusi embo da babojegari, Iesu daoro ambare dae sedo manaka garuseri.

<sup>2</sup> Amingedo, ne Iesu seiniimi (chain) bundedo budo era, Rome embo da kotofu javo Pilate, Frovensi Judia kaifa edo ghusira ainda ungod a fifituseri.

*27:3-10 Judas Nu Tofo Duboda Ivasi Edo, Ambududurusira.*

*(Ekaresia 1:18-19)*

<sup>3</sup> Iesu daoro ambare dae sero ningido, Judas Iesu aito usira aimi

dubo jovereghetiri, moni+ babai 30 futusera ava budo, sekago fristi+ da kokotofu a Jusi embo da babojegarikena ira futusera.

<sup>4</sup> Futuse, sisira, “Na dara embori! Genembo aito use nenda ungod a fiteno, daovo ambare dae ereva omo, genembo evevagori,” aminge sisira. Setiri, ne numokena siseri, “A jo namakena sae aresa. A tofo ninda darari.”

<sup>5</sup> Aminge setero ningido, Judas moniá God da Kambo+ jokáda fuge dodo, nu buvudo ira, tofo mandi duboda ivasi edo ambududurusira.

<sup>6</sup> Fristi+ da kokotofu ne moni ava rete budo, dabade se nininguse siseri, “Emo aito da minori. Ava sedo, e budo God kena joba mutarera amo, namondeda Agho Dari bejarera,” aminge sise, manaka garuse eminguseri.

<sup>7</sup> Ne moni aimi, okia jighari kato eni ainda enda ava, ofofodae sedo ofuseri. Ne gitofu ambeoro gido, aminda furugedo ghuseri.

<sup>8</sup> Aindae sedo, enda ofusera, ainda javo ‘Ororo’ jijighuseri.

<sup>9-10</sup> Amingero, God da feroveta Jeremiah rea sisira, ainda beká ava sirorusira. Nu eminge sisira:

“Bajari namokena rea aono dae sisira ava, nene useri. Israel embo, ne genembodae moni 30 (kau K360 avavaga) mutari sisera, ava budo aimi, okia jighari kato akena enda ofuseri.”

God aminge setiri Jeremiah gefusira.

*27:11-14 Pilate Nu Iesu Da Dara Ava Ijujusira.*

*(Mark 15:2-5; Luke 23:3-5; John 18:33-38)*

<sup>11</sup> Iesu nu frovensi da kotofu javo Pilate, ainda dombuda fetetiri, Pilate Iesu kena ategi use sisira, “Se ningone! Geka bekári: ni Jusi embo da kiniri (king), ai tefo?” aminge setiri, Iesu numokena sisira, “Ava nine resesare,” aminge sisira.

<sup>12</sup> Avata fristi+ da kokotofu a evetu genembo da babojegari nundae aji



sise, geke ekoko mendeni mendeni sisera aindae, nu mino jo saeri.

<sup>13</sup> Ava ningido, Pilate numokena ategi usira, “Ni dara a geke sembae sariá evetu genemboi sero niningeresa. Ava sedo, ni redae mino jo sae eresi?” Pilate aminge sisira.

<sup>14</sup> Avata Iesu aindae mino eni itako jo saeri. Etiri gido, kotofuá nu dudukughedo bunisira.

*27:15-26 Pilate Nu, Iesu Arafa Daoro Dae Sedo, Natofu Da Ungoda Fifitusira.*

*(Mark 15:6-15; Luke 23:13-25; John 18:39–19:16)*

<sup>15</sup> Jarige Yari da Kirumo+ ainda sifoda, frovensi da kotofuá sifo ghousa emingedo ghusera. Dibura embo eni nenda uju ava, natofoi benunu seoro ningido, nu doyeari tefo foa buvudo ghuseri.

<sup>16</sup> Sifo aminda, genembo eni javo Iesu Barabbas, diburada irei. Genembo amo nu eko bekári, edo nu binonderi.

<sup>17</sup> Avori, Pilate nu genembo eni doyeari ya buvaetira, ava kotise iriri, evetu genembo Iesu koto ari dae sedo totorugetero, nu nemokena ategi usira, “Genembo nenda uju ava sevu ningone! Mavejoá doyono buvu yari? Iesu Barabbas seraera, ai, Iesu Keriso seraera ava, sevu ningone!”

<sup>18</sup> Pilate nu aminge sisira da beká mo: nu kasama usira, ne Iesu sandi numokena budo fusera da susu mo, jo Iesu da ari ekodae bu furaeri. Amo, fristi+ da kokotofu a Jusi embo da babojegari ne, evetu genembo digari Iesu da geke ningido ghusera ava gido, dubo eko etiri, nu aindae sanduduseri.

<sup>19</sup> Pilate nu, koto da vasada kaifa use anumbiriri, noaro geke eni gembu mutiri firi rurusira. Noaro eminge sisira, “Genembo javo Iesu, koto use ireasa amo, genembo evevari. Nu doyasoyae. Ainda susu mo: tumbade aturuda na nundae sedo, dubo vevera tambeni,” noaro aminge gembudo sisira.

<sup>20</sup> Avata fristi+ da kokotofu a Jusi embo da babojegari, Iesu daoro ambududururari, Barabbas ava doyeari foa buvare dae uju use setero, evetu genembo ne geke ava tumonduseri.

<sup>21</sup> Etero, Pilate nemokena ategi usira, “Avori, sevu ningone! Na genembo ningiava saono buvu yari?” aminge setiri, ne, “Barabbas,” siseri.

<sup>22</sup> Setero, Pilate ategi usira, “Atá, genembo eni javo Iesu, evetu genembo mendeni Keriso seraera emo, nange areni? Sevu ningone!” aminge setiri, ne isambu, “Arafa dege!” siseri.

<sup>23</sup> Setero, Pilate sisira, “Atá, nunda dara rejuri? Sevu ningone!” setiri, ne tuturo edo koko sise fumbu aruguse, “Arafa dege!” siseri.

<sup>24</sup> Nunda geke sisira ava jo ningae, ne tuturo edo titigho ari da kau ava ero gido, Pilate setiri uvu budo fira buviri, evetu genembo da dombuda ijugaboro fifituse, nu ungo seghusira. Seghedo, sisira, “Dara ainda dongono evia, segheteno vovoserirere. Nene setevo, genembo emo ambarira. Ainda bouvu, jo nane fumbae arena,” aminge sisira.

<sup>25</sup> Aminge setiri, natofu isambu mino numokena siseri, “Genembo ava ambarira ainda mino mo, namane, a kotugo namanenda sasingu a imemesiriimi barera!” aminge siseri.

<sup>26</sup> Setero, Pilate natofoda uju ava use, Barabbas dotiri buvurutusira. Etiri, Pilate setiri nunda isoro kakato mendeni Iesu ambími detero ainda amboda, nu Iesu budo arafa daore dae sedo, isoro kakato mendeni da ungodafifitusira.

*27:27-31 Isoro Kakato Iesu Dere Jiseri.*

*(Mark 15:16-20; John 19:2-3)*

<sup>27</sup> Pilate da isoro kakato ne Iesu budo era, gavana da kamboda teredo aghi etero, nenda mendeni isambu totorugedo, nemonde Iesu jimbe birurughuseri.

<sup>28</sup> Jimbe birurughedo, nunda tamo asugari ava isorogo jumbero kosugusira. Amingedo, ne embo unju tamo a ghousago ava bu fera asuguseri.

<sup>29</sup> Asugedo, ne asi titifaghae bu kefu edo kini (king) da kekesa avavaga edo, nunda jiroda asuguseri. Edo, kotofu da ketua avavaga ari dae sedo, sebore ifu divege bu fera nunda ungodá fitero Iesu jighi fefetusira. Nu dere jise, kau kini tumonde baingheraera, avaga useri. Aminguse, ne sedo ghuseri, “Orokaiva! Jusi embo da kini buviro! Orokaiva!”

<sup>30</sup> Aminge sise, kosiva use sebor-eimi nunda jiroda dedo ghuseri.

<sup>31</sup> Dere jirero dadabetiri, nenda embo Iesu kena asugusera ava kosughedo, tofo nunda ava bu fera numokena asuguseri. Amingedo, nu arafa dari dae sedo jumbudo iseri.

*27:32-44 Iesu Arafa Doruseri.*

*(Mark 15:21-32; Luke 23:26-43; John 19:17-27)*

<sup>32</sup> Reighi Jerusalem ghe buvudo ise, Sairin embo eni javo Simon ava tambudo, setero nu Iesu sonembedo nunda korosi fumbiri nemonde iseri.

<sup>33</sup> Era, reighi javo Golgota, aminda buvurutuseri. Golgota resena ainda tuka mo, namondeda gekaimi ‘Ambari Embo da Jiro Aghati da Vasa’ seraera.

<sup>34</sup> Aminda buvudo, nu erá mema itatameure dae sedo, vaini (wine) budo fiyoghaghae baingoro edo mindare dae Iesu kena futuseri, avata nu itako dere gido dotutusira.

<sup>35</sup> Etiri, Iesu tautaimi arafa dedo, kikindoro garuse nunda tamo asugari ava soro edo ruruseri.

<sup>36</sup> Etero dadabetiri, anumbirise numo kaifa useri.

<sup>37</sup> Nu redae koto usira da susu ava ijugaoro kasama aoro dae sedo, ika sogho aminda gembudo Iesu da jiro agada detero takegha usira. Gefusera amo eviri:

“Emo Jusi embo da Kini (King), javo Iesu ri.”  
aminge gefuseri.

<sup>38</sup> Tafasara kakato etoto naká barago, budo era Iesu de dabade arafa doruseri, eni gimandukena, a eni umbefukena.

<sup>39</sup> Evetu genembo mendeni foa Iesu gi dariguse, dere jise gifua gitorotoro use eminge sedo ghuseri,

<sup>40</sup> “Ni erekotesa amo, ni God da Mandiri. A eni mo: ni God da Kambo+ jighi bejedo, sifo etodaba naká ainda jokáda sekago itaso fetare dae sisesi. Ava sedo, tofo sonembedo korosida ghe vose fete gaore!” ne aminge sedo ghuseri.

<sup>41</sup> Kau daba aminga ava, fristi+ da kokotofu, Moses da Geka ijuga kakato+, a Jusi embo da babojegari, eminge dere jise sedo ghuseri,

<sup>42</sup> “Nu seari, evetu genembo mendeni jejebugedo ghuseri. Avata nu nangetirai, tofo sonembedo vosae eri? Nunda kotari mo: namonde Israel embo da kini (king) mo numori. Ava sedo, tofo sonembedo, korosida ghe vose fetarira amo, namonde gido nu tumondarera.

<sup>43</sup> Nu God tumonduse, nu God da Mandiva seraira. Avori, namonde fete gaore! God foa nu sonembarira, ai tefo?” aminge sedo ghuseri.

<sup>44</sup> Tafasara kakato Iesu de dabade arafa dorusera, nembarago Iesu dere jiseri.

*27:45-56 Iesu Ambududurusira.*

*(Mark 15:33-41; Luke 23:44-49; John 19:28-30)*

<sup>45</sup> Isonga 12 koroko iri, reighi isambu aminda tumba jido iriri ira, ungobu 3 koroko iri, reighi sekago usasa usira.

<sup>46</sup> Ungobu 3 koroko iri, Iesu koko sise nunda gekaimi sisira, “Eli, Eli, lema sabatani?” Ainda tuka mo, namondeda gekaimi eminge saeteri: “Nanda God, nanda God, redae na dotesi?” Iesu aminge sisira.

<sup>47</sup> Evetu genembo mendeni aminda fetiriserá aimi, sembae ningido eminge siseri, “Genembo emo, nu feroveta javo Elijah dae kori resira,” ava siseri.

<sup>48</sup> Iesu aminge siri ainghae dabade, genembo eni sumbu viti

fetedo, roera eni sofeya ava budo, faragho mendoda vakimbedo, vaini (wine) dokegha ainda jokáda fatiri sasaka etiri budo ira, Iesu mindare dae sedo, nunda békada fifitusira.

<sup>49</sup> Amingiri, mendeni siseri, “Namonde gaore! Elijah foa sonembarira, ai tefo?” aminge siseri.

<sup>50</sup> Setero, Iesu sekago beka mindafugo koko sise, ghamo asegari dotutusira.

<sup>51</sup> Iesu amingiri, God da Kambo+ ainda jokáda, nunda vasa kakara ava, erá evetu genemboi tere gido ambeore dae sedo, embo teria eniimi gajetero ireira ava, soroda ijejege ikáda ghe vose fira duruda buvurutusira. Etiri, enda daradaraghi, ghamana tofo bebejegosira.

<sup>52</sup> Amingiri, ofofo gomo mendeni totofo afifigusira. A God setiri, nunda natofo mendeni ofofoda ghe jebugedo eroruseri.

<sup>53</sup> Eredo irero, Iesu ambarida ghe erorusira ainda amboda, ne era God da reighi kakara Jerusalem aminda teredo deinghero, evetu genembo mendeni ne gosuseri.

<sup>54</sup> Isoro kakato nenda giti jigharide dabade Iesu kaifa ero, enda daradaraghi roera mendeni siroriri gido, oju use eminge siseri, “Geka bekári: emo God da Mandiri,” aminge siseri.

<sup>55</sup> Iesu ambududuriri, evevetu mendeni ne esike fetirise gosuseri. Evevetu resena eimi, ne Galilee ghedo fera Iesu de dabade deinghuse nu sonembedo ghuseri.

<sup>56</sup> Nenda jokáda, evevetu eviri: Magdara embo evetu eni javo Mary, Mary da nunombo, amo James nengae Joseph ghae da noi, a Zebedee noarori.

*27:57-61 Iesu Da Tamo Budo Era Furuguseri.*

*(Mark 15:42-47; Luke 23:50-56; John 19:38-42)*

<sup>57</sup> Ungobu iri, Arimatia embo genembo eni javo Joseph fira buvurutusira. Numbarago Iesu da ambo jimbi eniri. Genembo gugaderi.

<sup>58</sup> Nu ira Pilate kena teredo, Iesu da tamo mutari bu ya furugari dae sedo benunu sisira. Setiri, Pilate Iesu da tamoá mutoro dae setiri, mutero Joseph rurusira.

<sup>59</sup> Budo, nu embo yokura foyago seka ava budo aimi doghedo,

<sup>60</sup> nunda ofofo seka, ghamana toka basisera, aminda budo ira teredo fifitusira. Fitido, guro gajari dae sedo, ghamana mindafu ava afufetiri ira aimi, toka gajetiri dodo isira.

<sup>61</sup> Joseph nu amingiri, Magdara embo evetu javo Mary, nunda nunomboghae, aminda irise nene gosuseri.

*27:62-66 Erama Iesu Foa Buveure Dae Sedo, Isoro Kakato Era Ofofo Kaifa Useri.*

<sup>62</sup> Sifo atetiri, fristi+ da kokotofu a Moses da Geka kaifa kakato+ era Pilate kena totoruguseri. (Amo, Jarige Yari da Kirumodae+ simbugusera da sifoá dadabetiri, sifo atetiri Pilate kena totoruguseri.)

<sup>63</sup> Pilate kena totorugedo, siseri, “Kotofuko, genembo Iesu jebuga irise, gungubo sise eminge sedo ghuseri, ‘Sifo etodaba naká ainda amboda, God sari na ambarida ghe jebugedo erarena,’ nu aminge sedo ghuseri.

<sup>64</sup> Ava sedo, saso ninda isoro kakato mendeni ya, ofofo kaifa ururoro sifo etodaba naká dadabare! Amingaresa amo, nunda ambo jimbi jo yama, nunda tamo ufena bu ya jungedo eminge sae arera, ‘Givu! Nu erorusira; ava sedo, nunda tamo eminda tefori,’ ava jo sae arera. Amingaresa amo, evevari. Ainda beká mo: Iesu numo jebuge erari dae giti sisira amo, evetu genembo daba daba aimi tumonduseri. O nunda ambo jimbi ya nunda tamo ufena bu ya jungedo, nu jebuge erariá saetera amo, natofo digari ne geke bekáva sise tumondururoro, dara mindafu ava siroraeti.”

<sup>65</sup> Setero, Pilate sisira, “Avori, isoro kakato mendeni mutono bareva. Budo yasivu, ofofo kaifa e gogoghombevu!” aminge sisira.

<sup>66</sup> Setiri, fristi+ da kokotofu a Moses da Geka kaifa kakato+ era, ofofo da guro ava gaje gogoghom-buseri. Guro gagojuse, ainda békada gavana da tano fatero takegha usira. Etiri, setero, isoro kakato aminda kaifa ero, ne dodo iseri.

## 28

*28:1-10 Iesu Ambarida Ghe Jebugedo Erorusira.*

*(Mark 16:1-10; Luke 24:1-12; John 20:1-10)*

<sup>1</sup> Fura Tomanako sifo atutiri, Magdara embo evetu Mary, nunda nunomboghae ofofo gari dae sedo iseri.

<sup>2</sup> Ero, Bajari da aneya eni anakora vose firi, dumo mindafugo eredo enda daradaragherirare. Iri, aneya guroá afige afufetiri, esike ira fase-tiri, nu etoda viti anumbusira.

<sup>3</sup> Nunda gari kau biria avavaga usira, a nunda tamo asugari foyago beká ava usira.

<sup>4</sup> Etiri, isoro kakato ava gido, oju beká ava use, ungo ata dadadaghuse du fafasedo, ambari da kakaugo ava useri.

<sup>5</sup> Etero, aneya amo evevetukena sisira, “Erá oju eove dae resena. Na kasama erena, ne Iesu arafa dorusera, ava kakova ereva.

<sup>6</sup> Nu eminda tefori. Nu rea sisira ava, beká siroretira. Amo, God setiri nu ambarida ghe jebugedo eretira. Fuvu, nunda tamo reda fitero fasusira ava, ijugaono gaove!

<sup>7</sup> Oroko nembo totoi jovereghe yasivu, nunda ambo jimbikena eminge saove: ‘Nu ambarida ghe jebugedo eretira. Eredo, nu giti Frovensi Galilee aminda erira. Ava sedo, ne eredo nunda amboda yasivu, aminda tambove!’ aminge sevu, nunda ambo jimbi ningore! Avori, resena evia, erá kotae eove!” aminge sisira.

<sup>8</sup> Aneya aminge setiri ningido, ne jovereghe ofofo dodo bibitai ise, oju use a ivugaghae, namanekena osa sari dae sedo sufuseri.

<sup>9</sup> Sufuse, Iesu emboro soroda tafuseri. Tambero, nu nemokena, “Refeva,” sisira. Setiri, ne era numokena buvudo, nunda atada sandi fafasuseri. Aminguse, nu tumonde bainghuseri.

<sup>10</sup> Etero, Iesu nemokena sisira, “Erá oju eove! Yasivu, nanda nano namendi saovo Frovensi Galilee aminda yaore! Ne na ominda tambudo garera,” aminge sisira.

*28:11-15 Iesu Erorusira Ava, Isoro Kakato Ne Kivo Useri.*

<sup>11</sup> Evevetu amo emboro soroda ero, isoro kakato ofofo kaifa edo ghusera aimi eredo, jovereghe era reighida teteruseri. Teredo, rea sirorusira ava, fristi+ da kokotofukena osa setero nininguseri.

<sup>12</sup> Ningido, fristi+ da kokotofu ne eredo era Jusi embo da babojegari tambudo, nemonde dabade anumbedo manaka garuseri. Manaka garuse, eminguseri. Geka ava kivo aore dae sedo, ne isoro kakato aikena moni teriango futuseri,

<sup>13</sup> Futuse, siseri, “Mave ategi arira amo, eminge sevu, ‘Namane avéro, Iesu da ambo jimbi fera, nunda tamo ava ufena budo iseri,’ aminge sevu!”

<sup>14</sup> O frovensi da kotofu ainda bino ava ningarira amo, erá oju eove! Namane numokena saoro dubo jama edo, nemokena rejo eni jo ae arira,” ne aminge siseri.

<sup>15</sup> Setero, isoro kakatoá ne minó ava budo, aminge sedo ghuseri. Setero ningido, oroko Jusi embo geka beká ava bunise, kau daba aminga ava totofo se ningiraera.

*28:16-20 Iesu Nunda Ambo Jimbikena Isagha Etiri Gosuseri.*

*(Mark 16:14-18; Luke 24:36-49; John 20:19-23; Ekaresia 1:6-8)*

<sup>16</sup> Iesu nu enda jiro fumbari eni gatedo, aminda yaoro dae sisira ava ningido, namane isambu 11 aimi aminda era, nu fetiriri gosuseri.

<sup>17</sup> Gido, namanenda mendeni manamana useri. Avata namane isambu nu tumonde bainghuseri.

<sup>18</sup> Etero, nu namanekena fira buvudo eminge sisira, “God Afa geka isambu a fakina isambu, namokena mutiri ruruseni, endada a utuda.

<sup>19</sup> Ava sedo, ne eredo yasivu, natofo nunda oro oro isambukena vironu sirurovo ningido, ne nanda ambo jimbi aore! Aminguse, ne God, Afa, Mandi, a Asisi Kakara da javoda bafataito areva.

<sup>20</sup> Na rea aovo dae sedo ghusena ava, ijugururovo natofo isambu ningido tumonduse amingaore! Amingururovo, na namonde dabade tatedo iroro, enda a sifo foa tano arira,” Iesu aminge sisira. Avori, nanda geka tano eviri.

## Mark Kakara

Mark, nu jo Iesu da ambo jimbi 12 ainda eni iraeri. Avata nu Paul da komana Barnabas da mandi eniri. Giti, nu Paul Barnabas ghae sifo tufako deinghedo ne dotutusira. Amingusira andae, Paul nu imboe usira. Avata amboda, nu Paul da saramana mendeni mendeni edo ghusira. Ekaresia+ da babojegari nenda kotari mo: Mark (o umbu mendeni John Mark seraera) amboda ira Rome aminda, Peter ghae dabade irise, Peter geke siri ningido, nunda geke evia gefusira. Mark nunda Gospel mo avose ghaeko 68 avavaga ainda jokáda gefusira.

Mark nunda buku gefusira amo, Iesu nu God da Aghi Kato edo, fira endada saramana mendeni a ari mendeni use deinghedo ghusira, ava kotise, a ijuguse gefusira.

*Mark Geke Gefusira, Ainda Mendo Mendo Mo Eviri.*

1:1-13 God da Aghi Kato da furariri.

1:14–13:37 God da Mandi nunda saramana rea edo ghusira amo, eviri.

14:1–15:47 God da Mandi da ambariri.

16:1-20 God da Mandi ambarida ghe jebuge erorusira.

*1:1-8 John Vironu Sisira.*

*(Matthew 3:1-12; 11:10; Luke 3:1-18; 7:27; John 1:19-28)*

<sup>1</sup> Iesu Keriso, God da Mandi ainda Bino Eveva eminge tuturo usira.

<sup>2</sup> God da feroveta, javo Isaiah, nu anakora beká nunda buku jokáda geke evia gefusira:

“Kote gi! Nanda aghi kato ava, giti dirigaono ya, ninda emboro rerebururari, ni amboda yaresa.

<sup>3</sup> Aghi kato amo, nu reighi uvu a evetu genembo irae da vasa aminda fetirise, beka fainghedo geke resira,

‘Bajari da emboro rerebevu dambu are!’ ”

Isaiah aminge gefusira.

<sup>4</sup> Ava sedo, John Bafataito Ari Kato ira, reighi uvu a evetu genembo irae da vasa aminda buvudo, evetu genembo bafataito use eminge sedo ghusira, “Fuvu, eminda! Nenda ari ekoko vujegururovo bafataito aono, God nenda ari ekoko kote doyare!” John vironu aminge sedo ghusira.

<sup>5</sup> Aminge sirureari, evetu genembo isambu eredo, nenda frovensi Judia a nenda reighi Jerusalem ghedo, foa John kena totorugedo ghuseri. Totorugedo, nenda ari ekoko vujegero, John ne uvu Jordan aminda bafataito edo ghusira.

<sup>6</sup> John nu sino fuka javo kamero (camel), ainda anoso aimi firedo, asugedo ghusira. A nunda ifu dighari barago, kau daba ava edo, dighido ghusira. John nu aminda irise, sisi a finje ava, nunda bayau-dae rise irá ghusira.

<sup>7</sup> Avori, nu eminge vironu sedo ghusira, “Genembo eni nanda amboda refira amo, nu genembo teria bekári. Na jo numongo iraeri. Na taká sabua+ bekári.

<sup>8</sup> Ne tefo uvu vanemboimi bafataito eraena. O numo, ne Asisi Kakara aimi bafataito arira,” aminge sedo ghusira.

*1:9-11 John Nu Iesu Ava Bafataito Usira.*

*(Matthew 3:13-17; Luke 3:21-22)*

<sup>9</sup> Sifo aminda, Iesu nunda reighi Nasareth frovensi Galilee aminda ghedo fira, uvu Jordan aminda buvudo ira uvuda vose fetetiri, John nu bafataito usira.

<sup>10</sup> Eteri dadabetiri, Iesu uvuda ghe vivitiri ainghae dabade, John gosiri utu afigetiri, Asisi Kakara kau ribo avavaga jinendo, vose fira Iesu kena asugetiri gosusira.

<sup>11</sup> Asugiri, beka utuda ghe isagha siri ne nininguseri, “Nimo nanda dubo bari Mandiri. Na, nindae ivuga use, aiyakoe beká resena!”

*1:12-13 Satan Nu Iesu Da Fakina Dere Gari Dae Usira.*

*(Matthew 4:1-11; Luke 4:1-13)*

<sup>12</sup> Se dadabiri ainghae dabade, Asisi Kakara aimi Iesu unumbe budo, reighi uvu a evetu genembo irae da vasa aminda isira.

<sup>13</sup> Ira, aminda sifo 40 ava iriri, Satan fira numokena buvudo nunda fakina ava dere gido ghusira. Iesu nu taima da sino fukade iriri, God da aneya mendeni fera numo kaifa use, sonembedo ghuseri.

*1:14-20 Iesu Nunda Ambo Jimbi Mendeni Aghi Usira.*

*(Matthew 4:12-22; Luke 4:14-15; 5:1-11)*

<sup>14</sup> Kini (King) Herod setiri, John Bafataito Ari Katoá sandi budo diburada fiftusera ainda amboda, Iesu ira Frovensi Galilee aminda teredo, tuturo edo God da Bino Eveva ava, vironu sedo ghusira.

<sup>15</sup> Vironu eminge sedo ghusira, “God sifo fiftusera ava ojira buvira! God evetu genembo kaifa ari<sup>15</sup> da sifo utua etira. Nenda ari ekoko vujege dodo, God da Bino Eveva ava tumondevu!” aminge sedo ghusira.

<sup>16</sup> Amingudo ira, Galilee uvu da teria ainda dengesida deinghusira. Aminda deinghudo ise, Simon nunda namendi Andrew ghae, voto voyuvaimi oka barero gosusira. Nemo oka bambari embori.

<sup>17</sup> Gido, nemokena sisira, “Nengae fuvu, namonde dabade irise, dengoro indono ningido, oka bamburaeva aminga ava, nengae ya evetu genembo unumbedo, God Afakena bu furove!” aminge sisira.

<sup>18</sup> Siri ainghae dabade, nengae eredo nenda voto voyuva aminda dodo, nunda amboda iseri.

<sup>19</sup> Era itako ambo soka use, Zebedee da sasingu etoto naká, James nengae John ghae, ghakada+ fetedo voto toka difero gosuseri.

<sup>20</sup> Gosuse ainghae dabade, Iesu nemokena kori setiri, nengae eredo

numamo a nunda saramana kakatode ghaka+ aminda dodo, Iesu da amboda iseri.

*1:21-28 Iesu Sukaru Ondiri, Genembo Da Jokáda Ghe Vose Darigusira.*  
*(Luke 4:31-37)*

<sup>21</sup> Iesu nunda natofode era, reighi eni javo Kaponiam aminda buvurutuseri. Buvudo, Jangutari da Sifo fira buviri gido, Iesu anakora ira dengoro indari da kamboda+ teredo, tuturo edo dengoro indudusira.

<sup>22</sup> Dengoro indudiri, natofo ava ningido dudukughuseri. Ainda beká mo: Moses da Geka ijuga kakato+ dengoro indido ghusera, a kau eniri. O Iesu dengoro indudusira amo, geke nunda fakinaghae dabade sisira.

<sup>23</sup> Genembo enikena, sukarui asug-etiri ireira aimi, tere anumbedo, Iesu geke siri ningido, nu koko sisira,

<sup>24</sup> “Agá Iesu, Nasareth embo, ni namakena nange ari dae fumutasi? Ni saso namane sirivo aoro dae sedo fumutasi, ai? Namane ni kasama erera. Ni God da Genembo Kakarago Bekári,” sukaru genembokena asugusira aimi, aminge sisira.

<sup>25</sup> Setiri, Iesu numokena kovionoghae sisira, “Beka dodo, genembo ainda jokáda ghe fu buvase!” aminge setiri,

<sup>26</sup> sukaru irisira aimi eretiri, genembo ungo ata dadadaghiri koko teriagio sise, vose dariguseri.

<sup>27</sup> Ava gido, evetu genembo isambu dudukughedo, minonde minonde se nininguseri, “Emo rejori? E geke seka siroretira! Nu fakina katori. Nunda fakinaghae seari, sukaru nunda geke ningido, evetu genembo da jokáda ghe foa buvuraera,” aminge se nininguseri.

<sup>28</sup> Aminge sise irero, Iesu da bino ava reighi isambu frovensi Galilee aminda iri nininguseri.

*1:29-34 Iesu Setiri, Evetu Genembo Digari Jejebuguseri.*

*(Matthew 8:14-17; Luke 4:38-41)*

<sup>15</sup> **1:15: Afige, Geka Se Disugari Da Vasa** aminda, geke *Natofo* aindae rea gefusera, ava tege garesa.

<sup>29</sup> Iesu nu setiri, sukaru genembo da jokáda ghe vose darigusira. Ari ovia usira ainda amboda, Iesu nu James John ghae, a nunda ambo jimbi mendeninde dabade, dengoro indari da kambo+ dodo era, Simon nengae Andrew ghae da kamboda teteruseri.

<sup>30</sup> Simon da imboti nu kae tambudo tamo vevera iri, kambo aminda fasiriri, teteruseri. Teterero ainghae dabade, Iesu kena setero ningusira.

<sup>31</sup> Ningido, nu ira teredo sire nunda ungodá jighiri eroriri, tamo vevera darigiri jebugusira. Jebugedo, bayau simbugedo nemo-kena futusira.

<sup>32</sup> Sifo daba aminda tumba jiriri, kae evetu genembo reighi aminda iriara ava, isambu budo fera Iesu kena buvurutuseri. Mendeni sukarui asugetero iriara, ainghae dabade budo fera buvurutuseri.

<sup>33</sup> Kaponiam embo isasambu kambo dendeguda totorugedo guro békada fefetuseri.

<sup>34</sup> Totorugetero, Iesu nu setiri kae evetu genembo digari jejebugetero, kae kau eni kau eniá isambu dadabusira. Kotugo, mendenikena sukarui asugetero iriara ava, nu setiri sukaru do vose dariguseri. Sukaru amo, ne Iesu mavejori, ava kasama useri. Ava sedo, Iesu kovionoghae bureguse, beka erá seore dae sisira.

*1:35-39 Nu Frovensi Galilee Aminda, Vironu Sisira.*  
(*Luke 4:42-44*)

<sup>35</sup> Ainda tumba soroda, Iesu eredo kambo dodo reighida ghe buvudo, evetu genembo irae da vasa aminda ira banungusira.

<sup>36</sup> Banungiri, Simon nunda mendeninde dabade eredo, numo tava udo era tafuseri.

<sup>37</sup> Tambudo siseri, “Evetu genembo isasambu eredo nimo tava use irera.”

<sup>38</sup> Aminge sisera avata, Iesu nemokena sisira, “Namonde yaore! Na reighi mendeni ainda dengesida ya vironu aminda barago sarena.

Ainda beká mo: na vironu sari dae sedo fuseni. Ava sedo, namonde yarera!” aminge sisira.

<sup>39</sup> Reighi isambu frovensi Galilee aminda birurughuse, dengoro indari kamboda+ teterudo ise vironu sedo ghusira. Ava seari, sukaru evetu genembo da tamonda ghe vose darigedo ghuseri.

*1:40-45 Iesu Setiri, Genembo Bedode Ava Jebugusira.*

(*Matthew 8:1-4; Luke 5:12-16*)

<sup>40</sup> Genembo eni tamo bedode eko beká edo ireira aimi, Iesu kena fira kauboi dadarigedo benunu sisira, “Na kasama erena: ni uju aresa amo, na saso jebugarena.”

<sup>41</sup> Aminge setiri, Iesu genembo ain- dae joka edo, ungo siregedo nunda tamonda jijighuse sisira, “Ai, na uju erena. Jebugaresa!”

<sup>42</sup> Aminge siri ainghae dabade, gambisi utetegetiri jebugusira.

<sup>43</sup> Etiri, Iesu nu diriguse, kovionoghae

<sup>44</sup> eminge sisira, “Seteno jebugetesa emo, erá osa seose! Ere yasi, ninda tamo fristikena+ ijugaso gari, Moses da Geka aminda, rea God kena mutaso dae resira, ava mutaresa! Amingaresa amo, ni jebugetesa ava, evetu genembo isambu kasama arera,” aminge sisira.

<sup>45</sup> Avata genembo amo, nu jo amin- gaeri. Nu evetu genembo isam- bukena osa setiri, numo jebugusira da binó ava reighi isambu aminda ivegedo isira. Ava sedo, Iesu reighi bogu eninda jo isaghada ya terari da kaugo irae usira. Etiri, nu evetu genembo irae da vasa aminda ira iriri, reighi isambu ainda evetu genembo ya numokena buvudo ghuseri.

## 2

*2:1-12 Iesu Setiri, Genembo Ungo Ata Dimbaride Ava Jebugusira.*

(*Matthew 9:1-8; Luke 5:17-26*)

<sup>1</sup> Sifo nanjogoá dadabetiri, Iesu nu sekago jovereghe ira reighi



Kaponiam buvurutusira. Ainda bino ava ivegedo isira.

<sup>2</sup> Iri, evetu genembo digari ningi kasama edo, fera numokena totoruguseri. Totorugedo, natofoimi kambo bedo edo mambe kosegetero, mendeni ya terari manamana useri.

<sup>3</sup> Iesu nu vironu siri, gegenembo avononde naká aimi genembo eni ungo ata dimbaride ava fumbudo fuseri.

<sup>4</sup> Fumbudo fera buvudo, natofoimi kambo bedo edo vasa kosegetero gido, Iesu kena ya terari manamana edo, genembo fumbu ririda viti sisoro gukada anumbedo, sisoro jighi afiguseri. Afigedo, genembo ghaghada fasiriri ainghae tino edo, siregetero vovosusira.

<sup>5</sup> Vosetiri, ne tumonde gogogho usera ava gido, Iesu kae genembo aikena sisira, “Nanda mandi, God ninda ari ekoko kote dotira,” Iesu aminge siri ningido,

<sup>6</sup> Moses da Geka ijuga kakato+ mendeni aminda anumbirisera aimi, ne dubo jokái totofo kotiseri,

<sup>7</sup> “Genembo omo nange ominge resi? Nu aminge sise God da javo etiri eko erira. God nusukako ari ekoko kote doyeraira. Jo tefo genembo eniimi kote doyari iraeri.”

<sup>8</sup> Aminge kotero ainghae dabade, Iesu nunda asisiimi nenda kotari ava kasama edo sisira, “Ne redae kotari ekoko erekotevu?”

<sup>9</sup> Kote givu! Ne erekoteva: na benunu sarena amo, God genembo einda ari ekoko jo kote doyae ari ava, erekoteva. A nenda kotari eni mo: nu jebugare dae sarena amo, nu jo jebugae ariá erekoteva.

<sup>10</sup> Avori, nanda fakina ijugaono gareva. Evetu Genembo da Korokena+ mo, ari ekoko kote doyari da fakina irira. Ava kasama aovo dae sedo, saono genemboé jebugarira,” aminge sedo, nu jovereghe genembo ungo ata dimbaride aikena sisira,

<sup>11</sup> “Eredo, ninda ghaito gaghe budo kamboda yasi!”

<sup>12</sup> Aminge setiri, genemboá eredo,

nunda ghaito gaghe budo ira buviri, evetu genembo isambu gi dudukughedo buniseri. Bunedo, God dae sakai sise siseri, “Namonde evavaga jo gae iriara ava, orokoá siroretiri, namondeda ditii eregoserá!” aminge siseri.

*2:13-17 Iesu Nu Levi Aghi Usira.  
(Matthew 9:9-13; Luke 5:27-32)*

<sup>13</sup> Iesu sekago Galilee uvu da teria aminda ira buviri, natofo isambu fera numokena totorugetero, dengoro indudusira.

<sup>14</sup> Dengoro indiri dadabetiri, nu isira amo, Alphaeus da mandi Levi, takesi ombari da kambo aminda anumbiriri gosusira. Gido, Iesu numokena sisira, “Fu nangae yaore!” aminge setiri, Levi nu eredo nunda amboda isira.

<sup>15</sup> Ainda amboda, Iesu ira Levi da kamboda buvudo, kirumo usera ava risira. Takesi bari gegenembo a ari ekoko embo digari Iesu da amboda isera aimi, fera Iesu nunda ambo jimbide dabade anumbedo bayau riseri.

<sup>16</sup> Moses da Geka kaifa kakato+ a ijuga kakato+ mendeniimi, Iesu takesi bari kakato a ari ekoko embo ainde dabade anumbedo bayau rero gosuseri. Gido, nunda ambo jimbikena ategi useri, “Takesi bari kakato ne gegenembo ekokori. A evetu genembo mendeni, takesi bari kakatode dabade ojera anumbirera omo, nembarago ari ekoko embori. Ava sedo, nenda ijuga kato redae takesi bari kakato a ari ekoko embode dabade anumbedo bayau rereri?”

<sup>17</sup> Aminge sisera ava ningido, Iesu sisira, “Mave, ‘Na kae tefori,’<sup>17</sup> sarira amo, dogeta jo numokena yae arira. O mave, ‘Na kae beni,’ sarira amo, dogeta numokena yarira. Kau daba aminga ava, mave nunda ari ekoko jo vujegae irise, ‘Na mandi eveva a ari eko eni tefori,’ sarira amo, na nu jo aghi ae arena. O mave nunda ari ekoko vujeguse, ‘Na ari

<sup>17</sup> 2:17: Afige, **Matthew 9:12** ainda duruda tege garesa!

ekoko embori,' sarira amo, numoa aghi arena," aminge sisira.

*2:18-22 Kanangara Ari, A Irari Seka Da Geka Amo Eviri.*

*(Matthew 9:14-17; Luke 5:33-39)*

<sup>18</sup> John da ambo jimbi a Moses da Geka kaifa kakato+ da ambo jimbi kanangara ero gido, evetu genembo fera Iesu kena buvudo ategi useri, "John da ambo jimbi a Moses da Geka kaifa kakato+ da ambo jimbi, God dae kanangara use banungeraera. Avata ninda ambo jimbi, ne nange amingae eraeri?" aminge setero,

<sup>19</sup> Iesu mino nemokena sisira, "Kote givu! Mandi gimasa eni, nu evetu fiftururari kirumo arera da sifo aminda, nunda kokomana ne bayau jo kanangara ae arera.

<sup>20</sup> O genembo evetu fitira ava, gitofui sandi bu ya daoro ambarira ainda sifo aminda, nunda kokomana dubo mema use, tuturo edo nundae kanangara arera," aminge sisira.

<sup>21</sup> Aminge sedo, evetu genembo nangedo ari manai dodo, ari seka aimi God kakara aetera, ava ijugusira. Ijuguse, kasia evia sisira, "Embo boka eni manai edo toka basarira, namonde jo embo sogho seka gafugedo aimi, tauta gayae arera. Ainda susu mo: embo seka gafuge baresa amo, eko arira. A embo seka manaikena tauta gayaresa amo, jo eveva ae arira.

<sup>22</sup> Kau daba ava, vaini (wine) seka jo budo, kofiri manai aminda avere gaoro vosedo irae arira. Amingarera amo, vaini (wine) seka da fakinaimi, fumbari kofiri bejari, vaini averege vose soesa arira. Ava sedo, vaini seka kofiri sekada averegeraera," aminge sisira.

*2:23-28 Iesu Nu Jangutari Da Sifo Ainda Bajariri.*

*(Matthew 12:1-8; Luke 6:1-5)*

<sup>23</sup> Jangutari da Sifo eninda, Iesu nunda ambo jimbide vare jokada

tere sembiseri. Sembise, nunda ambo jimbi tuturo edo farava da vuji ava bambudo,<sup>23</sup> ungoi jase rido iseri.

<sup>24</sup> Amingero, Moses da Geka kaifa kakato+ mendeni ava fuge gido, Iesu kena siseri, "Kote gi! Ninda ambo jimbi nangetiraimi Jangutari da Sifoda farava da vuji bambu jase rise, namondeda agho dari erebejeri? Jangutari da Sifoda, saramana jo ae aeteri."

<sup>25</sup> Aminge setero, Iesu nemokena sisira, "Ne nanda ambo jimbikena ghoghora reseva, ai? Namondeda abua David nunda mendeninde dabade, uvu bayau dadabetiri ighoii sirivo use, nange usira ainda kiki amo tegutusevu, ai tefo?"

<sup>26</sup> Nu, fristi+ da giti jighari javo Abiathar ireira ainda sifoda ira, God da Kambo+ aminda teredo, farava God kena futusera aindae benunu setiri, fristi+ mutiri David budo risira. Rise, nunda mendenikena mutiri ne riseri. Risera amo, ne agho dari bejiseri. Agho dari bejisera amo eviri:

'Fristi+ nesuka, farava kakara amo mindarera,' agho dari aminge resira," Iesu aminge sisira.

<sup>27</sup> Aminge sedo, nu nemokena sisira, "God nu giti evetu genembo usira. Amboda, Jangutari da Sifo amo, nemo sonembari dae sedo gategusira. Nu jo Jangutari da Sifo giti gategedo, amboda evetu genembo, Jangutari da Sifo ava kaifa aoro dae sedo, ne jo ae usira. Nu giti evetu genembo usira.

<sup>28</sup> Geka beká mo eviri: Jangutari da Sifo aminda rea ava aetera amo, a barago, Evetu Genembo da Koro+ nunda sari ningariri," aminge sisira.

### 3

*3:1-6 Iesu Setiri Genembo Eni*

<sup>23</sup> **2:23:** Abraham da sasingu, o Israel embo seraera, nenda kiki mo eviri: nenda komana da roera seka bambu mindari da kau ava barido ya ghusera, amo jo bagia irareri. O bambu atida vendari mo, aindae bagia sedo ghuseri. Ava sedo, Iesu da ambo jimbi amingusera amo, ne jo bagia ae useri.

*Ungo Dimbaride Ava Jebugusira.*

*(Matthew 12:9-14; Luke 6:6-11)*

<sup>1</sup> Iesu nu sekago jovereghedo ira, dengoro indari da kamboda+ teterusira. Genembo eni ungo dimbaride amo, aminda iriri teterusira.

<sup>2</sup> Moses da Geka kaifa kakato+ ne, Iesu ari sembae ari gido, numo bu koto ari dae sedo kotiseri. Avori, Iesu nu nange Jangutari da Sifo aminda, genembo ungo dimbaride ava sari jebugururari gido, nu budo koto aetera aindae kato useri.

<sup>3</sup> Kato ero, Iesu genembo ungo dimbaride aikena sisira, “Eredo, fu buvase!”

<sup>4</sup> Aminge sedo, nu natofokena sisira, “Namonde Jangutari da Sifo aminda, evetu genembo sonembarera, ai, nemokena mema mutarera? Sonembaoro jebugarera, ai, daoro sirivo arera?” aminge setiri, ne mino numokena sari buniseri.

<sup>5</sup> Amingetero, ne dubo joka iraede ava gido, dubo mema use, janje eko etiri, nemoá gi ya foa ghedo, nu jovereghe genembo aikena sisira, “Ninda ungo jujurege gaone!” aminge setiri, genemboá nunda ungo Iesu kena siregiri, eveva usira.

<sup>6</sup> Amingetiri gido, Moses da Geka kaifa kakato+ eredo era buvudo, Herod da ambo jimbide dabade, Iesu nange daoro ambarira aindae, man-aka garuseri.

*3:7-12 Evetu Genembo Iesu Kena Totoruguseri.*

*(Matthew 4:24-25; 12:15-16; Luke 6:17-19)*

<sup>7</sup> Iesu nunda ambo jimbide dabade reighiá dodo era, uvu da teria javo Galilee aminda buvero, evetu genembo digarigo aimi, nunda amboda iseri. Frovensi Judia,

<sup>8</sup> reighi Jerusalem, Frovensi Idumea, frovensi eni uvu Jordan beine sovenikena irira, a Taiar a Saidon da reighi mendeni, ainda natofo digarigo Iesu da bino ava ningido, fera numokena buvurutuseri.

<sup>9</sup> Buvudo, nu doghetero Jaredo, Iesu nunda ambo jimbikena, ghaka+

simbugaoro dae sisira. Ainda tuka mo: evetu genembo erá numo mime-ore dae sise sisira.

<sup>10</sup> Nu giti kae evetu genembo digarigo ava, setiri jejebuguseri. Ava gido, evetu genembo kae mendeni mendeni rurusera amo, ne fera numokena buvurutuseri.

<sup>11</sup> Buvurutuse, evetu genembo mavekena sukarui asugetero iriara amo, nemo sukaruimi fugetero duduruguse, koko sise eminge siseri, “Ni God da Mandiri.”

<sup>12</sup> Aminge sero, Iesu nu mavejo ava erá isagha seore dae sise, kovionoghae buregusira.

*3:13-19 Iesu Nunda Ambo Jimbi Beká Isambu 12 Ava Rurusira.*  
*(Matthew 10:1-4; Luke 6:12-16)*

<sup>13</sup> Iesu ira, doririda vitido, gegenembo mavejoá uju usira, avanembo aghi etiri fuseri.

<sup>14</sup> Fera buvero, gegenembo 12 ava gategusira. Gategedo, nu eminge sisira, “Ne nanda karona edo, namonde dabade deingharera,” aminge sedo, nu sisira, “A kotugo, ne ya vironu saovo dae, nane diriguse,

<sup>15</sup> sukaru ondovo ya buvari da fakina ava mutono, budo yareva,” aminge sise, gegenembo 12 ava gategusira.

<sup>16</sup> Gegenembo gategusira, amo eviri. Nu Simon gategedo, nunda javo seka eni, Peter jijighusira.

<sup>17</sup> Mendeni mo, Zebedee da sasingu, James nengae John ghae gategedo, nenda javo seka eni, Boanerges ava jijighusira. Ainda tuka mo: ‘Sasingu Amo Barara da Kakaugori’.

<sup>18</sup> A kotugo, gegenembo mendeni mo eviri: Andrew, Philip, Bartholomew, Matthew, Thomas, James da nunombo (numamo javo Alphaeus), Thaddaeus, Simon ‘Reighi Susu’ seraera,

<sup>19</sup> a Keriot embo Judas ri. Judas resena emo, nune Iesu aito usira.

*3:20-30 Iesu Maveda Fakina Aimi, Seari Sukaru Vose Darigedo Ghuseri? (Matthew 12:22-32; Luke 11:14-23; 12:10)*

<sup>20</sup> Ainda amboda Iesu ira natida buvurutusira amo, evetu genembo sekago totorugetero, Iesu nunda ambo jimbide jo anumbe uvu bayau mindari da goroto jo tambae useri.

<sup>21</sup> Jo mindae irero, nunda nano namendi ava ningido siseri, “Nu daghedo irira,” aminge sedo, numo sandi bu yari dae fuseri.

<sup>22</sup> Moses da Geka ijuga kakato+ Jerusalem ghedo fusera aimi, eminge siseri, “Sukaru da bajari javo Satan, nune Iesu kena asugedo nunda fakina ava, muteari budo aimi, nu sukaru bu fugeraira,” aminge siseri.

<sup>23</sup> Setero, Iesu nemo furoro dae kori setiri fero, nemokena kasiai sisira, “Satan nangetiraimi tofo numoá bu fugari? Amo, nu tofo numorita!

<sup>24</sup> Evia kote givu! Frovensi eni ainda natofo beisiga edo, soroda sarigarera amo, frovensi da fakina soesa arira.

<sup>25</sup> Kau daba aminga ava, reighi eni o oro eni beisiga edo, soroda sarigarera amo, reighi o oro amo, jo fakina edo fetae arera.

<sup>26</sup> ‘Na Satan da fakina budo aimi, nunda sukaru bu fugeraena ava sedo, na Satan da eniri,’ aminge sise reseva. Avorita, saono ningivu! Satan da natofo tofo tofo beisiga edo, soroda sarigarera amo, ne jo fakina edo fetae arera.

<sup>27</sup> “Mave jo kotae kotae, genembo fakina kato ainda kambo beje teredo, nunda roera a gugua jo bagia ae eraira. Nu giti genembo fakina katoá sandi bundedo, amboda nunda roera a gugua sosighi arira. Kau daba aminga ava, na Asisi Kakara da fakinaimi, Satan da fakina gajedo, seono nunda sukaru foa buvuraera,” aminge sisira.

<sup>28-30</sup> Avori, Moses da Geka ijuga kakato+ giti eminge siseri, “Iesu mo, sukari asugusira,” siseri. Setero,

aindae sedo, Iesu eminge sisira, “Kote givu! Na nemokena geke beka resena! Mave ari eko eni edo o geke eko eni sedo, amboda God kena vujegarira amo, God nunda ari eko amo kote doyarira. Avata ne eminge seraeva, ‘Iesu nu jo Asisi Kakara da saramana ae eraira; numo Satan da fakinaimi eraira.’ Ne aminge sise, Asisi Kakara da javo eko eraeva. A kotugo, mave Asisi Kakara da javo eko arira amo, God nunda ari eko amo jo kote doyae arira, sifo ghousa evia irarira,” aminge sisira.

*3:31-35 Iesu Da Ai Ghasovu A Nano Namendi, Mavejori?*

*(Matthew 12:46-50; Luke 8:19-21)*

<sup>31</sup> Ainda amboda, Iesu da noi nunda jamenade fera buvudo isaghada fetedo, nu foa buvare dae siseri.

<sup>32</sup> Evetu genembo digari Iesu kena anumbirisera aimi siseri, “Nei a ninda jamenade isaghada fetirise, nimo ya buvaso gari dae uju erera.”

<sup>33</sup> Aminge setero, nu sisira, “Nanda aya a nanda jamena mavejori?” aminge sedo,

<sup>34</sup> evetu genembo anumbirisera, ava fuge gosuse sisira, “Givu! Evetu genembo anumbirera emo, nanda aya a nanda jamenari.

<sup>35</sup> Mave God da uju ava use irarera amo, nanda ai ghasovu, nanda nano namendi, a nanda aya mo, nemori,” aminge sisira.

## 4

*4:1-9 Genembo Vare Govari Kato Aina Kasiari.*

*(Matthew 13:1-9; Luke 8:4-8)*

<sup>1</sup> Iesu nu eredo ira, Galilee uvu da teria irira ainda betuda buvudo, sekago tuturo edo ijugusira. Ijugiri, evetu genembo digari numokena fera totorugedo vasa ganjibuseri. Aindae sedo, nu ghaka+ evada feghiri gido, ghaka+ jokáda vose anumbetiri, evetu genembo isambu buvudo uvu betuda fefetuseri.

<sup>2</sup> Fetetero, Iesu nemokena kasi-aimi geka mendeni mendeni ijuguse, eminge sisira,

<sup>3</sup> “Kote givu! Genembo eni eredo, farava veka govani dae sedo, aira vareda buvudo,

<sup>4</sup> tuturo edo, veka giririghe budo jife jafe getira. Etiri, veka mendeni mo, begatada vosetiri, rikamanei ojighera minderi.

<sup>5-6</sup> Veka mendeni mo, aroro etoda vosedo totoi batuno etiri, ijiimi aviri gharasa etira. Enda jo teria irae ava sedo, besisi jo bae etira.

<sup>7</sup> Veka mendeni mo, vive titifaghae ainda jokáda vosedo, viveghae dabade vitira. Ainghae vitido, vivei gaetiri dadabetira, beká jo ae etira.

<sup>8</sup> A veka mendeni mo, enda evevada vosedo vitira. Viti, beká digarigo jighira. Amo, mendeni 30, mendeni 60, a mendeni 100 avavaga jighira,” kasia evia se dotutuse,

<sup>9</sup> Iesu eminge sisira, “Kasia setena amo, dengoro jave ningi gogoghombevu!” aminge sisira.

*4:10-20 Iesu Kasia Sisira Ainda Beká Mo Eviri.*

*(Matthew 13:10-17; Luke 8:9-15)*

<sup>10</sup> Natofo nu dodo isera ainda amboda, Iesu da ambo jimbi 12 nunda kokomana mendeninde dabade fera numokena kasia da tuka aindae ategi useri.

<sup>11</sup> Ategi etero, Iesu nemokena sisira, “God Afa kau nange nunda natofo+ kaifa eraira, ainda geka mendeni ava kivo usira. Ne nanda ambo jimbi. Ava sedo, nu rea kivo usira amo, nemokena isagha saono ningi kasama aovo dae sise, seraena. O natofo mendenikena geka isambu kasiaimi ijugeraena.

<sup>12</sup> Aminge ijugeraena da beká mo eviri:

‘Erama nenda dubo joveregheuri gido, God nenda ari ekoko kote doyeure dae sise,

ne garera, avata ne jo gi gogoghombae arera.

Ne dengoroi ningarera, avata ne jo ningi kasama e gogoghombae arera.’

God da Geka ava kotise kasiaimi ijugeraena,” aminge setiri dadabusira.

<sup>13</sup> Dadabetiri, Iesu nemokena ategi usira, “Ne nangetiraimi kasia da tuka erebunevu? Amboda kotugo, na sekago kasia sarena amo, ne nange tuka kasama arevu? Avori, kasia setena, ainda tuka ava iju-gaono kasama areva.

<sup>14</sup> Vare govani kato veka govetira amo, God da Gekari.

<sup>15</sup> Veka mendeni emboro begatada vosetira, ainda tuka mo eviri. Evetu genembo mave God da Geka ningero Satan foa, God da Geka ningiraera ava, nenda jokáda ufena saghimbe buraira, amingori.

<sup>16</sup> Kau daba aminga ava, veka mendeni enda aroroghae aminda vosetira, ainda tuka mo eviri. Evetu genembo mave God da Geka ningido ivugaghae buraera, amingori.

<sup>17</sup> Avata nenda dubo jokáda tumondari jo inono ae arira. Ava sedo, ne sifo tufako tumonduse iroro, dara sirorarira, o ne God da Geka tumonderaira aindae, gitofu nemokena fakarago use mema mutarera amo, ne oju use totoi gofarera.

<sup>18</sup> Veka mendeni vive titifaghae ainda jokáda vosetira, ainda tuka mo eviri. Amo, evetu genembo mave God da Geka ningiraera, amingori.

<sup>19</sup> Avata amboda nenda irari, reighi da gugua, a fisi da uju ava koteraera. Aimi, God da Geka gajeari, nenda tumondari da beká ava jo sirorae eraira.

<sup>20</sup> Avata veka mendeni enda eveva aminda vosetira, ainda tuka mo eviri. Evetu genembo mave God da Geka ningido bu kaifa urureoro, vitido beká jighiraira amo, 30, 60, a 100 avavaga jighiraira, amingori,” Iesu kasia ainda tuka aminge setiri nininguseri.

*4:21-25 Arivo Da Kasiari.*

*(Matthew 5:15; 10:26; 7:2; 13:12; Luke 8:16-18)*

<sup>21</sup> Iesu sekago kasia sisira, “Namonde jo arivo injibedo budo okia

jokáda vendae eraera, o jo ghaitoi gajae eraera. Namonde, arivo isaghada jigheoro jaragheraira.

<sup>22</sup> Roera oroko jungedo irira, amboda foa isagha ari kasama arera. A roera oroko kivo etero irira, amboda isagha vironu sirurari ningarera. Kau daba aminga ava kasia resera ainda beká mo, amboda kasama arera.

<sup>23</sup> Geka setena amo, dengoro jave ningi gogoghombevu!” aminge sisira.

<sup>24</sup> Aminge sise, nu sekago sisira, “Ne rea niningereva ava, kote gogoghombevu! Ne rea evetu genembokena mutareva amo, God nemokena mino kau daba ava futuse, ainda etoda mendeni bu fitido, ainghae mutarira.

<sup>25</sup> Ainda beká mo: mave God da Geka ningido, kotari eveva koteraira amo, God sonembari nu kote gogoghombarira. Avata mave God da Geka jo kotae eraira amo, God nunda kotari isambu bari dadabarira,” Iesu aminge sisira.

#### *4:26-29 God Da Natofo+ Nange Siroreraera, Ainda Kasiari.*

<sup>26</sup> Iesu aminge sise, kasia eni sisira, “God da natofo nange siroreraera amo, emingori. Nu inono, genembo eni nu veka giririghe budo endada jife jafe ge dotutusira.

<sup>27</sup> Dodo ainda amboda, sifo tumba ava, avido eredo ghuse deinghurureari, veka nusuka batuno edo vitiraira. Ava kau nange vitiraira ava, nu bunariri.

<sup>28</sup> Endaimi eveva muteari, veka batuno edo, viti beká jighido safufu eraira.

<sup>29</sup> Safufu eari gido, ‘Bambari da sifo buviro!’ sedo, genembo nunda saramana kakato dirigeari, ya kaiyaimi dive bamburaera. Kau daba aminga ava, evetu genembo mendeni tuturo edo, God da Geka niningurureoro, tumondari sirorari, ne foama nunda sasingu eraera,” aminge sisira.

#### *4:30-34 Ika Maine Da Kasiari. (Matthew 13:31-32,34; Luke 13:18-19)*

<sup>30</sup> Iesu kasia ika mainekena fiftuse sisira, “God da natofo+ kau nange digarigo eraera ava, sari dae erena.

<sup>31</sup> God da natofo+ tuturo edo, nange digarigo siroreraera amo, kau ika maine da vujiimi vose batuno edo vitiraira, ainda kaugori. Maine da vuji mo, veveyako bekári. Nu jo ika mendeni da vujigo iraeri.

<sup>32</sup> Avata vuji avavaga, genembo enii bu yama nunda vareda govavi vitarira amo, nu viti vareda roera isambu darigedo mindafu beká ava edo, fafatu saredo itumu sirorari, rikamane foama nenda mogha fafatu aminda fitiraera. Kau daba aminga ava, God da natofo+ tuturo edo digarigo eraera,” aminge sisira.

<sup>33</sup> Iesu nu kasia kau daba aimi, evetu genembokena ijugedo ghusira. Ijugurureari, ne duboi kotise, ainda tuka ava inonoda kasama aetera, ava sedo ghusira.

<sup>34</sup> Nu natofokena kasia ainembo ijugedo ghusira. Avata ne dodo esike irureoro nunda ambo jimbide dabade anumbirise, nesuka nemokena kasia da tuka ava isagha ijugeari, ne ningido ghuseri.

#### *4:35-41 Iesu Setiri, Eva Yaura Tukughedo Binono Usira.*

*(Matthew 8:23-27; Luke 8:22-25)*

<sup>35</sup> Sifo daba aminda, ungobu iri, Iesu nunda ambo jimbikena sisira, “Namonde sembi ya betu sovenida darore!”

<sup>36</sup> Aminga setiri, nunda ambo jimbi ghaka+ nune irisira aminda vosedo, evetu genembo anumbiriserado, ne sirigedo ghaka+ mendeni ainde dabade betu sovenida sembiseri.

<sup>37-38</sup> Sembera, soroda buvurutero, eva yaura vovogoghae eko beká ava erorusira. Eredo, ghaka+ de rosari dae usira. Avata, Iesu nu ghaka+ ghaemboda guto gae fase aviri, nunda ambo jimbi deretero eretiri, numokena siseri, “Ijuga Kato,

namonde sirivo ari dae erera emo, nangetiraimi ni kotae fase ravesi?"

<sup>39</sup> Aminge setero, nu eredo yaura bureguse kovionoghae sisira, "Dodo binono e!" aminge setiri, eva yaura tukughedo binono usira.

<sup>40</sup> Amingetiri, nemokena sisira, "Ne redae oju etevu? Nemokena tumondari tefori!"

<sup>41</sup> Aminge setiri, ne dudukughedo tofo tofo se nininguseri, "Arie! Genemboé kau avegorai? Nune setiri, eva yaura nunda geka ningi! Ari emo, jo evetu genemboi ari da kaugo iraeri!" aminge siseri.

## 5

*5:1-20 Iesu Setiri, Sukaru Genembokena Asugedo Ireira Ava, Vose Darigusira.*

*(Matthew 8:28-34; Luke 8:26-39)*

<sup>1</sup> Iesu nunda ambo jimbide uvu da teria javo Galilee, aminda sembera, Gerasa ondi da reighi sovenikena aminda teteruseri.

<sup>2</sup> Tere ghaka+ darido, vitari dae iri, genembo sukarui asugetero ireira aimi, beku jokáda ghe buvu vose fira nu tafusira. Beku resena emo, ambari embo aminda furugedo ghuseri.

<sup>3</sup> Genembo amo, kambo tefori; nu ofofo beku aminda irá ghedo ghusira.

<sup>4</sup> Evetu genemboimi foama nu sandido, ungo ata seinii (chains) bundedo ghuseri. Avata nu ereari, seini (chains) bununughedo ghusira. Amingeari, evetu genembo nu sandi bundari bunedo ghuseri.

<sup>5</sup> Sifo tumba ava inono, nu ofofo a doriri aminda birurughuse koko sise, ghamana aimi budo, nunda tamo iseri edo ghusira.

<sup>6</sup> Avori, genembo amo, nu soka beká Iesu fuge gido, numokena sumbu fira buvudo, Iesu da dombuda tumoi bainghusira.

<sup>7-8</sup> Bainghetiri, Iesu sukaru aikena sisira, "Sukaru, nindae resena! Genembo ainda jokáda ghe fu buvase!" aminge setiri, koko sisira, "Iesu, ni God Teria Beká ainda Mandiri! Ni

redae namanekena refesi? Namane God da dombuda, nimokena benunu resera. Namanekena erama mema muteose!" aminge setero,

<sup>9</sup> Iesu nemokena ategi usira, "Ne mavejori? Sevu ningone!" aminge setiri, ne siseri, "Namanenda javo mo 'Digariri'. Ainda beká mo: namane digarigo irera," aminge siseri.

<sup>10</sup> Aminge sedo, ne sekago siseri, "Namane uju beká ava erera, ni jo namane dirigaso vasaé dodo, reighi eninda yae arera," aminge siseri.

<sup>11</sup> Vasa ganasa jo soka irae aminda, fuka 2,000 amingo ava bayau rise ya foa ghero gosuseri.

<sup>12</sup> Gido, sukarui benunu siseri, "Namane nange saso yama, fukamane da jokáda teraeteri!" aminge benunu siseri.

<sup>13</sup> Setero, Iesu 'avori' setiri, sukaru genembo ainda tamonda iriara aimi, vose darigedo era fukamane da jokáda tere asugetero, fukamane amo sumbu fusikenana sedo era, vasa ganasa aminda ghasaghe vosedo, uvuda mindi sirivo useri.

<sup>14</sup> Etero gido, fuka kaifa kakatoi sumbu era, reighi bogu aminda a reighi mendeni mendeni aminda buvudo, rea gosusera ava osa setero, evetu genembo nininguseri. Ningido, ne eredo, geka sisera ainda beká ava, ningari dae a gari dae sedo, Iesu kena fuseri.

<sup>15</sup> Fera buvudo, genemboá jebugedo boka ujudo anumbiriri gosuseri. Gido, oju useri.

<sup>16</sup> Evetu genembo mendeni, mave rejo siroretiri ditiimi gosusera aimi, osa setero evetu genembo nininguseri.

<sup>17</sup> Ningido, Iesu nu nange ne dodo jovereghe yaetira, aindae benunu siseri.

<sup>18</sup> Setero, Iesu nu ira ghakada+ vivitiri, genembo giti setiri sukaru nu do buvero jebugusira aimi, fira Iesu kena benunu sisira, "Na nange nangae yaeteri!"

<sup>19</sup> Setiri, Iesu numokena sisira, "Tefo, ni jo namonde yae arera. Ni jovereghedo, kamboda yasi! God

joka edo ni kau nange sonembetiri jebudgetesa ava, osa saso ninda kokomana ningore!” Iesu aminge sisira.

<sup>20</sup> Setiri, genemboá nu jovereghe ira, Frovensi Dekapoles, reighi isambu ghabu sovenisoveni ireira aminda birurughudo ise, Iesu numokena rea usira ava, osa seari evetu genembo isambu, ava ningido dudukughedo ghuseri.

*5:21-43 Iesu Evetu Eni Setiri Jebugusira. A Gagara Eni Setiri Ambarida Ghe Jebuge Erorusira.*

*(Matthew 9:18-26; Luke 8:40-56)*

<sup>21</sup> Iesu nunda ambo jimbide dabade jovereghe, uvu da teria aminda sembera dari viti fefetero, evetu genembo digari fera nu jimbe fefetuseri.

<sup>22</sup> Jimbe fetetero, dengoro indari kambo+ da bajari eni javo Jairus, fira numo gido, tumoi bainghusira.

<sup>23</sup> Bainghedo, nunda ghamo joká isambu numokena futuse sisira, “Nanda gagara ijoghako kae budo ambari dae erira. Fu, ninda ungoimi tamonda jighaso jebugare!” aminge sisira.

<sup>24</sup> Setiri, Iesu eredo nemonde iseri. Evetu genembo natofo ainde dabade ise, minonde minonde gotatara udo iseri.

<sup>25</sup> Ero, evetu eni fira, nu emboro soroda tafusira. Evetu resena emo, nu kae budo tambuno gosuse irise, ghaeko 12 ava dadabusira.

<sup>26</sup> Nu dogeta mendenikena sonemba bari dae sedo, ya ghedo ghusira. Avata nu jo jebugaeri. Dogetakena ya foa ghuse, nunda moni fuge dadabusira. Avata nunda kae jo dadabae irise, teria usira.

<sup>27</sup> Avori, evetu aimi Iesu da bino ava ningi eredo, nunda amboda ira,

<sup>28</sup> nunda tamo asugarida jijighusira. Nu amingusira da beká mo: nu kotisira, “Na tefo nunda tamo asugari aminda jigharena amo, na jebugarena,” aminge kotisira.

<sup>29</sup> Nunda tamo asugarida jijighiri, nunda kae ororo tukughedo dadabiri itatamusira, “Na jebudgeteni!” aminge kotisira.

<sup>30</sup> Kotiri, Iesu nunda fakina mavekena sefusira ava, tofo itatamusira. Itatamuse, nu anakora evetu genembo da soroda jovereghe fetedo sisira, “Mave nanda tamo asugarida jighi?” aminge setiri,

<sup>31</sup> nunda ambo jimbi siseri, “Ni redae aminge resesi? Namonde natofo jokáda gotatara udo refera emo, ni ‘mave sire jighariá’ resesi?” aminge siseri.

<sup>32</sup> Avata Iesu nu mave nunda tamo asugarida jijighusira, ava kasama ari dae sedo, gi ya foa ghusira.

<sup>33</sup> Amingiri, evetuá Iesu nange etiri jebugusira ava kotise, evetu ojughae ungo ata dadaragaruse, Iesu kena ira buvudo, nunda ata duruda du fasusira. Fasedo, numokena rea sirorusira ava, isambu setiri niningsira.

<sup>34</sup> Setiri, Iesu numokena sisira, “Nanda gagara, ninda tumondariimi ni jebudgetesi. Ava sedo, dubo jamaghae yasi, jebuga irase!” aminge sisira.

<sup>35</sup> Evetu aikena geke jo se dadabae iriri, aghi kakato mendeni Jairus da kamboda ghe fera buvudo, Jairus kena siseri, “Ninda gagara ambira. Ava sedo, Ijuga Kato erá tefo fuse janjagu eure dae resera.”

<sup>36</sup> Aminge setero ningido, nenda geke ningi dotutuse, Iesu Jairus kena sisira, “Erá oju eose! Ni taká tumonde!”

<sup>37</sup> Aminge sedo, erama evetu genembo nemonde dabade yeore dae sedo buregusira. Buregedo, Iesu nu Peter, James, a James da mandako John, ava budo nemonde dabade era,

<sup>38</sup> Jairus da kamboda buvudo, evetu genembo digari dimbia sorara ero gosuseri.

<sup>39</sup> Iesu ira kambo jokáda teredo, nemokena sisira, “Ne redae dimbia sorara erevu? Gagara mo jo ambaeri, nu ravira.”



<sup>40</sup> Aminge setiri, ne tuturo edo numoá dere jiseri. Dere jirero aindae, Iesu ne ondiri era buvero, gagara ainda noi numamo, a nunda ambo jimbi etodaba naká ainde dabade, gagara da avari vasada era teteruseri.

<sup>41</sup> Tere fetetero, Iesu gagara un-goda jighido, reighi ainda gekaimi, “Talitha kumi!” sisira. Ainda tuka mo eviri: “Nanda gagara, eraso dae resena.”

<sup>42</sup> Aminge siri ainghae dabade, gagara amo jebuge erorusira. Gagara ainda ghaeko mo, isambu 12 ava sedo, nu ya foa ghiri gi dudukughedo buniseri.

<sup>43</sup> Bunero gido, Iesu, erá osa se-ore dae sise bureguse, bayau gagara aikena mutoro mindare dae sisira.

## 6

*6:1-6 Iesu Da Natofo Nasareth Em-boimi Eredo, Nu Ighagha Useri.*

*(Matthew 13:53-58; Luke 4:16-30)*

<sup>1</sup> Iesu nunda ambo jimbide dabade eredo reighiá dodo, nunda reighi Nasareth aminda era buvurutuseri.

<sup>2-3</sup> Buvudo irise, Jangutari da Sifo aminda ira, dengoro indari da kambo+ aminda teredo, tuturo edo ijugusira. Ijugiri, evetu genembo nunda geke sisira ava, ningi dudukughedo siseri, “Numo kafentari (carpenter). Nunda noi mo Mary; nunda jamena mo James, Joses, Judas, a Simon ri. A nunda ghaghasovu barago, ne eminda irá gheraera. Ne isambu reighi ei embori. Nu jo genembo teria iraeri. Ava nu fakina a dubo kotarié reda rurusi? Nu nange nange dubo koterai? Nu nange nange nunda fakinaimi, ari mendeni mendeni etiri siroretiri, namonde gae iriara ava, namondeda gitida eregoseri?” aminge sedo, dubo ekoko edo, nu ighagha useri.

<sup>4</sup> Amingetero, Iesu nemokena sisira, “Feroveta da geke ava, evetu genembo isambu, ne ningido nu kakara eraera. Avata feroveta tofo nunda natofo, nunda oro, a nunda

ghaguru aimi, nu jo tumonduse kakara ae eraera. Kau daba aminga ava, ne namokena eraeva. Namonenda eniri, avo gido, ne na jo tumondae eraeva,” aminge sisira.

<sup>5</sup> Evetu genembo nu jo tumondae usera aindae sedo, nu ari a tano bouvu fakinaghae digarigo, aminda jo aeri. Nu dabako evia usira. Nu kae evetu genembo da tamonda ungoi jijighuse setiri jejebuguseri.

<sup>6</sup> Evetu genembo jo tumondae usera ava gido, Iesu nu dudukughusira. Dudukughedo, nu reighi Nasareth dodo, reighi mendeni Nasareth ainda dengesida irira, aminda ise, evetu genembo-kena ijugedo ghusira.

*6:7-13 Iesu Nunda Ambo Jimbi 12 Ava Dirigetiri Iseri.*

*(Matthew 10:5-15; Luke 9:1-6)*

<sup>7</sup> Iesu nunda ambo jimbi 12 ava, aghi etiri numokena fuseri. Fera buvero, ne gatededo, etoto etoto dirigusira. Diriguse, nu sukuru bu fugari da fakina ava nemokena futuse,

<sup>8</sup> eminge sisira, “Ne jo totoi jovereghe furae areva, avata ne roera digari futo jo bu ainghae deinghae areva. Erá bayau, moni, a javo bambudo yeove! Ne ketua avanembo bu yasivu!

<sup>9</sup> Nenda ata asugari a nenda tamo asugari asugedo yareva. Avata erama tamo asugarida tuka bu yeove!

<sup>10</sup> Ne ya reighi eninda buvudo kambo ningiaminda terovo, evetu genembo ne ivugaghae nati joká darera amo, kambo daba aminda avise, saramana aovo dadabari gido, kambo a reighi amo dodo yareva.

<sup>11</sup> O ne ya reighi eninda buvovo, evetu genembo ne jo ivugaghae nati joká dedo ne bu undae arera, a nenda geke jo ningae arera amo, reighiá do buvurutuse, nenda ata danghevu, fonja aminda vosare! God nu evetu genembo amo ighagha arira. Ava kasama aoro dae sedo, amingevu!” Iesu aminge sedo, ne dirigetiri iseri.

<sup>12</sup> Era buvudo, ne evetu genembo dubo jovereghaoro dae sise, vironu sedo ghuseri.

<sup>13</sup> A kotugo, ne sukaru digari ava ondeoro evetu genembo da jokáda ghe vose darigedo ghuseri, a ne orivi (olive) da muka simbe budo aimi, kae evetu genembo da tamonda dav-  
edo seoro jejebugedo ghuseri.

*6:14-29 John Bafataito Ari Kato Detero Ambududurusira, Ainda Kikiri.*

*(Matthew 14:1-12; Luke 3:19-20; 9:7-9)*

<sup>14</sup> Ne rea ava edo ghusera, ainda bino ava iri, Kini (King) Herod niningusira. Ainda beká mo: Iesu da bino ava, reighi isambu aminda ivegedo iri nininguseri. Ningido, evetu genembo mendeni Iesu dae sedo ghuseri, “John Bafataito Ari Kato seteno dorusera ava, ambarida ghe jebuge erorusira amo, numori tano. Ambarida ghe jebuge erorusira aimi, nu fakina tomanako budo saramana eraira,” aminge sedo ghuseri.

<sup>15</sup> Mendeni ne eminge sedo ghuseri, “God da feroveta javo Elijah, sekago jovereghe furariá seraera amo, numori tano.” A mendeni sedo ghuseri, “Numo God da feroveta eni, abuanane da sifoda iriara, ainda kaugori,” aminge sedo ghuseri.

<sup>16</sup> O Kini (King) Herod bino ava niningusira amo, nu eminge sisira, “John Bafataito Ari Kato seteno duboda divegetero ambududurusira ava, ambarida ghe jebuge erodo deingherira tano,” aminge sisira.

<sup>17</sup> Ainda beká mo: Herod John kena emingusira. Nu setiri, nunda mendeni era, John sandi bundedo diburada fiftuseri. Nu amingusira da susu mo: nunda koro Philip da noaro javo Herodias ava, saghimbe bu fiftusira.

<sup>18</sup> Aindae sise, John nu Herod kena ghoghora sise eminge sedo ghuseri, “Ni evetué bu fiftusesa amo, agho dari bejisesi!” aminge sedo ghuseri.

<sup>19</sup> Herodias aindae sedo, John kena dubo eko etiri, numo dari dae uju usira. Avata Herod nu ditii jijinimbiri, evetuá John dari bunisira.

<sup>20</sup> Amingusira da beká mo: Herod kasama usira, John nu genembo eveva a kakaragori. Ava sedo, nu John ava ditii jijinimbedo ghuseri. Amingeari, John foa numokena geka seari ningido, ivuga edo ghuseri. Avata, nu jo tumondae edo ghuseri.

<sup>21</sup> Herodias nu John dari dae kotise iriri, Herod da sirorari sifo fira buviri, nu aminda goroto tafusira. Amo emingusira. Herod da sirorari sifo fira buviri, Herod nu gavana da kokotofu, nunda isoro kakato da babojegari, a frovensi Galilee da gegenembo babai frovensi aminda iriara, isambu aghi etiri fera totorugetero, nendae sedo kirumo usira.

<sup>22</sup> Kirumo ero, Herodias da gagara ira teredo, yaru didiviri gido, Herod nunda esa embode dabade ivuga beká ava useri. Ava sedo, Herod gagara aikena sisira, “Ninda uju ava se ningone! Ni rejodae benunu saresa ava, na nimokena mutarena.”

<sup>23</sup> Aminge sise, beka gagojuse sisira, “Ni uju aresa amo, na nanda enda tano edo, nanda gugua diti etoto fuggedo, ni soveni baso na soveni baono dae saresa, amin-garena.”

<sup>24</sup> Aminge setiri ningido, ira noikena buvudo ategi usira, “Na rejodae benunu sarení?” setiri, noi minonda sisira, “Ni John Bafataito Ari Kato da gifua ava, benunu saso mutarira.”

<sup>25</sup> Aminge setiri ningido, gagara jovereghe bibitai sumbudo ira kinikena buvudo benunu sisira, “John Bafataito Ari Kato da gifua ava, oroko nembo gafuggedo rooróda vendi mutaso barena,” aminge benunu sisira.

<sup>26</sup> Setiri ningido, Kini (King) Herod nu dubo mema ambari eko usira. Avata nunda esa embo da dom-buda beka gagojusira aindae, nu

bouvu edo, gagara da geka buregari bunisira.

<sup>27</sup> Amingedo, John da gifua gafuge bu furare dae sedo nunda isoro kato eni sifo daba aminda dirigetiri isira.

<sup>28</sup> Ira, dibura da vasa aminda teredo, John duboda divegedo, gifua ava rooróda vendi budo fira gagara aikena futusira. Mutiri budo ira, noikena mutiri rurusira.

<sup>29</sup> Etiri dadabetiri, John da ambo jimbi ava ningido era, nunda tamó budo fera, ofofoda furuguseri. John nunda ambari mo, amingusira ava kotise, Herod nu Iesu da bino ningido, John jovereghe furariá kotisira.

*6:30-44 Iesu Setiri Bayau Dige-tiri, Gegenembo 5,000 Mindero Inono Usira.*

*(Matthew 14:13-21; Luke 9:10-17; John 6:1-14)*

<sup>30</sup> Avori, Iesu da ambo jimbi jovereghe fera buvudo, ne rea usera a ijugusera ava, Iesu kena osa siseri.

<sup>31</sup> Sisera ava, evetu genembo digari nemokena ya foa ghero, Iesu nunda ambo jimbide dabade anumbe bayau mindari da goroto jo tambaeri. Aindae sedo, Iesu nemokena sisira, “Fuvu, namonde kikiako yama vasa esike, evetu genembo irae da vasa aminda jangutarera!”

<sup>32</sup> Aminge sedo, ghakada+ vosedo, evetu genembo irae da vasa aminda sembiseri.

<sup>33</sup> Uvu da teria aminda sembero, evetu genembo digari nemoá gi kasama edo, nenda reighi isambu dodo uvu dengesida sumbudo giti era buvurutuseri.

<sup>34</sup> Iesu amboda buvudo ghaka+ dari vitido, evetu genembo nato-fogo ava totorugedo irero gosusira. Gido, nendae joka usira. Ainda beká mo: ‘Ne kau sifi (sheep) giti jighari irae, anda kaugo ava edo iriari,’ ava kotise, nemokena roera mendeni mendeni ava ijugusira.

<sup>35</sup> Ijugiri ungobu etiri, nunda ambo jimbi 12 ai fera numokena siseri, “Iji dadabetira, eminda evetu genembo a kambo tefori.

<sup>36</sup> Ava sedo, natofo dirigaso, yama reighi mendeni mendeni aminda, bayau ombu mindore!” aminge siseri.

<sup>37</sup> Setero, Iesu nemokena sisira, “Bayau nene mutuvu mindore!” Setiri, ne numokena siseri, “Ni erekotesa amo, namane yama K2,000<sup>37</sup> aimi farava ombu mutoro mindoro dae sise resesa, ai?” aminge siseri.

<sup>38</sup> Setero, nu nemokena sisira, “Nemokena farava nanjogori? Yasivu gaove!” Setiri, era gido jovereghe fera siseri, “Farava ghabu soveni a oka etoto nakári.”

<sup>39</sup> Aminge setero ningido, nu nunda ambo jimbikena sisira, “Evetu genembo sevu, nunda diti diti kikisada fuge anumbaore!” aminge setiri, ne era setero

<sup>40</sup> evetu genembo sarigedo diti mendeni 100 a mendeni 50 avavaga fuge anumbuseri.

<sup>41</sup> Anumbetero, Iesu nu farava ghabu soveni a oka etoto naká ava budo, dombu utuda fainghedo God kena ‘aiyakoe’ sisira. Sedo, farava jighi embebegedo, natofokena ghasoro mindoro dae sedo, nunda ambo jimbikena futusira. Oka etoto naká ainghae dabade budo soro aoro dae sedo futusira.

<sup>42</sup> Mutiri budo soro etero, isasambu mindero inono usira.

<sup>43</sup> Mindero inono etiri, mendeni dotero fasusira ava, Iesu da ambo jimbiimi rete budo kanda babai isambu 12 ava vevenduseri.

<sup>44</sup> Gegenembo bayau risera amo, inono 5,000 avavagori. Evevetu a sasingu jo tegaeri.

*6:45-52 Iesu Nu, Vose Eva Etoda Fete Deinghudo Isira.*

*(Matthew 14:22-33; John 6:15-21)*

<sup>45</sup> Mindero dadabiri ainghae dabade, Iesu nu setiri nunda ambo

<sup>37</sup> 6:37: Afíge, **Geka Se Disugari Da Vasa** aminda, geka *mino o moni* aindae rea gefusera, ava tege garesa.

jimbi ghakada+ vosedo, ne giti uvu da teria sovenikena reighi Betsaida aminda yari dae sembiseri. Sembero, Iesu evetu genembo totorugusera ava dirigusira.

<sup>46</sup> Dirigetiri ero, nu enda jiro fumbari, aminda banungari dae sedo vitisira.

<sup>47</sup> Tumba jiriri, nu nusuka vasa aminda iriri, ghakada+ isera amo, ne sembera soroda buvurutero,

<sup>48</sup> yaura dombukena firi ghandavusera, jo inono ae usira. Amingero, Iesu gosusira. Gido, sifo da tumba aminda, Iesu vose eva etoda fete deinghe nemokena isira. Ira ghaka+ darigari dae iri,

<sup>49</sup> ne fuge gido, 'sukaruva' sedo, koko siseri.

<sup>50</sup> Ainda beká mo: numo gosuse, ne isambu oju beká ava useri. Oju ero, Iesu tavarige sisira, "Fakina evu! Namori! Erá oju eove!"

<sup>51</sup> Aminge sedo, Iesu nu ira ghakada+ vivitiri, yaura tukughedo binono usira. Binono etiri gido, ne dubo buniseri.

<sup>52</sup> Ainda susu mo: Iesu nunda fakina nemokena ijuguse, farava soro etiri natofo mindero inono usira ainda tuka ava, ne jo kasama ae useri. Ava sedo, nu nemokena buviri, yaura tukughe binono usira ainda tuka barago, jo kasama ae useri. Ainda beká mo: nenda munju jo afigae usira.

*6:53-56 Iesu Kae Evetu Genembo Mendeni Setiri Jejebuguseri.*

*(Matthew 14:34-36)*

<sup>53</sup> Avori, ne Iesu de dabade sembera, reighi Genesaret aminda dadoruseri. Genesaret resena emo, reighi savavarari. Kotugo ainda jokáda, reighi veveyako mendeni irei.

<sup>54</sup> Ghaka+ dari vitéro, evetu genembo ne Iesu gido kasama useri.

<sup>55</sup> Kasama edo, kae evetu genembo bu furari dae sedo, ne anakora era nenda reighi aminda, kae evetu genembo fafasedo iritiriara ava, ghaghada fiti fumbudo, numokena fuseri. Evetu genembo, nu reighi

reda iriri setero niningusera, vasa aminda kae evetu genembo budo fuseri.

<sup>56</sup> Nu reda isira, reighi babai a reighi kikitako aminda, natofoimi nunda bino ava ningido, kae evetu genembo fumbudo maketa vasada budo fuseri. Budo fera buvudo, evetu genembo aimi, ne Iesu kena benunu siseri, nange kae embo Iesu da tamo asugari da tingu ava deredo jejebugaeteri. Aminge setero, mave sire dederusira amo, nu jejbugusira.

## 7

*7:1-13 Jusi Embo Nenda Nombuamane Da Kikiri.*

*(Matthew 15:1-9)*

<sup>1-4</sup> Moses da Geka kaifa kakato+ a Jusi embo isambu nenda kiki kakara use, ungo jo seghae arera amo, ne bayau jo mindae arera. Ne maketa vasa dodo ya kamboda vitido, roera ombarera ava jo seghae arera amo, ne jo mindae arera. A eni mo, ne agha, okia, a rooro ábarago segheraera. Aminguse, ne kiki mendeni mendeni ava kakara use eraera.

Avori, Moses da Geka kaifa kakato a ijuga kakato+ mendeni Jerusalem ghedo fera buvudo Iesu kena totoruguseri. Totorugusera amo, ne Iesu da ambo jimbi ungo jo seghae bayau rero gosuseri.

<sup>5</sup> Gido, ategi useri, "Ninda ambo jimbi redae namondeda kiki dodo, ungo jo seghae bayau bu mindiraeri?"

<sup>6</sup> Aminge setero, nu eminge sisira, "Ne gungubo kakatori. God da feroveta Isaiah nendae sise, geke beká gefusira. Amo eviri:

'Bajari resira,

"Evetu genembo emo, bekaimi na kakara eraera.

Avata nenda dubo jokáda mo, ne soka bekári.

<sup>7</sup> Ne na tumonde baingheraera, avata beká eni tefo bekári.

Ne aminda sonemba eni jo bae arera. Ainda beká mo: ne evetu genembo da kotari ava, ne nanda Agho Dariva sise ijugeraera.'

Geka amo God setiri, Isaiah nendae sedo gefusira.

<sup>8</sup> Ne evetu genembo da kotari a uju ava bu jighirise, God da Agho Dari ava dotutusevu.”

<sup>9</sup> Aminge sedo, Iesu sekago sisira, “Ne nangetiraimi God da Agho Dari bu fugedo, tofofo nenda kiki ava use dara eraevu!

<sup>10</sup> Na redae aminge reseni? Iju-gaono gareva. God setiri, Moses eminge sisira:

‘Nei nimamo kakara use, nenda geka ava ningivu!’

A eni mo:

‘Mave noi o numamokena jijivu sarira amo, devu ambare!’

Moses aminge sisira.

<sup>11</sup> Avata nemo, eminge ijugeraeva. Genembo mave noi numamo ighagha use, nunda gugua budo ‘Korban’ sise,

<sup>12</sup> noi numamo jo sonembae arira amo, avori. Ne aminge ijugeraeva. (‘Korban’ da tuka mo, roera God kena mutariri.) Evetu genembo aminguse, noi numamo jo sonembae eraera amo, ne ‘avori’ seraeva.

<sup>13</sup> Aminguse, ne God da Geka ava dotutuse, nenda kotari ava seovo buveari, geka bekáva sise seraeva. A ne roera mendeni mendeni kau daba ava ijugeraeva,” Iesu aminge sisira.

*7:14-23 Bebeta Ari Da Gekari.  
(Matthew 15:10-20)*

<sup>14</sup> Setiri dadabetiri, Iesu kori setiri evetu genembo sekago fera numokena totoruguseri. Totorugetero, nemokena sisira, “Ne isambu, ningido kasama aovo dae resena. Ne erekoteva, evetu genembo ungo jo seghae iria edo bayau bu mindarera aimi, tamo bebete arira.

<sup>15</sup> Avata, evetu genembo rea mindarera aimi, nenda tamo jo bebete ae arira. O evetu genembo da dubo jokáda kotari sembae o geka sembae buvarira aimi, ne bebete arira.

<sup>16</sup> Ava ningido kasama aovo dae sise resena!”

<sup>17</sup> Aminge sedo, evetu genembo dendeguda totorugusera ava dodo, nunda ambo jimbi ainde dabade

kamboda teteruseri. Teredo, nunda ambo jimbi, Iesu kasia sisira ainda tukadae, ategi useri.

<sup>18</sup> Ategi etero, Iesu nemokena sisira, “Ne nangetiraimi geka setena da beká ava, jo kasama ae erevu? Ne nanda ambo jimbiri. Avata na eregosena, nenda kotari kikitakori, evetu genembo mendeni da kotarigori.

<sup>19-23</sup> Ne anakora geka evia kasama aetevu. Genembo bayau rea mindarira aimi, jo nu bebete ae arira. Ainda beká mo: genembo bayau mindarira amo, jo nunda dubo jokáda terae arira. Bayau amo nu tininda vosiya foká jinendo ya vosarira. Avata genembo rea dubo jokáda koteraira aimi, nu bebete eraira. Ainda tuka mo: kotari ekoko, bagia ari, kombo yagera ari, dighighi ari, evetu genembo kae jighoro ambari, komana daoro ambari, ari ekoko ari, gungubo sari, oduso ari, kotae kotae emboroda sino da ari ava use deinghari, bengoso ari, aji sari, tofo sakai sari, gogore edo kotae kotae sari, kotari amo genembo da dubo jokáda ghe foa buvuraira aimi, nu bebete eraira,” aminge sisira. Aminge sise, Iesu ijugusira: evetu genembo jo bayau rise, aimi bebete ae eraera. Ari ekoko nenda dubo jokáda buvuraira aimi, bebete eraira.

*7:24-30 Jusi Embo Da Gitofu Evetu  
Eniimi, Iesu Tumondusira.  
(Matthew 15:21-28)*

<sup>24</sup> Iesu nu reighiá dodo ira, gitofu da reighi etoto, javo Taiar a Saidon, ainda frovensi aminda buvudo, kambo eninda teterusira. Nu junge ufena ya teraetira ava uju usira, avata nu jo junge yari da kaugo iraeri.

<sup>25-26</sup> Nu fira buvurutusira da bino ava ningido, evetu eni anakora fira numokena buvudo, nunda ata duruda du fasusira. Evetu resena emo, nu Greek embori, reighi Sairofonisia aminda sirorusira. Nu nunda gagara ijoghako ainghae irá ghedo ghusira.

Gagara ijoghako aikena sukaru asug-etiri irei. Avori, evetu amo ira Iesu da ata duruda du fasedo, numo sonembedo sukaru ondari nunda gagara da jokáda ghe vose darigare dae sedo, benunu sisira.

<sup>27</sup> Aminge benunu setiri, Iesu numokena sisira, “Ne namanenda gitofuri. Namane nendae ‘sinova’ seraera. God namanenda abua Abraham gategusira, a namanenda oro barago gategusira. Ava sedo, God da sasingu giti bayau mindaeteri. Nenda bayau budo sinodae fugarena amo, jo eveva iraeri. Ava sedo, ni redae sonembareni?”

<sup>28</sup> Aminge sisira avata, evetuá mino eminge sisira, “Ai, Bajari! A nu beká resesa. Avata sasingu mo, bayau rirureoro susunda dudurugeraera amo, sinomanei bu mindiraera. Ava sedo, nandae joka edo sonembaso dae resena!”

<sup>29</sup> Aminge setiri, Iesu sisira, “Ni beká resesa. Ava sedo, kamboda yasi gase! Ni geke mino eveva setesa ágido, na sukaru ondeno ninda gagara da jokáda ghe vose darigetira.”

<sup>30</sup> Aminge setiri, nu jovereghe ira, kamboda buvurutusira. Buvurutusira amo, sukaru nu anakora vose darigetiri, gagara fase avíri gosusira.

### *7:31-37 Iesu Genembo Dengoro Irae A Beka Guga Ava, Setiri Jebugusira.*

<sup>31</sup> Aında amboda, Iesu eredo reighi Taiar dodo ira, reighi Saidon dodo, Frovensi Dekapoles, reighi isambu ghabu sovenisoveni ireira aminda sembira, uvu da teria javo Galilee aminda buvurutusira.

<sup>32</sup> Buviri, evetu genembo mendeni eredo, genembo dengoro irae, a beka guga ava, numokena bu fuseri. Bu fera, Iesu nunda ungoimi genembo da tamonda jighare dae benunu siseri.

<sup>33</sup> Aminge setero ningido, Iesu genemboá budo, evetu genembo dodo nengae kikiako esike era, nunda ungo konsirari aimi genembo aında

dengoroda siregetiri teretiri, kosiva edo genembo da avivada dederusira.

<sup>34</sup> Amingedo, nu dombu utuda fainghuse, ghamo aseguse nenda gekaimi, “Efata!” sisira. Aında tuka mo: “Afige!”

<sup>35</sup> Aminge siri ainghae dabade, dengoro afigetiri, aviva vujegedo dambu etiri beka dambu sisira.

<sup>36-37</sup> Evetu genembo ava gi dudukughedo bunari beká buniseri, nu geke nunda bekaimi sisira aındae. Dudukughuse siseri, “Nu rea eraira amo, isambu eveva beká eraira. Nu taká eari dengoro afigeraira, a aviva vujege dambu eari geke seraera,” aminge siseri. Avata Iesu nu, erama osa seóro dae sise buregusira. Aminguse, nu umbu digarigo buregedo ghusira, avata ne nunda geke jo ningae, osa sido ya ghuseri.

## 8

### *8:1-10 Iesu Setiri Bayau Digetiri, Evetu Genembo 4,000 Míndero Inono Usira.*

*(Matthew 15:32-39)*

<sup>1</sup> Sifo aminda, evetu genembo sekago fera totorugedo irero, sifo etodaba naká dadabetiri, bayau dadabetiri gido, Iesu nunda ambo jimbikena kori setiri, numokena fera buvero sisira,

<sup>2</sup> “Evetu genembo namonde sifo etodaba naká deinghuse bayau dadabetiri gido, na nendae joka erira.

<sup>3</sup> Na ne oroko bayau tefo dirigaono natida yarera amo, ne emboro soroda ighoii sirivo arera. Mendeni mo, nenda reighi soka bekári. Ava sedo, na nange evetu genembo dirigareni? Namonde sonembaeteri!”

<sup>4</sup> Aminge setiri, nunda ambo jimbi eminge siseri, “Namonde nange nange farava budo mutoro mindareri? Reighi eminda, evetu genembo a nati tefo ava sedo, bayau tefori.”

<sup>5</sup> Aminge setero, Iesu nemokena ategi usira, “Nemokena farava nanjogo iri?” setiri, ne “7” siseri.

6 Setero, Iesu natofo endada anumbaoro dae setiri, ne fuge anumbuseri. Anumbetero, Iesu farava 7 ava budo, God Afakena 'aiyakoe' sedo, jighi embebegedo, evetu genembo isambukena ghasoro dae, nunda ambo jimbikena futusira.

7 Oka veveyako nanjogoko nemokena iritirisira ábarago, esimbugedo nunda ambo jimbikena futuse, soro aoro dae sisira.

8 Soro etero, evetu genembo budo mindero inono usira. Inono etiri, mendeni dotero fasusira ava, rete budo kanda babaimi isambu 7 ava vendero bedo usira.

9 Evetu genembo bayau risera amo, inono 4,000 avavagori.

10 Etiri dadabetiri, Iesu evetu genembo dirigetiri ero ainghae dabade, nunda ambo jimbide ghakada+ vosedo, reighi javo Dalmanuta aminda sembiseri.

*8:11-13 Moses Da Geka Kaifa Kakato+, Ne Iesu Nunda Fakina Ijugari Gari Dae Siseri.*

*(Matthew 16:1-4; Luke 11:16; 12:54-56; 11:29; John 6:30)*

11 Moses da Geka kaifa kakato+ mendeni Iesu kena era buvudo, Iesu de dabade beisiga useri. Nenda uju mo: numo deroro geke sembae sari ningido, nu bu koto ari dae sedo, eminge siseri, "Ni God da fakina aimi, tano aso gari dae resera!"

12 Aminge setero ningido, Iesu nu dubo memaghae ghamo asegedo sisira, "Ne redae tano aono dae resevu? Na geke beká nemokena resena. Evetu genembo siroredo oroko endada irera emo, ne jo tano eni ururono gae arera,"

13 Aminge sedo, ne dodo nunda ambo jimbide dabade, jovereghe sembiseri.

*8:14-21 Iesu Ari Eko Da Kasia Ava Yistikena Fifituse Sisira.*

*(Matthew 16:5-12; Luke 12:1)*

14 Iesu da ambo jimbi farava dabako budo, farava mendeni kotae dodo sembero,

15 Iesu nemokena sisira, "Ditii gi gogoghombevu! Moses da Geka kaifa kakato+ da yisti<sup>15</sup> (yeast) a Kini (King) Herod da yisti ava imboe edo darigaovo dae resena," Aminge setiri ningido, nunda ambo jimbi farava bekáva kotise, tofo tofo se nininguseri,

16 "Omo rejodae resi? Namonde farava kotae dotera aindae resira tanojo," ne aminge bunise se nininguseri.

17 Ne rejodae se niningusera, ava kasama edo, Iesu nemokena sisira, "Ne redae faravadae resevu? Ne nangetiraimi geke da tuka anakora kasama ae irevu? Ne munju tefori!"

18 Ne diti digoideri, ai? Ne dengoro iraeri, ai? Kote givu!

19 Na giti farava ghabu soveni jighi embebegedo ghaseteno, gegenembo 5,000 mindero inono etiri, kanda babai nanjogo ava vevendusevu?" aminge setiri, ne "12" siseri.

20 Setero, nu sekago sisira, "A na farava 7 budo jighi embebegedo ghaseteno, evetu genembo 4,000 mindero inono etiri, ne kanda babai nanjogo ava vevendusevu?" aminge setiri, ne "7" siseri.

21 Setero, nu sisira, "Oroko ava kasama ereva, ai? Farava saono sirorari da fakina namokena irira. Ava kotaetevu! Avata na yisti (yeast) sise, na jo faravadae kotaeri. Na ijuga eko aindae kotise, yisti (yeast) seteni," aminge sisira.

*8:22-26 Iesu Ira Reighi Betsaida Aminda, Genembo Diti Digoide Ava Setiri Diti Eveva Usira.*

22 Aminge setiri dadabetiri, reighi Betsaida aminda tere darido vivituseri. Vitéro, evetu genembo mendeni ne genembo diti digoide ava unumbe budo fuseri. Bu fera, Iesu kena buvudo, Iesu nunda tamonda derari jebugare dae sedo, benunu siseri.

15 8:15: Afige, Matthew 16:6 ainda duruda tege garesa.

23 Setero, Iesu nu genembo diti digoide ava ungodá budo unumbe, nengae kamboá dodo itako ambo soka iseri. Era fetedo, genembo da ditída kosiva edo nunda ungo ditída sire jijighuse, ategi usira, “Ni rejo eni eregosesa?” aminge setiri,

24 diti fuge gido sisira, “Na evetu genembo deinghero eregosena, avata nemo kau ika da kaugo ava deinghero eregosena.”

25 Setiri, Iesu sekago nunda ungoi genembo ainda ditída sire jijighusira. Jighiri fuge giri, diti eveva etiri, nu roera isambu isagha etiri gosusira.

26 Amingetiri, Iesu nu genemboá kamboda yare dae diriguse sisira, “Ni dambu ninda kamboda yasi! Erá jovereghe reighi teriada ya tereose!” aminge sisira.

*8:27-30 Iesu Nu God Da Mandi Beká, Ava Peter Kasama Edo Isagha Sisira.*

*(Matthew 16:13-20; Luke 9:18-30; John 6:67-71)*

27 Ainda amboda, Iesu nunda ambo jimbi gido, Peter dombuda sisira, “Satan, na darigaso dae resena! Resesa amo, jo God da kotari iraeri. Amo evetu genembo da kotariri!”

28 Aminge setiri, ne numokena mino eminge siseri, “Evetu genembo mendeni koteraera, John Bafataito Ari Kato ambarida ghe, jebugedo erariá seraera amo, nimori tano. A mendeni koteraera, God da feroveta Elijah jovereghe furariá seraera amo, nimori. A mendeni koteraera, God da feroveta eni ambarida ghe, jebugedo erariá seraera amo, nimori. Evetu genembo ne aminge kotise seraera.”

29 Aminge setero, Iesu sekago ategi usira, “Atá, ne nange erekotevu? Na mavejori? Sevu ningone!” aminge setiri, Peter mino sisira, “God namanenda ari ekoko kote doyari dae sise, Genembo eni dirigari furare dae sisira, amo nimori.”

30 Aminge setiri, erama nu mavejori ava osa seóro, evetu genembo ningeore dae sedo, Iesu buregusira.

*8:31–9:1 Iesu Nu Nange Ambarira, Aindae Osa Sisira.*

*(Matthew 16:21-28; Luke 9:22-27)*

31 Amingedo, nu tuturo edo isagha beká dengoro induduse, nemokena eminge sisira, “Evetu genembo da kokotofu, fristi+ da babojegari, a Moses da Geka ijuga kakato, + ne Evetu Genembo da Korokena+ mema tomanako mutoro itatamarira. Amo emingarera. Na ighagha edo saoro, evetu genembo mendeniimi na daoro ambudo, sifo etodaba naká dadabari ainda amboda, na sekago ambarida ghe jebuge erarena,” aminge sisira.

32 Isagha beká setiri ningido, Peter nu eredo Iesu budo nengae era ajagha fetedo, Peter tuturo edo nu dombuda sise, erá aminge seure dae sisira.

33 Avata Iesu jovereghe nunda ambo jimbi gido, Peter dombuda sisira, “Satan, na darigaso dae resena! Resesa amo, jo God da kotari iraeri. Amo evetu genembo da kotariri!”

34 Iesu aminge sedo kori setiri, evetu genembo totorugusera, a nunda ambo jimbi fera numokena buvurutuseri. Buvero, Iesu nemokena sisira, “Mave nanda ambo jimbi edo, namonde dabade deinghari sarira amo, nu emingarira. Nunda uju ava dodo, nanda uju avanembo arira. Nu namo tumonduse, gitofudae jo oju ae, mema ã bouvu fufudo ya ambarira, a nu avori. A nane rea eraena ava, nu kau daba ava udo yarira. Amingarira amo, nu nanda ambo jimbi edo, namonde dabade deingharera.

35 Ainda tuka mo: mave enda ainda gugua kotise a ambari dae oju use, na doyarira amo, nu sifo amboda ambarira. O mave nandae a nanda binodae sedo ambarira amo, nu amboda jebuga evovodae irari ava tuve barira.



<sup>36</sup> Mave nu enda da gugua ava dubo ruruse, roera isambu nunda tofo sise, jebuga evovodae irari ava kosasaghedo ambarira amo, givu!

<sup>37</sup> Aimi nu sonembarira, ai? Avata aimi, nu jo sonembae arira.

<sup>38</sup> A eni mo: mave nanda ijugadae meka gosuse, evetu genembo oroko endada irise, ari ekoko use God kotae eraera ainda dombuda, Evetu Genembo da Koro+ ighagha arira amo, amboda na God Afa da usasa jokáda, nunda aneya kakarade vose furarena ainda sifo aminda, na genemboá barago ighagha arena.”

## 9

<sup>1</sup> Aminge sedo, nu nemokena sisira, “Na geka beká nemokena resena. Ne mendeni nanda dombuda fetireva emo, ne jo ambae irovo, God tofo mandi nunda fakinaimi evetu genembo kaifa ari<sup>1</sup> da sifo foa buvari gareva,” Iesu aminge sisira.

*9:2-13 Iesu Dombu Jovereghedo, Usasago Beká Ava Usira.*

*(Matthew 17:1-13; Luke 9:28-36)*

<sup>2</sup> Sifo 6 ava dadabetiri ainda amboda, Iesu nu eredo, Peter, James, a John budo, nemonde kikiako esike era, doriri mindafu eni aminda vitiseri. Doririda viti fetedo gosero, Iesu nu jovereghedo usasago beká ava usira.

<sup>3</sup> A nunda tamo asugari barago, janimbedo foyago beká ava usira. Amo, jo evevetu roera segheraera, ainda kaugo iraeri. Foyago beká ava usira.

<sup>4</sup> Etiri, Elijah Moses ghae, ne giti beká endada iriara ava, nengae fera isagha edo, Iesu de dabade geka se nininguseri.

<sup>5-6</sup> Se niningero, Peter, James, a John oju edo aindae, Peter geka rejo saetira ava bunise, Iesu kena sisira, “Bajari, namane budo ojesa aindae sedo, na ivuga erena. Ni nange erekotesi? Eveva mo, namane dobo

etodaba naká eminda itore, eni nindae, eni Moses dae, ã eni Elijah dae itore, ai?” aminge sisira.

<sup>7</sup> Setiri, foroga fira nenda jiro agada fetiriri ainda jokáda, beka siri nininguseri. Amo eminge sisira, “Emo nanda dubo bari Mandiri. Nunda geka ava ningivu!”

<sup>8</sup> Setiri dadabiri ainghae dabade, ne dudukughedo diti fange, jovereghusera amo, Iesu nusuka fetiriri gosuseri.

<sup>9</sup> Gido, jovereghe, ne Iesu de dabade vose fuse, Iesu nemokena sisira, “Ne oroko rea geva amo, erá osa seove! Evetu Genembo da Koro+ daoro ambudo, ambarida ghe jebuge erarira ainda amboda osa sareva, a nu avori,” aminge sisira.

<sup>10</sup> Setiri, ne rea gosusera ava kivo use, evetu genembo mendenikena jo osa saeri. Avata ne ainda tuka ava bunise, tofo tofo se nininguseri, “Nu ambarida ghe jebuge erariá resira da tuka mo, rejori?”

<sup>11</sup> Se nininguse, numokena ategi useri, “Moses da Geka ijuga kakato+ eminge seraera, ‘Elijah giti endada ireira amo, sekago jovereghe furarira ainda amboda, Genembo God mutari sisira amo, sirorarira.’ Amo redae aminge seraeri?”

<sup>12-13</sup> Aminge setero, Iesu nemokena sisira, “Moses da Geka ijuga kakato+ aminge seraera, ainda beká mo eviri. Elijah nu giti foama, Evetu Genembo da Koro+ dae emboro rerebuse, roera simbugaeti. Avata na nemokena eminge resena. Elijah nu anakora fusira. Fusira amo, God da Geka nundae rea resira ava, numokena sirorusira. Elijah jovereghe fira iriri, evetu genembo nu budo nenda uju ava use, mema mutero itatamusira. A kotugo, Evetu Genembo da Koro+ ava kote givu! God da Geka nundae nange resi? Ava givu! ‘Evetu Genembo da Koro+ foa buvari gido, evetu genembo nu imboe edo, mema a bouvu mutoro itatamarira.’ God da Geka nundae aminge resira amo,

<sup>1</sup> 9:1: Afige, **Geka Se Disugari Da Vasa** aminda, geka *Natofu* dae rea gefusera ava, tege garesa.

redae resi? Ava kotovo dae resena,” Iesu aminge sisira.

*9:14-29 Iesu Setiri, Sukaru Mandi Enikena Asugedo Ireira Ava, Vose Darigusira.*

*(Matthew 17:14-21; Luke 9:37-43)*

<sup>14</sup> Setiri dadabetiri, Iesu, Peter, James, a John, nemonde vosera, nunda ambo jimbi mendeni doriri duruda dotutusera, aikena buvurutuseri. Buvurutuse, evetu genembo natofogo aminda totorugusera ava gosuseri. A kotugo, Moses da Geka ijuga kakato+ mendeni mo, Iesu da ambo jimbide dabade beisiga ero gosuseri.

<sup>15</sup> Evetu genembo totorugusera amo, ne Iesu fuge gosuse dudukuguseri. Dudukughedo, numokena sumbudo era, nati joká doruseri.

<sup>16</sup> Etero, Iesu nunda ambo jimbidae ategi usira, “Ne redae beisiga erevu?”

<sup>17</sup> Aminge setiri, evetu genembo totorugusera ainda jokáda, genembo eniimi numokena sisira, “Ijuga Kato, nanda mandi nimokena budo ojeni. Nanda mandi resena emo, sukaruimi asugetiri irise, beka jo sae eraira.

<sup>18</sup> A kotugo sifo mendeni, sukaruimi nunda tamonda asuge bu fugeari, endada du fasedo, yaiva tabetabe vovosurureari dika ghininji ghananja ghuse, ungo ata taintangheraira. Avori, nanda mandi emo nimokena bu ojena avata, ni jo tambae edo, ninda ambo jimbiimi bu fugoro dae setena ava, ne jo aoro inono ae etiri gido, na nimokena bu ojena resena.”

<sup>19</sup> Aminge setiri, Iesu nemokena ghoghora sise sisira, “Ne sembae er-aeava! Nangetiraimi ne tumondari tefori? Eveva mo: na ne doyaetena ava avori. Na erebunena. Avori, mandiá namokena budo fuvu gaone vae!”

<sup>20</sup> Aminge setiri, mandiá numokena budo fera buvero, sukaru ai Iesu gosuse, anakora eredo mandiá fugetiri, endada du afufuse, ungo ata

dadadaghiri, yaiva tabetabe vovosusira.

<sup>21</sup> Amingiri, Iesu numamokena ategi usira, “Ninda mandi mo, sifo reda sukaru numokena asugusi?” aminge setiri, numamo sisira, “Siroredo itako bajiri gido, asugusira.

<sup>22</sup> Asugedo, sukarui mandi emo dari ambare dae sedo, mandi bu fugeari, avaraka etoda dudo gheraira, o uvuda tifugheraira. Ni inono aresa amo, namanendae joka edo sonembaresa!” aminge sisira.

<sup>23</sup> Setiri, Iesu mino numokena sisira, “Ni aminge sise, redae bouvu namokena fifiteresi? Nine tumonde! Mave tumondarira amo, nu roera isambu ari inono arira,” aminge sisira.

<sup>24</sup> Setiri nininguse ainghae dabade, mandi numamo beka fainghede sisira, “Na itako tumonderena! Nine sonembaso, nanda tumondari fakina arira!” aminge sisira.

<sup>25</sup> Aminge sise, evetu genembo natofogo fera tototo ghero gido, Iesu kovionoghae sukarukena sisira, “Nine eteso, mandi dengoro gajedo beka guga usira. Ava sedo, vose dari-gaso dae resena. Erama numokena sekago asugeose!”

<sup>26</sup> Aminge setiri, sukaru koko sedo mandi bu fugetiri, dudo ungo ata eko beká edo dadadaghiri, fira buvurutusira. Buviri, mandiá ambari embo da kaugo usira. Amingiri gido, evetu genembo siseri, “Arie, mandi ambira!” siseri.

<sup>27</sup> Avata Iesu nu mandiá ungodá jighiri erorusira.

<sup>28</sup> Ainda amboda nu nunda ambo jimbide dabade, evetu genembo dodo kambo eninda teteruseri. Teredo, ne kikiako anumbedo, nunda ambo jimbi ategi useri, “Namane ondera amo, nangetiraimi sukaru jo vose darigaeri?”

<sup>29</sup> Aminge setero, Iesu sisira, “Jo tefo aovo, sukaru foa buvae arira. Ne na tumondedo banunguse, sukaru ondovo foa buvarira,” aminge sisira.

*9:30-32 Iesu Nu Nange Ambarira Ava, Sekago Osa Sisira.*

*(Matthew 17:22-23; Luke 9:43-45)*

<sup>30</sup> Reighiá dodo era, Frovensi Galilee aminda teredo sembiseri. Sembise, numo ambarira da geka amo, nunda ambo jimbikena ijugusira. Aindae sedo, numo isira da vasa ava, evetu genembo erá kasama eore dae sise imboe usira. Aminda ise, geka ava ijuguse eminge sisira,

<sup>31</sup> “Evetu Genembo da Koro+ ava sandido, gegenembo mendeni da ungodá fitoro daoro ambarira. Avata sifo etodaba naká dadabari, God sari nu ambarida ghe jebuge erarira,” ava nunda ambo jimbikena setiri nininguseri.

<sup>32</sup> Gekaá sisira ainda tuka ava, ne buniseri. Bunedo, Iesu kena ategi e ningari oju useri.

*9:33-37 Genembo Teria Ari Dae Aresa Amo, Emingaresa.*

*(Matthew 18:1-5; Luke 9:46-48)*

<sup>33-34</sup> Frovensi Galilee sembise, emboro soroda, Iesu da ambo jimbi beisiga use, eminge se nininguseri, “Iesu nu namondeda giti jighariri. Avata nunda amboda mave namondeda giti jighari?” Aminge se nininguse, Iesu de dabade reighi Kaponiam buvudo, kambo eninda era tetetuseri. Teredo, Iesu ategi usira, “Ne emboro soroda geka rea se ningevu?” aminge ategi usira.

<sup>35</sup> Avata ne beka dodo irero gido, Iesu nu anumbedo kori setiri, nunda ambo jimbi 12 ava numokena fera buvero sisira, “Mave nenda giti jighari ari sarira amo, nu tofo fitari vosari ne isambu da aghi kato use irarira,” aminge sisira.

<sup>36</sup> Aminge sise, nu mandi kitako eni ovinembe budo nenda soroda fifitusira. Fitido, nemokena sisira,

<sup>37</sup> “Mave, nanda javoda sasingu evavaga ava nati joká doruse, bu tavo arira amo, nu inono, namoá nati joká doruse, bu tavo arira. A kotugo, mave na nati joká doruse, bu tavo arira amo, nu inono, God Afa na dirigetiri fusena, numoá nati joká doruse, bu tavo arira,” aminge sisira.

*9:38-41 Mave Namondeda Gitofu Jo Sonembae Eraira Amo, Nu Inono, Namonde Sonemberaira.*

*(Matthew 10:42; Luke 9:49-50)*

<sup>38</sup> Setiri, John sisira, “Ijuga Kato, genembo eniimi ninda javoda sukaru bu fugutiri gido, namane nu doyare dae siseri. Ainda beká mo: nu jo namonde dabade deinghae eraira,” aminge sisira.

<sup>39</sup> Avata Iesu sisira, “Amo erá amingeove! Ainda susu mo: mave sukaru ondari buvarira, o ari fakina mendeni evia avaga nanda javoda arira amo, nu jo totoi dubo jovereghedo, nanda javo eko ae arira.

<sup>40</sup> Mave namondeda gitofu jo sonembae eraira amo, nu kau, namonde sonembuse ariá eraira.

<sup>41</sup> Na geka beká nemokena resena! Mave eminge kotarira, ‘Genembo omo, nu Iesu da ambo jimbi ava sedo, na sonembe uvu mutarena,’ aminge kotise, uvu nimokena mutarira amo, na amboda mino mutono barira. Jo kosasaghae arira,” aminge sisira.

*9:42-50 Iesu, Erá Ari Ekoko Mino Mutari Vasada, Tereóro Dae Sise Sisira.*

*(Matthew 18:6-9; 5:13; Luke 17:1-2)*

<sup>42</sup> Setiri dadabetiri, nu sekago sisira, “Genembo mave foa, sasingako evavagoimi namo tumonderaera, ava derari, ari ekoko arera amo, derari kato amo, amboda mema mindafugo ava tambarira. Eveva mo: genemboá nanda sasingu jo derae irari, gitofu eni foama, ghamana mindafu budo, genembo ainda duboda dighido, bu fugari evada tifughari dadabaeti. O nu, sasingu namo tumonderaera evia, derari gido, God aindae mema mutari tambarira amo, eko a bouvugori.

<sup>43-44</sup> A eni mo: ninda ungo aimi dara aso ari eko sirorarira amo, gafuge fugaresa. Eveva mo: ni ungo soveni taukaka iria ambudo, ya God kena jebuga tambaresa. O ni ungo etoto aminge irise, ari ekoko use iria

ambudo, ya ari ekoko mino mutari vasa aminda teraresa amo, eko a bouvugori. Aminda teraresa amo, ni sifo ghousa ava avarakai avirurari ainda jokáda iraresa.<sup>43-48</sup>

<sup>45-46</sup> O ninda ata barago aimi dara aso ari eko sirorarira amo, gafuge fugaresa. Eveva mo: ni ata soveni tauskakai iria ambudo, ya God kena jebuga tambaresa. O ni ata etoto aminge irise, ari ekoko use iria ambudo, ya ari ekoko mino mutari vasa aminda teraresa amo, eko a bouvugori.

<sup>47</sup> O ninda diti aimi gosuse, ni ari eko aso sirorarira amo, gunumbe fugaresa. Eveva mo: ni diti soveni tauskakai iria ambudo, ya God kena jebuga tambaetesi. O ni diti etoto aminge irise, ari ekoko use iria ambudo, ya ari ekoko mino mutari vasa aminda teraresa amo, eko a bouvugori.

<sup>48</sup> Ari ekoko mino mutari vasa aminda, jifa ava ninda tamonda irari, ni avarakai sifo ghousa ava avirurari ainda jokáda iraresa.

<sup>49</sup> Kau karaje bayau jokáda voseraira aminga ava, evetu genembo isambu avaraka jokáda vosarera.

<sup>50</sup> Karaje mo roera evevari. Avata karaje sasaka edo nunda janje dadaberaira aminga ava, genembo da dubo bari sembae arira amo, genembo nu eko arira. Ava sedo, ne tofo tofo dubo ruruse dubo jamaghae irivu!" aminge sisira.

## 10

*10:1-12 Iesu Erá Evetu Doyeore Dae Sise Ijugusira.*

*(Matthew 19:1-12; Luke 16:18)*

<sup>1</sup> Iesu reighi Kaponiam dodo Frovensi Judia aminda teredo uvu Jordan sémbiri, evetu genembo sekago fera numokena totoruguseri.

<sup>43-48</sup> **9:43-44:** Tuturo 9:48 da geka, "Ari ekoko mino mutari vasa aminda, jifa ava ninda tamonda irari, ni avaraka sukainghae tambuno aimi avirurari, ainda jokáda sifo ghousa evia iraresa." Baiboro (Bible) mendeni aminda geka emo umbu etodaba naká tambaresa, tuturo 44, 46, a 48 aminda. O mendeni aminda tuturo 48 avanembo irira. Avori, evetu genembo mendeni erekotera Mark, tuturo 44 nengae 46 jo gambaeri. Ava sedo ne Baiboro jovereghuse, gekaá jo gembae eraera.

Totorugetero, nu natofu ijugedo ghuseri, kau daba ava use sekago ijugusira.

<sup>2</sup> Ijugiri, Moses da Geka kaifa kakato+ mendeni fera, Iesu geka sembae sari ningari dae sedo, ategi useri, "Namondeda agho dari nange resi? Se ningore! Genembo nunda evetu imboe edo doyaeti, ai tefo?"

<sup>3</sup> Aminge setero, Iesu mino nemo-kena sisira, "Moses rea aovo dae sedo gefusi?" setiri,

<sup>4</sup> ne siseri, "Moses da sifoda emingedo ghuseri. Genembo nunda evetu imboe edo doyarira saetira amo, nu giti redae noaro doyaetira ava, gembu mutari noaro bu gosururari, ainda amboda noaro doyarira. Moses amingaoro dae sisira."

<sup>5</sup> Aminge setero, Iesu nemokena sisira, "Ne gogore a jiro fafakara ava sedo, Moses nu aminge gefusira.

<sup>6</sup> Avata tuturoda, God utu enda etiri sirorusira ainda sifoda, nu setiri, genembo evetughae siroruseri.

<sup>7-8</sup> God da Geka eminge resira:

'Aindae sedo, genembo noi numamo dodo evetu fitido, nengae tamo fisi dabako arera.'

aminge resira. Ava sedo, evetu genemboghae nenda irari, jo nunda nunda irari. Nenda irari dabakori.

<sup>9</sup> Aindae sedo, God setiri dabade tatisera amo, jo evetu genemboi vujegari da kaugo irari. Ava sedo, genembo noaro jo doyae arira!" nu Moses da Geka kaifa kakatokena+ aminge sisira.

<sup>10</sup> Setiri dadabetiri ainda amboda, kamboda teredo nunda ambo jimbi-imi geka daba ava sekago numokena ategi useri.

<sup>11</sup> Etero, Iesu minonda sisira, "Genembo eni noaro dodo, nu ya evetu eni fitarira amo, nu evetu giti ffitusira aikena dara arira. Ainda javo yagerari.

12 O evetu nuvu dodo genembo enikena vai arira amo, ainda javo barago yagerari,” aminge sisira.

*10:13-16 Iesu Sasingako Ava Esimbugusira.*

*(Matthew 19:13-15; Luke 18:15-17)*

13 Evetu genembo mendeni nenda sasingu ava, Iesu nunda ungoi esimbugare dae sedo, budo fuseri. Budo fera numokena buvero gido, Iesu da ambo jimbi ghoghora siseri.

14 Iesu ava gido, janje eko usira. Etiri, nemokena sisira, “Sasingako emo erama buregeove! Dovu, namokena furore! Ainda tuka mo: ne ivuga use nanda geka ningi tumonderaera. Mave amingarira amo, nu God da natofo+ arira.

15 Geka evia kotovo dae resena. Mave jo sasingako da kaugo ava ae arira, a kotugo God jo tumondae arira amo, nu God da natofo+ jo ae arira.”

16 Aminge sise, nu sasingu ovinembedo, ungo tamonda fiftuse, ne isambu esimbugusira.

*10:17-31 Kotofuko Eni Nunda Guguadae Ghamo Ruruse, Iesu Ighagha Usira.*

*(Matthew 19:16-30; Luke 18:18-30)*

17 Iesu yari dae iri, genembo eni numokena sumbu buvudo kauboi dadarigedo bainghusira. Bainghedo, numokena ategi usira, “Ni ijuga kato evevari. Ava sedo, se ningone! Na rejo ava edo, jebuga evovodae irari ava tambareni?” aminge setiri,

18 Iesu sisira, “Ni redae nandae ‘eveva’ resesi? God nusuka numoá evevari.

19 God da Agho Dari ni kasama eresa:

‘Erama komana deóvo ambeure!  
Erama yagera eove! Erama bagia eove!

Erama komana dedeuse gungubo seove!  
Erama komana dedeuse, nunda roera baetira ava, saghimbe beove!

Nei nimamo kakara use, nenda geka ningido ghevu!’ ”

20 Iesu aminge setiri, genemboá mino numokena sisira, “Na siroredo gimasada irise, agho dari resesa ava kaifa udo refuana genembo eteni.”

21 Setiri, Iesu nu fuge gosuse dubo ruruse sisira, “Dabako jo ae iresa. Ninda gugua a roera isambu oriro edo, ainda moni budo makasi embokena ghasaresa. Ghasedo, ni furaso namonde dabade deinghaore! Amingaresa amo, ni amboda ya gugua evevago utuda baresa.”

22 Aminge setiri, kotofuá dombu jovereghedo dubo memaghae, Iesu dodo isira. Ainda beká mo: genembo ainda gugua mo jo daba etoto iraeri.

23 Genembo iri, Iesu jovereghe nunda ambo jimbi fuge gosuse sisira, “Evetu genembo susu iti fafode amo, foa God da natofo+ arikena fakarago bekári,” aminge setiri,

24 nunda ambo jimbi nunda geka ava ningido dudukughuseri. Dudukughetero gido, Iesu nu sekago nemokena sisira, “Arie, nanda sasingu! God da natofo+ ari mo fakaragori.

25 Sino fuka, javo kamero (camel), ava kote givu! Nu jo totoi ningu toka aminda tere ya sovenikena buvae arira. Avata nu aminda tere yari amo, raugakori. O evetu genembo guguade aimi God da natofo+ ari dae sarera amo, fakarago bekári!” Iesu aminge sisira.

26 Setiri ningido, ne dudukughedo bunise ategi useri, “Aminge saresa amo, God da natofo+ mave ari?”

27 Ava setero, Iesu nemoá tataseguse sisira, “Amo jo, evetu genembo endada irera ainda ari da kaugo iraeri. Ne jo totofo nenda fakinaimi, God da natofo+ ae arera. Avata God mo inonori. Nune roera isambu ari sirorarira,” aminge sisira.

28 Setiri, Peter tuturo edo Iesu kena sisira, “Kote gi! Namane nindae sedo, namanenda kambo a roera isambu dodo, namonde dabade deingheraera,” aminge sisira.

29-30 Setiri, Iesu minonda sisira, “Na geka beká nemokena resena.

Mave nandae sedo, nunda kambo, nunda nano namendi, nunda ghaghasovu, nunda noi numamo, nunda sasingu, o nunda enda doyarira amo, natofo a roera resena emo, aminga ava siroruse digutururari, nu enda eminda irise barira. Avata kotugo, natofo a roera setena ainghae dabade, nu dara a mema mindafugo tafuse itatamarira. Aminguse, nu jebuga evovoda irari ábarago sifo amboda tuye barira.

<sup>31</sup> Avata mendeni oroko kokotofu edo irera amo, ne sifo amboda vose sabua edo irarera. O mendeni oroko sabua edo irera amo, ne sifo amboda viti kokotofu edo irarera,” aminge sisira.

*10:32-34 Iesu Nunda Ambari Da Geka Ava, Sekago Sisira.*

*(Matthew 20:17-19; Luke 18:31-34)*

<sup>32</sup> Iesu nunda ambo jimbide dabade, Jerusalem aminda yari dae vitera, emboro soroda buvurutusira amo, Iesu nu giti iri, ne amboda ise, nunda ambo jimbi manamana useri. A evetu genembo mendeni amboda isera amo, ne oju useri. Amingetero, Iesu nunda ambo jimbi 12 ava budo esike era, numokena amboda reju sirorarira ava, sekago ijugusira.

<sup>33</sup> Ijuguse sisira, “Ningivu! Namonde reighi Jerusalem yari dae viti refera. Reighi ominda, evetu genembo mendeniimi Evetu Genembo da Koro+ sandi bundedo, fristi+ da kokotofu a Moses da Geka ijuga kakato+ da ungodá fitarera. Fitoro budo, namonde Israel embo da gitofukena mutarera.

<sup>34</sup> Mutoro, bu dere jise, nundae kosisiva edo ambíimi de bu yama daoro ambarira. Ambudo, sifo etodaba naká dadabari ainda amboda, nu sekago ambarida ghe, jebugedo erarira,” ava ijugusira.

*10:35-45 James Nengae John Ghae, Iesu Kena Era Benunu Siseri.*

*(Matthew 20:20-28)*

<sup>35</sup> Ainda amboda, Zebedee da sasingu, James nengae John ghae,

fera numokena buvudo siseri, “Ijuga Kato, ni namane rea uju erera ava, aso dae resera,” aminge setero,

<sup>36</sup> Iesu nemokena sisira, “Na nendae rea aono dae resevu?”

<sup>37</sup> Aminge setiri, ne siseri, “Ninda usasaghae furaresa ainda sifoda, saso namane ninda giti jighari use, eni ninda ungo gimandukena anumbaeti, a eni ninda ungo umbefukena anumbaeti,” aminge siseri.

<sup>38</sup> Setero, Iesu nu nange ambaetira ava kotise, nemokena sisira, “Ne rea benunu reseva ava, ne jo kasama use sae ereva. Ne erekoteva, na agha, Afa mutari bu fumbu rise, mema itatamarena aminga ava areva, ai? O gitofuimi bouvu a mema namokena mutarera aminga ava fumbareva, ai? Namu bafataito fakarago arera aminga ava, bafataito aoro itatamareva, ai? Amo, na nange nange mema itatamuse ambarena, aminga ava areva, ai?” aminge sisira.

<sup>39</sup> Setiri, ne siseri, “Ai, namane aoro inono arira,” setero, Iesu nemokena sisira, “Resevare! Ne agha nane fumbu rise mema itatamarena ava budo, kau daba aminga ava areva. A na nange bafataito arera amo, kau daba aminga ava, ne bafataito aoro itatamareva.

<sup>40</sup> Avata, mave nanda ungo gimandukena a umbefukena anumbarira ava, jo nane gategari da kaugo iraeri. God Afa mavejoá gategedo simbugetiri irera amo, ne aminda anumbarera,” Iesu aminge sisira.

<sup>41</sup> Setiri, Iesu da ambo jimbi mendeni ghabu sovenisoveni aimi James nengae John ghae da geka ava ningido, janje ekoko useri.

<sup>42</sup> Etero, Iesu ne isambu kori setiri, fera numokena totorugetero sisira, “Nenda gitofu da kokotofu a babojegari mendeni fakina kakatori. Ne kovionoghae seoro, evetu genembo nenda sari avanembo ningido, ava eraera.

<sup>43</sup> Avata ne jo amingae areva. Mave nenda jokáda bajari ari da sarira amo, ne isambu nune sonembarira.

<sup>44</sup> A mave nenda giti jighari dae sarira amo, nu tofo sabua da ari ava use, ne isasambu nune kaifa arira.

<sup>45</sup> Aında susu mo: Evetu Genembo da Koro+ evetu genembo sonembuse nenda ari ekoko da mino futuse, ambari dae sedo fusira. Jo evetu genembo numoá sonembaoro dae sedo furaeri. Ava sedo, ne kau namongo ava areva,” Iesu aminge sisira.

*10:46-52 Iesu Setiri, Genembo Eni Diti Digoide Javo Bartimaeus, Diti Afigetiri Gosusira.*

*(Matthew 9:27-31; 20:29-34; Luke 18:35-43)*

<sup>46</sup> Setiri dadabetiri, emboroda ise Iesu nunda ambo jimbide dabade reighi Jericho buvu teredo jokáda ero, evetu genembo natofogoi fera nemonde dabade iseri. Era, reighi do buvari dae use, Timaeus da mandi javo Bartimaeus diti digoide amo, nunda bayau ombari dae sedo, monidae benunu sise, emboro den-gesida anumbiriri tafuseri.

<sup>47</sup> Nu aminda anumbirise, Nasareth embo genembo javo Iesu fira utua iri, ava setero ningido, nu tuturo edo koko sise sedo ghusira, “Arie, Iesu! Kini (King) David da Mandi God mutari sisira amo, nimori! Ava sedo, na joka eyo!” aminge siri,

<sup>48</sup> evetu genembo digari nu beka doyare dae sedo bureguseri. Buregusera avata, nu jo itako doyaeri. Numo koko sise sekago kori sisira, “Kini (King) David da Mandi God mutari sisira amo, nimori! Ava sedo, na joka eyo!”

<sup>49</sup> Aminge setiri ningido, Iesu fetedo sisira, “Sevu furari gaone!” setiri, ne genembo diti digoide aikena kori sise siseri, “Dubo jam-ghae ere! Iesu ni furaso dae resira,” aminge setero,

<sup>50</sup> Bartimaeus nunda tamo asugari ava kosughe fuggedo jaunghe eredo Iesu kena isira.

<sup>51</sup> Ira buviri, Iesu numokena sisira, “Na rea aono dae uju eresi?” setiri, genembo diti digoideá sisira, “Ijuga

Kato, saso nanda diti afigari sifo sevo gaeteni!” aminge setiri,

<sup>52</sup> Iesu sisira, “Yasi! Ninda tumondariimi jebudgetesi!” aminge siri ainghae dabade, diti anakora afigetiri, nu Iesu da amboda isira.

## 11

*11:1-11 Evetu Genembo Nati Joká Dorero, Iesu Ira Jerusalem Teterusira. (Matthew 21:1-11; Luke 19:28-40; John 12:12-19)*

<sup>1</sup> Iesu nunda ambo jimbide dabade era reighi Jerusalem utua use, reighi Betfeij nengae Bethany ghae aminda buvurutuseri. Betfeij nengae Bethany ghae resena emo, nu enda jiro fumbari javo Orivi seraera, aında ganasa ifudari.

<sup>2</sup> Buvudo, nunda ambo jimbi etoto naká gatededo diriguse nemokena sisira, “Reighi omo eregoseva? Ominda ya buvudo, donki (donkey) da mandi eni buri edo dighero fetirira, ava tambareva. Donki (donkey) resena emo, mave jo viti aminda anumbe deinghae irira. Ava vujege bu furovo dae resena.

<sup>3</sup> Vujegururovo, mave nemokena bureguse, ‘Redae vujegererevu!’ sarira amo, eminge sevu, ‘Bajari nu uju erira. Itako deinghari dadabari, oroko bu foa eminda fitarera,’ aminge sevu!”

<sup>4</sup> Setiri ne era, donki (donkey) buri edo dighero emboro isaghada fetiriri, ava tambudo vujeguseri.

<sup>5</sup> Vujegero, evetu genembo aminda fetiriseri aimi siseri, “Ne donki (donkey) redae vujegererevu?”

<sup>6</sup> Aminge setero, Iesu nemokena rea sisira ava setero ningido, “avori” setero, donki budo iseri.

<sup>7</sup> Donki Iesu kena bu fera buvudo, nenda tamo asugari kosedo, javureghe donki da gukada asugetero, Iesu viti anumbusira.

<sup>8</sup> Anumbedo javi edo iri, natofo digari nenda tamo asugari ava kosedo emboroda dudo ero, nu aında etoda fetedo isira. A mendeni era, vare

jokáda ika igi gafugedo bu fera, numoá kakara ari dae, emboroda dudo ero ainda etoda isira.

<sup>9-10</sup> Evetu genembo giti fete isera, a mendeni ambo gaedo fusera aimi, koko sise a nati joká doruse eminge siseri, “Orokaiva! Orokaiva! David da Mandi, God mutari sisira amo, nimori! Buvurutesare! Bajari da javoda refira andae, sakai saore! Orokaiva!” aminge koko sise nati joká doruse iseri.

<sup>11</sup> Aminguse, reighi Jerusalem aminda era teredo, Iesu ira God da kambo+ aminda teterusira. Teredo indiro iri, ungobu etiri gido, nu do buvudo, nunda ambo jimbi 12 ainde dabade jovereghe reighi Bethany aminda iseri.

*11:12-14 Iesu Ika Kayuyudae Simbora Usira.*

*(Matthew 21:18-19)*

<sup>12</sup> Ne sifoghae eredo, reighi Bethany dodo ise, Iesu nu emboro soroda ighoi usira.

<sup>13</sup> Edo, nu diti fuge ika kayuyu igighae itako soka fetiriri gosusira. Iesu nu, igi yaughiri gido, beká tambari dae sedo isira. Ira buvurutusira amo, jo jighae iriri ava gosusira. Ainda beká mo: beká jighari da sifo jo foa buvaeri.

<sup>14</sup> Avori, beká jo tambae edo, Iesu ika aikená sisira, “Mave jo amboda foa ninda beká tambu mindae arira,” aminge siri, nunda ambo jimbi nininguseri.

*11:15-19 Iesu Ira God Da Kam-boda+ Teredo, Ghoghora Sise Natofo Ondisira.*

*(Matthew 21:12-17; Luke 19:45-48; John 2:13-22)*

<sup>15</sup> Ningero dadabetiri, ne era Jerusalem aminda buvurutuseri. Buvudo era, God da kambo+ aminda teredo, Iesu nu, evetu genembo oriro use, a ofuse irisera<sup>15</sup> ava, isambu ondiri buvurutuseri. A gegenembo moni oriro edo ghusera, ainda ghagha isambu jighi jovereghusira, a gegenembo rika ribo oriro edo moni

budo ghusera, nenda avo anumba ábarago jighi rokombusira.

<sup>16</sup> Ainghae dabade, erama evetu genembo tofofo nenda roera eni fumbu God da Kambo+ jokáda tere sembi yeore dae buregusira.

<sup>17</sup> Aminguse, nu nemokena dengoro induduse sisira, “God setiri nunda geke jokáda geke eni gembero irira amo eviri:

‘Nanda kambo mo, evetu genembo isambu endada irera, nenda banungari da kambori.’

God aminge sisira. Avata ne teredo amingevo, kambo emo kau tafasara kakato da dobo a beku da kau avaga edo irira,”

<sup>18</sup> Aminge setiri, fristi+ da kokotofu a Moses da Geka ijuga kakato+ ava ningido, numo daoro ambare dae sedo, tuturo edo emboro kakova useri. Evetu genembo isambu nunda ijuga ningido dudukghusera andae sedo, ne nundae oju useri.

<sup>19</sup> Avori, tumba jiriri, Iesu nunda ambo jimbide dabade reighi dotutuseri.

*11:20-26 Ika Kayuyu Da Ijugari.*

*(Matthew 6:14-15; 21:20-22; John 14:13-14)*

<sup>20</sup> Sifo ataeghae beká, ne emboroda ise, ika kayuyu Iesu simbora usira ava gosuseri. Ikaá avi gharasa edo vose besisighae dabade avisira ava gido,

<sup>21</sup> Peter nu, Iesu rea usira ava kotise, Iesu kena sisira, “Ijuga Kato, gi! Ika kayuyu nine sife simbora umutasa, gharasa edo avi dadabedo fetirira!” aminge setiri,

<sup>22</sup> Iesu nemokena sisira, “Na geke beká nemokena resena! God tumondevu!

<sup>23</sup> Mave nunda dubo jokái tumonde gogoghombuse, ‘Na rea sarena amo, sirorarira,’ kotarira amo, God nu sonembari sirorarira. A gido, mave tumonduse doriri ovia gosuse, ‘Darige yasi, evada tifughase!’ sarira amo, God

<sup>15</sup> 11:15: Afige, Matthew 21:12 ainda duruda tege garesa.



sonembari, doriri omo ya evada tifugharira.

<sup>24</sup> Ava sedo, na eminge resena: ne God tumonduse rejodae benunu sise banungareva amo, ava sirorari bareva.

<sup>25</sup> A eni mo: ne rejodae banunguse, mave nemokena dara eni usira, ava kotareva amo, ne daba aminda, nenda komana da ari ekoá kote do-yareva. Ainda susu mo: amin-gareva amo, Nimamo utuda irira, numbarago nenda ari ekoko kote do-yarira.

<sup>26</sup> O ne komana da ari ekoko jo kote doyae areva amo, Nimamo utuda irira ábarago, nenda ari ekoko jo kote doyae arira,” aminge sisira.<sup>26</sup>

*11:27-33 Iesu Nu Maveda Javoda Saramana Edo Ghusira, Aindae Ategi Useri.*

*(Matthew 21:23-27; Luke 20:1-8)*

<sup>27</sup> Setiri dadabetiri, ne era reighi Jerusalem aminda sekago teteruseri. Teredo, nu ira God da Kambo+ aminda buvudo tere aminda de-inghiri, fristi+ da kokotofu, Moses da geka ijuga kakato+, a evetu genembo da babojegari, nemonde dabade fera numokena buvurutuseri.

<sup>28</sup> Buvudo siseri, “Se ningore! Mave setiri ni saramana emo eresi? Ni maveda javoda geka emo vironu resesi?”

<sup>29</sup> Aminge setero, Iesu nemokena sisira, “Na nemokena ategi dabako arena. Einda mino sareva amo, na maveda javoda ojena amo, isagha saono ningareva.

<sup>30</sup> Sevu ningone! John Bafataito Ari Kato, maveda javoda evetu genembo bafataito edo ghusi, evetu genembo da javoda ai, God da javoda?” aminge sisira.

<sup>31</sup> Setiri, ne tofo tofo beisiga use, se nininguseri, “Namonde kau nange nange sareri? Namonde, ‘God da javoda bafataito edo ghusira,’ sarera amo, nu, ‘Ne redae John jo tumondae usevu?’ sarira.

<sup>32</sup> O kotugo, namonde, ‘Evetu genembo da javoda bafataito edo ghusira,’ sarera amo, avose natofo namondedae nange areri?” aminge siseri. Ainda tuka mo: evetu genembo isambu kotisera amo, ‘John nu God da feroveta eniri,’ Ava sedo, fristi+ da kokotofu, Moses da geka ijuga kakato+, a evetu genembo da babojegari, erama evetu genembo ne deore dae sise oju edo, Iesu ategi usira da mino sari buniseri.

<sup>33</sup> Bunise, Iesu kena siseri, “Naname erebunera,” aminge setero, Iesu sisira, “Avori, nambarago maveda javoda saramana eraena, nemokena jo saono ningae areva,” aminge sisira.

## 12

*12:1-12 Vare Kaifa Kakato Da Kasiari.*

*(Matthew 21:33-46; Luke 20:9-19)*

<sup>1</sup> Aminge sedo, Iesu tuturo edo nemokena kasiaimi sisira, “Kasia eni ningovo dae resena. Genembo eni aira vare simbugedo vaini da asi ava govetira. Govedo, furu dighi birurughetira. Ainda amboda, nu asi vuji da muka ava simbari vosari bari dae sedo, bako ghambira. Ghambudo, kaifa kakato da vasa iti vitira. Itiri dadabetiri, nunda vare amo evetu genembo mendeni saramana use moni futururoro bari dae sedo, mutira. Evetu genembo aimi, vare ava kaifa ero, nu reighi eninda aira.

<sup>2</sup> Avori, asi vuji bambari da sifo buviri gido, vare numamoá nunda saramana kato eni dirigitiri, vare da kaifa kakatokena aira.

<sup>3</sup> Aira buviri, vare kaifa kakato ne saramana kato aikena roera eni jo mutae, nu sandi dedo ondero jovereghe aira.

<sup>4</sup> Amingetero gido, vare numamo sekago, nunda saramana kato eni dirigitiri aira buviri, vare kaifa kakato numbarago doruse jiroda je

<sup>26</sup> **11:26:** Tuturo 26 da geka, Baiboro (Bible) mendeni ainda jokáda fitero irira. O Baiboro mendeni ainda jokáda jo fitero teraeri.

basetero ororo buvurutiri, nu dere jise avoda doruseri.

<sup>5</sup> Amingetero ainda amboda, vare numamo nunda saramana kato eni dirigetiri aira buvira. Buviri, ne numoá detero ambira. Aminguse irero, vare numamo nunda saramana kakato mendeni mendeni dirigeari ya ghedo gheteri. Ya buveoro gido, vare kaifa kakato nunda saramana kakato mendeni dedo ondido gheteri, mendeni deoro ambudo gheteri.

<sup>6</sup> Amboda beká mo, vare numamo tofo nunda mandi nusukako fetetira. Fetedo iriri, numamo nu dubo bu gogoghombedo, numoá diriguse eminge kotetira, 'Avose, nanda mandiva kakara arera tanojo,' aminge kotise, nunda mandi ava dirigetiri aira.

<sup>7</sup> Avata vare kaifa kakato ne numoá gosuse, tofo tofo se ningeri, 'Mandi omo, vare ainda numamo da mandiri. Amboda vare emo, nune barira. Ava sedo fuvu, namonde nu daoro ambari, vare emo namondeda tofodae baore!' aminge se ningido,

<sup>8</sup> ne eredo, mandi amo vare jokáda sandi detero ambiri, nunda tamo jumbu budo aera buvudo, vare isaghakena fugeteri.

<sup>9</sup> "Avori, kote givu! Vare numamoá nange ari? Saono ningove! Nu foama vare kaifa kakato ava dari amboro, vare amo budo evetu genembo mendeni kaifa aoro dae sedo mutarira," Iesu aminge sisira.

<sup>10</sup> Aminge sedo, nu tofo numoá ijuguse, kasia da tuka ijugari dae use sisira, "God da Geka emo tegutusevu tanojo:

'Ghamana eni, kambo itari kakato imboe edo fugutusera ava, Bajari nune budo tutumbidae sedo fiti simbugedo, aminda tuturo edo, nunda kambo itari dae erira.

<sup>11</sup> Emo Bajari da ariri. Namane gido dudukugherera,' God da Geka amo tegutusevu, ai?" Iesu aminge sisira.

<sup>12</sup> Setiri ningido, fristi+ da kokotofu, Moses da geka ijuga kakato+, a evetu genembo da babojegari, ne Iesu sandi bundari dae kotiseri. Ainda beká mo: ne kasama useri, Iesu nendae sedo vare da kasia omo sisira. Nu sandaetera avata, ne natofu da kotari andae oju edo, nu dodo iseri.

*12:13-17 Iesu Dederuse, Ne Takesi Ombari Da Susu Aindae Ategi Useri.*

*(Matthew 22:15-22; Luke 20:20-26)*

<sup>13</sup> Isera ainda amboda ne, Moses da Geka kaifa kakato+ mendeni Herod da ambo jimbi mendeninde dabade ava dirigetero, Iesu derari dae iseri. Nenda uju beká mo: Iesu geka sembae sirurari ningido, nu bu koto ari dae uju useri.

<sup>14</sup> Aindae era Iesu kena siseri, "Ijuga Kato, namane kasama erera, ni geka beká avanembo sifo ghousa ijugeraesa. Ni evetu genembo da kotari amo jo oju ae use, God da uju avanembo ijugeraesa. Ava sedo, se ningore! Namondeda Agho Dari nange resi? Namondeda gitofu Rome embo da kotofukena takesi ombarera, ai tefo? Ava se ningore!"

<sup>15</sup> Aminge setero, ne numo derari dae kotido fusera ava kasama edo, Iesu nemokena sisira, "Ne gungubo kakatori! Ne redae na dedererevu?<sup>15</sup> Moni eni budo fuvu gaoneta!" setiri,

<sup>16</sup> ne moni dabako budo fera ijuguseri. Ijugetero gido, Iesu ategi usira, "Moni+ tamonda, dangio a javo emo, mavedari?" aminge setiri, ne siseri, "Rome embo da kotofu, namonde Caesar seraera, nundari."

<sup>17</sup> Setero, Iesu nemokena sisira, "Avori, Caesar da tofo amo, Caesar dae mutuvu bare! A God da tofo amo, God dae mutuvu bare!" aminge setiri, ne ningido buniseri.

<sup>15</sup> 12:15: Afige, Matthew 22:18 ainda duruda tege garesa.

*12:18-27 Ambarida Ghe Jebuge Erari Mo, Kau Mavegori?*

*(Matthew 22:23-33; Luke 20:27-40)*

<sup>18</sup> Jusi embo da mendeni ain-dae, Sadusi embo+ seraera. Sadusi embo+ resena emo, nenda kotari: ambari embo jo sekago jebugedo erae arera. Avori, Sadusi embo+ mendeni Iesu kena fera buvudo ategi useri,

<sup>19</sup> “Ijuga Kato, God setiri, Moses nu namondeda Agho Dari emo gefusira: ‘Genembo mave evetu fitari, mandi sasingu jo sirorae iroro, gen-emboá ambari nunda rori irarira amo, nunda ambo bego eniimi, roriá fitarira. Genembo ambududurusira, ainda veka sirorare dae sedo, amingarira.’

<sup>20</sup> “Avori, kiki eni sari dae erera. Ningi! Vide jamena isambu 7 ava siroredo iriari. Bego mo, nu evetu fifitusira ava, sasingu eni jo sirorae irero, nu ambududurusira.

<sup>21</sup> Ambiri, rori amo nunda diroruimi fifitusira. Fifitusira ava, sasingu eni jo sirorae irero, nu ambududurusira.

<sup>22</sup> Aminguse, fifitero refara, ambo nemboi bu fitido ireira ambududurusira. Ainda amboda beká, roriá ambududurusira.

<sup>23</sup> “Amboda evetu genembo isambu jebuge erariá, seraesa. Avori, se ningore! Gegenembo isambu 7 aimi evetuá fifituseri. Ava sedo, iria edo, erari da sifoda, evetuá maveda evetu ari? Bego aindari, o ambo aindari, ai maveda evetu ari? Ava se ningore!”

<sup>24</sup> Aminge setero, Iesu nemokena sisira, “Ne sembae beká ava erekoteva. Ainda tuka mo: ne God da Geka rea resira, a God da fakina ava, ne erebuneva.

<sup>25</sup> Evetu genembo ambarida ghe jebuge erarera ainda sifo aminda, ne kau aneya da kau aminga ava irise, genembo evetu jo fitae arira, a evetu genembokena jo vai ae arira.

<sup>26</sup> “Kotugo, ambari embo ambarida ghe jebugedo erarera, ainda

geka eni sari dae erena. Ningivu! Ne God da Geka Moses da buku jokáda irira, a tegutusevu, ai? Ika orobu veveyako ainda jokáda avaraka gambudo bubura iri Moses gosusira amo, God nu Moses da nombuamane anakora sirivo usera aindae, geka evia Moses kena setiri nunda bukuda gefusira:

‘God, nembuamane, Abraham, Isaac, a Jacob anakora endada irise tumonduse iriara, a kotugo oroko tumonduse irera amo, namori.’

God aminge sisira aindae, namonde kasama erera: ambari embo mo jo amboro dadabaeri.

<sup>27</sup> Ava sedo evetu genembo isambu, ambari embo a jebuga embo isasambu, God da dombuda jebuga irera. Ava sedo, ambari embo jo jebugedo erae ariá koteraeva amo, ne sembae koteraeva,” Iesu aminge sisira.

*12:28-34 Agho Dari Mindafugo Beká Mo, Eviri.*

*(Matthew 22:34-40; Luke 10:25-28)*

<sup>28</sup> Moses da Geka ijuga kato+ eni fira buvudo, ne geka se niningero, ava niningsira. Iesu nemokena mino eveva beká sisira ava ningido, nu Iesu kena ategi usira, “God da Agho Dari jokáda, geka mindafu beká mo, ningiavori?” sisira.

<sup>29-30</sup> Setiri, Iesu mino sisira, “Mindafu beká mo eviri:

‘Israel embo, nemokena resena, ningivu!

Bajari God nusuka numoá namondeda Bajariri.

Namondeda Bajari God kena ninda dubo, fakina, a kotari isasambuimi futuse, nusuka numoá dubo bu gogoghombaresa!’

<sup>31</sup> Agho Dari teria setena, ainda kaugo eni mo eviri:

‘Ni tofo dubo buraesa, kau daba aminga ava, ninda komana barago dubo baresa!’

Agho Dari etoto resena emo, mindafu bekári, mendeni mo veveyakori,” aminge sisira.

<sup>32</sup> Setiri, Moses da Geka ijuga kakatoimi sisira, “Ijuga Kato, ni geka se gogoghombetesi! ‘God nu dabakori, eni tefori.’ A nu geka bekári. A kotugo, ‘namonde dubo, fakina, a kotari isasambuimi futuse, nu dubo bu gogoghombarerera,’ a ‘namonde totofo dubo buraera, komana kau daba ava dubo barera,’ amo, mindafu bekári.

<sup>33</sup> O God kena banunguse, nunda sedo, namondeda sino fuka isambu de dungoro avatira amo, ijoghakori,” aminge sisira.

<sup>34</sup> Nu dubo kotise geka amo sisira, ava gido, Iesu numokena sisira, “Ni God kena aesa utua etesi!”

Ainda amboda, mave numokena sekago ategi ari oju useri.

*12:35-37 Keriso Mo, Mavejori, Ava Tofo Mandi Ijugusira.*

*(Matthew 22:41-46; Luke 20:41-44)*

<sup>35</sup> Iesu nu God da Kambo+ aminda ijuguse sisira, “Moses da Geka ijuga kakato+ ne seraera, ‘God evetu genembo sonembuse, Genembo eni mutari dae sisira amo, David da mandiri.’ Amo nange reseri? Kote givu!

<sup>36</sup> David nu tofo mandi, Asisi Kakara geka numokena siri ningido gefusira:

‘Bajari nu nanda Bajarikena sisira, “Fu, nanda ungo gimandukena anumbiraso, ninda gitofu ninda fakina ava gosuroro, ne de bundedo bu foama, ninda ata duruda fitono fafasaore!” ’

Bajari aminge setiri, David gefusira.

<sup>37</sup> Avari, genembo mo, nunda sasingu da bajariri. Mandi eni jo viti numamo da bajariri bae aeti. Ava sedo David, Genembo amboda furarira ava kotise, ‘Nu nanda Bajari,’ sisira amo, nu jo nunda mandi ava kotise saeri. Nu Genembo aindae igheghi use, nunda Bajari arira ava sise sisira. Ava sedo, geka Moses da

Geka ijuga kakatoimi seraera amo, jo inono iraeri,” aminge siri ningido, evetu genembo totorugusera amo, ne ivuga useri.

*12:38-40 Moses Da Geka Ijuga Kakato+ Dara Emingedo Ghuseri.*

*(Matthew 23:1-36; Luke 20:45-47)*

<sup>38</sup> Amingero, nu nemokena ijuguse sisira, “Moses da Geka ijuga kakato+ eminge resena. Nenda irari ava ijuje gi gogoghombevu! Ne eminger-aera. Natofoi nemoá sakai sise kakara aoro dae sedo, nenda tamo asugari koburu edo<sup>38</sup> deingheraera. Deinghudo ya ombari vasada buvurutororo gido, evetu genembo tumoi bainghedo, nemoá kakara use ategi e gogoghombaoro dae uju eraera.

<sup>39</sup> A nenda uju mo: ne kirumo a banungari dae use, totofo nenda fisi da uju ava kotise, anumbari vasa eveva vanembo gategeraera.

<sup>40</sup> Ne roriri dederuse, nenda kambo a gugua ava nenda tofodae ruruse, natofo nemoá gido sakai saore dae sise, ya God da Kamboda+ tere fetedo ghousago banungeraera. Avata God mo, nu aindae sedo sifo amboda nemokena mino eko beká ava mutarira,” aminge sisira.

*12:41-44 Rori Da Jobari.*

*(Luke 21:1-4)*

<sup>41</sup> Setiri dadabetiri, Iesu nu God da Kambo+ jokáda deinghedo ira, joba mutari da rooroá gido, nu sem-bira vasa sovenikena anumbusira. Anumbirise, evetu genembo fera moni fifitero gosusira. Evetu genembo guguae, moni teriagio bu fera fifitero gosusira.

<sup>42</sup> Ainda amboda, rori eni, makasi bekári, aimi fira moni+ ingigago veveyako beká etoto naká, ainda inono 10 toea da kaugo, ava fifitiri gosusira.

<sup>43</sup> Gido, Iesu kori setiri, nunda ambo jimbi fera buvu fetetero,

<sup>38</sup> **12:38:** Sifo aminda, evetu genembo digari ne totofo gegenembo kasama kakato a diti basari embo iririá sedo ghuseri. Avari, gegenembo resena, natofo tomanako nange ne totói gi kasama edo nemoá kakara aetera ava kotise, ne embo koburu edo deinghedo ghuseri. Ava sedo, Moses da Geka ijuga kakato+ nembargo amingedo ghuseri.

nemokena sisira, “Na nemokena geka beká resena. Rori eregoseva omo, nu makasi bekári. Avata nu joba fitira amo, teria bekári. Mendeni da mo, jo rori aimi fitira, ainghae inono iraeri.

<sup>44</sup> Ainda beká mo: mendenikena gugua tomanakori, avata ne itako fiteri. Rori omo, tefo bekári, avata nu isambu fitira,” aminge sisira.

## 13

*13:1-2 God Da Kambo+ Nange Bejarera, Ainda Geka Sisira.*

*(Matthew 10:17-22; 24:1-2; Luke 21:5-6)*

<sup>1</sup> Iesu nu javi edo ira, God da Kamboda+ ghedo yari dae iri, nunda ambo jimbi eniimi Iesu kena sisira, “Ijuga Kato, God da Kambo+ evia fuge gi! Ghamana babai oimi budo, God da Kambo+, nunda vasa mendeni ainde dabade itutusera amo, evevago bekári! Eregosesa?”

<sup>2</sup> Aminge setiri, Iesu numokena sisira, “Ni ghamana babai evia gosuse resesa, ai? Na nimokena eminge resena. Gitofuimi foama kambo omo de bejoro, oinda ghamana aveverege vose dadabarira ainda amboda, ghamana eniko jo nunda vasa ireira, aminda jo irae arira,” aminge sisira.

*13:3-13 Enda Dadabururari, Tano Mendeni Sirorari Garera.*

*(Matthew 24:3-14; Luke 21:7-19)*

<sup>3</sup> Iesu nu enda jiro fumbari javo Orivi, aminda ira, God da Kambo+ sovenikena anumbiriri, Peter, James, John, a Andrew kikiako fera numokena ategi useri,

<sup>4</sup> “Ni God da Kambo+ bejarera, setesa amo, nanjigo areri? Ainda sifo ava namane nange kasama aeteri?”

<sup>5</sup> Aminge setero, Iesu sisira, “Diti gosuse kaifa evu! Erama, mave nemo dederuse gungubo sarera, ava tumondeove!

<sup>6</sup> Ainda tuka mo: evetu genembo digari foama gungubo sise, ‘Evetu Genembo da Koro+ namori,’ sise, natofo deroro nemoá tumondarera.

<sup>7</sup> Tataya ururoro ningareva, a soka beká isoro ururoro, ainda bino ava ningareva. A nu sirorarira avata, erá oju eove! Ainda beká mo: aminge siruroro ningareva, avata enda emo jo sifo aminda dadabae arira.

<sup>8</sup> Natofo mendeni mendeni a gavana mendeni mendeni eredo, tofo tofo isoro ururoro ningareva. Endada, dumo fururari baimara eko beká ava sirorurari itatamedo ghareva. Kau, evetu tamo bouvu edo iriama edo, mandi sasingu javi urureari mema itatameraira aminga ava, enda da mema sifo aminda tuturo arira.”

<sup>9</sup> “Diti gosuse, totofo kaifa evu! Ainda beká mo: evetu genembo mendeniimi foa, ne sandi budo yaoro, nenda dengoro indari kambo+ mendeni aminda terovo koto arera. Koto use, ne ambii daoro mema tambareva. Ne namo tumonderaeva aindae sedo, ne sandi bu yaoro, gavana a kini (kings) mendeni da dombuda fetovo koto arera. Koto ururoro, ne nanda Bino Eveva ava osa sirurovo, nenda natofode ningarera.

<sup>10</sup> Nanda Bino Eveva evia saovo enda da natofo isambu ningoro dadabari ainda amboda, enda emo dadabarira.

<sup>11</sup> Avori, ne koto ari da sifoda, geka rea sareva aindae, erá teria futo koteove! Ainda beká mo: sifo aminda, Asisi Kakara aimi ijugururari sareva. Ne totofo nenda kotari ava jo sae areva. Asisi Kakara aimi sonembururari nunda geka ava sareva.

<sup>12</sup> Sifo ava fururarira amo, gegenembo nenda jamena ava sandi mutoro daoro ambarera. Kau daba aminga ava, gegenembo nenda sasingu ava sandi mutoro daoro ambarera. A sasingu barago, noi numamo ava sandi mutoro daoro ambarera.

<sup>13</sup> Ne namoá tumonderaeva aindae sedo, evetu genembo isambu ne imboe arera. Avata mave fakina edo, namoá tumonduse jo ighagha ae iria ambarira amo, nu jebuga evovodae irari ava tuve barira,” Iesu aminge sisira.

**13:14-23 Sifo Eko Beká Sirorarira.**  
(*Matthew 24:15-22; Luke 21:20-24; 19:43-44; 17:31*)

<sup>14</sup> (Iesu da geka eregefena evia, mave teguterira amo, nu ningido kote simbugare dae sise resena.) Iesu eminge sisira, “Amboda, roera eko beká ava bu foa fitoro, God da Kambo+ joká<sup>14</sup> aminda fetirise, aimi bebeta arira. Ava bu foa fitoro fetirari, ne frovensi Judia eminda irise gareva amo, ne eredo sumbu yasivu doriri ominda jungove!

<sup>15</sup> Mave nunda ofoda<sup>15</sup> anumbirari, sifoá foa buvari garira amo, nu jo ere kambo jokáda, roera eni bari dae jo terae arira. Nu taká sumbarira.

<sup>16</sup> A mave vareda saramana ururari, sifoá foa buvarira amo, nu jo nunda tamo asugari bari dae sedo, jovereghe kamboda yae arira. Nu taká sumbarira.

<sup>17</sup> Mará! Na, evevetu mave sifo aminda tamo bouvu edo irarera, aindae dubo mema erena. Ainda beká mo: evevetu sifo aminda tamo bouvu edo irarera, o sasingu veveyako unduse ami futuse irarera amo, ne sumbari dae ató barago use, mema mindafugo ava itatamarera.

<sup>18</sup> God kena banungururuvu, erama dara resena evia, yaura teria da sifo aminda sireure!

<sup>19</sup> Ainda beká mo: mema a bouvu, sifo aminda sirorarira amo, teria bekári. God setiri enda sirorusira, ai tano ghedo ojira orokoé, aminga ava jo sirorae irira. Kotugo mema a bouvu resena emo, ainda amboda barago, jo sekago aminga ava sirorae arira.

<sup>20</sup> Avata jo ghousa irae arira. God setiri fetirira amo, eviri. Dara furarira amo, jo ghousa irae arira. Ghousago iratira amo, evetu genembo isambu sirivo aeteri. Avata God nunda natofo gategusira, nendae sise sari, dara furarira amo, jo ghousago irae arira.

<sup>21</sup> “Sifo aminda, mave nemokena, ‘God namondeda ari ekokodae Gen-

embo eni mutari sisira amo, eviri. Fuvu gaove!’ sarira. O, ‘Numo omindari. Yasivu gaove!’ sarira amo, erá tumondeove!

<sup>22</sup> Ainda beká mo: gegenembo mendeni eredo, foa gungubo sise, ‘Genembo eni God mutari sisira amo, namori,’ sarera. Nemo feroveta gungubo kakatode dabade foa, God da natofokena nange edo gido dederruroro, ‘bekáva’ sise, nemoá tumondaeteri. Aminguse, ne tano a ari mendeni mendeni ururoro, evetu genembo ne jo gae iriara ava, nenda gitida sirorurari garera.

<sup>23</sup> Ava sedo, diti gosuse totofo kaifa evu! Rea amboda sirorarira ava, jo sirorae iriri, orokoá seteno niningerevere.”

**13:24-27 Evetu Genembo Da Koro+ Sekago Jovereghe Furarira.**

(*Matthew 24:29-31; Luke 21:25-28*)

<sup>24-25</sup> “Dara setena dadabarira ainda amboda mo, utu da fakina raugo edo javi ururari, iji da usasa dadabururari, inua jo janimbae arira. A damana utuda dore vosarira.

<sup>26</sup> Ainda amboda, evetu genembo diti fainghedo, Evetu Genembo da Koro+ vose fururari garera. Nu foroga jokáda, fakina tomanako a usasaghae vose fururari garera.

<sup>27</sup> Gosururoro, Evetu Genembo da Koro+ nunda aneya dirigari, endada vose foa, iji vitarikena a vosarikena, kotugo foriforimanakena a yavatakena, aminda yama, nunda natofo gategusira, ava unumbe budo yarera.”

**13:28-31 Ika Kayuyu da Kasiari.**

(*Matthew 24:32-35; Luke 21:29-33*)

<sup>28</sup> “Ika kayuyu da ijugaboro ava kasama evu! Ika amo tuturo edo, tunó seka yaughururari gareva amo, ne kasama areva, ‘Borija da sifo buvira ava sedo, beká jighari da sifo utua erira.’

<sup>14</sup> **13:14:** Matthew 24:14 ainda duruda tege garesa! <sup>15</sup> **13:15:** Afige, geka Matthew 24:17 ainda duruda tege garesa.

<sup>29</sup> Kau daba aminga ava, roera setena ava sirorurari gareva amo, ne kasama areva, ‘Sifo utua iri, tuturo ari dae erira.’

<sup>30</sup> “Geka evia kotovo dae sise resena! Roera setena ava sirorurari, evetu genembo oroko siroredo endada irera, mendeni garera. Mendeni ambarera, avata mendeni jo ambae iroro sirorari garera.

<sup>31</sup> Utu a enda dadabarira, avata nanda geka jo dadabae arira, evovo-dae irarira,” Iesu aminge sisira.

*13:32-37 Iesu Furari Da Sifo Ava, God Nusuka Kasama Erira.*

*(Matthew 24:36-44; 25:13-14; Luke 21:36; 19:12-13; 12:40; 12:38)*

<sup>32</sup> Aminge sedo, sisira, “Avata Evetu Genembo da Koro+ nanjigo jovereghe furarira, ainda sifo amo, mave jo kasama aeri. Aneya ne jo kasama aeri, a God da Mandi barago, nu jo kasama aeri. God Afa nusukako kasama erira.

<sup>33</sup> Kaifa use irivu! Ainda beká mo: Evetu Genembo da Koro+ nanjigo jovereghe furarira ava, ne berefo bekári.

<sup>34</sup> Sifo amo kau emingori. Genembo eni esa yari dae kotetira. Kotedo, nunda saramana kakato aikena saramana nunda nunda ijugetira. Aminguse, nu guro kaifa katokena setira, ‘Namoá kaifa gigita use iri!

<sup>35</sup> Ainda susu mo: ni kambo numamo nanjigo jovereghe furarira ava, erebunesa. Nu ungobughae, tumba soroda, sifoghae, o isonga furarira ava, ni berefori.

<sup>36</sup> Ni aviruraso na jovereghe furarena amo, jo eveva iraeri! Ava sedo, kaifa e gogoghombe!’ aminge setira.

<sup>37</sup> A kambo numamoá nunda guro kaifa katokena geka rea sisira amo, na daba ava nemokena resena. A na rea nemokena resena emo, evetu genembo isambukena barago kau daba ava resena, ningivu! Namoá

kaifa gigita use irivu!” Iesu aminge sisira.

## 14

*14:1-2 Iesu Daoro Ambare Dae Sedo, Manaka Garuseri.*

*(Matthew 26:1-5; Luke 22:1-2; John 11:47-53)*

<sup>1</sup> Jarige Yari da Kirumo+ a Yisti Kanangara Ari da Kirumo+ jo ae irise, sifo etoto ainda gitida, fristi+ da kokotofu a Moses da Geka ijuga kakato+ tuturo edo, Iesu ufena sandi daoro ambare dae emboro kakova useri.

<sup>2</sup> Aminguse, eminge siseri, “Namonde Jarige Yari da Kirumo+ da sifo aminda, jo ae arera. Ainda tuka mo: amingarera amo, natofo tomanako kirumodae totorugarera aimi, janje ekoko edo titigho arera tanojo,” aminge siseri.

*14:3-9 Evetu Eni Fira, Usuimi Budo Iesu Da Jiroda Averegusira.*

*(Matthew 26:6-13; John 12:1-8)*

<sup>3</sup> Iesu nu ira, reighi Bethany aminda buvudo irise, genembo javo Simon Refero, ainda kamboda teterusira. Tere anumbedo bayau riri, evetu eni usu da muka javo nard<sup>3</sup> ava budo fira, Iesu kena teterusira. Botoro ghamana javo arabasta aimi usera, ainda jokáda usu ava vendero iriri budo fusira. Usu muka budo fusira amo, munonderi, a jo uvughae baingoro aeri; ava sedo nunda mino mo, teria bekári. Evetuá teredo ira, Iesu kena buvudo botoro jighi bejedo, usu nard aimi Iesu da jiroda averegusira.

<sup>4</sup> Averegetiri dadabetiri gido, evetu genembo mendeni aminda irisera aimi, janje ekoko edo, tofo tofo se nininguseri, “Usu omo nangedo soesa averegetiri dadabeti?”

<sup>5</sup> Omo budo oriro aetera amo, ainda moni+ K3,000 avaga mutoro budo, makasi embokena ghasaetera amo, avori,” aminge sise, evetu aikena ghoghora siseri.

<sup>3</sup> **14:3:** Roera eni mo: tamo foyago da gekaimi ‘nard’ o ‘spikenard’ seraera amo, vive eniri. Vive ava budo jasedo simbeoro muka voseraira. Ava budo, tamonda davari dae simbugedo ghuseri.

<sup>6</sup> Avata Iesu nemokena sisira, “Dovu, evetué amingare! Ne redae nu dombuda resevu? Nu namokena veka eveva etira.

<sup>7</sup> Eregoseva: makasi embo ne sifo ghousa nemonde dabade irá ghareva. Ava sedo, nemo sonembari sareva amo, sonembuse irareva. O namo, jo namonde dabade sifo ghousa irae arera.

<sup>8</sup> Averegetira emo, nanda tamo simbugedo bu furugarera, aindae sedo etira.

<sup>9</sup> Na geka beká resena! Ningivu! Nanda Bino Eveva reda ya buvari ningarera amo, evetué rea namokena etira ava, erá kotae eore dae sedo, vironu sise, nunda bino evia sise irarera,” aminge sisira.

*14:10-11 Judas Nu Ira, Gitofude Dabade Iesu Dari Dae, Manaka Garuseri.*

*(Matthew 26:14-16; Luke 22:3-6)*

<sup>10</sup> Setiri, nunda ambo jimbi 12 ainda jokáda, genembo eni, Keriot embo javo Judas aimi eredo, Iesu dere budo gitofu da ungodá fitari dae sedo, fristi+ da kokotofukena isira.

<sup>11</sup> Ira setiri ningido, ivuga edo, numokena moni mutari dae beka gagojuseri. Etero ningido, Judas nu tuturo edo, Iesu nange sandido nenda ungodá fitaetira, ainda emboro ava kakova usira.

*14:12-21 Iesu Nunda Ambo Jimbide Dabade, Jarige Yari Da Kirumo+ Ava Useri.*

*(Matthew 26:17-25; Luke 22:7-14,21-23; John 13:1,21-30)*

<sup>12</sup> Yisti (Yeast) Kanangara Ari da Kirumo+ ainda sifo kakara tuturo eari, sifi (sheep) da mamandi Jarige Yari da Kirumo+ aminda iti mindari dae sedo, de ojedo ghuseri. Sifo resena daba aminda, Iesu da ambo jimbi numokena ategi useri, “Namane vasa ningiaminda ya, Jarige Yari da Kirumo esimbugaoro dae uju eresi?” aminge siseri.

<sup>13</sup> Setero, nu nunda ambo jimbi etoto diriguse sisira, “Yasivu Jerusalem teredo, genembo eni okia

bu uvu dimbudo, fururari tambudo, nunda amboda yasivu!

<sup>14</sup> Nu reda ya terarira amo, vasa daba aminda yasivu teredo, kambo numamokena sevu, ‘Ijuga kato eminge setira, “Na vasa reda tere, nanda ambo jimbide dabade, Jarige Yari da Kirumo+ simbugedo mindareri?” ’ aminge sevu!

<sup>15</sup> Aminge saovo, nune ne bu ya kambo duruda, a dodo, viti vasa ikáda ijugari gareva. Vasa eveva mo aminda simbugetero irira, ava tambareva. Namondedae sedo, kirumo aminda simbugevu!”

<sup>16</sup> Aminge setiri ningido, nunda ambo jimbi etoto eredo era Jerusalem teteruseri. Teredo, roera isambu Iesu sisira, ava tambudo, Jarige Yari da Kirumo+ aminda simbuguseri.

<sup>17</sup> Simbugetero ungobu iri, Iesu nunda ambo jimbi 12 ainde dabade era teteruseri.

<sup>18</sup> Tere anumbedo, bayau rise Iesu nemokena sisira, “Na nemokena geka beká sari dae erena. Namonde bayau rerera ainda jokáda, genembo eni anumbirira aimi, namoá gitofukena aito arira.”

<sup>19</sup> Aminge setiri, namane dudukughedo, dubo mema use, nusuka nusuka se nininguse daba daba numokena ategi useri, “Ni mavedae resesi? Se ningore! Ni namokena resesa, ai?” aminge siseri.

<sup>20</sup> Setero, nu nemokena sisira, “Ne isambu 12 ava nane aghi usena ainda jokáda, genembo eni mave, nangae ungo dabade bayau sukada fati bu rerera amo, numori.

<sup>21</sup> God da Geka jokáda rea gembero irira amo, eviri:

‘Evetu Genembo da Koro ambarira!’ aminge gefuseri. A nu aminge siro-rarira. Avata, genembo mave aito ari ambarira amo, nu mema a bouvu teriago beká barira,” Iesu aminge sisira.

*14:22-26 Bajari Da Kirumori.*

*(Matthew 26:26-30; Luke 22:14-20; 1 Corinth Embokena 11:23-25)*



<sup>22</sup> Setiri dadabetiri, ne bayau rise, Iesu nu farava budo, God kena 'aiyakoe' sedo esimbugedo, jighi embebegedo nemokena ghasisira. Ghasisise sisira, "Emo nanda tamori. Bu mindivu!" aminge sedo,

<sup>23</sup> kotugo agha jighiri eretiri, God kena 'aiyakoe' sedo, nemokena mutiri ne isambu riseri.

<sup>24</sup> Mindido, Iesu sisira, "Emo nanda ororori. Nanda ororoimi, God numokena ya buvari da emboro+seka, afigari dae erira. Evetu genembo digari da jebugadae sedo, nanda ororo averegaono vosedo, emboro+ afigarira.

<sup>25</sup> Na nemokena geka beká resena! Na vaini (wine) jo mindae irono, God sari nunda natofo+ nunda vasa aminda ya terarera da sifo aminda, na vaini (wine) sekago aminda mindarena."

<sup>26</sup> Iesu aminge setiri dadabetiri, ne eredo yaru eni divudo, kamboá dodo enda jiro fumbari javo Orivi, aminda iseri.

*14:27-31 Peter Iesu Ighagha Arira Ava, Iesu Nu Giti Osa Sisira.*

*(Matthew 26:31-35; Luke 22:31-34; John 13:36-38)*

<sup>27</sup> Aminda ise, Iesu nemokena sisira, "Ne isambu na do sumbareva. God da Geka jokáda, rea aindae sedo gembero irira amo eviri:

'God nu, sifi (sheep) kaifa kato dari ambari gido, sifi sarigedo nunda nunda sumbarera,' God da Geka aminge resira.

<sup>28</sup> Avata kotugo, God sari, na ambarida ghe jebugedo erarena ainda amboda, na ya frovensi Galilee aminda buvuruturono, ne amboda furareva."

<sup>29</sup> Aminge setiri, Peter numokena sisira, "Bajari, ninda mendenii ni ighagha edo doyarera tanojo. Avata namo, ni itako jo doyae arena," Peter aminge sisira.

<sup>30</sup> Setiri, Iesu numokena sisira, "Na nimokena geka beká resena! Oroko tumbaghae, kokora umbu etoto naká

sifo jo karigae irari, ni na umbu etodaba naká ighagha aresa," aminge sisira.

<sup>31</sup> Setiri, Peter nu kovionoghae sisira, "Na ni jo ighagha ae beká arena! Na nangae dabade ambarera amo, avori!" aminge sisira. Kotugo, nunda ambo jimbi isambu, ne geka daba ava siseri.

*14:32-42 Iesu Ira Reighi Javo Getsemani Aminda Buvudo, Vare Jokáda Banungusira.*

*(Matthew 26:36-46; Luke 22:39-46)*

<sup>32</sup> Iesu nunda ambo jimbide dabade era, reighi javo Getsemani aminda buvudo, nu nemokena sisira, "Ne eminda anumbirovo, na ya ominda banungarena."

<sup>33</sup> Aminge sedo, nu Peter, James, a John ava budo, nemonde era vasa esike fetedo, Iesu nu dubo mema ambari eko ava usira.

<sup>34</sup> Etiri, nemokena sisira, "Nanda dubo jokáda, bouvu mindafu beká ava erefufena. Fufuse, na ambududurerena. Ne diti fakara edo, eminda fetedo namo kaifa ururuvu!"

<sup>35</sup> Aminge sedo, ne dodo itako ira dombui du fasedo, nu nange mema da sifo ovia darigaetira, aindae banungusira.

<sup>36</sup> Banunguse sisira, "Arie, Afako! Emo, isambu nine ari da kaugori! Mema teria namokena refira evia, saso darigaeti! Avata jo nanda uju ava ae arena, ninda uju ava arena."

<sup>37</sup> Aminge sedo, nu ere jovereghedo, nunda ambo jimbikena ira buvudo, ne fafase avéro tafusira. Tambudo, nu Peter kena sisira, "Simon, fairesa, ai ravesa? Ni redae sifo tufako jo diti fakara edo, na itako kaifa aeri?"

<sup>38</sup> Aminge sedo, nemokena sisira, "Erá Satan foa nemo dereuri ari eko eove dae sise, diti fakara edo banungevu! Nenda uju a kotari namokenari. Avata nenda tamo imboe edo, diti bouvu etiri, ne fakina jo ae ereva."

<sup>39</sup> Aminge sedo, nu jovereghe ira banunguse, geka daba ava sisira.

<sup>40</sup> Setiri dadabetiri, jovereghe ira buvudo, ne sekago diti bainghetiri fafase avéro tafusira. Avori, ne diti fainghedo numoá gido, geka sari buniseri.

<sup>41</sup> Etero, Iesu sekago jovereghe ira banungedo, jovereghe fira buvudo sisira, “Ne ravava amo, nangetiraimi kotugo sekago fase ravevu? Avori, sifo buvira! Oroko, Evetu Genembo da Koro+ ari ekoko embo da ungodá fitarira.

<sup>42</sup> Erevu namonde ya gaore! Givu! Genembo namo aito erira amo, evia buvirere!” aminge sisira.

*14:43-52 Iesu Sanduduseri.  
(Matthew 26:47-56; Luke 22:47-53;  
John 18:3-12)*

<sup>43</sup> Iesu aminge siri, nunda ambo jimbi 12 ainda eni javo Judas fira buvurutusira. Fristi+ da kokotofu, Moses da Geka ijuga kakato a Jusi embo da babojegari, ne evetu genembo mendeni dirigetero kaiya a gandigha ava budo, Judas de dabade fera buvurutuseri.

<sup>44</sup> Giti, ne jo javi edo furae irise, gitofu Iesu kau nange kasama aetera aindae sedo, Judas nu eminge sisira, “Sandi muno arena amo, numora avori. Ururono aminda kasama edo, numoá sandido kaifa use bu yasivu!” aminge sisira.

<sup>45</sup> Judas gitofude dabade fera buvudo, Judas dambu Iesu kena ira sisira, “Ijuga Kato, iresa!” aminge sedo, Iesu sandi muno usira.

<sup>46</sup> Amingetiri gido, gitofu fera Iesu sanduduseri.

<sup>47</sup> Sandudero, genembo eni aminda fetirisira aimi, nunda kaiya bu jighiri eretiri, fristi+ da giti jighari ainda saramana kato da dengoro ava je gafugetiri dudurusira.

<sup>48</sup> Ainda amboda, Iesu nemokena sisira, “Ne redae kaiya a gandigha budo, namo sandari dae sedo refevu? Na jo tafasara kato iraeri.

<sup>49</sup> Namonde sifo ghousa God da Kamboda+ irise ijugedo ghuseña amo, ne nangusiraimi aminda na jo sandae edo ghusevu? Avata ne emingereva da beká mo: God da

Geka rea resira, ava beká are dae sedo, nene etevo sirorerira,” aminge setiri,

<sup>50</sup> nunda ambo jimbi isambu oju edo, nu do sufuseri.

<sup>51</sup> Sufero, mandi gimasa eni emboi avisira amo, nu Iesu da amboda firi gido, numo sandari dae etero,

<sup>52</sup> sumbiri, embo ujuge duriri, nu tefo tamoi sufusira.

*14:53-65 Iesu Koto Ari Dae Sedo,  
Budo Iseri.*

*(Matthew 26:57-68; Luke 22:54-55,63-71; John 18:13-14,19-24)*

<sup>53</sup> Amingetiri, Iesu budo era, fristi+ da kokotofu da giti jigharikená buvurutuseri. Fristi+ da kokotofu, evetu genembo da babojegari, a Moses da geka ijuga kakato+ totorugedo irero, Iesu bu teteruseri.

<sup>54</sup> O Peter mo, nu itako ambo-kena fetiriri, Iesu budo ero, nu amboda amboda udo ira fristi+ da giti jighari da kambo furu aminda teredo ofotighida buvudo fefetusira. Fetedo, ungo ata mesari dae sedo ira, isoro kakato mendeni ainde dabade anubusira.

<sup>55-56</sup> Avori, fristi+ da kokotofu a kaniseremane isambu aminda totorugusera aimi, Iesu daoro ambare dae sedo, susu kakova useri. Susu tambari dae sedo, setero evetu genembo mendeni fera teredo, Iesu dae aji siseri. Ne gungubo teria futo siseri. Avata numo saoro ambari da susu eni jo tambaeri.

<sup>57</sup> Ainda amboda, mendeni ere fetedo gungubo osa sise, nundae eminge siseri,

<sup>58</sup> “Nu eminge siri namane nininguseri, ‘God da Kambo+ evetu genemboimi itutusera ava, nane bejedo sifo etodaba naká ainda jokáda, nasukako itono fetarira, jo enii na sonembae arera,’ nu aminge setiri namane nininguseri.”

<sup>59</sup> Aminge sisera avata, nenda geka jo mendo dabako aeri.

<sup>60</sup> Etero, fristi+ da giti jighari ere fetedo, Iesu kena ategi usira, “Geka setera aindae, ni rejo eni saresa?”

Evetu genembo resera emo, geka bekári?”

<sup>61</sup> Aminge sisira, avata Iesu nu beka dodo geka rejo eni jo saeri. Etiri, fristi+ da giti jighari sekago Iesu kena ategi usira, “Se ningore! God namonde kakara eraera, ainda Mandi nu evetu genembo da ari ekoko kote doyari dae sedo mutari sisira amo, nimori, ai?”

<sup>62</sup> Aminge setiri, Iesu sisira, “Resesa avori! Ne amboda Evetu Genembo da Koro+, God Fakina Kato ainda ungo gimandukena anumbirari gareva, a kotugo utuda ghe foroga jokáda vose fururari gareva.”

<sup>63</sup> Aminge setiri ningido, fristi+ da giti jighari janje eko etiri, nunda tamo asugari jighi ijejegedo sisira, “Ningevu! Nu aminge siri, God da javo eko erira. Geka eni redae ningarerer?”

<sup>64</sup> Nunda ari eko ava, tofo siri niningerevere! Ava ne nange erekotevu?” setiri, ne isambu numoá daoro ambare dae siseri.

<sup>65</sup> Sedo, mendeni tuturo edo numokena kosiva edo, embo budo fera diti gajedo, nu umbebaimi doruse siseri, “‘Ni God da feroveta,’ seraesa. Ava sedo, se ningore! Ni mave eredori?” aminge setero dadabetiri, fristi+ da isoro kakato, nembarago Iesu doruseri.

*14:66-72 Peter Nu Iesu Ighagha Usira.*

*(Matthew 26:69-75; Luke 22:56-62; John 18:15-18,25-27)*

<sup>66</sup> Peter nu kambo ofotighida anumbiriri, fristi+ da giti jighari da saramana kato gagara eniimi fira,

<sup>67</sup> Peter ungo ata mesise anumbiriri, ava fuge gido sisira, “Evetu genembo Nasareth embo genembo javo Iesu ainde dabade deinghedo ghusera, ainda eni nimori,” aminge setiri,

<sup>68</sup> Peter ighagha use sisira, “Ni geka resesa amo, na bunariri!” aminge sedo, nu eredo ira, emboro békada fetiriri, kokora beka sisira.

<sup>69</sup> Setiri, gagara daba aimi, nu aminda fetiriri gido, sekago evetu genembokena sisira, “Genembo emo, nu Iesu da eniri,” sisira.

<sup>70</sup> Avata nu sekago ighagha usira. Ainda amboda, evetu genembo aminda fetiriseri aimi siseri, “Geka bekári. Nimo Galilee embori; ava sedo, ni nunda eniri! Amo jo ighagha ae aresa!”

<sup>71</sup> Aminge setero, Peter God da javoda beka gagojuse sisira, “Na gungubo sarena amo, God na darira. Genembo reseva amo, na bunari bekári!”

<sup>72</sup> Aminge siri, kokora sekago sifo karigusira. Sifo karigiri, Iesu rea numokena sisira ava Peter kotisira, “Kokora umbu etoto naká sifo jo karigae irari, ni na umbu etodaba naká ighagha aresa.” Peter ava kotedo tuturo edo sorara janjagughae usira.

## 15

*15:1-15 Iesu Budo Era, Pilate Da Dombuda Koto Useri.*

*(Matthew 27:1-2,11-14; Luke 23:1-5; John 18:28-38)*

<sup>1</sup> Sifo atetiri, fristi+ da kokotofu, evetu genembo da babojegari, a Moses da Geka ijuga kakato+, kanisere isambude dabade manaka garuseri. Manaka gaetero dadabetiri, ne Iesu seiniimi (chains) bundedo budo era, Rome embo da kotofu, javo Pilate, frovensi Judia kaifa edo ghusira, nunda ungodafifituseri.

<sup>2</sup> Fitero, Pilate da dombuda fetetiri, Pilate Iesu kena ategi usira, “Se ningone! Geka bekári: ni Jusi embo da kiniri, ai tefo?” setiri, Iesu minonda sisira, “Ava nine resesare!”

<sup>3</sup> Aminge setiri, fristi+ da kokotofu nundae aji sise, geka ekoko mendeni mendeni siseri.

<sup>4</sup> Setero, Pilate sekago ategi usira, “Ni dara eraesa a geka sembae seraesa ava, gegenembo ei sero niningeresere. Ava sedo, ni redae mino jo sae eresi?” sisira.

<sup>5</sup> Avata Iesu amboda geke eni jo sae usira. Amingetiri gido, Pilate bunisira.

<sup>6</sup> Jarige Yari da Kirumo+ ainda sifoda, Pilate sifo ghousa emingedo ghusira. Dibura embo eni nenda uju ava, natofoi benunu seoro ningido, nu doyeari tefo foa buvudo ghuseri.

<sup>7</sup> Sifo aminda, genembo gogore kato eni javo Barabbas dibura jokáda irei. Natofu mendeni gavana imboe use, titigho usera ainda sifo aminda, Barabbas resena eimi, genembo eni detiri ambududurusira.

<sup>8</sup> Avori, Pilate nu genembo eni doyeari ya buvaetira ava kotise iriri, evetu genembo natofogo Pilate kena fera buvudo, Pilate da kiki setena evia kotise, tuturo edo genembo eni diburada ghe foa buvare dae sedo, benunu siseri.

<sup>9</sup> Benunu setero, Pilate nemokena ategi usira, “Avori, ne mavejoá uju erevu? Na saono, Jusi embo nenda kini (king) ava foa isaghada buvare, ai? Sevu ningone!”

<sup>10</sup> Aminge sisira da beká mo: nu kasama usira, fristi da kokotofu a Jusi embo da babojegari ne, evetu genembo digari Iesu da geke ningido ghusera ava gido, dubo eko etiri, nu aindae sanduduseri.

<sup>11</sup> Avata natofu nange Barabbas foa buvare dae benunu saetera ava kotise, fristi+ da kokotofu natofu da ghamo deretiri eretiri, ne Barabbas foa buvare dae setero,

<sup>12</sup> Pilate sekago nemokena ategi usira, “Atá, na genembo eni, Jusi embo da kini (king) seraeva emo, nange areni!” aminge setiri,

<sup>13</sup> ne koko sedo, “Amo, arafa dege!” siseri.

<sup>14</sup> Setero, Pilate sisira, “Atá, nunda dara rejori? Sevu ningone!” setiri, ne koko sedo fumbu aruguse siseri, “Arafa dege!”

<sup>15</sup> Aminge setero, Pilate nu, evetu genembo dubo eveva aoro dae sedo, emingusira. Nu Barabbas dotiri fira isaghada buvurutusira. Ainda amboda nu setiri, nunda mendeni Iesu

budo ambíimi doruseri. Detero, Pilate nu arafa daoro dae sedo, isoro kakato mendeni da unghoda fiftusira.

*15:16-20 Isoro Kakato Iesu Dere Jiseri.*

*(Matthew 27:27-31; John 19:2-3)*

<sup>16</sup> Isoro kakato aimi Iesu budo era, gavana da kambo mindafu ainda furu da guro aminda teredo dendeduda buvurutuseri. Dendegu da javo mo, ‘Praetorium’ seraera. Aminda buvudo, kori setero, nenda mendeni isambu fera totoruguseri.

<sup>17</sup> Totorugedo, ne embo unju tamoi budo fera Iesu kena asuguseri. Asugedo, ne asi titifaghae bu kefu edo kau kini (king) da kekesa avaga edo, nunda jiroda asuguseri.

<sup>18</sup> Asugetero fetetiri, tuturo edo nu dere jise, ategi use sedo ghuseri, “Orokaiva! Jusi embo da kini buviro! Orokaiva!” aminge sedo,

<sup>19</sup> ambii budo nunda jiroda doruse kosiva use bainghedo ghuseri.

<sup>20</sup> Dere jirero dadabetiri, nenda embo unju tamo Iesu kena asugusera ava kosughedo, tofo nunda ava bu fera numokena asuguseri. Amingedo, nu arafa dari dae sedo, jumbudo iseri.

*15:21-32 Iesu Arafa Doruseri.*

*(Matthew 27:32-44; Luke 23:26-43; John 19:17-27)*

<sup>21</sup> Emboro soroda, Sairin embo genembo eni, javo Simon ava, reighi Jerusalem teteriri tambudo, kovionoghae setero, nu Iesu da korosi ava fufusira. (Simon resena emo, nu Alexander a Rufus ghae da numamori.)

<sup>22</sup> Avori, ne Iesu budo era, reighi javo Golgota, aminda buvurutuseri. Golgota resena, ainda tuka mo namonedda gekaimi, ‘Ambari Embo da Jiro Aghati da Vasa’ seraera.

<sup>23</sup> Aminda buvudo, nu erá mema itatameure dae sedo, vaini (wine)

budo a fiyogha eni, moor (*myrrh*)<sup>23</sup> seraera, ainghae baingoro edo futuseri. Futusera avata, nu jo bae, dotutusira.

<sup>24-25</sup> Dotiri, iji vitiri (9 koroko), Iesu tautaimi arafa detero takegha etiri, nunda tamo asugari kosughe budo, mave nunda embo boka ningiava baetira, ava kasama ari dae sedo, kikindoro garuseri.

<sup>26</sup> Etero dadabetiri, nu redae koto usira da susu ava ijugaoro kasama aoro dae sedo, faiya gembudo Iesu da jiro agada detero takegha usira, amo eviri:

“Emo Jusi embo da Kiniri!”  
aminge gefuseri.

<sup>27</sup> Tafasara kakato etoto naká ábarago budo era, Iesu de dabade arafa doruseri, eni gimandukena, a eni umbefukena.

<sup>28</sup> Amingero, God da Geka rea sisera ava isagha usira. Amo eviri:

“Nu ari eko embova kotise siseri.”<sup>28</sup>

<sup>29</sup> Evetu genembo mendeni foa Iesu gi dariguse, dere jise gifua gitorotoro use sedo ghuseri, “Ai, makoede! Ni erekotesa amo, ni God da Mandiri. A eni mo: ni God da Kambo+ jighi bejedo, sifo etodaba naká, ainda jokáda sekago itaso fetare dae sisesi.

<sup>30</sup> Ava sedo, tofo sonembedo korosida ghe vose fete gaore!” ne aminge sedo ghuseri.

<sup>31</sup> Kau daba aminga ava, fristi+ da kokotofu a Moses da Geka ijuga kakato+, ne Iesu dere jise tofo tofo se nininguseri, “Nu seari, evetu genembo mendeni jejebugedo ghuseri. Avata nu nangetirai tofo sonembedo vosae eri!

<sup>32</sup> Nunda kotari mo: God namondeda ari ekoko kote doyari dae sedo, Genembo eni mutari sisira amo, numori. A nunda kotari eni mo: namonde Israel embo da kini (king) mo numori. Ava sedo, tofo

sonembedo korosida ghe vose foa fetarira amo, namonde gido nu tumondarera,” aminge sedo ghuseri. Kotugo, tafasara kakato Iesu de dabade arafa dorusera aimi, nengae Iesu dere jiseri.

*15:33-41 Iesu Ambududurusira.  
(Matthew 27:45-56; Luke 23:44-49;  
John 19:28-30)*

<sup>33</sup> Isonga (12 koroko) iri, reighi isambu aminda tumba jido iriri ira, ungobu (3 koroko) iri, reighi sekago usasa usira.

<sup>34</sup> Ungobu iri, Iesu koko sisira, “Eloi! Eloi! Lema sabatani!” Ainda tuka mo: namondeda gekaimi saeteri, “Nanda God! Nanda God! Redae na dotesi?”

<sup>35</sup> Aminge setiri, evetu genembo mendeni aminda fetirisera aimi, sembae ningido eminge siseri, “Ningivu! Nu God da feroveta javo Elijah, aindae kori resira,” siseri.

<sup>36</sup> Iesu aminge siri, genembo eni sumbu viti fetedo, roera eni sofeya ava budo, faragho mendoda vakimbedo, vaini (wine) dokegha ainda jokáda fatiri sasaka etiri, budo ira, Iesu mindare dae sedo, nunda bekada ffituse sisira, “Namonde gaore! Elijah foa nu sonembarira, ai tefo?” aminge setiri,

<sup>37</sup> Iesu beka mindafugo koko sedo, ghamo asegaru dotutusira.

<sup>38</sup> Ambududuriri, God da Kambo+ ainda jokáda, nunda vasa kakara ava, evetu genembo erá tere gido ambeore dae sedo, embo teria eniimi gajetero ireira ava, soroda ijejege ikáda ghe vose fira, duruda buvurutusira.

<sup>39</sup> Etiri, isoro kakato da giti jighari Iesu da dombuda fetirisera aimi, Iesu nange ambududurusira, ava gido, “Geka bekári: emo God da Mandiri!” sisira.

<sup>40</sup> Iesu ambududuriri, evevetu mendeni ne esike fetirise gosuseri.

<sup>23</sup> **15:23:** Jusi embo roera javo moor (*myrrh*) nange eoro siroredo ghusira ava, Matthew 2:11 ainda duruda tegaresa. Tuka redae Iesu kena futusera ava, namonde jo kasama e gogoghombaeri. Avata kasama kakato mendeni da kotari mo: moor futusera amo, Iesu erá mema itatameure dae sedo futuseri. <sup>28</sup> **15:28:** Tuturo 28 da geka, Baiboro (Bible) mendeni ainda jokáda fitero irira. O Baiboro mendeni ainda jokáda jo fitero teraeri.

Evevetu resena ainda jokáda mo, evevetu eviri: Magdara embo evetu eni javo Mary, Mary da nunombo, amo James Kitako nengae Joses ghae da noi, a Salome ri.

<sup>41</sup> Evevetu resena eimi, ne Frovensi Galilee ghedo fera, Iesu de dabade deinghuse nu sonembedo ghuseri. Evevetu resena, a kotugo evevetu digari, Iesu de dabade viti fera reighi Jerusalem buvurutusera, ainde dabade esike fetirise gosuseri.

*15:42-47 Iesu Da Tamo Budo Era Furuguseri.*

*(Matthew 27:57-61; Luke 23:50-56; John 19:38-42)*

<sup>42</sup> Sifo atarira amo, Jangutari da Sifori. Ava sedo, ungobu iri gido, Arimatia embo genembo eni javo Joseph, fakina edo ira, Iesu da tamo budo ya furugari dae sedo, Pilate kena benunu sisira.

<sup>43</sup> Joseph resena emo, nu genembo binonderi, a kotugo kanisere jokáda irei. Numbarago God foa nunda natofo+ kaifa arira da sifo ava kaifa use irei.

<sup>44</sup> Nune eredo ira Pilate kena teredo, Iesu da tamo mutari bu ya furugari dae sedo, benunu setiri ningido, Pilate dudukughusira. Dudukughedo, isoro kakato da giti jighari aghi etiri fira buviri, ategi usira, “Iesu ambira ai, jebuga irira?” setiri,

<sup>45</sup> giti jighari amo, “Anakora ambira!” sisira. Setiri, Pilate Iesu da tamoá Joseph kena mutoro dae sisira.

<sup>46</sup> Aminge setiri, Joseph mane eredo era, embo yokura foyago ava ombudo budo fera, Iesu da tamo korosida ghe bu fitero vosetiri, simbuge doghedo budo era, ofofo eni ghamana toka basisera, aminda bu teredo ffituseri. Fitido, ghamana mindafu ava afufetero ira, aimi toka gagojusira.

<sup>47</sup> Nu reda ffituseri ava, Magdara embo evetu javo Mary, nunombo Joses da noighae aminda irise, nene gosuseri.

## 16

*16:1-8 Iesu Ambarida Ghe Jebugedo Erorusira!*

*(Matthew 28:1-8; Luke 24:1-12; John 20:1-10)*

<sup>1</sup> Jangutari da Sifo dadabetiri gido, Magdara embo evetu javo Mary, a nunda nunombo, James da noi, a Salome, nemonde dabade era, usu eni muno futo ava, Iesu da tamonda davari dae sedo, ofuseri,

<sup>2</sup> Amingedo, Fura Tomanako ataeghae beká sifo atutiri, evevetu aimi eredo ofofoda iseri.

<sup>3</sup> Ofofoda ise siseri, “Namondedae ghamana teriaó, mave afufari dari-gari namonde terareri?” aminge sise,

<sup>4</sup> diti fuge gosusera amo, ghamana mindafu amo anakora afufedo darigetiri, toka isagha edo iriri gosuseri.

<sup>5</sup> Gido, era tokada teredo, mandi gimasa eni tamo asugari foyago aimi asugedo, gimandukena anumbiriri gi dudukughedo buniseri.

<sup>6</sup> Bunéro, nu sisira, “Erá buneove! Ne Nasareth embo genembo javo Iesu arafa dorusera ava kakova ereva, ai? Numo ambarida ghe jebugedo eretira! Nu eminda tefori. Nunda tamo reda fitero fasusira, ava ijugaono gaove!

<sup>7</sup> Yasivu! Nunda ambo jimbi, Peter de dabade, nemokena eminge sevu ningore! ‘Nu frovensi Galilee aminda giti erira. Ava sedo, ne eredo nunda amboda yasivu, aminda tambove! Nu aminda tambari mo, nu anakora jebuga irise, setiri ne niningusevu.’”

<sup>8</sup> Gimasaá aminge setiri, ne jovereghe fera isaghada buvudo sufuseri. Ainda susu mo: ne oju edo dudukughedo, ungo ata dadadaghuseri. Ne oju beká ava usera ava sedo, ne sumbudo era reighida buvurutusera amo, ne osa jo saeri.

*16:9-18 Iesu Umbu Etodaba Naká Isagha Etiri Gosuseri.9-18*

*(Matthew 28:9-10,16-20; Luke 24:13-49; John 20:19-23; Ekaresia 1:6-8)*

<sup>9</sup> Iesu nu Fura Tomanako ainda sifoghae ambarida ghe jebuge eredo, Magdara embo evetu javo Mary kena, isagha etiri gosusira. Mary resena emo, numokena giti sukaru 7 aimi asugetero ireira ava, Iesu nunda jokáda ghe ondiri vose dari-guseri.

<sup>10</sup> Mary Iesu gido, jovereghe ira, Iesu da kokomana dubo mema use sorara usera aikena buvudo, Iesu erorusira da bino ava osa sisira.

<sup>11</sup> Eminge sisira, “Iesu ambarida ghe jebugedo eretiri na geni!” aminge setiri niningusera avata, ne manamana edo jo tumondae useri.

<sup>12</sup> Ainda amboda, Iesu da kokomana etoto naká, emboroda de-inghudo ero, Iesu dombu beka jovereghe kau eni edo, nemokena isagha usira.

<sup>13</sup> Nu kasama edo, jovereghe era buvudo, nenda kokomana isambukena osa siseri. Avata nenda geke barago, jo tumondae useri.

<sup>14</sup> Ainda amboda, Iesu da ambo jimbi 11 aimi, ne bayau rero, nu nemokena isagha etiri gosuseri. Ne diti jo basari nu tumondae usera aindae, nu dombuda sisira. Ainda susu mo: Iesu ambarida ghe jebuge erorusira ava, evetu genembo mendenii gido era nunda ambo jim-bikena osa setero niningusera avata, nenda gogoreimi use, jo tumondae useri.

<sup>15</sup> Dombuda sedo, ainda amboda nemokena sisira, “Nanda Bino budo reighi isambu aminda yasivu! Natofu isambukena sevu ningore!”

<sup>16</sup> Mave tumondedo bafataito arira amo, jebuga evovodae irari ava tuve budo, God da vasada teredo sifo

ghousa irarira. Avata mave jo tumondae arira amo, na saono numo ari ekoko mino mutari vasada ter-arira.

<sup>17</sup> Mave tumondarira amo, nu fakina edo tano mendeni mendeni use emingarira. Nanda javoda a nanda fakinaimi, nu sukaru ondari vose darigarera. Asisi Kakara numokena asugari, aviva jovereghari geke mendeni nu bunari ava, nunda bekaimi sarira.

<sup>18</sup> Jingabu bu jighari gambarira amo, nu jo ambae arira. Kae mindarira amo, nu jo ambae arira. O, evetu genembo kae tambudo irarera amo, ungo tamonda fitari, ne jejebugarera,” aminge sisira.

*16:19-20 Iesu Utuda Vitisira.*

*(Luke 24:50-53; Ekaresia 1:9-11)*

<sup>19</sup> Setiri dadabetiri, God setiri Iesu utuda vitisira. Vitira teredo, God da ungo gimanduda anumbusira.

<sup>20</sup> Etiri, nunda ambo jimbi era reighi isambu aminda, Iesu da Bino ava osa sedo ghuseri. Bajari nu sonembeari, nunda ambo jimbi tano mendeni mendeni eoro siroredo ghuseri. Aminge siroreari gido, nenda geke mo geke beká ava, evetu genembo kasama edo ghuseri. Avori, nanda geke tano eviri.

**9-18 16:8:** Evetu genembo mendeni, geke **Mark 16:9-18** jokáda mo, Mark nune gembariá seraera, o mendeni genembo eniimi gembariá seraera. Nenda kotari, Iesu erorusira ainda amboda nu rea usira ava kotise, genembo resera eimi nune, Mark geke giti gefusira, aminda avagaya edo gefusira. Ava sedo Baiboro mendeni aminda gekeá ‘footnote’ jokáda (amo ‘page’ duruda) tambaresa.

## Luke Kakara

Luke Kakara mo, Greek embo eni, javo Luke, nune gefusira. Numo dogetari. Nu Iesu da ambo jimbide dabade, deinghedo ghusira. Nu jo Jusi embo kotise gambaeri. Amo nu, nunda natofo Greek embo, a kotugo natofo mendeni tumondaoro dae sedo gefusira. Nu jo **Luke Kakara** *avanembo gambaeri. Nu God da Geka eni, Ekaresia, ábarago nune gefusira.*

Luke nu genembo eni, javo Theophilus kotise, buku emo gefusira. Theophilus da tuka mo, 'God Dubo Bari Katori'. Ava sedo namonde erebunera, Luke, genembo beká eni, javo Theophilus ava kotise, numokena gefusira. O nu, evetu genembo mave God dubo buraera aikena, buku emo gefusira.

Iesu mo, namonde evetu genembo isambu da Koro, ã namonde isambu sonembari dae sedo fusira, ava ijugari dae sedo gefusira.

*Luke Geka Gefusira, Ainda Mendo Mendo Mo Eviri.*

1:1-4 Geka da tuturori.

1:4—2:52 John Bafataito Ari Kato nengae Iesu ghae, nange siroruseri.

3:1-20 John Bafataito Ari Kato saramana edo ghusira.

3:21—4:13 Iesu bafataito etiri ainda amboda, Satan ira Iesu dederusira.

4:15—9:50 Iesu frovensi Galilee aminda deinghuse, vironu sedo ghusira.

9:51—19:27 Iesu frovensi Galilee ghedo ira, Jerusalem buvurusira.

19:28—23:56 Fura Kakara aminda, rea sirorusira.

24:1-53 Iesu ambarida ghe jebuge eretiri, nunda ambo jimbi gero utuda vitisira.

<sup>1</sup> Arie, Theophilus ko! Na ni ategi beká ava erena. Namanenda jokáda rea sirorusira ainda Bino ava, evetu

genembo digari aimi osa sise, gembero irira.

<sup>2</sup> E jo duboi kotise gambaeri. Evetu genembo mendeni diti mokoi gido, Iesu da bino evia, vironu seoro ningido ghusera, ava gefuseri.

<sup>3</sup> Ava sedo, kotofuko, nane kotisena amo, eveva mo: na nindae gembu gogoghombaeteni. Ainda beká mo: na roera digari emo isambu, nunda tuturo da ghe ijuje ningi gogoghombuseni.

<sup>4</sup> Na emingerena ainda tuka mo: ni rea niningusesa ainda beká ava, kasama e gogoghombaetesi. Yari budo gi!

*1:5-25 John Bafataito Ari Kato Sirorarira Ava, Aneyaimi Fira Osa Sisira.*

<sup>5</sup> Kini (King) Herod nu reighi Israel kaifa use ireira ainda sifoda, God da fristi+ eni javo Zechariah irei. Zechariah resena emo, nu Abijah da imendiri. A nu Abijah da imemesisiride dabade, God da Kamboda+ fristi+ da saramana edo ghuseri. Noaro da javo mo, Elizabeth ri. Elizabeth da numamo mo, numbarago fristiri.

<sup>6</sup> Zechariah noaroghae mo, God da dombuda veka eveva use, Nunda agho dari kaifa e gogoghombedo ghuseri.

<sup>7</sup> Nengae erova irarara edo, eve-tako embako useri.

<sup>8-9</sup> Avori, fristimane God da Kamboda+ saramana edo ghusera ava, Zechariah nunda boanda ari dae sedo, ira Jerusalem aminda saramana use irei. Fristi+ da kiki mo eviri: mavejo mavejo yabiyabina (incense) oltada (altar) dungedo ghaetira ava, gategari dae use, kikindoro avavaga gaedo ghuseri. Sifo eninda kikindoro garusera amo, Zechariah da javo ava isagha etiri gido, nu eredo ira God da Kamboda+ yabiyabina (incense) God kena dungari avare dae sedo teterusira.

<sup>10</sup> Nu amingiri sifo aminda, evetu genembo digari isaghakena fete banungero,



<sup>11</sup> aneya fira Zechariah kena olta (altar) beina gimandukena isagha usira.

<sup>12</sup> Isagha etiri, nu gi dudukughedo oju usira.

<sup>13</sup> Oju iri, aneya numokena sisira, “Zechariah, erá oju eose! God ninda benunu ningira. Ava sedo, nearo Elizabeth kauri edo mandi fumbarira. Mandi javo mo, John jighareva.

<sup>14</sup> Numo sirorarira amo, ne ivuga use dubo eveva beká ava areva, ã evetu genembo mendeni barago ivuga beká ava arera.

<sup>15</sup> Mandi amo, nu God da dombuda kotofuko edo irarira. Vaini (wine) o uvu fakara jo mindae arira. Nu jo sirorae, noi da tininda irari, Asisi Kakara aimi numokena asugarira.

<sup>16</sup> Asugari gido, nu Israel embo digarigo ava, nenda Bajari God kena unumbe bu jovereghe furarira.

<sup>17</sup> Nu God da feroveta Elijah da kau aminga ava edo, God da Asisi ã God da fakina aimi, giti yama Bajari da emboro simbuguse irarira. Sasingu noi numamode bu foa tatari dubo dabako arera. Kotugo, gogore kakato ábarago bu jovereghari kotari eveva ava kotarera. Aminguse, nu Bajari da natofo nenda dubo joká esimbugururari iroro furarira,” aneya aminge sisira.

<sup>18</sup> Setiri, Zechariah mino numokena sisira, “Na nangedo ni tumondareni? Namane Elizabeth ghae eve-tako embako eteri,” aminge setiri,

<sup>19</sup> aneya sisira, “Nanda javo Gabriel ri. Na sifo ghousa God da dombuda irá gheraena. Na, Nune dirigetiri bino eveva evia nimokena osa sari dae ojigheni.

<sup>20</sup> Ni nanda geka evia jo tumondae eresa avata, geka ainda beká mo sirorarira. Ava sedo, ni beka guga ari iraso, ninda mandi sirorari gido, beka afigarira,” aneya aminge sisira.

<sup>21</sup> Nengae God da Kamboda+ geka sero, evetu genembo isaghada fefetusera amo, kaifa e jarutuseri.

<sup>22</sup> Bunise irero, Zechariah fira bu-vudo beka sari bunisira, ava gosuseri. Gosero, aneya rea setiri niningusira ava, ungoi ijugetiri gosuseri. Gido, ne kasama usera amo, aneya fira numokena isagha etiri, diti mokoi gosusira.

<sup>23</sup> Zechariah da saramana sifo dadabetiri, nu Jerusalem dodo jovereghe natida isira.

<sup>24</sup> Ira natida buvudo irise, noaro Elizabeth kauri usira. Kauri edo jo deinghae kamboda irise, tambuno ghabu soveni taukaka dadabusira.

<sup>25</sup> Dadabetiri sisira, “Aiyakoe! Giti na erova iriono, evetu genembo na dere jireoro meka gido ghuseni. Orokoá Bajari sonembetiri na dubo eveva use irena,” aminge sisira.

### *1:26-38 Iesu Sirorarira Aindae, Aneya Aghi Edo Osa Sisira.*

<sup>26</sup> Elizabeth kauri edo iriri, tambuno ghabu soveni dadabetiri ainda amboda, God sekago nunda aneya javo Gabriel ava dirigetiri, Frovensi Galilee, reighi Nasareth aminda isira.

<sup>27</sup> Gagara javo Mary kena, geka osa sari dae isira. Gagara emo, nu genembo javo Joseph kena, vai are dae sedo datu dighero irei. Joseph resena emo, nu Kini (King) David da imendi eniri.

<sup>28</sup> Aneya ira buvudo, eminge sisira, “Mary, iresa. God ninda irari evevago ava gido, ivuga erira. Ni ategi use esimbugerira,” aminge sisira.

<sup>29</sup> Setiri, Mary nu aneya da geka ava ningi dudukughedo geka da tuka ava bunisira.

<sup>30</sup> Etiri, aneya sekago numokena sisira, “Mary, erá oju eose! God ni dubo ererurira.

<sup>31</sup> Ni kauri edo, mandia fumbaresa amo, nunda javo Iesu jigharesa.

<sup>32</sup> Nu kotofuko arira. God Teria Beká aimi, nundae ‘nanda Mandi’ sarira. Kini (King) David evetu genembo kaifa e gogoghombedo ghusira; kau daba aminga ava, namondeda Bajari God sari, ninda Mandi kotofuko edo,

<sup>33</sup> nune nembua Jacob da imeme-siri evovodae kaifa ururari irarerera. Nunda fakina jo tano ae arira,” aminge sisira.

<sup>34</sup> Setiri, Mary mino aneyakena sisira, “Nu kau nange nangedo namokena sirorari? Na jo genemboghae iraeri,” aminge sisira.

<sup>35</sup> Setiri, aneya numokena sisira, “Amo jo genembo da fakinaimi siro-rae arira. God nunda Asisi Kakara mutari nimokena vose asugarira. Aminguse, God da fakina aimi afuregari, ni Mandi Kakara fumbaresa. Aindae sedo, God nundae ‘nanda Mandi’ sarira.

<sup>36</sup> Ninda ghatu Elizabeth ava kote gi! Nu ‘erovava’ sedo ghuseri. Nu evetako avata, oroko nu kauri edo iriri, tambuno ghabu soveni sembudo ghabu sovenida dabako ava dadabari dae erira.

<sup>37</sup> God kena fakara eni tefori. Nu rea sarira amo, beká sirorarira,” aminge sisira.

<sup>38</sup> Setiri, Mary numokena sisira, “Na Bajari da aderi. Ava sedo, nunda uju setesa amo, namokena sirorare!” aminge setiri, aneya eredo dari-gusira.

### *1:39-45 Mary Elizabeth Kena Isira.*

<sup>39</sup> Ainda amboda, Mary nunda roera bibitai simbuge bu eredo beina doririkena ira, Judia frovensi bu-vudo, nunda ghatu da reighi aminda buvurutusira.

<sup>40</sup> Buvudo ira Zechariah da kamboda teredo, nunda ghatu Elizabeth gido ategi usira.

<sup>41-43</sup> Ategi etiri, nunda ghatu Elizabeth ava niningiri, kokoi nunda tini jokáda dudukughedo javi javi usira. Amingiri, Asisi Kakara Elizabeth kena vose asugetiri, nu dubo kotedo beka fainghe sisira, “Arie, ni nanda Bajari da noiri! Ava redae namokena ojesi? Nane eredo nimo gari dae yaetena, ava avori. Namokena ojighesa aindae, na ivuga beká ava erena. God ni esimbuge

gogoghombusira. Ninda mandi fumbaresa amo, numbarago esimbuge gogoghomburira.

<sup>44</sup> Ni ategi eso, kokoi nanda tininda ava ningido, ivuga use javi javi etira.

<sup>45</sup> Geka Bajari da aneya aimi nimokena sisira, ava beká are dae sedo tumonde gogoghombusesi. Aindae sedo, Bajari ni esimbugerira,” aminge sisira.

### *1:46-56 Mary God Kena Sakai Sise, Yaru Didivusira.*

<sup>46</sup> Aminge setiri, Mary eminge sisira,

“Nanda ghamo joká isambuimi, Bajarikena sakai resena.

<sup>47-49</sup> Nanda asisiimi ivuga erira.

Ainda susu mo: na sabuari, avata God Fakina Kato namo kotedo sonembuse veka eveva erira.

Ava sedo, orokoá evetu genembo tuturo edo, nandae sarera, ‘God Mary esimbugusira.’ Nunda javo kakara bekári.

<sup>50</sup> Evetu genembo God igheghi use kakara eraera amo, God joka use ne dubo buraira.

Ã kotugo, nenda sasingu ã imeme-siri barago, joka use esimbugeraira.

<sup>51</sup> Nunda ungo siregusira da fakina aimi, evetu genembo gogore kakato amo, bambu soesa babarigusira.

Etiri, nenda ujuda manaka garusera amo, dotero dadabusira.

<sup>52</sup> Nune seari, reighi mendeni da kini (king) babai, nenda vasa do vosedo, sabua edo ghuseri.

Kotugo Nune seari, sabua mendeni vitido kokotofu edo ghuseri.

<sup>53</sup> Evetu genembo baimarai sirivo edo ghusera amo, sonembuse oka bayau muteari mindido ghuseri.

Aminguse, evetu genembo mendeni guguae amo, dirigeari ighoii sirivo udo ya ghuseri.

<sup>54-55</sup> Nu beka gagojuse, Abraham ã namonde Abraham da sasingu-keno joka use, evovodae sonembari sisira.

God ava kotise, namonde Israel embo, nunda gigimasa ã ade jamena, ava sonembusira.”

<sup>56</sup> Mary Elizabeth ghae irise tambuno etodaba dadabetiri, jovereghedo nunda natida isira.

*1:57-66 John Bafataito Ari Kato Sirorusira.*

<sup>57</sup> Elizabeth da fumbiri sifo buviri, mandiá fufusira.

<sup>58</sup> Fumbiri, nati embo ã nunda natofo isambu, Bajari nu nange nange sonembetiri mandi fufusira ava ningido, Elizabeth de ivuga useri.

<sup>59</sup> Mandiá siroretiri, fura dabako dadabetiri, nunda vika mendo anoso gafugari dae sedo, evetu genembo mendeni fera buvudo, nunda vika mendo anoso ava gafugedo, numamo da javo Zechariah ava jighari dae siseri.

<sup>60</sup> Setero, noi sisira, “Tefo, nunda javo John jigharera.”

<sup>61</sup> Setiri, mino numokena siseri, “Ninda oro ainda jokáda, javo emo tefori.”

<sup>62</sup> Aminge sedo, numamokena ungoi use, nunda uju mo, javo rejoá jigharera andae ategi useri.

<sup>63</sup> Etero, Zechariah nu roera eni mutoro mandi da javo gembari dae ungoi etiri gido, mutero bu eminge gefusira: ‘Nunda javo mo, John ri.’ Aminge gembiri gido, natofo isambu dudukuguseri.

<sup>64</sup> Zechariah gefiri beka vujegetiri, geka sise tuturo edo God dae sakai sisira.

<sup>65</sup> Amingetiri, nati embo reighi aminda oju useri. Oju ero, bino ivegedo iri, evetu genembo Judia frovensi beina doririkená irá ghedo ghusera, isambu nininguseri.

<sup>66</sup> Mave bino ava niningusera amo, isambu kotari futo use siseri, “Mandié baji teria arira amo, amboda rejoá ari?” Ainda susu mo: mandiá Bajari da esimbugari jokáda irei.

*1:67-80 God Da Geka Amboda Rea Sirorarira Ava, Zechariah Osa Sisira.*

<sup>67</sup> John numamo Zechariah, Asisi Kakara ai vose asugetiri, God da Geka ava itatamuse geka evia sisira:

<sup>68</sup> “Namonde Israel embo da Bajari God dae sakai saore, nu fira nunda fakinaimi namonde sonembusira ava sedo.

<sup>69</sup> Nune namonde sonembare dae sedo, Sonemba Kato tomanako, nunda gimasa David da imendi eni ava futusira.

<sup>70</sup> Anakora beká, God setiri nunda ferovetaimi gembero irira:

<sup>71</sup> ‘God namondeda gitofu ava kosegari namonde jebugarera.

Ã kotugo, evetu genembo namondekena gitofu eraera, ainda ungodá ghe saghimbe bari jebugarera.’

aminge gembero irira.

<sup>72</sup> Nune namondeda abuanamendae joka edo, nunda beka gajari kakara ava, kaifa ari sisira.

<sup>73-74</sup> Namondeda abua agira beká Abraham kena beka gagojuse, sisira,

‘Ninda gitofu ã ninda sasingu da gitofu ava, nane kosegaono jebugareva.

Nenda gitofudae jo oju ae, namoá tumonde bainghedo ghareva.

<sup>75</sup> Aminguse, ne evovodae nanda natofo kakarago beká ava use irareva.’ ”

Zechariah aminge sedo, jovereghe nunda kokoi John kena eminge sisira,

<sup>76</sup> “Nanda mandi, ninda geka barago irira:

God Teria Beká, nunda Geka ava isagha saso dae sedo, ni gategusira. Ni giti yama, Bajari da emboro esimbugaresa.

<sup>77</sup> Bajari nu nange nunda natofo da ari ekoko kote doyari jebugarera ava, nemokena osa saso ningarera.

<sup>78-79</sup> Namondeda God, namondedae joka edo tavo use unduraira.

Sifo atedo iji viteari, tumba dadaberaira kau aminga ava, God

da sonemba a God da usasa utuda ghe janimbeari, evetu genembo ambari dae oju eraera amo, usasa ava gido, dubo jama arera,” Zechariah aminge sisira.

<sup>80</sup> Nunda mandi baji tomanako use, dubo gekaghae babojusira. Nu reighi uvu ã evetu genembo irae da vasa aminda ireira edo, tuturo edo Israel embokena vironu sedo ghusira.

## 2

*2:1-7 Iesu Nange Nange Sirorusira, Ainda Gekari.  
(Matthew 1:18-25)*

<sup>1</sup> Sifo aminda, Rome embo da kotofu javo Augustus, agho dorusira amo eviri. Evetu genembo Rome emboimi kaifa edo ghusera aimi ya, nenda nombuamane da reighi aminda, nenda oro ainde dabade javo gembraeteri.

<sup>2</sup> Genembo javo Quirinius, nu Syria frovensi da kotofu edo ireira ainda sifoda, evetu genembo da javo jo gembae iriara ava, tuturo edo nenda javo gefuseri.

<sup>3</sup> Ava sedo, evetu genembo isambu eredo era, nenda reighida buvudo, nenda oro ainde dabade javo gefuseri.

<sup>4</sup> Genembo javo Joseph setena amo, numbarago Nasareth ghedo ira, Frovensi Galilee dodo, Judia frovensi reighi javo Bethlehem aminda buvurutusira. Bethlehem resena emo, reighi aminda giti Kini (King) David sirorusira. Joseph mo, Kini (King) David da imendi eniri. Aindae sedo, aminda javo gembari dae sedo isira.

<sup>5</sup> Isira amo, nunda datu gagara Mary ava budo, nengae dabade iseri. Mary nu tamo bouvu edo irei.

<sup>6-7</sup> Era, Bethlehem buvudo, aminda esa embo da kamboda avari vasa tefo gido, ne era sino fuka da kamboda tere aminda irá ghuseri. Aminda irero, Mary da fumbari sifo fira buviri itatamusira. Itatamedo,

nunda mandi bego fumbudo emboimi doghedo, sino fuka da bayau mindari vasa aminda fitiri fasusira.

*2:8-20 Iesu Sirorusira Ava, Aneyaimi Sifi (Sheep) Kaifa Kakatokena Osa Sisira.*

<sup>8</sup> Vasa eni Bethlehem dengesida, evetu genembo mendeni nenda sifi (sheep) kaifa ero, Mary nu mandia fufusira.

<sup>9</sup> Fumbiri, Bajari da aneya, sifi kaifa kakatokena isagha etiri, God da usasaimi jaraghetiri gido, oju beká ava useri.

<sup>10</sup> Oju ero, aneya nemokena sisira, “Era oju eove! Na Bino Eveva nemokena sari dae erena. Bino resena einda, evetu genembo isambu ivuga arera.

<sup>11</sup> God nenda ari ekoko kote do-yari dae ã nemo sonembari dae sedo, nenda Sonemba Kato dirigetiri ojighira orokoá siroretira. David da reighi Bethlehem ominda siroretira. Emo, Bajari Keriso dae resena.

<sup>12</sup> Siroretira ava gari dae areva amo, mandia emboimi doghedo, sino fuka da bayau mindari vasa aminda fitero fasirira, ava gareva,”

<sup>13</sup> aminge siri ainghae dabade, aneya digari ambari beká ava, utuda ghe fera isagha edo, aneya giti fira isagha usira, ainde dabade fetedo, God dae sakai siseri:

<sup>14</sup> “God Teria, a Iká Bekáda irira, aikena sakai sise resera!

ã evetu genembo endada God nune uju eraira, aikena dubo jama mutari irare!”

Aminge sedo, aneya do jovereghedo utuda vitiseri.

<sup>15</sup> Vitéro, sifi (sheep) kaifa kakato tofo tofo se nininguseri, “Fuvu, namonde Bethlehem yaore! Bajari namondekena rea osa setiri ningera ava, ya gaore!” aminge sedo,

<sup>16</sup> ne bibitai era buvudo, Joseph noaro Mary ghae tambudo, mandia sino fuka da bayau mindari vasa, aminda fitero fasiriri gosuseri.

<sup>17</sup> Gido, aneya geke rea mandidae setiri niningusera ava, osa setero nininguseri.

<sup>18</sup> Mave sifi (sheep) kaifa kakato da geke niningusera amo, ne isambu dudukughedo buniseri.

<sup>19</sup> Avata Mary nu sifo ghousa geke ava, nunda dubo jokái kotise irá ghusira.

<sup>20</sup> Sifi (sheep) kaifa kakato eredo jovereghe iseri. Ise, aneya geke setiri niningusera ava, God kena sakai sise yarui didivudo iseri. Ainda beká mo: aneya geke setiri niningusera ainda beká ava, isagha etiri gosuseri.

*2:21 Mandi Da Javo Mo, Iesu Jijighuseri.*

<sup>21</sup> Mandiá siroretiri fura dabako dadabetiri, vika mendo anoso gafugari da sifo buviri, nunda javo, Iesu ava jijighuseri. Javo Iesu mo, noi jo kauri ae iriri, aneya fira futusira, ava jijighuseri.

*2:22-38 Iesu Budo Era, God Da Kamboda+ God Kena Ijuguseri.*

<sup>22-24</sup> Sifo 30 ava dadabari dae iri gido, Joseph noaro Mary ghae mandiá budo, Moses da Geka rea resira ava ari dae sedo, Jerusalem iseri. Moses da Geka resena amo eviri. Evevetu ghasongana eraera amo, jo totoi ya God da Kamboda+ terae eraera. Ne sifo tufako kaifa use iria edo ainda amboda, tamo seghe simbugedo, joba budo, ya God da Kamboda+ teredo muturaera. Avori, ne Jerusalem iseri, Mary da javoda, joba God kena mutari dae sedo, á kotugo, mandiá God kena ijugari dae sedo, iseri. Mandi ijugusera ainda tuka mo, Bajari da Agho Dari eminge ijugerira:

“Vide jamena bebego fumburaera amo, isambu kakarari, God kena.”

Ã kotugo, Bajari da Agho Dari joba rea mutoro dae sisira amo, gumbara etoto o ribo etoto naká ava mutari dae sedo, Jerusalem iseri.

<sup>25</sup> Sifo aminda, genembo eveva javo Simeon, reighi Jerusalem aminda irei. Nu God kakara use, God nange nange Israel embo sonembarira, ava kaifa use irei. Nu Asisi Kakara ghaeri.

<sup>26</sup> Asisi Kakara ai numokena sisira, “Ni jo ambae irise, God da Sonemba Kato garesa. God evetu genembo da ari ekoko kote doyari dae sedo, Genembo mutari endada vosarira, ava garesa,” aminge sisira.

<sup>27</sup> Avori, sifo eni, Asisi Kakara imi setiri, Simeon eredo God da Kamboda+ ira teredo, kaifa iri, noi numamoghae nenda mandi Iesu budo, Agho Dari rea resira ava ari dae sedo, amboda era teteruseri.

<sup>28</sup> Tere fetetero, Simeon mandiá bu ovinembedo, God kena aiyakoe sise eminge sisira:

<sup>29</sup> “Bajari, namokena beka gagojusesa, ava ojighira isagha etiri eregosenere.

Orokoá saso na nimokena dubo jamaghae yarena!

<sup>30-32</sup> Ainda tuka mo: ninda Sonemba, nunda oro oro aimi gaoro dae sedo, simbugusesa ava, diti eregosenere.

Mandi emo, namane Israel embo da duro a usasari.

Janimburrari, namane Israel embo da gitofu ninda emboro ava garera.”

<sup>33</sup> Aminge setiri, Simeon rea mandidae sisira ava ningido, noi numamoghae dudukughuseri.

<sup>34-35</sup> Amingetero, Simeon ne esimbuguse, Mary kena sisira, “Mandi emo, Israel embo da kotari ava isagha are dae sedo, God nu gategusira. Numo God da tanori. Evetu genembo mendeni ne ivugaghae, mandi evia gosuse jebugarera. O mendeni, numoá gido imboe aoro, God sari nunda jebuga ne jo tambae arera. Evetu genembo amingururoro, nenda kotari eveva, ai, eko ava, God gido kasama arira. A evetu genembo ninda Mandi imboe ururoro gido, mema ninda ghamo jokáda gayarira,” aminge sisira.

<sup>36-37</sup> Evetu rori eni javo Anna, numo God da feroveta eniri. Nunda oro javo Asher, a numamo da javo mo Phanuel. Nu vai edo irise ghaeko 7 ava dadabetiri, nuvu ambududurusira. Ambiri, nu rori edo

irise, ghaeko 84 ava usira. Nu sifo ava inono, God da Kamboda+ irise, bayau kanangara use, God tumonde bainghedo ghusira.

<sup>38</sup> Simeon Iesu noikena geke siri, Anna fira nemokena buvurutusira. Buvudo Anna tuturo edo, God dae sakai sisira. Aminge sedo, nu Iesu da bino ava, evetu genembo digari Jerusalem aminda, God da Sonemba kaifa edo ghusera aikena, osa setiri nininguseri.

*2:39-40 Joseph Mane Jovereghedo, Nenda Reighi Nasareth Aminda Iseri.*

<sup>39</sup> Bajari da Agho Dari rejo resira ava, Joseph noaro Mary ghae etero dadabetiri, ne mandide jovereghe era, nenda reighi Nasareth, Frovensi Galilee aminda buvurutuseri.

<sup>40</sup> Buvudo, mandia dubo gekaghae baji mindafu iri, God mandia esimbugusira.

*2:41-52 Iesu Ghaeko 12 Etiri, Noi Numamode Dabade God Da Kamboda+ Iseri.*

<sup>41</sup> Ghaeko ava inono, Iesu noi numamode dabade Jarige Yari da Kirumo+ ari dae sedo, Jerusalem aminda ya ghedo ghuseri.

<sup>42</sup> Iesu ghaeko 12 etiri, kirumo edo ghusera, kau daba aminga ava ari dae sedo, sekago noi numamode dabade Jerusalem iseri.

<sup>43</sup> Era, kirumo etero dadabetiri, noi numamo natofode jovereghe natida ero, Iesu Jerusalem aminda fefetusira. Fefetusira ava, noi numamo jo kasama aeri.

<sup>44</sup> Nenda kotari mo: Iesu nu natofode dabade yaria kotise era, emboro soroda tumba jiriri, nenda nano namendi a kokomanakena tava useri.

<sup>45</sup> Tava usera avata, jo tambaeri. Bune Jaredo, sekago jovereghe numo tava udo Jerusalem iseri.

<sup>46</sup> Tava ero sifo etodaba naká dadabetiri ainda amboda, nu God da Kambo+ jokáda tafuseri. Nu Israel embo da ijuga kakatode dabade anumbedo, geke minonde minonde se niningero tafuseri.

<sup>47</sup> Ijuga kakato aimi ategi eoro, Iesu geke numo beká ava seari ningido, evetu genembo aminda irisera amo, ne dudukughedo ghuseri.

<sup>48</sup> Noi numamoghae Iesu gi dudukughedo, noi Iesu kena sisira, “Nanda mandi, ni redae emingumutasi? Eteso, namane nimamoghae, nimo tava edo, bune jarutumutari.”

<sup>49</sup> Aminge setiri, Iesu nemokena sisira, “Redae na tava umutavu? Na Afa da saramana arena amo, ne anakora kasama aetevu,” aminge sisira.

<sup>50</sup> Avata ne mino jo bae useri.

<sup>51</sup> Amingedo, nu noi numamode dabade jovereghe era, reighi Nasareth aminda buvudo irise, noi numamoghae da geke nininguse, aghi edo ghusira. Avata Jerusalem aminda geke sisera ava, noi Mary dubo jokái kotise irá ghusira.

<sup>52</sup> Avori, Iesu nu dubo kotise babojusira. Amingiri, God nu dubo budo ghusira, a evetu genembo barago, nu dubo budo ghuseri.

### 3

*3:1-20 John Bafataito Ari Kato, Tuturo Edo Vironu Sedo Ghusira.*

*(Matthew 3:1-12; Mark 1:1-8; John 1:19-28)*

<sup>1</sup> Genembo javo Tiberius, nu Rome embo a evetu genembo isambu da kotofu teria edo iriri, ghaeko 15 ava dadabusira. Ainda sifo aminda, genembo javo Pontius Pilate, nu Judia frovensi ainda kotofu edo irei. Kini (King) Herod nu Frovensi Galilee kaifa edo ghusira, a Herod da namendi Philip, Ituria a Trakonaitas frovensi ava, nune kaifa edo ghusira. Genembo javo Lysanias, nu Abelin frovensi ainda kotofu edo irei.

<sup>2</sup> Reighi Jerusalem aminda, fristi+ da giti jighari etoto naká, javo Annas nengae Caiaphas ghae, fristi+ nene kaifa edo ghuseri. Sifo aminda, Zechariah da mandi John, reighi uvu a evetu genembo irae da vasa aminda ira iriri, God nunda geke ava, John osa sare dae sedo futusira.

<sup>3</sup> Mutiri gido, John eredo uvu Jordan aida dengesida ise fuse, vironu eminge sedo ghusira, “Fuvu eminda, nenda ari ekoko vujegururovo, bafaitaito aono, God nenda ari ekoko kote doyare!” vironu aminge sedo ghusira.

<sup>4</sup> God da feroveta Isaiah anakora beká, John nunda saramana rea arira ava, nunda bukuda eminge gefusira:

“Mave reighi uvu a evetu genembo irae da vasa aminda fetirise, koko fuge vironu resira,  
‘Bajari da emboro rerebevu dambu are!’

<sup>5</sup> Enda doriri ghambuvu, vose tevisa are! Urokuto amo furevu, viti dambu are!

Emboro birurughari amo rerebevu, ya dambu are! Enda vitari vosari ábarago, jevu vose vivisegare!

<sup>6</sup> Amingururovo, God da sonemba ava isagha ari, evetu genembo isambu garera!’ ”

aminge gefusira.

<sup>7</sup> Evetu genembo digari, nemoá bafaitaito are dae sedo, John kena foa ghedo ghuseri. Furureoro, nemo-kena eminge sedo ghusira, “Ne Satan da sasinguri.<sup>7</sup> Ne na jo derae areva. Ne dubo jo jovereghae ireva. God nenda ari ekoko aindae, janje eko use mino mutari erekotira ava, ne jo reda darige yae areva.

<sup>8</sup> Ágido, dubo jovereghedo, veka eveva use irivu! Erá eminge seove! ‘Abraham namanenda abua gido, God namane uju eraira!’ aminge erá seove! God nu uju aetira amo, nu sari ghamana iritirira eimi, Abraham da sasingu jinaeteri. God evetu genembo da oro aindae, jo kotae eraira. Mavejo Israel embo o oro eni amo, God jo kotae eraira.

<sup>9</sup> God nu, ika karivakoi susuda jari dae sedo, simbugedo refira. (Ika resena emo, nemori.) Ika vuji eveva jigharira amo, irarira. O jo eveva jighae arira amo, God ika amo jedo

avarakada dungari avarira,” aminge sedo ghusira.

<sup>10</sup> Seari, evetu genembo ategi edo ghuseri, “Namane nange nange areri?”

<sup>11</sup> Seoro, John nu mino eminge sedo ghusira, “Nenda tamo asugari etoto irarira amo, eni kosughe mutuvu, makasi emboi baore! Nenda bayau irarira ábarago, budo soro evu!” aminge sedo ghusira.

<sup>12</sup> Sifo eni, takesi bari kakato mendeni fera buvudo, nemo bafaitaito are dae sise, eminge siseri, “Ijuga Kato, se ningore! Namane rejoá areri?” aminge setero,

<sup>13</sup> John sisira, “Takesi da mino beká avanembo buvu! Erá kokomana dedeuse mino teria beove!”

<sup>14</sup> Aminge setiri, isoro kakato mendeni, nembarago ategi useri, “Se ningore! Namane mo, nange areri?” setero, John nemokena sisira, “Erá nenda fakinaimi evetu genembo katiyavara use, nenda moni saghimbe beove! Erá koto use, mino bari dae sedo, gungubo seove! Geka bekáda sevu! Erá nenda saramana eraeva, aida minondae sedo beisiga eove!” aminge sisira.

<sup>15</sup> John geke ava siri ningido, evetu genembo kotisera amo, “Genembo eni God mutari sisira amo, avose, numori tanojo!”

<sup>16</sup> Aminge koteri, John itatamedo sisira, “Namo, ne tefo uvuimi bafaitaito eraena. Avata nanda amboda, Genembo eni refira. Numo, genembo teria bekári. Na jo numongo iraeri. Na taká sabua bekári. Numo ne Asisi Kakara nengae avarakaghae aimi bafaitaito arira.

<sup>17</sup> Genembo amo, nu vare numamo da kaugori. Nune farava veka budo gategari dae sedo, simbuge refira. Gategedo, farava da beká ava simbuge budo, nunda kamboda fitari irarira. O anoso ifughae amo budo, avaraka sukainghae tambuno aminda fugari vosedo, evovoda aminda irarira,” John aminge sisira.

<sup>7</sup> 3:7: Afige, geke Matthew 3:7 aida duruda tege garesa.

18 Geka evia ã kotugo, geka mendeni mendeni sise, John nu God da Bino Eveva ava, evetu genembokena vironu sedo ghusira.

19 Aminge sise, nu frovensi da kotofu Herod dae ghoghora sedo ghusira. Ainda susu mo: nunda koro jo ambae iriri, noaro javo Herodias ava saghimbe bu ffitusira. ã kotugo, ari ekoko mendeni ava edo ghusira.

20 Ari ekoko mendeni edo ghusira ainda etoda usira amo, nu setiri, John bu diburada ffituseri.

*3:21-22 John Iesu Ava Bafataito Usira.*

*(Matthew 3:13-17; Mark 1:9-11)*

21 John jo dibura ae irise, evetu genembo numokena foa ghusera amo, isambu bafataito edo ghusira. Ainda amboda Iesu fira buviri, John numbarago bafataito usira. Amingetiri, Iesu nu banungiri utu afigetiri,

22 Asisi Kakara kau ribo ava jine vose fira, Iesu kena asugusira. Vose asugetiri, beka utuda ghe eminge sisira, “Nimo nanda dubo bari Mandiri. Na nindae ivuga use, aiyakoe beká resena!”

*3:23-38 Iesu Da Nombuamaneri.*  
*(Matthew 1:1-17)*

23 Iesu da ghaeko 30 avaga dadabiri, nu tuturo edo God Afa da saramana ava, isaghada edo ghusira. Evetu genembo kotedo ghusera amo: Iesu nu Joseph da mandiri.

Joseph da numamo mo Heli ri.

24 Heli da numamo mo Matthat ri. Matthat da numamo mo Levi ri. Levi da numamo mo Melchi ri.

Melchi da numamo mo Jannai ri. Jannai da numamo mo Joseph ri.

25 Joseph da numamo mo Mattathias ri. Mattathias da numamo mo Amos ri.

Amos da numamo mo Nahum ri. Nahum da numamo mo Esli ri.

Esli da numamo mo Naggai ri.

26 Naggai da numamo mo Maath ri.

Maath da numamo mo Mattathias ri. Mattathias da numamo mo Semein ri.

Semein da numamo mo Josech ri. Josech da numamo mo Joda ri.

27 Joda da numamo mo Joanan ri. Joanan da numamo mo Rhesa ri.

Rhesa da numamo mo Zerubbabel ri. Zerubbabel da numamo mo Shealtiel ri.

Shealtiel da numamo mo Neri ri.

28 Neri da numamo mo Melchi ri.

Melchi da numamo mo Addi ri. Addi da numamo mo Cosam ri.

Cosam da numamo mo Elmadam ri. Elmadam da numamo mo Er ri.

29 Er da numamo mo Joshua ri. Joshua da numamo mo Eliezer ri.

Eliezer da numamo mo Jorim ri. Jorim da numamo mo Matthat ri.

Matthat da numamo mo Levi ri.

30 Levi da numamo mo Simeon ri.

Simeon da numamo mo Judah ri. Judah da numamo mo Joseph ri.

Joseph da numamo mo Jonam ri. Jonam da numamo mo Eliakim ri.

Eliakim da numamo mo,

31 Melea ri. Melea da numamo mo Menna ri.

Menna da numamo mo Mattatha ri. Mattatha da numamo mo Nathan ri.

Nathan da numamo mo David ri.

32 David da numamo mo Jesse ri.

Jesse da numamo mo Obed ri. Obed da numamo mo Boaz ri.

Boaz da numamo mo Salmon ri. Salmon da numamo mo Nahshon ri.

33 Nahshon da numamo mo Amminadab ri. Amminadab da numamo mo Admin ri.

Admin da numamo mo Arni ri. Arni da numamo mo Hezron ri.

Hezron da numamo mo Perez ri. Perez da numamo mo Judah ri.

Judah da numamo mo,

34 Jacob ri. Jacob da numamo mo Isaac ri.

Isaac da numamo mo Abraham ri. Abraham da numamo mo Terah ri.

Terah da numamo mo Nahor ri. Nahor da numamo mo,



35 Serug ri.  
 Serug da numamo mo Reu ri. Reu da numamo mo Peleg ri.  
 Peleg da numamo mo Eber ri. Eber da numamo mo Shelah ri.  
 36 Shelah da numamo mo Cainan ri. Cainan da numamo mo Arphaxad ri. Arphaxad da numamo mo Shem ri. Shem da numamo mo Noah ri. Noah da numamo mo Lamech ri.  
 37 Lamech da numamo mo Methuselah ri. Methuselah da numamo mo Enoch ri. Enoch da numamo mo Jared ri. Jared da numamo mo Mahalaleel ri. Mahalaleel da numamo mo Cainan ri.  
 38 Cainan da numamo mo Enos ri. Enos da numamo mo Seth ri. Seth da numamo mo Adam ri. ã Adam da numamo mo God ri.

#### 4

*4:1-13 Satan Iesu Da Fakina Dere Gari Dae Usira.*  
*(Matthew 4:1-11; Mark 1:12-13)*

1 Iesu nu, Asisi Kakara ai asuge-tiri dubo kotise, Jordan Uvuda ghe jovereghe isira. Asisi Kakara aimi nu unumbe budo ira, reighi uvu ã evetu genembo irae da vasa aminda isira.

2 Buvudo ira, sifo 40 aminda iriri, Satan fira numokena buvudo, nunda fakina ava dere gosusira. Iesu bayau jo mindae, kanangara use iriri, sifo 40 ava dadabiri, nu ighoi usira.

3 Etiri gido, Satan numokena sisira, “Ni God da Mandi iraresa amo, se ghamanaé farava jinari mindase!”

4 Setiri, Iesu mino sisira, “God da Geka eminge resira:

‘Evetu genembo oka bayau vanembo kotarera amo, God da jebuga beká jo tambae arera.’ ”

5 Aminge setiri, Satan Iesu unumbe bu vitira, reighi ã frovensi isasambu endada irira, ainda fakina ã duro ava, jighi afigetiri fuge gosusira.

6 Gosiri, Satan numokena sisira, “Reighi mendeni mendeni eregosesa evia, God nunda ungo sokinembetiri nane ruruseni. Genembo mavejoá

uju arena amo, nane saono nu reighi ainda kotofuko arira. A enda ainda reighi isasambu da fakina ã gugua numokena mutarena.

7 Ava sedo, Iesu, ni namoá tumonde baingharsa amo, reighi ainda duro eregosesa evia, nimo-keno mutono baresa,” aminge setiri,

8 Iesu mino numokena sisira, “God da Geka eminge resira:

‘Nenda Bajari God nusuka numoá, tumonde bainghuse, nunda uju avanembo areva!’ ”

9 Setiri, Satan nu Iesu unumbe budo Jerusalem aminda ira buvudo, God da Kambo+ ainda enoda viti ira fetedo, Satan jovereghe Iesu kena sisira, “Ni God da Mandi iraresa amo, jaunghe gaone!

10 Jaunghaso dae resena ainda susu mo, God da Geka eminge resira: ‘God nunda aneya ni kaifa aoro dae sedo, dengoro indarira.’

11 A God da Geka eni barago eminge resira,

‘Aneya nene ni kaifa ururoro, ni vosiya nenda ungodá desembedo vose fetaresa.

Ninda ata jo ghamanai de fokughuse, jorae arira.’ ”

Satan aminge setiri,

12 Iesu mino numokena sisira, “Resesa amo, geka bekári. Avata vasa eninda, God da Geka eminge resira: ‘Nenda Bajari God ava, jo dere gari dae ae areva.’ ”

13 Aminge setiri, Satan nu derari Iesu durari gari dae usira ava, jo inono ae etiri gido, nu Iesu sifo tufako do darigusira.

*4:14-15 Iesu Nu Frovensi Galilee Aminda Tuturo Edo, Saramana Edo Ghusira.*

*(Matthew 4:12-17; Mark 1:14-15)*

14-15 Iesu Asisi Kakara ai asugusira ava jo darigae iriri ainghae dabade, jovereghe ira Frovensi Galilee aminda buvurutusira. Buvudo, reighi mendeni kena ise, natofó da dengoro indari kambo+ mendeni aminda vironu seari ningido, nunda sakai sedo ghuseri. Sakai sero, nunda bino ivegedo iri, ‘evetu

genembo frovensi aminda, isambu nininguseri.

*4:16-30 Iesu Nunda Reighi Nasareth Aminda, Vironu Setiri Ningido, Dubo Ekoko Useri.*

*(Matthew 13:53-58; Mark 6:1-6)*

<sup>16</sup> Iesu nunda reighi Nasareth aminda ira buvudo, nu evovoda edo ghusira aminga ava use, Jangutari da Sifoda, ira dengoro indari da kamboda+ teterusira. Teredo, God da Geka tegari dae erorusira.

<sup>17</sup> Eretiri, God da Geka Isaiah gefusira ava, mutero bu afigedo, geka evia tambudo tegutusira:

<sup>18</sup> “Bajari da Asisi namokena asug-etiri irena. Ainda beká mo: evetu genembo makasi embokena, Bino Eveva saono dae sedo, na gategusira.

Evetu genembo ari ekoi bundetiri irera ava, saono vujege doyoro dae sedo, Bajari setiri ojigheni.

Evetu genembo diti digoide ava sonembaono, diti afigari gaoro dae sedo, na mutiri ojigheni.

Evetu genembo, nenda kokotofuimi jo tavo ae eraera ava, foa sonembaono jejebugaoro dae sedo, setiri ojigheni.

<sup>19</sup> A God, ghaeko eminda nunda jebuga ijugarira, ava osa saono dae sedo, setiri na ojigheni.”

Geka ava tegutusira.

<sup>20</sup> Tegedo, Iesu buku gajedo, kaifa katokena mutiri biri nu anumbusira. Anumbetiri, dengoro indari da kambo+ aminda, evetu genembo isambu fuge Iesu gosero,

<sup>21</sup> nu tuturo edo sisira, “Geka oroko nembo teguteno ningeva amo, beká sirorerirere,” aminge sisira.

<sup>22</sup> Iesu geka numo beká ava se disugetiri niningero, tamo gafusira. Etiri ne jovereghe tofo tofo se nininguse yove siseri, “Emo Joseph da mandiri. Nu kotari emo reda rurusi?” aminge setero,

<sup>23</sup> Iesu nemokena sisira, “Ne rea kotise, uju ereva amo, na kasama

ereva. Amo, namokena eminge sari dae ereva, ‘Geka tege beká siro-rariá setesa amo, reighi Kaponiam aminda rea eteso binó setero niningusera ava, sekago eminda ururaso namane gido, tumondaore!’

<sup>24</sup> Avori, na nemokena eminge resena: feroveta da geka ava, evetu genembo isambu ningido kakara eraera. Avata feroveta tofo nunda tofofoi, nu jo tumonduse kakara ae eraera. Aminguse, na nati joká jo dae etevu.

<sup>25</sup> “Kote givu! Ne feroveta Elijah da kiki kasama ereva. Elijah banungetiri, boriya jo dirae iriri baimara tomanako siroredo, ghaeko 3 1/2 dadabusira. Ainda sifoda, roriri digari namondeda reighi Israel eminda iriari.

<sup>26</sup> Avata God setiri Elijah ira, gitofu da frovensi Saidon reighi Serafet aminda buvudo, gitofu da rori eniá sonembusira. O tofo namondeda roriri eni jo sonembaeri.

<sup>27</sup> ã kotugo, feroveta Elisha da sifoda, evetu genembo digari namondeda reighi Israel eminda kae budo iriari. Avata God jo sari ne jebugaeri. God setiri namonde Jusi embo da gitofu, Syria embo, genembo javo Naaman, nusuka numoá jebugusira.”

<sup>28</sup> Aminge setiri, evetu genembo dengoro indari da kambo+ aminda irisera, aimi ningido, janje ekoko beká ava useri.

<sup>29</sup> Aminguse, ne eredo Iesu ungodá jumbudo, nati jokáda vitererisera reighiá do darigedo, vitera jiroda kounghuseri. Viti fetedo, Iesu fananda fugoro vosiya de ambare dae ero,

<sup>30</sup> nu jovereghedo ira, natofu jokáda teredo isira.

*4:31-37 Iesu Sukaru Ondiri, Genembo Da Jokáda Ghe Vose Darigusira.*  
*(Mark 1:21-28)*

<sup>31</sup> Ainda amboda, Iesu ira, Frovensi Galilee reighi Kaponiam aminda buvurutusira. Buvudo,

Jangutari da Sifo aminda, ira dengoro indari da kamboda+ teredo, tuturo edo dengoro indudusira.

<sup>32</sup> Indudiri, natofo geke ava ningido dudukughuseri. Ainda beká mo: Iesu dengoro indudusira amo, geke nunda fakinaghae dabade sisira.

<sup>33</sup> Genembo eni, sukarui asugetero ireira amo, tere anumbedo, Iesu geke siri ningido, nu sukaru da fakinaimi koko sise sisira,

<sup>34</sup> “Agá, Iesu, Nasareth embo, ni namanekena nange ari dae fumutasi? Ni saso namane sirivo aoro dae sedo fumutasi, ai? Namane ni kasama erera, Ni God da Genembo kakarago bekári,” aminge sisira.

<sup>35</sup> Setiri, Iesu numokena kovionoghadedo sisira, “Beka dodo, genembo ainda jokáda ghe fu buvase!” aminge setiri, sukaruimi fugetiri genembo natofo da dombuda duduriri, nu vose darigusira. Sukaru numokena rejo eni jo aeri.

<sup>36</sup> Ava gido, evetu genembo isambu dudukughedo dabade se nininguseri, “Geke emo rejori? Nu geke fakinaghae seari sukaru ningido, evetu genembo da jokáda ghe vose darigeraera,” aminge siseri.

<sup>37</sup> Aminge sero, Iesu da Bino ava ivegedo iri, reighi isambu nininguseri.

*4:38-41 Iesu Setiri, Evetu Genembo Digari Jebuguseri.*

*(Matthew 8:14-17; Mark 1:29-34)*

<sup>38</sup> Iesu dengoro indari da kamboá+ dodo ira, Simon da kamboda teterusira. Teretiri, Simon da imboti kae budo, tamo vevera teria beká iri fasirisira ava, setero niningusira.

<sup>39</sup> Iesu ava ningido ira, nunda dengesida fetedo, kovionoghae tamo vevera aikena setiri darigiri jebugusira. Jebugedo, anakora nu eredo bayau simbugedo nemokena futusira.

<sup>40</sup> Tumba jiriri, evetu genembo kae dombu eni dombu eni bambudo iriara ava, isambu nenda kokomanaimi budo fera Iesu kena buvuruseri. Buvero, Iesu nunda ungo

nenda tamonda jighiri, ne isambu jebuguseri.

<sup>41</sup> Sukaru evetu genembo da tamonda iriara, ábarago ondiri vose dariguseri. Amingiri, ne koko siseri, “Ni God da Mandiri!” Aminge setero, Iesu nu kovionoghae, beka erá seóro dae sise buregusira. Ainda susu mo: sukaru kasama useri, God genembo eni mutari sisira amo, Iesu ri. Ava sedo, erá sukarui seóro natofo numo kasama eóro dae sise, Iesu ne buregusira.

*4:42-44 Iesu Reighida Ise, Vironu Sedo Ghusira.*

*(Mark 1:35-39)*

<sup>42</sup> Sifo atetiri, Iesu eredo reighiá dodo, evetu genembo irae da vasa aminda iri, evetu genembo tuturo edo numoá tava useri. Tava udo era tambudo, nu nemonde irare dae benunu siseri.

<sup>43</sup> Avata nu sisira, “God nange nange nunda natofo+ kaifa eraira ainda Bino Eveva ava saono dae sedo, na dirigetiri fuseni. Ava sedo, na ya reighi mendeni mendeni aminda, Bino evia inononda sise deingharena.”

<sup>44</sup> Aminge sedo, Iesu nu eredo Israel embo da reighi aminda birurughuse, dengoro indari da kamboda+ teterudo ise, vironu sedo ghusira.

## 5

*5:1-11 Iesu Nunda Ambo Jimbi Mendeni Aghi Eari, Eredo Nemonde Deinghedo Ghuseri.*

*(Matthew 4:18-22; Mark 1:16-20)*

<sup>1</sup> Sifo eni, Iesu ira, Genesaret Uvu Teria ainda dengesida fetiriri, evetu genembo God da Geke ningari dae sedo, tofo tofo mimudo era numokena buvuruseri.

<sup>2</sup> Avori, kora aminda ghaka+ etoto naká jerighetero iriri, oka bambari embo vose nenda voto seghero ghususira.

<sup>3</sup> Gido, Iesu vosira ghaka+ eninda vivitusira. Ghaka amo, Simon da ri. Viti fetedo, gembu sirigedo amboi

buvare dae sisira. Setiri gembu buviru, Iesu ghakada+ anumbedo, evetu genembo ava dengoro indudusira.

<sup>4</sup> Indiri dadabetiri, jovereghedo Simon kena sisira, “Gembu vosivu, kafuruda vosedo, voyuva fuge jumbove!” aminge setiri,

<sup>5</sup> Simon sisira, “Bajari, tumbaghae fugutero atetira ainda jokáda, oka eniko jo baeri. Avata nine resesa ágido, sekago fuge garena.”

<sup>6</sup> Aminge sedo, voyuva fugetero vosetiri, oka jo sari irae ava barido, jumbero voto bejari dae usira.

<sup>7</sup> Etiri, ne nenda kokomana ghaka+ eninda anumbirero gido, ne foa nemo sonembaore dae sedo, ungoi farighuseri. Farighetero, fera sonembedo bero, ghaka+ etoto naká bedo edo rosari dae usira.

<sup>8-10</sup> Etiri, Simon nunda kokomanade dabade oka digari jufusera ava gido, dudukughuseri. Kotugo, Simon da kokomana ghaka eninda, nembarago gido dudukughuseri. Nunda kokomana resena emo, Zebedee da sasingu, James nengae John ghaeri. Avori, Simon (o Peter seraera) aimi, Iesu da dombuda kauboi dadarigedo sisira, “Bajari, na dodo yasi! Na ari eko embori.” Aminge setiri, Iesu numokena sisira, “Erá oju eose! Ni oka báresa eminga ava, sifo amboda evetu genembo digari aghi edo unumbaso, foa nanda natofo arera!”

<sup>11</sup> Aminge setiri ningido, ghaka+ fafoda jumbero vitiri, ne ati ghayafa isambu dodo, Iesu da amboda iseri.

*5:12-16 Iesu Setiri, Genembo Bedode Amo Jebugusira.*

*(Matthew 8:1-4; Mark 1:40-45)*

<sup>12</sup> Sifo eni, Iesu ira reighi eninda buvudo, genembo tamo bedo gaetiri eko beká edo ireira, ava tafusira. Tambiri, nu Iesuá gido, endada du fasedo sisira, “Bajari, ni uju aresa amo, na saso jebugarena,” aminge setiri,

<sup>13</sup> Iesu ungo siregedo nunda tamonda jijighuse sisira, “Ai, na uju erena. Jebugaresa!” aminge siri

ainghae dabade, gambisi utetegetiri jebugusira.

<sup>14</sup> Etiri, Iesu kovionoghae sisira, “Seteno jebugetesa emo, erá osa seose! Ere yasi, fristikena+ ninda tamo ijugaso gari, Moses da Geka aminda, God kena joba rea mutaso dae resira, ava mutu! Amin-garesa amo, ni jebugetesa ava, evetu genembo isambu kasama arera,” aminge sisira.

<sup>15</sup> Avata Iesu da bino amo, ivegedo iri reighi reighi ningido, evetu genembo natofogo beká ava javi edo, nunda geka ningari dae ã nemo sari jebugari dae sedo, ya ghedo ghuseri.

<sup>16</sup> Avata nu evetu genembo kakagedo ya reighi evetu genembo irae da vasa aminda, banunguse irá ghedo ghusira.

*5:17-26 Iesu Setiri, Genembo Ungo Ata Dimbaride Ava Jebugusira.*

*(Matthew 9:1-8; Mark 2:1-12)*

<sup>17</sup> Sifo eni, Iesu ira kambo eninda tere anumbedo dengoro indudusira. Moses da Geka kaifa kakato+ ã ijuga kakato+ mendeni, reighi Jerusalem ghedo ã kotugo reighi isambu Galilee ã Judia frovensi aminda ghedo fera, numokena totorugedo, anumbe niningero, nu dengoro indudusira. Bajari da fakina numokena iriri ainghae setiri, evetu genembo mendeni jejebuguseri.

<sup>18-19</sup> Ijugiri, gegenembo mendeni-imi, genembo ungo ata dimbaride ava, ghagha dighi fumbudo fuseri. Fera buvudo, kambo evetu genemboi bedo edo mambe kosegetero, ya terari buniseri. Bunedo, genemboá fumbu isaghakena ririda viti sisoro gukada anumberi. Anumbedo sisoro ghoretero toka isagha etiri, asiimi ghaghada dighido genembo ainghae dotero, evetu genembo da jokáda vosira Iesu da dombuda fassusira.

<sup>20</sup> Fasetiri, ne tumonde gogogho usera ava gido, Iesu genembo aikena sisira, “Nanda komana, God ninda ari ekoko kote dotira,” aminge siri ningido,

<sup>21</sup> Moses da Geka ijuga kakato ā kaifa kakato+ tuturo edo eminge kotiseri, “Genembo omo, nu eminge sise God da javo etiri eko erira. God nusukako ari ekoko kote doyeraira. Jo tefo genembo eniimi ari ekoko kote doyari da kaugo iraeri,” aminge kotiseri.

<sup>22</sup> Aminge kotero, Iesu nenda kotari ava kasama edo sisira, “Ne redae kotari ekoko erekotevu?”

<sup>23</sup> Kote givu! Ne erekoteva: na benunu sarena amo, God genembo einda ari ekoko jo kote doyae ari ava erekoteva. A nenda kotari eni mo: nu jebugare dae saetena amo, jo jebugae aeti, ne aminge erekoteva na kasama erena.

<sup>24</sup> Avori, nanda fakina ijugaono gareva. Evetu Genembo da Koro+ kena mo, ari ekoko kote doyari da fakina ava irira. Ava kasama aovo dae sedo, saono genemboé jebugarira,” aminge sedo, jovereghe genembo ungo ata dimbaride aikena sisira, “Eredo, ghaito budo kamboda yasi!”

<sup>25</sup> Aminge siri ainghae dabade, genembo amo natofu da dombuda eredo, nunda ghaito gaghe budo, God dae sakai sido kamboda isira.

<sup>26</sup> Amingetiri, evetu genembo isambu dudukughedo buniseri. Bunedo, oju edo God dae sakai sise, eminge siseri, “Namonde evia jo gae iriara ava, orokoá siroretiri, namondeda ditii eregoserere.”

*5:27-32 Iesu Levi Aghi Usira.  
(Matthew 9:9-13; Mark 2:13-17)*

<sup>27</sup> Ainda amboda, Iesu kamboda ghe buvudo ira, takesi bari kato javo Levi, nunda saramana da kamboda anumbiriri gosusira. Gido sisira, “Fu, nangae yaore!” aminge setiri,

<sup>28</sup> Levi eredo, nunda saramana ā gugua isambu dodo, Iesu da amboda isira.

<sup>29</sup> Ainda amboda, Levi aghi etiri, takesi bari kakato mendeni ā evetu genembo mendeninde dabade fera

anumbedo, Iesu dae sedo kirumo tomanako useri.

<sup>30</sup> Usera ava, Moses da Geka kaifa kakato+ ā ijuga kakatode+ gido, beisiga use, Iesu da ambo jim-bikena siseri, “Takesi bari kakato mo, gegenembo ekokori. Ā evetu genembo mendeni, takesi bari kakatode dabade ojighera anumbirera omo, nembarago ari ekoko embori. Ava sedo, ni redae, nemonde dabade anumbedo bayau reresi?”

<sup>31</sup> Aminge setero, Iesu mino nemo-kena sisira, “Mave, ‘Na kae tefori,’<sup>31</sup> sarira amo, dogeta (doctor) numo-kena jo yae arira. O mave, ‘Na kae beni,’ sarira amo, dogeta (doctor) numokena yarira.

<sup>32</sup> Kau daba aminga ava, mave nunda ari ekoko jo vujegae irise, ‘Na mandi eveva a ari eko eni tefori,’ sarira amo, na nu jo aghi ae arena. O mave nunda ari ekoko vujeguse, ‘Na ari eko embori,’ sarira amo, na numoá esimbugaono dubo jovereghare dae aghi arena,” aminge sisira.

*5:33-35 Kanangara Ari Da Gekari.  
(Matthew 9:14-15; Mark 2:18-20)*

<sup>33</sup> Evetu genembo mendeni Iesu kena ategi useri, “John da ambo jimbi ā Moses da Geka kaifa kakato+ da ambo jimbi, God dae bayau kanangara use banungeraera. Avata ninda ambo jimbi mo, ne sifo ghousa evia uvu bayau mindiraera,” aminge setero,

<sup>34</sup> Iesu mino nemokena sisira, “Kote givu! Mandi gimasa eni evetu ffitururari kirumo arera da sifo aminda mo, mave jo sari nunda kokomana bayau kanangara ae arera.

<sup>35</sup> O genembo evetu fitira ava, gitofui sandi bu ya daoro ambarira da sifoda, nunda kokomana dubo mema use, tuturo edo nundae kanangara arera,” Iesu aminge sisira.

*5:36-39 Irari Seka Da Geka, Amo Eviri.  
(Matthew 9:16-17; Mark 2:21-22)*

<sup>31</sup> 5:31: Afige, **Matthew 9:12** ainda duruda tege garesa!

<sup>36</sup> Aminge sedo, Iesu kasia evia sisira, “Embo boka eni manai edo toka basarira amo, jo embo sogho seka gafugedo aimi, tauta gayae arera. Ainda susu mo: tauta gayarera amo, ainda békada torerarira.

<sup>37</sup> Kau daba aminga ava, vaini (wine) seka jo budo, kofiri manai aminda averegaoro vosedo irae arira. Amingarera amo, vaini (wine) seka da fakinaimi fumbari, kofiri bejari vaini (wine) averege vose soesa arira.

<sup>38</sup> Ava sedo, vaini (wine) seka amo, kofiri sekada averegeraera.

<sup>39</sup> Evetu genembo mendeni vaini (wine) manai ava mindarera ainda amboda, ne jo sekago jovereghe vaini (wine) seka ava mindae arera. Ne vaini (wine) manai amo, evevago seraera.”

## 6

*6:1-5 Iesu Nu, Jangutari Da Sifo Ainda Bajariri.*

*(Matthew 12:1-8; Mark 2:23-28)*

<sup>1</sup> Jangutari da Sifo eninda, Iesu nunda ambo jimbide dabade vare jokáda tere sembiseri. Sembise, nunda ambo jimbi tuturo edo farava vuji ava bambudo,<sup>1</sup> ungoi jase rido iseri.

<sup>2</sup> Amingero, Moses da Geka kaifa kakato+ mendeni ava fuge gido siseri, “Nangetiraimi ne Jangutari da Sifoda, farava vuji ava bambu jase rise, namonde da agho dari erebejevu? Jangutari da Sifoda, saramana eteva amo, jo ae aetevu,” aminge setero,

<sup>3</sup> Iesu mino nemokena sisira, “Namondeda abua David nunda mendeninde dabade, ighoii sirivo use, nu nange usira amo tegutusevu, ai tefo?

<sup>4</sup> Nu ira God da Kamboda+ teredo, farava God kena joba futusera andae benunu setiri, fristi+ mutiri budo rise mutiri, nunda kokomana riseri. Aminguse, ne agho dari bejiseri. Agho dari amo, eviri:

‘Farava budo God kena joba muturaera amo, fristimane+ nesukako mindarera.’”

<sup>5</sup> Iesu geka se tano use, eminge sisira, “Evetu Genembo da Koronu, Jangutari da Sifo ainda Bajariri,” aminge sisira.

*6:6-11 Iesu Setiri, Genembo Eni Ungo Dimbaride Ava Jebugusira.*

*(Matthew 12:9-14; Mark 3:1-6)*

<sup>6-8</sup> Jangutari Sifo eni aminda, Iesu ira dengoro indari da kamboda+ teredo ijugusira. Ijugiri, Moses da Geka ijuga kakato+ ã kaifa kakato+ mendeni dabade aminda totorugedo irise, Iesu nenda agho dari ava bejari gari dae kato useri. Avata, ne kato use rea kotisera amo, Iesu nu kasama usira. Kasama edo, genembo eni ungo gimandu dimbaride anumbiriri gido sisira, “Ere fu, dombu eminda fetase!” setiri, ere fira buvu dombuda fefetusira.

<sup>9</sup> Fetetiri, Iesu nemokena sisira, “Na nemokena ategi ari dae erena. Namondeda agho dari nange resi? Jangutari da Sifo aminda, evetu genembo sonembaeteri, ai, nemokena mema mutaeteri? Sonembaoro jebugaeteri, ai, daoro ambaeteri?” aminge sedo,

<sup>10</sup> nemoá tatasegusira. Ainda amboda, nu jovereghe genembo aikena sisira, “Ninda ungo jujurege gaone!” aminge setiri, genemboá nunda ungo Iesu kena siregiri, eveva usira.

<sup>11</sup> Avata gegenembo kato erusera amo, ne janje eko beká ava edo, Iesu kena nange aetera ava se nininguseri.

*6:12-16 Iesu Nunda Ambo Jimbi Beká, Isambu 12 Ava Gategusira.*

*(Matthew 10:1-4; Mark 3:13-19)*

<sup>12</sup> Sifo eni tumba jiriri, Iesu ira doririda vitido, God kena banungiri sifo atetiri,

<sup>13</sup> Iesu aghi etiri, nunda dorevare fera, numokena totoruguseri. Totorugetero, gegenembo 12 ava

<sup>1</sup> **6:1:** Ari ambo jimbiimi usera amo, jo bagia iraeri. Afige, **Mark 2:23** ainda duruda tege garesa.

gategetiri, nunda ambo jimbi beká useri. Nunda karona use iria edo, amboda nunda Bino osa saoro dae sedo, gategusira.

<sup>14</sup> Genembo eni mo, Simon ri. Nunda javo seka Peter jijighusira. Eni mo, Peter da namendi Andrew ri. Mendeni mo, James nengae John ghae, Philip, Bartholomew,

<sup>15</sup> Matthew, Thomas, ã James ri. James resena emo, nu Alphaeus da mandiri. Eni mo, Simon o Simon Reighi Susu seraera.

<sup>16</sup> Eni mo, James da mandi Judas ri, kotugo Judas da nunombo Keriot embori. Judas resena emo, nune eredo Iesu aito usira.

*6:17-19 Iesu Vironu Sise Setiri, Evetu Genembo Mendeni Jejebuguseri.*

*(Matthew 4:23-25)*

<sup>17</sup> Iesu nunda ambo jimbi beká ava gatedo, nemonde vosera vasa tevisa eni aminda fefetuseri. Iesu da dorevare digari ainde dabade fetetero, Frovensi Judia embo, Jerusalem embo, ã evetu genembo reighi Taiar ã Saidon eva tinguda dighido iriara aimi tatetero, natofogo etiri, fera Iesu kena buvurutuseri.

<sup>18</sup> Nunda geka ningari dae ã nune sari jebugari dae sedo totoruguseri. Evetu genembo mendeni sukarui asugetero iriara ábarago, fera buvero, Iesu sukaru ondiri vose dari-guseri.

<sup>19</sup> Evetu genembo isambu nunda tamo jighari dae uju useri. Ainda susu mo: fakina numokena ghedo fira nenda tamonda sembiri, itata-muse jejebuguseri.

*6:20-26 Iesu Dengoro Induduse, Ivuga ã Dubo Mema Da Beká Ava Sisira.*

*(Matthew 5:1-12)*

<sup>20</sup> Iesu jovereghedo, nunda ambo jimbi fuge gosuse eminge sisira: “Ni makasi use iresa amo, ivugaghae iraetesi. Ainda beká mo: God ninda Bajariri.

<sup>21</sup> Ni baimaraghae iresa amo, ni ivugaghae iraetesi. Ainda beká mo: sifo amboda, God sari, ni oka bayau de aresa. Ni soraraghae iresa amo, ivugaghae iraetesi. Ainda beká mo: sifo amboda, gegha yarughae iraresa.

<sup>22-23</sup> Ni Evetu Genembo da Koro+ tumonderaesa aindae sedo, evetu genembo ni imboe edo ighagha use, nindae aji sise, ‘Ni ekori!’ sarera amo, ni ivugaghae iraetesi. Aji sari kakato resena einda nombuamane, God da ferovetakena kau daba ava edo ghuseri. Ne ava edo gharera amo, ni ivuga beká ava use, yaru divaetesi. Ainda beká mo: God utu ominda, nimokena mino eveva mutari baresa.

<sup>24</sup> “O ni endada susu iti fafode edo iresa amo, ninda gugua enda eminda dadabari, sifo amboda mema mindafugo tambaresa.

<sup>25</sup> O nimokena uvu bayau inono irira amo, ni sifo amboda baimaraghae iraresa. O ni ivugaghae iresa amo, ni sifo amboda soraraghae iraresa.

<sup>26</sup> O evetu genembo nindae sakai siruroro ningaresa amo, erá aindae ivuga eose! Amo, ni dara baresa. Ainda beká mo: nenda feroveta gungubo kakato aindae sakai daba ava sedo ghuseri,” Iesu aminge sisira.

*6:27-36 Namondeda Gitofu Nange Dubo Baeteri.*

*(Matthew 5:38-48; 7:12)*

<sup>27</sup> Aminge sise, Iesu sisira, “Avata emo ningovo dae resena. Nenda gitofu dubo buvu! Evetu genembo ne imboe eraera ava sonembuse, dubo buvu!

<sup>28</sup> Mave nemokena jijivu sarira amo, nu esimbugevu! Mave nemokena dara arira amo, nundae banungevu!

<sup>29</sup> Genembo mave ni dedo, kotugo umbu eni dari dae arira amo, do dare! Mave ni katiyavara edo, tamo asugari kosughe barira amo, do ninda javoghae bare!

<sup>30</sup> Mave nimokena roera enidae benunu sarira amo, tefo mutu bare!

Mave nimokena roera eni bagia arira amo, ainda minonda erama seove!

<sup>31</sup> Ni rea evetu genembo nimokena aoro dae koterasesa, kau daba aminga ava, ni nemokena edo gharesa!

<sup>32</sup> Ninda komana ni dubo rururari, aindae minonda nu dubo baresa amo, God ni jo aindae esimbugae arira. Eregoseva: ari ekoko embo barago, minonde minonde dubo buraera. Ava sedo, evetu genembo ni dubo buraera avanembo dubo baresa amo, God aindae ni jo esimbugae arira.

<sup>33</sup> Ninda komana ni sonembururari, aindae minonda nu sonembaresa amo, God ni jo aindae esimbugae arira. Eregoseva: ari ekoko embo barago, minonde minonde sonemberaera. Ava sedo, evetu genembo ni sonemberaera avanembo sonembaresa amo, God aindae ni jo esimbugae arira.

<sup>34</sup> A kau daba aminga ava, ninda komana ni moniimi sonembururari, aindae minonda nu moniimi sonembaresa amo, God ni jo aindae esimbugae arira. Eregoseva: ari ekoko embo barago, minonde minonde moniimi sonemberaera. Ava sedo, evetu genembo ni moniimi sonemberaera avanembo moniimi sonembaresa amo, God ni jo aindae esimbugae arira.

<sup>35</sup> Geka einda beká mo eviri: ninda gitofu dubo ruruse, sonembe! Moni futuse, mino bari dae erá koteose! Amingaresa amo, ni sifo amboda mino tomanako budo, God Teria Beká ainda natofo aresa. Ainda susu mo: ari ekoko embo ne God kotae use 'aiyakoe' jo sae eraera avata, nu nemokena kavevera eraira.

<sup>36</sup> God Afa aminguse, joka eraira. Kau daba aminga ava, ninda kokomanadae joka aresa!" Iesu aminge sisira.

*6:37-42 Iesu Aji Sari Kakato Da Geka Sisira.*  
(*Matthew 7:1-5*)

<sup>37</sup> Aminge sise, Iesu sisira, "Ni komana da ari ekoko jo ijujae aresa amo, God ninda ari ekoko jo ijujae arira. Ni komana da ari ekokodae mema mutari jo sae aresa amo, sifo amboda God ninda ari ekokodae mema mutari jo sae arira. Ni komana da ari ekoko kote doyaresa amo, God ninda ari ekoko kote doyarira.

<sup>38</sup> Ni komana sonembaresa amo, God ni sonembarira. Ni sonembuse rejo mutaresa ava, God ni sonembuse mino mutarira. Mino nindae mutarira amo, bedo edo aveverege vose fasarira. Avata ni kau mavega mutaresa aminda inono use, God kau daba ava nindae mutarira."

<sup>39</sup> Aminge sedo, Iesu kasia eni eminge sisira, "Genembo diti digoide aimi, jo nunda komana digoide ava unumbe budo, emboro ijugae arira. Amingarira amo, nengae dabade emboro kosasaghedo, ya bakoda durarera.

<sup>40</sup> Sasingu faiya eraera amo, nenda kasama jo ijuga kato da kasama amingo iraeri. O faiya aoro dadabarira amo, nenda kasama mo ijuga kato da aminga ava arira.

<sup>41</sup> "Eni mo: erama ninda ari ekoko mindafu irarira ava dotutuse, ninda komana<sup>41</sup> da ari eko kitako ava ijujeose! Ni redae faragho ninda ditidagae fetirira amo sofughae irise, ni komanada ditida fonja ava fusaso buvare dae eresi?

<sup>42</sup> Nimo gungubo katori! Faragho ditida fetiriri ainghae iresa avata, nangetiraimi komana da ditida fonja ava fusaso buvare dae resesi? Eveva mo, giti ninda ari eko tomanako ava vujegaso eveva ari gido, amboda ya ninda komana sonembaresa.

*6:43-45 Ari Eveva A Ari Eko Da Beká Mo, Evetu Genembo Da Janje Jokári.*

(*Matthew 7:16-20; 12:33-35*)

<sup>43</sup> "Ika evevai nunda vuji eveva ã garigo jighiraira. O ika eko amo, nunda vuji sembae jighiraira.

<sup>41</sup> **6:41:** Afige, geka **Matthew 7:3** ainda duruda tege garesa.



<sup>44</sup> Ika kau mavega amo, nunda vujída gosuse kasama eraera. Kauro da vuji, jo ya asi buaretifa aminda jighido irari, bu foa mindae eraera. A mofi da vuji mo, jo ya ika fokono aminda jighido irari, bu foa mindae eraera.

<sup>45</sup> Kau daba aminga ava, genembo eveva, nunda janje jokáda geka eveva ã ari eveva ava irá gheraira amo, foa isagha eraira. Genembo eko barago, nunda janje jokáda geka eko ã ari ekoko ava irá gheraira amo, foa isagha eraira. Genembo da janje jokáda, rejoimi bedo edo irá gheraira amo, foa isagha eraira.

*6:46-49 Iesu Nu Kambo Etoto Da Kasia Ava Sisira.*  
(*Matthew 7:24-27*)

<sup>46</sup> “Ne redae nandae ‘Bajari, Bajari!’ sise, nanda geka jo ningae eraevu?

<sup>47</sup> Mave nanda geka ningido amingarira amo, nunda kau mavegori, ava ijugaono kasama areva.

<sup>48</sup> Nu kau genembo eni bako ghambu tutumbi darido, ghamana endaghae vendi gaetiri fakara e gogoghombetiri, ainda etoda nunda kambo iti dotiri fetetira. Ainda amboda, usegha beje buvira, avata kambo amo jo gofaeri, nunda kambo eveva itira ava sedo.

<sup>49</sup> O mave nanda geka ningido jo ae arira amo, nu kau genembo eni kambo itari dae use, tutumbi jo ghambu gogoghombae etira ainda kaugori. Etiri, usegha beje buvudo osinimbetiri, kamboá du de bunununghe fasetira,” Iesu aminge sisira.

## 7

*7:1-10 Iesu Setiri, Rome Embo Da Giti Jighari Da Saramana Kato Jebugusira.*

(*Matthew 8:5-13*)

<sup>1</sup> Setiri dadabetiri, natofo isambu taraghetero, Iesu reighi Kaponiam aminda ira teterusira.

<sup>2</sup> Rome embo da isoro kakato da giti jighari eni, reighi aminda irei. Nunda saramana kato eni dubo

bu gogoghombedo ghusira ava, kae tomanako budo ambari dae iri, Iesu ira reighi aminda teterusira.

<sup>3</sup> Teretiri, Rome embo da giti jighariá Iesu da bino ava ningido, Jusi embo da babojegari mendeni dirigetiri aghi iseri, saoro Iesu foama saramana kato ava sari jebugare dae sedo.

<sup>4</sup> Era, Iesu kena buvudo, nu furare dae uju beká ava edo, eminge siseri, “Namane, ni genembo evia sonembaso dae resera.

<sup>5</sup> Ainda beká mo: nu namonde Israel embo dubo ruruse, namondeda dengoro indari kambo+ ava, nunda moniimi itutusira,” aminge setero,

<sup>6</sup> Iesu eredo nemonde iseri.

Era, giti jighari ainda kamboda buvari dae ero, nunda kokomana mendeni dirigetiri, era Iesu emboroda tambudo siseri, “Bajari, ni genembo teriari. Na genembo ijoghakori. Ava sedo, ni jo foa nanda kamboda terae aetesi.

<sup>7</sup> Á na jo ya nangae dombu dabade tatari da kaugo iraeri. Na kasama erena, saso jebugari da fakina mo, nimokena irira. Ni taká soka fetedo beka saresa amo, nanda saramana kato jebugarira.

<sup>8</sup> Na, nanda babojegari da geka ningiraena, kotugo nanda mendeni nanda geka ningiraera. Nanda isoro kato eni kena, ‘Yasi!’ sarena amo, yarira. O enikena, ‘Fu!’ sarena amo, furarira. A kotugo, nanda saramana katokena saramana eni are dae sarena amo, nu amingarira.”

<sup>9</sup> Giti jighari ainda geka ava setero, Iesu ningido dudukughusira. Amingedo, nu jovereghe, natofo nunda amboda isera aikená sisira, “Na eminge saono ningivu! Namó irena evia, tumondari kau évavaga ava jo gae iriana ava, nanda tuturoda orokoá eregosenere. Israel embo da jokáda barago, tumondari kau évavaga jo gae irena,” aminge sisira.

<sup>10</sup> Ainda amboda, aghi kakato jovereghedo era, isoro kakato da giti jighari ainda kamboda teterusira

amo, saramana katoá anakora jebugedo iriri gosuseri.

*7:11-17 Iesu Setiri Roriko Ainda Mandiá Ambarida Ghe Jebugusira.*

<sup>11</sup> Ainda amboda, Iesu eredo nunda ambo jimbi ã natofode dabade era, reighi javo Nein aminda buvurutuseri.

<sup>12</sup> Buvudo era, furu dighero ireira ainda guro bekada tetetero, natofo ne ambari embo eni ava fumbu ya furugari dae sedo, fera guroda buvurutuseri. Ambari embo amo, nu evetu rori ainda mandi dabako tainako avori. Roriá ekoko iri, natofo digari fera sonembudo iseri.

<sup>13</sup> Iesu rori ava gido, joka use sisira, “Erá sorara eose!”

<sup>14</sup> Aminge sedo, ira ghaghada jighiri, ne tukughe fefetuseri. Fetetero, Iesu mandi ambari aikena sisira, “Nanda mandi, jebugaso dae resena!” aminge setiri,

<sup>15</sup> jebuge ere anumbedo beka sisira. Beka setiri gido, Iesu mandiá noikena futusira.

<sup>16</sup> Natofo isambu ava gido, oju use God dae sakai sise, eminge siseri, “God da feroveta teria eni ojira buvira,” kotugo, geke eni mo, “God namane sonembari dae sedo ojighira,” aminge siseri.

<sup>17</sup> Iesu amingusira ainda bino ava ivegedo iri, reighi mendeni mendeni Judia frovensi aminda nininguseri.

*7:18-35 John Bafataito Ari Kato Da Ambo Jimbi Era, Iesu Kena Ategi Useri.*

*(Matthew 11:2-19)*

<sup>18-19</sup> Iesu amingedo ghusira ainda bino ava, John Bafataito Ari Kato da ambo jimbi ningido, era setero, John niningusira. Ningido, John nunda ambo jimbi etoto aghi etiri fera buvero, nu sisira, “Iesu kena yasivu! Ategi use eminge sevu: God Genembo eni dirigari furariá sedo ghusena amo, nimori, ai, namane Genembo eni kaifa aore?” John aminge sedo, ne dirigetiri iseri.

<sup>20</sup> Era, Iesu kena buvudo siseri, “John Bafataito Ari Kato namane

dirigetiri, nimo ategi e ningari dae sedo ojigheri. God Genembo eni dirigari furariá sedo ghusira amo, nimori, ai, namane genembo eni kaifa aore?” aminge siseri.

<sup>21</sup> Sifo daba aminda, Iesu setiri evetu genembo digariá jejebuguseri; diti digoide setiri jebuguseri, ã setiri sukaru evetu genembo mendeni da jokáda ghe vose dariguseri.

<sup>22</sup> Etiri, nu John da aghi kaka-tokena sisira, “Ne jovereghe yasivu! Na rea eno eregoseva ã seno niningereva evia, osa sevu John ningare! Na seteno evetu genembo diti digoide ava, diti fangetiri eregoserá. Seteno evetu genembo daguna jebuge eredo, atai fete deingherera. Seteno evetu genembo tamo bedode ã isode, utetegetiri jejebugeteri. Dengoro gajari embo amo, seteno dengoro afigetiri geke niningerera. Seteno, ambari embo uroda ghe jebuge ereteri. A vironu seno makasi embo ne, God da Bino Eveva ava niningerera.

<sup>23</sup> Mave na jo bunae ae arira amo, nu esimbugari barira,” aminge setiri ningido, John da aghi kakato jovereghedo iseri.

<sup>24</sup> Ne jovereghe ero, Iesu tuturo edo natofokena John dae sise, eminge sisira, “Ne giti redae reighi uvu ã evetu genembo irae da vasa aminda isevu? Ne jo reighi gari dae sedo yaeri. Ne John gari dae sedo isevu.

<sup>25</sup> ã ne, genembo kau mavega ava tambari dae sedo isevu? Genembo dubo kotari irae, ai, dubo kotaride? Ne jo nunda tamo asugari ã gogho ava gari dae sedo yaeri. Ava gari kotaeteva amo, ne ya kotofu da kamboda tava aetevu.

<sup>26</sup> Ava sedo, reje tambari dae sedo isevu? Avori, saono ningivu! Nemo, God da feroveta ava tambari dae sedo isevu. Emo, na geke beká sari dae erena. Feroveta digari irera ainda teriá mo, John ri.

<sup>27</sup> God nunda Geke John dae sise, setiri gefusera amo, eviri:

‘Kote gi! Nanda aghi kato ava, giti dirigaono ya ninda emboro rerebururari, ni amboda yaresa,’

aminge gefuseri.

<sup>28</sup> Kotugo na eminge resena, John nu genembo teria bekári. Genembo eni numongoá jo sirorae irera. Avata na emboro+ seka God kena afigaono, mave aminda ise ã tumonduse, God da natofo+ arira amo, nunda dubo kotari ã ivuga amo teria arira. Aimi, John da dubo kotari ã ivuga amo darigarira,” aminge sisira.

<sup>29</sup> Evetu genembo isambu, takesi bari kakatode, John da geka ningido, nenda ari ekoko vujegetero, ne bafataito usira. Amingusera amo, ne God da uju ava useri.

<sup>30</sup> Avata Moses da Geka kaifa kakato+ ã ijuga kakatode+ dabade buregetero, John ne jo bafataito ae usira. Amingusera amo, ne God da uju ava imboe useri.

<sup>31</sup> Iesu sekago sisira, “Evetu genembo oroko endada siroredo ireva, nenda irari kau mavegori ava saono ningivu!

<sup>32</sup> Nemo sasingako da kaugori. Aminge resena da beká mo, eviri. Sasingako ne ofotighida yaru use tofo tofo beisiga use, ghoghora sirureoro ningiraera, ‘Ne imboe kakatori! Namane esimbuguse yaru divari da kau etera ava, ne jo namonde divaeri. Amboda, kau ambari budo sorara arigetera, ne jo namonde sorara aeri. Ne beisiga a imboe kakatori!’ Amo, sasingui eraera. Evetu genembo oroko endada siroredo ireva emo, ne kau daba ava eraeva.

<sup>33</sup> Amo, saono ningivu! John Bafataito Ari Kato fira vaini (wine) reeta use, God tambari dae sise, bayau kanangara edo ghusira. Eari, ne sedo ghusevu, ‘Sukarui John kena asugetiri daghusira,’ aminge sedo ghusevu.

<sup>34</sup> O Evetu Genembo da Koro+ mo, foa bayau rise vaini (wine) rirureari gido seraeva, ‘Genemboé

givu! Nu bayau mindari kato, ã vaini (wine) da oduso katori. Nu evetu genembo eko beká aikena, komana eraira.’ Evetu genembo oroko endada siroredo ireva emo, ne aminguse beisiga eraeva.

<sup>35</sup> Avata na eminge resena! Na mavejori, ã John barago mavejo ava, evetu genembo duboi kotise, geka beká kasama erera,” Iesu aminge sisira.

*7:36-50 Evetu Ari Ekoko Edo Ghusira Aimi, Fira Iesu Da Ata Seghusira.*

<sup>36</sup> Moses da Geka kaifa kato+ eni javo Simon, Iesu foa numokena bayau mindare dae sedo, aghi etiri, Iesu ira nunda kamboda teredo, bayau mindari dae anumbusira.

<sup>37</sup> Evetu eni, kombo yagera kato, reighi aminda irei. Evetuá nu, Iesu nengae Moses da Geka kaifa kato ghae dabade bayau mindari da bino ava kasama edo, usu muká botoroda ava budo ira Simon da kamboda teterusira.

<sup>38</sup> Teredo ira, Iesu da gukakena buvudo kauboi dadarigedo, sorara iri diti jivu vovosusira aimi, Iesu da ata seghedo ã beoimi ghajisira. Ghajedo, usuimi atada averegusira.

<sup>39</sup> Amingiri, Simon kotisira, “Genembo emo jo God da feroveta iraeri. Evetu emo ekori, ava feroveta anakora itatamedo ghoghora saeti.”

<sup>40</sup> Aminge kotiri, Iesu numokena sisira, “Simon, na nimokena geka tufako sari dae erena,” setiri, Simon sisira, “Ijuga Kato, se ningone!” aminge sisira.

<sup>41</sup> Setiri, Iesu numokena sisira, “Gegenembo etoto naká aera benunu setero, genembo eni aimi sonembuse nemokena moni+ mutira. Genembo eni kena K5,000 mutira, enikena K500 mutira.

<sup>42</sup> Amboda, ne mino mutari bune Jaredo setero, genembo amo setira, ‘Avorasi, erá koteove!’ aminge setira. Avori, Simon, kote gi! Ni erekotesa: nengae bera amo, mavejo moni mutari kato ava dubo bu gogoghombéri? K500 mutiri bira

avori, ai? K5,000 mutiri bira avori?" aminge sisira.

<sup>43</sup> Setiri, Simon Iesu kena mino sisira, "Avoise, na erekotena, mave K5,000 bira avori tano. Moni tomanako numokena kote dotira ava sedo," aminge setiri, Iesu sisira, "Geka beká resesa," aminge sedo,

<sup>44</sup> nu jovereghedo evetuá gosuse, Simon kena sisira, "Evetu emo eregosesa? Na ninda kamboda tereteno, ni nanda ata uvuimi jo seghae etesi. Avata evetu emo, nunda jivuimi nanda ata seghedo beoimi ereghajira.

<sup>45</sup> Ninda kamboda tetereño, na nati joká jo dedo muno ae etesi. Avata evetu emo, nanda ata muno use jo doyae irira.

<sup>46</sup> Ni nanda jiroda usu jo averegae etesi. Avata evetu emo, usuimi nanda atada averegetira.

<sup>47</sup> Ava sedo, nimokena isagha resena: evetu emo na dubo bu gogoghomberrira aindae, nunda ari ekoko digari ava, God kote dotira. Avata mave nunda ari ekoko daba daba irarira ava vujegari God kote doyarira amo, genemboá nu God itako dubo barira."

<sup>48</sup> Aminge sedo, nu jovereghe evetu aikena sisira, "Seteno, God ninda ari ekoko kote dotira."

<sup>49</sup> Aminge setiri ningido, evetu genembo mendeni Iesu á Simon de dabade bayau rise irisera amo, dudukughedo tofo tofo se nininguseri, "Genemboé mavejorai ari ekoko nune kote doyerai? God nusukako ari ekoko kote doyeraira. Jo tefo genembo eniimi, ari ekoko kote doyari da kaugo iraeri," aminge siseri.

<sup>50</sup> Avata Iesu evetuá diriguse sisira, "Ni na tumonderesa ágido, God setiri jebugetsi. Dubo jamaghae yasi!" aminge sisira.

## 8

*8:1-3 Evevetu Mendeniimi, Iesu Nunda Ambo Jimbide Ava Tavo Edo Ghuseri.*

<sup>1-2</sup> Ainda amboda, Iesu ya reighi mendeni mendeni aminda, God da Bino Eveva ava vironu sedo ghusira. God nange nange nunda natofo+kaifa eraira ava, osa sedo ghusira. Nunda ambo jimbi 12 á evevetu mendeninde dabade, karonu eoro ise, vironu sedo ghusira. Evevetu resena emo, mendeni kae budo iri-ari á mendeni sukaruimi asugetero iriara ava, Iesu setiri jejebuguseri. Eni Magdara embo evetu javo Mary aikena, Iesu sukaru isambu 7 ava ondiri fera buvurutuseri.

<sup>3</sup> Eni mo, Chuza noaro javo Joanna ri. Chuza resena emo, nu Kini (King) Herod da kambo á gugua isambu ava kaifa edo ghusira. Evetu eninda javo mo Susanna ri. Evevetu eimi, evevetu mendeninde dabade, ne Iesu á nunda ambo jimbide ava, sonembuse gugua á bayau mutudo ghuseri.

*8:4-8 Genembo Vare Govetira Ainda Kasiari.*

*(Matthew 13:1-9; Mark 4:1-9)*

<sup>4</sup> Sifo eninda, evetu genembo digari reighi mendeni mendeni aminda ghedo fera numokena totorugetero, Iesu tuturo edo kasia evia sisira,

<sup>5</sup> "Genembo eni eredo, farava veka govári dae sedo, aira nunda vareda buvudo, tuturo edo veka giririghe budo, jife jafe getira. Etiri, veka mendeni begatada vosetira amo, evetu genemboi ise fuse ghuse, atai fati jaseteri, á mendeni rikamanei ojighera minderi.

<sup>6</sup> Veka mendeni mo, aroro etoda vose batuno edo gharasa etira. Gharasa etira da beká mo: aroro etoda vosetira ava sedo, uvu tefori.

<sup>7</sup> Veka mendeni mo, vive titifaghae ainda jokáda vosedo, viveghae dabade vitira. Vitido, vivei gaetiri dadabetira.

<sup>8</sup> Veka mendeni mo, enda eveva aminda vosedo, viti beká jighira. Beká jighira amo, 100 100 avavaga jighira," kasia evia setiri dadabetiri, Iesu beka fainghedo sisira, "Ka-

sia setena amo, dengoro jave ningi gogoghombevu!” aminge sisira.

*8:9-15 Iesu Kasia Sisira Ainda Tuka Mo Eviri.*

*(Matthew 13:10-23; Mark 4:10-20)*

<sup>9</sup> Setiri, Iesu da ambo jimbi fera, numokena kasia da tuka aindae ategi useri.

<sup>10</sup> Ategi etero, Iesu nemokena sisira, “God Afa kau nange nunda natofo+ kaifa eraira, ainda geka mendeni ava kivo usira. Ne nanda ambo jimbiri. Ava sedo, nu rea kivo usira ava, nemokena isagha saono ningi kasama aovo dae seraena. O natofo mendenikena, geka isambu kasiaimi ijugeraena. Aminge ijugeraena da beká mo: ne erama ditiimi gosuse gi gogoghombeore dae ã, kotugo dengoroí nininguse kasama eore dae sise, aminge seraena.”

<sup>11</sup> Aminge sedo, sekago sisira, “Kasia da tuka mo eviri. Veka amo, God da Gekari.

<sup>12</sup> Begatada vosetira amo, evetu genembo ará God da Geka ningeoro nenda ghamo jokáda voseraira ava, Satan foa saghimbe buraira avori. Satan amingeraira da beká mo: erá God da Geka tumonduse jebugeore dae sedo eraira.

<sup>13</sup> Aroro etoda vosetira amo, evetu genembo ará God da Geka ivugaghae ningiraera avata, jo tumonde gogoghombae eraera avori. Sifo tufako tumondurureoro, Satan foa dereari goferaera.

<sup>14</sup> Vive titifaghae ainda jokáda vosetira amo, evetu genembo ará God da Geka ningiraera avata, reighi da irari, enda da gugua, ã fisi da uju aimi God da Geka ava gajeari, nenda tumondari da beká jo sirorae eraira avori.

<sup>15</sup> Enda eveva aminda vosetira amo, evetu genembo ará God da Geka ningido, jighi fetedo durumuguse dubo joká isambui muturaera avori. Amingeraera aimi, beká siroreraera,” Iesu aminge sisira.

*8:16-18 Arivo Da Kasiari.*  
*(Mark 4:21-25)*

<sup>16</sup> Aminge sise, Iesu sisira, “Namonde jo arivo injibedo, okia jokáda fitae eraera, o jo ghaitoi gajae eraera. Namonde arivo injibedo, isaghada roera gari dae jigheoro jaragheraira.

<sup>17</sup> Rea jungarida aresa amo, amboda foa isagha ari kasama arera. Rea kivo aresa amo, amboda isaghada vironu sari ningarera.

<sup>18</sup> God da Geka resena evia, kote gogoghombuse irivu! Ainda beká mo: mave God da Geka ningido tumonderaira amo, God sonembururari nunda tumondari aimi beká mokogo sirorarira. Avata mave God da Geka jo ningae eraira amo, amboda nunda eveva itako irariá koteraira amo manjarira,” aminge sisira.

*8:19-21 Iesu Da Ai Ghasovu ã Nano Namendi Mavejori?*

*(Matthew 12:46-50; Mark 3:31-35)*

<sup>19</sup> Iesu noi ã nunda jamenade dabade fera, natofo digariimi vasa kosegetero gido, se ningari buniseri.

<sup>20</sup> Bunero, enii eredo ira Iesu kena sisira, “Nei ninda jamenade isaghada fetirise, nimo gari dae uju erera,” aminge setiri,

<sup>21</sup> Iesu evetu genembo isambukena sisira, “Mave God da Geka ningido, nunda uju ava eraera amo, nanda aya ã nanda jamena mo, nemori,” aminge sisira.

*8:22-25 Iesu Setiri, Eva Yaura Tukughedo Binono Usira.*

*(Matthew 8:23-27; Mark 4:35-41)*

<sup>22</sup> Sifo eninda, Iesu nunda ambo jimbide dabade, ghakada+ vosedo sisira, “Namonde sembiya betu soveni ominda darore!”

<sup>23</sup> Setiri sembise, Iesu fase avíri, yaura vovogo sufusira. Sufuse, ghaje vose ghaka+ rosari dae usira.

<sup>24</sup> Amingiri, Iesu da ambo jimbi era dederuse koko siseri, “Ijuga Kato, Ijuga Kato, namonde sirivo ari dae ererata!” aminge setero, Iesu eredo kovionoghae setiri, eva yaura tukughedo binono usira.

<sup>25</sup> Etiri, Iesu nemokena sisira, “Ne tumonderaeva amo, redari?”

Aminge setiri, ne dudukughedo oju use, tofo tofo se nininguseri, “Arie! Genembo emo kau mavegorai, setiri eva yaura nunda geke ningi? Ari emo, jo evetu genemboi ari da kaugo iraeri!” aminge siseri.

*8:26-39 Genembo Sukarui Asugeti Ireira Ava, Iesu Setiri Jebugusira. (Matthew 8:28-34; Mark 5:1-20)*

<sup>26</sup> Ne Galilee Uvu Teria aminda sembera, sovenikena frovensi eni Gerasa ondi da reighi, aminda tere dadoruseri.

<sup>27</sup> Darido, Iesu nu ghakada+ ghe vivitiri, genembo eni fira numokena buvurutusira. Genembo amo, sukaruimi asugetero, nati dodo, boka tefo emboroda deinghuse, bekuda irá ghedo ghusira. (Beku resena emo, ambari embo da ofofori.)

<sup>28-29</sup> Genemboá Iesu fuge gido, koko sise nunda dombuda dudurusira. Duriri, Iesu sukaru foa buvoro dae setiri, genembo nu sukaru da fakinaimi beka mindafu fuge koko sisira, “Iesu, ni God Teria Beká ainda Mandiri. Se ningore? Ni redae namanekena refesi? Namane nimokena benunu resera: erá namanekena mema muteose!” aminge siseri.

Genembo omo, ungo ata seiniimi (chains) bundedo kaifa urureoro iria ghusira. Avata sukaru da fakinaimi eari seini (chains) bununungheari, nu sumbudo ya reighi uvu irae da vasa aminda iria ghedo ghusira.

<sup>30</sup> Avori, Iesu nu sukarukena ategi usira, “Ne mavejori? Sevu ningone!” setiri, sukaru Iesu kena siseri, “Namanenda javo mo *Digari* ri,” aminge siseri. Ainda beká mo: sukaru digari fera, numokena asugetero irei.

<sup>31</sup> Sukaruimi aminge sedo, sekago siseri, “Erama namane dirigeóso ari ekoko mino mutari vasada tereoro dae sise resera,” aminge siseri.

<sup>32</sup> Aminge sise fuge, fuka digarigoimi bayau rise fana betuda ya foa ghero gosuseri. Gido, sukaru ne Iesu kena benunu siseri, nemoá sari sumbu fuka jokáda terari dae siseri. Setero, nu ‘avori’ sisira.

<sup>33</sup> Setiri, ne genemboá darige vosedo era, fukamanekena tere asugetero, fuka isambu sumbu fuse kenana sedo era, fananda ghasaghe vosedo, uvuda mindi sirivo useri.

<sup>34</sup> Amingetero, fuka kaifa kakato ava gido sumbu era, reighi bogu á reighi mendeni mendeni aminda buvudo, rea gosusera ava, osa setero evetu genembo nininguseri.

<sup>35</sup> Ningido ne eredo, geke sisera ainda beká ava gari dae sedo, fera Iesu kena buvurutuseri. Buvudo, genemboá sukaru darigetero, genembo beká edo boka ujudo anumbiriri gido oju useri.

<sup>36</sup> Iesu nange nange setiri sukaru vose darigetero genembo jebugusira ava, natofo gosusera aimi osa setero, evetu genembo isambu nininguseri.

<sup>37-39</sup> Ningido, Iesu ne dodo jovereghe yare dae siseri. Ainda susu mo: ne oju beká ava useri. Avata genembo jebugusira aimi Iesu kena benunu sisira, “Na nangae yaore!” setiri, Iesu numokena sisira, “Tefo, ni jo namonde yae arera. Ni jovereghedo kamboda yasi! God kau nange nange ni sonembetiri jebugusira ava, osa saso evetu genembo ningore!” aminge sedo nu ghakada+ vosedo, nunda ambo jimbide sembiseri.

Genembo amo, jovereghe reighida ise, Iesu kau nange nange sonembetiri jebugusira ava, osa sido isira.

*8:40-56 Iesu Setiri Evetu Eni Jebugusira, á Gagara Eni Ambarida Ghe Jebuge Erorusira.*

*(Matthew 9:18-26; Mark 5:21-43)*

<sup>40</sup> Evetu genembo Iesu kaifa use irero, sembera ghaka+ darido vivitero nati joká doruseri.

<sup>41-42</sup> Nati joká dorero, genembo javo Jairus fira, Iesu kena buvudo endada du fasedo, nunda ghamo joká isambuimi Iesu kena futuse, nunda kamboda yare dae benunu sisira. Ainda beká mo: nunda gagara dabako tainako, ghaeko 12 ava, kae budo ambari dae uroghe usira. Jairus mo nu, Jusi embo

da dengoro indari kambo+ aminda ireira, ainda bajari eniri. Iesu evetu genembo da jokáda gotatara udo iseri.

<sup>43</sup> Ero ainda jokáda, evetu eni fusira. Evetu resena emo, tambuno gosusira ava, ororo jo tukughae iriri, ghaeko 12 dadabetiri, ava irei. Numokena moni mavego ireira ava, isambu nunda jebuga dae sedo dogeta (doctor) manekena mutu tefo usira. Avata nu itako jo jebugaeri.

<sup>44</sup> Evetu aimi, Iesu da amboda fira nunda tamo asugari tinguda jijighiri ainghae dabade, ororo tukughusira.

<sup>45</sup> Iesu ava itatamedo ategi usira, “Na mave sire jighi?” setiri, evetu genembo isambu ighagha useri.

Amingero, Peter Iesu kena sisira, “Bajari, namonde natofo jokáda gotatara udo refera. Ni redae aminge resesi?” aminge setiri,

<sup>46</sup> Iesu sisira, “Avata mave na sire jighira amo, nanda fakina numokena sefiri na itatametení,” aminge sisira.

<sup>47</sup> Iesu nu kasama usira ava gido, evetu amo ungo ata dadaragaruse, fira nunda dombuda du fasusira. Du fasedo, nu redae Iesu sire jijighusira ã, nange nange jebugusira ava, natofo da dombuda osa sisira.

<sup>48</sup> Setiri dadabetiri, Iesu numokena sisira, “Nanda gagara, ninda tumondariimi ni jebugatesi. Ava sedo, dubo jamaghae yasi!” aminge sisira.

<sup>49</sup> Siri, aghi kato eni Jairus da kamboda ghe fira Jairus kena sisira, “Ninda gagara anakora ambira. Ava sedo, ijuga kato erá tefo fuse janjagu eure dae sise resena!” aminge sisira.

<sup>50</sup> Avata Iesu ava ningido, Jairus kena sisira, “Erama oju eose! Tumondaresa amo, nu jebugarira,” aminge sedo,

<sup>51-52</sup> era kamboda buvu fetedo, natofo aminda isambu, gagara ainda dimbia sorara ero gido, Iesu nu Peter, James, John, ã gagara ainda noi numamo ava nembo budo, evetu genembo mendeni erama kamboda

tereore dae buregusira. Bureguse sisira, “Erá sorara eove! Gagara mo jo ambaeri; nu ravira,” aminge setiri,

<sup>53</sup> ne Iesu ava dere jiseri. Ainda susu mo: ne kasama useri, gagara amo anakora ambududurusira.

<sup>54</sup> Avata Iesu nu gagara ava ungodá jighido sisira, “Nanda gagara, ere!”

<sup>55</sup> Aminge siri ainghae dabade, gagara jebugedo erorusira. Eretiri, Iesu gagaraá bayau mutoro mindare dae sisira.

<sup>56</sup> Noi numamoghae ava gi dudukughedo buniseri. Bunero, Iesu nu rea usira ava, osa seóro dae sise buregusira.

## 9

*9:1-6 Iesu Nunda Ambo Jimbi Beká 12 Ava, Dirigetiri Iseri.*

*(Matthew 10:5-15; Mark 6:7-13)*

<sup>1</sup> Iesu nunda ambo jimbi 12 ava aghi etiri totoruguseri. Etero, nunda fakina ava futusira. Amo nu, nunda javoda sukaru bu fugari ã saoro kae evetu genembo jebugari da fakina ava futusira.

<sup>2</sup> Ava futuse, God namonde nange nange kaifa eraira,<sup>2</sup> ava vironu saoro dae ã saoro evetu genembo jebugaoro dae sedo, ne dirigusira.

<sup>3</sup> Diriguse, nemokena eminge sisira, “Ne esa yareva avata, roera digari jo bu ainghae deinghae areva. Erá ketua, nenda javo, bayau, moni, ã tamo asugari da tuka ava bambudo yeove!

<sup>4</sup> Ne ya reighi eninda buvudo, kambo ningiaminda terovo, evetu genembo ne ivugaghae nati joká darrera amo, kambo daba aminda avise, saramana aovo dadabari gido, kamboá doyareva.

<sup>5</sup> O ne ya reighi eninda buvovo, evetu genembo jo ivugaghae nati joká dedo, ne jo bu tavo ae arera amo, reighiá do buvurutuse, ata danghevu, fonja aminda vosare! God nu evetu genembo amo ighagha

<sup>2</sup> 9:2: Afige, **Geka Se Disugari Da Vasa** aminda, *geka Natofo* dae rea gefusera, ava tege garesa.

arira, ava kasama aoro dae sedo, amingevu!”

<sup>6</sup> Iesu aminge sedo dirigitiri, nunda ambo jimbi eredo iseri. Era, reighi isambu aminda, God da Bino Eveva ava vironu sise, seoro evetu genembo jebugedo ghuseri.

*9:7-9 Iesu Nu Mavejori, Ava Kini (King) Herod Bunisira.*

*(Matthew 14:1-12; Mark 6:14-29)*

<sup>7</sup> Kini (King) Herod nu Frovensi Galilee ainda kotofuko edo irei. Iesu roera mendeni eari siroredo ghuseri, ainda bino ava ningido nu bunisira. Ainda susu mo: evetu genembo mendeni Iesu dae sise, numo John Bafataito Ari Kato ambarida ghe jebuge eraria seoro;

<sup>8</sup> mendeni ne, numo Elijah o God da feroveta eni ambarida ghe jebuge eraria kotedo ghuseri.

<sup>9</sup> Amingero, Kini (King) Herod bunise sisira, “Na anakora seteno, John Bafataito Ari Kato detero ambududurusira. Avata genembo emo mavejori?” aminge sise, nu Iesu gari dae uju beká ava edo ghuseri.

*9:10-17 Iesu Setiri Bayau Dige-tiri, Gegenembo 5,000 Mindero Inono Usira.*

*(Matthew 14:13-21; Mark 6:30-44; John 6:1-14)*

<sup>10</sup> Nunda ambo jimbi jovereghe fera buvudo, ne rea usera ava, Iesu kena setero niningusira. Setero ningido, Iesu eredo ne budo, reighi Betsaida aminda kikiako iseri.

<sup>11</sup> Nu aminda isira ainda bino ava ningido, natofo eredo nunda amboda iseri. Era numokena buvero gido, ivugaghae ategi usira. Ategi edo, God nunda natofo+ nange nange kaifa eraira ava, vironu sisira. Sise, setiri evetu genembo kae budo iriara amo jebuguseri.

<sup>12</sup> Amingero ungo bu iri, Iesu da ambo jimbi 12 aimi fera numokena siseri, “Eminda avari vasa eni tefori. Ava sedo, natofo dirigaso yama, reighi mendeni mendeni aminda bayau tava e rise, aminda avarera.”

<sup>13</sup> Aminge setero, Iesu nemokena mino sisira, “Bayau nene mutuvu mindore!” aminge setiri, ne siseri, “Namanekena farava ghabu soveni ã oka etoto nakári. Rejo eni tefori. Ni nange erekotesi? Ni namane, natofodae bayau omboro dae resesa, ai?” aminge siseri.

<sup>14</sup> (Gegenembo aminda totorugusera amo, 5,000 ri. Evevetu ghagurude jo tegaeri.)

Aminge setero, Iesu nunda ambo jimbikena sisira, “Gategevu, nunda diti 50 avavaga fuge anumbaore!” aminge setiri,

<sup>15</sup> nunda ambo jimbi setero fuge anumberi.

<sup>16</sup> Anumbetero, Iesu farava ghabu soveni ã oka etoto sisera ava budo, dombu utuda fainghedo, God kena ‘aiyakoe’ sisira. Sedo, farava jighi embebegedo nunda ambo jimbikena futusira, nene budo evetu genembo-kena ghasoro mindore dae.

<sup>17</sup> Mutiri bu soro etero, isasambu mindero inono usira. Bayau mindi dotero fasusira ava, Iesu da ambo jimbiimi rete budo, kanda babai isambu 12 ava vevenduseri.

*9:18-27 Iesu Nu God Da Mandi Beká Ava, Peter Kasama Edo Isagha Sisira.*

*(Matthew 16:13-28; Mark 8:27–9:1)*

<sup>18</sup> Sifo eni, Iesu ira ajagha irise banungiri, nunda ambo jimbi fera buvero, nu ategi usira, “Sevu ningone! Evetu genembo nange nange erekoteri? Na mavejori?” aminge sisira.

<sup>19</sup> Setiri, ne siseri, “Mendeni seraera amo, nimo John Bafataito Ari Kato ambarida ghe jebugedo eraria seraera. ã mendeni mo, nimo God da feroveta Elijah o feroveta eni anakora ambudo, ambarida ghe jebuge eraria seraera.”

<sup>20</sup> Aminge setero, Iesu sekago nemokena ategi usira, “Atá nemo, nange erekotevu? Na mavejori? Sevu ningone!” aminge setiri, Peter sisira, “God namanenda ari ekoko kote doyari dae sise, Genembo



eni dirigari furare dae sisira amo, nimori,” aminge sisira.

<sup>21</sup> Setiri, Iesu kovionoghae; erá geke sisira ava osa seóro evetu genembo ningeore dae sise buregusira.

<sup>22</sup> Aminge sise, sisira, “Evetu genembo da kokotofu, God da fristi+ da babojegari, ã Moses da geke ijuga kakato+, ne Evetu Genembo da Korokena+ mema tomanako mutoro itatamarira. Amo, emingarera. Na ighagha edo, saoro evetu genembo mendeniimi na daoro ambudo, sifo etodaba naká dadabari ainda amboda, na sekago ambarida ghe jebuge erarena,” geke aminge sisira.

<sup>23</sup> Avori, geke eni eminge sisira, “Mave nanda ambo jimbi edo, namonde dabade deinghari sarira amo, nu sifo ava inono nunda uju amo dodo, nanda uju avanembo arira. Nu namo tumonduse, gitofudae jo oju ae, mema ã bouvu fufudo ya ambarira, a nu avori. A nane rea eraena ava, nu kau daba ava udo yarira. Amingarira amo, nu nanda ambo jimbi edo, namonde dabade deingharera.

<sup>24</sup> Avata mave nu enda ainda gugua kotise ã ambari dae oju use, na doyarira amo, nu sifo amboda ambarira. O mave nandae sedo ambarira amo, nu amboda jebuga evovodae irari ava tuve barira.

<sup>25</sup> Mave nu enda da gugua ava dubo ruruse, roera isambu nunda tofo sise, jebuga evovodae irari ava kosasaghedo ambarira amo, givu! Aimi nu sonembarira, ai? Avata aimi nu jo sonembae arira.

<sup>26</sup> Mave nanda ijugadae meka gosse, Evetu Genembo da Koro+ ava, natofo da dombuda ighagha arira amo, amboda God Afa da usasa, aneya kakara da usasa, ã tofo nanda usasa jaraghururari ainda jokáda vose furarena da sifo aminda, na numbarago ighagha arena.

<sup>27</sup> Na oroko geke beká nemokena resena: ne mendeni nanda dombuda fetireva emo, ne jo ambae irovo, God nunda natofo+ kaifa arira da sifo foa buvari gareva,” aminge

sisira.

*9:28-36 Iesu Dombu Jovereghedo, Usasago Beká Ava Usira.*

*(Matthew 17:1-8; Mark 9:2-8)*

<sup>28</sup> Sifo 8 aminga dadabetiri, Iesu nu eredo, Peter, John, ã James budo, nemonde banungari dae sedo, doriri eni aminda vitiseri.

<sup>29</sup> Doririda vitera fetedo, banunguse Iesu nu dombu jovereghedo, usasago beká ava usira. Nunda tamo asugari barago janimbedo, foyago beká ava usira.

<sup>30</sup> Amingiri, gegenembo etoto naká fera numokena buvudo isagha edo, nemonde geke siseri. Eni mo Moses ri, ã eni mo Elijah ri.

<sup>31</sup> Ne utu da usasa ainda jokáda isagha edo, Iesu de dabade, nu nange nange God da uju ava use, reighi Jerusalem aminda ambarira ava, se nininguseri.

<sup>32</sup> Avori, Peter nunda kokomanade diti bainghetiri fafase ravisera eroruse fuge gosusera amo, Iesu nu usasa ainda jokáda, Moses Elijah de dabade geke se niningero gosuseri.

<sup>33</sup> Moses Elijah ghae Iesu doyarida dae javi ero, Peter Iesu kena sisira, “Bajari, namane budo ojesa aindae sedo, na ivuga erena. Ni nange erekotesi? Eveva mo, namane dobo etodaba naká eminda itore, eni nindae, eni Moses dae, ã eni Elijah dae itore, ai?” nu bunise aminge sisira.

<sup>34</sup> Aminge siri, foroga fira afurugusira. Etiri, Iesu da ambo jimbi oju etero, beka foroga jokáda siri nininguseri.

<sup>35</sup> Amo eminge sisira, “Nanda Mandi gategusena amo, eviri. Nunda geke ava ningivu!”

<sup>36</sup> aminge setiri dadabetiri, ne fuge, Iesu nusuka fetiriri gosuseri. Peter, James, ã John mane rea gosusera amo, kivo edo iriari.

*9:37-43 Sukaru Mandi Enikena Asugedo Ireira Ava, Iesu Setiri Vose Darigusira.*

*(Matthew 17:14-18; Mark 9:14-27)*

<sup>37</sup> Sifo atetiri, Iesu nu Peter, James, ã John de dabade, doririda ghedo

vose fero, evetu genembo digari vitéra tafuseri.

<sup>38</sup> Genembo eni natofo jokáda koko sisira, “Ijuga Kato, nanda mandi dabako tainako eviri. Nundae joka aso dae resena!

<sup>39</sup> Sukarui dederureari koko sise, jinongu tambudo yaiva tabetabe vovosurureari, ungo ata dadadagheraira. Aminguse, sukaru nanda mandi jo doyaie irira.

<sup>40</sup> Na, ninda ambo jimbiimi bu fugoro dae setena avata, ne jo aoro inono ae etira. Aindae, na nimokena budo ojena resena.”

<sup>41</sup> Aminge setiri, Iesu isambukena ghoghora sise sisira, “Ne sembae eraeva! Nangetirai ne tumondari tefori! Eveva mo: na ne doyaetena ava avori!” aminge sedo, mandi ainda numamokena sisira, “Avori, ninda mandi budo fu gaone vae!” sisira.

<sup>42</sup> Setiri, mandia Iesu kena firi, sukaruimi fugetiri dudo tamodadaragaruse ungo ata ghusa ghasa ghusira. Avata Iesu kovionoghae setiri, sukaru vose darigetiri mandia jebugusira. Jebugetiri, Iesu mandia numamokena mutiri rurusira.

<sup>43</sup> Amingetiri, natofo isambu God da fakina teria ava gido dudukuguseri.

*9:44-45 Iesu Nu Nange Nange Ambarira Ava, Sekago Osa Sisira.*

*(Matthew 17:22-23; Mark 9:30-32)*

Evetu genembo dudukughedo, Iesu rea edo ghusira ava se niningero, Iesu nunda ambo jimbikena sisira,

<sup>44</sup> “Na oroko geka rea sari dae erena emo, era kotae eove! Evetu Genembo da Koro ava sandido, gegenembo mendeni da ungodafitoro, nenda uju ava arera,” aminge sisira.

<sup>45</sup> Setiri, ne geka ainda tuka ava buniseri. Nenda munjuda kotari jo furaeri. Bunedo, ne Iesu kena ategi e ningari oju useri.

*9:46-50 Iesu Da Ambo Jimbi, Ne Tofo Tofo Beisiga Useri.*

*(Matthew 18:1-5; Mark 9:33-40)*

<sup>46</sup> Iesu da ambo jimbi tuturo edo, tofo tofo beisiga use nusuka nusuka kotiseri, “Namondeda jokáda mo, bajari mave ari?”

<sup>47</sup> Aminge kotero, Iesu anakora kasama edo, mandi kitako eni budo fitiri nunda dengesida fefetusira.

<sup>48</sup> Fetetiri, Iesu nemokena sisira, “Mave, sasingako eviviga nati joka doruse, bu tavo arira amo, nu inono, namoa nati joka doruse, bu tavo arira. A kotugo, mave na nati joka doruse, bu tavo arira, amo inono, nu God Afa na dirigetiri fusena ava, nati joka doruse bu tavo arira. Ainda tuka mo: ni tofo mandi fitaso vosari, ninda kokomana sonembuse iraresa amo, ni kotofuko aresa.”

<sup>49</sup> Aminge setiri, John sisira, “Ijuga Kato, genembo eni ninda javoda sukaru bu fugetiri gido, namane nu doyare dae siseri. Ainda beka mo: nu jo namonde dabade deinghae eraira,” aminge setiri,

<sup>50</sup> Iesu nemokena sisira, “Era amingeove! Ainda susu mo: mave namondeda gitofu jo sonembae eraira amo, nu kau, namonde sonembuse ariá eraira.”

*9:51-56 Reighi Eni Samaria Frovensi Aminda Aimi, Iesu Imboe Useri.*

<sup>51</sup> Iesu nu ambarida ghe jebuge utuda viti yari da sifo utua iri gido, nu Jerusalem yari kotise,

<sup>52</sup> javi use, aghi mutiri era, reighi eni Samaria frovensi aminda buvrutuseri. Buvudo, ne Iesu dae sedo, roera a avari vasa simbugaoro dae siseri.

<sup>53</sup> Avata Samaria embo ne, Iesu foa nenda reighida terari, unumbari imboe useri. Ainda beka mo: ne Jusi embo da gitofu edo ghusera ava sedo, nu Jusi da bogu Jerusalem yaria kotise, imboe useri.

<sup>54</sup> Samaria embo ne imboe etero gido, James nengae John ghae Iesu kena siseri, “Bajari, nange areri? Namonde saoro avaraka buburaghae utuda ghe vose foa aimi, ne avari sirivo aore, ai?” aminge setero,

<sup>55</sup> Iesu jovereghe nemokena ghoghora sise setiri,

<sup>56</sup> ne reighiá dodo era reighi eninda buvudo aminda aviseri.

*9:57-62 Evetu Genembo Mendeni, Iesu De Dabade Deinghari Siseri.*

*(Matthew 8:19-22)*

<sup>57</sup> Emboroda ero, genembo eni fira buvudo Iesu kena sisira, “Na ni tumonderena. Ni reda yaresa amo, nangae yarera,” setiri,

<sup>58</sup> Iesu mino sisira, “Agari ã rika, ne moghaghaeri. Avata Evetu Genembo da Koro+, nunda kambo ã avari vasa eni tefori. Ni nangae dabade deingharera amo, ni avari vasa jo tambae aresa,” aminge sisira.

<sup>59</sup> O genembo enikena, Iesu eminge sisira, “Fu, nangae deinghaore!” aminge setiri, genemboá mino sisira, “Bajari, nanda afa embako beká etira. Nu ambari gido irise, nangae deingharera.”

<sup>60</sup> Setiri, Iesu numokena eminge sisira, “Evetu genembo mave God da Geka jo ningi tumondae eraera amo, ne kau ambari embo da kaugori. Ava sedo, mave ambarira amo, dovu, nene bu ya furugaore! Ni yasi, God nunda natofo+ nange nange kaifa eraira aindae, vironu sase!”

<sup>61</sup> Aminge setiri, genembo eni Iesu kena sisira, “Bajari, na nangae yaetera avata giti mo, na jovereghe ya nanda natofo ategi edo, foa nangae yaore!” aminge setiri,

<sup>62</sup> Iesu numokena sisira, “God da saramana ari dae use, ni fisi da uju ava kotise jovereghahesa amo, ni God da saramana jo ae aresa,” aminge sisira.

## 10

*10:1-12 Iesu Nunda Dorevare 72 Ava Dirigetiri, Nunda Emboro Rerebari Dae Iseri.*

<sup>1</sup> Ainda amboda, Iesu nunda dorevare mendeni, 72 ava gategusira. Gategedo, nu amboda reighi reda reda yari kotisira aminda, giti dirigitiri, ne etoto etoto aminda iseri.

<sup>2</sup> Diriguse sisira, “Ghaeko sifo buviri, vare beká etira. Avata bayau bambari kakato jo digari iraeri. Ava sedo, vare Numamokena banunguruvu, bayau bambari kakato digarigo mutare!

<sup>3</sup> Ava sedo, yasivu! Ne kau, sasingako da kaugo ava ururovo, na ne dirigaono yama, evetu genembo ekoko aikena vironu sise mema itatamareva tanojo.

<sup>4</sup> Nenda javo erá beove! Nenda ata asugari erá beove! ã emboroda ise, erá fetedo umo use kiki kaka seove!

<sup>5</sup> Ne kambo ningiaminda ya buvareva amo, eminge sise ategi evu, ‘Bajari da dubo jama nemokena furare!’

<sup>6</sup> Kambo resena ainda natofoi ivuga use ne ategi arera amo, avori. Nenda ategi da geka amo irare! O ne imboe arera amo, avori. Bajari da dubo jama jo nemokena mutae areva.

<sup>7</sup> Kambo aminda avise, uvu bayau rea mutarera amo, mindari dae use erá oju eove! Rea bu mindareva amo, God da saramana areva, ainda minori.

<sup>8</sup> Ne ya reighi eninda buvovo, natofo ivugaghae nati joká doruse, bayau mutarera amo, bu mindareva.

<sup>9</sup> Evetu genembo aminda kae budo irarera amo, saovo jebugarera! Kotugo eminge sevu, ‘God nunda natofo+ kaifa ari da sifo amo, nemokena foa buvari dae erira,’ aminge sevu!

<sup>10-11</sup> O ne ya reighi eninda buvovo, natofo ne ighagha use, nendae nati joká jo dae arera amo, emboroda fetedo evetu genembo da dombuda eminge sevu, ‘God ne kaifa ari dae setira avata, ighagha eteva ava sedo, nu minonda ne ighagha arira. Ava kasama aovo dae sedo, namane nenda reighi einda fonja atada emo, danghaoro vosarira.’

<sup>12</sup> Na nemokena eminge resena: Ategi da Sifo foa buvarira aminda, reighi amo mema tomanakogo beká ava tambarira. O Sodom embo nenda ari ekoko dae, God anakora

dorusira amo, ne mema itako tambarera.

*10:13-16 Reighi Mendeni Jo Tumondae Usera Ágido, Ne Mino Eko Barera.*

*(Matthew 11:10-24)*

<sup>13</sup> “Arie, Korasin embo a Betsaida embo! Nemokena sari dae erena. Ne sifo amboda mema teria eko beká ava tambareva. Ainda beká mo: ne nanda tano a ari mendeni mendeni eono gido ghuseva avata, ne dubo jo jovereghae, kau daba ava ireva. O nanda fakina a tano evia, namondeda gitofu da reighi Taiar a Saidon aminda, ijugaono gaetera amo, ne anakora nenda ari ekoko vujegedo, dubo jovereghari da tano ava ijuguse, bohora fire asuguse á vava gutuse ghaeteri.

<sup>14</sup> Ava sedo, Ategi da Sifo aminda, Taiar a Saidon embokena, God joka ari ne mema itako tambarera. O reighi Korasin a Betsaida embo resena emo, ne mema teria eko beká ava tambarera.

<sup>15</sup> “Á eni mo: reighi Kaponiam embo nemokena resena! Ne erekoteva, nenda javo jighovo erariá erekoteva. Avata na eminge resena: God sari ne bako eko aminda ya vosareva.

<sup>16</sup> “Avori, na eminge resena: God Afa na dirigetiri fena, nunda geke ava seraena. Na jo nanda geke ava sae eraena. Ava sedo, ne ya vironu saovo nenda geke ningarera amo, inono, nane saono ningaetera avavaga arera. O ya vironu saovo ningido, ne ighagha arera amo, inono, nambarago ighagha arera. A kotugo, mave na ighagha arira amo, inono, nanda Afa namo dirigetiri fusena, ábarago ighagha arira,” aminge setiri dadabetiri, ne iseri.

*10:17-24 Iesu Da Dorevare 72 Jovereghe Fuseri.*

*(Matthew 11:25-27; 13:16-17)*

<sup>17</sup> Gegenembo 72 aimi jovereghe ivugaghae fera osa sise eminge siseri, “Bajari, namane ninda javoda roera mendeni etero sirorusira. Á kotugo ninda javoda setero, sukaru

ekoko barago namanenda geke nininguseri,” aminge setero,

<sup>18</sup> Iesu mino nemokena sisira, “Nenda geke niningusera da beká mo eviri: na, Satan kau biria avavaga utuda ghe vose firi gosuseni.

<sup>19</sup> Na aindae sise, eminge resena. Ningivu! Na nemokena fakina futusena aimi budo, ne jingabu o vuvuji fatovo gambarira, o Satan da fakina tambareva ábarago, mema jo itatamae areva.

<sup>20</sup> Avata sukaru ekoko nenda geke niningusera aindae, erá ivuga eove! Amo kitakori. God Afa nenda javo utuda gefusira, aindae ivuga aetevu! Amo teriago bekári.”

<sup>21</sup> Aminge sedo nu tuturo edo, Asisi Kakara da fakinaimi ivuga use banungusira, “Afa, utu á enda da Bajari nimori. Na nimokena aiyakoe resena. Ainda susu mo: ninda geke kivo edo diti basari embokena jo ijugae usesi, avata evetu genembo kotari veveyako a diti basae aikena ijugeteso isagha usira. Amo, ni amin-gari dae uju etiri usesi.”

Iesu aminge banungetiri dadabetiri, tuturo edo sekago natofokena vironu sisira.

<sup>22</sup> “Nanda Afa namokena roera isasambu mutiri kaifa eraena. God nusuka nune nunda Mandi kasama eraira. Kau daba aminga ava, God da Mandi nusuka nune numamo kasama eraira. A evetu genembo mendeni nune gategarira amo, nune ijugururari, nembargo God Afa kasama arera.”

<sup>23</sup> Aminge sedo, Iesu jovereghedo nunda ambo jimbi nesuka nemokena eminge setiri nininguseri, “Na nemokena resena. Ne reava nenda ditiimi eregoseva emo, nenda makoreri!

<sup>24</sup> Ne rea giraeva á ningiraeva emo, kini (king) digari á God da feroveta digari, ne gari á ningari dae uju edo ghuseri. Avata ne jo gaeri á ningaeri. Avata orokoé ne giraeva á ningiraeva aindae sedo, ne ivuga aetevu,” aminge sisira.

**10:25-37 Namondeda Natofo Mavejori Ainda Kasiari.**

<sup>25</sup> Umbu eni, Moses da Geka ijuga kato+ eniimi fira, Iesu dedeuse sisira, “Ijuga Kato, na nange nange jebuga evovodae irari ava tambareni?” setiri,

<sup>26</sup> Iesu numokena sisira, “Kote gi! God da Agho Dari andae mo rea resi?”

<sup>27</sup> Aminge setiri, genemboá Iesu kena sisira:

“Ninda Bajari God kena ninda dubo, fakina a kotari isasambuimi futuse,

nusuka numoá ava, dubo bu gogoghombaresa.’

A eni mo:

‘Ni tofo dubo buraesa, kau daba aminga ava,

ninda komana barago dubo baresa! Avakori,” aminge setiri,

<sup>28</sup> Iesu numokena sisira, “Resesa, avori. Amingaresa amo, God da jebuga tambaresa,” aminge sisira.

<sup>29</sup> Avata genemboá, nunda geka beká are dae sedo, sekago sisira, “Atá, nanda komana mo mavejori? Se ningone!”

<sup>30</sup> Setiri, Iesu tuturo edo kasia eni sisira, “Kote gi! Amo inono, namonde Jusi embo da genembo eni Jerusalem ghedo reighi Jericho aminda vosiri, tafasara kakatoi nu sandido, nunda embo boka jighi kosughedo, genemboá de fitero fase-tira.

<sup>31</sup> Sifo aminda, namondeda fristi+ eni emboro daba aminda ise, genemboá fasiriri gosuse, nu do darigedo, emboro sovenida sembudo aira.

<sup>32</sup> Kotugo ainda amboda, Levi ondi+ eni aira, kau daba ava etira. Nu, genemboá fasiriri gosuse, do darigedo emboro sovenida sembudo aira.

<sup>33</sup> Ainda amboda, Samaria embo genembo eni aira, genemboá fasiriri gira. Samaria embo amo, namondeda gitofu bekári, avata nu namondeda genembo ava fasiriri gido, nundae joka etira.

<sup>34</sup> Amingedo, numokena aira buvudo, fiyogha averege fitido, bandesi (bandages) eghetira. Eghedo, nunda sino fuka da gukada fitiri vitiri budo aira, esa embo da kambo eninda, avari vasa ava ombudo, genemboá aminda bu tere fiti esimbugetira.

<sup>35</sup> Sifo atetiri, Samaria emboá javi use K20 avavaga budo, kambo numamokena futuse, eminge setira, ‘Genemboé kaifa aso dae resena. Moni+ erefutena evia dadabari, nine sonembaresa andae, na jovereghe furarena aminda, nindae mino mutarena,’ aminge setira.

<sup>36</sup> “Avori, na nimokena ategi erena, ‘Ni erekotesa amo: komana beká mo mavejori?’ ” Iesu aminge sisira.

<sup>37</sup> Setiri, Moses da Geka ijuga kato+ sisira, “Sonembedo budo aira, avori,” setiri, Iesu numokena sisira, “Yasi! Aminguse irase!”

**10:38-42 Iesu Ade Jamena, Martha Nengae Mary Ghaekena Esa Isira.**

<sup>38</sup> Iesu nunda ambo jimbide era reighi eninda buvero, gagara javo Martha nati joká doruse unumbusira.

<sup>39</sup> Martha da gagarako javo Mary, ira Bajari da tinguda anumbetiri, geka siri nininguse iriri,

<sup>40</sup> nunda aki Martha bayau itutuse, dubo mema etiri Iesu kena sisira, “Bajari, emo evevari, ai? Gi! Na nasukako saramana da bouvu fufeno, nanda gagarako tefo anumbirira. Se foa namo sonembare!” aminge setiri,

<sup>41-42</sup> Bajari numokena sisira, “Arie, Martha! Martha, ni redae kotari digari kotise resesi? Kotari dabako evia kotaetesi. Mary rea erira emo, evevatori. Ava sedo, jo mave eniimi sari doyari da kaugo iraeri.” aminge sisira.

## 11

**11:1-13 Bajari Namonde Kau Nange Banungedo Ghaetera Ava Ijugusira.**

(Matthew 6:9-13; 7:7-11)

<sup>1</sup> Sifo eni, Iesu reighi eninda banungusira. Banungetiri dadabetiri, nunda ambo jimbi eniimi numokena sisira, “Bajari, John nunda ambo jim-bikena nange banungedo ghaetera ava ijugusira. Kau daba aminga ava, namanekena ijuge!” aminge sisira.

<sup>2</sup> Setiri, Iesu nemokena sisira, “Eminge banungareva:

‘Afa:

Namane ninda javo kakara use  
jighoro erare!

Fu, namane kaifa ururaso namonde  
irore!

<sup>3</sup> Sifo evia inono, namanendae  
bayau futuraso irore!

<sup>4</sup> Evetu genembo namanekena ari  
ekoko urureoro, namane gido kote  
doyeraera.

Ava sedo, ni kau daba aminga ava,  
namanenda ari ekoko eraera amo,  
kote doyasao dae resera!

Erama namane derarikenana budo  
yeose!’ ”

<sup>5</sup> Aminge sedo, sekago nemokena  
sisira, “Banungari mo inono: ni  
tumba soroda ya ninda komanakena  
goinginghedo saresa, ‘Nanda ko-  
mana, nandae bayau sonembaetes!

<sup>6</sup> Nanda komana eni oroko nembo  
esa ojighira. Avata na bayau tefori.’

<sup>7</sup> Aminge saresa amo, ninda ko-  
mana sarira, ‘Nandae erá seose! Na  
guro gajeteno, nanda sasingu ravera.  
Ni rea mutono dae resesi?’ aminge  
sarira.

<sup>8</sup> Avori, nu ninda komanari. Avata  
tumba foa soroda arira ava sedo, jo  
mutae arira. Avata ni dere gogorego  
ururaso ningi Jaredo, aindae mu-  
tarira.

<sup>9-10</sup> “Ava sedo, eminge resena!  
God Afakena benunu saresa amo,  
mutarira. Tava aresa amo, tam-  
baresa. Goinginghahesa amo, afigarira.  
Ainda beká mo: mave  
benunu sarira amo, mutari barira.  
Mave tava arira amo, ijugari tam-  
barira. A mave goingingharira  
amo, God Afa nundae guro afigarira.

<sup>11</sup> Kote givu! Namonde mendeni  
ghaguruderi. Ninda mandi okadae

benunu sarira amo, ni jingabuá mu-  
taresa, ai?

<sup>12</sup> A kokora munjudae benunu  
sarira amo, ni vuvujiá mutaresa, ai?

<sup>13</sup> Tefo, jo roera eko mutae aresa.  
Ni eveva vanembo mutaresa. Ne ari  
ekoko embori, avata nenda sasingu  
tavo eveva eraeva. God Afa nu veka  
eveva bekári. Ava sedo, kau nenda  
sasingu tavo eveva eraeva aminga  
ava, mave God Afakena benunu sar-  
era amo, nunda Asisi Kakara nemo-  
kena mutari barera,” Iesu aminge  
sisira.

*11:14-23 Iesu Maveda Fakinaimi,  
Seari Sukaru Vose Darigedo Ghuseri?  
(Matthew 12:22-30; Mark 3:20-27)*

<sup>14</sup> Sifo eni, Iesu sukaru eni bu fu-  
gari dae usira. Sukaru resena emo,  
asugetiri genemboá beka jo sae, guga  
edo irei. Iesu setiri, sukaru gen-  
embo ainda jokáda ghe fira buviri  
beka afigetiri, genemboá tuturo edo  
geka sisira. Beka siri, natofo ningido  
dudukughuseri.

<sup>15</sup> Dudukughedo, mendeni siseri,  
“Sukaru da bajari javo Satan, nunda  
fakina ava muteari, Iesu budo aimi,  
sukaru bu fugeraera,” aminge siseri.

<sup>16</sup> A mendeni, numokena deroro  
ari sembae ari gari dae kotise,  
eminge siseri, “Ni God da javoda  
furariá resesa amo, nunda fakina  
aimi, tano eni aso gaore!”

<sup>17</sup> Avata ne rea kotise sisera, Iesu  
anakora kasama usira. Kasama edo,  
aindae sisira, “Frovensi eni ainda  
natofo beisiga edo, soroda sarigar-  
era amo, frovensi ainda fakina soesa  
arira. Kau daba aminga ava, reighi  
a oro eni beisiga edo, soroda sarigar-  
era amo, reighi a oro amo jo fakina  
edo fetae arera.

<sup>18</sup> Na Satan da fakina budo aimi,  
nunda sukaru bu fugariá seraeva.  
Aminge sise, na Satan da eniva ser-  
aeva. Avori, saono ningivu! Satan da  
natofo tofo tofo beisiga edo, soroda  
sarigarera amo, fakina edo fetarera,  
ai? Ava kote givu!

<sup>19</sup> Eni mo: ne eminge sise reseva,  
Satan namokena fakina muteari  
budo aimi, na sukaru bu fugeraena.

Avata, nenda ambo jimbi tofo aghi useva, nenda ari ava kote givu! Nenda ambo jimbi sukuru ondiraera amo, mave da fakinaimi ondiraeri? Kote givu! Ava sedo, tofo nenda ambo jimbi eraera, ava kotise kasama evu! Ne nandae aji sise gungubo setevu!

<sup>20</sup> Geka beká mo: na God da fakinaimi sukuru bu fugeraena. Sukuru bu fuguteno, God da fakina isagha etiri eregoseva. Ava gido eminge kotaetevu: God evetu genembo tofo kaifa ari<sup>20</sup> sisira, ainda sifo orokoá nemokena buvira.

<sup>21</sup> “Satan nu inono: genembo fakina kato ainda goroba kefataghae budo aimi, nunda kambo kaifa use irarira amo, eveva irarira.

<sup>22</sup> O na inono: genembo eni fakina kato beká ava edo foama, genembo giti setena ava, dedo nunda goroba a kefata a gugua ainghae dabade sosighi edo, budo yama evetu genembo mendeninde dabade ghase barera.

<sup>23</sup> “Mave na jo sonembae arira amo, nu kau Satan sonembarira. Kau daba aminga ava, mave na jo sonembae, a evetu genembo unumbae arira amo, nu kau, evetu genembo ondari soesa ururoro, Satan foa ne bare dae sise arira,” Iesu aminge sisira.

*11:24-26 Sukuru Eni Buvu Ya Deingherá Edo, Sekago Jovereghe Foa Genembo Daba Aikena Asugarira.*

*(Matthew 12:43-45)*

<sup>24</sup> Aminge sise, Iesu sisira, “Genembo enikena sukuru asugetiri ireira ava, sukuru aimi eredo, genembo da jokáda ghe buvudo, ya reighi uvu a evetu genembo irae da vasa aminda birurughuse deingharira, jangutari vasa tambari dae. Tava use deinghuse iria Jaredo, eminge sarira, ‘Na eminda birurughuse iria jararena amo, jovereghe ya nanda kambo manai aminda terarena.’

<sup>25</sup> Aminge sedo, jovereghe ya nunda kambo manai ava tambarira. Kambo amo, nasara tafono etero eveva edo irira. Kau kambo joká seghe gogho eraera aminga ava, genembo daba ainda dubo joká ava tambarira.

<sup>26</sup> Tambudo, jovereghe ya nunda kokomana 7, sukuru ekoko beká ava, unumbe budo foama, genembo aikena asugarera. Genembo amo, giti mema itako itatamuse irei. Avata, sukuru dabako aimi yama, nunda kokomana 7 ekoko beká ava, unumbe nemonde 8 edo foama, genembo aikena asugarera amo, nu mema teria beká ava itatamarira,” Iesu aminge sisira.

*11:27-28 Ivuga Beká Mo, Nu Kau Mavegori?*

<sup>27</sup> Iesu aminge setiri, evetu eni natofo jokáda koko sisira, “Ni genembo teria etesi. Nei nimo fumbudo undiri babojusesa amo, nu nindae ivuga aeti,” aminge setiri,

<sup>28</sup> Iesu mino numokena sisira, “Seteso ningeni. Avata mave God da Geka ningido, God da uju ava arira amo, nu ivuga beká ava arira,” aminge sisira.

*11:29-32 Iesu Nu, Jonah Usira, Avavaga Ari Sisira.*

*(Matthew 12:38-42)*

<sup>29</sup> Iesu aminge vironu siri, evetu genembo fera buvudo, vasa bedo edo mimuseri. Amingero, Iesu nu sisira, “Evetu genembo siroredo oroko endada irera emo, ne taká ekoko bekári. Ne God jo kotae eraera. A ainda mendeni mo, nemori. Ne tano ijugaono gari dae setevu. Avata na jo amingae arena. Nu dabako, Jonah kena rea sirorusira, aminga ava namokena sirorari gareva.

<sup>30</sup> Jonah nu Nineva embokena tano eni usira. Reighi Nineva da natofo ne Jonah gido a nunda geka ningido aindae, God dae oju use nenda ari ekoko vujeguseri. Kau daba aminga

<sup>20</sup> **11:20:** Afige, **Geka Se Disugari Da Vasa** aminda, geka *Natofo* aindae rea gefusera ava, tege garesa.

ava, na nemokena tano eni arena. Evetu Genembo da Koro+ gido a nunda geka ningido, nenda ari ekoko vujegaetevu!

<sup>31</sup> Siba Frovensi ainda evetu kotofuko amo eredo, Ategi da Sifo aminda God da dombuda fetedo nenda ari ekoko eraeva aindae, osa sarira. Ainda beká mo: nu reighi soka beká aminda ireira ava dodo, Kini (King) Solomon da dubo kotari a ijuga ava ningari dae sedo, fusira. O nemo, genembo oroko fetirise geka resira emo, ne nunda geka ningari imboe eraeva. Avata Solomon nu genembo ijoghakori. Genembo oroko fetirise geka resira emo, nu teriagori.

<sup>32</sup> Reighi Nineva setena ainda natofu barago eredo, God da dombuda fetedo, nenda ari ekoko eraeva aindae, osa sarera. Ainda beká mo: Jonah vironu setiri ningido aindae, nenda kotari eko a nenda ari ekoko vujeguseri. O nemo, genembo oroko fetirise geka resira einda geka, ningari imboe eraeva. Avata Jonah genembo ijoghakori. O genembo oroko fetirise geka resira emo, nu teriagori. Ava sedo, ne redae nanda geka jo tumondae eraevu? Amingeraeva amo, eko bekári!" Iesu aminge sisira.

*11:33-36 Namondeda Diti Da Usasa Mo, Arivo Da Kaugori.  
(Matthew 5:15; 6:22-23)*

<sup>33</sup> Iesu aminge sedo, sekago sisira, "Namonde arivo injiberaera amo, jo bu ya ambokena ae eraera, o jo bu gagara ae eraera. Namondeda emboro ijugare dae sedo, arivo injibe jigheoro jaragheraira.

<sup>34</sup> Ninda diti amo, ninda tamo da arivo avavagori; arivo injibeoro jaragheraira, avavagori. Nindi diti eveva irarira amo, ninda tamo usasaimi bedo arira. O ni diti digoi arira amo, ninda tamo isambu tumba arira.

<sup>35</sup> Ava sedo, ninda dubo joká, erá tumba eure dae sedo, kaifa e gogoghombe!

<sup>36</sup> Ninda tamo isambu usasaimi bedo edo jaragharira amo, kau arivo eveva jaragheari usasa eraira, aminga ava arira," aminge sisira.

*11:37-54 Iesu Nu Moses Da Geka Kaifa Kakato A Ijuga Kakatokena+ Ghoghora Sisira.*

*(Matthew 23:1-36; Mark 12:38-40)*

<sup>37</sup> Iesu aminge setiri dadabetiri, Moses da Geka kaifa kato eni+ ira numokena buvudo, bayau dabade mindari dae sisira. Sedo, nengae era dabade anumbuseri.

<sup>38</sup> Iesu bayau mindari dae ira anumbusira amo, nunda ungo jo seghedo ya anumbae usira. Etiri, Moses da Geka kaifa kato+ ava gido dudukughusira, Iesu Jusi embo da agho dari<sup>38</sup> bejisira aindae.

<sup>39</sup> Avata Iesu numokena sisira, "Ni Moses da Geka kaifa kakato+ da eniri. Kotugo, ne Moses da Geka kaifa kakato+ mo, agha kofiri da kaugori. Fokakena segheraeva. Avata joká, jo seghae eraeva. Kau daba aminga ava, nenda janje jokáda, beisiga a ari ekoko aimi bedo etiri ireva.

<sup>40</sup> Ne kotari tefori. God fokakena vanembo jo aeri, nu jokághae dabade etiri sirorusira.

<sup>41</sup> O nenda uvu bayau mo, ne sifo ghousa aghada averegeraeva a tevoda vendiraeva, ava budo makasi embokena futururaeteva amo, nenda agha a tevo eveva aeti.

<sup>42</sup> "Arie, Moses da Geka kaifa kakato!+ Ne taká mema teriago beká ava itatamareva! Nemo emingeraeva. Nenda gugua tomanako a nenda roera veveyako kau mosou, yabiyabina, a karaje ava budo, diti ghabu sovenisoveni fitido, diti eni budo God kena muturaeva. A nu evevari. Ne amingareva. Avata ne jo inononda use, evetu genembo kaifa ae eraeva, a God jo dubo bae eraeva.

<sup>38</sup> **11:38:** Jusi embo da agho dari da kiki mo, eviri. Ne bayau mindari da sifo ungo jo seghae arera amo, ne bayau jo mindae arera.



Ábarago areva! Amboda God nendae mino eko ava, mutari itatamareva.

<sup>43</sup> “Arie, Moses da Geka kaifa kakato!+ Ne taká mema teriago beká ava itatamareva. Ne emingeraeva: dengoro indari kamboda+ terareva amo, evetu genembo vasa eveva mutoro anumbari dae a, deinghururovo evetu genembo ne kakara use ategi aoro dae uju eraeva.

<sup>44</sup> Agá! Amo, ne amboda mema teriago beká ava itatamareva. Ne ofofo gomo jevedo iriari, kotae ya etoda fete ya gheraera, ainda kaugori. Jokáda anakora masa usira. Evetu genembo nemoá gido, evevava seraera. Avata nenda dubo jokáda mo, ne ekokori,” aminge sisira.

<sup>45</sup> Iesu aminge setiri dadabetiri, Moses da Geka ijuga kato+ eni Iesu kena sisira, “A sise, namanekena barago aji resesa,” aminge setiri,

<sup>46</sup> Iesu sisira, “Arie, Moses da Geka ijuga kakato!+ Nembarago amboda mema itatamareva. Ne agho dari digari simbugedo seovo, natofo janjagu use irá gheraera. Avata ne totofo nenda agho dari amo jo kaifa use, ainda bouvu itako fumbae eraeva.

<sup>47-48</sup> “Arie, Moses da Geka ijuga kakato!+ Ne taká amboda mema teriago beká ava itatamareva! Nembuamane God da feroveta deoro sirivo edo ghuseri. A ne God da feroveta da ofofo gomo ava gogho use, tano fitiraeva. Avata ne erá feroveta kakara use ariá seove! Nembuamane God da feroveta detero sirivo usera andae ivuga use, tano amo ofofo gomoda fitiraeva. Ava sedo, nembuamane usera, ava gido ivuga eraeva. Ainda mino eko beká, God amboda nemokena mutari itatamareva.

<sup>49</sup> Nene amingeraeva andae, God da Dubo Kotari aimi setiri eminge gefusira:

‘Na nemokena nanda feroveta a nanda aghi kakato dirigaono yama buvudo, nanda javoda siruroro ningido,

ne mendeni mo sandi bu daoro sirivo arera, a mendenikena fakarago use bouvu mutoro mema itatamarera.’

<sup>50</sup> God da natofo evevago ava detero sirivo usera, ainda mino isambu, God nemokena mutari ruruse itatamareva.

<sup>51</sup> Tuturoda Cain, Abel detiri ambududurusira, tano aminda ghefira, Zechariah God da kamboda+ sandi olta (altar) a vasa kakara soro aminda detero ambududurusira, ainda mino isambu, ne oroko siroredo ireva, nene ruruse itatamareva. Geka beká resena! Ainda mema ne jo darigae areva!

<sup>52</sup> “Arie, Moses da Geka ijuga kakato!+ Ne taká mema teriago beká ava itatamareva! God da Geka da susu mo, nemori. Avata God da kotari mavega amo, ne jo saovo isagha ae eraira. O totofo nemo amo, jo kasama ae eraeva. A kotugo ne, evetu genembo mendeni erá ava kasama eore dae sedo bu-regeraeva! Ava sedo, ainda mino eko God amboda nemokena mutari bareva,” aminge sisira.

<sup>53-54</sup> Iesu reighi amo dotutiri, Moses da Geka kaifa kakato a ijuga kakato+ tuturo edo numoá dere gido ghuseri. Aji sise, nu geka sembae sari ningido, numo budo koto ari dae sedo, numokena ategi fakarago edo ghuseri.

## 12

*12:1-3 Ni Irise Ari Ekoko Kivo Er-  
aesa Amo, Amboda Isagha Arira.  
(Matthew 10:26-27)*

<sup>1</sup> Natofo digari ambari ava totorugedo anumbari vasa ganjibetero, Iesu nunda ambo jimbikena sisira, “Yisti (yeast) farava jokáda fiteoro bají mindafu eraira amo nu kau, evetu genembo da jokáda gungubo bají mindafu eraira ainda kaugori. Moses da Geka kaifa kakato+ da yisti (yeast) ava imboe edo darigaovo dae resena. Amo ne, gungubo eraera. Ne natofo gaoro dae sedo, ari eveva isaghada eraera, avata aminguse, ne ufena ari ekoko

eraera. Erá amingeove dae sise resena!

<sup>2</sup> Aında tuka mo: oroko rea ufena use jungeraera amo, amboda isagha ari garera. Ne oroko rea kivo eraeva amo, isagha saoro ningarera.

<sup>3</sup> Na oroko rea sainghe seraena amo, amboda ne vironuda sareva. Eminda namonde rea kikiako se ningiraera emo, ne amboda ofotighida, evetu genembo da dombuda fetedo koko fuge sareva,” aminge sisira.

*12:4-7 Namonde Evetu Genembo-dae, Oju Jo Ae Aeteri.*

*(Matthew 10:28-31)*

<sup>4</sup> Aminge sise, Iesu sisira, “Nanda kokomana, kote givu! Evetu genembo ne daoro ambareva aindae, erá oju eove! Aında tuka mo: ne daoro, nenda tamova ambarira, o nenda asisi mo irarira.

<sup>5</sup> Ava sedo, ne God dae oju aetevu! Nu sarira amo, tamo ambarira, kotugo nenda asisi mo, ari ekoko mino mutari vasada terarira. Aindae sedo, nundae oju use kakara areva!

<sup>6</sup> “Eni mo: rika kaghá ajamena kote givu! Ne rika isambu ghabu soveni ombari saeteva amo, nunda mino toea etoto avagai ombaetevu. Avata God nu kaghá ajamena amo, isasambu kotise kaifa eraira.

<sup>7</sup> Ava sedo, ne God tumonduse ambari dae, oju jo ae areva. Aında beká mo: God nu rika kaghá ajamena itako dubo buraira. Avata God da dubo bari namonde evetu genembokena mo, teriago bekári. Nenda jiroda, beo anakora afige gi tege tefo usira. Ava sedo, ne jo kosasaghari da kaugo iraeri. Erá oju eove! God Afa nu rika kaghá ajamena kaifa eraira kau daba aminga ava, ne kaifa e gogoghomberraira,” Iesu aminge sisira.

*12:8-12 Namonde Keriso Jo Ighagha Ae Arera.*

*(Matthew 10:32-33; 12:32; 10:19-20)*

<sup>8</sup> Aminge sise, Iesu sisira, “Na eminge resena: mave nanda tofo edo

irise, natofo da dombuda, Evetu Genembo da Koro+ da javo jighari erarira amo, Evetu Genembo da Koro+ genemboá God Afa da aneya da dombuda jo ighagha ae arira.

<sup>9</sup> O mave na, natofo da dombuda, imboe edo ighagha arira amo, Evetu Genembo da Koro+ eredo numbarago, God Afa da aneya da dombuda, imboe edo ighagha arira.

<sup>10</sup> Kau daba aminga ava, mave Evetu Genembo da Koro+ da javo eko arira amo, God nunda ari eko amo kote doyarira. O mave Asisi Kakara da javo eko arira amo, God nunda ari eko amo jo kote doyae arira.

<sup>11</sup> Evetu genembo na imboe use ne sandi bu yaoro, Jusi embo da dengoro indari kambo+ aminda, o reighi da kokotofu da dombuda koto areva amo, ne rea sareva aindae, erá koteove!

<sup>12</sup> Aında susu mo: Asisi Kakara aimi ijugururari, nunda geka ava sareva,” aminge sisira.

*12:13-21 Genembo Eni Guguadae Kotise, God Jo Kotae Edo Ghusira.*

<sup>13</sup> Setiri, genembo eni natofo jokáda fetirise, Iesu kena ategi usira, “Ijuga Kato, nanda afa ambududurusira. Ava sedo, nunda gugua namane koroghae soro aeteri. Saso soro edo nanda boanda mutare!” aminge setiri,

<sup>14</sup> Iesu numokena sisira, “Ni redae aminge resesi? Amo jo nanda saramana iraeri.”

<sup>15</sup> Aminge sedo, sekago sisira, “Erama dighighi eove dae resena. Kote gogoghombevu! Evetu genembo da jebuga jo gugua iraeri. Makasi embo o kotofuko, nenda jebuga beká mo, asisikena irira. Jo guguakena iraeri,”

<sup>16</sup> aminge setiri dadabetiri, Iesu aindae kasia evia sisira, “Genembo eni enda a iti fafode edo irei.

<sup>17</sup> Genembo ai tuturo edo, tofo mandi kotetira, ‘Nanda bayau fitari vasa ganjibetira ava sedo, na vuji bambudo reda fiti kaifa areni?’

<sup>18</sup> Emingarena: na nanda bayau fitari da koroma kambo manai bejedo,

sekago begogo itido, nanda bayau a nanda gugua aminda fiti kaifa arena.

<sup>19</sup> Itono dadabari, na tofo mandi sarena, ‘Makoeé redae edo, roera eveva gaveva sifo ghousa yari ava inono edo, mindi dandido ghuse, ã divu fusedo ghuse irarena!’ aminge setiri,

<sup>20</sup> God nu sifo daba aminda aira numokena setira, ‘Ni kotari tefori. Oroko tumbaghae, na bekáda bekáda ni ategi aono, ambudo esike yaresa. Amingaresa amo, gugua budo ainghae yaresa, ai?’” Iesu aminge sedo,

<sup>21</sup> geka tano use sisira, “Evetu genembo mendeni gugua digari endada bu jighirise, gugua avanembo tumonderaera amo, ne God da dombuda mo, makasi bekári. Ne genembo setena aminga ava irise, sirivo arera,” aminge sisira.

*12:22-34 God Tumondevu! Tamo Asugari A Bayaudae Erá Koteove!  
(Matthew 6:19-21,25-34)*

<sup>22</sup> Amboda, nunda ambo jim-bikena sisira, “Namonde uvu bayau jo mindae arera amo, ambarera. A namonde tamo asugariá, nu bu asugaeteri. Avata, ne bayau a tamo asugaridae erama teria futo koteove dae sise resena.

<sup>23</sup> Ainda susu mo eviri: ninda jebuga mo, susuri. Bayau jo susu iraeri. A tamo nu susu. Tamo asugari mo, jo susu iraeri.

<sup>24</sup> Rika ogha ava kote givu! Ne jo vare je govae eraera, a vuruku tefori. Avata God ne kaifa use, nenda bayau muturaira. Avori, God nu rika itako koteraira. Avata evetu genembo mo, teriago kotise, tavo e gogogho eraira, ne asisighae ava sedo. Avori, God rika kaifa use bayau muturaira amo, nemokena kau daba aminga ava, ne bayau mutari bareva.

<sup>25</sup> Geka setena, daba ava sari dae erena. Ni baimara buvari bayau dadabarira aindae, oju use teria futo kotaresa o jo kotae aresa avata, ninda ambari da sifo furarira amo, ni ambaresa.

<sup>26</sup> Ava sedo, erá uvu bayau teria futo koteove dae sise resena.

<sup>27</sup> “Kotugo tamo asugari reda bareva aindae sedo, jo dubo mema ae areva. Vare joka kote givu! Nu jo tofo mandi fire asugae eraira. Avata vare joka mo, gari evevago bekári. O Kini (King) Solomon ava kote givu! Nu susu iti fafode ava sedo, nunda tamo asugari isambu evevagori. Avata nunda tamo asugari amo, jo vare joka amingo iraeri. Vare joka mo, evevago bekári.

<sup>28</sup> Kikisa ava kote givu! Oroko irira. Avata sifode gaforo gharasa ari dungoro avarira. Nu roera veveyako bekári. Avata God nunda gari evevago fiftusira. Ava sedo, kasama evu: God vare joka kote simbugarira amo, ne asisighae gido, nembarago kaifa use, nemokena tamo asugari mutari bareva.

<sup>29-30</sup> Ava sedo, uvu bayau reda bu mindareva, o tamo asugari reda bu asugareva aindae, erama dubo mema eove! Namondeda gitofu mave God da Geka jo bae irera, ne roera aindae kotise dubo mema eraera. Avata ne jo amingae areva. Ainda susu mo: God Afa nenda irari ava gosuse, nemokena rejo daiva eraira, nu anakora kasama use irira.

<sup>31</sup> Ava sedo, ne giti nunda saramana a uju ava areva. Amingururovo, uvu bayau a tamo asugari, nune mutari bareva.

<sup>32</sup> “God Afa ne kaifa ari sisira. Ava sedo, erá oju eove!

<sup>33-34</sup> Nenda gugua reda irá gheraira amo, nenda dubo isambu aminda muturaeva. Eveva mo, nenda gugua oriro edo moni budo makasi embodae mutareva. Amingururovo, God gugua utuda irira ava, nendae mutarira. Utu da gugua amo, evovodae irarira. Ainda beká mo: utuda, tafasara kakato tefori, a roera eni jo jirikoi mindari bakomba e dadabae eraira. Dara avavaga utuda eni tefori. Ava sedo, nenda roera utuda bareva amo, jo nanjigo aminda eko ae arira,” Iesu aminge sisira.

*12:35-40 Namonde Bajari Furari Da Sifo, Ava Kaifa Use Iraeteri.*

<sup>35-36</sup> Aminge sise, Iesu sisira, “Bajari eni kirumo ari dae sedo yarira amo, nunda saramana kakato numoá kaifa arera. Embo boka ujudo avido ghedo, roera simbugedo, arivo injibaoro jaraghurari kaifa arera. Simbugedo kaifa ururoro, bajariá foa goingoinghari, nundae guro afigarera. Kau daba aminga ava, ne simbugedo kaifa use irivu!

<sup>37</sup> Saramana kakato setena, ne kaifa e gogoghombururoro, nenda bajari furarira amo, ivuga arera. Ainda tuka mo: bajari sari nunda saramana kakato anumbaoro, tofo mandi uvu bayau mutari mindarera.

<sup>38</sup> Nu tumbagha o tumba soroda furarira ava ne bunariri. Avata simbuge kaifa arera amo, ivuga beká ava arera.

<sup>39</sup> A geka evia kote givu! Kambo numamo eniimi tafasara kato foa buvari da sifoá kasama aetira amo, jo doyari foa nunda kambo bejae aeti.

<sup>40</sup> Ne kau daba aminga ava esimbugedo kaifa use irivu! Ainda susu mo: Evetu Genembo da Koro+ jovereghe furari da sifoá ne bunariri,” aminge sisira.

*12:41-48 Namonde Bajari Da Saramana E Gogoghombarerera.*

*(Matthew 24:45-51)*

<sup>41</sup> Setiri, Peter numokena sisira, “Bajari, kasia setesa emo, namanenda setesi ai, evetu genembo isambudae setesi?” aminge setiri,

<sup>42</sup> Bajari mino numokena sisira, “Saramana kato dubo kotaride aimi saramana e gogoghomberaira, nu kau emingori. Saramana kato amo saramana e gogoghombeari gido, nunda bajari sari nu viti bajari da duruda fetedo, saramana kakato mendeninde nenda saramana gatededo, nenda bayau soro edo, kambo a roera isambu kaifa urureari, bajariá ya deingheraira.

<sup>43</sup> Kaifa e gogoghombururari, nunda bajari jovereghe furarira amo, saramana kato aindae ivuga beká ava arira.

<sup>44</sup> Na eminge resena: bajari nunda kambo a nunda roera isambu, saramana kato aikena mutari evovodae kaifa edo gharira.

<sup>45</sup> O saramana katoá nu eminge kotaeti, ‘Nanda bajari jo totoi furae, ghousago irarira tano,’ aminge kotise tuturo edo, nunda bajari da saramana kakato evetu genembo mendeni ava, soesa ondi dedo, nu uvu fakara mindari jiro birurughedo gharira.

<sup>46</sup> Aminguse, nunda bajari jo kotae edo irari, sifo eninda foa buvarira. Buvudo, saramana kato amo, de dive gafari ambarira. Gogore kakatokena eraera, avavaga numokena arira.

<sup>47</sup> “Saramana kato eni nunda bajari da uju ava kasama arira avata, jo simbugedo ae arira amo, amboda nunda bajari sari nu dari beká darera.

<sup>48</sup> O saramana kato eni, nunda bajari da uju bunise saramana use dara arira amo, nu itako darera. Ni fakina edo bajari aresa amota, ni saramana kaifa use e gogoghombaresa! Ainda beká mo: ninda bajari sari, ni viti nunda bajari eni aresa amo, nu amboda foa ninda saramana ijuje gogogho arira,” Iesu aminge sisira.

*12:49-53 Iesu Evetu Genembo Da Ghamo Derari Erare Dae Sedo Fusira.*

*(Matthew 10:34-36)*

<sup>49</sup> Aminge sise, Iesu sisira, “Na enda evia dungono avarakai avarigedo, mema itatamare dae sedo ojeni. Na uju erena amo, anakora saono avaeti.

<sup>50</sup> Na ava uju beká erena avata, na giti tofo mandi mema tomanako itatamedo ambarena ava, nange aono dadabaetira aindae, dubo mema erena.

<sup>51</sup> Ne erekoteva: na mainungari bu furariva reseva. Tefo. Ne erá aminge koteove! Na evetu genembo da ghamo derono eredo tofo tofo beisiga aoro dae sedo ojeni.

<sup>52</sup> Resena emo, oroko eminda tuturo edo yarira. Saono ningivu! Evetu genemboghae ghagurude ghabu soveni irarera amo, ne soveni

etoto soveni etodaba fete beisiga edo sarigarera.

<sup>53</sup> Gegenembo nenda vide jame-nade dabade, beisiga edo sarigarera. A evevetu nenda ade jamenade dabade, beisiga edo sarigarera. Imboboti nenda mamandisiride dabade, beisiga edo sarigarera. A atovono nenda mumundurude dabade, beisiga edo sarigarera,” aminge sisira.

*12:54-56 God Rea Amboda Sari Sironarira Ava, Oroko Kasama Aeteri. (Matthew 16:2-3)*

<sup>54</sup> Aminge sedo, Iesu geke eni nato-fokena sisira, “Foroga dadorureari gido seraeva, ‘Borija dirarirasi,’ aminge seraeva. Amo bekári, borija dirarira.

<sup>55</sup> O foriforimana tuturo eari gido koteraeva, ‘Iji da sifo buvirasi,’ ava kotirovo iji fetarira.

<sup>56</sup> Ne gungubo kakatori! Ainda tuka mo: ne foroga a yaura da tuka kasama eraeva. Avata oroko roera a tano siroreari gido ghereva emo, ne redae bunedo gherevu?” aminge sisira.

*12:57-59 Irari Eveva Da Gekari. (Matthew 5:25-26)*

<sup>57</sup> Aminge sise, Iesu sisira, “Ne totofo veka eveva ari da emboro kote gogoghombaetevu!

<sup>58</sup> Komana nimoá koto ari sarira amo, totoi yasi nengae dabade se ningovo dadabare. O jo amingae aresa amo, ni budo ya jaji (judge) kena mutari, nune budo, sari forisi (police) ni budo ya diburada fitarera.

<sup>59</sup> Amingarera amo, ni jo totoi doyo-ro ya buvudo, dubo jama ae aresa. Jaji ninda dara da mino rea sarira ava, mutaso dadabari gido, foa bu-varesa,” Iesu aminge sisira.

## 13

*13:1-5 Ninda Ari Ekoko Jo Vujegae Aresa Amo, Ambaresa.*

<sup>1</sup> Sifo daba aminda, evetu gen-embo mendeni fera Iesu kena osa eminge siseri, “Galilee embo mendeni era God kena joba mutari

dae sedo, sino fuka de dungutero, Pilate setiri nunda isoro kakato mendeni fera, Galilee embo ava, God da Kambo+ aminda detero amomonjeguseri.”

<sup>2</sup> Aminge setero, Iesu mino nemo-kena sisira, “Ne kau amingedo amomonjegusera ava sedo, ne erekoteva amo, ne ari ekoko teria usera aindae, amomonjegariá erekoteva, ai?

<sup>3</sup> Amo kotari sembaeri! Galilee embo mo, kau nemongori. Ne nenda ari ekoko jo vujegae areva amo, ne kau daba aminga ava edo ambareva.

<sup>4</sup> A eni mo: Jerusalem aminda, reighi ijoghako Sailoam aminda kambo tomanako nange tofo mandi gofe dudo, evetu genembo 18 ava fatiri sirivo usera amo, ne setero niningusevu tanojo. Evetu gen-embo amo, ne ari ekoko embori, o Jerusalem embo mendeni ne isambu eveva vanembo, ava erekoteva, ai?

<sup>5</sup> Amo kotari sembaeri! Na eminge resena: ne nenda ari ekoko jo vuje-gae areva amo, ne kau daba ava use, isambu ambareva,” aminge sisira.

*13:6-9 Iesu Ika Mofi Da Kasia Sisira.*

<sup>6</sup> Ainda amboda, Iesu nemokena kasia evia sisira, “Genembo eni, ika javo mofi ava, nunda vareda kaifa iri irei. Sifo eni, genemboá aira vuji jighari gari dae etira. Avata beká jo jighari gaeri.

<sup>7</sup> Tava e gae bune Jaredo, nunda vare kaifa katokena setira, ‘Na mofi evia, beká jo jighari gae irise, ghaeko etodaba dadabetira. Nu irarira amo, enda fafama ari veka mendeni jo viti jighae arira. Ava sedo, je fugaresa!’

<sup>8</sup> Aminge setiri, vare kaifa katoá setira, ‘Do, nangae ghaeko eni kaifa e gaore! Na sino fuka da foká ava budo endaghae gae jovereghedo, mofi susuda averegarena.

<sup>9</sup> Ghaeko eninda beká jigharira amo, avori. O jo jighae arira amo, je fugarera!’ ” Iesu kasia aminge sisira.

*13:10-17 Jangutari Da Sifo Aminda, Iesu Setiri Evetu Guka Gunjughari Ava Jebugusira.*

<sup>10</sup> Jangutari da Sifo eninda, Iesu dengoro indari da kambo+ aminda teredo ijugusira.

<sup>11</sup> Evetu eni sukarui asugetiri, guka gunjughetiri irise, ghaeko isambu 18 ava dadabusira. Nu ukuge deinghedo ghusira. Evetu amo, nu anumbedo niningiri Iesu ijugusira.

<sup>12</sup> Iesu nu evetuá gido, beka fainghe sisira, “Nanda ghasovu, ni jebuetesi!” aminge sise,

<sup>13</sup> ungoi tamonda jighiri nunda guka dambu usira. Dambu etiri, evetuá God dae sakai sisira.

<sup>14</sup> Iesu Jangutari da Sifo aminda setiri evetuá jebugusira. Amingetiri gido, dengoro indari kambo+ da giti jighari, nu janje eko usira. Janje eko edo natofokena sisira, “Sifo isambu 6 aminda, namonde saramana aeteri. Sifo aminda, ne furovo genembo eimi sari jebugareva amo, avori. O Jangutari da Sifo eminda, namonde jo amingae arera,” aminge setiri,

<sup>15</sup> Iesu mino numokena sisira, “Ne gungubo kakatori! Ne isambu Jangutari da Sifo aminda, nenda burumakava (ox) o donki (donkey) vujudu bu furuda ghe buvudo, bu yama uvu muteovo mindiraera.

<sup>16</sup> Amingeraeva ava sedo, kau daba aminga ava, Abraham da imendi da gagara Satan i bundetiri irise, ghaeko 18 ava dadabetiri irira evia, Jangutari da Sifo eminda saono vujegari jebugarira amo, avori,” aminge sisira.

<sup>17</sup> Aminge setiri, Iesu da gitofu meka gido, mino sari bunetero, natofo isambu gido ivuga useri. Ainda beká mo: nu setiri evetuá jebugusira, a ari mendeni ne jo gae iriara ava, etiri gosuseri.

*13:18-21 Ika Maine Ainda Kasiari. (Matthew 13:31-32; Mark 4:30-32)*

<sup>18</sup> Ainda amboda, Iesu nemokena sisira, “God da natofo+ kau mavegori? Kote givu!

<sup>19</sup> Ne kau ika maine da vuji-imi vose batuno edo vitiraira ainda kaugori. Vuji amo, genembo enii budo nunda vareda govarira. Vuji amo veveyako bekári, avata baji tomanako edo fafatu sararira. Ari, rikamane foa nenda mogha aminda fitarera,” aminge sedo,

<sup>20</sup> sekago ategi usira, “God da natofo+ kau mavegori? Kote givu!

<sup>21</sup> God da Bino Eveva ava, ivegedo irureari evetu genembo ningido, nunda natofo+ eraera amo, kau yisti (yeast) farava jokáda tive ya gheraira ainda kaugori. Yistiá, evetu enii budo okia tomanako aminda, faravaghae gae joveregheari tive ya aimi, farava isambu baji vitido okia bedo eraera. Kau daba aminga ava, God da natofo+ digarigo siroreraera,” aminge sisira.

*13:22-30 Utu Da Guro Sokumakori.*

*(Matthew 7:13-14,21-23)*

<sup>22</sup> Iesu nu Jerusalem yari dae ise, reighi mendeni mendeni emboro soroda vironu sedo ghusira.

<sup>23</sup> Nu amingiri, evetu genembo eni-imi numokena ategi usira, “Bajari, evetu genembo daba daba ya God kena jebugarera, ai tefo?” setiri, Iesu mino sisira,

<sup>24</sup> “Utu da guro sokumako aminda terari dae fakina evu! Ainda beká mo: evetu genembo digari, utuda terari dae uju erera. Avata digari jo ya terae arera. Daba dabai ya terarera.

<sup>25</sup> Kambo numamo eredo guro gajari, ne ya buvudo goingoinghuse, ‘Bajari, guro afige!’ sareva amo, nu sarira, ‘Ne reda ghe ojeva ava, na erebunena. Yasivu, ajagha fetove! Ne ari ekoko embori!’ ava sarira.

<sup>26</sup> Sari, ne sareva, ‘Ni fesa namanenda reighida buvudo, vironu seso nininguse, namonde dabade anumbedo bayau riseri,’ ava saovo,

<sup>27</sup> nu sekago sarira, ‘Ne reda ghe ojeva ava, na erebunena. Ne ari ekoko embori. Yasivu!’ aminge sarira.

<sup>28</sup> Amboda, God nu Abraham, Isaac, Jacob a nunda feroveta isambu tavo ururari<sup>28</sup> gido, janje ekoko use, sorara use dika ghininji ghananja ghuse irareva. Ainda susu mo: ne budo ajagha fugarera.

<sup>29</sup> Sifo aminda, evetu genembo reighi isambuda ghedo ya God kena kirumo arera.

<sup>30</sup> Evetu genembo mendeni, oroko kokotofu edo irera avata, sifo aminda, ne vose sabua arera. O evetu genembo mendeni, oroko sabua edo irera. Avata sifo aminda, ne viti kokotofu arera,” Iesu aminge sisira.

*13:31-35 Iesu Nu Jerusalem Embodae Dubo Mema Usira.  
(Matthew 23:37-39)*

<sup>31</sup> Aminge siri, Moses da Geka kaifa kakato+ mendeni fera buvudo, Iesu kena siseri, “Kini (King) Herod ni dari ambaso dae erekotira. Ava sedo, yasi, reighi eninda ijugase!” aminge setero,

<sup>32</sup> Iesu nemokena sisira, “Yasivu, gambari sinoá saovo ningare: ‘Na oroko ã sifode, sukaru bu fugono evetu genembo da jokáda ghe foa buvarera, a saono evetu genembo jebugarera. Edo ojina nanda saramana aono dadabarira.’

<sup>33</sup> Avata, na jo oroko, sifode ã ojina eminda fetirise, saramana ae arena. Na deinghudo ya, Jerusalem aminda buvono, nanda saramana gombu arira. Ainda susu mo: God da feroveta isambu Jerusalem aminda, deoro sirivo eraera.

<sup>34</sup> “Arie mará, nanda natofo Jerusalem emboko! Ne God da feroveta deovo amburaera, a nunda aghi kakato ghamanai deovo sirivo eraera. Kau kokora nunda mande ghabui doghe sandi faseraira aminga ava, ne nane kaifa use, undari dae uju edo ghuse, avata na nene buregusevu.

<sup>35</sup> Ava sedo, God nunda kambo+ nenda jokáda irira ava, do dumbari, ne tefo irareva. Na jo to-

toi gae areva. Sifo amboda ne dubo jovereghedo nandae eminge ategi areva, ‘Orokaiva! God ni esimbugetiri nunda javoda refesa! Orokaiva!’ nandae aminge ategi use nati joká dorurovo, na fururono gareva,” aminge sisira.

## 14

*14:1-6 Jangutari Da Sifo Eninda, Iesu Setiri Kae Genembo Eni Jebugusira.*

<sup>1</sup> Jangutari da Sifo eninda, Iesu bayau mindari dae sedo ira, Moses da Geka kaifa kakato+ da kotofu enikena anumbusira. Anumbiriri, evetu genembo nu ditii jijinimbuseri.

<sup>2</sup> Amingero, genembo eni nunda kae ungo ata bajirode amo, fira Iesu kena buvurutusira.

<sup>3</sup> Buviri, Iesu beka fainghedo, Moses da Geka ijuga kakato a kaifa kakato+ aminda totorugusera aikena ategi usira, “Namondeda agho dari mo, nange resi? Namonde Jangutari da Sifoda evetu genembo sonembaoro jebugarera, ai tefo?” setiri,

<sup>4</sup> ne mino jo sae etero, Iesu nu genemboá budo setiri jebugusira. Etiri, nu dirigetiri iri,

<sup>5</sup> nemokena sisira, “Ninda mandi o burumakava (ox) Jangutari da Sifo aminda bakoda vosaetira amo, ni nangaetesi? Ya jumbaso vitaeti? Ai, doyasamo aminda iraeti?” aminge setiri,

<sup>6</sup> ne beka dadabuseri.

*14:7-14 Erá Tofo Sakai Seose!*

<sup>7</sup> Evetu genembo mendeni vasa evevago gatedo anumbero gido, Iesu isambukena kasia evia sisira,

<sup>8-9</sup> “Ni evetu fitari da kirumoda yaresa amo, erá tofo mandi vasa evevada anumbari dae eose! Mandi ainda numamo mo, nu kirumo da bajariri. Nune sari ni ya kirumo aresa. Ava sedo, ni tofo mandi vasa evevada anumbirasamo genembo teria eni furarira amo, kirumo da bajari

<sup>28</sup> **13:28:** Afige, **Geka Se Disugari Da Vasa** aminda, geka *Natofo* dae rea gefusera, ava tege garesa.

aimi foa sari, ni ya tinguda anumbaesa. Aminguse, ni meka iji avari garesa!

<sup>10</sup> Erá meka geose dae sise, ni kirumo mindari dae sedo, ya tinguda anumbaetsi. Amingaresa amo, kirumo da bajariá foa, 'Nanda komana, ere fu, soroda anumbase!' aminge sarira. Sari ni aminguse, natofo da dombuda ivuga aresa.

<sup>11</sup> Ainda beká mo: mave tofo nunda javo jighari erarira amo, nu foa ambokena arira. O mave nu tofo fitari vosarira amo, amboda natofoi fitoro nu vitarira," Iesu natofokena aminge sisira.

<sup>12</sup> Sedo, Iesu jovereghe kambo numamo aikena sisira, "Ni kirumo ari dae saresa amo, ninda nano namendi, ai ghasovu, ninda kokomana, a kokotofu erá aghi eóso fureore! Ainda beká mo: amboda nembarago kirumo use, minonda, ni aghi aoro ya teredo bayau mindaresa.

<sup>13</sup> Ni kirumo ari saresa amo, makasi embo, evetu genembo daguna, diti digoide ava aghi aso furarera!

<sup>14</sup> Ainda beká mo, evetu genembo amo, ni amingaresa ainda mino, ne jo ae arera. Amingaresa aindae, evetu genembo eveva ambarida ghe jebuge erarera ainda sifoda, God ni esimbuguse, ninda mino mutarira," aminge sisira.

#### *14:15-24 Kirumo Tomanako Ainda Kasiari.*

*(Matthew 22:1-10)*

<sup>15</sup> Setiri, genembo eni natofode bayau rise, Iesu da geke ava ningido numokena sisira, "Mave ambudo utuda ya God da dombuda kirumo arera amo, ne ivuga beká ava arera," aminge setiri,

<sup>16</sup> Iesu numokena sisira, "Genembo eni kirumo tomanako ari dae sedo, aghi kato dirigetiri aira, kirumo da sifo ava setiri, evetu genembo aghi etira ai ningeri.

<sup>17</sup> Sifo utua iri gido, genemboá nunda saramana kato eni dirigetiri aira natofokena setira, 'Fuvu, nanda bajari roera isambu simbugetira,'

<sup>18</sup> nu aminge setiri, natofo isambu nenda darige yari da geke eminge sedo gheteri. Eni setira, 'E gita! Na vare ombena ava ya garena. Ava sedo, na kirumo aminda jo yae arena.'

<sup>19</sup> Eniá setira, 'E gita! Na buru-makava (oxen) ghabu sovenisoveni ava ombena amo, evevari ai ekori, ava ya gari dae erena. Ava sedo, na kirumo aminda, jo yae arena.'

<sup>20</sup> A eni mo setira, 'E gita! Na evetu fiftumutani. Ava sedo, na kirumo aminda jo yae arena.'

<sup>21</sup> Ne isambu aminge setero ningido, saramana katoá jovereghedo aira, nunda bajarikena osa setiri ningido, janje eko edo, nunda saramana kato aikena setira, "Totoi yasi, evetu genembo emboroda tava ase! Makasi embo, evetu genembo daguna, a diti digoide isambu aghi edo unumbe bu furase!' aminge setiri aira.

<sup>22</sup> Sifo tufako ainda amboda, saramana katoá jovereghe ojira teredo, nunda bajarikena setira, 'Bajari, setesa ava eteni. Avata vasa mo, isambu irira,' setiri,

<sup>23</sup> nunda bajariá setira, 'Sekago jovereghe yasi! Evetu genembo vare doboda a emboroda tambaresa, kovionoghae saso foa terore! Na uju erena: nanda kambo bedo aeti.

<sup>24</sup> Avata na eminge resena: evetu genembo giti aghi etena amo, jo foa nanda kirumo mindae arera,' " Iesu kasia aminge sisira.

#### *14:25-33 Iesu Da Ambo Jimbi Nenda Dubo Isambu Numokena Mutarera!*

*(Matthew 10:37-38)*

<sup>25-26</sup> Sifo eni evetu genembo digarigo Iesu de ise, nu jovereghe nemokena eminge sisira, "Mave nanda ambo jimbi ari kotarira amo, nunda noi numamo, nunda noaro a ghaguru, nunda nano namendi, nunda ai ghasovu, a tofo nunda uju ava imboe use, nanda uju avanembo arira aimi, nanda ambo jimbi nune arira.



<sup>27</sup> Mave nanda amboda fuse, nan-dae sedo ambari dae oju arira amo, nu jo nanda ambo jimbi ae arira.

<sup>28</sup> Mave kambo itari dae sarira amo, nu giti anumbedo, nunda moni inono arira, ai tefo, ava tegarira.

<sup>29</sup> Nu itari dae tuturo edo, tutumbi darari, nunda moni daiva arira amo, evetu genembo nu dere jise eminge sarera:

<sup>30</sup> 'Givu! Genembo omo kambo itari tuturo etira, avata nunda moni daiva etira,' sarera.

<sup>31</sup> O saone! Kini (king) eni nunda isoro kakato mo 10,000 ri. A gitofu da mo, 20,000 ri. Ne isoro ari sarera amo, kini (king) giti setena amo, tege gogoghobarira. Isoro kakato inono arira o jo inono ae arira, ava tege gogoghobarira.

<sup>32</sup> Jo inono ae arira amo, nu totoi aghi mutari ya emboro soroda gitofuá tambudo mainungarira.

<sup>33</sup> Kau daba aminga ava, ni nanda ambo jimbi ari dae saresa amo, ni giti kotaresa, 'Na fisi da uju a nanda gugua isambu kote dodo Iesu da ambo jimbi arena amo, inono arira, ai tefo?' aminge kotaresa."

*14:34-35 Iesu Karaje Da Kasia Sisira.*

*(Matthew 5:13; Mark 9:50)*

<sup>34-35</sup> "Karaje nu roera evevatori. Avata karaje sasaka e tive janje dadabarira amo, nu amboda jo aoro sekago jovereghe foa karaje ae arira. Ava sedo fugarera. Kau daba aminga ava, nenda ari eko dotutuseva ava, sekago tuturo edo use God doyareva amo, evetu genembo jo foama nomena sonemba a eveva eni bae arera. Geka emo, ne dengoro jave ningido, kote gogoghombevu!" aminge sisira.

## 15

*15:1-10 God Namonde Tava Edo, Unumbe Bu Furarira.*

*(Matthew 18:12-14)*

<sup>1</sup> Sifo eni, takesi bari kakato a gegenembo ekoko mendenide dabade, Iesu da geka ningari dae fuseri.

<sup>2</sup> Fera niningero, Moses da Geka ijuga kakato a kaifa kakato+ misi masi sise Iesu dae siseri, "Genemboé nu gungubo kakato a derari kakatokena nati joká doruse, nemonde dabade anumbedo bayau mindiraera," aminge sero,

<sup>3</sup> Iesu tuturo edo kasia evia nomena sisira.

<sup>4</sup> "Sifi (sheep) kaifa kato eveva enii, nunda sifi 100 ava eke jokáda kaifa ururari, eni ya baghimbarira amo, nu nange ari? Amo, nu nunda sifi 99 ava vasa aminda dodo, ya dabako ava tava use iria tambarira.

<sup>5</sup> Tambudo, ivuga use fumbudo,

<sup>6</sup> kamboda yarira. Ya buvudo, nunda kokomana a nunda nano namendi aghi ari furoro sarira, 'Nanda sifi (sheep) baghimbetira ava tambudo, ivuga beká ava use dubo jama erena. Ava sedo, namonde gumema use umo arera!' aminge sarira.

<sup>7</sup> Kau daba aminga ava, evetu genembo 99 eveva irarera amo, utuda aneya ivuga itako arera. O genembo dabako ari eko embo ava, dubo jovereghe God kena yarira amo, ne dabade utuda irise, ivuga teria beká ava arera.

<sup>8</sup> "A eni mo saone: evetu eni nunda moni+ ghabu sovenisoveni irara ava, dabako baghimbarira amo, evetuá nu nange ari? Amo, nu nanefa dunedo, mando jokáda nasarai doruse, tava udo ya torugharira.

<sup>9</sup> Torughedo, nunda biká bimonu, nunda jao tatodae aghi ari furoro sarira, 'Na ivuga beká ava erena. Nanda moni baghimbetira ava torugheteni. Ava sedo, namonde gumema use umo arera.'

<sup>10</sup> Na eminge resena: kau evetu ivuga etira, daba aminga ava, genembo dabako dubo jovereghari, nunda ari ekoko vujegarira amo, God da aneya ivuga beká ava arera," aminge sisira.

*15:11-32 Vide Jamena Etoto Naká Aikena, Numamo Nunda Joka Ari Ava Ijugusira.*

11 Aminge sise, Iesu sisira, “Genembo eni nunda vide jamena etoto naká dabade iriara edo,

12 sifo eni, mandi amboi eredo numamokena setira, ‘Afa, ninda gugua ambaso baetera ava, oroko soro use, nanda boanda mutaso barena!’ aminge setiri, numamo amingedo mandi ambo aikena, nunda boanda mutiri bira.

13 Sifo mendeni ainda amboda, mandia nunda gugua a nunda enda oriro edo, ainda moni budo reighia dotira. Dodo aira, reighi soka eninda buvudo, aminda irise nunda moni soesa fugetira.

14 Isambu fuge tefo etira, ainda amboda, reighi aminda baimara eko beká siroretiri, nunda ungodá moni dadabetira.

15 A gido, nu aira genembo enikena saramana bira. Genemboá mandi amo dirigetiri aira, nunda fuka<sup>15</sup> kaifa use undudo ghetira.

16 Nu ighoii ambududuruse, fuka da bayau ava mindari kotetira. Amo, jo evetu genemboi da mindari da kaugo iraeri, sena vanembori. Mave enii nundae jo joka edo bayau mutaeri.

17 Nu saramana use irara, sifo eni kotetira, ‘Na dara useni. Nanda afa da saramana kakato bayau inononda mindiraera. O namasi, ighoiimi ambududurerena.

18 Ava sedo, na eredo ya afakena sarena, “Afa, na nimokena, a God kena dara useni.

19 Na jo ninda mandi beká amingo iraeri. Avata joka aso na ninda saramana kato eni aeteni,” ’ mandia nu aminge kotedo,

20 eredo numamokena aira.

“Mandia nu soka beká firi, numamo fuge gira. Fuge gosuse, joka edo mandi aikena sumbu aira, sandi ovinembedo muno etira.

21 Muno iri, mandia numamokena setira, ‘Afa, na God kena a nimokena dara useni. Na jo ninda mandi beká amingo iraeri,’ aminge setira.

22 Avata numamoimi nunda saramana kakatodae aghi etiri ojera buvero gido, nemokena setira, ‘Totoi yasivu, nanda tamo asugari evevago, ungo bumbuki, a ata jogha barago budo fuvu, numokena asugaove!

23 Edo yasivu, namonde burumakava da mandi (calf) unduse irera ava, de ojevu namonde kirumo aore!

24 Ainda susu mo: nanda mandi evia ambariva setena avata, nu jebuga ojira buvira. Baghimbusira ava, oroko ojighiri tambeni,’ numamo aminge setiri, tuturo edo kirumo eteri.

25 “Mandi ainda koro vareda saramana erara kamboda buvari dae fuse, yaru didivero ningira.

26 Ava nininguse, saramana kato enikena kori setiri ojira buviri ategi etira, ‘Ne nanguse erevu?’

27 Setiri, nu setira, ‘Ninda mandako oroko ojira buvira. Nu jebuga ojira buviri andae sedo, nimamo burumakava da mandi (calf) unduse ireira ava, dedo ojetira.’ aminge setiri ningido,

28 nunda koro janje eko etiri, kamboda jo ya terae etira. Etiri ava gido, numamo kamboda ghe vosedo, nunda mandi bego foa terare dae setira.

29 Setiri, nunda mandi begoa setira, ‘Kote gi! Na ghaeko ghousa beká ava, ninda saramana kato edo, saramana use irena. Ninda sari ningari ava use irena. Avata ni nandae rejo eni jo ae iresa. Nanda kokomanade kirumo aono dae sedo, jo gouti (goat) mandi eni mutae iresa.

30 O saone? Nanda namendi amo, nu kombo yagera use ninda gugua soesa etiri dadabetira. Etiri dadabetiri, jovereghe ojighira buviri, burumakava da mandi evevago ava nundae sedo, dedo ojetesi.’

31 Aminge setiri, numamoá numokena setira, ‘Nanda mandi, ni nangae irera. Nanda gugua isambu nindari.

15 15:15: Jusi embo isambu, Moses da Agho Dari rea resira ava kotise, fuka kau ‘sino fuka dongono beká’ sise reeta edo ghuseri, jo itako derae edo ghuseri. Ava sedo, mandia tofo fitari vosari, fuka kaifa ari da saramana aetira amo, meka gari teria bekári.

<sup>32</sup> Avata namonde oroko umo use ivuga aeteri. Ainda susu mo: ninda mandako ambariá setera, avata jebuga ojira buvira. Aira baghimbetira, ava tamberi,' ” Iesu aminge sisira.

## 16

*16:1-13 Derari Kato Genembo Eni, Nunda Bajarikena Dederuse, Nunda Bayau Bu Mindari Da Emboro Simbugedo Ghetira, Ainda Kasiari.*

<sup>1</sup> Iesu nunda ambo jimbikena sisira, “Genembo eni, nunda bajari da gugua roera a bisnis (business) isambu kaifa edo ghetira. Sifo eni, evetu genembo eniimi ojira, genembo ainda bajarikena aji sise setira, ‘Ninda saramana kato bagia eraira.’

<sup>2</sup> Aminge setiri ningido, nunda bajari aghi etiri ojira buviri numokena setira, ‘Ni saramana etesa ainda jokáda, dara etesi. Ava sedo, do-yaresa. Ninda buku roera isambu simbuge mutaso barena.’ Aminge setiri,

<sup>3</sup> genemboá kotetira, ‘Bajari doyono dae setira ava sedo, na nangareni? Bako ghambarikena, na jo inono iraeri. A reighida birurughuse benunu sari mo, na meka erira.

<sup>4</sup> Na emingarena. Na oroko nanda kokomana sonembarena. Ainda amboda, na saramana doyarena amo, ne na sonembuse, nenda kamboda uvu bayau kaifa ururoro irarena.’

<sup>5</sup> Aminge kotedo, evetu genembo mendeni nunda bajarikena moni mutaetera ava, aghi etiri ojeri. Ojera buvero, genembo giti ojighira aikena setira, ‘Ni nanda bajarikena mo, nanjogo mutaetesi?’ setiri, nu setira,

<sup>6</sup> ‘Na orivi (olive) da muka, 3,700 lita (litres) ava mutaeteni,’ aminge setiri, saramana katoá numokena setira, ‘Fefa na nindae gefusena, eviri. Totoi anumbedo, 3,700 ghajedo, do vose 1,850 ava gembu ijoghako are!’ aminge setira.

<sup>7</sup> Sedo, genembo enikena setira, ‘Nanda bajarikena mo, mino nanjogo mutaetesi?’ setiri, nu setira, ‘Na farava, 37,000 lita (litres) ava mutaeteni,’ aminge setiri, saramana katoá numokena geke daba ava setira, ‘Ninda fefa eviri. 37,000 ghajedo, do vose 29,600 ava gembu, ijoghako are!’ aminge setira.

<sup>8</sup> Ainda amboda, saramana kato ainda bajari ojira, nunda saramana kato nange nange edo, nunda bayau bu mindaetira da emboro simbugetira, aindae sakai setira. Ainda beká mo: evetu genembo mendeni fisi da uju ava eraera amo, ne jiro munjuderi. A gido, ne saramana e gogoghomberaera. O evetu genembo usasada deingheraera amo, ne jo amingae eraera.”

<sup>9</sup> Aminge sedo, Iesu amboda sisira, “Ava sedo, enda da gugua a moni budo aimi futururaso, ninda kokomana endada sirorarera. Amboda ninda gugua a moni dadabarira amo, ni utuda nati joká darera.

<sup>10</sup> Mave saramana kitako e gogoghombarira amo, nu saramana tomanako ábarago e gogoghombarira. O mave saramana kitako use, gungubo sarira amo, nu saramana tomanako ábarago use, gungubo sarira.

<sup>11</sup> Ni enda da gugua aimi saramana use dara aresa amo, God nimokena gugua beká jo mutae arira.

<sup>12</sup> Ninda komana da gugua jo kaifa e gogoghombae aresa amo, God tofo ninda gugua jo mutari bae aresa.

<sup>13</sup> “Ni bajari etoto aikena jo saramana ae aresa. Amingari saresa amo, eni dubo bu gogogho aresa, eni imboe aresa. Bajari eninda geke ningido, nunda saramana e gogoghombaresa. O bajari eninda geke imboe use, nunda saramana imboeghae aresa. Ninda dubo monikena mutaresa amo, God kena jo mutae aresa. O God kena dubo mutaresa amo, moni jo kotae aresa,” aminge sisira.

*16:14-18 Iesu Geka Mendeni Mendeni Sisira.*

*(Matthew 11:12-13; 5:31-32; Mark 10:11-12)*

<sup>14</sup> Iesu aminge setiri ningido, Moses da Geka kaifa kakato, + ava ningido dere jiseri. Ainda beká mo: ne moni dubo bu gogoghombuseri.

<sup>15</sup> Amingero gido, Iesu nemokena sisira, “Ne evetu genembo da dom-buda nenda javo tofofo jigheovo er-eraira. Avata God nenda dubo joká eregosira. Koana evetu genembo dighighi use uju eraera ava, God roera daba aindae beghagha eraira.

<sup>16</sup> “Moses a feroveta mendeni-imi God kena ya buvari da emboro manai da Geka ava gembudo vironu sedo ghuseri. Abuamane nene niningudo refuara amo iriri, John Bafataito Ari Kato eredo, God nange nange emboro seka numokena afigedo nunda natofo+ isambu kaifa arira, ainda Bino Eveva ava, vironu sedo ghusira. Vironu seari ningido, evetu genembo digari God da natofo+ ari dae kotise, tofo tofo mimuse foa gheraera.

<sup>17</sup> Avata God da Geka mo, jo dadabae irira. Utu endaghae giti dadabarira, avata God da Geka mo, evovodae irarira, jo geka kitako eni kosasaghae arira.

<sup>18</sup> “Genembo eni noaro dodo eni fitarira amo, ainda javo yagerari. O mandi eni, evetu ghanjara ava fitarira amo, ainda javo barago yagerari,” Iesu aminge sisira.

*16:19-31 Kotofuko Eni Lazarus Ghae Iriara Da Kikiri.*

<sup>19</sup> Aminge sedo, Iesu amboda sekago sisira, “Kiki tufako sari dae erena. Kotofuko eni ireira amo, susu iti fafoderi. Nu sifo ghousa ava, ujari avari eveva vanembo ujuse avise ghedo ghetira. Oka bayau barago eveva vanembo rise irei.

<sup>20</sup> O genembo eni, javo Lazarus, nu makasi beká edo irei. Nu tamo bedo gaetiri fasireari, nunda nano namendi nu unumbe budo yama, kotofuko ainda guro békada fiteoro anumbedo ghetira.

<sup>21</sup> Kotofuko bayau rirurari susunda vosari, ava bu mindari dae kaifa use anumbirá ghedo ghetira. Anumbireari, sinomane foama Lazarus da gambisi sosofedo gheteri.

<sup>22</sup> “Aminguse irara, Lazarus ambiri, aneya ojera nu unumbedo budo aera, Abraham da vasa eveva aminda dirigetero irise, kirumo use dubo jamaghae irá ghedo ghetira. Kotofukoá barago amboda ambira. Ambiri furugetero,

<sup>23</sup> aira ari ekoko embo da mino mutari vasa aminda vosedo, mema itatamuse irá ghedo ghetira. Mema itatamuse, diti fuge, soka beká ava Lazarus nengae Abraham ghae anumbirero gido,

<sup>24</sup> kori setira, ‘Afa Abraham oó, na joka e! Na eminda avaraka jokáda mema itatamerena ava sedo, Lazarus dirige foa, nunda ungo konsirariimi uvuda fatido, bu nanda avivada sasaka are!’

<sup>25</sup> Aminge setiri, Abraham numokena setira, ‘Nanda mandi, ni kote garesa! Ni giti endada iriasa amo, roera isambu eveva vanembo ruruse iriasi. O Lazarus mo, nu dubo memaghae irise, eko vanembo budo ghusira. Ava sedo, nu oroko eveva vanembo itatamerira. A ni mema itatameresas.

<sup>26</sup> A eni mo, namondeda soroda, govi tomanako irira. Namane nemokena jo sembi yae arera. A nembarago namanekena jo sembu furae areva.’

<sup>27</sup> “Aminge setiri, kotofukoá sekago Abraham kena setira, ‘Avari, Afa, na nimokena eminge benunu resena! Lazarus dirigaso jovereghe yama nanda afa da kamboda buvudo,

<sup>28</sup> nanda nano namendi ghabu soveni aikena dengoro indaeti. Indari ningido, nenda ari ekoko vujegaeteri. Erama vasa eko eminda fureore dae sise resena.’

<sup>29</sup> Aminge setiri, Abraham numokena setira, ‘Ninda nano namendi resesa amo, ne Moses a God da

feroveta da geka ava, dengoro jave ningaeteri,' aminge setira.

<sup>30</sup> Setiri, kotofukoá sekago Abraham kena setira, 'Afa Abraham, a jo inono iraeri. O evetu genembo eni-imi ambarida ghe ya buvari garera amo, ne tumonduse, nenda ari ekoko vujegarera,' nu aminge setira.

<sup>31</sup> Avata Abraham numokena setira, 'Ninda nano namendi amo, Moses a God da feroveta da geka ava, jo dengoro jave ningae eraera. Kau daba aminga ava, mave ambarida ghe ere ya buvari garera, ábarago jo tumondae arera,' Iesu aminge sisira.

## 17

*17:1-4 Komana Deraso Ari Eko Arira Amo, Eko Bekári.*  
(*Matthew 18:6-7,21-22; Mark 9:42*)

<sup>1</sup> Iesu nunda ambo jimbikena sisira, "Geka bekári: derari a ari ekoko ari mo, nu foa gheraira. Avata evetu genembo mave, nenda kokomana deroro ari ekoko arera amo, ne sifo amboda mema teria beká ava tambarera.

<sup>2</sup> Eveva mo: genemboá nanda sasingu jo derae irari, gitofu eni foama, ghamana mindafu budo genembo ainda duboda dighido, bu fugari kafuruda tifughari dadabaeti. O genembo resena eimi, nanda sasingu mendeni derari gido, God aindae sedo mema mutarira amo, eko a bouvugori.

<sup>3</sup> Ava sedo, nenda irari kaifa e gogoghombevu!

"Ninda komana ari eko arira amo, dombu békada saso doyarira! O nu dubo joveregharira amo, nunda dara ava kote doyaresa.

<sup>4</sup> Ninda komana sifo dabako aminda umbu 7 ava, dara nimokena edo foa vujeguse, kote doyaso dae sarira amo, ni umbu 7 ava nunda dara kote doyaresa!" aminge sisira.

*17:5-6 Tumondari Mo, Kau Emingori.*

<sup>5-6</sup> Sifo eni, Bajari da ambo jimbi numokena siseri, "Dengoro indaso,

namane tumondari da emboro ava kasama e gogoghombarera!" aminge setero, Bajari nemokena sisira, "Nenda tumondari kitako, kau ika maine da vuji da kaugo ava iratira amo, ika teria gavideá a gido saetevu, 'Usumbe yasi, evada tifughase!' Aminge saeteva amo, nu amingaeti," aminge sisira.

*17:7-10 Namonde Bajari Da Saramana E Gogoghombarera!*

<sup>7</sup> Aminge sise, Iesu sisira, "Na eminge resena: nenda saramana kato eni ya nenda saramana eni arira, o nenda sifi (sheep) kaifa use iria ungobu ari, unumbe bu foa kamboda buvarira amo, ne jo nu ya bayau mindare dae sae eraeva tano.

<sup>8</sup> Ai, ne eminge sise seraeva tano, 'Ni yasi, nanda bayau iti bu foa mutaso mindone! Amingaso dadabari, ya bayau mindi jebugase.'

<sup>9</sup> Aminge sise, ne saramana kato-kena, 'aiyakoe' teria jo sae eraeva. Ainda tuka mo: nenda moniimi saramana kato da fakina a nunda saramana ava ofusevu; ava sedo, nu nenda sari ningariri.

<sup>10</sup> Nemo, kau daba amingori. God nu rea aovo dae sarira, ava areva amo, erá God nune aiyakoe sare dae kaifa eove! Eminge sevu, 'Atá, amo namondeda saramanari. Namonde mo, Bajari da saramana kakatori,'" Iesu aminge sisira.

*17:11-19 Iesu Setiri, Gegenembo Bedode Ghabu Sovenisoveni Ava Jejebuguseri.*

<sup>11</sup> Iesu nu Jerusalem aminda ise, Frovensi Galilee ghedo Frovensi Samaria sembiyari dae use,

<sup>12</sup> ira soro aminda nati boguda bu-vurutiri, gegenembo bedode ghabu sovenisoveni aimi, numo tambudo ategi useri. Soka fetedo,

<sup>13</sup> kori siseri, "Arie, Bajari Iesu, namanendae joka aetesi!" aminge siseri.

<sup>14</sup> Setero, Iesu fuge gido sisira, “Ya-sivu, nenda tamo ijugaovo<sup>14</sup> God da fristiimi+ gaore!” aminge setiri, ne jovereghe ise emboro soroda, ne isambu jejebuguseri.

<sup>15</sup> Avori, genembo dabako nu jebugusira ava gido, jovereghe fira beka fugutuse, God dae sakai sise ira, Iesu kena buvurutusira.

<sup>16</sup> Buvudo, aiyakoe sise Iesu da ata duruda du fasusira. Genembo amo, nu Jusi embo da gitofu Samaria embo da eniri.

<sup>17-18</sup> Iesu numoá gido ategi usira, “Na seteno isambu ghabu sovenisoveni ava jejebugeteri. Avata genembo ojighira God dae sakai re-sira emo, nu God da natofo Jusi embo da gitofuri. O nunda kokomana mendeni 9 amo, ne namane Jusi embo da totofori. Amo nangetirai jo foa God kena sakai sise, aiyakoe jo sae ereri?”

<sup>19</sup> Aminge sedo, genembo aikena sisira, “Eredo yasi! Ninda tumon-dariimi jejebugeteri,” aminge sisira.

*17:20-37 Evetu Genembo Da Koro+ Sekago Jovereghe Furarira. (Matthew 24:23-28,37-41)*

<sup>20</sup> Moses da Geka kaifa kakato+ mendeni fera Iesu kena ategi useri, “God namonde isambu kaifa ari da sifo<sup>20</sup> nanjigo sirorari?” aminge ategi etero, Iesu nemokena sisira, “Amo jo ditiimi gari da kaugo iraeri.

<sup>21</sup> Mave jo foa sae arira, ‘Sifo evia ojira buviri eregosenere,’ o ‘Ovia bu-virore,’ a jo sae arira. Ainda beká mo: God anakora ojira, namondeda jokáda irira.”

<sup>22</sup> Aminge sedo, nunda ambo jim-bikena sisira, “Sifo amboda, Evetu Genembo da Koro+ totoi jovereghe furaetira, aindae uju beká ava areva, avata nu sifo aminda jo foa buvari gae areva.

<sup>23</sup> Evetu genembo mendeni sarera, ‘Fuvu, eminda gaove!’ o ‘Yasivu, ominda gaove!’ sarera. Erama nenda geke ava tumonduse yeove!

<sup>24</sup> Ainda beká mo: Evetu Genembo da Koro+ jovereghe furarira amo, nu jo ufena furae arira. Kau biria tarighedo sovenisoveni sarige fetari giraera aminga ava, Evetu Genembo da Koro+ fururari, evetu genembo isambu garera.

<sup>25</sup> Avata na giti mema teria tafurono, evetu genembo oroko endada irera eimi, na ighagha arera.

<sup>26</sup> Kau evetu genembo Noah da sifoda edo ghusera aminga ava, evetu genembo kotae kotae ururoro, Evetu Genembo da Koro+ jovereghe furarira.

<sup>27</sup> Natofo kotae kotae uvu bayau rise a evevetu fiftuse irero, Noah nunda ghakada+ teretiri, usegha a gisiimi fira buvudo gaunghetiri mindi sirivo useri.

<sup>28</sup> A kau Lot da sifoda edo ghusera aminga ava ururoro, Evetu Genembo da Koro+ jovereghe furarira. Natofo kotae kotae uvu bayau rise, roera oriro use, vare govuse, a kambo itutuse irero,

<sup>29</sup> Lot reighi Sodom dodo iri, sifo daba aminda, God avaraka a ghamana buburaghae averegetiri utuda ghe vosedo, evetu genembo ava isambu aviri sirivo useri.

<sup>30</sup> Kau daba aminga ava ururoro, Evetu Genembo da Koro+ foa bu-vudo isagha arira.

<sup>31</sup> “Ne ofoda<sup>31</sup> anumbirovo, sifo ava foa buvari gareva amo, erá nenda roera bari dae sedo, kambo jokáda tereove! Kau daba aminga ava, ne vare jokáda saramana areva amo, erá jovereghe natida yeove!

<sup>32</sup> Lot da evetu kau nange nange enda da gugua dubo ruruse, jovereghe reighi Sodom fuge gosiri,

<sup>14</sup> **17:14:** Moses da Agho Dari ijugerira, mave tamo bedo gayarira, o kae javo ‘Leprosy’ barira amo, nu ya evetu genembo a reighi bogu isambu dodo, vasa ajagha irarira. O amboda jebugarira amo, nu yama nunda tamo fristikena ijugari gido, “Avori, ni jejebugeteri!” sarira amo, nu sekago jovereghe ya natofode dabade irarira. <sup>20</sup> **17:20:** Afige, **Geka Se Disugari Da Vasa** aminda, geke *Natofo* dae rea gefusera ava, tege garesa. <sup>31</sup> **17:31:** Afige, geke **Matthew 24:17** ainda duruda tege garesa.

God setiri nu ghamana jinisira, ava kote givu!

<sup>33</sup> Mave nu enda ainda gugua kotise, nanda javodae ambari oju edo, na doyarira amo, nu sifo amboda ambarira. O mave namo tumonderaira andae sedo, nu daoro ambarira amo, amboda jebuga evovodae irari ava tuve barira.

<sup>34</sup> Tumba daba aminda,<sup>34</sup> genembo eni nunda komanaghae faro dabako aminda aviroro, eni budo ise eni doyarera.

<sup>35</sup> Evetu eni nunda komanaghae farava vuji jasiroro, eni budo ise eni doyarera.

<sup>36</sup> Genembo eni nunda komanaghae vareda saramana ururoro, eni budo ise eni doyarera,” aminge setiri,

<sup>37</sup> Bajari da ambo jimbi numokena ategi useri, “Reda bu yareri?” setero, Iesu nemokena sisira, “Ambari embo da tamo reda beterraira amo, riduna aminda joseraera,” aminge sisira.

## 18

### *18:1-8 God Namondeda Benunu Ningiraira.*

<sup>1</sup> Erá manamana euredae sise, kotugo evovodae banunguse iroro dae sedo, Iesu nemokena kasia evia sisira:

<sup>2</sup> “Reighi eni aminda jaji (judge) eni irei. Nu God a evetu genembo jo kakara use igheghi ae edo ghetira.

<sup>3</sup> Rori eni reighi daba aminda sifo ghousa ava numokena yama, sonembare dae sedo, eminge benunu sedo ghetira: ‘Evetu genembo mendeni nandae osogo eraera. Ava sedo, sonembururaso nanda roera barena,’ aminge sedo ghetira.

<sup>4</sup> Sifo ghousa ava, jaji (judge) amo sonembari imboe edo ghetira. Avata ainda amboda tofo mandi setira, ‘Na God a evetu genembo jo kakara use igheghi ae eraena.

<sup>5</sup> Avata rorié jo sonembae arena amo, nu geka daba ava sirurari e

jararena. Ágido, sonembururono nunda roera barira,’ aminge setira.

<sup>6</sup> “A jaji (judge) da geka kote givu!

<sup>7</sup> Jaji (judge) nu ekori. O God nu evevari. Ava sedo, God da natofo sifo tumba evia nundae banungururoro, nininguse ne jo ighagha ae arira.

<sup>8</sup> Nu nenda benunu nininguse, totoi sonembarira. Avata Evetu Genembo da Koro+ jovereghe furarira da sifo aminda, evetu genembo numoá tumonduse banunguse iroro, foa tambarira, ai, tefo?” aminge sisira.

### *18:9-14 Takesi Bari Kato Nengae Moses Da Geka Kaifa Katoghae Da Kasiari.*

<sup>9</sup> Evetu genembo mendeni ne totofo sakai sise, evetu genembo mendeni imboe edo ghusera, aikena Iesu kasia evia sisira.

<sup>10</sup> “Kiki eni sari dae erena. Gegenembo etoto naká banungari dae sedo aera, God da kamboda+ tereteri. Eni mo, Moses da Geka kaifa kato+, a eni mo, takesi bari katori.

<sup>11</sup> Moses da Geka kaifa kato+ ajagha fetedo, banunguse setira, ‘God Afa, aiyakoe beká resena. Na jo natofo mendeni emingo iraeri. Na bagia jo ae eraena. Evetu genembo da gugua jo dighighi ae eraena. Kombo yagera jo ae eraena. Na jo takesi bari kato, nanda dengesida fetirira emingo iraeri.

<sup>12</sup> Na fura evia inono umbu etoto naká, nimo kotise bayau kanangara eraena. Nanda gugua diti ghabu sovenisoveni ava fitido, diti dabako budo nimokena muturaena,’ aminge sise banungetira.

<sup>13</sup> O takesi bari kato sovenikena fetedo, God kena igheghi use tumo jo fainghaeri. Nu fetirise, God da dombuda meka gosuse, umbeba sambedo yafakoda doruse, eminge setira, ‘Are, God Afa, na joka aetesi! Na ari eko embori,’ aminge sise banungetira.

<sup>34</sup> **17:34:** Bajari Iesu tuturo eminda, geka ‘Tumba daba aminda...’ resira emo, avose, nunda jovereghe furari da sifo o Ategi da Sifo andae resira.

<sup>14</sup> Na nemokena eminge resena. God nu takesi bari kato da ari ekoko kote dotiri, nu kamboda aira. O Moses da Geka kaifa kato+ da ari ekoko jo kote doyaeri. Ainda beká mo: mave tofo nunda javo jighari erarira amo, nu foa ambokena arira. O mave nu tofo fitari vosarira amo, amboda God nu fitari vitarira,” Iesu geka aminge sisira.

*18:15-17 Iesu Sasingako Mendeni Ava Esimbugusira.*

*(Matthew 19:13-15; Mark 10:13-16)*

<sup>15</sup> Evetu genembo mendeni nenda sasingu veveyako Iesu kena budo fuseri, nunda ungoi esimbugare dae sedo. Budo fera buvero, Iesu da ambo jimbi ava gido ghoghora siseri.

<sup>16</sup> Sero ningido, Iesu setiri sasingako fera numokena totorugetero sisira, “Sasingako emo erama bu-regeove! Dovu, namokena furore! Ainda tuka mo: ne ivuga use nanda geka ningi tumonderaera. Mave amingarira amo, nu God da natofo+ arira.

<sup>17</sup> Geka evia kotovo dae resena. Mave jo sasingako da kaugo ava ae arira, a kotugo God jo tumondae arira amo, nu God da natofo+ jo ae arira,” Iesu aminge sisira.

*18:18-30 Kotofuko Eni Nunda Guguadae Ghamo Ruruse, Iesu Ighagha Usira.*

*(Matthew 19:16-30; Mark 10:17-31)*

<sup>18</sup> Aminge setiri, Jusi embo da kotofu eniimi fira, Iesu kena ategi usira, “Ni ijuga kato evevari. Ava sedo, se ningone! Na rejo ava edo, jebuga evovodae irari amo tam-bareni?” aminge setiri,

<sup>19</sup> Iesu numokena sisira, “Ni redae nandae ‘eveva’ resesi? God nusuka numoá evevari.

<sup>20</sup> God da Agho Dari ni kasama eresa:

‘Erama, yagera eove!

Erama, komana deóvo ambeure!

Erama, bagia eove!

Erama, komanakena dedeuse gun-gubo seove!

Nei nimamo kakara use, nenda geka ningido ghevu!’ ” aminge sisira.

<sup>21</sup> Kotofuá Iesu kena mino sisira, “Na siroredo gimasada irise, agho dari resesa ava, kaifa udo refuana genembo eteni,” aminge sisira.

<sup>22</sup> Setiri, Iesu ava ningido numokena sisira, “Dabako jo ae iresa. Ninda gugua a roera isambu oriro edo, ainda moni mo budo makasi embokena ghasaresa. Ghasedo, ni furaso namonde dabade deinghar-era! Amingaresa amo, ni amboda ya gugua evevago utuda baresa.”

<sup>23</sup> Aminge setiri, kotofukoá ningido, nunda guguadae dubo mema ambarako usira. Ainda beká mo: nu guguaderi.

<sup>24</sup> Dubo mema usira ava gido, Iesu sisira, “Evetu genembo susu iti fafode amo, foa God da natofo+ arikena fakarago bekári.

<sup>25</sup> Sino fuka javo kamero (camel), ava kote givu! Nu jo totoi ningu toka aminda tere ya sovenikena buvae arira. Avata nu aminda tere yari mo, raugakori. O evetu genembo guguade aimi God da natofo+ ari dae sarera amo, fakarago bekári.”

<sup>26</sup> Aminge setiri, natofo ava ningido ategi useri, “Aminge saresa amo, God da natofo+ mave ari?” setero,

<sup>27</sup> Iesu mino nemokena sisira, “Amo jo, evetu genembo endada ir-era ainda ari da kaugo iraeri. Ne jo totofo nenda fakinai, God da natofo+ ae arera. Avata God mo, inonori. Nune, roera isambu ari sirorarira.”

<sup>28</sup> Aminge setiri, Peter numokena sisira, “Kote gi! Namane nindae sedo, namanenda kambo a gugua isambu dodo namonde dabade de-ingheraera,” aminge setiri,

<sup>29</sup> Iesu numokena sisira, “Ai, re-sesa aindae, na geka beká nemokena resena. Mave God da natofo+ ari dae sedo, nunda kambo, noaro, nano namendi, noi numamo, o mandi sasinguá doyarira amo,



<sup>30</sup> natofo a roera resena emo, aminga ava digutururari oroko endada budo, jebuga evovodae irari ábarago, sifo amboda tuve barira,” aminge sisira.

*18:31-34 Iesu Nunda Ambari Da Geka Ava, Sekago Sisira.*

*(Matthew 20:17-19; Mark 10:32-34)*

<sup>31</sup> Iesu nunda ambo jimbi 12 ava, unumbe budo ira ajagha fetedo, nemokena sisira, “Ningivu! Namonde reighi Jerusalem yari dae viti refera. God setiri, feroveta nene rejoá Evetu Genembo da Koro+ dae gefusera amo, reighi Jerusalem aminda beká isagha arira.

<sup>32</sup> Nu aminda sandi bundedo, namonde Israel embo da gitofukena mutoro budo, nu dere jise ã, nundae kosiva use,

<sup>33</sup> ambíimi dedo, bu daoro ambarira. Ambudo, sifo etodaba naká dadabari ainda amboda, nu sekago ambarida ghe, jebugedo erarira.”

<sup>34</sup> Iesu geka sisira, ainda beká amo jungariri; ava sedo, nunda ambo jimbikena jo isagha ae usira.

*18:35-43 Iesu Setiri, Genembo Eni Diti Digoide Jebugusira.*

*(Matthew 20:29-34; Mark 10:46-52)*

<sup>35</sup> Iesu natofode dabade era, reighi Jericho aminda buvari dae use, genembo diti digoide emboro dengesida anumbirise, monidae benunu siri dariguseri.

<sup>36</sup> Darigero, javi niningusira. Ningido ategi usira, “E mavejori?” setiri, ne siseri,

<sup>37</sup> “Nasareth embo javo Iesu refirasi,” siseri.

<sup>38</sup> Setero ningido, dudukughedo koko sise sedo ghusira, “Iesu, David da Mandi God mutari sisira amo, nimori. Ava sedo, na joka eyo!” aminge sisira.

<sup>39</sup> Setiri, evetu genembo giti edo isera aimi, nu beka doyare dae sedo bureguseri. Buregusera ava, nu jo itako doyaeri; numo koko sise beka mindafugo beká kori sisira, “Arie,

Iesu! Kini (King) David da Mandi God mutari sisira amo, nimori. Ava sedo, na joka eyo!” aminge setiri ningido,

<sup>40</sup> Iesu fetedo, genemboá unumbe numokena bu furoro dae setiri, budo fera buvero gido, genembo aikena ategi usira,

<sup>41</sup> “Na rea aono dae uju eresi?” setiri, genemboá numokena sisira, “Bajari, saso nanda diti afigari sifo sevo gaeteni!” aminge sisira.

<sup>42</sup> Setiri, Iesu numokena sisira, “Avari, garesa! Ninda tumondariimi jebugetsi.”

<sup>43</sup> Iesu aminge siri ainghae dabade, diti afigetiri, genemboá God kena aiyakoe sise, Iesu da amboda isira. Natofo isambu ne ava gido, God dae sakai siseri.

## 19

*19:1-10 Zacchaeus Dubo Jovereghusira.*

<sup>1-2</sup> Genembo guguade eni javo Zacchaeus, nu takesi bari kato da giti jighari edo ireira ava, Iesu nu reighi Jericho aminda teredo sembiri, Zacchaeus Iesu da bino ningido,

<sup>3</sup> numo gari dae kotisira. Evetu genembo digari Iesu gari dae totoruge Iesu gosuse gajetero, Zacchaeus nu ata tufako ava sedo, gari bunisira.

<sup>4</sup> A gido, Iesu gari dae sedo, nu giti sumbu ira ikada vivitusira.

<sup>5</sup> Vitido anumbiriri, Iesu fira buvudo diti fainghedo, Zacchaeus gido sisira, “Zacchaeus, totoi fu vosase! Na oroko ya nimokena avarena,” aminge setiri,

<sup>6</sup> nu bibitai fira vosedo, ivugaghae nati joká dorusira.

<sup>7</sup> Nati joká doriri, evetu genembo mendeni ava gido, tuturo edo aji sise siseri, “Nu oroko genembo eko beká aikena ya avarira.”

<sup>8</sup> Aminge sero, Zacchaeus eredo Bajarikena sisira, “Saono ningaresa! Nanda gugua soro edo diti etoto fitido, eni makasi embokena mutarena. Na evetu genembo dedeuse rea rurusena, ainda inono ava diti

dabako fitarena. Fitido, gugua diti etodaba naká seka budo fitono ainde avononde naká ari, ava mutono barera,” aminge sisira.

<sup>9</sup> Setiri dadabetiri, Iesu numokena sisira, “Resesa aindae resena, God da jebuga nimokena a ninda totofokena orokoá siroretira. Nembua Abraham God nange tumondedo ghusira, aminga use ireasa.

<sup>10</sup> Na aindae sedo ojena irena. Evetu Genembo da Koro+ ambari embo ava tambudo, sonembari dae sedo ojira irira,” aminge sisira.

*19:11-27 Namonde Bajari Da Saramana E Gogoghobarera.  
(Matthew 25:14-30)*

<sup>11</sup> Evetu genembo nunda geka ava niningero, Iesu tuturo edo, kasia eni nemokena sisira. Amo, Iesu Jerusalem buvari dae utua iri gido, natofo kotiseri, “God evetu genembo endada kaifa ari da sifo<sup>11</sup> utua erirano.”

<sup>12</sup> Aminge kotero gido, Iesu kasia evia nemokena sisira, “Kiki eni sari dae erena. Kotofu eni nunda reighi dodo, reighi eninda yari dae simbugetira. Nunda kotari mo: aminda yari gido, saoro nu kini (king) edo, jovereghe foama tofo nunda reighi kaifa ariá kotise, yari dae simbugetira.

<sup>13</sup> Nu jo yae irise, giti aghi etiri, nunda saramana kakato mendeni ghabu sovenisoveni ava, ojighera numokena totorugetero, moni+ inono K10,000 avavaga budo, daba daba mutiri beri. Bero gido, kotofukoá nemokena setira, ‘Na irurono, moni eimi bisnis (business) edo, nanda moni mendeni buvu!’ aminge sedo, nu dodo aira.

<sup>14</sup> Avori, nunda natofo nu imboe eteri. Ava sedo nu dodo iri, ne eredo aghi kakato mutero nunda amboda aera buvudo, eminge seteri, ‘Namane nu imboe erera! Nu jo jovereghe foa namanenda kini (king) ae arira!’

<sup>15</sup> “Avori, reighi soka aminda setero kotofukoá kini edo, jovereghe ojira nunda reighida buvurutuse, nunda saramana kakatokena setiri ojighera buveri. Buvero, nu ategi etira, moni aimi saramana edo nanjogo tambara, ava saoro ningari dae setira.

<sup>16</sup> Giti saramana kato enii tere setira, ‘Ni moni+ futusesa aimi, saramana eteno ninda moni ghabu sovenisoveni seka siroretira,’ aminge setiri,

<sup>17</sup> kotofukoá numokena setira, ‘Aiyakoe beká resena! Ni e gogoghombetesi. Ni saramana kato evevagori. Nanda roera jo digari iraeko mutena ava, nangedo eteso digetiri besi! Ava sedo, na saoro ni reighi ghabu sovenisoveni ainda bajari aresa,’ aminge setira.

<sup>18</sup> Setiri ainda amboda, saramana kato enii teredo setira, ‘Bajari, ni moni+ futusesa aimi, saramana eteno ninda moni ghabu soveni seka siroretira,’ aminge setiri,

<sup>19</sup> kotofukoá numokena setira, ‘Ni reighi ghabu soveni ainda bajari aresa,’ aminge setira.

<sup>20-21</sup> Amboda, enii teredo setira, ‘Na kasama erena, ni genembo fakaragori. Ni evetu genembo mendeni da roera ava nine tofo eraesa, a evetu genembo mendeni vare goveoro, ainda bayau nine ya bamburaesa. Na aindae sedo, oju edo ninda moni+ ava budo emboi doghe jungeteno irira, evirere.”

<sup>22</sup> Aminge setiri, kotofukoá numokena setira, ‘Ni saramana kato ekori! Nimo imboe kato, guka dagaya bekári. Ninda kotari mo: evetu genembo da roera nane tofo ariri, a evetu genembo mendeni roera veka goveraera ainda beká ava, nane ya bambariá koteraesa.

<sup>23</sup> Ava sedo, ni nange, nanda moni evia bu ya banikada (bank) fitaso, aminda irari saramana ururoro ainda baako sirorari, na jovereghe foa baeteni!’ aminge sedo

<sup>24</sup> jovereghe, nunda mendeni

<sup>11</sup> **19:11:** Afige, **Geka Se Disugari Da Vasa** aminda, geka *Natofo* dae rea gefusera, ava tege garesa.

aminda fetirara aikena setira, 'Ne moni numokena ava saghimbe budo, saramana kato moni ghabu sovenisoveni ava rurusira, aikena mutuvu bare!' aminge setira.

<sup>25</sup> Setiri, dudukughedo seteri, 'Bajari nangetiraimi? Moni ghabu sovenisoveni futusesa ava, numokena irira,' setero,

<sup>26</sup> kini (king) sekago setira, 'Na eminge resena: mavekena rea irarira amo, mendeni mutoro, nu bari inono beká ava arira. O mavekena tefo beká, o itako irarira amo, a barago saghimbe baoro, nu makasi beká ava arira.

<sup>27</sup> A eni mo: nanda natofo mendeni mave namokena gitofu use, na erá kini eono dae seraera, ava sandido budo fuvu! Nanda dombuda daovo amomonjegaore!" Iesu aminge sisira.

*19:28-40 Evetu Genembo Nati Joká Dorero, Iesu Ira Jerusalem Teterusira.*

*(Matthew 21:1-11; Mark 11:1-11; John 12:12-19)*

<sup>28</sup> Iesu aminge setiri dadabetiri, javi edo giti etiri, natofo ambo gaedo nemonde Jerusalem iseri.

<sup>29</sup> Era, reighi Bethany a Betfeij aminda buvurutuseri, enda jiro fumbari javo Orivi aminda. Buvudo, Iesu nunda ambo jimbi etoto naká gatedo diriguse,

<sup>30</sup> nemokena eminge sisira, "Reighi omo eregoseva? Ominda ya buvudo, Donki (donkey) da mandi eni buri edo dighero fetirira, ava tambareva. Donki resena emo, mave jo viti aminda anumbe deinghae irira. Ava vujege bu furovo dae resena.

<sup>31</sup> Vujegururovo, mave 'Redae vujegerevu?' sarira amo, eminge sevu, 'Bajari evia uju etira,' aminge sevu!"

<sup>32</sup> Iesu aminge setiri, ne era, donki Iesu sisira ava tambudo,

<sup>33</sup> vujegero, donki ainda totofoi fera ategi useri, "Ne redae donki vujegerevu?" setero,

<sup>34</sup> ne siseri, "Bajari evia uju etira."

<sup>35</sup> Aminge sedo, ne donki mandia Iesu kena budo iseri. Era buvudo,

nenda tamo asugari mendeni ava kosedo, javureghe donki da gukada fitido, Iesu sonembetero viti anumbusira.

<sup>36</sup> Anumbedo iri, nunda ambo jimbi nenda tamo asugari a embo boka mendeni kosedo, emboroda dudo ero, nu ainda etoda fetedo isira.

<sup>37</sup> Emboroda ise, enda jiro fumbari Orivi ganasa aminda vosira, Jerusalem utua iri, Iesu da dorevare digari tuturo edo, roera tomanako gosusera andae koko sise, God kena aiyakoe sise nundae sakai siseri.

<sup>38</sup> Ne eminge siseri, "Orokaiva, orokaiva! Bajari dae sakai saore! Kini (King) ni buvurutesare! Kini Bajari da javoda refira andae, sakai saore! Orokaiva! Mainungari utuda irira, a God da duro iká bekáda eregoserá," aminge koko sido iseri.

<sup>39</sup> Aminge sero ningido, Moses da Geka kaifa kakato+ mendeni, natofo jokáda fetirise Iesu kena siseri, "Ijuga Kato, ninda dorevare se beka doyore!" aminge setero,

<sup>40</sup> Iesu mino nemokena sisira, "Na eminge resena: ne beka doyarera amo, ghamana eminda fafasirera eimi, koko sarera," aminge sisira.

*19:41-44 Iesu Jerusalem Dae Sorara Usira.*

<sup>41</sup> Aminge sedo, Iesu ira Jerusalem utua beká use, nu Jerusalem embo-dae sorara usira.

<sup>42</sup> Sorara use, eminge sisira, "Na uju beká ava erena: ne mainungari da emboro gido kasama aetevu. Avata ne emboro tambari dae e jarutereva.

<sup>43</sup> Sifo amboda, gitofuimi foa nenda reighi jimbe birurughedo, enda ghambudo jefuru fuge vitido, aminda viti jarige jokáda vosarera.

<sup>44</sup> Vosedo, nenda reighi sosighi edo, nenda natofo isambu daoro amomonjegarera. Nenda reighi ghamanai itero irira ava bejoro, aveverege vose dadabarira. Ainda beká mo: God nemokena orokoá ojighira utua erira ava, ne erebuneva," aminge sisira.

*19:45-48 Iesu Ira God Da Kambo+ Aminda Tere Fetedo, Ghoghora Sisira. (Matthew 21:12-17; Mark 11:15-19; John 2:13-22)*

<sup>45</sup> Iesu ira God da Kambo+ aminda tere fetedo, tuturo edo, bisnis (business) embo aminda ofero,<sup>45</sup> ava gido ondisira. b

<sup>46</sup> Ondise, nemokena sisira, “God setiri nunda Geka jokáda geka eni gembero irira amo, eviri:

‘Nanda Kambo+ mo, banungari da kambori.’

God aminge sisira. Avata ne teredo amingevo, kambo emo kau tafasara kakato da dobo a beku da kau avago edo irira!” aminge sisira.

<sup>47</sup> Iesu nu sifo evia inono, God da Kamboda+ ijugedo ghusira. Amin-giri, fristi+ da kokotofu, Moses da Geka ijuga kakato+, a evetu genembo da babojegari Iesu daoro ambare dae kotedo ghuseri,

<sup>48</sup> avata ne emboro jo tambaeri. Ainda beká mo: natofo isambu nunda geka ningari dae uju use, evovodae Iesu de dabade irá ghedo ghuseri, ava sedo, emboro jo tambaeri.

## 20

*20:1-8 Iesu Nu Mave Da Javoda, Saramana Edo Ghusira, Aindae Ategi Useri.*

*(Matthew 21:23-27; Mark 11:27-33)*

<sup>1</sup> Sifo eni, Iesu God da Kamboda+ dengoro induduse, God da Bino Eveva ava vironu siri, fristi+ da kokotofu, Moses da Geka ijuga kakato+, a evetu genembo da babojegari fera buvudo,

<sup>2</sup> numokena siseri, “Se ningore! Mave setiri ni saramana emo eresi? Ni mave da javoda, geka emo vironu resesi?” setero,

<sup>3</sup> Iesu mino nemokena sisira, “Nambarago nemokena geka dabako ategi arena. Einda mino sareva amo, na mave da javoda ojena amo, isagha saono ningareva. Sevu ningone!

<sup>4</sup> John Bafataito Ari Kato, mave da javoda evetu genembo bafataito edo ghusi, evetu genembo da javoda, ai, God da javoda?”

<sup>5</sup> Aminge setiri, ne tuturo edo tofo tofo beisiga use, se nininguseri, “Namonde kau nange nange sareri? Namonde ‘God da javoda bafataito edo ghusira,’ sarera amo, nu sarira, ‘Ne redae John jo tumondae usevu?’ sarira.

<sup>6</sup> O kotugo namonde ‘Evetu genembo da javoda bafataito edo ghusira,’ sarera amo, natofo eminda totorugetera eimi, namonde ghamanai darera. Ainda tuka mo: evetu genembo digari koteraera amo, John nu God da feroveta eniri,” aminge sedo

<sup>7</sup> bunise, Iesu kena siseri, “Naname erebunera,”

<sup>8</sup> Setero, Iesu nemokena sisira, “Aвори, nambarago mave da javoda saramana eraena, nemokena jo saono ningae areva.”

*20:9-18 Vare Kaifa Kakato Da Kasiari.*

*(Matthew 21:33-46; Mark 12:1-12)*

<sup>9</sup> Aminge sedo, Iesu nu natofokena jovereghedo, kasia evia sisira, Genembo eni aira vare simbugedo vaini da asi ava govetira. Govedo, furu dighi birurughetira. Ainda amboda, nu asi vuji da muka ava simbari vosari bari dae sedo, bako ghambira. “Kasia eni ningovo dae resena. Genembo eni aira, vare simbugedo vaini (wine) da asi ava govedo, vare amo evetu genembo mendeni saramana use, moni futururoro bari dae sedo, mutira. Evetu genembo aimi vare ava kaifa ero, nu dodo aira, reighi eninda ghousago irei.

<sup>10</sup> Aвори, asi vuji bambari da sifo buviri gido, vare numamoá nunda boanda bari dae sedo, nunda saramana kato eni dirigetiri, vare kaifa kakatokena aira. Aira buviri, vare kaifa kakato saramana kato aikena roera eni jo mutae, nu sandi dedo ondero jovereghe aira.

<sup>45</sup> 19:45: Afige, geka **Matthew 21:12** ainda duruda tege garesa.

<sup>11</sup> Amingetero gido, vare numamo sekago nunda saramana kato eni dirigetiri aira buviri, vare kaifa kakato numokena roera eni jo mutaeri. Ne eredo, nu dere jise avoda de ondero, jovereghe aira.

<sup>12</sup> Amingetero gido, vare numamoá sekago nunda saramana kato eni dirigetiri aira buviri, vare kaifa kakato numbarago de babasegedo ondero sumbira.

<sup>13</sup> A gido, vare numamo tofo mandi kotetira, 'Na emingarena. Nanda mandi dubo bu gogoghombraena ava, dirigaono yarira. Nu kakara arera tanojo,' aminge kotise, nunda mandi ava dirigetiri aira.

<sup>14</sup> Avata vare kaifa kakato ne numoá gosuse, tofo tofo se ningeri, 'Mandi omo, vare einda numamo da mandiri. Amboda vare emo, nune barira. Ava sedo fuvu, namonde nu daoro ambari, vare emo namondeda tofodae baore!' aminge sedo,

<sup>15</sup> ne eredo mandia, vare jokada sandi jumbudo aera, isaghada buvudo detero ambira.

"Avari, kote givu! Vare numamoá eredo foama, vare kaifa kakato aikena nange ari? Saono ningove!"

<sup>16</sup> Nu foama vare kaifa kakato amo dari amboro, vare budo evetu genembo mendeni kena mutari nene kaifa arera," Iesu aminge setiri dadabetiri, natofo siseri, "Agá! Amo erama sireure!" siseri.

<sup>17</sup> Setero, evetu genembo mendeni, nu nange imboe edo ighagha arera, ava kasama aoro dae sedo, Iesu dombu gongosedo natofokena sisira, "Aminge sareva amo, kote givu! God da Geka evia resira, einda tuka mo rejori?

'Ghamana eni, kambo itari kakato imboe edo fugutusera ava, Bajari nune budo

tutumbidae sedo fiti simbugedo, aminda tuturo edo, nunda kambo itari dae erira.'

God da Geka aminge resira.

<sup>18</sup> Avari, na eminge resena: mave ghamana etoda durarira amo, nu

de gite ambarira. O ghamana aimi maveda etoda du fatarira amo, nunda tamo fati tafere ari ambarira," aminge sisira.

*20:19-26 Iesu Ava Dederuse, Ne Takesi Ombari Da Susu Aindae Ategi Useri.*

*(Matthew 22:15-22; Mark 12:13-17)*

<sup>19</sup> Iesu aminge setiri, Moses da Geka ijuga kakato+ a fristi+ da kokotofu, ne Iesu sandi bundari dae kotiseri. Ainda beká mo: ne kasama useri, Iesu nendae sedo vare da kasia amo sisira. Avata ne natofo da kotari aindae oju edo, Iesu dotero isira.

<sup>20</sup> Ava sedo, Iesu nange geka sembae eni sari, nu sandi budo gavana da kotofukena mutoro gavana da javoda koto aetera ava kotise, ne evetu genembo mendeni dirigetero aera, geka beká sariguse ategi mendeni mendeni useri.

<sup>21</sup> Ava kotedo, ne derari kakato gategetero era, Iesu kena buvudo siseri, "Ijuga Kato, namane kasama erera: ni sifo ghousa evia, geka bekada sise ijugeraesa. Ni evetu genembo da kotari amo jo oju ae use, God da uju avanembo ijugeraesa.

<sup>22</sup> Ava sedo, se ningore! Namondeda Agho Dari nange resi? Namondeda gitofu Rome embo da kotofukena takesi ombarera, ai tefo? Ava se ningore!" aminge setero,

<sup>23</sup> ne numo derari<sup>23</sup> dae kotido fusera ava, Iesu kasama usira. Kasama edo, Iesu nemokena sisira,

<sup>24</sup> "Moni eni ijugevu gaone! Moni tamonda, dangio a javo emo, mavedari?" setiri, ne siseri, "Rome embo da kotofu, namonde Caesar seraera, nundari."

<sup>25</sup> Setero, Iesu nemokena sisira, "Avari, Caesar da tofo amo, Caesar dae mutuvu bare! A God da tofo amo, God dae mutuvu bare!" aminge setiri,

<sup>26</sup> ne ningido buniseri. Natofo da dombuda Iesu dederusera avata, nu geka eko eni jo sae usira.

<sup>23</sup> **20:23:** Afige, geka **Matthew 22:18** ainda duruda tege garesa.

Nu geka eveva sisira, aindae ne dudukughedo beka dadabuseri.

*20:27-40 Ambarida Ghe Jebuge Erari Mo, Kau Mavegori?*

*(Matthew 22:23-33; Mark 12:18-27)*

<sup>27</sup> Jusi embo da mendeni aindae Sadusi embo+ seraera. Sadusi embo+ resena emo, ne eminge kotise seraera: ambari embo jo sekago jebugedo erae arera. Avori, Sadusi embo+ aindae mendeniimi fera, Iesu kena ategi useri,

<sup>28</sup> “Ijuga Kato, God setiri, Moses nu namonedae Agho Dari evia gefusira:

‘Genembo mave evetu fitido, mandi sasingu jo sirorae iroro ambarira amo, nunda ambo bego eniimi roriá, ambari embo aindae veka sirorare dae sedo, fitarira.’

<sup>29</sup> “Avori, kiki eni sari dae erera. Ningi! Genembo dabako aindae vide jamena 7 ava siroredo iriari. Bego mo, nu evetu fitira ava, sasingu jo sirorae irero nu ambira.

<sup>30</sup> Ambiri, roriá nunda diroruimi fitira. Fitira ábarago, sasingu eni jo sirorae etero nu ambira.

<sup>31</sup> Aminguse, fifitero refara, ambo nemboi bu fitido irara, nu barago ambira.

<sup>32</sup> Aindae amboda beká, roriá barago ambira.

<sup>33</sup> Avori, se ningore! Amboda evetu genembo isambu jebuge erariá seraesa. Gegenembo isambu 7 evetu dabako ava fifituseri. Ava sedo, iria edo erari da sifoda, evetu amo maveda evetu ari? Bego aindari, o ambo aindari, ai maveda evetu ari? Ava se ningore!”

<sup>34</sup> Setero, Iesu mino nemokena sisira, “Oroko emo, evevetu vai eraera, a gegenembo evetu fitiraera.

<sup>35</sup> Avata God sari sifo amboda evetu genembo eveva, ambarida ghe jebuge erarera aindae sifo aminda, genembo evetu jo fitae arira, a evetu genembokena jo vai ae arira.

<sup>36</sup> Ne aneya da kau avavaga irarera, jo ambae arera.

<sup>37</sup> Kotugo, evetu genembo ambarida ghe jebugedo erarera ava, Moses numbarago tofo mandi ijugusira. Avaraka ika veveyako aindae jokáda gambudo bubura iri gosusira aindae sifoda, Moses da nombuamane anakora sirivo usera aindae, God nu geka evia setiri Moses gefusira:

‘God, nembuamane Abraham, Isaac, a Jacob anakora endada irise, tumonduse iriara,

ã kotugo oroko tumonduse irera amo, namori.’

<sup>38</sup> God aminge sisira aindae, namonde kasama erera: ambari embo jo amboro dadabaeri. Ava sedo evetu genembo isambu, ambari embo a jebuga embo isasambu God da dombuda jebuga irera,” aminge setiri,

<sup>39</sup> Moses da Geka ijuga kakato+ mendeni aminda fetirise, Iesu da geka ava ningido siseri, “Ijuga Kato, setesa amo, eveva bekári.”

<sup>40</sup> Aminge sedo, Iesu da geka eveva ava ningido, ne sekago ategi ari buniseri.

*20:41-44 Keriso Mo, Nu Maveda Mandiri?*

*(Matthew 22:41-46; Mark 12:35-37)*

<sup>41</sup> Iesu tuturo edo, nemokena ategi usira, “Mendeni seraera: God evetu genembo sonembuse, Genembo eni mutari dae sisira amo, David da mandiri. Amo nange reseri? Kote givu!

<sup>42</sup> David nu tofo mandi God Da Yaru Divari Buku aminda, Keriso dae eminge gefusira:

‘Bajari nu nanda Bajarikena sisira, “Fu, nanda ungo gimandukena anumbiraso,

<sup>43</sup> ninda gitofu ninda fakina ava gosururoro,

ne de bundedo bu foama, ninda ata duruda fitono fafasaore,” Bajari aminge sisira,’

ava David gefusira.

<sup>44</sup> Avori, genembo mo, nunda sasingu da bajariri. Mandi eni jo viti numamo da bajari ae aeti. Ava sedo

David, Genembo amboda furarira ava kotise, ‘nu nanda Bajari’ sisira amo, nu jo tofo nunda mandi ava kotise saeri. Nu Genembo aindae igheghi use, nunda Bajari arira ava sise sisira. Ava sedo, geke seraera amo, jo inono iraeri,” aminge sisira.

*20:45-47 Moses Da Geka Ijuga Kakato+ Dara Emingedo Ghuseri.*

*(Matthew 23:1-36; Mark 12:38-40)*

<sup>45</sup> Evetu genembo isambu Iesu da geke niningero, nu nunda ambo jim-bikena sisira,

<sup>46</sup> “Moses da Geka ijuga kakato-dae+ eminge resena: nenda irari ava ijuje gi gogoghombevu! Ne eminger-aera. Natofoi nendae sakai saoro dae sedo a nemo kakara aoro dae sise, nenda tamo asugari koburu edo deingheraera. Deinghudo ya ombari vasada buvuruturoro gido, evetu genembo tumo bainghedo, nemo tumondedo kakara use ategi e gogoghombaoro dae sise, uju eraera. A nenda uju mo: ne kirumo a banungari dae use, tofofo nenda fisi da uju ava kotise, anumbari vasa eveva vanembo gategeraera.

<sup>47</sup> Ne roriri da kambo a gugua ava nenda tofodae ruruse, ya God da Kamboda+ tere fetedo, natofoi nemo gido, sakai saore dae sise, ghousa futo banungeraera. Avata God nu aindae sedo, sifo amboda nemokena mino eko beká ava mutarira,” aminge sisira.

## 21

*21:1-4 Rori Da Jobari.*

*(Mark 12:41-44)*

<sup>1</sup> Etiri dadabetiri, evetu genembo iti susu fafode aimi fera, God da Kamboda+ God kena joba fifitero, Iesu gosusira.

<sup>2</sup> Ava gosiri, rori eni makasi beká aimi fira, moni+ ingigago veveyako beká etoto, inono 10 toea da kaugo, ava fifitiri gosusira.

<sup>3</sup> Gido sisira, “Na nemokena geke beká resena. Rori eregoseva omo, nu makasi bekári. Avata nu joba fitira

amo, teria bekári. Mendeni da mo, jo nune fitira, ainghae inono iraeri.

<sup>4</sup> Ainda beká mo: mendeni mo, ne gugua deri, avata ne itako fiteri. Rori omo tefo bekári, avata nu isambu fitira,” aminge sisira.

*21:5-28 Enda Dadabururari, Tano Mendeni Sirorari Garera.*

*(Matthew 24:1-31; Mark 13:1-27)*

<sup>5</sup> Evetu genembo mendeni God da Kamboá+ gosuse, aindae sakai sis-eri. Nunda ghamana garigo, a joba mutero aimi etero gari eveva usira, aindae sedo sakai siseri. Sakai sero, Iesu nemokena sisira,

<sup>6</sup> “Kambo omo ne kotise reseva? Avori, ningivu! Na nemokena eminge resena. Gitofuimi foama Kamboó de bejoro, oinda ghamana aveverege vose dadabarira ainda amboda, ghamana eniko jo nunda vasa ireira, aminda irae arira,” aminge setiri,

<sup>7</sup> ne numokena ategi useri, “Ijuga Kato, setesa amo, nanjigo sirorari? Sifo ava, nange kasama aeteri? Sifo resesa foa utua ururarira amo, namane tano rejoá sirorari gosuse aminda kasama areri?”

<sup>8</sup> Aminge ategi etero, Iesu nemo-kenena sisira, “Ditii gosuse kaifa evu! Erama, evetu genembo mendeni nemo dederuse gungubo sarera, ava tumondeove! Ainda tuka mo: evetu genembo digari foama, gungubo eminge sarera, ‘Evetu Genembo da Koro+ namori,’ o ‘Sifo buvira.’ Aminge sarera amo, nenda geke erama ningido, ainda amboda amboda eove!

<sup>9</sup> Ne tataya a isoro da bino ningareva amo, erama oju eove! A nu sirorarira avata, enda emo jo sifo aminda dadabae arira,” aminge sedo,

<sup>10</sup> Iesu sekago sisira, “Natofoi mendeni mendeni a gavana mendeni mendeni eredo, tofo tofo isoro arera.

<sup>11</sup> Endada, dumo teria beká fururari, baimara a taono ekoko ava buvudo gharira. Utuda, ne tano ekoko

a gari dombu eni dombu eni ava sirorari gareva.

<sup>12</sup> “Avata roera resena evia, jo siro-rae irari, ainda gitida, evetu gen-embo mendeniimi foa ne sandido, nemokena fakarago aoro mema tam-bareva. Ne budo yaoro dengoro indari da kambo+ mendeni aminda, koto aovo ne budo diburada fitar-era. Ne namoá tumonderaeva ain-dae sedo, ne sandi bu yaoro, gavana da babojegari a kini (king) mendeni da dombuda fetedo koto areva.

<sup>13</sup> Ne koto use, nanda Bino Eveva ava osa sirurovo ningarera.

<sup>14</sup> Avata ainda sifoda, ne rea sareva andae, erá koteove!

<sup>15</sup> Ainda beká mo: nane sonem-bururono, ne dubo kotise vironu evevago a bouvugo ava saovo, namondeda gitofu mino sari bunarera.

<sup>16</sup> Nenda nei nimamo, nano namendi, ai ghasovu, a nenda kokomana ne ighagha edo mutoro, ne mendeni, gavanaimi daoro sirivo areva.

<sup>17</sup> Ne namoá tumonderaeva andae sedo, evetu genembo isambu ne imboe arera.

<sup>18</sup> Avata erama oju eove! God Afa kaifa ururari, ne ambarida ghe eredo jebugareva.

<sup>19</sup> Ava sedo, fakina edo fete gogoghombevu! Amingareva amo, God sari ne jebugareva.

<sup>20</sup> “Gitofu da isoro kakatoimi, Jerusalem jimbe birurughururoro gareva amo, ne kasama areva, ‘Jerusalem oroko ava de bejedo sosighi arera.’

<sup>21</sup> Ne Frovensi Judia eminda irareva amo, eredo sumbu yasivu, doriri ominda jungove! Ne Jerusalem eminda irareva amo, totoi buvudo yasivu! Ne ajagha irareva amo, erama Jerusalem eminda fureove!

<sup>22</sup> Ainda sifoda, God da Geka rejodae resira amo, beká sirorurari God da janje eko eminda isagha ari garera.

<sup>23</sup> Mará! Na, evevetu mave sifo aminda tamo bouvu edo irarera andae, dubo mema erena. Ainda

beká mo: evevetu sifo aminda kau-righae irarera, o sasingako veveyako ami futuse irarera amo, ne sumbari dae ató barago use, mema mindafugo ava itatamarera. God nu reighi Israel eminda a Israel embokena, nunda janje eko ijugari mema teriango beká ava itatamarera.

<sup>24</sup> Israel embo mendeni mo, gitofuimi daoro sirivo arera. A mendeni mo, bu ya reighi eninda oriro aoro, oro eninda saramana kakato arera. Amingururoro, Israel embo da gitofuimi reighi emo jighiroro, God sifo ffitusira ava foa buvari gido, reighi emo dodo yarera.

<sup>25</sup> “Utuda, ijiimi, inuaimi, a damanaimi God tano ururari garera. Endada, eva tomanako eko, maso a vorughae sufururoro, gavana mendeni nenda natofode gido oju edo bunarera.

<sup>26</sup> Utu da fakina raugo ururari, iji, inua, a damana da usasa sembae janimbuse, sembae sufururoro evetu genembo garera. Gido, enda barago totoi sembae ururari, ava gosuse sifo tufako kaifa use, ojuimi jinongu tambarera.

<sup>27</sup> Amingururoro, Evetu Genembo da Koro+ foroga jokáda, fakina a usasa tomanako ainghae vose furururari garera.

<sup>28</sup> Roera resena evia, tuturo edo sirorurari amo, ere fetedo tumo fainghevu! Ainda beká mo: nenda jebuga a sonemba foa buvari dae use arira,” aminge sisira.

*21:29-33 Ika Kayuyu Da Kasiari.*

*(Matthew 24:32-35; Mark 13:28-31)*

<sup>29</sup> Iesu tuturo edo, kasia evia nemokena sisira, “Ika mendeni a ika kayuyu kote givu!

<sup>30</sup> Tunó seka yaughururari gido, kotareva, ‘Borija da sifo buviri, beká jighari dae erira,’ ava kasama areva.

<sup>31</sup> Kau daba aminga ava, roera setena ava sirorurari gareva amo, ne kasama areva, ‘God nunda natofo+ kaifa ari da sifo ojighira utua erira.’

<sup>32</sup> “Geka evia kotovo dae sise resena! Roera setena ava sirorurari,



evetu genembo oroko siroredo endada irera ainda mendeniimi garera. Mendeni ambarera, avata mendeni jo ambae iroro sirorari garera.

<sup>33</sup> Utu enda dadabarira avata, nanda geke mo, jo dadabae arira, evovodae irarira,” aminge sisira.

*21:34-38 Iesu Numo Kaifa Aoro Dae Sisira.*

<sup>34</sup> Aminge sise, nu sisira, “Kaifa e gogoghombuse irivu! Erama uvu bayau kotise, nenda fakina isambu tamo a fisi da uju andae muteove! Amingareva amo, Ategi da Sifo foa buvari ne bunareva.

<sup>35</sup> Kau oka kotae sumbudo votoda omburaira aminga ava, evetu genembo isambu bunedo iroro, Sifo amo foa buvari aminda ombarera. Erama amingeove dae sise resena!

<sup>36</sup> Fakina edo, roera eko setena aimi, nemo gambeure dae sedo, evovodae kaifa gigita use, banunguse irivu! Veka eveva vanembo use, sifo amboda ya ivugaghae, Evetu Genembo da Koro+ da dombuda buvu fetari dae sedo, banunguse irivu!” aminge sisira.

<sup>37</sup> Sifo aminda, Iesu nu ataeghae ya God da Kambo+ aminda dengoro indido, tumbaghae jovereghe foa, enda jiro fumbari javo Orivi aminda avido ghusira.

<sup>38</sup> Amingeari, natofo isambu ataeghae beká eredo, Iesu da geke ningari dae sedo, ya God da Kambo+ aminda teredo ghuseri.

## 22

*22:1-6 Iesu Daoro Ambare Dae Sedo, Manaka Garuseri.*

*(Matthew 26:1-5,14-16; Mark 14:1-2,10-11; John 11:45-53)*

<sup>1</sup> Yisti Kanangara Ari da Kirumo+, o Jarige Yari da Kirumo+ seraera amo, fira utua iri,

<sup>2</sup> fristi+ da kokotofu a Moses da Geka ijuga kakato+ tuturo edo, Iesu daoro ambare dae, emboro kakova useri. Amingusera da beká mo: ne natofodae oju useri.

<sup>3</sup> Amingero, Satan ira Judas kena asugedo nunda janje jokáda

teterusira. Judas resena emo, nu Keriot embori. Iesu da ambo jimbi 12, ainda eni numori.

<sup>4</sup> Satan numokena asugetiri, Judas nu eredo ira, fristi+ da kokotofukena a God da kambo+ da kaifa kakato da giti jigharikena buvudo, Iesu ava aito use nenda ungodá fitari dae sisira.

<sup>5</sup> Aminge setiri ningido, ne ivuga edo Judas kena moni mutari dae siseri.

<sup>6</sup> Setero, Judas nu ‘avori’ sedo tuturo edo, Iesu nange ufena budo nenda ungodá fitaetira, ainda emboro ava kakova usira.

*22:7-13 Iesu Nunda Ambo Jimbide Dabade, Jarige Yari Da Kirumo+ Ava Simbuguseri.*

*(Matthew 26:17-25; Mark 14:12-21; John 13:21-30)*

<sup>7</sup> Yisti Kanangara Ari da Kirumo+ ainda sifo kakara tuturo ari dae iri, natofo Jarige Yari da Kirumodae+ sifi (sheep) da mamandi de ojarera da sifo fira buvurutusira.

<sup>8</sup> Sifo aminda, Iesu nu, roera simbugaoro dae sedo, Peter nengae John ghae diriguse nemokena sisira, “Yasivu, Jarige Yari da Kirumo+ namondedae sedo simbugaove!”

<sup>9</sup> Aminge setiri, ne ategi useri, “Naname vasa ningiaminda ya kirumo simbugareri?” aminge setero,

<sup>10</sup> Iesu nemokena sisira, “Ningivu! Yasivu Jerusalem aminda teredo, genembo eni okia bu uvu dimbudo, fururari tambodo, nunda amboda yasivu! Nu reda ya terarira amo, vasa daba aminda yasivu teredo,

<sup>11</sup> kambo numamo aikena sevu, ‘Ijuga kato eminge setira, “Na vasa reda teredo, nanda ambo jimbide dabade, Jarige Yari da Kirumo+ simbugedo mindareri?” ’

<sup>12</sup> Aminge saovo, nune ne bu ya kambo duruda, a dodo, viti vasa ikáda ijugari gareva. Vasa eveva mo, aminda simbugetero irira, ava tambareva. Namondedae sedo, kirumo aminda simbugevu!”

<sup>13</sup> Iesu aminge setiri, ne era, roera isambu Iesu sisira ava tambudo,

Jarige Yari da Kirumo+ aminda simbuguseri.

*22:14-23 Bajari Da Kirumori.*

*(Matthew 26:26-30; Mark 14:22-26; 1 Corinth Embokena 11:23-25)*

<sup>14</sup> Ungobu iri bayau mindari da sifo buviri, Iesu nunda ambo jimbide bayau mindari dae, teredo anumbuguseri.

<sup>15</sup> Anumbetero, nu sisira, “Na oroko mema itatamarena. Avata giti Jarige Yari da Kirumo+ emo, namonde dabade mindari dae uju beká ava erena.”

<sup>16</sup> Na kirumo emo sekago jo mindae irono, ainda beká ava sirorari, God Afa nunda natofo+ tofo mandi kaifa ururari mindarena.”

<sup>17</sup> Aminge sedo, nu agha bu jighiri eretiri, God kena ‘aiyakoe’ sise nemokena sisira, “Vaini (wine) emo budo, soro e mindivu!”

<sup>18</sup> Na nemokena eminge resena: na vaini (wine) jo mindae irono, God foa buvudo nunda natofo+ kaifa ururari ainda sifo aminda, na sekago mindarena.”

<sup>19</sup> Aminge sedo, farava budo God kena ‘aiyakoe’ sedo, jighi embebegedo nemokena futuse sisira, “Nanda tamo nendae sedo erefutena evirere. Bu mindivu! Kotugo evia bu rise, na kotedo ghevu!”

<sup>20</sup> Bayau mindero dadabetiri, kau daba aminga ava, Iesu nu agha budo, nemokena futuse sisira, “God nune beka gagojuse, numokena ya buvari da emboro+ seka, nanda ororoimi afigari sisira amo, eviri.”

<sup>21</sup> Avata na, eminge resena: mave namoá aito arira amo, nu eminda namonde dabade anumbirera.

<sup>22</sup> Evetu Genembo da Koro+, nu God da uju ava use ambarira. Avata genembo mave numo aito ari ai ambarira amo, nu mema a bouvu teriogo ava barira,”

<sup>23</sup> Aminge setiri ne dudukughedo, tuturo edo totofo bunise se nininguseri, “Iesu resira omo, mave ari?” aminge se nininguseri.

*22:24-30 Iesu Da Duruda Mavejori, Ava Sise Beisiga Useri.*

*(Matthew 20:24-28; Mark 10:41-45)*

<sup>24</sup> Aminge sise ne tuturo edo, mave Iesu da duruda bajari aetira, aindae beisiga useri.

<sup>25</sup> Amingero, Iesu nemokena sisira, “Enda da kokotofu, ne kovionoghae seoro nenda natofo nenda geka ningido ava eraera. Ava edo, ne kaifa sembae use, evetu genembo nendae ‘kavevera kakatova’ saoro dae sise eraera.”

<sup>26</sup> Avata ne jo amingae areva. Bebego ne, nenda ambobo tavo ari dae sedo, jovereghe ambo da kaugo areva. A kokotofu ne, nenda sabua tavo ari dae sedo, jovereghe sabua da kaugo areva.

<sup>27</sup> Mavejo mo teriari? Anumbirá gheraira avori, o bayau muturaira, avori? Anumbirá gheraira amo, nu teriari. Avata namo, nenda jokáda nendae sabua+ eraena.

<sup>28</sup> “Namonde dabade deinghuse mema tafureono nanda karonu edo ghusevu.”

<sup>29</sup> Ava sedo, kau nanda Afa namokena fakina muteari, evetu genembo kaifa eraena, kau daba aminga ava, na nemokena fakina mutono kokotofu areva.

<sup>30</sup> Na sifo amboda evetu genembo reda kaifa arena aminda, ne namonde anumbedo bayau dabade mindarera. Kotugo, ne kokotofu da avo anumba 12 aminda anumbirise, Israel embo da oro isambu 12 ava nene kaifa edo ghareva,” aminge sisira.

*22:31-34 Peter Iesu Ighagha Arira Ava, Iesu Nu Giti Osa Sisira.*

*(Matthew 26:31-35; Mark 14:27-31; John 13:36-38)*

<sup>31</sup> Aminge sise, Iesu sisira, “Simon, dengoro jave nininguru! Satan nu God kena benunu sisira: God nange doyari nu foa, nenda fakina dere gosuse ijujaeti. Amo, ne fakina areva, ai, tefo?”

<sup>32</sup> Avata, ninda tumondari inono ari fetaso dae sedo, na banungu-mutani. Ni namokena jovereghedo foa, fakina baresa amo, ninda nano namendikena fakina futuse kaifa aresa!”

<sup>33</sup> Aminge setiri, Simon Peter numokena sisira, “Bajari, ni dibura aresa amo, nangae arera, o ya ambaresa amo, ábarago nangae dabade ya ambarera,” aminge setiri,

<sup>34</sup> Bajari numokena sisira, “Peter, na nimokena resena: sifode kokora sifo jo karigae irari, ni na umbu etodaba naká ighagha aresa,” aminge sisira.

*22:35-38 Dara Furarira.*

<sup>35</sup> Ainda amboda, Iesu nemokena sisira, “Ne giti dirigeteno iseve amo, ne javo, ata asugari, a roera isambu dodo iseve. Roera inono etiri iseve, ai tefo?” aminge setiri, ne siseri, ‘Inono bekári.’

<sup>36</sup> Setero, Iesu nemokena sisira, “Avata oroko nemokena eminge resena. Nemokena ati o javo irarira amo, buvu! Nemokena isoro da kaiya tefo irarira amo, avori, nenda tamo asugari mendeniimi oriro edo, eni ombuvu!

<sup>37</sup> Ai resira amo: God setiri nunda Geka aminda, nandae sise eminge gefuseri:

‘Tafasara kakato deoro sirivo eraera aminga ava, detero nu ambudurusira,’

Ainda geka a geka mendeni mendeni nandae sise gefusera amo, oroko isagha ari dae erira,” aminge setiri,

<sup>38</sup> ne nunda geka da tuka ava kasinguse numokena mino siseri, “Bajari, gi! Isoro da kaiya etoto naká evirere,” setero, nu sisira, “Avori, geka eminda tano e doyoire!” sisira.

*22:39-46 Iesu Nunda Ambo Jimbide Dabade, Enda Jiro Fumbari Javo Orivi, Aminda Banungari Dae Sedo Iseri.*

*(Matthew 26:36-46; Mark 14:32-42)*

<sup>39</sup> Aminge sedo, Iesu nu javi edo, enda jiro fumbari javo Orivi ya ghedo ghusira, aminda isira. Iri,

nunda ambo jimbi nunda amboda iseri.

<sup>40</sup> Era vasada buvudo, nu nemokena sisira, “Erama Satan foa nemo dereuri ari ekoko eove dae sedo, banunguse irivu!”

<sup>41</sup> Aminge sedo, nu eredo nunda ambo jimbi dodo itako soka ira, kauboi dadarigedo banungusira.

<sup>42</sup> Banunguse sisira, “Afa, ni uju aresa amo, mema teria namokena refira evia, saso darigaeti. Avata jo nanda uju ava ae arena. Ninda uju ava arena,” aminge siri,

<sup>43</sup> aneya utuda ghe fira, fakina mutari dae, numokena isagha usira.

<sup>44</sup> Etiri, Iesu nu mema itatamuse ininighae banungiri, nunda ófofo kau ororo da kaugo ava buvurutusira.

<sup>45</sup> Banungetiri dadabetiri, Iesu eredo jovereghe nunda ambo jimbikena ira buvudo, ne fafasedo avéro gosusira.

<sup>46</sup> Gido sisira, “Ne redae fafase ravevu? Ere banungevu, erama Satan foa nemo dereuri ari ekoko eove dae sise resena!”

*22:47-53 Iesu Sandi Bundiseri. (Matthew 26:47-56; Mark 14:43-50; John 18:3-11)*

<sup>47</sup> Iesu aminge siri, nunda ambo jimbi 12 ainda eni javo Judas, emboro ijugiri gegenembo mendeni fuseri. Fera buvero, Judas Iesu muno ari dae sedo, ira numokena buvurutusira.

<sup>48</sup> Buviri, Iesu Judas kena sisira, “Geka bekári? Ni namoá nati jóká doruse, gitofukena aito eresa, ai?” aminge setiri,

<sup>49</sup> Iesu da ambo jimbi mendeni nemonde fusera amo, Judas da ari ava gido, gegenembo rea ari dae usera ava kasama edo, Iesu kena ategi useri, “Bajari, namonde kaiyai jaore, ai?” aminge sero,

<sup>50</sup> nenda eniimi fristi+ da giti jighari ainda saramana kato da dengoro gimandukena ava je gafugetiri dudurusira.

<sup>51</sup> Etiri, Iesu sisira, “Erá amin-geove!’ Sedo, saramana kato da den-goro bu fitiri takegha usira.

<sup>52</sup> Takegha etiri, fristi+ da kokotofu, God da Kambo+ kaifa kakato da babojegari, a evetu gen-embo da babojegari numo sandari dae buvurutusera, aikená sisira, “Ne redae kaiya a gandigha budo, namo sandari dae refevu? Na jo tafasara kato iraeri.

<sup>53</sup> Namonde sifo ghousa God da kamboda+ irise, ijugedo ghuseña amo, nangusiraimi na aminda jo sandae edo ghusevu. Avata oroko Satan da fakinaimi, kau tumba da kaugo, reighida erejirira,” aminge sisira.

*22:54-62 Peter Nu Iesu Ighagha Usira.*

*(Matthew 26:57-58,69-75; Mark 14:53-54,66-72; John 18:12-18,24-27)*

<sup>54</sup> Setiri, gegenemboá Iesu sandi budo era, fristi+ da giti jighari ainda kamboda teteruseri. O Peter mo, nu itako ambokena fetiriri, ne giti ero, nu amboda amboda udo ira kambo ofotighi aminda buvurutusera.

<sup>55</sup> Kambo ainda ofotighi aminda avaraka usetero iriri, ira teterusera. Teredo ira, avaraka tinguda evetu genembo mendeninde dabade anumbusira.

<sup>56</sup> Saramana kato gagara eni fira, Peter anumbiriri gido, tataseguse sisira, “Genembo emo, Iesu ghae de-inghedo ghusira.”

<sup>57</sup> Setiri, Peter ighagha use, mino numokena sisira, “Evetu, ni gen-embo resesa amo, na bunari bekári.”

<sup>58</sup> Aminge setiri ainda amboda, genembo eni fira Peter gido numo-kená sisira, “Nimbarago nunda eniri,” setiri, Peter kovionoghae numokena sisira, “Tefo, a jo namo iraeri.”

<sup>59</sup> Ainda amboda, itako<sup>59</sup> fetedo, genembo eniimi fira kovionoghae sisira, “Geka bekári. Genembo emo nu Galilee embori. Ava sedo, nu Iesu da eniri,” aminge setiri,

<sup>60</sup> Peter mino numokena sisira, “Ni gungubo beká resesa! Na bunariri,” sisira.

<sup>61</sup> Aminge siri, kokora sifo kari-gusira. Etiri, Bajari nu jovereghedo, Peter ava tatasegiri, nu Bajari ge-ka rea sisira, ava kotisira. “Sifode kokora sifo jo karigae irari, ni na umbu etodaba naká ighagha aresa.”

<sup>62</sup> Peter nu ava kotedo, ira buvudo isaghada fetedo, sorara janjagughae usira.

*22:63-65 Iesu Dere Jise Doruseri.*

*(Matthew 26:67-68; Mark 14:65)*

<sup>63</sup> Amingiri, isoro kakato Iesu kaifa usera aimi, ne Iesu dere jise doruseri.

<sup>64</sup> Diti gajedo doruse siseri, “Ni God da feroveta eniva seraesa. Ava sedo, javo se namane ningore! Ni mave eredori?” aminge siseri.

<sup>65</sup> Aminguse, numoá dere jise, ge-ka ekoko mendeni mendeni numokena siseri.

*22:66-71 Iesu Jusi Embo Da Babojegari Da Dombuda Fetetiri, Koto Useri.*

*(Matthew 26:59-66; Mark 14:55-64; John 18:19-24)*

<sup>66</sup> Sifo atetiri, Jusi embo da babojegari, fristi+ da kokotofu, a Moses da Geka ijuga kakato+ fera totorugetero, mendeni Iesu unumbe budo fera teteruseri.

<sup>67</sup> Teretero, kokotofu Iesu kena ategi useri, “Se ningore! God evetu genembo da ari ekoko kote do-yari dae sedo, Genembo eni mutari sisira amo, nimori, ai, jo nimo iraeri?” aminge setero, nu mino nemokena sisira, “Na rea sareña amo, ne jo tumonda areva.

<sup>68</sup> O nane ategi arena amo, ne mino jo sae areva.

<sup>69</sup> Avata na nemokena eminge resena: Evetu Genembo da Koro+ oroko tuturo edo, God Fakina Kato ainda ungo gimandukena anumbedo, evovodae irarira,” aminge sisira.

<sup>59</sup> **22:59:** Tuturo eminda, ‘itako fetedo’ gefusera amo, tamo foyago da gekaimi ‘one hour’ resira.

<sup>70</sup> Setiri, ne sekago ategi useri, “Ni God da Mandi gido resesa?” setero, nu nemokena sisira, “Reseva avori!” aminge setiri,

<sup>71</sup> ne siseri, “Ningevu! Nu aminge siri, God da javo eko etira. Geka eni redae ningareri? Nunda ari eko ava, tofo nunda beka siri niningerevere!” aminge siseri.

## 23

*23:1-25 Pilate Da Dombuda Koto Useri, A Kotugo Sekago Herod Da Dombuda Koto Useri.*

*(Matthew 27:1-2,11-26; Mark 15:1-15; John 18:28-19:6)*

<sup>1</sup> Aminge sedo, ne isambu eredo Iesu budo, Rome embo da kotofu frovensi Judia kaifa edo ghusira, javo Pilate aikena iseri.

<sup>2</sup> Era buvudo, Pilate da dombuda Iesu dae aji sise, geka eminge siseri, “Genembo emo, namanenda natofo dedeuse, erá nenda Rome embo da kotofukena takesi ombeore dae sise irá gheraira. A eni mo: nu Keriso va seraira. Amo, nu tofo kini (king) ari dae sise seraira,” aminge siseri.

<sup>3</sup> Setero, Pilate Iesu kena ategi usira, “Se ningore! Geka bekári: ni Jusi embo da kiniri, ai tefo?” setiri, Iesu sisira, “Ava nine resesare.”

<sup>4</sup> Aminge setiri, Pilate fristi+ da kokotofukena a natofokena sisira, “Nunda dara eni na jo tambaeri. Saono dibura ari, o saono daoro ambari da beká eni jo tambaeri,”

<sup>5</sup> Ningido, ne sekago kovionoghae siseri, “Nu Frovensi Judia eminda vironu sise, evetu genembo da ghamo derari erari, titigho aore dae seraira. Nu Frovensi Galilee aminda tuturo edo fira, eminda kau daba ava eraira,” aminge setero,

<sup>6</sup> Pilate ava ningido nemokena ategi usira, “Geka beká reseva? Genembo emo Galilee embori?”

<sup>7</sup> setiri, “Ai!” setero ningido, Kini (King) Herod kena bu yaoro dae setiri, ne Iesu budo iseri. Ainda beká mo: Kini (King) Herod resena

emo, nu Frovensi Galilee ainda koto-fukori. Sifo aminda, nu Jerusalem irei.

<sup>8</sup> Era teretero, Herod nu Iesu gido ivuga usira. Ainda beká mo: nu anakora Iesu da bino ningido, numo gaetira andae uju beká ava use irei. Iesu nune tano eni ari nunda ditii gaetira, ava Herod nu uju usira.

<sup>9</sup> Ava sedo, nu Iesu kena geka mendeni mendeni ategi usira. Avata Iesu mino eniko jo saeri.

<sup>10</sup> Ava gido, fristi+ da kokotofu a Moses da Geka ijuga kakato+ eredo, aji sise Iesu dae geka ekoko mendeni mendeni kovionoghae siseri.

<sup>11</sup> Aminge sedo, Herod nunda isoro kakatode, Iesu gukai mutudo dere jiseri. Aminguse, nu meka gare dae sedo, ne tamo asugari eveva ava budo fera Iesu kena asugetero, kini (king) da kaugo etiri, mutero sekago jovereghe Pilate kena isira.

<sup>12</sup> Herod nengae Pilate ghae osogo edo ghusera ava, sifo daba aminda nengae komana useri.

<sup>13</sup> Pilate nu fristi+ da kokotofu, evetu genembo da babojegari, a natofo isambu aghi etiri fera torugetero,

<sup>14</sup> sisira, “Ne genembo budo ojigheva emo, ‘nune natofo da giti sembae jighari,’ ava setevu. Ne aji sise, nunda dara mendeni mendeni seteva ainda beká mo, na jo tambaeri. Nenda dombuda koto use, nunda dara eni jo tambae erena.

<sup>15</sup> Herod barago, Iesu da dara eni jo tambae edo, nu mutiri jovereghe namokena ojighira.

<sup>16</sup> Na nanda mendeni saono nu ambíimi dedo, dirigaoro yarira.”

<sup>17-18</sup> Aminge setiri, natofo isambu koko sise siseri, “Iesu, dege ambare! O Barabbas mo, dirige yare!” (Ne Barabbas dae sisera da beká mo: Pilate nu Jarige Yari da Kirumo+ da sifo aminda mo, dibura embo eni doyeoro foa buvudo ghusira.)<sup>17-18</sup> Pilate nu kirumo

**17-18 23:17-18:** Tuturo 17 da geka, Baiboro (Bible) mendeni ainda jokáda fitero irira. O Baiboro (Bible) mendeni ainda jokáda, jo fitoro teraeri.

da agho dari kotise, Iesu doyari yare dae sisira, avata natofo mo, ne Barabbas ava doyari foa buvare dae siseri.

<sup>19</sup> Barabbas resera emo, nu genembo ekori. Numo diburada fifitusira da beká mo eviri: nu natofo da ghamo deretiri, ne eredo titigho useri. A eni mo: nu genembo eni detiri ambududurusira.

<sup>20</sup> Pilate mo, nu sekago Iesu doyari yare dae sedo, sisira.

<sup>21</sup> Etiri, ne numokena mino koko siseri, “Arafa dege! Arafa dege!” setero,

<sup>22</sup> Pilate sekago nemokena sisira, “Atá, sevu ningone! Genembo ainda dara rejori? Numo daoro ambari da susu eni na jo tambaeri. Ava sedo, nanda mendeni saono nu ambiimi dedo, dirigaoro yarira.”

<sup>23</sup> Aminge setiri, ne amboda fumbu aruguse koko teria beká sise, Iesu arafa dare dae sero, Pilate nu manamana edo ‘avori’ sisira.

<sup>24-25</sup> Pilate nu natofo da uju ava ningido, amingusira. Amo, nu Iesu arafa daoro dae sisira. Kotugo genembo eniimi, setiri natofo titigho useri, a nunda komana eni detiri ambududurusira amo, setiri fira buvurusira. Iesu mo, nenda uju ava aoro dae sedo, natofokena futusira.

*23:26-43 Iesu Arafa Doruseri.*

*(Matthew 27:32-44; Mark 15:21-32; John 19:17-27)*

<sup>26</sup> Ne Iesu budo ise, Sairin embo genembo eni javo Simon, Jerusalem ghe ira buvurutiri tafuseri. Tambu sandido setero, nu Iesu da korosi fumbudo, Iesu da amboda isira.

<sup>27</sup> Iesu da amboda mo, evetu genembo digariá iseri. Ainda jokáda, evevetu mendeni Iesu dae sedo, soraraghae nunda amboda iseri.

<sup>28</sup> Sorara ero ningido, Iesu jovereghe nemokena sisira, “Erama nandae sedo sorara eove! Ne Jerusalem embo da eveveturi; ava sedo, nenda sasingudae a tofo nendae sedo sorara evu!

<sup>29</sup> Ainda beká mo: sifo eko amboda refira aminda, sasingu isambu memai a baimaraimi sirivo arera.

Ava sedo, evetu genembo eminge saoro ningareva, ‘Dara, ni ghaguruderi,’ o ‘Makoe, ni erovari,’ aminge sarera.

<sup>30</sup> Sifo aminda, natofo isambu oju use, nange ambaetera ava kotise, doriri a enda jiro fumbari aikena sarera, ‘Fu, namanenda etoda dudo fatase! Fu, namane gagara ase!’

<sup>31</sup> Ainda beká mo: na nu ambududuruse, mema itatamarena. O ne ambududuruse, mema teria beká ava itatamareva!” Iesu aminge sisira.

<sup>32</sup> Gegenembo etoto naká Iesu de dabade arafa dari dae sedo, budo iseri. Gegenembo etoto resena emo, tafasara kakatori.

<sup>33</sup> Ava budo era, reighi javo ‘Jiro Aghati’ aminda buvudo, Iesu tautaimi arafa doruseri. Tafasara kakato barago arafa doruseri, eni Iesu da ungo gimandukena a eni umbefukena.

<sup>34</sup> Amingetero, Iesu banunguse sisira, “Afa, nenda ari eko emo kote doyaso dae resena. Erera ainda tuka mo, ne bunariri,” aminge setiri, ne kikindoro garuse, Iesu da tamo asugari ava soro edo ruruseri.

<sup>35</sup> Natofo aminda fetedo gosero, Jusi embo da babojegari Iesu dere jise siseri, “Nu seari evetu genembo jebugedo ghuseri. Nunda kotari mo: God evetu genembo da ari ekoko kote doyari dae, Genembo eni mutari sisira amo, numori. Ava sedo, tofo mandi sonembedo korosida ghe vose furare!” aminge sero,

<sup>36</sup> isoro kakato barago dere jiseri. Dere jise, era Iesu kena buvudo vaini (wine) dokegha ava futuse,

<sup>37</sup> eminge siseri, “Ni erekotesa amo, ni Jusi embo da kiniri. Ava iraresa amo, korosida ghe vose fetaso gaore!”

<sup>38</sup> Iesu da jiro agada faiyaimi gembudo fitero takegha usira amo, eviri: “Emo Jusi embo da Kiniri.”

<sup>39</sup> Tafasara kato eni arafa dorusera, ábarago dere jise sisira, “Ni God da sonemba kato eni iraresa amo, tofo mandi sonembedo korosida ghe

vosedo, namane barago sonembe gaore!” setiri,

<sup>40</sup> nunda komana numokena ghoghora sise eminge sisira, “Ni God dae oju aetesi! Namonde etodaba naka amboro dae seteri.

<sup>41</sup> Avata nangae mo, dara usera ainda mino beká ava ererurera. O genembo emo, nu dara rejo eni jo aeri,” aminge sedo,

<sup>42</sup> nu jovereghe Iesu kena sisira, “Iesu, ni kotofu baresa<sup>42</sup> da sifoda, na kotaetesi!” aminge setiri,

<sup>43</sup> Iesu numokena sisira, “Na nimo-kena beka gagojuse resena. Ni oroko nangae dabade, God da vasa eveva aminda yarera,” aminge sisira.

*23:44-49 Iesu Ambududurusira.  
(Matthew 27:45-56; Mark 15:33-41; John 19:28-30)*

<sup>44</sup> Isonga (12 koroko) iri, reighi isambu aminda tumba jido iriri ira, ungobu (3 koroko) iri, reighi sekago usasa usira.

<sup>45</sup> Etiri, God da Kambo+ ainda jokáda, nunda vasa kakara ava, erama evetu genemboi tere gido ambeore dae sedo, embo teria eniimi gajetero ireira ava, soroda ijejege vose fusira.

<sup>46</sup> Amingiri, Iesu koko sisira, “Afa, nanda asisi nine baso dae erefutena!” aminge sedo, ghamo asegari dotutusira.

<sup>47</sup> Ambiri gido, isoro kakato da giti jighari God dae sakai sisira, “Geka bekári: Iesu nu genembo evevari.”

<sup>48</sup> Natofo Iesu da ambari ava gari dae sedo totorugusera, aimi ava gido, dubo vevera edo, umbebai yafakoda doruse, natida iseri.

<sup>49</sup> Evevetu mendeni Iesu da amboda deinghuse Galilee dodo fusera aimi, Iesu da dorevare mendeninde dabade, esike fetedo gosuseri.

*23:50-56 Iesu Da Tamo Budo Era Furuguseri.*

*(Matthew 27:57-61; Mark 15:42-47; John 19:38-42)*

<sup>42</sup> **23:42:** Afige, **Geka Se Disugari Da Vasa** aminda, geka *Natofo* dae rea gefusera, ava tege garesa.  
<sup>50-51</sup> **23:50-51:** Afige, **Geka Se Disugari Da Vasa** aminda, geka *Natofo* dae rea gefusera, ava tege garesa.

<sup>50-51</sup> Arimatia embo genembo eni javo Joseph, nu genembo eveva bekári. (Arimatia resena emo, nu reighi eni frovensi Judia amindari.) God nu namonde kaifa ari<sup>50-51</sup> sisira, ainda sifo foa buyaetira ainda, Joseph nu gigita use irei. Nu Jusi embo da bajari eniri. Avata babojegari mendeni, Iesu daoro ambare dae sedo manaka garusera ava, nu imboe usira.

<sup>52</sup> Nune eredo ira Pilate kena teredo, Iesu da tamo mutari bu ya furugari dae sedo, benunu sisira.

<sup>53</sup> Benunu setiri, Pilate ‘avori’ setiri, nu ira Iesu da tamo korosida irisira ava, simbuge bu fitiri vose-tiri, embo yokura foyago budo, aimi doghedo budo ira, nunda ofofo seka ghamana toka basisera, aminda bu tere fiftusira. Giti ambari embo eni jo bu tere fitae iriara aminda, Iesu bu tere fiftusira.

<sup>54</sup> Jangutari da Sifo fira utua iri, Iesu budo ira furugusera.

<sup>55</sup> Evevetu mendeni Iesu da amboda deinghuse Galilee dodo fusera setena amo, ne Joseph de era ofofoda buvudo, Iesu da tamo nange fiftusira ava gosuseri.

<sup>56</sup> Ava gido, jovereghe kamboda era buvudo, Iesu da tamo davari da usu ava tumbaghae simbuguseri. Sifo atarira amo, Jangutari da Sifori. Ava sedo, Agho Dari kakara use, kamboda iriseri.

## 24

*24:1-12 Bajari Ambarida Ghe Jebuge Erorusira!*

*(Matthew 28:1-10; Mark 16:1-8; John 20:1-10)*

<sup>1</sup> Fura Tomanako ataeghae beká, evevetu aimi eredo, tamo davari da usu simbugusera ava budo, ofofoda iseri.

<sup>2</sup> Era ofofoda buvurutusera amo, ne ghamana guro gajetero irisira ava, afufedo ira esike fasiriri gosuseri.

<sup>3</sup> Ava gido, teterusera amo, Bajari Iesu da tamo jo gae useri.

<sup>4</sup> Ne bunedo manamana use aminda fetirero, gegenembo etoto naká aimi nenda demonda sirore fefetererere. Nenda tamo asugari jaraghari beká ava usira.

<sup>5</sup> Etiri gido, evevetu oju use, tumo darido endada furege fafasuseri. Etero, gegenembo aimi nemokena siseri, “Jebuga embo mo, ofofoda jo tambae areva.

<sup>6</sup> A gido, Iesu eminda tefori. Nu anakora ambarida ghe jebuge eretira! Nu nemonde dabade irise, Frovensi Galilee aminda rea nemokena sisira, ava kote givu! Amo eviri:

<sup>7</sup> ‘God nunda ungo sokinembari, gegenemboimi Evetu Genembo da Koro+ budo arafa daoro ambari, sifo etodaba naká dadabari ainda amboda, ambarida ghe jebugedo erarira,’ ava sisira,” gegenembo aimi aminge sero,

<sup>8</sup> evevetuá Bajari da geka ava sekago kotiseri.

<sup>9</sup> Ava kote Jaredo, ofofododo jovereghe era buvudo, rea gosusera a niningusera ainda bino ava, Iesu da ambo jimbi 11 aikena osa sero, evetu genembo mendeninde dabade nininguseri.

<sup>10</sup> Evevetu resena emo, eni mo Magdara embo evetu Mary ri. Eni mo Joanna ri. Eni mo James da noi Mary, mendeninde dabade aimi, ambo jimbikena osa sero nininguseri.

<sup>11</sup> Ningido, Iesu da ambo jimbi ne evevetu ainda geka ava jo tumondae useri. Ne gego yaru use sariá siseri.

<sup>12</sup> Avata Peter eredo ofofoda sumbudo, ira buvudo andebusira. Andebusira amo, embo vanembo fasiriri gido, eredo bunise jovereghe natida isira.

*24:13-35 Iesu Emboroda Tafuseri.  
(Mark 16:12-13)*

<sup>13</sup> Sifo daba aminda, Iesu da dorevare etoto aimi eredo, Jerusalem ghedo reighi Emeas aminda iseri. Emeas resena emo, Jerusalem ghedo

yaresa, kau ututu 11 (11 kilometres) avavaga ya buvaresa.

<sup>14</sup> Ne emboroda ise, rea sirorusira ava se nininguseri.

<sup>15</sup> Ava se niningero, Iesu tofo mandi fira nemokena buvudo, nemonde iseri.

<sup>16</sup> Nengae Iesu gosusera amo, ‘Nu mavejova?’ sedo, buniseri.

<sup>17</sup> Iesu nemokena sisira, “Ne geka rea se nininguse refevu?” setiri, ne bate dombu use fefetuseri.

<sup>18</sup> Fetedo, Cleopas nune Iesu kena ategi usira, “Jerusalem aminda siro-rumutara ava, evetu genembo isas-ambu kasama erera. Ni nangetirai bunise resesi?”

<sup>19</sup> setiri, Iesu numokena ategi usira, “Rejoá sirorumuta? Sevu ningone!” aminge setiri, ne numokena siseri, “Namane mo, Nasareth embo javo Iesu dae resera. Nu God da feroveta teria eniri. Nu God da dombuda a evetu genembo da dombuda, vironu eveva sise, ari a tano mendeni eari, namane jo gae iriara ava, namanenda gitida siroreari gido dudukughedo ghuseri. Nunda fakina ijugeari namanenda ditiimi gido ghuseri.

<sup>20</sup> Namonde Jusi embo da babojegari a namondeda fristi+ da kokotofu ne, Iesu daoro ambare dae sedo, numo sandi bundedo, Rome emokena mutero, budo arafa doruseri.

<sup>21</sup> Namanenda kotari mo: nune nunda fakinaimi namane Israel embo sonembari jebugaeteri. Avata numo arafa detero ambiri, oroko sifo etodaba naká dadabetira.

<sup>22</sup> Namanenda evevetu mendeni oroko ojighera, geka dombu eni setero ningido, namane dudukugheteri. Ne ataeghae ofofoda aera amo,

<sup>23</sup> nunda tamo jo tambaeri. Ne aminda aneya etoto ava nenda diti mokoi geri. Aneya aimi, Iesu nu jebugari ava setero ningido, ne jovereghedo ojera, osa setero ningeri.

<sup>24</sup> Ningido, namanenda mendeni ofofoda aera amo, evevetu rea



setera, ava geri. Avata Iesu, ne jo gaeri,” aminge siseri.

<sup>25</sup> Setero, Iesu nemokena sisira, “Ne gogovara useva ágido, dubo jo kotae ireva! God da ferovetaimi rea sisera amo, ne anakora tumondaetevu. Avata ne jo tumondae ireva.

<sup>26</sup> Feroveta amo, ne eminge siseri: ‘God nu Sonemba kato mutari sisira amo, foama mema itatamari dadabari ainda amboda, nunda fakina a usasa barira,” aminge sise,

<sup>27</sup> God da Geka rea nundae resira ava, Iesu afigetiri kasama useri. Nu Moses da Geka aminda tuturo edo vose fira, God da feroveta da geka, ábarago afigetiri, nengae ningido kasama useri.

<sup>28</sup> Geka se niningudo era, reighi javo Emeas, aminda buvurutuse, Iesu nu ira darigarigiri gido,

<sup>29</sup> ne numoá bureguse ungodu budo siseri, “Tumba jirari dae erira. Fu, namonde avore!” aminge setero, nu nemonde era kamboda teteruseri.

<sup>30</sup> Teredo, ne bayau mindari dae sedo anumbedo, Iesu nu farava bu esimbugedo, jighi embebegedo nemokena futiri,

<sup>31</sup> ne diti basetiri nu kasama useri. Etero, nu manjisira.

<sup>32</sup> Manjetiri, ne tofo tofo se nininguseri, “Nangae emboroda namonde ojighera amo, nangetiraimi nu kasama ae eteri? Nu God da Geka nangaekena afigiri, ghamo biunghetira,” aminge siseri.

<sup>33-34</sup> Aminge sise, nengae eredo bibitai, jovereghe era Jerusalem buvurutuseri. Buvurutusera amo, Iesu da ambo jimbi 11 a, nunda dorevare mendeninde dabade torugedo, geka evia se nininguseri, “Geka bekári: Iesu ambarida ghe jebuge eredo Simon kena isagha etiri gira.”

<sup>35</sup> Ava se niningero, nengae buvudo, rea emboroda siroretiri gosusera, a Bajari nange farava jighi embebegiri nu kasama usera ava, osa setero, ne isambu nininguseri.

*24:36-49 Iesu Nunda Ambo Jimbikena Isagha Etiri Gosuseri.*

*(Matthew 28:16-20; Mark 16:14-18; John 20:19-23; Ekaresia 1:6-8)*

<sup>36</sup> Setero niningero ainghae dabade, Iesu nenda jokáda isagha erirare. Isagha edo, nemokena sisira, “Ireva. Erá oju eove! Dubo jama nemokena irare!” setiri ningido,

<sup>37</sup> ne oju beká ava edo, beka dad-abuseri. Numo sukaruva siseri.

<sup>38</sup> Aminge kotero, Bajari nemokena sisira, “Erá buneove! Ne redae oju erevu?”

<sup>39</sup> Nanda ungo ata evia gosuse, na kasama aovo dae resena! Nanda tamo jighi givu! Sukaru ne tamo tefori,”

<sup>40</sup> aminge sise, nunda ungo ata ava, ijugetiri ne gosuseri.

<sup>41</sup> Gi dudukughedo, ne ivuga useri. Avata ne manamana use tumonduseri. Ava gido, Iesu ategi usira, “Nemokena bayau eni iraeri?”

<sup>42</sup> Aminge setiri, oka eni iti fitero irisira ava, mutero

<sup>43</sup> budo, nenda dombuda risira.

<sup>44</sup> Mindido, nemokena sisira, “Namonde deinghuse, na rea sedo ghusena ava, oroko eminda beká siroretiri eregosevere. God da Geka aminda, Moses a God da feroveta rea nandae gefusera, a kotugo Yaru Buku jokáda rea nandae gefusera amo, beká sirorarira. Ava sedo, beká evia siroretiri eregosevere.

<sup>45</sup> Aminge sise, God da Geka ava dubo kote gogoghombaoro dae sedo, setiri nenda kotari afigusira.

<sup>46</sup> Afigetiri, nu nemokena sisira, “God da Geka eminge resira:

‘God nu evetu genembo da ari ekoko kote doyari dae sedo, Genembo eni mutari sisira amo, giti mema itatamedo ambudo, sifo etodaba naká ainda amboda, sekago ambarida ghe jebuge erarira.

<sup>47</sup> Evetu genembo nange nenda ari ekoko vujegaoro, God nenda ari ekoko, Genembo ainda javoda kote doyarira ava, osa

siruroro evetu genembo isasambu ningarera.

Jerusalem eminda tuturo edo, amboda ya reighi isasambu endada irera, aminda buvudo, osa sise, vironu siruroro ningarera.'

<sup>48</sup> Roera emo gosuseva ava sedo, nene ya osa sareva!

<sup>49</sup> Nanda Afa beka gagojuse, nunda Asisi Kakara mutari sisira ava, na tofo mandi nemokena mutarena. Ava bari dae sedo, Jerusalem eminda kaifa ururovo, Asisi Kakara nemokena vose furari bareva," aminge sisira.

*24:50-53 Iesu Utuda Vitisira.  
(Mark 16:19-20; Ekaresia 1:9-11)*

<sup>50</sup> Aminge sedo, Iesu ne unumbe budo Jerusalem ghedo era, reighi Bethany aminda buvudo, Iesu ungo jighiri eretiri ne esimbugusira.

<sup>51</sup> Amingedo, ne dodo, nu utuda vitisira.

<sup>52</sup> Vitiri, ne nu tumonde bainghuse, eredo ivugaghae era, Jerusalem teteruseri.

<sup>53</sup> Aminguse, ne sifo ghousa ava God da kamboda+ irise, God kena aiyakoe sise iriari.

Avori, nanda geke tano eviri.

## John Kakara

John ningaimi bukué gefusira amo, namonde jo kasama e gogoghombaeri. Avata evetu genembo digari erekotera amo, Iesu da ambo jimbi John, nune gefusira. Ainda susu mo eviri: John 13:23, 19:26, 20:2, 21:7, a 21:20 aminda, genembo buku gefusira aimi, nu tofo kivo udo ise, “Iesu da ambo jimbi mavejoá nu dubo budo ghusira,” avanembo sido isira. O 21:24 aminda, nu tofo isagha ijuguse sisira. Sifo aminda, evetu genembo totofo nenda javo kivo use, amingedo ghuseri. O namonde, Korafe-Yegha jo amingae eraera. Namonde kiki dise, totofo ijuguse, ‘na’, ‘namane’, o ‘namonde’ ava sise gemburaera. Avata John nunda geke gefuse, ‘na’ jo sae edo ghusira. A gido namane, Korafe-Yegha geke aimi jovereghuse, John tofo mandi geke gefusira ava kotise, dambu John numoá ijuguse, ‘na’, ‘namane’, a ‘namonde’ ava gefuseri.

Matthew, Mark, a Luke nenda geke giti gembero fefetusira. Ainda amboda, John nu eredo, nunda geke kote simbugedo gefusira. Avori, Matthew, Mark, a Luke, ne mokogo kiki a geke daba ava gefuseri. O John mo, nu kiki a geke mendeni gefuse, evia kasama aoro dae sedo gefusira: Iesu nu Geka Beká da susuri. A kotugo, nu Usasa, Jebuga, a Jebuga Evovodae Irari da Uvu Bayauri. Nu Namondeda Sifi (Sheep) Kaifa Kato Evevari. A namonde ya God Afakena buvari da Emboro+ numori. Kotugo geke mindafu eni mo eviri. Iesu nu God da Mandi beká, ava kasama aoro dae sedo, John geke emo simbugedo gefusira.

*John Geka Gefusira, Ainda Mendo Mendo Mo Eviri.*

1:1-18 Iesu reda ghe fira enda eminda sirorusira.

1:19-51 John Bafaito Ari Kato saramana use iriri, Iesu tuturo

edo nunda ambo jimbi mendeni aghi usira.

2:1–12:50 Iesu natofo da dombuda saramana edo ghusira.

13:1–19:42 Iesu Jerusalem aminda ira, rea sisira a usira, a kotugo nange ambududurusira amo, eviri.

20:1-31 Iesu ambarida ghe jebuge eredo, nunda natofokena isagha eari gido ghuseri.

21:1-25 Iesu sifo eni Galilee aminda isagha etiri, nunda ambo jimbi gosuseri.

*1:1-18 God Da Geka Evovodae Irari Aimi, Endada Vosedo, Evetu Genembo Da Tamo Ava Budo Sirorusira. God da Geka Evovodae Irari Amo, Na Iesu Dae Resena.*

<sup>1</sup> Enda jo sirorae iriri gitida, God da Geka nu irei. God da Geka amo, nu God ghae dabade iriari, a nengae mo dabakori. Nemo jo nunda nunda iraeri, o dombu eni iraeri.

<sup>2</sup> Giti beká giti tuturoda mo, nengae dabade iriari.

<sup>3</sup> God nunda Geka resena eimi, roera isasambu nune etiri sirorusira. Roera isasambu, utuda a endada irira amo, nunda Geka da fakina ainembo etiri sirorusira.

<sup>4</sup> God da Geka resena einda jokáda mo, jebuga siroredo foa gheraira. Jebuga resena emo, nu kau usasa aminga ava, evetu genembo da jokáda janimberaira.

<sup>5</sup> Usasa mo, tumba jokáda janimberaira. Jo tumbai fati soana ae eraira.

<sup>6</sup> Avori, God nunda aghi kato javo John ava dirigetiri,

<sup>7</sup> usasa einda beká ava sari ningoro dae sedo, evetu genembokena fusira. Ne John da geke ningido, usasa ainda bino ava tumondaoro dae sedo, God nu John dirigetiri fusira.

<sup>8</sup> Usasa resena emo, na jo John dae saeri. John nu usasa ainda aghi katori.

<sup>9</sup> Usasa amo, nu usasago bekári. Nu evetu genembo isambukena jan-imbari dae sedo, endada fusira. Usasa amo, na Iesu dae resena.

<sup>10</sup> Numo God da Gekari. Geka eimi, enda etiri sirorusira. Nu vose fira enda eminda ireira avata, evetu genembo nu jo kasama ae iriari.

<sup>11</sup> Numo, nunda natofo Jusi embokena fusira, avata ne nu ighagha useri.

<sup>12</sup> Avata mave, nundae nati jóká doruse nu tumondusera amo, God da sasingu aore dae sedo, nemokena fakina futusira.

<sup>13</sup> God da sasingu sirorusera amo, jo nenda fakinaimi o evetu genembo da ujuimi, saoro siroraeri. Nemo, God da fakinaimi etiri siroruseri; ava sedo God mo, nenda Numamo bekári.

<sup>14</sup> God da Geka setena amo, nu endada vosedo genembo beká jinetiri, namonde dabade iriari. Nu namonde dabade irise, geka beká sise, a sonembeari, nunda duro isagha eari namonde gido ghuseri. Nunda duro resena emo, nu God Afakena rurusira. Nu God da Mandi dabako tainako ava sedo, mutiri nune rurusira.

<sup>15</sup> John nu Iesu dae sise, eminge sisira, “Na geka sedo ghuseña amo, na genembo eindae sise, sedo ghuseña. Amo eviri: ‘Genembo eni nanda amboda refira amo, nu ambori, na begori. Avata, numo teriágo bekári, na kitakori. Ainda tuka mo: na jo sirorae iriana da gitida, nu irei,’ ” John nu Iesu dae aminge sisira.

<sup>16</sup> Nunda sonemba tomanako bekáimi namonde esimbugurureari irá gheraera.

<sup>17</sup> God nunda Agho Dari ava setiri, Moses gembu futusira. Avata sonemba a geka beká mo, jo Moses nune mutaeri. Iesu Keriso nune budo fira futusira.

<sup>18</sup> Evetu genembo mave eniimi God jo ditii gae irera. Avata,

God da Mandi dabako tainako, Numamoghae dabade irá gheraera aimi fira, God nu kau mavegori, ava nune setiri evetu genembo nininguseri.

*1:19-28 John Nu Tofo Mandi Ijuge-tiri, Babojegari Ne Nininguseri.*

*(Matthew 3:1-12; Mark 1:1-8; Luke 3:1-18)*

<sup>19</sup> Jusi embo<sup>19</sup> ne, John kena ategi e ningoro dae sedo, fristi+ a Levi ondi+ mendeni, dirigetero Jerusalem ghedo fera, John kena buvudo ategi useri, “Ni mavejori?”

<sup>20</sup> Aminge setero, John jo tofo jungutuse ighagha aeri. Nu isagha sisira, “God Genembo eni dirigari furare dae sisira amo, jo namo iraeri,” aminge sisira.

<sup>21</sup> Setiri, ne siseri, “Averi, se ningore! Ni, feroveta Elijah jovereghe furariá seraera amo, nimori, ai?” aminge setero, John mino eminge sisira, “Tefo! Na jo Elijah iraeri,” setiri, ne sekago ategi useri, “Ni aminge saresa amo, ni mavejori? God amboda feroveta tomanako eni mutari furare dae sisira amo, nimori, ai? Se ningore!” aminge setero, nu sekago eminge sisira, “Tefo! Na jo numo iraeri.”

<sup>22</sup> Aminge setiri, ne siseri, “Gegenembo namane dirigetero ojera aikena jovereghe yarera amo, mino nange sareri? Ava sedo, ni tofo se ningore! Ninda saramana rejori?” ne aminge siseri.

<sup>23</sup> Setero, John eminge sisira, “Nanda saramana beká aindae, feroveta Isaiah geka eminge gefusira:

‘Na reighi uvu a evetu genembo irae da vasa eminda, beka fainghedo natofo isambukena seraena:

“Bajari da emboro rerebevu dambu are!” ’

Geka emo, God da feroveta Isaiah anakora nandae sisira,” John aminge sisira.

<sup>19</sup> **1:19:** Tuturo 19 eminda, John nu ‘Jusi embo’ sisira amo, nu Jusi embo da babojegari a Moses da Geka kaifa kakato+ aindae sisira.

<sup>24</sup> Gegenembo John kena fera ategi usera amo, Moses da Geka kaifa kakato+ aimi dirigetero fuseri.

<sup>25</sup> Ne sekago daba aindae, John kena ategi useri, “Ni eminge setesi: ‘God Genembo eni dirigari furari seraera amo, jo nimo iraeri. A ni jo Elijah iraeri. A kotugo, God feroveta eni dirigari furariá seraera amo, jo nimo iraeri,’ setesi. Avori, ni redae bafataito eraesi?”

<sup>26</sup> Aminge setero, John minonda nemokena sisira, “Na tefo uvu vanemboimi bafataito eraena. Avata Genembo eni nenda jokáda fetirira amo, ne jo kasama ae ireva.

<sup>27</sup> Na giti siroreteno, nu amboda sirorusira. Avata nu genembo teria bekári. Na jo numongo iraeri. Na taká sabua bekári,” John aminge sisira.

<sup>28</sup> Reighi Bethany aminda, geka ava se nininguseri. Reighi Bethany resena emo, nu uvu Jordan beina iji vitarikena, aminda irira. John nu vasa aminda bafataito edo ghusira.

*1:29-34 Genembo Eni, Namondedae Sedo Ambari Dae Fusira Amo, Iesu Numori.*

<sup>29</sup> Sifo atetiri, Iesu numokena ira buvurutiri gosuse, John natofo isambukena sisira, “God Sifi da Mandi eni, namonde evetu genembo da ari ekoko seghe fugutuse ambare dae sedo, mutiri fusira amo, ovia refirore.

<sup>30</sup> Na Genembo eni nanda amboda refira, simutana, amo eviri. Na sife geka nundae simutani. Na giti siroreteno, nu amboda sirorusira. Avata nu teria bekári. Na jo numongo iraeri. Ainda beká mo: na jo sirorae iriana da gitida, nu irei,’ amo na nundae simutani.

<sup>31</sup> Nu furarira ava na kasama useni, avata nu mavejoá, na jo kasama ae useni. Avata na uvuimi bafataito udo refena ainda susu mo: na nange nunda kau mavega ava iju-gaono Israel embo gi kasama aeteri!”

<sup>32</sup> Aminge sedo, John geka eni Iesu dae sisira amo, eviri: “God da Asisi Kakara, kau ribo da kau aminga ava,

vose fira numokena asugedo iriri, na gosumutani.

<sup>33</sup> Na nu jo kasama ae umutani. Avata God na uvuimi bafataito aono dae sedo dirigusira aimi, namokena sisira, ‘Asisi Kakara vose foa Genembo mavekena asugedo irari garesa amo, Genembo amo, nu Asisi Kakara da fakinaimi, evetu genembo bafataito use irarira.’

<sup>34</sup> God rea sisira ava, isagha etiri gosumutani. Aindae na nemokena resena: nu God da Mandiri,” John aminge sisira.

*1:35-42 Iesu Gegenembo Mendeni Gategedo, Aghi Etiri Fera Nunda Ambo Jimbi Useri.*

<sup>35</sup> Sifo atetiri, John nunda ambo jimbi etoto naká ainde dabade vasa daba aminda irise,

<sup>36</sup> Iesu fira darigiri gido, John sisira, “God Sifi da Mandi eni mutiri ambari dae refira amo, ovirere.”

<sup>37</sup> Aminge siri ningido, nunda ambo jimbi ne John dodo, Iesu de dabade iseri.

<sup>38</sup> Nunda amboda ero, Iesu jovereghe gosusira amo, ne nunda amboda amboda fero gido, nendae ategi usira, “Ne rejoá kakova erevu?” aminge sisira. Setiri, ne mino siseri, “Rabai, ni reda irá gheraesi?” siseri. (Rabai resena emo, namondeda gekaami ‘ijuga kato’ sise siseri.)

<sup>39</sup> Setero, nu nemokena mino sisira, “Fuvu gaove!” Aminge sedo, ne dabade era, etoto naká amo ne Iesu da irari vasa ava gido kasama useri. Aminda nemonde dabade irero ungobu usira. (Amo kau, 4 koroko avavaga usira.)

<sup>40</sup> Gegenembo etoto naká John da geka ningido, Iesu de dabade isera amo, eni Andrew ri. Andrew resena emo, nu Simon (o Peter seraera) ainda namendiri.

<sup>41</sup> Andrew nu totoi ira, nunda koro Simon tambudo sisira, “Namane Keriso tamberi,” aminge sisira. (Geka Keriso da tuka mo: God Genembo eni dirigari furarira, aindae namonde ‘Keriso’ seraera).

<sup>42</sup> Aminge sedo, Andrew nunda koro Simon unumbe nengae Iesu kena iseri. Era buvero, Iesu nu Simon á tataseguse sisira, “Ni John da mandi Simon ri. Avata ninda javo seka, Cephas o Peter jijigherena.” (Geka Cephas o Peter ainda tuka mo, ghamanari.)

*1:43-51 Iesu Nunda Ambo Jimbi, Philip Nengae Nathanael Ghae, Ava Gategedo Aghi Usira.*

<sup>43</sup> Sifo atetiri, Iesu Frovensi Galilee aminda yari kotisira. Kotedo, Philip tambudo, “Fu, nangae yaore!” sisira.

<sup>44</sup> (Philip resena emo, nu Andrew Peter ghae da reighi Betsaida, ainda genembo eniri.)

<sup>45</sup> Setiri, Philip nu eredo ira Nathanael tambudo numokena sisira, “God da Agho Dari da buku jokáda, Moses i Genembo enidae gefusira. Genembo amo tamberi. Feroveta barago, Genembo daba andae gefuseri. Amo, Nasareth embo genembo Joseph da mandi javo Iesu dae siseri.”

<sup>46</sup> Aminge setiri, Nathanael nu Philip da geka ighagha edo, dere jise eminge sisira, “Kote gi! Nasareth aminda ghedo, eveva eni furariá sise resesa?” aminge setiri, Philip mino sisira, “Averi, fu gase!”

<sup>47</sup> Philip aminge setiri, Nathanael eredo Iesu kena isira. Iri, Iesu fuge Nathanael gido, eminge sisira, “Refira omo, Israel embo bekári. Numokena gungubo eni tefori,” aminge sisira.

<sup>48</sup> Aminge siri, Nathanael ningido ategi usira, “Ni nange na kasama eresi?” aminge setiri, Iesu mino sisira, “Philip jo ya nimokena buvae iriri, ni ika kayuyu duruda anumbireso geni.”

<sup>49</sup> Aminge setiri, Nathanael numokena sisira, “Ijuga Kato, ni God da Mandiri. Ni namonde Israel embo da kiniri.”

<sup>50</sup> Aminge setiri, Iesu numokena sisira, “Ni, kayuyu duruda

anumbireso gido setena andae tumonderesa, ai? Amo kitakori. Ni amboda roera mindafugo garesa.”

<sup>51</sup> Aminge sedo, nemokena sisira, “Geka beká resena! Amboda utu afigari, God da aneya Evetu Genembo da Korokena+, vose vitido ghururoro gareva,” Iesu aminge sisira.

## 2

*2:1-12 Iesu Setiri, Uvu Ava Jovereghedo Vaini (Wine) Jinisira.*

<sup>1</sup> Sifo etoto naká ainda amboda, reighi eni javo Keina Frovensi Galilee aminda, evetu fitari da kirumo useri.

<sup>2</sup> Iesu noi, nu ira kirumo ainda jokáda teterusira. Iesu barago, nunda ambo jimbi de dabade, ya anumbaoro dae sedo aghi useri.

<sup>3</sup> Kirumo use, vaini (wine) mindero dadabetiri gido, Iesu noi numokena, “Vaini dadabetira,” sisira.

<sup>4</sup> Setiri, Iesu noikena sisira, “Aya<sup>4</sup> ni redae namokena resesi? Nanda sifo jo foa buvae irira,” aminge sisira.

<sup>5</sup> Setiri, Iesu da noi saramana kakato aikena sisira, “Nu rea sarira, ava evu!” aminge sisira.

<sup>6</sup> Jusi embo nenda agho dari kotise, ungo giti seghedo bayau amboda mindiraera. Ava kotise, uvu dimbari dae sedo, okia 6 aminda fitero irei. Okia amo ghamanaimi useri. Okia dabako ainda inono kau 100 lita (litres) avavagori.

<sup>7</sup> Iesu nu eredo saramana kakato aikena sisira, “Okia mendeni tava edo bu yasivu! Uvu dimbu budo fuvu averegaovo, okia mindafué bedo are!” aminge setiri, ne okia tava edo, uvu dimbu budo era averegetero, vitifira okia mindafué bekada gisisighusira.

<sup>8</sup> Etiri gido, Iesu nemokena sisira, “Averi, uvu daba evia dimbu budo yasivu, kirumo da giti jighari aikena mutovo gare!” Iesu aminge setiri, ne eredo uvu dimbu budo, kirumo da giti jighari aikena iseri.

<sup>4</sup> 2:4: Tuturo eminda, namane ‘Aya’ gefuseri. Avata John nu Greek gekai, ‘Evetu’ gefusira.

<sup>9</sup> Era buvudo, mutero risira. Avata uvu amo anakora vaini (wine) jine-tiri risira. Mindido, vaini (wine) amo reda ghe fusira ava, nu bunisira. (Avata saramana kakato uvu difusera aimi, nene kasama useri.) Giti jighari nu bunendo aghi etiri, genembo evetu fiftusira aimi fira buviri sisira.

<sup>10</sup> “Evetu genembo isambu emingeraera. Ne giti vaini eveva janje araghari ava muteoro esa embo mindiraera. Avori, ne teria futo mindioro gido ainda amboda, ne tuturo edo vaini (wine) janje irae ava muturaera. Avata ni, vaini (wine) eveva janje araghari emo bu jighirasa, amboda erefutesi!” aminge sisira.

<sup>11</sup> Iesu tano mindafugo evia, reighi Keina Frovensi Galilee aminda usira amo, nunda tano gitida etiri sirorusira. Nu aminguse, nunda duro ava ijugetiri, nunda ambo jimbi gido, nu tumonduseri.

<sup>12</sup> Ainda amboda, Iesu nunda noi, jamena, a ambo jimbi ainde dabade reighi Keina ghedo era, reighi Kaponiam aminda buvudo, sifo tufako iriari.

*2:13-22 Iesu Ira Reighi Jerusalem Aminda Buvudo, Evetu Genembo Mendeni Ondiri, God Da Kambo+ Jokáda Ghe Fera Buvurutuseri.*

*(Matthew 21:12-13; Mark 11:15-17; Luke 19:45-46)*

<sup>13</sup> Jusi embo da kirumo eni, javo Jarige Yari da Kirumo+ seraera, amo fira utua iri gido, Iesu Jerusalem isira.

<sup>14</sup> Ira, God da Kambo+ aminda, evetu genembo mendeni burumakava (cattle), sifi (sheep), a ribo ava ofero tafusira. A mendeni nenda ghaghada anumbirise, esa embo da moni ava budo, Jusi embo da moni ainghae oriro<sup>14</sup> ero tafusira.

<sup>15</sup> Amingero gido, Iesu asi ava nunda ambídae budo aimi, sifi (sheep) nengae burumakavaghae (cattle) ava ondiri, God da Kambo+ jokáda ghe era buvurutuseri. A

kotugo nu, evetu genembo moni oriro erusera, ainda ghagha jighi jovereghetiri, nenda moni ghasaghe endada vovosegusira.

<sup>16</sup> Amingedo, nu jovereghe, evetu genembo ribo ava oriro erusera aikena sisira, “Nenda ribo bambudo yasivu! Erama eminda ofuse eove, nanda Afa da Kambo ombari vasa da kaugo eure!”

<sup>17</sup> Aminge siri ningido, nunda ambo jimbi geka eni, God da Geka jokáda eminge gefusera, ava kotiseri:

“Nanda dubo bari ninda kambokena mo mindafu bekári. Aimi, nanda ghamo

jokáda avarakaimi avarigiri ambududu-rerena,” geka ava kotiseri.

<sup>18</sup> Etiri dadabetiri, Jusi embo numokena siseri, “Ni erekotesa, God amingaso dae setiri etesi. Ava sedo, tano eni aso namane gido, God ni amingaso dae setira, ava tumondarera!”

<sup>19</sup> Aminge setero, Iesu sisira, “Avori, nanda tano ijugarena amo, eviri. Kambo emo de bejovo, sifo etodaba naká ainda jokáda nane sekago itarena.”

<sup>20</sup> Aminge setiri, ne siseri, “Amo nange resesi? Amo ni jo aso inono ae arira. God da Kambo+ emo ghaeko 46 ainda jokáda itutuseri,” aminge siseri.

<sup>21</sup> Avata Iesu nu tofo numoá kivo use, nunda tamodae nu budo ira ‘kambo’ sisira.

<sup>22</sup> Ava sedo, Iesu ambarida ghe sekago jebuge eretiri gido, nunda ambo jimbi geka emo sekago kotiseri. Kotedo, God da Geka rea sisira, a Iesu rea sisira ava tumonduseri.

*2:23-25 Iesu Nu Evetu Genembo Da Dubo Joká Ava Kasama Eraira.*

<sup>23</sup> Jarige Yari da Kirumo+ ainda sifoda, Iesu nu Jerusalem aminda irei. Iesu nu tano mendeni mendeni urureari gido, natofo nu tumondedo ghuseri.

<sup>14</sup> **2:14:** Afíge, Matthew 21:12 ainda duruda tege garesa.

<sup>24</sup> Avata Iesu ne jo tumonduse, nunda dubo joká jo nemokena afigae usira. Ainda beká mo: nu evetu genembo da dubo joká ava kasama edo ghusira.

<sup>25</sup> Nu, mave jo foama evetu genembo da kotari ava, numokena osa sari da kaugo iraeri. Ainda beká mo: nu tofo evetu genembo da dubo joká gi kasama edo ghusira.

### 3

#### *3:1-21 Iesu Nengae Nicodemus Ghae Dabade Geka Siseri.*

<sup>1</sup> Jusi embo da bajari eni javo Nicodemus, ai irei. Moses da Geka kaifa kakato+ da eni mo numori.

<sup>2</sup> Tumba eni, nu Iesu kena ira buvudo sisira, “Rabai (Ijuga Kato), namane kasama erera: God setiri ni ijuga kato edo fusesi. Tano a ari mendeni mendeni, nine easo gido dudukugheraera ava, mave jo tofo nunda fakinaimi ae arira. Ava sedo, ni amingeraesa amo, ni God da fakinaimi eraesa,” nu aminge sisira.

<sup>3</sup> Setiri, Iesu numokena sisira, “Na nimokena geke beká resena: mave nu jo sekago sirorae arira amo, nu jo God da natofo+ jokáda teredo, God da reighiá jo gae arira.”

<sup>4</sup> Aminge setiri, Nicodemus sisira, “Amo nange resesi? Genembo beká jo amingae arira. Nu jo jovereghedo noi da tininda teredo sekago sirorae arira.”

<sup>5</sup> Aminge setiri, Iesu sisira, “Na nimokena geke beká resena: mave nu jo sekago uvu a God da Asisiimi siorae arira amo, nu jo God da natofo+ jokáda teredo, God da reighiá jo gae arira.

<sup>6</sup> Ainda beká mo: evetu genembo da tamo mo, noi numamokena budo siroreraera, avata tamo da fakina aimi, evetu genembo da asisi jo jebugae arira. Amo, God da Asisi da fakina aimi, evetu genembo da asisi jebugarira.

<sup>7</sup> Ava sedo, ‘Ni sekago siroraetesi,’ aminge seteno ningesa ava, erá buneose dae sise resena.

<sup>8</sup> Yaura ava kote gi! Yaura nunda uju ava ya foa ghuse, javi ururari ningaresa. Avata, nu reda ghe foa gheraira, a reda ya gheraira, ni bunariri. Kau daba aminga ava, God da Asisi, nunda uju ava use, ya foa ghuse seari, evetu genembo mendeni jebugeraera.”

<sup>9</sup> Iesu aminge setiri, Nicodemus ategi usira, “Emo nangedo sirorerai?”

<sup>10</sup> Setiri, Iesu sisira, “Ni, namonde Israel embo da ijuga kato mindafu eni nimorita. Nangetiraimi ni erebunesi?”

<sup>11</sup> Na nimokena geke beká resena. Namane seraera evia, jo kotae kotae sae eraera. Namane rea kasama usera a gosusera avanembo, nemokena seraera. Avata ne namanenda geke jo bae eraeva.

<sup>12</sup> Na, oroko roera enda eminda irira aindae seraena, avata ni na jo tumondae eraesa. Ava sedo, roera utuda irira aindae, osa saono ningaresa amo, ábarago jo tumondae aresa tano.

<sup>13</sup> A kotugo, roera utuda irira ava, genembo eniimi mave jo viti ya gae irira. O Evetu Genembo da Koro+ utuda ghe vose fusira aimi, nusuka aminda irise gosusira.

<sup>14-15</sup> “Avori, God da uju mo: mave Evetu Genembo da Koro+ tumondarira amo, nu jebuga evovodae irari ava tuve barira. Ainda beká mo: God nunda ungo sokinembari, Evetu Genembo da Koro+ arafa dedo jighoro erari, mave ava gido tumondarira amo, nu jebugarira. Avori, Moses usira ava, kote gi! Nu reighi uvu a evetu genembo irae da vasa aminda, auri (bronze) aimi ove kevasira; jingabu da kau ava edo jighiri erorusira. Ere fetetiri, ava mave tumonduse gosusira amo, nu jebugusira. Kau daba aminga ava, mave Evetu Genembo da Koro+ gido, tumondarira amo, nu jebuga evovodae irari ava tuve barira.

<sup>16</sup> Ainda beká mo: God nu evetu genembo dubo bu gogoghombuse, jebuga evovodae irari ava baoro dae sedo, nunda Mandi dabako tainako



mutiri fusira. Fusira da beká mo: mave nu tumondarira amo, jo ambae arira. Nu jebuga evovodae irari ava tuve barira.

<sup>17</sup> Ainda tuka mo: God jo, natofo da ari ekoko ijujedo sari amboro dae sedo, nunda Mandi dirigari furaeri. Nune sari natofo jebugaoro dae sedo, dirigetiri fusira.

<sup>18</sup> Mave God da Mandi tumondarira amo, God nunda ari ekoko jo ijujari ambae arira. O mave God da Mandi jo tumondae arira amo, God anakora setiri nunda asisi ambududurusira. Ainda beká mo: nu God da Mandi dabako tainako ava jo tumondae usira aindae.

<sup>19</sup> Ijujari ambarera da beká mo eviri: usasa mo endada vose fusira. Avata natofo ne, usasa amo imboe use, tumba ava dubo buraera. Ai resira amo: ne ari ekoko eraera.

<sup>20</sup> Evetu genembo mave ari ekoko eraera amo, ne usasa imboe eraera. Aindae sedo, erama usasaimi janimbeuri, nenda ari ekoko ava geore dae sise, ne jo usasakena yae eraera.

<sup>21</sup> Avata evetu genembo mave, ari eveva use irá gheraera amo, ne usasakena ya gheraera. Ainda beká mo: ne God da uju ava use ari eveva eraera ava, usasaimi janimburrari, natofo gi kasama aoro dae sedo, ne usasakena ya gheraera.” Iesu aminge sisira.

*3:22-30 John Bafataito Ari Kato, Nune Iesu Da Javo Jighiri Erorusira.*

<sup>22</sup> Ainda amboda, Iesu nunda ambo jimbide dabade, Frovensi Judia aminda iseri. Nu namonde sifo mendeni mendeni aminda dabade irise, Iesu nu evetu genembo bafataito edo ghusira.

<sup>23-24</sup> John Bafataito Ari Kato, numbarago frovensi daba aminda, reighi eni javo Inon aminda irise, uvu kafuru aminda irira ava sedo, aminda bafataito edo ghusira. Reighi Inon resena emo, nu reighi Salem da tingudari. John jo dibura ae irise, evetu genembo fureoro ne bafataito edo ghusira.

<sup>25</sup> Amingiri, John da ambo jimbi mendeni tuturo edo, Jusi embo da genembo eninde beisiga useri. Ne beisiga usera da susu mo: ne ijuga eni, ungo seghari da agho dari aindae beisiga useri.

<sup>26</sup> Aminguse, John kena era buvudo siseri, “Ijuga Kato, ni uvu Jordan beina onakena, genembo eni fira nimokena iriri, nundae geka sisesa amo, erekotesa? Nu tuturo edo bafataito iri, oroko evetu genembo isambu namonde dodo numokena ya gherera,” aminge siseri.

<sup>27</sup> Aminge setero, John eredo eminge sisira, “Resesa amo, jo namondeda sari da kaugo iraeri. Amo nu God sari da kaugori.

<sup>28</sup> Na geka seno ne totofo niningusevu, ‘God Genembo eni mutari sisira amo, jo namo iraeri. God, Genembo setena ainda gitida, na dirigetiri fuseni,’ aminge seno niningusevu.

<sup>29</sup> Genembo resena emo, nu kau genembo eni evetu fitido, nunda evetu seka aindae sedo ivuga eraira. O namo, na kau genembo evetu fitiraira ainda komana mave dengesida fetirise, nunda komana evetu fitiraira ainda beka nininguse, ivuga eraira. Na kau daba ava, nanda komana da bino aindae, nambarago ivuga e gogoghombraena.

<sup>30</sup> Nu teria ari, na jovereghe vosedo ijoghako arena!” aminge sisira.

*3:31-36 Genembo Utuda Ghe Vose Fusira Amo, Kau Emingori.*

<sup>31</sup> Aminge sise, John sisira, “Genembo mave utuda ghe vose fusira amo, nu teria bekári. Eni jo numongo iraeri. Mave endada siorarrira amo, nu enda da tofori. Nu enda da bouvu a kotari aindae kotise a sise irarira. O genembo mave utuda ghe vose fusira amo, nu teriago a iká bekádari.

<sup>32</sup> Nu rea gosusira a niningusira ava, osa seraira. Avata nunda geka, mave jo tumondae eraira.

<sup>33</sup> O genembo mave nunda geka ningi tumondarira amo, nu tumonduse kasama arira: God da Geka mo, geka bekári.

<sup>34</sup> Genembo God dirigetiri fusira aikena, God nunda Asisi da fakina isambu futusira. Aindae sedo, nu God da Geka ava, vironu seraira.

<sup>35</sup> God nunda Mandi dubo ruruse, roera isasambu nunda ungodá fifitusira.

<sup>36</sup> Mave God da Mandi tumondarira amo, nu jebuga evovodae irari, ava tuve barira. Avata mave God da Mandi da geka jo ningi tumondae arira amo, nu jebuga evovodae irari amo jo tambae arira. Numo taká evovodae, God da janje eko ava itatamuse irarira,” John aminge sisira.

## 4

### *4:1-42 Iesu Nu Samaria Embo Evetu Enighae, Geka Siseri.*

<sup>1-3</sup> Evetu genembo Iesu tumondero bafataito etiri nunda ambo jimbi usera amo, digarigori. Evetu genembo John bafataito etiri nunda ambo jimbi usera amo, jo digari iraeri. Ainda bino ava setero Moses da Geka kaifa kakato+ ne nininguseri. (O emo, geka beká nemokena resena: Iesu nu tofo jo evetu genembo eni bafataito ae usira. Namane giti nunda ambo jimbi usera aimi, natofo bafataito edo ghuseri.) Geka rea se niningusera ava, Iesu nu kasama edo, eredo Frovensi Judia dodo, Frovensi Galilee aminda isira.

<sup>4</sup> Galilee yari saresa amo, ni giti ya Frovensi Samaria ghedo yaresa.

<sup>5</sup> Ava sedo Iesu Frovensi Samaria aminda sembise, reighi javo Saikar aminda buvurutusira. Namane Israel embo da abua Jacob, nunda mandi Joseph kena vare futusira, aminda ghe ya Saikar buvari amo, jo soka iraeri.

<sup>6</sup> A kotugo vasa daba aminda, Jacob anakora uvu mindari da bako

ghousa ava ghafusira. Namane erisera, aminda isonga buvurutuseri. Iesu nu, soro ghoussa ava erisira ambudo, bako dengesida anumbusira.

<sup>7-8</sup> Iesu nu aminda anumbiriri, namane eredo bayau ombari dae sedo era, reighi jokáda teretero, Samaria embo evetu eni, uvu dimbari dae sedo, reighida ghe buvudo fusira. Fira, Iesu nu aminda anumbiriri goususira.

Giri, Iesu numokena sisira, “Nandae uvu dimbu bofu mindone!”

<sup>9</sup> Aminge setiri, evetuá numokena sisira, “Agá! Nimo Jusi embori. Namu nenda gitofu Samaria embo eveturi. Ava sedo, nangetirai uvu nane dimbu mutono mindari dae resesi?” aminge sisira. (Geka bekári: Jusi embo ne, Samaria embo imboe use jo nenda agha kofirida<sup>9</sup> mindae edo ghuseri.)

<sup>10</sup> Setiri, Iesu mino numokena sisira, “Nimokena God rea muturaira ava, kasama aetesa amo, a kotugo na mavejori, ava kasama aetesa amo, ni namokena benunu saso, na nindae jebuga da uvu ava mutaeteni.”

<sup>11</sup> Aminge setiri, evetuá sisira, “Bajari, nimokena mo, okia a asi tefori, a kotugo bako mo, ghousari. Ava sedo, jebuga da uvu setesa amo, reda baresi?”

<sup>12</sup> Bako emo, namondeda abua agira Jacob ghambu futusira. Nu uvu eminda dimbu mindido ghuseri. A nunda vide jamena a nunda sino fuka barago, ne isambu uvu eminda dimbu mindido ghuseri. O ni, jebuga da uvu bari resesa amo, nange resesi? Ni erekotesa amo, namondeda abua Jacob nu ijoghakori, a nimoá teria sise resesa, ai?” aminge ategi usira.

<sup>13</sup> Setiri, Iesu mino kasiai sisira, “Uvu evia, mave mindiraira amo, nu amboda sekago uvudae uju edo gharira.

<sup>14</sup> O uvu nane mutono, mave mindarira amo, nu jo sekago uvudae

<sup>9</sup> 4:9: Jusi embo ne jo Samaria embode dabade itako umo ae edo ghuseri.

dubo saghae arira. Uvu amo mindari, nunda dubo jokáda irise, kau uvu ghoghoroda buvariguse irarira. Irise, jebuga da uvu usegha da kaugo ava buvurutururari, genemboá rise, jebuga evovodae irari ava tuve barira.”

<sup>15</sup> Aminge setiri, evetuá sekago sisira, “Bajari, uvu resesa ava, bofu mindone! Amingarena amo, na jo sekago uvudae uju use, foa eminda dimbae arena,” aminge sisira.

<sup>16</sup> Nu aminge setiri, Iesu sisira, “Yasi, nivu bu furase!” setiri, evetuá sisira,

<sup>17</sup> “Na genembo tefori,” setiri, Iesu numokena sisira, “Ni ‘genembo tefo,’ setesa amo, geka beká setesi.

<sup>18</sup> Avata ni gegenembo isambu ghabu soveni ava, bu dotutusesi. A kotugo, genembo oroko budo iresa amo, jo ninda genembo beká iraeri. Ava sedo, geka beká setesi. Ni genembo tefori.”

<sup>19</sup> Aminge setiri, evetuá sisira, “Bajari, na orokoá kasama erena amo, ni feroveta eniri.

<sup>20</sup> Namane Samaria embo da abuamane rea sedo ghusera amo, eviri, ‘Namane, doriri fetiriri eregosesa ominda God tumonde bainghedo ghaeteri.’ Avata ne Jusi embo, nene seraeva amo, ‘God tumonde bainghari da vasa beká mo, Jerusalem ri!’ ”

<sup>21</sup> Evetuá aminge setiri, Iesu evetu aikena sisira, “Nanda geka evia tumondaso dae resena. Sifo eni amboda foa buvari gido, evetu genembo jo doriri fetirira ominda, a Jerusalem aminda nembo, God tumonde bainghae arera.

<sup>22</sup> Ne Samaria embo mo, ne mavejo ava tumonde baingheraeva amo, ne jo kasama use tumondae eraeva. O namane Jusi embo, namane kasama eraera. Ainda beká mo: God da sonemba evetu genembokena amo, Jusi embo da jokáda sirorarira.

<sup>23</sup> Kotugo, sifo eni foa buvarira, a kotugo saone, oroko ojira buvuruterira. Sifo aminda, God Afa

da natofo beká, nu tumonde bainghari sarera amo, ne jo doriri fetirira ominda, o Jerusalem aminda nembo, God tumonde bainghae arera. Ne nenda reighida iroro, God da Asisi sonembururari, ne God da beká ava kasama edo, numoá tumonde bainghe gogoghombarerera. Evetu genembo aminguse, bekáda bekáda tumonde bainghe gogoghombearerera amo, God Afa nu uju beká ava use, gari dae tava eraira.

<sup>24</sup> God, nu Asisiri. Ava sedo, God da Asisi aimi sonembururari, evetu genembo God da beká ava kasama edo, numoá tumonde bainghaeteri,” aminge sisira.

<sup>25</sup> Setiri, evetuá numokena sisira, “God Genembo eni dirigari furare dae sisira, (ainda javo Keriso serera), nu amboda foama, geka isambu da susu ava, nune sari ningaeteri,” aminge setiri,

<sup>26</sup> Iesu numokena sisira, “Genembo resesa aimi, nimokena geka emo resira. Amo namori,” aminge sisira.

<sup>27</sup> Nengae aminge sero, namane jovereghe fera, Iesu evetu ainghae geka sero tafuseri. Tambudo, nu evetu ainghae geka sisira, aindae manamana useri. Avata namane evetu aikena geka eni jo sae useri. “Ni rejo uju eresi?” ava jo sae useri. O Iesu kena barago, “Ni redae evetu ainghae geka resesi?” ava jo sae useri.

<sup>28</sup> Ainda amboda, evetuá nunda uvu dimbari da okia aminda dodo, jovereghedo reighi jokáda ira natofokena sisira,

<sup>29</sup> “Genembo eni ojighira, uvu vasada anumbirise, na rea edo ghusera, a nanda irari kau mavega, ava setiri ningeni. God Genembo eni mutari sisira, avose, numori tano. Fuvu, ya gaove!”

<sup>30</sup> Aminge setiri, ne eredo Iesu gari dae fuseri.

<sup>31</sup> Iesu gari dae fero, namane Iesu kena siseri, “Ijuga Kato, bayau bu mindi jebugase!” siseri.

<sup>32</sup> Avata nu sisira, “Nanda bayau dombu eni irira ava, ne jo kasama ae ereva,” aminge sisira.

<sup>33</sup> Aminge setiri, namane tofo tofo se nininguseri, “Avoſe, bayau mutero mindido irira tano?”

<sup>34</sup> Aminge setero, Iesu namakena sisira, “Nanda bayau mo eviri. God na dirigetiri fusena, ainda uju ava use irena, a saramana nune futusira, ava aono dadabarira. Saramana amo, nanda bayauri.

<sup>35</sup> Nenda kotari mo: tambuno avononde dadabari ainda amboda, vuji bambari da sifo foa buvarira. Avata na nemokena resena: vare gi simbugevu! Vuji bambari da sifo ojira buvirere. Evetu genembo aghi ari da sifo, oroko eviri.

<sup>36</sup> Bayau mave bamburaira amo, nu saramana eraira andae sedo, mino barira. Kau daba aminga ava, mave ya evetu genembo, God da natofo edo jebuga evovodae irari ava baoro dae sedo, aghi eraira amo, nu saramana eraira andae sedo, mino barira. Kau vare jokáda bayau beká ari gido, vare govári kato nengae bayau bambari katoghae, dabade ivuga eraera aminga ava, genembo eni giti ya vironu sirurari, a kotugo genembo amboda ya evetu genembo aghi ari God tumondarera amo, nengae dabade ivuga arera.

<sup>37</sup> Namonde eminge seraera, ‘Genembo eni vare govári ainda amboda, genembo eniimi foama bayau bambarira,’ seraera. A nu geka bekári.

<sup>38</sup> Kau daba aminga ava, evetu genembo mendeni, ne giti era vareda saramana edo ghuseri. Avata ne nane amboda dirigeteno eva, evetu genembo giti era saramana edo ghusera, ainda mino ava nene ererureva,” Iesu aminge sisira.

<sup>39</sup> Avori, Samaria embo evetu setena amo, nu Iesu dae eminge sisira, “Na rea edo ghusena, a nanda irari kau mavega, ava setiri ningeni.” Nu Iesu da bino aminge setiri ningido, Samaria embo digari reighi aminda, ne Iesu tumonduseri.

<sup>40</sup> Ne ningido tumondusera ava sedo, ne era Iesu kena buvudo, nu nemonde itako avido yare dae benunu siseri. Aminge setero, namane namonde sifo etoto dabade aviseri.

<sup>41</sup> Amingero, evetu genembo digari amo, Iesu da geka setiri niningusera andae, tuturo edo numoá tumonduseri.

<sup>42</sup> Tumondedo, evetu aikena siseri, “Orokoá, namane nu tumonderera. Jo ninda geka andae tumondae erera. Iesu geka siri, namane tofofo nininguse kasama eteri: genembo mave evetu genembo isambu sonembari jebugaoro dae sedo furariá seraera amo, numori, ava kasama eteri,” aminge siseri.

#### *4:43-54 Iesu Setiri Gavana Eni Aında Mandi Jebugusira.*

<sup>43</sup> Aminda irero, sifo etoto naká setena ava dadabetiri, Iesu namane namonde reighi aminda ghedo, Frovensi Galilee iseri.

<sup>44</sup> Iesu nu sifo ghousa eminge sedo ghusira, “Feroвета da geka ava, evetu genembo isambu, ne ningido nu kakara eraera. Avata feroveta tofo nunda tofofoi nu jo tumonduse kakara ae eraera,” nu aminge sedo ghusira.

<sup>45</sup> Avata, nu namonde dabade era, nunda Frovensi Galilee aminda teretero natofo gido, nati joká doruse fera nu ategi useri. Aında susu mo: Jarige Yari da Kirumo+ ainda sifo aminda, nembargo Jerusalem aminda irise, Iesu rea usira ava, ne gosuseri.

<sup>46</sup> Avori, Iesu nu sekago ira, reighi Keina aminda buvurutusira. Reighi aminda, nu giti setiri uvu jovereghedo vaini (wine) jinisira. Reighi daba aminda, gavana eni irei. Gavana resena eında mandi mo, nu reighi eni javo Kaponiam aminda kae budo fasirei.

<sup>47</sup> Iesu nu Frovensi Judia ghedo, jovereghe ira Frovensi Galilee buvurutusira, ainda bino ava sero, gavana amo ningido eredo Iesu kena isira. Ira buvudo, Iesu kena sisira, “Nanda mandi kae eko budo,

Kaponiam aminda irise, ambari dae erira. Ava sedo ni fu, nangae ya nanda mandi saso jebugare!”

<sup>48</sup> Aminge setiri, Iesu numokena sisira, “Na kasama erena: na jo tano eni aono gi dudukughae areva amo, ne nanda geke jo tumondae areva,” aminge setiri,

<sup>49</sup> genemboá sekago sisira, “Bajari, erama nanda mandi ambeure dae sise resena! Fu nangae totoi yaore!”

<sup>50</sup> Aminge setiri, Iesu numokena sisira, “Avari, yasi! Ninda mandi jo ambae arira!” setiri, genemboá nu Iesu da geke tumondedo, jovereghe isira.

<sup>51</sup> Natida iri sifo atetiri, nunda saramana kakato mendeni fera soroda tafuseri. Tambudo siseri, “Ninda mandi anakora jebugetira. Jo ambae arira!”

<sup>52</sup> Aminge setero, genemboá ategi usira, “Amo nanjigo tuturo umuta?” setiri, ne siseri, “Amo sife isonga, iji ira vekengetiri 1 koroko tuturo edo, nunda tamo da vevera dadabumuta,”

<sup>53</sup> aminge setero, mandi ainda numamo kotisira, “Arie! Iesu, ‘Ninda mandi jo ambae arira!’ siri, nanda mandi sifo daba aminda jebugumuta,” ava kotise, nunda natofode dabade Iesu tumonduseri.

<sup>54</sup> Avari, Iesu Judia ghedo, jovereghe ira Frovensi Galilee aminda buvudo, nu uvu setiri vaini jinisira avo, kotugo gavana da mandi setiri jebugusira ainghae dabade ira tano etoto usira.

*5:1-18 Iesu Setiri Genembo Eni, Reighi Javo Betsada<sup>1-18</sup> Aminda Jebugusira.*

## 5

<sup>1</sup> Ainda amboda, Jusi embo da kirumo eni ari dae sedo, Iesu Jerusalem isira.

*1-18 4:54:* Reighi javo *Betsada (Bethzatha)* eminda gefusira. O ainda gembari foyago geke mo etoto nakári. Baiboro (Bible) mendeni aminda *Bethzatha* garesa, o mendenida *Bethesda* garesa. *3-4 5:3-4:* Geke tuturo 3-4 eminda, Baiboro (Bible) ana mendeni ainda jokáda jo fitoro teraeri. Ava sedo gekeá John gefusira o mave gefusira, namonde jo kasama e gogogho aeri.

<sup>2</sup> Jerusalem furu dighi birurughetero irei. Furu ainda guro eni ‘Sifi (Sheep) da Guro’ sedo ghusera, ainda dengesida uvu bogu eni irira, reighi Betsada aminda. Bogu resena ainda dengesida, oro isambu ghabu soveni ava simbugetero iritirei.

<sup>3-4</sup> Sifo aminda, kae evetu genembo digari ava, aminda fafasirero Iesu ira buvurutusira. Evetu genembo diti digoide, ata eko, a ungo ata dimbaride aimi aminda iriseri. (Kae evetu genembo aminda irise kaifa edo ghusera da beká mo, eviri. Sifo mendeni mendeni, Bajari da aneya eni vose foa, uvu bogu ava dereari dubinoghedo ghusera. Urureari ainda sifoda, mave giti uvu ainda jokáda vosedo ghusera amo, nu jebugedo ghusera. Kae rejo ava numokena irá ghedo ghusera amo, dadabedo ghusera.)<sup>3-4</sup>

<sup>5</sup> Genembo eni mo, ghaeko 38 ava kae budo aminda fasirei.

<sup>6</sup> Genemboá sifo ghousa ambari ava kae budo fasireira ava, Iesu kasama edo, ategi usira, “Ni jebugari uju eresa, ai?”

<sup>7</sup> Aminge setiri, genemboá sisira, “Bajari, na karonu tefori. Ava sedo, uvu dubinoghururari garena amo, mave jo foa na sonembae arira. A gido, sifo reda uvu dubinoghururari gido, na javi e yari dae urureono, evetu genembo enii ya giti kosegeraira.”

<sup>8</sup> Aminge setiri, Iesu sisira, “Ere, ninda ghaito gaghe bu yasi!”

<sup>9</sup> Aminge siri ainghae dabade, genemboá jebugusira. Jebugedo, nunda ghaito gaghe budo isira.

Amo Jangutari da Sifo aminda sirorusira.

<sup>10</sup> Ava sedo, genembo jebugusira amo, nunda ghaito fumbudo iri gido, Jusi embo da babojegari mendeni, ne ghoghora siseri, “Ni ninda ghaito jo gaghe fumbu yae aetesi! Oroko mo,

Jangutari da Sifori. Aminguse, ni namondeda agho dari ava erebejesa.”

<sup>11</sup> Aminge setero, genemboá sisira, “Genembo mave namo setiri jebugetena aimi, ‘Ninda ghaito gaghe bu yasi!’ setiri, na amingerena.”

<sup>12</sup> Genemboá nu aminge setiri, ne ategi useri, “Genembo ninda ghaito gaghe fumbu yaso dae setira amo, mavejori?”

<sup>13</sup> Aminge sisera avata, genembo jebugusira amo, nu Iesu jo kasama aeri. Ainda beká mo: evetu genembo digari ambari aminda irero, Iesu ira nenda jokáda tere baghimbusira.

<sup>14</sup> Ainda amboda, Iesu genemboá God da Kambo+ jokáda tambudo sisira, “Ni jebugedo iresa. Amboda kae eko beká ava erá tambeóso dae sise, eminge resena: ninda ari ekoko vujegedo, doyasos dae resena!”

<sup>15</sup> Aminge setiri, genemboá God da Kamboda+ ghe ira, Jusi embo da babojegari ava tava edo tafusira. Tambudo, genembo setiri nu jebugusira, amo Iesu ri, ava setiri ne ninguseri.

<sup>16</sup> Ningido, ne tuturo edo, Iesu nu Jangutari da Sifo aminda setiri genembo jebugusira aindae, numokena fakarago use mema mutero itamusira.

<sup>17</sup> Amingero, Iesu nemokena sisira, “Nanda Afa sifo ghousa evia saramana eraira. A nambarago, kau daba evia use saramana eraena.”

<sup>18</sup> Iesu aminge siri ningido, Jusi embo nu daoro ambare dae kotiseri. Giti rea usira aindae, ne itako dubo mema useri. O aminge siri ningido, nange nu daoro ambaetira, ava kotise irá ghedo ghuseri. Ainda tuka mo: nu giti Jangutari da Sifo ainda agho dari ava bejisira. Avata amo kitakori. O amboda God ava tofo nunda Numamova sisira amo, nu tofo numoá God va sise sisira.

*5:19-29 Iesu Mo, Nu God Bekári.*

<sup>19</sup> A gido, Iesu nemokena mino sisira, “Na geka beká resena! God da Mandi, jo rejo eni tofo nunda javoda

ae eraira. Numamo urureari giraira, avanembo eraira. God Afa rea eraira, nunda Mandi barago, daba ava eraira.

<sup>20</sup> Ainda beká mo: God Afa nunda Mandi dubo ruruse, nu tofo rea eraira ava, nunda Mandikena ijugairaira. O tano rea oroko gido ghereva emo, kikitakori. Gido dudukughaovo dae sedo, God amboda roera mindafugo eni nunda Mandikena ijugari gido, ari siro-rarira.

<sup>21</sup> Kau God Afa seari evetu genembo mendeni ambarida ghe jebugedo ereraera aminga ava, nunda Mandiimi seari, evetu genembo mavejoá nu uju eraira amo, jejebugaraera.

<sup>22-23</sup> Kotugo God Afa jo tofo evetu genembo da ari ekoko ijujae eraira. Nunda Mandi kau numoá avaga kakara aoro dae sedo, God nu evetu genembo ijujari da saramana amo, nunda Mandikena futusira. Mave God da Mandi jo kakara ae arira amo, nu, God Afa barago jo kakara ae arira. Ainda tuka mo: God nunda Mandi dirigetiri, Numamo da javoda fusira.

<sup>24</sup> “Na geka beká resena. Amo, mave nanda geka ninguse, God na dirigetiri fusena ava tumondarira amo, nu jebuga evovodae irari ava tuve barira. Amo kau nu anakora ambarida ghe jebuge erorusira, amingori. Ava sedo, genembo mave na tumondarira amo, jo mave eniimi nunda ari ekoko ijujae arira.

<sup>25</sup> Na geka beká resena: sifo foa buvari dae erira, o saone, ojira buvira. Sifo aminda, ambari embo ne God da Mandi da beka ningarera. Kotugo mave nunda beka sirurari ningarira amo, nu jebugarira.

<sup>26</sup> God Afa nu jebuga da susuri. Kotugo, nu setiri nunda Mandi kau daba aminga ava, jebuga da susu edo irira.

<sup>27</sup> God da Mandi, nu Evetu Genembo da Korori+. Aindae sedo, God setiri nune evetu genembo da ari ekoko ijugarira.

<sup>28</sup> Geka resena evia, ningido erá buneove! Sifo eni foa buvari dae erira. Sifo aminda, ambari embo isasambu, nunda beka sirurari ningido,

<sup>29</sup> nenda ofofo gomoda ghe jebuge erarera. Mendeni, ari eveva edo ghusera amo, ne eredo, jebuga evovodae irari ava tuve barera. O mendeni, ari ekoko edo ghusera amo, ne eredo, nenda ari ekoko da bouvu ava fumbarera,” aminge sisira.

*5:30-47 Namonde Iesu Tumonderaera Da Beká Mo, Eviri.*

<sup>30</sup> Aminge sedo, Iesu sisira, “Na roera eni tofo nanda javoda ari saetena amo, jo inono ae aeti. Avata God nune seari, na evetu genembo da ari ava ijujeraena. Ava sedo, na evetu genembo da ari ava ijujeraena amo, na evevada seraena. Ainda beká mo: na jo nanda ujui sae eraena. God na dirigetiri fusena, ainda uju avanembo use irena.

<sup>31</sup> “Namoá tumondaovo dae sedo, ‘Tofo namoá eveva,’ saetena amo, jo inono iraeri.

<sup>32</sup> Avata mave eniimi nanda kau mavegori ava osa seraira. A na kasama erena, nu rea nandae seraira amo, geka bekári.

<sup>33</sup> Ne nenda aghi kakato dirigetevo era John kena buvero, nu nandae sise, geka beká ava setiri nininguseri.

<sup>34</sup> Amo, John nanda geka sonembusira. Avata amingusira amo, jo nune nanda geka sonembari inono ari da kaugo iraeri. Na John dae resena da susu mo: na uju erena, ne John da geka ningido, na tumondedo jebugareva.

<sup>35</sup> John nu kau, arivo injibeoro usasa jaragheraira, amingori. Sifo tufako ne yama ivuga use, numokena usasa gido ghusevu.

<sup>36</sup> Avori, John mo nanda geka jo teria futo sonembari da kaugo iraeri. Avata, nanda geka da sonemba kato teria beká eni irira. Nanda Afa tano a ari rea aono dae sisira ava, eono sirereari ne giraeva. Tano a ari eono

siroreraira aimi ijugeraira amo, geka bekári: God Afa na nune dirigetiri fuseni.

<sup>37-38</sup> A God Afa na dirigetiri fusena, nune tofo nanda geka sonemberaira. Avata ne na jo tumondae eraeva. Ai resira amo: ne jo nunda beka ningae ireva, nunda dombu jo gae ireva, a nunda Geka jo nenda dubo jokáda teredo iraeri.

<sup>39</sup> Nenda kotari mo: God da Geka jokáda, ne jebuga tambareva. Ava sedo, ne aminda tegutuse ireva. A nu geka bekári: God da Geka amo nandae resira.

<sup>40</sup> Avata, ne na imboe use, jo namokena foama jebuga bae eraeva.

<sup>41</sup> Nandae sakai saovo dae, na jo sae erena.

<sup>42</sup> Avata nenda janje joká amo na kasama erena. Nenda janje jokáda, ne God jo dubo bae eraeva.

<sup>43</sup> Na Afa da javoda fusena avata, ne na jo tumonduse unumbae usevu. Mave tofo nunda javoda furaetira amo, ne nu tumondaetevu. Avata na Afa da javoda fusena amo, ne na jo tumonduse unumbae usevu.

<sup>44</sup> Kotugo na kasama erena: ne jo totoi tumondae areva. Ainda beká mo: nenda kokomana nange nemokena sakai saetera ava kotise, ne God da usasa a duro, nusuka nune nemokena mutaetira ava, jo kotae eraeva.

<sup>45</sup> Avata erá eminge koteove: na nasuka Afa da dombuda fete nenda ari ekoko ijujarena, erá aminge koteove! Ne, ‘Namane Moses da Geka tumonderaera,’ seraeva. Avata Moses nune eredo, God Afa da dombuda, nenda ari ekoko ava ijujarira.

<sup>46</sup> Ainda beká mo: Moses nu nandae gefusira. Ne Moses tumondaeteva amo, nambarago tumondaetevu.

<sup>47</sup> Avata ne, nunda geka gefusira ava, jo tumondae eraeva. Ava sedo, na eregosena, nanda geka barago jo tumondae areva,” aminge sisira.

## 6

*6:1-15 Iesu Setiri Bayau Dige-tiri, Gegenembo 5,000 Mindero Inono*

*Usira.*

*(Matthew 14:13-21; Mark 6:30-44; Luke 9:10-17)*

<sup>1</sup> Ainda amboda, Iesu eredo Frovensi Galilee, uvu da teria irira, Genesaret o Taibirias seraera, aminda sekago sembisira.

<sup>2</sup> Sembiri gido, natofo digarigoimi nunda amboda iseri. Ainda beká mo: Iesu tano eari, evetu genembo mendeni kae ekoko dombu eni eni budo iriara ava, jejebugeoro gi dudukughedo ghuseri.

<sup>3</sup> Iesu namane budo, enda jiro fumbari aminda vitera anumbuseri.

<sup>4</sup> Ainda sifo amo, namane Jusi embo da kirumo eni, javo Jarige Yari da Kirumo+ seraera, amo fira utua usira.

<sup>5</sup> Avori, namane anumbetero, Iesu jovereghusira amo, evetu genembo digari ambariá numokena fero gido, nu Philip kena sisira, “Evetu genembo digari eregosesa omo, namonde farava reda ombu mutareri?”

<sup>6</sup> (Aminge sisira amo, nu Philip dere gosuse sisira. Nu tofo amboda rea arira amo, kasama use ategi usira.)

<sup>7</sup> Setiri, Philip sisira, “Evetu genembo digari bekári. Ava sedo, K2,000<sup>7</sup> aimi farava ombu mutoro mindarera amo, jo inono ae arira.”

<sup>8</sup> Aminge setiri, namanenda eni javo Andrew, amo Simon (Peter) da namendi, aimi eredo sisira,

<sup>9</sup> “Mandi eni eminda fetirira emo, nu farava ghabu soveni a oka etoto ava budo ojighira. Avata evetu genembo rekato digari mo eviri. Ava sedo, jo inono ae arira.”

<sup>10</sup> Setiri, Iesu namanekena sisira, “Sevu, evetu genembo anumbaore!” (Aminge sisira da beká mo: vasa amo beraghago, kikisaghaeri.) Ava sedo, namane setero evetu genembo anumbuseri. Gegenembo aminda anumbusera amo, 5,000 da kaugori, evevetu a sasingu jo tegaeri.

<sup>11</sup> Anumbetero, Iesu nu farava budo, God kena ‘aiyakoe’ sedo, evetu

genembo anumbusera, aikena mutiri ruruseri. Amboda, oka budo kau daba ava use, ghasisira. Ghasetiri budo, ne uju usera aminga ava, mindero inono etiri dotero fasusira.

<sup>12</sup> Mindero inono etiri gido, nu namanendae sisira, “Yasivu, bayau mindera da itogato, dabade edo bu furove! Erá soesa eore!”

<sup>13</sup> Aminge setiri, namane, farava risera da itogato ava, rete budo kanda babai isambu 12 ava vendi budo fuseri.

<sup>14</sup> Iesu rea etiri sirorusira ava gido, natofo aminda totorugusera aimi siseri, “Feroveta teria amboda sirorariá seraera amo, eviri,” siseri.

<sup>15</sup> Natofoi orokoá foama nu sandi budo, kini (king) are dae sedo, katiyavara arera ava, Iesu kasama usira. Aindae sedo, natofo dodo, nu nusuka enda jiro fumbari aminda ira vivitusira.

*6:16-21 Iesu Nu, Vose Eva Etoda Fete Deinghedo Isira.*

*(Matthew 14:22-33; Mark 6:45-52)*

<sup>16</sup> Ungobu iri, namane jovereghedo era,

<sup>17</sup> ghakada+ vosedo sirige reighi Kaponiam aminda sembi yari dae ero, tumba jisira. Iesu nu jo foa namanekena buvaeri.

<sup>18</sup> Amingero, yaura teria sufuse, aimi eva deretiri erorusira.

<sup>19</sup> Eva yaura sufiri, namane dav-edo era, kafuru soroda (7 kirometa aminga ava) buvurutero, Iesu vose eva etoda fete deinghedo, namanenda ghakada+ vitari dae firi namanekena gosuseri. Gido, namane oju beká ava useri.

<sup>20</sup> Amingero, Iesu namanekena sisira, “Namori! Erá oju eove!”

<sup>21</sup> Aminge setiri, namane gido dubo jama use, nu ivugaghae tifuseri. Timbudo, namane era, fafo reda darari kotisera, aminda anakora tere dadoruseri.

*6:22-59 Jebuga Da Susu Mo, Iesu Numori.*

<sup>22</sup> Amingetero sifo atetiri, evetu genembo sovenikena irisera aimi,

<sup>7</sup> 6:7: Afige, **Geka Se Disugari Da Vasa** aminda, *geka mino o moni* aindae rea gefusera, ava tege garesa.



fuge ghaka+ dabako iriri gosuseri. Kotugo ne kasama useri, Iesu nu jo namane namonde dabade vendi sirigaeri. Nu aminda iriri, namane sirige dodo fusera ava, ne kasama useri.

<sup>23</sup> Aminge kotise sero, ghaka+ mendeni reighi Taibirias aminda ghe fera tetereuseri. Iesu bayau esimbuguse setiri, dige fasetiri risera da vasa, ainda tinguda tere dadoruseri.

<sup>24</sup> Ne jo namane Iesu de dabade aminda iroro tambaeri. Amingedo, ne isambu Iesu tambari dae sedo, ghakada+ vose sirigedo reighi Kaponiam sembu fuseri.

<sup>25</sup> Sembu fera aminda teredo, Iesu tambudo numokena siseri, “Ijuga Kato, ni nange nangedo ojesa eminda iresi?”

<sup>26</sup> Aminge setero, Iesu mino nemo-kenena sisira, “Nemokena geka beká resena. Ne namo tava ereva da beká mo: bayau esimbugeteno mindevo inono umutara ava kotise, na tava ereva. Na tano mendeni mendeni eono giraeva, a eni eteno gosumutava, ainda tuka ne jo kasama use furae ereva. Ne taká, bayau mindari ava kotise refeva.

<sup>27</sup> Tamo da bayau ya masa edo dadaberaira aindae, erá tava use saramana eove! Bayau eni mo irira. God Afa nu Evetu Genembo da Koro+ dubo buraira, ava kasama aovo dae sedo, nunda fakina a tano, namokena mutiri eno eregoseva. Ava sedo, na jebuga da bayau nemo-kenena mutarena amo, jebuga evovodaie irari ava tuve bareva. Jebuga da bayau dabako evia tava use eindae, saramana use iraetevu!”

<sup>28</sup> Aminge setiri aindae, ne ategi use siseri, “Namane God da saramana ari dae sarera amo, kau nange tuturo areri?”

<sup>29</sup> Aminge setero, Iesu sisira, “God saramana ningiava aovo dae uju eraira amo, eviri. God mavejoá dirigetiri ojighira amo, nu tumondareva.”

<sup>30</sup> Aminge setiri, ne mino numokena siseri, “Ni tano rejoá aso siro-

rari gido, namane ni tumondareri? Ni rejo aresi?

<sup>31</sup> Moses da sifoda, namondeda abuamane reighi uvu a evetu genembo irae da vasa aminda birurughuse, bayau tefo sirorureari bu mindido ghuseri. God da Geka aindae sise, eminge resira:

‘Nu bayau utuda ghe muteari voseari bu mindido ghuseri,’  
God da Geka aminge resira.”

<sup>32</sup> Setero, Iesu nemokena sisira, “Geka beká ava nemokena resena! Bayau utuda ghe vose furureari nembuamane mindido ghusera amo, jo Moses nune mutari mindido ghaeri. Bayau utuda ghe vose foa gheraira amo, nanda Afa aimi muteari foa gheraira.

<sup>33</sup> Bayau God muteari foa gheraira amo, genembori. Genembo resena emo, nu utuda ghe foa, nunda jebuga evetu genembokena muturaira. Bayau setena amo, numori.”

<sup>34</sup> Aminge setiri, ne numokena benunu siseri, “Bajari, bayau resesa amo, namanekena mutudo ghe, evovodaie!”

<sup>35</sup> Ne aminge setero, Iesu eminge sisira, “Namo jebuga da bayauri. Mave namokena furarira amo, nu jo sekago uvudae dubo saghae arira, o ighoi jo itatamae arira.

<sup>36</sup> Na rea sisena amo, beká siroretira. Ne ditiimi na eregoseva. Avata nanda geka jo tumondaie ereva. Afa nu mavejo ava, gatededo namokena mutarira amo, nu namokena furari bu tavo arena.

<sup>37</sup> Mave namokena mutari furarira amo, na nu jo buregae arena.

<sup>38-39</sup> Ainda beká mo: na jo nanda uju ava ari dae sedo, utuda ghe vose furaeri. God na dirigetiri vose fusena amo, nunda uju ava ari dae sedo fuseni. Afa da uju mo eviri: evetu genembo namokena futusira ava, jo eni kosasaghaono ya ambae arira. A kotugo, nunda uju mo: sifo gombuda na saono, ne ambarida ghe eredo jebuga tuve barera.

<sup>40</sup> Ai resira amo: nanda Afa uju eraira, mave nunda Mandi gido tumondarira amo, nu jebuga evovodae irari ava tuve barira. Aindae sedo, sifo gombuda na saono, ne ambarida ghe jebuge eredo, jebuga tuve barera,” Iesu, nu rea arira ava, tofo ijuguse aminge sisira.

<sup>41</sup> Avori, Iesu nu, “Bayau utuda ghe vose fusira amo, namori,” sisira aindae, ne tuturo edo dubo mema use tiriseri.

<sup>42</sup> Aminguse siseri, “Genembo emo, nu taká Joseph da mandi Iesu ri. Nunda noi numamo namonde kasama erera. Ava nu utuda ghe vose furariá resira amo, nu nange nange kotise resi?”

<sup>43</sup> Ne aminge setero, Iesu mino sisira, “Erá unongu sise tofo tofo se ningeove!”

<sup>44</sup> Ainda beká mo: mave jo tefo namokena furae arira. God Afa na dirigetiri fusena aimi, genembo eni unumbarira amo, nu namokena furarira. Furari, sifo gombuda na saono, ambarida ghe eredo jebuga evovodae irari ava tuve barira.

<sup>45</sup> God setiri feroveta nunda Geka gefusera amo, eviri:

‘God nu evetu genembo isambudae, dengoro indarira,’ aminge gefuseri. Ava sedo, evetu genembo mave God Afa da geka ningido, nunda ijuga ava tumondarera amo, ne namokena furarera.

<sup>46</sup> God da Geka ningiraera, resena emo, nenda dubo jokáda nunda Geka itatameraera, avata God jo ditiimi gae eraera. Ainda beká mo: jo mave God da dombu gae eraera, a geka dabade jo se ningae eraera. Avata na God Afa dirigetiri fusena amo, nasuka nane, Afa gosuseni.

<sup>47</sup> Na nemokena resena: mave tumondarira amo, nu jebuga evovodae irari ava, anakora tambudo irira.

<sup>48</sup> Namu jebuga da bayauri.

<sup>49</sup> Nambuamane reighi uvu a evetu genembo irae da vasa aminda biru-

rughuse, bayau javo ‘mena’<sup>49</sup> ava, mindido ghuseri. Rise iriara avata, ne rido fera sirivo useri.

<sup>50</sup> Avata bayau God mutiri vose fusira amo, jo avavago iraeri. Ava mave bu mindarira amo, nu jo ambae arira.

<sup>51</sup> Emo na tofo, nandae resena. Bayau utuda ghe vose fusira setena amo, tofo namoá seteni. Bayau evia, mave mindarira amo, nu jebuga evovodae irari ava tuve barira. Bayau evetu genembodae mutari resena emo, nanda tamo aindae resena. Evetu genembo jebugaoro dae sedo, nanda tamo mutarena,” Iesu aminge sisira.

<sup>52</sup> Ava setiri ningido, Jusi embo ne tuturo edo beisiga use, tofo tofo se nininguseri, “Nunda tamo mutari mindoro dae resira amo, kau nange nange genembo einda tamo mindareri?”

<sup>53</sup> Aminge setero, Iesu nemokena sisira, “Na geka beká resena. Ne Evetu Genembo da Koro+ da tamo, jo bu mindae areva, a nunda ororo jo fumbu mindae areva amo, ne jebuga evovodae irari ava, jo tambae areva.

<sup>54</sup> Avata mave, nanda tamo a nanda ororo bu mindarira amo, nu jebuga evovodae irari ava tambari, saono sifo gombuda nu ambarida ghe jebuge erarira.

<sup>55</sup> Ainda beká mo: nanda tamo a nanda ororo amo, uvu bayau bekári.

<sup>56</sup> Mave nanda tamo budo, nanda ororo fumbu mindarira amo, na nunda janje jokáda irarena. A numbarago nanda jokáda irarira.

<sup>57</sup> God Afa jebuga irira aimi, na dirigetiri fuseni. Nunda jebuga da fakinaimi, nambarago jebuga irena. Kau daba aminga ava, mave na bu mindarira amo, nu nanda jebuga da fakinaimi, jebuga tuve barira.

<sup>58</sup> Bayau utuda ghe vose fusira, ainda tuka seteno ningeva amo, eviri. Bayau nambuamane rise iriara, sirivo usera amo, jo nanda tamo

<sup>49</sup> 6:49: Roera javo ‘mena’ (manna) amo, God muteari, mungoghae dabade sifo ava inono vose furari, Israel embo reighi evetu genembo a uvu irae da vasa aminda deinghuse, rete mindido ghuseri.

a ororo evavago iraeri. Nanda tamo a ororo, mave bu mindarira amo, nu jebuga evovodae irari ava tuve barira,” Iesu aminge sisira.

<sup>59</sup> Ainda geka mo, Iesu nu reighi Kaponiam aminda, Kaponiam embo da dengoro indari kambo+ aminda, ijuguse sisira.

*6:60-71 Iesu Da Dorevare Gategedo, Mendeni Iesu Dotutuseri, Mendeni Ne Iesu De Dabade Deinghuseri.*

<sup>60</sup> Iesu da dorevare digari, ne geka ava ningido siseri, “Emo ijuga fakaragori. E mave ningi kasama ari?” aminge beisiga useri.

<sup>61</sup> Nunda dorevare mendeni nunda geka aindae beisiga usera ava, Iesu nu tamoi itatamusira. Itatamedo, nemokena sisira, “Geka emo ne imboe ereva.

<sup>62</sup> Avata Evetu Genembo da Koro+ ne dodo jovereghe utuda viti yarira amo, ne ivuga areva, ai? A kote givu!

<sup>63</sup> Jebuga mo, God da Asisi Kakara aimi muturaira. Jo evetu genembo da fakinaimi, aoro sirorari bari da kaugo iraeri. Geka resena emo, asisi da jebuga bekári.

<sup>64</sup> Avata mendeni ne, aindae na jo tumondae eraeva,” Iesu aminge sisira. (Mave ne Iesu jo tumondae arera, a mave numoá aito arira ava, Iesu anakora tuturoda kasama usira.)

<sup>65</sup> Aindae sise, nu eminge sisira, “Na aindae siseni, ‘Mave jo tefo namokena furae arira. Mavedae, God Afa guro afigarira amo, nu furarira. O mavedae, God guro jo afigae arira amo, nu jo furae arira,’ ” aminge sisira.

<sup>66</sup> Geka evia sisira aindae, nunda dorevare mendeni Iesu ighagha edo ainda amboda, jo nemonde dabade deinghae edo ghuseri.

<sup>67</sup> Ava gido, Iesu namane isambu 12 aikená ategi usira, “Nemo kote givu! Mendeni na doteri. Ne barago na doyareva, ai?”

<sup>68</sup> Aminge ategi etiri, Simon Peter nu eredo eminge sisira, “Bajari, namane ni jo dodo mavekena yae

arera. Jebuga bari da geka, nisuka nimokenari.

<sup>69</sup> Namane ni tumonduse oroko kasama erera, God Genembo Kakara, evetu genembodae mutari sisira amo, nimori.”

<sup>70</sup> Aminge setiri, Iesu namanekena sisira, “Nanda ambo jimbi 12 gategusena, amo nemori. Avata nenda eni, nu Satan da genembo bekári.”

<sup>71</sup> Iesu nu aminge sisira amo, nu Keriot embo genembo Simon da mandi javo Judas dae sisira. Ainda beká mo: nu namane 12 ainda eni, avata nu amboda, Iesu nune aito usira.

## 7

*7:1-9 Iesu Nunda Jamenade Beisiga Useri.*

<sup>1</sup> Ainda amboda, Iesu nu Frovensi Galilee aminda, ya birurughedo ghusira. Nu Frovensi Judia aminda yari mo, jo uju ae usira. Ainda susu mo: Jusi embo aminda, ne nu daoro ambare dae kotedo ghuseri.

<sup>2</sup> Avori, Jusi embo da kirumo eni ainda sifo ava fira buvurutusira. Kirumo resena einda javo mo, ‘Dobo’ jijighuseri. (Ainda beká mo: Jusi embo ne, God nunda sonemba anakora futusira, ava kotari dae sedo, dobo itido kirumo use aminda avido ghuseri.)

<sup>3</sup> Kirumo da sifo fira utua etiri gido, Iesu da jamena numokena fera, dere jise siseri, “Ni erekotesa, ni genembo mindafu eko eniri. Ava sedo, eminda ghedo yasi, Frovensi Judia aminda buvudo, saramana ururaso, ninda dorevare ninda saramana amo gaore!

<sup>4</sup> Mave genembo teria ari kotarira amo, nu saramana jo ufena ae arira. Ava sedo, ninda tano a ari eraesa ava, evetu genembo da dombuda ururaso ni gaore!”

<sup>5</sup> Aminge sisira da beká mo: nunda jamena nembarago, nenda koro Iesu jo tumondae useri.

<sup>6</sup> Iesu nemokena sisira, “Nanda sifo mo jo foa buvae irira. O nemo taká, sifo evia inono yareva.

<sup>7</sup> Ne fisi da uju ava use ireva aindae sedo, evetu genembo ne jo imboe ae eraera. O namo, evetu genembo nenda ari ekoko aindae, dombuda sise irá gheraena. Aindae ne, na imboe eraera.

<sup>8</sup> Ava sedo, ne kikiako yasivu kirumo aove! Nanda sifo jo foa buvae irira. Ava sedo, na jo yae arena,”

<sup>9</sup> Aminge sedo, nu Galilee aminda iriri ne iseri.

*7:10-24 Iesu Nunda Jamena Kakagetiri Ero, Nu Amboda Isira.*

<sup>10</sup> Iesu nu jo isaghada yari kotaeri. Ava sedo, nu kaifa iri, nunda jamena ero nu ufena amboda isira.

<sup>11</sup> Jusi embo da babojegari ne kirumo da sifo aminda, Iesu kaifa use tofofo se nininguseri, “Genemboé nangetiraimi jo furae iri?” siseri.

<sup>12</sup> Natofo isasambu barago, ne Iesu dae beka sainghiako se nininguseri. Sero, mendeni eminge siseri, “Nu genembo evevari,” siseri. O mendeni siseri, “Tefo, nu jo eveva iraeri. Nu natofo dereraira,” ava siseri.

<sup>13</sup> Beka sainghiako sisera da beká mo: ne Jusi embo da babojegari aindae oju use siseri.

<sup>14</sup> Kirumo tuturo edo fira soroda buviri, Iesu ira God da Kamboda+teredo, tuturo edo ijugusira.

<sup>15</sup> Amingiri, Jusi embo da babojegari nunda geke ningi dudukughedo, tofo tofo se nininguseri, “Genembo omo, nu faiya jo teria ae ava, kasama emo, reda rursi?”

<sup>16</sup> Aminge setero, Iesu nenda geke da mino eminge sisira, “Na rea ijugeraena amo, jo nanda kotari iraeri. God na dirigetiri fusena ainda ijuga ava, nane ijugeraena.

<sup>17</sup> Avori, nanda ijuga God kena foa gheraira o, na tofo nanda kotariimi ijugeraena amo, mave God da uju ari dae koteraira ainembo kasama arira.

<sup>18</sup> Genembo mave tofo nunda javoda ijugarira amo, tofo numoá sakai sise, ari nunda duro gaoro dae, arira. O mave nu bajari dirigetiri fusira amo, nunda ghamo joká

futuse, nunda bajari da duro aindae sakai sarira. Aminguse, nu geke beká avanembo sarira, a evetu genembo jo derae arira.

<sup>19</sup> Moses nemokena God da Agho Dari futusira. Avata ne isambu Agho Dari amo bejeraeva. Ava sedo, redae na Agho Dari bejariá sise, na daovo ambono dae seraevu?”

<sup>20</sup> Aminge siri ningido, natofo isambu eredo siseri, “Nimo, sukarui asugetiri resesa. Eminda, mave enii ni jo daoro ambasao dae kotae irera.”

<sup>21</sup> Aminge setero, Iesu mino sisira, “Na tano mindafu eni eteno gido, ne dudukughusevu.

<sup>22-23</sup> Kote givu! God setiri, Moses nu Agho Dari jokáda, sasingu vide jamena da vika mendo anoso gafugaoro dae sisira. (Geke beká mo: Moses nu geke amo bukuda gefusira avata, abuanane Moses da gitida, tuturo edo amingedo ghuseri.) Avori, ainda agho dari ava erá bejeóro dae sise, ne Jangutari da Sifoda, umbu mendeni vika da mendo anoso gafugeraeva. Aminguse, ne Jangutari da Sifo ainda agho dari ava bejeraeva. Ava sedo, na genembo eni Jangutari da Sifoda, seteno jebugusira amo, ne redae nandae janje eko use ghoghora sisevu?”

<sup>24</sup> Erá gido a ningido, totoi dudukugheove! Susu ijuje gi gogoghombedo, na ijujareva.”

*7:25-31 God Genembo Eni Mutari Furare Dae Sisira Amo, Iesu Numori.*

<sup>25</sup> Iesu aminge siri ningido, Jerusalem embo mendeni, ne eminge kotise siseri.

<sup>26</sup> “Givu! Genembo daoro ambare dae sise resera amo, genembo oviri. Nu natofo da dombuda eredo vironu resira ovia, mave jo imboe use buregae erira. Avose, namondeda babojegari kasama erera tanojo: God Genembo eni mutari furare dae sisira amo, numori tano.

<sup>27</sup> Avata seoro ningiraera: God Genembo eni mutari furarira amo, reda ghe furarira ava, mave enii jo

kasama ae arira. O namonde mo, Iesu da reighi ava kasama erera,” mendeni ne aminge siseri.

<sup>28</sup> Aminge setero ningido aindae, Iesu nu God da Kambo+ jokáda ijuguse, beka mindafu eminge sisira, “Ne erekoteva: na kasama ariva seraeva. A na reda ghe fusena, ne kasama ariva seraeva. A gido, ne aminge reseva. Avata na jo tofo nanda javoda furaeri. God na dirigetiri fusena amo, nu ari bekáda bekáda ari kato, a geka beká sari katori. Avata nemo, nu erebuneva.

<sup>29</sup> O namo, nu kasama erena. Ainda beká mo: na nangae dabade iriana edo, na nune dirigetiri fuseni.”

<sup>30</sup> Aminge setiri ningido aindae, ne Iesu sandi bu koto ari kotiseri. Avata nunda sifo jo foa buvae iriri aindae, nunda tamo jo derae useri.

<sup>31</sup> Avata evetu genembo digari kirumodae sedo totorugusera amo, ne Iesu tumonduse eminge siseri, “God da Genembo foa, tano a ari rea ava aetira amo, God da feroveta anakora gefuseri. Kotugo nene gefusera, a Iesu nune eraira amo, inonori. Jo bunari da kaugo iraeri. Ava sedo Iesu mo, numori, namane ava tumonderera,” aminge siseri.

*7:32-36 Iesu Kosege Sandoro Dae Sedo, Babojegariimi God Da Kambo+ Kaifa Kakato Dirigetero Iseri.*

<sup>32</sup> Natofo geka ava sainghiako sero ningido, Moses da Geka kaifa kakato+ a fristi+ da babojegari, nemonde dabade, Iesu kosege sandoro dae sedo, God da Kambo+ kaifa kakato ava mendeni, dirigetero iseri.

<sup>33</sup> Amingero gido, Iesu sisira, “Na namonde sifo tufako dabade iria edo ne dodo, God na dirigetiri fusena, aikena jovereghe yarena.

<sup>34</sup> Na kakova use irareva. Avata na vasa reda ya buvarena amo, jo nene aminda ya buvari da kaugo iraeri. Ava sedo, na jo tambae areva.”

<sup>35</sup> Aminge siri ningido, Jusi embo da babojegari ne tofo tofo se nininguseri, “Erá numo tambeóro

dae sise, nu reda yari dae resi? Namondeda natofo Jusi embo mendeni, ne Greek embo da reighi mendeni aminda dighi anumbusera, aikena ya aminda irise, Greek embo ava dengoro indari dae resira, ai, nange resi?”

<sup>36</sup> Nu setira amo, ‘Namonde numo kakova use irarera. Nu vasa reda ya buvarira amo, namonde jo aminda ya buvari da kaugo iraeri,’ setira amo, redae seti?” ne bunise, vasa eni enda eminda ya irariá kotise siseri.

*7:37-44 Iesu Nu Mavejova Sise, Natofo Sarigedo Nunda Nunda Kotiseri.*

<sup>37</sup> Kirumo sumbu nunda sifo reda dadaberaira, sifo amo sifo teriari. Sifo aminda, Iesu nu eredo beka mindafu sisira, “Mave nu uvudae uju arira amo, nu namokena foa bu mindarira.

<sup>38</sup> Geka resena eindae, God da Geka barago eminge resira:

‘Mave na tumondarira amo, nunda janje jokáda, jebuga da uvu kau usegha da kaugo ava buvarira. (Uvuá mave mindarira amo, nu jebuga evovodae irari ava tuve barira.)’

God da Geka aminge resira.”

<sup>39</sup> Iesu aminge sisira da beká mo: nu Asisi Kakara dae sisira. Evetu genembo mave Iesu tumondarera amo, Asisi Kakara nemokena vose asugedo irarira, aindae sisira. Avata sifo aminda, God jo sari Iesu ambarida ghe jebuge eredo, ya nunda duro sekago jo bae irei. A gido, nunda Asisi Kakara barago, jo mutari vose foa evetu genembokena asugae irei.

<sup>40</sup> Evetu genembo totorugusera, nenda mendeni geka ava ningido, eminge siseri, “Feroveta amboda furariá seraera amo, genembo oviri,” mendeni aminge siseri.

<sup>41</sup> A mendeni siseri, “God Genembo eni dirigari furare dae sisira amo, numori.” Avata mendeni, geka giti sisera aindae sise, beisiga use eminge siseri, “God Genembo eni

dirigari furare dae sisira amo, nu jo Frovensi Galilee ghedo furae arira.

<sup>42</sup> God da Geka ijugerira amo: nu David da imemesiri ainda jokáda sirorarira. Nu David da reighi Bethlehem aminda sirorarira. Nu jo Frovensi Galilee aminda sirorae arira.”

<sup>43</sup> Aminge sise, Iesu mavejova sise, ne soroda sarigedo beisiga useri.

<sup>44</sup> Aminge sise, mendeni ne Iesu sandi budo koto ari kotiseri. Avata mave jo ya nunda tamo derae usira.

*7:45-52 Moses Da Geka Kaifa Kakato+, Ne Iesu Jo Tumondaeri.*

<sup>45</sup> Etero dadabetiri, God da Kambo+ kaifa kakato, ne eredo jovereghe era, fristi+ da babojegari a Moses da Geka kaifa kakato+ aikena buvero, ne ategi useri, “Ne redae Iesu jo sandi bu furae etevu?”

<sup>46</sup> Aminge setero, God da Kambo+ kaifa kakato aimi siseri, “Iesu nunda vironu seraira, avaga mave eni jo giti siruroro ningaeri.”

<sup>47</sup> Aminge setero, Moses da Geka kaifa kakato+ ne ghoghora sise, eminge siseri, “Iesu vironu sise ne deretiri tumondereva, ava namane eregosa.

<sup>48</sup> Namane kote givu! Namane babojegari a kokotofu, jo eniko nu tumondae irera. A Moses da Geka kaifa kakato+ barago, eniko Iesu jo tumondae irera.

<sup>49</sup> O natofo teria, ne jo namane avavaga iraeri. Ne munju tefori. God da Geka Moses imi gefusira ava, ne jo tege kasama e gogoghombaeri. Ava sedo, God simbora etiri, nenda kotari ava baghimbusira,” God da Kambo+ kaifa kakatokena aminge siseri.

<sup>50</sup> Nicodemus giti tumbaghae Iesu kena isira amo, nu Moses da Geka kaifa kato+ eniri. Nicodemus nu babojegaride dabade totoruguseri. Nu eredo, nunda kokomana, Moses da Geka kaifa kakatokena eminge sisira,

<sup>51</sup> “Seteva aindae resena. Kote givu! Namondeda agho dari resira: genembo eni mave jo foa dombu is- agha edo geke sae arira amo, nunda ari ekoko jo ijujae arera. Nu foa fetedo sirurari nininguse, ijujarera amo avori.”

<sup>52</sup> Aminge setiri dadabetiri, ne, Nicodemus dere jise siseri, “Arose, Galilee embo eni nimori tano! Ni God da Geka tege kasama e gogoghombaresa amo, ni kasama areasa: Frovensi Galilee embo, ne ekokori. Ainda jokáda, God da feroveta eni jo sirorae arira, ava kasama areasa. Iesu nu Galilee embo ava sedo, nu jo feroveta iraeri, ava ni anakora kasama aetesi. Ni nunda geke erá sonembeóso dae resera,” aminge siseri.

*7:53–8:11 Evetu Eni Yagera Iri Sandudusera Ava, Iesu Sonembetiri, Dotoero Isira.7:53–8:11*

<sup>53</sup> Ainda amboda kirumo dadabetiri gido, natofo taraghedo natida iseri.

## 8

<sup>1</sup> Amingusera avata, Iesu nu enda jiro fumbari javo Orivi aminda vitisira.

<sup>2</sup> Sifo atetiri ataeghae, Iesu jovereghedo Jerusalem ira, God da Kamboda+ teterusira. Teretiri, natofo aminda irisera aimi, numoá gido totorugetero, nu anumbe tuturo edo ijugusira.

<sup>3</sup> Amingiri, Moses da Geka ijuga kakato a kaifa kakato+ evetu eni sandi budo fera setero, natofo da dombuda fefetusira. Evetu emo, nu yagera iri gido, sandi ruruseri.

<sup>4</sup> Bu fera, setero fetiriri, Moses da Geka ijuga kakato a kaifa kakato+ Iesu kena siseri, “Ijuga Kato, evetu emo genemboghae yagera use fasirero tamberi.

<sup>5</sup> God da Agho Dari Moses imi gefusira, ainda jokáda eminge resira: mave yagera arira amo,

*7:53–8:11* **7:52:** Evetu genembo mendeni, geke John 7:53–8:11 jokáda mo, John nune gembariá seraera, o mendeni genembo eniimi gembariá seraera. Ava sedo Baiboro mendeni aminda gekeá ‘footnote’ jokáda, amo ‘page’ duruda tambaresa.

daoro ambarira. Ava sedo, namonde nange areri? Se ningore!”

<sup>6</sup> Aminge sisera da beká mo eviri: Iesu geka sembae sirurari ningido, ijujedo numoá koto ari dae sedo aminguseri. Setero ningido, Iesu rosege, ungoimi endada geka gefusira.

<sup>7</sup> Ne numoá jimbe jokáda edo ategi ero, nu gembiri dadabetiri, ere fetedo, sisira, “Aвори, evetué daovo ambarira! Avata mave ari eko eni jo ae irarira aimi, giti tuturo edo ghamana afarira.”

<sup>8</sup> Aminge sedo, Iesu sekago rosege, ungoimi endada gefusira.

<sup>9</sup> Gefiri, ne nunda geka setiri ningusera aindae, nu dodo nunda nunda iseri. Bebego ne giti ero, ambobo ne amboda era dadabetero, evetuá nusuka Iesu da dombuda fetusira.

<sup>10</sup> Era dadabetero, Iesu ere fetedo evetu aikena sisira, “Ninda ari eko ijujari kakato oroko redari? Ne geka eni sero niningeresa? Kote gi!” sisira.

<sup>11</sup> Setiri, evetuá, “Tefo, Bajari, ne taragheteri,” setiri, Iesu sisira, “Aвори, nambarago nindae jo ghoghora sise ijujae arena. Yaresa avata, erá sekago amingeose dae resena!”

### *8:12-20 Iesu Nu Namondeda Usasari.*

<sup>12</sup> Iesu sekago natofokena sisira, “Na evetu genembo da usasari. Mave nanda amboda furarira amo, nu jo tumbada deinghae arira; nu usasada deinghuse irarira. Usasa aminda deinghuse, jebuga evovoda irari ava tuve barira.”

<sup>13</sup> Aminge setiri, Moses da Geka kaifa kakato+ numokena siseri, “Ninda geka tofo nimoá sonembuse seraesa amo, jo inono iraeri. A kotugo, ninda geka resesa amo, jo fetae arira.”

<sup>14</sup> Aminge setero, Iesu mino nemo-kenena sisira, “Nanda geka tofo namoá sonembariá sise, ne aindae nanda geka gungubova reseva. Avata na eminge resena: na tofo amingarena

amo, na geka beká sarena. Ainda beká mo: na reda ghe fusena, a na reda jovereghe yarena, ava na kasama erena. O ne a bunariri.

<sup>15</sup> Ne tofo nenda uju ava use, evetu genembo da kotariimi ijujer-aeva. O namo, na jo evetu genembo ijujae eraena.

<sup>16</sup> Avata na ijujaetena amo, na geka bekáda bekáda sise, evetu genembo da ari ekoko ijujaeteni. Ainda beká mo: na jo nasuka iraeri. Afa na dirigetiri fusena amo, nu nangae irera.

<sup>17</sup> Nenda agho dari eminge resira: koto ururoro, evetu genembo etotoimi, geka daba ava siruroro ningarera amo, nengae nenda geka ava tumondarera.

<sup>18</sup> Na tofo na mavejori, ava sise irá gheraena. A kotugo, Afa barago, nanda geka nu sonemberaira.”

<sup>19</sup> Aminge setiri, ne ategi useri, “Nimamo resesa amo, oroko reda iri?” aminge ategi etero, Iesu mino nemokena sisira, “Ne na mavejoá jo kasama ae ireva. A gido nanda Afa barago jo kasama ae ireva. O na mavejoá kasama aeteva amo, nanda Afa barago kasama aetevu,”

<sup>20</sup> Iesu geka aminge sise, God da Kambo+ da natofoimi moni vendoro dae sedo, rooro fiftusera, ainda vasa aminda fefetuse sisira. Avata mave, jo foa nu sandaeri. Ainda beká mo: nunda sifo jo foa buvaeri.

### *8:21-30 Mave Iesu Jo Tumondae Arira Amo, Nu God Da Reighi Eveva Aminda Jo Yae Arira.*

<sup>21</sup> Iesu sekago nemokena sisira, “Na ne dodo irurono, ne na tava areva. Avata na jo tambae irovo, God nenda ari ekoko jo kote doyaer irari, ne sirivo areva. Na reda yarena, ne jo aminda yari da kaugo iraeri.”

<sup>22</sup> Aminge setiri, Jusi embo da babojegari ne tofo tofo eminge se ninguseri, “Nu reda yarira, aminda namane jo yari da kaugo irae resira omo, nange sise resi? Nu tofo de ambari dae resira, ai,

nange ari dae resi?” ne bune jaredo, manamana use aminge siseri.

<sup>23</sup> Setero, Iesu nemokena sisira, “Ne duru eminda sirorusevu. Na ikáda ghe vose fuseni. Nemo, nenda susu enda eminda irira. O namo, nanda susu jo enda eminda iraeri.

<sup>24</sup> Na aindae seteni: God nenda ari ekoko jo kote doyae irari, ne sirivo areva. Ne, ‘na Numori’ ava jo tumonda areva amo, God nenda ari ekoko jo kote doyae irari, ne sirivo areva.”

<sup>25</sup> Aminge setiri, ne ategi useri, “Avori, geka bekáda se ningore! Ni mavejori?” aminge setero, Iesu minonda sisira, “Tuturoda fena ijuguse sisená, daba avori.

<sup>26</sup> Na nemokena geka mendeni mendeni saeteni, a nenda ari ekoko mendeni aindae ijujaeteni. Avata mave na dirigetiri fusena amo, nu ari bekáda bekáda ari kato, a geka beká sari katori. Ava sedo, na numokena rea niningusena, avanembo seono ningiraeva,” aminge sisira.

<sup>27</sup> Avori, Iesu nu God Afa dae sisira ava, ne buniseri.

<sup>28</sup> Ava gido, Iesu nemokena eminge sisira, “Ne na jighovo erono, daovo ambono gido, ne kasama areva: Evetu Genembo da Koro+ mo, namori. Kotugo na jo tofo nanda javoda saramana ae eraena, a na rea seraena amo, Afa ijugetiri kasama usena, ábarago ne kasama areva.

<sup>29</sup> Kotugo, Afa na dirigetiri fusena amo, nu jo na doyari, na nasuka deinghae eraena. Nu nangae dabade irera. Ainda beká mo: na rea eraena aindae, nu ivuga eraira,”

<sup>30</sup> Iesu nu geka ava siri, evetu genembo digari nu tumonduseri.

*8:31-47 Evetu Genembo Mave God Tumonderaera Amo, Ne Abraham Da Sasinguri.*

<sup>31</sup> Jusi embo da babojegari mendeni Iesu tumondusera aikena, nu eminge sisira, “Ne nanda geka ningido, aminguse irareva amo, ne nanda dorevare beká ava areva.

<sup>32</sup> Edo, geka beká da susu, ava kasama e gogoghombareva. Geka beká aimi, ne vujegari jebugareva.”

<sup>33</sup> Aminge setiri, ne siseri, “Agá! Ni redae vujegari da geka resesi? Namane mo, abua Abraham da sasinguri; ava sedo, namane jo bundoro iraeri, a namane jo sabua+ iraeri.”

<sup>34</sup> Aminge setero, Iesu nemokena sisira, “Nemokena geka beká resena. Mave Ari Eko da saramana use irarira amo, nu Ari Eko da sabua+ edo irarira.

<sup>35</sup> Genembo nunda sabua+ ava, jo evovodae bu jighirise, nemonde dabade irá ghae arira. O genembo ainda sasingu beká mo, nu jo doyae arira. Nu nemonde dabade irarera.

<sup>36</sup> Ava sedo, ne bundedo irovo, God da Mandiimi, ne vujegedo, nenda ari ekoko kote doyarira amo, ne sabua+ da irari dodo, nunda sasingu beká edo, jebugari beká ava edo irareva.

<sup>37</sup> Na kasama erena, ne Abraham da sasinguri. Ainda beká mo: ne nunda imemesiri jokáda sirorusevu. Avata ne nanda geka imboe use ireva aindae, ne na daovo ambono dae sedo kotise ireva.

<sup>38</sup> Nanda Afa rea namokena ijugusira, ava vironu sise irena. O nemo, nimamo geka rea siri nininguseva, ava use ireva.”

<sup>39</sup> Aminge setiri, ne siseri, “Namanenda afa mo, Abraham numori,” aminge siseri. Setero, Iesu nemokena sisira, “Ne Abraham da sasingu beká iraeteva amo, nu rea usira, ne kau daba ava use iraetevu.

<sup>40</sup> O namo, God geka beká namokena sisira, avanembo nemokena sise irena. Avata ne na daovo ambono dae kotise ireva. Nembua Abraham jo amingae edo ghusira.

<sup>41</sup> O nemo, nenda nimamo beká ainda saramana use ireva,” aminge setiri, ne siseri, “Namanenda afa dabako, God numori. Namane nunda sasingu bekári.”

<sup>42</sup> Aminge setero, Iesu nemokena sisira, “Amo gungubori! Ne God Afa da sasingu iraeteva amo, ne na dubo baetevu. Ainda beká mo: na tofo God kena ghedo ojena irena. Na jo nanda javoda furae useni. Na God dirigetiri fuseni.



<sup>43</sup> Ne nanda geka da tuka jo kasama ae eraeva da beká mo: ne ningarikena jo inono ae ireva.

<sup>44</sup> Ai resira amo: nenda nimamo Satan da uju ava ari dae kotise ireva. Nu tuturoda fusira ai tano ghedo, evetu genembo deari ambudo ghuseri. Numokena geka beká eni tefori. Aindae nu geka beká a ari beká ava, imboe use irira. Nu tofo numoá gungubo katori, a gungubo isasambu da susu mo, numori. Ava sedo, nu gungubo sarira amo, erá buneove! Amo nunda ariri.

<sup>45</sup> Na geka bekáda bekáda seraena, avata ne gungubo kato ainda sasingu ava sedo, ne na jo tumondae eraeva.

<sup>46</sup> Givu! Na ari eko eni, eno gosusevu? Ava kote givu! Tefo! Na geka bekáda bekáda seraena. Ava sedo, ne redae nanda geka jo tumondae eraevu?

<sup>47</sup> God da sasingu amo, ne God da Geka ava ningiraera. Avata ne jo God da sasingu iraeri. Ava sedo, ne nanda geka jo ningae eraeva,” Iesu aminge sisira.

#### *8:48-59 Abraham Nu Kitakori, Iesu Nu Teriari.*

<sup>48</sup> Iesu aminge setiri, Jusi embo da babojegari siseri, “Namanenda mendenii, sukaru nimokena asugedo iririá simutari. A namanenda mendeni simutara amo, ‘Ni namondeda gitofu Samaria embo ainda kau, ava use iresa.’ Aminge simutara amo, geka beká simutari. Ni aminguse iresa.”

<sup>49</sup> Aminge setero, Iesu mino nemo-kenena sisira, “Namokena sukaru eni jo asugaeri. Na nanda Afa kakara use irena. Avata ne nandae aji seraeva.

<sup>50</sup> Na jo tofo nanda durodae saramana ae eraena. Avata God nu nanda duro aindae koteraira. A amboda, nu foa geka bekáda bekáda ijujedo, na sonembarira.

<sup>51</sup> Na nemokena geka beká resena: nanda geka mave ningido amingarira amo, nu jo ambae arira.”

<sup>52-53</sup> Aminge setiri, Jusi embo da babojegari numokena siseri,

“Orokoá geka seso ningido, namane kasama e gogoghomberera: sukaru nimokena asugedo irira, amo geka bekári. Ni setesi, ‘Nanda geka mave ningido amingarira amo, nu jo ambae arira.’ Aminge setesa amo, jo geka iraeri. Namondeda abua Abraham mo, nu ambududurusira. A feroveta isambu, ne sirivo useri. Aminge setesa amo, inono, ni abua Abraham darigedo genembo teria etesi. A nu fiteso vose, genembo kitako etira. Amo jo geka beká iraeri. Ava sedo, isagha se ningore! Ni erekotesa, ni mavejori? Ava se ningore!”

<sup>54</sup> Aminge setero, Iesu mino sisira, “Na tofo nandae sakai saetena amo, nanda sakai sari beká irae aeti. Nanda Afa nandae sakai seraira amo, ‘Nu nenda God,’ seraeva. Avata, nu nandae jo sakai sae eraira, nu nandae sakai seraira.

<sup>55</sup> Ne God jo kasama ae ireva. Avata na God kasama eraena. Nu kasama use, nunda Geka ningido, amingeraena. Ava sedo, nu ighagha use, ‘Na nu bunariri,’ saetena amo, kau gungubo da kaugo aeti. Gungubo sari amo, nenda sariri; ava sedo, na jo amingae arena. Geka beká mo: na nu kasama use, nunda geka ningido, amingeraena.

<sup>56</sup> Na siroreno, nembua Abraham na gido, ivuga usira, ivuga ambari ava usira.”

<sup>57</sup> Aminge setiri, Jusi embo da babojegari siseri, “Abraham anakora ambududurusira. Ni jo ghaeko 50 tambae iresa. Ava ni nange Abraham gariá resesi? A ni nange resesi?”

<sup>58</sup> Aminge setero, Iesu mino nemo-kenena sisira, “Geka beká nemokena resena! Abraham nu jo sirorae ireira ainda gitida, na Numori,” aminge setiri,

<sup>59</sup> ne Iesu daoro ambare dae sedo, ghamana rete ruruseri. Rete rurero gido, Iesu God da Kambo+ jokáda jungedo, ira isaghada buvurutusira.

*9:1-12 Genembo Eni Diti Digoide Ava, Iesu Setiri Jebugusira.*

<sup>1</sup> Iesu namane namonde dabade ise, genembo eni diti digoide siroredo ireira ava, gosuseri.

<sup>2</sup> Gido, namane ategi useri, “Ijuga Kato, genembo omo, redae diti digoide sirorusi? Noi numamo da ari ekoko, ai, tofo nunda ari ekoko aindae aminge sirorusi?” aminge setero,

<sup>3</sup> Iesu sisira, “Tefo, ainda susu mo, jo ari eko dae aeri. Nu diti digoide sirorusira da beká mo: na ururono evetu genembo God da fakina ava gaoro dae sedo, nu aminge sirorusira.

<sup>4</sup> Iji isonga irarira amo, God na dirigitiri fusena ainda saramana ava, namonde use irá ghedo gharera. Ainda beká mo: tumba jirari dae erira ainda jokáda, mave jo saramana ari da kaugo irae arira.

<sup>5</sup> Avata namo, na endada irena emo, na kau evetu genembo einda usasari.”

<sup>6</sup> Aminge setiri dadabetiri, Iesu endada kosiva edo aimi budo, genembo diti digoide ainda ditida davedo,

<sup>7</sup> genembo aikena sisira, “Yasi, reighi javo Sailoam da uvu bogu aminda, dombu seghase!” aminge sisira. (Sailoam resena, ainda tuka mo namondeda gekaimi, ‘Dirigari Yari’ seraera.) Aminge sisira aindae, genemboá nu eredo ira, uvu bogu aminda dombu seghetiri, diti afigetiri gosuse jovereghe fusira.

<sup>8</sup> Nunda totofo a evetu genembo mendeni mave genemboá giti bayaudae benunu sirureari gido ghusera aimi, tofo tofo se nininguseri, “Genembo diti digoide giti eminda anumbirise, bayaudae benunu sedo ghusira amo, genembo oviri, ai?” ava sise manamana use,

<sup>9</sup> mendeni, “Ai, numori,” siseri. Kotugo mendeni siseri, “Tefo, jo numo iraeri. Omo nu kau nunda kaugori, avata jo numo iraeri,” aminge sero, genemboá tofo sisira, “Namori.”

<sup>10</sup> Aminge setiri, ne ategi useri, “Ni nange nangedo diti eveva etiri eregosesi?”

<sup>11</sup> Setero, genemboá sisira, “Genembo javo Iesu, namokena fira kosiva endada edo aimi budo, nanda ditida davedo setira, ‘Yasi, reighi javo Sailoam da uvu bogu aminda, dombu seghase!’ setira. Aminge setiri, na eredo aena segheno ainghae dabade, diti afigetiri eregosenana,” aminge sisira.

<sup>12</sup> Setiri, ne ategi useri, “Iesu nu redari?” setero, nu sisira, “Na erebunena,” sisira.

*9:13-34 Genembo Da Diti Nange Eveva Usira Aindae, Moses Da Geka Kaifa Kakato+ Ne Ijuseri.*

<sup>13</sup> Aminge setero dadabetiri, ne genemboá unumbe budo, Moses da Geka kaifa kakatokena iseri.

<sup>14</sup> Iesu genembo diti digoide ava, setiri diti eveva usira amo, Jangutari da Sifo aminda usira.

<sup>15</sup> Ava kasama edo, Moses da Geka kaifa kakato+ nunda diti nange eveva usira, ava sekago sari ningi gogogho ari dae siseri. Setero, nu sisira, “Iesu endada kosiva edo aimi budo, nanda ditida davedo setiri, na aena dombu segheteno, diti eveva etiri eregosenana.”

<sup>16</sup> Aminge setiri, Moses da Geka kaifa kakato+ mendeni Iesu dae siseri, “Nu Jangutari da Sifo ainda agho dari jo kaifa ae eraira, aindae namane kasama erera, nu jo God kena ghedo furaeri,” mendeni aminge siseri. Avata mendeni mo eminge siseri, “Tefo, God sonembetiri amingetira tano. Ai resira amo: genembo nusuka nunda fakinaimi jo amingae arira. Evetu genembo ari ekoko eraera amo, jo ari aminga ava ae eraera.” Aminge sise, ne soroda sarigedo beisiga useri.

<sup>17</sup> Amingedo, Moses da Geka kaifa kakato+ sekago genembo aikena siseri, “Genembo setiri, ninda diti eveva etira. Ava sedo, se ningore! Ni erekotesa, nu kau mavegori?”

aminge setero, “Nu feroveta eniri!” sisira.

<sup>18</sup> Avata Jusi embo da babojegari genembo ainda geke ava, ne jo tumondaeri. Nu giti diti digoide irise jebugusira ava, ne jo tumondaeri. Aminguse, ne setero, genembo ainda noi numamo fera buvero,

<sup>19</sup> ategi useri, “Sevu ningore! Geka bekári: genembo emo nenda mandiri? Nu diti digoide sirorusira reseva amo, nu nange jebugedo eregosi?”

<sup>20</sup> Aminge setero, genembo ainda noi numamo siseri, “Averi, kasama evu! Nu namanenda mandiri. A nu diti digoide ava sirorusira.

<sup>21</sup> Avata, nu nange jebugetira, a mave setiri jebugetira, ava namane erebunera. Nu genembori. Ava sedo, yasivu ategi aovo, tofo sari ningove!”

<sup>22</sup> Aminge sisera da beká mo: genembo ainda noi numamo ne Jusi embo da babojegari aindae oju useri. Ainda tuka mo: ne geke setero fefetusira, amo eviri: “Mave, ‘God Genembo eni dirigari furare dae sisira amo, Iesu numori,’ sarira amo, namane nu imboe use buregaoro, nu jo foa dengoro indari da kamboda+ terae arira,”

<sup>23</sup> Aminge sedo ghusera ava ningido, genembo ainda noi numamo oju edo eminge siseri, “Nu genembori. Ava sedo, yasivu ategi aovo, tofo sari ningove!” Aminge sisera amo, ne oju use siseri.

<sup>24</sup> Setero aindae, Moses da Geka kaifa kakato+ sekago aghi etero, genemboá jovereghe fira buviri numokena siseri, “Jebugetesa aindae, God da javo jighaso erarira amo, avori. O genembo Iesu da javo mo, erá jigheóso ereure dae sise resera. Namane kasama erera amo, nu ari eko embori.”

<sup>25</sup> Aminge setero, genemboá eminge sisira, “Nu ari eko embo reseva, ava na erebunena. Avata na dabako evia kasama erena. Na giti diti digoide iriana ava, nune setiri jebugeteni!”

<sup>26</sup> Aminge setiri, ne ategi useri, “Iesu nange etiri ninda diti eveva eti?”

<sup>27</sup> Setero, genemboá sekago nemo-kena sisira, “Na giti setena amo, ne ningari imboe etevu. Ava sedo, na redae sekago saono ningarevu? Nembarago nunda dorevare ari erekoteva, ai?”

<sup>28</sup> Aminge siri ningido, ne tuturo edo nundae jijivu sedo siseri, “Ni Iesu da ambo jimbi eni aresa tano. Avata nu genembo kitakori. O namane mo, Moses da ambo jimbiri.

<sup>29</sup> A Moses nu, feroveta teria eniri. God Moses ghae geke sisera ava, namane kasama erera. Nu genembo teriari. O Iesu mo, jo rejo eni iraeri. Nu reda ghe fusira amo, namane berefori.”

<sup>30</sup> Aminge setero, genemboá dudukughedo mino nemokena sisira, “Amo redae aminge resevu? Nu setiri nanda diti eveva etira. A gido, nu God da genembo eni, ava anakora kasama aetevu.

<sup>31</sup> Kote givu! God evetu genembo ekoko ainda benunu jo ningae eraira, ava namonde kasama erera. Avata evetu genembo nu kakara use, nunda uju ava use irera amo, nenda benunu ava, nu ningiraira.

<sup>32</sup> Utu enda etiri sirorusira, tano aminda ghedo ojira orokoé, genembo eni jo sari, evetu genembo diti digoide sirorusera ainda diti jo eveva ae irira.

<sup>33</sup> Ava sedo, Iesu jo God kena ghedo furae aetira amo, roera nune eraira ava, nu jo edo ghae aeti.”

<sup>34</sup> Aminge setiri, ne numokena jijivu sise minonda siseri, “Nimbarago, emboroda bu undariri. Namane jo nine dengoro indae aresa!” aminge sedo, ne genemboá ondero ira buvurutusira.

*9:35-41 Evetu Genembo Mendeni Ne Munjuderi, Avata Ne Asisi Ambariri.*

<sup>35</sup> Genembo ondisera ava ningido, Iesu ira numo tambudo sisira, “Ni Evetu Genembo da Koro+ ava tumonderesa?” sisira.

<sup>36</sup> Setiri, genemboá mino numokena sisira, “Bajari, Evetu Genembo da Koro+ resesa, ijugaso gido tumondaone!”

<sup>37</sup> Aminge setiri, Iesu numokena sisira, “Nu anakora eregosesere! Evetu Genembo da Koro+ setena amo, namori.”

<sup>38</sup> Aminge setiri, genemboá sisira, “Bajari, na ni orokoá tumonderena,” aminge sedo, Iesu da dombuda kauboi dadarigusira.

<sup>39</sup> Etiri, Iesu sisira, “Na endada vose fusena da beká mo: evetu genembo diti digoide ava, saono gaoro dae a dubo koto dae sedo fuseni. Avata evetu genembo mave nu eveva gariá erekotira amo, nu anakora tuturo edo, nunda munju eveva a kotari eveva aindae, gogore use irira. Evetu genembo avavaga, saono diti digoi aore dae a nenda kotari dadabare dae sedo, fuseni.”

<sup>40</sup> Aminge siri ningido, Moses da Geka kaifa kakato+ mendeni aminda fetirisera aimi, numokena ategi useri, “Ni mavedae resesi? Namanendae resesa, ai?”

<sup>41</sup> Setero, Iesu mino nemokena sisira, “Ne diti digoide iraeteva amo, ne ari ekoko da mino eni jo bae aetevu. Avata ne eminge sise irá gheraeva, ‘Namane gi gogogho eraera. Namanenda kasama teriari,’ aminge sise irá gheraeva. Aindae sedo, na nemokena resena: nenda ari ekoko da mino jo dadabae, irari, amboda tambareva,” aminge sisira.

## 10

*10:1-6 Sifi (Sheep) Kaifa Kato Da Kasiari.*

<sup>1</sup> Iesu aminge sise, kasia eni sisira, “Na nemokena geka beká resena. Mave, sifi (sheep) da karo dari birurghusera ava viti jarigarira, o beje terarira amo, nu bagia katori. Sifi (sheep) da numamo a kaifa kato jo amingae eraera.

<sup>2</sup> Genembo guroda teterrururari garesa amo, kasama aresa, sifi kaifa kato mo, numori.

<sup>3-4</sup> Guro da kaifa kato nundae sedo, guro afigari teredo beka sirurari, sifi (sheep) nunda beka ningi kasama arera. Nu nunda sifi da javo sise atimbari ne ningido, nunda amboda amboda buvudo yarera.

<sup>5</sup> O genembo eninda beka ningarera amo, jo nunda amboda yae arera. Genembo eninda beka ningarera amo, ne oju sumbarera, ne nunda beka bunari ava sedo,” Iesu aminge sisira.

<sup>6</sup> Iesu nu aminge setiri niningusera avata, kasia aindae tuka mo, ne bunariri.

*10:7-21 Iesu Nu Kasia Da Tuka Ava Osa Sisira.*

<sup>7</sup> Kasia da tuka bunisera aindae, Iesu tuturo edo sekago sisira, “Na nemokena geka beká ava resena. Namoni inono, sifi da karo dari birurghusera aindae gurori.

<sup>8</sup> Evetu genembo nanda gitida fusera, ne kau, bagia kakato da kugori. Aindae sedo, sifi nenda beka jo ningae edo ghuseri.

<sup>9</sup> O namo, gurori. Mave namokena terarira amo, nu jebuga evovoda irari ava tuve barira. Nu tere ya foa ghuse, bayau inononda tambarira.

<sup>10</sup> Bagia kakato setena amo, ne bagia ari, sifi daoro ambare dae sedo, a de bejari dae sedo foa gheraera. O namo, jebuga mutono dubo jama use, irovo dae sedo fuseni.

<sup>11</sup> “Tuka eni seteni. Kotugo eni mo eviri: sifi kaifa kato eveva setena amo, namori. Sonembari da emboro eni jo tambae arira amo, sifi kaifa kato eveva amo, nunda sifi sonembari dae sedo ambarira.

<sup>12</sup> O genembo eni tefo moni bari dae sedo, sifi kaifa eraira amo, nu jo amingo iraeri. Sifi mo, jo nunda tofo iraeri. Ava sedo, sino gambari kato fururari garira amo, nu sifi do sumbarira. Sufuse doyariri, sinoá foama sifi mendeni gambu rirurari, mendeni oju edo nunda nunda sumbarera.

<sup>13</sup> Genemboá nu tefo moni bari dae sedo saramana eraira, a sifi nu jo

dubo bae eraira; ava sedo, nu sifi dodo sumbarira.

<sup>14-15</sup> Sifi kaifa kato eveva setena amo, namori. Kau namane Afaghae tofo tofo kasama eraera aminga ava, nanda sifi namane tofo tofo kasama eraera. A na, nemo sonembari dae sedo ambarena.

<sup>16</sup> Nanda sifi mendeni, karo setena ainda jokáda irera. Kotugo, mendeni mo, karo eninda irera. Kotugo, mendeni karo eninda irera amo, ne foa dabade tataeteri. Ava sedo, na ya sifi (sheep) karo eninda irera ava bu furono, mendeni karo ainda jokáda irera ainde dabade tatedo, nanda beka nininguroro, nane tavo ururono irarera.

<sup>17</sup> “Nanda jebuga nu sekago barena, avata nanda mendeni sonembari dae sise, nanda jebuga dodo ambari dae erena. Nanda Afa aindae sedo na dubo buraira.

<sup>18</sup> Na, nanda jebuga tofo mutarena. Na jo ‘avori’ sae aetena amo, mave enii jo nanda jebuga bari ambae aeteni. Nanda jebuga, nane tofo mutarena. Kotugo, nanda jebuga daba ava, tofo bu erarena. Ainda fakina ava, nanda Afa nanda ungodá fiftusira.”

<sup>19</sup> Iesu aminge sisira aindae, Jusi embo da babojegari sekago sarigedo beisiga useri.

<sup>20</sup> Beisiga use, mendeni eminge siseri, “Sukarui numokena asugeteri daghusira. Nunda geka erá ningeove!” siseri.

<sup>21</sup> Avata mendeni eminge siseri, “Tefo, genembo mavekena sukarui asugarira amo, jo geka evavago sae arira. A sukaruimi jo sari evetu genembo da diti eveva ae arira,” aminge siseri.

### *10:22-42 Jusi Embo Da Babojegari, Ne Sekago Iesu Ighagha Useri.*

<sup>22</sup> Israel embo nenda gitofu ava de ondido, God da Kambo+ gitofui bebete usera ava seghedo, ainda amboda sifo fitido, sekago Kambo aminda tuturo edo God tumonde bainghedo ghuseri. Ainda kiki ava kotise, ghaeko ava inono kirumo edo

ghuseri. Ainda kirumo da sifo fira buvurutusira. Amo, baimara da sifo aminda edo ghuseri.

<sup>23-24</sup> Kirumo da sifo buviri, vasa eni Kini (King) Solomon tefo yaura bari dae sedo God da Kambo+ dendeguda itutusira aminda, Jusi embo da babojegari Iesu kena fera totoruguseri. Nu aminda deinghiri, ne totorugedo numokena siseri, “Erá kivo eose! Isagha se, ningore! God Genembo eni dirigari furare dae sisira amo, nimori, ai?”

<sup>25</sup> Aminge setero, Iesu nemokena sisira, “Na nemokena anakora siseni. Avata ne nanda geka jo tumondaereva. Tano a ari mendeni nanda Afa da javoda eono gido dudukugheraeva aimi, nanda geka sonemberaira.

<sup>26</sup> Avata ne jo nanda sifi (sheep) iraeri. Ava sedo, na jo tumondaereva.

<sup>27</sup> O nanda sifi mo, ne nanda geka ningiraera. A ne, na kasama eraena. A kotugo, ne nanda amboda amboda foa gheraera.

<sup>28</sup> Na nemokena jebuga evovodaere irari mutarena aimi, ne jo ambae arera. Kotugo, nanda sifi mave enii, jo foa nanda ungodá saghimbe bae arira.

<sup>29</sup> Ai resira amo: nanda Afa sifiá namokena futusira. A nunda fakina mindafu bekári. Jo maveda fakina amingo iraeri. Ava sedo, nanda sifi mave enii, jo foa Afa da ungodá saghimbe bae arira.

<sup>30</sup> Namane Afaghae mo, tatedo dabako edo irera.”

<sup>31</sup> Iesu nu aminge siri ningido, Jusi embo da babojegari, sekago numoá ghamanai daoro ambare dae sise, ghamana retiseri.

<sup>32</sup> Amingero, Iesu nemokena ategi usira, “God Afa seari, na tano eveva a ari eveva eono giraeva. Ari reja ava usena aindae kotise, na daovo ambono dae resevu?”

<sup>33</sup> Aminge seteri, Jusi embo da babojegari mino numokena siseri, “Tano a ari evavago eraesa aindae, ni jo daoro ambae aresa. Avata ni

geka seso God da javo eko erira ain-  
dae sedo, ni daoro ambaresa. Ni taká  
genembo bekári. Avata ni aminge  
sise, ni inono God da kaugo use, God  
da javo eso eko erira,” aminge siseri.

<sup>34</sup> Setero, Iesu mino nemokena  
sisira, “Agho Dari God nemokena  
futusira ainda jokáda, God nu tofo  
evetu genembodae sisira:

‘Na nemokena resena, “Ne totofo  
nemo goderi,” ’<sup>34</sup>

aminge sisira.

<sup>35</sup> Avori, namonde kasama erera:  
God da Geka nu evovodae irarira.  
Ava sedo, evetu genembokena God  
Afa Geka futusira andae mo, ‘Ne  
totofo nemoá goderi,’ sisira amo,  
geka bekári.

<sup>36</sup> Kotugo namo, God tofo nune  
gategedo na dirigetiri vose fuseni.  
Ava sedo, ‘Na God da Mandiri,’  
sarena amo, erá buneove! Na  
aminge sirurono, God da javo jo eko  
ae arira.

<sup>37</sup> A eni mo: na God da saramana jo  
ae aetena amo, ne na jo tumondae  
aetevu.

<sup>38</sup> Avata nunda saramana eraena  
amo, nanda ari ava gido, na tumon-  
daetevu. Nanda geka avanembo  
ningido, ne na jo tumondae areva,  
avata nanda ari ava gido, na  
tumondaetevu. Kotugo, na rea  
eraena, ava gosuse ne kasama e  
gogoghombaetevu: geka bekári,  
namane Afaghae tatedo nangae  
dabako edo irera,” Iesu aminge  
sisira.

<sup>39</sup> Setiri ningido, nu sekago sandi  
koto ari dae kotiseri. Avata nu ne  
kakagedo isira.

<sup>40</sup> Amingedo, Iesu ira uvu javo Jor-  
dan sembudo, reighi John giti bafa-  
taito edo ghusira, aminda irei.

<sup>41</sup> Nu aminda iriri, evetu genembo  
digari numokena iseri. Era, Iesu  
nemonde dabade irise, ne eminge  
sedo ghuseri, “John nu tano a ari  
mendeni jo ari gido dudukughae edo  
ghuseri. Avata, nu rea Iesu dae sisira  
amo, isagha etiri eregoserere. Amo  
geka bekári,”

<sup>42</sup> Aminge sise, evetu genembo di-  
gari aminda, Iesu tumonduseri.

## 11

### *11:1-16 Lazarus Ambududurusira.*

<sup>1</sup> Bethany embo genembo javo  
Lazarus, kae budo fasirei. Bethany  
resena emo, ade jamena etoto naká,  
Mary nunda aki Martha ghae da  
reighiri.

<sup>2</sup> (Gagara Mary ira usu da mukai,  
Bajari da atada averegedo, nunda  
beoimi ghajisira, amo numori.  
Lazarus kae budo fasireira amo,  
Mary da mandakori.)

<sup>3</sup> Kae biri gido, nunda ghaghasovu  
Iesu furare dae sedo aghi futuse sis-  
eri, “Yasi, Bajarikena eminge sase,  
‘Bajari, ninda komana dubo buraesa  
amo, nu kae budo fasirira,’ ” ne  
aminge sedo, nu diriguseri.

<sup>4</sup> Setero ira aminge setiri ningido,  
Iesu sisira, “Lazarus kae budo  
fasirira amo, jo ambari dadabae  
arira. Ainda beká mo: evetu  
genembo God dae sakai saoro dae  
sedo, nu kae emo rurusira. Rea  
siororarira ava gido andae, God da  
Mandi dae sakai sarera,” aminge  
sisira.

<sup>5</sup> Iesu nu, Mary nengae Martha  
ghae, a Lazarus de dabade, dubo  
budo ghusira.

<sup>6</sup> Avata, Lazarus nu kae rurusira  
ainda bino ava firi ningido, Iesu vasa  
daba aminda iriri, sifo etoto naká  
dadabusira.

<sup>7</sup> Dadabetiri gido, namanekena  
sisira, “Fuvu namonde eredo,  
Frovensi Judia aminda jovereghe  
yaore!”

<sup>8</sup> Setiri, namane bureguse siseri,  
“Ijuga Kato, sife nembo Jusi embo  
da babojegari, ni ghamanai dari dae  
siseri. Ni erama aminda yeóso dae  
resera!”

<sup>9</sup> Aminge setero, nu namanekena  
sisira, “Sifo evia inono usasa jan-  
imberaira. Ava sedo, genembo  
deinghari sarira amo, usasa jan-  
imbururari evevada deingharira.

<sup>34</sup> **10:34:** Geka emo **David Da Yaru Buku** 82:6 jokáda gembero irira,

Ainda beká mo: iji janimbukurari, nunda emboro gi gogoghombuse deingharira.

<sup>10</sup> Avata tumbaghae deinghari sarira amo, atada dimbu fugari durari dae arira. Resena einda beká mo: genembo aikena usasa tefori.”

<sup>11</sup> Iesu aminge sise ainda jokáda, Lazarus da geka setiri buvurutusira, “Namondeda komana Lazarus diti bainghetiri fase ravira. Namonde ya derono erarira,” aminge sisira.

<sup>12</sup> Setiri, namane siseri, “Bajari, amo evevari. Eveva avarira amo, nunda tamo aragharira,” aminge siseri.

<sup>13</sup> Avata Bajari nu kasia setiri, namane nu beká sariá kotiseri. Iesu nu ambari dae mo, avariá sisira. O geka bekári: Lazarus mo nu ambududurusira.

<sup>14</sup> Namane bunero gido, Iesu namanekena isagha sisira, “Lazarus ambududu-rumuta.

<sup>15</sup> Avata namonde eminda irero, nu ambududurumutara aindae, na ivuga erena. Ainda beká mo: ne nanda fakina ava gido tumondareva. Fuvu, namonde numokena yaore!”

<sup>16</sup> Aminge setiri, namanenda genembo eni, Thomas (o Didymus sedo ghusera) aimi eredo namanekena sisira, “Fuvu, namonde ijuga kato einde dabade yaoro, daoro ambore!” aminge sisira.

### *11:17-44 Iesu Setiri, Lazarus Ambarida Ghe Jebuge Erorusira.*

<sup>17</sup> Lazarus furugetero, sifo avononde naká dadabetiri, Iesu ira ava kasama usira.

<sup>18</sup> Reighi Bethany ghedo, Jerusalem jo soka iraeri. Amo, ututu etodaba (3 kilometres) aminga yariri.

<sup>19</sup> Lazarus ambududurusira aindae, Jusi embo digari, nange Mary nengae Martha ghae kena dubo jama mutaetera ava kotise, nemokena iseri.

<sup>20</sup> Iesu fira utuako iri, ainda bino ava ningido, Martha nu ere Iesu tambari dae isira. Avata Mary nu kamboda fefetusira.

<sup>21</sup> Martha nu ira, Iesu tambudo numokena sisira, “Ni eminda iraetesa amo, nanda mandako jo ambae aeti.

<sup>22</sup> Avata na kasama erena: ni God Afakena rejodae benunu saresa amo, mutarira.”

<sup>23</sup> Aminge setiri, Iesu numokena sisira, “Ninda mandako ambarida ghe jebugedo erarira.”

<sup>24</sup> Aminge setiri, nu sisira, “Nu sifo gombuda jebuge erarira ava, na kasama erena.”

<sup>25</sup> Aminge setiri, Iesu sisira, “Ambarida ghe erari da fakina, a jebuga da fakina amo, nanda tofori. Mave na tumondarira amo, nu jebuga tuve barira. Mave na tumonduse enda eminda ambarira amo, nu sekago ambarida ghe jebugedo erarira.

<sup>26</sup> Mave na tumondarira amo, nu jebuga evovodae irari ava tuve barira. Amo tumonderesa, ai?”

<sup>27</sup> Aminge setiri, Martha sisira, “Ai, Bajari, na tumonderena. Ni God da Mandiri. A God Genembo eni mutari endada vose furariá seraera amo, nimori, ava na tumonderena,” aminge sisira.

<sup>28</sup> Setero dadabetiri ainda amboda, Martha jovereghe ira buvudo aghi etiri, nunda gagarako Mary fira buviri, ufena numokena sisira, “Ijuga kato ojighira; ni numokena yaso dae resira,”

<sup>29</sup> Aminge setiri ningido, Mary nu eredo sumbudo ira,

<sup>30</sup> Iesu reighi jokáda jo terae iriri, nu tafusira. Martha Iesu vasa reda tafusira daba aminda, Mary ira nu tafusira.

<sup>31</sup> Kotugo, Mary nu eredo kambo dodo sufiri gido, Jusi embo mendeni sonembedo sorara ari dae sedo fusera aimi, eredo nunda amboda iseri. Nu ya ofofo gomo gosuse, sorara ari dae ariá kotiseri.

<sup>32</sup> Mary Iesu kena ira buvudo, nunda ata duruda du fasedo sisira, “Bajari, ni eminda iraetesa amo, nanda mandako jo ambae aeti.”

<sup>33</sup> Aminge sedo, tuturo edo sorara usira. A Jusi embo mendeni Mary da amboda fusera, nembarago sorara

useri. Amingero gido, Iesu nu dubo mema teria beká ava usira.

<sup>34</sup> Edo ategi usira, “Lazarus mo, reda furugusevu?” aminge setiri, ne siseri, “Bajari, fu gase!”

<sup>35</sup> Aminge setero, Iesu nu tuturo edo sorara usira.

<sup>36</sup> Amingiri gido, Jusi embo tofo tofo se nininguseri, “Lazarus ava dubo bu gogoghombusira, ava eregosera,” aminge se nininguseri.

<sup>37</sup> Avata mendeni ne siseri, “Nu setiri genembo diti digoide amo jebugusira. Ava sedo, nu eminda iratira amo, nu sonembururari Lazarus jo ambae aeti.”

<sup>38</sup> Iesu sekago dubo mema teria beká ava etiri, ofofoda isira. Ofogo resena emo, bekuri. Ghamana teriai gagojuseri.

<sup>39</sup> Aminda buvudo, Iesu kovionoghae sisira, “Ghamana mimevu esike yare!” setiri, ambari embo ainda aki Martha, nu eminge sisira, “Bajari, namane Lazarus furugetero, oroko sifo avononde naká dadabetira. A gido, nu masa erira.”

<sup>40</sup> Aminge setiri, Iesu numokena sisira, “Na seteni: ni tumondaresa amo, ni God da duro a fakina garesa.”

<sup>41</sup> Aminge setiri, ghamana mime-tero esike isira. Etiri, Iesu nu dombu fainghedo sisira, “Afa, nanda benunu ningiraesa, andae na aiyakoe resena.

<sup>42</sup> Ni nanda geka sifo ghousa evia ningiraesa, ava na kasama erena. Avata evetu genembo eminda totorugetera, ne kau daba ava kasama aoro dae sise resena. Ni na dirigiteso fusena, ava kasama aoro dae sise, andae benunu resena.”

<sup>43</sup> Aminge sedo, sekago beka mindafu kori sisira, “Lazarus, fu buvase!”

<sup>44</sup> Setiri, Lazarus ambarida ghe jebuge ere fira buvurutusira. Nunda ungo ata, embo yokurai doghuseri. A dombu barago, emboi gagojuseri. Andae sedo, Iesu sisira, “Yasivu, nunda yokura tamonda o vujovo de-inghare!” sisira.

*11:45-57 Iesu Daoro Ambare Dae Sedo, Manaka Garuseri.*

<sup>45</sup> Iesu setiri Lazarus nu ambarida ghe jebuge erorusira. Ava gido, Jusi embo Mary sonembedo, sorara ari dae sedo fusera amo, digarigo ne Iesu tumonduseri.

<sup>46</sup> Avata nenda mendeni jovereghe era, Moses da Geka kaifa kaka-tokena+ buvudo, Iesu rea etiri sirorusira ava, osa setero ne nininguseri.

<sup>47</sup> Binoá ningido, Moses da Geka kaifa kakato+, a fristi+ da kokotofu kaniseremanede dabade, totorugedo geka se nininguse siseri, “Iesu tano a ari mendeni mendeni eari gido, natofo dudukugheraera, andae namonde nangareri?”

<sup>48</sup> Eveva mo: namonde nu bu-regaeteri. Ainda beká mo: nu aminguse irarira amo, evetu genembo tomanako isambu numoá tumonduse, nunda amboda amboda iruroro gido, Rome embo ne janje ekoko edo, God da Kambo+ de bejedo, namondeda natofo soesa daoro sirivo arera,” aminge nesuka se nininguseri.

<sup>49</sup> Se niningero, genembo eni javo Caiaphas, aminda irei. Sifo aminda, ghaeko ainda jokáda, fristi+ da giti jighari, nune edo ghusira. Aimi eredo sisira, “Ne bunise reseva.

<sup>50</sup> Namonde Jusi embo isambu dabade ambarera amo, eko bekári. Ava sedo, namonde genembo dabako daoro ambari, natofo tomanako isambu jebuga irarera amo, evevari. (Emo, na genembo Iesu dae resena.)” Caiaphas nu aminge sisira.

<sup>51</sup> Avata nu jo nunda kotariimi saeri. Nu ghaeko aminda, fristi+ da giti jijighuse iriri gido, God setiri, nu kau feroveta da kaugo edo, geka aminge siri nininguseri. Iesu nange Jusi embo isambu andae ambarira, ava osa setiri nininguseri.

<sup>52</sup> Kotugo, nu jo Jusi embo nesuka nendae sedo, ambae arira. Numo, evetu genembo mendeni God tumonduse nunda sasingu edo irar-



era ava, bu tatari dabako aoro dae sedo, nu ambarira. Ava ari siro-rare dae sise, God setiri Caiaphas Iesu da ambari aindae, osa setiri ne nininguseri.

<sup>53</sup> Sifo aminda, Jusi embo da babojegari ne tuturo edo, Iesu daoro ambare dae sedo manaka garudo fuseri.

<sup>54</sup> Aindae sedo, Iesu Fovensia Judia aminda, jo isaghada ya foa ghae edo ghusira, nu ufena ya foa ghedo ghusira. Nu ira vasa tomanako evetu genembo a uvu irae da vasa aindae tinguda, reighi javo Efrema aminda, nu namonde dabade iriari.

<sup>55</sup> Jusi embo da kirumo eni, Jarige Yari da Kirumo+ seraera, aindae sifo fira utuako usira. A gido, evetu genembo digari, nenda dubo joká ava, esimbugari dae sedo, nenda reighi reighi aminda ghedo Jerusalem iseri.

<sup>56</sup> Natofo era, God da Kambo+ aminda totoruguse, Iesu tava use, tofo tofo se nininguseri, “Avoise, sevu ningore! Genembo amo jo furae arira, ai?” siseri.

<sup>57</sup> Aminge sisera da beká mo eviri: Iesu sandi koto ari dae sedo, Moses da Geka kaifa kakato+, a fristi+ da kokotofu eminge sedo ghuseri, “Iesu reda irira ava, genembo mave kasama arira aimi, foa sari ningore!” aminge sedo ghuseri.

## 12

*12:1-8 Mary Nu Usu Da Muka Ava Budo, Iesu Da Tamonda Averegusira. (Matthew 26:6-13; Mark 14:3-9)*

<sup>1</sup> Jarige Yari da Kirumo+ jo foa buvae iriri, sifo 6 ava fefetusira. Sifo aminda, Iesu eredo, Lazarus da reighi javo Bethany, aminda isira. Lazarus resena emo, Iesu setiri ambarida ghe jebuge erorusira, aindae resena.

<sup>2</sup> Iesu ira buviri, nundae gumema useri. Lazarus nu Iesu ghae dabade anumbirero, Martha nu bayau iti futusira.

<sup>3</sup> Amingero, Mary nu tamo davari da usu, botoro eni irisira ava, bu fusira. Usu resena, einda javo

‘nard’<sup>3</sup> seraera, aindae mino mo, tomanako bekári. Ava Mary budo fira, Iesu kena buvudo, nunda atada averegetiri dadabetiri, nunda beoimi ghajisira. Etiri, aindae munoimi ivegedo ira, kambo bedo iri fufuseri.

<sup>4-5</sup> Etiri fufuse, namanenda eni, Iesu da ambo jimbi, javo Judas, eredo sisira, “Usu amo budo oriro edo, moni+ K3,000 aminga ava budo makasi embokena ghasaetera amo, avori. O orokoé, nange edo soesa averegetiri, na dubo mema ereni!” Judas resena emo, nu Keriot embori. Nune amboda Iesu ava budo, nunda gitofu da ungodae fiftusira.

<sup>6</sup> Kotugo, moni budo makasi embokena ghasari da geke sisira amo, nu jo makasi embo sonembari dae kotise saeri. Nu bagia katori. A nune namanenda moni kaifa use, mendeni bagia edo ghusira.

<sup>7</sup> Judas aminge setiri ningido, Iesu sisira, “Dovu! Usu mendeni fetetira ava, evetu aikena iriri, amboda namo furugari dae sedo, bu davore!”

<sup>8</sup> Makasi embo ne sifo ghousa, nemonde dabade irá gheraeva. Ava sedo, nemo sonembari sareva amo, sonembuse irá ghareva. O namo, jo namonde sifo ghousa irae arera,” aminge sisira.

*12:9-11 Jusi Embo Da Babojegari Ne, Lazarus Daoro Ambare Dae Kotiseri.*

<sup>9</sup> Iesu nu reighi Bethany aminda iriri ava ningido, Jusi embo digari totorugedo Iesu tambari dae sedo iseri. Kotugo, jo Iesu vanembo gari dae sedo yaeri. Ne, Lazarus ambarida ghe jebuge erorusira, ainghae dabade gari dae sedo iseri.

<sup>10</sup> Ágido, fristi+ da kokotofu, Lazarus barago daoro ambare dae kotiseri.

<sup>11</sup> Aindae beká mo: nu ambarida ghe jebuge erorusira aindae, Jusi embo da natofo mokogo mo, nenda babojegari ighagha use, ne Iesu ava tumonduseri.

<sup>3</sup> 12:3: Afige, Mark 14:3 aindae duruda tege garesa.

*12:12-19 Evetu Genembo Nati Joká Dorero, Iesu Ira Jerusalem Teterusira. (Matthew 21:1-11; Mark 11:1-11; Luke 19:28-40)*

<sup>12</sup> Sifo atetiri, evetu genembo Jarige Yari da Kirumo+ dae torugusera amo, Iesu Jerusalem furari dae iri, ainda bino ava sero nininguseri.

<sup>13</sup> Sero ningido, igi kau usu da ugiro avavagava gafe budo, Iesu tambari dae iseri. Aminda ise, nati joká dorudo iseri. Aminguse, beka teria sise siseri, “Orokaiva, orokaiva! Bajari dae sakai saore! Genembo emo Bajari da javoda refira andae, sakai saore! Namonde Israel embo da kini (king) emo, God nu esimbugare! Orokaiva, orokaiva!” aminge sido iseri.

<sup>14</sup> Iesu nu sino fuka javo donki (donkey) seraera ava tambudo, ainda gukada viti anumbetiri iseri. God da Geka rea resira, ava udo isira. Amo eviri:

<sup>15</sup> “Enda jiro fumbari Saion+ embo, erá oju eove! Nenda kini (king), donki (donkey)

seka ainda etoda anumbetiri, budo refira amo, oviri,”

God da Geka aminge resira.

<sup>16</sup> Sifo aminda, namane God da Geka amo kotae useri. Avata Iesu nu utuda vitira, nunda usasa sekago rurusira ainda amboda, namane God da Geka amo kotiseri. Iesu amingarira andae, ferovetaimi rea gefusera ava, namane kotiseri. A kotugo, namane nange nundae nati joká dorero, geka ferovetaimi gembero irira ava, beká usira, ábarago namane kotiseri.

<sup>17</sup> Natofoto tomanako Iesu unumbe budo era Jerusalem teterusera, ainda beká mo eviri: evetu genembo mendeni totorugedo irero, Iesu setiri Lazarus ambarida ghe jebuge eretiri ava gosuseri. Evetu genembo aimi, sifo aminda Iesu da bino ava osa siseri.

<sup>18</sup> Iesu tano mindafu eni ava, Lazarus kena ari sirorari natofogaoro dae sedo, etiri jebugusira. Ainda bino sisera andae sedo,

evetu genembo digari totorugedo, Jerusalem ghedo buvudo, Iesu tambari dae sedo fuseri.

<sup>19</sup> Natofoto amingero gido, Moses da Geka kaifa kakato+ tofo tofo se nininguseri, “Namonde rojeteri! Evetu genembo isasambu, nunda amboda semberi,” aminge siseri.

*12:20-36 Iesu Tofo Nunda Ambari Da Bino Ava, Osa Sisira.*

<sup>20</sup> Kirumo da sifo aminda, evetu genembo Jerusalem aminda, tumonde bainghari dae sedo totorugusera ainda jokáda, Greek embo mendeni fuseri.

<sup>21</sup> Ne geka sari dae sedo, namanda eni javo Philip kena fuseri. (Philip resena emo, nu Frovensi Galilee embori. Nunda reighi javo Betsaida ri.) Numokena fera buvudo siseri, “Kotofuko, namane Iesu gari dae uju erera.”

<sup>22</sup> Aminge setero ningido, Philip nu eredo, Andrew kena ira binoá setiri Andrew ningido, nengae Iesu kena iseri.

<sup>23</sup> Era buvu setero ningido, Iesu sisira, “Sifo ojira buvira! Oroko God usasa tomanako, Evetu Genembo da Korokena+ mutari barira.

<sup>24</sup> Na nemokena geka beká resena: farava vuji dabako esike irarira amo, nu taká dabako irarira. O, bu ya govarera amo, nunda gari a nunda kau amo dadabarira. Dadabarira avata, nunda fakinaimi, batuno edo vitido beká digarigo jigharira.

<sup>25</sup> Kau daba aminga ava, mave enda eminda nunda uju ava use, nunda jebuga andae kotise irarira amo, nu ambarira. O mave enda eminda nunda jebuga jo kotae edo, God da uju ava use irarira amo, nu jebuga evovodae irari ava tuve barira.

<sup>26</sup> Na reda irarena amo, nanda saramana kakato vasa daba aminda irarera. Ava sedo, mave na sonembari sarira amo, nu nanda amboda amboda arira. A kotugo mave, na sonembarira amo, God Afa nu, genembo ainda javo jighari erarira.”

27 “Oroko na dubo mema eretafena. Aindae na rejoá sareni? Saono, Afa sonembari na memaé darigaeteni, ai? Tefo, na jo aminge sae arena. Ainda beká mo: na memaé itatamari dae sedo fuseni.

28 Arie, Afa! Tofo ninda uju ava use, ninda javo jighaso erare!” aminge setiri, beka utuda ghe sisira, “Nanda javo jigheno eretira, kotugo, sekago jighono erarira.”

29 Aminge setiri dadabetiri, mendeni ne sembae kotise siseri, “Barara fugetira.” siseri. A mendeni mo, ne siseri, “Amo, aneya numokena siri ningeri.”

30 Aminge sero ningido, Iesu nemokena sisira, “Beka rea setira amo, jo nane ningono dae saeri. Amo nene ningi kotovo dae setira.

31 Evetu genembo da ari ekoko ijujari da sifo ojira buvira. Oroko, Satan nu enda da bajari edo irira. Avata na nunda fakina ava daono bejarira.

32 Na arafa de jighoro erarena amo, na evetu genembo isambu baono namokena furarera.”

33 Aminge sise, nu kau nange ambarira, ava sisira.

34 Setiri, natofo numokena siseri, “Namondeda Agho Dari ijugerira amo, God Genembo eni dirigari furare dae sisira amo, nu evovodaé irarira. Avori, Evetu Genembo da Koro+ arafa darera resesa amo, ni mavedae resesi? Nu mavejori?”

35 Aminge setero, Iesu mino nemokena sisira, “Usasa sifo tufako nemokena irarira. Usasa janimbuse irarira amo, ainda jokáda deinghevu! Erama doyeóvo tumba nemokena fureure! Ainda beká mo: mave nu tumba jokáda deingharira amo, nu emboro kosasagarira.

36 Ava sedo, usasa jo darigae irari, ne sifo tufako aminda usasa amo tumondevu! Amingareva, ne usasa ainda natofo areva,” Iesu aminge sisira.

*12:37-50 Iesu Da Bino Ava, Evetu Genembo Mendeni Jo Tumondae Arera.*

Iesu aminge setiri dadabetiri, nu eredo ira jungutusira, erá natofo numoá tambeore dae sedo.

37 Nu tano a ari teria nenda dombuda eari gido ghusera avata, ne nu jo tumondae useri.

38 Amingero, God da feroveta Isaiah rea sisira ava, beká sirorusira. Amo eviri:

“Bajari, ninda fakina tomanako ava, ijugeteso ne gosuseri.

A ninda bino, namane setero ne nininguseri. Avata, nama-nenda geka ne jo tumondae useri,”

Isaiah aminge gefusira.

39 Aindae sedo, ne tumondarikena jo inono ae useri. Ainda susu barago, Isaiah God da Geka ainda jokáda gefusira amo, eviri:

40 “Erama ditiimi geore dae sise, a jiro munjuimi koteore dae sise, God setiri ne diti digoi usira a kotari dadabusira.

God eminge resira: ‘Erama ditiimi gosuse, dubo joveregheóro seóno jebugeore dae sise, aminguseri,’ aminge resira.”

41 Isaiah aminge sisira da beká mo: Iesu nu jo endada vose furae iriri, Isaiah nu gosusira. Nu, Iesu duro a usasa, utu aminda ireira ava gido, aindae gefusira.

42-43 Avata sifo aminda, Jusi embo da babojegari mendeni, ne Iesu tumonduse iriari. Avata kotugo, ne evetu genembo da kotari aindae, oju edo ghuseri. O God da kotari aindae, ne itako oju edo ghuseri. Aminguse, ne Iesu tumondusera ava, kivo edo ghuseri. Ne Moses da Geka kaifa kakatodaé+ oju use, kivo edo ghuseri. Ainda beká mo: Moses da Geka kaifa kakato+ eminge sedo ghuseri, “Mave Iesu tumondarira amo, namonde nu imboe use buregaoro, nu jo foa dengoro indari da kamboda+ terae arira,” ne aminge sedo ghuseri.

44 Ainda amboda, Iesu beka mindafu sisira, “Mave na tumondarira amo, nu jo nasuka namoá tumondae arira. Nu, God Afa na

dirigetiri fusena, ábarago tumondarira.

<sup>45</sup> Kau daba aminga ava, mave nanda dombu garira amo, God na dirigetiri fusena, ainda dombu barago garira.

<sup>46</sup> Na kau usasa aminga edo endada vose fusena ainda beká mo eviri: mave na tumondarira amo, nu jo tumbada irae arira.

<sup>47</sup> “Mave nanda geka ningido, ava jo ae arira amo, nunda ari ekoko ava God amboda ijujarira. Jo nane, nunda ari ekokoá ijujae arena. Na evetu genembo sonembaono, jebugaoro dae sedo fuseni. Jo nenda ari ekoko ijujari dae sedo furaeri.

<sup>48</sup> Avata mave na ighagha use, nanda geka jo tumondae arira amo, nunda ijujari kato irira. Sifo gombuda, na geka rea sedo ghusena aimi, genembo ainda ari ekoko ijujarira.

<sup>49</sup> Ainda beká mo: na rejo eni nanda javoda jo saeri. Na rejo saetena amo, God Afa na dirigetiri fusena aimi ijugetiri kasama useni. Na nunda geka avanembo seraena.

<sup>50</sup> Kotugo na kasama erena: nunda geka saono dae sisira amo, jebuga evovodae irari da susuri. Ava sedo, na rea seraena amo, Afa aminge saono dae sisira ava seraena.

## 13

*13:1-20 Iesu Nu Sabua+ Da Sara-mana Ava Use, Nunda Ambo Jimbi Da Ata Seghusira.*

<sup>1</sup> Jarige Yari da Kirumo+ jo foa buvae iriri, sifo dabako dombuda fefetusira. Fetetiri, Iesu nu kasama usira amo, nunda sifo fira buvurusira. Sifo resena emo, nu endada ghe jovereghe Numamokena yarira da sifori. Kotugo, evetu genembo mave enda eminda irise, nunda natofu usera ava, nu evovodae dubo budo ghusira. Ne jo doyae irise, nu ne dubo ruruse ambududurusira. Ainda geka ava oroko sari dae erena.

<sup>2</sup> Sifo aminda ungobu iri, Iesu namonde dabade bayau mindari dae sedo anumbuseri. Anumbusera

amo, Satan nu anakora nunda kotari eko ava, Keriot embo Simon da mandi javo Judas, aikena fitiri vovosusira. Kotari eko amo eviri: Iesu ava, nune aito are dae Satan sisira.

<sup>3</sup> Avori, God Afa roera a fakina isambu Iesu da ungodá fifitusira ava, Iesu kasama usira. A nu God kena ghe fusira, kotugo sekago God kena jovereghe yarira amo, nu kasama usira.

<sup>4</sup> Ava kasama use, Iesu nu namonde anumbiriserá ava eredo, nunda embo koburu ava kosughe fitiri fasetiri, tamo ghajari bu ifuda avido,

<sup>5</sup> uvu rooróda averegedo, tuturo edo namanenda ata seghuse, tamo ghajari aimi ghajido ira birurughusira.

<sup>6</sup> Nu seghudo fira, Simon (Peter) kena buvurutiri gido, Peter numokena sisira, “Bajari, nine nanda ata seghari dae eresa, ai?”

<sup>7</sup> Aminge setiri, Iesu numokena sisira, “Na rea erena ava, ni oroko erebunesa. Avata ainda beká mo, amboda kasama aresa,” aminge setiri,

<sup>8</sup> Peter sekago sisira, “Tefo, jo itako doyono nanda ata seghae aresa!” aminge sisira. Setiri, Iesu mino sisira, “Na ninda ata jo seghae arena amo, ni jo nanda ambo jimbi irae aresa.”

<sup>9</sup> Aminge setiri ningido, Peter sisira, “Arie, Bajari! Aminge saresa amota, erá nanda ata vanembo segheose! Nanda ungo gifua isambu seghe!”

<sup>10</sup> Aminge setiri, Iesu sisira, “Mave nu uvu anakora gutetira amo, nunda tamo evevari. Ava sedo, nu jo sekago tamo isambu gutae arira. Nu ata vanembo segharira amo, inono beká ava arira. Mendeni ne avori, avata nenda genembo dabako jo avori iraeri.”

<sup>11</sup> Iesu aminge sisira da beká mo: mave nu aito arira, ava nu kasama usira. Aindae, geka eminge sisira, “Mendeni ne avori, avata nenda genembo dabako jo avori iraeri.”

<sup>12</sup> Namanenda ata seghetiri dad-abetiri, Iesu nunda embo koburuá sekago asugedo jovereghe ira, vasa daba aminda anumbusira. Anumbedo ategi usira, “Na rea etena amo, ne kasama ereva, ai?”

<sup>13</sup> Ne javono namoá gatise, ‘Bajari’ o ‘Ijuga Kato’ seraeva. A nu beká seraeva.

<sup>14</sup> Na nenda Bajari a, nenda Ijuga Katori. Avata kotugo, nane nenda ata segheteni. Ava sedo, ne tofo tofo sabua+ edo, kokomana da ata seghedo ghaetevu.

<sup>15</sup> Na amingetena ainda beká mo: na ijugaboro aono gido, etena avavaga aovo dae sedo, eteni.

<sup>16</sup> Na nemokena geka beká resena. ‘Sabua’+ seraera, a ‘babojegari’ seraera ainda tuka mo: sabua+ mo, ne gegenembo veveyakori, a babojegari, ne gegenembo babairi. Kau daba aminga ava, genembo mave aghi muturaira amo, nu teriari. O genembo aghi eraira amo, nu kitakori. Ne nanda sabua+ a nanda aghi kakatori. Ava sedo, na sabua+ edo, ne sonembarena amo, nembarago sabua+ edo, tofo tofo sonembuse irareva.

<sup>17</sup> Avori, geka oroko setena ainda beká mo, ne kasama ereva. Eminguse irareva amo, ne ivuga use irareva.

<sup>18</sup> “Na eminge resena emo, jo ne isambudae saeri. Evetu genembo nane gategusena amo, na kasama erena. Avata oroko rea sirorari dae erira emo, God da Geka irira ava, beká isagha are dae sedo sirorarira. Geka amo eviri:

‘Genembo eni, namonde dabade bayau rise anumbirisera, aimi eredo na imboe usira,’  
God da Geka aminge sisira.

<sup>19</sup> Geka ainda beká jo sirorae irira. Avata, giti nemokena resena ainda susu mo: beká amboda sirorari gido, ‘na Numori’ ava tumondareva.

<sup>20</sup> Na nemokena geka beká resena. Genembo eni dirigaono furarira ava,

mave nati joká doruse, bu tavo arira amo, nu inono, namoá nati joká doruse, bu tavo arira. Kotugo, mave nandae nati joká doruse, bu tavo arira amo, nu inono, God Afa namo dirigetiri fusena ava, nati joká doruse, bu tavo arira,” Iesu aminge sisira.

*13:21-30 Judas Nange Iesu Aito Arira Ava, Iesu Tofo Isagha Sisira.*

*(Matthew 26:20-25; Mark 14:17-21; Luke 22:21-23)*

<sup>21</sup> Ainda amboda, Iesu nu dubo mema mindafugo tafuse, eminge isagha sisira, “Na nemokena geka beká sari dae erena. Namonde anumbirera ainda jokáda, genembo eniimi, namoá gitofukena aito arira.”

<sup>22</sup> Aminge setiri, nu mavedae sisira ava, namane bunise tofo tofo gosuseri.

<sup>23</sup> Iesu nu namanenda eni dubo budo ghusira.<sup>23</sup> Genemboá nu Iesu da dengesida anumbusira.

<sup>24</sup> Ágido, Simon Peter nu ungoi farighedo, genembo aikena sisira, “Ategi e ningi! Nu mavedae resi?”

<sup>25</sup> Aminge setiri, genemboá gisigisighedo ira, Iesu utua edo ategi usira, “Emo, mavedae resesi?”

<sup>26</sup> Aminge setiri, Iesu sisira, “Na mavekena farava evia sukada fati mutarena amo, genemboá numori,” aminge sedo, nu farava ava budo sukada fatido, Keriot embo Simon da mandi javo Judas kena futusira.

<sup>27</sup> Mutiri biri, Satan fira, Judas da janje jokáda teterusira. Etiri, Iesu Judas kena sisira, “Ni rea ari dae erekotesa ava, totoi e!”

<sup>28</sup> Iesu aminge sisira da beká ava, namane mave aminda irisera amo, jo kasama aeri.

<sup>29</sup> Judas nu namanenda moni fendi bu deinghari da javo ava, nune kaifa edo ghusira. Ava sedo, namanenda mendeni kotisera amo: Judas nu namanenda moni budo, kirumo da bayau mendeni ofuse, o mendeni

<sup>23</sup> **13:23:** John nu geka “...namanenda eni dubo budo ghusira...” ava gefusira amo, Baiboro (Bible) kasama kakato mokogo mo erekotera, John nu tofo mandi ijuguse, geka evia gefusira.

makasi embokena ghasare dae, Iesu sariá kotiseri.

<sup>30</sup> Judas nu farava bu eredo, kamboda ghe bibitai ira buvurutusira. Buvurutusira amo, tumba jisira.

*13:31-35 Iesu Da Agho Dari Seka Mo, Eviri.*

<sup>31</sup> Judas ira buvurutusira ainda amboda, Iesu sisira, “Evetu Genembo da Koro+ da duro, oroko isagha etira. A nu oroko rea ururari aimi, God da duro barago isagha arira.

<sup>32</sup> Na amingururono, natofo God da duro garera amo, God barago tofo ururari nanda duro isagha ari, evetu genembo garera. Orokoá erirere!

<sup>33</sup> Nanda sasingu, namo, jo namonde dabade sifo ghousa irae arera. Na giti rea Jusi embo da babojegarikena sisena ava, kau daba ava oroko nemokena resena, ‘Na reda yarena aminda, jo nene yari da kaugo mo iraeri.’

<sup>34</sup> Avori, na nemokena agho dari seka erefutena. Ne tofo tofo dubo buvu! Na ne dubo buraena, kau daba aminga ava, ne tofo tofo dubo bareva!

<sup>35</sup> Ne aminge dubo ruruse irareva amo, evetu genembo isambu kasama arera, ne nanda ambo jimbiri,” aminge sisira.

*13:36-38 Peter Iesu Ighagha Arira Ava, Iesu Nu Giti Osa Sisira.*

*(Matthew 26:31-35; Mark 14:27-31; Luke 22:31-34)*

<sup>36</sup> Iesu aminge setiri, Simon Peter nu sisira, “Bajari, ni reda yari dae use resesi?” Setiri, Iesu numokena sisira, “Na reda yari dae erena aminda, ni jo oroko nembo nanda amboda yae aresa. Avata, sifo amboda, ni nanda amboda yaresa.”

<sup>37</sup> Aminge setiri, Peter ategi usira, “Bajari, oroko nangetirai, na ninda amboda jo yae aono dae resesi? Na nimo sonembuse ambarena!”

<sup>38</sup> Aminge setiri, Iesu sisira, “Amo jo geka beká iraeri. Ni jo namo sonembuse ambae aresa. Na geka

beká resena: kokora sifo jo kari-gae irari, ni na umbu etodaba naká ighagha aresa,” Iesu aminge sisira.

## 14

*14:1-15 Emboro God Afakena Amo, Iesu Numori.*

<sup>1</sup> Aminge sise, Iesu sisira, “Erá dubo mema eove, a erá dubo vevera eove dae resena! God Afa tumondevu! A nambarago tumondevu!

<sup>2</sup> Nanda Afa da kamboda mo, vasa digariri. Na oroko yama, nendae sedo vasa esimbugarena. Emo geka bekári. Geka jo beká irae aetira amo, na jo aminge sae aeteni.

<sup>3</sup> Na oroko yama nenda vasa esimbugedo, namonde dabade irari dae sedo, jovereghe foa ne unumbe budo, nanda vasada yarena.

<sup>4</sup> Kotugo na reda yarena ainda emboro, ne kasama ereva.”

<sup>5</sup> Aminge setiri, namanenda eni javo Thomas, nu eredo ategi usira, “Bajari, ni reda yari resesa ava, namane erebunera. Ava sedo, ainda emboro namane nange kasama areri?”

<sup>6</sup> Aminge setiri, Iesu mino numokena sisira, “Embora Afakena amo, namori. Geka beká da susu, amo namori. A jebuga da susu barago, namori. Embora Afakena setena amo, dabako tainako, namori, eni tefori. Na mavejoá unumbe bu yarena amo, ya God Afa kena buvarira. O mavejoá na jo unumbe bu yae arena amo, God Afakena jo ya buvae arira.

<sup>7</sup> Ne na kasama use irareva amo, Afa barago kasama use irareva. Kotugo, ne na kasama ereva a, erego-seva. Ava sedo, oroko ei tano ghedo ise, ‘Namonde God Afa gi kasama usera,’ ava sido yareva,” aminge sisira.

<sup>8</sup> Setiri, Philip sisira, “Bajari, God Afa ijugaso gido, tumonde gogogho arera.”

<sup>9</sup> Aminge setiri, Iesu sisira, “Philip, namonde dabade sifo ghousa evia deingheraera. Ni na kasama eresa. Mave nu na giraira amo, nu God Afa

barago giraira. Ava sedo, erá, ‘God Afa ijugaso gaone!’ ava seose!

<sup>10</sup> Philip, na God Afaghae tatedo nangae dabade irera ava, ni tumondaetesi,” Aminge sedo, namane isambukena eminge sisira, “Na geka nemokena sedo ghusena amo, jo tofo nanda geka iraeri. Amo Afa da gekari. Ainda beká mo: Afa nangae dabade tatedo irera amo, tofo nunda saramana ava use irira.

<sup>11</sup> Namane Afaghae dabade tatedo irera ava, ne tefo tumondaetevu. O jo tefo tumondae areva amo, nane tano eono giraeva, aindae sedo, tumondaetevu!

<sup>12</sup> Nemokena geka beká resena. Na tano eono giraeva ava, evetu genembo mave na tumondarera amo, ne kau daba ava tano use irarera. Kotugo, na oroko Afakena yarena. Ava sedo, tano nane eono giraeva amo, kitakori. O evetu genembo na tumonduse, tano rea use irarera amo, teriagio bekári.

<sup>13</sup> Ne nanda javoda rejodae benunu sareva amo, na amingarena. God da Mandi nunda javo jighovo erari, natofo God Afa da duro gaoro dae sedo, na amingarena.

<sup>14</sup> Ne nanda javoda rejodae benunu sareva amo, na amingarena.

<sup>15</sup> Kotugo, na dubo bareva amo, ne nanda agho dari kaifa use irareva,” Iesu aminge sisira.

#### *14:16-31 Iesu Nu Asisi Kakara Mutari Dae Sisira.*

<sup>16</sup> Aminge sise, Iesu sisira, “Na Afakena benunu saono Sonemba Kato eni mutari foa, nemonde dabade evovodae irareva.

<sup>17</sup> Sonemba Kato resena emo, nu geka beká a ari beká da Asisi, aindae resena. Evetu genembo mave fisi da uju use irera amo, ne jo nu gido kasama ari da kaugo iraeri. Ava sedo, ne nu jo bae arera. Avata nene, nu kasama eraeva. Ainda beká mo: nu oroko nemonde dabade ireva, a kotugo, amboda nenda dubo jokáda irarira.

<sup>18</sup> “Na jo dodo yaono ne babate ae areva. Na sekago jovereghe nemo-kena furarena.

<sup>19</sup> Sifo tufako ainda amboda, evetu genembo mave fisi da uju use irera amo, ne nanda dombu jo gae arera. Avata nene, na itatamuse irareva. Na jebuga irá gheraena ava sedo, nembarago jebuga tuve bareva.

<sup>20</sup> Aminguse, sifo aminda ne kasama areva, ‘Na Afaghae dabade tatedo dabako edo irena. A kau na nenda janje jokáda irarena, kau daba aminga ava, ne nanda janje jokáda irareva,’ ava kasama areva.

<sup>21</sup> “Mave nanda agho dari ningido, kaifa eraira amo, nu na dubo buraira. A na numoá dubo budo, numokena isagha aono nu na garira. Kotugo, nanda Afa barago numoá dubo barira.”

<sup>22</sup> Aminge setiri, Keriot embo Judas ainda nunombo mo, nu eredo ategi usira, “Bajari, ni nangetiraimi, isagha aso namane kikiako gareri, mendeni mo ni jo gae areri?”

<sup>23</sup> Aminge setiri, Iesu sisira, “Mave na dubo barira amo, genemboá nu nanda geka ningido kaifa arira. Amingari, God Afa nu genemboá dubo barira. A namane Afaghae genembo aikena yama, namonde dabade irarera.

<sup>24</sup> O mave, na jo dubo bae arira amo, nu nanda geka jo bu kaifa ae arira. Geka seono ningido ghuseva amo, jo nasuka nanda geka iraeri. God Afa na dirigetiri fusena, namane nangaeda gekari.

<sup>25</sup> “Ne namonde dabade irise, na geka evia seteno niningereva.

<sup>26</sup> Avata amboda, nenda Sonemba Kato God Afa nanda javoda dirigari furarira aimi, nune roera isambu ijugari gareva. A na rejo ava sedo ghusena amo, nune sekago sirurari nininguse kotareva. Sonemba Kato resena emo, God da Asisi Kakaradae resena.

<sup>27</sup> “Na dubo jama nemokena mutudo, ne dodo yarena. Amo tofo nanda dubo jama ava erefutena. Amo dubo jama bekári. Jo dubo

jama evetu genembo mendeniimi muturaera, ainda kaugo iraeri. Erá dubo mema eove! A erá dubo vevera eove dae resena. Erá oju eove!

<sup>28</sup> Na eminge seno ningevu, 'Na ne dodo yarena, avata na sekago jovereghe nemokena furarena,' aminge seno ningevu. Ne na dubo baeteva amo, ne ivuga aetevu. Ainda beká mo: na God Afakena yarena. Numo teriari. O namo ijoghakori.

<sup>29</sup> Emo jo sirorae irari, geka oroko resena ainda susu mo: amboda, beká sirorari gido, nanda geka evia tumondaovo dae sise resena.

<sup>30</sup> "Avori, na namonde jo geka ghousa beká sae arera. Ainda beká mo: enda da bajari Satan mo, nu furari dae erira. Nunda fakina jo namongo iraeri.

<sup>31</sup> Avata, na God Afa dubo buraena ava, evetu genembo kasama aoro dae sedo, na, God Afa rea aono dae seraira, na jo doya, ava eraena.

"Avori, fuvu namonde yaore!" Iesu aminge sisira.

## 15

### *15:1-17 Namonde Iesu De Dabade Tatedo Irarera.*

<sup>1</sup> Aminge sise, Iesu sisira, "Na kasia eni sari dae erena. Namu, inono vaini (wine) buraera da asi amingori. Ainda susu beká mo, namori. Nanda Afa mo, nu inono, asi da kaifa kato amingori.

<sup>2</sup> Nanda fatu eni, gharasa edo beká jo jighae arira amo, jore fugarira. O, nanda fafatu ningiá beká jigharira amo, fafatu amo sende simbugari, beká digarigo jigharira.

<sup>3</sup> Na geka sedo ghusea aimi, nenda dubo jóká anakora seghe simbugetiri eveva usira.

<sup>4</sup> Ne namonde dabade tatedo irareva amo, nambarago namonde dabade tatedo irarera. Ne erego-seva: fafatu mo, jo nesuka ajagha irise, beká jighae arira. Susughae tatedo irise, beká jijighuse irarira. Nu susu tefo irarira amo, beká jo jighae arira, emboro eni tefori. Kau daba aminga ava, ne namonde

dabade tatedo irareva amo, kau beká jigharira, avavaga ava areva.

<sup>5</sup> "Asi da susu setena amo, namori. Ne inono, nanda fafatu amingori. Mave namokena tatedo, nangae dabade irarira amo, nu beká digarigo jigharira. Ainda beká mo: na ne jo sonembae arena amo, nene rejo eni jo ae areva.

<sup>6</sup> Mave jo namokena tatedo nangae dabade irae arira amo, God Afa nu gafugedo ajagha fugari fasarira. Fafatu gafuge fugeraera aminga ava, ari gharasa ari gido, bu ya avarakada dungarera.

<sup>7</sup> Ne namokena tatedo, nanda geka nenda dubo jókáda kaifa use, rejodae uju ari benunu sareva amo, sirorari bareva.

<sup>8</sup> Ne ari eveva use irareva amo, ne nanda amboda amboda ise amingareva. Kotugo, amingururovo aimi, evetu genembo God Afa da duro a usasa gido kasama arera.

<sup>9</sup> Kau Afa na dubo buraira daba aminga ava, na ne dubo buraena. Ne nanda dubo bari jókáda irivu!

<sup>10</sup> Kau na, nanda Afa da Geka a Agho Dari kaifa use, nunda dubo bari jókáda irena aminga ava, ne nanda geka, a agho dari kaifa use irareva amo, ne nanda dubo bari jókáda irareva.

<sup>11</sup> "Na geka evia setena da beká mo: na uju erena amo, nanda ivuga nenda janje jókáda irari, ivuga e gogoghombuse iratevu.

<sup>12</sup> Nanda agho dari mo eviri: kau nane ne dubo buraena aminga ava, ne tofo tofo dubo ruruse irareva!

<sup>13</sup> A dubo bari da teria mo eviri: genembo mave nunda kokomana dubo bu gogoghombarira amo, nunda jebuga ava, nunda kokomanadae sedo, futuse ambarira.

<sup>14</sup> A nene nanda geka a agho dari kaifa areva amo, ne nanda kokomana areva.

<sup>15</sup> 'Ne nanda saramana kakato,' seraena avata, oroko mo, 'Ne nanda kokomana,' sarena. Ainda beká mo: saramana kato nu, nanda bajari da kotari isambu jo kasama ae eraira. O



Afa rea namokena siri niningusena amo, isambu seteno, ne nininguse kasama usevu. Aindae sedo, 'Ne nanda kokomana,' sarena.

<sup>16</sup> Nene na jo gategae usevu. Nane, ne gateguseni. Ari eveva a ari beká evovodae irari ava aovo dae sedo, nane ne gateguseni. Aindae sedo, nanda javoda rejodae benunu sareva amo, God Afa mutari bareva.

<sup>17</sup> Avori, setena, geka daba ava resena: ne tofo tofo dubo buvu!" Iesu aminge sisira.

*15:18-16:4 Evetu Genembo Mave Fisi Da Ujuá Use Irá Gheraera Amo, Ne Iesu Da Natofo Ava Imboe Eraera.*

<sup>18</sup> Aminge sise, Iesu sisira, "Kotovo dae resena: evetu genembo endada irise fisi da uju ava use irera aimi, giti na imboe edo ghuseri. Ava sedo, evetu genembo resena eimi, ne imboe arera amo, erá buneove!

<sup>19</sup> Ne sekago jovereghe, evetu genembo setena, ainde dabade tatareva amo, evetu genembo ainde dabade tatedo, tofo tofo dubo bareva. Ainda susu mo: ne reighida evetu genembo da mendeni edo iraetevu. Avata, ne nane gategedo seteno, reighi da evetu genemboá dodo, ne esike ireva. Ne jo evetu genembo ainde dabade tatedo iraeri. Aindae sedo, evetu genembo fisi da uju use irera aimi, nemoá imboe eraera.

<sup>20</sup> Na giti rea nemokena sedo ghusena, ava kotovo dae resena. Amo eviri: 'Kotofu mo, nu teriari. Nunda sabua+ mo, kitakori. Evetu genembo kotofuá jo kakara ae arera amo, nunda sabua+ barago jo kakara ae arera,' aminge sedo ghuseri. Ava sedo, namokena fakarago use bouvu muteoro mema itatameraena amo, kau daba aminga ava, nemokena fakarago use bouvu mutoro ne mema itatamareva. O, nanda geka mave ningiraera amo, ne geka rea sareva ábarago ningarera.

<sup>21</sup> Kotugo, ne nanda natofo edo ireva aindae, nemokena rejo ava arera amo, ne nandae sedo arera. Ne amingarera da beká mo: God Afa na

dirigetiri fusena amo, ne jo kasama ae irera.

<sup>22</sup> Na jo foa evetu genembo setena aikena, vironu saono ningae edo ghaetera amo, God jo, 'Ne ari ekoko embo,' ava sae aeti. Avata na fena evetu genembo mavekena vironu sedo ghusena, aikena mo, darige yari da emboro eni tefori.

<sup>23</sup> Mave na imboe eraira amo, nu God Afa barago imboe eraira.

<sup>24</sup> Kotugo, geka eni mo kau daba avori. Na jo foa, ari a tano aono gi dudukughae edo ghaetera amo, God jo, 'Ne ari ekoko embo,' sae aeti. Avata na fena, ari a tano eono gido ghuseri. Avata ne, namane Afaghae dabade, ava imboe use irera.

<sup>25</sup> A ne namane imboe eraera amo, nenda Agho Dari jokáda rea sisira ava, beká are dae sedo eraera. Amo eviri:

'Ne susu tefo na imboe edo ghuseri,' Agho Dari jokáda aminge sisira.

<sup>26</sup> "Avori, Sonemba Kato setena amo, nu ari beká a geka beká da Asisi, aindae seteni. Numoá dirigaono, Afakena ghe vose foa nemokena buvudo, nandae sedo, nune ijugururari nininguse irareva.

<sup>27</sup> Kotugo nembarago, nandae sedo ijugururovo evetu genembo ningido gharera. Ainda beká mo: na giti tuturoda vironu sisena ai tano ava, ne namonde dabade deingheraera."

## 16

<sup>1</sup> "Na geka resena einda beká mo: erama oju edo na ighagha use, nenda tumondari doyeove dae sise seteni.

<sup>2</sup> Jusi embo da dengoro indari kamboda+ erá tereove dae sedo, Jusi emboimi, ne ighagha edo buregarera. A amboda sifo foa buvarira aminda, evetu genembo mave, ne daoro ambareva amo, evetu genembo amo nenda kotari mo, ne God sonembuse ariá kotarera.

<sup>3</sup> Avata ne amingarera da beká mo: ne na jo kasama ae irera, a Afa barago jo kasama ae irera.

<sup>4</sup> Na oroko geka evia nemokena resena da beká mo: sifoá foa buvarira amo, na rea oroko resena evia, sekago kotise kasama areva,” Iesu aminge sisira.

*16:5-15 Asisi Kakara Da Sara-  
mana, Kau Eviri.*

Aminge sise, Iesu sisira, “Geka evia, na jo giti nemokena saono ningae useva da beká mo: ne namonde dabade iriari.

<sup>5</sup> Avata oroko, God na dirigetiri fusena aikena jovereghe yari dae erena. Kotugo na reda yarena aindae, ne eni jo nandae ategi ae ireva.

<sup>6</sup> Avata geka setena aindae, ne dubo mema teria futo use ireva.

<sup>7</sup> Avata na nemokena geka beká resena. Na yarena amo, nenda evevadae sedo yarena. Ainda susu mo: na jo yae arena amo, Sonemba Kato setena, jo nemokena furae arira. O, na ne dodo yarena amo, na numoá dirigaono nanda vasa budo nemokena furarira.

<sup>8</sup> Foama, evetu genembo fisi da uju use irera amo, ne nange roera isambu etodaba naká aında beká kosasaghusera, ava ijugari kasama arera. Roera resena amo eviri: ari eko beká mo rejori, ari eveva mo mave erai, a God da ijugari mo kau mavegori. Roera etodaba naká setena, aında beká amo kosasaghuseri.

<sup>9</sup> Ne ari ekodae bunise irera setena amo, Sonemba Kato foa ijugururari, na jo tumondae use ari eko beká eraera, ava ne kasama arera.

<sup>10</sup> Roera eni kosasaghusera amo, ari eveva mave eraera ava, ne bunise irera. Na jovereghedo yaono, na jo gae irovo Afakena irarena amo, Sonemba Kato setena aimi, foa ijugururari, ‘Na eveva eraena,’ ava kasama arera.

<sup>11</sup> A kotugo, roera eni kosasaghusera amo, God evetu genembo ijugarira ava, ne bunariri. God nu enda da bajari Satan ijujedo, nunda ari ekoko tambudo aında mino ava, mutari dae sedo simbugetiri irira ava, Sonemba Kato aimi foa ijugarira.

Ijugari, God nune evetu genembo barago ijugarira, ava ne kasama arera.

<sup>12</sup> “Na geka mendeni mendeni saetena avata, oroko jo saono nene ningari da kaugo iraeri.

<sup>13</sup> Kotugo, ari beká a geka beká da Asisi setena, aimi foa buvarira amo, nu ari beká a geka beká da emboro isambu ijugururari kasama areva. Nu jo nunda geka ava sae arira. Nu rea ningarira, ava sarira. A kotugo nu amboda rea sirorarira, ava sari ningareva.

<sup>14</sup> Nu nanda geka a ijuga ava ijuguse, nanda duro ava sakai sirurari ningareva.

<sup>15</sup> Afakena rea irira amo, isambu nandari. Na aindae sedo eminge seteni, ‘Asisi Kakara nanda roera a nanda geka budo, nemokena ijugarira,’ ” Iesu aminge sisira.

*16:16-24 Iesu Da Natofo Amboda  
Nu Gido, Ne Ivuga Arera.*

<sup>16</sup> Aminge sise, Iesu sisira, “Sifo tufako eında amboda, ne nanda dombu jo gae areva. Avata kotugo, sifo tufako dadabarira aında amboda, nanda dombu sekago gareva.”

<sup>17</sup> Aminge setiri ningido, namanda mendeni ategi useri, “Aında tuka mo rejori? Nu eminge setira, ‘Sifo tufako eında amboda, ne nanda dombu jo gae areva. Kotugo, sifo tufako dadabarira aında amboda, nanda dombu sekago gareva,’ aminge setira. A eni kotugo eminge setira, ‘Aında beká mo, na nanda Afakena yarena,’ aminge setira.

<sup>18</sup> Avori, ‘sifo tufako’ resira, aında tuka mo rejori? Namonde nunda geka da tuka jo kasama ae erera,” aminge siseri.

<sup>19</sup> Aminge sero itatamedo, namane rejodae numokena ategi ari kotisera ava, Iesu kasama usira. Kasama edo, namanekena sisira, “Na seteni, ‘Sifo tufako eında amboda, ne nanda dombu jo gae areva. Kotugo, sifo tufako dadabarira aında amboda, nanda dombu sekago

gareva,' aminge setena aindae, ne se niningereva ava eregosena.

<sup>20</sup> Na nemokena geka beká resena. Giti mo, ne sorara use dubo mema tafururovo, reighi da evetu genembo ne ivuga use irarera. Ne dubo mema use irareva, avata kotugo, sifo amboda nenda dubo mema jovereghari ivuga areva.

<sup>21</sup> Evetu nunda fumbari da sifo utua ururari dubo mema arira, nu fumbari dae use mema tambarira aindae. Avata, mandi sasingu fumbari sirorari gido, nu jebugedo, nunda mema amo kotae arira. Ainda beká mo: nunda mandi sasingu siroretira ava gido, ivuga arira.

<sup>22</sup> Ne kau daba ava ereva. Oroko ne dubo mema use ireva. Avata amboda, na furono ne na tambudo ivuga beká ava areva. A ainda ivuga mo, jo mave bu darigari da kaugo iraeri.

<sup>23</sup> "Sifo aminda, ne jo namokena rejo enidae benunu sae areva. Na nemokena geka beká resena: ne nanda javoda, Afakena rea benunu sareva amo, nu mutari bareva.

<sup>24</sup> Tuturoda ghedo fira tano oroko eminda, nanda javoda, rejo enidae jo benunu sae ireva. Nene benunu saovo mutari budo, ivuga beká ava aovo dae sise resena," Iesu aminge sisira.

*16:25-33 Enda Da Irari A Nunda Bajari Satan Da Fakina Ava, Iesu Detiri Bejisira.*

<sup>25</sup> Aminge sise, Iesu sisira, "Na geka emo giti kasiaimi, seono ningido ghusevu. Kotugo, sifo eni foa buvarira amo, Afa kau mavega amo, kasiaimi jo sae arena. Na ava isagha saono ne ningareva.

<sup>26</sup> Sifo aminda, ne dambu nanda javoda Afakena benunu sareva. Na jo nemo sonembuse, Afakena benunu sae arena. Ne totofo benunu sareva amo, nu ningarira.

<sup>27</sup> Ainda beká mo: Afa nune, ne dubo buraira. Ne na dubo buraeva, a kotugo na Afakena ghedo fusena, ava ne tumonderaeva; aindae sedo, God Afa ne dubo buraira.

<sup>28</sup> Emo geka bekári: na God Afakena ghedo fena, enda eminda vovosuseni. A kotugo, na oroko enda emo dodo, Afakena jovereghe yari dae erena."

<sup>29</sup> Aminge setiri ningido, namane numokena siseri, "Oroko resesa evia, namane kasama ari da kaugori. Amo, ni kasia dodo geka isagha seso ningido,

<sup>30</sup> ni nisuka roera isasambu kasama eraesa, ava kasama erera. A evetu genembo nenda kotari jo nimokena saoro ningae irise, ne rejo uju eraera ava, ni giti kasama eraesa. Ava sedo, namane tumonderera amo, geka bekári: ni God kena ghedo fusesi."

<sup>31</sup> Namane aminge setero ningido, Iesu mino namanekena kovionoghae sisira, "Orokoá ne na tumondereva, ai? Givu!

<sup>32</sup> Sifo refara buvira oroko emo, ne isasambu oju edo, na dodo nunda nunda sumbudo, nenda nati nati yareva. Sufuse doyovo, na nasuka fetarena. Avata geka bekári: na jo nasuka fetae arena. Namu, Afaghae dabade fetarena.

<sup>33</sup> Ne na tumonduse, dubo jama baovo dae sedo, nanda geka emo seteni. Enda eminda, nanda gitofu nemokena fakarago use, bouvu futururoro, ne mema itatamareva. Avata tumo fainghedo fakina use, ivuga aovo dae sise resena. Evetu genembo fisi da uju use irera, a kotugo nenda bajari, ainda fakina ava, nane anakora deteno bejisira," Iesu aminge sisira.

## 17

*17:1-26 Iesu Nunda Ambo Jimbi, A Kotugo Nunda Natofo Amboda Siro-rarira, Aindae Banungusira.*

<sup>1</sup> Iesu aminge sedo, nu dombu utuda fainghu- sira. Fainghedo sisira, "Afaé! Sifo buvira. Na nange aono, evetu genembo ninda duro gaetera, aindae resena. Ninda duro namokena futururaso, evetu

genembo nanda duro gaore! Amin-gururaso, ninda duro ava isagha ijugaono gido sakai saore!

<sup>2</sup> Nangaeda duro gaoro dae sedo, ni seteso, na evetu genembo isasambu da bajari edo irena. Na ainda bajari rurusena da susu mo: ni evetu genembo namokena futusesa ava, sonembaono jebuga evovodae irari ava baoro dae sedo futusesi.

<sup>3</sup> Jebuga evovodae irari ava bari da emboro mo eviri. Afa, ni God bekári, a ninda Mandi Keriso futusesa amo, namori. Mave namane kasama arira amo, jebuga evovodae irari ava, nune tuve barira.

<sup>4</sup> Ninda saramana ava use, ninda duro ijugeono evetu genembo gido ghuseri. Na aminguse, ninda saramana eteno dadabusira.

<sup>5</sup> Afa, orokoé na ninda dombuda fetirono, nanda duro, a usasa sekago namokena mutaso bari dae resena. Enda jo sirorae iriri, na giti usasa a duroghae iriana ainda duro ava, sekago mutaso bari dae resena.

<sup>6</sup> “Evetu genembo endada irero ni gido, nenda jokáda evetu genembo mendeni ava gategedo namokena futusesi. Muteso budo, ni mavejori, ava nane ijugeteno gido, ne kasama useri. Ne nine gategeteso ninda tofo usera, ava budo nandae futusesi. Ne ninda Geka kaifa eraera.

<sup>7</sup> Kotugo, oroko ne kasama erera, rea isambu nandae futusesa, ainda susu mo nimori.

<sup>8</sup> Ne ava kasama erera da beká mo: geke namokena futusesa ava, nemokena muteno ne ruruseri. Na nimokena ghedo fusena, amo geke beká ava ne kasama erera. A ni na dirigiteso fusena ava, ne tumonderera.

<sup>9</sup> “Na oroko nendae sedo benunu resena. Na evetu genembo mendenidae, jo benunu sae erena. Avata gegenembo nine futusesa eindae, benunu resena. Ne ninda tofo ava sedo, benunu resena.

<sup>10</sup> Ne nanda natofo. A nanda natofo amo, isambu nindari. Kotugo, ninda natofo amo, isambu nandari. A natofo setena aimi, nene nanda

duro ijugaoro gido, nandae sakai sarera.

<sup>11</sup> Avori, na oroko jovereghe nimokena yari dae erena. Na jo enda eminda irae arena. O nemo, doyono enda eminda irarera. Arie, Afa Kakara! Ninda javo namokena futusesa ainda fakinaimi, ne kaifa aso dae resena. Kaifa ururaso, ne dabade tatedo dubo dabako aeteri. Kau ni nangae tatedo dubo dabako edo irera, daba aminga ava, ne dabade tatedo dubo dabako aeteri.

<sup>12</sup> Namane namonde enda eminda dabade irise, ninda javo namokena futusesa ainda fakinaimi, ne kaifa edo ghuseni. Ne, nane kaifa eno, mendeni ne eveva iriari. Avata, ninda Geka jokáda rea resira ava, beká are dae sedo, genembo dabako jebuga evovodae irari ava kosasaghusira. O mendeni, nane kaifa eono ne eveva iriari.

<sup>13</sup> Na oroko nimokena yari dae erena. Kotugo na enda eminda irise, geke evia nimokena banunguse resena da beká mo: ne ningido nanda ivuga itatamuse, nandae ivuga beká ava aoro dae sise resena.

<sup>14</sup> Na ninda geke muteno ne ningido, ruruseri. Budo irero, evetu genembo fisi da uju use irera aimi, tuturo edo nangaeda natofo imboe eraera. Kau na ari ekoko da emboro ava ighagha edo, ajagha fetirá gheraena aminga ava, ne ari ekoko da emboro ava ighagha edo, evetu genembo fisi da uju use irera, ainda jokáda ghe buvudo era, ajagha fetedo irera. Ne ajagha irera andae sedo, evetu genembo fisi da uju ava use irera aimi, nangaeda natofo amo imboe eraera.

<sup>15</sup> Na jo, nine saso endada ghe yaoro dae, benunu sae erena. Avata, erá Ari Eko da Numamo foa nemo dereure dae sise, nine kaifa ururaso eveva iroro dae benunu resena.

<sup>16</sup> Kau na enda da irari ava imboe edo, ajagha feteraena aminga ava, ne evetu genembo da irari ava imboe edo, ainda jokáda ghe buvu fera ajagha fetedo irera.

<sup>17</sup> Ninda geke bekáimi, nenda dubo

joká seghaso, ninda natofo kakara a eveva irore!

<sup>18</sup> Kau nine na dirigiteso, evetu genembo da jokáda vose fusena aminga ava, ne dirigiteno evetu genembo da jokáda iseri.

<sup>19</sup> Ninda geke bekáimi aso, ne ninda natofo kakara a eveva aoro dae sedo, na tofo nanda dubo joká isambuimi nimokena erefutena.

<sup>20</sup> “Na jo nemoá nembo kotise, aindae benunu sae erena. Evetu genembo amboda nenda vironu ningido aindae, namoá tumondarera ava kotise, nendae benunu resena.

<sup>21</sup> Afa, nanda benunu mo eviri: nange ne dubo dabako aeteri! Kau ni nangae tatedo irera aminga ava, ne namonde dabade tataeteri. Nangaeda natofo dubo dabako edo iroro gido, evetu genembo endada irise, fisi da uju use irera amo, ni na dirigiteso fusena ava, ne kasama arera.

<sup>22</sup> Ni nangae dabade tatedo dubo dabako edo irera. Nangaeda natofo kau daba aminga ava use, dubo dabako e gogoghombaoro dae sedo, na nemokena ninda duro a usasa namokena futusesa ava, nemokena muteno ne ruruseri.

<sup>23</sup> Na nenda dubo jokáda irari dae, a kotugo ni nanda dubo jokáda iraso dae sedo, aminguseni. Kotugo, ne dubo dabako aoro dae resena, aindae beká eni mo eviri: na dirigiteso fusena ava, evetu genembo fisi da uju use irera aimi, kasama aeteri. A nangaeda natofo, kau namo dubo buraesa aminga ava, na ne dubo buraena, ava kasama aeteri.

<sup>24</sup> “Afa, ni evetu genembo namokena futusesa aindae resena. Na uju erena amo, na vasa reda irarena, vasa daba aminda, ne namonde dabade iraeteri. Irise, ne nanda duro a usasa ava gosuse iroro dae, uju erena. Duro a usasa amo, ni enda jo ae irise aindae gitida, na dubo ruruse namokena futusesa, ava gosuse iroro dae uju erena.

<sup>25</sup> “Arie, Afa Eveva Ari Kato! Evetu genembo endada irise, fisi da uju use irera amo, ne ni jo kasama ae eraera.

Avata na ni kasama erena. A ni na dirigiteso fusena ava, gegenembo emo ne kasama erera.

<sup>26</sup> Ni na dubo buraesa, aindae dubo bari nemokena irare dae, a na nenda dubo jokáda irari dae sedo, na, ni mavejori, ava ijugeono gido kasama edo ghuseri, a kau daba aminga ava, ijugururono gido kasama edo gharera,” Iesu aminge benunu sisira.

## 18

*18:1-11 Iesu Sanduduseri.  
(Matthew 26:47-56; Mark 14:43-50; Luke 22:47-53)*

<sup>1</sup> Aminge benunu setiri dadabetiri, Iesu namane unumbe budo era, uvu javo Kidron sembiseri. Reighi aminda ika vuji bambari dae sedo, vare govetero irei. Namane aminda buvudo era, vareda teteruseri.

<sup>2</sup> Namanenda genembo eni javo Judas, Iesu aito usira amo, numbarago reighiá kasama usira. Aindae beká mo: Iesu nu namonde dabade, aminda ya totorugedo ghuseri.

<sup>3</sup> Aindae sedo, Judas isoro kakato mendeni budo, vare daba aminda iseri. Fristi+ da kokotofu a Moses da Geka kaifa kakato+ barago, God da Kambo+ kaifa kakato mendeni dirigitero, ne isoro kakatode dabade, Judas nune budo fusira. Ne nanefa, arivo, ambí, a goroba ava budo fera buvurutuseri.

<sup>4</sup> Rea numokena sirorarira ava kasama edo, Iesu dombui isoro embokena ira fetedo ategi usira, “Ne mavejoá kakova erevu?”

<sup>5</sup> Aminge setiri, ne siseri, “Iesu Nasareth embo, ava kakova erera,” setero, nu sisira, “Amo namori,” sisira. Judas aito ari kato amo, gitofude dabade fetirero, Iesu aminge sisira.

<sup>6</sup> “Namori,” siri, amboi era du fafasuseri.

<sup>7</sup> Etero, Iesu sekago ategi usira, “Ne mavejoá kakova erevu?” setiri, ne siseri, “Iesu Nasareth embo ava kakova erera.”

<sup>8</sup> Setero, nu sekago sisira, “Na seteno ningeva, amo namori! Namokakova areva amo, na evirere.

Nanda mendeni eminda irera amo, dovú yaore!” aminge sisira.

<sup>9</sup> (Nu aminge sisira da beká mo: nu giti sisira ava, beká are dae sedo sisira, amo eviri: “Afa, ni gegenembo namokena futusesa amo, kaifa eno eveva irera.”)

<sup>10</sup> Simon Peter kaiya irisira aimi budo, fristi+ da giti jighari da saramana kato ainda dengoro giman-dukena ava, de gafugetiri dudurusira. Saramana kato ainda javo mo, Malchus ri.

<sup>11</sup> Etiri, Iesu Peter kena sisira, “Erá amingeose! Ninda kaiya nunda voruda vendi! Mema da agha Afa namokena erefutira amo, erá na do-yariá koteose! Amo, na mindarena,” sisira.

*18:12-14 Iesu Budo Era, Annas Da Dombuda Fitero Fefetusira.*

<sup>12</sup> Aminge setiri dadabetiri, isoro kakato nenda giti jigharide, a God da Kambo+ kaifa kakatode dabade Iesu sandi bundiseri.

<sup>13</sup> Bundedo, giti mo Annas kena budo iseri. Annas resena emo nu, Caiaphas ghaeko aminda fristi+ da giti jighari edo ireira ainda atovori.

<sup>14</sup> Caiaphas nu giti, Iesu daoro ambare dae kotise, Jusi embo da babojegarikena sisira, “Genembo eni natofo digari ainda bouvu fumbari dae sedo ambarira amo, evevari. O natofo isambu ambarera amo, eko bekári,” Caiaphas aminge sisira.

*18:15-18 Peter Nu Iesu Ighagha Usira.*

*(Matthew 26:69-70; Mark 14:66-68; Luke 22:55-57)*

<sup>15</sup> Simon Peter, nu Iesu da dorevare eni<sup>15</sup> ainghae dabade Iesu da amboda iseri. Fristi+ da giti jighari a Iesu da dorevare resena emo, nengae minonde minonde kasama edo iriari. Ava sedo, nu Iesu de dabade ira, fristi+ da giti jighari ainda kambo dendegu, furu dighi birurughusera, aminda teterusira.

<sup>16</sup> Avata Peter nu isaghakena fefetusira. Fetiriri, Iesu da dorevareá, jovereghedo ira buvudo, gagara guro kaifa edo ghusira, aikena geke sisira. Fristi+ da giti jighari nu kasama usira. Ava sedo, gagara aikena setiri ningiri, nu Peter unumbedo, nengae teteruseri.

<sup>17</sup> Teretero, gagara guro kaifa edo ghusira aimi, eredo ategi usira, “Se ningone! Ni Iesu da ambo jimbi eniri, ai?” aminge sisira. Setiri, Peter sisira, “Tefo.”

<sup>18</sup> Sifo aminda yaura itatamuse aindae, saramana kakato a isoro kakato ne atomo budo fera, aimi avaraka usiseri. Usedo, ungo ata mesise aminda fetirero, Peter numberago nemokena ira buvudo, nemonde dabade avaraka avise fefetuseri.

*18:19-24 Fristi+ Da Giti Jighari Iesu Kena Ategi Usira.*

*(Matthew 26:59-66; Mark 14:55-64; Luke 22:66-71)*

<sup>19</sup> Avori, fristi+ da giti jighari nu, Iesu da ambo jimbi a nunda ijuga aindae sedo ategi usira.

<sup>20</sup> Etiri, Iesu mino numokena sisira, “Na geke eni jo kivo aeri. Na sifo ghousa isaghada vironu sedo ghuseni. Na evovodae namonde Jusi embo da totorugari vasa aminda vironu sedo ghuseni, dengoro indari kamboda a God da Kambo+ aminda.

<sup>21</sup> Ava sedo, redae namokena ategi eresi? Evetu genembo nanda geke niningusera, nemokena ategi aetesi. Na rea sisena ava, nene kasama era.”

<sup>22</sup> Aminge setiri, kaifa kato eni aminda fetirisira aimi, eredo Iesu sovoda megha edo eminge sisira, “Ni fristi+ da giti jigharikena jo aminge sae aresa.”

<sup>23</sup> Setiri, Iesu minonda sisira, “Na geke eko rea seteno ningeva ava, osa saovo evetu genembo isambu ningarera. O na geke eko eni jo sae ava, ni redae na eredoresi?”

<sup>15</sup> **18:15:** John nu geke “...Iesu da dorevare eni...fristi da giti jighari...nengae minonde minonde kasama edo iriari,” evia gefusira amo, Baiboro (Bible) kasama kakato erekotera, John nu tofo mandi numoá ijuguse, geke evia gefusira.

<sup>24</sup> Aminge setiri, Annas nu, Iesu bundisera ava, seini (chains) jo vujae, ainghae dirigetiri budo, fristi+ da giti jighari Caiaphas aikena iseri.

*18:25-27 Peter Sekago Iesu Ighagha Usira.*

*(Matthew 26:71-75; Mark 14:69-72; Luke 22:58-62)*

<sup>25</sup> Peter nu kau daba ava ungo ata mesise avaraka dengesida fetiriri, mendeni numokena ategi useri, “Se ningore! Ni genembo oinda eniri, ai?” aminge setero, Peter ighagha use sisira, “Tefo, na jo nunda eni iraeri.”

<sup>26</sup> Setiri, fristi+ da giti jighari da saramana kato enii eredo, Peter kena ategi usira, “Ni genembo ainghae vare jokáda geni, ai?” Genembo ategi usira, nu saramana kato da dengoro gafugusira, ainda nano namendi eniri.

<sup>27</sup> Nu aminge ategi etiri, Peter sekago, “Tefo,” sisira. Aminge siri, kokora sifo karigusira.

*18:28-38 Iesu Rome Embo Da Kotofu Eni Javo Pilate, Ainda Dombuda Fete Koto Usira.*

*(Matthew 27:1-2,11-14; Mark 15:1-5; Luke 23:1-5)*

<sup>28</sup> Ainda amboda, ne Iesu budo Caiaphas da kamboda ghedo era, Rome embo eni Frovensi Judia kaifa edo ghusira, ainda kambo tomanako aminda buvurutuseri. Amo, ataeghae beká useri. Jarige Yari da Kirumo+ nange mindaetera ava kotise, Jusi embo da babojegari ne kotofu da kamboda jo teraeri. Ainda beká mo: erá gitofu da kamboda teterruse bebete eore dae sedo, ne oju useri. Bebete arera amo, ne kirumo jo mindae arera.

<sup>29</sup> Ava sedo, kotofu javo Pilate mo, nu kamboda ghe fira buvudo nemo-kena ategi usira, “Sevu ningone! Nu dara rea usira aindae, budo refevu?”

<sup>30</sup> Setiri, ne mino numokena siseri, “Redae ategi eresi? Nu ari eko eni jo ae aetira amo, namane nimokena jo bu furae aeteri.”

<sup>31</sup> Aminge setero, Pilate nemo-kena sisira, “Averi, genembo emo, ne totofo budo, nenda Agho Dari aminda rea resira ava kotise, koto areva,” aminge sisira. Setiri, Jusi embo da babojegari ne siseri, “Namane koto use, bouvu mendeni mendeni ava muturaera. Avata genembo daoro ambari mo, jo doyasoo namane kikiako ae eraera. Amo nisuka eraesa,” aminge siseri.

<sup>32</sup> (Ne aminge sisera da beká mo: Iesu nu, nange ambaetira ava, tofo mandi ijugusira. Ainda beká siro-rare dae sedo, God setiri, ne gekaovia siseri.)

<sup>33</sup> Pilate nu jovereghe ira nunda kamboda teredo, Iesu setiri fira bu-viri, numokena sisira, “Se ningone! Ni Jusi embo da kiniri, ai tefo?”

<sup>34</sup> Setiri, Iesu sisira, “Amo, nisuka ninda kotariimi ategi eresa? O evetu genembo mendeniimi setero ningido ategi eresa, ai?”

<sup>35</sup> Setiri, Pilate sisira, “Na jo Jusi embo da eni iraeri. Na reda ghe kasama use sareni? Avata ninda natofo nenda fristi+ da kokotofude dabade, ni budo ojighera nanda un-goda fiteri. Ava sedo, se ningone! Ninda dara rejodae budo ojeri?”

<sup>36</sup> Aminge setiri, Iesu sisira, “Reighi nane kaifa eraena amo, jo enda eminda iraeri. A nanda natofo jo budo eminda kaifa ae arena. Nanda reighi eminda iratira amo, nanda natofo nandae sedo isoro aeteri. Erá na budo, Jusi embo da babojegari ainda ungodae fiteose dae sedo, ne isoro aeteri. Avata nanda reighi jo eminda iraeri,”

<sup>37</sup> Aminge setiri, Pilate nu aindae ategi usira, “‘Ninda reighi,’ ava teria futo resesa, a gido, ni kini (king) eniri tano?” aminge sisira. Setiri, Iesu mino numokena sisira, “Ava nine resesare. Na geka beká a ari beká ijugari dae sedo, vose fena enda eminda siroruseni. Evetu genembo mave, ari beká a geka beká da amboda amboda eraera amo, nanda natofo mo nemori.”

<sup>38</sup> Aminge setiri, Pilate sisira, “Ari

beká a geka beká resesa amo, rejori?” aminge sisira.

*18:39-19:16 Iesu Arafa Dari Dae Siseri.*

*(Matthew 27:15-31; Mark 15:6-20; Luke 23:13-25)*

Aminge sedo, Pilate jovereghedo ira, Jusi embo da babojegarikena buvudo sisira, “Nunda dara eni na jo tambaeri. Saono dibura ari o saono daoro ambari da beká eni jo tambaeri.

<sup>39</sup> Avori, kote givu! Nenda kiki mo: na ghaeko evia inono Jarige Yari da Kirumo+ da sifo aminda, na dibura embo eni doyeono buvu ya gheraira. Ava sedo, nenda uju mo rejori? Na saono, Jusi embo nenda kini (king) ava foa isaghada buvare, ai? Sevu ningone!”

<sup>40</sup> Aminge setiri, ne isambu koko sise mino eminge siseri, “Tefo, nu jo mutae aresa. Namane mo, Barabbas ava uju erera.” (Genembo Barabbas siseri amo, nu tafasara kato eniri.)

## 19

<sup>1</sup> Aminge setero, Pilate Iesu budo setiri, nunda isoro kakato ne asi ava, nenda ambídae budo aimi, Iesu doruseri.

<sup>2</sup> Etero dadabetiri, isoro kakato asi titifaghae ava bu kefu edo, kini (king) da kekesa avavaga useri. Amingedo, bu Iesu da jiroda asugedo, embo unju tamo ghousago ava budo nunda tamonda asuguseri.

<sup>3</sup> Asugedo, ne totorugedo numoá dere jise eminge sedo ghuseri, “Orokaiva! Jusi embo da kini buviro! Orokaiva!” aminge sedo ghuseri. Aminge sise, nunda sovoda megha edo ghuseri.

<sup>4</sup> Amingero, Pilate sekago jovereghedo ira, natofokena buvudo sisira, “Givu! Nunda dara eni jo tambae eteni. Ava kasama aovo dae sedo, saono sekago foa buvarira.”

<sup>5</sup> Aindae Iesu sekago ira buvurutusira. Kekesa, asi titifaghaeimi kefu usera a, embo unju tamo ava

asugedo, ainghae fira nemokena buviri, Pilate sisira, “Givu! Genembo evirere!”

<sup>6</sup> Setiri, fristi+ da kokotofu a God da Kambo+ kaifa kakato ne Iesu gido, dabade koko sise siseri, “Arafa dege! Arafa dege!” setero, Pilate mino sisira, “Avori, nene budo arafa devu ambare! O namo, nunda dara eni jo tambaeri.”

<sup>7</sup> Aminge setiri, Jusi embo da babojegari, ne minonda siseri, “Namanenda Agho Dari resira amo, nu ambarira. Ainda beká mo: nu tofo mandi, ‘Na God da Mandiri,’ sedo ghusira.”

<sup>8</sup> Ne aminge sero ningido, Pilate nu oju beká ava usira. Nu giti itako oju usira. O amboda, ava ningido, nu oju beká ava usira.

<sup>9</sup> Edo, nu sekago jovereghedo Iesu budo ira, nunda kamboda teredo Iesu kena ategi usira, “Se ningone! Ni reda ghe fusesi?” setiri, Iesu mino eni jo sae usira.

<sup>10</sup> Etiri, Pilate numokena sisira, “Namokena geka eni jo sae aresa? Kote gi! Nimo arafa dari da fakina namokena irira. Kotugo, nimo doyono ya buvari da fakina barago, namokena irira,” aminge sisira.

<sup>11</sup> Setiri, Iesu mino numokena sisira, “Setesa ainda fakina ava, God nimokena futusira. Jo mutae aetira amo, ni jo bu jighirae aetesi. Ava sedo, genembo mave na ninda ungodá fitira, ainda ari eko mo, mindafugori. Nine saso ambarena ainda dara ava, jo nunda amingo irieri.”

<sup>12</sup> Aminge setiri ningido, Pilate nu jovereghe ira buvudo, nu Iesu dovari yare dae sedo, emboro tava usira. Avata Jusi embo da babojegari ne minonda koko sedo siseri, “Iesu doyasoyarira amo, ni jo ninda natofo Rome embo da kotofuko ainda komana irieri. Ai resira amo: mave nu kini (king) ariá sarira amo, nu inono, ninda natofo Rome embo da kotofuko ainda fakina ava ighagha use sarira. Aminguse numo, ne Rome embo da gitofu da kaugo arira,”



aminge siseri.

<sup>13</sup> Aminge setero ningido, Pilate sekago setiri Iesu fira buviri, Pilate nu natofo ijujari da avo anumba aminda anumbusira. Anumbusira da vasa amo, Jusi embo da gekaimi, 'Gabata' sedo ghuseri. O namondeda gekaimi 'Ofotighi Ghamanai Esimbuguseri', aminge saeteri.

<sup>14</sup> Isonga iri, Pilate ira aminda anumbusira. Sifo amo, Jusi embo nenda kirumo javo Jarige Yari da Kirumo+, aindae simbugeraera. Pilate anumbedo, Jusi embo da babojegarikena sisira, "Nenda kini (king) evirere."

<sup>15</sup> Setiri, ne minonda koko sise siseri, "Dege ambare! Dege ambare! Arafa dege ambare!" setero, Pilate ategi usira, "Nenda kini ava arafa daono ambare dae reseva, ai?" Aminge setiri, fristi+ da kokotofu siseri, "Eminda namanenda kini eni tefori. Dabako irira amo, Rome embo da kotofuko ava, nu namanenda kiniri. Eni tefori."

<sup>16</sup> Aminge setero, Pilate nu Iesu arafa daoro ambare dae sedo, nenda ungodá fiftusira.

*19:17-27 Iesu Arafa Doruseri.  
(Matthew 27:32-44; Mark 15:21-32; Luke 23:26-43)*

<sup>17</sup> Etiri, ne setero Iesu nunda korosi tofo fumbiri, budo iseri. Era, vasa eninda buvurutuseri. Vasa amo Jusi embo da gekaimi javo 'Golgota' seraera. O namondeda geka mo, 'Ambari Embo da Jiro Aghati' seraera.

<sup>18</sup> Aminda buvudo, Iesu arafa dedo, gegenembo etoto naká ábarago sovenisoveni arafa detero, nemonde dabade fefetuseri.

<sup>19</sup> Amingusera ainda amboda, Pilate geka eminge gembudo setiri, budo era Iesu da korosida doruseri: "Emo Nasareth embo genembo Iesu, Jusi embo da kiniri," aminge gefusira.

<sup>20</sup> Ainda geka ava, Jusi embo digari aimi ne tegutuseri. Ainda beká mo:

vasa aminda ghe ya Jerusalem buvari jo soka iraeri. Geka amo, Jusi embo da gekaimi, Rome embo da gekaimi a, Greek embo da gekaimi gefuseri.

<sup>21</sup> Jusi embo digarii geka ava tegutero gido, Jusi embo da fristi+ da kokotofu era Pilate kena siseri, " 'Nu Jusi embo da kiniri,' ava erá seose! 'Nu tofo Jusi embo da kiniri, sisira,' ava gembu!"

<sup>22</sup> Aminge setero, Pilate mino sisira, "Tefo! Na rea gembena, a gembeni! Ava irarira!"

<sup>23</sup> Isoro kakato ne Iesu arafa dedo ainda amboda, nunda embo boka ava budo soro edo, diti isambu avononde naká fugutuseri. Fugedo, ne diti ava inono daba daba ruruseri, ne avononde naká ava sedo. Nunda tamo asugari ghousa barago ruruseri. Tamo asugari amo, jo avagaya iraeri.

<sup>24</sup> Ágido, isoro kakato ne tofo tofo se nininguseri, "Namonde jo jighi torerae arera. Namonde mave kikinodoro gae barira amo, tamo asugari evia nune barira," Amingusera da beká mo: God da geka rea aindae sisira ava, beká are dae sedo aminguseri. God da Geka sisira, amo eviri: "Nanda embo boka, tofo tofo soro edo ruruseri. A nanda tamo asugari ghousa ava bari dae sedo, kikinodoro garuseri,"

God da Geka anakora aminge sisira, aindae isoro kakato ne aminguseri.

<sup>25</sup> Amingero, Iesu da korosi den-gesida, evevetu mendeni fetiriseri. Evevetu fetiriseri amo, Iesu noi nunda gagarakoghae, noi da nunombo eni, amo Clopas noaro Mary, kotugo Iesu noi da nunombo eni, amo Magdara embo evetu javo Mary ri.

<sup>26</sup> Iesu namanenda genembo eni dubo budo ghusira<sup>26</sup> aimi, Iesu da noighae dabade fetirero gido, Iesu noikena eminge sisira, "Aya, ninda mandi avarere."

<sup>26</sup> **19:26:** John nu geka "...namanenda genembo eni dubo budo ghusira..." evia gefusira amo, Baiboro (Bible) kasama kakato erekotera, John nu tofo mandi numoá ijuguse, geka evia gefusira.

<sup>27</sup> Aminge sedo, kotugo jovereghe nunda ambo jimbi aikena sisira, “Ninda nei avarere.” Aminge setiri, nunda ambo jimbiá eredo Iesu da noi budo kamboda isira. Sifo aminda nu tuturo edo, nunda kamboda kaifa edo ghusira.

*19:28-30 Iesu Ambududurusira. (Matthew 27:45-56; Mark 15:33-41; Luke 23:44-49)*

<sup>28</sup> Ari rea nune aetira amo, etiri inono usira ava, Iesu kasama usira. Kasama edo, God da Geka eni rea resira, ava beká are dae sedo, Iesu eminge sisira, “Na dubo sagherira.”

<sup>29</sup> Setiri, vaini (wine) dokegha aghada averegetero fasirisira ava, ika eni javo hisofi seraera, ainda fatu ava budo, roera eni sofeya avavaga bu aminda vakimbedo, aimi fati budo, nunda békada ffituseri.

<sup>30</sup> Fitero, vaini (wine) ava mindido, Iesu, “Inono etira!” sisira. Aminge sedo, nu tumo darido, ghamo asegari dotutusira.

*19:31-37 Iesu Da Reimada Gae Basiseri.*

<sup>31</sup> Ainda amboda, Jusi embo da babojegari Pilate kena era ategi useri, nu ‘avori’ sari ningido, ne Iesu a tafasara kakato da ata de jojoregaoro totoi amboro, korosida ava bari dae sedo, ategi useri. Ne aminge benunu sisera da beká mo: sifo aminda Jusi embo nenda Jarige Yari Da Kirumo+ aindae simbugeraera. Ava sedo, sifo atarira amo, Jangutari da Sifo kakara bekári. Sifo aminda, tamo korosida irari ava, jo uju aeri.

<sup>32</sup> Aindae, Pilate ‘avori’ setiri, isoro kakato era, tafasara kakato Iesu de dabade arafa dorusera, ainda ata de jojoreguseri.

<sup>33</sup> De jojoregetero dadabetiri, fera Iesu kena buvurutusera amo, Iesu anakora ambiri gido, nunda ata jo de jorae useri.

<sup>34</sup> Numo, isoro kato eniimi eredo nunda gorobai Iesu da reimada gae basetiri, uvu ororoghae baingoro edo vovosusira.

<sup>35</sup> (Nane gosusena, evia tumondaovo dae sedo, resena. Na kasama erena. Nane resena emo, geka bekári.)

<sup>36</sup> God da Geka rea resira ava, beká are dae sedo aminguseri. Amo eviri:

“Nunda etu eni jo de jorae arera.”

<sup>37</sup> A vasa eninda resira:

“Genembo nene gae basisera ava, fuge garera,”

God da Geka aminge resira.

*19:38-42 Iesu Da Tamo Budo Era Furuguseri.*

*(Matthew 27:57-61; Mark 15:42-47; Luke 23:50-56)*

<sup>38</sup> Ainda amboda, Arimatia embo genembo javo Joseph, ira Pilate kena buvudo ategi usira, nu ‘avori’ sari ningido, Iesu da tamo bu ya furugari dae sedo. (Numo Iesu da dorevare eniri. Avata Jusi embo da babojegari aindae oju use, nu tofo kivo edo ghusira.) Benunu setiri, Pilate ‘avori’ setiri, nu ira Iesu da tamo budo isira.

<sup>39</sup> Genembo eni javo Nicodemus, giti beká tumba eninda Iesu gari dae isira aimi, fiyogha etoto naká baingoro edo budo isira, eninda javo moor (myrrh), a eninda javo aros (aloes), ava dabade tate budo isira. Amo, 40 kiro (kilos) avavaga budo, nu Joseph da karona edo, nengae iseri.

<sup>40</sup> Nengae Iesu da tamo budo, fiyogha aimi nunda tamo davuse, embo foyago budo nunda tamo doghuseri. Jusi embo ne ambari embo da tamo furugari dae sedo nange simbugeraera, ainda ari ava nene useri.

<sup>41</sup> Iesu arafa dorusera aminda, vare irei. Vare jokáda, ofofo seka beku da kaugo ava, anakora fana ifuda basetero irei. Aminda ambari embo eni, giti jo fitaeri.

<sup>42</sup> Sifo amo, Jusi embo nenda Jarige Yari Da Kirumo+ dae simbugeraera; a gido, Joseph nengae Nicodemus ghae, Iesu da tamo aminda furuguseri, vasa utuako ava sedo.

## 20

*20:1-10 Iesu Ambarida Ghe Jebuge Erorusira Ava Bunise, Nunda Kokomana Mendeni Aimi, Ofofoda Era Vasa Vanembo Gosuseri.*

*(Matthew 28:1-8; Mark 16:1-8; Luke 24:1-12)*

<sup>1</sup> Fura Tomanako sifo jo atae iriri, Magdara embo evetu Mary setena aimi, eredo ofofoda ira, ghamana afufetero afigedo iriri gosusira.

<sup>2</sup> Gido, jovereghe sumbu fira, Iesu da ambo jimbi mavejoá nu dubo budo ghusira,<sup>2</sup> nengae Simon Peter ghaekena buvudo sisira, “Bajari da tamo ofofo jokáda ava budo aera. Budo aera reda fitera ava, namane erebunera,” sisira.

<sup>3</sup> Setiri, Iesu da ambo jimbi setena, nengae Peter ghae dabade eredo ofofoda iseri.

<sup>4</sup> Nengae etoto naká sumbudo era, Iesu da ambo jimbi setena, nu Peter darigedo giti ofofoda buvurutusira.

<sup>5</sup> Buvudo, ofofo békada fete ghounghedo, embo foyago avanembo fasiriri gosusira. Avata nu jo ya teraeri.

<sup>6</sup> Amingiri, Peter nunda amboda fira, nu darigedo ira jokáda teterusira. Teredo, embo nunda tamo doghusera, a kotugo eni gifua doghusera, avanembo fafasirero gosusira.

<sup>7</sup> Gifua doghari resena emo, jo embo giti setena ainghae dabade tate fasiraeri. Amo, nu ruvedo ajagha fasiriri gosusira.

<sup>8</sup> Gosiri ainda amboda, Iesu da ambo jimbi setena aimi, ira teterusira. Tere ava gido, nu tumondusira.

<sup>9</sup> (Avata Iesu, ambarida ghe erae-tira ava, God da Geka ijugusira amo, nengae Peter ghae da jiro munjuda jo terae irei.)

<sup>10</sup> Gero dadabetiri, nengae Peter ghae jovereghe natida iseri.

*20:11-18 Iesu Isagha Etiri, Magdara Embo Evetu Mary, Nu Gosusira.*

*(Matthew 28:9-10; Mark 16:9-11)*

<sup>11</sup> Mary nu isaghada fete sorara use, ghounghedo ofofo jokáda gosusira.

<sup>12</sup> Fuge gosusira amo, aneya etoto naká embo foyago asugedo, aminda anumbirero gosusira. Iesu da tamo reda fasusira aminda, eni gifuakena, a eni atakena anumbirero gosusira.

<sup>13</sup> Nu nemoá gosiri, ne ategi useri, “Evetu, ni redae sorara eresi?” setero, nu mino nemokena sisira, “Nanda Bajari budo aera. Avata vasa reda fitera ava, na erebunena.”

<sup>14</sup> Aminge sise jovereghusira amo, gukakena Iesu fetiriri gosusira avata nu bunisira.

<sup>15</sup> Buniri, Iesu numokena ategi usira, “Evetu, ni redae sorara eresi? Ni mavejo ava kakova eresi?” Aminge setiri, nunda kotari mo, nu vare kaifa katova sedo, numokena eminge sisira, “Kaifa kato, ni Iesu da tamo bu ya reda fitaresa amo, vasaá saso ningido, na ya baone!”

<sup>16</sup> Aminge setiri, Iesu numokena sisira, “Mary!” Setiri ningido, numokena jovereghedo, Jusi embo da gekaimi, “Rabonai!” sisira. (Ainda tuka mo, namondeda gekaimi, ‘Ijuga Kato!’ seraera.)

<sup>17</sup> Setiri, Iesu numokena eminge sisira, “Erá nanda tamo jigheose! Ainda beká mo: na Afakena jo ya buvae irena. Nu, ni yasi! Nanda nano namendikena buvudo eminge se ningore, ‘Na jovereghe yari dae erena, nanda Afa, a nenda Afakena, nanda God, a nenda God kena,’ aminge se nanda ambo jimbi ningore!”

<sup>18</sup> Aminge setiri ningido, Mary jovereghe ira, nu Bajari nange gosusira, a nunda geka ava namakena setiri nininguseri.

<sup>2</sup> **20:2:** John nu geka “...Iesu da ambo jimbi nu dubo budo ghusira...” evia gefusira amo, Baiboro (Bible) kasama kakato erekotera, John nu tofo mandi numoá ijuguse, geka evia gefusira.

*20:19-23 Iesu Nunda Ambo Jimbikena Isagha Etiri Gosuseri.*

*(Matthew 28:16-20; Mark 16:14-18; Luke 24:36-49)*

<sup>19</sup> Fura Tomanako daba aminda tumba jiriri, namane Iesu da ambo jimbi totorugedo, guro boragai gagojuseri. Ainda beká mo: namane Jusi embo da babojegaridae oju useri. Namane totorugedo aminda dabade edo irero, Iesu fira namanenda jokáda isagha e fetedo sisira, “Ireva. Erá oju eove! Dubo jama nemokena irare!”

<sup>20</sup> Aminge sedo, nunda ungo tautai dorusera, a nunda reimada gorobai gae basisera da buvá ava, ijugetiri namane gosuseri. Namane nu gido, ivuga beká ava useri.

<sup>21</sup> Ainda amboda, Iesu sekago namanekena eminge sisira, “Erá oju eove! Dubo jama nemokena irare! Kau nanda Afa namo dirigitiri fusena aminga ava, na ne dirigaono yareva.”

<sup>22</sup> Aminge sedo, nu fira namanekena nunda ghamo asegedo eminge sisira, “Asisi Kakara buvu!”

<sup>23</sup> Ne endada irise, evetu genembo da ari ekoko kote doyaeva amo, God Afa utuda irise, evetu genembo daba ainda ari ekoko kote doyarira. O evetu genembo mendeni da ari ekoko jo kote doyae areva amo, God Afa barago, evetu genembo daba ainda ari ekoko, jo kote doyae arira,” aminge sisira.

*20:24-29 Thomas Kau Emingedo, Bajari Tumondusira.*

<sup>24</sup> Namane Iesu da ambo jimbi 12 ava iriara amo, namanenda genembo eni, javo Thomas ri. (Nunda javo Rome embo da gekaimi, Didymus seraera. Ainda tuka mo: takegha sirorariri.) Thomas mo, Iesu fira namanekena buvudo isagha usira ainda sifoda, nu jo aminda iraeri.

<sup>25</sup> Ava sedo, namane numokena siseri, “Bajari namanekena isagha etiri gosumutari.” Setero, Thomas sisira, “Tauta nunda ungodá

dorusera da buvá, a nunda reimada gae basisera da buvá ava, nanda ungoi jighi gae arena amo, na jo tumondae arena,” aminge sisira.

<sup>26</sup> Fura eni dadabetiri, namane Thomas de dabade sekago kamboda totorugedo, guro boragaimi gagojuseri. Avata Iesu sekago fira, namanenda jokáda isagha etiri gero eminge sisira, “Ireva. Erá oju eove! Dubo jama nemokena irare!”

<sup>27</sup> Aminge sedo, Thomas kena sisira, “Ninda ungo sirege vivisedo itatame gi! Nanda ungo evirere! A kotugo ninda ungo, sekago sirege nanda reimada jighi gi! Erá buneose! Na tumondaso dae resena.”

<sup>28</sup> Aminge setiri, Thomas mino sisira, “Arie, nanda Bajari! Arie, nanda God! Na oroko ava tumonderena.”

<sup>29</sup> Setiri, Iesu numokena sisira, “Ni gosuse aindae tumonderesa. Avata, mave na jo gae irise, tumondarira amo, nu ivuga beká ava arira,” aminge sisira.

*20:30-31 John Buku Evia Gefusira Da Beká Mo, Eviri.*

<sup>30</sup> Iesu ari mendeni mendeni a tano mendeni mendeni eari gido, namane dudukughedo ghusera amo, jo isambu buku einda jokáda gembaeri.

<sup>31</sup> O, buku einda jokáda geke rea gembena, ainda susu mo: ne Iesu tumondaovo dae sedo gembeni. God Genembo eni mutari furare dae sisira amo, numori. Ava tumondaovo dae sedo gembeni. A kotugo, nu God da Mandi beká ava tumonduse, nunda javoda jebuga evovodae irari ava, baovo dae sedo gembeni.

## 21

*21:1-14 Iesu Nunda Ambo Jimbi 7 Aikena Isagha Etiri Gosuseri.*

<sup>1</sup> Ainda amboda, Iesu namanekena sekago uvu da teria irira, javo Taibirias (o mokogo mo, namonde uvu da teria javo Galilee seraera), aminda isagha etiri gosuseri. Amo, emingusira.

<sup>2</sup> Simon Peter, Thomas (o Didymus seraera), Nathanael (amo reighi Keina, Frovensi Galilee aminda irira, ainda genembo eniri), Zebedee da sasingu etoto naká (Amo namane koroghaeri.), namanenda kokomana etoto ainde dabade iriari.

<sup>3</sup> Simon Peter eredo eminge sisira, “Na vose ya oka bambarena.” Aminge setiri, namane isambu siseri, “Averi, namonde isambu yaore!” Aminge sedo, namane vosera ghakada+ vosedo, voto fugutero sifo atutusira ava, eniko jo baeri.

<sup>4</sup> Sifo atutiri, Iesu fira uvu da teria ainda betuda fefetusira. Avata namane nu buniseri.

<sup>5</sup> Aminda fetirise, eminge sisira, “Gigimasa, ne oka eni bevu?” aminge setiri, namane siseri, “Tefo, eniko jo baeri!”

<sup>6</sup> Aminge setero, nu namanekena sisira, “Nenda voto voyuva gimandukena fugevu vosari oka barido baove!” aminge setiri, namane barido oka digariá jokáda edo, jumbari buniseri.

<sup>7</sup> Amingusera ava gi kasama edo, Iesu nunda ambo jimbi dubo budo ghusira<sup>7</sup> aimi, Peter kena sisira, “Omo Bajariri!” setiri ningido, Peter nunda tamo asugari ava asugedo, Iesu kena yari dae sedo, uvuda jorughe vosedo numokena isira. (Nunda tamo asugari bu asugusira setena ainda beká mo: nu oka bambari dae sedo, nunda tamo asugari kosughe fitiri irisira, ava bu asugusira.)

<sup>8</sup> Namane mendeni voyuva jumbu vitéra ghousesada vivituseri. Namane jo soka iraeri, betuda ghedo 100 mita (metres) aminga ava vitera ghousesada vivituseri.

<sup>9</sup> Namane ghaka+ darido, vivituse gosusera amo, Iesu nu farava dengesida fitido, avaraka usedo oka ingutiri gosuseri.

<sup>10</sup> Gosero, Iesu namanekena sisira,

“Oka bambeva ava, mendeni budo fuvu!”

<sup>11</sup> Aminge setiri, Simon Peter jovereghe vosira ghakada+ vitido, sonembedo voyuva jumbu viti fera ghousesada ifarata useri. Ainda jokáda, oka babai a digari ambariá, isambu 153 ava bariseri. Oka digari, avata voyuva jo bejaeri.

<sup>12</sup> Iesu namanekena sisira, “Fuvu, bayau mindove!” aminge setiri, namane oju use, nu mavejori, ava jo se ningae useri. Ainda beká mo: namane kasama useri, nu namanenda Bajariri.

<sup>13</sup> Iesu ira, farava ava budo namanekena ghasisira. Kotugo oka budo, ari daba ava usira.

<sup>14</sup> Iesu giti ambarida ghe jebuge erorusira, ainda amboda umbu etoto naká fira namanekena isagha etiri gosuseri. O sifo aminda amingusira, ainde dabade fira umbu etodaba naká usira.

### *21:15-23 Iesu Peter Nengae John Ghaekena Geka Evia Sisira.*

<sup>15</sup> Namane bayau mindero dadabetiri ainda amboda, Iesu Simon Peter kena sisira, “Simon, John da mandi, nimokena resena. Ni na dubo bu gogoghombraesa, ai, roera a evetu genembo evia dubo buraesa?” aminge setiri, Simon numokena minonda sisira, “Ai, Bajari, redae resesi? Na ni dubo buraena amo, ni kasama eresa.” aminge setiri, Iesu sisira, “Nanda sifi (sheep) da mandi sasingu ava, kaifa aso dae resena.”

<sup>16</sup> Aminge sedo, sekago ategi usira, “Simon, ni na dubo buraesa, ai?” aminge setiri, Simon sisira, “Ai, Bajari, redae resesi? Ni dubo buraena amo, ni kasama eresa.” aminge sisira. Setiri, Iesu numokena sisira, “Nanda sifi ava kaifa aso dae resena.”

<sup>17</sup> Aminge sedo, giti umbu etoto naká sisira amo, sekago kau daba ava ategi usira, “Simon, ni na dubo

<sup>7</sup> 21:7: John nu geka “...Iesu nunda ambo jimbi dubo budo ghusira...” evia gefusira amo, Baiboro (Bible) kasama kakato erekotera, John nu tofo mandi numoá ijuguse, geka evia gefusira.

buraesa, ai?” sekago aminge sisira. Setiri, umbu isambu etodaba naká kau daba ava ategi usira, aindae Peter dubo mema use sisira, “Bajari, ni roera isasambu kasama eraesa. Na ni dubo buraena amo, ni kasama eresa.”

Aminge setiri, Iesu numokena sisira, “Nanda sifi ava kaifa aso dae resena.

<sup>18</sup> Na nimokena geka beká resena. Ni giti gimasada iriasa amo, ni eredo gogho edo, reda yari kotedo ghusesa amo, aminda ya foa ghedo ghusesi. O ni embako aresa amo, evetu genembo mendeni nimokena foa buvororo, ni ungo siregaso bundedo, vasa ni imboe aresa aminda, bu yarera.”

<sup>19</sup> (Iesu aminge sise, Peter nu nange nange ambududuruse, God da javo jighari erarira, ava ijugusira.) Ainda amboda, Iesu Peter kena sisira, “Nanda amboda amboda fu!”

<sup>20</sup> Setiri, Peter jovereghedo, fuge gukakena gosusira amo, Iesu da ambo jimbi eni Iesu nune dubo budo ghusira,<sup>20</sup> a kotugo mave bayau rise baghedo ira, Iesu kena nu mave aito arira aindae ategi usira, ava gosusira.

<sup>21</sup> Peter fuge nu gido, eminge sisira, “Bajari, seteso ningeni. Kotugo, genembo emo nange ambari?”

<sup>22</sup> Aminge setiri, Iesu numokena sisira, “Amo erá koteose! Nane saono irari, na jovereghe furarena amo, nanda sariri. Jo ninda iraeri. Ni taká nanda amboda amboda furaso dae resena.”

<sup>23</sup> Iesu aminge sisira, ainda bino ava ivegedo isira, nunda dorevarekena. Amo, genemboá jo ambae aetira ava tumonduseri. Avata kotugo, “Nu jo ambae irarira,” ava Iesu jo saeri. Iesu eminge sisira, “Amo erá koteose! Nane saono irari, na jovereghe furarena amo, nanda sariri. Jo ninda iraeri,” Iesu Peter kena geka aminge sisira.

### *21:24-25 Geka Da Tano Eviri.*

<sup>24</sup> Avori, geka Iesu Peter kena sisira amo, nandae sise sisira. Nane geka sise eregefena emo, namane kasama erera, geka bekári.

<sup>25</sup> Avori, Iesu tano a ari mendeni mendeni usira amo, na jo gambaeri. O namonde nunda ari ava isasambu gambaetera amo, avose resena, enda emo bukuimi ganjibaeti.

Avori, nanda geka tano eviri.

<sup>20</sup> **21:20:** John nu geka “...Iesu nunda ambo jimbi eni Iesu nune dubo budo ghusira...” evia gefusira amo, Baiboro (Bible) kasama kakato erekotera, John nu tofo mandi numoá ijuguse, geka evia gefusira.

## **Ekaresia Nange Tuturo Edo, Baji Teria Usira.**

Buku emo, genembo Luke dogeta (doctor) edo ireira, aimi gefusira. Giti mo, nu Luke Kotofu gefuse, Iesu endada irise rea edo ghusira, a sedo ghusira, ava gefusira. O buku einda jokáda, Luke nu, Iesu da natofu nunda ambari da amboda nange usera, a nange baji teria usira, ainda geka ava gefusira. Kotugo Asisi Kakara nange fira, Iesu da natofokena asugetiri, ne tuturo edo saramana mindafu a bouvugo usera, ainda geka buku eminda irira. Kotugo ne nange reighi mendenikena ya, Bino Eveva ava vironu seoro ningido, natofu a oro mendeni tumonduse, Iesu Keriso da ekaresia+ reighi mendeni mendeni aminda siroredo ghusira, ainda geka barago nune gefusira.

Buku emo namonde, **Ekaresia Nange Tuturo Edo, Baji Mindafu Usira** seraera ava sedo, namonde Iesu tumondari+ embo nange usera, ava kotise gefuseri. Avata, buku emo, nu Asisi Kakara da ari ava ijugerira saetera amo, ábarago gekari. Ainda beká mo: Asisi Kakara aimi Iesu da natofokena asugedo irise fakina muteari, ne nunda uju ava ningido, nunda amboda amboda use, Iesu da Bino sise, nunda saramana edo ghuseri.

*Ekaresia Nange Tuturo Edo, Baji Mindafu Usira, Ainda Geka Da Mendo Mendo Mo Eviri.*

1:1-26 Iesu da natofu nunda bino ava, saoro dae sedo esimbugusira.

2:1—8:3 Iesu da natofu nunda bino ava, Jerusalem aminda osa sedo ghuseri.

8:4—12:25 Iesu da natofu nunda bino ava, Judia a Samaria aminda sedo ghuseri.

13:1—21:16 Paul nu, Iesu da aghi kato edo deinghedo ghusira.

21:17—28:31 Jusi emboimi setero, gitofuimi Paul Jerusalem aminda diburada ffitusera ainda amboda, nu budo era reighi Sesaria aminda diburada fitero irei. Etiri, sekago budo koto ari dae sedo, reighi Rome iseri.

1-2 Arie, Theophilus ko, na geka evia nimokena resena, ningi! Iesu nu saramana tuturo usira ai tano ghedo, nu ari rea use a geka rea ijugudo fira utuda vitisira ava, nanda geka gitida nimokena gefuseni. Avori, Iesu jo utuda viti yae irise, sifo aminda, nu Asisi Kakara da fakinaimi nunda ambo jimbi anakora gategusira aikena dengoro indudusira. Ne rejoá aetera a geka rejoá saetera ava, nemokena ijugusira.

3 Nu ambudo jebuge eredo, sifo 40 ava endada irise, sifo mendeni mendeni ainda jokáda, isagha eari nunda ambo jimbi gido ghuseri. Aminguse, nu ari mendeni mendeni use, tofo numoá ijugedo ghusira. Eari gido, ne tumonde gogoghombedo ghuseri. Amingeoro, God nunda natofu+ nange nange kaifa eraira, ava ijugedo ghusira.

4 Sifo eni, nu setiri ne totorugetero, geka evia sisira, “God Afa rejoá mutarira, seteno nininguseva amo, Jerusalem eminda kaifa evu!

5 John nu tefo uvu vanemboi bafaito edo ghusira, avata itako kaifa ururovo, nemokena Asisi Kakara futuse aimi, ne bafaito arira,” aminge sisira.

*1:6-14 Iesu Utuda Vitisira.  
(Mark 16:19-20; Luke 24:50-53)*

6 Sifo eni, Iesu da ambo jimbi fera totorugedo numokena ategi useri, “Bajari, oroko eminda ni saso namonde Israel embo isambu, kokotofu arera, ai tefo?” setero,

7 Iesu nemokena sisira, “Na jo aminge sae arena. Roera isasambu,

God nune seari siroreraira. A kotugo amo, jo nene ategi ae areva.

<sup>8</sup> Avata sifo setena ava foa buvari, Asisi Kakara vosedo fakina mutari aimi, dubo kotedo, Jerusalem eminda, a Frovensi Judia ainda reighi isambu aminda nanda Bino ava saovo evetu genembo ningore! Ava use, ne reighi Samaria aminda ise, a kotugo reighi isambu birurughuse, nanda Bino ava saovo, evetu genembo ningore!”

<sup>9</sup> Aminge setiri dadabetiri, God setiri, Iesu nu utuda vitíri, forogai fira gagojiri ne gosuseri.

<sup>10</sup> Ne fuge fetedo gosero, gegenembo etoto naká, nenda asugari foyago beká asugusera aimi, fera nemo-kena isagha useri.

<sup>11</sup> Isagha edo, siseri, “Ne anakora Frovensi Galilee aminda, Iesu da geke nininguse nemonde dabade ya foa ghedo ghusevu. Ava sedo, erá buneove dae sise resera. Iesu oroko vitíri geva amo, nu kau daba aminga ava, amboda sekago jovereghe vose furarira.”

<sup>12</sup> Aminge setero ainda amboda, Iesu da ambo jimbi enda jiro fumbari javo Orivi aminda ghe itako sokago era, Jerusalem buvurutuseri.

<sup>13</sup> Buvudo, nunda ambo jimbi beká: Peter, John, James, Andrew, Philip, Thomas, Bartholomew, Matthew, James nunda nunombo Alphaeus da mandi, Simon ‘Reighi Susu’ seraera a James da nunombo eni nunda mandi Judas aimi, era nenda kamboda teteruseri. Teredo, kambo duruda á dodo ikáda era viti avido ghusera aminda, era vivituseri.

<sup>14</sup> Iesu da ambo jimbi a noi Mary, nunda jamenade a evevetu mendeni ainde dabade sifo ghousa totorugedo, dubo dabako use banungedo ghuseri.

*1:15-26 Setero, Matthias Nu Judas da Vasa Budo, Iesu Da Ambo Jimbi Eni Usira.*

<sup>15</sup> Aminguse irero, sifo eni evetu genembo Iesu tumondedo ghusera

amo, kau 120 aminga ava, fera totoruguseri. Totorugedo anumbetero, Peter nu eredo geke eminge sisira,

<sup>16-17</sup> “Nanda nano namendi, Asisi Kakara setiri, David rejoá Judas dae gefusira, ava sirorusira. Amo God da Geke ava sedo, setiri sirorusira. Namondeda Bajari Iesu, namane Judas de isambu 12 ava, nunda ambo jimbi aoro dae sedo, anakora gategusira. Avata Judas nune evetu genembo mendeni unumbedo budo fera, Iesu sandi bundiseri.

<sup>18</sup> Jusi embo da babojegari moni mutero, Judas aimi budo vare eni ombudo, ira aminda, nu tofo mandi duboda ivasi usira. Ivasi edo jorughe endada duriri, tini de bejedo jetini buvurutusira.

<sup>19</sup> Amingetiri, Jerusalem embo ava ningido, vare ainda javo ‘Akeldama’ jijighuseri. Ainda tuka mo, ‘Ororo da Vareri.’

Ava sedo, David God Da Yaru Buku aminda gefusira ava, isagha usira.

<sup>20</sup> Amo, eminge gefusira: ‘Nunda nati, evetu genembo isambu taraghe tefo aeteri, eni aminda jo irae aeteri.’

A eni mo:

‘Nunda saramana da vasa ava, genembo eniimi barira.’

<sup>21-22</sup> “Ava sedo, namonde genembo eni saoro nunda vasa bare! Mave John bafataito edo ghusira ainda sifoda, tuturo edo namonde dabade deinghedo ghusira. A nu namonde dabade iriri, Iesu nu ambu jebugedo ere utuda vitisira. Genembo eni aminga ava gi saoro, Judas da vasa bare! Budo, namane isambu 12 ava dabade irise, Iesu nu nange nange ambarida ghe jebuge erorusira, ainda bino ava osa saore!”

<sup>23</sup> Aminge setiri, ne eredo gegenembo etoto naká ava setero nengae fefetuseri. Genembo eninda javo mo, isambu etodaba nakári. Amo eviri: Joseph, Barsabbas, a Justus ri. A genembo eninda javo mo, Matthias ri.

<sup>24-25</sup> Ne eminge banunguseri, “Bajari, ni evetu genembo da janje joká ava nine kasama eraesa. Judas



ninda saramana dodo, ari ekoko mino mutari da vasada isira. Ava sedo, nunda vasa bare dae sedo, mavejo uju eresa ava ijugaso, saoro fetedo, numbarago ninda ambo jimbi arira,” aminge banunguseri.

<sup>26</sup> Banungedo, kikindoro gaetero, Matthias da javo ava isagha usira. Etiri, Matthias nu ambo jimbi edo, nemonde 12 aimi fefetuseri.

## 2

### *2:1-13 God Setiri Nunda Asisi Kakara Vovosusira.*

<sup>1</sup> Fura eni dadabetiri, Jusi embo da kirumo javo ‘Pentecost’ seraera, ainda sifo ava fira buvurutusira. Buviri, Iesu da dorevare kambo eninda totoruguseri.

<sup>2</sup> Totorugedo irise, utuda ghe yaura tomanako da dukago ava javi iri nininguseri. Anumbedo ava niningero, duka teria beká etiri, kambo ainda jokáda anumbera amo, jo se ningari da kaugo irae usira.

<sup>3</sup> Iri, roera eni avaraka bubura da kaugo ava vose fira, kau aviva da kaugo ava isagha edo, sasarige evetu genembo daba daba ainda jiroda, vose jaraghiri gosuseri.

<sup>4</sup> Gosero, Asisi Kakara aimi vosetiri dubo kotero, Asisi Kakara sonembetiri aviva jovereghetiri, ne geka dombu eni dombu eni ava siseri.

<sup>5-6</sup> Jusi embo mendeni God tumonedo ghusera aimi eredo, nenda reighi dodoyegedo fera Jerusalem aminda buvudo iriari. Evetu genembo natofogo aimi ne duka ava ningido fera totoruguseri. Totorugedo niningero, nenda geka nunda nunda ava, Iesu da dorevare aimi sero ningido, ne dudukughuseri.

<sup>7-8</sup> Ningi dudukughuse eminge siseri, “Gegenembo geka resera omo, Galilee embori. Ava ne namondeda geka nange kasama edo reseri?”

<sup>9-11</sup> Namonde Partia embo, Midia embo, Ilam embo, Mesopotemia embo, Judia embo, Kapadosia embo, Pontus embo, Asia embo, Frijia

embo, Pamfilia embo, Krit embo, Arabia embo, a Egypt embori. Namondeda mendeni Libya dodo fuseri. (Libya resera emo, reighi Sairin dengesida irira.) Mendeni mo, Rome ghedo fuseri. Mendeni mo, Jusi embo bekári, a mendeni ne, Jusi embo da gitofuri. (Gitofu resena emo, nenda kiki dodo, Jusi embokena sembudo Jusi embo da ambo jimbi useri.) Avata namonde isambu, nunda oro oro ainda geka ava Galilee emboimi sero niningerera. Emo, God rea etiri mindafugo sirorusira ava, Galilee embo nange kasama edo sero niningereri?” aminge siseri.

<sup>12-13</sup> Dudukughe bune Jaredo, tofo tofo se nininguseri, “Emo rejori?” mendeni aminge siseri. Avata mendeni ne dere jise siseri, “Iesu da dorevare ne uvu fakara mindido aito sembae fugutuse, beka soesa resera,” aminge siseri.

### *2:14-42 Peter Vironu Sisira.*

<sup>14</sup> Se niningero, Peter eredo ambo jimbi 11 ainde dabade isambu 12 ava fefetuseri. Fetedo, Peter nu, evetu genembo totorugusera aikena, beka teriango vironu sisira, “Jerusalem embo a nanda natofu Jusi embo, ne isambu ategi beká ava erena. Nemokena geka evia sari dae erena, ningivu!”

<sup>15</sup> Nanda geka evia ningi gogoghombevu! Oroko 9 koroko etira. Sifoghae, 9 koroko avavaga mo, jo uvu fakara mindari da sifo iraeri. Ava sedo, namane jo uvu fakara mindido, aito sembae fugaeri. Ne ava jo kotae areva!

<sup>16</sup> Ne rea niningereva emo, God da feroveta javo Joel, nu anakora isagha osa sedo gembiri irira. Nu eminge sisira,

<sup>17</sup> “God eminge resira, namokena, “Na, nanda Asisi mutono evetu genembo isambukena vose asugarira. Asugedo irari, na nenda sasingukena nanda geka afigaono, nene isagha sarera.

Nenda vide jamena mo, diti mokoi garera, a nenda embabako mo, aturu arera.

<sup>18</sup> Nanda saramana kakato, evevetu a gegenembokena, nanda Asisi mutono vose asugari, nanda geke afigaono, sifo aminda nene isagha sarera.

<sup>19</sup> Aminguse, nane aono tano utuda a endada sirorari gido, evetu genembo isambu dudukugharera.

Aono, ororo, avaraka buburaghae, a imbosi gumba teriagio siroredo,

<sup>20</sup> iji ambarira,

a inua kau ororo da kaugo ava sirorari, aindaa amboda, nanda Sifo mindafu usasaghae furarira.

<sup>21</sup> Mave sifo aminda, nandae javono gatise kori sarira amo, nu jebuga tambarira,"'

God aminge setiri Joel gefusira.

<sup>22</sup> Ava sedo, nanda geke evia ningivu! God setiri Nasareth embo, mandi javo Iesu, God da saramana ari dae sedo, fira sirorusira. Genembo amo, God sonembeari ari mendeni mendeni eari gido, evetu genembo dudukughedo ghuseri, 'Eraira emo, God da fakinaimi eraira,' aminge kotedo ghuseri. Amo, jo reighi eninda siroraeri, nu eminda sirorusira. Ava sedo, ne ava gido kasama aetevu.

<sup>23</sup> Avori, God nu Iesu, ambare dae sedo, dirigitiri endada fusira. Ava sedo, ne Iesu ava sandi budo, gegenembo ekoko aikenaa mutovo arafa daoro ambarira amo, God nu anakora kasama edo, 'Avori,' sisira.

<sup>24</sup> 'Avori,' sise, nu setiri ne amingusevu. Avata aindaa amboda, God nune setiri Iesu ambarida ghe jebugedo erorusira. God setiri ambari da mema dadabusira. Iesu nu fakina kato ava sedo, ambari da fakina aimi nu jo buregae usira, nu jebugedo erorusira.

<sup>25</sup> David barago Iesu dae sedo, eminge gefusira:

'Na Bajari sifo ghousa giraena. Nu, namo sonembari dae sedo, nanda ungo gimandukena, fetirá gheraira.

<sup>26</sup> Ava sedo, na ivuga beká ava erena. Nanda bekaimi nundae sakai seraena.

Na genembo ava sedo, na ambarena. Avata Bajari tumonduse, ambari dae oju jo ae eraena.

<sup>27</sup> Aindaa susu mo: Bajari, ni nanda asisi kotise, na ambari da vasa aminda jo doyae aresa.

Erama nanda tamo beteure dae sedo, ni saso na jebugarena. Na nimoá kakara eraena aindae sedo, ni amingaresa.

<sup>28</sup> Na nange nangedo jebugarena ava, ijugeteso geni. A na ninda dombuda evovodae ivuga use irarena,'

ava David Iesu dae sisira.

<sup>29</sup> "Avori, nanda nano namendi, ningivu! Namondeda abua David da kiki isagha sarena. Nu ambiri bu furugetero, nunda ofofo eminda irira.

<sup>30</sup> Avata nu jo ambae iriri, God ira numokena beka gagojuse sisira, 'Ninda imemesiri da mandi eni saono, kotofuko nimongo ava arira,' aminge sisira.

<sup>31</sup> David nu God da feroveta eniri. Ava sedo, God rejo sisira amo, tumondusira. God rea amboda arira ava kasama usira. Agido God nange nange sari, Keriso ambarida ghe jebuge erarira, aindae geke evia sisira: 'God nunda asisi jo ambari vasa aminda doyari irae arira. Nunda tamo jo betae arira,'

aminge sisira.

<sup>32</sup> Geke emo Iesu dae sisira. Amo, God nune setiri, Iesu ambarida ghe jebuge eretiri, namane gosuseri.

<sup>33</sup> Gero aindaa amboda, Numamo God numoá budo, nunda ungo gimandukena fitido, Asisi Kakara anakora mutari sisira ava sedo, numokena futusira. Mutiri, Iesu nu Asisi Kakara ava budo, namanekena mutiri oroko eminda vosedo irira. Ne nunda fakina ava gido a ningido dudukughetevu.

34-35 Geka eni mo: ne kasama ereva, David nu jo utuda viti yaeri. Ava sedo, nu mavedae geke emo sisi?

'Bajari God nanda Bajarikena sisira,

"Fu, eminda! Nanda ungo gimandukena anumbiraso, ninda fakina gaoro dae sedo, ninda gitofu de bundedo budo foama, ninda ata duruda fitono fafasaore!"'

Geka amo, David nu Iesu dae sisira.

36 Ava sedo, ningi gogoghombevu! Ne Israel embo ava sedo, kasama aovo dae resena. Iesu setena emo, nene budo arafa dorusevu. Genembo daba ava, God setiri nu kotofuko edo, namondeda sonembadae sedo irira. Numo Keriso ri!"

37 Peter aminge setiri, evetu genembo ningido, oju e bune Jaredo, ne Peter kotugo Iesu da ambo jimbi mendeni aikena ategi useri, "Nanenda nano namendi, ne erekoteva, namane nange aeteri?"

38-39 Aminge setero Peter sisira, "God nemo sonembari dae sedo, beka gagojusira. Avata jo nesuka nemova nembo sonembae arira. Nenda imemesiri a oro mendeni mendeni ava, God aghi edo sonembarira. Ava sedo, ne isasambu nenda ari ekoko dodo, furovo namane ne Iesu da javoda bafataito arera. Amingareva amo, God nenda ari ekoko kote dodo, Asisi Kakara mutari vose nemokena asugarira"

40 Aminge setiri dadabetiri, geke mendeni mendeni sise, eminge sisira, "God ari ekoko embo amo dari ambarera. Ava sedo, ari ekoko dodo fuvu!"

41 Aminge setiri, evetu genembo mendeni mendeni ivugaghae ningido, fera buvero bafataito etero, ne Iesu da natofo useri. Amo, evetu genembo 3,000 ava useri.

42 Edo, ne Iesu da ambo jimbi rea ijugusera ava ningido, nunda ambo jimbide dabade dombu dabako use, dabade bayau rise,<sup>42</sup> banungedo ghuseri.

<sup>42</sup> 2:42: Namonde erekotera, Iesu da dorevare ne bayau mindido ghusera ainda amboda, Iesu da ambari kotise, tamo a ororo kakara ava budo ghuseri tano.

2:43-47 Iesu Da Dorevare, Nenda Irari Kau Eminguse Irá Ghedo Ghuseri.

43 Aminguse, Iesu da ambo jimbi seoro, kae evetu genembo jejebugedo ghuseri, sukuru evetu genembo da jokáda ghe foa buvudo ghuseri, a ari mendeni mendeni edo ghuseri. Urureoro, evetu genembo gido beka dadabeari oju ghamo edo ghuseri.

44 Aminguse, Iesu da natofo dombu dabako use, nenda roera nano namendikena soro edo ghuseri.

45 Amo, nenda enda a nenda gugua budo oriro edo ainda moniá budo, nenda mendeni da irari a nenda mema ava gosuse, aminda soro edo ghuseri.

46 Ne sifo ava inono God da Kambo+ aminda dombu dabako edo banungeoro dadabeari, taraghe kamboda yama, dabade anumbedo bayau mindido ghuseri. Dabade anumbirise, ivugaghae nenda bayau soro vesa edo ghuseri.

47 Aminguse, ne God dae sakai seoro, evetu genembo isambu, Iesu da natofo dubo budo ghuseri. Amingurureoro, Bajari seari evetu genembo mendeni foama, Iesu tumonduse nunda natofo edo ghuseri.

### 3

3:1-10 Peter John Ghae Setero Genembo Daguna Jebugusira.

<sup>1</sup> Sifo eni, Peter nengae John ghae banungari da iji, ungobughae 3 koroko iri, God da Kambo+ aminda iseri.

<sup>2</sup> Era, aminda buvudo, guro beka eni ainda javo jijighusera amo, 'Garigo' aminda teteruse, genembo eni anumbiriri gosuseri. Genembo resena emo, nu taká daguna ava sirorusira. Sifo ava inono, gegenembo mendeniimi genembo daguna amo budo foa, guro beka aminda fitido ghuseri. Amingero, evetu

genembo God da Kamboda+ foa terari dae urureoro gido, genemboá nu nemokena monidae benunu sedo ghusira.

<sup>3</sup> Peter nengae John ghae teterero gido, ne moni mutoro bari dae sedo benunu sisira.

<sup>4</sup> Setiri, numoá gosuseri. Amin-guse, Peter sisira, “Fainghe namane gi!” setiri,

<sup>5</sup> nu, ne moni mutariá sedo, fainghe nemoá gosusira.

<sup>6</sup> Etiri, Peter sisira, “Na moni tefori. Avata namokena rejo irira ava, mutarena. Amo eviri. Nasareth embo, Iesu Keriso da javoda resena: ‘Eredo, fete yasi!’ ” aminge sise,

<sup>7</sup> ungo gimanduda jighiri erorusira. Eroriri, nunda ata umbukena fakina firi budo,

<sup>8</sup> jaunghe eredo atai fetedo deinghusira. Jaunghe ya foa ghuse, God dae sakai sise, nemonde era God da Kamboda+ teteruseri.

<sup>9</sup> Teretero, evetu genembo digari ne, genemboá joká aminda deinghe ya foa ghuse God dae sakai siri gosuseri.

<sup>10</sup> Rea sirorusira ava gido, dudukughedo siseri, “O eregoseva? Omo nu, genembo daguna guro ‘Garigo’ ainda békada anumbirá gheraira avori.”

### *3:11-26 Peter God Da Kambo+ Aminda Vironu Sisira.*

<sup>11</sup> Etero, genembo aimi Peter John ghae da ungodu budo fetiriri gido, evetu genembo dudukughedo sumbu era, Solomon da vasa God da Kambo+ joká aminda, tere fefetuseri.

<sup>12</sup> Tere fetetero Peter fuge gido, nemokena sisira, “Nanda nano namendi, namonde isambu Israel embori; ava sedo, God da Geka ningi kasama eraera. Ava sedo, erá dudukugheove! Redae erebunevu? Namane jo saoro mave eni, jo jebugedo deinghae arira. Namane jo inono iraeri, jo God amingo iraeri.

<sup>13</sup> God, namondeda abumane Abraham, Isaac, nemonde Jacob de dabade tumondedo ghusera amo,

nu God bekári. God nu, Iesu nunda mandi beká ava ijuguse, nune setiri genembo daguna emo jebugetira. Iesu resena emo, nene imboe edo nu sandi bundedo, Rome embokena mutevo, Rome embo da kotofu eni javo Pilate, nu Iesu koto edo doyari buvare dae sisira. Sisira avata, ne Pilate da dombuda Iesu ighagha usevu.

<sup>14-15</sup> Iesu resena emo, nu genembo evevago a kakara bekári. Avata nemo, Iesu ighagha use, genembo eni Iesu da vasa budo, diburada ghe foa buvare dae, Pilate kena benunu sisevu. Genembo dotevo buvurutusira amo, nu genembo eni detiri ambududurusira. Nene genembo eko aindae benunu setevo, Pilate setiri genembo amo, diburada ghedo fira buvurutusira. O Iesu mo, ne budo eva arafa detevo ambududurusira. Ne genembo eko aindae benunu sise, namondeda jebuga mutari kato amo, detevo ambududurusira. Ambududurusira avata, God setiri nu ambarida ghe jebuge eretiri namane gosuseri.

<sup>16</sup> Namane Iesu da javoda setero, genembo daguna eregoseva emo, nu Iesu da fakina aimi jebugetira. Iesu tumonduse nunda javoda setero, genembo emo nenda dombuda jebugetira.

<sup>17-18</sup> Avori, nanda nano namendi! God anakora seari nunda feroveta isambu eminge sedo ghuseri, ‘God namondeda ari ekoko kote doyari dae sedo, nu genembo eni dirigari furarira. Genembo amo evetu genemboimi daoro ambarira,’ aminge sedo ghusera ava, nange beká aetira aindae kotise, God setiri, nenda bunariimi kokotofude dabade tatedo, setevo Iesu ambududurusira. Avata na kasama erena: ne bunise amingusevu.

<sup>19-20</sup> “Ava sedo, na eminge resena: nenda ari ekoko vujegedo dovu! Nenda ari ekoko kote doyare dae kotareva amo, dubo jovereghedo God tumondevu! Amingareva amo, God sari nunda sonemba nenda asisikena furarira, a Iesu sekago

nemokena furarira. Iesu resena emo, genembo God anakora gategusira, aindae resena.

<sup>21</sup> God anakora Iesu dae sise, geka eminge setiri nunda feroveta gefuseri:

‘Utuda irari, God Afa enda a utu isambu seka ari dadabari gido, nu sekago jovereghe furarira,’

aminge gefuseri.

<sup>22</sup> A Moses barago eminge gefusira, ‘Namondeda Bajari God, numo amboda feroveta eni, namoá avavaga dirigari foa,

namondeda natofo jokáda siro-rarira. Nu rea sarira ava, ningi gogoghombareva!

<sup>23</sup> Mave nunda geka jo ningae arira amo, God genemboá budo ajagha fitido, dari ambarira,’

Moses aminge gefusira.

<sup>24</sup> A God da feroveta Samuel tano ghedo fira orokoé tano, ne God da Geka ava ningi kasama edo, sifo oroko eminda rea sirorerira aindae gefuseri.

<sup>25</sup> God beka gagojuse, rea nunda ferovetakena setiri gefusera amo, jo abuamane kikiako nendae sedo saeri, namonde isambudae sisira. God nu anakora namondeda abua Abraham kena beka gagojuse rea sisira amo, eviri:

‘Ninda imemesiri sirorarera ainda javoda, natofo nunda oro oro endada irera ava, isambu nane esimbugarena,’

aminge setiri gido,

<sup>26</sup> sifo fira buviri, God nunda Aghi Kato dirigitiri fusira. Namonde Abraham da imemesiri gido, nunda mandi Iesu dirigitiri giti namondekena fusira. Eminda fusira amo, namondeda ari ekoko vujegedo doyo-ro dae sedo fusira. God aminguse, namonde giti esimbugusira.”

## 4

*4:1-22 Kaniseremane Fera, Peter Nengae John Ghae Koto Useri.*

<sup>1</sup> Peter nengae John ghae evetu genembokena geka sero, God da

fristi+, Sadusi embo+ mendeni, a God da Kambo+ kaifa kakato da giti jigharide, dabade fera buvurutuseri.

<sup>2</sup> Iesu ambarida ghe jebuge erorusira ava sedo, God amboda sari evetu genembo ambarida ghe jebuge erarera, ainda geka ava, Peter nengae John ghae ijugero ningido, giti jighariá ne imboe useri.

<sup>3</sup> Imboe edo, ne eredo, Peter nengae John ghae sandi budo era diburada fitero aminda aviseri, tumba jisira, ava sedo.

<sup>4</sup> Aminguseri, avata evetu genembo digari ne, Peter nengae John ghae da geka, ningido tumonduseri. Gegenembo tumonduse Iesu da natofo usera amo, isambu 5,000 ri. A evevetu sasingude jo tegae useri.

<sup>5</sup> Sifo atetiri, Jusi embo da kokotofu, evetu genembo da babojegari, a Moses da Geka ijuga kakatode+ dabade fera, Jerusalem aminda totoruguseri.

<sup>6</sup> God da fristi+ da giti jighari javo Annas nengae Caiaphas ghae, John, Alexander a giti jighari da nano namendi mendeni barago, aminda totoruguseri.

<sup>7</sup> Totorugedo, ne Iesu da ambo jimbi budo fera soroda fitero fetetero ategi useri, “Ne mave da fakinaimi, a mave da javoda setevo, genembo daguna omo jebugumuta?”

<sup>8</sup> Aminge ategi etero, Asisi Kakara aimi Peter sonembiri dubo kotedo sisira, “Kokotofu isambu ojeva totorugetevu, aindae aiyakoe resena. Dengoro javuruvu, geka sari dae erena.

<sup>9</sup> Genembo daguna nange nange jebugumutara aindae, ategi ereva, ai?

<sup>10</sup> Kasama aovo dae sedo, na nemokena a Israel embo isasambukena isagha sari dae erena. Nasareth embo Iesu mo God dirigitiri fusira, ainda fakina a nunda javoda, namane setero nu jebugumuta. Iesu resena emo, nene budo arafa detevo ambiri ainda amboda, God setiri ambarida ghe jebugedo erorusira.

<sup>11</sup> Iesu nange nange ighagha aovo ambari, nunda bino mindafu ari namonde nunda duro gaetera ava, God anakora kasiaimi setiri eminge gefuseri:

‘Ghamana eni, kambo itari kakatoi imboe edo fugutusera ava Bajari nune budo, tutumbidae sedo fiti simbugedo, aminda tuturo edo, nunda kambo itari dae erira.’

<sup>12</sup> God nu namonde da ari ekoko kote doyari dae sedo, Iesu mutiri fusira. Ava sedo, namonde jebuga bari sarera amo, namonde Iesu nusuka numoá tumondarera. Jebuga bari da emboro eni tefori,” Peter geke aminge setiri dadabusira.

<sup>13</sup> John nengae Peter ghae ne faiya usera avata, ghousa jo gambaeri, a nengae natofodae jo oju ae usera ava, gegenembo totorugusera aimi gido dudukughuseri. Dudukughedo, kasama useri, “Peter John ghae Iesu de dabade deinghuse, fakina numokena ruruseri.”

<sup>14</sup> A kotugo, genembo daguna jebugusira amo, nu aminda fetiriri gido beka dadabuseri.

<sup>15</sup> Amingedo, ne setero, Iesu da ambo jimbi etotoá era ajagha fetetero, ne tofo tofo se nininguseri,

<sup>16</sup> “Namonde nange areri? Evetu genembo isambu Jerusalem eminda, genembo jebugumutara ava, ningi kasama eteri. Ava sedo, jo namonde ighagha ari da kaugo iraeri.

<sup>17</sup> Avata erama natofo isambu ningeore dae sise, namonde ne bureguse, erama Iesu da javoda geke eni seore dae sarera,” aminge setero dadabetiri,

<sup>18</sup> ne kori setero ambo jimbi etoto naká budo fera teteruseri. Teretero ne bureguse siseri, erama Iesu da javoda geke eni ijuguse seore dae siseri.

<sup>19-20</sup> Setero, Peter nengae John ghae eredo mino siseri, “Kasama evu! God da dombuda, eveva mo, namane nenda geke ningaeteri ai, God da geke ningaeteri? Namane God da Geka ningido, rea niningusera

a gosusera ava ijugarera,” aminge siseri.

<sup>21</sup> Kaniseremane totorugusera amo, isambu ambo jimbi etoto aikena sekago ghoghora eko beká siseri, avata ne jo daeri, ne dirigetero iseri. Ainda beká mo: natofo ne genembo daguna ava jebugedo deinghiri gido, God dae sakai siseri. Ava sedo, kokotofu ne oju edo, Peter nengae John ghae jo dae useri, ne taká dirigetero iseri.

<sup>22</sup> Genembo amo daguna siroredo irise, nunda ghaeko isambu 40 dadabetiri ainda amboda jebugusira.

#### *4:23-31 Iesu Da Dorevare Ne God Kena Fakina Bari Dae Sedo Banunguseri.*

<sup>23</sup> Peter nengae John ghae, kaniseremane dodo Iesu da dorevarekena iseri. Era buvudo, fristi+ da kokotofu a evetu genembo da babojegaride dabade, rea sisera ava, osa siseri.

<sup>24</sup> Setero ningido, ne isasambu dabade edo God kena banunguse siseri, “Bajari, nine seteso, utu, enda, eva, a roera isasambu sirorusira.

<sup>25</sup> Ni Asisi Kakara da fakina aimi seteso, namanenda abua David, ninda saramana kato, eminge gefusira:

‘Gitofu nunda oro oro janje ekoko edo, kau nange nangedo God kena isoro aetera ava

kotise, manaka garuseri. Avata ne jo aoro inono aeri.

<sup>26</sup> Enda da babojegari aimi totorugedo, Bajari a nunda Mandi dirigetiri fusira, aikena isoro ari dae sedo simbuguseri,

aminge sisira.

<sup>27</sup> A nu beká sisira. Kini Herod nengae Rome embo da kotofu eni javo Pontius Pilate, nengae dabade tatedo fera, Jerusalem eminda oro oro mendeni nemonde Israel embode dabade totorugedo, manaka garuseri. Ninda Saramana Kato Kakara Iesu dirigeteso fusira, aikena isoro ari dae sedo, manaka garuseri.

28 Ninda fakina a ujuimi rea sisesa ava, ne nimokena isoro use amingero, beká sirorusira.

29 Kotugo oroko, Bajari, nene daba aimi namane katiyavara eteri. Geka setera ava kotise, namane sonembururaso, fakina use aindae, jo oju ae arera. Aminguse, tumo fainghedo, ninda Bino a ninda geka ava, vironu sise irarera!

30 Ninda ungo siregedo sonembururaso, namane siruroro evetu genembo jebugedo ghaore, o tano dombu eni dombu eni ninda Saramana Kato Kakara, Iesu da javoda ururoro, evetu genembo gido dudukughedo ghaore!

31 Aminge banungetero dadabetiri, vasa totorugusera aminda, enda daradaraghiri Asisi Kakara nemonkena vose asugetiri, dubo kotedo eghovo fakara etiri, tumo fainghedo God da Bino ava vironu sedo ghuseri.

#### *4:32-37 Iesu Da Natofo Dubo Dabako Useri.*

32 Evetu genembo Iesu tumondusera aimi, dubo dabako a kotari dabako edo ghuseri. Jo mave guguadae ghamo bae edo ghuseri. Ne gugua isambu budo, tofo tofo soro edo ghuseri.

33 Aminguse, Iesu da ambo jimbi isambu 12 aimi, Iesu ambarida ghedo jebuge erorusira ainda bino ava osa sedo ghuseri. Fakina use seoro, God ne isambu esimbuge gogoghombedo ghusira.

34-35 Ne isambu uvu bayau inonori. Evetu genembo susu iti fafode, nenda kambo a nenda enda ai budo oriro edo, moni budo Iesu da ambo jimbi 12 aikena mutudo ghuseri. Eoro, ne moni budo evetu genembo da irari a mema ava gosuse a kotise, aminda soro edo ghuseri.

36-37 Amingero, butu Cyprus embo genembo eni javo Joseph, nunda oro javo Levi, ai irei. Nune eredo nunda vare oriro edo, moni budo ambo jimbikena futusira. Ambo jimbi ne nunda javo seka Barnabas

jijighuseri. Ainda tuka mo: 'Dubo Jama Mutari Katori.'

## 5

### *5:1-11 Ananias Noaroghae Da Kikiri.*

1-2 Aminguse, genembo javo Ananias, noaro Sapphira ghae eredo, nenda enda eni ava bu oriro edo moni ruruseri. Budo, jo isambu mutaeri. Ne mendeni jighi fefetuseri. A mendeni mo, Ananias bu fira ambo jimbikena futuse sisira, "Enda da mino evakori."

3 Aminge setiri, Peter eredo numokena sisira, "Ananias, Satan dere-tiri, ni nunda geka niningeresa. Ni redae nunda geka nininguse, Asisi Kakarakena gungubo resesi?"

4 Ni enda ombesa da moni mendeni mo jighi fetetesi. Enda tofo nindari. Ava sedo, ninda enda bu oriro edo moni isasambu baetesa, a nu avori. Amo ninda moniri. Avata ni redae mino beká mo jungedo, gungubo resesi? Amingeresa amo, jo namane kikiako namanekena gungubo saeri. Ni God da dombuda barago gungubo resesa."

5-6 Aminge setiri, Ananias nu Peter da geka ava niningiri, God nu detiri dudo ambududurusira. Amingetiri, gigimasa teredo nunda tamo doghe fumbudo era furuguseri. Avori, evetu genembo digari nunda bino ava ningido oju beká ava useri.

7-8 Furugetero dadabetiri, jo ghousa irae ainda amboda, Ananias noaro fira teterusira. Rea sirorusira ava bunise, fira teretiri, Peter eredo moni budo ijuguse, numokena ategi usira, "Nivughae enda oriro eteva da mino mo evakori, ai?" aminge setiri, Sapphira "Avakorasi!" sisira.

9 Setiri, Peter sisira, "Ne nivughae redae God da Asisi dedererevu? Ningi! Gigimasa nivu budo aera furugetera amo, buvari dae erera. Nimbarago fumbu ya furugarera," aminge setiri,

10 nu niningiri, God setiri dudo ambududurusira. Etiri, gigimasa fera teredo, Sapphira ambududurusira

ava gido, fumbudo era nuvu da den-  
gesida furuguseri.

<sup>11</sup> Iesu da dorevare a evetu gen-  
embo mendeninde dabade bino ava  
ningido, oju beká ava useri.

*5:12-16 Tano Eoro Evetu Genembo  
Ne Jo Gae Iriara Ava, Nenda Gitida  
Siroreari Gido Ghuseri.*

<sup>12</sup> Sifo aminda, Iesu da ambo jimbi  
12 aimi, tano dombu eni dombu eni  
eoro siroredo ghusira. Siroreari,  
evetu genembo ne jo gae iriara ava,  
nenda gitida siroreari gido, bunise  
dudukughedo ghuseri. A kotugo,  
Iesu da dorevare ya Solomon da vasa  
aminda totorugedo ghuseri, God da  
Kambo+ jokáda.

<sup>13</sup> Evetu genembo digari Iesu da  
dorevaredae sakai sedo ghuseri.  
Avata Ananias da bino ningido, ne  
oju use jo ya Iesu da dorevare ainde  
dabade tatae edo ghuseri.

<sup>14</sup> Jo tefo tefo ya nemonde tatae  
edo ghuseri. Avata God nune seari,  
evetu genembo sifo ghousa evia,  
Iesu tumonduse foa nunda natofo  
digarigo edo ghuseri.

<sup>15</sup> Eoro ava gido, evetu genembo  
mendeni ne eredo, kae evetu gen-  
embo ava budo, foa emboro tinguda  
ghaito dudo fiteoro fafasedo ghuseri.  
Ne eminge kotedo ghuseri, “Peter foa  
darigedo irurari, nunda dangioimi  
jarigarira amo, ne jejebugarera,” ava  
kotise edo ghuseri.

<sup>16</sup> Evetu genembo digari, nenda  
reighi reighi aminda, nenda koko-  
mana kae budo iritiriara, a mendeni  
sukarui asugetero iritiriara ava,  
tige foa Jerusalem aminda buvudo  
ghuseri. Amingurureoro, Iesu da  
ambo jimbiimi seoro ne isambu  
jejebugedo ghuseri.

*5:17-42 Kaniseremane Janje Ekoko  
Edo, Iesu Da Ambo Jimbi Sekago Koto  
Useri.*

<sup>17-18</sup> Iesu da natofo amingero gido,  
fristi+ da giti jighari nunda koko-  
mana, Sadusi embo+ ainde dabade,  
bino ava ningido aji sise, Iesu da  
ambo jimbikena janje ekoko useri.  
Edo, manaka garuse kaifa kakato

mendeni dirigetero era, Iesu da  
ambo jimbi sandido budo era dibu-  
rada fiftuseri.

<sup>19</sup> Fitero, God nunda aneya eni  
dirigetiri ira, dibura da guro afigedo,  
ne unumbe budo fera isaghada bu-  
vurutuseri.

<sup>20</sup> Buvudo, isaghada fetedo,  
aneyaimi sisira, “Ne yasivu! God da  
Kambo+ aminda tere fetedo, evetu  
genembo nemokena totorugarera,  
aikena jebuga seka da bino ava  
sirurovo ningore!” aminge setiri,

<sup>21</sup> ne aneya da geka ningido,  
sifoghae beká era, God da Kambo+  
jokáda tere fetedo ijuguseri.

Amingero, fristi+ da giti jighari,  
nunda kokomanade dabade, aghi  
etero Jusi embo da babojegari  
isambu fera dabade anumberi.  
Fera anumbedo, Iesu da ambo  
jimbi unumbe bu furoro dae sedo,  
aghi mutero jovereghedo dibura  
kamboda iseri.

<sup>22</sup> Era teredo, nunda ambo jimbi  
aminda tava e Jaredo, jovereghe fera  
buvudo kaniseremanekena siseri,

<sup>23</sup> “Namane aera buvera amo,  
dibura da guro gajetero iriri geri. Ko-  
tugo kaifa kakato guro beka aminda  
fetirero geri. Nene guro afigetero  
teretera avata, Iesu da ambo jimbi jo  
aminda iroro tambaeri.”

<sup>24</sup> Aminge setero ningido, God  
da Kambo+ kaifa kakato da giti  
jighari, nemonde fristi+ da kokoto-  
fude dabade, dudukughedo siseri,  
“Nange resevu?”

<sup>25</sup> Aminge se niningero, genembo  
eniimi teredo sisira, “Atá, ne nin-  
givu! Gegenembo sife diburada  
gagojava amo, ne nangetirai God da  
Kambo+ jokáda fetedo evetu genem-  
bokena vironu reseri!”

<sup>26</sup> Aminge setiri, kaifa kakato da  
giti jighariimi eredo, nunda natofo  
mendeni budo era, Iesu da ambo  
jimbi sandido, sainghiako budo  
fuseri. Ainda tuka mo, erama evetu  
genembo nemo ghamana ai deore  
dae sedo, oju useri.

<sup>27</sup> Fera teredo, Iesu da ambo jimbi  
setero kaniseremane da dombuda



fetetero, fristi+ da giti jighari nemo-  
kena dumoghae sisira,

<sup>28</sup> “Namane, erama Iesu da javoda  
ijugeove dae siseri. Avata nene sevo,  
evetu genembo isambu Jerusalem  
eminda geka evia niningerera:

‘Iesu ambududurusira da susu mo,  
namaneri,’  
aminge reseva amo, bekári? Sevu  
ningore!”

<sup>29-30</sup> Aminge setiri, Peter ambo jim-  
bide dabade siseri, “Namane nenda  
geka jo ningae arera. God da  
Geka ava ningarera. Ne Iesu arafa  
doruseva avata, God namondeda  
abuamane tumondedo ghusera aimi,  
nune Iesu jighiri ambarida ghe je-  
buge erorusira.

<sup>31</sup> Etiri, God nu Iesu budo, evetu  
genembo kaifa use jebuga mutare  
dae sedo, nunda ungo gimandukena  
fifitusira. Aminguse, God nenda ari  
ekoko vujegaoro kote doyare dae  
sedo, Israel embodae emboro afi-  
gusira.

<sup>32</sup> God amingusira ainda bino ava  
osa sise ijugeraera. God da Asisi  
Kakara barago, kau daba aminga  
ava, evetu genembo da janje jokáda  
saramana eari, Iesu da Bino ava is-  
agha eraira. Asisi Kakara resena  
emo, mave God da Geka ningido,  
nunda uju ava eraira aikena mutu-  
raira.”

<sup>33</sup> Aminge setero ningido, baboje-  
gari totorugusera amo, ne dubo eko  
beká ava useri. Amingedo, Iesu da  
ambo jimbi daoro amboro dae siseri.

<sup>34</sup> Aminge sedo, Moses da Geka  
kaifa kato a ijuga kato+ eni javo  
Gamaliel, dengoro indari dae sedo,  
erorusira. Gamaliel resena emo,  
evetu genembo isambu tumonduse  
kakara edo ghuseri. Aimi eredo, Iesu  
da ambo jimbi bu ya vasa eninda fi-  
toro dae setiri, bu vasa eninda fitero  
gido, nu eminge sisira,

<sup>35</sup> “Nanda nano namendi Israel  
embo, na geka evia itako sari dae  
erena. Namonde isambu kote  
gogoghobarera. Ne jo totoi daoro  
ambae arera.

<sup>36</sup> Sifo eninda, genembo eni javo  
Theudas, nune kotofuko ari dae  
sedo aghi etiri, gegenembo 400 fera  
nunda ambo jimbi useri. Etero,  
gavana eredo Theudas detiri am-  
biri, nunda ambo jimbi oju sumbu  
taraghuseri.

<sup>37</sup> Etero dadabetiri, javo tegari a  
gembari da sifo fira buviri aminda,  
Galilee embo eni javo Judas, nu  
aghi etiri, evetu genembo mendeni  
ningido fera, nunda ambo jimbi  
useri. Kotugo kau daba aminga  
ava, gavana eredo Judas detiri am-  
biri, nunda ambo jimbi oju sumbu  
taraghuseri.

<sup>38</sup> Avori, na eminge resena: na-  
monde gegenembo sandudumutara  
ava, jo bu daoro ambae arera. Nenda  
kotariimi o nenda fakinaimi sara-  
mana arera amota, rejo eni o beká  
eni, jo sirorae arira.

<sup>39</sup> O God da fakina aimi saramana  
arera amo, jo namonde buregaoro  
inono ae arira. Erá namonde tefo,  
God kena osogo eore dae sise re-  
sena!” aminge setiri, babojegari  
totorugusera amo, ne ava ningido  
tumonduseri.

<sup>40</sup> Tumonduse, aghi mutero era  
Iesu da ambo jimbi budo fera  
teretero, ne ambíimi doruseri.  
Detero ainda amboda, babojegari  
nemokena siseri, “Erama Iesu da  
javoda, geka rejo eni seove!” aminge  
sedo, ne dotero iseri.

<sup>41</sup> Era, kaniseremane da kambo  
dodo, ivugaghae era buvurutuseri.  
Ivuga usera da beká mo: God nenda  
tumondari mindafu gido sisira, “Na  
eregosena, nenda tumondari isambu  
inonori.” Ava sedo, nunda ungo ava  
sokinembetiri, ne Iesu da javoda,  
mema tafuse meka gosuseri.

<sup>42</sup> Edo, ne sifo ava inono God da  
Kambo+ aminda a natofu da kambo  
aminda, God nu nange namondeda  
ari ekoko kote doyari dae sedo, Iesu  
dirigetiri fusira, ava ijuguse vironu  
sedo ghuseri.

*6:1-7 Iesu Da Ambo Jimbi, Nemo Sonembaoro Dae Sedo, Evetu Genembo Mendeni Gateguseri.*

<sup>1</sup> Aında amboda, Iesu da natofo digarigo use, tuturo edo to tofo tofo beisiga useri. Israel embo mendeni Israel amında siroredo nenda gekaimi sedo ghusera, a Israel embo mendeni Greek gekaimi sedo ghusera, nemonde dabade beisiga useri. Mendeni Greek gekai sedo ghusera amo, ne eminge siseri, “Bajari da ambo jimbi namondeda moni soro use, namanenda roririkena itako muturaera. O nenda roririkena mo, teriago muturaera,” aminge setero,

<sup>2</sup> Iesu da ambo jimbi 12 aimi aghi etero, Iesu da natofo isambu totoruguseri. Totorugetero, siseri, “Naname God da Geka ava vironu sari dodo, sifo ghousa evia tefo moni vanembo soro use irarera amo, jo eveva iraeri.

<sup>3</sup> Avori, namondeda nano namendi, emingareva! Gegenembo isambu 7 ava gategareva. Gegenembo resera emo, Asisi Kakara ai asugetiri dubo kotise iroro natofo gi kasama eraeva avavaga, gategaovo moni nene soro edo gharera.

<sup>4</sup> Namane moni soro ari da saramana ava, nemokena mutoro nene ururoro, namane sifo ghousa evia, banunguse vironu sedo gharera.”

<sup>5</sup> Aminge setero, natofo ava ningido ivuga useri. Ivuga edo, giti genembo javo Stephen ava gateguseri. God setiri Asisi Kakara numokena vosetiri dubo kotise ireira, ava gateguseri. A gegenembo mendeni barago, nenda javo Philip, Prochorus, Nicanor, Timon, a Parmenas, nemoá ava gateguseri. A genembo eni mo, Antiok embo javo Nicolaus, amo nunda kiki dodo Jusi embokena sefusira, ábarago gateguseri.

<sup>6</sup> Gategusera ava budo fera, Iesu

da ambo jimbikena ijugetero, Iesu da ambo jimbi, gegenembo gategusera aındae banunguse, ungo jiroda fifituseri.

<sup>7</sup> Sifo amında, evetu genembo God da Geka niningudo refuara, Iesu da natofo digarigo Jerusalem amında sirorusira. A kotugo, fristi+ mendeni barago Iesu tumonduseri.

*6:8-15 Stephen Koto Ari Dae Sedo Sanduduseri.*

<sup>8</sup> Stephen gategusera amo, God nu esimbugedo fakina mutiri rurusira. Budo, nu ari fakina a tano mendeni mendeni eari, evetu genembo ne jo gae iriara ava, nenda gitida sireari gido ghuseri.

<sup>9</sup> Ava gido, evetu genembo mendeni ne Stephen de beisiga useri. Evetugenembo resena emo, Jusi embori. Ne Sairin a Alexandria amında babojegarii bero sabua edo iriara ava dotero fera, Jerusalem amında iriari. Irise, nenda dengoro indari kambo+ itido, javo ‘Evetu Genembo Babojegari Iraede’<sup>9</sup> ava jijighuseri. Dengoro indari kambo+ resena, aında natofo mendeni a Jusi embo mendeni Frovensi Silisia a Frovensi Asia ghedo fera iriara amo, nemonde dabade tatedo, Stephen de besiga useri.

<sup>10</sup> Besiga ero, Asisi Kakara kotari a geka evevago beká ava Stephen kena mutiri budo, geka setiri evetu genembo ningido, beka dadabuseri.

<sup>11</sup> Bunedo, Stephen da geka imboe edo aito use, gegenembo mendenikena moni mutero budo era, aji sise, Stephen nu Moses da Geka a God da Geka ava doyoro dae sariá gungubo siseri.

<sup>12</sup> Aminge gungubo sedo, evetu genembo, babojegari, a Moses da Geka ijuga kakato,+ da ghamo ava deretero erorusira. Amingedo, era

<sup>9</sup> **6:9:** Jusi embo mendeni, giti evetu genembo mendeniimi ombero, aında tofo edo iriari. Avori, ne moni tambudo nenda babojegarikena mutero bu gido, ‘avori’ setero, ne babojegari dodo, totofo nenda uju ava edo ghuseri. Jusi embo amo nenda irari manai kotise, dengoro indari kambo nenda moniimi itido, javo **‘Evetu Genembo Babojegari Iraede’**

Stephen sandido, Jusi embo da kanis-eremakena koto ari dae sedo budo iseri.

<sup>13</sup> Era buvudo, gegenembo mendeni saoro, foa nemo sonem-bedo gungubo saoro dae sedo, aghi mutero iseri. Era setero fera teteruseri. Teredo, ne dederuse gungubo eminge siseri, “Stephen sifo ghoua evia, God da Kambo+ kakara ava doyoro dae seraira, a kotugo Moses da Geka barago, doyoro dae seraira.”

<sup>14</sup> Stephen nu eminge sisira, ‘Iesu Nasareth embo aimi foa, God da Kambo+ de bejedo, a Moses kiki rejo futusira a ari rejo ijugusira, ava nune sari dadabarira,’ Stephen aminge sari ne ningariá siseri. Amo, ne gungubo siseri.

<sup>15</sup> Sedo, gegenembo totorugusera aimi, Stephen gosusera amo, nunda dombu aneya da kau avavaga iri gosuseri.

## 7

### *7:1-53 Stephen Da Gekari.*

<sup>1</sup> Ava gido, fristi+ da giti jighariimi Stephen kena ategi usira, “E geka beká resera, ai? Ni God da Geka a Moses da Geka doyoro dae sise resesa, ai tefo?”

<sup>2</sup> Aminge setiri, Stephen minonda sisira, “Nanda nano namendi a nanda natofo, dengoro jave ningivu! Na geka itako sari dae erena. Namondeda abua Abraham reighi javo Heren aminda jo yae irise, nu Frovensi Mesopotemia aminda iriri, God usasa beká a gari durode ava numokena isagha etiri gosusira.

<sup>3</sup> Gosiri, God sisira, ‘Ninda oro a reighi dodo yasi, reighi eni mutono, aminda dighi anumbase!’

<sup>4</sup> Aminge setiri, Abraham nu eredo nunda reighi Kaldia a Mesopotemia ava dodo, fira emboro soroda, Heren aminda didighusira. Dighido iriri, numamo ambiri, God numokena sekago yare dae setiri, Abraham eredo, namondeda reighi Israel eminda fusira.

<sup>5-7</sup> Fira buviri, God enda ijuguse, mutari dae sedo beka gagojusira. Avata sifo aminda, enda o rejo eni jo mutaeri. Abraham noaro mandi sasingu jo fumbae iriri, God Abraham kena sisira, ‘Enda evia nindae mutono iriri, amboda ninda sasingu siroraoro, ninda imemesirii barera,’ aminge sise, nu gekaé barago ijugusira, ‘Ninda imemesiri sifo amboda reighi emo dodo yama, reighi soka aminda sabua+ arera. Reighi da kokotofu saoro, ninda imemesiri saramana janjagu use irarera. Amingururoro, ghaeko 400 ava dadabarira. Dadabari ainda amboda, na reighi da kokotofu setena, ainda ari ekoko da mino mutono, ninda imemesiri saramana janjagu use irarera dodo, aminda ghe buvudo foa reighi eminda namokena banungarera.’

<sup>8</sup> Aminge sedo, nu Abraham ghae tofo tofo beka gagojusera ainda tano futusira. Amo, Abraham nunda vika mendo anoso ava gafugare dae sisira. Aminge sisira andae, Abraham da mandi Isaac siroretiri, sifo 8 dadabetiri, Abraham God da Geka ava kotedo, Isaac da vika mendo anoso ava gafugusira. Gafugetiri, Isaac baji evetu fitido, nunda mandi Jacob siroretiri gido, nunda vika mendo anoso gafugusira. Avori, Jacob nu baji evetu fitido, mandi sasingu siroretiri gido, nunda sasingu vide jamena isambu 12 amo, kau daba ava usira. Sasingu 12 resena emo, namondeda abuanameri.

<sup>9-10</sup> “Abuamane resena emo, jo tini dabako jo siroraeri. Joseph da koromane isambu 10, avata Joseph nu noi tini eniri. Ava sedo, Joseph da koromane ne, nu imboe edo eredo, nenda mandako Joseph sandido Egypt embokena mutero ruruse, ne moni ava mutero ruruseri. Bero, Egypt emboimi Joseph budo era setero, nenda saramana kato use irei. Aminguse iriri, God Joseph kaifa use, dara dombu eni dombu eni ainda jokáda sonembetiri jebugusira. Etiri, God dubo kotari mutiri bu jighiriri, Egypt

embo da kini (king), 'Pharaoh' ser-aera, aghi etiri Joseph numokena ira teretiri, nunda dubo kotari a kasama teria ava gido, Pharaoh ivuga use setiri, nunda kambo, roera, a nunda natofo ava, Joseph kaifa edo ghusira.

<sup>11</sup> Amingiri, namondeda reighi Israel eminda (o Keinan giti sedo ghuseri) a Egypt aminda baimara teria sirorusira. Bayau dadabari beká etiri itatamuse, evetu genembo dubo mema useri. Amingetero, namondeda abuamane da bayau barago dadabusira.

<sup>12</sup> Egypt aminda bayau itako iriri ainda bino ava ningido, namondeda abua Jacob nunda sasingu ava dirigetiri, nenda gitida Egypt aminda bayau ombari dae iseri. Nunda sasingu isera amo, namondeda abuamaneri.

<sup>13</sup> Era buvudo, bayau ombudo jovereghe fuseri. Ainda amboda, sekago iseri. Era buvero, Joseph nemokena sisira, 'Na nenda mandakorasi, erama na buneove!' aminge setiri, Pharaoh nu Joseph da natofo ava kasama usira.

<sup>14</sup> Etiri, numamo a nunda natofo isambu 75 ava saoro, Egypt aminda yaore dae sedo, Joseph aghi mutiri iseri.

<sup>15</sup> Era buvudo setero ningido, Jacob mane eredo, Egypt aminda iseri. Era buvudo, Jacob namondeda abuamane Joseph de dabade, Egypt aminda iriara sirivo useri.

<sup>16</sup> Sirivo eoro, nenda sasingu nombuamane da tamo budo yama, reighi Sekem aminda furugedo ghuseri. Sekem resena aminda, Jacob da nombua Abraham anakora Hamor ondikena ofofo vasa amo, moniimi ofusira.

<sup>17</sup> "Namondeda natofo Egypt aminda siroredo digarigo etero, sifo fira buvari dae iri, God nu beka gagojuse, Abraham kena enda mutari sisira ava, nu sekago kotisira.

<sup>18-19</sup> Kotiri, sifo aminda oro eni ne kokotofu edo, nenda kini eni sirorusira. Siroredo, nu Joseph da bino a Joseph da natofo ava

bunise, namondeda abuamane ava dedeuse, nemokena fakarago edo ghusira. Aminguse katiyavara etiri, namondeda abuamane nenda sasingu vide jamena ava budo, isaghada fiteoro irise sirivo edo ghuseri.

<sup>20</sup> Sifo aminda, mandi eni gari evevago sirorusira, nunda javo mo Moses ri. Moses siroretiri gido, noi numamo Pharaoh da geka aindae imboe edo, kamboda undéro tambuno etodaba naká dadabusira.

<sup>21</sup> Dadabetiri, noi numamo bune Jaredo, nenda kokoi budo isaghada fitero, Pharaoh da gagara fira, Moses tambudo budo ira, nunda mandidae sedo undiri babojusira.

<sup>22</sup> Bajiri gido, ijuga kakato mendeni fera, Egypt embo da kasama, nenda kiki, a nenda kotari isambu ava ijugetero, Moses kasama usira. Kasama use, baji mindafu edo Moses nu bajari teria eni usira. Amingedo, geka bekáda bekáda sise, ari numo beká edo ghusira.

<sup>23</sup> "Use, nunda ghaeko 40 ava dadabetiri, Moses nu eredo nunda nano namendi Israel embo, ava gari dae isira.

<sup>24</sup> Ira buvudo, Egypt embo genembo eniimi namondeda abua eni ava doriri gido, ainda mino ari dae sedo, Moses nu Egypt embo genemboá detiri ambududurusira.

<sup>25</sup> Amingiri gido, nu kotisira, 'God setiri, na nanda natofo unumbe budo, namondeda reighida yari dae ojena ava, natofo kasama arera tano,' ava kotisira. Avata nunda natofo ne jo kasama aeri.

<sup>26</sup> Avori, sifo dabako dadabetiri ainda amboda, namonde Israel embo da abuamane etoto naká nengae tataya ero gido, Moses nemokena sisira, 'Ningivu! Ne oro dabakori. Redae totofo tataya erevu?'

<sup>27</sup> Aminge setiri, genembo nu giti nunda komana dorusira aimi, eredo Moses jighi miminguse sisira, 'Mave setiri, ni kotofu da geka resesi?'

<sup>28</sup> Ni Egypt embo sife doreso na go-

sumutani. Ava sedo, na erá dereose!’

<sup>29</sup> Aminge setiri, Moses geka ava ningido, oju edo sufusira. Sumbudo ira, reighi Midian aminda buvudo, evetu eni fitido nunda imboti atovode dabade irero, nunda vide jamena etoto naká siroruseri.

<sup>30</sup> “Ghaeko 40 ava dadabetiri ainda amboda, Moses reighi uvu irae da vasa a doriri Sainai ainda dengesi aminda fetirise, orobu jokáda ika veveyako aminda, avaraka gambu avise bubura iri gosusira. Aneya bubura jokáda fetiriri gosusira.

<sup>31-32</sup> Moses ava gi dudukughedo, ava indiro use gi gogoghombari dae sedo, ira utua usira. Utua edo, Bajari geka evia siri niningusira, ‘God nembuamane Abraham, Isaac, a Jacob de anakora endada irise tumonduse iriari, a kotugo oroko tumonduse irera amo, namori,’ aminge setiri, Moses ava ningido, ojuimi ungo ata dadaragarusira. Etiri, tumo darido fefetusira.

<sup>33</sup> Fetiriri, God sekago numokena sisira, ‘Ninda ata anoso asuge fetiresa, ava kosughe! Reighi emo, vasa kakarari.

<sup>34</sup> Nanda natofo da mema a nenda irari eko beká Egypt aminda ava eregosena. Nenda sorara ava ningido, nemo sonembari dae refena. Ni fu, nane dirigaono Egypt aminda yase!’ aminge sisira.

<sup>35</sup> “Genembo Moses setena ava, Israel emboi ighagha useri. Nu ighagha use, eminge siseri, ‘Mave setiri, ni kotofu da geka resesi?’ Namondeda abuanane Moses ighagha usera avata, God setiri, Moses nune daba aimi kotofuko edo, natofo sonembari dae sedo jovereghe nemokena Egypt aminda isira. Aneya mo avaraka buburaghae ika jokáda avíri Moses gosusira ainda sonembaimi, God setiri Moses amingusira.

<sup>36</sup> Ira buvudo, namondeda natofo unumbedo emboro ijuguse, nune giti budo Egypt ghedo iseri. Amo, Moses nu Egypt aminda tuturo edo, tano a ari mendeni mendeni udo

fusira. Aminguse, esuru eni javo ‘Kokoigo’ aminda, a kotugo reighi tomanako uvu irae da vasa aminda, nu tano a ari mendeni mendeni eari, namondeda natofo ne jo gae iriara ava, nenda gitida sirearei gi dudukughedo ghuseri. Vasa daba aminda deinghero ghaeko 40 dadabusira.

<sup>37</sup> Moses resena eimi sisira, ‘God nunda feroveta eni namongoá, dirigari yama namondeda natofo jokáda sirorarira.’

<sup>38</sup> Kotugo Moses daba aimi, namondeda abuanane dabade reighi tomanako uvu irae da vasa aminda irise, nu doriri Sainai viti ya aminda, aneya da geka ningido, a God da Geka evovodae irarira ava ningido, namonde baoro dae sedo gefusira.

<sup>39-40</sup> Gefusira avata, natofo Moses da Geka jo ningae useri. Ne Moses ighagha edo eredo, Egypt aminda jovereghe yari dae use, Moses da koro Aaron kena siseri, ‘Moses nu God ghae geka sise jo furae irira. Nu furarira, ai? Jo furae arira? Ava sedo, namonde God doyore! Ni arii namondeda ove keve simbugaso, namondeda gode eni siroredo, nu namondeda giti jijighururari yaore!’ aminge siseri.

<sup>41</sup> Sifo aminda, ne ove keve simbugetero, roera eni burumakava mandi (calf) da kaugo ava etero sirorusira. Siroredo, natofo da kotofu usira. Etiri, evetu genembo nenda kotofu, ava sedo nenda godekena, joba futuse, sino fuka de oje dungedo kirumo useri.

<sup>42</sup> Amingetero, God namondeda abuanane gukai futuse, ne ighagha edo, ne utu da damana ava tumonde bainghaoro dae sedo dotutusira. God setiri nunda feroveta eni namondeda abuanane da ari aindae, eminge gefusira:

‘Israel embo, ningivu! Ghaeko 40  
ava, reighi tomanako uvu irae  
da vasa aminda irise,  
sino fuka de oje dungedo ghuseva  
amo, jo namokena joba futuse

ae edo ghusevu.

<sup>43</sup> Ne nenda gode eni javo Moloch seraera, ainda kau ava nenda yeyedae simbugedo, bu deinghuse tumondedo ghusevu.

A kotugo, nenda gode eni javo Rephan seraera, ainda dangio kau damana avavaga ava, nenda yeyedae bu deinghuse, tumondedo ghusevu.

Amo, ne roera nene totofo ungoi useva ava, ne kakara edo ghusevu.

Ava sedo na saono, nenda gitofu ya ne bundedo budo yama, Babylon darigedo ambokena aminda fitarera,

God setiri aminge gefusira.

<sup>44</sup> “God nu nange nange evovodae irise, evetu genembo kaifa eraira ava, ijugari kasama aoro dae sedo, nu namonde dobo<sup>44</sup> itoro dae sisira. Dobo da kau a nunda mindafu ava, Moses kena ijuge gogoghombusira. Etiri ningido, dobo amo, embo boka aimi firedo simbuguseri. Simbugedo, reighi tomanako a uvu irae da vasa aminda bu deinghedo ghuseri. Ne amingusera da beká mo: God nu nemonde dabade irá gheraira ava kasama ari dae sedo useri.

<sup>45</sup> Ainda amboda, namondeda abuamane ambeoro, nenda sasingu a nenda imemesiri doboá budo Moses da ambo jimbi Joshua de dabade fera namondeda reighi eminda teteruseri. Teretero, God sonembetiri, namondeda afamanei gitofu mendeni ava detero sirivo ero, mendeni oju sufuseri. Sumbero, reighi emo abuamane budo, dighi anumberi. Anumbedo, dobo amo sekago itutuseri. Itero, dobo vasa daba aminda sifo ghousa ambari ava iriri, David sirorusira.

<sup>46</sup> Siroretiri, God nu David da irari a nunda tumondari ava gido, David dubo bu gogoghombusira. Amo God nombua Jacob tumondedo ghusira daba aindae resena. God ‘avori’ sari

ningido, David nunda kambo beká ava itari dae benunu sisira.

<sup>47</sup> Avata erá David nune kambo iteure dae, God imboe usira. Etiri, David da mandi Solomon nune itutuseri.

<sup>48</sup> Itutuseri avata, God iká bekáda irira amo, jo evetu genembo kambo ungoi itari aminda irari da kaugo iraeri. Ava kotise, God da feroveta eni eminge gefusira:

<sup>49-50</sup> ‘Utu eregoseva? Nanda avo anumba vasa oviri. O enda mo, nanda ata fitari vasari.

Givu! Enda, utu isambu nane eteno sirorusira. Ava sedo, nanda kambo kau nange itarevu? O ne nanda avari vasa reda simbugarevu?’

aminge gefusira.

<sup>51</sup> “Nemo, ne isambu gogore kakatori! Ne gitofu da kakaugo use, God jo tumondae a nunda geka jo ningae eraeva. Namondeda abuamane kau nange nange God buregedo ghuseri, ne kau daba aminga ava, Asisi Kakara buregeraeva.

<sup>52</sup> Nenda abuamane God da feroveta isambukena fakarago eoro, feroveta mendeni, God nunda Genembo eveva beká ava dirigari furariá sedo ghusera, nembarago detero sirivo useri. Nenda abuamane ferovetakena amingedo ghusera, a ne kau daba aminga ava use, God da Genembo Eveva ava, namondeda gitofukena mutevo budo detero ambududurusira.

<sup>53</sup> God nunda Agho Dari setiri, aneya ai budo fera mutero, namondeda natofo ruruseri. Kotugo namonde barago ruruseri. Rurusera avata, ne God da Geka amo jo ningae eraeva,” Stephen nu geka aminge sisira.

*7:54-60 Stephen Ghamanai Detero Ambududurusira.*

<sup>54</sup> Babojegari totorugusera amo, Stephen da geka nininguse, janje ekoko useri. Edo, dika ghininji ghananja ghuseri.

<sup>44</sup> **7:44:** Dobo mo, tamo foyago ne ‘tent’ seraera. Dobo da gima mo, ika budo aimi keve simbuguseri. O nunda sisoro a botou mo, embo a sino fuka da anoso aimi fire fiftuseri.

<sup>55</sup> Amingusera avata, Asisi Kakara Stephen kena vose asugari beká etiri, diti fainghedo, God da usasa, a Iesu God da ungo gimandukena fetiriri gosusira.

<sup>56</sup> Gido, sisira, “Givu! Utu afigetiri, na Evetu Genembo da Koro, + God da ungo gimandukena fetiriri eregosena,” aminge setiri,

<sup>57-60</sup> ne nunda geka imboe use koko sise, nenda dengoro ungoi gajedo sumbu nu sanduduseri. Sandi budo era, reighi Jerusalem isaghada buvudo, aminda fetedo Stephen fugetero endada dudurusira. Duriri, gegenembo aji sisera aimi, nenda tamo asugari kosedo, gimasa eninda ata duruda dabade useri. Gimasa resena einda javo mo Saul ri. Amingedo, Stephen ghamanai doruseri. Dorero, Stephen sisira, “Bajari Iesu, nanda asisi bu yasi!” aminge sedo, nu kauboi dadariguse beka mindafu sisira, “Bajari, ari eko oroko namokena erera emo, kote do!” aminge sedo nu ambududurusira.

## 8

<sup>1</sup> Stephen ambiri gido, Saul nu ivuga usira.

*8:1-3 Saul Iesu Da Dorevarekena Fakarago Usira.*

Sifo daba aminda, evetu genembo mendeni Jerusalem aminda eredo, Iesu da natofokena fakarago use, bouvu muteoro mema itatamedo ghuseri. Natofu isambu Frovensi Judia a Samaria aminda oju use, reighi nunda nunda sufuseri. Etero, Iesu da ambo jimbi 12 ainembo fefetuseri.

<sup>2</sup> Stephen ambiri gido, gegenembo mendeni God tumondusera aimi eredo era, Stephen budo era furuguseri. Aminguse, koko sise dimbia sorara useri.

<sup>3</sup> Avata genembo Saul, Iesu da natofu dari amboro dae sedo, nenda kambo isambu beje teredo, Iesu da evetu genembo ava sandido mando jokáda ghe jumbu buvudo, budo ira diburada fifitegusira.

*8:4-25 Frovensi Samaria Aminda, Iesu Da Bino Sedo Ghuseri.*

<sup>4</sup> Iesu da natofu oju use sufusera setena amo, ne Jerusalem dodo reighi mendeni mendeni aminda ya, Iesu da Bino ava sedo ghuseri.

<sup>5</sup> Amingedo, Philip nu eredo ira, reighi Samaria aminda buvurusira. Buvudo irise, God nange nangedo Evetu Genembo da Koro+ dirigitiri fusira ava, Samaria embokena vironu sedo ghuseri.

<sup>6-7</sup> Vironu seari, evetu genembo totorugedo ghusera amo, Philip da geka ava ningi gogoghombedo ghuseri. Philip nu ari mendeni mendeni eari, evetu genembo ne jo gae iriara ava, nenda gitida sireari gi dudukughedo ghuseri. A sukaru barago ondido ghuseri. Philip seari, sukaru koko sise evetu genembo digari ainda jokáda ghe vose darigedo ghuseri. A evetu genembo mendeni ungo ata dimbaride, a kotugo mendeni daguna ábarago seari jejebugedo ghuseri.

<sup>8</sup> Aminguse, evetu genembo reighi Samaria aminda ivuga edo ghuseri.

<sup>9-10</sup> Reighi daba aminda, genembo eni javo Simon fira iriri, Philip amboda fusira. Simon resena emo, nu kae jijighuse fiyogha fusedo simbora eari ava gido, evetu genembo dudukughedo ghuseri. Nu, “Na genembo eko eniri,” seari, evetu genembo kokotofu a sabua+ amo, isambu nunda geka ava ningido ghuseri. Ningido, Simon nu God da fakina budo aimi ariá sise, nu kaka edo ghuseri.

<sup>11</sup> Nu sifo ghousa ava, kae jijighuse fiyogha fusedo simbora eari, evetu genembo gi dudukughedo ghuseri. Ava sedo, nu rea sedo ghuseri ava, ningi gogoghombedo ghuseri.

<sup>12</sup> Avata Philip amboda fira, God da Bino Eveva ava sisira. Siri, God namonde nange kaifa eraira ava ningido, Iesu Keriso da javo ava ningido, a kotugo God nange Iesu dirigitiri fusira ava ningido, evetu

genembo Philip da geka tumonduseri. Tumondedo setero, Philip nu gegenembode a evevetude dabade budo bafataito usira.

<sup>13</sup> Simon numbarago, Philip da geka ava ningido tumondusira. Tumondedo setiri, Philip Simon barago bafataito usira. Etiri, Simon nu sifo ghousa Philip da amboda deinghedo ghusira. Philip nu tano mendeni mendeni a ari fakina mendeni mendeni eari, Simon nu jo gae ireira ava, nunda gitida siroreari gi dudukughedo ghusira.

<sup>14</sup> Iesu da ambo jimbi Jerusalem aminda irise, Frovensi Samaria embo nangedo God da Geka ava ningi tumondedo ghusera ava ninguseri. Ningido, ne Peter nengae John ghae dirigetero, Samaria aminda iseri.

<sup>15</sup> Era buvudo, Asisi Kakara nu, evetu genembo tumondusera aikena vose asugare dae sedo, benunu siseri.

<sup>16</sup> Ainda beká mo: Philip ne Iesu da javoda bafataito usira, avata Asisi Kakara nemokena jo vose asugae usira.

<sup>17</sup> Aindae benunu sise, Peter nengae John ghae ungo jiroda fitero, Asisi Kakara nemokena vose asugeteri dubo kotiseri.

<sup>18</sup> Ambo jimbi etoto naká nengae, nenda ungo evetu genembo da jiroda fitero, Asisi Kakara vose asugusira amo, Simon nu gosusira. Gido, nu Peter nengae John ghaekena, ainda fakina ava bari dae sedo, moni mutari sisira.

<sup>19</sup> Sedo, nu eminge sisira, “Nenda fakina ava nandae bofuvu! Nanda ungo evetu genembo da jiroda fitono, Asisi Kakara nemokena vose foa asugare dae sise resena.”

<sup>20</sup> Aminge setiri, Peter numokena ghoghora sedo sisira, “Ni monighae dabade ambaso dae resena. Ni God da joba ava, jo monii ombae aresa!

<sup>21</sup> Ninda janje jokáimi, God jo tumondae eraesa ava sedo, ni ajagha bekári. Ni namonde dabade jo deinghae arera.

<sup>22</sup> Ninda ari eko ava vujege dodo, ni Bajarikena benunu saso ninda ari eko kote doyare!

<sup>23-24</sup> Ni namanenda fakina gosuse, dighighi beká ava eresa. Satan ninda dighighi ari aimi, bundetiri iresa ava eregosena,” aminge setiri, Simon nu eredo Peter nengae John ghaekena mino sisira, “Setesa ava, erama isagha eure dae sedo, Bajarikena nandae benunu sevu!” aminge sisira.

<sup>25</sup> Ainda amboda, Peter nengae John ghae, Bajari ne nange sonembusira ava osa sise, Bajari da Geka ava vironu siseri. Setero dadabetiri, Peter nengae John ghae eredo jovereghe Jerusalem aminda ise, emboro soroda ne Frovensi Samaria aminda, reighi mendeni mendeni aminda teredo, God da Bino Eveva ava vironu sedo ghuseri.

#### *8:26-40 Philip Ethiopia Embo Eni Bafataito Usira.*

<sup>26</sup> Amboda God da aneya Philip kena sisira, “Ni simbugedo vose yasi, reighi uvu irae da vasa aminda emboro eni tambaresa. Emboroá sovenikena aira, Jerusalem buvira, a sovenikena aira, Gesa buvira, aminda buvu fete gi!” aminge sisira.

<sup>27-29</sup> Setiri, Philip eredo ise, Ethiopia embo eni firi gosusira amo, nunda kotofu evetu javo Candace, ava sonembedo ghusira. Nunda moni isambu, genembo aikena muteari kaifa edo ghusira. Avori, genemboá nunda reighi dodo Jerusalem ira, God kena banungedo, jovereghe firi Philip gosusira. Genembo nunda ghaka hosiimi jumburaira, (o sariot seraera) aminda anumbirise, God da feroveta Isaiah da buku ava, tegutiri Philip gosusira. Gosiri, Asisi Kakara Philip kena sisira, “Yasi, sariot (chariot) ainda tinguda deinghase!”

<sup>30</sup> Aminge setiri, Philip ere sumbu buvudo, genembo Isaiah da buku ava tegutiri ningusira. Ningido sisira, “Geka teguteresa amo, ni mino ereruresa?” aminge setiri,



<sup>31</sup> moni kaifa kato sisira, “Ni na sonembaresa amo, geke teguterena einda beká mo kasama arena,” aminge sedo, nu, Philip viti anumbare dae sisira.

<sup>32</sup> Genemboá nu geke evia tegutusira:

“Sino fuka sifi (sheep) ava dedo, ojari dae budo yarera amo, nu beka jo sae arira.

A sifi da mamandi (lamb) ainda buroro bambari dae sedo, bu yarera amo, beka jo sae arira.

Kau daba aminga ava, Genembo aikena fakarago ero, nu jo tofo sonembari dae sise,

geka eni sae usira.

<sup>33</sup> Numo dorusera amo, nu kau bate eni ava dari da kaugo useri.

Nundae ari ekoko use, jo evevada ijujae useri.

Nu detero ambududurusira ágido, nunda sasingu a imemesiri da geke mave enii jo sari da kaugo iraeri,”

geka evia tegetiri dadabusira.

<sup>34</sup> Dadabetiri, moni kaifa kato Philip kena sisira, “Se ningone! Isaiah tofo nundae sisira, ai? Genembo enidae sisira?”

<sup>35</sup> Aminge setiri, Philip nu Isaiah da geke aminda tuturo edo, Iesu da Bino Eveva ava numokena ijuguse sisira.

<sup>36</sup> Aminguse, emboroda uvu eninda buvurutuseri. Buvudo, moni kaifa katoi sisira, “Uvu irira ava sedo, namo bafataito aso dae resena.”

<sup>37</sup> Aminge setiri, Philip sisira, “Ni tumonde gogogho aresa amo, na ni bafataito arena,” setiri, genemboá sisira, “Na tumonderena, Iesu Keriso nu God da Mandi bekári,” aminge sedo,<sup>37</sup>

<sup>38</sup> nunda saramana kakatokena setiri, sariot (chariot) jighi fetetiri, genemboá Philip ghae dabade vosera uvuda vosedo, Philip genemboá bafataito usira.

<sup>39</sup> Edo, nengae uvuda ghe jovereghe vitéro, Bajari da Asisi Philip kena vose asugetiri Philip nu manjisira. Manjetiri, genemboá jo Philip sekago gae usira avata, nu emboroda ivugaghae isira.

<sup>40</sup> Asisi Kakara Philip budo ira, reighi Asdod aminda fitiri, nu kasama usira. Kasama edo, Philip eredo reighi isambu aminda ise, God da Bino Eveva ava sedo ghusira. Vironu sido ira, Sesaria aminda buvurutusira.

## 9

### *9:1-19 Saul Nu Iesu Tumondusira.*

<sup>1-2</sup> Philip nu amingiri, Saul nu Iesu da natofo dari amboro dae sedo ghusira. Aminge sedo, nu fristi+ da giti jigharikena ira benunu sisira, “Na mavejori a, na ni kau nange nange sonembaraena ava, reta jokáda gembaso budo, reighi Damascus aminda yama, namonde Israel embo da dengoro indari kambo+ mendeni mendeni aminda, ijugaono gido, na sonembarera. Amingaso, na Iesu da evetu genembo eni Damascus aminda tambarena amo, sandi bundedo bu jovereghe foa, Jerusalem eminda buvarena.”

<sup>3</sup> Aminge setiri, fristi+ sonembetiri, Saul nu eredo Damascus aminda isira. Ira, reighi buvari dae iri, usasa mindafu utuda ghe vose fira numokena jaraghusira.

<sup>4-5</sup> Nu du fasedo, beka niningusira, “Saul, Saul! Ni redae namokena dubo mema futuse, fakarago eraesi?” ava ningido, Saul nu sisira, “Arie, Bajari! Ni mavejori?” setiri, beka sekago sisira, “Ni genembo-kena mema futuse fakarago eraesa amo, namori. Na Iesu ri.

<sup>6</sup> Avori, ni oroko eredo yasi! Reighi jokáda teredo, ni rea aresa ava, saoro ningase!” aminge setiri niningusira.

<sup>7</sup> Gegenembo mendeni Saul de dabade isera, ne beka dukava

<sup>37</sup> **8:37:** Tuturo 37 da geke Baiboro (Bible) mendeni ainda jokáda fitero irira. O Baiboro (Bible) mendeni ainda jokáda, jo fitoro teraeri.

nininguseri, avata beka mave sisira, ne jo gaeri.

<sup>8</sup> Geka setiri dadabetiri, Saul nu eredo diti fangutusira avata, diti sovasova etiri rejo eni jo gaeri. Etiri gido, Saul da kokomana nu ungodabudo era, reighi Damascus buvurutuseri.

<sup>9</sup> Buvudo irise, Saul nu uvu bayau jo mindae a rejo eni jo gae iriri, sifo etotodaba naká dadabusira.

<sup>10</sup> Iesu da dorevare eni javo Ananias, Damascus aminda irise, nu Bajari diti mokoi gosiri, numokena sisira, “Ananias, irese!” setiri, Ananias sisira, “Bajari, na evia irenere.”

<sup>11</sup> Setiri, Bajari numokena sisira, “Ni, ere yasi emboro eni javo ‘Dambu’ seraera, aminda yama Judas da kamboda teredo, Tarsus embo genembo javo Saul seraera, ava ategi e ningase! Nu aminda banunguse irira.

<sup>12</sup> Saul nu banunguse ainda jokáda, genembo javo Ananias ava, diti mokoi gira. Amo, nine teredo, Saul da diti eveva are dae sedo, ungoi tamonda jijigheso gira.”

<sup>13</sup> Bajari aminge setiri, Ananias sisira, “Arie, Bajari! Evetu genembo digari ambari eko Saul dae osa seraera. Nu Jerusalem aminda sifo ghousa evia ari ekoko digarigo ava ninda natofokena eraira.

<sup>14</sup> Nu oroko fristi+ da giti jighari ainda javoda refira. Evetu genembo ninda javo sise tumonderaera ava, sandi bundari dae sedo refira.”

<sup>15</sup> Aminge setiri, Bajari Ananias kena sisira, “Ni yaso dae resena! Omo, namo sonembare dae sedo, nane gateguseni. Nu nanda javoda nanda Bino sirurari gitofu, enda da kokotofu, a ninda natofo Israel embo ningi tumondaoro dae sedo, gateguseni.

<sup>16</sup> Na tofo mandi ijugururono, nanda javoda, mema a bouvu mavegoá itatamarira ava, nu kasama arira.”

<sup>17</sup> Aminge setiri, Ananias nu eredo ira kamboda teredo, ungoimi Saul da

tamonda jijighuse sisira, “Nanda namendi Saul, Bajari Iesu ni emboroda ise gosusesi. Nune na dirigetiri ojeni. Ninda diti eveva are dae sedo, a Asisi Kakara nimokena vose asugari dubo kotaso dae sedo, Iesu na dirigetiri ojeni,” aminge sisira.

<sup>18</sup> Setiri, roera eni oka anofafa da kaugo ava, Saul da ditida ghe dudurusira. Duriri, diti eveva etiri, Saul eredo benunu setiri nu bafaitaito usira.

<sup>19</sup> Etiri, Saul bayau mindi jebugedo, fakina usira.

*9:20-25 Jusi Embo Da Babojegari Janje Ekoko Etero Gido, Saul Sufusira.*

<sup>20</sup> Saul sifo mendeni Damascus aminda Iesu da natofode irise, Jusi embo da dengoro indari kambo+ aminda ya foa ghuse, Iesu da Bino ava vironu sedo ghusira. Aminguse, “Iesu nu God da Mandi bekári,” ava sedo ghusira.

<sup>21</sup> Seari evetu genembo ava ningi dudukughedo ghuseri. Dudukughuse, eminge sedo ghuseri, “Genembo emo kote givu! Jerusalem aminda evetu genembo Iesu da javoda tumondedo ghusera ava, genembo eniimi dearu ambudo ghusera amo, genembo eviri tano? A kotugo, genembo enii Iesu da dorevare eminda sandido, God da fristi+ da kokotofukena mutari dae sedo fumutara amo, genembo daba eviri, tanojo? Avata, nu nange geka dombu eni resi?”

<sup>22</sup> Aminge sirureoro, Saul nu fak-inaghae vironu sedo ghusira. God nu Iesu dirigetiri fusira ava, ijuge gogoghombetiri ningido, Jusi embo reighi Damascus aminda iriara aimi, bunedo beka dadabuseri.

<sup>23</sup> Sifo mendeni dadabetiri ainda amboda, Jusi embo ne Saul daoro ambare dae sedo, totoruge manaka garuseri.

<sup>24</sup> Manaka garusera avata, ne rea sisera amo, Saul nu niningusira. Avori, ne sifo a tumba ghousa ava, reighi ainda furu da guro békada Saul sandi daoro ambare dae sedo, fete kaifa edo ghuseri.

<sup>25</sup> Aminguse irero, tumba eninda, Saul da kokomana eredo, nu budo roera kanda da kaugo aminda vendido tino edo, furu tokada fitero, isaghada vose fetedo isira.

*9:26-31 Saul Ira, Jerusalem Aminda Buvurutusira.*

<sup>26</sup> Saul nu Iesu da ambo jimbide tatari dae sedo, ira Jerusalem buvurutusira avata, nu Iesu da ambo jimbikena usira ava, ne jo tumondae useri. Ainda tuka mo: nu giti nemokena fakarago edo ghusira ava sedo, ne nundae oju useri.

<sup>27</sup> Oju ero gido, Barnabas nu eredo, Saul sonembe budo ira, Iesu da ambo jimbi 12 aikena teteruseri. Teredo, Saul nu nange nange emboroda fetedo Bajari gosusira, a Bajari Iesu nu nange Saul kena geka sisira ava, Barnabas nemokena ijugusira. Ijuguse, Saul nu nange nange Jusi embo dae jo oju ae edo, Iesu da javoda Damascus aminda vironu sedo ghusira ava, ijuguse setiri ne nininguseri. Barnabas aminge setiri dadabetiri,

<sup>28</sup> Saul nu Iesu da natofokena teredo, nemonde dabade irise ya foa ghuse, oju jo ae, Iesu da javoda Jerusalem aminda vironu sedo ghusira.

<sup>29</sup> Amingedo, Saul nu eredo, Israel embo mendeni Greek geka ava sedo ghusera, ainde dabade geka se ningido beisiga useri. Beisiga edo, ne Saul daoro ambare dae siseri.

<sup>30</sup> Setero, Iesu da dorevare mendeni ava ningido, Saul budo reighi Sesaria aminda vosera, dirigetero Tarsus aminda isira.

<sup>31</sup> Sifo aminda, frovensi etodaba naká, Judia, Galilee, a Samaria aminda, dara o dubo mema eni Iesu da dorevarekena jo siroraeri. Asisi Kakara ai sonembiri, Iesu da natofo dubo kotedo Bajari kakara use, natofo digarigo useri.

*9:32-43 Peter Setiri, Evetu Genembo Etoto Naká Jebuguseri.*

<sup>32</sup> Peter nu natofo kaifa use, reighi isambu aminda ya foa ghedo

ghusira. Umbu eni nu eredo, God da natofo reighi Lida aminda gari dae sedo, esa isira.

<sup>33</sup> Ira buvudo, Peter nu genembo ungo ata dimbaride javo Aeneas ava tafusira. Aeneas resena emo, daguna edo ghaeko 8 ava jo deinghae fasirá ghedo ghusira.

<sup>34</sup> Tambudo, Peter numokena sisira, “Aeneas, Iesu Keriso setiri ni jebugetesi. Ni eredo, ninda ghaito gaghe budo yasi!” aminge setiri, Aeneas jebugedo erorusira.

<sup>35</sup> Eretiri, evetu genembo isambu reighi Lida a Saron aminda, numoá gido, dubo jovereghetiri Bajari tumonduseri.

<sup>36</sup> Reighi Jofa aminda, evetu eni javo Tabitha anakora Iesu tumonduse irei. Evetu ainda javo Greek gekaimi, Dorcas sedo ghuseri. Nune sifo ghousa evetu genembo sonembuse nunda gugua aimi budo, evetu genembo makasi embo ava sonembedo ghusira.

<sup>37</sup> Sifo aminda, nu kae budo ambududurusira. Ambiri, natofo ne ambari evetu ava budo tamo gute simbugedo, kambo eninda vasa duruda do bu vitido, vasa ikáda fifituseri.

<sup>38</sup> Reighi Jofa ghedo ya Lida buvari jo soka iraeri. Peter nu Lida aminda esa fusira ava ningido, Iesu da natofo Jofa aminda iriara aimi, eredo gegenembo etoto naká dirigetero era, Peter kena buvudo siseri, “Totofu, namonde yaore!” aminge setero,

<sup>39</sup> Peter nu eredo nemonde iseri. Era buvero, natofo Peter budo era, kambo ikáda vivituseri. Dorcas roriri sonembedo ghusira aimi, isambu fera Peter kena buvurutuseri. Buvudo sorara use, Dorcas tamo asugari fire futusira ava budo, Peter kena ijuguseri.

<sup>40</sup> Ijugetero, Peter nu setiri, evetu genembo eredo isambu era buvurutuseri. Buvero, Peter evetu ambari ainda dengesida kauboi dadarigedo banungusira. Banungetiri dadabetiri, jovereghe nunda javo beká ava sisira, “Tabitha, ere!” setiri, eve-

tuá diti fangedo, Peter a gosuse ere anumbusira.

<sup>41</sup> Anumbetiri, Peter ungo siregedo nunda ungodá bu jighiri erorusira. Eretiri, Peter Iesu da dorevare isambu roriride dabade kori setiri fera buvero, Dorcas budo nemokena futusira.

<sup>42</sup> Etiri, osa setero reighi Jofa aminda evetu genembo isambu ningido, mokogo Bajari tumon-duseri.

<sup>43</sup> Etero, Peter Jofa aminda itako ghousa nunombo Simon kena irei. Simon resena emo, nu sino fuka da anoso ava budo, fiyoghái daveari takegha eari, ava budo evetu genembo mendenikena muteari monimi ombudo ghuseri.

## 10

*10:1-33 Peter Eredo, Gitofukena Isira.*

<sup>1</sup> Rome embo da isoro kakato da giti jighari eni javo Cornelius, reighi Sesaria aminda irei. Nunda isoro kakato ainde dabade javo jijighusera amo, ne Rome embo da frovensi da javo ava kotise, 'Italy embo da isoro kakato' da javo mo, ava jijighuseri.

<sup>2</sup> Genemboá nunda evetu a gh-agurude dabade, ne God tumondedo ghuseri. Nu sifo ghousa ava, God kena banungedo ghuseri. Aminguse, nu Jusi embo da makasi embo ava, sonembedo ghuseri.

<sup>3</sup> Sifo eni ungo bu 3 koroko iri, Cornelius nu, God da aneya diti mokoi gosusira. Giri, aneya numokena fira ategi usira, "Cornelius!"

<sup>4</sup> Setiri, Cornelius dudukughedo oju use fainghe gi gogoghombuse sisira, "Bajari, nangeti?" setiri, aneya numokena sisira, "Ni sifo ghousa evia banunguse evetu genembo sonemberaesa; aindae sedo, God ni erekotira.

<sup>5-6</sup> Avori, gegenembo mendeni dirigaso Jofa aminda yama, genembo Simon Peter esa ojira irira, ava ategi e ningore! Nu nunda nunombokena esa fusira. Nunda

nunombo da saramana mo, nu sino fuka da anoso ava, bu fiyoghái daveari takegha eari budo, evetu genembo mendenikena muteari monimi omburaera. Nunda kambo mo eva tinguda irari tambarera."

<sup>7</sup> Aminge sedo, aneya ere dodo iri, Cornelius nu aghi mutiri, nunda saramana kakato etoto a isoro kato dabako ainde dabade fera teteruseri. Isoro kato amo nu God tumonduse, Cornelius sifo ghousa ava kaifa edo ghuseri.

<sup>8</sup> Fera teretero, geka aneya numokena sisira ava, Cornelius nemokena setiri ningero, dirigitiri ne reighi Jofa aminda iseri.

<sup>9</sup> Ne era soroda avido, sifo atetiri era reighi Jofa buvari dae ero, Peter nu ere kambo vasa duruda dodo ira, banungari dae sedo viti kambo ikáda<sup>9</sup> anumbusira.

<sup>10</sup> Anumbedo ighoi etiri, bayau bu furoro mindari dae sisira. Setiri, bayau itutero, Peter nu anumbirise, nunda diti mokoi gosusira.

<sup>11</sup> Gosiri utu afigetiri roera eni embo mindafu asiimi tingu sovenisoveni dighido, fitero vose firi gosusira.

<sup>12</sup> Embo ainda jokáda, sino fuka, jingabu, kaisi ararafa, a rika ava vendiri vose firi gosusira.

<sup>13</sup> Gosiri, beka eminge siri niningusira, "Peter, eredo, de oje mindi!"

<sup>14</sup> ava ningido, Peter sisira, "Tefo, Bajari! Nine seteso namane Israel embo roera eregosena evia, reeta use jo mindae eraera. Roera emo ekori. Na itako jo mindae eraena," aminge setiri,

<sup>15</sup> beka sekago sisira, "God roera mindaso dae sarira amo, erá ekova seose!"

<sup>16</sup> Umbu etoto kau daba aminga ava, siroretiri giri ainda amboda, emboá jovereghe utuda vitisira.

<sup>17</sup> Vitíri, Peter dudukughuse, geka a roera gosusira ainda beká ava tambari dae kotisira. Kotise anumbiriri, gegenembo Cornelius dirigusira

<sup>9</sup> 10:9: Afige, **Matthew 24:17** ainda duruda tege garesa.

aimi, fera kamboá tambudo, guro bekada fetedo

<sup>18</sup> kori siseri, “Genembo Simon Peter esa fusira amo, eminda irira, ai?”

<sup>19</sup> Aminge setero, Peter nu diti mokoi gosusira ainda tuka ava kotiri, Asisi Kakara numokena sisira, “Peter, ningi! Gegenembo etodaba naká, nimo tambari dae sedo ojeri.

<sup>20</sup> Ere vose! Erá oju eose! Nane seteno ojeri. Ava sedo, ni nemonde dabade yareva,” aminge setiri,

<sup>21</sup> Peter ere vosedo, gegenembo aikena sisira, “Genembo tambari dae ojeva amo, namori. Ne redae ojighevu?”

<sup>22</sup> Aminge setiri, ne siseri, “Namanenda giti jighari Cornelius setiri namane ojigheri. Nu genembo evevari. Nu God tumonderaira. A Jusi embo isambu numoá kakara eraera. Namane foa ni budo, jovereghe numokena yaoro dae sedo, God nunda aneya dirigitiri numokena buvudo aminge sisira. Ni ya numokena gekea rea erekotesa ava saso dae sisira.” aminge setero,

<sup>23</sup> Peter sisira, “Aвори, terevu, namonde avore!”

Setiri teredo ravisera, sifoghae eredo Peter de dabade iseri. Iesu da dorevare mendeni reighi Jofa aminda iriara ábarago eredo, nemonde dabade iseri.

<sup>24</sup> Era, soroda avido, sifo atetiri era, Sesaria aminda buvurutuseri. Cornelius nu Peter kaifa use setiri, nunda natofo nunda kokomanade dabade numokena fera totoruguseri.

<sup>25</sup> Peter kamboda tetetiri, Cornelius ira numokena buvu kauboi dadarigedo tumo bainghusira.

<sup>26</sup> Etiri, Peter Cornelius ungodá bu jighiri eretiri sisira, “Ere fete! Nambarago genembo bekári. Na kau nimongori.”

<sup>27</sup> Aminge sise, Peter nengae Cornelius ghae era, evetu genembo totorugusera aikena teredo,

<sup>28</sup> Peter nemokena sisira, “Namanenda agho dari eminge resira. Namane Jusi embo gitofukena, jo viti umo use avae eraera, o gekea jo

dabade se ningae eraera. Avata God ijugetiri kasama useni: evetu genembo isasambu God setiri siroruseri. Ava sedo, jo gitofu iraeri.

<sup>29</sup> Na ava kotise anumbireno, nenda aghi kakato era buvudo, na furono dae setero, imboe a oju jo ae, na taká refena. Ava sedo, sevu ningone! Ne redae uju edo setevo na ojigheni?”

<sup>30</sup> Aminge setiri, Cornelius sisira, “Na onde sifo evavaga, ungobu 3 koroko iri banunguse ireno, genembo eni fira isagha usira. Genembo ainda tamo asugari mo, usasa bekári.

<sup>31</sup> Aimi namokena sisira, ‘Cornelius, ni banunguse evetu genembo sonemberaesa ava gido, God ni erekotira.

<sup>32</sup> Gegenembo mendeni dirigaso ya reighi Jofa aminda, genembo javo Simon Peter, ava ategi e ningore! Genemboá nu nunda nunombo Simon kena esa ojira aminda irira. Simon resena emo, nu sino fuka da anoso ava simbuge budo monidae oriri eraira. Ya nunda kambo eva tinguda irari tambarera,’ aminge setiri,

<sup>33</sup> na eredo ni aghi eteno, namoá kotedo refesa. Namane oroko eminda, God da dombuda totorugeteri. God nimokena rea sisira ava, saso ningari dae sedo, aghi eteno refesa.”

### *10:34-43 Peter Da Geka Eviri.*

<sup>34</sup> Setiri, Peter eredo sisira, “God da dombuda evetu genembo isasambu inonori, ava oroko kasama eteni.

<sup>35</sup> Mave God kakara use God da uju ava arira amo, nu God da genembo o God da evetu arira. Tamo foyago, ingago, a yaghogo, ne isasambu inonori. Namane Israel embo a namanenda gitofu, namonde isambu God da dombuda inonori.

<sup>36</sup> God nange nange giti Israel embokena nunda gekea futusira ava niningusevu. A God nange nange evetu genembo isasambu da ari ekoko kote doyari dae sedo, Bajari

Iesu Keriso dirigetiri fusira, a nunda Bino Eveva, ábarago niningusevu.

<sup>37</sup> Ne kasama ereva: John nu bafataito ari da geka sisira ainda amboda, God setiri nunda saramana tomanako Galilee aminda giti ivegedo ira, Frovensi Judia aminda barago mindafu usira.

<sup>38</sup> Ne Nasareth embo javo Iesu, ainda bino ava niningusevu. God nu nange nange nunda fakina a nunda Asisi Kakara mutiri, vose Iesu kena asugusira, ava niningusevu. Kotugo Iesu nu Asisi Kakara da fakina budo aimi, evetu genembo sonembuse setiri ne, Satan imi bundetiri iriara ava, darigetiri ne jejebugusera ábarago niningusevu.

<sup>39</sup> Iesu nu Jusi embo da reighi aminda, a Jerusalem aminda rea etiri siroretiri gosusera ava, namane osa sari dae erera. Jusi embo ne Iesu budo arafa detero ambududurusira.

<sup>40</sup> Avata sifo etodaba naká dadabetiri, God setiri Iesu ambarida ghe jebuge eredo fira, isagha usira.

<sup>41</sup> God anakora namane nunda bino ava, osa saoro dae sedo gategusira. Ava sedo, Iesu nu natofo isambukena jo isagha aeri. Nu ambarida ghe jebuge eredo, namanekena fira isagha etiri, nu namonde dabade uvu bayau riseri.

<sup>42</sup> Amingedo, namane God da Bino Eveva budo yama vironu saoro, natofo ningoro dae sisira. A kotugo, nu sifo amboda evetu genembo, ambari embo a jebuga embo isasambu ijunedo, nenda ari eveva a ari ekoko da mino mutare dae sedo, God numoá gategusira ábarago, namane saoro natofo ningoro dae sisira.

<sup>43</sup> A God da feroveta barago Iesu dae eminge gembudo ghuseri:

‘Mave numo tumonduse nunda Geka ningarira amo, nunda javo da fakinaimi, God nunda ari ekoko kote doyarira.’ ”

*10:44-48 God Nunda Asisi Kakara Mutiri, Jusi Embo Da Gitofukena Vose Asugusira.*

<sup>44</sup> Peter aminge siri, God da Asisi Kakara vose evetu genembo Peter da Geka niningusera aikena asugusira.

<sup>45</sup> Avori, God gitofokena barago nunda Asisi Kakara mutiri vose asugusira amo, Iesu da dorevare mendeni Israel embo reighi Jofa ghedo fusera aimi gido, dudukughuseri.

<sup>46</sup> Gitofuá God dae sakai sero aviva jovereghetiri, ne geka dombu eni dombu eni jo giti kasama ae usera aimi, God da sakai siseri.

<sup>47-48</sup> Amingero, Peter nunda kokomanakena sisira, “Givu! Kau God namondekena nunda Asisi mutiri vose asugetiri dubo kotisera aminga ava, namondeda gitofu eikena nunda Asisi Kakara mutiri vose asugetiri dubo erekotera. Ava sedo, namonde ne bafataito arera amo, mave amboda jo ghoghora sae arira tano?” aminge sedo setiri, ne eredo nenda gitofu Iesu da javoda bafataito useri. Etero, Cornelius mane ne, Peter sifo mendeni nemonde dabade irari dae siseri.

## 11

*11:1-18 God Rea Gitofukena Usira Ava, Peter Jerusalem Aminda Osa Sisira.*

<sup>1</sup> Jusi embo da gitofu nange nange God da Geka ningido tumondusera ava, Iesu da ambo jimbi a nunda natofo isambu Frovensi Judia aminda iriara aimi, nininguseri.

<sup>2</sup> Ava ningido, evetu genembo mendeni kotiseri, “Avori, namondeda gitofu ne Iesu da natofo ari dae sarera amo, nenda vika mendo anoso ava gafugarera. Aminguse, ne namonde Israel embo da kaugo edo irarera.” Aminge kotise, ne Peter kaifa useri. Kaifa ero, Peter ira nemokena Jerusalem aminda teterusira. Teretiri, ne eredo ghoghora siseri,

<sup>3</sup> “Ni redae gitofukena esa isesi? Ne nenda vika mendo anoso jo gafugae irero, ni nemonde dabade anumbedo bayau riseva amo, geka bekári, ai?”

4-5 Aminge setero ningido, Peter eredo, nu rea usira, a God rejoá setiri sirorusira ava, ijugari kasama aoro dae sedo, geke sisira, “Nanda nano namendi, na tuturoda ghe sido yarena. Na reighi Jofa aminda banunguse, diti mokoi gosuseni. Utu afigetiri, na roera eni embo mindafu avavaga gosuseni. Embo amo, tingu sovenisoveni dighido fitero vosefira nanda dombuda fefetusira.

6 Fetetiri, aında jokáda fuge gosusena amo, sino fuka, jingabu, kaisi ararafa, a rika ava gosuseni.

7 Goseno, beka namokena eminge siri nininguseni, ‘Peter, eredo de oje mindi!’

8 Setiri, na siseni, ‘Tefo, Bajari! Nine seteso namane Israel embo roera eregosena evia, reeta use jo mindae eraera. Roera emo ekori. Na itako jo mindae eraena,’ aminge seteno,

9-10 beka sekago utuda ghe sisira, ‘God roera mindaso dae sarira amo, erá ekova seose!’ aminge sedo, umbu etodaba naká geke daba ava sisira. Setiri dadabetiri, roera isambu jovereghe utuda vitisira.

11 Vitíri, gegenembo etodaba naká dirigetiri Sesaria ghedo fera, sifo daba aminda buvurutuseri. Kambo nane avido ghusena aminda fera buvurutuseri.

12 Buvurutero, Asisi Kakara namokena sisira, ‘Ni gitofudae erá dubo mema eose! Ni eredo, nemonde dabade yasivu!’ aminge setiri, namondeda natofo gegenembo 7 eminda fetirera aimi eredo, namane gitofude dabade reighi Sesaria aminda era buvudo, Cornelius da kamboda teteruseri.

13 Teretero, aneya nange teredo nunda kamboda fetirise, geke siri niningusira ava, Cornelius setiri namane nininguseri. Amo, aneya numokena eminge sisira, ‘Ni genembo eni dirige yama, genembo javo Simon Peter nu reda irira ava ategi e ningare!’

14 Nune geke sirurari ningido, ninda natofode dabade tumondaovo

gido, God nenda ari ekoko kote doyarira,’ aminge setiri dadabetiri, Cornelius nu aghi etiri na numokena iseni.

15 “Ena buvudo, geke seno ainghae dabade, Asisi Kakara anakora vose evetu genembokena asugerirare. Amo nu, giti namondekena vose asugusira. Kau daba aminga ava nu, evetu genembo gitofu reighi Sesaria aminda totorugusera, aikena vose asugusira.

16 Vose asugetiri, na Bajari da geke evia kotiseni:

‘Kau John Bafataito Ari Kato uvuimi, bafataito edo ghusira, kau daba aminga

ava, na amboda Asisi Kakara nemokena mutarena,’

geke ava firi kotiseni.

17 Namonde Jusi embo Bajari Iesu Keriso tumondero gido, God namondekena nunda Asisi Kakara mutiri vose asugusira. Kau daba aminga ava, God namondeda gitofukena nunda Asisi Kakara mutiri vose asugusira. Amo isaghari. Ava sedo, God rejoá usira ava gido, na God da uju ava jo buregaeri.”

18 Aminge setiri ningido, evetu genembo Jerusalem aminda totorugedo ghoghora sisera amo, ne ghoghora dodo, God dae sakai sise, eminge siseri, “Namonde Jusi embo da gitofu nange jebugaetera aindae, God emboro rerebusira. Kau namonde avavaga, ne God tumonduse nenda ari ekoko vujegarera amo, ne jebugedo evovodae irarera,” aminge siseri.

*11:19-30 Evetu Genembo Antiok Aminda, Iesu Da Bino Ningido Tumonduseri.*

19 Stephen detero ambududurusira aında sifoda, Iesu da gitofu ne eredo, Iesu da natofokena fakarago use bouvu futurureoro mema itatamedo ghuseri. Amingedo, Iesu da dorevare oju sumbudo reighi mendenikena iseri. Mendeni oju sumbudo era reighi Foenisia aminda buvurutuseri. Buvudo, Iesu da Bino

nenda natofo Israel embokena seoro ningido ghuseri.

<sup>20</sup> Kotugo, Iesu da dorevare mendeni, Cyprus embo a Sairin embo, ne eredo era Antiok aminda buvudo, Jusi embo da gitofukena Bajari Iesu da Bino Eveva ava, vironu sedo ghuseri.

<sup>21</sup> Ne God da fakinaimi vironu seoro ningido, evetu genembo digari Bajari tumondedo ghuseri.

<sup>22</sup> Amingero ningido, Iesu da natofo Jerusalem aminda eredo, Barnabas dirigetero Antiok aminda isira.

<sup>23</sup> Ira buvudo, God nange nange es-  
imbugetiri natofo dubo kotise ivuga  
usera ava gido, nu ivuga edo sisira,  
“Dubo joká isambu Bajarikena fu-  
tuse irivu!” aminge sisira.

<sup>24</sup> Barnabas resena emo, nu genembo evevari. Asisi Kakara numokena vose asugetiri, nu dubo kotise tumonde gogoghombedo ghusira. Ava sedo, nu geka seari ningido, evetu genembo digari Bajari tumondedo ghuseri.

<sup>25</sup> Amingero, Barnabas nu Saul tambari dae sedo, reighi Tarsus aminda isira.

<sup>26</sup> Ira buvudo, Saul tambu budo, nengae jovereghe fera reighi Antiok aminda buvurutuseri. Buvudo irero, Iesu da dorevare digari totorugeoro, Saul nengae Barnabas ghae ijuguse geka seoro ningido ghuseri. Amingero, ghaeko dabako dadabusira. Reighi Antiok aminda evetu genembo ne tuturo edo, Iesu da natofo isambudae, ‘Kuristini’ sedo ghuseri.

<sup>27-28</sup> Sifo aminda, God da feroveta Agabus a God da feroveta mendeninde dabade, Jerusalem ghedo reighi Antiok aminda iseri. Era buvudo, Agabus nu Asisi Kakara da fakinaimi eredo, amboda rea sirorarira, ainda bino ava isagha setiri, evetu genembo nininguseri. Geka evia sisira: baimara mindafu beká ava reighi isambuda sirorarira. (Amo, baimara Rome embo da koto-

fuko Claudius da sifoda sirorusira, aindae sisira.)

<sup>29</sup> Agabus da geka ningido, Iesu da natofo manaka garuse siseri, “Namonde nangedo namondeda natofo Frovensi Judia aminda irera, ava sonembareri? Namondeda irari aminda gosuse, sonemba mutoro yari baore!”

<sup>30</sup> Aminge sedo, moni dabade edo mutero, Saul nengae Barnabas ghae ava budo era, Iesu da natofo da babojegarikena mutero ruruseri.

## 12

*12:1-5 Kini (King) Herod Nu, Iesu Da Dorevarekena Fakarago Use, Bouvu Mutiri Mema Itatamuseri.*

<sup>1-2</sup> Sifo aminda, reighi Galilee da kini (king) javo Herod nu, eredo Iesu da dorevare mendeni aikena fakarago use, bouvu mutiri mema itatamuseri. Herod setiri, nunda mendenii John da koro James ava, kaiyaimi jetero ambududurusira.

<sup>3-4</sup> Ambiri, Jusi embo ava ningido ivuga useri. Ivuga ero gido, Herod setiri nunda isoro kakato era, Peter sandi budo Yisti (Yeast) Kanangara Ari da Kirumo+ da sifo aminda, diburada fiftuseri. Etero, dibura aminda kaifa kakato isambu 16 aimi Peter kaifa edo ghuseri. Goroto avononde ava inono gegenembo avononde aimi foama kaifa edo ghuseri. Herod nu Peter bu ya Jarige Yari da Kirumo+ ainda amboda, Jusi embo da dombuda koto ari dae sedo kotisira.

<sup>5</sup> Peter diburada iriri, ne kaifa edo ghuseri. Kaifa edo ghusera avata, Iesu da dorevare ne fakina edo God kena banungedo ghuseri.

*12:6-19 God Sonembetiri, Peter Diburada Ghe Fira Buvurutuseri.*

<sup>6</sup> Herod nu, Peter bu diburada fitado, Jusi embo da dombuda koto ari dae sedo, sifo fiftuseri. Ainda tumba daba aminda, kaifa kakato etoto naká aminda kaifa ero, Peter nu nenda soroda asi seiniimi (chains) ungodu bundetero ainghae fase avisira. Dibura kambo guro



békada, kaifa kakato mendeni kaifa edo ghuseri.

<sup>7</sup> Peter fase avíri, aneya fira is-  
agha iri, usasai Peter da vasa aminda  
janimbusira. Janimbetiri, aneya Pe-  
ter da tamonda jighido, deretiri diti  
fangutusira. Fangetiri, “Peter, ni  
totoi ere!” setiri, asi seiniá tofo  
vujegusira.

<sup>8</sup> Vujegetiri, aneya Peter kena  
sisira, “Ninda ifu dighari a ninda  
ata jogha, bu dighi simbuge yasi!”  
aminge setiri, Peter eredo amingiri,  
aneyá sisira, “Ninda tamo asugari  
asuge, nangae yaore!”

<sup>9</sup> Aminge setiri dadabetiri, Peter  
eretiri, aneya nu giti etiri nu ambo  
gaedo, nengae dabade diburada ghe  
buvári dae ise, Peter bunise kotisira,  
“Emo aturu erena, ai, bekári?”

<sup>10</sup> Kaifa kato eni emboro gaje  
fetiriri era darigedo, era kaifa kato  
eni sekago emboro gaje fetiriri  
darigedo, dibura da guro auriimi  
usera ainda békada buvurutuseri.  
Guroá afigaresa amo, ya isaghada  
buvudo, reighi Jerusalem aminda  
deingharsa. Aminda buvero, guro  
tofo mandi afigetiri, era isaghada  
buvudo nengae emboroda ise, aneya  
Peter da dombuda manjisira.

<sup>11</sup> Etiri, Peter kotisira, “Emo  
bekári. Bajari nunda aneya dirigetiri  
ojira, Herod da fakina buregedo, na  
diburada ghedo unumbe bu fitiri  
isaghada buveni. Herod da uju a Jusi  
embo da uju namokena jo sirorae  
arira.”

<sup>12</sup> Ava kotise, nu John Mark noi  
javo Mary, ainda kamboda isira.  
Evetu genembo digari totorugedo  
banunguse irero ainda sifoda, Peter  
ira buvurutusira.

<sup>13-14</sup> Buvudo, furu ainda guro  
békada fetedo goinginghiri ningido,  
ne saramana kato javo Rhoda setero  
ira, kambo guroda, Peter da beka ava  
ningi kasama usira. Ningi kasama  
edo, dudukughe furu da guro jo  
afigae, nu ivugaghae jovereghe  
kamboda sufusira. Sumbudo ira  
kamboda teredo sisira, “Peter ojira  
furu oinda guro békada fetirira.”

<sup>15</sup> Aminge setiri ningido, ne siseri,  
“Ni daghedo resesa tanojo!” ava  
setero, nu kovionoghae sisira, “Na  
beká resena,” setiri, ne mino siseri,  
“Avose, detero ambiri nunda dangio  
ava gesi tanojo,” aminge siseri.

<sup>16</sup> Aminge sero, Peter nu goin-  
goinghuse fetiriri ningido, ne guro  
afigedo Peter á gi dudukughuseri.

<sup>17</sup> Dudukughero, Peter nemokena  
ungoi de fafutuse, erama beka seore  
dae sedo, buregusira. Edo, Bajari  
nange nange setiri nu buvurutusira  
ava, isambu isagha setiri dadabetiri,  
eminge sisira, “Setena ava, James  
kena a Iesu da dorevare isambukena  
sevu ningore!” aminge sedo, Peter  
ne dodo isira.

<sup>18</sup> Sifo atetiri, dibura da kaifa  
kakato eredo, Peter tava e  
bune Jaredo, oju use beka dad-  
abuseri. Aminguse, ne tofo tofo se  
nininguseri, “Peter nange nangedo  
baghimbeti?”

<sup>19</sup> Aminge sero, Herod eredo tava  
aoro dae sisira. Avata, ne Peter  
tava usera, jo tambae etero, Herod  
nu kaifa kakatoá bu koto etiri dad-  
abetiri, setiri nunda kaifa kakato  
amo budo era detero amomonje-  
guseri. Amomonjegusera ainda am-  
boda, Herod Frovensi Judia dodo ira,  
reighi Sesaría aminda anumbusira.

### *12:20-25 Kini Herod Dara Edo Am- bududurusira.*

<sup>20</sup> Ainda sifo aminda, Herod nu Ta-  
iar a Saidon embokena janje eko use  
irei. Aminguse iriri gido, ne eredo  
geka dabade se ningari dae sedo,  
Herod kena iseri. Era buvudo, ne  
giti Herod da kambo kaifa kato javo  
Blastus de komana useri. Amingedo,  
ne mainungari dae sedo, Herod kena  
teteruseri. Ainda susu mo: ne Herod  
da reighida nenda bayau ombudo  
ghuseri.

<sup>21</sup> Herod sifo ffitusira á fira bu-  
viri, nu gogho edo, kini da anumba  
vasa aminda anumbedo nemokena  
vironu sisira.

<sup>22</sup> Setiri dadabetiri, ne siseri, “Omo  
jo evetu genembo da geka iraeri.

Omo gode eninda gekagori,” aminge sise ivugaghae koko siseri.

<sup>23</sup> Sero, God da aneya nu Herod dorusira. Herod nu evetu genembo da geke ava ningido, jo buregae usira aindae sedo, God nunda aneya dirigetiri fira setiri, Herod jifa ai mindiri ambududurusira.

<sup>24</sup> Sifo aminda, God da Geka ava sirureoro, ivegedo irureari evetu genembo ningido tumondedo ghuseri.

<sup>25</sup> Barnabas nengae Saul ghae baimara da moni budo fusera ava, mutero bero, ne John Mark bu nemonde dabade era, Jerusalem ghedo jovereghe reighi Antiok iseri.

## 13

*13:1-3 Ekaresia+ Imi Barnabas Saul Ghae Gategetero Ne Iseri.*

<sup>1</sup> Reighi Antiok aminda, Iesu da natofo jokáda, God da feroveta mendeni a ijuga kakato mendeniimi, dengoro indido ghuseri. Amo, Saul, nunda komana Barnabas, Simeon (nunda javo Ingago seraera), Sairin embo Lucius, a Manaen (nu anakora Kini (King) Herod ghae dabade faiya edo ghusira), aimi dengoro indido ghuseri.

<sup>2</sup> Gegenembo resena emo, God kena bayau kanangara edo banunguse irero, Asisi Kakara nemokena sisira, “Na Saul nengae Barnabas ghae gategeteno, ne nanda uju ava use, nanda saramana eni arera. Nanda saramana aoro dae sedo, ne bu esimbugaovo dae resena.”

<sup>3</sup> Aminge setiri ningido, ne seago God kena bayau kanangara edo banunguse nenda ungo, Barnabas nengae Saul ghae da tamonda fitido esimbuguse, ne dirigetero iseri.

*13:4-12 Barnabas Nengae Saul Ghae, Kae Da Bajari Eni Ava Bureguseri.*

<sup>4-5</sup> Asisi Kakara nu Saul nengae Barnabas ghae dirigetiri yari dae use, gimasa John Mark nemo sonembare dae sedo budo, reighi Antiok dodo reighi Selusia aminda

vosera buvudo, ghakada+ vosedo sirige era butu Cyprus aminda buvurutuseri. Butu aminda buvudo, reighi javo Salamas aminda, ghaka+ darido vivituseri. Vitido, ne era Jusi embo da dengoro indari kambo+ mendeni aminda God da Geka ijugedo ghuseri.

<sup>6</sup> Etero dadabetiri, ne eredo reighi Salamas dodo, agada sembera reighi Peifos aminda buvurutuseri. Buvudo, ne Jusi embo genembo eni javo Bar-Jesus ava tafuseri. Genemboá nu kae da bajari eniri. Bar-Jesus nu tofo sakai sedo ghuse, gungubo eminge sedo ghusira, “Na God da feroveta eniri,” sifo ghousa evia evetu genembokena aminge sedo ghusira.

<sup>7</sup> Butu ainda kotofu Sergius Paulus, nu genembo jiro munju evevari. Bar-Jesus setena amo, nu anakora Sergius Paulus ghae komana usira. Avori, Sergius Paulus resena emo, nu eredo God da Geka ningari dae sedo, aghi mutiri ira setiri, Saul nengae Barnabas ghae numokena iseri.

<sup>8</sup> Era buvurutusera avata, kae da bajari Bar-Jesus (namonde Greek gekaimi Elymas seraera), nu eredo, erá butu ainda kotofu nenda geke ningi tumondeure dae sise, Barnabas nengae Saul ghae buregusira.

<sup>9</sup> Etiri, Asisi Kakara nu Saul (o nunda javo eni Paul seraera) ava sonembetiri, dubo kotise Bar-Jesus ava gosuse tatasegusira.

<sup>10</sup> Tataseguse sisira, “Ni Satan da eniri. Ni ari eveva, geke eveva, a irari eveva ava isambu, buregeraesa. Ni ari ekoko aimi, evetu genembo dereraesa. Ni God da Geka beká ava jighi jovereghe gungubokena fitiraesa.

<sup>11</sup> Ava sedo, oroko Bajari nunda ungoi siregari ni diti digoi ari sifo sevo jo gae iraso, amboda sari jebugedo garesa,” aminge siri, Elymas (o Bar-Jesus seraera) ava, roera eni kau rofoma da kaugo aimi, tumba beká edo vose fira afuregetiri, nu diti eko usira. Amingetiri, aminda ya foa ghari bunise, evetu genembo enii foa

ungoda bu deinghaoro dae uju usira.

<sup>12</sup> Etiri, butu ainda kotofuá nu rea sirorusira ava gido, Bajari tumonduse, nunda Bino aindae dudukughusira.

*13:13-52 Frovensi Pisidia Aminda, Iesu Da Bino Ava Vironu Sedo Ghuseri.*

<sup>13</sup> Etiri, Paul nunda kokomanade dabade, Peifos ghedo ghakada+ vosedo era Frovensi Pamflia aminda buvudo, reighi javo Perga aminda, ghaka+ do vitido, John Mark nu sifo aminda ne dodo, jovereghe Jerusalem isira.

<sup>14</sup> Paul nengae Barnabas ghae reighi Perga dodo era, frovensi eni Pisidia aminda teredo, era reighi Antiok buvurutuseri. Antiok resena emo, nu reighi eniri. Kotugo Antiok Frovensi Syria aminda irira amo nu, reighi eniri. Aminda teredo, Jangutari da Sifoda, ne era Jusi embo da dengoro indari kamboda+ tere anumbuseri.

<sup>15</sup> Anumbetero, Moses da Geka a God da feroveta da geka mendeni ava tegetero dadabetiri, dengoro indari kambo+ da babojegari setero, eniimi ira Paul nengae Barnabas ghaekena sisira, “Nanda nano namendi, kotovo inono arira amo, ne fuvu! Geka saovo ningido namane tamo feghare!”

<sup>16</sup> Aminge setiri, Paul nu eredo ungo jighiri eretiri de fatido sisira, “Namanenda natofo beká Israel embo, a namanenda gitofu mendeni God tumonderaeva, ainde dabade totorugetevo, ne ategi beká ava erena. Ningivu! Na geka itako saono ningovo dae resena.

<sup>17</sup> God anakora namane Israel embo da abuamane ava gategusira. Gategetiri, namanenda abuamane era Egypt aminda sabua+ edo iri-ari. Amingero, God sonembetiri ne digarigo siroretero, God nunda fakinaimi etiri, ne Egypt ghedo buvurutuseri. Buvudo era, reighi uvu iraede aminda birurughuse ne dara edo ghuseri. Amo, ne God da Geka jo

ningae edo ghuseri, a God da Geka jo tumondae edo ghuseri.

<sup>18</sup> Amingedo ghusera avata, God nenda ari ovia gi dodo ghiri, ghaeko 40 ava dadabusira.

<sup>19</sup> Etiri, God nu Frovensi Keinan aminda, natofo oro isambu 7 ava detiri sirivo useri. Sirivo ero, nu setiri namane Israel embo Keinan aminda kokotofu useri.

<sup>20</sup> “Etero, God nu natofo tavo aoro dae sedo, nenda giti jighari ava nune gatededo ghusira. Eari, ne namanenda abuamane ava tavo ero, ghaeko 450 ava dadabetiri, God da feroveta eni javo Samuel sirorusira.

<sup>21</sup> Siroretiri, namanenda abuamane ne, tavo kakato God gatededo ghusira ava imboe edo, kini (king) gatededo mutare dae sedo, God kena benunu siseri. Setero, God nu gen-embo javo Saul ava gategusira. Gen-emboá nunda oro Benjamin, numamo javo Kish. Numoá gatededo setiri, nu kini usira. Edo irise, ghaeko 40 ava dadabusira.

<sup>22</sup> Avata God nu Saul imboe edo setiri darigetiri, God nu David ava gatededo setiri, David nu Israel embo da kini usira. God nu eminge kotedo David gateguse eminge sisira:

‘Jesse da mandi David, na dubo bu gogoghombraena. Na rejoá sarena, nu ava arira,’

God aminge sisira.

<sup>23</sup> David resena, einda imendi eni mo, Iesu ri. God namane Israel embo da ari ekoko kote doyari dae sedo, beka gagojuse, Iesu dirigetiri fusira.

<sup>24</sup> Iesu jo furae iriri, John nu giti fusira. Fira buvudo, Israel embo-kena irise, nenda ari ekoko vujegedo doyoro dae sise, vironu sedo ghusira. Seari ningeoro, John ne bafataito edo ghusira.

<sup>25</sup> John da saramana dadabari dae iri, nu eredo eminge sisira:

‘Ne nange nange erekotevu? Na mavejori? God Genembo gatededo furare dae sisira, jo namo iraeri.

Kote givu! Genembo amo amboda furarira. Na ijoghakori, nu teria bekári,'  
John aminge sisira.

<sup>26</sup> “Aвори, nanda nano namendi, Abraham da sasingu a kotugo namanenda gitofu eminda tumonde baingheraeva, God namonde nange sonembari jebuga tambarera ainda binó ava namondekena mutiri ojighira.

<sup>27</sup> Namonde God tumonderaera avata, Iesu namondeda ari ekoko seghe fugari dae sedo fusira ava, evetu genembo Jerusalem aminda nenda babojegaride dabade, ne buniseri. Ne Jangutari da Sifo evovodae God da feroveta da geka tegedo, ainda tuka jo kasama ae edo ghuseri. Jo kasama ae edo ghusera avata, Iesu daoro ambare dae sero, God nu rea nunda ferovetakena osa saoro dae sisira, ainda beká ava isagha usira.

<sup>28</sup> Ne Iesu daoro ambare dae sedo, nunda ari ekoko tava usera avata, jo tambae edo, nu Rome embo da kotofu Pilate kena, Iesu dari ambare dae sedo benunu siseri.

<sup>29</sup> Amingero, God rea sisira amo, geka isambu isagha usira. Etiri dadabetiri, Iesu ambiri gido, mendeni era nunda tamo korosida ghe budo era furuguseri.

<sup>30</sup> “Amingetero, God setiri Iesu ambarida ghe jebuge erorusira.

<sup>31</sup> Iesu jo ambae irise, evetu genembo mendeni nunda karoni edo, nemonde Frovensi Galilee ghedo Jerusalem isera amo, nu ambarida ghe jebuge erorusira ainda amboda nemokena isagha eari gido ghuseri. Gido ghusera ava, ne oroko Israel embokena Iesu da Bino ava osa seraera.

<sup>32-33</sup> “Namane andae sedo God da Bino ava sari dae sedo refera. God nu beka gagojuse, rejoá namanenda abuanekena sisira, oroko ava namondekena isagha etira. Iesu jebuge erarira andae, God setiri ne nunda **Yaru Divari Buku** aminda, tano etoto ainda jokáda eminge gefuseri:

‘Ni nanda Mandiri. Na oroko nimo-kena resena, “Na ninda Afa bekári,”’  
aminge gefuseri.

<sup>34</sup> Kotugo God nange sari, Iesu ambarida ghe jebuge erodo irari nunda tamo jo betae arira ainda geka ava, God setiri nunda mendeni eminge gefuseri:

‘Na nange David kaifa use esimbuge gogoghombusena aminga ava, ni barago kaifa use esimbugarena.’

<sup>35</sup> Kotugo tano eninda, God eminge setiri gefuseri:

‘Ninda saramana kato ninda geka ningi gogoghombarira. Ava sedo, ni saso nunda tamo jo ofofoda betae arira,’  
aminge gefuseri.

<sup>36</sup> “David nunda sifoda, God da uju ava use, God da Geka ningido ambududurusira. Ambiri, budo era nunda nombuamane da dengesida furugetero nunda tamo betisira.

<sup>37</sup> David da tamo betisira avata, God setiri nunda Genembo ambarida ghe jebuge erorusira, ainda tamo jo betaeri.

<sup>38-39</sup> “Aвори, nanda nano namendi, kote gogoghombevu! Namane nange Iesu da javoda vironu seraera amo, God nange nange ari ekoko kote doyeraira ava, Iesu da javoda ijugeraera. Moses da Gekaimi namonde jo God kena jebugae arera Avata mave Iesu da javoda tumondarira amo, God nunda ari ekoko kote doyari, nu jebugarira.

<sup>40</sup> God da feroveta rea sisera ava, erá nemokena sireureure dae sise, kaifa e gogoghombevu! Feroveta amo, ne eminge siseri:

<sup>41</sup> ‘Dere jirari kakato, kote givu!

Na saramana eni aono nenda sifoda sirorari gido, ne jo kasama ae areva.

Mave ainda beká ijuge gogoghombarira avata, ne jo ningido tumondae areva.

Ava sedo, gido dudukughuse ambuvu!’ ”

<sup>42</sup> Paul nu geke aminge setiri dadabetiri, Paul nu Barnabas ghae eredo era, dengoro indari kamboda+ ghe buvurutero natofo siseri, "Fura eninda, Jangutari da Sifoda fuvu, geke sekago saovo ningore!" aminge siseri.

<sup>43</sup> Sedo, Jusi embo mendeni a Jusi embo da gitofu mendeni God tumondedo ghusera aimi, ne isambu eredo Paul nengae Barnabas ghae da amboda iseri. Ero, Paul Barnabas ghae mo, natofo God da Geka ningoro dae sedo, a God fakina futusira ava baoro dae sedo, nengae dengoro induduseri.

<sup>44</sup> Fura dabako dadabetiri Jangutari da Sifoda, evetu genembo isambu reighi Antiok aminda, Bajari da geke ningari dae sedo fera totoruguseri, daba daba jo furaeri.

<sup>45</sup> Totorugetero, Jusi embo, evetu genembo digari totorugusera ava gido, ne dubo mema useri. Evetu genembo isambu Paul nengae Barnabas ghae da geke tumondusera aindae, dubo mema use, erama Paul geke seure dae sise bureguseri. Buregedo, Paul nengae Barnabas ghaekena dombuda siseri.

<sup>46</sup> Sisera avata, Paul nengae Barnabas ghae jo oju ae, ne fakina edo siseri, "Ne Israel embori. Ava sedo, namane God da Bino ava giti nomena sarera. Avata namane setero, ne buregetevu. Aminguse, ne God da jebuga ava imboe use dotutereva. Dotutereva ava sedo, namane ne dodo gitofukena yari dae erera.

<sup>47</sup> God namanekena sisira, 'Na nemo kotise geke evia anakora seteno gefuseri:

"Gitofu nanda usasa gaoro dae sedo, nane ne dirigerena.

Ne dirigaono yama, evetu genembo isambukena jebuga da emboro ijugareva,"

God aminge namanekena sisira," setero nenda geke dadabetiri,

<sup>48</sup> Israel embo da gitofu ava ningido ivuga use, Bajari da Bino ava ningido

sakai siseri. Avori, God evetu genembo mendeni, jebuga evovoda irari baoro dae sedo, anakora gategusira ava, ne tumonduseri.

<sup>49</sup> Evetu genembo digari reighi aminda irise, Bajari da Bino ava ningido eredo, reighi digari aminda ise osa sedo ghuseri.

<sup>50</sup> Amingero gido, Jusi embo ne reighi da babojegari da ghamo, a gitofu evevetu da ghamo deretero erorusira. Evevetu amo, ne kokotofu da eveveturi. Ne nenda kiki dodo fera, Israel embo da kiki tumonduse, God tumondedo ghuseri. Ne isambu eredo, Paul nengae Barnabas ghaekena fakarago use ondiseri.

<sup>51</sup> Ondero, Iesu da ambo jimbi Paul nengae Barnabas ghae, era buvudo ne simbora use, reighi ainda fonja nenda atada ava danghetero vovosusira. Amingedo, ne era reighi Aikoniam aminda buvurutuseri.

<sup>52</sup> Iesu da dorevare seka Antiok aminda tumondusera amo, ne ivugaghae irise, Asisi Kakara da fakina naimi dubo kotedo ghuseri.

## 14

*14:1-7 Reighi Aikoniam Aminda, Paul Nengae Barnabas Ghae Vironu Sedo Ghuseri.*

<sup>1</sup> Reighi Aikoniam aminda, kau daba aminga ava etero sirorusira. Paul nengae Barnabas ghae, Jusi embo da dengoro indari kamboda+ era vironu setero ningido, Jusi embo digari nenda gitofude dabade Iesu tumonduseri.

<sup>2</sup> Etero, Jusi embo mendeni jo tumonda iriara aimi eredo, Iesu da natofo ava imboe aore dae sedo, gitofu mendeni da ghamo deretero erorusira.

<sup>3</sup> Iesu da ambo jimbi mo, ne ghousa beká ava reighi daba aminda irise, fakina edo Bajari da Bino ava vironu sedo ghuseri. Amingero, evetu genembo natofo tomanako nange nange nunda Bino ningido, "Geka bekári," sise tumondaetera ava kotise, Bajari nu fakina nunda

ambo jimbikena mutudo ghusira. Muteari, ne tano mendeni mendeni eoro evetu genembo ne jo gae iri-ara ava, nenda gitida sireari gido ghuseri.

<sup>4</sup> Reighi da natofo isambu sarigedo dubo etoto kotedo ghuseri: mendeni mo Iesu da ambo jimbi tumondedo ghuseri, a mendeni mo Jusi embo tumondedo ghuseri.

<sup>5</sup> Aminguse, Jusi embo da gitofu mendeni, a Jusi embo mendeni, nenda babojegaride dabade eredo, Iesu da ambo jimbikena ari fakarago fakarago ava ari kotise, ghamanai daoro amoro dae siseri.

<sup>6</sup> Setero ningido, Paul nengae Barnabas ghae ere sumbudo era, Frovensi Laikaonia aminda teredo, reighi Listra a Derbi aminda buvuruseri.

<sup>7</sup> Listra, Derbi, a reighi mendeni mendeni aminda irise, Iesu da Bino Eveva ava vironu sedo ghuseri.

#### *14:8-20 Reighi Listra Aminda Dara Sirorusira.*

<sup>8</sup> Reighi Listra aminda, genembo eni daguna ava siroredo, jo ya foa ghae edo ghusira.

<sup>9-10</sup> Genembo amo, Paul da geka ningido tumondusira. Tumondiri gido, Paul kotisira, "Genembo emo tumonde gogogho erira ava sedo, sarena amo, nu jebugarira," aminge kotise, genemboá fuge gido beka mindafu, "Ere fete!" setiri, jorughe ere atai fetedo ya foa ghusira.

<sup>11</sup> Ya foa ghiri gido, Paul nu rea etiri sirorusira ava kasama edo, evetu genembo digari eredo nenda reighi Laikaonia da gekaimi koko sise siseri, "Namondeda gode mo, gegenembo etoto naká jinendo evia vosojgherere."

<sup>12</sup> Aminge sedo, ne nenda gode eni Zeus seraera ava, Barnabas kena jighido, a kotugo Paul geka sedo ghusira aindae, nenda gode eni Hermes seraera ava, numokena jighuseri.

<sup>13</sup> Edo, nenda gode Zeus da kambo itako soka fefetusira, ainda fristimi burumakava (bulls) da kandana mendeni a joba mendeni ava kamboda ghe bu fira, Paul nengae Barnabas ghae da kamboda buvudo furu bekada fefetusira. Nu, evetu genembo totorugusera ainde dabade, Paul nengae Barnabas ghaekena banunguse, joba dungoro avare dae sedo uju useri.

<sup>14</sup> Barnabas nengae Paul ghae ava ningido, nenda tamo asugari ava jighi toreredo, evetu genembo totorugusera ainda jokáda sufuse, beka mindafu siseri,

<sup>15</sup> "Ne nangerevu? Namane gegenembo beká nemoá avavagori. Namane God da Bino Eveva ava saoro ningovo dae sedo fuseri. God nu roera isambu utuda, endada, a evada etiri sirorusira. Nu fakina katori. Sukaru evia seteva amo, Hermes a Zeus, ne jo namonde sonembae arera.

<sup>16</sup> God nu giti evetu genembo doyeari nenda uju ava edo ghuseri.

<sup>17</sup> Avata God numoá kasama aovo dae sedo, nunda tano fitiraira. Nu seari borija dido bayau siroreraira. A nu bayau muteari gido ivuga er-aeva," aminge siseri.

<sup>18</sup> Paul nengae Barnabas ghae aminge ghoghora sise bureguse beka fakara beká useri. O durumuguse buregaetera amo, ne anakora joba dungoro avaeti.

<sup>19</sup> Jusi embo mendeni Frovensi Pisia da reighi Antiok a reighi Aikoniam ghedo fuseri. Fera buvudo, nenda geka a nenda kotari ava dengoro indero, evetu genembo digari ningi tumonduseri. Jusi embo da geka tumondedo, evetu genembo ne eredo ghamanai Paul detero du fasetiri, nu ambariva kotedo, nunda tamo jumbudo era isaghada buvuruseri.

<sup>20</sup> Buvudo, nunda tamo aminda dotero fasiriri, Iesu da dorevare era numo gari dae totorugetero, Paul nu jebuge eredo jovereghe ira reighida teterusira. Tere avero, sifo atetiri, nu

Barnabas ghae reighi Derbi aminda iseri.

*14:21-28 Paul Barnabas Ghae Dabade Jovereghe Iseri.*

<sup>21</sup> Era buvudo, Paul nengae Barnabas ghae reighi Derbi aminda, God da Bino Eveva ava vironu seoro, evetu genembo digari Iesu tumondedo, nunda natofo edo ghuseri. Ainda amboda, ne eredo jovereghe era, reighi Listra aminda avido era, reighi Aikoniam aminda avido era, reighi Antiok Frovensi Pisidia aminda buvurutuseri.

<sup>22</sup> Buvudo, ne sonembeoro Iesu da dorevare tamo feghedo fakina edo tumondedo ghuseri. Sonembuse, eminge ijugedo ghuseri, “Dara sirorarira, namondekena. Avata namonde fakina edo tumondarera amo, namonde utuda terarera,” aminge ijugedo ghuseri.

<sup>23</sup> Reighi nunda nunda aminda, ne giti jighari kakato ava gateguseri. Aminguse, Paul nengae Barnabas ghae God kena bayau kanangara use, nunda dorevare nu tumonde gogoghombusera, ava kaifa are dae sedo, Iesu kena benunu siseri.

<sup>24-25</sup> Amingedo, ne eredo Frovensi Pisidia sembera, Frovensi Pamfilia aminda teredo, reighi Perga aminda iseri. Era reighi Perga aminda buvudo, Iesu da Bino ava vironu sedo, dodo era reighi Atalia buvurutuseri.

<sup>26</sup> Buvudo, ghakada+ vosedo jovereghe reighi Antiok, Frovensi Syria aminda iseri. Reighi Antiok resena aminda, Bajari nange sonembururari Paul nengae Barnabas ghae nunda saramana aetera aindae, Iesu da dorevare ne giti diriguse esimbuguseri. Saramana resena emo, etero ojira evia dadabetira.

<sup>27</sup> Antiok aminda teredo setero Iesu da dorevare totorugetero, Paul nengae Barnabas ghae eredo, ne kau nangego ava use deinghusera da kiki ava setero niniguseri. God rejo etiri nemokena sirorusira, a God nange nange Jusi embo da gitofukena emboro afigetiri Iesu tumondusera, ava setero niniguseri.

<sup>28</sup> Etero dadabetiri, ne aminda Iesu da natofode dabade sifo ghousa ambari ava iriari.

## 15

*15:1-21 Jusi Embo Mendeni Fera, Moses Da Agho Dari Kaifa Aoro Dae Sisera Aimi, Paul Barnabas Ghaekena Beisiga Useri.*

<sup>1</sup> Aminda irero, gegenembo mendeni Frovensi Judia aminda ghedo fera reighi Antiok aminda buvudo, geke sembae sedo ghusera, amo eviri: “Moses rea sisira ava ari dae sedo, nenda vika mendo anoso gafugareva amo, ne God kena jebugareva. O jo amingae areva amo, ne God kena ambareva,” aminge sedo ghuseri.

<sup>2</sup> Ainda bino ava ningido, Paul Barnabas ghae eredo beisiga use, ghoghora eko beká siseri. Beisiga etero gido, Iesu da natofo isambu aminda manaka gaedo, Paul Barnabas ghae, a Iesu da dorevare mendeni Antiok aminda iriara ava gateguseri. Gategedo, ne yama Jerusalem aminda Iesu da ambo jimbide dabade a Iesu da dorevare da babojegaride dabade, geke beká ningiavori, ava se ningoro dae siseri.

<sup>3</sup> Sedo, Iesu da natofo aminda iriara aimi, ne dirigetero iseri. Ise, Frovensi Foenisia a Samaria aminda, Jusi embo da gitofu nange nange God tumondedo ghusera ava, Iesu da dorevarekena osa sedo ghuseri. Seoro, Iesu da natofo isambu ningido ivuga beká ava edo ghuseri.

<sup>4</sup> Paul Barnabas ghae nenda kokomanade dabade era, Jerusalem aminda buvurutuseri. Buvero, Iesu da ambo jimbi a Iesu da dorevare nenda babojegaride dabade nati joká doruseri. Amingetero, God nange nange sonembetiri Jusi embo da gitofu Iesu tumondedo ghusera ava, osa siseri.

<sup>5</sup> Setero, Moses da Geka kaifa kakato+ mendeni Iesu tumondusera, aimi eredo siseri, “Namonde Jusi embo da gitofu mave Iesu tumondarera amo, nenda vika mendo anoso

gafugedo, abua Moses da Geka kaifa e gogoghombaoro dae sarera.”

<sup>6</sup> Aminge setero, Iesu da ambo jimbi nemonde Iesu da dorevare da babojegaride dabade, ainda geka ava manaka garuse se ningari dae sedo, totoruguseri.

<sup>7</sup> Totorugedo, geka se nininguse, Peter ere fetedo sisira, “Nanda nano namendi, God anakora namondeda gitofu nunda Bino Eveva ava virono saono ningido, tumondaoro dae sedo, namoá gategusira. Ava ne kasama ereva.

<sup>8</sup> God nu evetu genembo isambu da janje joká kasama eraira; ava sedo, namondeda gitofu numoá tumondetero gido ivuga usira. Ava ijuguse, nunda Asisi Kakara mutiri vosedo nemokena asugusira. Namondekena giti vose asugusira, kau daba aminga ava, amboda nemo-keno vose asugusira.

<sup>9</sup> Ava sedo, jo dombu eni iraeri. Namonde tumondusera andae, God namondeda ari ekoko kote dotutusira. Kau daba aminga ava, namondeda gitofu tumondusera andae, God nenda ari ekoko barago kote dotutusira.

<sup>10</sup> Namonde a namondeda abua-mané, Moses da Geka kaifa arikena jo inono ae edo ghuseri, a namondeda gitofu barago, ne Moses da Geka kaifa arikena jo inono iraeri. Ava sedo, namondeda gitofu nenda vika mendo anoso gafugaoro dae a Moses da Geka kaifa aoro dae redae sareri? Namonde amingaoro dae sarera amo, God da fakina ava dere gosuse sarera. Tefo, namonde jo amingae arera.

<sup>11</sup> Namonde Bajari Iesu da sonembaimi tumonduse jebuguseri. Kau daba aminga ava, gitofu ne Bajari da sonembaimi tumonduse jebuguseri. Ava sedo, namonde jo amingae arera,” Peter aminge setiri,

<sup>12</sup> natofo totorugusera ava ningido, beka dadabuseri. Beka dadabetiri, Paul Barnabas ghae eredo, God nange nange eari, ne ari a tano mendeni mendeni eoro,

nenda gitofu jo gae iriara ava sireore-ari, nenda gitida gi dudukughedo tumondedo ghusera ava, osa siseri.

<sup>13</sup> Amingetero, geka dadabetiri, James nu eredo sisira, “Nanda nano namendi, ningivu!

<sup>14</sup> God nange nange namondeda gitofu dubo buraira, a nu nange nange giti nenda mendeni gatededo nunda tofodae rurusira ava, Simon Peter oroko isagha setiri ningeri.

<sup>15</sup> A God da ferovetamane anakora daba ava sedo ghuseri. God da Geka eni gefusera amo, eviri:

<sup>16</sup> ‘Bajari resira, “Na amboda sekago jovereghe foa David da kambo bejetiri irira ainda sagho tumbi ava budo, sekago nane itarena.

<sup>17</sup> Amingururono, evetu genembo isambu namo tava udo furarera. Oro isasambu ainda jokáda, evetu genembo mendeni anakora gategusena ava, furoro nanda tofodae barena.

<sup>18</sup> Geka evia kotise anakora sisená ava, oroko isagha resenere,” aminge gefuseri,”

<sup>19</sup> James nu aminge sedo sisira, “Na erekotena, namondeda gitofu oroko God tumondari dae erera, aikena agho dari digari jo saoro fetae arira.

<sup>20</sup> Avata namonde reta (letter) gefuse, eminge saore, ‘Sino fuka dedo bu ya ove kevari da dombuda joba muturaera ava, erá bu mindeove! Kombo yagera erá eove! Sino fuka duboda ivasi aoro ambari ororo jo vosae arira amo, erá mindeove! A ororo barago erá mindeove dae resera,’ aminge saore!

<sup>21</sup> Ainda susu mo: reighi isasambu aminda, Jusi embo da dengoro indari da kambo+ aminda Moses da Geka tegutuse, Jangutari da Sifoda vironu seraera,” James aminge sisira.

*15:22-35 Reta (Letter) Budo Era Mutero, Tegedo Ivuga Useri.*

<sup>22</sup> Setiri, Iesu da ambo jimbi a Iesu da dorevare nenda babojegaride dabade manaka gaedo, gegenembo mendeni, Paul Barnabas ghae da



karona edo Antiok aminda yaore dae gateguseri. Gateguse, gegenembo etoto naká natofo isambu kakara use tumondedo ghusera, ava gateguseri. Eni mo Silas, a eni mo Judas, o Barsabbas sedo ghuseri.

<sup>23</sup> Gategedo, ne reta evia gefuseri:

“Namane Iesu da ambo jimbi a Iesu da dorevare da babojegari isambu Jerusalem eminda, namanenda nano namendi Frovensi Syria, Silisia, a reighi Antiok aminda ategi

beká ava erera. Ne namane Jusi embo da gitofuri, avata namane ne ategi roro beká ava erera. Yari budo givu!

<sup>24</sup> Gegenembo mendeni Jerusalem ghedo era nemokena buvudo dengoro indudero ningido, dubo mema useva ava, namane kasama erera. Avata gegenembo amo jo namane dirigaoro yaeri. Totofo nenda kotariimi iseri.

<sup>25</sup> Ava sedo, namane totorugedo manaka garuse, aghi kakato gategedo dirigaoro nemokena yaoro dae sise resera. Aghi kakato resera emo, ne namanenda kokomana beká, Barnabas Paul ghae da karona edo yarera.

<sup>26</sup> Paul Barnabas ghae resera emo, ne Iesu da saramana ero, evetu genembo ne dari dae sisera, avata ne jo oju ae edo ghuseri.

<sup>27</sup> A aghi kakato Judas nengae Silas ghae resera emo, ne nenda dombuda fetedo geka daba ava siruroro ningareva. Namane rea aovo dae sedo eregefera geka daba evia bekaimi sarera.

<sup>28</sup> Namane God da Asisi Kaka-rade dabade dubo dabako edo eminge resera, ningivu!

<sup>29</sup> Sino fuka dedo bu ya ove kevari da dombuda joba mutarera ava, erá bu mindeove! Ororo erá mindeove! Sino fuka duboda ivasi aoro ambari ororo jo vosae arira ábarago, erá mindeove! A kombo yagera erá eove dae resera.

Ava jo ae areva amo, evevari. Avori, geka tano eviri.”

Avaka gembudo tano useri.

<sup>30</sup> Tano edo, aghi kakato dirigetero era reighi Antiok aminda buvudo setero, Iesu da dorevare isambu aminda iriara ava totorugetero, reta nemokena futuseri.

<sup>31</sup> Mutero budo, geka eveva ava tege gido, ivuga useri.

<sup>32</sup> Judas nengae Silas ghae, ne God da feroveta mendeniri. Ava sedo, nengae eredo vironu janje ghousago siseri. Sero, dubo jamaghae ningido fakina aminda ruruseri.

<sup>33-34</sup> Judas nengae Silas ghae ghousa beká iriara ava, yari dae sedo javi etero, Iesu da natofo ne dubo jamaghae diriguseri. Dirigusera avata, Silas nu fefetiri, Judas nusukako jovereghedo, evetu genembo numo dirigetero fusira, aikena isira.

<sup>35</sup> Paul nengae Barnabas ghae barago ghousa beká ava irise, dengoro induduse, natofo mendeninde dabade Bajari da geka ava vironu sedo ghuseri.

*15:36-41 Paul Barnabas Ghae Sarigedo, Reighi Nunda Nunda Iseri.*

<sup>36</sup> Ainda amboda, Paul nu eredo Barnabas kena sisira, “Nangae ya, reighi ningiaminda giti Bajari da geka ava vironu sedo ghusera, aminda yama natofo garera. Ne eveva irera, ai tefo?” aminge setiri ningido,

<sup>37</sup> Barnabas nu John Mark ava bu yari dae sisira.

<sup>38</sup> Sisira avata, Paul nu John Mark bu yari imboe usira. Ainda susu mo: giti nemonde dabade reighi mendenida era vironu siseri avata, emboro soroda Frovensi Pamfilia aminda, John Mark nu saramana dodo jovereghe isira.

<sup>39</sup> Paul nu John Mark bu yari imboe use, Barnabas ghae beisiga ambariá useri. Amingedo, nengae sarigedo, emboro nunda nunda iseri. Barnabas nu eredo John Mark budo, nengae butu Cyprus aminda sembiseri.

<sup>40</sup> Paul nu Silas nengae yari dae setiri, Iesu da natofo ne esimbuguse,

God nunda dubo bariimi ne kaifa are dae banunguseri.

<sup>41</sup> Etero, Paul nengae Silas ghae eredo era, Frovensi Syria a Silisia aminda vironu sirureoro, Iesu da dorevare isambu ningido, fakina edo ghuseri.

## 16

### *16:1-5 Paul Silas Ghae Ne Timothy Ava Budo Iseri.*

<sup>1</sup> Amingedo, era reighi Derbi buvu darigedo era, reighi Listra aminda buvudo, Iesu da dorevare eni javo Timothy ava tambudo kasama useri. Timothy da numamo mo Greek embori, a noi mo Jusi embori. Noi nu Iesu tumondedo ghusira.

<sup>2</sup> Iesu da dorevare isambu reighi Listra a Aikoniam aminda, ne Timothy dae sakai sedo ghuseri.

<sup>3</sup> Seoro ningido, Paul nu Timothy ghae deinghari dae sedo, Timothy budo nunda vika mendo anoso ava gafugusira, Jusi embo da tano ijugari dae sedo. Ainda beká mo: Timothy numamo nu Greek embo ava, Jusi embo isambu reighi aminda anakora kasama useri.

<sup>4</sup> Nengae amingedo, Silas de dabade eredo iseri. Era, emboro soroda reighi mendeni mendeni aminda buvurutuse, Iesu da ambo jimbi a Iesu da dorevare da babojegari Jerusalem aminda rea sisera, ava ningido kaifa aoro dae sedo, dengoro indido ghuseri.

<sup>5</sup> Amingeoro ava ningido, Iesu da dorevare reighi isambu aminda, ne tumonde gogoghombedo fakina edo ghuseri. Evetu genembo digari ava ningido, Iesu tumonduse, fera Iesu da dorevare digari beká ava useri.

### *16:6-10 Paul Nu Reighi Troes Aminda Avise, Sono Rurusira.*

<sup>6-7</sup> Paul, Silas, a Timothy de dabade eredo iseri. Asisi Kakara nu, erama ne ya Frovensi Asia aminda vironu seore dae setiri ningido, ne Frovensi Asia darigedo, Frovensi Frijia a Galeisia aminda sembera, Frovensi Misia

aminda buvurutuseri. Aminda buvudo, ne Frovensi Bitinia aminda sembi yari dae ero, Iesu da Asisii ne buregusira.

<sup>8</sup> Buregusira ava sedo, ne dombu jovereghe Frovensi Misia sembera reighi Troes aminda buvurutuseri.

<sup>9</sup> Aminda buvudo, Paul nu avise sono rurusira. Sono jokáda, Masedonia genembo eni fetiriri gosusira. Genembo gosusira aimi, numokena sisira, “Masedonia eminda sembu fu, namane sonembase!” ava sono rurusira.

<sup>10</sup> Ava gido, eredo osa setiri ningido, namane eredo Frovensi Masedonia sembi yari dae useri. Ainda tuka mo: namane sono da tuka kasama useri. Amo, God da uju mo: namane sembi ya Masedonia aminda, God da Bino Eveva ava vironu saeteri.

### *16:11-15 Reighi Filipai Aminda, Lydia Nu Vironu Ningido, Iesu Tumondusira.*

<sup>11</sup> Ava sedo, namane eredo ghakada+ vosedo reighi Troes ghedo sembera, butu javo Samotres aminda teredo, avéro sifo atetiri, reighiá do sembera, reighi javo Niapoles aminda teteruseri.

<sup>12</sup> Teredo, namane reighi Niapoles dodo era Frovensi Masedonia jokáda teredo era, reighi mindafu eni javo Filipai aminda buvurutuseri. Filipai aminda, nati embo ne jo tofofo nenda reighi ava kaifa ae edo ghuseri. Rome emboimi fera dighi anumbedo, reighi ava nene kaifa edo ghuseri. Filipai aminda buvudo, namane sifo tufako ava iriari.

<sup>13</sup> Irise, Jangutari da Sifoda, namane Jusi embo da banungari da vasa tambari dae kotise, reighida ghedo vose uvu betuda iseri. Era buvu anumbedo, evevetu mendeni aminda totorugusera, aikena vironu siseri.

<sup>14</sup> Evetu eni, nu Taiyataira eveturi. Nunda javo Lydia. Lydia nu kokotofu da embo boka evevago ava, neuri fatido gembu simbugedo, aimi oriro edo ghusira. Lydia resena emo,

nu sifo ghousa ava God kena banunguse irei. Sifo aminda, Bajari setiri Lydia da jiro munju afigetiri, nu Paul da geke nininguse kote gogoghombusira.

<sup>15</sup> Ningido, nunda natofo a saramana kakatode dabade bafataito useri. Etero, nu sisira, “Na Bajari tumonde gogoghombaria kotareva amo, ne fuvu, nanda kamboda avove!” aminge setiri, namane nunda geke tumondedo era, nunda kamboda avido ghuseri.

*16:16-40 Dibura Kaifa Kakato, Nenda Giti Jighari Iesu Tumondusira.*

<sup>16</sup> Sifo eni, namane sekago banungari vasada ero, gagara eni fira namane tafusira. Gagara amo, nu sukaru eko aimi asugetiri irei. Rejoa amboda sirorarira ava, gagara nu sukaru da fakinaimi kasama edo isagha sedo ghusira. Gagara amo, nu sabuari.+ Ava sedo, nunda saramana ainda moni digarigo ava budo, nunda babojegarikena mutudo ghusira.

<sup>17</sup> Namane tambudo gagara aimi, Paul da amboda ise kori eminge sedo ghusira, “Gegenembo emo, ne God Teria Beká tumonduse nunda saramana eraera. Nenda geke ningareva amo, God kena jebugareva,” aminge sedo ghusira.

<sup>18</sup> Sifo ava inono, aminge sise iriri, Paul nu janje eko etiri sukaru aikena sisira, “Iesu da javoda, gagara da jokada ghe foa buvaso dae resena,” aminge setiri, sukaru nu ava ningido fira buvurutusira.

<sup>19</sup> Etiri, gagara ainda babojegari ava kasama edo, moni bari da goroto dadabari beká arira ava kotedo, ne eredo Paul nengae Silas ghae sandi budo koto vasada era, Rome embo da gavana da kokotofudae futuseri.

<sup>20</sup> Mutudo siseri, “Jusi embo etoto naká emo, namondeda reighi eminda dara tomanako eteri.

<sup>21</sup> Namonde Rome embo ava sedo, Rome embo da kiki a nenda agho dari ava ningido amingeraera. Avata gegenembo emo, ne Jusi embo da

kiki ningoro dae resera. Aminguse, ne namondeda agho dari erebejera.”

<sup>22</sup> Aminge setero ningido, evetu genembo koto ningari dae sedo fera totorugusera, ne Silas nengae Paul ghae dari dae sedo eroruseri. Amingero, kokotofu ne Paul Silas ghae dari dae sedo, nenda tamo asugari jighi toreruseri. Amingedo, nenda isoro kakato ne ambimi daoro dae sedo, siseri.

<sup>23</sup> Setero ningido, isoro kakato ne Paul Silas ghae budo, dari beká dedo, budo era diburada fitero teteruseri. Teretero, kokotofu ne dibura kaifa kakato da giti jigharikena, kaifa e gogoghombare dae siseri.

<sup>24</sup> Aminge setero ningido, dibura da giti jighari nu Paul Silas ghae budo ira, dibura kambo aminda teredo, kaifa e gogoghombari dae sedo, vasa soroda ffitusira. Aminda fitido, nenda ata faraghoi vakimbuseri.

<sup>25</sup> Vakimbetero irero, tumba ira soroda iri, Paul Silas ghae God kena yaru didivuse banungero, dibura gegenembo mendeni ne ava nininguse irero,

<sup>26</sup> dumo teria beká sumbiri, dibura kambo javi javi usira ava teria beká usira. Etiri, dibura kambo da guro isambu tofo afigetiri, dibura gegenembo da seini (chains) tofo vujege tefo usira.

<sup>27</sup> Dibura da giti jighari eredo, dibura kambo da guro isambu afigedo iriri gido, nunda dibura gegenembo isambu eredo sumbaria kotise, nu tofo je ambari dae sedo, nunda kaiya voruda irisira ava ghonumbusira.

<sup>28</sup> Ghonumbetiri, Paul nu ava kasama edo beka mindafu sisira, “Era tofo jeose! Namane isasambu irera.”

<sup>29</sup> Aminge setiri ningido, dibura da giti jighari oju edo, nunda mendenikena, avaraka bu furoro dae sedo, sumbu Paul Silas ghaekena teredo, kauboi dari fetedo ungo ata dadadaghusira.

<sup>30</sup> Etiri dadabetiri, giti jighari nu eredo nengae ungodá budo era isaghada buvudo sisira, “Na nange nangedo God kena jebugareni?”

<sup>31</sup> Aminge setiri ningido, Paul nengae Silas ghae siseri, “Bajari Iesu tumondaresa amo, nimo a ninda natofode, ne isambu God kena jebugareva,”

<sup>32</sup> aminge sedo, ne dibura da giti jighari, nunda natofode, a nunda saramana kakatode dabade, nemokena Bajari da Bino ava vironu siseri.

<sup>33</sup> Setero dadabetiri, totoi dibura da giti jighari nu, Paul Silas ghae ambii detero tamo inanda usira ava seghedo, benunu setero Paul Silas ghae numo a nunda natofode dabade bafataito useri.

<sup>34</sup> Edo, nu eredo Paul nengae Silas ghae budo, nunda kamboda teredo nemokena bayau mutiri riseri. Dibura da giti jighari nunda natofode God tumonduse ivuga beká ava useri.

<sup>35</sup> Sifo atetiri, Rome embo da kokotofu ne aghi mutero fera, dibura kaifa katokena siseri, “Paul nengae Silas ghae buvu yaoro dae sedo resera,” aminge setero,

<sup>36</sup> dibura da giti jighari Paul kena sisira, “Kokotofu mo, nengae Silas ghae foa buvovo dae sedo, aghi mutero ojigheri. Ava sedo, dubo jamaghae buvu yasivu!”

<sup>37</sup> Aminge setiri, Paul dibura da giti jigharikená sisira, “Namanekena koto use dara eni jo tambae edo, namane evetu genembo da dombuda dedo diburada ffitumutari. Namane mo, Rome embo da natofo bekári. Ava sedo, aminguse nene namonde Rome embo da agho dari ava bejimitari, a oroko ufena yaoro dae sedo seteri. Tefo. Namane jo yae arera. Kokotofu totofo foa eminda guro afigaoro buvaetera ava avori.”

<sup>38</sup> Aminge setiri, aghi kakato ne jovereghedo era, Paul da geka ava Rome embo da kokotofukena setero ninguseri. Ningido ne, Paul nen-

gae Silas ghae mo, Rome embo beká ava kasama edo, oju useri.

<sup>39</sup> Oju edo, era dibura vasada teredo, Paul nengae Silas ghaekena siseri, “Ai, namane dara umutari! Namane bunariri,” aminge sedo ne unumbedo, budo era isaghada buvudo, reighiá dodo yaoro dae sedo, benunu siseri.

<sup>40</sup> Setero, Paul nengae Silas ghae diburada ghedo Lydia da kamboda era teteruseri. Teredo, Iesu da dorevare mendeni aminda totorugusera ava tambudo, dubo jama use fakina aoro dae sedo, ne reighiá dodo iseri.

## 17

*17:1-9 Paul Silas Ghae Era Tesalonaika Aminda, Vironu Sedo Ghuseri.*

<sup>1</sup> Era, reighi Amfipoles aminda buvudo, era reighi Apolonia aminda buvudo, kotugo a dodo era reighi Tesalonaika aminda teteruseri. Tesalonaika aminda, Jusi embo dengoro indari da kambo+ eni iriri tafuseri.

<sup>2</sup> Paul da kiki mo: nu sifo ghousa reighi eni nunda gitida+ teredo ghusira amo, nu ya Jusi embo da dengoro indari kamboda+ teredo, aminda giti geka vironu sedo ghusira. Sifo aminda, nu kau daba aminga ava use, Jangutari da Sifo etodaba naká, yama Tesalonaika aminda dengoro indari kamboda+, God da Geka ava tege geka vironu sedo ghusira.

<sup>3</sup> Ava use, God nange nange ari ekoko kote doyarí dae Genembo eni dirigari furarira ava, nune ijugusira. A Genembo amo nange nange evetu genemboi daoro ambudo, ambarida ghe jebuge erarira ábarago ijugusira. Ijuguse sisira, “God Genembo eni dirigari furariá sisira. Kotugo genembo Iesu da Binó oroko nemokena resena emo, numori.”

<sup>4</sup> Aminge setiri, Jusi embo mendeni Paul da geka tumonduse, Paul nengae Silas ghae kena komana edo, nemonde dabade irá ghedo ghuseri. A Greek embo mendeni

ne God tumonduse kambo aminda ya foa ghedo ghusera, nembargo kokotofu da evevetude dabade Paul da geka ningi tumondedo, nemonde dabade irá ghedo ghuseri.

<sup>5</sup> Amingetero, Jusi embo mendeni, ne ava gido dubo mema use, gegen-embo guka dagaya ava aghi edo, nemonde dabade titigho ari dae sedo totoruguseri. Amingedo, Paul Silas ghae sandido natofokena bu furari dae sedo era, Jason da kambo guro beje teteruseri.

<sup>6-7</sup> Teredo, jo tambae useri. Paul Silas ghae jo tambae edo, ne gen-embo Jason a Iesu da dorevare mendeninde dabade, ava sandi jum-budo, reighi da kokotofukena iseri. Era buvudo, koko fuge siseri, “Gegenembo mendeni ne reighi digari aminda dara eoro siroreraira amo, ne fera eminda buvero, Jason nunda kamboda kaifa iri irera. Ne isambu kini (king) eni Iesu seraera, ava kakara eraera. Aminguse, namonde Rome embo da kini beká ainda agho dari bejeraera.”

<sup>8</sup> Aminge sise ne, evetu genembo isambu aminda totorugusera, a reighi da kokotofu aminda totorugusera, Iesu da dorevare imboe aore dae sedo, ghamo deretero erorusira.

<sup>9</sup> Amingetero, reighi da kokotofu dara sekago erá eore dae setero, Jason nunda kokomanade dabade moni mutero ruruseri. Amo nu, dara jo sekago sirorae arira amo, nenda moni sekago barera. Moni mutero budo, dotero iseri.

*17:10-15 Paul Nengae Silas ghae, Reighi Beria Aminda, Iesu Da Bino Ava Vironu Sedo Ghuseri.*

<sup>10</sup> Tumba jiriri, Iesu da dorevare eredo, Paul nengae Silas ghae dabade dirigetero, reighi Beria aminda iseri. Era buvudo, Jusi embo da dengoro indari kamboda+ ya foa ghedo ghuseri.

<sup>11</sup> Jusi embo Tesalonaika aminda mo, ne Paul Silas ghae da geka jo bae edo ghuseri. O evetu genembo Bera aminda, ne Paul Silas ghae da

geka ava ivugaghae ningido, sifo ava inono God da Geka ava tegutuse, ainghae inono edo ghuseri. Ainda susu mo: Paul da geka amo geka bekári, ai tefori, ava kasama ari dae uju edo ghuseri.

<sup>12</sup> Jusi embo digari, Greek gegen-embo digari, a kotugo Greek evevetu mendeni susu iti fafode, ainde dabade, Paul da geka ningido Iesu tumonduseri.

<sup>13</sup> Paul nu reighi Beria aminda irise, God da Geka nangego ava vironu sedo ghusira, ava Jusi embo Tesalonaika aminda nininguseri. Ningi eredo era, reighi Beria aminda buvudo, God da Geka ava imboe aore dae sedo, evetu genembo da ghamo deretero erorusira.

<sup>14</sup> Deretero eroriri, Iesu da dorevare ne Paul budo, nenda mendeni ainde dabade dirigetero era, reighi eva tingu aminda buvurutuseri. Avata Silas nengae Timothy ghae ne Beria aminda fefetuseri.

<sup>15</sup> Gegenembo mendeni Paul da karonu usera amo, ne Paul de dabade era reighi Athens aminda buvudo, ne Paul dotutero nu sisira, “Timothy nengae Silas ghae totoi dirigaovo furoro dae resena,” aminge setiri, ne Athens dodo jovereghe era, Beria aminda buvurutuseri.

*17:16-34 Paul Nu Athens Aminda Vironu Sedo Ghuseri.*

<sup>16</sup> Paul nu Athens aminda, Silas Timothy ghae furoro dae sedo kaifa use, reighi aminda ove digari kevedo bainghedo ghusera ava gido, dubo vevera ambari ava usira.

<sup>17</sup> Edo, Paul nu aindae Jusi embo da dengoro indari kamboda+ natofode dabade se ningido ghuseri. Aminda Jusi embo mendeni a Jusi embo da gitofu mendeni God tumondusera aimi, ne Paul jiro biri, nemonde dabade nunda geka se nininguseri. A nu sifo ava inono, ya ofotighi isagha aminda fetedo, evetu genembo aminda totorugedo ghusera ainde dabade geka sise

sarige, soveni soveni fetedo, beisiga edo ghuseri.

<sup>18</sup> A ijuga kakato mendeni foa Paul de dabade beisiga edo ghuseri. Ijuga kakato mendeni, nenda kotari a ijuga susu eni, nendae Efikurean<sup>18</sup> sedo ghuseri. O ijuga kakato mendeni, nenda kotari a ijuga susu eni, nendae Stoik sedo ghuseri. Paul nu, Iesu da Bino, a Iesu nu nange nange ambarida ghe jebuge erorusira, aında bino ava ijugusira. Ijugiri, ijuga kakato mendeni dere jise siseri, “Genemboé avose, daghedo resira tanojo,” aminge sero, mendeni siseri, “Nu oro mendeni mendeni aında godemane da bino ava resira tano,” aminge sedo,

<sup>19-20</sup> ne Paul unumbe budo era, reighi enda jiro fumbari Ereafagas aminda kaniseremane totorugedo irero buvurutuseri. Buvudo siseri, “Ni geka seka seso, namanenda gitida niningerera. Ava sedo, aında beká mo saso ningarera.”

<sup>21</sup> Aında susu mo: Athens embo a evetu genembo oro mendeni mendeni Athens aminda dighi anumbusera aında kiki: ne saramana imboe edo tefo geka gaka sise, geka seka se ningari dae uju edo ghuseri.

<sup>22-23</sup> Reighi Ereafagas aminda, Paul nu kaniseremane da dombuda eredo sisira, “Athens embo eminda totorugeteva, ne ategi beká ava erena. Na nenda reighi eminda deinghuse nenda banungari vasa digari eretafena. Ava sedo, na kasama erena, ne sukaru a gode mendeni mendeni kakara use banungeraeva. Na eminda deinghuse, banungari da olta (altar) eni tafumutani. Tam-

budo, aında javo mave gembiri irira ava gosumutani. Aında javo amo eviri:

‘Bajari, Ni Ireso Itatamedo Javo Bunise,  
Ninda Olta Tefo Fifiterera, Gi!’  
Ne gode bunise banungeraeva aında bino ava, oroko sari dae erena.

<sup>24</sup> God resena emo, enda a roera isambu enda eminda irira ava, nune etiri sirorusira. Enda da Bajari a utu da Bajari mo, numori. Nu jo evetu genembo da banungari kambo aminda nembo irae eraira. Nu utu a enda isambu bedo edo irira.

<sup>25</sup> Namonde jo God sonembari da kaugo iraeri. Aında susu mo: roera isambu aında jebuga nune muturaira, a namondekena sifo ghousa roera isambu nune muturaira.

<sup>26</sup> God nu giti beká genembo dabako etiri sirorusira, aında imemesiri ava God setiri, gatedo nunda oro oro sirouseri. Siroretero, ne reighi reda dighi anumbaetera, a sifo ningiaminda ya dighi anumbaetera ava, God gatedo setiri, ne reighi nunda nunda era dighi anumbuseri.

<sup>27</sup> God amingusira aında susu mo: namonde numoá tava edo tambore dae sedo, amingusira. Avata God namondekena jo soka iraeri.

<sup>28</sup> Kotugo nenda vironu kakato mendeni daba ava kasama edo eminge gefuseri:

‘Fakina numokena ghedo foa gheraira, a  
namonde nunda fakinaimi setiri jebuga irera.’

A geka eni mo gefuseri:

‘Namonde isambu nunda sasinguri.’

<sup>29</sup> Amo geka beká gefuseri. Namonde nunda sasingu ava sedo, God

<sup>18</sup> **17:18:** Baiboro (Bible) jokáda geka evia, ‘ijuga kakato mendeni...Efikurean...a...Stoik sedo ghuseri,’ ava tambaresa. Amo, jo ijuga kakato sasingu ijugeraera aında saeri. Evetu genembo beká, kotari dabako edo, dabade totorugedo umo use, tofo tofo nenda kotariimi dengoro indido ghusera, aında resira. Mendeni nenda javo Efikurean resira amo, ne kasama a geka beká kasama ari da emboro tambari dae manamana use iriari. Jo tambari da kaugo irae ava sedo ghuseri. Ava sedo, ne eminge kotise sedo ghuseri, “Namonde jo namondeda kotari teria futo tumondae arera. Namondeda itatamari, fisi da uju, a ivuga amo roera mindafugori.” O mendeni nenda javo Stoik resira amo, ne Kuristini kena itako utuakori. Nenda kotari a uju mo, ne nange dubo kotise, geka beká da susu ava tambu kasama aeteri. Amingari dae sedo, “Namonde fisi da uju bureguse, namondeda ivuga jo itako kotae aeteri,” ava sedo ghuseri.

mo, jo ove da kau amingo iraeri. Namonde kotise, auri eni ('gold' o 'silver' seraera) o ghamana eni budo aimi, ove garigo kevarera amo, jo aindae God sae arera!

<sup>30</sup> Evetu genembo isambu ne giti God da agho dari bunedo ghusera ava, God kasama edo irise, nenda ari ekoko gi dodo ghusira. Avata oroko God, evetu genembo nenda ari ekoko vujegedo doyoro dae sedo resira.

<sup>31</sup> God nu Ategi da Sifo gategetiri irira. Amboda furarira. Namonde ava kasama aoro dae sedo, God setiri nunda Genembo ambarida ghe jebuge erorusira. Ategi da Sifo aminda, God nu sari, Genembo ambarida ghe jebuge erorusira aimi, evetu genembo isambu nune bekáda bekáda ategi arira. Nu evetu genembo da ari eveva a ari ekokodae, bekáda bekáda ategi arira," aminge sisira.

<sup>32</sup> Paul nu ambarida ghe jebuge erari da bino ava setiri ningido, mendeni dere jiseri, a mendeni siseri, "Amboda sekago fu, ainda bino ava siruraso ningore!"

<sup>33</sup> Aminge setero, Paul eredo isira.

<sup>34</sup> Evetu genembo mendeni Paul da geka ava ningido, Paul de tatedo Iesu tumonduseri. Eni mo, reighi Ereafagas da kanisere javo Dionysius ri, a eni mo, evetu javo Damaris ri. Ne evetu genembo mendeninde dabade Iesu tumonduseri.

## 18

*18:1-17 Paul Reighi Corinth Aminda, Iesu Da Bino Ava Vironu Sedo Ghusira.*

<sup>1</sup> Ainda amboda, Paul nu eredo reighi Athens ghedo ira, reighi Corinth aminda buvurutusira.

<sup>2</sup> Paul jo ya buvae iriri, Rome embo da kini (king) javo Claudius nu, Jusi embo reighi Rome ava doyoro dae sedo ondisira. Ondiri, Jusi embo da genembo eni javo Aquila noaro Priscilla ghae, ne eredo Rome dodo a Rome da frovensi javo Italy dodo era, reighi Corinth aminda anumberi. Aquila resena emo, nu reighi Pontus

aminda sirorusira. Paul nu amboda ira, Aquila noaroghae kasama edo komana usira. Edo, eredo ya

<sup>3</sup> nemokena avise, nemonde dabade saramana edo ghuseri. Ainda susu mo: ne saramana daba ava use, moni bari dae sedo, embo boka fire dobo edo, bu ya oriro edo ghuseri.

<sup>4</sup> Reighi Corinth aminda irise, Paul nu Jangutari da Sifo ava inono, ya Jusi embo da dengoro indari kamboda+ teredo, Iesu tumondaoro dae sedo, Jusi embo a nenda gitofude dabade geka se ningido ghuseri.

<sup>5</sup> Amingiri, Silas nengae Timothy ghae Frovensi Masedonia ghedo fera buvero, Paul dobo da saramana dodo, vironu vanembo sedo ghusira. Vironu sise, God nu nenda ari ekoko kote doyari dae sedo, Iesu dirigetiri fusira ava tumondaoro dae sedo, Jusi embokena ijugedo ghusira.

<sup>6</sup> Amingiri, mendeni ne eredo, Paul kena osogo use aji setero gido, nu gukai futuse nunda tamo asugari da fonja ava farafaraghetiri vovosusira. Amingedo, nu sisira, "Iesu da Bino setena ava tumondareva amo, jebugareva. O imboe areva amo, ne ambareva. Ne bajariri. Na oroko ne do yama, namonde Jusi embo da gitofukena Iesu da Bino ava sari dae erena."

<sup>7</sup> Aminge sedo, Paul nu Jusi embo totorugusera ava dodo isira. Ira, Jusi embo da gitofu javo Titius Justus da kamboda avido ghusira. Kambo amo, Jusi embo da dengoro indari kambo+ ainda dengesidari. Titius Justus resena emo, nu God tumondedo ghusira.

<sup>8</sup> Genembo javo Crispus, Jusi embo da dengoro indari kambo+ da bajari irá ghedo ghusira amo, numo nunda ghagurude ne Bajari tumondedo ghuseri. Tumondurureoro, evetu genembo mendeni Corinth aminda, Iesu da Bino ava ningido, tumonduse benunu seoro, bafataito edo ghuseri.

<sup>9-10</sup> Tumba eni, Paul nu sono rurusira. Bajari numokena sisira, "Nanda geka jo doyae, sise iraresa.

Erá oju eose! Ainda beká mo: nimo nane kaifa eraena. Eminda evetu genembo digari na tumonderaera; ava sedo, mave ni jo dae arira.”

<sup>11</sup> Bajari sonoda aminge setiri ningido, Paul evetu genembokena God da Geka ijuguse iriri, tambuno 18 ava dadabusira.

<sup>12</sup> Rome embo da kokotofu setero, Rome embo eni javo Gallio, nu frovensi tomanako Akeia da kotofu usira. Kotofu etiri gido, Jusi embo Corinth aminda dabade edo, Paul sandido Gallio kena budo era koto vasada buvurutuseri.

<sup>13</sup> Buvudo siseri, “Genembo emo nu God tumonde bainghari da emboro dombu eni ava ijuguse, namenda agho dari irira ava, evetu genembo bejoro dae sise resira.”

<sup>14</sup> Aminge setero, Paul geke sari dae erorusira. Erorusira, avata Gallio giti Jusi embokena sisira, “Genemboé dara eni o ari eko eni aetira amo, na nenda geke ningaeteni.

<sup>15-16</sup> Avata namane Rome embo da agho dari jo bejaeri. Amo, ne nenda gekadae, nenda javodae, a ne Jusi embo da agho dari aindae beisiga ereva. Avata nenda beisigadae, jo rejo eni sae arena.” Aminge sedo, setiri nunda mendeni ne Jusi embo koto vasada ghedo ondero buvurutuseri.

<sup>17</sup> Buvero, evetu genembo mendeni ne, Jusi embo da dengoro indari kambo+ da bajari javo Sosthenes ava budo, koto kambo da sisi aminda doruseri. Dorero gosusira ava, Gallio nu jo rejo eni sae usira.

#### *18:18-23 Paul Nu Corinth Dotutusira.*

<sup>18</sup> Sosthenes dorusera ainda amboda, Paul nu Corinth aminda itako ghousago, Iesu da dorevarede dabade irei. Ainda amboda, Paul nu Aquila noaro Priscilla ghaede dabade Corinth ghedo vosera, reighi Kenkiria aminda buvurutuseri. Buvudo, Paul beka gajari eni God kena usira. Nu beka gagojusira ava, evetu genembo kasama aoro dae sedo, Paul nu Jusi embo da agho dari ava kotise, setiri nunda beo aruguseri.

Etiri dadabetiri, Paul a Aquila noaro Priscilla ghaede dabade ghakada+ vosedo sembiseri.

<sup>19</sup> Era, reighi Efesas aminda buvudo, ne ghaka+ dodo vivituseri.

Reighi Efesas aminda, Paul ira Jusi embo da dengoro indari kamboda+ teredo, Jusi embode dabade beisiga useri.

<sup>20</sup> Beisiga edo, nu nemonde itako irari sisera avata, Paul nu jo ‘avori’ sae usira.

<sup>21</sup> Nu kamboá dotutuse sisira, “God nu uju arira amo, na jovereghe furarena,” aminge sedo, nu Aquila noaro Priscilla ghae reighi Efesas aminda dodo, ghakada+ vosedo isira.

<sup>22</sup> Sembira, reighi Sesaria aminda buvudo, ghaka+ dodo vitido reighi Sesaria ghedo Jerusalem aminda vitisira. Vitira buvudo, Iesu da dorevare ategi e dodo, reighi Antiok aminda isira.

<sup>23</sup> Ira buvudo, sifo tufako aminda avido, Paul nu eredo ira, Frovensi Galesia a Frijia aminda buvurutusira. Buvudo, Iesu da dorevarekena vironu seari, ivugaghae nininguse fakina edo ghuseri.

#### *18:24-28 Jusi Embo Genembo Eni, Javo Apollos, Iesu Da Bino Ava Vironu Sedo Ghusira.*

<sup>24</sup> Sifo aminda, Jusi embo genembo eni javo Apollos, reighi Alexandria aminda sirorusira aimi ira, reighi Efesas aminda buvurutusira. Apollos resena emo, nu geke vironuderi, a nu God da Geka kasama e gogoghombusira.

<sup>25</sup> Nu anakora Iesu da Bino, a Iesu da Geka ava ningido, bu gogoghombusira. Nu Iesu da kiki ivugaghae se gogoghombedo ghusira. John Bafataito Ari Kato, evetu genembo uvuimi bafataito edo ghusira ava, Apollos kasama usira. Avata Bajari nange nange nunda Asisi Kakara aimi, evetu genembo bafataito edo ghusira ava, nu bunariri.

<sup>26</sup> Apollos reighi Efesas aminda buvudo ira, Jusi embo da dengoro indari kambo+ aminda ya foa ghuse,



Jusi embodae jo oju ae, Iesu da kiki ava vironu sedo ghusira. Aquila noaro Priscilla ghae, ne Apollos da geka ningido, nu unumbedo kamboda iseri. Era buvudo, namonde nange nange Iesu da fakinaimi, ya God kena buvarera ava, nene Apollos kena ijuge gogoghombuseri.

<sup>27</sup> Etero dadabetiri, Apollos nu Frovensi Greece aminda yari dae setiri ningido, Iesu da natofo Efesas aminda, Apollos sonembari dae sedo, Iesu da natofo Greece aminda iriara, aikeneta reta gefuseri. Ne, Apollos nange nange ivugaghae, nati joká doruroro buvaetira, aindae sedo gefuseri. Gembero dadabetiri budo, Apollos nu eredo sembira, Frovensi Greece aminda buvurutusira. Buvudo, Apollos nu evetu genembo mavejoá God sonembuse setiri giti tumondedo ghusera ava, sonembe gogoghombedo ghusira.

<sup>28</sup> Aindae beká mo: nu natofo da dombuda, Jusi embode dabade beisiga edo ghuseri. Beisiga use, Apollos nu dubo kotedo fakina use se darigeari, Jusi embo sifo ghousa beka dodo ghuseri. Nu God da Gekaimi eminge ijugedo ghusira: God namondeda ari ekoko kote do-yari dae sedo, Genembo dirigetiri fusira amo Iesu ri.

## 19

### *19:1-10 Paul Nu Reighi Efesas Aminda, Dengoro Indido Ghusira.*

<sup>1-2</sup> Apollos nu reighi Corinth aminda iriri, Paul nu Frovensi Frijia a Galesia aminda sembira, reighi Efesas aminda buvurutusira. Buvudo, nu Iesu da dorevare mendeni tambudo sisira, “Ne Iesu tumondevo, Asisi Kakara vosedo nemokena asugetiri dubo kotisevu, ai?” aminge setiri, ne siseri, “Asisi Kakara da Bino oroko ava seso, namanenda gitida niningerera.”

<sup>3</sup> Aminge setero, Paul nu sisira, “Bafataito useva da sifo aminda mo, ne dengoro nange nange indero niningusevu? Ava sevu ningone!” aminge setiri, ne mino siseri, “John

Bafataito Ari Kato rea ijugusira, namane ava ningi kasama useri.”

<sup>4</sup> Aminge setero, Paul sisira, “Israel embo nenda ari ekoko vujegedo doyeoro gido, John ne bafataito edo ghusira. Aminguse, John nu, genembo eni nunda amboda furarira, ava tumondaoro dae sedo ghusira. Amo, Iesu dae sedo ghusira.”

<sup>5</sup> Paul aminge setiri ningido, ne tumonduse benunu setero, Iesu da javoda bafataito usira.

<sup>6</sup> Aminguse, Paul nunda ungoi nenda tamonda jighiri, Asisi Kakara nemokena vose asugetiri, ne geka tinongu tanongu sise, God da Geka isagha siseri.

<sup>7</sup> Gegenembo isambu 12 aimi aminguseri.

<sup>8</sup> Tambuno etodaba naká aindae jokáda, Paul nu Jusi embo da dengoro indari kamboda+ ya foa ghuse evetu genembodae jo oju ae, nemonde beisiga edo ghuseri. Aminguse, God nu nange nange evetu genembo dubo budo kaifa ari dae resira, ava tumondaoro dae sedo, beisiga edo ghuseri.

<sup>9</sup> Amingeari, evetu genembo mendeni, ne gogore edo geka jo ningi tumondae edo, Bajari da Bino evetu genembo da dombuda ighagha use aindae aji siseri. Amingetero gido, Paul nu Iesu da dorevare budo, totorugari kambo eni, genembo javo Tyrannus kaifa edo ghusira aminda sembira, sifo ghousa ava geka se ningido ghuseri.

<sup>10</sup> Amingero, ghaeko etoto dadabusira. Ava sedo, Frovensi Asia aminda, evetu genembo isambu Jusi embo nenda gitofude dabade, Bajari da Bino ava nininguseri.

### *19:11-20 Genembo Javo Sceva Da Sasingu Mo, Ne Dara Useri.*

<sup>11</sup> God seari, Paul nu tano a ari mendeni mendeni eari, evetu genembo ne jo gae iriara ava, sireoreari nenda gitida gido ghuseri.

<sup>12</sup> Paul nu saramana use, embo boka eni ifuda dighido ghusira a foiya jiroda ombudo ghusira ava,

evetu genembo mendeni budo ya, evetu genembo kae budo iriara aikena muteoro ava jijighuse jebugedo ghuseri, a sukuru evetu genembo da jokáda ghe foa buvudo ghuseri.

<sup>13</sup> Sifo aminda, Jusi embo mendeni mo, ne ya foa ghuse, sukuru evetu genembo da tamonda ava ondido ghuseri. Aminguse, mendeni ne Bajari Iesu da javoimi, sukuru mendeni ondari dae kotiseri. Ava kotise, ne eminge sedo ghuseri, “Iesu da Bino Paul vironu seraira ainda javoda, ni foa buvaso dae resena,” aminge sedo ghuseri.

<sup>14</sup> Jusi embo da fristi+ da kotofu javo Sceva ainda vide jamena 7 aimi, amingedo ghuseri.

<sup>15</sup> Sifo eni amingero, sukuru nemo-kena sisira, “Iesu na kasama erena, a Paul da bino na niningerena. Avata ne mavejori, amo na erebunena,” aminge sedo,

<sup>16</sup> genembo sukuruimi asugetiri ireira aimi, eredo fakina edo, gegenembo 7 ava de babasegedo nenda embo boka jighi torere tarere ghetiri, ne tefo tamoi sufuseri.

<sup>17</sup> Jusi embo nenda gitofude dabade reighi Efesas aminda, ari ava ningido, oju beká ava use, Bajari Iesu da javo kakara edo ghuseri.

<sup>18</sup> Iesu da natofo barago, ari ava ningido fera totorugedo, natofo da dombuda nenda ari ekoko mendeni mendeni ava vujeguseri.

<sup>19</sup> Iesu da natofo digari, ne giti simbora edo ghusera a kae jighido ghusera amo, nenda simbora da buku a kae da buku amo bambudo fera, evetu genembo da dombuda dungetero avisira. Buku isambu dungetero avisira, ainda mino+ mo K500,000 ri.

<sup>20</sup> Amingetero, evetu genembo digari ne God da fakina ava gido, Bajari da geka ningi tumondedo ghuseri. Aminguse, Iesu da natofo digutusira.

*19:21-41 Reighi Efesas Aminda, Dara Mindafu Sirorusira.*

<sup>21</sup> Ainda amboda, Paul nu Frovensi Masedonia a Greece sembudo, Jerusalem viti yari dae kotisira. Ava kotise, sisira, “Na Jerusalem aminda ya buvono, God amboda sari na Rome aminda yarena,” aminge sisira.

<sup>22</sup> Sedo, nu Frovensi Asia aminda saramana use, nunda sonemba kakato etoto, Timothy nengae Erastus ghae dirigitiri Frovensi Masedonia iseri.

<sup>23</sup> Sifo aminda Frovensi Asia jokáda, reighi Efesas aminda evetu genembo Iesu tumondedo ghusera aindae, titigho useri.

<sup>24</sup> Genembo eni javo Demetrius, nunda kokomanade dabade, ne auri eni ‘silver’ seraera aimi, ove a roera mendeni mendeni keve simbugedo ghuseri. Nenda saramana tomanako mo, ne gode eni Artemis seraera, nunda banungari kambo mindafu ainda kau ava, evetu genembo foa omboro dae sedo, ijoghako keve simbugedo ghuseri. Saramana ainda giti ava Demetrius nune jijighurureari, nunda moni a kokomana da moni digarigo ava siroreari budo ghuseri.

<sup>25</sup> Demetrius resena eimi, aghi etiri nunda kokomana isambu fera numokena totorugetero, nemokena sisira, “Nanda nano namendi, saramana eimi namonde moni buraera.

<sup>26</sup> Paul nu rejo seraira a eraira ava, ne totofo giraeva. Paul seraira: namonde ove keveraera amo, jo gode beká iraeri. Aminge seari ningido, evetu genembo digari Efesas eminda a namondeda Frovensi Asia ainda reighi digari aminda, nunda geka ava tumonderaera.

<sup>27</sup> Evetu genembo digari Paul da geka ava tumondarera amo, namondeda saramanadae aji sarera. Oroko, evetu genembo digari Frovensi Asia eminda, a enda da reighi isambu aminda, namondeda gode Artemis kena banunguse tumonderaera. Avata evetu genembo digari Paul da geka tumondarera amo, ne Artemis a nunda banungari kambo mindafu ava ighagha edo doyarera.”

<sup>28</sup> Aminge setiri ningido, evetu genembo totorugusera aimi, ne janje ekoko etiri koko fuge siseri, “Reighi Efesas da gode javo Artemis mo, teria bekári,” aminge koko sise irero,

<sup>29</sup> evetu genembo isambu reighi aminda niningero, geke ivegedo ise fuse ghusira. Masedonia gegenembo etoto, javo Gaius a Aristarchus, ne Paul de dabade ya foa ghedo ghuseri. Natofoto totorugusera aimi, janje ekoko etiri, Gaius nengae Aristarchus ghae sandi budo, totorugari da vasada bibitai iseri.

<sup>30</sup> Paul, nu teredo natofokena geke sari dae setiri, Iesu da dorevare oju edo, erama numo deoro ambeure dae sedo, buregetero Paul nu esike fefetusira.

<sup>31</sup> Kotugo frovensi da babojegari mendeni anakora Paul de komana usera aimi eredo, erama totorugari vasa aminda tereure dae sedo, aghi mutero ira Paul kena buvurutusira.

<sup>32</sup> Amingero, evetu genembo totorugusera aimi, koko sise irise, geke nunda nunda siseri. Ainda susu mo: evetu genembo digari ne redae totorugusera ava buniseri.

<sup>33</sup> Jusi embo setero, nenda genembo eni javo Alexander, ere fetetiri gido, evetu genembo mendeni kotiseri, “O numo susuri tano,” ava kotero, Alexander nu ungoi de fatido, “Na jo susu iraeri,” ava sari dae usira.

<sup>34</sup> Etiri, Alexander numo Jusi embo ava kasama edo, iji goroto etoto (2 hours) ainda jokáda, erama nunda geke ningeore dae sedo, geke daba ava koko siseri, “Reighi Efesas da gode javo Artemis mo, teria bekári,” aminge siseri.

<sup>35</sup> Iji goroto etoto (2 hours) dadabusira ainda amboda, reighi Efesas da bajari eni eredo, koko sedo setiri beka dotutuseri. Beka dotero, nu sisira, “Nanda nano namendi, namonde isambu Efesas embori. Namondeda gode teria Artemis da banungari kambo, a nunda ghamana

kakara utuda ghe dudurusira ava, namonde Efesas emboi bu kaifa eraera. Ava evetu genembo isambu kasama eraera.

<sup>36</sup> Ava, mave jo ighagha ae eraira. Ava sedo, dubo jama evu! Erá kotae edo, ari eko eni eove!

<sup>37</sup> Gegenembo emo, namondeda banungari kambo da roera eni jo bagia aeri. A namondeda gode Artemis dae aji jo saeri. Ava sedo, ne redae gegenembo emo, sandi bu ojighevu?

<sup>38</sup> Namondeda koto da sifo irira. Ava sedo, Demetrius nunda kokomanade mave koto ari sarera amo, avori, ne koto da sifo aminda foa geke se ningarera.

<sup>39</sup> O ne geke eni se ningari uju areva amo, namonde saoro evetu genembo isambu furoro se ningarera.

<sup>40</sup> Avata namonde oroko rea etera eindae, mave foa ategi arira, aindae na oju erena. Ainda beká mo: namonde susu tefo totorugedo titigho eteri,” aminge sedo,

<sup>41</sup> nu evetu genembo isambu dirigitiri natida iseri.

## 20

*20:1-6 Frovensi Masedonia A Akeia Aminda, Paul Nu Geke Seari, Iesu Da Dorevare Ava Ningido, Ivuga Edo Ghuseri.*

<sup>1</sup> Titigho etero dadabetiri ainda amboda, Paul setiri Iesu da natofoto totorugetero, nu dengoro induduse fakina futuse, ategi e dodo ira, Frovensi Masedonia buvurutusira.

<sup>2</sup> Buvudo, aminda sembise, geke vironu sise, fakina futudo ira, Frovensi Akeia aminda teterusira.

<sup>3</sup> Teredo iriri, tambuno etodaba naká dadabetiri, Paul nu Akeia ghedo Frovensi Syria aminda, ghakada+ sembi yari dae kotisira. Ava kotise nu, Jusi embo numoá dari dae manaka garusera ava, ninigusira. Ningido, nu jovereghe Frovensi Masedonia aminda, agada yari dae kotisira.

<sup>4</sup> **20:4:** Luke nu Paul ghae dabade deinghedo ghusira ava sedo, nu eminda ‘namonde’ gefusira.

<sup>4</sup> Gegenembo mendeni, Paul da karon a edo namonde<sup>4</sup> dabade yari dae siseri. Eni mo, Beria embo genembo javo Sopater, amo Pyrrhus da mandiri. Mendeni mo, Tesalonaika embo gegenembo javo Aristarchus nengae Secundus ghaeri. Eni mo, Derbi embo genembo javo Gaius ri. Mendeni mo, Frovensi Asia embo gegenembo Tychicus nengae Trophimus ghaeri. Eni mo Timothy ri.

<sup>5</sup> Gegenembo resena emo, ne Paul de dabade giti era reighi Troes aminda, namane kaifa useri.

<sup>6</sup> Yisti (Yeast) Kanangara Ari ainda Kirumo+ da amboda, namane ghakada+ vosedo, reighi Filipai ghedo sembero sifo ghabu soveni dadabetiri, namane Troes aminda tere dari vitido, namanenda kokomana Paul de dabade aminda irero tafuseri. Namane fura dabako aminda iriari.

*20:7-12 Paul Setiri, Genembo Ambudurusira Ava Jebugusira.*

<sup>7-8</sup> Fura Kitako tumbaghae namane Bajari kotise, farava nengae vainighae mindari dae sedo, kambo eninda iseri. Era buvudo, namane ofo duruda dodo, viti soroda ghe era ikáda viti anumbuseri. Nanefa digarigo dungetero usasa teriágo usira. Etiri, Paul nu eredo, namane sifo atari natofo dodo yarera ava kotise, nu vironu ghousago siri tumba soroda usira.

<sup>9</sup> Gimasa eni javo Eutychus, nu vironu ningari dae sedo, vindoda (window) anumbusira. Paul vironu siri, Eutychus anumbirisira, diti bainghetiri du endada de ambu fasusira. De ambiri, namane vosedo jighero erorusira.

<sup>10</sup> Paul ere fira vosedo, dotiri firi ovinembedo sisira, “Dubo mema erá eove! Nu avori,” aminge siri nu jebugusira.

<sup>11</sup> Jebugetiri, namane dabade sekago era, vasa daba aminda vivituseri. Viti anumbedo, Bajari kotise, farava nengae vainighae ava mindido, Paul sekago tuturo edo geka

siri sifo atutusira. Sifo atetiri, Paul eredo natofo dodo isira.

<sup>12</sup> O Troes nati embo, ne eredo Eutychus de dabade ivugaghae natida iseri.

*20:13-16 Paul Mane Eredo Troes Ghedo Era, Reighi Mailitas Aminda Buvurutuseri.*

<sup>13</sup> Paul nu namane ghakada iruroro, nusukako agada yari uju usira. Ava sedo namane Paul da kokomana giti setena ainde dabade era, ghakada vosedo, Paul timbari dae, reighi Asos aminda era teteruseri.

<sup>14</sup> Era, Asos tere Paul timbudo, namane isambu dabade Asos ghedo reighi Mitiline sembiseri.

<sup>15</sup> Era buvudo, aminda ghe sembera butu javo Kios darigedo sifo atetiri, era butu eni javo Semos, aminda teredo aviseri. Sifo atetiri, era reighi Mailitas aminda teteruseri.

<sup>16</sup> Paul nu reighi Efesas darige yari dae sisira. Ainda tuka mo: nu Frovensi Asia aminda, sifo eni tefo irari ava imboe usira. Nunda uju mo: nu kirumo javo ‘Pentecost’ ainda gitida, ya Jerusalem aminda buvaeti.

*20:17-38 Iesu Da Dorevare Reighi Efesas Iriara Ainda Babojegarii Fera, Paul Diriguse Ategi Useri.*

<sup>17</sup> Paul nu aghi mutiri, reighi Mailitas ghedo era reighi Efesas aminda buvudo, Iesu da natofo da babojegari numokena furoro dae siseri.

<sup>18</sup> Setero fera buvero, Paul nemokena sisira, “Nanda nano namendi, nanda gitida na Frovensi Asia eminda teredo nemokena iriono, ne nanda irari a nanda ariá gido ghusevu.

<sup>19</sup> Jusi embo ne namokena veka sembae use, namo dari dae sedo manaka garuseri. Avata na jo aindae sedo saramana doyaeri; na sabua+ edo dubo memaghae, Bajari da saramana edo ghuseni.

<sup>20-21</sup> Na sifo ghousa evia, evetu genembo isambu sonembari dae sedo, nanda kotari isagha sedo ghuseni. Natofo isambu da dombuda a evetu genembo da kamboda, natofo nange

ningido jebugaetera ava kotise, na geke eveda a geke fakarago ava sedo ghuseni. Na Jusi embokena a Jusi embo da gitofukena eminge sedo ghuseni, 'Nenda ari ekoko God kena vujege dodo Bajari Iesu tumondevu!'

<sup>22</sup> Avori, God da Asisi Kakara ai setiri, na oroko Jerusalem sembi yari dae erena. Na ominda rejo tambarena ava, na erebunena.

<sup>23</sup> Na dabako kasama erena amo, na emboroda irureono, Asisi Kakaraimi seari evetu genembo reighi a vasa isambuda foa namokena seraera, 'Nimokena dara siro-rari, ni diburada fitarera,' seraera.

<sup>24</sup> Avata na ambari dae jo oju ae erena. Bajari Iesu saramana rea namokena futusira, ava use iria edo ambarena, a nu avori. Avata God nu evetu genembokena jebuga nange muturaira aida Bino Eveva ava, na isagha saeteni.

<sup>25</sup> Na nenda jokada irise, God namonde nange kaifa<sup>25</sup> eraira ava, nane osa seono ningido ghusevu. Avata na oroko kasama erena amo, ne na sekago jo gae areva.

<sup>26</sup> Na oroko isagha resena: ne jebuga evovodae irari jo tambae areva amo, jo nanda dara iraeri.

<sup>27</sup> Aida beka mo: God nu rejo arira, a rejo uju eraira ava, ijuguse seono ningido ghusevu. Na evetu genembo da kotari aida jo oju aeri. Na geke isambu seono ne ningido ghusevu.

<sup>28</sup> God da Asisi Kakara ai setiri, ne Iesu da natofo da babojegari edo ireva agido, nenda evetu genembo a nembarago totofo, dabade kaifa e gogoghombevu! Iesu da natofo ava, God nune nunda Mandi da ambariimi ofusira. Ava sedo, kaifa e gogoghombevu!

<sup>29-30</sup> Na eminge resena aida beka mo eviri: nanda amboda, gegenembo mendeni foama Iesu da dorevare ava dedeuse, ijuga sembae ava tumondaovo dae sarera. Gegenembo amo nenda jokada aima eredo,

gungubo sarera. Gungubo sarera aida beka mo: natofo nange Iesu da geke dodo, totofo nemoa tumondedo nenda amboda amboda aoro dae sedo, gungubo sarera.

<sup>31</sup> Ava sedo, kaifa e gogoghombevu! Na nange ghaeko etodaba naka ava, nenda jokada sifo tumba evia inono, dubo mema a soraraghae ne ijugedo ghusena ava, kote gogogho use irivu!

<sup>32</sup> "Na jo amboda ne kaifa ae arena agido, God nemo kaifa are dae sise, benunu seraena. A nu namondedae joka edo sonembari dae sisira da geke, aida fakinaimi barago ne kaifa are dae sise, benunu seraena. God nu inonori. Nune ne enda eminda kaifa arira, a utu ominda ne esimbugururari, ne God da natofo isambu aida dabade evovodae irareva.

<sup>33</sup> Na mave da moni, embo boka, a gugua aida jo ghama baeri.

<sup>34</sup> Ne kasama ereva: nanda ungoi saramana use moniimi oriro edo, nanda oka bayau, gugua, a nanda kokomana da oka bayau a gugua isambu ombudo ghuseni.

<sup>35</sup> Na aminguse, namonde nange nange makasi embo sonembaetera ava ijugedo ghuseni. Na aminguse, Bajari Iesu nu tofo mandi geke rea sisira, ava kotedo ghusena amo eviri: 'Mutari mo, dubo eveda a ivugaghaeri, jo mino buraera amingo iraeri,' "

Paul aminge setiri dadabusira.

<sup>36</sup> Dadabetiri, nu nemonde dabade kauboi dadarigedo banunguseri.

<sup>37</sup> Banungedo, ne isambu sorara use, Paul ategi edo sandi muno useri.

<sup>38</sup> Nu sekago jo furae arira ava ningido, dubo mema teria beka ava useri. Aminguse, ne namonde dabade era fafoda buvurutuseri.

## 21

*21:1-16 Paul Nunda Kokomanade Dabade Sembera Darido Jerusalem Vitiseri.*

<sup>25</sup> **20:25:** Afige, **Geka Se Disugari Da Vasa** aminda, geke *Natofo* dae rea gefusera, ava tege garesa.

<sup>1</sup> Paul nu ghakada+ vosedo, namane nati embo ategi edo, do sem-biseri. Namane dambu sembera, butu javo Kos aminda teteruseri. Tere buvudo sembero sifo atetiri, namane butu javo Rhodes aminda tere buvudo sembero sifo atetiri, reighi javo Patara aminda teteruseri.

<sup>2</sup> Teredo, ghakaá+ dodo, ghaka+ eni tava useri. Ghaka+ eni Frovensi Foensia yari dae simbugiri kasama edo, aminda sembudo iseri.

<sup>3-4</sup> Sembise, butu Cyprus gido iji vosarikená era ovenembuseri. Ovenembedo sembera, reighi javo Taiar, Frovensi Syria aminda teteruseri. Frovensi Foensia setena amo, kitakori. Amo frovensi mindafu javo Syria, aında frovensi eniri. Teteruse, ghaka+ da bajari, nu gugua mendeni tigoró vosare dae sisira. Avori, namane ghaka+ do vitido, Iesu da dorevare mendeni tambudo nemokena aviseri. Amingero, nati embo siseri, “Namane Asisi Kakara da fakinaimi resera: Paul, ni Jerusalem ominda jo yae aresa,” aminge siseri.

<sup>5</sup> Namane aminda irero fura dabako dadabetiri, namane yari dae javi ero, nati embo evevetu mandi sasingude javi etero, namonde dabade vosera fafoda buvudo, namane kauboi dadarigedo banunguseri.

<sup>6</sup> Banungetero dadabetiri, namane eredo nati embo ategi edo era, ghakada+ vovosero, ne jovereghe natida iseri.

<sup>7-8</sup> Namane tuturo edo reighi Taiar ghedo sembera, reighi javo Tolemeas aminda teteruseri. Teredo, Iesu da natofo tambudo nemokena anumbedo tumba dabako geka se niningero sifo atetiri, namane eredo reighiá dodo era, reighi Sesaria aminda buvudo, feroveta eni javo Philip kena aviseri. Philip resena emo, nu giti gegenembo 6 ainde dabade Jerusalem aminda bayau soro aoro dae sedo, gateguseri.

<sup>9</sup> Philip nunda sasingu, ade jamena avononde naká, ainde dabade God

da Geka isagha sedo ghuseri.

<sup>10</sup> Sifo etoto o etodaba ava reighi aminda irero, God da feroveta gen-embo javo Agabus, Frovensi Judia aminda ghedo fira buvudo, namanekena teterusira.

<sup>11</sup> Teredo, Paul da ifu dighari ava budo, tofo nunda ungo ata bundedo eminge sisira, “Na ungo ata bundeteno, eregoseva emo, Jerusalem ominda, Jusi emboi eredo ifu dighari eında numamo ava, eminge sandi bundarera. Bundedo, namonde Jusi embo da gitofu Rome embokena mutarera.”

<sup>12</sup> Aminge setiri ningido, namane nati embode dabade, Paul erama Jerusalem yeure dae sise bureguseri.

<sup>13</sup> Buregusera avata, nu sisira, “Ne redae sorara use amingevo, na dubo mema ereni? Jerusalem ominda na bundarera, a nu avori. Kotugo na Iesu tumonderaena aında sedo, daoro ambarena ábarago, avori. Na jo aında sedo oju ae arena.”

<sup>14</sup> Aminge sedo, namanenda geka jo bae etiri Jaredo, namaneva beka dotutuseri. Beka dodo, eminge siseri, “Avori, Bajari da uju aminga ava are!”

<sup>15</sup> Aminge setero, aminda iri-ara edo aında amboda, namane eredo namanenda roera simbugedo Jerusalem iseri.

<sup>16</sup> Reighi Sesaria aında dorevare mendeni barago, eretero namonde dabade iseri. Era buvudo, namane vasa reda avarera ava, nene ijugetero namane gosuseri. Kambo aında numamo da javo mo, Mnason ri. Numo butu Cyprus embori. Mnason resena emo, nu giti beká tuturo edo Iesu tumondedo ghusira.

*21:17-26 Paul Nu James Kena Ira Buvudo, Nengae Anumbedo Geka Siseri.*

<sup>17</sup> Namane era Jerusalem aminda buvero, Iesu da dorevareimi eredo, ivugaghae namane ava nati jóká doruseri.

<sup>18</sup> Nati jóká detero, tumba dabako avido sifo atetiri, namane Paul

de dabade eredo James kena era, Iesu da dorevare da babojegari totorugedo, anumbirero teteruseri.

<sup>19</sup> Namane tere anumbetero, Paul eredo, nu nange nange vironu seari, God nu Jusi embo da gitofu digari ava aghi edo esimbugedo ghusira ava, osa setiri nininguseri.

<sup>20</sup> Ningido, ne God dae sakai setero dadabetiri, Paul kena eminge siseri, “Namanenda namendi, ni kasama eresa, namonde Jusi embo da natofo digari ambari eko ava Iesu tumonderaera. A kotugo, ne Moses da Geka barago kaifa e gogoghombuse irera.

<sup>21</sup> Evetu genembo mavejo mavejomi fera, gungubo nindae eminge siseri, ‘Namonde Jusi embo da natofo mendeni era, namondeda gitofukena nati dighi anumberi. Aina amboda, Paul nemokena ira, Moses da agho dari a namonde Jusi embo da kiki ava doyoro dae sise, a nenda vide jamena da vika mendo anoso ava erama gafugeoro dae sise, sedo ghusira,’ aida gungubo ava seoro ningiraera.

<sup>22</sup> Ni fumutasa ava natofo ningido, janje ekoko arera. Ava sedo, namonde nangareri?

<sup>23</sup> Emingaresa. Gegenembo avononde naká eminda fetirero eregosesa emo, ne saramana a ari mendeni mendeni God da javoda use, nenda beo jo arugae irise, itako avido nenda beo arugari dae siseri. Amingari dae sedo, God kena beka gagojuseri. Avori, nenda sifo orokoá ojighira dadabetira.

<sup>24</sup> Ava sedo, ni nemonde dabade ya, Moses da agho dari rejo resira ava simbugedo, ne nenda beo arugururoro, aida joba da sino fuka nine ombaresa. Amingaresa amo, evetu genembo isambu kasama arera: ‘Amo, gungubo siseri. Paul nu Moses da agho dari kaifa eraira.’

<sup>25</sup> Avata namonde Jusi embo da gitofu mendeni Iesu tumondusera amo, ne Moses da agho dari kaifa aoro dae jo saeri. Namane retada (letter) geke evia nembo kaifa aoro

dae gefuseri.

Sino fuka de bu ya ove kevari da dombuda joba muturaera ava, erá bu mindeoro dae siseri. Ororo erá mindeoro dae siseri. Sino fuka duboda ivasi aoro ambarira da ororo jo vosae arira amo, erá mindeoro dae siseri. A kombo yagera erá eoro dae sedo siseri,”

James mane aminge siseri.

<sup>26</sup> Setero, Paul nu, gegenembo avononde naká sisira, ava budo nemonde era nenda beka gajari God kena etero dadabusira. Ava evetu genembokena ijugaoro kasama aoro dae sedo, ne eredo Paul de dabade uvu gutuseri. Edo, roera mendeni Moses da Agho Dari resira ava useri. Etero dadabetiri, Paul nu eredo ira, God da Kambo+ aminda teredo sisira, “Gegenembo avononde sonemberaena ava, oroko God da saramana ari sisera aida tano fitari dae, uvu guteteri. Ava sedo, nenda javo gembaso fura dabako aida amboda, ne foama nenda sino fuka dedo joba mutoro nenda beka gajari da sifo dadabarira,” aminge sisira.

*21:27-36 Paul Sandi Diburada Fiftuseri.*

<sup>27</sup> Paul da kokomana nenda fura dabako jo dadabae iriri, Paul nu God da Kambo+ jokáda iriri, Jusi embo mendeni Frovensi Asia ghedo fusera aimi gosuseri. Gido ne eredo, Paul kena osogo ari dae sedo, evetu genembo da ghamo deretero erorusira. Eretiri, ne Paul sanduduseri.

<sup>28</sup> Sandido, ne eminge kori siseri, “Israel embo, fuvu, sonembaove! Genembo ei yama reighi mendeni mendeni aminda deinghuse, evetu genembo isambu dedeuse, ne namonde Jusi embo da agho dari, Moses da agho dari, a God da Kambo+ evia imboe aoro dae sedo, dengoro induduse ijugeraira,”

<sup>29</sup> Aminge sisera da beká mo: gitofu da reighi Efesas genembo eni javo Trophimus, nu isaghada Paul ghae deinghero gido kotiseri, “Paul namondeda agho dari bejise, namonde da gitofu enighae

dabade ojera, God da Kamboda+ tereteri tano,” aminge kotise, Paul sanduduseri.

<sup>30</sup> Paul sandudusera ainda bino ava ningido, evetu genembo fera totoruguseri. Totorugusera avata, ne susu bunise, Paul ava ungodu bu jumbu buvurutuseri. Jumbu fera isaghada buvero, evetu genembo mendeniimi God da Kambo+ da guro ava gagojuseri.

<sup>31</sup> Evetu genembo totorugusera aimi Paul budo, ambare dae sedo dorero, Rome embo da isoro kakato da giti jighari ainda bino ava iri niningusira. Amo, Jerusalem embo isambu titigho ariá setero nu niningusira.

<sup>32</sup> Ningido, nu totoi eredo, nunda isoro kakato mendeni nenda babojegaride dabade budo, sumbudo era natofo jokáda teteruseri. Ne Paul dorero, isoro kakato nenda giti jigharide dabade era buvero gido, dotutuseri.

<sup>33</sup> Doteru, giti jighariá nu Paul kena ira numoá sandido, seini (chains) etoto aimi bundoro dae sedo, ategi usira, “Genemboé mavejori? Nunda dara rejori? Nu nangeti?” aminge ategi usira.

<sup>34</sup> Ategi etiri, natofo ne geke nunda nunda siseri, geke jo dabako saeri. Agido, isoro kakato da giti jighari nu Paul daoro ambare dae usera ainda susu ava, nu bunisira. Bunedo setiri, nunda isoro kakato Paul budo, nenda vasa, furu dighi birurughusera ainda jokáda era teteruseri.

<sup>35</sup> Era, furu da riri aminda buvudo, isoro kakato ne Paul fumbudo vivituseri. Ainda beká mo: natofo totorugusera aimi, nu dari dae useri.

<sup>36</sup> Ne Paul da amboda amboda ise koko sise, “Devu ambare!” siseri.

### *21:37–22:16 Paul Nusuka Nunda Geka Sisira.*

<sup>37</sup> Furuda jarigari dae use, Paul nu isoro kakato da giti jighari aikena Greek gekaimi sisira, “Nanda geke itako saono ningaresa,” aminge setiri, isoro kakato da giti jighari

nu dudukughedo sisira, “Ni nange nange Greek gekaimi resesi?”

<sup>38</sup> Nanda kotari mo: Egypt embo genembo eni ghaeko dotutusera ominda tuturo edo, nunda mendeni isambu 4,000 ava budo, namane Rome embode isoro ari dae sedo, misi, gandigha, kefata, goroba budo, reighi uvu irae da vasa aminda jungari dae isera ava, na nimova seteni,” aminge setiri,

<sup>39</sup> Paul sisira, “Na Jusi embori. Na Frovensi Silisia ainda jokáda, reighi javo Tarsus aminda siroruseni. Reighi resena emo, jo kitako iraeri, mindafu bekári. Na uju erena amo, na natofokena vironu sarena,” aminge sisira.

<sup>40</sup> Setiri, isoro kakato da giti jighari nu ‘avori’ setiri, Paul nu ririda fetedo, beka doyoru dae sedo, ungoi de fatiri beka dotero, nu Israel embo da gekaimi sisira.

## 22

<sup>1</sup> “Nanda nano namendi, na reju ava usena, ainda beká ava saono ningareva,” aminge sisira.

<sup>2</sup> Paul nu Israel embo da gekaimi siri kasama edo ningi gogoghomboro, Paul sisira,

<sup>3</sup> “Namo Jusi embori. Na reighi Tarsus Frovensi Silisia aminda siroruseni. Avata na Jerusalem eminda babojuseri. Babojeno, Gamaliel na dengoro indido ghusira. Abuamane da kiki a namondeda agho dari ava, dengoro indeari ningi gogoghombedo ghuseni. Ne oroko God dubo budo a God kotise totorugeteva, kau daba aminga ava, na God kotise iriani.

<sup>4</sup> Evetu genembo mendeni Iesu tumondedo ghusera amo, nane budo, amboro dae sedo, sandido diburada fitido ghuseni.

<sup>5</sup> God da fristi+ da giti jighari a kaniseremane isambu kasama erera, na geke beká resena. Ne nenda kokomanakena, Jusi embo, reighi Damascus aminda reta mendeni gembudo mutero ruseni. Budo, na Damascus aminda iseni. Isena ainda beká mo: na Iesu da dorevare



setena ava, sandi seiniimi (chains) bundedo, Jerusalem eminda bu foama koto ari dae sedo iseni.

<sup>6</sup> “Ena, reighi Damascus buvari dae eno, usasa tomanako janimbedo nanda tamonda garusira.

<sup>7</sup> Gaetiri, na endada du faseteno, beka eminge siri nininguseni, ‘Saul, Saul, ni redae namokena dubo mema futuse fakarago eresi?’

<sup>8</sup> ava ningido na siseni, ‘Arie, Bajari! Ni mavejori?’ seteno, nu sisira, ‘Na Nasareth embo genembo Iesu ri. Ni namokena dubo mema futuse fakarago eresa,’ aminge sisira.

<sup>9</sup> Gegenembo mendeni namonde dabade isera amo, ne usasa gosusera avata, ne beka jo ningaeri.

<sup>10</sup> Na ategi useni, ‘Bajari, na nangareni?’ Seteno, Bajari namokena sisira, ‘Ni ere fetedo yasi! Reighi Damascus aminda teraso, God ninda saramana rea aso dae gategusira ava, amboda enii foa saoro ningaresa.’

<sup>11</sup> Aminge setiri, nanda kokomana na ungodá budo era, reighi Damascus aminda teteruseri. Ainda beká mo: na usasa tomanako geno, diti sovasova etiri rejo eni jo gae useni.

<sup>12</sup> “Genembo eni javo Ananias, nu God kotise, namonde Jusi embo da agho dari kaifa e gogoghombedo ghusera. Amingiri gido, Jusi embo isambu reighi Damascus aminda, nu kakara edo ghuseri.

<sup>13</sup> Nune fira tere namokena fetedo sisira, ‘Nanda namendi, diti eveva ari sekago gaso dae resena!’ aminge siri, nanda diti afigetiri nu gosuseni.

<sup>14</sup> Goseno, nu sisira, ‘God namondeda abumane tumondedo ghusera aimi, nunda uju ava kasama aso dae sedo, ni gategusira. A nunda Saramana Kato kakara a eveva ava, tofo nunda bekaimi sirurari nininguse, ninda ditiimi gaso dae sedo, ni gategusira.

<sup>15</sup> Ainda beká mo: ni rejo kasama usesa a niningusesa ava, evetu genembokena osa siruraso ningarera.

<sup>16</sup> Ava sedo, erá kaifa eose! Ni eredo, Bajari da javoda benunu saso,

nu ninda ari ekoko kote dodo seghe fugari, ni bafataito aresa,’ aminge sisira.

*22:17-29 God Nu Nange Nange Paul Dirigetiri, Gitofukena Vironu Sari Dae Isira Ainda Gekari.*

<sup>17</sup> “Setiri, na amingedo, aminda itako irisena edo, eredo fena Jerusalem eminda buvudo, God da Kambo+ aminda teredo banunguse, Bajari nanda diti mokoi gosuseni.

<sup>18</sup> Goseno, nu namokena sisira, ‘Totoi eredo, Jerusalem dodo yasi. Ainda susu mo: ni eminda rejo ava nandae evetu genembokena saresa amo, ne jo tumondae arera,’ aminge sisira.

<sup>19</sup> Setiri, na siseni, ‘Avata Bajari, ne totofo kasama erera amo, na giti yama dengoro indari kambo+ mendeni mendeni aminda, ninda dorevare sandi dedo ghuseri.

<sup>20</sup> A kotugo, evetu genemboi ninda osa sari kato Stephen ava detero ambududurusira ainda sifoda, na aminda fete gido ivuga use, nenda tamo asugari ava, nane kaifa useni. Na amingusena amo, nanda natofo Jusi embo kasama erera. Ava sedo, na nemokena vironu sarena amo, ne ningido tumondarera tano,’ aminge seteno,

<sup>21</sup> Bajari sisira, ‘Ni yaso dae sedo, na ni dirigeteni. Ni yasi! Reighi mendeni mendeni soka beká aminda, ninda natofo Jusi embo da gitofukena vironu saso ningore!’ aminge sisira.”

<sup>22</sup> Evetu genembo totorugusera aimi, Paul da geka niningero, gitofukena vironu sari ava setiri ningido, ne tuturo edo koko siseri. Koko eminge siseri, “Namonde nu daoro ambare! Nu geka setiri ningera ain-dae, nu daoro ambare dae resera,” aminge sise,

<sup>23</sup> Janje ekoimi, embo boka budo vurafa vurafa ghuse, fonja budo ikáda babariguseri.

<sup>24</sup> Amingero, Rome embo da giti jighari nunda isoro kakatokena sisira, “Jusi embo redae emingerera

da tuka ava kasama ari dae sedo, genembo emo, bu namondeda vasada teredo saovo einda beká ava nune sari ningarera,” aminge setiri,

<sup>25</sup> isoro kakato ne Paul budo, dari dae sedo bundetero, Paul nenda bajari eni aminda fetirisira aikena sisira, “Na Rome embo da tofori. Ne Rome embo da tofo jo koto ae irise dareva amo, inono arira, ai tefo? Rome da agho dari nange resi?”

<sup>26</sup> Aminge setiri ningido, isoro kakato da bajari nunda giti jigharikenana ira sisira, “Ni nangeresita? Genembo emo Rome embo da tofori,” aminge setiri,

<sup>27</sup> isoro embo da giti jighari ira Paul kena buvudo sisira, “Se ningone! Geka beká resesa, ni Rome embo da tofori, ai tefo?” aminge setiri, Paul nu ‘ai’ sisira.

<sup>28</sup> Setiri, isoro kakato da giti jighari sisira, “Na moni teriango mutudo, Rome embo da tofo useni,” aminge setiri, Paul sisira, “Avata namo jo moni mutudo ai tofo aeri, na taká Rome embo ava siroruseni,” Paul aminge setiri ningido,

<sup>29</sup> gegenembo Paul dedo ategi ari dae erusera amo, ne oju edo, totoi nu dodo era ajagha fefetuseri. Isoro kakato da giti jighari barago oju usira. Ainda tuka mo: Paul nu Rome embo da tofo ava bunise, seiniimi (chains) bundise agho dari bejisira aindae.

*22:30–23:11 Paul Nu Kaniseremanekena Teredo, Geka Sisira.*

<sup>30</sup> Jusi embo redae Paul dae dubo vevera use aji sisera ava, kasama ari dae sedo, Rome embo da isoro kakato da giti jighari nu emingusira. Sifo atetiri nu setiri, nunda mendeni Paul da seini (chains) vujegetero, nu, fristi+ da babojegari a kaniseremane isambu totorugaoro dae sisira. Setiri totorugetero, nu Paul budo ira fitiri babojegari totorugusera aindae dombuda fefetusira.

## 23

<sup>1</sup> Fetedo, kaniseremane da dombu gi gogogho use sisira, “Nanda nano

namendi, na siroredo fusena ava, evetu genembokena a God kena eko eni tefori,” aminge setiri ningido,

<sup>2</sup> fristi+ da giti jighari javo Ananias aimi eredo, gegenembo mendeni Paul da dengesida fetirisera, aikena sisira, “Genembo aindae bekada devu!”

<sup>3</sup> Aminge setiri, Paul numokena sisira, “Evetu genembo ni evevava seraera avata, ni genembo ekori. God ni darira. Ni anumbirise, God da Geka kotise namo daoro dae setesi. Aminge sise, ni tofo namondeda Agho Dari bejetesi,” aminge sisira.

<sup>4</sup> Setiri, gegenembo mendeni Paul da dengesida fetirisera, aimi Paul kena sisira, “Ni nangedo God da fristi+ da giti jigharikenana geke eko resesi?” aminge setero ningido,

<sup>5</sup> Paul sisira, “Agá, nanda nano namendi! Numoá fristi+ da giti jighari ava buneteni. Kasama aetena amo, gekeá jo numokena sae aeteni. Na kasama erena amo, God da Geka eminge resira:

‘Ne nenda kotofukena geke eko jo sae areva!’ ” aminge sisira.

<sup>6</sup> Gegenembo totorugusera amo, mendeni ne Moses da Geka kaifa kakatori+ a mendeni ne Sadusi embori. + Ava kasama edo, Paul nu kaniseremane da dombuda beka mindafu sisira, “Nanda nano namendi, na Moses da Geka kaifa kakatori,+ a nanda oro barago Moses da Geka kaifa kakatori.+ Na tumonderaena: namonde ambarera amo, God namonde sari jebuge erarera. Ne aindae sedo na koto ereva,” aminge siri ningido,

<sup>7</sup> Moses da Geka kaifa kakato+ tuturo edo, Sadusi embode+ dabade beisiga use kotari nunda nunda useri.

<sup>8</sup> Aindae beká mo: Sadusi embo+ ne aneya jo tumondaeraera, sukaru jo tumondaeraera, a evetu genembo ambarida ghe jebuge erarera, ava ne jo tumondaeraera. Avata Moses da Geka kaifa kakato,+ ne roera etodaba naká setena ava, isambu tumonderaera.

<sup>9</sup> Ava sedo, beisiga edo tiriseri. Aminguse, Moses da Geka kaifa kakato+ aında ijuga kakato mendeni eredo siseri, “Genembo emo nu dara eni jo aeri, a geke eko eni jo saeri. Avose, namonde berefori, aneya eni fira numokena dengoro indususira tano.”

<sup>10</sup> Aminge setero, ne tuturo edo tataya useri. Aminguse, ne Paul ava jumbu ya foa ghetero, ifuda tafusegari dae etiri Jaredo, Rome embo da isoro kakato da giti jighari nu eredo setiri, nunda isoro kakato gegenembo tataya usera aında jokáda teredo, Paul budo nenda vasada jovereghe era teteruseri.

<sup>11</sup> Tumba jiriri, Bajari Paul kena fira isagha usira. Isagha buvu fetedo, Paul kena sisira, “Erá oju eose! Ni Jerusalem eminda nandae osa seteso niningumutari. Kau daba aminga ava, ni reighi Rome ominda nandae osa saso evetu genembo ningarera,” aminge sisira.

*23:12-22 Jusi Embo, Ne Paul Daoro Ambare Dae Siseri.*

<sup>12</sup> Setiri dadabetiri, sifo atetiri, Jusi embo ne totorugedo manaka garuseri. Manaka gaedo, God kena beka gagojuse siseri, “Namonde uvu bayau reeta use, Paul daoro ambari gido, aında amboda sekago uvu bayau mindarera,” aminge siseri.

<sup>13</sup> Gegenembo aminge sisera amo, digarigori, 40 darigusira.

<sup>14</sup> Aminge sedo, ne eredo fristi+ da kokotofukena a evetu genembo da babojegarikena era buvudo siseri, “Namane uvu bayau reeta use, Paul daoro ambari gido, aında amboda uvu bayau mindarera.

<sup>15</sup> Ava sedo, ne kaniseremane isambu, sevu Rome embo da giti jighari Paul mutari furare! Ne eminge sevu: ‘Namane Paul foa nunda geke sari ningi gogoghombari dae sise resera,’ aminge sise derevu, mutari furare! Aminge saovo, Rome embo da giti jighari Paul mutari fururari, namane nu emboro soroda gajedo daoro ambarira!”

<sup>16</sup> Aminge sisera avata, Paul da ghasovu da mandi ava ningido ira, isoro kakato da vasada teredo, Paul kena osa sisira.

<sup>17</sup> Setiri ningido, Paul nu kori setiri, Rome embo da isoro kakato da bajari eni fira buviri, Paul numokena sisira, “Gimasa emo budo yasi, ninda giti jigharikena buvaso, numokena geke eni irira ava sari ningare!”

<sup>18</sup> Aminge setiri, isoro kakato da bajari Paul da mandi budo ira, nunda giti jigharikena teredo sisira, “Genembo Paul, namonde sandi diburada ffitusera amo, kori setiri na numokena aena buveno, nu gimasa emo nimokena bu furono dae setira.”

<sup>19</sup> Aminge setiri, giti jighari amo Paul da mandi aında ungodá budo ira esike fetedo, numokena ategi usira, “Ni nandae rejo ava saresi?”

<sup>20</sup> Ategi etiri, Paul da mandi sisira, “Jusi embo mendeni manaka gaedo, nimo derari dae sedo emingarera. Sifode, ne foa eminge sarera, ‘Namane, Paul foa kaniseremankena nunda geke sari ningi gogoghombari dae sise resera,’ ava sarera.

<sup>21</sup> Foa aminge sarera amo, erá nenda geke ningeose! Aında beká mo: Jusi embo mendeni 40 darigetera aimi, Paul dari dae junge kaifa arera. Ne isambu beka gagojuse uvu bayau reeta use, Paul daoro ambare dae seteri. Ne anakora simbugedo, ni rea saresa, ava kaifa erera,” aminge sisira.

<sup>22</sup> Setiri ningido, isoro kakato da giti jighari numokena sisira, “Seteso ningena ava, evetu genembo mendenikena erá osa seose!” aminge sise, nu Paul da mandi dirigitiri isira.

*23:23-35 Isoro Kakato Ne Paul Budo, Frovensi Da Kotofu Javo Felix Kena Siseri.*

<sup>23</sup> Gimasa dodo iri, Rome embo da isoro kakato da giti jighari embo eredo kori setiri, nunda isoro kakato da babojegari etoto naká, numokena fera buvero nu sisira, “Sevu, isoro kakato 470 reighi Sesaria aminda

yari dae simbugaore! 200 ne ke-fata budo yarera, 200 ne goroba bu yarera, a 70 ne sino fuka javo hosida (horse) yarera. Ne oroko tumbaghae 9 koroko yareva.

<sup>24</sup> Edo Paul mo, hosida (horse) mutovo yarira. Avori, ne Paul kaifa udo yama, frovensi da kotofu Felix kena mutuvu, nune kaifa are!” aminge setiri,

<sup>25</sup> giti jighari nu frovensi da kotofukena reta eminge gefusira:

<sup>26</sup> Na Claudius Lysias ri. Ni frovensi da kotofu ava sedo, na ni ategi beká ava erena. Felix nimokena geke itako sari dae erena, gi!

<sup>27</sup> Jusi emboimi genembo javo Paul ava sandido dari dae useri. Nu namonde Rome embo da tofo, ava ningido eredo, nanda isoro kakato mendeninde dabade era nu sonembe budo fera, namanenda vasada fitido kaifa erera.

<sup>28</sup> Jusi embo ne Paul dari dae usera, ainda susu tambari dae sedo, na Paul budo ena buvudo, nenda kaniseremanekena tetereuseri.

<sup>29</sup> Jusi embo da kaniseremane nemonde Paul de dabade geke se niningero, na kasama useni: Paul nu namonde Rome embo da agho dari eni jo bejaeri. Ava sedo, numo jo daoro ambae aetira, o diburada jo fitae aeteri. Nu nunda oro beká Jusi embo da agho dari ava, bejisira. Amingetiri andae sedo, ne janje ekoko useri.

<sup>30</sup> Jusi embo ne Paul dari dae manaka garero ava ningido, nimokena mutari dae resena. Evetu genembo Paul koto ari dae osa resera amo, nimokena ya nenda bouvu saoro dae resena. Yari budo gi!

Avakori!  
aminge gefusira.

<sup>31</sup> Nenda giti jighari rea sisira ava, nunda isoro kakato ava useri. Amo, ne eredo Paul budo era reighi javo Entipatres aminda buvero, sifo atutusira.

<sup>32-33</sup> Sifo atetiri, isoro kakato atai isera amo, ne eredo Paul dodo jovereghe nenda vasada iseri.

Isoro kakato hosida (horse) isera amo, ne Paul budo, nemonde era reighi Sesaria aminda buvudo, reta frovensi da kotofukena mutero biri, Paul aminda numokena diriguseri.

<sup>34</sup> Dirige dodo ero, frovensi da kotofoá reta bu tegedo, Paul kena ategi usira, “Ni reighi ningiai embori?” setiri, Paul sisira, “Na Frovensi Silisia aminda siroruseni,” aminge setiri,

<sup>35</sup> frovensi da kotofu javo Felix sisira, “Evetu genembo nimo koto ari dae resera, ava furarera da sifo aminda, na dara da susu ningi gogoghom-barena,” aminge sedo, nu Paul budo ya, kambo Herod itutusira aminda kaifa aoro dae sisira.

## 24

*24:1-9 Jusi Embo Fera Felix Kena, Nenda Bouvu Ava Osa Setero Niningusira.*

<sup>1</sup> Sifo ghabu soveni dadabeteri ainda amboda, fristi+ da giti jighari a Jusi embo da babojegari mendeninde dabade, genembo eni geke vironude javo Tertullus budo, Jerusalem ghedo fera, reighi Sesaria aminda buvurutuseri. Buvudo, ne frovensi da kotofu Felix kena tere fetedo, Paul nu rejoá etiri janje ekoko usera ava, Felix kena osa sari dae useri.

<sup>2</sup> Aminguse, ne kori setero, vironu kato Tertullus tere fetedo eminge sisira, “Frovensi da kotofu ojesa iresa, ni ategi beká ava erena. Ni namane eveva kaifa eraesa, ava sedo tataya tefori. A roera mendeni mendeni seaso siroreraera andae, reighi jebugari dae erira.

<sup>3</sup> Namane ava gido, ivuga edo aiyakoe beká resera.

<sup>4</sup> Ninda saramana digari ava sedo, geke tufako sirurono ningaso dae resena.

<sup>5</sup> “Genembo emo, javo Paul ri. Nu eari dara mindafu siroreraira. Nu reighi digari aminda deinghuse, Jusi embokena geke seari, dara a titigho eraera. A kotugo, Nasareth embo Iesu da dorevare ainda bajari eni numori.

<sup>6</sup> A geke eni mo: nu God da Kambo+ Jerusalem aminda bebeta ari dae sedo, teterusira. Teretiri, namane nu sanduduseri. Namane Jusi embo da agho dari ava kotise, namane totofo Paul koto aeteri.

<sup>7</sup> A nu aetera avata, ne Rome embo da isoro kakato da giti jighari jawo Lysias, nunda mendeninde dabade fera teredo, nenda fakina Paul budo iseri.

<sup>8-9</sup> Budo era, Paul diburada fitido, giti jighari namanekena, eminda furoro dae sisira. Ni Paul ategi aresa amo, namane rea resera, daba ava sari ningaresa,” Tertullus aminge setiri dadabetiri, nunda kokomana Jusi embo, ne geke daba ava siseri.

#### *24:10-23 Geka Sisera Ainda Mino Mo, Paul Sisira.*

<sup>10</sup> Setero dadabetiri, frovensi da kotofu, geke sare dae sedo, Paul kena ungoi farighusira. Farighetiri, Paul sisira, “Ni reighi kaifa eraesa. Ninda dombuda koto arena, aindae na ivuga erena.

<sup>11</sup> Gegenembo geke resera eikena ategi aresa amo, evia kasama aresa: na God kena joba mutari dae sedo ena, God da Kamboda+ teterusena amo, jo anakora iraeri, oroko sifo 12 ava jo dadabae irira.

<sup>12</sup> Ne gungubo resera. Na God da Kambo+ jokáda, evetu genembode jo osogo aeri. A kotugo, namane Jusi embo da dengoro indari kambo+ aminda o reighi jokáda, na evetu genembo da ghamo jo derono erari titigho aeri.

<sup>13</sup> Geka oroko resera, ainda beká eni, ne jo tambudo saoro ningae aresa.

<sup>14</sup> Na dabako usena ava, nimo-kenena isagha sarena. Namanenda abuamane God mavejoá tumondedo ghusera ava, na God daba ava tumonderaena. Avata na emboro eni tambudo, aminda use God tumondurureono gido, ne imboe eraera. Aindae mo, ‘emboro sembae’ seraera. Avata kotugo, God rea setiri Moses a God da feroveta mendeniimi gefusera, a nu tumonderaena.

<sup>15</sup> God amboda sari evetu genembo eveva a ekoko isambu, ambarida ghe jebuge erarera, ava gegenembo emo tumonderaera. Nambarago daba ava tumonderaena.

<sup>16</sup> Ava gido, na sifo ghousa God kena a evetu genembokena, ari eveva vanembo ari dae sise e giraena.

<sup>17</sup> “Na ghaeko mendeni Jerusalem jo terae irise, nanda natofokena moni mendeni mutari dae sedo, a God kena joba mutari dae sedo, Jerusalem ena buvurutuseni.

<sup>18</sup> Buvudo, God da Kamboda+ teredo, God kena joba mutari dae sedo, simbugedo tamo seghuseni. Segheteno, gegenembo emo teredo na tambu sanduduseri. Na maveghae jo beisiga aono dara eni jo siro-rae usira.

<sup>19</sup> Avata Jusi embo mendeni Frovensi Asia ghedo fera teredo, na tafuseri. Ava sedo, na dara rejo ava eno tafusera ava, foa saeteri.

<sup>20</sup> O gegenembo mendeni oroko ojighera irera emo, na giti budo era nenda kaniseremane da dombuda koto useri. Ava sedo, nanda dara rea tafusera ava, isagha saeteri.

<sup>21</sup> Avata dara eni jo tambaeri. Dabako tafuseri. Na nenda dombuda fetedo siseni, ‘Na tumonderaena: namonde ambarera amo, God namonde sari jebuge erarera. Ne aindae sedo na koto ereva,’” Paul aminge setiri dadabusira.

<sup>22</sup> Dadabetiri, Felix nu Iesu da natofo ainda bino ava, anakora niningusira ava sedo, nu kaifa aoro dae sisira. Nu sisira, “Jerusalem isoro kakato da giti jighari jawo Lysias furari gido, geke saoro dadabarira.”

<sup>23</sup> Aminge sedo, Paul da kaifa kakato da bajarikena sisira, “Kaifa ururovo, Paul nu deinghari sarira amo, avori, itako deingharira. O nunda kokomana foa tere sonembari sarera amo, a barago avori, foa sonembarera,” aminge sisira.

#### *24:24-27 Felix Setiri, Paul Tere Vironu Sisira.*

<sup>24</sup> Frovensi da kotofu Felix noaro javo Drusilla, nu Jusi embo da gagara eniri. Sifo mendeni ainda amboda, Felix noaroghae fera buvudo, Felix nu aghi etiri, Paul ira Felix noaroghaekena teredo, Iesu Keriso tumondari da kau nangego ava, Paul setiri ne nininguseri.

<sup>25</sup> Paul da geka itako ghousa sise, namonde nange nange ari eveva aetera, nange nange namondeda uju ava dodo God da uju avanembo aetera, a amboda God nange nange evetu genembo isambu ategi arira ava siri ningido, Felix oju usira. Oju edo sisira, “Avori, yasi! Umbu eninda saono furaresa,” aminge sisira.

<sup>26</sup> Paul nange nange numokena ufena moni mutari ruruse nu doyari yaetira ava kotise, Felix sifo ghousa seari tereari, nengae geka dabade sedo ghuseri.

<sup>27</sup> Ghaeko etoto dadabetiri ainda amboda, genembo javo Porcius Festus fira Felix da vasa budo, frovensi da kotofu usira. Ainda sifo aminda, Felix Jusi embo nange ivuga edo nunda javo jighoro eraetira ava kotise, Paul diburada dotiri iriri, nu gavana do vosetiri, Festus gavana usira.

## 25

### *25:1-12 Paul Nu Festus Da Dombuda Sekago Koto Usira.*

<sup>1</sup> Festus nu Felix da vasa bari dae sedo, frovensi aminda fira teredo, reighi Sesaria aminda buvurutusira. Buvudo, sifo etodaba naká dadabetiri, Festus nu Sesaria ghedo Jerusalem aminda isira.

<sup>2-3</sup> Ira buviri, fristi+ da kokotofu a Jusi embo da babojegari ainde dabade era Festus kena tere fetedo, Paul nu rejoá etiri janje ekoko usera ava, Festus kena osa siseri. Aminge sedo, ne Festus kena siseri, “Se ninda mendenii Paul Jerusalem eminda bu furore!” aminge sisera ainda beká mo: ne manaka garuse, emboro soroda Paul gaje sandido, daoro ambare dae sedo siseri.

<sup>4</sup> Aminge setero dadabetiri, Festus sisira, “Paul nu, namanenda isoro kakatoi reighi Sesaria aminda kaifa eraera. Na totoi jovereghe Sesaria aminda yarena.

<sup>5</sup> Ava sedo, nenda babojegari sevu, ne namonde ya, Paul nu dara rea usira ava, siruroro na ningaone!”

<sup>6</sup> Aminge sedo, Festus sifo 8 o 10 aminga ava nemokena avisira. Ainda amboda, Festus Jusi embo da babojegaride dabade eredo, jovereghe reighi Sesaria aminda iseri. Era buvudo aminda ravisera sifo atetiri, Festus Paul bu furore dae sisira. Setiri, era Paul budo fuseri.

<sup>7</sup> Bu fera teretero, Jusi embo Jerusalem ghedo fusera aimi, Paul jimbe birurughe fetedo, gungubo sise eminge siseri, “Paul nu dara usira.” Aminge sisera amo, dara sisera da beká eni jo foa isagha aeri.

<sup>8</sup> Amingetero dadabetiri, Paul mino sisira, “Na Jusi embo da agho darikena, God da Kambokena, a Rome embo da kotofukena geka eko eni jo sae, a ari eko eni jo ae useni.”

<sup>9</sup> Aminge setiri ningido, Festus, Jusi embo ivuga edo numoá amboda nange sonembaetera ava kotise, Paul kena eminge sisira, “Namonde ya Jerusalem aminda, ni koto aoro dadabarira, ai?”

<sup>10</sup> Aminge setiri, Paul sisira, “Tefo. Rome embo da koto vasa eviri. Ni na eminda koto aresa. Na Jusi embokena dara eni jo ae usena ava, ni tofo mandi ningido kasama eresa.

<sup>11</sup> Na dara aono isagha aetira amo, ainda mino ava na jo darigari dae sae aeteni. Aindae ambono dae saetesa amo, na ambaeteni. Avata Jusi embo gungubo setera ainda beká eni jo tambae aresa amo, na nemokena jo mutae aresa. Na dirigaso Rome embo da kotofukena ya aminda koto ari dae sedo resena,” Paul aminge sisira.

<sup>12</sup> Setiri ningido, Festus nunda kasama kakato mendeninde dabade manaka gaetero dadabetiri, Festus eredo Paul kena sisira, “Ni namonde Rome embo da kotofukena yari dae

resesa. Avori, na ni dirigaono numo-kená yama nunda dombuda koto aresa,” aminge sisira.

*25:13–26:11 Paul Nu Frovensi Eninda Kotofu Da Dombuda, Fete Geka Sisira.*

<sup>13</sup> Aında amboda, frovensi eninda kotofu Kini (King) Agrippa, nunda ghasovu javo Bernice ghae dabade, Festus nati joká doruse ategi ari dae sedo fera, reighi Sesaria aminda buvutuseri.

<sup>14</sup> Buvudo aminda irero, Festus nu eredo Kini Agrippa kena Paul da kiki ava sisira. Sise, eminge sisira, “Genembo javo Felix, nu nanda gitida reighié nune kaifa edo ghusira. Nu genembo javo Paul ava, diburada fitiri irei.

<sup>15</sup> Na Jerusalem aminda ena buveno, Jusi embo da fristi+ da kokotofu a Jusi embo da babojegaride dabade fera namokena teredo, Paul dara rejoá etiri janje ekoko usera ava, namokena osa siseri, numo saono ambare dae sedo.

<sup>16</sup> Avata na nemokena dengoro eminge induduseri. Genembo dara ari, mave foa osa sarira amo, aında osa sari kato nange nange koto jokáda genembo aında dombuda fetedo sekago osa saetira, ava seteno Jusi embo ne nininguseri. A kotugo, genembo nange nange osa sari katokena mino saetira, ava seteno nininguseri. Aında beká mo: namonde Rome embo evetu genembo jo tefo diburada fitae eraera, o tefo dae eraera. Seteno dadabetiri, na Jerusalem dodo reighi Sesaria eminda fuseni.

<sup>17</sup> Jusi embo ne fera namokena totorugetero, na sembena koto vasada anumbedo, Paul bu furoro dae siseni.

<sup>18</sup> Seteno, Paul fira buvudo teretiri gido, Jusi embo ne eredo osa siseri. Nanda kotari mo: ne dara teriágo aında osa saeteri.

<sup>19</sup> Avata ne nenda tumondari aında beisiga useri. Aminguse, genembo javo Iesu ambududurusira aında beisiga useri. Jusi embo da

kotari mo: nu ambududurusira. A Paul da kotari mo: nu jebuga irira.

<sup>20</sup> Geka da beká mo, nange nange tambarera aında bune Jaredo, na Paul kena ategi useni, ‘Namonde Jerusalem aminda ya, ni koto use geke da beká tambarera, ai?’ aminge seteno,

<sup>21</sup> Paul nu, na numoá kaifa edo mutono reighi Rome aminda ya, kotofukena koto ari dae sisira. Setiri, na, isoro kakato nu kaifa ururoro, amboda dirigaono yare dae siseni,” Festus aminge setiri dadabetiri,

<sup>22</sup> Kini Agrippa numokena sisira, “Nambarago genembo aında geke ava ningaeteni,” setiri, Festus sisira, “Avori, sifode ningaresa.”

<sup>23</sup> Sifo atetiri, vironu sari da vasa simbugedo gogho etero, Kini Agrippa nunda ghasovu Bernice ghae, nemonde isoro kakato da babojegari a reighi da babojegari ainde dabade fera, mendeni yaru didivero, teteruseri. Teretero, Festus setiri, ne Paul budo fera teteruseri.

<sup>24</sup> Teretero, Festus nu Kini Agrippa kena sisira, “Jusi embo isambu reighi Jerusalem aminda a reighi eminda, genembo Paul nu dara etiri janje ekoko use aında, osa seraera. Genembo amo numori. Na nunda javoá saono ningarera amo, numoá daono ambare dae koko sarera.

<sup>25</sup> Avata dara da beká eni mo jo isagha aeri. Ava sedo, na jo saono nu ambae arira. Nu tofo mandi namonde Rome embo da kotofukena yari dae sisira. Ava sedo, dirigaono yarira.

<sup>26</sup> Avata na dara da beká eni jo tambaeri. Ava sedo, na namondeda kotofukena nange sarení? Dengoro javuruvu! Kini Agrippa, ni genembo eında geke ningido, na rea gembarena ava, saso ningarena.

<sup>27</sup> Aında susu mo: na genembo koto are dae mutudo, nunda dara da beká eni jo ijugae arena amo, jo eveva iraeri,” Festus aminge sisira.

## 26

<sup>1</sup> Setiri, Kini Agrippa Paul kena

sisira, “Tofo ninda geka rejo sari dae uju eresa ava, saso ningarena,” aminge setiri, Paul ungo jighiri eretiri, Kini (King) Agrippa kena eminge sisira,

<sup>2</sup> “Kini Agrippa, na ninda dombuda fetedo, geka einda susu ava ijugaono garesa, aindae ivuga erena. Jusi embo rea seraera ainda susu ava, na ijugaono garesa.

<sup>3</sup> Ni namane Jusi embo da kiki a agho dari anakora kasama e gogoghombusesi. Ava sedo, na ivuga erena. Erá dubo mema eose! Nanda geka itako ghousa evia sari dae erena.

<sup>4</sup> “Na nange nange bajido genembo usena, a nanda irari ava, Jusi embo ne isambu kasama era. A kotugo, na nange nange nanda frovensi aminda a Jerusalem aminda irá ghedo ghuseña ava, ne gido ghuseri.

<sup>5</sup> Na gimasa edo Moses da Geka kaifa kato eni useni. Gegenembo mendeni da tumondari God kena mo, jo nanda tumondarigo iraeri. A kotugo, nanda irari kau mavega edo ghuseña, ava nene nimokena osa saoro ningaetesi.

<sup>6</sup> God anakora namane Jusi embo da abuanakena beka gagojusira. Na ainda beka gajari tumonderaena. Ava tumonderaena aindae sise, dumo edo na bu koto ari dae siseri.

<sup>7</sup> Namane Jusi embo da oro isambu 12, God da beka gajari setena amo kotise, tumonde baingheraera. Avata tumondari resena aindae, na kotoda fifiterera.

<sup>8</sup> Avori, God nu inonori. Nune sari evetu genembo ambarida ghe jebuge erarera amo, God numokena inonori. Ava sedo, Jusi embo a kotugo nimbarago, Kini Agrippa, ne redae jo tumondae eraevu?

<sup>9</sup> “Avata giti, nambarago ava jo tumondae edo ghuseña. Nanda kotari mo: na aono Nasareth embo Iesu da bino ava eko aeti.

<sup>10</sup> Na tuturo edo, Jerusalem aminda emingedo ghuseña: na fristi+

da kokotofu da javoda, God da natofo mendeni mendeni diburada fitido ghuseña. Fiteono, daoro amboro dae sirureoro ningido, na daba ava sedo ghuseña.

<sup>11</sup> Na namane Jusi embo da dengoro indari kambo+ mendeni aminda, Iesu da natofo sandido dedo ghuseña. Iesu da bino ighagha aoro dae sedo, ne dedo ghuseña. Na janje eko edo, reighi Israel dodo, namanenda gitofu da reighi reighi aminda, Iesu da natofo ava sandido dari dae, ya foa ghedo ghuseña.

*26:12-18 Bajari Iesu Nu Nange Nange Paul Kena Emboroda Isagha Usira Ava, Paul Osa Sisira.*

<sup>12</sup> “Na aindae sedo, fristi+ da kokotofu da reta bu eredo, nenda javoda reighi Damascus aminda iseni.

<sup>13</sup> Avori, Kotofuko, na ena isonga emboro soroda, usasa tomanako janimbetiri gosuseni. A nanda kokomana barago gosuseri. Iji beká da usasa kitakori, usasa janimbusira amo, teriango bekári.

<sup>14</sup> Namane isambu endada du fafasuseri. Du fafasetero, beka utuda ghe namokena siri nininguseni. Namane Israel embo da gekaimi eminge sisira, ‘Saul, Saul, ni redae namokena dubo mema futuse fakarago eraesi? Aminguse, ni tofo mandi mema eretafesi.’

<sup>15</sup> Aminge setiri, na siseni, ‘Arie, Bajari, ni mavejori?’ seteno, nu sisira, ‘Ni erá buneose! Na Iesu ri. Ni namokena dubo mema futuse fakarago eraesa.

<sup>16</sup> Ere fete! Na nimokena isagha etena da beká mo eviri. Nanda saramana aso dae sedo, ni gateguseni. Ni oroko ningesa, a amboda ijugaono garesa ava, evetu genembokena osa saso ningarera.

<sup>17</sup> Ninda natofo Israel embo ni jo daoro ambae aresa. Na ni dirigaono, ninda natofo Israel embo da gitofukena yama nemokena vironu saresa. Aminda iruraresa amo, na ni kaifa arena.



<sup>18</sup> Ninda saramana mo: ni vironu saso ninda gitofu da diti basarira. Ne tumba da irari dodo, jovereghe foa nanda usasada teroro dae sedo, a ne Satan da fakina dodo, God da fakina ava baoro dae sedo, vironu saresa. A kotugo, ne nanda javoda tumondaoro, God nenda ari ekoko kote doyari ne, God nunda natofo anakora gategusira, ainda mendeni aoro dae sedo, ni vironu saresa.

*26:19-32 Paul Nu Nangedo Gitofukena Ira Vironu Sisira Ava, Osa Setiri Kini (King) Agrippa Niningusira.*

<sup>19</sup> “Avori, Kini Agrippa, na nimo-kena isagha resena. God utuda ghedo isagha etiri nanda diti mokoi gosusena, ainda geka ava na jo kote doyae useni. Na ningido amin-guseni.

<sup>20</sup> Na reighi Damascus a reighi Jerusalem aminda tuturo edo, amboda Frovensi Judia ainda reighi isambu aminda ise, vironu sedo ghuseni. A kotugo, namane Jusi embo da gitofukena barago, ya vironu sedo ghuseni. Ne nenda ari ekoko vujegedo, God tumondedo ari eveva vanembo aoro dae sise, vironu sedo ghuseni. Ari eveva aoro dae sedo ghusena, ainda beká mo eviri: genembo mave ari ekoko dodo, ari eveva vanembo arira amo, evetu genembo isambu kasama arera: genembo amo dubo jovereghusira.

<sup>21</sup> Na ainda saramana edo ghusena aindae, Jusi emboi na God da Kambo+ jokáda sandido, na dari dae useri.

<sup>22</sup> Na dari dae sisera avata, God tuturo edo na sonembusira. Sonembusira ava sedo, na oroko eminda fetedo sabua a kokotofukena, nunda bino ava osa resena. Na rea resena emo, God da feroveta a Moses giti nene sedo ghuseri. Amo ne, rea amboda sirorarira ava sise, bino emo seoro ningido ghuseri:

<sup>23</sup> ‘Namonde evetu genembo da ari ekoko kote doyari dae sedo, God nunda Genembo eni

dirigari, foa mema tafuse ambudo, namonde evetu genembo jo jebuge erae irera ainda

gitida, nune jebugedo erarira. Eredo, namane Jusi embo a gitofude, nunda usasaimi

jaraghururari, God da jebuga evovo-dae irari ava gido kasama arera,’

ne aminge sedo ghuseri, a na kau daba ava resena.”

<sup>24</sup> Paul aminge siri, Festus nu eredo Paul kena koko sise sisira, “Ni daghetesi. Ni teria futo tegeraesa aimi, daghari dae eresa,” aminge sisira.

<sup>25</sup> Setiri, Paul sisira, “Tefo, Koto-fuko! Na jo daghaeri. Na dubo kotise, geka beká resena amo, eviri.

<sup>26</sup> Kini Agrippa, na nimokena isagha resena. Ainda beká mo: geka setena emo, ni anakora kasama usesi. Na kasama erena: ni ainda bino niningusesi. Ainda susu mo: roera setena emo, evetu genembo da dombuda sirorusira.

<sup>27</sup> Na kasama erena: namane Jusi embokena, God da feroveta rea sedo ghusera ava tumonderaesa,” aminge sisira.

<sup>28</sup> Aminge setiri, Kini Agrippa Paul kena sisira, “Ni erekotesa amo, ni geka tufako evia saso, na Iesu da dorevare eni arena, ai? Amo erá koteose!” aminge sisira.

<sup>29</sup> Setiri, Paul sisira, “Resesa, nanda uju a nanda benunu God kena: ni a evetu genembo isambu totorugeteva emo, ne nangedo namongava aetevu. Na jo seiniimi (chains) bundetevo fetirena, einda saeri. Na Iesu tumonderaena, aminga ava aovo dae resena.”

<sup>30</sup> Aminge setiri dadabetiri, Kini Agrippa nu, frovensi da kotofughae, Bernice a natofo isambu dabade eredo,

<sup>31</sup> era isaghada buvudo tofo tofo se nininguseri, “Genembo emo dara eni jo aeri. Ava sedo, numo diburada jo fitae aeteri, o jo saoro ambae aeti.”

<sup>32</sup> Aminge sedo, Agrippa nu Festus kena sisira, “Ni genembo emo

doyaso yaeti. Avata makasí, nu namonde Rome embo da kotofukena yari dae sisira. Ava sedo, mutaso aminda yarira,” aminge sisira.

## 27

### *27:1-12 Festus Nu Paul Mutiri Isira.*

<sup>1</sup> Festus, namane mutari reighi Italy aminda yaoro dae sedo, setiri nunda isoro kakato da babojegari-imi eredo, Paul a dibura embo mendeninde dabade, ava budo, isoro kakato da bajari enikena futuseri, kaifa are dae. Bajari resena emo, nunda javo Julius, a nunda isoro embo da oro javo ‘*Rome Embo da Kotofu da Isoro Ari Embo*’ ava jighido sedo ghuseri.

<sup>2</sup> Ghaka eni, reighi javo Adramitiam aminda ghedo, foa ghedo ghuseri amo, Frovensi Asia da reighi mendeni mendeni aminda sembi yari dae simbugiri gido, namane aminda vovouseri. Vose sirigedo, reighi Sesaria ghedo iseri. Tesalonaika embo genembo eni javo Aristarchus, nu namonde dabade iseri. Tesalonaika resena emo, nu Frovensi Masedonia aminda irira.

<sup>3</sup> Sifo atetiri, namane era reighi Saidon aminda tere dadouseri. Julius nu Paul dae joka usira. Joka edo, Paul dotiri, nunda kokomanakena ya nunda roera uju usira ava bari dae iseri.

<sup>4</sup> Ainda amboda, namane reighi Saidon dodo, yaura dombuda firi gido, butu javo Cyprus ainda tinguda, binono aminda ovenembuseri.

<sup>5</sup> Ovenembedo, Frovensi Silisia a Pamfilia darigedo era, reighi Maira tetetuseri, Frovensi Lisia aminda.

<sup>6-7</sup> Aminda namane ghaka+ amo dodo era, isoro kakato da bajari Julius nu ghaka+ eni tafusira. Ghaka+ amo reighi Alexandria ghedo fira teredo, sifo aminda Frovensi Italy yari dae simbugiri namane era buvudo tafuseri. Tambudo, namane vosedo reighi Maira dodo sufero, yaura tomanako ava dombuda didiviri Jaredo, jo bibita

yaeri, namane soroda avido eredo ghudo iseri. Era, reighi javo Knaidas ava darigedo, bune Jaredo gafuge sembera, mendo javo Selmone aminda, viti ovenembedo butu Crete tinguda sufuseri.

<sup>8</sup> Sufuse, fakarago tafudo era, esuru javo ‘Fafu Binono’ seraera, aminda tetetuseri, reighi javo Lesia ainda dengesidari.

<sup>9</sup> Fura etoto o etodaba aminga ava, aminda aviseri. Aminda avero, yaura da sifo tuturo iri kasama use, Paul nu natofokena sisira,

<sup>10</sup> “Nanda kokomana, na eregosena: namonde oroko sirigarera amo, dara barera. Yaura eva teria beká eredo, ghaka+ de rosari, namondeda roera evada vosarira, a namondeda mendeni barago vose mindi sirivo arera,” aminge setiri,

<sup>11</sup> isoro kakato da bajari Julius, nu Paul da geka jo tumondae usira. Nu ghaka+ da bajari a ghaka+ ainda numamo da geka ava tumondusira.

<sup>12</sup> Esuru dadouseru aminda, yaura da sifoda fumbasa eraira. Ava sedo, natofo digari barago, ne Paul da geka jo ningae edo, reighi javo Finiks aminda yari dae siseri. Finiks resena emo, nu Crete aminda, sovu eni ainda jokádari. Fafu aminda ghe sirige foa buvari da goroto mo etoto nakári, eni iji vosarikena ise itako dimbu ghatukena yaresa amo, ya buvaresa. A eni mo itako dimbu samonokena yaresa amo, kotugo ya buvaresa. Ava sedo, yaura da sifo aminda, nu vasa evevatori.

### *27:13-38 Yaura Teria Beká Erorusira.*

<sup>13</sup> Ainda amboda, yaura avoda vurivurighe viti firi gido, ghaka+ da saramana kakato amo, ne Finiks aminda sembi yari dae kotise, kamora jumbero vivitusira. Vitiri, namane sirige buvudo, butu Crete tingu bekáda sufuseri.

<sup>14-15</sup> Sufero, yaura sonembiri isera ava tukughiri, yaura vovoga sovena firi tafuseri. Tambudo, jo inono ae etiri, jovereghe amboi fuseri.

16 Era, butu Koda viti ovenem-betero yaura itako tukughetiri, namane fakarago tafuse, ghaka+ aindakairega (dinghy) jumbero etoda vivitusira.

17 Vitiri, ghaka+ da saramana kakato ghaka+ mindafu ava erá bejeure dae sedo, asiimi bundiseri. Amingedo, Frovensi Libya da founa aindae oju use, rara gaghuseri. Gaghedo, tefo sivudo iseri.

18 Yaura teria jo dadabae sufiri sifo atetiri, jo inono ae etiri gido, ne tuturo edo ghaka+ da gugua timbudo isera, ava mendeni bambu goroghetero evada vovosusira.

19 Sifo etoto dadabedo sifo eni atetiri, namane isambu eredo, rara da gaisimbari a ghaka+ da roera mendeni jighi didisugedo fugetero titifughusira.

20 Yaura sufuse iriri, namane sifo tumba ava sivudo ise, iji a damana jo gae beká ava edo, bune Jaredo ambariá kotiseri.

21 Ghamo takegha edo aviva saghetiri, sifo ghousa ambari ava bayau jo mindae irero, Paul eredo nemokena sisira, "Ne nanda geke ningido, namonde butu Crete aminda iraetera amo, namonde isambu eveva irateri.

22 Avata oroko resena. Fakina edo fetevu! Erá oju eove! Jo eni ambae areva. Ghaka+ vanembo bejarira.

23 God na nunda tofodae biri na nu tumonderaena, nunda aneya aimi tumbade fira namokena simuta,

24 'Paul, erá oju eose! Ni ya Rome aminda buvudo, Rome embo da kotofu aindae dombuda fete geke saresa. A kotugo, geke eni mo: God mindae joka use, mave ghaka+ eminda refera emo, eni jo ambae arera,' aneyai namokena aminge simuta.

25 Ava sedo, erá oju eove! Na God tumonderena. God nu rea simutara ava sirorarira.

26 Avata yaura sumbarira aimi, namondeda ghaka bu ya, butu eninda vitarira," aminge sisira.

27 Eva javo Mediterranean aminda, yaura eretiri namane

sivero, sifo 14 ava dadabetiri tumba soroda, namane reighi buvari dae usera ava, ghaka+ da saramana kakato itatamuseri.

28 Itatamedo, roera bouvu eni asida dighi kafuru da inono ava kasama ari dae, fugetero evada vovosusira. Vosedo, fefetusira. Fetetiri, itatamedo tano fitido asi aindae ghousa tegutusera amo, 37 mita ri (metres). Itako kaifa edo sekago fugetero vosetiri tegutusera amo, 28 mita ri (metres).

29 Tegedo, erá ghaka+ founanda viteure dae, oju edo nenda kamora avononde naká, ghaembokena fugetero vovosusira. Ava edo, sifo totoi atare dae sedo, banunguseri.

30 Banungedo, ghaka+ da saramana kakato, namane dodo sumbari dae kotise, gungubo eminge siseri, "Namane kamora mendeni bu gitikena fuge digharera!" aminge siseri. Aminge sedo, ghaka+ etoda kairega (dinghy) fasirisira ava, fitero vovosusira.

31 Vosetiri gido, Paul nu isoro kakato a nenda bajari Julius kena sisira, "Ghaka+ da saramana kakato ghaka+ emo dodo sumbarera amo, ne sirivo areva," aminge setiri ningido,

32 isoro kakato mendeni eredo kairega (dinghy) aindae asi gafugetero sivedo isira.

33 Sifo jo atae iriri, Paul namakena, bayau mindi jebugaoro dae sedo, eminge sisira, "Ne sifo 14 ava kaifa use, bayau jo mindae ireva.

34 Bayau mindareva amo, jo ambae areva. Evadae, ne mema jo itatamae areva,"

35 aminge setiri dadabetiri, Paul nu farava budo, natofo da dombuda God kena aiyakoe sedo, farava jighi embebedo risira.

36 Etiri gido, natofo fakina edo, isambu bayau bu riseri.

37 Namane evetu genembo isambu 276 ava ghaka+ aminda iseri.

38 Bayau mindero dadabetiri aindae amboda, farava vuji ghakai+ budo

fusira ava, fugetero evada vovosusira.

*27:39-44 Ghaka+ Bejisira.*

<sup>39-40</sup> Sifo atetiri, ghaka+ da saramana kakato reighi gido buniseri. Bunedo, ne esuru koraghae ava gido, ghaka+ aminda teriya darari dae sedo, kamora da asi gafuguseri. Gafuguse, ghaka+ da ghaembo dimbari etoto naká vujeguseri. Vujegedo, dambu yari dae sedo, rara gitida jighero vivitusira. Vitiri, ne korada yari dae sedo, difuseri.

<sup>41</sup> Korada viti yari sisera avata, esuru soro aminda founa irisira ainda etoda viti fusiseri. Ghaka+ giti fuse fetetiri, ghaembo evaimi de bejisira.

<sup>42</sup> Isoro embo ne, erá dibura embo vose ujavi edo viti sumbeore dae sedo, ne daoro amboro dae sedo, manaka garuseri.

<sup>43</sup> Avata isoro embo da bajari Julius nu eredo, Paul sonembari dae sedo setiri, ne kotari amo dotutuseri. Julius setiri, evetu genembo ujavi kasama usera amo, ne jaunghe evada gute ujavi edo founanda vivituseri.

<sup>44</sup> A mendeni ujavi bunari amo, ne ghaka+ bejisira ainda ika a ika mendeni ava budo ainda etoda ujavi edo era founanda vivituseri. Aminguse, namane isasambu ujavi edo founanda vivituseri.

## 28

*28:1-10 Butu Malta Amindari.*

<sup>1</sup> Vitido, reighi butu buvurutusera, ainda javo Malta sero ningi kasama useri.

<sup>2</sup> Butu ainda evetu genembo aimi, namane kaifa e gogogho useri. Borija tuturo edo dido, yaura etiri gi Jaredo, ne avaraka usise namanendae nati joká doruseri.

<sup>3</sup> Nati joká detero, Paul ira faragho sije bu fira fiti usari dae iri, jingabu faragho sijari ainda jokáda irisira ava, avaraka da veriveriimi gaetiri, fira buvudo Paul da ungodá gambu takegha usira. Jingabu amo ekori.

<sup>4</sup> Gambu takegha etiri, butu ainda evetu genembo ava gido, tofo tofo se nininguseri, “Genembo emo, avose, genembo eni detiri ambududurusera aindae sedo, God setiri jingabui gambira. Nu evada jo ambae etira ágido, makoede, jingabuimi gambiri, ambari dae erira.”

<sup>5</sup> Aminge setero, Paul, jingabu ungodá gafusira, ava jifegetiri avarakada vitiri, Paul nu mema eni jo itatamae usira.

<sup>6</sup> Nati embo kotisera amo, Paul nu ungo bajariá, o dudo ambariá kotiseri. Avata nu jo amingae usira. Etiri gido, ne bune jarutuse, “Numo gode eniva,” kotiseri.

<sup>7</sup> Butu da kotofu javo Publius da enda jo soka iraeri. Namane eredo era numokena buvero, nu namanendae nati joká dedo sonembusira. Sonembedo setiri, namane numokena avero sifo etodaba naká dadabusira.

<sup>8</sup> Publius numamo tamó vevera use foká gutedo fasiriri gido, Paul ira numokena tere banungedo, ungo sirege tamonda jighi setiri jebugusira.

<sup>9</sup> Publius numamo jebugusira ainda bino ava ningido, kae evetu genembo isambu butu aminda kae budo iritiriara ava, isambu fera, Paul kena buvero, setiri ne jejebuguseri.

<sup>10</sup> Jejebugedo, namanekena joba a roera digari ava futuseri. Mutudo, a kotugo namane isera ainda sifoda, uvu bayau a roviravi mendeni mutero budo iseri.

*28:11-15 Butu Malta Ghedo, Reighi Rome Aminda Iseri.*

<sup>11</sup> Tambuno etodaba naká butu Malta aminda irero, ghaka+ eni reighi Alexandria ghedo fusira. Fira buviri, namane ghaka aminda vovosuseri. Ghaka+ resena ainda javo mo, ‘Castor a Pollux’ jijighuseri. Ghaka+ da saramana kakato, yaura da sifo aminda butu Malta ainda tinguda, ne kamora fuggedo iria ghedo ghuseri. Ghaka+ aminda vosedo, namane butu Malta dodo iseri.

<sup>12</sup> Era, reighi javo Sirakius aminda teredo, sifo etodaba naká aviseri.

<sup>13</sup> Avido, namane reighi Sirakius ghedo, reighi javo Rijiem aminda sembiseri. Era tere avero sifo atetiri, yaura avoda ghe tuturo edo sufusira. Sumbiri, namane reighi Rijiem dodo, sifo etoto sembera, reighi javo Putiolai aminda teteruseri.

<sup>14</sup> Aminda teredo, Iesu da dorevare mendeni tambero, nemokena fura dabako avoro dae siseri. Nemokena ravisera eredo, reighi Putiolai ghedo reighi Rome aminda iseri.

<sup>15</sup> Iesu da dorevare Rome aminda, namanenda bino ningido, namane ategi ari dae fuseri. Mendeni reighi javo Epias ainda ombari vasada fetedo, namane kaifa useri. A mendeni reighi eni javo 'Taberna Etodaba' aminda fetedo, namane kaifa useri. Kaifa ero, namane era buvudo, ne tambudo Paul nu God kena aiyakoe sedo fakina usira.

### *28:16-31 Rome Amindari.*

<sup>16</sup> Namane era reighi Rome aminda teredo, Paul nu kambo esike fitero iriri, isoro kato dabakoi nu kaifa edo ghusira.

<sup>17</sup> Rome aminda buvudo irero, sifo etodaba naká dadabetiri ainda amboda, Paul nu aghi etiri, Jusi embo da babojegari Rome aminda iriara aimi fera, Paul kena totoruguseri. Totorugetero, Paul nemokena sisira, "Nanda nano namendi, na namondeda natofo Jusi embo-kena rejo eni jo aeri, a namondeda abuamane kiki futusera ava, na jo ighagha aeri. Avata namondeda mendeniimi na sandido, namondeda gitofu Rome embokena mutero na diburada fiftuseri.

<sup>18</sup> Fitido, na ategi edo, doyoro yaono dae siseri. Ainda beká mo: na dara eni jo aeri. Ava sedo, na jo daoro ambae aeteni.

<sup>19</sup> Aminge setero, namondeda natofo Jusi embo aimi besiga useri. Na jo namondeda natofo Jusi embokena, rejo eni ari dae so saeri. Avata nene besiga etero, Rome embo na diburada irono dae setero gido,

na Rome embo da kotofu Caesar da dombuda koto ari dae benunu siseni. Diburada ghe foa buvari da emboro eni tefori.

<sup>20</sup> God da Genembo namonde Israel embo tumondedo kaifa eraera ainda Bino ava, nane sedo ghusena aindae, na sandido seiniimi (chains) bundiseri. Ava osa saono ningovo dae sedo, aghi eteno ojighevu."

<sup>21</sup> Aminge setiri, ne numokena siseri, "Ninda bino, namane oroko namanenda gitida niningerera. Ninda javoda, geke eko eni jo ningaeri. Namanenda natofo eni Frovensi Judia aminda ghedo, jo foa ninda bino saeri, a reta eni jo mutoro furaeri.

<sup>22</sup> Avata namane ninda kotari ningari dae uju erera. Ainda beká mo: evetu genembo reighi isambu aminda, Genembo setesa, ainda dorevare imboe edo ighagha eraera."

<sup>23</sup> Aminge se dodo, sifo eninda se ningari dae sedo, sifo fiftuseri. Sifo fiftusera aminda, ne fera Paul kena totoruguseri. Giti fusera amo, itakori. O amboda fusera amo, natofofogi. Ataeghae totorugetero, geke siri tumba jisira. Evetu genembo nange nange Iesu tumondedo, foa God da natofo+ aetera ava ijuguse, dengoro indudusira. Iesu tumondaoro dae sedo, Paul nu God da Geka Moses gefusira, a God da ferovetaimi gefusera ava tegedo, vironuda sisira.

<sup>24</sup> Setiri, mendeni tumonduseri a mendeni jo tumondaeri.

<sup>25</sup> Paul nu geke eni setiri ningido, tofo tofo beisiga use taraghuseri. Amo nu, eminge sisira, "God da Asisi Kakarai geke setiri, feroveta Isaiah aimi nenda nembuamandae gefusira.

<sup>26</sup> Geka beká sisira, amo eviri: 'Ninda natofokena yasi, nemokena eminge sase!

"Ne dengoroimi ningido, tuka jo kasama ae areva.

Ne ditii gaovo, diti jo basae arira."

<sup>27</sup> Ainda beká mo: natofo eikena kotari jo afigae irira. Erama nanda geke ningeore dae sise, nenda dengoro gagojuseri.

Erama nanda geka tege kasama eore  
 dae sise, nenda diti gagojuseri.  
 Ava jo ae aetera amo, dengoroimi  
 ningido, ditiimi gosuse tege  
 kasama e gogogho edo,  
 ne dubo namokena jovereghaoro, na  
 saono jebuga tambaeteri,  
 Isaiah nembuamandae aminge ge-  
 fusira.”

<sup>28-29</sup> Paul aminge sedo, nu sekago  
 sisira, “Kasama aovo dae resena: ne  
 tumondareva o jo tumondae areva  
 amo, ne bajariri. God da jebuga  
 da Bino ava ivegedo ira, namonde  
 Israel embo da gitofukena buvuru-  
 tusira. Ne ava tumondedo jebuga  
 tambarera. Aminge kasama aovo  
 dae resena,” aminge sisira.<sup>28-29</sup>

<sup>30</sup> Paul nu ghaeko etoto ava, kam-  
 boá ofuse irá ghedo ghusira. Nu  
 aminda iriari, evetu genembo numo-  
 kena esa, a geka se ningari dae foa  
 ghusera amo, nu ivugaghae nati joká  
 dedo ghusira.

<sup>31</sup> Nu evetu genembodae jo oju ae,  
 namonde nange nange foa God da  
 natofo+ aetera, a namondeda Bajari  
 Iesu Keriso nu mavejori ava, vironu  
 sedo ghusira. Vironu aminge sedo  
 ghusira ava, mave nu jo buregae edo  
 ghusira.

Avori, nanda geka tano eviri.

---

<sup>28-29</sup> **28:28-29:** Evetu genembo mendeni, geka **Ekaresia 28:29** jokáda mo, Luke nune gembariá seraera, o mendeni genembo enimi gembariá seraera. Ava sedo gekaé **29** (*Setiri dadabetiri, Jusi embo tofo tofo beisiga edo se nininguse fera buvurutuseri.*) eminda teguteresá.

## Paul Nunda Reta Rome Embokena Gefusira, Amo Eviri.

Bajari da aghi kato Paul, Baiboro (Bible) da buku isambu 13 o 14 ava gefusira. Rome, Corinth, Galesia, Efesas, Filipai, Kolosi a Tesalonaika embokena, a kotugo Timothy, Titus a Philemon nemokena, Paul nune gefusira. Evetu genembo mendeni erekotera amo, reta eni 'Israel Embokena,' ábarago Paul nune gefusira.

Ghaeko 57 aminga ava Paul reighi Rome jo yae irise, nunda reta evia Iesu da natofo Rome aminda iriara aikena gefusira. Reighi Rome da gavana fakina edo, reighi digari a natofo digari nune kaifa edo ghusira. Ava sedo, Paul Iesu tumondari+ embo Rome aminda ya gari dae uju usira. Ekaresia+ ainda jokáda mokogo mo, Jusi embo da gitofuri. Kotugo ainde dabade Jusi embo digari Iesu tumonduse iriari. Ava sedo, Paul nu God nange Jusi embo, kotugo nenda gitofodae joka edo Iesu futusira aindae gefuse, nu nunda natofo Jusi embodae sise '**namane Jusi embo**' gembudo ghusira. O nenda gitofudae sise '**namane Jusi embo da gitofu**' gembudo ghusira.

*Paul Nunda Reta Rome Embokena Gefusira, Ainda Mendo Mendo Mo Eviri.*

1:1-17 Nu tuka redae reta evia eregefira ava, Paul nune ijugerira.

1:18–3:20 Evetu o genembo eni, jo tofo mandi fakina edo jebuga tambae arira.

3:21–4:25 Namonde Iesu tumondarera amo, namonde jebuga tambarera, o jo tumondae arera amo, jebuga kosasagharera.

5:1–8:39 Namonde Keriso de dabade tatedo irise, jebuga seka da emboro aminda deinghudo yarera.

9:1–11:36 God sifo amboda Israel embo aghi ari, sekago jovereghe foa Iesu tumondarera.

12:1–15:13 Kuristini da irariri.

15:14–16:27 Paul evetu genembo mendeni ategi edo tano e dotutusira.

<sup>1</sup> Arie nanda nano namendi! Na Iesu Keriso da saramana kato, Paul mo, namori. God nunda Bino Eveva ava vironu saono dae sedo, na gategusira. Gategetiri nunda aghi kato edo irena.

<sup>2</sup> Bino Eveva resena, einda beká isagha ijugari dae sedo, God beka gagojusira. Beka gajedo, nu nunda ferovetakena seari ningido, nunda Geka jokáda gembudo ghuseri a vironu sedo ghuseri.

<sup>3</sup> Bino Eveva resena einda beká mo, God da Mandi, namondeda Bajari Iesu Keriso aindae resena. Iesu nu genembo beká edo, David da imemesiri jokáda sirorusira.

<sup>4</sup> Kotugo nu God da Mandi beká, ava God da Asisi Kakara aimi ijugusira. Ava ijugari kasama aoro dae sedo, Asisi Kakara nunda fakina tomanakoimi setiri, Iesu ambarida ghe jebuge erorusira.

<sup>5</sup> Namondeda Bajari Iesu Keriso nunda javoda aghi aono dae sedo, sonemba a fakina namokena futusira. Futusira ainda beká mo: na ya aghi ururono ningido, enda einda oro oro isambu ainda evetu genembo mendeni mendeni Iesu tumondedo, nunda uju ava use irore dae sedo futusira.

<sup>6</sup> A oro oro setena ainda mendeni mo, ne reighi Rome aminda ireva amo, nemori. Amo, na oro oro isambukena yaono dae sise, a nemokena barago yaono dae sisira. Ainda beká mo: ne Rome embo nembarago, Iesu Keriso da natofo aovo dae sedo, God ne aghi usira.

<sup>7</sup> Ava sedo, God da natofo Rome aminda ireva, nemokena reta evia eregefenerere. God ne dubo ererurira. A nu ne dubo ruruse, nunda natofo aovo dae sise, ne aghi usira. Ava kotise reta evia eregefenerere. Yari budo givu!

Namondeda Afa God, a namondeda Bajari Iesu Keriso da sonemba a dubo jama nemokena mutari baove! Yari budo givu!

*1:8-17 Paul Nu Reighi Rome Aminda Yari Dae Kotisira.*

<sup>8</sup> Na tuturoda eminge resena. Ne tumonde gogogho eraeva ainda bino mindafu beká ava iri, evetu genembo digari ambari seoro namane ningiraera. Aindae sedo, na Iesu Keriso da javoda, God kena ‘aiyakoe beká’ sise irá gheraena.

<sup>9</sup> Na geka resena emo, God kasama erira, na geka beká resena. God resena emo, na numokena nanda dubo isambuimi futuse, nunda Mandi da Bino Eveva ava, vironu sise irá gheraena. God nu kasama erira, na sifo ghousa evia inononda banunguse ne koterana.

<sup>10</sup> Nemo kotise, eminge benunu sise banungeraena: nange God ‘avori’ sedo, emboro afigari na nemokena yaetena, aindae benunu seraena.

<sup>11</sup> Na nemokena yaetena da beká mo eviri: na uju erena amo, na ya nemokena buvudo, Asisi Kakara da joba a sonemba eni mutono budo, ne fakina aetevu.

<sup>12</sup> Aminguse, namonde tofo tofo sonembuse fakina barera. Amo, nenda tumondari ava gido, na fakina barena. A nembarago, ne nanda tumondari ava gosuse, fakina bareva.

<sup>13</sup> Nanda nano namendi, ne geka evia kotareva. Na nemokena yari dae kotise irá gheraena. Avata roera mendeniimi na dimburaira. Nanda uju mo: na namane Jusi embo da gitofu mendenikena ya ijugurureono dubo jovereghedo ghusera, kau daba aminga ava, nemokena ya saramana ari dae uju eraena.

<sup>14</sup> God na sonembusira ava gido, na evetu genembo isambu sonembuse, nunda Bino ava saeteni. Evetu genembo isambu resena emo, na Greek embo a Greek embo da gitofu, taima embodae resena, a kotugo diti basari embo a evetu genembo diti basaede, aindae resena.

<sup>15</sup> A kotugo, na nemokena yama nunda Bino Eveva ava, ne Rome embokena osa sari dae uju beká ava eraena.

<sup>16</sup> God da Bino Eveva aindae, na meka jo gae eraena. Bino Eveva aimi God da fakina ava ijugeraira. Nunda fakina aimi jebuga muteari, namane Jusi embo a namanenda gitofu, evetu genembo isambu, Bino ava tumonduse jebuga evovodae irari ava tuve barera.

<sup>17</sup> Ainda tuka mo: God nange nange namondeda ari ekoko seghe fuggedo, namonde dabade mainungiraera ava, nunda Bino Eveva aimi ijugeraira. Amo eviri: mave tuturo edo, tumondudo ya gombuda tumonduse irarira amo, nu mainungari da emboro evia tambarira. God da Geka aindae sise, eminge resira:

“God evetu genembo gido, nendae ‘eveva’ sarira amo, jo nenda ari eveva eraera, aindae sae arira. Ne numoá tumondururoro gido, aindae jebuga evovodae irari ava mutari barera,” aminge resira.

*1:18-32 God Evetu Genembokena Janje Eko Eraira Da Beká Mo, Eviri.*

<sup>18</sup> Evetu genembo mendeni ne God kotae irise, ari ekoko avanembo use irera. Nenda ari ekokoimi, geka beká ava, erá isagha eure dae sise buregeraera. Nenda ari ekoko eraera aindae, God janje eko edo, ainda mino ava muteari vose fureari, itatamurureoro namonde giraera.

<sup>19</sup> God evetu genembokena mema muturaira da beká mo, eviri. God da irari kau mavega ava, tofo nemokena isagha ijugeari giraera. Ava sedo, evetu genembo resena emo, ne anakora kasama edo itatamuse irá gheraera.

<sup>20</sup> God enda etiri sirorusira, ai tano ghedo refira eminda, nunda irari, nunda fakina, a nunda aito fugari kau mavega ava, evetu genembo itatameraera. Amo jo ditiimi gae eraera. Avata God nune rejo etiri sirorusira ava gosuse, ne God da



irari ava itatamuse kasama eraera. Ava sedo, evetu genembo resena emo, ne 'darige yari' da emboro eni jo tambae arera.

<sup>21</sup> Ainda beká mo: ne God kasama eraera, avata nu jo kakara ae eraera, a numokena jo 'aiyakoe' sae eraera. Amingurureoro, nenda kotari dadaberaira, a nenda jiro munju da usasa dadabeari tumba eraira.

<sup>22</sup> Amingeari, ne eminge seraera, "Namane dubo kotari kakatori," seraera. Avata geke beká mo: nenda dubo kotari mo anakora dadabusira.

<sup>23</sup> Ne God evovodae irira ava tumonde bainghaeteri. Avata nunda duro a usasa ighagha edo, tuturo edo ove kevari ava, tumonde baingheraera. Ove kevari resera ainda kau mo, genembo, rika, sino fuka, a arada da kau aminga ava ove kekevegedo, ava tumonde baingheraera.

<sup>24-25</sup> Geke bekári: God nu utu a enda etiri sirorusira aindae, nundae sakai evovodae sise iraeteri. A nu avori! Avata evetu genembo amo, ne geke beká dodo gungubo ava tumonduse, enda da roera God etiri sirorusira ava tumonde baingheraera. Aindae God nunda ungo sokinembeari, nenda tamo fisi da uju ava use, meka gari da ari ava use, tofo tofo nenda irari bebete eraera.

<sup>26</sup> Ne amingeraera aindae, God nunda ungo sokinimbeari, meka gari da uju ava teria futo use irá gheraera. Nenda evevetu tuturo edo ari sembae use gegenembo dodo, ne totofo kombo yaru use, meka gari da ari ava use irá gheraera.

<sup>27</sup> Kau daba aminga ava, nenda gegenembo evevetude dabade avari dodo, meka gari da ari ava use, totofo kombo yaru eraera. Aindae sedo, God nenda eko ainda mino inononda muteari, nenda tamonda sirereari itatameraera.

<sup>28</sup> God irira ava, ne ighagha use jo itako kakara ae eraera aindae sedo, God nunda ungo sokinembeari, evetu genembo amo ne ari sembae ava use irá gheraera. Amo, nenda kotari ekoko rea koterera

aimi, bajari urureari ainda amboda amboda ise, ari sembae ne jo ae aetera, ava use irá gheraera.

<sup>29</sup> Ari ekoko dombu eni dombu eniimi nenda dubo joká bedo etiri, avanembo use irá gheraera. Ari ekoko resena amo eviri: kombo yagera, ari sembae ari, dighighi ari, kokomana da irari eveva aindae dubo eko use aji sari, genembo daoro ambari, osogo use beisiga ari, komanakena gesire ari,

<sup>30</sup> gungubo sise unongu a indiga sari, God imboe ari, gogore ari, katiyavara use geke eko sari, tofo sakai sari, tofo jighari erari, ari ekoko ari dae emboro tava ari, noi numamo da geke bae ari,

<sup>31</sup> munju tefo kotae kotae ari, beka gagojuse gungubo sari, kavevera aede a dubo joka iraederi.

<sup>32</sup> Evetu genembo amo, ne ari ekoko avanembo use irá gheraera. God da Agho Dari eminge resira: evetu genembo amingeraera amo, ne sirivo arera. God da Agho Dari kasama eraera avata, ne ari ekoko use irá gheraera. Avata kotugo, amingeraera amo, kitakori. O evetu genembo mendeni ari daba ava urureoro giraera aindae sakai seraera amo, eko bekári.

## 2

### *2:1-16 God Evetu Genembo Isambu, Inononda Ijujarira.*

<sup>1</sup> Nanda komana, erá evetu genembo mendeni da ari ekoko ava ijujeose! Nimbarago jo eveva iraeri. Ni ari ekoko daba ava eraesa. Ava sedo, evetu genembo mendeni da ari ekoko ijujedo, God ne dari itatamaoro dae saresa amo, ni aminguse, tofo ninda ari ekoko eraesa aindae, ni dari itatamari dae aresa.

<sup>2</sup> Namonde kasama erera: God, evetu genembo amingeraera ava ijujarira amo, nu inononda ijujarira.

<sup>3</sup> Avata nanda komana, ni komana da ari ekoko rea eraira amo, nimbarago ari daba ava eraesa. Ava sedo, erá God ni jo ijujae ariá ko-teose!

<sup>4</sup> O, avose resena: ni erekotesa, “God sifo ghousa evia inono nandae kavevera use, nanda ari ekoko eraena ainda mino jo mutae irira. Ava sedo, jo mutae arira tano.” Erá aminge koteose! Kasama e! Ni dubo jo jovereghae aresa amo, nu mino mutari itatamaresa. Avata nu oroko nindae kavevera eraira, ainda susu mo: ninda ari ekoko vujegedo, dubo jovereghaso dae sedo goroto muturaira.

<sup>5</sup> Kotugo ni geke jo ningae, gogore use jiro fakara use iresa aindae, God ninda ari ekoko da mino teria ambariá, mutari itatamaresa. Sifo amboda God ni bekáda bekáda ategi arira aminda, itatamaresa.

<sup>6</sup> Ainda beká mo: God evetu genembo isasambu bekáda bekáda ategi edo, ne rea edo ghusera a eraera, aminda inono use minó mutarira.

<sup>7</sup> Eregoseva: evetu genembo mendeni, God nemoá sakai sare dae sedo, ari eveva use irera. Aminguse, ne nunda usasa a jebuga tava use irera. Nemokena God jebuga evovodae irari ava mutari barera.

<sup>8</sup> O evetu genembo mendeni gogore use geke beká ighagha edo, ari ekoko da amboda amboda ya gheraera. Mave amingarera amo, God nemokena nunda vevera a janje eko mutari itatamarera.

<sup>9</sup> Evetu genembo isambu mave ari ekoko use irarera amo, nemokena God bouvu a mema mutari itatamarera. Giti, namane Jusi embokena mutarira. Kotugo amboda, namanenda gitofukena mutari barera.

<sup>10</sup> O mave ari eveva use irarera amo, God nendae sakai sise, usasa a dubo jama mutari barera. Giti, namane Jusi embokena mutarira. Kotugo amboda, namanenda gitofukena mutarira.

<sup>11</sup> Ainda tuka mo: God evetu genembo isambukena mino inononda mutarira.

<sup>12</sup> Namane Jusi embo da gitofu God da Agho Dari jo mutari bae useri. Avata nenda ari ekoko use irá ghedo ghusera aindae sedo, sirivo arera. O namane Jusi embokena,

God nunda Agho Dari futusira. Ava sedo, namanenda mendeni mave ari ekoko use irá ghedo gheraera amo, God nunda Agho Dari rea resira ava kotise, nenda ari ekoko ijujedo sari sirivo arera. Nunda Agho Dari nu rurusera avata, ningido jo ae edo ghuseri.

<sup>13</sup> Ainda beká mo: evetu genembo God da Agho Dari tefo dengoroi ningari vanembo arera amo, jebuga eni aminda jo bae arera. O God da Agho Dari rea resira ava, mave ningido bu kaifa arira amo, nu jebugarira.

<sup>14</sup> Avori, God nunda Agho Dari namanenda gitofukena jo mutari ne baeri. Avata ne totofo nenda uju ava use, God da Agho Dari rea resira ava use irarera amo, ne jebugarera. Aminguse, nenda itatamari a nenda dubo joká rea resira aimi, nemokena kau agho dari da kaugo arira.

<sup>15</sup> Ne aminguse irero, namonde kasama erera: God da Agho Dari rea resira ava, nenda dubo jokáda fitiri irira. Ne totofo nenda dubo jokáda rea itatameraera amo, kau daba avori. Umbu eni, ne rejo eni use eminge itatameraera, “Arie, namane dara eteri!” aminge seraera. O umbu eni, ne eminge itatameraera, “Arie, namane eveva eteri!” aminge seraera.

<sup>16</sup> Avori, God da Bino Eveva ava vironu seraena amo, eminge resira: God sifo amboda Iesu Keriso da javoda, evetu genembo da kotari jungedo irira ava ijugarira amo, ne rea itatamedo a kasama edo ghusera, aminda gosuse ne ijugarira.

*2:17–3:8 Israel Embo, Ne God Da Agho Dari Rurusera Da Beká Mo Eviri.*

<sup>17</sup> Nanda komana, God nangaeda natofokena nunda Agho Dari futusira aindae, tofo nindae sakai eminge seraesa, “Na Jusi embori. Nanda tumondari God Da Agho Darikena fitiraena,” aminge seraesa.

<sup>18</sup> Ni erekotesa: God da Agho Dari sero niningusesa aindae, ni God da

uju kasama eresa, a nange emboro eveva torughaetesa, ava kasama eresa.

<sup>19</sup> Ni erekotesa: evetu genembo diti digoide aikena emboro eveva ijugaresa, a evetu genembo tumbada irera aikena usasa evevago ijugaso garera.

<sup>20</sup> Ninda kotari mo: evetu genembo kotari iraeade ainda dengoro indari kato eveva eni a sasingako da ijuga kato eveva eni amo nimori. Ni aminge erekotesa ainda beká mo: God da Agho Dari ruruse, ni geka, a kotari beká isambu ainda susu kasama e gogoghombariá erekotesa.

<sup>21</sup> Avori, ni evetu genembo mendeni ijugeraesa. Avata tofo nimoá ava ijugaetesi. Ni vironuda seraesa, “Erá bagia eove!” sise, ni bagia eraesa, ai? Kote gi!

<sup>22</sup> O, “Erá yagera eove!” sise, ni yagera eraesa, ai? Ni, “Erá ove a gode mendeni mendeni tumondeove!” seraesa. Avata ni tofo gode mendeni da banungari kambo da roera bagia eraesa.

<sup>23</sup> Ni tofo mandi sakai sise, “Na God da Agho Dari bu jighirena,” seraesa. Avata ni God da Agho Dari bejise, tofo nunda javo eko eraesa.

<sup>24</sup> Amingeraesa andae, God da Geka eminge resira:

“Jusi embo rea eraera ava gido, nenda gitofu God ighagha use, nunda javo bu ekoda fitiraera,”

God da Geka aminge resira.

<sup>25</sup> Ni Agho Dari ningido amin-garesa amo, ninda vika mendo anoso gafugusera da tuka isagha arira. Ni God da mandi eni aresa. O, ni jo ava ae aresa amo, nei nimamo ninda tamo tefo gafuguseri. Tano ainda tuka jo foa isagha ae arira.

<sup>26</sup> O nangaeda gitofu eni vika da mendo anoso jo gafugae irira aimi, eredo Agho Dari rea resira ava arira amo, nu ainda tano jo bae usira ava, God kote dotutuse numokena sarira, “Ni fu, nanda mandi ase!” sarira.

<sup>27</sup> Aminguse, ninda gitofu da irari eveva gido andae, God ninda ari ekoko ijujedo mino bouvu beká ava nimokena mutarira. Ainda beká mo: ni Jusi embori. Ninda vika da mendo anoso gafuguseri. A God nunda Agho Dari setiri Moses gefusira ábarago, nimokena irira. Avata nangaeda gitofu tamo kakara jo gafugae irise, Agho Dari rea resira ava nune eraira. O nimo, ni jo amingae eraesa. Andae sedo, God nimokena mino bouvu beká ava mutari itatamaresa.

<sup>28</sup> Ainda beká mo eviri. Jusi embo mo, Abraham da sasingu andae seraera. Avata God da kotari mo: Jusi embo beká jo Abraham da sasingu avanembo iraeri. A tamo kakara gafugari amo, tefo tano vanembori. Ainda beká sirorarira amo, jo tamonda sirorae arira. Amo, tatera dubo jokáda sirorarira.

<sup>29</sup> God da kotari mo: genembo mave nunda dubo joká simbugarira amo, nu Jusi embo bekári. Kau nangaeda natofo nenda tamo simbuguse, vika da mendo anoso gafugeraera aminga ava, genembo amo nunda dubo joká simbugedo, God kena muturaira. Avata dubo joká simbugari mo, jo Agho Dari imi simbugae eraira. Saramana amo, God da Asisi Kakara aimi simbugeraira. Genembo mavejoá Asisi Kakarai simbugarira amo, God nundae sakai sarira. Evetu genembo nundae sakai saoro dae jo kotae arira.

### 3

<sup>1</sup> Avata vika mendo anoso gafugedo Jusi embo arera, ainda eveva eni tefo, ava erá seove! Ainda eveva mo irira.

<sup>2</sup> Jusi embo nenda eveva mo, evia gitida sari dae erena. God nunda Geka nemokena mutiri ruruseri.

<sup>3</sup> Geka bekári: Jusi embo mendeni God jo tumondae useri. Ne nundae sedo rea ari dae beka gagojusera ava, ne jo ae useri. Avata kote givu! God andae sedo nunda beka gajari ighagha edo doyarira, ai?

<sup>4</sup> Tefo, nu jo doyaer arira. Evetu genembo isasambu ne gungubo seraera tano. O God nu geke beká vanembo seraira. Nunda Geka jokáda aindae eminge resira:

“Ni geke sise, geke beká vanembo seraesa, ava isagha ari evetu genembo kasama arera.

A kotugo ni ijujaresa da sifo aminda, evetu genembo ni gido geke beká arera,”

nunda Geka aminge resira.

<sup>5</sup> Avata evetu genembo mendeni erekotera amo: “Namonde ari ekoko arera amo, God nu eveva vanembo arira aindae, evetu genembo nunda javo jighoro erarira. Amo, namondeda ari ekoko eraera aimi, God da binó sonembari teria arira. Ava sedo, God redae namonde ari ekoko embo dari dae resi?” (Emo, na evetu genembo mendeni da kotari ava resena.)

<sup>6</sup> Avata amo jo geke beká iraeri. God nu ari ekoko da mino, jo inononda mutae aetira amo, nu nange enda kaifa use evetu genembo ijujari?

<sup>7</sup> Evetu genembo daba aimi, eminge erekotera: “Namonde gungubo seraera aimi, God da binó sonemberaira. Ainda beká mo: namonde gungubo seraera aindae sedo, God geke beká ava ijugari dae sedo geke beká seraira. Amingeari, God da Geka beká isagha eari kasama edo, natofo God dae sakai seraera. Ava sedo, God jo namondeda ari ekoko ijujari dae jo sae aeti.”

<sup>8</sup> A gido, ari eveva isagha are dae sedo, ekoko vanembo use irore!” aminge seraera amo, geke sembaeri. Evetu genembo mendeni nandae unongu sise, na amingaoro dae sariá sise seraera. Avata na geke eko amo jo sae eraena. A unongu sari kakato setena amo, God ijujedo, nenda unongu sari aindae darira amo, eveva arira.

*3:9-20 Evetu Genembo Isasambu Ekokori.*

<sup>9</sup> Ava sedo, namane Jusi embo jo eminge sae arera, “Namane evevari, namanenda gitofu ekokori,” ava jo sae arera. Tefo, na geke anakora seteno ningeva amo, eviri. Jusi embo a Jusi embo da gitofu, ne inonori. Ne isasambu, ari ekoko da amboda amboda use irá gheraera.

<sup>10</sup> God da Geka aindae eminge resira:

“Genembo eveva eni, tefo bekári.

<sup>11</sup> Genembo eniimi jo kasama use God tava ae eraera.

<sup>12</sup> Evetu genembo isambu, eveva da emboro gukai mutudo, eko da emboroda udo ya

gheraera. Evetu genembo isambu sembae use irá gheraera.

<sup>13</sup> Kau ambari embo da ofofo gomoda ghe, masa ombege foa gheraira aminga ava,

geke eko nenda bekada ghe foa buvuraira. Amo, ne gungubo sise irá gheraera.

Kau kae eko jingabukena iriari gamburaira aminga ava, geke eko nenda bekada irise buvuruturureari, dara siroreraira.

<sup>14</sup> Nenda bekaimi simbora use, dubo ekoko use geke seraera.

<sup>15</sup> Tataya da bino ningarera amo, ne anakora sumbu ya buvudo tataya use, mendeni daoro mema itatamarera,

a mendeni daoro sirivo arera.

<sup>16</sup> Ne reda ya buvarera amo, reighi sosighi edo, ekoko ururoro dubo mema sirorarira.

<sup>17</sup> Mainungari da emboro amo, ne berefori.

<sup>18</sup> Ne God jo itako kakara use, igheghi ae eraera,”

God da Geka aminge resira.

<sup>19</sup> Ainda beká mo: namonde kasama erera, Agho Dari rea resira amo, nu evetu genembo Agho Dari da emboro+ aminda ise irá gheraera, nemokena resira. Agho Dari resira amo, nu evetu genembo isambu nange God da ijujari ava darige ya buvaetera ainda emboro+ ava, gajari dae sise resira.

<sup>20</sup> Jo genembo eniimi Agho Dari da emboroda+ ise inononda ururari, God nundae 'eveva' jo sae arira. Amo, God Agho Dari futusira da susu mo: namonde evetu genembo ari ekoko eraera, ava tofo kasama aoro dae sedo futusira.

*3:21-31 God Evetu Genembodae 'Eveva' Sari Da Emboro Mo Eviri.*

<sup>21</sup> God evetu genembodae 'eveva' sari da emboro mo, oroko isagha etiri eregoseva. Avata evetu genembo Agho Dari da emboro aminda udo yarera aikena, nendae jo 'eveva' sae arira. God emboro+ seka numokena afigarira ava, Agho Dari da geka a feroveta da geka jokáda gembero resira.

<sup>22-23</sup> Ainda emboro+ eviri: evetu genembo Iesu Keriso tumondarera aindae, God nendae 'eveva' sarira. Evetu genembo isambu kau dabakori. Amo, evetu genembo isasambu ekoko use irá gheraera. Aminguse, God da kau duroghae ava, nene ijugaoro nenda tamonda isagha aetira amo, ne kasiguse jo ijugae eraera. Isasambu ne ari ekoko use irá gheraera. Ava sedo, God isambukena inononda eraera. Evetu genembo mave Iesu Keriso tumondarera amo, God gido, nendae 'eveva' nune sarira.

<sup>24</sup> Ne Iesu Keriso tumonduse, nunda fakinaimi jebugeraera. Ainda beká mo: God nunda sonemba tefo futururari, ne Iesu tumondururoro gido, nendae 'eveva' sarira.

<sup>25</sup> God nu evetu genembo da ari ekoko kote doyarari dae sedo, Iesu mutiri fira ambududurusira. Iesu namondeda ari ekoko da mino mutari gido, numoá tumonduse nunda ambari da fakinaimi jebugaoro dae sedo, God Iesu futusira. Amingusira da beká mo: nu nange evetu genembo inononda ijujeraira, ava ijugari dae sedo amingusira. Ne eregoseva, Iesu mutiri fusira ainda gitida, God nu durumugedo kaifa use, evetu genembo da ari ekoko gido dotutusira.

<sup>26</sup> Avata Iesu fira buviri aindae, God nu oroko, evetu genembo da

irari inononda ijujeraira ava kasama aoro dae sedo, evetu genembo da ari ekoko jo tefo tefo kote doyarari eraera. Avata evetu genembo mave Iesu tumondarera amo, God nendae 'eveva' sarira.

<sup>27-28</sup> Ava sedo, namonde tofo sakai sari da susu eni tefori. Ainda beká mo: namonde jo Agho Dari da emboroda+ ise, ari eveva eraera aindae jo jebugae arera. Jo namondeda ari eveva aimi, God da jebuga tuve bae arera. Namonde taká tumondururoro aindae, God namondeda 'eveva' sarira.

<sup>29</sup> Ne eregoseva: God namane Jusi embokena nunda Agho Dari mutiri rurusera amo, jo kikiako namanda God iraeri. Namane Jusi embo da gitofu barago, namondeda God ri.

<sup>30</sup> God nu dabakori. A nunda uju mo: namane Jusi embo tumondururoro gido, namanendae 'eveva' sise, sari namane nunda sasingu aeteri. A kotugo, namane Jusi embo da gitofu barago tumondururoro gido, nendae 'eveva' sise, sari nembarago nunda sasingu aeteri. Amo nunda ujuri.

<sup>31</sup> Avata namondeda tumondari resena eimi, jo Agho Dari fugoro dadabae arira. Namonde Iesu Keriso tumonduse, Agho Dari bu jighiroro ainda fakina foa isaghada buvarira.

## 4

*4:1-12 Abraham Barago, Jo Nunda Ari Eveva Edo Ghusira Aimi, Jebugaeri.*

<sup>1</sup> Giti beká, namane Jusi embo da abua javo Abraham ava kotaeteri. Nu nange edo ghusira ava kote givu!

<sup>2-3</sup> Jo nunda ari eveva edo ghusira aindae, God nundae 'eveva' saeri. Nunda ari eveva edo ghusira aindae, God nunda ari ekoko kote dodo, nundae 'eveva' saetira amo, namanenda abua Abraham, nu tofo sakai saeti. Avata jo nunda ari eveva eni aindae jo saeri. God da Geka eminge resira: "Abraham God tumondusira aindae, God nundae 'eveva' sisira,"

God da Geka aminge resira. Ava sedo, Abraham barago nu jo tofo sakai saeri.

<sup>4</sup> Moni genembo mave saramana use barira aindae, namonde jo joba sae eraera. Moni amo, nunda minori. Nu saramana kau mavega arira, ainda inononda barira. Eveva arira, mino eveva barira. O eko arira, mino eko ava barira.

<sup>5</sup> God nu ari ekoko embo da mino ekoá mutaetira avata, nenda tumondari ava gosuse, nenda ari ekoko kote dodo, nendae 'eveva' seraira. Ava sedo, evetu genembo mave nenda ari eveva jo tumondae use, ne God vanembo tumondarera amo, God nu evetu genembo aindae 'eveva' sarira.

<sup>6</sup> God amingarira aindae, evetu genembo ivuga use irarera ava kotise, David nunda Yaru Buku jokáda eminge gefusira:

<sup>7</sup> "Evetu genembo mave, God nenda ari ekoko kote dodo, nenda ari sembae seghe fugarira amo, ne ivuga arera.

<sup>8</sup> Genembo mave God nunda ari ekoko kote dodo, jo sekago kotae arira amo, nu ivuga arira." David aminge gefusira.

<sup>9-10</sup> Namonde geka ava tegedo eminge kasama erera. Abraham jo rejo eni ae, nu taká tumondusira ava gido, God nundae 'eveva' sisira. Avori, kote gaore! Abraham nunda vika mendo anoso jo gafugae irise ainda gitida, nu God tumondetiri gido, God nundae 'eveva' sisira. Ava sedo, David genembo ivuga arira gefusira amo, jo namane Jusi embo vika mendo anoso gafugeraera aindae nembo saeri. Evetu genembo isambu mave tumonderaera aindae sedo, geka emo gefusira.

<sup>11</sup> Abraham giti tumondetiri gido, God nundae 'eveva' sisira. Nundae 'eveva' sedo, amboda nunda tumondari da tano futuse, vika mendo anoso gafugare dae sisira. Ava sedo, mave vika mendo anoso jo gafugae irise tumondari gido, God nundae

'eveva' sarira, ainda numamo a jiro mo, Abraham nune arira.

<sup>12</sup> Kotugo, nu namane Jusi embo da afa resena emo, jo namanenda tamo gafugeraera aindae sise saeri. Kau Abraham nunda tamo jo gafugae irise tumondedo ghusira aminga ava, namane tumonduse irera aindae sise, 'nu namanenda afa' resena.

*4:13-25 God Beka Gagojuse Rea Mutari Sisira Ava, Jo Saramana Use Bae Arera. Tumonduse Barera.*

<sup>13</sup> God beka gagojuse, Abraham kena sisira, "Enda nane usena emo, ninda tofo a ninda sasingu da tofo arira," Abraham God tumondusira aindae sedo, God aminge sisira. Abraham jo Agho Dari da emboroda+ ise ari eveva ari gido, aindae enda jo mutari saeri. Nunda tumondari ava gido, nundae 'eveva' sise, God nu beka gagojuse, numokena enda mutari dae sisira.

<sup>14</sup> Ai resira amo, God beka gagojuse rea mutari sisira ava, evetu genembo mave Agho Dari kaifa e gogoghombuse baetera amo, namondeda tumondari soesa aeti, a God da beka gajari barago soesa aeti.

<sup>15</sup> Avori, Agho Dari aimi God da janje eko budo foa gheraira. Ainda beká mo: Agho Dari futusira amo, jo kaifa ae eraera. O, Agho Dari jo mutae aetira amo, Agho Dari bejari da emboro jo sirorae aeti.

<sup>16</sup> Avori, God nunda beka gajari amo, mave numo tumonderaera aikena tefo futusira. Amo, na Abraham da sasingu a imemesiri aindae resena. Kotugo na jo nunda oro beká Agho Dari budo irera, aindae nembo jo saeri. Mave God tumonderaera, ainda afa mo Abraham. Ainda beká mo: ne tumonduse, kau Abraham God tumondedo ghusira, aminga ava use irera.

<sup>17</sup> God da Geka aindae eminge resira:

"Na ni esimbugetena aindae, ni oro mendeni mendeni da numamo aresa."

Avori, God tofo setiri Abraham namonde tumondari embo da afa

usira. A God resena emo, nu inono bekári. Nune seari ambari embo ambarida ghe jebugeraera. A nune seari roera tofo siroreraira.

<sup>18</sup> God sisira, “Ni oro mendeni mendeni da numamo aresa,” setiri, Abraham ava tumonduse, beká sirorare dae sedo gigitusira. Rejodae gigitusira amo, jo numokena sirorari da kaugo iraeri. Avata nu tefode numonde gigitusira. Gigitiri, beká sirorusira. God da Geka eminge sisira, “Ninda sasingu digarigo sirorarera.”

<sup>19</sup> Geka sisira ainda sifoda mo, Abraham nu ghaeko 100 ari dae use nunda tamo gido eminge kotisira, “Na embako beká eteni. Ava sedo ambari dae erena. A nanda evetu Sarah mo, erovari.” aminge kotisira avata, kotari amo dodo, nu tefode numonde tumondusira.

<sup>20</sup> Nu jo manamana use, nunda tumondari doyae usira. Nu tumonduse God dae sakai sise fakina usira.

<sup>21</sup> God numokena rea ari dae sise beka gagojusira ava, nune ari inono arira ava kasama use, Abraham nu God tumonde gogoghombusira.

<sup>22</sup> A God Abraham da tumondari teria ava gido, nundae ‘eveva’ sisira.

<sup>23</sup> Avata kotugo geka, “nundae ‘eveva’ sisira,” amo, God jo Abraham dae nembo saeri.

<sup>24-25</sup> Namonde barago kotise, God aminge setiri gefuseri. God nu namondeda Bajari Iesu setiri, namondeda ari ekoko da mino mutari dae sedo, fira ambududurusira. Ambiri, namondedae ‘eveva’ sari dae sedo, God sekago setiri Iesu ambarida ghe jebuge erorusira. Ava sedo, namonde God evia tumonderaera aindae, God ‘eveva’ sarira.

## 5

### *5:1-11 God Namondedae ‘Eveva’ Sarira Amo, Namonde Ivuga Arera.*

<sup>1</sup> Namonde tumondero gido, God namondedae ‘eveva’ sisira. Nu aminguse, namonde dabade mainungosuseri. Amo, namondeda Bajari Iesu Keriso, namondedae rea usira

aindae sedo, God namonde dabade mainungosuseri.

<sup>2</sup> Namonde numoá tumondero gido, Iesu namonde ava unumbe budo ira God kena ijugetiri, God da sonemba emo ruruseri. Ava itatamuse, namonde ivuga use irera. Ainda beká mo: namonde amboda God de dabade nunda usasada irise, numongo ava arera, ava gigituse ivuga use irera.

<sup>3</sup> Avori, namonde aindae ivuga use irera, a kotugo kau daba aminga ava, dara siroreari mema itatameraera aindae barago, namonde ivuga use irera. Ainda beká mo: mema a dara itatamuse, namonde durumuguse fakina eraera.

<sup>4</sup> Durumuguse, fakina use irioro gido, God aindae aiyakoe sise, nunda ivuga ava namondekena ijugeari itatameraera. Ava itatamuse, nu rea mutari sisira, ava gigituse irera.

<sup>5</sup> Kotugo namonde gigituse irera, aindae jo meka gae arera. Ainda susu mo: beká sirorari da tano mo, God da Asisi Kakarari. God nunda Asisi Kakara mutiri rurusera aimi, nunda dubo bari namondekena ghaseari, dubo jokáda itatameraera.

<sup>6</sup> Ai resira amo: namonde fakina tefo irero, God sifo gategusira aminda, Keriso ari ekoko embodae sedo ambududurusira.

<sup>7</sup> Eregoseva: genembo eniimi eredo, genembo eni ari dambu eraira ava sonembari dae sedo, nunda vasa budo ambarira amo, fakarago bekári. Jo ari da kaugo iraeri. Avose, genembo eniimi eredo, genembo eni eveva beká kavevera eraira, ava sonembari dae sedo, nunda vasa budo ambaeti, tanojo. Na bunise resena.

<sup>8</sup> Avata God da dubo bari namondekena kau mavega ava ijugetiri gosuseri. Namonde totofo ari ekoko use irero, nu uju edo setiri, Keriso namondedae sedo ambududurusira.

<sup>9</sup> Avori, giti namonde ari ekoko use irero, Keriso fira ambiri nunda ororo da fakinaimi, God namondedae ‘eveva’ sisira. Ava sedo, oroko eveva iroro, Keriso joka edo sonembururari, God da janje eko amboda

foa isagha arira ava, namonde jo itatamae arera.

<sup>10</sup> Ne eregoseva: namonde giti God da gitofu edo irero, nu joka edo nunda Mandi ambududurusira ainda fakinaimi, namonde dabade mainungosuseri. Ava sedo, oroko nunda natofo edo iroro, Keriso ambarida ghe jebuge erorusira ainda fakinaimi, jebuga evovodae irari ava namondekena mutari barera.

<sup>11</sup> Amo amboda barera. Avata oroko barago, namonde God da natofo edo irise, ivuga use irera. Ainda beká mo: namondeda Bajari Iesu Keriso sonembetiri, namonde God de dabade mainungido nunda natofo useri.

*5:12-21 Adam Rea Usira Aimi, Ambari Bu Fusira! O Keriso Rea Usira Aindae, Jebuga Sirorusira!*

<sup>12</sup> Genembo Adam nu God da Geka kotae edo dara etiri, Ari Eko endada sirorusira. Kotugo Ari Eko aimi ambari unumbe bu fusira. Aindae sedo ambari mo, evetu genembo isambukena sefusira. Ainda beká mo: evetu genembo isasambu ari ekoko embori.

<sup>13</sup> God jo Moses kena Agho Dari mutae iriri ainda gitida, Ari Eko endada irei. Avata agho dari jo irae arira amo, nange ari eko da kau kasama edo ijujareri? Ava sedo, Adam tano ghedo fira Moses sirorusira ainda jokáda, God evetu genembo da ari ekoko jo tegae edo ghusira.

<sup>14</sup> Avata Adam dara usira, sifo ai tano ghedo firi Moses Agho Dari rurusira da soro aminda, evetu genembo ambududurudo fuseri. Mendeni ari eko Adam usira ava, ne jo ae useri. Amo, Adam God da Geka jo ningae use ari eko usira aminga ava, ne jo ae useri. Avata nembargo ambududuruseri.

Kau Adam rea usira ainda bouvu evetu genembo mendenikena sefusira aminga ava, Iesu amboda rea etiri sirorusira ainda esimbugari ava, evetu genembo mendenikena sefusira.

<sup>15</sup> Avata Adam nengae Iesu ghae jo kau dabako iraeri. Ainda beká mo: joba God tefo futusira amo, jo Adam da dara nune usira ainda kaugo iraeri. Adam amingusira aindae sedo, evetu genembo digari ne ambududuruseri. Avata God da sonemba a nunda joba tefo futusira amo, fakina bekári. Iesu Keriso nu genembo dabakori. Avata nunda sonemba ava, evetu genembo digarii itatamuseri.

<sup>16</sup> Kau daba aminga ava: God da joba a Adam da dara jo kau dabako iraeri. God da joba nune tefo futusira amo, teria bekári. Eregoseva: Adam umbu dabako ari eko etiri gido, God inononda ategi use, nundae 'eko' sisira. Avata evetu genembo isambu ari ekoko udo refuara ainda amboda, God nunda joba ne jo bae aetera ava, tefo futuse, ne isambu aindae 'eveva' sisira.

<sup>17</sup> Geka beká, genembo dabakoi ari eko etiri, ambari aimi namonde isambukena sembiri, namonde ambari da tofo useri. Avata amo kitakori. O genembo dabako Iesu, rea usira ava kote givu! Amo teriagori. Ainda beká mo: evetu genembo mave God da sonemba a nunda joba baoro, nendae 'eveva' sarira amo, jebuga evovodae irari ava nenda tofo ari, ne evovodae fakina use irarera. Iesu Keriso nendae rea usira aindae sedo, ne amingarera.

<sup>18</sup> Avori, setena, daba ava sari dae erena. Kau ari eko dabako aimi etiri, ambari mo evetu genembo isambukena sefusira aminga ava, ari eveva dabako aimi evetu genembo isambu sonembetiri, God nendae 'eveva' sise setiri, ne jebuga evovodae irari ava ruruseri.

<sup>19</sup> A kau genembo dabako God da Geka jo ningae use dara usira aindae, evetu genembo digari ari ekoko usera aminga ava, genembo dabako God da Geka ningi kaifa e gogoghombusira aindae sedo, God evetu genembo digari aindae 'eveva' sarira.

<sup>20</sup> Eveva rejo a eko rejo, ava kasama aoro dae sedo, God nunda Agho Dari futusira. A kotugo, ari



ekoko da goroto digari ava ijugari evetu genembo kasama aoro dae sedo, Agho Dari futusira. Avori, evetu genembo ari ekoko da kau kasama edo, tuturo edo ari ekoko digari edo ghuseri. Avata kotugo God da sonemba aimi teria edo, Ari Eko da fakina ava darigedo fira teria usira.

<sup>21</sup> Ai resira amo: kau ambari da fakinaimi, Ari Eko fira mindafu usira aminga ava, God da sonembai fira, namondedae 'eveva' sise mindafu usira. Aminguse, God da sonembaimi namonde unumbedo bu yari, Bajari Iesu Keriso da fakina aimi, jebuga evovodae irari ava tuve barera.

## 6

### *6:1-14 Namonde Ari Eko Da Fakina Darigedo, Keriso Da Tofo Arera.*

<sup>1</sup> Avori, setena ava kotise, erá eminge seove, "Paul resira, 'Ari eko arera amo, God da sonemba viti mindafu arira,' ava sedo, fuvu, namonde ari ekoko teria futo ururoro, God da sonemba mindafu ari gaore!" erá aminge seove!

<sup>2</sup> Namonde jo itako amingae arera. Namonde Ari Eko da natofu edo irise, Keriso de dabade tatedo ambududurusera amo, Ari Eko da fakina namondekena dadabusira. Ava sedo, jo sekago jovereghe ari ekoko use irae arera.

<sup>3</sup> Ne kasama ereva: namonde bafataito use, Iesu Keriso de dabade tatiseri. Aminguse, nunda ambari barago namonde itatamuseri.

<sup>4</sup> Avori, namonde bafataito usera amo, inono namonde Iesu de dabade tatetero bu furugetero, nunda ambari da fakina ava ruruseri. Amingusera da tuka mo: kau God Afa nunda fakina durode aimi setiri Keriso ambarida ghe jebuge erorusira aminga ava, namonde bafataito edo uvuda ghe ere vivituse, jebuga seka budo ainda aito ava use irarera.

<sup>5</sup> Ne eregoseva: Iesu kau nange ambududurusira, aminga ava ambududuruse, namonde Keriso de dabade tatarera amo, nu kau nange

nange jebugedo erorusira aminga ava, namonde jebugarera.

<sup>6</sup> A kotugo namonde kasama erera, Ari Eko da fakina dariguse, namondeda irari eko doyoro dadabare dae sedo, God namondeda irari manai ava, Keriso de dabade korosida arafa dorusira.

<sup>7</sup> Ainda beká mo: evetu genembo mave ambarera amo, Ari Eko da fakina nemokena dadabarira.

<sup>8</sup> Avori, namonde tumonderera: namonde Keriso de dabade ambududurusera ava sedo, namonde kau daba aminga ava, Keriso de dabade jebugedo irarera.

<sup>9</sup> Ainda beká mo: namonde kasama erera, God setiri Keriso ambarida ghe jebuge erorusira. Kotugo Keriso jo sekago ambae arira. Ambari da fakina numokena dadabusira.

<sup>10</sup> Keriso nu umbu dabako ambududuruse, Ari Eko da fakina de bejisira. Avata nu jebugedo, oroko God ghae dabade irera.

<sup>11</sup> Ne kau daba ava useva, ava kotise irareva. Amo, Ari Eko da fakina nemokena dadabetiri, ne Iesu Keriso de dabade tatedo, jebugedo oroko God de dabade ireva.

<sup>12</sup> Ava sedo Ari Ekoimi, jo nenda tamo da bajari ururari, nenda fisi da uju ava use irae areva.

<sup>13</sup> Kau daba aminga ava, nenda tamo da ungo, ata, diti, o roera eni jo doyovo, Ari Eko da tofo edo ari sembae jo ae arira. Fisi da uju ava ighagha use, God ne nange nange sonembiri ambari darigedo jebuga tafuseva ava kotise, nenda dubo joká isambu God kena mutuvu! Nenda dubo joká a nenda fakina isambu God kena futurovo, aimi God budo, sonembururari ne ari eveva use irareva.

<sup>14</sup> Ne jo Agho Dari da emboroda+ yae eraeva. God nunda sonembaimi emboro+ eni afigusira, aminda udo refeva. Aindae sedo, Ari Ekoimi jo nenda bajari ae arira.

### *6:15-23 Namonde, Jo Ari Eko Da Sari Ningari Ae Arera.*

<sup>15</sup> Geka evia erá seove: “Namonde jo Agho Dari da emboroda+ yae eraera. God da sonembaimi emboro afigusira, aminda udo refera. Ava sedo, namonde kotae kotae use ari ekoko arera, a nu avori,” erá aminge seove! Amo eko bekári.

<sup>16</sup> Ne kasama ereva tanojo. Ne mave da geka ningareva, ainda tofo edo irareva. Kau daba aminga ava, Ari Eko da uju ainda amboda amboda areva amo, ne ainda tofo edo ya ambareva. O, God beka sirurari nininguse amingareva amo, God nendae ‘eveva’ sarira.

<sup>17</sup> Avori, God kena ‘aiyakoe’ sise irareva! Ainda beká mo: ne giti Ari Eko da tofo edo iriavu. Amingedo iriava avata, aghi kakato era nemokena buvudo, vironu sise ijugetero, nenda dubo isambuimi God kena futuse, aghi kakato da geka ningi tumondusevu.

<sup>18</sup> Tumondevo, Ari Eko da fakina nemokena dadabetiri, ne ari eveva da tofo usevu.

<sup>19</sup> Na ijugaboro fifiterena ainda tuka mo: erá nenda kotari tufakoimi euri, nanda geka da tuka kosasagheovo dae sise resena. Avori, kau ne giti Ari Eko da tofo edo nenda fakina aikena futuse, ari eko a ari sembae edo ghuseva aminga ava, oroko nenda fakina mo, ari eveva aikena futuse, ari eveva ava use irareva.

<sup>20</sup> Giti ne Ari Eko da tofo edo iriava amo, ne jo God da Geka eni ningido, ari eveva eni ae usevu. Ne fisi da uju avanembo edo ghusevu.

<sup>21</sup> Amingedo ghuseva ainda eveva eni tafusevu, ai? Givu! Ne oroko aindae sedo meka eregoseva. A kotugo ari oinda gombuda, ambari avanembo tambaetevu.

<sup>22</sup> Avata oroko, Ari Eko da fakina nemokena dadabetiri, ne God da tofo edo ireva. Amingedo irise, ari eveva ava use, God da natofu kakarago ava edo iria, sifo gombuda jebuga evovoda irari ava tuve bareva.

<sup>23</sup> Ainda beká mo: ne Ari Eko da tofo edo irareva amo, ne ainda mino ava bareva. Mino resena emo, ambariri. Avata namondeda Bajari Iesu

Keriso, emboro+ eni afigusira aindae sedo, namonde Keriso de dabade tatarera amo, God namondekena jebuga evovoda irari ava tefo mutari barera.

## 7

### *7:1-6 Agho Dari Nengae Ari Eko Ghae Da Ijugaboro Eni Mo, Eviri.*

<sup>1</sup> Avori, nanda nano namendi, ne God da Agho Dari ava tegutuse, ainda geka da mendo ava kasama ereva. Ava sedo, na rea sari dae erena amo, nemokena isagha erira. Genembo mave Agho Dari da emboroda+ yarira amo, nu Agho Dari da geka ava use irari, ambari tano arira.

<sup>2-3</sup> Avori, geka evia kote givu! Ijugaboro evetu genemboghaekena fifituse sari dae erena. Evetu eni vai edo irarira amo, nu jo ya genembo enikena vitae arira. Nuvu jebuga irari, ya genembo enikena vitarira ainda javo mo, yagera seraera. O nuvu ambari rori arira amo, agho dari ainda fakina numokena dadabarira. Nu rori arira ava sedo, ya genembo enikena vai ari sarira, a nu avori.

<sup>4</sup> Avori, nanda nano namendi, nemokena kau daba ava sirorusira. Agho Dari da fakina nemokena dadabusira. Ainda beká mo: Keriso ambarida ghe jebuge erorusira amo, ne nunda tofo usevu. Nunda tofo edo, ne Keriso da tamo da mendeni edo ireva. Kotugo namonde nunda tofo edo irera da beká mo: God uju erira amo, namonde nundae sedo ari eveva use iraeteri.

<sup>5</sup> Eregoseva: namonde Keriso da tofo jo ae irero, ari ekoko da aito ava, Agho Dari ijugusira aimi, namondeda ghamo dereari eredo fisi da uju ava use, ari ekoko avanembo edo ghuseri. Mave dubo jo jovereghae irise, amingudo yarira amo, sifo amboda nunda asisi ambarira.

<sup>6</sup> O oroko mo, Agho Dari da fakina namondekena dadabusira. Ainda beká mo: namonde giti Agho Dari da tofo etero, aimi namonde bundetiri irise Keriso de dabade ambero,

Agho Dari da fakina namondekena dadabusira. Oroko emo namonde jo, Agho Dari ainda emboroda+ yae eraera. Jebuga seka God da Asisi muturaira ainda emboro+ aminda, udo refera.

*7:7-25 Agho Dari Nu Evevari. Avata Evetu Genembo Jo Amingari Da Kaugo Iraeri.*

<sup>7</sup> Avori, na rea setena ava ko-tise, evetu genembo mendeni eredo eminge saeteri, “Agho Dari ekori,” aminge saetera amo, jo eveva ae aeti. Agho Dari mo evevari. Avata kotugo, na Agho Dari tegutuse, na ari ekoko da goroto ava kasama useni. Na giti dighighi ari amo ari eko, ava jo kasama ae irise, Agho Dari jokáda, “Erá dighighi eose!” ava tegutuse, ainda tuka kasama edo, na kotiseni, na amingeraena.

<sup>8</sup> Kotugo ava kotise, Agho Dari da geke kasama eno, Ari Eko aimi nanda ghamo deretiri eretiri, na roera digari dombu eni dombu eni ava isambu dighighi useni. Ainda susu mo: Agho Dari jo irae arira amo, Ari Eko da fakina barago jo irae arira.

<sup>9</sup> Namokena kau daba ava sirorusira. Na Agho Dari ainda beká jo ningi kasama ae irise, jebuga iriani. Aminge irise, na Agho Dari da beká ningi kasama eno, Ari Eko nanda dubo jokáda siroredo fakina usira.

<sup>10</sup> Etiri, nanda asisi ambududurusira, ava itatamuseni. Avori, Agho Darii jebuga mutaetira ava dodo, namokena ambari ava futusira.

<sup>11</sup> Agho Dariimi goroto afigetiri, Ari Eko aimi deretiri na gofeteno, nanda asisi ambududurusira.

<sup>12</sup> Avori, Agho Dari nu eveva a kakarari. A nu rea resira amo, kakara, dambu, a evevari.

<sup>13</sup> “Agho Dari evevari,” aminge seteni. A kotugo, Agho Dariimi emboro afigetiri, nanda asisi ambududurusira, ábarago seteni. Avata geke bekári: nanda asisi ambududurusira da susu mo, jo Agho Dari

eveva aimi aeri. Nanda asisi ambududurusira da susu mo, Ari Ekori. Amo, Ari Eko aimi eredo, Agho Dari eveva ava jighi jovereghetiri, namokena ambari budo fusira. Amin-gusira andae namonde kasama eraera, Ari Eko ainda jokáda eveva eniko tefo bekári.

<sup>14</sup> Geke bekári: God nunda agho Dari amo, namondeda asisi ava sonembari dae sedo futusira. Avata na genembori. Kau tafasara kaka-toimi genembo eni sandi budo bajari eko aikena omburaera aminga ava, na Ari Eko da tofo edo irena, a Ari Ekoi nanda bajari edo irira.

<sup>15-16</sup> Na rea eraena, ava jo kasama use ae eraena. Ainda beká mo: na jo nanda uju ava ae eraena. Na ari imboe eraena avata eraena. Ari ovia imboe eraena da beká mo: na kasama erena, Agho Dari rea resira amo, nu geke eveva a damburi.

<sup>17</sup> Ava sedo, ari ekoko eraena amo, jo tofo nane ae eraena. Amo, Ari Eko nanda dubo jokáda irira aimi, sirureari amingeraena.

<sup>18</sup> Na kasama erena, nanda fisi jokáda roera eveva eni tefori. Ai resira amo: na ari eveva eni uju use ari dae kotarena amo, jo nane ari da kaugo irae ava arena.

<sup>19</sup> Na, ari eveva rea ari dae uju eraena ava kosasaghe dodo, ari ekoko imboe eraena, ava eraena.

<sup>20</sup> Avori, amingeraena da tuka mo eviri. Na jo tofo nanda bajari iraeri. Ari Eko nanda dubo jokáda irira amo, nu nanda bajari edo irira.

<sup>21</sup> Avori, nanda fisi jokáda agho dari eni irira ava itatameraena. Roera eveva eni uju use ari dae koteraena ava kosasaghe dodo, ari eko avanembo eraena.

<sup>22</sup> Nanda dubo jokámi, na God da Agho Dari ava uju eraena.

<sup>23</sup> Avata nanda fisi jokáda, na agho dari eni setena aimi eredo, God da Agho Dari nane uju eraena, ainghae dabade tataya eraira. Aimi na bundedo, Ari Eko da ungodá fiteari irá gheraena.

<sup>24-25</sup> Na makasi embo bekari! Nanda dubo mema teria eresufira.

Ainda beká mo: nanda dubo joká isambuimi, na God da Agho Dari uju eraena. Avata nanda fisi jokáda, na ari eko uju eraena. Ava sedo, mave foa na sonembari, fisi da ujuimi ambari budo refira, ava darigaeteni?

Avata, darigari da emboro mo Bajari Iesu Keriso fira afigusira. Na nune sonembetiri aindae, na jo nanda tamo a fisi eko ainghae dabade ambae arena! Aindae sedo, na God Afakena 'aiyakoe beká' re-sena.

## 8

*8:1-17 Asisi Kakara Aimi Sonembururari, Namonde Dubo Jama Itatamuse Irarera.*

<sup>1</sup> Avori, Iesu Keriso fira sonembetiri, evetu genembo mave Iesu Keriso de dabade tatedo irarera amo, ne Ari Eko da bouvu jo itatamuse, ainda mino jo bae arera.

<sup>2</sup> Ainda beká mo: God da Asisi namonde budo, Iesu Keriso de dabade tatedo jebuga muturaira aimi setiri, na Ari Eko nengae ambarighae da fakina darigedo buvurutuseni.

<sup>3</sup> Namondeda fisi joká gofedo irira ava sedo, God da Agho Dariimi namondeda jebuga bu furarikená jo inono ae usira. Ainda beká mo: namonde evetu genembo da fisi jokáda, eveva ari da fakina eni tefori. Nunda Agho Dari jo inono ae etirigido, God tofo mandi emingusira. Ari Eko da fakina de bejari dae sedo, nu nunda Mandi beká ava dirigitiri, nunda tamo fisi kau namonde evetu genembo ekoko da fisi a dubo joká avaga budo, genembo beká edo sirorusira.

<sup>4</sup> God amingusira da beká mo: nu uju erira amo, namonde nunda Agho Dari rea aoro dae resira ava, inononda use iraeteri. Na 'namonde' setena amo, namonde mave fisi da uju buregedo, nunda Asisi Kakara da amboda amboda eraera, aindae seteni.

<sup>5</sup> Evetu genembo mave fisi da uju use irera amo, nenda uju a kotari isambu, nenda fisi da uju aminda

muturaera. O, evetu genembo mave Asisi Kakara rea seraira, avanembo ningido amingeraera amo, nenda uju a kotari isambu, Asisi Kakarakena futuse nunda uju ava eraera.

<sup>6</sup> Mave nunda uju a kotari ava, fisi da uju aikená mutarira amo, nu fisi da uju ainda amboda amboda udo ya ambarira. O, mave nunda uju a kotari Asisi Kakarakena mutarira amo, nu Asisi Kakara da amboda amboda use, jebuga a dubo jama ava tambarira.

<sup>7</sup> Ai resira amo: evetu genembo mave nenda uju a kotari, sifo ghousa fisi da uju aikená fitiraera amo, ne kau God da gitofu aminga edo irera. Evetu genembo amo, ne God da Agho Dari jo kaifa ae eraera. A geka beká mo eviri: ne Agho Dari kaifa arikená jo inono iraeri.

<sup>8</sup> Ne fisi da uju ava use, God nendae sedo ivuga are dae sarera amo, jo inono ae arira.

<sup>9</sup> Avata kotugo, ne jo nenda fisi da uju use irae eraeva. Ne Asisi Kakara da uju ava ningido, aminguse ireva. Amo, Asisi Kakara nenda dubo jokáda irarira amo, ne aminguse irareva. O mave Keriso da Asisi jo bae irira amo, nu jo Keriso da tofo iraeri.

<sup>10</sup> Avori, Keriso nenda dubo jokáda irari, God nendae 'eveva' sarira amo, nenda asisi jebuga irarira. Ari Eko da fakinaimi, tamo ambarira. Avata nenda asisi jebuga irarira.

<sup>11</sup> Kotugo God setiri Iesu ambarida ghe jebuge erorusira. God daba ainda Asisi nenda dubo jokáda irarira amo, nune sari nenda tamo barago ambarida ghe jebuge erarira. Amo, nunda Asisi nenda dubo jokáda irira, aimi sarira.

<sup>12</sup> Avori, nanda nano namendi, God da Asisiimi rea sirurari ningarera, namonde ava arera. Avata namondeda fisi rejo uju eraira ava, namonde jo amingae arera.

<sup>13</sup> Ainda beká mo: ne fisi da uju ava use irareva amo, ambareva. O, Asisi Kakara da fakinaimi nenda fisi

da uju ava daovo ambarira amo, ne jebugareva.

<sup>14</sup> Evetu genembo mave God da Asisi da uju ava use irera amo, ne God da sasinguri.

<sup>15</sup> Ainda beká mo: God nunda Asisi futusira amo, nu jo, namonde sabua+ da kotari ava budo oju aoro dae sedo, mutaeri. Tefo. Namonde nunda sasingu aoro dae sedo, nunda Asisi mutiri budo, namonde Asisi da fakinaimi God Afakena eminge sise irera, “Eri, Afa, Afako!” sise irera.

<sup>16</sup> God da Asisi, nu namonde sonembeari namondeda dubo jokáda kasama eraera amo, namonde nunda sasinguri.

<sup>17</sup> Avori, namonde nunda sasingu edo irera aindae sedo, nunda esimbugari nunda natofokena mutari dae sisira ava, namonde barera. A kotugo, rea Keriso dae mutari sisira, ábarago Keriso de dabade barera. Avata namonde giti emingarera. Kau Keriso mema tafusira aminga ava, namonde Keriso de dabade tatedo mema tambarera. Namonde Keriso de dabade nunda usasa bari dae sedo, mema amo itatamarera.

*8:18-30 God Da Sasingu Amboda Usasa Jokáda Fefeturoro, Duro Arira.*

<sup>18</sup> Na erekotena: namonde enda eminda irise mema itatameraera amo, kitako bekári. O, God sari namonde amboda usasa jokáda fefeturoro duro arira amo, teria bekári. Jo mema endada itatameraera ainghae dabade, inono ari da kaugo iraeri.

<sup>19-22</sup> Eregoseva: utu, enda, a roera isambu God etiri sirorusira amo, mema tafuse aoro sise irira. Kau evetu mandi sasingu fumbari dae use mema tamburaira aminga ava, mema tafuse aoro sise irira. Ainda beká mo: God setiri, utu, enda, a roera isambu eko use jaghudo refira. Jo roera setena aimi, uju use eko ae usira. God nune setiri amingusira. Avata roera setena aimi, God nunda sasingu ijugari isagha arera ainda sifo, ava gigituse irira. God sari nunda sasingu ambarida ghe

jebugedo erarera da sifo ava gigituse irira. Gigituse irira ainda beká mo: kau God da sasingu nenda tamo enda eminda kae budo amburaera ava kosughe dodo, ambarida ghe jebugedo tamo evovodae irari ava barera aminga ava, utu enda God setiri jaghudo refira evia, udo ya kau eni edo evovodae irarira. Avata oroko mo, utu enda aoro sise irira.

<sup>23</sup> A kotugo, jo utu a enda nusuka aoro sise iraeri. Namonde mave bebede God da sasingu da tano, nunda Asisi rurusera aimi, namonde barago aoro sise irá gheraera. God sari namonde nunda sasingu beká edo, namondeda tamo seka barera, ainda sifo ava gigituse aoro sise irera.

<sup>24</sup> Avori, ava gigitero, God namonde sonembusira. Avata namonde rea gigituse irera ava foa buvari garera amo, jo sekago gigitae arera. Ai resira amo, mave nunda ujuá garira amo, nu redae gigituse irari?

<sup>25</sup> Avata namonde rea gigituse irera ava, jo foa isagha ari gae arera amo, namonde durumugedo gigituse irarera.

<sup>26</sup> Kau daba aminga ava, namonde fakina irae de ava gido, Asisi Kakara aimi namonde sonemberaira. Ainda beká mo: namonde rejodae benunu saetera ava, namonde bunariri. Avata Asisi Kakara tofo namondeda sedo banunguse, namondeda dubo jokáda aoro sise irá gheraira. Aoro sari amo, jo isagha siruroro ningari da kaugo iraeri.

<sup>27</sup> Asisi Kakara ai amingururari, God Afa evetu genembo da dubo joká giraira aimi, nune nunda Asisi da kotari kasama eraira. Nunda Asisi rejodae benunu seraira ava, nune kasama eraira. Ainda beká mo: Asisi Kakara God da natofodae sedo banungeraira amo, jo nunda kotariimi banungae eraira. Nu tofo God Afa da ujuimi banungeraira.

<sup>28</sup> Namonde kasama erera: evetu genembo mave God gatege aghi eari nu dubo buraera, aikena isambu eveva are dae sise, God seari roera

isasambu, eveva a eko rea siror-  
eraira ava, eveva vanembo eraira.

<sup>29</sup> God evetu genembo gategusira setena amo, ne jo sirorae irero, nu anakora ne kasama use, nunda Mandi da kau aminga ava aoro dae sedo, ne gategusira. Ainda tuka mo: God da ujuimi, nunda Mandi evetu genembo digari ainda koro ava nune aeti.

<sup>30</sup> Aindae sedo, evetu genembo nune gategusira, ava aghi usira. A evetu genembo aghi usira amo, nune budo nendae 'eveva' sisira. Kotugo evetu genembo aikena, nunda usasa futusira.

### *8:31-39 Keriso Da Dubo Bari Namondekena Jo Dadabae Arira.*

<sup>31</sup> Ava sedo, namonde kasama erera, God namonde sonembari dae sarira amo, mave jo buregae arira.

<sup>32</sup> Nu namonde sonembari dae sedo, tofo nunda Mandi ava, tefo namondedae sedo mutiri fira ambududurusira. Avo gido, namonde kasama erera: nu roera isambu kau daba ava namondekena tefo mutarira.

<sup>33</sup> God nu tofo mandi namondedae 'eveva' sisira. Ava sedo, namonde kasama erera: mave eniimi jo foa sekago namondedae 'eko' sari da kaugo iraeri.

<sup>34</sup> Iesu Keriso ambududurusira, o saone, ambarida ghe jebuge eredo, God da ungo gimanduda anumbirira aimi, nune tofo mandi Afakena namondeda ari ekoko kote doyare dae sedo, benunu sise irá gheraira. Ava sedo, namonde kasama erera: mave jo namondeda ari ekoko da mino namondekena mutari da kaugo iraeri.

<sup>35</sup> Ava sedo, namonde kasama erera: Keriso namonde dubo ruruse irarira. Nu jo doyae arira. Vevera a mema sirorari itatamarera, o evetu genembo God imboe use namonde daoro mema tambarera, o baimara sirorarira, o namonde makasi arera, o eko jokáda fetarera, o namonde ambarera, avata Keriso namonde dubo ruruse irarira.

<sup>36</sup> God da Geka aindae sise, eminge resira:

“Namane ni tumonderaera aindae sedo, ambariimi ojighira utua erira. Ambariimi namonde dabade evovodae deinghuse irira.

Kau evetu genembo sifi (sheep) dari dae simbugeraera aminga ava, evetu genembo namane dari dae kotise irá gheraera,”  
God da Geka nunda natofodae aminge resira.

<sup>37</sup> Avata Keriso namonde dubo ruruse ambududurusira aimi sonembeari, namonde fakina use, roera tegetena ava isambu atai fati fete gogoghombraera.

<sup>38</sup> Na kasama beká ava erena: Keriso namonde dubo ruruse irarira. Nu jo doyae arira. Nunda dubo bari namondekena muturaira ainda emboro ava, rejo eniimi jo gajae arira. Ambarera o jebuga irarera aimi, jo gajae arira. God da aneyaimi o Satan da aneyaimi o sukaruimi jo gajae arira. Rejo eni oroko refira o amboda furarira aimi, jo gajae arira.

<sup>39</sup> Utu enda God etiri sirorusira, ainda jokáda roera eniimi jo gajae arira. Amo, rejo eni ikáda irira o enda jokáda irira, ai barago emboro amo jo gajae arira. God namonde dubo ruruse, namondeda Bajari Iesu Keriso futusira, ainda dubo bari amo, namondekena evovodae irarira.

## 9

### *9:1-29 God Kau Nangedo, Evetu Genembo Gategeraira Amo Eviri.*

<sup>1</sup> Na Keriso da javoda geke beká resena. Geke resena emo, jo gungubo iraeri. Asisi Kakara namokena irira aimi, sonembiri nanda dubo jokáda itatamerena, emo geke bekári.

<sup>2</sup> Na, nanda natofo Israel embo, nanda ororo aindae, dubo mema use nanda dubo jokáda, evovodae mema ambarako ava itatamuse irena.

<sup>3</sup> Ne Keriso ighagha usera aindae, God nunda janje eko nemokena mutarira. Na aindae sedo dubo mema erena. Na Keriso da natofo dodo, nanda natofo Israel embo da vasa budo, God ne mema itatamaoro

dae sedo simbora usira ava, nane ambudo mema itatamaono ne jebugaetera amo, na ivuga aeteni.

<sup>4</sup> Ne eregoseva: God Israel embo ava anakora gategetiri, ne nunda natofo useri. Nune setiri ne nunda sasingu etero, nunda usasa a duro nemokena futusira. A kotugo, nunda Agho Dari nemokena futusira. Nu bekáda bekáda tumonde bainghari da emboro ava, nemokena ijugusira. Nunda beka gajari mendeni ava, nemokena futusira.

<sup>5</sup> Nombuamane binonde, Abraham, Isaac, a Jacob nunda sasingude, nemoá avavagori. A Keriso barago, genembo edo Israel embo ainda jokáda sirorusira. God nune roera isasambu bu jighirise kaifa eraira, nundae evovodae sakai sise ireore! Ai, bekári!+

<sup>6</sup> Avori, Israel embo isambu, ne jo God da sasingu beká edo iraeri. Avata, God da beka gajari Abraham kena gofusira, ava na jo sae arena.

<sup>7</sup> Kau daba aminga ava, God beka gagojuse Abraham kena rea mutari sisira ava, nunda sasingu jo isambuimi bae arera. God Abraham kena sisira, “Ninda sasingu a imemesiri digari mutari dae sisena amo, ninda mandi Isaac da sasingu aindae nembo mutari siseni.”

<sup>8</sup> Aminge sisira da tuka mo: Abraham da imemesiri isambu, ne jo God da natofo iraeri. Sasingu God beka gajedo mutari dae sisira, aimi nembo nunda natofo edo irera.

<sup>9</sup> Ainda beká mo: God beka gagojuse, eminge sisira, “Sifo foa buvari gido, na jovereghe foa sonembururono, Sarah mandiá fumbarira.” Aminge sisira amo, nu Abraham da evevetu mendeni da sasingudae jo saeri.

<sup>10</sup> Geka eni mo eviri. Genembo eni javo Isaac noaro Rebecca ava fitiri, nu vide jamena etoto naká takegha fufusira.

<sup>11-12</sup> Sasingu etoto naká ava jo siroredo, eveva o eko eni jo ae irero ainda sifoda, God nunda fakina a kasama kau nangego a nunda

gategari kau nangego ava ijugari is-  
 agha are dae sedo, Rebecca kena eminge sisira, “Ninda mandi ambo aimi vitido, bego da bajari ava nune barira.” Aminge sise, nu ijugusira: mandi ambo viti bajari barira da susu mo, jo sasingu da irari o nenda ari eni iraeri. God nunda uju ava use, mandi amboá aghi usira; aindae sedo, bajari mutiri rurusira.

<sup>13</sup> God da Geka Rebecca da sasingu aindae sise, eminge resira:

“Jacob na dubo rurusena avata, Esau na imboe useni,”  
 aminge resira.

<sup>14</sup> Avori, geka amo ningi kotise, erá eminge seove! “God jo inononda ae eraira,” erá aminge seove!

<sup>15</sup> Geka ainda beká ava, nu Moses kena ijugetiri kasama usira. Ijuguse, eminge sisira, “Na genembo ningiá uju arena aindae, na joka arena, a mavejo ava uju arena aindae, dubo mema use sonembarena,” aminge sisira.

<sup>16</sup> God jo evetu genembo da uju o nenda irari ava kotise ne aghi ae eraira; nu nunda uju ava use, joka edo ne aghi eraira.

<sup>17</sup> Ava ijuguse, God da Geka Egypt embo da kini (king), (o Fero sedo ghusera,) aindae resira. “Nane seteno ni kini (king) usesa da beká mo eviri: nanda fakina ijugaono kasama aso dae sedo, a enda da natofo isambu nanda bino ava kasama aoro dae sedo, seteno ni kini (king) usesi,” aminge sisira.

<sup>18</sup> Ava sedo, God uju arira amo, genembo enidae joka arira. O uju arira amo, God nune ururari genembo eni gogore edo dubo jo jovereghae arira.

<sup>19-20</sup> O nenda eni eredo eminge saetira, “Paul, ni setesa aindae resena. God da uju amo, jo evetu genemboimi buregari da kaugo iraeri. Ava sedo, God redae namonde ijujari? Nunda uju ava eraira ava sedo, jo namonde ijujae aeti,” aminge saetira amo, jo eveva iraeri. Nu taká genembori. Nu jo eredo, God kena

mino eni jo sae aeti. Aminge sae-tira amo, nu inono: okia eniimi eredo, okia jighari katokena ategi aetira, “Ni redae na kau emingeteso siroreteni?” Aminge ategi aetira amo, jo inono iraeri.

<sup>21</sup> Okia jighari kato amo, nu nunda uju ava arira. Sifo eninda, nu enda budo enda daba aimi, okia etoto naká ava arira. Eni mo, okia garigo koana da kaugo ava arira, a eni mo, taká bayau itari da okia ava arira. Amo avori. Nu bajariri.

<sup>22</sup> Kotugo, God nu kau daba avori. Nu nunda fakina a janje eko ava ijugari dae sedo, nu durumuguse, evetu genembo, mavedae janje eko use dari dae esimbugusira ava, jo totoi dari ambaeri.

<sup>23</sup> Kotugo kau daba aminga ava, nu namonde mavedae joka edo, nunda usasa garigo ava ijugari baoro dae sedo uju usira amo, ne esimbugusira. Esimbugedo, nunda usasa ava futusira.

<sup>24</sup> Namonde nune gategusira. ‘Namonde’ resena emo, mave Jusi embo da jokáda a namane Jusi embo da gitofu ainda jokáda gategusira, ain-dae resena.

<sup>25</sup> God namane Jusi embo da gitofu gategedo, nunda natofo aovo dae sisira. Ava jo ae irise, nu setiri nunda feroveta javo Hosea, nunda buku jokáda eminge gefusira:

“Evetu genembo mendeni, ne giti nanda natofo jo ae iriara andae, amboda ‘ne nanda natofo’ sarena.

A kotugo oro eni, giti na jo dubo bae usena ava, amboda nendae, ‘ne nanda dubo bari natofo’ sarena.

<sup>26</sup> A reighi eni aminda siseni, ‘Ne jo nanda natofo ae ireva,’ siseni. Reighi daba aminda,

na amboda sarena, ‘God jebuga irari, amo namori, Ne nanda sasin-guri,’ sarena.”

Hosea namanenda gitofudae geka aminge sisira.

<sup>27</sup> Kotugo God da feroveta eni javo Isaiah, namane Jusi embodae sise, eminge gefusira:

“Israel embo da natofo, ne eva da ghousesa avaga irarera tano, avata daba daba aimi jebuga tambarera.

<sup>28</sup> Ai resira amo: God evetu genembo isambu endada irera, nenda irari da mino ava, totoi foa mutari dadabarira.”

Isaiah aminge sisira.

<sup>29</sup> Kotugo Isaiah daba aimi, vasa eninda geka evia gefuse sisira:

“God Fakina Kato Beká jo joka use, namondekena imemesiri daba daba doyari

jebuga irae aetera amo, namondeda oro anakora sirivo tefo aeteri.

Kau reighi Sodom embo a Gomora embo sirivo e tefo usera, aminga ava aeteri.”

Isaiah aminge gefusira amo, namane Jusi embo oroko irera aikena, rea sirorumutara ava kotise, aminge gefusira.

### *9:30—10:21 Israel Embo Daba Daba, Ne Iesu Da Bino Ava Ningi Tumonduseri.*

<sup>30</sup> Avori, geka setena ainda tuka mo eviri. Namanenda gitofu giti God da kotari eveva jo tavo e gogoghom-bae edo ghusera aimi, tumondero gido, God nendae ‘eveva’ sisira.

<sup>31</sup> O nanda natofo Jusi embo God tofo mandi gategusira aimi, God nendae ‘eveva’ sare dae sedo, nunda Agho Dari da amboda amboda use, jebuga kosasaghuseri.

<sup>32</sup> Redae jebuga kosasaghuseri? Ainda beká mo: ne totofo nenda ariimi, jebuga tava edo ghuseri. Avata jo nenda tumondariimi, tava ae edo ghuseri. God nunda Geka jokáda, ‘ghamana emboroda fitari atada dimbari durari’ sisira aimi, atada dimbiri ne duduruguseri. Ghamana fitari sisira amo, Iesu dae sisira.

<sup>33</sup> God da Geka setena, eminge re-sira:



“Givu! Enda jiro fumbari Saion+ aminda, na ghamana eni emboroda fitono, evetu genembo ya foa ghuroro, atada dimbari durarera. A kotugo, evetu genembo aimi atada dari gofe ya du fasarera. Avata mave ghamana resena ava tumondarira amo, nu jo aindae meka gae arira,” aminge sisira.

## 10

<sup>1</sup> Nanda nano namendi, nanda ghamo joká isambuimi na uju beká ava erena, nanda natofo, Israel embo isambu, jebuga tambaeteri. Na nendae sedo God kena banunguse irá gheraena.

<sup>2</sup> Na nendae geka beká ava osa sari dae erena: ne God dae uju beká ava eraera. Avata ne God tumonde bainghari da emboro beká ava, jo kasama edo diti basaeri.

<sup>3-4</sup> Na aminge resena da beká mo: Keriso fira buviri gido, Agho Dari da emboro+ God kena amo gagojusira. Ava sedo, oroko mave Iesu tumondarira amo, God nundae ‘eveva’ sarira. O mave Iesu jo tumondae irise, Agho Dari avanembo kaifa ari dae e garira amo, nu God jo tambae arira. Avori, nanda natofo Jusi embo, ne tumondari da emboro+ amo jo kasama ae irise, totofo nenda emboro eni God kena afigari dae siseri. Aminguse, ne God da emboro nune simbugusira ava, nene ighagha useri.

<sup>5</sup> Moses gefusira amo: God da Agho Dari rea resira ava, mave amingarira aimi, nu jebugarira.

<sup>6</sup> Avata mave tumondari da emboroda+ ise God kena buvari dae sarira aindae, God da Geka jokáda eminge resira:

“Erá nenda dubo jokáda eminge koteove, ‘Mave utuda viti ya bari?’ aminge erá seove!”

(Geka aminge saetera amo, inono namonde viti ya Keriso utuda tava aeteri. Avata namonde jo viti ya, Keriso utuda tava ae arera.)

<sup>7</sup> A vasa eninda resira:

“A kotugo, erá eminge seove, ‘Mave enda jokáda vose ya bari?’ aminge erá seove!”

(Geka aminge saetera amo, inono, namonde Keriso ambari embo jokáda tava edo budo furaeteri. Avata namonde Keriso jo ambari embo da jokáda tava ae arera.)

<sup>8</sup> Namonde nange God kena ya buvaetera, aindae emboro ava ijuguse, God da Geka eminge resira:

“God da Geka nemokena utua bekári, nenda békada a nenda dubo jokáda irira.”

God da Geka aminge sise, ‘geka’ resira emo, a kotugo namane nene tumondaovo dae sedo, geka vironu sise irá gheraera amo, geka daba avori.

<sup>9</sup> Aindae beká mo: ne nenda bekaimi, “Iesu mo, nu nanda Bajariri,” sise, nenda dubo jokáda eminge kotise irareva, “God setiri Iesu ambarida ghe jebuge erorusira amo, geka bekári,” aminge sise a kotise irareva amo, jebuga evovodae irari ava tuve bareva.

<sup>10</sup> Ai resira amo: namondeda dubo jokámi tumondarera amo, God ava gido namondedae ‘eveva’ sarira. A beka afige, namonde tumonderaera ava osa siruroro ningarira amo, God jebuga evovodae irari ava mutari namonde barera.

<sup>11</sup> Mave Iesu tumonduse irá gheraera aindae, God da Geka eminge resira:

“Mave nu tumonduse irira amo, nu meka jo gae arira,” aminge resira.

<sup>12</sup> Geka aminge resira amo, nu evetu genembo isambudae resira. Aindae beká mo: namane Jusi embo a namanenda gitofu kau daba avori. Jo dombu eni iraeri. Namonde isambu, namondeda Bajari dabako aimi kaifa eraira. Evetu genembo mave numokena kori sarera amo, Bajari nune ne isambu esimbuge gogoghombarira.

<sup>13</sup> A kotugo, God da Geka aindae eminge resira:

“Evetu genembo mave nundae javono gatise, ‘Arie, nanda Bajari!’ sarera amo, ne jebuga evovodae irari ava tuve barera,”

God da Geka aminge resira.

<sup>14</sup> Avata evetu genembo mave nu jo tumondae irera amo, ne numokena kori jo sae arera. A kotugo, mave nunda Bino jo ningae irera amo, ne nange nu tumondareri? Kotugo aghi kakato jo ya ainda Bino ava, vironu sae arera amo, ne nange ningareri?

<sup>15</sup> A kau daba aminga ava, aghi kakato jo dirigaoro yae arera amo, ne jo ya vironu sae arera. God da Geka aindae eminge resira:

“Aghi kakato bino eveva bu foga gheraera amo, natofo ivuga use nati joká deraera,”

aminge resira.

<sup>16</sup> Avata kotugo God da Bino Eveva ava, jo isambui ningi tumondae useri. Ava kotise, feroveta Isaiah, nu God da Geka ainda jokáda eminge gefusira:

“Bajari, namondeda geke ava, mave eniimi jo ningido tumondaeri,”

aminge sisira.

<sup>17</sup> Ava sedo, namonde eregosera: tumondari mo, bino ningarikená siro-rarira. Kotugo Keriso da Bino ava, vironu sarera amo, mendeni ainda bino ava ningarera.

<sup>18</sup> Avata na ategi erena. Evetu genembo mendeni seraera, “Namane Keriso da Bino jo ningae irera.” Amo, ne geke beká seraera, ai? Kote givu! Amo jo geke beká iraeri. Ne anakora nininguseri. God da Geka aindae eminge resira:

“Ne beka sero, evetu genembo endada irera, isambu nininguseri.”

Nenda geke ava setero, ivegedo iri reighi isambu nininguseri,”

aminge resira.

<sup>19</sup> Avori, na sekago ategi erena. Amo, namanenda natofo Israel embo aindae sise, ategi erena. Israel embo,

nene eminge saeteri, “God da Bino, namanenda gitofuimi ningi kasama use tumonderaera ava, namane jo ningi kasama ae irera.” Aminge saetera amo, geke beká iraetira, ai? Kote givu! Amo jo geke beká iraeri. Moses nu tofo mandi giti beká, nenda ategi ainda mino eminge sisira,

“Na nenda gitofu mendeni, makasi da kaugo eraera ava, joka edo sonembarena. Ne sonembururono gosuse, ne bengoso areva.

Kau daba aminga ava, na nenda gitofu mendeni, ari kotae kotae eraera ava,

joka edo sonembarena. Ne sonembururono gido, ne janje eko areva,”

Moses aminge gefusira.

<sup>20</sup> Kotugo Isaiah geke isagha beká eminge sisira:

“Evetu genembo na jo tava ae edo ghusera aimi, na tafuseri.

Natofo nandae sedo jo ategi ae edo ghusera, aikená isagha eteno gosuseri.”

Nu nanda natofo Israel embo da gitofudae, aminge gefusira.

<sup>21</sup> O, Isaiah nanda natofo Israel embo kotise, eminge sisira:

“Na nemo sonembari dae sedo, kori sise iriani.

Avata ne nanda geke jo ningae edo, beisiga use na ighagha useri,”

Isaiah Israel embodae aminge gefusira.

## 11

*11:1-12 God Israel Embo Daba Daba Sonembetiri, Jebuga Tafuseri.*

<sup>1</sup> Avori, na geke fakarago seteni. Avata na jo eminge sae arena, ‘God nunda natofo ighagha usira,’ ava na jo sae arena. Na tofo mandi Abraham da imendi, Israel embo da genembo eniri. Na Israel embo da oro Benjamin ondi da eniri.

<sup>2</sup> God nunda natofo anakora gategusira ava, nu jo ighagha aeri. God da Geka jokáda vasa eninda, Elijah anakora Israel embodae Bajarikena

indiga use sisira, ava ne kasama ereva. Elijah eminge sisira:

<sup>3</sup> “Bajari, Israel embo mo, ne ninda olta (altar) de bejedo, ninda feroveta detero sirivo useri.

Amingetero, na nasuka irena. Avata kotugo, nambarago dari dae erekotera,”

nu aminge sisira.

<sup>4</sup> Avata Bajari numokena mino eminge sisira:

“Nanda totofo irore dae sedo, na gegenembo 7,000 ava kaifa eno, gode eni javo Baal

ainda dombuda, jo ya kauboi dadarigedo tumonde bainghae irera,”

aminge sisira.

<sup>5</sup> Oroko emo, kau daba aminga ava eresufira. God nu joka use, evetu genembo daba daba gatededo, kaifa iri ne jebuga tafuse irera.

<sup>6</sup> Kotugo God da joka ari resena emo, kote givu! God joka usira amo, jo nenda ari eveva eni edo ghusera aindae, nu jo joka aeri. Nu nendae sedo tefo joka usira. Ainda beká mo: namonde ari eveva ururoro gido, God kavevera aetira aindae mo, jo kavevera ari sae aeteri.

<sup>7</sup> Avori, Israel embo ne isambu, God a nunda jebuga tava edo ghusera avata, jo ne isambu tambaeri. Amo, God nenda jokáda evetu genembo daba daba gategusira aimi, jebuga tafuseri. O Israel embo mendeni mo, nenda munju fakara etiri, ne God da kori jo ningae useri.

<sup>8</sup> God da Geka aindae eminge resira:

“Sifo ai tano ghedo refira eminda, God setiri nenda kotari fure gajedo, diti digoi edo, dengoro gajedo ghetiri irero refira,”

aminge resira.

<sup>9</sup> Kotugo David kau daba aminga ava sisira:

“Na uju erena amo, ne God kotae irise, nenda kirumo rise God da vagho jokáda teraeteri,

a kotugo ne gofedo, nenda ari ekoko da mino itatamuse fumbaetera ava na uju erena.

<sup>10</sup> A kotugo na uju erena amo, ne diti digoi ari irise, gofe dudo ghuse, evovodae nenda bouvu fufudo yaeteri,”

David aminge gefusira.

<sup>11</sup> Oroko nembo setena ava kotovo dae sise ategi erena. Jusi embo ne atada dimbiri dudurusera amo, ne amboro dadabare dae sedo aminguseri, ai? Kote givu! Tefori. Amo nu, nanda natofo Jusi embo ari ekoko use gofetero aimi, namanenda gitofu jebuga tafuseri. Jusi embo da gitofu jebuga tafusera da susu mo: Jusi embo dubo mema use janje ekoko aoro dae sedo, God setiri aminguseri.

<sup>12</sup> Avori, Jusi embo ne dara usera ainda jokáda, enda da natofo jebuga ruruseri. A ne gofusera aindae, nenda gitofu God da esimbugari ruruseri. Avata esimbugari gitofui rurusera amo, kitakori. O Jusi embo dubo jovereghari, nenda gitofude dabade tatedo foa God da natofo edo irarera amo, esimbugari mindafu beká ava sirorarira.

*11:13-24 Namonde Erá Gogore Eore Dae Sise, Paul Geka Evia Sisira.*

<sup>13</sup> Jusi embo da geka seteno dadabetira. Avori, na oroko jovereghe namanenda gitofukena geka sari dae erena, ningivu! Na ya nemokena vironu saono dae sedo, God na gategusira. Afa nendae saramana teria futusira aindae, na aiyakoe beká resena.

<sup>14</sup> Nanda uju mo, Jusi embo da gitofukena Bino Eveva evia ijugururono gido, nanda natofo Jusi embo mendeni, nange nenda ghamo derono erari bengoso edo, kote gogoghombuse, jebuga tambaeteri tano.

<sup>15</sup> Eregoseva: God nanda natofo Jusi embo avóda doriri, enda da natofo mendeni God de dabade mainungosuseri. Kotugo nunda natofo ighagha usira ainda sifoda, esimbugari itako sirorusira. O God sekago nanda natofo Jusi embo budo, jebuga mutari sarira amo, kau evetu genembo ambarida ghe ere

jebugaetera, ainda kaugo ava arira. Sifo aminda ivuga a esimbugari teriagio sirorarira.

<sup>16</sup> Avori, namonde farava esimbugedo, mendeni bu God kena mutoro nunda tofo arira amo, inono mo, namondeda farava ava isambu, mutoro God da tofo arira. Kau daba aminga ava, namonde ika eni ainda besisi a susu God kena mutarera amo, ifu a fafatu barago, God da tofo arira.

<sup>17</sup> Emo, na ika orivi (olive) da kasia ava sari dae erena. Jusi embo mo, ne kau ika orivi eveva evetu genembo aimi kaifa eraera, ainda kaurori. O gitofu mo, ne kau ika orivi eko, taimada vitiraira, ainda kaurori. Avori, oroko mo, God ika orivi eveva ainda fafatu mendeni jighi jore fuggedo, taima da orivi ainda fafatu mendeni budo, orivi eveva ainda susuda faka fitido, aminda dighiri takegha e fetetira. Avori, orivi eko setena amo, na namane Jusi embo da gitofudae seteni. Gitofu resena emo, nendae resena. Ne oroko orivi (olive) eveva, ainda fakina a eveva ava buraeva.

<sup>18</sup> Avata erama totofo sakai sise, ika eveva da fafatu ava de jorisira andae, dere jireove! Ne taká fafaturi. Ne jo susu iraeri. Nenda fakina mo, ne susukena buraeva.

<sup>19</sup> A erá eminge seove, “Na nenda vasa baono dae sedo, God fafatu mendeni<sup>19</sup> ava jighi jore fuggedo, na fitiri takegha useni. Ava sedo, ne veveyakori. Na mindafuri,” aminge erá seove!

<sup>20</sup> Geka emo geka bekári. Jusi embo ne jo tumondae usera andae sedo, God ne jighi jore fugutusira. Avata ne fitiri ireva ainda beká mo: ne tumonduse ireva. Susu eni tefori. Ava sedo, erama gogore use totofo sakai seove! Ne igheghi use, tumonduse irareva.

<sup>21</sup> Ainda beká mo: God nunda natofo beká giti gategusira amo, kau fafatu aminga ava jighi jore fugutusira. Ava sedo, ne nenda tu-

mondari doyareva amo, nembarago jighi jore fugarira.

<sup>22</sup> God amingusira ainda jokáda, nunda kavevera eari giraeva, kotugo nu nange ari ekoko ijujedo mino muturaira, ainda aito barago giraeva. Evetu genembo gofusera, aikena fakarago usira. O nomena kavevera etiri ava gosuse ireva. Ne tumonduse irareva amo, nunda kavevera ainda jokáda irareva. O jo amingae areva amo, nembarago jighi jore fugarira.

<sup>23</sup> Avata nanda natofo Jusi embo mo, sekago tuturo edo tumondarera amo, God ne sekago totofo nenda vasada fitiri fetarera. God amingarikena, nu inono bekári.

<sup>24</sup> Erá andae sedo dudukugheove! Ainda beká mo: ne kau taima da orivi (olive), ava seteni. God ne gafuge budo, nenda irari manai a nenda kau manai buregedo, ne fitiri nunda susu eveva aminda takegha usevu. Avata God amingusira amo, fakarago ava usira. O, nu sekago Jusi embo budo, totofo nenda vasa a susu aminda fitiri fetarikena mo inonori. Amingari mo, raugakori.

### *11:25-32 God Nu Evetu Genembo Isambukena Joka Eraira.*

<sup>25</sup> Geka setena avata, kotugo sekago sari dae erena. Geka emo itako jungariri. Avata erá gogore use, ‘Namane evevari,’ seove! Aminge setena ainda beká, oroko ijugari dae erena. Amo eviri: Israel embo mendeni gogore use, munju fakara etiri irera amo, ne jo evovodae aminguse irae arera. God nanda natofo Jusi embo da gitofu mave tumondarira, ava gosurari ne ya inono arera amo, God da sonemba nanda natofokena sekago mutari furarira.

<sup>26</sup> Ainda sonemba nange Israel embokena furari barera andae, God da Geka jokáda eminge resira:

“Doriri Saion+ ghedo, Sonemba kato foa, Jacob da imemesiri da ari ekoko isambu ava bu fugarera.

<sup>19</sup> 11:19: Paul ‘fafatu mendeni’ resira emo, nu Jusi embo mendenidae sise resira.

27 Na nenda ari ekoko bu fugutuse beka gajari evia arena, sifo aminda nenda ari ekoko bu fugarena,” aminge resira.

28 Oroko mo, Jusi embo digari, ne God da Bino Eveva ava imboe eraera. Aminguse, ne God kena gitofu arigeraera. Kotugo God nu aindae sedo, Jusi embo do darigedo, nunda sonemba nemokena mutiri rurusevu. Avata God nanda natofo Jusi embo da abuamane dubo ruruse, nunda natofo aore dae sedo gategusira. Ava sedo, nu nendae jo gitofu sae arira.

29 Ainda beká mo: God nu mavejoá aghi ari dae sarira amo, nune aghi arira. A nu mavejoá esimbugari dae sarira amo, nune esimbugarira.

30 Ne giti God da Geka jo ningae edo ghusevu. Avata Jusi embo, God da Geka ighagha edo jo ningae usera aindae sedo, God oroko, ne Jusi embo da gitofudae sedo joka eari itatameraeva.

31 Avori, kau ne giti God da Geka jo ningae edo ghuseva aminga ava, Jusi embo oroko God da Geka jo ningae eraera. Kotugo Jusi embo God da Geka jo ningae edo ghusera aindae sedo, God nendae joka use, sonemba muteari buraeva. Ágido, Jusi embo barago dubo jovereghara amo, God nendae joka arira.

32 Ai resira amo: God namonde evetu genembo isambu inononda joka ari dae sise, ungo sokimbetiri, namonde ari ekokoimi bundetiri irera.

### *11:33-36 God Teria Beká Ava Kotise, Sakai Saore!*

33 God da esimbugari a kavevera ari, teria bekári! Nunda dubo kotari a kasama barago, jo mave eniimi kasama ari da kaugo iraeri! Nunda ijajari a nunda aito fugari barago, jo mave eniimi kasama ari da kaugo iraeri!

34 Nunda Geka aindae eminge resira: “Mave jo Bajari da kotari kasama aeri. Numokena mave jo dengoro indae arira.

35 Jo genembo enii, mino God kena bari dae sise, numokena joba mutari da kaugo iraeri,” aminge resira.

36 Ainda beká mo: roera isasambu nune etiri sirorusira, a nunda fakinaimi irira. A kotugo, nunda duro a binodae sedo irira. Numokena duro a usasa evovodae irare! Ai, bekári!+

## 12

### *12:1-21 Namonde Dubo God Kena Futuse Irarera.*

1 Avori, nanda nano namendi, God namondekena joka mindafu usira aindae eminge resena. Totofo nemoá God kena mutuvu! Kau evetu genembo giti sino fuka de ojedo, joba God kena dungeoro avi dadabe gogoghombedo ghusera aminga ava, totofo nemoá God kena mutuvu! Nu nenda irari a saramana gido, ivuga are dae sedo, dubo isambu numokena futuse, nunda uju avanembo e gogoghombuse irareva. Amo asisi tumonde bainghari da emboro bekári.

2 Erá evetu genembo mave fisi da uju use irera, ainda amboda amboda eove! Ari amo dodo, nenda kotari God da ungodae fitovo, nune ari nenda dubo jóká jovereghe kau eni beká ava arira. Amingari, ne God da uju ava kasama areva. Amo, nu rea uju eraira, a reja ava aovo dae seraira, ava kasama areva. A kotugo, eveva mo rejori, rea aoro nu riria ari, a ari inono a dambu beká mo rejori, ava ne kasama areva.

3 Dengoro indono ningovo dae sedo, God nunda sonemba namokena futusira. Ava sedo, na nemokena resena: ne totofo kau mavega ava kotise, erá totofo nemoá jigheóvo ereure! Totofo nenda kau mavega ava, nenda eveva a nenda eko ava, durumuge kotise, God nemokena tumondari da fakina reja futusira, ava kasama areva.

4 Namonde totofo namondeda tamo kotore! Namondeda tamo da roera nunda nundari, avata tamo nu teria dabakori. A kotugo, tamo da

roera ainda saramana barago nunda nundari.

<sup>5</sup> Kau daba aminga ava, namonde evetu genembo digari avata, namonde dabade tatedo, Keriso de tamo dabako edo irera. Amingedo, namonde nunda tamo da fafatu mendeni edo irera.

<sup>6</sup> A kotugo God namondekena joba a fakina nunda nunda futusira aimi, namonde saramana use iraeteri. Ava sedo, nimokena feroveta da saramana futusira amo, nu geka sirurari ningido, ninda tumondari kau mavega eresufira ava gido, osa saresa.

<sup>7</sup> O nimokena, evetu genembo tavo use, sonembari da fakina ava futusira amo, ni amingaresa. O nimokena dengoro indaso dae sedo, fakina futusira amo, ni ava aresa.

<sup>8</sup> Nimokena evetu genembo da ghamo deraso fakina baoro dae sedo, fakina ava futusira amo, ni amingaresa. O ninda moniimi evetu genembo sonembaso dae sedo, fakina futusira amo, ni mutu gogoghombaso, inononda barera. O saramana da giti jighari aso dae sedo, munju eveva futusira amo, ni dubo kotise, saramana e gogoghombaresa. O makasi embokena joka edo sonembaso dae sedo, fakina futusira amo, ghamo ivugaghae amingaresa.

<sup>9</sup> Erá tefo dubo barigo eove! Dubo bu gogoghombevu! Ari a geka ekoko imboe evu! Ari a geka eveva bu jighi gogoghombuse irivu.

<sup>10</sup> Ne Keriso da natofo edo, kau nano namendi tini dabako da kaugo usevu. Ava sedo, kau nano namendi eveva tofo tofo dubo buraera aminga ava, tofo tofo dubo ruruse irareva. A nano namendi minonde minonde kakara e gogoghombuse, durumugedo irivu!

<sup>11</sup> Saramana e gogoghombevu! Erama imboeghae eove! Asisi Kakara nenda dubo jokáda saramana ururari, ne God dubo ruruse, numokena dubo isambu futuse irivu! Bajari da uju ava use irivu!

<sup>12</sup> Ne amboda God da usasa bareva aindae, gigituse ivugaghae irivu!

Mema tafuse, durumuguse evovodae banunguse irivu.

<sup>13</sup> Nenda roera nano namendi makasi embo ainde soro use irareva. Esa embo furarera amo, nati joká dedo, sevu, nenda kamboda foa aviroro tavo aove!

<sup>14</sup> Evetu genembo mendeni God imboe eraera aimi, nemokena fakarago eoro itatameraeva. Avata ne jo, God ne dari ghamo baoro dae sedo, benunu sae areva. God ne nange nange esimbugaetira aindae benunu sareva.

<sup>15</sup> Evetu genembo mave ivuga use irera ainde dabade, ivuga use irivu! O evetu genembo mave mema tafuse irera ainde dabade, nenda bouvu ava fumbareva.

<sup>16</sup> Dubo dabako edo irareva! Erama gogore use, totofo sakai seove! Sabua edo aghi use irivu! Erama, "Namane dubo kotari kakatori," sise gogore eove!

<sup>17</sup> Evetu genembo mendeni nemokena dara arera amo, erama mino ari dae use, ari eko eove! Edo gido, kotofu da irari ava natofo da dombuda ururovo garera.

<sup>18</sup> Ne evetu genembo isambude dubo jamaghae irari dae sedo, nenda fakina ava edo gaetevu!

<sup>19</sup> Erá, dara evetu genembo mendeniimi nemokena arera, ainda mino eove! Amo dovu, God nu tofo mandi ainda mino nune arira. Nunda Geka aindae eminge resira:

"Bajari resira, 'Dara da mino mo, nane arena. Saramana amo, nanda tofori,' aminge resira.

<sup>20</sup> Kotugo vasa eninda, God da Geka emingaoro dae resira:

"Ninda gitofu ighoi itatamarira amo, bayau mutaso mindarira. Dubo sagharira amo, uvu mutaso mindarira.

Amingururaso, nunda dubo jokáda mema mindafugo ava itatamarira.

Ainda beká mo: nu dara nimokena arira avata ainda mino mo, ni veka eveva use, esimbuguse iraresa,"

God da Geka aminge resira.

<sup>21</sup> Ava sedo erá, evetu genembo mendeni ari ekoko eraera aindae gofeóvo, Ari Eko imi nenda bajari eure! Ari eveva avanembo ururuvu, ari ekoko ya dadabare!

## 13

### *13:1-7 Namonde Gavana Da Geka Ningarera, Ainda Tuka Mo Eviri.*

<sup>1</sup> Ne isasambu, gavana da geka ningareva. Ainda beká mo: gavana isasambu irera ainda susu mo, God numori. Nu jo 'avori' sae arira amo, gavana jo fetae arira.

<sup>2</sup> Ava sedo, gavana oroko nemo-kenka irira ainda geka ava, mave buregarira amo, inono, nu God ava buregarira. Ainda tuka mo: God setiri gavana sirorusira. Ava sedo, mave eniimi gavana buregarira amo, God amboda aindae, nu ijujarira.

<sup>3</sup> Ainda beká mo: evetu genembo mave ari eveva use irera amo, ne gavana aindae jo oju ae eraera. O evetu genembo mave ari ekoko eraera, ne gavana da fakina aindae oju use irera. Ava sedo, ne gavanadae jo oju ae areva amo, veka eveva use irovo, gavanaimi nendae sakai sarira.

<sup>4</sup> Ne eregoseva: nenda evevadae, a nemo sonembaoro dae sedo, God setiri gavana fefetusira. Avata ne dara areva amo, ne gavanadae oju areva. Ainda beká mo: gavana da fakina irira. Nu God da saramana katori. Ava sedo, mave dara eraera amo, God da janje eko nemokena ijugeari giraera.

<sup>5</sup> Ava sedo, namonde gavana da geka ningarera. Avata namonde gavana da geka ningarera amo, jo tefo God da janje eko darigari dae sedo ae arera. Namonde dubo jokáda tofo itatameraera, ari eveva rejo a ari eko rejo, ava itatamuse gavana da geka ningarera.

<sup>6</sup> Ne susu daba aindae sedo takesi omburaeva. Gavana saramana use, God da saramana barago eraira.

<sup>7</sup> Ava sedo, gavana rea aovo dae sarira amo, amingareva. Takesi ningiava mutovo dae sarira amo, mutareva. Moni a roera mendeni mutovo dae sarira ábarago, mutareva. Gavana kakara use, nunda geka ningareva, a kaka use igheghi areva.

### *13:8-14 Namonde Tofo Tofo Dubo Barera.*

<sup>8</sup> Erá nenda komanakena roera se budo, mino mutae, ghousa futo iri-ove! Totoi mutuvu, nenda bouvu dadabare! Bouvu dabako fufudo yareva amo, dubo bariri. Sifo ghousa tofo tofo dubo ruruse irivu! Mave nunda komana dubo ruruse irarira amo, nu Agho Dari da geka inononda use irarira.

<sup>9</sup> Ne eregoseva: Agho Dari eminge resira:

“Erá yagera eove! Erá komana deóvo ambeure! Erá bagia eove! Erá dighighi eove!”

aminge resira. Kotugo geka setena ava, a geka mendeni ainda susu mo dabakori. Amo dubo bariri. Aindae Agho Dariimi eminge resira:

“Ni tofo dubo buraesa, kau daba ava, ninda komana dubo baresa!” Amingareva amo, Agho Dari da geka mendeni oroko setena ava, isambu inononda use irareva.

<sup>10</sup> Mave nunda komana dubo ruruse irarira amo, nunda komanakena dara eni jo ae arira. Na aindae seteni: Agho Dari da geka inononda ari da emboro amo, dubo bariri.

<sup>11</sup> Nane setena ava areva. Ainda beká mo: namonde jebuga evovodaev irari ava bari da sifo ojighira utua erira. Ava sedo, diti fangovo dae sise resena. Namonde giti tumondusera amo, jebuga bari da sifo jo foa utua ae iriri tumonduseri. Oroko ojira utua erira.

<sup>12</sup> Tumba ojira dadabiri, oroko sifo seka ojira atari dae utua erira. Ava sedo, tumba da irari amo, imboe e doyore! Dodo, usasa da ambí goroba ava bu jighirise, ari eveva avanembo use irore!

<sup>13</sup> Avori, evetu genembo iji usasada deingheraera amo, ne jo

kirumo jokáda uvu fakara rise, kotae kotae ae eraera, jo kombo yagera ae eraera, a jo komana da roera aindae dighighi use tataya ae eraera. Ava sedo, namonde usasada deinghuse jo amingae arera.

<sup>14</sup> Nenda tamo fisi da uju ainda emboro jo rerebae areva. Amo dotutuse, Bajari Iesu Keriso ava nenda beredae sedo bu jighi fetareva. Amo kau nenda ambí gorobari.

## 14

### *14:1-12 Komanada Irari Erá Ijujeose!*

<sup>1</sup> Nenda nano namendi mave, nunda tumondari jo inono ae arira amo, jo ighagha ae areva. Nu nati joká dedo, unumbaovo foa ekaresia+ jokáda terarira. Avata nunda tumondari ningiaminda eredifira aindae, erá beisiga eove!

<sup>2</sup> Ainda geka eni mo eviri: evetu genembo mendeni, God nu roera isambu da Bajari ava kotise, roera isambu mindiraera. O evetu genembo mendeni nenda tumondari jo inono iraeri. Ava sedo, ne oka a fuka avavaga reeta eraera.

<sup>3</sup> Evetu genembo mave roera isambu mindiraera aimi jo eredo, nenda nano namendi oka reeta eraera aindae, imboe ae arera. Kau daba aminga ava, evetu genembo mave oka reeta eraera aimi, jo eredo, nenda nano namendi reeta jo ae eraera ava ijujae arera. Ainda beká mo: God ne isasambu setiri, nunda natofo edo irera.

<sup>4</sup> Ne eregoseva: ne jo genembo eninda saramana kato ijujae areva. Nunda bajari nune tofo mandi ijujuse sari vitarira, o sari vosarira. Amo jo nenda saramana iraeri. Keriso nu nenda komana da bajariri. Nenda komana oka mindarira, o jo mindae arira amo, Keriso jo kotae arira. Nune sonembururari nenda komana amo fete gogoghombarira. Iesu nu sonembarikena inono bekári.

<sup>5</sup> Kau daba aminga ava, evetu genembo mendeni sifo eni ava kakara

e gogoghombaraera. O nenda nano namendi mendeni sifo isambu ava inononda kakara eraera. Ainda susu mo: God sifo isambu setiri sirorusira. Avori, ne rea koteraeva ava areva.

<sup>6</sup> Ne eregoseva amo inonori. Mave sifo dabako kakara eraira amo, nu Bajari kakara use amingeraira. Mave roera isambu kotae kotae mindiraira, nu God tumonduse amingeraira. Ainda susu mo: nu God da fakina tumonduse, nunda bayau aindae God kena 'aiyakoe' seraira. Kau daba aminga ava, mave God da javoda bayau dombu eni dombu eni reeta eraira amo nu aminguse, God kakara use, nundae 'aiyakoe' sise irá gheraira.

<sup>7</sup> Ainda susu mo: ni jo ninda tofo iraeri. Ni jebuga iraresa amo, jo ninda fakina aimi irae aresa. O ni ambaresa, ábarago jo ninda sari iraeri.

<sup>8</sup> Ava sedo, jebuga irarera o ambarera amo, namonde sifo ghousa Keriso da natofo edo irarera.

<sup>9</sup> Ainda beká mo: Keriso nu, jebuga embo a ambari embo ainda Bajari ari dae sedo, ambududurusira a kotugo, sekago ambarida ghe jebuge erorusira.

<sup>10</sup> Nu namonde isambu da Bajariri. Ava sedo, erá nenda nano namendi da irari ijujuse, imboe eove! Ainda susu mo: amboda namonde isambu God da dombuda fetiroro, nu namonde isambu da irari ava ijujarira.

<sup>11</sup> God da Geka aindae sise, eminge resira:

“Geka bekári, na Bajariri. Na jebuga irena. Ava sedo, geka resena evia, beká edo sirorarira.

Amboda evetu genembo isasambu kauboi dadarigedo, namokena tofofosa sarera, ‘Geka beká: ni God ri,’ sarera,”

God da Geka aminge resira.

<sup>12</sup> Ava sedo, namonde isasambu amboda God da dombuda fetiroro ategi ururari, namonde eveva rejoá usera, a eko rejoá usera, ainda beká ava sarera.

*14:13-23 Namonde Nano Namendi Da Eveva Aindae Kotise, Saramana*



*Arera.*

<sup>13</sup> Bajari nune namonde ijujarira ava sedo, namonde jo tofo tofo ijujae arera. Avata ne emingareva. Ne ari eni ururovo gido, nenda namendi tuturo edo avaga use, aimi ari eko arira amo, ari avavaga doyareva.

<sup>14</sup> Bajari Iesu namokena geke evia ijugetiri kasama edo irena: roera eniimi jo tofo mandi bebeta ae eraira. Avata ninda dubo jokáda, eminge kotaresa, “Na roeraé barena aimi, na bebeta arena,” aminge kotaresa amo, erá beose! Amo nisuka ninda ari ekori. Roera amo, ni nisuka darigaresa, o reeta aresa.

<sup>15</sup> O, ninda namendi roera eni reeta eraira ava budo, nunda dombuda mindaso gido, dubo mema edo numbarago mindarira amo, ni aminguse, numokena ari eko aresa. Amo jo dubo bari iraeri. Keriso ambududurusira amo, nindae, a kotugo, ninda namendidae sedo ambududurusira. Ava sedo, erama bayau mindiraesa aimi, ninda namendi da dubo joká bebeta eóso ambeure!

<sup>16</sup> Avori, ni kasama eresa, nimokena roera amo evevari. Avata erá aimi, ninda namendi dereóso ari eko euri, natofo tomanakoimi gido aji seore!

<sup>17-18</sup> Mave Keriso da javoda, nunda nano namendi da tumondari a kotari evia kakara arira amo, nundae barago God sakai sise ivuga arira a natofo barago nundae ‘eveva’ sarera. Ainda beká mo: uvu bayau mindari mo, jo God da natofokena+ roera teria iraeri. O irari eveva, dubo jama a ivuga Asisi Kakara aimi muturaira, ava kotise irarera.

<sup>19</sup> Ava sedo, tofo tofo dubo jama a fakina futuse irareva. A ainda emboro ava sifo ghousa evia tava use irivu!

<sup>20</sup> Ava sedo, erama nenda ujuda, mindari dae sedo eóvo God da saramana gofeure! Bayau dombu eni dombu eni isambu namonde nu mindarera. Aminda fakara eni tefori. Avata namondeda namendi eni kotae edo, roera eni nunda dom-

buda riruroro gido, dubo mema edo numbarago rise, nunda dubo joká bebeta arira amo, ekori. Ágido namonde jo amingae arera.

<sup>21</sup> Ava sedo, namondeda nano namendi eni uvu fakara o oka o roera eni aindae, mema use doyarira amo, eveva mo, namonde barago numo sonembuse, roera amo reeta arera.

<sup>22</sup> Avori, eveva mo: ni roera aindae sedo rea koteraesa ava, kivo aresa. Amo, ni God ghae nenda gekari. Ni rejo eraesa aindae, God da dombuda meka jo gae aresa amo, ni ivuga use iraresa.

<sup>23</sup> Avata ni roera eni rise, manamana edo mino sembae itatamaresa amo, erá roera amo mindeose! Ainda beká mo: ninda tumondari roera aikena tufakori. Ava gido, God ari amo nimokena, kau ari eko da kaugo ava tegarira. Ainda tuka mo: ni roera eni rise, God da fakina jo tumondae iraresa amo, inono, ni ari eko aresa.

**15**

*15:1-6 Genembo Mave Fakina Edo, Tumonde Gogoghomberraira Amo, Nu Sabua+ Da Irari Ava Use, Evetu Genembo Mendeni Da Bouvu Fumbarira.*

<sup>1</sup> Namonde mave tumonde gogoghombuse, fakina eraera amo, nano namendi mendeni mave jo fakina edo, tumonde gogoghombae eraera, ainda bouvu fumbarera. Namonde jo namondeda uju ava use irae arera.

<sup>2</sup> Namondeda komana nange fakina edo, tumonde gogoghombae taira, a nunda evevadae sedo, namonde nunda uju ava use irarera.

<sup>3</sup> Keriso numbarago amingusira. Nu jo nunda uju ava aeri. Keriso nange God Afa da bouvu fufusira aindae, God da Geka eminge resira: “Arie, Afa, evetu genembo ni imboe edo dere jisera ainda bouvu ava, na nindae sedo fufuseni,” aminge resira.

<sup>4</sup> Ne eregoseva: God rea seari nunda Geka jokáda gembudo ghusera amo, namonde ijugari dae sedo, gembudo ghuseri. Amo, namonde tege

gido durumuguse, fakina aoro tamo feghari, nu rea mutari dae sisira ava gigitaoro dae sedo, gembudo ghuseri.

<sup>5-6</sup> Avori, durumuguse fakina aoro tamo feghari da susu mo: God Afa numori. Ava sedo, God nune ne sonembururari, dubo dabako areva. Amo, ne Iesu Keriso da amboda amboda use, dabade tatedo dubo dabako use, beka dabakoimi Iesu Keriso da Numamo, God Afadae sakai sareva.

*15:7-13 Keriso Jusi Embo A Nenda Gitofude Ava Sonembari Dae Sedo Fusira.*

<sup>7</sup> God da duro isagha ari gaovo dae sedo, Keriso ne nati joká doruse rurusira. Ava sedo, kau daba aminga ava, tofo tofo nati joká doruse tavo use irivu!

<sup>8</sup> Ne amingareva da susu ava, saono ningareva. God namane Jusi embo da abuanekena beka gagojuse geke beká sisira, ava kasama aoro dae sedo Keriso fira, namane Jusi embo da jokáda sabua etiri God da Geka beká usira.

<sup>9</sup> A namanenda gitofu, God da joka ari ava gido, nange sakai saetera aindae barago, nune fira sabua usira. God da Geka aindae eminge resira:

“Na aindae sedo, ninda natofo da gitofu jokáda nindae sakai sarena.

Namonde dabade irise, yaru didivuse ninda javo jighono erarira!”

aminge resira.

<sup>10</sup> Kotugo vasa eninda resira:

“Ne God da natofo aindae gitofuri. Avata fuvu, nunda natofode dabade ivuga aove!”

aminge resira.

<sup>11</sup> A kotugo vasa eninda, kau daba aminga ava resira:

“God da natofo aindae gitofu, nemokena resena. Ne, Bajaridae sakai sevu! Evetu genembo isambu, nundae sakai sevu!”

aminge resira.

<sup>12</sup> A kotugo vasa eninda, God setiri nunda feroveta Isaiah eminge gefusira:

“Jesse da mandi David, aindae imemesiri da jokáda, veka eni sirorarira.

Aindae jokáda, kotofu eni siroredo, God da natofo aindae gitofu ava, nune bajari arira.

Amingururari, ne tumondari isambu numokena fitarera,”

God da Geka aminge resira.

<sup>13</sup> Ava sedo tumondururuvu, God gido, nemokena ivuga tomanako a dubo jama mutari baove! God resena emo, nu rea amboda mutari seraira ava, nune seari, ne aindae gigiteraeva. Numo nenda gigitari da susuri. Nune sari nunda Asisi Kakara sonembururari, ne gigituse nenda tumondari baji mindafu are!

*15:14-21 Paul Redae Rome Embokena Reta Gefusira, Aindae Susu Mo Eviri.*

<sup>14</sup> Avori, nanda nano namendi, na tofo mandi kasama erena: ne ari eveva avanembo use ireva, dubo kote gogoghomberaeva, a tofo tofo dengoro indarikenana, ne inonori.

<sup>15-16</sup> Avata nanda reta einda jokáda, na fakina edo geke mendeni mendeni fakarago ava sise, sekago kotovo dae seteni. Amingetena da beká mo eviri: God setiri, na Iesu Keriso da aghi kato edo, ya namane Jusi embo da gitofu aindae jokáda saramana aono dae sisira. Na nunda fristi+ edo, God da Bino Eveva ava seraena. Na vironu seraena da susu mo: Asisi Kakara ne namane Jusi embo da gitofu ava budo, kakara use, ne kau joba aminga ava God kena mutari gido, nu ivuga are dae sedo, amingeraena. Na aindae sedo, geke fakarago mendeni mendeni seteni.

<sup>17</sup> Avori, na Iesu Keriso de dabade tatise, nunda fakinaimi God da saramana eveva usena aindae, na ivuga eraena.

<sup>18-19</sup> Na rea usena amo, jo nanda fakina aimi aeri. Iesu da fakina ainembo usena ava sari dae erena. Saramana amo eviri: na geke mendeni sise, ari mendeni edo

ghuseni. Aminguse, tano a ari bouvu ijugedo ghusena ainda fakinaimi, a Asisi Kakara da fakinaimi, eono gido dudukughedo ghusevu. Ainda beká mo: ne namane Jusi embo da gitofu, God da Geka ningido ava aovo dae sedo, aminguseni. Aindae sedo: reighi Jerusalem tano ghedo ira reighi Ilirikom ainda soroda, na ya Keriso da Bino Eveva ava, vironu se gogoghombedo ghuseni.

<sup>20</sup> Na sifo ghousa uju eraena amo, nange ya natofo Keriso da Bino Eveva jo ningae irera aikena, vironu saeteni. O evetu genembo mendeni anakora era Keriso da Bino ava vironu setero, natofo ningi tumonduse irera aikena, na jo yari uju aeri. Na natofo aikena yaetena amo, inono, evetu genembo mendeni, kambo da tutumbi daroro ainda etoda na kambo itari da kaugori. A gido na imboe eraena.

<sup>21</sup> Nanda uju mo, nange God da Geka evia beká aeti:

“Evetu genembo mavekena, nunda Bino jo ya sae irera amo, ne gido diti basarira,

a evetu genembo mave jo ningae irera, ne ningi kasama arera.”  
God da Geka emo, geka beká aeti.

### *15:22-33 Paul Nu Rome Embokena Yari Dae Uju Usira.*

<sup>22</sup> Umbu mendeni mendeni, na nemokena yari dae kotedo ghuseni. Avata reighi mendeni mendeni aminda birurughuse, vironu sedo ghusena agido, na nemokena jo ya buvae edo ghuseni.

<sup>23</sup> Avata oroko nanda saramana eminda eteno dadabusira ava sedo, na nemokena yari dae erekotena. Kotugo na ghaeko ghousa evia inono, nemo gari dae kotedo ghuseni.

<sup>24</sup> Aindae sedo, na edo garena, na nange Frovensi Spain aminda ise, Rome aminda teredo ne gaeteni. Ne gido, namonde itako aminda umo ururono, na sonembedo dirigaovo yaeteni.

<sup>25</sup> Avata oroko mo, God da natofo Jerusalem aminda irera, ava sonembari dae sedo, na aminda yari dae erena.

<sup>26</sup> Na yari dae erena ainda beká mo: na moni nemokena mutarena. Tumondari+ embo Frovensi Masedonia a Akeia aminda irera aimi eredo, moni resena emo, dabade fitido makasi embo sonembari dae siseri. Makasi embo resena emo, na God da natofo Jerusalem aminda irera, aindae resena.

<sup>27</sup> Amo, ne tofofo ari dae kotiseri. Kotugo, amo eveva bekári. Ne amingaeteri. Ainda beká mo: Jusi embo Iesu da natofo edo irera, nenda asisi da esimbugari ava nenda gitofukena ghasetero jebuga tafuseri. Ava sedo, gitofuá eredo nenda guguaيمي nanda natofo Jusi embo sonembarera amo, eveva bekári.

<sup>28</sup> Avori, moni dabade fiftusera ava bu ya mutono dadabari gido, na dodo Frovensi Spain aminda ise, ne tere garena.

<sup>29</sup> A na kasama erena: na ya nemokena buvarena amo, Keriso da esimbugari fakinaigo ava, isambu bu ya mutono bareva.

<sup>30</sup> Avori, nanda nano namendi, Asisi Kakara dubo bari nemokena futusira, aindae nemokena benunu resena. A kotugo, namondeda Bajari Iesu Keriso da javoda nemokena eminge benunu resena: ne nanda banungari sonembuse, nandae sedo dubo isambu futuse banungaetevu!

<sup>31</sup> Evetu genembo mendeni Frovensi Judia aminda God jo tumondae eraera. Erama evetu genembo aimi foa na deore dae sise banungaetevu! A na moni bu yarena ava, God da natofo Jerusalem aminda, ne ivuga use baoro dae sedo banungaetevu.

<sup>32</sup> Amingaeteva da beká mo: God ‘avori’ sarira amo, na saramana resena emo, aono dadabari gido, ivugaghae nemokena ya namonde dabade umo gamo eveva arera.

<sup>33</sup> Avori, God, dubo jama mutari kato, nemokena irare! Ai, bekári!+ Yari budo givu!

## 16

*16:1-27 Paul Nu Tano Use, Evetu Genembo Mendeni Ategi Usira.*

<sup>1</sup> Namondeda ghasovu Phoebe, oroko nemokena yari dae erira. Phoebe nu, reighi Kenkiria irise, Iesu tumondari+ embo aminda irera aikena, saramana e gogoghomberraira.

<sup>2</sup> Ava sedo, nemokena yarira amo, ne Kuristini da ari ava use, nu nati joká dedo bu tavo aovo dae sise resena. A nu rea uju arira, ava sonembedo mutaetevu. Aida beká mo: nune evetu genembo digari sonemberaira. A kotugo nambarago, nune sonembusira.

<sup>3</sup> Na Priscilla nuvu Aquila ghae ava ategi erena. Ne namonde dabade, Iesu Keriso da saramana edo ghuseri.

<sup>4</sup> Ne namo sonembari dae sedo, nenda jebuga kotae edo, nandae sedo ambari dae kotiseri. Jo nasuka nane nendae aiyakoe sae erena. Nanda natofo Jusi embo da gitofu Iesu tumonduse irera aimi, isasambu nendae aiyakoe resera.

<sup>5</sup> Kotugo nenda ekaresia+ mendeni, Priscilla Aquila ghae da kamboda totorugeraera, ábarago ategi erena. Sevu ningore!

Nanda komana beká Epaenetus, barago ategi erena! Epaenetus resena emo, nu Frovensi Asia aminda, evetu genembo isambu aida gitida, nune Keriso giti tumondusira. Nu ategi erena. Sevu ningare!

<sup>6</sup> Mary nenda jokáda saramana e gogoghomberraira, numbarago ategi erena. Sevu ningare!

<sup>7</sup> Nanda natofo Jusi embo da mendeni, Andronicus nengae Junias ghae, ne namonde dabade dibura useri. Ne giti Iesu tumonduseri, na amboda tumonduseri. Nengae barago ategi erena!

<sup>8</sup> Nanda Kuristini komana beká eni, Ampliatus barago ategi erena.

<sup>9</sup> Urbanus nangae, Keriso da saramana dabade edo ghuseri, numbarago ategi erena. Sevu ningare!

Nanda komana Stachys ategi erena. Sevu ningare!

<sup>10</sup> Apelles Keriso da saramana e gogoghombiri gido, Keriso nu uju beká ava erira. Na nu ategi beká ava erena. Sevu ningare!

Aristobulus nunda natofode barago ategi erena. Sevu ningore!

<sup>11</sup> Nanda oro Jusi embo da eni Herodion barago, ategi erena. Sevu ningare!

Narcissus nunda natofode Bajari tumondusera, nembarago ategi erena. Sevu ningore!

<sup>12</sup> Bajari da saramana kakato Tryphaena nengae Tryphosa ghae barago ategi erena. Sevu ningore!

Nanda komana Persis, Bajari da saramana e gogoghombuse irira, numbarago ategi erena. Sevu ningare!

<sup>13</sup> Rufus nu Bajari da natofo aida jiro eniri. A noi mo, nu kau nanda aya da kaugo edo irira. Nembarago ategi erena. Sevu ningore!

<sup>14</sup> Asyncritus, Phlegon, Hermes, Patrobas, Hermas, nenda nano namendide dabade irera, ne isambu dabade ategi erena. Sevu ningore!

<sup>15</sup> Philologus, Julia, Nereus nunda ghasovu Olympas ghae, ne God da natofo mendeninde dabade irera, nembarago ategi erena. Sevu ningore!

<sup>16</sup> Ne tofo tofo ategi areva amo, nati joká doruse dubo isambu futuse ategi e gogoghombedo ghevu.<sup>16</sup>

Keriso da tumondari+ embo isambu reighi mendeni mendeni eminda irera aimi, ne ategi erera. Yari budo givu!

<sup>17</sup> Nanda nano namendi, ne emingareva. Evetu genembo mave nunda nunda sarigedo beisiga use osogo eraera amo, gi darigareva. Kotugo kau daba aminga ava, ne ijuga eveva ruruseva ava, evetu

**16 16:16:** Paul, ne tofo tofo ategi aoro dae sisira amo, ne “muno kakara” ava use, ategi aoro dae sisira. Sifo aminda, nenda kiki mo: ne ategi use sandi muno edo ghuseri.

genembo mave bureguse ighagha arera, nembarago gi darigareva.

<sup>18</sup> Ainda beká mo: evetu genembo amo, ne jo namondeda Bajari Keriso da saramana ava jo ae eraera. Ne tofofo nenda fisi da uju ainda amboda amboda use, nenda beka vivi aimi evetu genembo mendeni kotari iraede ava, dereraera. Evetu genembo amo do darigaovo dae resena.

<sup>19</sup> Ne God da Bino Eveva bu jighi gogoghombereva ava, natofo digarii se ningiraera aindae, na ivuga erena. A nanda uju mo: ne ari eveva ari da emboro ava kasama e gogoghombaetevu. O ari eko ari da emboro ava, ne itako jo derae aetevu.

<sup>20</sup> Aminguse irovo, God dubo jama mutari kato aimi, fakina futururari Satan da fakina ava, de atai fati fetareva. Bajari Iesu da sonemba nemokena irare!

<sup>21</sup> Timothy nangae saramana eraira aimi, ne ategi erira. Yari budo givu!

Nanda natofo Jusi embo da mendeni namonde irera, Lucius, Jason, a Sosipater aimi, ne ategi erera.

<sup>22</sup> Na Tertius ri. Paul geke emo siri nane eregefena. Nambarago Keriso da javoda ne ategi erena. Yari budo givu!

<sup>23</sup> Gaius namane sonemberaira. Amo, na numokena aviraena, a ekaresia+ numokena totorugeraera aimi, ne ategi erira. Yari budo givu!

Erastus, reighi einda gavana da moni kaifa kato, namondeda namendi Quartus ghae ne ategi erera. Yari budo givu!

<sup>24</sup> Namondeda Bajari Iesu Keriso da sonemba nemokena irare! Yari budo givu!<sup>24</sup>

<sup>25</sup> Namonde evovodae God dae sakai sise irore! Ainda susu mo: nu inonori. Nune sari ne fakina edo tumonde gogoghombareva. Nu amingarikena inonori. God amingarira ava, na nemokena Iesu Keriso da Bino Eveva vironu sise sedo ghuseni.

Iesu Keriso da Bino resena emo, nu ghaeko ghousa ava jungedo irei.

<sup>26</sup> Avata orokoá isagha etiri, namonde eregoserera a niningerera. God setiri feroveta rea gefusera ava, oroko isagha urureari endada oro oro isambu giraera a ningiraera. Numoá tumonduse, nunda Geka ava ningido amingaoro dae sedo, God setiri ferovetai gefuseri.

<sup>27</sup> Avori, God nusuka roera isambu nune kasama eraira, numo kasama a dubo kotari da susuri, aindae numokena sakai sise irore! A kotugo, nune Iesu Keriso mutiri fira namondedae sedo ambududurusa aindae, namonde evovodae numokena sakai sise irore! Ai, bekári!+ Avori, nanda geke tano eviri.

Na Paul.

<sup>24</sup> **16:24:** Tuturo 24 da geke, Baiboro (Bible) ana mendeni ainda jokáda fitero iriri tafuseri. O Baiboro (Bible) mendeni ainda jokáda, jo fitoro teraeri.

## Paul Nunda Reta Gitida, Corinth Embokena Gefusira, Amo Eviri

Paul reighi Efesas aminda irise, reta evia avose, ghaeko 55 ainda jokáda gefusira. Reighi Corinth mo, Greek embo da reighiri. Nemo Jusi embo da gitofuri, a God Afa a nunda Agho Dari, ne bunariri. Ne Iesu jo tumondae irise, fisi da uju a ari eko beká ava edo ghuseri. Paul nu aindae sedo, tumondari da emboro a Kuristini da irari ainda beká, ava se disugusira. Se disuguse, nenda ari ekoko mendeni use iriara aindae, ghoghora sisira.

*Paul Nunda Reta Gitida Corinth Embokena Gefusira, Ainda Mendo Mendo Mo Eviri.*

1:1-9 Paul ne ategi use, geka tuturo usira.

1:10–4:21 God da natofo sarigedo beisiga usera aindae, Paul ne ategi usira.

5:1–7:40 Kuristini da irari, ade vide a evetu genemboghae da irariri.

8:1–11:1 Kuristini beká, ne ari re-joá imboe arera amo, eviri.

11:2–14:40 Keriso da natofo ne dabade saramana use, nunda tamo edo irera.

15:1-58 Keriso ambarida ghe jebugedo erorusira ainda tuka mo, eviri.

16:1-4 Moni Jerusalem embokena mutari da gekari.

16:5-24 Paul geka mendeni mendeni sise, tano usira.

<sup>1</sup> Arie, nanda nano namendi! God uju use aghi etiri, na Iesu Keriso da aghi kato edo irena. Na Paul, namane namondeda namendi Sos-thenes ghae, ne ategi beká ava erera.

<sup>2</sup> God da ekaresia+ reighi Corinth aminda ireva, nemokena reta evia eregefenerere. Yari budo givu!

Ne Iesu Keriso de dabade tatedo, nunda natofo kakarago ava aovo dae sedo, God ne aghi usira. Geka

eregefena emo, Corinth embokena eregefena A kotugo, evetu genembo isambu, mave namondeda Bajari Iesu Keriso da sari ava ningiraera, aikena eregefena. Bajari Iesu Keriso resena emo, namonde isambu da Bajari dabako numori. Yari budo givu!

<sup>3</sup> God Afa a namondeda Bajari Iesu Keriso ghae, nemokena sonemba a dubo jama mutoro baove!

*1:4-9 Keriso Da Sonembari.*

<sup>4</sup> Iesu Keriso da ambariimi, God ne esimbugusira. Aindae sedo, na evovodae numokena aiyakoe sise irena.

<sup>5</sup> Ainda susu mo: ne Keriso de dabade tatedo irevo, nune ne sonem-bedo esimbugusira. Amingiri, ne dubo kotedo kasama teriagio ruruse, geka se simbugari da emboro kasama e gogoghombusevu.

<sup>6</sup> Ne Iesu da Bino a nunda Geka ningido, kaifa e gogoghomberaeva.

<sup>7</sup> Aindae sedo, namondeda Bajari Iesu Keriso da jovereghe furari da sifo ava kaifa use, Bajari da sonemba a esimbugari isambu rurusevu.

<sup>8</sup> A kotugo, erá ne ari ekoko eóvo dae sise, nune kaifa arira. Ne kaifa use sonembururari, nunda sifo amboda foa buvarira aminda, ne fete simbugareva.

<sup>9</sup> Namondeda tumondari isambu God kena fitarera. Ainda beká mo: nu rea namondedae ari kotarira ava, nune arira. God ne budo, nunda Mandi namondeda Bajari Iesu Keriso de dabade tatedo, nemonde deinghaovo dae sedo, aghi usira. Ava sedo nunda ungo jo sokinembae arira, ne kaifa use irarira.

*1:10-17 Corinth Embo, Ne Beisiga Use Nunda Nunda Sarigedo Iriari.*

<sup>10</sup> Nanda nano namendi, namondeda Bajari Iesu Keriso da javoda, nemokena benunu resena, ningivu! Ne isambu rea sareva a rea kotareva amo, dubo dabako use irivu! Jo nunda nunda ae areva! Nenda kotari a nenda uju dabako aeti!

<sup>11</sup> Na aminge resena da beká mo: Chloe da nano namendi mendeni

fera, namokena isagha eminge osa se simbuguseri! Ne mendeni Corinth da ekaresia+ aminda ireva aimi, beisiga eraeva.

<sup>12</sup> Ne beisiga eminge eraeva: “Nenda mendeni seraera, ‘Na Paul da ambo jimbi eniri.’ A mendeni, ‘Na Apollos da ambo jimbi eniri.’ seraera. A mendeni, ‘Na Peter da ambo jimbi eniri.’ seraera. A kotugo mendeni seraera, ‘Na Keriso da ambo jimbi eniri.’”

<sup>13</sup> Ne aminge sise, Keriso da tamo, o ekaresia+ seraera ava sarigedo, nunda nunda ereva. Mave nenda sedo korosida ambududurusu? Ne maveda javoda bafataito usevu? Kote givu! Na Paul ri. Na jo nenda sedo korosida ambaeri. A ne jo nanda javoda bafataito aeri.

<sup>14</sup> Beisiga da geka evia ningido, na God kena aiyakoe resena. Ainda susu mo: na reighi Corinth aminda, evetu genembo digari jo bafataito aeri. Crispus nengae Gaius ghae kikiako, ava bafataito useni.

<sup>15</sup> Ava sedo, “Na Paul da javoda bafataito useni,” sareva amo, jo geka beká iraeri.

<sup>16</sup> (O eni mo, kotae eteni. Stephanas barago nunda natofode dabade, nane bafataito useni. Avori, na erekotena amo, eni tefori.)

<sup>17</sup> Keriso jo, nane evetu genembo bafataito aono dae sedo, na dirigari nemokena yaeri. Nunda Bino Eveva ava saono dae sedo, na nemokena dirigusira. A nunda Bino amo, jo evetu genembo da kotarigo iraeri. Na evetu genembo da kotariimi vironu saetena amo, Keriso ambududurusira da fakina ava, jo mave gido kasama ae aeti.

*1:18-2:5 Keriso Mo, Kotari A Fakina Da Susu Bekári.*

<sup>18</sup> Ainda beká mo: evetu genembo mave God da sonemba imboe edo, ambari dae use irera amo, Keriso korosida ambududurusira ainda bino ningido, gego sariá sise, dere jiraera. Avata namonde God tumonduse, jebugari dae erera amo, namonde

kasama erera: God da fakina namondekena foa gheraira amo, Iesu da ambarikena ghe foa gheraira.

<sup>19</sup> God da Geka aindae sise, eminge resira:

“Na aono evetu genembo mendeni, tofofo nenda fakinaimi dubo koteraera ava, nenda kotari dadabarira,

a evetu genembo mendeni diti basari ábarago, nenda kasama dadabarira.”

God da geka aminge resira.

<sup>20</sup> Ava sedo, evetu genembo kasama teria, a vironu kakato, kotugo evetu genembo tofofo dubo koteraera amo, ne nangareri? Ne jo tofofo jebugae arera. God anakora geka evia ijugeti kasama useri: enda da kotari a kasama jo inono iraeri, amo sino fuka da kotariri.

<sup>21</sup> God nu, evetu genembo tofofo nenda dubo kotariimi ya numokena buvari da emboro+ ava, nune gagojusira. Enda da kotariimi, jo numokena ya buvari da kaugo iraeri. God nusuka, ya numokena buvari da emboro+ afigari dae sedo, eminge kotisira: nunda Geka namonde vironu seraera ava, mave tumondarira amo, nu jebuga evovoda irari ava tuve barira. Evetu genembo digari, ne geka ava ningido dere jiraera avata, ya God kena buvari da emboro+ eni tefori.

<sup>22</sup> Namane oro Jusi embo namanda mendeni, ne eminge seraera, “Keriso da javoda tano aso gido, namane tumondarera.” O oro mendeni ne seraera, “Dubo kotari eveva ijugaso gido, kotise kasama e gogoghombedo Keriso tumondarera.” Ava sedo, Jusi embo digari a Jusi embo da gitofu digari, ne jo Iesu da ambari tumondedo nunda natofu ae eraera.

<sup>23</sup> Avata namonde mo, Iesu korosida ambududurusira aindae, vironu sise irera. Jusi embo mendeni ava ningido imboe eraera, a nenda gitofu, oro mendeni mendeni ava ningido, gego sariá sise, dere jiraera.

<sup>24</sup> Avata namonde Jusi embo daba daba a namanenda gitofu daba daba,

mave God aghi usira, ai namonde kasama erera: Keriso mo, nu God da dubo kotari a fakina da emborori.

<sup>25</sup> Ne eregoseva: evetu genembo digari ne erekotera, God da Bino resena emo, jo kau iraeri, dubo kotari a fakina tefori. Avata na eminge resena: God da kotari emo, dubo kotari a fakina bekári. Evetu genembo endada irera, nenda dubo kotari a fakina jo amingo iraeri.

<sup>26</sup> Ava sedo, nanda nano namendi, nenda irari kau mavega ava evo, God ne aghi etiri ne nunda natofo useva, ava kotovo dae resena. Sifo aminda, nenda jokáda kasama kakato daba dabari, a kokotofu barago jo digari iraeri. O nenda nano namendi digarigo mo, ne dubo kotari a geka vironu tefo, a fakina barago tefori.

<sup>27-28</sup> Amo, God jo bunise ne aghi aeri. Eregoseva, evetu genembo endada irera eimi, nene Iesu da ambari da bino ningido, dere jise eminge seraera, “A jo geka beká iraeri. A aminda fakina eni tefori.” Ne Iesu da ambari ainda bino ningido, ava imboe use ighagha eraera. Avata God Iesu da ambari da fakina aimi sari, evetu genembo endada irera, ne meka gosuse nenda fakina a nenda kotari dadabarira. God nu emboro ava gategusira aimi, enda da kotari dari dadabarira.

<sup>29</sup> Amingusira da beká mo eviri: God uju erira amo, mave nunda dombuda jo tofo nunda javo jighari erae arira.

<sup>30</sup> Avata nemo, ne jo nenda dubo kotariimi, God da dombuda fetaeri. Ne, God setiri Keriso da ambari da fakina aimi, Iesu Keriso de dabade tatedo, nunda jebuga rurusevu. Nune setiri, Iesu Keriso nenda dubo kotari da susu usira. Totofo nenda dubo kotari ighagha use, Keriso bevo nunda fakinaimi, God nenda ari ekoko kote dodo, nendae ‘eveva’ sisira. Nunda fakinaimi, ne God da natofo kakarago ava sirorusevu. A kotugo nunda fakinaimi, Ari Eko da ungodá ghe feva buvudo jebugusevu.

<sup>31</sup> God da Geka andae sise, eminge

resira:

“Mave sakai sari dae uju arira amo, nu jo tofo nundae sakai sae arira.

Nu God dae sakai sise, nusuka nunda javo ava jighari erarira.”

## 2

<sup>1</sup> Avori, nanda nano namendi, na God da Bino nemokena sari dae sedo ena buvurutusena amo, na jo reighi da kotari ava kotise, geka vironu kote simbuge gogoghombuse saeri.

<sup>2</sup> Ainda susu mo: na uju usena, nanda kotari a kasama amo dotutuse, mokogo Iesu Keriso nange nange korosida ambududurusira da Binó avanembo kotise, vironu sari dae uju useni.

<sup>3</sup> Andae sedo, na ena nemokena reighi Corinth aminda buvudo, oju use ungo ata dadaragarusira.

<sup>4</sup> Aminguse, na jo evetu genembo da dubo kotariimi nanda ijugari a geka vironu simbugedo, saono ningae usevu. God da Asisi Kakara ai sonembiri nunda fakinaimi geka seteno ningi tumondusevu.

<sup>5</sup> Ava sedo, nenda tumondari, jo evetu genembo da dubo kotarikená furari bae usevu. Nenda tumondari mo, God da fakina aimi rurusevu.

*2:6-16 God da Dubo Kotari Eveva, Kau Eviri.*

<sup>6</sup> Avata mave tumonde gogoghombuse, fakina edo God da genembo beká edo dubo koteraera aikena, na ijuga eni dubo kotarighae ava ijugeraena. Avata ijuga a dubo kotari resena emo, jo enda da dubo kotari amingo iraeri. Enda da kokotofu nenda dubo kotari eniri, o nanda dubo kotari a ijuga mo eniri. Enda da kokotofu resena emo, nemo nenda fakina ainghae dabade, soesa edo dadabari dae erera.

<sup>7</sup> O dubo kotari nane ijugeraena emo, God da dubo kotariri. God da kotari amo, erama enda da evetu genembo kasama eore dae sedo, nu anakora beká kotedo kivo usira. Utu enda jo ae irise, God nu, namonde nunda usasa baoro dae sise, dubo kotari amo kotisira.



<sup>8</sup> Enda da kokotofu a babojegari, ne God da dubo kotari amo jo kasama ae useri. Ne kasama aetera amo, ne namondeda Bajari, usasa a durode ava, jo budo arafa dae aeteri.

<sup>9</sup> Avata kotugo, God da Geka dubo kotari aindae sise, eminge resira:

“Evetu genembo mave God dubo bu-raera aindae sise, God roera evevago esimbugusira.

Roera resena emo, jo evetu genembo eniimi ditii gido kasama aeri, a ainda binó jo

dengoroi ningido kasama aeri, a kotugo dubo jokáda itako jo siro-rari kotaeri.”

<sup>10</sup> Avata God geka a kotari emo giti kivo usira ava, namondekena afigetiri, nunda Asisi Kakara da fakinaimi namonde kasama useri. Ai resira amo: God da Asisi roera isasambu ijunedo giraira, a God da kotari jun-garida amo, nune gi tefo eraira.

<sup>11</sup> Nu kau genembo amingori. Genembo eni nu dubo jokáda rea erekotira ava, genembo ainda asisi nusuka kasama erira. Mave eniimi jo kasama aeri. Kau daba aminga ava, God nu kau mavega amo, a nu rea erekotira ava, Asisi Kakara ai nusuka kasama erira.

<sup>12</sup> Namonde enda da asisi a dubo kotari ava jo baeri. Namonde God da Asisi Kakara ava ruruseri. God namondekena rea muturaira ava, kasama aoro dae sedo, nunda Asisi Kakara dirigetiri vose fira asugetiri, namonde irera.

<sup>13</sup> Aindae sedo, namane jo namane dubo kotariimi, geka ijugae eraera. Geka Asisi Kakara ai muturaira ava budo, aimi dengoro indiraera. Evetu genembo mave Asisi Kakara rurusera aikená, namane Asisi da geka beká ava ijugeraera.

<sup>14</sup> Avata mave God da Asisi jo bae irira amo, joba a fakina God da Asisi muturaira ava, jo nune bari da kaugo iraeri. Joba resena ainda tuka mo, nu bunari, jo nune kasama ari da kaugo iraeri. Ainda beká mo: God da joba a fakina amo, nunda Asisi da fakinaimi kasama arera. Ava sedo,

mave God da Asisi jo bae arira amo, nu God da joba jo kasama ae arira.

<sup>15</sup> Avata genembo mave God da Asisi barira amo, nu roera eveva a eko, kau avega isambu itatamuse kasama arira. Avata genembo ainda irari a ari ava, mave jo ijujae arira.

<sup>16</sup> Ainda beká mo: God da Geka, evetu genembo endada irera, einda sise eminge resira:

“God rea erekotira ava, mave jo kasama aeri. Ágido, mave eniimi jo Bajari da dengoro indae arira.”

O namonde God da Asisi rurusera amo, namonde Keriso da kotari God da Asisi ainghae dabade ruruseri.

### 3

#### *3:1-23 Namonde Fakina Edo, God Da Natofo Aore!*

<sup>1</sup> Avori, nanda nano namendi, ne Keriso da natofo usevu. Avata ne kau sasingako da kakaugo ava edo ireva. Ava sedo, na nemokena dengoro induduse eregefena emo, na, ne kau evetu genembo Asisi Kakara iraede ava kotise, nemokena dengoro induduse eregefena.

<sup>2</sup> Kau namonde mandi sasingu seka fumbari aikena ami futuse, bayau fakara jo mutae eraera aminga ava, na nemokena geka raugako avanembo ijugeraena. Na jo tuturo edo, geka bouvugo ijugae irena. Ainda susu mo: ne dubo jo kote simbugae ireva. Giti, ne amingedo ghusevu. A kotugo oroko, kau daba ava eraeva.

<sup>3</sup> Ainda beká mo: ne enda da kotari a fisi da uju ava, jo doyaereva. Ne komana da irari eveva aindae, dubo ekoko use beisiga eraeva. Ava gido, namane kasama erera, ne enda da kotari jo doyaereva. Ne fisi da uju ava teriágo use ireva.

<sup>4</sup> Ne totofo sariguse, eminge seraeva, “Namane Paul da ambo jimbiri,” a mendeni seraeva, “Namane Apollos da ambo jimbiri.” Aminge seraeva amo, ari evevari, ai? Kote givu! Amo ari eko, a enda da kotariri.

<sup>5</sup> Kote givu! Apollos nu mavejori? A kotugo na mavejori? Namane taká God da gigimasa a saramana kakatori. Namane geka setero ningido, ne tumondusevu. Amo, God nu rea namane aoro dae sisira, ava namane useri.

<sup>6</sup> Amo inono, na bayau da veka budo yama vareda govaeteni. A amboda, Apollos ya uvu averegaeti. Avata namane jo saoro batuno edo vitae aeti. Amo, God nune sari batuno edo vitarira.

<sup>7</sup> Veka govári kato a uvu averegari kato amo, jo saramana mindafu ae eraera. God mo, nu teriari. Nune seari batuno edo vitiraira.

<sup>8</sup> Genembo mave veka govarira o mave uvu averegarira, nenda saramana mo inonori. Etoto naká aimi saramana e gogoghombarrera amo, God nemokena nenda mino inononda use mutarira.

<sup>9</sup> Namane Apollos ghae, namane dubo dabako use, God da vareda saramana eraera. God da vare resena emo, nemori. O ijugaboro eni mo, ne kau God da Kambo amingori.

<sup>10</sup> Ne aminge sise, Keriso da tamo, o ekaresia+ seraera, ava sarigedo nunda nunda ereva. Mave nendae sedo korosida ambududurusi? Ne maveda javoda bafataito usevu?

<sup>11</sup> Aında beká mo: na ijugaboro ffituse kambo setena, aında tutumbi dabako resena emo, namondeda Bajari Iesu Keriso, numori. God da ekaresia+, kotugo nunda tumondari+ embo da susu eni tefori. Susu dabako mo, Iesu Keriso, nusuka numori.

<sup>12</sup> Avata kambo da sagho mo, digariri. Evetu genembo mendeni, sagho fakara a evevago budo, aimi itarera. Amo, ne auri 'gold' o 'silver' seraera, a ghamana evevago aimi itarera. O mendeni, sagho raugo a eko budo, aimi itarera. Amo, ne ika, eke, a kikisa aimi itarera.

<sup>13</sup> Genembo nu kambo kau nangego itarira amo, Keriso da Sifo amboda furarira, aminda kasama arera. Avaraka sifo aminda siro-rarira aimi, evetu genembo isasambu aında saramana dere garira.

<sup>14</sup> Mave tutumbi aında etoda, kambo sagho evevago aimi itari irari, avarakai jo avae arira amo, nu mino eveva amo nune barira.

<sup>15</sup> O mave tutumbi aında etoda, kambo sagho eko aimi itari irari, avarakai avari tise vosarira amo, genemboá mino eveva eni nunda kambo itutusira aında jo bae arira. Nunda tutumbi mo, Iesu ava budo, aında etoda itutusira ava sedo, nu jo ambae arira. Nu kau genembo avaraka jokáda ghe saghimbe baoro jebugarira, aında kaugo ava arira. Avata kambo itutusira da mino eveva eni jo bae arira. Aında tuka mo: nu saramana sembae usira.

<sup>16</sup> Ne kasama ereva, geka emo geka bekári. Nemo God da Kambori+. A kotugo, ne kasama ereva. God da Asisi nenda jokáda irira, ava itatamuse kasama ereva.

<sup>17</sup> Mave God da Kambo+ amo de bejise, God da natofo bebete arira amo, God numokena dara aında mino futuse, nu dari ambarira. Aında beká mo: God da Kambo mo kakarari. God da Kambo resena emo, nemori.

<sup>18</sup> Erá gungubo sise, totofo dere-ove! Mave tofo mandi eminge kotarira, "Na enda eminda dubo kotari kato eniri," aminge kotarira amo, eveva mo, nu enda eında dubo kotariá dodo, sasingako da kaugo ava arira. Nu giti aminguse irarira amo, amboda nu God da jebuga a dubo kotari tambarira.

<sup>19</sup> God, evetu genembo endada irera, eında dubo kotari ava gosuse, "Aında jokáda, eveva a beká eni tefori," seraira. God da Geka aında sise, eminge resira:

"Evetu genembo mave totofo nenda kasamaimi dubo koteraera amo, ne totofo nenda dubo kotariimi gofedo, God da vagho jokáda tereraera."

<sup>20</sup> A vasa eninda, God aında sise eminge resira:

"Bajari dubo kotari kakato endada irera, aında kotari gosuse kasama erira amo, nenda kotari aında beká mo tefori."

21 Ava sedo, evetu genembo mendeni da dubo kotari a kasama aindae sedo, erá riria use sakai seove! God nemokena roera isasambu mutiri rurusevu.

22 Apollos, Peter ghae, namonde dabade ava God gatededo, nemo sonembaoro dae sedo futusira. Utu, enda, ambari, jebuga, roera oroko irira a amboda sirorarira, roera isambu resena evia, nemokena mutiri nenda tofo edo irira.

23 A nemo, Keriso da tofori. A Keriso mo, nu God da tofori.

## 4

### *4:1-21 God Da Aghi Kakato, Nenda Irari Eviri.*

1 Ne namaneá gosuse, eminge ko-taetevu! Namane Keriso da sabua+ a saramana kakatori. God namane gategusira aindae tuka mo: namane nunda geke beká jungedo irira ava kaifa aoro dae sedo, gategusira.

2 Genembo mave bajari enikena saramana ari dae sarira amo, saramana da agho dari tomanako eviri: nunda bajari tumonduse, fakina edo nunda agho dari kaifa use irarira.

3 Ava sedo, mave nanda ari ekoko ijujari dae sarira amo, na aindae jo oju ae arena. A kotugo, na jo tofo nanda ari ekoko ijujae arena.

4 Na tofo kasama erena: nanda dubo jokáda, ari eko eni jo irari itatamae eraena, avata na jo tofo 'na eveva' sari da kaugo iraeri. Bajari nusuka nune nanda ari ekoko ijujarira.

5 Kau daba aminga ava, sifo jo foa buvae irari, ne jo eredo, evetu genembo mendeni da ari ekoko nene ijujae areva. Ne kaifa ururovo, sifo amboda Bajari jovereghe foama, evetu genembo da ari ekoko ijujarira. Sifo aminda, evetu genembo nenda uju a kotari nenda dubo jokáda jungetero irira ava, Bajari bu fitari isaghada foa buvarira. Isaghada foa buvarigido, Bajari nu ava gosuse, nendae sakai inononda sarira.

6 Agho dari eminge resira, "Erá God da Geka dariguse, genembo eni

ika bekáda jigheóvo ereure!" Agho dari aminge resira da beká mo: ne jo genembo eni jighovo erorurari, eni jo imboe ae areva. Ava kasama aovo dae sedo, na ijugaboro fiftuse, nanda javo a Apollos da javo isagha seteno niningereva.

7 Ne jo kokomana da babojegari iraeri. Nenda kotari a kasama isambu ava, God nune nemokena mutiri rurusevu. Rea nemokena irira ava, isambu God nune mutiri rurusevu. Ava sedo, erá gogore use, totofo nenda javo jigheóvo ereure!

8 Nenda irari kau mavegori, kotugo namanenda irari kau mavegori, ava kotovo dae resena. Ne susu iti fafodeva seraeva. Ne kini (kings) a kokotofuva seraeva. Avata namane jo amingo iraeri. Na uju erena amo, ne anakora kini (kings) a kokotofu edo iraetevu. (Ainda susu mo: namonde amboda God da vasa aminda, kini (kings) a kokotofu arera. Ava sedo, ne anakora kini (kings) a kokotofu edo iraeteva amo, namane barago amingaeteri. Avata geke beká mo: aindae sifo jo foa buvae irira.)

9 Namane God da aghi kakato mo, namanenda irari ava eko bekári. Na erekotena, God setiri, nunda aghi kakato da irari, kau sabua+ a babate embo da kaugo ava usira. Kau gavana evetu genembo mendeni dari amboro dae sedo, ne natofo da dom-buda ijugeoro dere jiraera aminga ava, evetu genembo namane imboe use dere jiraera. Amingeoro, aneya isambu a evetu genembo isambu namanenda mema giraera.

10 Namane Keriso dae sedo vironu seoro, evetu genembo 'geke beká irae a geke dubo kotari iraeava' sise, namane dere jiraera. O nemo, ne Keriso da natofo use, 'ne dubo kotari kakatova' seraeva. Namane fakina tefori. O nemo, ne fakina, ava koteraeva. Evetu genembo mendeni nenda irari ava gosuse, ne kakara eraera, o namanenda irari ava gosuse, namane dere jiraera.

11 Giti, namane emingedo ghuseri, a oroko barago, daba ava eraera.

Namane ighoi ambududuruse, uvu-dae dubo sagheraira. Namane embo boka evevago tefori. Keriso da gito-fuimi namane ondi dorero, endada birurughuse irera. Namane reighi tefori.

<sup>12-13</sup> Namane totofo janjagu use, namanenda uvu bayau omburaera. Genembo mave namanekena jijivu sarira amo, numokena mino eveva mutarera, a nundae esimbuguse numokena geka eveva sarera. Namane Keriso tumonderaera aindae, evetu genembo mendeni bouvu futureoro mema itatameraera amo, namane Bajari tumonduse, durumuguse irá gheraera. Evetu genembo tomanako oroko nembo kotedo gherera amo, namane babate, taká makasi embo bekári, kau sena o susunda avaga, kotedo gherera.

<sup>14</sup> Geka setena amo, fakaragori. Avata na jo, nene meka gaovo dae sedo jo gambaeri. Ne taká nanda dubo bari sasingu da kaugo edo ireva. Nemo dengoro indono dubo jovereghare dae sedo gembeni.

<sup>15</sup> Keriso da natofo ainda saramana kakato digari ambari, yama ijuga mendeni mendeni nemokena ijugaetera amo, avori. Avata Keriso da ekaresia+ jokáda, nenda afa dabako namori. Na nenda afa da kaugo edo irena ainda tuka mo: na ena nemokena buvudo, giti beká Iesu da Bino seteno ningido tumondusevu.

<sup>16</sup> Aindae sedo, na nemokena benunu resena: nane eraena, kau daba ava evu!

<sup>17</sup> Amingaovo dae sedo, na Timothy dirigaono nemokena yarira. Nu kau nanda dubo bari mandi da kaugo edo irira. Ainda beká mo: na numokena Iesu da Bino seteno ningido, nu tumondusira. Nu nanda mandi edo, Bajari da saramana e gogoghomberraira. Ava sedo, na nu dirigaono ya, namondeda jebuga seka Iesu Keriso futusira, ainda irari kau nange use irateteva ava, Timothy sari ningareva. A kotugo, na rea ekaresia+ isambukena ijuger-aena, nu daba ava sekago nemokena

ijugari gosururovo sari ningareva.

<sup>18</sup> Nenda mendeni, na jo toto nemokena yae ariá kotise, ne gogore use irera.

<sup>19</sup> Avata Bajari 'avori' sarira amo, na toto nemokena yarena. Na ya buvudo, gogore kakato amo ijujedo kasama arena, ne fakinaghae eraera, ai, geka vanembo seraera, ava kasama arena.

<sup>20</sup> Ainda beká mo: God nunda natofo+ kaifa eraira amo, jo geka vanemboi kaifa ae eraira, nu fakinaghae dabade kaifa eraira.

<sup>21</sup> Aindae sedo, gategaovo dae resena! Na ambí budo ya nemokena buvone, ai? Dubo jama budo ya nemokena buvone? Ava nesuka gategaovo dae resena.

## 5

### *5:1-13 Yagera Kato Dirigaovo Ya Ajagha Irarira.*

<sup>1</sup> Geka eni sari dae erena. Kombo yagera eko beká aminda sirorusira ainda bino ava, osa setero namane niningerera. Genembo eni mo, nu noi tofo ainda osoghae, kombo yagera use irá gheraera. Amo eko bekári. Evetu genembo mave God da Bino jo ningae irera, ne jo amingae eraera.

<sup>2</sup> Avata ne nange nange gogore edo, totofo nenda javo jigheovo eraeri? Ne dubo mema use, genembo amo dirigaovo ya ajagha irateti.

<sup>3</sup> Na jo aminda irateti. Avata kau na aminda fetedo genembo amo ijujaetena aminga ava, na anakora nanda asisiimi aminda fetirise, nanda dubo jokáda genembo ari eko use irira ava, Bajari Iesu da javoda ijujeteni.

<sup>4</sup> Ne aminda totorugareva amo, ne namonde dubo dabako edo, Iesu Keriso da fakina ava budo, na rea nanda asisiimi ijujetena ava itatamuse, ne kau daba ava aovo dae resena.

<sup>5</sup> Amo eviri: ne kombo yagera kato amo dirigedo, nenda ungo sokinembaovo Satan kena yama irise, nunda tamo fisi a tamo da fakina isambu

dadabarira. Amingarira amo, nu dubo jovereghari, Bajari da Sifo amboda furarira aminda, nunda asisi jebugarira tanojo.

<sup>6</sup> Ari ava siroretira avo gido, tatera nemoá gogore dodo, tumo darido irivu! Ne geka evia anakora ningi kasama usevu: oka sembae ojise uvá de bejeoro, aimi fisi isambu eko eraira. Kau daba aminga ava, dara kitakatako sirorarira amo, namonde isambu itatamarera.

<sup>7</sup> Ava sedo, uvá ajagha fugovo, fisi eveva arira. Amo, ari eko nenda jokáda sirorusira ava, seghe fugevu dadabari, ne sekago evetu genembo kakarago ava edo irove! Ne erego-seva, Keriso namondeda vasa budo, namondeda ari ekoko seghe fugari, eveva a kakarago aoro dae sedo, aindae ambududurusira. Ava sedo, nenda ari ekoko seghe fugevu dadabare!

<sup>8</sup> Namonde ari ekoko isambu seghe fugedo, natofo eveva a kakarago use, geka beká sise, divu fuse use dabade anumbedo, God da kirumo mindarera.

<sup>9</sup> Nanda reta giti gefusena ainda jokáda, na erá ne ari ekoko embo ainde dabade deinghuse umo eóvo dae siseni.

<sup>10</sup> Avata kote gogoghombevu! Na jo, evetu genembo God da Bino jo ningido tumondae eraera aindae sedo, geka amo gambaeri. Geka beká mo: evetu genembo God da Geka jo tumondae eraera amo, ne kombo yagera eraera, enda da gugua dighighi eraera, bagia eraera, a ove kevari ava tumonde baingheraera. Avata ari ekoko embo ainde dabade, erá umo eóvo dae sisena amo, na jo nendae saeri. Ne evetu genembo ava darigari dae saeteva amo, ne anakora ambudo endaé doyaetevu. Ainda beká mo: evetu genembo amo, ne jo daba etoto irae ava sedo, ne jo darigari da kaugo iraeri.

<sup>11</sup> Avata na geka gefusena, ainda beká mo eviri. Evetu genembo mendeni ne ekaresia+ jokada iririá sise, nemonde dabade irá gheraeva

amo, ne kombo yagera eraera, enda da gugua dighighi eraera, ove tumonde baingheraera, aji seraera, bagia eraera, a uvu fakara da oduso eraera. Na evetu genembo aindae gefuseni. Nenda ekaresia+ da natofo ari ekoko avavaga eraera, ainde dabade jo deinghuse umo ae areva. A kotugo geka eni mo: nemonde dabade jo anumbedo, bayau mindae areva.

<sup>12-13</sup> Ainda beká mo: evetu genembo God jo tumondedo nunda natofo ae irera ava, ne jo ijujareva. Nenda irari ava, God Afa kotise ijujedo, nemokena mino mutarira. O God da natofo ekaresia+ jokáda irera amo, nene ijujareva. Nenda ari ekoko kotise ijujedo, ainda mino mutareva. God da Geka aindae sise, eminge resira:

“Ari ekoko embo gategaovo ajagha fetarera!”

## 6

*6:1-11 Namonde, Nano Namendi Jo Bu Ya, Gavana Da Dombuda Koto Ae Arera.*

<sup>1</sup> Ne, nenda nano namendide beisiga areva amo, ne jo yama gavanakena buvudo, aminda koto ae areva. Ainda beká mo: gavana da jaji (judges) digarigo mo, ne jo God tumondari embo iraeri. Ava sedo, ne koto ari dae aeteva amo, ne God da natofo ainda dombuda koto aovo dadabaeti.

<sup>2-3</sup> Sifo amboda furarira aminda, namonde enda da jaji (judges) a kokotofu arera. A kotugo namonde eredo, aneya ijujarera. Amboda, namonde roera teriago ava kaifa arera. Ava sedo, oroko roera kitakatako enda eminda siroreraira, ébarago namonde kaifa aeteri. Namonde jo gavanakena yae arera.

<sup>4</sup> Dara nenda jokáda sirorarira amo, ne jo yaovo gavana tumondari irae de aimi, koto ae arera.

<sup>5</sup> Emo, meka gaovo dae sedo resena. Nenda jaji (judge) are dae sedo, genembo eni dubo koteraira ava, nenda jokáda tambareva tanojo.

Numoá tambudo, nunda dombuda koto edo ghaetevu.

<sup>6</sup> Avata ne jo amingae eraeva. Ne nunda nunda beisiga use, yama gavana tumondari iraede aikena buvudo, aminda koto eraeva.

<sup>7</sup> Geka setena, ainda eni sari dae erena. Ne nunda nunda beisiga use, ya koto eraeva amo, ne tofofo nenda irari ava isagha ijugeovo, nenda Kuristini da irari anakora gofedo irira, a ne jo Keriso da uju ava use, nano namendidae sabua+ ae eraeva ava, evetu genembo isambu kasama eraera. Ninda komana nimoá deredo, nimokena dara arira o ninda roera bagia arira, ava gido kote doyaresa amo, evevari. O gavana da dombuda koto ari saresa amo, ekori.

<sup>8</sup> Avata ne ari eko beká ava eraeva. Nemo God da natofofo. Avata ne, nenda nano namendikena dara eraeva. A nenda nano namendi tofofo tofofo dederuse, nenda roera bagia eraeva.

<sup>9</sup> Kote givu! God evetu genembo ekokoá jo kaifa ae arira. Amo ne kasama eraeva, ai? Kombo yagera kakato, mave ove kevari tumonde baingheraera, gegenembo evevetude dabade avari dodo tofofo kombo yaru eraera,

<sup>10</sup> mave bagia eraera, mave enda da gugua dighighi eraera, uvu fakara da oduso kakato, a mave aji seraera, evetu genembo amo God jo kaifa ae arira.

<sup>11</sup> Nenda mendenii giti amingedo ghuseri. Avata oroko, ne ari amo dodo jo ae eraeva. God nenda ari ekoko seghe fugetiri, ne nunda natofofo kakarago ava edo ireva. Namondeda Bajari Iesu Keriso da javoda, a Asisi Kakara da fakinaimi, ne God da dombuda fete gogoghombetevo, nu nendae 'eveva' sisira.

**6:12-20 Namondeda Tamo Mo, Asisi Kakara Da Kambori.**

<sup>12</sup> Mave God da fakina kotise sarira, "Namondeda God Afa roera isambu etiri sirorusira. Ava sedo, namokena rejo eni jo fakara ae arira; na ari sarena, isambu raugako

bekári," aminge sarira amo gekari. Avata geka beká mo eviri: roera isambu jo nemokena eveva iraeri. Na eminge saeteni, "Na rejo ari dae sarena amo, arena: jo mave buregae arira." Aminge saetena avata, nanda Bajari dabako mo, God ri. Ava sedo, roera o fisi da ari eni aimi, jo nanda bajari ae arira. Roera o ari resena aimi, nanda emboro+ ya God kena buvari ava gajarira amo, na roera o ari amo doyarena.

<sup>13</sup> Evetu genembo mendeni eminge seraera, "God nanda tini usira amo, bayau mindono dae sedo usira. Ava sedo, nanda uju ava mindarena." Aminge seraera, avata sifo amboda God sari ninda tamo tinighae dadabarira. Ava sedo, namondeda tamoimi Bajari da saramana use irarera. Ava sedo namondeda tamo aimi, jo kusia bagia o kombo yagera ae arera. Ainda beká mo: namondeda tamo mo, Bajari da tofofo.

<sup>14</sup> God Afa setiri, namondeda Bajari ambarida ghe jebugedo erorusira. Kau daba aminga ava, nune amboda sari, nunda fakina namonde jebugedo, tamoghae dabade erarera.

<sup>15</sup> Ne kasama ereva: namonde Keriso da tamori. Namondeda tamo mo, inono Keriso da ungo atari. Kote givu! Na Keriso da ungo o Keriso da ata budo ya, evetu saghere kato ainghae tatarena amo, evevari, ai? Amo eko bekári!

<sup>16</sup> Ne kasama ereva: genembo mave nunda evetughae sandi avarira amo, nengae dabade tatedo, tamo dabako a fisi dabako arira, ava kasama ereva. God da Geka aindae sise, eminge resira:

"Nengae nunda nunda ava foa tamo fisi dabako arera."

<sup>17</sup> O mave Keriso ghae dabade tatarira amo, jo tamo vanemboimi tatae arira. Nu asisi a dubo jóká isambuimi, Keriso ghae dabade tatarira.

<sup>18</sup> Na aindae sise eminge resena: namonde mo, Keriso da tamori. Ava sedo, erá nenda tamo evia budo,

kombo yagera use evetu genembo ekoko aikena bu ya tateove! Evetu genembo ari ekoko mendeni eraera amo, eniri. Avata kombo yagera eraera amo, tofofo nenda tamo bebete eoro, tamo eko beká ava eraera.

<sup>19</sup> Kasama aovo dae sise resena: nenda tamo mo, Asisi Kakara da kambori+. God nunda Asisi mutiri, asugedo nenda dubo jokáda irá gheraira. Ava sedo, nenda tamo amo, jo nesuka nenda iraeri. Ne God da tofori.

<sup>20</sup> Nu mino futuse, ne ombu rusira. Ava sedo, nenda tamo da fakinaimi, God da saramana use, nunda javo jighovo eroruse nunda duro isagha ururari gaore!

## 7

### *7:1-16 Evetu Vai Ari A Genembo Evetu Fitari Da Gekari.*

<sup>1</sup> Ne reta gefuse, geka mendeni mendeni aindae ategi useva, aindae geka ava sari dae erena. Giti, evetu fitari da geka ava sarena. Gimasa mave evetu jo fitae irarira amo, evevari.

<sup>2</sup> Avata kotugo oroko mo, kombo yagera futo erera ava sedo, gigimasa evetu fitaeteri. A ade jamena vide jamenakena vai aeteri.

<sup>3-4</sup> Genembo da tamo amo, jo tofo nune bajari ae arira: nunda tamo amo, nunda evetu da tofori. Ava sedo, nunda evetu da sari ningari ava arira. A evetu barago nunda tamo amo, jo tofo nune bajari ae arira; nunda tamo amo, genembo da tofori. Ava sedo, nunda genembo da sari ningari ava arira. Evetu genemboghae sonemba minonde minonde use irarera.

<sup>5</sup> Nivu o nearoghae avari ava jo nisuka ninda kotariimi doyaie aresa. O nengae dubo dabako edo Bajari kena benunu sari dae sedo, sifo tufako dabade avari dodo aminguse irareva amo, evevari. Avata amboda, nengae sekago tuturo edo dabade avareva. Jo amingae areva amo, Satan foa nivu o nearo derari dara sirorarira.

<sup>6</sup> Geka oroko setena amo, nenda jebuga ava sonembari dae sedo seteni. Jo nanda agho dari iraeri.

<sup>7</sup> A kotugo, amo jo nanda ujuimi saeri. Nanda uju beká mo eviri: gegenembo a evevetu isambu ne kau namongo edo iraetevu. Amo, gigimasa ne jo evetu fitae aetevu, a ade jamena jo vai ae aetevu. Avata na kasama erena: God joba a fakina dombu eni dombu eni evetu genembokena muturaira. Avori, namokena joba futusira amo, evetu jo fitae irari da fakina ava futusira. Avata evetu genembo mendeni, jo aindae joba a fakina baeri.

<sup>8</sup> Roriri a kukumboro, ade jamena a vide jamena, nemokena resena, ningivu! Ne kau aminguse irareva amo, evevari. Aminguse, ne kau nane eraena, aminga ava areva.

<sup>9</sup> Avata ne jo kotovo inono ae arira amo, evetu fiftuse a vai use ghevu!

<sup>10</sup> Gegenembo evetu fitido ireva a evevetu vai edo ireva, nemokena resena, ningivu! Emo jo nasuka nanda kotari vanembo iraeri. Emo Bajari da kotariri. Evevetu ne, nenda gegenembo jo doyaie areva!

<sup>11</sup> Genembo doyaie amo, nenda emboro etoto nakári: eni mo, ne nesuka irareva. O eni mo, sekago jovereghe yama, nenda genembo manai budo daba aminda dubo dabako edo, nemonde dabade irareva. Gegenembo barago, nenda evevetu jo doyaie areva.

<sup>12</sup> Ne isambukena resena, ningivu! Bajari nunda kotari namokena jo sari ningaeri. Na nasuka nanda kotariimi resena. Evetu genemboghae Keriso jo tumondae irise fiftusera ava, genembo aimi eredo Keriso tumondarira amo, nu emingarira. Nunda evetu eredo, nengae dabade irari dae uju arira amo, genemboá nunda evetu jo doyaie arira.

<sup>13</sup> O kotugo, evetu Keriso tumondarira amo, nu kau daba ava arira. Nunda genembo jo tumondae irira avata kotugo, nengae dabade irari dae uju arira amo, evetuá nunda genembo jo doyaie arira.

<sup>14</sup> Aında susu mo eviri: ni Kuristini evetu o genembo edo, God tumonderaesa ava sedo, nivu o nearo barago foa God kena utua arira. Gekaé, jo beká irae aetira amo, ninda sasingu barago kau evetu genembo tumondari irae de aında sasingu avavaga edo, ajagha beká iraeteri. Avata ni tumonderaesa ava sedo, ninda sasingu barago foa God kena utua fetirise, God da natofa aında jokáda irarera.

<sup>15</sup> Avata geke eında soveni ava sari dae erena. Genembo o evetu eni, nu jo Keriso tumondedo Kuristini ae iria edo, nunda Kuristini evetu o genembo ava doyarida dae sarira amo, avori, ne jo buregae areva. Sifo amında ne nenda uju ava arera. Aında beká mo: God da uju mo, namonde dubo jamaghae iraeteri, jo beisiga use irae aeteri.

<sup>16</sup> Avata ni fakina edo, ninda evetu o ninda genembo jo doyae areva amo, amboda nu Bajari tumondedo, jebuga evovoda e irarida ava tuve baririda tanojo.

*7:17-24 Namonde Keriso De Dabade Tatarera Amo, Emingarera.*

<sup>17</sup> Eni mo eviri: na ekaresia+ isambu nenda jokáda eminge ijugeraena. God nune etiri ni sirorusesi. Ni kau nange irise, God tumondedo nunda tofo usesa, kau daba aminga ava use iraresa.

<sup>18</sup> Amo, Jusi embo eni Moses da Geka kaifa use, Bajari tumondedo nunda tofo aririda amo, nu Moses da Geka jo ighagha ae aririda. O Jusi embo da gitofu genembo eni Bajari tumondedo nunda tofo aririda amo, genembo amo jo ya Jusi embokena sembudo, vika da mendo anoso ava gafugae aririda.

<sup>19</sup> Aında beká mo: namonde oroko vika da mendo anoso gafugarera o jo gafugae arera, aimi jo eveva o eko eni sirorae aririda. O Bajari da Agho Dari kaifa arera amo, jebuga tambarera.

<sup>20-21</sup> Ni sabua edo ireso, God ni aghi usirida amo, o ni kotofu edo ireso God ni aghi usirida amo, ni kau daba use

iraresa. Genembo eni ni ombiri, nunda saramana kato edo ireso God ni aghi usirida amo, avori, ni aında mema jo ae areva, ni aminguse iraresa. O goroto gido, sabua doyarida da emboro tambaresa amo, amin-garesa. Sabua doyaeva amo, ninda fakina isambu God kena mutaresa.

<sup>22</sup> Eregoseva: sabua+ da irarida a kotofu da irarida mo, inonori. Sabua+ Keriso tumondaririda amo, nu kau kotofu da kaugo aririda. O kotofu Keriso tumondaririda amo, nu kau Bajari da gimasa aririda.

<sup>23</sup> God anakora sabua+ a kokotofu isambudae mino futusirida. Amingetiri, ne nunda tofo usevu. Ava sedo, erama jovereghedo, evetu genembo mendeni da tofo eove!

<sup>24</sup> Nanda nano namendi, na sekago eminge resena: ne kau nange nange irise, God tumondedo nunda tofo useva, kau daba ava use irareva.

*7:25-40 Ade Vide Irise A Rori Kum-boro Irise, Namondeda Fakina God Kena Mutarera, Amo Evevari.*

<sup>25</sup> Oroko ade vide nenda irarida aında, geke eni sari dae erena. Bajari nunda agho dari eni, aında jo sari na ningaeri. Avata ne kasama ereva: Bajari nanda e sedo joka edo sonembururari, na dubo kotise, geke eveva nene tumondaeteva ava, mokogo seraena.

<sup>26</sup> Oroko dubo mema digarigo siroraririda ava, ne kasama ereva. Ava sedo, na erekotena, ne oroko kau mavega ireva, kau daba ava iraetevu.

<sup>27</sup> Ne evetu fitido ireva amo, avori, nenda evevetu jo doyae areva. O gigimasa ireva amo, avori, erama evetu fitarida dae sedo tava eove!

<sup>28</sup> Avata evetu fitaresa amo, jo ari eko irarida. Ne evetu fitareva a ade jamena ya vai areva amo, jo ari eko irarida. Avata ne evetu fitareva o genembokena vai areva, aında bouvu a dubo mema mendeni mendeni iririda. Ava nange darigaeteva, aında sise resena.

<sup>29</sup> Na geke resena aında beká mo eviri: sifo tufako fetetirida. Oroko tuturo edo eminguse irareva. Ni evetu fitido iraresa amo, ni gimasa irise



kau nange God tumondedo ghusesa, aminga ava tumonduse iraresa.

<sup>30</sup> Ni dubo mema edo sorara nu use iraresa, avata ni jo bate dombu use irae aresa. Ni ivuga nu use iraresa, avata ninda geke kotise durumugedo sise iraresa, jo riria teria futo ae aresa. Ninda iraridae sise, roera nu ombaresa, avata ninda roera amo jo dubo bae aresa.

<sup>31</sup> Ni bisnis (business) use iraresa, avata ninda fakina isambu jo bisniskena mutae aresa. Ainda beká mo: utu enda oroko iriri eregoseva emo, jo ghousa irae arira.

<sup>32</sup> Nanda uju mo: ne jo dubo memaghae irae aetevu. Ne kasama ereva: gigimasa nenda dubo jóká isambuimi, Bajari da saramanakena futuse irá gheraera. Ainda susu mo: ne Bajari ivuga are dae sedo amingeraera.

<sup>33</sup> Avata gegenembo evetu fitido irera amo, ne nenda evetu da uju a sari ava use, nenda fakina mokogomo, nenda irarikenana fitiraera. Ainda susu mo: nenda evevetu ivuga aoro dae sedo, ne amingeraera.

<sup>34</sup> Ne Bajari kotise irera avata kotugo, nenda fakina nenda evevetukena fitiraera. Aminguse, ne dubo etoto eraera. O kau daba aminga ava, ade jamena nenda dubo jóká isambuimi, Bajari da saramanakena futuse irá gheraera. Ainda beká mo: nenda tamo a asisi isambu God kena mutari dae uju eraera. Avata evevetu vai edo irera amo, ne gegenembo da uju a sari ava use, nenda fakina isambu nenda irarikenana fitiraera. Ainda susu mo: nenda gegenembo ivuga aoro dae sedo, amingeraera.

<sup>35</sup> Geke emo, na jo nanda agho dari nemokena fiftuse sae erena. Emo, nemo sonembuse resena. Geke eveva sise a ari eveva use, nenda dubo jóká isambuimi Bajarikenana futuse, nunda saramana aovo dae sise resena.

<sup>36</sup> Gagara mandighae datu dighero ireva, nemokena eminge resena. Mandiá nanda geke evia kotedo

nunda datu gagara ava dodo, jo fitae ari sarira amo, a nu avori. Avata nu, nunda datu gagara da uju ava kotise, a nengae nenda fisi da kotari a uju ava kotise, gagara fitari sarira amo, avori, gagaraá nu fitarira. Amo jo ari eko iraeri.

<sup>37</sup> Avata mandi eni, nanda geke resena evia kotise, nunda datu gagara doyarari sarira amo, avori. Amo, nunda fisi da uju evia buregarikenana inono arira, avori, nunda datu gagara doyarira.

<sup>38</sup> Ava sedo, mandi gimasa mave nunda datu gagara fitari dae sarira amo, evevari. Avata mandi gimasa eni nunda datu gagara doyarari dae sarira amo, eveva bekári.

<sup>39</sup> Evevetu vai edo ireva, nemokena eminge resena: nenda gegenembo jo ambae iroro, ne totofo nenda uju ava jo ae areva. O nenda gegenembo amboro, ne roriri edo irareva amo, nenda uju ava areva. Ne genembo enikenana vai ari sareva amo, avori, avata ne gegenembo Keriso tumondedo Kuristini edo irira aikena vai areva.

<sup>40</sup> Avata na erekotena: roriri jo vai ae irareva amo, evevari. Ne aminguse, dubo jamaghae irareva. Amo, nanda kotari ava resena. A kotugo na erekotena amo, God da Asisi Kakara da uju barago kau daba avori.

## 8

*8:1-13 Namondeda Kuristini Nano Namendi Nenda Tumondari A Irari Ava Kakara Use, A Dubo Ruruse Sonembarera.*

<sup>1</sup> Ne retada gefuse ategi mendeni useva, ainda geke eni eviri. Sino fuka bu ya ove kevari da dombuda de ojedo joba muturaera, aindae sari dae erena. Geke bekári: namonde kasama erera, ove kevari da beká eni tefori. Avata kasama ava budo aimi jo namondeda nano namendi sonembae eraera. Namonde kasama ava buraera aindae, namonde riria use totofo jigheoro ereraira. Amo ekori. O namondeda dubo bariimi

namonde nano namendi sonembarera.

<sup>2</sup> Genembo eni nu roera digari isambu kasama e tefo ariá koteraira, avata amo, nu tefo seraira.

<sup>3</sup> O genembo mave God dubo buraira amo, God numoá kasama use unumberaira.

<sup>4</sup> Avori, sino fuka ove kevari da dombuda de ojedo, joba muturaera, ava namonde mindarera, ai, jo mindae arera? Ainda geke sari dae erena. Namonde kasama erera: ove kevari ainda susu a beká eni tefori. A kotugo, namonde kasama erera: gode eni tefori, God Afa nu dabakori.

<sup>5</sup> Avori, evetu genembo mendeni erekotera amo, enda eminda a utuda, gode a babojegari dombu eni dombu eni ava iritirera.

<sup>6</sup> Avata namonde kasama erera: namondeda Afa God nu dabakori. Nune roera isasambu setiri sirorusira. Nunda javo jighoro erare dae sedo, namonde jebuga irera. A kotugo namonde kasama erera: namondeda Bajari dabako mo, Iesu Keriso nusuka numori. Bajari Iesu da fakinaimi, God Afa setiri utu a enda sirorusira. A nunda fakina daba aimi, namonde oroko jebuga irera.

<sup>7</sup> Avata evetu genembo mendeni, geke resena evia, jo kasama e gogoghombae irera. Ne ove kevari ava tumonduse, ne tamo useri. Ágido, sino fuka de ojedo, jobadae sedo ove da dombuda mutudo, sekago bu mindarera amo, inono, ne sino fuka ava rise, ne ove tumondarigarera. Nenda tumondari God kena jo inono iraeri. Avo gido, ne koteraera amo, sino fuka ava budo rise, ne totofo bebete ariá koteraera.

<sup>8</sup> Avata namonde God kena utua fetari da susu mo, jo sino fuka mindari iraeri. Evetu genembo mendeni God tumonduse, sino fuka mindiraera amo, ne ya God kena utua feteraera. A evetu genembo mendeni God tumonduse, sino fuka reeta eraera amo, nembargo God kena utua feteraera. God kena utua fetari da susu mo, jo sino fuka mindari o

sino fuka reeta ari iraeri. God kena utua fetari da susu mo: namonde dubo jóká isambu numokena mutarera aimi, namonde ya God kena utua fetarera.

<sup>9</sup> Avori, ne durumugedo irise, nenda nano namendi da tumondari a irari ava kakara use irivu! Erama nenda tumondari mindafuimi, nenda nano namendi da tumondari kitako ava dereóvo ne gofeore!

<sup>10</sup> Ijugaboro fifiterena: ninda tumondari teriari, a ninda komana da tumondari jo teria iraeri. Ni God tumonduse yama, ove kevari da banungari kambo aminda kirumo riruraso gido, ninda komana amo, numbarago aminda kirumo mindari dae sarira. Nunda tumondari kitako ava sedo, nengae ove kevari da banungari kambo aminda ya teredo, nu sino fuka mindarira amo, nu ove ovia tumonde bainghuse mindariá kotarira. Ava kotise mindarira amo, inono, nu ari eko arira.

<sup>11</sup> Amingarera amo, eko bekári. Ainda beká mo: Keriso ninda komana aindae sedo ambududurusira. Ava sedo, nine aso gofedo ambarira amo, eko bekári.

<sup>12</sup> Amingaresa amo, ninda namendi tumondari kitako aikena ari eko use, ni kau daba ava Keriso kena areza.

<sup>13</sup> Ava sedo, namonde emingarera. Namondeda nano namendi, sino fuka ove da dombuda de ojeraera ava, bu rise ari eko arera amo, avori, namonde sino fuka amo, evovodae reeta use irarera. Na ava kotise, erama ari ekoko use gofeure dae sedo, nanda komana sonembuse, na sino fuka jo mindae arena!

## 9

*9:1-27 Bajari Da Aghi Kakato Nenda Irari, Kau Emingori.*

<sup>1</sup> Nanda Bajari dabako Keriso numori. Ava sedo, na jo evetu genembo da sari ningari iraeri. Na Bajari da sari ningariri. Na Iesu da aghi kato eniri. Na namondeda Bajari Iesu nanda ditiimi gosuseni. A kotugo, na

nunda aghi eno beká sirorusira ava, nendae resena.

<sup>2</sup> Bajari na nunda aghi kato aono dae sedo gategusira ava, evetu genembo mendeni ighagha eraera. Avata ne jo amingae aetevu! Nanda saramana da beká nemori. Nane aghi eno, ne dubo jovereghetiri Bajari tumondusevu, aindae resena.

<sup>3</sup> Evetu genembo mendeni nandae sise aji seraera. Ava ningido, na nemokena eminge resena:

<sup>4</sup> na Bajari da saramana ururono, uvu bayau nene mutudo ghaeteva ava, avori.

<sup>5</sup> Eni mo: Iesu Keriso da ambo jimbi, Bajari da jamena, a Peter de dabade, nenda evevetude dabade deinghuse saramana eraera. Ava sedo, na uju aetena amo, na Kuristini evetu ava fitido, ainghae saramana use deinghururono, namanendae bayau mutovo mindido ghaeteri.

<sup>6</sup> Namane Barnabas ghae kikiako, saramana use namanenda uvu bayau totofo omburaera. Iesu da ambo jimbi a aghi kakato mendeni, ne jo amingae eraera.

<sup>7</sup> Eregoseva: isoro kakato nenda uvu bayau jo totofo ombae eraera. A nati embo, ne ya nenda bayau vareda irira ava, tefo bambu mindiraera, a sifi (sheep) kaifa kakato nenda sifi (sheep) da ami tefo simbe bu mindiraera.

<sup>8</sup> Namonde evetu genembo amingeraera. Kotugo God da Agho Dari kau daba aminga ava resira.

<sup>9</sup> God setiri, Moses aindae sise, eminge gefusira:

“Ne burumakavade (oxen) dabade farava vuji jasise, erá burumakavai mindeure dae sise, nunda beka erá firiove!

God geka amo, jo burumakava avanembo kotise saeri.

<sup>10</sup> Nu geka amo, namanendae kotise sisira. Genembo ya vareda veka goveraira o bayau bamburaira, amo redae erai? Ainda susu mo: nu bayau sirorari bu mindari dae sise eraera.

<sup>11</sup> Namane kau daba avori. Namane God da Geka nenda ghamo

jokáda govuseri. Ava sedo, ne namane sonembuse, bayau beká mutovo namane budo ghaeteri. Amo namanenda saramana da minori.

<sup>12</sup> Ne evetu genembo mendeni sonemberaeva. Ava sedo, namane barago, kau daba aminga ava sonembaetevu. Kotugo, namane itako begogo sonembaetevu. Ainda susu mo: namane giti nemokena era, Keriso da Bino setero niningusevu. Avata ainda sifoda, jo saoro ne namane sonembae usevu. Ainda susu mo: Keriso da Bino Eveva ava ningi kote gogoghombaovo dae sedo, namane saramana use uvu bayau totofo ombu mindido ghuseri. Amo, erama reju enii nenda tumondari da emboro gajeure dae sise, namane mema a bouvu dombu eni dombu eni isambu kote dotutuse, namanenda uvu bayau totofo ombu mindido ghuseri.

<sup>13</sup> Ne kasama ereva: gegenembo mave God da Kambo+ Jerusalem aminda saramana eraera amo, ne nenda uvu bayau aminda buraera. A gegenembo mave aminda joba mutari dae sedo, sino fuka de budo ya oltada (altar) dungeraera amo, ne joba ava budo, nenda bayaudae mindiraera.

<sup>14</sup> Kau daba aminga ava, Bajari agho dari evia futusira: evetu genembo mendeni nunda Bino Eveva ava vironu sise, nunda saramana eraera aindae sedo, ne uvu bayau tefo bu mindido ghaeteri.

<sup>15</sup> Ava sedo, na giti nemokena saramana edo ghusena aminda, uvu bayau tefo bu mindido ghaetena avata, na jo aindae benunu sae edo ghuseni. A kotugo, na jo aindae sise, geka emo gembae erena. Geka bekári: nenda sonemba jo bae eraena aindae, na tofo mandi sakai resena. Erá nanda sakai sari gunguboeure dae sise, nenda sonemba jo bae arena. Na giti ambaetena, a nu avori.

<sup>16</sup> Eregoseva, na God da Geka vironu sise irena, avata amo jo tofo nanda javo jighono erari da kaugo iraeri. Ainda beká mo: na jo tofo

nanda ujuimi amingae eraena. God nune setiri na amingeraena. Amo nanda saramanari. Ava sedo, jo amingae arena amo, na God da bouvu ava itatamarena.

<sup>17</sup> Na saramana evia nanda ujuimi aetena amo, God nandae mino teria eni mutaeti tanojo. Avata God na saramana ava aono dae sedo, na gategetiri aminguse irena.

<sup>18</sup> Ava sedo, nanda mino rejoá bareni? Amo saone? Namokena vironu sari vivi eraira. Mino a uvu bayau jo bae irise, God da Geka ava tefo vironu sise irarena amo, na ivuga arena.

<sup>19</sup> Na jo mave da sari ningari iraeri, a mave da sabua+ iraeri. Avata evetu genembo mendeni Bajari tumondaoro dae sedo, na evetu genembo isambu da sabua+ edo, nenda aghi use irena.

<sup>20</sup> Aminguse, nanda oro Jusi embo ainda jokáda saramana use irarena amo, nenda kiki a Moses da Agho Dari ava kaifa use irarena. Ne eregoseva, nanda bajari jo Moses da Agho Darikena iraeri. Avata Jusi embo mendeni Bajari Iesu tumondaoro dae sedo, na Moses da Agho Dari ava kaifa use irarena.

<sup>21</sup> Kau daba aminga ava na, namane Jusi embo da gitofu jokáda saramana use irarena amo, namanenda kiki dodo, nenda kiki ava kaifa use irarena. Namanenda gitofu resena emo, ne jo Moses da Agho Dari kaifa ae eraera. Avata, ne nange Bajari Iesu tumondaetera ava kotise, namane Jusi embo da kiki a Moses da Agho Dari dodo, na namanenda gitofu da jokáda saramana use, nenda kiki ava kaifa eraena. Avata na aminguse, God da Geka a Agho Dari ava jo doyarí beká ae eraena. Amo, na Keriso da Agho Dari ava use irena.

<sup>22</sup> Evetu genembo mendeni jo tumonde gogoghombae use, oju edo bayau dombu eni dombu eni reeta eraera. Evetu genembo amo, ne Bajari Iesu tumondaoro dae sise, nambarago bayau dombu eni

dombu eni reeta eraena. Evetu genembo isasambu, nenda irari a nenda kiki ava kotise, na nenda jokáda irise amingeraena. Ainda susu mo: na amingururono, evetu genembo mendeni ava gido, ne Bajari Iesu tumonduse jejebugarera.

<sup>23</sup> God da Bino Eveva ava ivegedo yare dae sedo, a kotugo, na nunda jebuga a esimbugari ava bari dae sise, amingeraena.

<sup>24-25</sup> Namondeda irari a tumondari kau mavego iratira, ainda ijugaboro fitari dae erena. Mave yaru jokáda teredo, sumbarira amo, nu viti fetari dae sedo, gasegi use irarira. Genembo dabako nu viti fetarira. Mendeni jo vitae arera. Ava sedo, namonde emingarera: namonde God da dombuda eveva fetari dae sedo, a nunda koana ava bari dae sedo, namonde kau sumbari kato ainda kaugo ava use, gasegi use irarira. Namonde kasama erera: enda eminda mave viti fetedo mino barira amo, mino amo soesa ari dadabarira. O mino utu da barera amo, evovodae irarira.

<sup>26</sup> Na aindae sedo God da saramana use a nunda Geka ava vironu sise, saramana e gogoghombereaena. Kau sumbari kato sumbu simbugeraira, o tataya kato jo kotae kotae ungo fugae eraira, aminga ava use, na saramana e gogoghombereaena.

<sup>27</sup> Aminguse, na fisi da uju bureguse, gasegi use irá gheraena. Ainda beká mo: evetu genembo God da natofu aoro dae sedo aghi eraena ava, ne God da dombuda eveva fetiroro, nane gofarena amo, jo eveva iraeri.

## 10

*10:1–11:1 Erá, Jusi Embo Da Abuamane Dara Usera, Aminga Ava Eóro Dae Sise, Resira.*

<sup>1</sup> Nanda nano namendi, kote givu! Nanda natofu Jusi embo da abuamane dara usera, ainda kiki ava sari dae erena. God nunda foroga mutiri giti edo iri, ne ambo gaedo ero, God setiri, esuru javo Kokoigo ava sarige

fetetiri, ainda jokáda ne atai sembis-eri.

<sup>2</sup> Foroga ainda ambo gaedo, esuru soroda sembisera amo, kau bafataito aminga ava use, ne isambu Moses de dabade tatiseri.

<sup>3-4</sup> Aminguse ero, God nunda Asisi da fakinaimi, uvu a bayau muteari ne isambu mindido ghuseri. Reighi uvu irae da vasa aminda, God ghamana afigetiri, ne isambu dabade uvu riseri. Ghamana amo, Keriso numori. Ne isambu numo-kena uvu a fakina ava budo ghuseri.

<sup>5</sup> Aminguse, ne isambu God da esimbugari a sonemba ava itata-museri. Avata nenda mendeni dara eoro gido, God ne imboe edo ghuseri. Imboe eari, ne reighi uvu irae da vasa aminda birurughudo ise, sirivo edo ghuseri.

<sup>6</sup> Kiki emo, namondeda iju-gaborori. Ne roera ekoko dighighi edo ghusera ava, erá namonde eore dae sise, kiki emo gembero irira.

<sup>7</sup> A kotugo, ove kevari tumonde bainghedo ghusera aminga ava, erá namonde eore dae sise, kiki emo gembero irira. Ne amingedo ghusera aindae, God da Geka eminge resira: “Evetu genembo anumbedo kirumo rise, ove kevari da dombuda divari dae sedo eroruseri.”

<sup>8</sup> A kotugo, namonde kusia bagia barago jo ae arera. Sifo aminda, namanenda abuamane amingetero gido, God setiri, evetu genembo 23,000 sifo dabako aminda sirivo useri.

<sup>9</sup> Namonde Bajari da fakina jo dere gae arera. Sifo aminda, abuamane gogore use amingetero, Bajari setiri jingabu digarigo siroredo aimi, evetu genembo gambiri sirivo useri.

<sup>10</sup> A eni mo, namonde jo God gisae arera. Sifo aminda, namanenda abuamane God da kavevera ava imboe edo, teria futo gisero aindae, God Ambari da Aneya mutiri vose fira ne detiri sirivo useri.

<sup>11</sup> Roera isambu resena emo, nemokena siroretiri, namondeda ijugaborodae sedo gembero irira. Namondeda ijugaboro resena ainda

beká mo: enda da tano refara utua etira ava sedo, namonde ijugaboro amo kote gogoghombarera.

<sup>12</sup> Kote givu! “Na God da dombuda inono edo irena,” ava erá seove! Evetu genembo digari, ne aminge seraera amo, ne amboda goferaera.

<sup>13</sup> Satan nunda derari kau eni kau eni, namonde evetu genembo ADD BUA HERE isasambukena foa gheraira aminga ava, nunda derari nemokena budo foa gheraira. Avata God beka gagojuse, ne sonembari dae sisira, ava sedo, jo doyari Satan nenda fakina dere gosuse fakina ururari ne gofae areva. Avata derari da sifoda, ne sonembuse fakina futururari, emboro gido inono edo, Satan da derari ava dariguse fakina e fetareva.

<sup>14</sup> Avori, Jusi embo nenda kiki setena emo, ne God da esimbugari ruruseri. Avata ne God kotae dodo, ove kevari ava tumonde bainghetero gido, God ne dorusira. Ava sedo, nanda nano namendi, erá amin-geove! A ove da banungari kambo ava gi darigaovo dae resena.

<sup>15</sup> Ne dubo koteraeva ava sedo, nanda geka sari dae erena emo, kote gogoghombevu!

<sup>16</sup> Bajari da kirumo amo, namondeda esimbugariri. Nunda agha aindae aiyako sedo, dabade fumbu rise, nunda ororo namondeda averegusira aimi, namonde Keriso de dabade tateraera. A kotugo, farava jighi embebebedo rise, nunda tamo namondeda sedo futusira aimi, namonde Keriso de dabade tateraera.

<sup>17</sup> Farava da susu mo dabako Keriso numori. Namonde digariri. Avata farava dabako evia rise, namonde Keriso de dabade tatedo, tamo dabako arera.

<sup>18</sup> Nanda natofo Jusi embo da ari ava kote givu! Joba God dae sedo oltada (altar) dungeoro aviraira ava, mave mindiraira amo, nu aminguse, God ghae dabade tateraira.

<sup>19</sup> Avori, nanda geka ainda tuka mo rejori? Kote givu! Ove keveraera aikena, fakina eni tefori. A

kotugo, sino fuka jobadae sedo, ove da dombuda de ojeraera amo, jo ove kevariimi bu mindae arira.

<sup>20</sup> Amo isagha bekári. Avata geka evia kotovo dae sise resena. Sino fuka olta (altar) ove da dombuda de ojeraera amo, sukaru da jobari. Amo jo God da joba iraeri, jo numokena mutae eraera. Ava sedo, mave sino fuka ava mindarira amo, nu aminguse sukarude dabade tatarira. Avata nanda uju mo: ne jo sukarude dabade tatae aetevu.

<sup>21</sup> Ne jo Bajari da agha bu mindido, kotugo jovereghe yama, sukaru da agha bu mindae areva. A kotugo, ne jo Bajari da kirumo mindido, kotugo jovereghe yama, sukaru da kirumo mindae areva.

<sup>22</sup> Amingareva amo, inono, ne Bajari da ghamo derovo erari, nu janje eko arira. Amingarira amo, ne jo fetae areva.

<sup>23</sup> Ne God da fakina kotise sareva, “Namondeda God Afa roera isasambu etiri sirorusira. Ava sedo, na rea ava uju ari dae sarena amo, evevari,” aminge sareva, amo gekari. Avata geka beká mo eviri: roera isambu jo nemokena eveva iraeri. Mendeni eveva a mendeni ekokori. Roera mendeni areva aimi, nenda nano namendi sonembareva. O roera mendeni areva aimi, nenda nano namendi jo sonembae arira.

<sup>24</sup> Ni tofo ninda jebuga vanembo erá koteose! Ninda komana da jebuga barago kote simbugaresa.

<sup>25</sup> Ne emingareva: ne oka rejo ava ombari vasada gido uju areva ava, ombu mindareva. Ove da dombuda de ojarera o tefo de ojarera, aindae jo ategi ae areva.

<sup>26</sup> Ainda beká mo, God da Geka eminge resira:

“Enda emo, God da tofori, a roera isasambu endada irira amo, Bajari da tofori.”

aminge resira. God sino fuka isasambu endada fiftusira. Ava sedo, kotae mindaresa.

<sup>27</sup> Kau daba aminga ava, genembo mave Iesu jo tumondae irira aimi, sari numokena esa yaresa amo, nu

bayau rea mutarira, ava mindaresa. Ni Bajari tumonduse, kotae mindaresa. Ove da dombuda de ojarera o tefo de ojarera, aindae jo ategi ae areva.

<sup>28-29</sup> Avata mave eredo nimokena, “Oka emo ove kevari da dombuda de ojeteri,” saetira amo, oka amo jo mindae aetesi. Tofo nindae sedo jo doyae aetesi. Ai resira amo, genembo aminge saetira, nu God da fakina jo tumonde gogoghombae eraira ava sedo nundae doyaetesi.

O ni eminge saetesi, “Komana da tumondari, nunda kiki, a nunda kotari ava na jo kotae eraena.

<sup>30</sup> Na God tumonduse, numokena aiyakoe sedo, bayau kotae bu mindiraena. Ava sedo, nanda komana da kotari ava jo kotae arena,” aminge saetesa amo, a nu avori, avata dabako saono ningaresa.

<sup>31</sup> Ni rea areva amo, God da javo jighaso erare dae sedo areva. Bayau mindaresa o doyaresa amo, God da javo jighaso erare dae sedo amingaresa.

<sup>32</sup> Jusi embo, nenda gitofude dabade nemokena, a kotugo, nenda nano namendi God da ekaresia+jokáda irera nemokena, erama ari eni eovo gido gofeore!

<sup>33</sup> Na emingeraena. Evetu genembo isambu, Bajari Iesu tumondaoro dae sedo, na nanda uju dodo, nenda kiki a koana kotise, nenda uju ava eraena. Na jo nanda eveva a nanda jebugadae kotise ae eraena. Evetu genembo jebuga baoro dae sedo, na amingeraena. A ne kau daba aminga ava, aovo dae sise resena.

## 11

<sup>1</sup> Na Keriso da amboda amboda use, nunda ari ava use irena. Ne, nane use irena, kau daba aminga ava, aovo dae sise resena.

*11:2-16 God Tumonde Bainghuse, Geka Evevada Sise Dabade Irareva.*

<sup>2</sup> Na nendae sakai resena. Ainda susu mo: na rea sisena a ijugusena ava, use ireva.

<sup>3</sup> Avata oroko ijuga eni mutari dae erena, ningivu! Gegenembo isambu, nenda Bajari Keriso numori. A gegenembo isambu ne, nenda evevetu da bajariri. A kotugo, God Afa nu Keriso da Bajariri. Ava sedo, evevetu nenda gegenembo kakara arera, a gegenembo ne Keriso kakara arera.

<sup>4</sup> Avori, namondeda kiki rea resira, ava kotarera. Genembo mave kekesa asugedo o foiya ombudo ya teredo, tumonde bainghuse eredo banungarira o vironu sarira amo, nu aminguse, Keriso da javo eko use Keriso jo kakara ae arira.

<sup>5</sup> O kotugo, evetu mave foiya jo ombae yama teredo, tumonde bainghuse eredo banungarira, o feroveta da saramana use God da Geka isagha sarira amo, nu aminguse, nuvu da javo eko use, nuvu jo kakara ae arira. Amo meka gariri.

<sup>6</sup> Foiya asugari imboe arira amo, eveva mo, nunda beo arugaeti. Avata nunda beo gafarira o arugarira amo, nu meka garira. Ava sedo, erá meka geure dae sedo, foiya ombare dae resena.

<sup>7</sup> Gegenembo kekesa jo asugae aetera, o foiya jo ombae aetera ainda beká mo eviri: God giti beká usira amo, genembo kau numoá evavaga, nunda usasa ijugari dae sedo, etiri sirorusira. O evetu, genembo da duro a usasa ava ijugare dae sedo, etiri sirorusira.

<sup>8</sup> Ai resira amo: evetu jo genembo da susu iraeri. God giti genembo edo, genembo da etu eniimi budo, evetu etiri sirorusira.

<sup>9</sup> A genembo usira amo, jo noaro ava sonembare dae sedo, jo ari siro-raeri. O evetu mo, nu nuvu sonembare dae sedo, etiri sirorusira.

<sup>10</sup> God da aneyai namonde giraera. Ava sedo, nemo kotise, evevetu foiya ombudo God tumonde bainghaeteri. Amingarera amo, aneya kasama arera: evevetu ne, nenda nuvumane kakara use, nenda sari ava ningiraera.

<sup>11</sup> Avata namonde Bajari da natofo

namondeda irari emingeraera: genembo jo nusuka fetae eraira, a noaro jo nusuka fetae eraira. Nengae dabade tatedo irá gheraera.

<sup>12</sup> Ainda beká mo: God genembo giti etiri sirorusira. Ainda amboda, genembo da etu eniimi evetu etiri sirorusira. Avata oroko, gegenembo isasambu evevetu da fumariri. A gegenembo a evevetu isasambu ainde dabade, a kotugo roera isasambu ainda susu mo, God Afa numori.

<sup>13</sup> Ne totofo kotovo dae resena: evetu foiya jo ombae yama tere God tumonde bainghuse, eredo God kena banungarira amo, evevari, ai tefo?

<sup>14-15</sup> Namonde Keriso da Bino jo ningae irise eminge kotedo ghuseri, “Genembo da beo baduru arira amo, meka garira. O evetu amingarira amo, evevari. Nenda jiro gajare dae sedo, God nu evevetu da beo futusira,” aminge kotedo ghuseri. A oroko, namonde kau daba aminga ava kotise amingaeteri.

<sup>16</sup> Avata kotugo, mave aindae sedo beisiga arira amo, na nundae eminge resena. Amo, namane a God da ekaresia+ isambu amingeraera.

### *11:17-34 Bajari Da Kirumori.*

*(Matthew 26:26-29; Mark 14:22-25; Luke 22:14-20)*

<sup>17</sup> Oroko geka eni sari dae erena. Avata na geka evia sise, jo nendae sakai sae arena. Ainda beká mo: ne God tumonde bainghuse, dara edo beisiga eraeva. Aminguse irareva amo, eveva mo, ne God tumonde bainghari doyaeteva, ava avori.

<sup>18</sup> Dara da mendo mo eviri: ne soroda sarigedo, nunda nunda edo beisiga eraeva ava, setero nininguseni. Ningido, na tofo mandi kotiseni, “Geka ainda jokáda, beká eni irira tano,” ava kotiseni.

<sup>19</sup> Avata kotugo ne beisiga use irareva amo, eveva bekári. Ainda beká mo, ne beisiga ururovo gido, geka beká mave resira, a gungubo mave resira ava totoi kasama arera.

<sup>20</sup> Avata geka evia sari dae erena. Ne totorugedo totofo nenda bayau

mindido, ainda amboda Bajari da Kirumo Kakara mindiraeva amo, ne jo simbugedo mindae eraeva.

<sup>21</sup> Amo, ne bayau rise sembae eraeva. Genembo eni mo, nu bayau irarira ava sedo, nu giti mindarira. A genembo eni mo, numokena bayau tefo ava sedo, nu ighoi itatamarira. O genembo eni mo, nu vaini (wine) teria ava mindido jiro birurugarira.

<sup>22</sup> Amo ekori. Ni ninda bayau eveva moni teria aimi ofusesa ava, bu yama riruraso, ninda komana makasi emboá meka garira amo, jo eveva iraeri. Amo inono, ni ninda komana a God da ekaresia+ kotae aresa. Amo ari eko beká ava eraeva. Ne amingeraeva aindae sedo, na jo nendae sakai sae arena. Kote givu! Nenda kambo irira. Ava sedo, ne ighoi itatamareva amo, ne giti kamboda irise bayau mindido, amboda foama dabade Bajari da Kirumo Kakara durumugedo mindareva.

<sup>23</sup> Bajari da Kirumo Kakara nange arera ainda ijuga, Bajarikena rurusena ava, nemokena giti ijuguseni, kotugo oroko sekago sari dae erena. Judas namondeda Bajari Iesu aito usira, ainda gitida tumba daba aminda, Iesu nu farava budo,

<sup>24</sup> God kena 'aiyakoe' sedo, jighi embebegusira. Embebeguse, sisira, "Nanda tamo nendae sedo erefutena, eviri. Evia bu rise, na kotedo ghevu!"

<sup>25</sup> Aminge sedo, bayau mindero dadabetiri ainda amboda, Iesu nu kau daba ava use, agha jighiri eretiri, eminge sisira, "God nune beka gagojuse, numokena ya buvari da emboro+ seka, nanda ororoimi afigari sisira amo, eviri. Totorugedo mindido ghareva amo, na kotise amingedo ghevu!" aminge sisira.

<sup>26</sup> Avori, Bajari jo jovereghe furae irari, namonde farava a vaini (wine) evia mindarera amo, namonde Bajari da ambari da tuka ava osa sise irarera.

<sup>27</sup> Eni mo: mave nunda dubo jóká jo simbugae irise, Bajari da Kirumo

Kakara mindari dae sarira amo, nu aminguse, Iesu da tamo a ororo ava bebete use, ari eko arira.

<sup>28</sup> Nu giti tofo mandi nunda dubo jóká simbugedo, ari ekoko ijujedo ainda amboda mindarira.

<sup>29</sup> Ainda beká mo: genemboá Bajari da tamo kotae mindarira amo, nu aindae God da janje eko ava tofo itatamarira.

<sup>30</sup> Ne amingeraeva ágido, nenda mendeni kae tambudo fafasirera, a mendeni sirivo useri.

<sup>31</sup> Mave tofo mandi nunda dubo jóká simbugedo, nunda ari ekoko ijugarira amo, God genembo ainda ari ekoko jo ijujedo, aindae mema eni mutae arira.

<sup>32</sup> O namonde ari ekoko aoro God ijujedo, aindae mema namondekena mutarira amo, nu susudae mutarira. Namonde dubo jóká simbugedo ari eveva use, erá evetu genembo ekokode dabade, sirivo eóro dae sise amingarira.

<sup>33-34</sup> Ava sedo, nanda nano namendi, Bajari da Kirumo Kakara dabade mindari dae sareva amo, tofo tofo kaifa edo dabade anumbedo durumuge mindido, ainda amboda Bajari da Kirumo Kakara mindareva. O ighoi itatamareva amo, giti kamboda mindido, ainda amboda ya Bajari da Kirumo Kakara mindari dae sedo totorugareva! Erá God da mema a janje eko beove dae sise amingareva. Avori, setenere. Na amboda ya nemokena buvudo, geke mendeni mendeni saono ningovo dambu arira.

## 12

*12:1-11 Asisi Kakara Aimi, Joba A Fakina Dombu Eni Dombu Eni Namondekena Mutturaira.*

<sup>1</sup> Avori, nanda nano namendi, God da Asisi aimi joba a fakina muturaira, ainda geke da tuka ava kasama aovo dae sedo, itako sari dae erena.

<sup>2</sup> Ne Iesu jo tumondae irevo, Satan ne dereari ove kevari ava tumondedo ghusevu. Ove da fakina tefori, a kotugo, ove aimi beka jo sae eraira. Avata Satan da derariimi, ove



tumonduse bundedo iriavu. Ava ne kasama ereva.

<sup>3</sup> Ágido, mave Asisi Kakara da fakina budo aimi saramana eraira amo, nange kasama aeteva ava, saono ningareva. Mave jo God da Asisi Kakara da fakinaimi, Iesu kena simbora use, “Iesu mo, nu ekori; ava sedo God nu dare!” jo sae arira. A eni mo: mave jo tofo nunda fakinaimi a nunda ujuimi, “Iesu nu Bajariri,” jo sae arira. Mave aminge sari dae arira amo, nu Asisi Kakara da fakinaimi sarira.

<sup>4</sup> Avori, God da joba a fakina dombu eni dombu eni irira. Avata joba mutari kato mo dabako, God da Asisi Kakarari.

<sup>5</sup> Namonde saramana dombu eni dombu eni eraera, avata kotugo, namonde isambu Bajari da saramana eraera.

<sup>6</sup> Namonde fakina a sonemba dombu eni dombu eni buraera, avata kotugo, fakina a sonemba da susu mo dabako, God Afa numori.

<sup>7</sup> God da Asisi Kakara nunda ekaresia+ tomanako sonembari dae sedo, nu joba a fakina dombu eni dombu eni ava, God da natofo isambukena muteari buraera.

<sup>8</sup> Asisi daba aimi nunda fakina futuse, genembo enikena seari ningido, God da dubo kotari eveva ava natofokena ijugeraera, a kotugo, Asisi daba aimi, genembo enikena geka jungarida ava kasama ari da fakina futureari budo isagha seraira.

<sup>9</sup> Asisi daba aimi, tumondari da fakina genembo enikena muteari budo, benunu sirurari ainda beká ava foa isagha eraira. A kotugo, nu genembo enikena, sari jebugari da fakina muteari budo, seari kae evetu genembo jejebugeraera.

<sup>10</sup> Kau daba aminga ava, Asisi Kakara tano ari da fakina muteari budo, genembo eni tano a ari bouvu urureari, evetu genembo jo gae iriara ava gido dudukugheraera. A Asisi Kakara aimi sonembuse, feroveta ari da fakina genembo enikena futureari, God da kotari ava osa seraira. Asisi daba aimi, genembo

enikena ijugurureari, Asisi Kakara da fakina kau mavego, a Satan da fakina kau mavego ava gi kasama use osa seraira. Asisi Kakara daba aimi, nu genembo enikena geka tinongu sari da fakina ava muteari budo, nu geka mendeni jo kasama ae irá gheraira aimi, vironu a geka seraira. A geka tinongu seraira amo, geka jovereghari da fakina muteari genembo enii budo, nune geka jovereghari foa isagha eari natofo ningiraera.

<sup>11</sup> Asisi Kakara evetu genembo-kena, joba a fakina dombu eni dombu eni muteari buraera, avata numo dabakori. Nunda uju ava use, nu God da joba a fakina ghaseari, evetu genembo buraera.

### *12:12-31a Namonde Tofo Tofo Sonembuse, Fakina Barera!*

<sup>12</sup> Keriso da ekaresia+ ainda kau mo, genembo da tamo avavagori. Nunda ungo, ata, diti, beka, a dengoro, gari nunda nundari. Avata isambu tatedo, tamo dabako edo irira.

<sup>13</sup> Na tamo dabako resena emo, namondedae resena. Ainda beká mo: namondeda mendeni Jusi embo, a mendeni nanda natofo Jusi embo da gitofuri. A kotugo, namondeda mendeni mo kokotofuri, a mendeni sabuari. Namonde isambu, God da Asisi dabakoimi bafataito edo tamo dabako edo irera. A nunda Asisi daba ava, namondekena futusira.

<sup>14</sup> Eregoseva: tamo mo jo roera dabako iraeri. Roera nunda nunda ai tatedo, tamo dabako edo irira.

<sup>15</sup> Atai eminge saeti, “Na jo ungo iraeri, ágido, na jo tamo da roera eni iraeri,” aminge saetira amo, gungubori.

<sup>16</sup> O dengoroi eminge saeti, “Na jo diti iraeri, ágido, na jo tamo da roera eni iraeri,” aminge saetira ábarago, gungubori.

<sup>17</sup> Ainda beká mo: tamo isambu diti vanembo iratira amo, geka jo ningae aeti. O tamo isambu dengoro vanembo iratira amo, masa jo fumbae aeti.

18-20 Avata ne eregoseva: God nunda uju ava use, evetu genembo da tamo esimbugetiri sirorusira. Roera dabakoimi jo tamo ae arira. God nu roera dombu eni dombu eni bu esimbugedo tatetiri, tamo dabako sirorusira.

21 Ava sedo ditiimi ungokena jo eminge sae arira, “Emo nane arena. Ni yasi!” a jo sae arira. O jiroi barago, atakena jo eminge sae arira, “Emo nane arena. Ni yasi!” a jo sae arira.

22 Ne eregoseva: tamo da roera mendeni aikena, jo fakina teria iraeri. Avata kotugo, nunda nunda iratira amo, tamo eko aeti.

23 A tamo da roera mendeni aindae meka gido gari imboe eraera. Ava kakara use kaifa e gogoghombereaera.

24 O tamo da roera garigo, namonde jo kakara use kaifa ae eraera. God tofo mandi tamo da roera mendeni kakara aoro dae sedo, kote gogoghombedo etiri siroredo irira.

25 Aindae sedo, namondeda tamo da roera jo nunda nunda saramana ae eraera. Ne dabade edo, tofo tofo inononda sonemberaera.

26 Roera dabako, ungo o ata avavaga, mema itatamarira amo, tamo isambu mema sarira. Tamo da roera enidae sakai sarira amo, tamo da roera isambu ainde dabade ivuga arera.

27 Avori, ne isambu Keriso da tamori. Nunda tamo da ungo, ata, diti, beka, a dengoro nemori.

28 God nu namonde bu dabade tatedo, nunda ekaresia+ esimbugedo, namondeda saramana gategusira. Saramana resena amo, eviri. Giti mo, nunda aghi kakato fitido, ainda diroru nunda feroveta fitido, a ainda amboda mo, ijuga kakato fifitusira. Ainda amboda, evetu genembo nene, tano mendeni mendeni aoro gido dudukughari, ainda evetu genembo ava fifitusira. Kotugo evetu genembo mendeni, nene saoro kae embo jebugari ava fifitusira. Ainda amboda, sonemba kakato, saramana da giti jighari

kakato, a evetu genembo mave geka mendeni jo kasama ae irise, aimi vironu a geka sari ava fifitusira.

29 Namonde isambu jo aghi kakato iraeri. Namonde isambu jo feroveta o ijuga kakato iraeri. Isambui jo tano aoro evetu genembo gi dudukughae eraera.

30 Namonde isambui jo saoro kae evetu genembo jebugae eraera. A kotugo, namonde isambui jo geka mendeni kasama ae irise, aimi vironu sae eraera, o ainda geka da mino jo jovereghaoro evetu genembo ningae eraera.

31 Avori, God da joba a fakina isambu eveva vanembori, avata mendeni mo, eveva bekári. Ava sedo, God da joba a fakina eveva beká ava bari dae sedo fakina evu!

### *12:31b–13:13 Dubo Bari Mo Eviri.*

God nemokena joba ningiava mutarira aimi, saramana use irareva. Avata ainembo saramana use irareva amo, jo inono iraeri. Ava sedo, na emboro evevago eni ijugari dae erena.

## **13**

1 Namonde God da fakinaimi, oro eninda geka jo kasama ae irise, aimi vironu sarera, o aneya da gekaimi vironu sarera amo, evevari. Avata dubo bari tefo vironu vanembo sarera amo, tefo duka vanembori, geka beká eni tefori.

2 Namonde God da feroveta edo, geka isambu kasama edo, a kotugo geka jungarida ava, isambu kasama arera amo, evevari. Avata dubo bari tefo irarira amo, namondekena beká eni tefo bekári. O tumonde gogoghombuse saoro, doriri gigise sembi ya sovenikena fetarira amo, evevari. Avata amo tumondari da tano vanembori, beká eni tefori. O namondekena dubo bari tefo irarira amo, namondekena beká eni tefori.

3 Namondeda gugua oriro edo, ainda mino isambu makasi embokena ghasarera, o Iesu jo ighagha ae aoro gido, Iesu da gitofuimi namonde sandido dungoro avarera amo, evevari. Avata amingururo,

namondekena dubo bari tefo irarira amo, namonde itako jo sonembae arira.

<sup>4</sup> Dubo bari da susu mo, eviri. Durumugedo, veka eveva use kavevera aresa. Komanadae bengoso jo ae aresa. Ninda binodae sise jo ivuga ae aresa, a ni jo tofo sakai sae aresa.

<sup>5</sup> Dubo bari mo, komana jo isimbuse dombuda sae aresa, nu kakara aresa. Dubo bari mo, jo emingae aresa. Jo nisuka nimoá kotise, dighighi ae aresa. Ni jo totoi dubo mema use janje eko ae aresa. Jo komana da ari ekoko aindae gisari futo ae aresa.

<sup>6</sup> Dubo bari mo, jo komana da ari ekoko ijujuse, ivuga ae aresa. Avata geka beká nininguse, riria aresa.

<sup>7</sup> Dubo bari jo sifo ningi aminda tafusegae arira, gombu tefori. Avo gido, dubo bari mo, ni sifo ghousa komana tumonduse, ninda komana rejo eveva ari dae erira ava, durumugedo gigituse iraresa.

<sup>8</sup> Dubo bari mo, evovodae irarira. Feroveta da vironu sari amo, ya dadabarira. Geka da beká jo kasama ae irise tinongu sari amo, ya dadabarira. A dubo kotari barago, ya dadabarira.

<sup>9</sup> Aindae beká mo: oroko namonde God da fakinaimi, nunda geka itako isagha seraera, a itako dubo koter-aera.

<sup>10</sup> Avata sifo amboda, Geka Numo Beká a Dubo Kotari Beká isagha ururari, namondeda geka a dubo kotari kitako emo ya dadabarira.

<sup>11</sup> Namonde sasingako irise sasingu da geka, kotari, a itatamari ava use iriari. O oroko emo, genembo eteri. Ava sedo, namonde genembo da sari ava sise irera. Sasingu da kotari amo dotutuseri.

<sup>12</sup> Kau namonde sasingako irise edo ghusera, aminga ava, oroko namonde God da dangio mo, tumba jokáda garigo garigo eraera. Avata sifo amboda diti basari, nu namonde, dombu minonde minonde garera. Aindae beká mo: namonde oroko God itako kasama arigerera

avata, namondeda kasama tufakori, jo inono iraeri. Avori, oroko mo, God nu namonde kasama e gogoghom-buse irira. Kau daba ava, amboda namonde nu kasama e gogoghom-barera.

<sup>13</sup> Avori, geka etodaba evia irira. Tumondari, kaifa gigita use irari, a dubo bari, avata geka etodaba einda jokáda, teriago beká mo, dubo bariri.

## 14

### *14:1-25 Namonde God Tumonde Bainghuse, Emingarera.*

<sup>1</sup> Avori, dubo bari da emboro aminda yari dae inini use, fakina e gogoghombevu! Aminguse, God da Asisi da joba a fakina mendeni uju use, ava bari dae fakina evu! Joba eveva beká mo, ne feroveta edo God da Geka isagha saetevu. Ava sedo mokogo mo, ne aindae joba ava bari dae sedo fakina aetevu.

<sup>2</sup> Aindae susu mo: mave geka mendeni jo kasama ae irise, geka aimi seraira amo, nu geka sirureari God nusuka ningiraira. Nu geka tinongu sise, God da Asisi da fakinaimi geka jungarida ava seraira. A nu evevari. Avata God nusuka ningi kasama eraira, jo mave eniimi nunda geka tinongu ava nininguse, tuka bae eraira.

<sup>3</sup> O God da feroveta, nu geka sirureari evetu genembo ningido, sonemba, fakina, a dubo jama ava buraera. Amo eveva bekári.

<sup>4</sup> Genembo mave geka jo kasama ae irise, geka aimi seraira amo, nu tofo sonemberaira. O God da feroveta mo, nu evetu genembo isambu sonemberaira.

<sup>5</sup> Ne isambu geka mendeni jo kasama ae irise, geka aimi vironu saeteva, o aimi banungaeteva amo, na ivuga aeteni. Amo evevari. Avata kotugo, ne isambu feroveta aeteva amo, na ivuga beká ava aeteni. Aindae susu mo: mave God da Geka isagha seraira amo, nu sonemba tomanako natofokena muturaira. Avata genembo geka eni jo kasama ae irise, geka aimi seraira

amo, jo natofokena sonemba teriago mutae eraira. O nunda komana eni eredo, geka tinongu setira ava, jovereghari natofo ningarera amo, natofo sonembarira.

<sup>6</sup> Nanda nano namendi, kote givu! Na yama nemokena buvudo, geka eniimi sirurono ningido, tuka jo bae areva amo, na aminguse ne sonembarena, ai? Tefo. Na jo itako ne sonembae arena. Avata kasama seka ijugaono gi kasama areva, o God da Geka seka afigaono kasama areva, o vironu sise dengoro indarena amo, sonemba bekári.

<sup>7</sup> Feku sembae fusiroro o sino sembae doruroro, mave dubo jo kasama ae arira.

<sup>8</sup> O tavuya saone? Tavuya duka sembae fusarira amo, mave jo tataya ari dae sedo simbugae arira.

<sup>9</sup> Kau daba aminga ava, ni geka tinongu sise vironu saresa amo, ninda geka da tuka, mave jo kasama ae arira. Ninda geka tefo babari-garesa.

<sup>10</sup> Endada geka nunda nunda irira amo, digari ambari ekori. Geka resena emo, isambu tukaghaeri.

<sup>11</sup> Avata genembo enii eredo, geka tinongu sirurari ningido, geka da tuka jo kasama ae arera amo, namonde inono nunda gitofu da kaugo arera. Namonde minonde minonde geka se ningari bunarera. Avata nu feroveta edo, God da Geka isagha sarira amo, namonde nunda geka ningido, mino barera.

<sup>12</sup> Ava kotise, na eminge resena. Ne Asisi Kakara da joba a fakina kau eni kau eni ava uju eraeva. A nu evevari. Avata joba mendeni mutari baresa amo, nisuka ninda jebugadae sedo, erefutira. O mendeni mutari baresa amo, budo aimi natofo isambu sonembaso dae sedo, erefutira. Ava sedo, joba rejoimi evetu genembo isambu sonemberaira ava bari dae sise, e gosuse fakina evu!

<sup>13</sup> Eminge sise resena: genembo mave geka jo kasama ae irise, geka aimi vironu seraira amo, eveva mo, nu geka jovereghedo, tuka isagha

sari da fakina ábarago bari dae sise, banunguse iraeti.

<sup>14</sup> Ne eregoseva: Asisi Kakara sonembari, namonde geka jo kasama ae irise, geka aimi sise banungarera amo, namondeda asisikena inonori. Avata jo namondeda kotariimi banungae arera.

<sup>15</sup> Ava sedo, na nangareni? Na emingarena. Umbu eni, na geka tinongui sise nanda asisiimi banungarena. Kotugo umbu eni, tofo nanda geka aimi sise, nanda kotariimi kotise banungarena. Umbu eni, nanda asisiimi yaru divarena, kotugo umbu eni, tofo nanda geka aimi, nanda kotariimi kotise yaru divarena.

<sup>16</sup> Ainda beká mo: ni tumonde bainghuse, geka tinonguimi sise God Afakena 'aiyakoe' saresa amo, ninda komana nange kasama edo, ninda banungari sonembuse, 'Ai, bekári!+' sari? Nu ninda banungari da tuka bunarira ava sedo, nu ninda banungari jo sonembae arira.

<sup>17</sup> Ni tumonde bainghe gogoghom-baresa tanojo. Avata ninda komana aminda sonemba eni jo bae arira.

<sup>18</sup> Na nasuka irise banunguse, God Afa tumonde baingheraena amo, na umbu digari geka eni jo kasama ae irise, geka aimi banungeraena. Na teria futo geka tinonguimi banungeraena. Ne jo namongo iraeri.

<sup>19</sup> Avata God tumonde bainghari dae sedo totorugarera amo, na emingari uju erena. Na geka tufatafako namondeda gekaimi saono, evetu genembo ningi kasama edo ijuga a sonemba barera amo, evevari. O na geka eni jo kasama ae irise, geka aimi vironu ghousa ambari sarena amo, evetu genembo jo sonembae arena. Ainda beká mo: ne nanda geka tinongu ningido, ainda tuka jo kasama ae arera.

<sup>20</sup> Nanda nano namendi, erá sasingu da kotari ava koteove! Geka bekári: sasingu jo ari eko ari dae sedo, manaka gayae eraera. Amo ari evevari. Nembarago aminguse

iraetevu. Avata sasingu kotae kotae eraera aminga ava, erá eove dae sise resena. Evetu genembo beká da kotari ava use irovo dae resena.

<sup>21</sup> God da natofo Jusi embo gogore edo God imboe etero aindae, God setiri nunda Geka jokáda eminge gembero irira:

“Bajari resira: ‘Na evetu genembo geka tinongu seraera ava dirigaono, yama nanda natofo ava ijugaoro garera.

Na teana embo, geka nunda nunda seraera ava, mutono nemokena yarera avata,

nanda natofo nenda gogore amo jo doyae irise, nanda geka jo ningae arera.’ ”

God da Geka aminge resira.

<sup>22</sup> Avori, geka amo tege gido kasama aovo dae sise resena: gogore kakato a evetu genembo mave God jo tumondae eraera, nange oju edo dubo jovereghaetera aindae sise, God amingusira. Eregoseva: geka tinongu sari mo, God da tano evetu genembo jo tumondae eraera aikenari. Ava sedo, ne geka eni jo kasama ae irise, geka aimi, vironu sareva amo, ne evetu genembo mave jo tumondae eraera, aindae areva. Avata God da geka isagha sarera amo, God da natofo nenda geka ningido, jebuga a fakina bareva.

<sup>23</sup> O eni mo: ne isambu geka jo kasama ae irise, geka aimi tuturo edo vironu sirurovo, genembo eni foa nunda gitida tere ningarira amo, nu eminge kotarira, “O ne isambu dagheteri!”

<sup>24-25</sup> O ne isambu feroveta edo God da Geka isagha sirurovo, genemboá foa teredo ningarira amo, nunda ari eko ava kotarira. Nu geka rea ningarira aimi, nunda dubo jokáda rea jungeraira ava, isagha ari oju edo tumo darido, God Afa tumonde bainghuse eminge sarira, “Geka bekári: God nemokena irira.”

*14:26-40 God Tumonde Bainghari Dae Sedo, Durumuguse Esimbugareva.*

<sup>26</sup> Ava sedo, nanda nano namendi, nanda geka da tuka oroko isagha saono ningareva. God tumonde bainghari dae sareva amo, ne emingareva! Genembo eni eredo, yaru gatarira. A eni ijuga mutarira. A genembo eni, God da Geka seka ava isagha sarira. Kotugo genembo eni, geka eni jo kasama ae irise, geka aimi vironu sarira. A eni, komana da geka ava jovereghari natofo ningarera. Ne rea areva amo, ne ekaresia+ isambu ava sonembari dae sise, amingareva!

<sup>27</sup> Avori, mave geka jo kasama ae irise, geka aimi vironu sari dae simbugarira amo, ne emingareva! Evetu genembo etoto o etodaba avavaga, geka tinonguimi vironu saoro tano arira. A jo isambu dabade tuturo edo, vironu sae areva. Eni geka se dadabari, kotugo eniimi tuturo arira. Amingareva! Avori, saoro dadabari, genembo enii eredo, tinongu geka amo jovereghari ainda tuka isagha ari, natofo ningi kasama arera.

<sup>28</sup> O ni geka tinonguimi vironu sari kotaresa amo, ni itatame garesa! Genembo eni ninda geka jovereghari kato aminda irarira amo, ni geka tinongui vironu saresa. O ninda geka jovereghari kato aminda tefo garesa amo, ni jo beka afigedo, geka tinonguimi vironu sae aresa. Ni tofo dubo jokaimi, God kena banungaresa.

<sup>29</sup> Feroveta etoto o etodaba eredo geka siruroro ningido, natofo isambu nenda geka ava ningi kote simbugarera.

<sup>30</sup> Avata feroveta eni geka sirurari ainda jokáda, feroveta eni aminda anumbirise, God numokena geka eni ijugari itatamarira amo, nu emingarira. Nu kaifa ururari, genembo giti tuturo arira, aimi nunda geka se dadabari gido ainda amboda, nu God da geka ningira ava, osa sari natofo ningarera.

<sup>31</sup> Aminguse, eni se dotutururari, kotugo eni se doyarira. Amingareva amo, ne isambu God da Geka seka

ningi itatamedo, tofo tofo sise fakina bareva.

<sup>32-33</sup> Eregoseva! God nu uju erira, namonde durumugedo simbuguse, tumonde baingharera. Avori, ne kasama aetevu: feroveta God da Geka sarira amo, nunda komana kaifa ururari geke se doyar amboda, nu eredo sarira. Nu beka kaifa use durumugedo sirurari, ne ava kasama aetevu. Erá aminge sirure-oro nenda tumonde bainghari ava soesa eove dae sise resena.

A geke eni mo, na evevetudae resena. God da ekaresia+ isambu nange eraera, kau daba ava aovo dae resena.

<sup>34</sup> Evevetu ne tumonde bainghuse, jo tirae areva. Ne erá geke eni seove! Jusi embo da Agho Dari resira amo, geke beká resira:

“Evevetu tumonde bainghuse, jo giti jighae arera.”

<sup>35</sup> Ne tumonde bainghuse, geke da beká ava kasama ari dae uju arera amo, ne amboda ya kamboda nenda nuvumanede dabade se ningarera. God tumonde bainghari dae sedo totorugururoro, evevetu ere vironu sarera amo, meka gariri.

<sup>36</sup> Ne nangetiraimi nanda geke ser-aena jo ningae eraevu? Ne koter-aeva, God da Geka nesuka kasama ariá seraeva, ai? Ne nanda geke resena evia ningido, erá gogore edo ighagha eóvo dae sise resena.

<sup>37-38</sup> Genembo mave nu tofo kotarira, “Na God da ferovetari,” o “Na God da joba budo saramana eveva eraena,” aminge kotarira amo, nu kasama aeti. Na reta oroko erege-fena emo, Bajari da Agho Dariri. O nu nanda geke evia jo ningae arira amo, erá nunda geke ningeove!

<sup>39</sup> Avori, nanda nano namendi, feroveta edo God da Geka isagha sari da fakina ava bari dae sedo, uju use fakina evu! Avata nenda mendeni geke eni jo kasama ae irise, geke aimi vironu sari dae sarera amo, ne erá buregeove dae resena.

<sup>40</sup> Avori, tumonde bainghuse, ainda jokáda ne rea areva amo,

durumugedo simbuguse areva.

## 15

*15:1-11 God Da Bino Eveva Mo: Keriso Ambarida Ghe Jebuge Erorusira.*

<sup>1-2</sup> Avori, nanda nano namendi, na God da Bino Eveva vironu sedo ghusena, ava sekago kotovo dae sise resena. Ava ningi tumonduse, ainda fakinaimi ne fete simbugereva. A kotugo, God da Bino Eveva ava tumonduse, bu jighi simbugareva amo, ainda fakinaimi jebugareva. (O ne jo tumondari da susu kasama e gogoghombae areva amo, ne jo jebugae areva.)

<sup>3</sup> Geke teria beká nane tofo mandigiti ningi kasama edo, nemokena seteno nininguseva ava, God da Geka jokáda gembero irira amo, eviri: Keriso nu namondeda ari ekokodae sedo ambududurusira.

<sup>4</sup> A kotugo, nunda Geke jokáda, eminge gembero irira: ne Keriso budo era furugetero, God Afa setiri sifo etodaba naká ainda amboda, nu ambarida ghe jebugedo erorusira.

<sup>5</sup> Amingedo, nu giti Peter kena isagha etiri gosusira. Ainda amboda, nunda ambo jimbi beká 12 gategusira, aikena isagha etiri gosuseri.

<sup>6</sup> Ainda amboda, Bajari da natofo 500 aminga ava totorugedo irero, nu nemokena isagha etiri gosuseri. Evetu genembo 500 resena emo, mendeni sirivo useri. O teriigo mo, ne oroko irera.

<sup>7</sup> Avori, evetu genembo 500 aimi nu gosuseri. Sifo eninda, nunda namendi James kena isagha etiri gosusira. Kotugo ainda amboda, nunda aghi kakato isambukena isagha etiri gosuseri.

<sup>8</sup> Amboda beká mo, namokena isagha etiri gosuseri. Amo kau, evetu sasingu fufudo eria ambo nembo fumbudo doyeraira aminga ava, namokena isagha usira.

<sup>9</sup> Ava sedo, namo ambo nembori. Nane God da ekaresiakena isoro useni. Aindae sedo, na jo nunda aghi kato ae aeteni.

<sup>10</sup> Avata God joka edo na gategetiri, nunda aghi eraena. A nunda sonemba namokena futusira amo, na jo budo kotae kotae aeri. Na nunda sonemba aimi budo, saramana e gogoghombraena. Aghi kakato mendeni jo namongo iraeri. Na saramana begogo eraena. Avata na jo tofo nanda fakinaimi saramana ae eraena. Na God da fakina aimi saramana eraena.

<sup>11</sup> Ava sedo, na uju erena amo, namane aghi kakato ava, teria futo jo kotae areva. Nane iseni, ai mave nemokena isi, ava kotae aovo dae resena. Namane isambu Geka a Bino setena, daba evia vironu seraera. A ne ainda Bino ningido tumonderaeva. Ava sedo, mave giti ira Bino sisira ava, kotae aovo dae sise resena.

### *15:12-34 Namonde Ambarida Ghe Jebuge Erarera.*

<sup>12</sup> Keriso ambarida ghe jebuge erorusira ainda bino ava, nemokena sedo ghuseri. Ava nangetiraimi nenda mendeni, namonde jo ambarida ghe jebuge erae ariá seraeri? Aminge tumondareva amo, kotari sembaeri.

<sup>13</sup> Ne aminge kotareva amo, inono, Keriso nu jo ambarida ghe jebuge erae ari ava, sari da kaugori.

<sup>14</sup> Avata Keriso jo ambarida ghe jebuge erae aetira amo, namanenda vironu jo beká ae aeti, a nenda tumondari jo beká irae aeti.

<sup>15</sup> Avata amo kitakori. Teriagio mo: ne aminge sareva amo, inono, namane Keriso da Bino sise, God da javoda gungubo sari da kaugori. Ainda beká mo: namane eminge sedo ghuseri, “God setiri, Keriso ambarida ghe jebugedo erorusira.” Avata evetu genembo jo ambarida ghe jebuge erae ari ava geka beká iratira amo, namane Keriso da Bino, nu ambarida ghe jebuge erariá sise, gungubo saeteri.

<sup>16</sup> Ainda beká mo: ambari embo jo ambarida ghedo jebuge erae arera, aminge sareva amo, inono, Keriso

barago, nu jo jebuge erae ariá sise, sareva.

<sup>17</sup> A Keriso jo jebuge erae aetira amo, nenda tumondari jo beká irae aeti, a nenda ari ekoko da fakinaimi, ne sirivo use iratetevu. Aminguse, ne jebuga evovodae irari ava jo bae aetevu.

<sup>18</sup> A kotugo, Keriso da natofo giti sirivo usera amo, ne nenda ari ekoko jokáda ambudo, jebuga evovodae irari ava kosasaghaeteri.

<sup>19</sup> Namonde enda da gugua a kotari isambu, Keriso dae sedo ighagha edo dotutuseri. Ava sedo, namonde Keriso tumonduse ambudo, jebuga evovodae irari ava kosasaghaetera amo, namonde makasi beká aeteri. Ainda beká mo: roera eveva eminda dotutuseri. Avata roera eveva eni amboda jo bae aeteri.

<sup>20</sup> Avata geka beká mo eviri. God setiri Keriso giti ambarida ghe jebuge erorusira. Ava sedo, namonde kasama erera: amboda God sari namonde barago, ambarida ghe jebuge erarera.

<sup>21</sup> Ne eregoseva: genembo eni javo Adam, nu ari eko use, emboro afigetiri Ambari evetu genembo isambukena sirorusira. Kau daba aminga ava, genembo eni javo Keriso, ambarida ghe jebuge erorusira da fakina aimi, evetu genembo isambu ambarida ghe jebuge erari da emboro ava nune afigusira.

<sup>22</sup> Namonde isambu Adam da vekari. Ava sedo, Adam dara usira andae sedo, namonde isasambu amburaera. Kau daba aminga ava, mave Keriso tumondedo nemonde tatarera amo, ne isambu amboda ambarida ghe jebugedo erarera.

<sup>23</sup> Namonde isasambu ambarida ghe jebuge erarera. Avata erari mo, namonde jo isambu dabade jebuge erae arera. Giti beká mo, Keriso jebuge erorusira. Keriso da amboda, nunda natofo isambu, nunda jovereghe furari da sifo aminda, ne ambarida ghe jebugedo erarera.

<sup>24</sup> Ainda amboda, utu enda dadabarira. Sifo aminda, Keriso nu evetu genembo, sukaru, a gavana

isambu nenda fakina de bejedo, nune barira. Budo, fakina isambu God Afakena mutari barira.

<sup>25</sup> Amboda God Afakena mutari barira da tuka mo: Keriso nu utu a enda kaifa ururari, God nunda gitofu isambu dedo sosighi edo, Keriso da ata duruda fitari Keriso atai fati fetarira. Atai fati fefetuse, nu roera isambu God Afakena mutari budo, God Afa utu, enda, a roera isambu nune kaifa arira.

<sup>26</sup> God da gitofu resena emo, ambo nembo, asuki beká mo, Ambariri. Nu amboda beká Ambari da fakina ava de bejarira.

<sup>27</sup> Avori, God da Geka eminge resira:

“God roera isasambu, nunda ata duruda fiftusira,”

God da Geka aminge resira. Avata ‘roera isasambu’ resira amo, jo God dae saeri. Amo isagha bekári. Ainda beká mo: God nu susuri. Nune roera isasambu Keriso da ata duruda fitari, atai fati fefetuse kaifa arira.

<sup>28</sup> Avori, Keriso roera isasambu budo kaifa use, nu tofo numoá fitari vosari, God Afa vitido roera isasambu nune kaifa use, ainda Bajari nune arira.

<sup>29</sup> Avori, ne eregoseva: evetu genembo mendeni, ambari embo-dae bafataito eraera. Avata ambari embo amboda jo ambarida ghe jebugedo erae aetera amo, ne jo amin-gae aeteri. Amo, susu tefo bafataito aeteri.

<sup>30</sup> O geke eni mo: tofo namoá kotise, sari dae erena. Na sifo ghousa daoro ambono dae kotise, evetu genembo manaka gayeraera. Avata Keriso jo ambarida ghe jebuge erae aetira amo, na jo goroto eni mutono gido, namo dari dae manaka gayae aeteri.

<sup>31</sup> Nanda nano namendi, na geke beká resena. Nenda tumondari gido, na ivuga use nendae sakai sise resena. Kotugo nenda tumondari a nanda ivuga da susu mo, Iesu Keriso namondeda Bajariri. Avori, amo geke bekári. Kotugo gekeá barago geke bekári. Ambari amo nanda

karena edo, sifo inononda na unumberaira.

<sup>32</sup> Ambari embo jo ambarida ghe jebuge erae aetera amo, na redae Iesu dae sedo doyono, na bu koto edo, sino fuka da jokáda fugoro na gambu mindaeti? Na amingaetena amo, eveva eni baeteni? Kote givu! Ambari embo amboda jebuge erarera amo, na eveva tambarena. O jo erae arera amo, na susu tefo ambarena, gombuda eveva eni tefori. O eni mo: ambari embo jo ambarida ghe jebugedo erae aetera amo, namonde eminge sise saeteri, “Namondeda ambari sifo erebunera; ava sedo fuvu, namonde uvu bayau rise, umo gamo edo, sifode amboro dadabare!” aminge sedo, namonde aminguse iraeteri.

<sup>33</sup> Avata gungubo amo erá tumondeove! Mave, ambari embo jo ambarida ghe jebuge erae ariá sarira amo, nunda geke erá tumondeove!

Eminge seoro ningiraeva, “Evetu genembo eveva aimi kokomana sembae tambudo, ainde dabade umo gamo eraera amo, nembargo sembae eraera.” Ava sedo, mave geke setena ava sarira amo, nunda geke erá tumondedo, ainde dabade umo use deingheove!

<sup>34</sup> Diti fangevu! Sekago dubo jovereghedo, nenda ari ekoko dodo ari eveva aovo dae resena. A eni mo: meka gaovo dae sise, eminge resena. Geke bekári, ne mendeni God da kau mavega a nunda fakina kau mavega ava, jo itako kasama edo tumondae ireva.

### *15:35-58 Namonde Ambarida Ghe Jebuge Eroruse, Tamo Seka Barera.*

<sup>35</sup> O nenda mendeni eminge sarera, “Ambari embo nange jebuge erareri? Tamo kau mavega ava bareri? Ambari embo mo, tamo tefo ágido, jo ambarida ghe jebuge erae arera,” aminge sarera amo,

<sup>36</sup> ne kotari tefori. Ijugaboro fitari dae erena. Ni veka govaresa amo, nu gari kau eni vitarira. Veka da



anoso betise, batuno eveva kosughe vitarira.

<sup>37</sup> Ni farava veka o rejo govaresa amo, jo veka amboda batuno edo vitarira, amingo iraeri. Veka govaresa amo, kitakori. O batuno edo vitarira amo, teria a garigo bekári.

<sup>38</sup> Veka kau eni eni batuno edo vitarira amo, nunda kau God uju etiri futusira, ava vitarira.

<sup>39</sup> Kau daba aminga ava, God nu evetu genembo, sino fuka, rika, a oka nenda tamo kau eni kau eni futusira. Evetu genembo da tamo kau eni, sino fuka da tamo kau eni, rika da tamo kau eni, a oka da tamo kau eniri.

<sup>40</sup> Roera utuda irira a roera endada irira, ava kote givu! Roera utuda irira, ainda duro kau eni irira. A roera endada irira, ainda duro barago kau eni irira.

<sup>41</sup> Iji da gari eveva kau eni irira, inua da gari eveva kau eni irira, a damana da gari eveva kau eni irira. Kotugo damana barago gari eveva jo kau dabako iraeri, nunda nundari.

<sup>42</sup> Ambari embo ambarida ghe jebuge erari da sifo, kau emingori. Namonde endada irise, ambeoro furugeraera amo, tamo bete dadaberaira. Avata tamo sifo amboda, ambarida ghe jebuge eredo, evovodae irarira.

<sup>43</sup> Tamo enda eminda furugeraera amo, gari eveva a fakina eni tefori. Avata tamo amboda, ambarida ghe jebuge erarira amo, gari evevago a fakinaghaeri.

<sup>44</sup> Tamo enda eminda furugeraera amo, fisi vanembori. Sifo amboda ambarida ghe jebuge erarira amo, asisi da tamo ava erarira. Amo, namonde kasama erera: fisi da tamo irira ava sedo, asisi da tamo barago irira.

<sup>45</sup> Aindae sedo, God da Geka eminge gembero irira:

“Genembo giti beká javo Adam, God etiri nu siroredo genembo usira.

O genembo eni, Adam da vasa bari dae sedo fusira amo, nu nunda

Asisiimi jebuga beká ava muturaira.”

<sup>46</sup> Asisi da jebuga muturaira, resena emo, jo giti furae eraira. Enda da jebuga giti foa gheraira, a asisi da jebuga amboda foa gheraira.

<sup>47</sup> Genembo javo Adam giti sirorusira amo, nu endaimi etiri enda eminda sirorusira. Genembo amboda sirorusira amo, nu utuda ghe vose fusira.

<sup>48</sup> Evetu genembo fisi da uju kotise, endada irise ambeoro tamo beterraira amo, ne kau, nembua Adam giti beká sirorusira, ainda kaugori. O evetu genembo, God utuda irira ainda uju ava kotise, nunda natofo edo irera amo ne kau, nenda Koro amboda utuda ghe vose fira sirorusira, ainda kaugori.

<sup>49</sup> Oroko namonde, Adam giti endada sirorusira, ainda tamo da kaugo ava asugedo irera. Kau daba aminga ava, Genembo utuda ghe vose fusira ainda tamo da kaugo ava, namonde amboda asugedo irarera.

<sup>50</sup> Nanda nano namendi, nanda geka da tuka mo eviri: namondeda tamo enda eminda irira aimi, jo viti ya utu aminda God da dombuda fetae arira. Amo, tamo fisi, ororo, a etu, isambu bete dadabarira, jo God da dombuda evovodae irae arira.

<sup>51</sup> Kote givu! Geka jungarida ava, afigaono ningovo dae sise resena. Namonde jo isambu ambae arera. Avata namondeda tamo jovereghedo kau eni arira.

<sup>52</sup> Tamo jovereghe kau eni arira amo, kau biria tarigharigo arira o diti farigharigo arira. Aminguse, ainda jokáda, namonde isambu namondeda tamo manai kosughe dodo, tamo seka asugarera. Amo eminge sirorarira. Amboda beká, God sari tavuya fusoro duka ururarira amo, ambari embo ne ambarida ghe jebuge eredo, tamo seka asugarera. Amingururoro, namonde barago, sifo aminda endada irarera amo, namonde tamo manai kosughe dodo, tamo seka ava asugarera.

<sup>53</sup> Enda da tamo irira emo, bete

dadabarira. O asisi da tamo evovodae irari, ava bu asugarera. Amo kau oriro arigarera. Enda eminda, namonde amburaera. Avata utu aminda irari dae sedo, namonde tamo seka asugedo evovodae irarera.

<sup>54</sup> Avori, sifo aminda, namonde enda da tamo kosughe fiti dodo, asisi da tamo ava asugarera, a ambari da tamo kosughe fiti dodo, jebuga da tamo ava asugarera. Amingaoro, God da Geka evia beká arira.

“Ambari, na nimokena resena. Ninda fakina redari? Bajari nimokena isoro use, ninda fakina de bejedo atai fati fefetusira.

<sup>55</sup> Ninda fakina dadabusira, a ninda mema ava, namane sekago jo itatamae arera.”

<sup>56</sup> Ainda beká mo: namonde Agho Dari bejise, Ari Eko da fakina itatameraera. A kotugo, ari ekoko eraera aindae sedo, God setiri ambududuruse, Ambari da fakina ava itatameraera.

<sup>57</sup> Avata namondeda Bajari Iesu Keriso da ambariimi, God nune Ambari a Ari Eko da fakina ava de bejisira. Avo gido, namonde God Afakena ‘aiyakoe’ saore!

<sup>58</sup> Avori, nanda nano namendi, fakina edo durumuguse, ata fete simbugareva. Bajari da saramana use irareva. Ainda beká mo: ne kasama ereva: ne rejo Bajaridae sedo areva amo, beká sirorarira.

## 16

*16:1-4 Tumondari+ Embo Reighi Corinth Aminda, Nenda Kokomana Sonembari Dae Siseri.*

<sup>1</sup> Geka eni sari dae erena. God da natofo Frovensi Judia aminda irera, ava sonembaovo dae sedo, geka sari dae erena. Ekaresia+ Frovensi Galeisia aminda irera aikena rea sisena, kau daba aminga ava, na nemokena sari dae erena.

<sup>2</sup> Judia embo sonembari dae sedo, ne isambu Fura Tomanako evia inono, moni fitido ghareva. Ni fura eninda, moni digari baresa, o ninda vareda roera digari safufu arira

amo, digari fitaresa, o itako baresa amo, itako ava fitaresa. Kotugo amo, jo doyari da kaugo iraeri. Ne isasambu, fura evia inono fitido ghareva. Aminguse, fakina edo fitovo dadabari na aminda ya buvarena amo, ne sekago moni bari dae sedo jo atai fetae areva.

<sup>3</sup> Avori, na ya buvono, gegenembo ningiava gategareva amo, dirigaono moni nene budo Jerusalem yarera. Kotugo, ne kau mavega ava kasama aoro dae sedo, reta gembudo mutono monighae dabade bu yarera.

<sup>4</sup> Sifo aminda, na tofo mandi Jerusalem yari dae kotarena amo, namonde dabade yarera.

*16:5-24 Paul Nunda Geka Sido Fira, Tano Edo Dotutusira.*

<sup>5</sup> Na giti Frovensi Masedonia sembi yama, aminda ghedo amboda nemokena ya buvarena.

<sup>6</sup> Na erekotena, na itako ghousago nemokena irarena. Amo, na borija da sifoda nemokena itako ghousago irono, na sonembedo dirigaovo, na reighi eninda yarena tanojo.

<sup>7</sup> Na nemokena ya namonde sifo tufako irari imboe erena. Ava sedo, Bajari ‘avori’ sarira amo, na namonde ghousago iraeteni.

<sup>8-9</sup> Nanda gitofu a Bajari da gitofu mendeni reighi Efesas eminda irera, avata Bajari nandae sedo saramana da emboro eveva eni ava afigetiri irira. Ava sedo, na ekaresia+ sonembari dae sedo, reighi Efesas eminda saramana ururono, Jarige Yari da Kirumo+ foa buvari gido, fura 7 ava kaifa use, Pentecost eminda edo yarena.

<sup>10</sup> Timothy nu kau nane eraena ava use, Bajari da saramana use irira. Ava sedo, nu ya nemokena buvarira amo, nati joká dedo bu kaifa use tavo areva.

<sup>11</sup> Nunda geka erá imboe use, kotae eóvo dae resena. Nu sonembedo dirigaovo, dubo jamaghae jovereghe namokena furaeti. Ainda beká mo: nu namondeda nano namendi mendeninde dabade furarera, ava kaifa use irena.

<sup>12</sup> Avori, Apollos da geka resena. Nu nano namendi mendeninde dabade, nemokena yaoro dae siseni. Avata Apollos erekotira amo, nu jo oroko aminda yari da kaugo iraeri, ava erekotira. O goroto tambarira amo, ya buvari gareva.

<sup>13</sup> Bajari tumonduse, nenda tumondari ava kaifa e gogoghombuse, fete simbuguse irivu! Fakina use tumo fainghevu, erá oju eove!

<sup>14</sup> Saramana rea ari sareva amo, ne tofo tofo dubo ruruse, saramana use irareva!

<sup>15</sup> Stephanas nunda natofode, nenda kiki ava ne ningi kasama ereva. Amo, ne Frovensi Akeia aminda, giti beká Bajari tumondedo, oroko dubo joká isambuimi futuse, God da natofo sonembuse irera. Avori, nanda nano namendi, nanda benunu mo eviri:

<sup>16</sup> Stephanas resena emo, nunda sonemba kakato a kotugo evetu genembo mendeni mave numongo ava edo, God da natofo sonemberaera, ainda geka a ijuga ava ningido, nenda amboda amboda use irareva.

<sup>17</sup> Stephanas a Fortunatus nemonde Achaicus de dabade, fera eminda buvudo, na sonembetero tamo feghetiri ivuga erena. Ne soka ireva. Ava sedo, nenda vasa budo na sonembetero tamo feghusira.

<sup>18</sup> Gegenembo resena emo, nene bouvu itatameraeva ava, osa setero na niniguseni. Ava sedo, nembarago gegenembo ainda sonembadae, aiyakoe sise ivuga aetevu. Gegenembo kau eviviga kakara use, nenda geka ava ningovo dae resena.

<sup>19</sup> Iesu tumondari+ embo isambu Frovensi Asia eminda irera ai, ne ategi beká ava erera. Yari budo givu! Aquila noaro Priscilla ghae, ne isambu Bajari da javoda ategi erera. A kotugo, ekaresia+ Aquila noaroghae da kamboda totorugeraera aimi, isambu ne ategi erera.

<sup>20</sup> Nenda nano namendi isambu eminda irera aimi, ne ategi erera. Nenda nano namendi kakara use, nati joká doruse muno areva! Yari budo givu!

<sup>21</sup> Avori, na Paul, nane ne ategi erena. Ategi emo oroko na eminda tuturo edo, tofo nanda ungoi eregefena. Yari budo givu!

<sup>22</sup> Mave Bajari jo dubo bae arira amo, na nundae simbora erena, God da bouvu ava bare dae.

Namanenda Bajari, ni nange furaetesi!

<sup>23</sup> Bajari Iesu da sonemba nemokena irare!

<sup>24</sup> Kotugo ne Iesu Keriso de dabade tatedo ireva, ne isambukena eminge resena: nanda dubo bari nemokena irare!

Avori, nanda geka tano eviri. Na Paul.

## Paul Nunda Reta Amboda, Corinth Embokena Gefusira, Amo Eviri.

Paul nunda reta gitida Corinth embokena gembudo, Efesas ghedo ira, Frovensi Masedonia aminda irise ghaeko eni dadabetiri, avose, ghaeko 56 ainda jokáda, Paul nu reta evia gefusira. Evetu genembo mendeni nunda reta gitida gefusira, ainda geka a benunu ningido amin-gusera aindae, nu ivuga use aiyakoe sisira. Ainda amboda, Corinth embo nange Jerusalem da ekaresia+ sonembaetera ainda emboro ava, Paul ijugusira. Tano use, evetu genembo mendeni Corinth aminda, Paul da geka imboe usera aindae, nu dubo mema etiri ghoghora sisira.

*Paul Nunda Reta Amboda Corinth Embokena Gefusira, Ainda Mendo Mendo Mo Eviri.*

1:1-11 Paul natofo ategi use, geka tuturo usira.

1:12—7:16 Paul dengoro induduse, Asisi Kakara da jebuga ainda geka mendeni mendeni sisira.

8:1—9:15 Paul, moni dabade fitido Jerusalem embo sonembaoro dae sedo, gembudo sisira.

10:1—13:10 Nunda geka ningido tumondaoro dae sedo, Paul nunda irari, a Bajari Iesu nu nange aghi usira, aindae osa sisira.

13:11-14 Paul geka se tano usira.

<sup>1</sup> Arie, nanda nano namendi! Na Paul, Iesu Keriso da aghi kato aono dae sedo, God nunda uju ava use, na gategusira. Na namondeda namendi Timothy ghae, ne ategi beká ava erera. Ne reighi Corinth aminda God da natofo edo ireva, a God da natofo isambu Frovensi Akeia aminda ireva ava, namane nangae ne ategi beká ava erera. Yari budo givu!

<sup>2</sup> Namondeda God Afa a Bajari Iesu Keriso, nengae sonemba a dubo jama mutoro baove!

*1:3-11 God Nu Namondeda Sonemba Katori.*

<sup>3</sup> Namondeda Bajari Iesu Keriso da God a nunda Afakena, aiyakoe sise irarera. Afa resena emo, nu joka ari katori. Sonemba isambu numokena ghe foa gheraira. Ava sedo, numokena aiyakoe sise irarera.

<sup>4</sup> Nu namondeda dara a dubo vevera ainda jokáda, namonde sonembuse dubo jama muturaira. Nu amingeraira da tuka eni mo: namonde nunda sonemba budo, evetu genembo mendeni ava sonembuse dubo jama mutaeteri. Evetu genembo mendenikena dara sirorarira, o dubo mema itatamarera ava sonembuse, dubo jama mutaeteri. Amo, namonde sonemba God kena budo tamo feghari, sonemba daba aimi, natofo mendeni sonembarera.

<sup>5</sup> Avori, namonde Keriso da natofo edo, mema a bouvu Keriso fufuse itatamusira ava, namonde barago fufuse itatameraera. Kau daba aminga ava, Keriso da natofo use, namonde sonemba God kena ruruse irera.

<sup>6-7</sup> Avori, namane mema a bouvu fufuse itatameraera amo, nene sonemba a dubo jama baovo dae sedo, amingeraera. O God namane sonembuse, dubo jama muturaira amo, nu jo namane vanembo sonembari dae sedo amingae eraira. Nu, nembarago sonemba baovo dae sedo, amingeraira. Namane mema a bouvu fufuse itatameraera ava, nembarago sonemba ruruse, namanenda bouvu fufuse, fakina edo durumugaovo dae sedo, God sonemba a dubo jama muturaira. Namane kasama erera, kau ne namanenda bouvu a mema fufuse ireva aminga ava, namane sonemba rea God kena buraera, ne kau daba ava ruruse ireva. Ava kasama use, tumonderera, ne fakina edo fetareva.

<sup>8</sup> Geka evia kasama aovo dae resera. Namane nangaekena dara a dubo mema Frovensi Asia aminda siroretiri tafusera, ava kasama aovo dae resena. Dara amo teria beká ava siroretiri gido, namane, "Avose,

ambarera, jebugari da goroto eni tefori,” ava kotiseri.

<sup>9</sup> Namane ambariá kotiseri. Avata amo, namanenda evevadae sirorusira. Ainda beká mo: namane tuturo edo, tofofo namanenda kasama a fakina ava ighagha edo, God da fakina avanembo tumonduse iriari. God resena eimi, nune seari evetu genembo ambarida ghe jebugeraera. Nunda fakina ava tumondaoro dae sedo, bouvu a mema teria beká ava, namane nangaekena sirorusira.

<sup>10</sup> Namane nangae sandi daoro ambaetera avata numoá tumondero, nune sonembetiri namane jejebuguseri, a nune sekago sonembari jebugarera. A kotugo, nu amboda namane sonembuse irarira, ava tumonduse gigiteraera.

<sup>11</sup> Amo, nu namane nangae nange sonembaetira aindae, banunguse irovo, nu namane sonembarira. God nu, nenda benunu digari namanendae seraeva, ava ningido, namane sonembururari jebugaoro gido, evetu genembo digari beka fainghedo nundae aiyakoe sarera!

*1:12–2:4 Paul Nemokena Jo Yae Ireira, Ainda Susu Mo Eviri.*

<sup>12</sup> Namane nangae roera dabako eindae ivuga use, tofofo sakai sise irera, amo eviri. God sonemburureari, namane dubo jokáda itatameraera, namane enda eminda irise a deinghuse, ari bekáda bekáda use a geka bekáda bekáda sise irá gheraera. A namane nemokena irise kau daba ava edo ghuseri. Amo, jo evetu genembo da dubo kotariimi aeri. Amo, namane God da sonembaimi edo ghuseri.

<sup>13-14</sup> Oroko, ne rea tege kasama aovo inono aetira, avanembo nemokena eregefera. Oroko nenda kasama kitakori. Avata na ne tumonduse erekotena, amboda ne namane kasama e gogoghombareva. Oroko ne namane garigo garigo ereva. Avata, na gigiteraera, Bajari Iesu da Sifo aminda, ne namanendae ivuga use sakai sareva. Kau namane

nendae sise ivuga use sakai sarera aminga ava, ne namanendae ivuga use sakai sareva.

<sup>15</sup> Na geka ava kote gogoghombuse, na giti emboroda deinghudo ise, ya nemokena buvari dae kotiseni. Umbu etoto naká, nemokena ya teredo, esimbugari mutono budo ivuga aovo dae kotiseni.

<sup>16</sup> Umbu etoto naká resena da tuka mo eviri. Na Frovensi Masedonia aminda ise, ya tere nemo gari dae kotiseni. A kotugo, beine jovereghe foa Frovensi Judia aminda sembi yari dae use, na sekago aminda teredo, nenda sonemba budo ya Judia buvaetena, ava kotiseni.

<sup>17</sup> Na aminge kotisena avata, na jo yae irena. Avata erá aindae sedo, eminge seove, “Paul nu dubo bunedo umbu eni ‘Ai, yarena,’ sedo, amboda ‘Tefo, irarena,’ resira.” ava erá seove! Evetu genembo fisi da uju use irera aimi, ne amingeraera. Avata na jo avavaga ae eraena.

<sup>18</sup> God geka beká seraira, ainda javoda nemokena resena, na sifo ghousa evia, rea ari dae koteraena ava, nane eraena. Ava sedo, na susudae fefetuseni.

<sup>19</sup> Ne kasama ereva: namane Silas a, Timothy de dabade nemokena era, God da Mandi Iesu Keriso da Bino, ava vironu siseri. Iesu resena emo, nu jo gofari iraeri. Nunda geka mo, geka beká vanembori. Ava sedo, nunda beka gajari amo, jo ighagha ae arira, nu isambu ava arira.

<sup>20</sup> A kotugo, God da beka gajari namonde evetu genembokena futusira amo, isambu Iesu da tamonda isagha etiri beká usira. Aindae sedo, namonde Iesu de dabade tatedo, God tumonde bainghuse eminge seraera, “Arie, God! Duro nimokena irare! Ai, bekári!+”

<sup>21</sup> God nu tofo namonde aghi edo, nunda fakina mutiri namonde Keriso da natofo edo irera. God nu tofo mandi evia ijugiri, kasama edo itatamudo refera: namonde Keriso da jebuga anakora budo irera.

<sup>22</sup> A kotugo, nu namonde nunda tofodae rurusira, ava ijugari dae sedo,

nunda tano namondeda tamonda fitiri sefusira. Tano resena emo, nunda Asisidae resena. Nunda es- imbugari a jebuga namonde amboda barera, ava kasama aoro dae sedo, nunda Asisi Kakara namondekena mutiri ruruseri.

<sup>23</sup> Avori, na God da dombuda, eminge resena. Na giti javi e nemo- kena yari dae useni. Avata dodo fefe- tusena ainda beká mo eviri. Erama nenda irari sembae ava gido, geka fakara seóno mema eove dae sise, na reighi Corinth aminda jo yae useni.

<sup>24</sup> Na kasama erena: ne geka beká tumonde gogoghombereva. Ava sedo, ne rejo ava tumondaeteva ain- dae, na jo gembae erena. Na reta evia eregefena ainda susu mo: ne totofo ivuga aovo dae sedo erege- fena.

## 2

<sup>1</sup> Na aindae sedo kotiseni: na jo sekago ya nenda dombuda fetedo, ghoghora saono dubo mema ae areva.

<sup>2</sup> Ainda beká mo: na ya geka fakara saono, bate dombu use dubo mema use irareva amo, namonde jo amboda anumbedo, tofo tofo fakina futuse umo gamo ae arera, ne dubo mema use irareva ava sedo.

<sup>3</sup> Na geka daba ava kotise, aindae sedo nanda reta gitida gefuseni. Na amingusena da beká mo: na ivuga arena amo, ne ivuga areva. Na ya namonde dombu dabade arera, ainda sifo aminda, namonde dabade ivuga aeteri. Jo dubo mema ae aeteri. Na ya nemokena buvudo, geka fakara saono dubo mema areva amo, na maveghae ivuga areni? Ava kotise, na geka fakara ava, retada gefuseni.

<sup>4</sup> Avata na jo dubo mema aovo dae sedo, reta gembae useni. Na tofo dubo mema mindafu ava tafuse, sorara use jivughae gefuseni. Na ne dubo bu gogoghombereva ava, ijugaono kasama aovo dae sedo, reta amo gefuseni.

*2:5-11 Paul, Genembo Eniimi Dara Usira Ava Kote Doyoro Dae Sedo, Gefusira.*

<sup>5</sup> Genembo eni dara usira aindae reta gitida gefusena amo, nu dara namokena jo aeri. Nunda dara nemokena etiri, ainda bouvu nenda mendeni, o saone, ne isambu fufu- sevu. Avata emo, jo saono teria ari dae jo sae erena.

<sup>6</sup> Avori, ne genembo amo gi- gagairego eovo, nu dubo mema itatamedo ghusira. Amo avori, etevo inono etira.

<sup>7</sup> Ava sedo, erá eóvo dubo mema teria futo use, ambeure dae sise, nunda ari eko amo kote doyaetevu. Nunda ari eko kote dodo, fakina fu- tururuvu jebugare!

<sup>8</sup> Na nemokena eminge benunu resena: nenda dubo bari ava ijugu- rurovo itatamarira.

<sup>9</sup> Na reta gefusena da susu eni mo eviri. Na nenda tumondari namo- kena ava dere gari dae sedo amin- guseni. Na evia kasama ari dae uju useni: ne nanda geka ningido amingeraeva, ai tefo? Ava kasama ari dae uju use, reta gefuseni.

<sup>10</sup> Eregoseva: ne mave da ari ekoko kote doyaereva amo, nambarago gen- embo daba ainda ari ekoko kote do- yarena. Jo nane nunda ari eko kote doyari da kaugo iraeri tano. Avata na nunda ari eko kote dotutusena amo, na Keriso da dombuda irise, nenda eveva kotise, aminguseni.

<sup>11</sup> Erá Satan foama namondeda jokáda teredo, namonde dereure dae sise, na aminguseni. Ainda beká mo: Satan goroto ningiaminda foama namonde dereraira ava, anakora gi kasama useri.

*2:12-13 Paul Reighi Troas Dotu- tusira Da Beká Mo Eviri.*

<sup>12</sup> Na Keriso da Bino Eveva ava, vironu sari dae sedo reighi Troes aminda isena amo, Bajari na sonem- biri, namokena vironu sari da em- boro eveva ava afigusira.

<sup>13</sup> Avata nanda namendi Titus, aminda jo tambae useni. Ava sedo, na kotari teria futo use, saga jo faing- haeri. Amingedo, na Troes embo ategi edo, Troes dodo ena Frovensi Masedonia aminda buvurutuseni.

*2:14-17 Keriso Nunda Gitofu Ava De Atai Fati Fefetusira Ainda Fakinaimi, Namonde Fetarera.*

<sup>14</sup> Avata kotugo, na God kena aiyakoe resena. Ainda beká mo: nu Keriso da javo jighari erare dae sedo, namane bu Keriso de dabade tatedo, Keriso nunda gitofu ava de atai fati fefetusira ainda fakinaimi, sonemburureari namane sifo ghousa gitofu de atai fati feteraera. A kotugo, God sonemburureari, namane Iesu da Bino ava vironu seoro ivegedo irureari, evetu genembo isambu ningido kasama eraera. Kau yaurai masa o muno bu ivegedo ya gheraira aminga ava, namane Iesu da bino ava, bu ya seoro ivege ya gheraira.

<sup>15-16</sup> Eregoseva: evetu genembo mave God da Geka ighagha use ambari dae erera aikena, namanenda vironu mo, kau masa da kaugo ava use irira. Mave fumbarira amo, ambarira. Evetu genembo mave God da Geka ningido, jebuga evovodae irari ava barera aikena, namanenda vironu mo, kau muno evevago ava use irira. Mave fumbarira amo, jebugarira. Ava sedo, vironu sari emo, saramana bouvugori. Jo feghako iraeri.

<sup>17</sup> Namane vironu seraera ainda beká mo: God namane, Keriso da aghi aoro dae sedo gategusira. Ava kotise, namane Iesu da javoda a God da dombuda saramana use, geka bekáda bekáda seraera. O evetu genembo mendeni mo, jo namane eraera amingo iraeri. Nemo moni bari dae kotise, God da Geka kotae kotae sise saramana eraera.

### 3

*3:1-18 Agho Dari Da Duro Jo Teria Iraeri, Jebuga Da Durova Teriagori.*

<sup>1</sup> Avata na jo aminge gefuse, totofo namanendae sakai sari dae sedo, gambaeri. Ava erá koteove! Ijuga kakato mendeni totofo sakai sari dae sedo, eminguseri. Ne benunu setero, Iesu tumondari+ embo mendeni ainda babojegari, ijuga kakato

resena, nendae sakai sise retada gefuseri. Gembu mutero, budo era ijugetero tege gido, ne tumondusevu. Avata namane redae amingareri? Namane reta avavaga jo mavekena benunu se, saoro gembu mutoro bu ya ijugaoro gae areva, o nemokena jo benunu se, saoro gembu mutovo ekaresia+ mendenikena bu yae arera. Ainda beká mo: namane mavejo ava, ne anakora kasama usevu.

<sup>2</sup> Ne totofo nemoá namanenda sakai sari da reta da kaugori. Namane era nemokena vironu setero ningi tumondedo, dubo jovereghusevu. Aminguse, ne kau namanenda sakai sari da reta da kaugo edo, ne namanenda dubo jokáda ireva. A kotugo, ne kau namanenda sakai sari da reta ainda kaugo use, nenda irari a nenda saramana da aito ava ijugeovo natofo tomanako fuge gido, namanenda saramana da aito kasama eraera.

<sup>3</sup> Ijuga kakato setena amo, nenda reta ava evetu genemboimi gefuseri. O ne kau namanenda reta da kaugo edo ireva setena amo, jo evetu genemboi gembu mutaeri. Amo, Keriso nune ne budo esimbugetiri, reta eveva ainda kaugo edo ireva. A nu jo, evetu genembo eraera ava use, susufi ongoda fatido ghamana tamonda gambaeri. Nu God jebuga irira, ainda Asisiimi jebuga evovodae irari ava, nenda dubo joká aminda gefusira. Amingetiri, ne nunda natofo usevu. Etevo, evetu genembo isambu kasama erera: namane jo namanenda fakinaimi saramana ae useri. Keriso namane gateguse, nunda fakina mutiri aimi budo, namane saramana useri.

<sup>4</sup> Namane Keriso de tatedo, God da fakina tumonduse tumo fainghedo, geka ava gefuseri.

<sup>5</sup> Namane jo namanenda fakina tumonduse, saramana aoro nenda dubo jokáda beká siroraeri. Namanenda fakina jo inono irae bekári. Namane God da fakinaimi, vironu setero ningi tumondetevo, jebuga

nenda dubo jokáda sirorusira.

<sup>6</sup> God evetu genembo sonembari dae sedo, emboro+ seka afigusira. Nune setiri namane emboro+ seka ainda aghi kakato useri. A kotugo, emboro+ seka ya God kena buvoroda sedo, God da Asisiimi afigusira. Emboro+ manai mo, Agho Dari aimi afigusira. Avata mave aminda yarira amo, nu ambarira, jo ya God kena buyae arira. O mave emboro+ Asisiimi afigusira, aminda yarira amo, nu jebuga evovoda irari ava tuve barira.

<sup>7</sup> God nunda Agho Dari futusira amo, nu eredo, geke amo ghamana tamonda faiyai gembudo, Moses kena futusira. Mutiri ruriri, God da usasa Moses kena isagha edo, nunda dombu usasa usira. Usasa amo, jaraghedo fira dadabusira. Avata kotugo sifo daba aminda, usasa amo fakina ambari ava jaraghiri, Israel embo ne Moses da dombu diti fuge gosusera amo, diti tutumbegetiri, gosuse irarikená jo inono aeri. Agho Dari nu evevari. Avata nu jo namondekena jebuga bu furae eraira. Nunda saramana mo, namonde susu redae jebuga evovoda irari ava kosasaghedo ambarera, ava ijugeraira. Ava sedo, Agho Dariimi, ambari bu foa gheraira. Avata nu, nunda duro teria setena, ainghae sirorusira.

<sup>8</sup> Avata Agho Dari da duro amo kitakori. O jebuga da emboro Asisiimi afigusira, ainda duro mo, teriagori. Agho Dari da duro ava darigedo, teriagobeká ava edo irira.

<sup>9</sup> Ainda beká mo: Emboro+ ya God kena buvari Agho Dariimi afigusira, aimi namondeda ari ekoko ijunedo, ambari ava namondekena bu fusira. O jebuga da emboro+ Asisiimi afigusira aimi, God namondeda ari ekoko kote dodo, namondeda 'eveva' seraira. Jebuga da emboro ainda duro mo teria bekári. Nu jebuga bu foa gheraira; jo ambari bu furae eraira. Ava sedo, nunda duro mo, Agho Dari da duro darigedo teriagobeká edo irira.

<sup>10</sup> Agho Dari da duro tuturoda jaraghusira amo, ira dadabusira. Jebuga da emboro da duro, Agho Dari da duro ava darigedo, ai fatiri sukainghusira.

<sup>11</sup> Agho Dari da duro jo ghousago iraeri, avata nunda sifoda duro teria jaraghusira. O jebuga da emboro+, ainda duro sifo ghousa irarira ava sedo, nunda duro teriagobekári.

<sup>12</sup> Avori, namonde jebuga da emboro, ainda duro amboda gi kasama e gogoghombarera, ava gigitirera. Aindae sedo, namane tumo fainghedo, Iesu da Bino ava vironu sise irá gheraera, jo oju use doyaeraera.

<sup>13</sup> Aminguse, namane jo Moses usira, ava ae eraera. Moses nunda dombu ava foiyaimi afurugusira. Nunda dombu afurugusira da beká mo: erá natofo nunda dombu da duro ava dadaburureuri geore dae sedo, nu jo uju aeri.

<sup>14-16</sup> Avata kotugo, Israel embo da diti jo basae etiri, ne jo gi gogoghombae edo ghuseri. A oroko mo, ne kau daba aminga ava irise, nenda diti jo basae irira. Amo, ne oroko Agho Dari manai Moses imi gefusira ava tegarera amo, ainda duro a tuka jo bae edo gharera. Kau Moses foiyai nunda dombu afurugusira aminga ava, nenda munju gajedo diti jo basae etiri, ne Agho Dari da tuka jo bae eraera. Avata munju afigari da emboro dabako irira. Mave Keriso ghae dabade tatarira amo, nunda munju afigari, geke da tuka isagha ari diti basarira. Aindae, God da Geka eminge resira:

“Moses Bajarikena teterusira amo, nunda foiya kosughetiri dombu isagha usira.”

Kau daba aminga ava, mave dubo jovereghedo, Bajarikena yarira amo, nunda munju gagojusira ava afigari diti basarira.

<sup>17</sup> Avori, na Bajaridae setena amo, nunda Asisidae seteni. A Bajari da Asisi evetu genembo mavekena irarira amo, ne jebuga tuve barera.



18 Ava sedo, namonde isambu Bajaride dabade tatedo, munju afigedo Bajari da duro ava tataseguse irera. Namonde aminguse iroro, Bajari da Asisi duro daba aimi budo, namondeda dubo jokáda saramana ururari, namonde nunda fakinaimi kau numongo ava eraera. Kau dombu gari da ititu ijii gayari ainda usasa giraera aminga ava, namonde numo gosuse, kau numongo ava use, nunda duro ava ijugeraera. Duro amo jo dadabae arira, nu baji teriagio arira.

#### 4

*4:1-15 God Da Bino Eveva Amo Fakinaghaeri. Avata Ainda Aghi Kakato Mo, Ne Taká Evetu Genembo Gido, Fakina Tefori.*

<sup>1</sup> God namanendae joka edo, nunda Bino Eveva ava saoro dae sedo, saramana namanekena mutiri vironu seraera. Saramana evia nune futusira ava sedo, namane jo manamana use doyaerera.

<sup>2</sup> Evetu genembo isambu namanenda geka nenda dubo jokái tumondaoro dae sedo, namane ne jo derae eraera. Erá meka geóro dae sedo, namane ari sembae a ari jungari aimi, ne jo derae eraera. Namane God da Geka dambu a isagha ava ijugeraera. Namane jo namanenda kotariimi o ujuimi, God da Gekaghae dabade baingoro use ijugae eraera. Namane geka beká vanembo sise, God da dombuda nunda Geka bekáda bekáda sise irera.

<sup>3</sup> Avata evetu genembo mendeni, namanenda geka jo ningi kasama ae eraera. Evetu genembo resena emo, ne jebuga evovodae irari ava kosasaghedo ambari dae erera. Evetu genembo amo, ne kau foiyai asugeoro dombu gagara eraira aminga ava edo, nenda munju gajedo diti jo basae etiri, namanenda vironu ava, ne jo ningi kasama ae eraera.

<sup>4</sup> Ne jo tumondaerera da beká mo eviri. Satan, nu enda da gode ava

edo irira. Evetu genembo tumondari iraede amo, erá usasa geore dae sise, nenda kotari isambu tumba da roeraimi gajetiri irera. Usasa amo, Bino Eveva da usasari. Ava sedo, erá Bino Eveva ningido, Keriso da duro ava geore dae sedo, Satan nu amingusira. Keriso resena emo, God ghae kau dabakori.

<sup>5</sup> Namane vironu seraera amo, namane Iesu Keriso dae seraera. Namane jo namanendae sise, vironu sae eraera. O totofo namanenda javo jighoro erare dae sise, jo sae eraera. Tefo! Namane eminge seraera, “Iesu Keriso nu Bajariri, a kotugo namane nenda sabua+ edo, Iesu da javoda nemo sonembuse irá gheraera,” aminge sise, namane vironu seraera.

<sup>6</sup> Namane Keriso da Bino ava vironu seraera ainda beká mo, eviri. God utu a enda use, eminge sisira, “Tumba aminda usasa siroredo janimbare!” aminge sisira. God daba aimi nunda usasa mutiri, namanenda dubo jokáda janimbedo munju afigetiri, namane Iesu da dombu gosuse, God da duro gido kasama useri. Aindae namane nunda Bino ava vironu seraera.

<sup>7</sup> God da Bino namane seraera amo, duroghae a fakinaghaeri. Avata namane mo, fakina tefori. Namane taká dambu evetu genembori. Namane kau okia endaimi jighiraera, amingori. Kau okia toto bejeari dadaberaira avavaga, namanenda tamo da fakina dadabeari amburaera. Ava sedo, namane nunda Bino bu jighirera avata, ainda fakina da susu mo, jo namane iraeri. Ainda susu mo God ri.

<sup>8</sup> Dara a bouvu digarigo namanekena foa gheraira avata aimi, namanenda tumondari jo disae eraira. Namane umbu mendeni manamana use dubo buneraera avata, namanenda tumondari jo doyaerera.

<sup>9</sup> Evetu genembo mendeni namanekena fakarago use bouvu mutero mema itatameraera avata, God nu namane jo doyaerera. Gito-

fuimi namane deraera avata, namane jo ambae eraera.

<sup>10</sup> Namane dara a bouvu, kau Iesu itatamuse ambududurusira aminga ava, namanenda tamoi itatamuse nunda ambari ava, evetu genembokena ijuguse deingheraera. Nunda ambari ava ijugurureoro, nu namane sonembeari, nunda jebuga itatamedo bu deinghuse, nunda jebuga barago ijugeoro natofo kasama eraera. Ambari itatameraera da susu mo: namane ambari dae urogho use sekago jebugarera amo, evetu genembo ava gosuse, Iesu da jebuga namanenda tamonda isagha ari garera.

<sup>11</sup> Namane jebuga irise, Iesu da javodae sedo, eko jokáda fefetuse ambarigeraera. Amingeraera da beká mo: Iesu nu namane sonembururari, nunda jebuga namanenda tamonda isagha ururari evetu genembo isambu gaeteri.

<sup>12</sup> Kotugo, namane amingedo ghusera a amingureoro aimi, ne Iesu da Bino ningido, nunda jebuga ava budo, nenda dubo jokáda itatameraeva.

<sup>13</sup> Genembo enii God da fakina tumonde gogoghombuse, God da Geka jokáda eminge gembiri irira:

“Na God tumondusena aindae sedo, nunda Geka ava vironu siseni,”

aminge gefusira. A namanenda tumondari kau daba avori. Namane Iesu tumonderaera aindae sedo, namane nunda Bino ava vironu sise irera.

<sup>14</sup> Namane eminge tumonderaera. God nune setiri, Bajari Iesu ambarida ghe jebuge erorusira. God daba aimi sari, ne namonde dabade ere ya numokena buvudo, nunda dombuda fetarera.

<sup>15</sup> Avori, namane janjagu eraera a mema itatameraera amo, nendae sise amingeraera. Amingururoro, God da sonemba ya evetu genembo digari aikena buvari budo, ne God dae aiyakoe sise, nunda javo a duroghae dabade jighoro ere gogoghobarira.

*4:16—5:10 Namonde God Tumonduse Ivugaghae Irarera.*

<sup>16</sup> Namane aindae sedo, jo bunae eraera. Geka bekári: namanenda tamo isaghakena garoro gaghari dae erira. Avata kotugo, God sifo ghousa evia nunda fakina namanekena futurureari, namanenda asisi jokáda fakina buraira. Fokakena, namanenda fakina dadaberaera. Avata dubo jokáda, namanenda asisi fakina eraira.

<sup>17</sup> Amo, namane oroko sifo tufako ainda jokáda, bouvu fufuse mema itatameraera da beká mo: namanenda dubo joká nange kau ari, namane duro evovodae irari ava baetera aindae, God seari mema itatameraera. Namanenda bouvu a mema kitakori. O duro amo, teriago bekári.

<sup>18</sup> Aindae sedo, namane enda da roera ditiimi giraera aindae, jo gigitae eraera. Namane utu da roera a asisi da roera jo ditii gae eraera ava kotise, a gigituse irera. Ainda beká mo: roera endada irira amo, ya dadabarira. O asisi da roera amo, evovodae irarira.

## 5

<sup>1</sup> Namane mema itatamuse, jo bunae eraera da susu mo eviri. Namane kasama erera: namondeda tamo mo kau dobo eko ainda kugori. O namonde ambarera amo, namonde ya utu aminda kambo seka evevago ava barera. Kambo seka resena emo, namondeda tamo seka aindae sise resena. God nu tofo mandi, tamo amo ari siroredo, evovodae irarira.

<sup>2-3</sup> Namonde tamo eminda bu jighirera emo, jo kau a inono iraeri. Aindae namonde eminda irise aoro sise, nange namondeda tamo seka, kau embo evevago asugeraera aminga ava asugaetera, avavaga kotise irera.

<sup>4</sup> Ainda beká mo: namane enda eminda tamo manai bu jighirise, enda da bouvu fufuse namanenda tamo aindae, jo ivuga ae eraera. Avata kotugo, namane jo tamo kosughedo, tamo tefo deinghari jo uju ae eraera. Tefo! Namane tamo

seka bari dae kotise irera. Namane uju erera: tamo seka baoro, God da jebugaimi nange namanenda tamo betari evia sari dadabari, tamo seka bu jighirise, jebuga evovodae irari ava tambaeteri.

<sup>5</sup> Namanenda tamo evia dadabari, tamo seka budo jebuga evovodae irari ava baoro dae sedo, God nune setiri namane siroruseri. A amboda, nunda beka gajari namanekena beká edo sirorarira, ava kasama aoro dae sise, God nunda Asisi namanekena mutiri firi ruruseri.

<sup>6-7</sup> God da Asisi rurusera aindae, namane tumo fainghedo, sifo evia inono ata fete simbugeraera. Enda eminda, namonde taká, kau evetu genembo esa ya gheraera, aminga ava edo deingheraera. Avata namane tumo faingheraera da susu eni mo: namanenda reighi beká a kambo beká mo, Bajari da reighi utu ominda irira. Ava kasama use, tamo evia bu jighirise, enda eminda deingheraera. Ainda beká mo: namane endada deinghuse, Bajari jo gae eraera. Avata Bajari a nunda roera utuda irira, ava tumonduse deingheraera.

<sup>8</sup> Kotugo, namane tumo fainghedo, uju beká ava eraera amo, namane nange ambudo tamo evia kosughe fuggedo, Bajarikena yaetera, ava uju eraera. Eminda tamo einghae irari mo, jo eveva iraeri. O ya Bajarikena irari mo, eveva bekári.

<sup>9</sup> Avori, namane enda eminda irarera, o utuda ya Bajarikena irarera amo, namonde sifo ghousa nunda uju ava ururoro gido, nu ivuga are dae sedo, aminguse irarera.

<sup>10</sup> Ainda susu mo: sifo gombuda, Keriso anumbirari, namonde isasambu ya tere nunda dombuda fetiroro, nu namondeda irari ava ijujuse ategi arira. Edo, namonde endada irise, nusuka nusuka rea eraera, ainda mino eveva a eko ava, nune mutarira.

*5:11–6:13 God De Mainungari Da Emborori.*

<sup>11</sup> Keriso amingarira aindae sedo, namane Bajaridae igheghi use, evetu genembo numoá tumondaoro dae sedo, vironu seraera. Avata kotugo, namane kau mavego amo, God nu kasama erira. A na erekotena, namane kau mavego amo, nene nenda dubo jokái kasama ereva.

<sup>12</sup> Namane geka resera emo, jo nene namane tumondaovo dae saeri. Ne nange namanenda javo jighovo eraetira, ainda emboro ijugari dae sise seteni. Eregoseva: evetu genembo mendeni, nenda kokomana da dubo joká jo kotae eraera. Ne kokomana da irari da kau avanembo kotise, eminge seraera: “Nu genembo teriari,” o “Nu genembo kitakori.” Avori! Ne nange evetu genembo aminga ainda dombuda, namanenda javo jighovo eraetira ava kotise, namanenda kotari evia ijugetero eregoseva.

<sup>13</sup> Avori, namane aminge sise, gogovara da kaugo ariá erá koteove! Namane God da javo jighoro erare dae sedo, aminge seteri. O geka mendeni dubo kote simbugedo setera amo, nemo sonembari dae sedo seteri.

<sup>14</sup> Namane nemo sonembuse geka seraera ainda beká mo: Keriso da dubo bari aimi, namanenda dubo bedo eari itatamedo ne sonemberaera. Aminguse, namane eminge kotise irera: Keriso namonde evetu genembo dubo ruruse, evetu genembo isasambudae ambududurusira. Aminge kotise, namonde tuka evia buraera. Nu ambududurusira amo, kau namonde isambu Keriso de dabade ambududuruseri, ainda kaugori.

<sup>15</sup> A kotugo, Iesu namonde isasambudae ambududurusira da susu mo: namonde jo totofo namondeda irari kotise irae aeteri. Nu namondeda sedo ambudo, ambarida ghe jebuge erorusira. Ava sedo, namonde nunda sedo, saramana use iraeteri.

<sup>16</sup> Ava sedo namane orokoé tuturo edo, jo evetu genembo da gari o duro avanembo kotise ijujuae arera. Namane giti Keriso gido, eminge ko-

tiseri, “Nu taká dambu genembori,”  
ava kotiseri. Avata nunda kau a beká  
ava fira isagha etiri gido, namane giti  
sembae kotisera ava, kasama useri.  
Kasama edo, namane oroko Keriso  
kotise, jo aminge kotae arera. Ava  
sedo, namane oroko evetu genembo  
kotise, nenda dubo joká kau mavega  
irira, avanembo kotarera.

<sup>17</sup> Avori, ne eregoseva: genembo  
mave Keriso ghae dabade tatedo  
irarira amo, nu dubo jovereghari,  
irari seka budo, nu dombu eni beká  
ava edo irarira. Nunda irari manai  
isambu dodo, nunda irari seka ava  
tuturo arira.

<sup>18-19</sup> God nune sonembeari, irari  
seka evetu genembo da dubo jokáda  
siroreraira. God Keriso dirigetiri  
fira ambududuruseri aimi, namon-  
dekena mainungari budo fusira.  
Amingedo, evetu genembo da ari  
ekoko kote dodo, jo sekago ijujue  
arira. Nu amingusira ainda amboda,  
namane nunda Geka osa saoro dae  
sisira. Osa siruroro evetu genembo  
ningido, nu nemonde mainungari  
dae sisira.

<sup>20</sup> Geka setera, daba ava sari dae  
erera. Namane Keriso da aghi kaka-  
tori. God tofo mandi, namane nemo-  
kena geke saoro dae setiri resera  
amo, eviri. Keriso da javoda nemo-  
kena resera, ningivu! God de dabade  
mainungivu!

<sup>21</sup> Keriso resena emo, nu ari  
eko eni jo aeri. Avata nange  
namonedae ‘eveva’ saetira ava  
kotise, God Keriso gido, nundae ‘eko’  
sise, namonde darige dodo, Keriso  
namonedae sedo dorusira. Dedo,  
Keriso da irari eveva ava budo,  
namondekena mutiri bero, aminda  
gosuse, namonedae ‘eveva’ sisira.

## 6

<sup>1</sup> Avori, namane God de dabade  
saramana use andae, eminge re-  
sera. Ne God da sonemba ruruseva  
ava, erá soesa eove!

<sup>2</sup> Nunda sonemba baoro dae sise,  
God nunda Geka jokáda eminge re-  
sira:

“Na evetu genembodae joka use,  
kavevera ari dae sedo sifo fi-  
fitusena aminda, na ninda be-  
nunu nininguseni.

A kotugo, na sonemba mutari dae  
sedo, sifo ffitusena aminda,  
ni sonembeteno jebugusesi.”

God nu aminge setiri, nunda Geka  
jokáda gefuseri. Avori, kote givu!  
Kavevera a joka ari da sifo gategari  
amo, nu sifo oroko eindae sisira.  
A kotugo, sifo God sonemba mu-  
tari dae sisira, ábarago oroko eindae  
sisira. Ava sedo, nunda sonemba a  
jebuga, oroko baovo dae resera.

<sup>3</sup> Erá evetu genembo namanenda  
saramana gido, aji seóro dae sise, na-  
mane durumugedo irise namanenda  
ari a irari kaifa e gogoghombeara.  
Evetu genembo gido, jo sembae ko-  
tise gofae aoro dae sedo, aminger-  
aera.

<sup>4</sup> Namane God da aghi kakato  
ava, evetu genembo kasama aoro  
dae sedo, namane emingeraera.  
Dara, mema, a roera eko mendeni  
mendeni namanekena foa gheraira  
ainda jokáda, namane God da  
saramana jo doyaera eraera.

<sup>5</sup> Kau daba aminga ava, gitofuimi  
eredo namane deraera, diburada fi-  
tiraera, a evetu genembo namanen-  
dae sise titigho eraera ainda jokáda,  
namane God da saramana jo doyaera  
eraera. Umbu mendeni, namane  
janjagu use, ighoi itatamuse jo avae  
edo ghuseri. Kotugo ainda jokáda  
barago, namane God da saramana jo  
doyae edo ghuseri.

<sup>6</sup> Namane fisi da uju ava kotae  
edo, geke kote simbuguse, nama-  
nenda uju kote dodo, evetu genembo  
mendeni da uju ava use, nemokena  
durumugedo, kavevera use God da  
aghi edo ghuseri. Asisi Kakara da  
fakinaimi, namane jo evetu genem-  
bokena dubo bari tefo ikáda ae edo  
ghuseri, ne dubo bu gogogho edo  
ghuseri.

<sup>7</sup> A kotugo, namane geke bekáda  
bekáda sise, God da geke ava vi-  
ronu sise, God da fakina evetu gen-  
embokena ijuguse, saramana edo

ghuseri. God nunda irari eveva ava namanekena mutiri bero, aminda gosuse, namanendae ‘eveva’ sisira. Ava kotise, nunda irari eveva ava, kau kaiya a bere aminga ava budo, ungo soveni soveni jighi fetedo, namane isoro eraera.

<sup>8</sup> Evetu genembo namanendae sakai sarera o dombuda sarera amo, namane aindae jo kotae arera. Kau daba aminga ava, evetu genembo namanenda javo jighoro erarira, o namanendae aji sarera amo, namane aindae jo kotae arera. Namane taká, God da saramana use irarera. Evetu genembo mendeni aji sise, namane gungubo kakatova seraera. Avata geka bekári: namane geka bekáda bekáda sise irá gheraera.

<sup>9</sup> Evetu genembo namane kotae eraera, avata God namane kasama eraira. Namanenda ambari mo, ata duruda iriari deingheraera; avata kotugo, namane jebuga irá gheraera. Gitofuimi namane dedo ghuseri, avata namane jo ambae edo ghuseri.

<sup>10</sup> Namane dubo memaghae irá gheraera, avata namane Bajari da sonemba buraera, aindae ivuga use irá gheraera. Namane makasi embori. Avata kotugo, namane God da gugua ghasise deinghureoro, evetu genembo digari ava gido, jebuga aminda buraera. Namane gugua tefo bekári. Avata kotugo, namane amboda God da dombuda gugua barera ava kotise, eminge resena. Geka bekári: namane mo, susu iti fafoderi.

<sup>11</sup> Arie, namanenda nano namendi, Corinth aminda ireva! Namanenda kotari isagha beká setero niningereva.

<sup>12</sup> Namane dubo joká isambu nemokena muturaera. Avata ne dubo joká isambu namanekena jo mutae eraeva.

<sup>13</sup> Avori, ne kau nanda sasingu da kaugo ava edo ireva. Na aindae nemokena resena. Ne minonde minonde dubo ruruse, nenda dubo joká namanekena mutareva!

*6:14–7:1 Namonde Jo Evetu Gen-*

*embo Ekoko Ainde Dabade, Umo Gamo Use Deinghae Arera.*

<sup>14</sup> Erama, evetu genembo God da natofo jo ae irera, ainde dabade tateove! Geka evia kote givu! Usasa reda irarira aminda tumba tefori. Kau daba aminga ava, ari eveva jo ari ekoghae dabade baingoro ae arira.

<sup>15</sup> Eregoseva, Keriso da kau eniri. O Satan da kau mo, eni bekári. Kau daba aminga ava, God da sasingu, jo tumondari irae embo ainde dabade tatae arera. Namonde susu eniri, o nemo susu eni bekári.

<sup>16</sup> Kau daba aminga ava, namonde jo God da Kambo+, Satan da ove kevariimi bebete ae arera. God da Kambo+ resena emo, totofo namondedae resena. Ainda beká mo: namonde tumondari embo mo, inono, God da Kambo+ avavagori, nu namondeda dubo jokáda teredo irira. Aindae sise, God setiri nunda Geka jokáda eminge gefuseri:

“Na nenda dubo jokáda teredo, namonde dabade irise, na nenda God edo irono, ne nanda natofo arera.”

aminge sisira. Kotugo, vasa eninda eminge sisira:

<sup>17</sup> “Ava sedo, evetu genembo mendeni da jokáda ghe buvu ajagha fetevu! Aminguse, bebete ari da roera eni erá dereove!

Aminguse irareva amo, ne nane bu kaifa use,

<sup>18</sup> nenda Afa aono, ne nanda sasingu edo irareva. Na, Bajari fakina kato, nane resena.”

## 7

<sup>1</sup> Nu aminge beka gagojuse sisira ava sedo, nanda dubo bari kokomana, namonde emingaore! Namondeda tamo a dubo joká rejo eniimi bebete eraira ava dodo, namonde ghamo joká a tamo seghedo, God da natofo kakarago ava edo irarera. Namonde God kena igheghi use amingarera!

*7:2-16 Corinth Embo Ne Dubo Jovereghusera Aindae, Paul Ivuga Usira.*

<sup>2</sup> Nenda dubo joká namanekena mutareva! Namane mavekena ari eko eni jo aeri. Namane jo nenda jokáda ijuga sembae aoro, mave enii ningido dara aeri. O namane jo nenda mendeni dedeuse, nenda roera eni jo baeri.

<sup>3</sup> Aminge resena aindae, erá dubo mema eove! Na anakora setena, daba ava sari dae erena: namane ne dubo bu gogoghomboraera. Namane ambarera o irarera amo, ne jo kote doyaerera.

<sup>4</sup> Na nemoá tumonde gogoghombuse a nendae ivuga use, nenda javo jigheono erera. Namane mema a bouvu itatamuse irera aindae jokáda, nenda bino ava ningido, na riria beká ava erena.

<sup>5-6</sup> Ne eregoseva: namane fera Frovensi Masedonia eminda buvurutusera amo, namane eminda barago jo jangutuse saramana ae edo ghuseri. Namane dubo jokái bunise, oju edo kotari teria futo useri, a evetu genembo mendeninde dabade beisiga use, osogo edo ghuseri. God babatekena dubo jama muturaira aimi, namanekena dubo jama futusira. Amo, nu Titus unumbe budo fira buviri gido, namane tumo fainghuseri.

<sup>7</sup> Nu fira buviri, nunda dombu sekago gosusera aindae, tumo fainghuseri. A kotugo, ne nange numo sonembetevo dubo jama usira ava setiri ningido aindae barago, tumo fainghuseri. Aminguse, ne nange dubo namokena futuse, namo gari dae kotiseva a nendae sise sorara useva ava, setiri ningido, na ivuga beká ava useni.

<sup>8-9</sup> Nenda irari eko aindae, na reta gembeno bu tegedo dubo mema useva, aindae nambarago dubo mema useni. Avata kotugo, ne sifo tufako dubo mema evo, God sonembetiri dubo jovereghusevu. Ava sedo, na oroko dubo evevaghae irena. Dubo mema useva aindae,

na jo ivuga aeri. Avata ne dubo jovereghuseva aimi, bouvu mendeni darigedo ireva aindae, na ivuga erena.

<sup>10</sup> Aindae beká mo: God mavekena dubo mema mutarira amo, genemboá nu dubo mema itatamedo dubo jovereghari, sifo gombuda jebuga evovodaerari ava tambudo, dubo mema jo ae arira. O evetu genembo mave tefo oju use o meka gosuse dubo mema edo, dubo jo jovereghaerara amo, sifo gombuda ne ambarera.

<sup>11</sup> Ne eregoseva: God nenda ghamo deretiri eretiri dubo mema useva aimi, ne dubo kotedo e gogoghombusevu. Na rea gefusena aindae, dubo mema use, ne oju edo, dara amo dadabare dae sedo, e gogoghombusevu. Aminguse, genembo dara usira aikena, fakarago ava etevo itatamusira. Amo, isambu eveva beká usevu. Amingevu, namane kasama useri, dara aindae susu mo, jo nemo iraeri.

<sup>12</sup> Avori, kotovo dae resena: na reta gefusena amo, na jo, genembo dara usira, o evetu genembo dara aindae bouvu itatamusera aindae sedo, jo gembaeri. Na reta gefusena da beká mo: ne nange na dubo budo, God da uju ava use, nanda geka ningari dae uju beká eraeva, ava kasama aovo dae sedo, reta amo gefuseni.

<sup>13</sup> Ne reta bu tegedo, nanda geka ningido aminguseva aindae, namane saga fainghetiri, ivuga beká ava erera. Namane aindae ivuga useri. A kotugo, ivuga usera da beká eni mo eviri. Ne Titus tavo e gogoghoevo, dubo jama beká ava edo, saga fainghetiri fira osa setiri ningido, namane aindae ivuga useri.

<sup>14</sup> Namane Timothy ghae, giti nendae sakai setero niningsira, aindae beká ava isagha etiri, Titus kasama usira. Amingetiri, namanenda sakai sari amo, geka beká usira. Kau, namane giti geka beká nemokena setero niningsiva aminga ava, namane nendae sakai sisera ava, beká

isagha usira. Amingedo, namanenda geke jo durari, namane meka gaeri.

<sup>15</sup> Titus da dubo bari nemokena barago, baji mindafu ari dae erira. Ainda beká mo: ne nange nange nu igheghi edo kakara use nati jóká doruseva, a nunda geke sifo ghousa ningido ghuseva ava kotise, amingerira.

<sup>16</sup> Na rejoá nenda ungota fitiraena amo, ne amingeraeva. O rejo ava aovo dae seraena amo, ne taká ava eraeva. Aindae na ivuga beká ava erena.

## 8

*8:1-15 Kuristini Evetu Genembo Giti Dubo God Kena Mutudo, Amboda Ne Tofo Tofo Sonembarera.*

<sup>1</sup> Nanda nano namendi, namanenda uju mo: Masedonia aminda Iesu tumondari+ embo irera ainda jókáda, God sonembetiri, rejo sirorusira, ava nene kasama aetevu.

<sup>2</sup> Ne makasi bekári. Dara a bouvu nemokena siroreari itatameraera. Avata ne, God da jebuga aindae sifo ghousa ivuga use, nenda nano namendi Judia embo ava sonembari dae sedo, kavevera use moni begogo futuseri.

<sup>3-5</sup> Ne nange God da natofo Frovensi Judia aminda irera ava sonembaetera aindae, dubo jókáimi namanekena benunu setero, namane 'avori' setero, ne rea kotisera ava useri. Namane kotiseri, ne taká, nenda kotariimi manaka gaedo moni dabade fitaeteri. Avata ne jo avanembo ae useri. Giti, ne dubo Bajarikena futuseri. Ainda amboda, ne God da uju ava use, nenda dubo namanekena futuseri. Aminguse, nenda irari kau mavega kotise, ne rejo mutaetera, ainda inono amo darigedo, teriigo mutero dige fasusira.

<sup>6</sup> Nene amingusera ava gido, namane Titus dae kavenu siseri. Nu nange ya, nemokena buvudo, nenda dubo bariimi, moni dabade fitari dae tuturo useva, ava kaifa ururari, fitovo dadabaeti.

<sup>7</sup> Ne saramana mendeni eraeva ava, ne e gogogho eraeva. Amo, ne tumonde gogogho eraeva. Ne geke se gogogho eraeva. Nenda kasama mindafu aimi, ne kote gogogho eraeva. Ne uju use, sonemba e gogogho eraeva. Ne ari kakatori. Ne namane dubo bu gogogho eraeva. Ava sedo, kau daba aminga ava, ne dubo bari da saramana evia e gogogho aetevu. Saramana evia e gogogho use, moni dabade fitaetevu!

<sup>8</sup> Na resena emo, jo agho daono fetae arira. Avata kotugo, evetu genembo mendeni nange usera, ainda bino ava se ijuguse, nenda dubo bari da fakina ava dere gari dae erena!

<sup>9</sup> Kote givu! Ne anakora namondeda Bajari Iesu Keriso da sonemba ava, itatamedo kasama usevu. Nunda sonemba eminge ijugusira. Nu susu iti fafoderi, avata kotugo, nu nendae sedo, nunda gugua dodo, makasi embo da kaugo edo fusira. Nu makasi edo fusira da beká mo: ne jebugedo susu iti fafode ava aetevu.

<sup>10</sup> Avari, nanda kotari evia sari dae erena: ghaeko eni dotutusera aminda, ne tuturo edo moni dabade fitari dae giti sisevu. Ekaresia+ mendeni isambu, nenda amboda amingari siseri. Ne amingari uju beká ava usevu. Ava sedo, eveva mo: ne moni dabade fitovo dadabaeti!

<sup>11</sup> Moni mutari dae sedo, ne manaka gae gogoghombusevu. Oroko kau daba ava, aovo beká sirorare dae sedo e gogoghombaetevu. Moni kau mavega nemokena irira aimi, fitivu dadabare!

<sup>12</sup> Kotovo dae resena: nenda dubo jókáda moni mutari kotise mutareva amo, God nu ivuga arira. Nemokena nanjogo irarira ava gosuse mutareva amo, inono arira, God da dombuda. Nemokena itako irarira amo, itako mutareva. O teria irarira amo, teria mutareva. Ne dubo jóká isambu God kena futuse, moni mutareva amo, God nu ivuga arira.

<sup>13</sup> Evetu genembo mendeni ungo sokinembarera, ainda bouvu jo nene fumbovo dae sedo, na jo sae erena.

<sup>14</sup> Avata na eminge resena: nenda joba futururovo ya inono aeti. Ne oroko inono beká ava edo ireva. Ava sedo, nenda moniimi sonembururovo, namondeda nano namendi mendeni jebugarera. Amboda mo, tatera nene sonembururoro, ne jebugareva. Aminguse, ne tofo tofo sonembururovo ya inono arira.

<sup>15</sup> Namonde nange nangedo, tofo tofo soro kavevera use sonembaetera aindae, God setiri, nunda Geka jokáda eminge gefuseri:

“Mave digari rete budo ghusera, a mave jo digari iraeke ava rete budo ghusera ava, dabade inononda soro e budo ghuseri,” aminge sisira.

*8:16-24 Paul Nunda Nano Namendi Mendeni, Titus De Dabade Dirigari Dae Erira.*

<sup>16</sup> Avori, kau namane ne dubo bu gogoghomberaera aminga ava, Titus barago ne dubo bu gogoghomberaira. Amo, God nunda ghamo deretiri erorusira ava sedo, ne dubo buraira. Aindae namane God kena aiyakoe resera.

<sup>17</sup> Nunda dubo bari eminge is- agha usira. Namane nu nemokena yare dae benunu sisera amo, nu ivugaghae yari dae sisira. Kotugo, namane giti jo, nune yare dae benunu sae irero, nu tofo mandi ya nemokena sonembari dae uju use kotisira.

<sup>18</sup> Titus da karona are dae sedo, namondeda namendi eni dirigaoro yarira. Genembo resena emo, ne kasama ereva. Genemboé, nu ekaresia+ isambu ainda jokáda eredo, God da Bino Eveva vironu seari ivege ya gheraira.

<sup>19</sup> Geka eni nundae sise resena amo, eviri. Ekaresia+ isambu nu tumonduse, numo namanenda karona edo, Judia embokena namonde dabade ya, dubo bari da emboro ava sonembuse ijugaoro dae sedo, nu gateguseri. Sonemba resena amo, eviri. Namane Judia embo dubo ruse, namane nemo sonembari dae uju beká eraera ava ijuguse, moni

nemokena mutarera. Aminguse, Bajari da javo jighoro erorurari, natofo nunda duro garera.

<sup>20</sup> Namanenda uju mo eviri: moni ekaresiaimi futusera amo, itako mindafuri. Ava sedo, nange namane moni emo kaifa e gogoghombururoro, natofo jo dubo mema use, aji sae aeteri.

<sup>21</sup> A kotugo, namanenda uju eni mo: God nu namanenda saramana gido tumonde gogoghombaetira, a kotugo, evetu genembo barago namanenda saramana tumondaetera aindae sedo, namane amingeraera.

<sup>22</sup> Susu setena aindae sedo, namondeda namendi dirigaoro, natofo mendeninde dabade yarera. Nunda irari gido, nunda saramana ava, umbu mendeni dere gido ghusera amo, nu evovodae dubo joká futuse, ivugaghae sonemburureari gido ghuseri. A nu, ne tumonde gogoghomberaira aindae, nemokena oroko sonembari dae uju beká ava erira.

<sup>23</sup> Titus giti setena amo, nanda komana beká ava edo irira. Nu nangae dabade, nendae sedo saramana eraera. Avori, gegenembo etoto naká nunda karona edo yarera amo, ne ekaresia+ da javoda yarera. Nengae nenda irari ava fuge gosuse, evetu genembo Keriso da duro gosuse, nunda javo jigheoro ereraira.

<sup>24</sup> Ava sedo, ne ya nemokena buvarera amo, nenda dubo bari ava ijugaovo ne gaeteri! Kotugo, ne moni mutareva amo, namane redae nendae sakai sise irera ainda beká barago, ijugaovo gaoro dae sise resera.

## 9

*9:1-15 Mave Ivuga Use Kavevera Eraira Aindae, God Nu Uju Eraira.*

<sup>1</sup> Namonde, God da natofo Frovensi Judia aminda irera ava sonembari dae sedo, nange moni bu dabade fitaetera, ainda geka ne anakora kasama usevu. Ava sedo, jo sekago ghousa sae arena.



<sup>2</sup> Na kasama erena, ne sonembari dae uju beká ava eraeva. Na aindae sedo, evetu genembo Frovensi Masedonia eminda irera, nenda dom-buda fete eminge sise irá gheraena, “Corinth embo a Frovensi Akeia embo mendeni ne, ghaeko dotutusera ominda, moni mutari dae simbugudo refera,” aminge siseni. Aminge sise, evetu genembo eminda irera, ainda ghamo dereteno eretiri, nembarago sonembari dae uju use irera.

<sup>3</sup> Avori, na namondeda nano namendi etodaba naká dirigaono nemokena yarera. Nanda uju, ne ya buvarera amo, namane redae nendae sakai sise irera, ainda beká ava sirorari gaeteri. Erá nanda geka beká irae eure dae sise, ne dirigaono nemokena yarera. Avata na erekotena amo, ne anakora nenda sonemba simbugedo irovo, nanda mendeni resena emo ya buvarera.

<sup>4</sup> O ne jo simbugae irovo, namane Masedonia embode dabade ya nemokena buvarera amo, namane meka teria ambari ava garera. Namane meka garera da beká mo: namane oroko nendae sakai sise irera ava, gungubo sari da kaugo arira. A kotugo, totofo nenda meka gari ava, teria beká arira.

<sup>5</sup> Na aindae sedo Titus manekena eminge benunu siseni. Ne giti yama, rejo mutari siseva ava, simbuge dabade fitareva. Ne durumugedo moni dabade fitovo ya inono ari, na Masedonia embode dabade ya buvarera. Ne amingareva amo, evetu genembo kasama arera, geka emo geka bekári. Ne Corinth embo Frovensi Akeia aminda ireva, ne jo dadaragaruse, moni mutaeri. Ne uju use, durumugedo futuseva ava kasama arera.

<sup>6</sup> Geka evia kotise irivu! Genembo mave vareda veka digari irae govarira amo, nu beká jo digarigo bambae arira. O genembo mave veka digari govarira amo, nu beká digarigo bambarira. Kau daba aminga ava, mave nunda nano namendi sonem-

buse itako mutarira amo, nu God da esimbugari teria eni jo bae arira. O mave nunda gugua teria aimi, nunda nano namendi sonembarira amo, God nu genembo amo esimbuge gogoghombarira.

<sup>7</sup> Ava sedo, ni rea ninda dubo jokáda mutari kotaresa amo, mutaresa. Ni jo imboeghae mutae aresa. A ni jo, evetu genembo mendeni rea muturaera o seraera, ava kotise jo mutae aresa. Ainda beká mo: genembo mave dubo joká riria use, kavevera eraira amo, God nu uju beká ava eraira.

<sup>8</sup> Ne eregoseva: God kena gugua inonori. Ne ivuga use, nenda gugua ghasareva amo, ne totofo rejo bu mindaeteva o asugaeteva ava, God nune mutari bareva. A rejoimi kavevera use, mutari dae kotareva, ábarago God futururari ya inono beká edo teria arira.

<sup>9</sup> Genembo mave ivuga use kavevera eraira aindae sise, God da Geka eminge resira:

“Genembo amo, nu makasi embo-kena gugua soesa ghaseraira.

Aindae sedo, nunda kavevera ainda beká siroredo evovoda irarira,”

God da Geka aminge resira.

<sup>10-11</sup> God nu kavevera katori. Vare govári da veka, nune muturaira. A uvu bayau barago, nune muturaira. Kau daba aminga ava, ne Judia embodae kavevera ururovo, God ne esimbugururari gugua dige fasarira. Kavevera evovoda use irovo dae sedo, nu amingarira. Amingururari, ne kavevera use moni ghasovo, namane budo ya evetu genembokena mutoro budo, ne God kena aiyakoe sise irarera.

<sup>12</sup> Ne eregoseva: namonde aminguse irarera amo, eveva etoto naká ava sirorarira. Eni mo: namondeda nano namendi, makasi embo, ne uvu bayau inononda barera, a kotugo, tamo asugari inononda barera. A eni mo: ne amingururovo, makasi embo ne dubo eveva use ivugaghae God kena aiyakoe sise irarera.

<sup>13</sup> Nenda sonemba aindae sise, evetu genembo digari ne God da javo jighoro erarira. Ne Keriso da Bino tumonduse, ainda Geka ningido moni futuse kavevera eraeva aindae, evetu genembo mendeni ne God da javo jighoro erarira.

<sup>14</sup> God da sonemba muteovo buraera aindae, evetu genembo amo ne dubo ruruse, nendae sise God kena banunguse irarera.

<sup>15</sup> Namonde barago, God nunda joba jo beka sari da kaugo irae ava futusira aindae, aiyakoe sise irore! Nunda joba futusira amo, jo ambo jijighuse mutae usira, aindae numokena aiyakoe sise irore!

## 10

*10:1-18 Paul Nunda Saramana Aindae Geka Sise, Fakina Beká Ava Usira.*

<sup>1</sup> Na Paul, nane tofo nemokena resena. Nenda mendeni eminge seraera, “Paul nu namonde dabade irise, geka robogho ai sise durumugedo tofo fiteari voseraira. O nu ya soka feteraira amo, ghoghora sise gemburaira,” aminge seraera. Avori, Keriso namondekena durumuguse veka eveva eraira ava kotise, na nemokena benunu resena.

<sup>2</sup> Na jo uju aeri, erama na ya nemokena geka fakarago sise, dombuda seóno dae sise resena. Ava sedo, erá gogore eóvo gido, na ya nemokena geka fakarago sise, dombuda seone! Evetu genembo mendeni ne seraera, “Paul nu rea eraira amo, fisi da uju ava kotise eraira.” Avata na kasama use, eminge resena. Na inonori. Na yama evetu genembo aikena geka fakara ambari ava, nane sari da kaugori. Avata erá amingeóno dae sise, ne durumugedo irareva!

<sup>3</sup> Geka bekári: namonde isambu endada irise, fisi da uju itatamuse irera. Avata namane mo, jo fisi da uju ava ari dae sise, jo Satan kena isoro ae eraera.

<sup>4</sup> Namane God da javoda isoro arera amo, namane jo enda da ambí goroba budo aimi, isoro ae arera.

Ambi goroba God namanekena muturaira amo, fakinago bekári. Aimi, namanenda gitofu ainda susu ava de diseari, beje nunda nunda eraira. Namane, evetu genembo gungubo sise beisiga eraera, ava vegeoro ya dambu edo dadaberaira.

<sup>5</sup> Evetu genembo nange God kasama ari da emboro, ava nenda gogoreimi eoro God da emboro gajeraira ava, namane de tiseraira. A kotugo kotari ekoko rea irira ava, namane jighoro dambu ari, ne Keriso da geka avanembo ningarera.

<sup>6</sup> Ne namanenda geka ningi simbugareva ainda amboda, namanenda geka dodo, ne sekago tuturo edo ari eko eni areva amo, ainda mino jovereghari gareva.

<sup>7</sup> Ne tamo isaghada ava giraeva, o jokáda mo, ne jo gae eraeva. Amo, ne jo dubo kotise gae eraeva. Na aminge resena ainda beká mo eviri: mave tofo sakai sise eminge saeti, “Na Keriso da tofori. Na nunda fakina ruruseni.” Mave aminge saetira amo, eveva mo, nu eminge kotaeti, “Paul nunda natofode barago, Keriso da tofori. Ne fakina kau daba ava ruseri. Jo dombu eni iraeri,” aminge kotaeti.

<sup>8</sup> Avori, na reta evia gefuse, nanda javo teria futo jigheono ereraira tanojo. Avata kotugo, Bajari namokena fakina mutiri, na nenda giti jighari useni. Nunda fakina namokena futusira eimi, sonembaono ne fakina aovo dae sedo futusira. Jo nemo de disono dae sedo mutari na baeri. Avata na, nanda geka ningovo dae sedo rea gembena aindae, na meka jo gae arena.

<sup>9</sup> Na geka fakara reta jokáda gembena amo, jo geka vanembo iraeri. Erá seove, “Paul da fakina tefori. Nu tefo, oju aoro dae sise reta gemburaira,” ava erá seove! Na ya buvono, retada rea setena da beká ava siro-rarira.

<sup>10</sup> Na kasama erena, evetu genembo mendeni eminge sise seraera, “Paul reta gefuse, geka fakarago beká ava gemburaira. Avata dom-

buda fetarira amo, nu jo geka fakarago a jo ghoghoraghae sae arira,” aminge sise seraera.

<sup>11</sup> Avata ne mave aminge seraeva, na nemokena eminge resena, ne kasama aetevu: na retada rea gemburaena, daba ava nenda dombu gosuse sarena.

<sup>12</sup> Namane kasama erera: evetu genembo mendeni nenda jokáda saramana use, totofo nenda javo jigheoro ereraira. Ne totofo nemoá sakai sise seraera. Namane jo nemongo iraeri, namane jo totofo sakai sari da kaugo iraeri. Avata ne kau daghedo sarigeraera. Ainda beká mo: ne taká nenda kotariimi, tofo tofo inono use sakai seraera. Na kasama erena, ne namoá inono use ijujaetera amo, na jo namonde fetono inono ae aeti. Ne evetu genembo da kotariimi, tofo tofo inono use ijujeraera. Ne jo God da kotariimi, inono use ijujae eraera. Ava sedo, na nendae jo oju ae eraena.

<sup>13</sup> O namane mo, jo amingo iraeri. Namane sakai sarera amo, saramana rea God namanekena futusira aindae sakai sarera. Jo kotae kotae totofo sakai sae arera. A namanekena saramana futusira amo, saramana eni nenda jokáda aoro dae sedo futusira.

<sup>14</sup> Ava sedo, namane jo kotae kotae use, ya nemokena buvudo saramana ae useri. Namane God da uju a saramana ava use, era nemokena buvudo, Keriso da Bino Eveva ava vironu setero ningi tumondusevu. God da aghi kakato mendeni amboda nemokena iseri. O namane mo, giti nemokena iseri. Ava sedo, namane geka sarera amo, ningareva. Nemo namanenda sari ningariri.

<sup>15</sup> Ne eregoseva: God namanenda saramana a namanenda saramana da vasa futusira, a kotugo nunda aghi kakato mendeni gatededo, saramana nunda nunda ghasedo, nunda vasa vasa futusira. Ava sedo, aghi kakato mendeni da saramana eveva eresufira aindae, namane jo namanenda javo jigheoro erae arira.

Avata God namane nenda jokáda saramana rea aoro dae sisira, ava use irarera. A kotugo, aminguse irari dae uju beká ava erera. Amo, nenda tumondari baji mindafu ururari, namane giti sonemba itako nemokena futusera ava darigedo, sonemba teria beká ava nemokena mutari dae uju beká ava erera.

<sup>16</sup> Namane nemokena sonemba mutarera ainda amboda, ne dodo ya vasa eni seka aminda tuturo edo, Keriso da Bino Eveva ava vironu sarera. Aminguse, namane jo evetu genembo mendeni da saramana ainda jokáda teredo, namane totofo sakai sae arera.

<sup>17</sup> Avata geka beká mo eviri. God da Geka eminge resira:

“Mave sakai sari dae uju arira amo, nu jo tofo numoá sakai jo sae arira. Nu Bajaridae sakai sarira,”

aminge resira.

<sup>18</sup> Ainda beká mo: Bajari genembo enidae sakai sarira amo, namonde kasama arera, nu genembo evevari. O genembo mave tofo sakai sarira amo, nunda irari kau mavega ava, namonde bunarera.

## 11

*11:1-15 Paul Nu Giti Ira, Keriso Da Bino Ava, Corinth Embokena Sisira; Ava Sedo, Ne Nunda Geka Nininguse, Evetu Genembo Mendeni Da Geka Jo Ningae Aeteri.*

<sup>1-2</sup> God uju erira amo, ne nusuka numoá tumondaetevu. Na daba ava uju beká ava erena. Aminge kotise, ijuga kakato sembae setena, ainda geka ava erá tumondeóvo dae sise, na gogovara da kaugo edo, nanda javo jigheo eretira, a kotugo sekago jigheo erarira. Jo sari da kaugo irae, avata na taká sarena. Ne namokena durumugedo, nanda geka rea sarena ava ningareva. Ainda beká mo: na uju erena amo, nane ne unumbe budo, Keriso kena mutaeteni. Ne kau gagara eni eveva a kakarago irovo ava budo, mandi

enikena datu dighido mutono bae-tira, avavaga kotise irena. Mandi resena emo, Keriso dae resena.

<sup>3</sup> Nanda oju mo eviri. Erá evetu genembo mendeniimi yama nenda kotari ava bebeta eóro, ne dubo isambu Keriso kena muturaeva ava doyeove dae oju use resena. Kau Satan jingabu da tamo bu asugedo fira, namondeda avia Eve kena buvu deretiri, nunda gungubo tumondusira aminga ava, erama evetu genembo mendeni dereóro ne ava tumondeove dae sise, oju erena.

<sup>4</sup> Na aminge resena da beká mo: mave nemokena ya buveari, ne nati joká doruse, nunda geka ivugaghae ningiraeva. Ava sedo, Satan da aghi kato eni yama, genembo eni Iesu da kaugo, ainda bino ava vironu sarira amo, ne Iesu va sise, nunda geka tumondareva. Avata kotugo, amo gungubo sarira. Bajari Iesu kau mavega sisena ava kotae edo, Satan da aghi katoá rejo sarira, ne ava tumondareva. Ne Asisi Kakara rurusevu, avata Satan da aghi katoá yama asisi o sukaru eninda bino sarira amo, ne Asisi Kakarava sise, sukaruá nemokena foa asugare dae sedo benunu sareva. Aindae na oju erena.

<sup>5</sup> Kote givu! Ne, aghi kakato sembae setena ainda kasamadae, ne sakai seraeva. Avata namo jo nemongo iraeri.

<sup>6</sup> Avose, na vironu sise, geka da iriro jo e gogoghombae eraena tanojo. Avata nanda kasama mo, teriago bekári. Namane namonde aminda irise, geka rea sedo ghusera ainda jokáda, namanenda kasama mavega amo, ne itatamedo ghusevu.

<sup>7</sup> Ijuga kakato mendeni setena, ne benunu seoro nenda moni ava muteoivo aimi, bu uvu bayau ombu mindiraera. Ne kokotofu da kaugo ero, nenda geka ava tumondusevu. O na nemokena God da Bino Eveva ava vironu sedo ghusera amo, nemo sonembaono viti God da jebuga baovo dae sise, na sabua+ da ari ava use, nenda moni jo bae edo ghusera.

Avose, amo ari sembae useni tanojo. Na nenda moni jo bae edo ghusera ava gido, na 'sabuava' sise, nanda geka jo ningae eraeva.

<sup>8</sup> Eregoseva: na nenda jokáda saramana use, ekaresia+ mendeni da moni ava ruruse aimi, nanda uvu bayau ombudo ghusera. Na nemo sonembari dae sise, na kau bagia kato eninda kaugo edo, ekaresia+ mendeni da moni ava budo ghusera.

<sup>9</sup> Na Corinth aminda saramana use, uvu bayaudae o roera enidae uju edo ghusera amo, na nenda moni eni jo benunu saono mutaeri. Nanda sonemba rea uju edo ghusera amo, namondeda nano namendi Frovensi Masedonia ghedo fusera aimi, uvu bayau futero na saramana udo fuseni. Na aindae sedo, nenda moni o roera eni jo bae useni, a kotugo amboda, na jo saono mutae areva.

<sup>10</sup> Na, Keriso da geka beká namokena irira aimi, eminge resena: na jo nenda sonemba benunu se bae arena. Erá nanda sakai sari evia beká irae eure dae sise, na nemo-keno jo benunu sae arena. Amin-gaono, reighi Akeia aminda, nanda sakai sari evia, sifo ghousa geka beká edo irarira, jo gungubo ae arira.

<sup>11</sup> Na redae geka eminge reseni? Kote givu! Erá na nemo imboe use sariá seove! God kasama erira, na geka evia sise, eminge resena emo, ne dubo bu gogoghombuse resena.

<sup>12</sup> Avata na nenda moni jo benunu se bae arena ainda beká mo: na aghi kakato setena, ainda geka da mendo se tafusegaono jo tumonda areva. Aghi kakato resena emo, ne dederuroro, nenda geka tumondaovo dae sise, eminge seraera, "Namane Paul de inonori. Nu kau nange nangedo nenda jokáda saramana edo ghusera, kau daba aminga ava, namane saramana urureoro giraeva. Ava sedo, namanenda geka ava, ne tumondaetevu," ne aminge sise, totofo sakai seraera.

<sup>13</sup> Avata a jo geka beká iraeri. Amo gungubori. Evetu genemboá, ne

Keriso da aghi kakato da kaugo use eraera, jo nunda aghi kakato beká iraeri. Ne derari kakatori.

<sup>14</sup> Avata nenda geka seraera ain-dae, erá buneove! Satan barago nu amingeraira. Amo nunda dangio jovereghedo, kau aneya usasa a durode ava jinarikena mo, inonori.

<sup>15</sup> Avori, evetu genembo ainda bajari Satan, nu amingeraira. Ava sedo, erá buneove! Satan da mendeni kau numongo ava edo, geka beká da aghi kakato ainda kaugo arera ain-dae, erá dudukughuse buneove! Ne Satan da natofo ava sedo, ne amin-garikena inonori. Avata kotugo, ne rea eraera andae kotise, God mino eko mutari nene itatamarera.

*11:16-33 Paul Nu Iesu Da Gimasa Use, Mema A Bouvu Dombu Eni Dombu Eni Itatamusira.*

<sup>16</sup> Geka setena, daba ava sari dae erena. Tofo mandi javo jighono erari da kaugo ava use, na kau gogovara da kaugo ava eteni. Avata ne, erá na amingedo irari, ava ko-teove! O aminge kotareva amo, avori. Avata ijuga kakato sembae setena, nenda geka erá tumondeove dae sise, nanda javo sekago jighono erorurari ningareva.

<sup>17</sup> Na tofo sakai sari da geka oroko resena emo, na sekago gogovara edo sarigerena. Jo Bajari da kotari budo aimi sae erena.

<sup>18</sup> Avata na tofo sakai sari dae erena. Ijuga kakato resena emo, nenda irari andae kotise, nenda javo tofo jigheoro ereraira. Ava sedo, na oroko reta gefuse, kau daba aminga ava erenere.

<sup>19</sup> Ne tofo dubo kotari kaka-tova sise, evetu genembo gogovara kakato ava, nati joká deraeva.

<sup>20</sup> Aminguse, nenda sari ningari eraeva. Dederurureoro, nenda uvu bayau tefo aminda fugeraeva. Mave nemokena derari bu foha gheraera, ainda geka buraeva. Mave nenda irari ava indiro eraera andae, ne ivuga eraeva. Mave ne sovoda megha eraera amo, ne refo eni jo sae eraeva.

<sup>21</sup> Aghi kakato amingeraera. O nane nendae amingaetena amo, givu, ne ivuga aetevu, ai? Avata emo, na geka beká sari dae erena. Aghi kakato resena, ne ari ekoko beká ava nemokena urureoro mema itatameraeva. O namane mo, jo amingaeri. Namane amingari mo, oju useri.

Avori, aghi kakato sembae amo, ne tofo sakai sise rea seraera, na oroko daba ava sari dae erena. Amo, na evetu genembo munju iradee, ainda geka ava sari dae erena, avata nenda geka da mendo se tafusegari dae sise resena.

<sup>22</sup> Nene seraera, God oro eni Israel embo, ava gategetiri nunda natofo edo fefetusera, ainda mendeni nemori seraera. Avori, nambarago Israel embo da eniri. Nenda nembua agira giti beká mo Abraham, seraera. Ne nunda imemesiri seraera. Avori, nambarago Abraham da imendi eniri.

<sup>23</sup> Ne seraera, ne Keriso da saramana kakatori. (Na oroko kau gogovara da kaugo edo irise, geka resena. Avata kotugo, sido yarena.) Avori, na Keriso da saramana e gogoghombere-aena. Ne jo kau namongo iraeri. Keriso da bino ivegedo yare dae sedo, na janjagu use irena. Na umbu nanjogo fitero dibura useni! Na umbu nanjogo dedo ghusera ava, jo tegari da kaugo mo iraeri. Amingurureoro, na ambari dae urogho use, iria edo jebugedo ghuseni.

<sup>24</sup> Umbu ghabu soveni, nanda natofo Jusi embo, nenda agho dari rea resira ava use, na umbu 39 ava ambí eni asi da kaugo aimi doruseri.

<sup>25</sup> Umbu etodaba naká, na ambí bogaraimi doruseri. Umbu eni, na ghamanai doruseri. Na Keriso da saramana use, ena ghakada+ vose deingheno, ghaka+ umbu etodaba naká bejisira. Ainda jokáda, tumba eni ava, evada fegheno sifo atusira.

<sup>26</sup> Keriso da javodae sedo, na ya foha ghuse, umbu mendeni mendeni usegha jokáda ambari dae useni, a

kotugo, tafasara kakato na daoro ambono dae sedo ghuseri. Nanda natofo Jusi emboimi namo dari dae kotedo ghuseri. Kotugo, namane Jusi embo da gitofu barago, namo dari dae kotedo ghuseri. Taima jokáda a evada, na eko jokáda irá ghedo ghuseri. Yaura, damo, a borija teria beká itatamedo ghuseri. A evetu genembo mendeni na daoro ambono dae kotise, namokena komana ariguse, namo dedeuse gungubo sedo ghuseri.

<sup>27</sup> Na saramana janjagu use, bouvu mendeni mendeni tafuseni. Aminguse, na uvu bayau da baimara itatamedo ghuseri. Umbu digari, na bayau tefo, kambo tefo, embo boka tefo irá ghedo ghuseri.

<sup>28</sup> Avata na rea usena aindae, na jo kotae arena. Bouvu mindafu erefufena amo, na ekaresia+ da bouvu fufuse, nendae oju use irena.

<sup>29</sup> Ainda susu mo: nanda nano namendi fakina dadabari mema itatamarera amo, na nendae sedo, dubo jokái mema tafuse irarena. O evetu genembo mendeni eredo, nanda nano namendi eni jumboro amboda amboda ise, ari ekoko use gofarira amo, na dubo mema ambarako use, derari kakato aikena janje eko arena. Avori, tufako seteno ningeva aindae, eminge resena: aghi kakato sembae setena amo, ne jo namongo iraeri.

<sup>30</sup> Avata ari nane usena aindae, na tofo sakai sarena amo, jo eveva iraeri. Ava sedo, ainda geke do-yarena. O oroko emo, na fakina tefo ireno, Bajari da fakina nange namokena isagha usira, aindae sakai sarena.

<sup>31</sup> Bajari Iesu da God a Afa nundae, evovodae sakai sise irarera! Nune kasama erira: na geke beká resena.

<sup>32</sup> Kini (King) Aretas da gavana eni reighi Damascus kaifa edo ghuseri aimi, namo sandoro dae setiri, nunda isoro kakatoimi Damascus guro békada gaje fefetuseri.

<sup>33</sup> Avata kotugo, namondeda nano namendi mendeniimi, na

rooróda vendi tino edo, furu tokada fitero vosedo sumbu dariguseni. Amingeteno, ne na tava edo, jighi gae useri.

## 12

*12:1-10 Paul Nunda Diti Mokoi Gosusira, Ainda Gekari.*

<sup>1</sup> Setena, daba ava sari dae erena. Na tofo sakai sarena, aminda sonemba eni jo sirorari bae arera. Avata kotugo tuturo eteni. Ava sedo, se dadabarena. Bajari namokena geke jungarida ava afigedo, sono mutiri na diti mokoi gosusena, ainda geke oroko ava sari dae erena.

<sup>2</sup> Ghaeko 14 ainda gitida, na Keriso da eni edo ireno, God sonembiri emo sirorusira. Na saghimbe budo ira, God da vasa iká beká aminda teteruseni. Amo, na tamoi iseni, o asiiimi iseni ava, God nusuka kasama erira.

<sup>3</sup> Vasa aminda irise, na geke mendeni nininguseni.

<sup>4</sup> Kotugo geke niningusena amo, jo evetu genembo mave sari da kaugo iraeri.

<sup>5</sup> Rea gosusena, oindae sakai sarena, avata na tofo mandi sakai jo sae arena. O na sifo mendeni mema tafusena, o fakina tefo iriana ainda jokáda, Bajari da fakina nanda tamonda isagha usira, aindae na sakai sarena.

<sup>6</sup> O na tofo namoá sakai saetena amo, na jo tefo sae aeteni. Na jo, evetu genembo munju kitako edo irise susu tefo sakai seraera aminga ava use, jo sae aeteni. Na susudae saeteni. Avata na jo vasa eninda irise, amingae arena da beká mo eviri: na uju erena, na rejoá sirureono ne dengoroi ningido ghuseva, a ditiimi gido ghuseva, avanembo kotareva.

<sup>7</sup> Avori, Bajari nunda geke jungarida ava afigedo, sono mutiri diti mokoi gosuseni. Ainda amboda, nu emingusira. Erama na aindae gogore use, tofo sakai seóno dae sedo, nu darigetiri, Satan mema

eni mutiri namokena siroretiri itata-mudo refena. Mema aimi namokena bouvu ambarako muteari itatamer-aena. Erama na gogore eono dae sise, mema amo nanda tamonda sirorusira.

<sup>8</sup> Amo darigare dae sedo, na umbu etodaba naká Bajarikena benunu siseni.

<sup>9</sup> Avata nu namokena eminge sisira, “Paul, na jo saono ninda mema amo dadabae arira. Ainda beká mo: ninda fakina irarira amo, nanda fakina nimokena dika jo ae arira. O ninda fakina dadaburu-rarira amo, nanda fakina nimokena amo, dikago arira,” nu aminge sisira. Avori, na gofedo tamo mema tafuse irena avata, na aindae sedo ivuga erena.

<sup>10</sup> Ava sedo, na fakina tefo irarena amo, Keriso nunda fakina namokena mutari budo, nunda fakinaimi nunda saramana arena. Avori, nanda tamo da fakina dadabarira, o evetu genembo na dere jirarera, aindae na jo kotae arena. O na janjagu ururono evetu genembo namokena fakarago arera, aindae na jo kotae arena. Kau daba aminga ava, mema a dara namokena furari barena, aindae na jo kotae arena. Ainda beká mo: namokena fakina tefo irarira amo, na Bajari da fakinaimi, fakina beká edo irarena.

*12:11-21 Paul Nu Corinth Embo Dubo Rurusira Ava, Nune Ijugerira.*

<sup>11</sup> Avori, na genembo munju irae da kaugo use, tofo na sakai seteni. Avata amingetena aindae susu mo, nemori. Nene eredo, nandae sakai saetevu. Ainda beká mo: ne, aghi kakato setena, aindae sakai seraeva. Namo, na beká irae da kaugo, avata na, aghi kakato setena amo, jo namonde inono ari iraeri. Na taká teria bekári. Avo gido, nene eredo, nandae sakai saetevu.

<sup>12</sup> Bajari da aghi kato beká da saramana a tano ava, na nenda jokáda durumugedo eono ne gido ghusevu. Tano a ari mendeni mendeni eono ne jo gae iriava, ava gido dudukughedo ghusevu.

<sup>13</sup> Nenda mendeni erekotera, “Paul namane imboe eraira. Amin-guse, nu ekaresia+ mendeni ava uju beká eraira.” Ava erá koteove! Amo gungubori! Na rea urureono ekaresia+ mendeni gido ghuseri a giraera ava, nenda dombuda urureono ne gido ghusevu. Avose, dara dabako nemokena useni tanojo! Na, ekaresia+ mendeni namonde dabade irise, nenda uvu bayau sonembeoro mindido ghusevu. O namonde dabade irise, dubo jama aovo dae sedo, na nemokena uvu bayau jo benunu se bu mindae edo ghusevu.

<sup>14</sup> Na umbu etoto naká nemokena iseni. Oroko yari dae erena emo, umbu etodaba naká arira. A kau na giti edo ghusevu aminga ava use, na sekago nanda uvu bayau tofo ombarena. Na amingarena da susu mo: na jo nenda guguadae uju use ae eraena. Na nemoá uju use, aindae arena. Ne eregoseva: sasingu jo noi numamo da roera ombu mutae aeteri. Noi numamo, ne sasingu da roera ombu mutaeteri. Na kau daba aminga ava, nenda nimamo aminga ava use, nanda roera isambu nemokena mutarena.

<sup>15</sup> Na nemo sonembuse, nanda dubo isambui nemokena mutarena. Amingururono gido, asisi da jebuga tambu baovo na ambarena amo, avori. Nanda dubo bari teria giraeva evia, ne nangarevu? Nenda dubo bari namokena amo dadabarira, ai?

<sup>16</sup> Avori, ne kasama ereva. Na tofo, nenda uvu bayau jo mindae edo ghusevu. Avata nenda mendeni eminge seraera, “Paul, namanenda uvu bayau jo tofo mandi bu mindaeri. Avata Paul da aghi kakato foama, moni mutoro dae sise, dederuse namanenda moni ava, nene bagia eraera,” nenda mendeni ava seoro ningiraena.

<sup>17</sup> Avori, kote givu! Seraera amo, nangaeteni? Nanda nano namendi mendeni dirigeteno nemokena isera aimi, nenda moni bagia useri, ai? Kote givu!

<sup>18</sup> Na Titus, yare dae sedo benunu siseni. Sedo, namondeda namendi eni, nunda karoná are dae sedo gatededo, ne dirigeteno iseri. Avori, nenda irari ava kote givu! Na nemo-kená rejó a nange edo ghusena ava, Titus nu kau daba aminga ava edo ghusira. Nu jo rejó eni bagia aeri.

<sup>19</sup> Avori, namane geka evia gefuse, totofo namanenda geka sonembari dae sedo gembariá, erá koteove! Namane God da dombuda irise, Keriso da uju use geka evia gemberi. Ne fakina budo fetovo dae sise, geka emo gemberi. Namane ne dubo buraera aindae sedo, amingeteri.

<sup>20</sup> Eregoseva: namane uju erera, nange nangedo tofo tofo dubo futuse, dubo dabako edo dabade umo use iraeteri. Avata nanda oju mo eviri: na ya nemokena buvudo, ne tofo tofo beisiga ururovo garena. O tofo tofo kokomanadae bengoso ururovo garena. O tofo tofo janje ekoko ururovo garena. O ne totofo nenda uju avanembo kotise ururovo garena. O aji a unongu sirurovo garena. O ne tofo tofo gogore use, osogo ururovo garena. Ne aminguse irovo garena amo, na ghoghora sarena aindae, ne meka gareva. Amo, nanda oju mindafuri.

<sup>21</sup> A kotugo, nanda oju eni mo eviri: na ya nemokena buvarena amo, avose, na sorara arena. Nenda mendeni kombo yagera a kusia bagia use, gogore beká edo irise, jo dubo jovereghedo nenda ari ekoko vujegae irareva aindae, God sari na meka gido sorara arena tanojo. Ava kotise, na oju erena.

## 13

### *13:1-14 Paul Nu Geka Fakarago Evia Sedo Dotutusira.*

<sup>1</sup> Na giti umbu etoto naká nemo-kená iseni. Oroko yarena amo, umbu etodaba arira. Koto ari da aito aindae sise, God da Geka eminge resira:

“Dara rejodae koto ari sareva, ne jo genembo dabako aindá geka tumondae areva.

O gegenembo etoto o etodaba geka daba ava sarera, nenda geka ava tumondareva,”

God da Geka aminge resira. Amo, namane aminguse koto arera.

<sup>2</sup> Na giti siseni, “Na ya buvarena amo, na jo, nenda ari ekoko nenda mendeni giti usera ava, na jo kote dodo darigae arena,” na aminge siseni. Na giti nemokena isena amo, na nenda ari ekoko embokena a kotugo natofo isambukena aminge siseni. Amboda isena amo, na geka daba ava siseni. Oroko na jo ya buvae irise, geka kau daba ava resena, “Nenda ari ekoko jo kote dodo darigae arena. Ava ijujuse aindá mino mutarena ava, mave jo darigae arira.”

<sup>3</sup> Ne mendeni seraeva, na Keriso da fakinaí ururono gaetevu. Avori, itatamuruvu! Na ya nenda ari ekoko ava ijujururono, Keriso da fakina isagha ari gaove. Ne sifo aminda kasama areva, na Keriso da fakinaími saramana eraena.

<sup>4</sup> Geka bekári: nu arafa detero ambududurusira aindá jokáda, nunda fakina dadabusira. Avata oroko, nu God da fakinaími jebugedo irira. A kotugo, namane Keriso de dabade tatiseri. Avata kau nu genembo beká etiri nunda fakina dadabusira aminga ava, namane fakina tefo irera. Avata kau Keriso God da fakina budo irira aminga ava, namane Iesu de dabade tatedo irise, God da fakinaími geka saoro ningido fakina areva.

<sup>5</sup> Ava sedo, na nemokena resena, ningivu! Ne totofo nenda irari ava ijujaetevu. Amo, ne Keriso tumonduse ireva, ai tefo? Nu nenda dubo jokáda irira, ava itatameraeva, ai tefo? Ne, avose, ava itatameraeva. Jo itatamae aeteva amo, ne God da jebuga kosasaghaetevu.

<sup>6</sup> Na erekotena: ne namane ijujuse kasama areva, emo geka bekári: namane barago Keriso da natofori.



7 Namane God kena eminge benunu sise irera, nange ne ari eko da emboro dariguse, ari eveva avanembo use iraetevu. Namane aminge banungeraera da beká mo: jo evetu genembo namanenda saramana eveva edo ghusera aindae, sakai saoro dae sise banungae eraera. Namane evetu genembo da dombuda gofari da kaugo arera, a nu avori. Avata ne ari eveva avanembo use iraetevu, aindae sise banungeraera.

8 Ai resira amo: namane God da fakina barera amo, geka beká avanembo sonembarera. Namane geka sembae ava, jo sonembari da kaugo iraeri.

9 Ne saramana inononda use ata fete simbugururovo, namane ya buvu gido ivuga use, nemokena geka fakara jo sae arera. Ne e gogoghombuse ata fete simbuge gogoghombaovo dae sise, namane banunguse irá gheraera.

10 Bajari namokena fakina futusira. Avata nu fakina futusira amo, nemo sonembaono fakina baovo dae sedo futusira. Jo nemo daono dae sedo mutaeri. Na ava kotise, vasa ajagha irise, ari eveva ava aovo dae sise eregefena. Erá na ya nemokena buvudo fakarago eóno dae sise, vasa ajagha irise, reta emo eregefenere. Yari budo givu!

11 Avori, nanda nano namendi, anumbevu! Edo gido, nanda geka evia ningido, ari eveva avanembo use irivu! Dubo dabako edo durumuguse, nano namendide dabade dubo jamaghae irivu! Amingururovo, God dubo bari kato a dubo jama mutari kato nenda jokáda irare!

12 Nenda nano namendi kakara use, tofo tofo nati joká doruse,<sup>12</sup> ategi e gogoghombuse irivu!

13 God da natofo, nenda nano namendi eminda irera, ne ategi beká ava erera. Yari budo givu!

14 Namondeda Bajari Iesu Keriso da sonemba a God da dubo bari

nemokena irare! A Asisi Kakara nemonde dabade tatedo irare! Avori, nanda geka tano eviri. Na Paul.

12 13:12: Afige, Romans 16:16 ainda duruda tege garesa.

## Paul Nunda Reta Galesia Embokena Gefusira.

Galesia mo, frovensi da javori. Frovensi Galesia ainda jokáda, ijuga kakato mendeni birurughuse, ijuga sembae ijugedo ghusera ava gido, Paul reta evia gefusira. Ijuga kakato resira eimi, eminge ijugedo ghuseri. Namonde Keriso tumonduse ainghae dabade, Jusi embo da kiki a Agho Dari manai ava kaifa use, God da jebuga tambarera. Avata Paul reta ainda jokáda ijugerira emo, namonde taká Iesu tumonduse, jebuga evovodae irari ava tuve barera.

*Paul Nunda Reta Galesia Embokena Gefusira, Ainda Mendo Mendo Mo Eviri.*

1:1-5 Paul ne Bajari da javoda ategi usira.

1:6—2:21 Paul, Galesia embo ijuga kakato sembae da geka ighagha edo, nunda geka ningaetera ava, ijugusira.

3:1—4:31 God da jebuga jo ombu bae arera, o jo tofofo namondeda fakinaimi bae arera. Namonde tumondururoro gido, God tefo mutari barera.

5:1—6:10 Namonde Keriso da sonembaimi jebugedo, Asisi Kakara da geka nininguse irarera.

6:11-18 Paul natofo ategi edo, geka se tano usira.

1-2 Arie, nanda nano namendi! Na Paul. Nanda nano namendi mendeni eminda irera ainde dabade, ne ategi erena. Tumondari+ embo isambu Frovensi Galesia aminda ireva, ne ategi roro beká ava erena. Na Iesu Keriso da aghi aono dae sedo, jo evetu genemboimi na gategaeri. God Afa nunda Mandi Iesu Keriso ghae dabade setero gido, na nenda aghi kato edo irena. God Afa resena eimi, setiri Iesu ambarida ghe jebuge erorusira. Na nenda aghi kato edo irena. Yari budo givu!

<sup>3</sup> God Afa a namondeda Bajari Iesu Keriso, nenda sonemba a dubo jama nemokena mutoro baove.

<sup>4</sup> Namonde, evetu genembo oroko endada irera, ainda ari ekoko da bouvu ava darigaoro dae sedo, Iesu fira God da uju ava use, namondeda ari ekoko dae ambududurusira.

<sup>5</sup> Ava sedo, God da duro gido, aindae numokena sakai sise irore, evovodae! Ai, bekári!+

*1:6-10 God da Bino Eveva Ainda Susu Dabakori, Jo Etoto Iraeri.*

<sup>6</sup> Ne nange nange etevo na dudukughuseni! God nu Keriso da jebuga evovodae irari ava futuse, ne aghi etiri niningusevu. Avata ne bibita use, nunda Bino Eveva ava dodo, bino eni ainda amboda amboda eraeva. Aindae na bunise irena.

<sup>7</sup> Kotugo, geka beká resena. Bino Eveva mo dabakori, jo etoto iraeri. Ava sedo, bino eni evetu genembo mendeniimi seraera amo, jo Keriso da Bino Eveva iraeri. Avata na geka oroko resena ainda beká mo: evetu genembo mendeni era nenda jokáda saramana use, Keriso da Bino Eveva ava nesuka nenda kotariimi jighi jovereghuse, ghamo dereoro erera.

<sup>8</sup> Ava ningido, na eminge resena. Na ya nemokena Bino Eveva sedo ghusena amo, geka beká sedo ghuseni. O genembo eni ya nemokena bino eni saetira, o aneya ya nemokena bino eni saetira, o tofo nane jovereghe ya nemokena bino eni saetena amo, bino sembae sari katoá ambari, God nunda ari eko ava ijujedo bouvu mutari, genemboá evovodae fufuse irare.

<sup>9</sup> Setena, sekago kotovo dae sedo, daba ava sari dae erena. Na giti ya nemokena Bino Eveva sedo ghusena amo, geka bekári. Mave, nane geka sisena aindae, beisiga edo geka eni sarira amo, nu ambudo, God da bouvu ava evovodae fufuse irare!

<sup>10</sup> Na geka eregefena emo, jo evetu genembo tege gido ivuga use, nandae sakai saoro dae sedo gembaeri. Nanda uju mo, na emingururono,

God ava gido ivuga aetira, aindae eraena. O na, evetu genembo ivuga use, nandae sakai saoro dae sedo amingaetena amo, na jo Keriso da saramana kato eni irae aeteni.

*1:11-24 Paul Nu Nangedo God Da Aghi Kato Usira, Ainda Kiki Eviri.*

<sup>11</sup> Nene kasama aovo dae resena. Bino a geka sedo ghusena amo, jo evetu genembo da geka iraeri.

<sup>12</sup> Ainda tuka mo: geka amo, evetu genembo eniimi jo foa saoro na ningaeri, o dengoro indoro na jo ningaeri. Iesu Keriso nune, geka amo afigetiri na kasama useni.

<sup>13</sup> Na nange nange Jusi embo da jokáda siroredo baji mindafu usena, ainda geka ava seoro ningiraeva, tanojo. Amo eviri. God da ekaresia+ nange manjaetira ava kotise, na God da ekaresiakena+, mema a bouvu futureono mema itatamedo ghuseri.

<sup>14</sup> Eregoseva: nanda kokomanade dabade, Jusi embo da jokáda sirorusena amo, nanda irari kau eniri. Namane Jusi embo da abuamane ainda geka a kiki isambu kasama edo, tumonde gogoghombuseni. Eni jo namongo iraeri.

<sup>15</sup> Avata giti na jo sirorae ireno ainda sifoda, God nandae kavevera use, na gategusira. Sifo nune uju edo gategusira ava,

<sup>16</sup> fira buviri gido, nunda Mandi namokena ijugetiri gido, na nu kasama useni. Nu amingusira da susu mo: nane ya namane Jusi embo da gitofukena nunda Mandi da Bino Eveva ava vironu saono dae sedo, namoá gategusira.

<sup>17</sup> Amingetiri, na jo Jerusalem yaeri. A na jo evetu genembo nanda gitida Bajari da ambo jimbi usera, aikena jo yaeri. Ava sedo, na geka vironu seraena amo, jo nemokena ningido kasama ae useni. Na Damascus ise, Iesu gi kasama edo, dambu Frovensi Arabia iseni. Ainda amboda, na Arabia dodo sekago jovereghedo ena, reighi Damascus aminda buvurutuseni.

<sup>18</sup> Ghaeko etodaba ainda amboda, na Cephas (o Peter seraera) ava gari dae sedo, Jerusalem iseni. Nu namane nangae dabade irise, fura etoto dadabusira.

<sup>19</sup> Ainda jokáda, na Peter nengae Bajari da mandako James ghae avanembo gosuseni. Avata Bajari da ambo jimbi eninda dombu ava, na jo gae useni. Ava sedo, Bino Eveva nane vironu seraena emo, jo nene saoro na ningae useni.

<sup>20</sup> God da dombuda na geka beká resena. Na geka vironu seraena emo, Keriso nune ijugetiri kasama useni.

<sup>21</sup> Ainda amboda na Jerusalem dodo ena, Frovensi Syria a Silisia aminda irise, ya birurughedo ghuseri.

<sup>22</sup> Sifo aminda, God da ekaresia+ namane Jusi embo da Frovensi Judia aminda, ne na jo kasama ae iriari.

<sup>23</sup> Nanda bino sedo ghusera, ne avanembo ningido ghuseri. Amo eviri: "Genemboá giti namondekena mema a bouvu futuse, fakarago edo ghusera. Avata orokoé evetu genembo Keriso ava tumondaoro dae sedo, nune vironu resira. Nu giti Keriso da tumondari ava bureguse, natofu erá tumondeure dae sise, katiyavara edo ghusera. Avata kotugo, orokoé Keriso tumondaoro dae sise, nune vironu resira."

<sup>24</sup> Nanda bino evia ningido aindae sedo, God da javo jigheoro eredo ghusera.

## 2

*2:1-10 Paul Nu Bajari Da Ambo Jimbide Totorugedo, Geka Dabade Se Nininguseri.*

<sup>1</sup> Ghaeko 14 ava dadabetiri ainda amboda, na sekago Jerusalem iseni. Namane Barnabas ghae Titus de dabade iseri.

<sup>2</sup> Na isena ainda beká mo: God nune setiri na iseni. Ena buvudo, na rejo ava namane Jusi embo da gitofukena vironu seraena, ava seteno ne nininguseri. Na jo evetu genembo isambukena saeri. Bajari

da geka gitofukena vironu seraena ava, na ekaresia+ da kokotofukena ijugeteno, ne kikiako nininguseri. Na amingusena da beká mo: na geka rea vironu seraena, ava kasama aoro dae sedo, aminguseni. Erama nanda geka ighagha eore dae sedo, aminguseni.

<sup>3-5</sup> Nanda komana Titus setena amo, nu Greek embori. A nu vika mendo anoso jo gafugae irise, namonde iseri. Ava kasama edo, evetu genembo mendeni ne, Titus nunda vika mendo anoso gafugare dae siseri. Avata tumondari+ embo da kokotofu setena, nu amingare dae jo saeri; ava sedo, namane jo amingaeri. Evetu genembo amingare dae sisera amo, ne gungubo kakatori. Ne ufena namondeda jokáda teredo, namondeda nano namendiva siseri. Avata, amo jo geka beká iraeri. Namonde Iesu Keriso da natofo edo, Agho Dari manai ava doyeraera aindae, gungubo kakato resena, ne imboe edo, namonde sekago Agho Dari manai aimi bundoro, irise kaifa aoro dae sedo, siseri. Avata namane kokotofu ainde, nenda geka jo itako ningaeri. Jo ningae usera da susu mo: ne God da Bino Eveva ainda beká vanembo ningi kasama aeteva, aindae namane uju useri.

<sup>6</sup> Evetu genembo ne kokotofu sedo ghusera aimi, jo rejo eni ijugaoro na ningae useni. Na rea vironu sise sedo ghusera a seraena aindae, ne ivuga useri. Avori geka beká ne kokotofuri o jo kokotofu irae ava na jo kotae useni. God jo evetu genembo da dombu gosuse, jo ijujae eraira.

<sup>7</sup> Avata ne namonde geka dabade se nininguse, ne kasama useri: kau Bajari nu Peter, Jusi embokena vironu sare dae sedo gategusira aminga ava, nune na Jusi embo da gitofukena vironu saono dae sedo, na gategusira. Gitofu resena emo, ne vika mendo anoso jo gafugae eraera.

<sup>8</sup> Ainda beká mo: kau God nu Peter, Jusi embokena saramana are dae sedo esimbugusira daba aminga

ava, na Jusi embo da gitofukena saramana aono dae sedo, nune na esimbugusira. Ne ava kasama useri.

<sup>9</sup> Avori, God namokena sonemba futuse, nanda saramana esimbugusira, ava kasama edo, gegenembo kokotofu seraera, James, Cephas (o Peter seraera), ne John de dabade eredo, namane Barnabas ghae da ungo jijighuseri. Aminguse, ne namonde saramana kau daba ava use irari dae siseri. Amo, ne yama Jusi embokena vironu sise iraeteri. A namane mo, nenda gitofu vika mendo anoso jo gafugae eraera, aikena ya vironu sise iraeteri.

<sup>10</sup> Ainghae dabade namane makasi embo tavo aoro dae siseri. Kotugo, ábarago nanda ujuri.

*2:11-21 Reighi Antiok Aminda, Paul Nu Eredo, Peter Dombuda Sisira.*

<sup>11</sup> Avata ainda amboda, Cephas (o Peter seraera), nune eredo reighi Antiok aminda fira buyudo irise dara usira aindae, na nu dombuda siseni.

<sup>12</sup> Dara mo evia usira: nu fira namonde dabade irise, Jusi embo da gitofude dabade bayau mindido ghuseri. Avata ainda amboda, evetu genembo mendeni ava, James dirigitiri fuseri. Fera buvero, Peter nu jovereghedo namane Jusi embo da gitofu dodo, Jusi embode kikiako bayau mindido ghuseri. Amingusira da beká mo: Jusi embo mendeni eminge sedo ghuseri, "Namanenda gitofu God da natofo arera amo, nembarago nenda vika mendo anoso ava gaforo, namonde inono ari gido, bayau dabade mindarera." Ne aminge seoro ningido, aindae oju use, Peter nu amingedo ghusira.

<sup>13</sup> Avori, Peter amingiri gido, Jusi embo isambu ne kau daba ava edo, nenda gitofu dodo esike fetedo ghuseri. Nanda komana Barnabas barago amingusira. Ne kau gungubo kakato da kaugo ava useri.

<sup>14</sup> Avata kotugo, ne Bino Eveva ainda emboroda jo yae ero ava gido, na Peter dombuda siseni. Nu ekaresia+ isambu ainda dombuda fetiriri siseni, "Ni Jusi embo bekári. Avata

sife nembo, ni namonde Jusi embo da kiki dodo, gitofude dabade umo use iriasi. Avata oroko mo, namanenda gitofu Keriso tumonduse irera ava dodo, Jusi embode kiki-ako bayau rise, ijugaboro sembae fifiteresa. Aminguse, ni namonde Jusi embo da Agho Dari ava gitofui kaifa aoro dae sise ijugeraesa, amo sembaeri!

<sup>15</sup> “Gi! Nangae mo, Jusi embo beká ava siroruseri. Jo Jusi embo da gitofu ari ekoko use irera ainda jokáda sirorae useri.

<sup>16</sup> Avata nangae anakora kasama useri: God nu namondedae ‘eveva’ sarira amo, jo namonde Agho Dari kaifa ari dae ururoro gido andae, sae arira. Ainda beká mo, namonde jo Agho Dari kaifa ari da kaugo iraeri. Ava kasama edo, namonde Agho Dari da emboro+ aminda ya God kena buvari dae e gosusera, ava dotutuseri. God namondedae ‘eveva’ sise, nunda jebuga mutari bari dae sedo, ni nangae Keriso da fakina ava tumonduseri. Ainda beká mo: nangae kasama useri, genembo eni Agho Dari da emboroda+ yarira amo, jo ya God kena buvae arira.

<sup>17</sup> “Namondeda gitofu God da Agho Dari jo kaifa ae eraera andae, namonde Jusi embo, ‘ne ari eko embova’ sedo ghuseri. Avori, namonde Agho Dari da emboro+ dodo, Keriso emboro+ afigusira aminda God kena yarera amo, Jusi embo mendeni kau daba aminga ava use, namondedae ‘ari eko embova’ sarera. Amo, Keriso namonde jumbari ari ekoko ariá sarera. Avata amo gungubo bekári.”

<sup>18</sup> O geke eni mo<sup>18</sup> eviri: na Agho Dari da emboro+ ighagha edo dotutusena ava, sekago tuturo edo, aminda yari dae sarena amo inono, na giti Keriso da emboroda+ yari dae sise, Agho Dari da emboro+ dotutuse, dara useni.

<sup>19</sup> Eregoseva: Agho Dari daba ainda emboroda ise, na kasama useni, “Na jo Agho Dari evia kaifa ari da kaugo iraeri. Ainda emboroda ise, God kena buvari dae sarena amo, na jo inono ae arena. Na ambarena,” Agho Dari aminge ijugerira. A kotugo, amo geke bekári. Agho Dari rea resira aimi, etiri na ambududuruseni. Amingusira da beká mo: God uju usira, na nange nunda jebuga budo, nundae saramana use iraeteni. Irise, Keriso ghae dabade tataeteni. Avori, na Keriso ghae dabade tatisena amo, kau na Keriso ghae dabade ambududuruseni. Amo, nanda irari manai a nanda kotari manai ava, Keriso ghae dabade arafa doruseri.

<sup>20</sup> Ava sedo, na jebuga irena emo, jo tofo nanda jebuga iraeri. Keriso nanda dubo jokáda teretiri, nunda jebuga aimi irena. O namokena jebuga eni tefori. Ava sedo, nanda dubo jokáda jebuga itatamuse irena emo, jo tofo nanda jebuga iraeri. Amo, God da Mandi nane tumonduse irena, ainda jebugari. Nu na dubo ruruse, nandae sedo fira ambududurusira. Ava sedo, na numoá tumonduse, numokena jebuga ruruse irena.

<sup>21</sup> Aminge sise, na jo God da sonemba ighagha use doya arena. Na jo Agho Dari da emboro+ aminda udo yae arena. Ainda beká mo: namonde Agho Dari kaifa use iria edo, ya God kena buvaetera amo, kau, Keriso da ambari ava susu tefo aeti. Avata amo jo geke beká iraeri. Keriso emboro+ afigusira aminda nembo yarera amo, jebuga evovoda irari ava tuve barera.

### 3

*3:1-14 Namonde Jo Namondeda Fakinaimi Jebugae Arera. Namonde God Tumondarera Aimi Jebugarera.*

<sup>18</sup> **2:18:** Paul nunda geke jungarida se dojeguse, itako dombu eni gefuseri. O dambu jovereghaetera amo, eminge gambaeteri, “O, na roera giti fugutusena ava, sekago jovereghe ya barena amo, na jugaono evetu genembo kasama arera, na giti roera fugutusena amo, na dara useni.”

<sup>1</sup> Avori, nanda nano namendi Frovensi Galesia aminda ireva, nemokena resena. Ne nangetiraimi kau gogovara da kakaugo edo irevu! Mave deretiri ne Keriso dotutusevu? Iesu Keriso arafa dorusera ainda tuka ava, namane nenda dombuda vironu seoro ningido ghusevu.

<sup>2</sup> Geka emo kotovo dae resena. Ne jo Agho Dari kaifa use, God da Asisi bae usevu. Ne taká God tumonduseva aimi, nunda Asisi rurusevu.

<sup>3</sup> Ne nangetiraimi gogovara edo irevu! Ne giti God da Asisi da fakina budo aimi, saramana edo ghusevu. Ava ne redae oroko God da Asisi da fakina dodo, nenda tamo da fakina naimi saramana eraevu?

<sup>4</sup> Ne, God da Asisi budo, mino eveva itatamedo ghuseva ava, tukadae itatamedo ghusevu. Erá tefo soesa eove!

<sup>5</sup> Ne jo Agho Dari ava kaifa ururovo andae, God nunda Asisi nemokena mutae usira. Ne nunda Geka ningido, tumonduse ireva andae sedo, nunda Asisi da fakina aimi nenda jokáda tano eari gido, dudukugheraeva.

<sup>6</sup> Jusi embo da nombua Abraham, nunda tumondari jo dombu eni ae usira. Nu God tumondari gido andae, God nundae 'eveva' sisira.

<sup>7</sup> Ava kotise, ne kasama areva: 'Abraham da sasingu' seraera amo, jo Abraham da imemesiri beká Jusi embo andae sae eraera. Evetu genembo isambu mave God tumonderaera andae, ne 'Abraham da sasingu' seraera.

<sup>8</sup> Kotugo, God da Geka jokáda, anakora andae sisira. Jusi embo da gitofu amboda, God tumondururoro gido nu nendae 'eveva' sarira, ava ijuguse, Abraham kena Bino Eveva eminge sisira:

"Ninda oro amboda sirorarera ainda jokáda, esimbugari evetu genembo isambukena sirorari barera,"

God nunda geka jokáda aminge sisira.

<sup>9</sup> Sisira ainda beká eminge sirorusira. Abraham God tumon-

duse, nunda esimbugari rurusira. Kau daba aminga ava, evetu genembo mave God tumondarera amo, nembarago, God da esimbugari barera.

<sup>10</sup> Ne eregoseva: mave Jusi embo da Agho Dari da emboroda+ ise, ya God kena buvari sarira amo, nu jo inono ae arira. Ava sedo, God da bouvu a simbora ava, nune itatamarira. God da Geka andae resira:

"Agho Dari rea resira ava, mave jo Agho Dari isambu kaifa e gogoghombae arira amo, God da bouvu a simbora ava, nune itatamarira."

Kotugo, namonde evetu genembo endada irera emo, jo eniimi, Agho Dari kaifa ari da kaugo iraeri.

<sup>11</sup> A vasa eninda eminge resira:

"Mave God tumondarira amo, God nunda tumondari ava gido, nundae 'eveva' sise, sari genemboá jebuga evovoda irari ava tuve barira."

Ainda sedo, namonde kasama erera, jo genembo dabakoi, Agho Dari da emboroda+ ise, ya God kena buvae arira. Genembo amo, nu jo tumondae eraira; ava sedo, God jo nundae 'eveva' sae arira.

<sup>12</sup> Ne eregoseva, Agho Dari da emboro+ ainda susu kau eni bekári. Jo tumondari da emboro amingo iraeri. Amo, vasa eninda resira:

"Mave, Agho Dari rea resira, ainda mendo mendo isambu e gogoghombarira amo, nu jebugarira."

Aminge resira da tuka mo: Agho Dari da emboroda+ ise, God kena ya buvari dae saresa amo, Agho Dari da mendo mendo isambu kaifa aresa. Dabako tainako kosasagharesa amo, ni God kena ya buvari jo inono ae aresa.

<sup>13</sup> Avata Agho Dari mave sembae kaifa arira amo, nu God da simbora ava itatamarira. Simbora da geka andae, vasa eninda eminge resira:

"Mavejo ava arafa daoro ikada buingharira amo, God da simbora ava nune itatamarira."

Avata ainda simbora ava, namonde tumondari embo jo itatamae arera. Ainda beká mo: Keriso namondeda vasa budo, korosida buinghuse simbora amo nune itatamusira.

<sup>14</sup> Iesu Keriso amingusira da beká mo: namane Jusi embo da gitofu aimi, Iesu tumonduse esimbugari baeteri. Esimbugari resena emo, God nu Abraham esimbugusira, ainda esimbugari daba ava nene baeteri. Budo, ne namonde tumondari embo isambu ainde dabade, God da Asisi mutari sisira ava baeteri.

*3:15-20 God Jo Nunda Agho Dari Kotise, Abraham Kena Beka Gajae Usira.*

<sup>15</sup> Avori, nanda nano namendi, na oroko ijugaboro eni, namonde evetu genembokena barena. Gegenembo etoto naká, geka se dadabedo tofo tofo beka gajedo yama, geka sisera andae gavana da dombuda javo gembarera amo, amboda jo nenda beka gajari bejae arera. Beka gajari amo, nu irarira.

<sup>16</sup> Avori, God Abraham a nunda vekakena, nunda esimbugari mutari sisira amo, nunda veka dabako aikena esimbugari dae sisira, jo nunda veka isambukena esimbugari dae saeri. Amo, Keriso dae kotise sisira.

<sup>17</sup> Na beka gajari da ijugaboro oroko setena ainda tuka mo eviri: God nu giti beká Abraham kena beka gagojusira. Ainda amboda ghaeko 430 dadabetiri, nu Agho Dari futusira. Avori, Agho Dari amboda futusira aimi, jo nunda beka gajari giti futusira ava, bejari da kaugo iraeri. Beka gajari amo, giti futusira ava sedo, irarira.

<sup>18</sup> Namonde Agho Dari da emboroda+ ise, jebuga evovodae irari ava tambaetera amo, God nunda beka gajari giti Abraham kena sisira, ava kote doyarí saeteri. Avata God jo amingaeri. Nu jo, Abraham Agho Dari kaifa use jebuga bare dae sedo, jo saeri. Nu, nunda beka gajari

sisira ava, tumonduse jebuga bare dae sedo, setiri Abraham ningido tumondusira.

<sup>19</sup> Ava sedo, God Agho Dari redae futusi? Saone? God nu Agho Dari futusira da beká mo eviri. Namonde evetu genembo ari ekoko use irera, ava kasama aoro dae sedo, God nu Agho Dari futusira. Agho Dari nu irari, Abraham da veka dabako setena ava, furari gido, Agho Dari amo doyaeteri. A Agho Dari amo, God jo dambu evetu genembokena mutaeri. Amo nu, aneyamanekena mutiri budo era aghi katokena futuseri. Mutero budo, Jusi embo isambukena futusira.

<sup>20</sup> Avori, na geka 'aghi kato' seno ningido, ne kasama etevu: God nu jo dambu evetu genembokena, Agho Dari futuse geka saeri. Ava sedo, dambu numokena ya buvari da emboro+ eni, jo Agho Dari imi afigaeri. O Abraham kena mo, God nu tofo mandi fira dombu dabade edo, geka sisira. Ava sedo, nunda beka gajari-imi, emboro+ numokena afigusira.

*3:21—4:7 Namonde God Tumonduse, Nunda Sasingu Arera.*

<sup>21</sup> Avata God da Agho Dari imi, God da beka gajari buregeraira, ava namonde jo sae arera. Namonde Agho Dari da emboroda+ ise, jebuga tambaetera amo, namonde amingururoro gido, God nu namondeda 'eveva' saeti. Avata Agho Dari da fakina, jo jebuga mutarikenana inono iraeri.

<sup>22</sup> Agho Dari, God da Geka jokáda gefusera, ainda fakina amo eviri. Agho Dari aimi, namonde isambu enda eminda irera ava, bundedo ari ekoko da ungodá fitiri irera. Amingusira da beká mo: evetu genembo mave Iesu Keriso tumondarera amo ne, God beka gagojuse rea mutari sisira ava, nene kikiako ruruse, ari ekoko da fakina ava darigarera.

<sup>23</sup> Iesu jo foa buvae, a kotugo numo tumondari da sifo barago, jo foa buvae iriri ainda gitida, Agho Dari da fakinaimi namonde bundetiri iriari.

Amingedo irero, tumondari da sifo fira buvurutusira.

<sup>24</sup> Avori, namonde Agho Dari da fakinaimi bundetiri iriara setena ainda tuka mo, eviri. Agho Dari aimi, kau ijuga kato edo, ari ekoko kau mavega ava, ijugetiri kasama useri. Kasama etero, nu namonde ari ekoko eraera ava, ijuguse bu-regusira. Avori, Agho Dari da fakinaimi namonde bundetiri irero, Keriso fira buvurutusira. Amin-gusira da beká mo: namonde tumon-duse, God kena ya buvudo mainun-gaeteri.

<sup>25</sup> Avori, tumondari da sifo fira buviri aindae, Agho Dari da fakina dadabetiri, namonde oroko Keriso da ungodá irera.

<sup>26</sup> Amo, ne tumonduse Iesu Keriso de dabade tatedo, God da sasingu edo ireva.

<sup>27</sup> Ne bafataito use, Keriso de dabade tatedo, Keriso da jebuga ava bevo, nu nemokena asugusira.

<sup>28</sup> Avori, ava nemokena sirorusira; aindae sedo, ne evetu genembo go-suse, ne kau daba ava kotareva. Mave Jusi embo a mave nenda gitofu, mave sabua a mave kotofu, mave evetu a genembo amo, ne isambu kau dabakori. Ainda beká mo: ne Iesu Keriso de dabade tatedo, dubo dabako edo ireva.

<sup>29</sup> A kotugo, Keriso da natofo edo irareva amo, ne kau Abraham da sasingu aminga ava edo irareva. A God beka gagojuse rea mutari sisira, ava nene bareva.

## 4

<sup>1</sup> Na geka resena da ijugaboro eni eviri: genembo eninda mandi nu sasingako irise, kau sabua<sup>1</sup> da ari ava use irarira. Avata numamo da roera ainda bajari numori. Ainda beká mo: amboda nu bají mindafu edo, numamo da roera isambu nune barira.

<sup>1</sup> 4:1: Paul nu, “*Genembo eninda mandi, sasingako irise kau sabua da ari ava use irarira,*” ava gefusira ainda tuka mo: namonde isambu sasingako irise, aya afadae aghi eraera. Avori, kau namonde enda eminda eraera aminga ava, namonde God da sasingu edo nundae aghi use, sabua da kaugo use irá gheraera.

<sup>2</sup> Avata numamo sifo ningiava sarira ava kaifa use, nu kaifa kakato a ijuga kakato mendeni da geka nininguse irarira.

<sup>3</sup> Namondekena, kau daba ava sirorusira. Giti mo, namonde kau sasingako irise, abuamane da kiki a tumondari mendeni ava kaifa use irero, sukaru ekokoimi bajari edo, namonde bundetero iriari.

<sup>4</sup> Avata God sifo fifitusira ava fira buviri gido, nunda Mandi dirigetiri vose fira sirorusira. Amo, evetui fumbiri sirorusira. Siroredo, nu Jusi embo da Agho Dari ainda jokáda irá ghedo ghusira.

<sup>5</sup> Namonde Agho Dari da fakinaimi bundetiri iriara ava, sonembari jebugedo God da sasingu aoro dae sedo, nu amingusira.

<sup>6</sup> A ne nunda sasingu useva, ava ijugari dae sedo, God nunda Mandi da Asisi nemokena futusira. Mutiri ruruseva ainda fakinaimi, ne God dae javono gatise, “Eri, Afa, Afako!” sise irá gheraeva.

<sup>7</sup> Ne kasama ereva: God nune rea etiri sirorusira aimi, ne sabua+ da irari ava dodo, nunda sasingu edo ireva. Edo, nu rea mutarira ava, nene bareva.

### *4:8-20 Paul Nu Galesia Embo Nange Dubo Budo Ghusira Ava Osa Sisira.*

<sup>8</sup> Giti mo, ne God bunise, sukaru a ove mendeni ava godeva sise, nendae sabua+ edo ghusevu. Avata kotugo, gode amo ne jo itatako, God Beká ainda kaugo iraeri.

<sup>9</sup> O orokoé, ne God kasama edo ireva. O saone? God nune ne kasama edo rurusira. Ava sedo, erama ne jovereghe ya sekago, ove a agho dari fakina irade, ainda sabua+ eove dae sise resena. Aimi, ne jo sonembae arira. Ava sedo, ne redae gode mendeni da sabua+ sekago ari dae resevu?



<sup>10</sup> Amo, ne oroko emo tuturo edo, iji, inua, a ghaeko mendeni aindae kakara use ireva.

<sup>11</sup> Na oju use resena. Na erekotena, nemokena saramana use, nanda fakina tefo nendae soesa useni!

<sup>12</sup> Nanda nano namendi, ne giti Agho Dari jo kaifa ae edo ghusevu. O namo, kaifa edo ghuseni. Avata na Agho Dari da emboro+ dodo, kau nemoá avavaga edo irena. Ava sedo, nane Agho Dari da emboro+ dotutusenana ava kotise, amingaovo dae resena! Na geka oroko resena emo, na jo dubo mema use aindae sae erena. Ne namokena ari sembae eni jo ae usevu.

<sup>13</sup> Ne kasama ereva: na giti nenda jokáda, God da Bino Eveva vironu sisena amo, na kae tambudo irise, ainghae fete siseni.

<sup>14</sup> Kotugo, na kae eko tafusena ava gido, ne nandae jo dere jirae usevu, o nanda geka ningido, jo ighagha ae usevu. Na kau God da aneya o kau Iesu Keriso aminga ava budo kaifa tavo usevu.

<sup>15</sup> Avata orokoé, ne nange etirai nandae jo ivuga ae erevu? Ai resira amo: na kasama use resena, sifo aminda, na embako aetena amo, ne nanda ketuadae baeteni.<sup>15</sup>

<sup>16</sup> Avata oroko, na geka beká seteno ningeva aindae, na gitofu da kau aminga ava kotareva tanojo?

<sup>17</sup> Evetu genembo mendeni ya nendae ivuga use, nendae sakai sirureoro ningido ivuga eraeva amo, jo nene eveva eni tambovo dae sedo, sakai sae eraera. Ne, na dotutuse nemoá tumondaovo dae sise, aminge seraera.

<sup>18</sup> Avori, evetu genembo nendae ivuga use sakai seraera amo ekori, ava na jo sae arena. Roera teria mo, evetu genembo sifo ningiaminda eredo nendae sakai sarera amo, ne susu evevadae saeteri. Na namonde dabade iratena, o na esike iratena amo, ne ari eveva use irovo, susu

aindae, nendae sakai saetera amo, avori.

<sup>19</sup> Ne nanda sasinguri. Kau aya-mané mandi sasingu fumbari dae use mema itatameraera aminga ava, na nendae sedo dubo mema eraena. Keriso da fakina nange nenda dubo jokáda terari, ne kau numoá avaga edo iratena, aindae kotise, mema itatameraena.

<sup>20</sup> Nanda uju mo: na oroko yama, namonde dabade irise, geka resena evia dabade se ningaeteri. Aminge dabade se nininguse, avose, na geka itako raugako saeteni tano. O na oroko eminge resena emo, na nemo kotari futo use, memaghae irena.

#### *4:21-31 Hagar Nengae Sarah Ghae Da Kasiari.*

<sup>21</sup> Avori, ne mendeni Agho Dari uju use, tumondari da emboro+ dodo, Agho Dari da emboroda+ yari dae reseva. Nemokena resena, ningivu! Agho Dari ainda jokáda geka eni gembero irira, ava kote givu!

<sup>22</sup> Amo, eviri. Abraham da vide jamena etoto naká ava siroruseri. Eni mo, nunda sabua+ evetu javo Hagar, aimi fufusira. Eni mo, nunda evetu beká javo Sarah, aimi fufusira.

<sup>23</sup> Avori, sabua+ evetuimi fufusira amo, fisi da uju ava ero mandia sirorusira. O kotofu evetuimi fufusira amo, God nu beka gagojusira aindae sedo, setiri mandia sirorusira.

<sup>24</sup> Amo kasiadae ererurena. Evevetu etoto naká setena amo, inono, emboro+ etotori. Emboro+ eni doriri Sainai aminda sirorusira; amo inono, Abraham da sabua+ evetu Hagar dae resena. Nunda sasingu barago, sabua+ kau numongo ava edo irera. Mave emboro+ aminda yari kotarira amo, tofo mandi bundedo irarira.

<sup>25</sup> Doriri javo Sainai resena emo, oroko Frovensi Arabia aminda irira. A kotugo, na kasia doriri Sainai kena fiftuse resena emo, nu inono, Jusi

<sup>15</sup> **4:15:** Korafe-Yegha da duka kotise, namane Paul da geka itako dombu eni jovereghuseri. O namane Paul da geka dambu jovereghaetera amo, eminge gambaeteri: "Sifo aminda, ne namo sonembari dae sedo, nenda diti gunumbe mutari dae kotisevu."

embo da reighi babai Jerusalem, ava sise resena. Jerusalem da sasingu, Jusi embo, ne isambu Agho Dari da fakinaimi bundetiri ainda jokáda sabua+ da kakaugo edo irera.

<sup>26</sup> O Jerusalem seka, amboda utuda ghe vose furarira aminda, mave ya terarera amo, ne jo sabua+ ae arera. A Jerusalem utuda ghe vose furarira amo, kau namonde tumondari embo da aya da kaugori.

<sup>27</sup> Aindae sedo, God da Geka jokáda eminge gembero irira:

“Ni erova irise, jo fumbae iresa. Avata kotugo, ivuga aetesi!

Ni mandi sasingu fumbari da mema jo itatamae iresa. Avata kotugo, ivuga use koko saetesi!

Ainda susu mo: evetu mandi sasingu jo fumbae irari, genembo do-yari ghanjara arira avata

sifo amboda, nunda sasingu ghaguru ambari arira.

O evetu vai edo irira, ainda sasingu mo jo digari iraeri.”

<sup>28</sup> Avori, God beka gagojuse setiri, Abraham da mandi javo Isaac sirorusira. Kau daba aminga ava, namonde tumondari embo God da beka gajari aindae sedo, nunda sasingu useri.

<sup>29</sup> Sifo aminda, sabua+ evetu ainda mandi fisi da ujuimi sirorusira aimi, eredo kotofu evetu ainda mandi Asisi da fakinaimi sirorusira, aikena bouvu a mema futuse fakarago usira. Oroko, kau daba aminga ava eraera. Jusi embo Agho Dari da fakinaimi bundetiri irera aimi, eredo namonde tumondari embokena bouvu a mema futuse, fakarago eraera.

<sup>30</sup> Avata God da Geka eminge resira: “Sabua+ evetu nunda mandighae ondovo yarera. Ainda beká mo:

sabua+ evetu da mandi jo kotofu evetu da mandi ainghae dabade fetedo, numamo da roera soro edo bae arera.”

<sup>31</sup> Na aindae sise, eminge resena. Nanda nano namendi, namonde jo sabua+ da sasingu edo, Agho Dari

da emboro+ aminda yae arera. Namonde kotofu da sasingu edo, tumonduse irarera.

## 5

### *5:1-15 Keriso Namonde Vujegetiri Irera.*

<sup>1</sup> Namonde giti Agho Dari da fakinaimi bundetiri iriara ava, Keriso nune vujegetiri irera. Vujegetiri, namonde ojighera dabako edo irera. Ava sedo, erá sekago jovereghedo sabua+ da irari ava use, Agho Dari da emboroda+ yeove!

<sup>2</sup> Na Paul, nane resena. Kote givu! Ne Agho Dari kaifa ari dae sedo, nenda vika mendo anoso ava gafugareva amo, Keriso da ambariimi ne jo sonembae arira.

<sup>3</sup> Na sekago resena. Genembo mave amingarira amo, nu Agho Dari ainda geka isasambu ava nune kaifa arira. Jo eni do-yari da kaugo iraeri.

<sup>4</sup> Genembo mave, Agho Dari kaifa e gogoghombururari gido, God nundae ‘eveva’ sare dae sedo, saramana arira amo, numo anakora Keriso dotutusira. Nu aminguse irarira aimi, jo God da sonemba nune bari da kaugo iraeri.

<sup>5</sup> O namane mave Keriso da fakina tumonduse, a rea gigituse irera amo, eviri. God da Asisiimi sonembururari, namane nu tumondururoro gido, God namanendae ‘eveva’ sise, sari namane jebugarera.

<sup>6</sup> Ai resira amo: namonde Iesu Keriso de dabade tatedo, nunda natofu arera amo, vika ainda mendo anoso gafugedo Jusi embo da kaugo edo irarera, o jo amingae arera aindae, God jo kotae arira. Nunda uju mo: namonde Keriso tumonduse, tofo tofo dubo ruruse iraeteri.

<sup>7</sup> Giti ne Keriso tumonduse, ari eveva edo ghusevu. Avata amboda mave fira ne dedeuse setiri, geka beká ava dotutusevu? Nu nange amingusira ava, na jo kasama ae erena.

<sup>8</sup> Avata na evia kasama erena: God ne aghi eraira amo, jo nune aeri.

<sup>9</sup> A kotugo, na kasama erena: kau fuka da uvá ava gae bejeoro aimi, fisi isambu sembae eraira aminga ava, geke sembae itatako sirorarira aimi, evetu genembo mendenikena ivege yari, sembae tumondarera. Kau avavaga nemokena sirorusira tanojo.

<sup>10</sup> Avata na ne tumonderena. Ne namonde Bajari de dabade tatedo ireva, aindae na erekotena: ne jo nanda tumondari ava dodo, jo enikena ya sembae areva. A nanda kotari eni mo eviri. Na erekotena, genembo mave ne dederiri, nemonde dabade osogo use ireva amo, God nu dari itatamarira.

<sup>11</sup> Na kasama erena: evetu genembo mendeni nandae gungubo sise, eminge seraera, “Paul numbarago, nenda vika mendo anoso gafugaovo dae resira.” Aminge seraera amo, jo geke beká iraeri. Ava geke beká iratira amo, namokena jo bouvu a mema futuse fakarago ae aeteri. Amo, ne namonde dubo dabako edo irateri. Ne resera amo inono, na Iesu a nunda korosi kotae edo, na nemokena yama tatedo, namonde Agho Dari vanembo tumonduse irateri. Avata na jo amingae irena. Namondeda jebuga bari da emboro+ dabako ava, Iesu nune korosida afigusira. Ainda bino ava imboe use, namokena bouvu a mema futuse fakarago use irera.

<sup>12</sup> Avori, na uju erena amo, evetu genembo nemonde osogo eraera ava, dovu, nenda tamo kakara gafuguse, mandi sasingu da emboro gagojuse, mema itatamaore!

<sup>13</sup> Avori, nanda nano namendi, God nendae sedo uju erira: ne numokena ya buvari dae areva amo, jo Agho Dari da emboroda+ yae areva. Amo, ne jo Agho Dari da sabua+ edo irae areva. Ne jo aindae sedo, aghi aeri. Ágido, ne nune vujegetiri ireva. Avata kotugo, nu jo nenda fisi da uju ava aovo dae sedo amingaeri. Nu amingusira da susu mo: tofo tofo dubo ruruse, nenda kokomanakena sabua+ aovo dae sedo, nu

amingusira.

<sup>14</sup> Agho Dari rea aovo dae resira ainda tuka mo, eviri:

“Kau ni tofo dubo buraesa aminga ava, ninda komana dubo baresa!”

Ava sedo, mave amingeraira amo, inono: nu Agho Dari da geke isambu kaifa eraira, ávovogori.

<sup>15</sup> O ne geke amo kotae edo, sino fuka da ari ava use irise, tofo tofo beisiga use mema mutareva amo, na aindae oju use nemokena dengoro induderena. Kaifa e gogoghombevu! Erama tofo tofo de sirivo eove!

*5:16-26 Asisi Kakara Aimi, Rea Aoro Dae Sarira Ava Namonde Arera.*

<sup>16</sup> Ava sedo, geke resena ainda tuka mo, eviri. Erá fisi da uju ainda amboda amboda eove! O Asisi Kakara aimi, rea aovo dae sarira, avanembo edo ghevu!

<sup>17</sup> Namonde jo fisi da uju nengae, Asisi Kakara da ujughae dabade tatedo, bu jighi irae arera. Ainda beká mo: fisi da uju mo, Asisi Kakara da gitofuri. Etoto naká ninda dubo jokáda tataya use irera. Amingurureoro aimi, ni sifo ava inono, ninda uju eveva ava jo ae eraesa.

<sup>18</sup> Kotugo Asisiimi ninda emboro ijugururari yaresa amo, ni jo Agho Dari da emboro+ aminda yae aresa.

<sup>19</sup> Fisi da uju setena ainda saramana, namonde isagha eregosera. Evetu genembo amingeraera amo, ne meka irae, kombo yagera use a evevetu da amboda ya foa ghuse irá gheraera.

<sup>20</sup> Ne ove kevari ava tumonde bainghuse, asisi da mendo ruruse, kae jijighuse simbora eraera. Evetu genembo avavaga tofo tofo gitofu edo, beisiga use nunda nunda sarigeraera. Ne kokomana da bino ava ningido, nesuka nemoá avanembo kotise dubo ekoko eraera, janje ekoko eraera, a totofo nenda javo a bino ava jighoro erare dae sedo eraera.

<sup>21</sup> Ne kokomana da roera aindae dighighi eraera, a ne uvu fakara mindioro jiro birurugheari ainda

jokáda, ari ekoko mendeni mendeni eraera. A roera digari avavaga, nene eraera. Avori, na giti rea sisena, daba ava sari dae erena. Mave amingarira amo, nu jo God da vasada terari nune kaifa<sup>21</sup> ae arira.

<sup>22</sup> Avata Asisi Kakara evetu genembo da dubo jokáda saramana ururirira amo, beká evavaga sirorarira. Amo, nunda fakinaimi dubo bari, ivuga, a dubo jama ava sirorarira. Asisi Kakara aimi sonembururari, nunda geka ningido, mema itata-muse jo bibita ae arera. Ne taká durumuguse irarera. Ne kavevera arera, ari eveva use irarera, a nenda kokomana jo ighagha edo doyaerera.

<sup>23</sup> Ne durumuguse roboghoi sise irarera, a ne fisi da uju ava buregarera. Ari avavaga amo, isambu eveva vanembori. Aindae sedo, ari setena amo, jo agho dari eniimi buregae eraira.

<sup>24</sup> Mave Iesu Keriso da natofo edo irera amo, ne anakora nenda fisi da uju a kotari ava bureguseri. Amingusera amo, inono, ne nenda fisi da uju a kotari eko ava, Keriso da korosi aminda detero dadabusira.

<sup>25</sup> Avori, namonde jebugaoro dae sedo, God da Asisi nune fakina mutiri jebuguseri. Ava sedo, nunda fakina futuse nunda uju ava sirurari ningido, namonde nunda sari ava use irarera.

<sup>26</sup> Aminguse, namonde jo namondeda javo totofo jighoro erare dae sedo, kokomana da bino eveva aindae bengoso use, osogo ae arera.

## 6

### *6:1-10 Namonde Kokomana Da Bouvu Tofo Tofo Fufuse Irarera.*

<sup>1</sup> Nanda nano namendi, nenda namendi eni ari eko rejo ururari gido kasama areva amo, ne emingareva. Nenda mendeni mave, God da Asisii sirureari ningido, nunda amboda amboda eraeva aimi eredo, nenda

namendikena emboro eveva ijugururovo gare! Geka roboghoi sise, emboro ijugareva. Ainda susu mo: ne ya dara kau daba ábarago ari da kaurigori. Ava sedo, erá ne gofeóvo dae sise, totofo kaifa e gogoghombevu!

<sup>2</sup> Bouvu minonde minonde fufuse irareva. Aminguse, Keriso namonde rea aoro dae sisira ava, nene use irareva.

<sup>3</sup> Ne aminguse irareva da susu mo, eviri. Genembo ijoghako eni mave nu tofo mandi, “Na genembo teria eniri,” kotarira amo, nu tofo mandi derarira.

<sup>4</sup> Ne totofo nenda irari ava ijujuse irareva. Eveva irareva amo, ne totofo nenda dubo jokáda ivuga areva. Nemo nenda irari ava ijujuse, erá komana da ari o irari ava fuge gosuse, totofo nenda irari ainghae inono eove!

<sup>5</sup> Ainda beká mo: namonde rea aetera, ainda bouvu ava namonde totofo fumbaeteri.

<sup>6</sup> Genembo mave anumbirari, God da Geka afigedo dengoro indururoro ningarira amo, nu eredo nunda dengoro indari kakatode dabade, nunda uvu bayau a roera ava soro vesa arira.

<sup>7</sup> God jo derari da kaugo iraeri. Ava sedo, erá ne totofo dereove! Genembo veka rea govarira amo, ainda beká ava bambarira.

<sup>8</sup> Kau genembo veka govedo, ainda beká buraira aminga ava, ni fisi da uju ava aresa amo, sifo gombuda, ni ambari ava baresa. O God da Asisi ni sonembururari nunda sari ava aresa amo, sifo gombuda, God da Asisi aimi, nimokena jebuga evovoda irari ava mutari baresa.

<sup>9</sup> Ava sedo, namonde jo ari eveva ari ava imboe ae arera. Ainda beká mo: namonde ari eveva use irarera amo, namonde beká bari da sifo aminda, mino eveva ava tambarera.

<sup>10</sup> Ágido, evetu genembo natofo sonembari da goroto ningiaminda tambarera amo, jo doyoro foa dari-gae arira. Kotugo mokogo mo, na-

<sup>21</sup> 5:21: Afige, **Geka Se Disugari Da Vasa** aminda, geka *Natofo* dae rea gefusera, ava tege garesa.

mondeda nano namendi, tumondari embo, ava sonembarera.

*6:11-18 Paul Geka Setiri Eminda Dadabusira.*

<sup>11</sup> Faiya babai evia eregefenere, yari budo givu!

Na geka tano eminda gagojuse, tofo mandi eregefena. Yari budo givu!

<sup>12</sup> Evetu genembo mendeni, nenda vika mendo anoso gafugedo, Jusi embo da kiki ava aovo dae sise seraera amo, ne tofo nenda javo jighoro erare dae sise, aminge seraera. Kotugo ne amingeraera ainda beká eni mo, eviri. Ne koterera amo, Jusi embo isambu vika mendo anoso gafugeraera ava sedo, ne Keriso da korosi ainda bino avanembo vironu sarera amo, nenda natofo Jusi embo mendeni nemokena veka sembae use, bouvu futururoro mema itatameraera. Ainda mema ava darigari dae sedo, ne, nenda vika mendo anoso ava gafugaovo dae sise seraera.

<sup>13</sup> Setena, daba ava sari dae erena. Evetu genembo mave, nenda vika mendo anoso gafugedo irera, ábarago Agho Dari isambu jo kaifa e gogoghombae eraera. Avata ne amingaovo dae sise seraera ainda beká mo, eviri. Ne, nenda vika mendo anoso ava gafugedo, ya Jusi embode dabade tatedo, nenda uju ava ururovo gosuse, tofo sakai sari dae sise, amingeraera.

<sup>14</sup> O namo, roera dabako irira, ainda duro ava gosuse, sakai sise tumondarena. Amo, namondeda Bajari Iesu Keriso da korosi andae resena. Ainda beká mo: Iesu korosida ambududurusira amo, kau nambarago ambududuruseni. Aminguse, kau genembo ambudo, enda da irari a fisi da uju doyarira aminga ava, na enda da irari a fisi da uju ava dotutuseni. Kotugo kau daba aminga ava, evetu genembo fisi da uju use irera, ne namo gosuse koterera amo, na ambari embova sise, na jo tumondaeraera.

<sup>15</sup> Kote givu! Namonde vika mendo anoso gafugarera, o jo gafugae arera andae, God jo ijuae arira. Nu dabako kotise irira, amo eviri: namonde Keriso de dabade tatedo dubo jovereghedo, nunda natofo da jokáda teredo irera, ai, tefo?

<sup>16</sup> Evetu genembo mave aminguse irera aikena, God joka edo nunda dubo jama mutare dae resena, nemokena a God da natofo isambukena! Yari budo givu!

<sup>17</sup> Avori, geka tano ari dae use, na eminge resena. Iesu da gitofuimi na dedo ghusera, ainda buvá nanda tamonda irira. Ava gosuse, ne kasama ereva, nu nanda bajariri. Ava sedo, nanda geka erá sekago ighagha eove dae sise resena. Yari budo givu!

<sup>18</sup> Nanda nano namendi, nemokena ategi use eminge resena: namondeda Bajari Iesu Keriso da sonemba nemokena irare! Avori, nanda geka tano eviri. Na Paul.

## Paul Nunda Reta Efesas Embokena Gefusira Amo, Eviri.

Paul sandi diburada fitero irise, reta evia avose, ghaeko 61 A.D. ainda jokáda gefusira. Evetu genembo da kotari mo, Paul jo Efesas embo vanembo kotise, reta evia gambaeri. Ekaresia+ mendeni nunda reta evia bu tegaetera, ava kotise gefusira. Reta ainda ijuga mo, God nange evetu genembo nunda oro oro aghi ari, Keriso de dabade tatedo, nemonde tamo dabako edo irarera, aindae ijugirira.

*Paul Nunda Reta Efesas Embokena Gefusira, Ainda Mendo Mendo Mo Eviri.*

1:1-2 Geka da tuturori.

1:3—3:21 God namonde nange aghi etiri, namonde Keriso tumondedo, nunda natofo a ekaresia+ dabako edo irera, ainda gekari.

4:1—6:9 Jebuga seka da aito mo eviri.

6:10-20 Namonde Bajari dae sedo isoro arera.

6:21-24 Paul natofo ategi edo, tano usira.

<sup>1</sup> Arie, nanda nano namendi! Na Paul ne ategi beká ava erena. God na aghi etiri, Iesu Keriso da aghi kato edo irena. God ne gategetiri, Efesas aminda nunda natofo edo ireva nemokena, reta emo eregefena. Iesu Keriso de tatedo numoá tumonduse, nunda uju ava use ireva ava sedo, nemokena reta emo eregefena. Yari budo givu!

<sup>2</sup> God Afa a namondeda Bajari Iesu Keriso, nenda sonemba a dubo jama mutoro baove!

*1:3-14 God Namonde Eminge Esimbugusira.*

<sup>3</sup> Namondeda Bajari Iesu Keriso da Numamo, God Afakena sakai saore! Ainda beká mo: namonde Keriso de dabade tatedo irera ainda jokáda,

God namonde esimbuguse namondekena utu da joba isasambu futusira.

<sup>4-5</sup> Ava mutari dae kotise, utu enda jo ae irise, nu giti namonde, nunda tofo aoro dae sedo gategusira. Nu namondeda ari ekoko Iesu da ororoimi seghe fugari, namonde Keriso de dabade tatedo, nunda natofo kakara a eveva edo irise, nunda dombuda fetoro dae sedo, namonde gategusira. Nu namonde dubo rurusira ava sedo, namonde nange nange Iesu Keriso da fakinaimi nunda sasingu aetera ava anakora kotise, nu sifo ghousa evia irise, uju edo ghusira.

<sup>6</sup> God nunda sonemba tomanako beká ava mutiri namonde ruruseri. Nunda Mandi dabako, dubo bu gogoghomberraira ava, tefo namondeda futusira. Jo namondeda ari eveva aoro gido, aindae mutaeri. Nu tefo futusira. Ava sedo, namonde nundae sakai sise, nunda javo jighoro erare!

<sup>7-8</sup> Iesu da ororoimi namondeda ari ekoko da mino etiri gido, God namondeda ari ekoko kote dotiri, namonde jebuguseri. Nunda sonemba namondekena futusira amo, tomanako bekári. God nu rejo uju usira ava kote gogoghombuse, nunda sonemba teria beká ava namondekena futusira.

<sup>9</sup> God nu amboda Keriso da fakinaimi rejo ava arira amo, giti beká kotisira. Kotedo, kivo edo ireira sife nembo, namondekena ijugetiri gosuseri.

<sup>10</sup> God rejoá kotedo kivo usira amo, eviri. Roera a evetu genembo isasambu utuda a endada, bu dabade edo, mutari Keriso kaifa ururari irarera. Nunda sifo ffitusira ava, foa buvarira amo, God nu amingarira.

<sup>11</sup> Roera isasambu God da sari ningariri. Nune sarira amo, beká sirorarira. Kotugo nune sarira amo, dadabarira. God namonde jo tefo gategaeri. Nu rejoá giti beká kotise uju edo ghusira, ava itatamuse, nu namonde budo Keriso de dabade tatedo, tofo nunda natofo aoro dae

sedo, namonde gategusira.

<sup>12</sup> Ava sedo, namane Israel embo mave tuturoda, Keriso da Bino ava ningi tumondusera aimi, God dae sakai sise nunda fakinaimi ururoro, natofo nunda duro ava garera.

<sup>13</sup> O nemo namanenda gitofuri. Avata kau daba aminga ava, nemo-kena sirorusira. Ne God da Geka beká aında Bino ava ningido, Keriso tumondedo jebuga evovodae irari ava tafusevu. Tambudo, ne nunda tofo edo ireva. Ava ijugari dae sedo, nunda Asisi Kakara mutari sisira ava, mutiri ne rurusevu.

<sup>14</sup> Asisi Kakara namondeda dubo jokáda irira ava itatamuse, namonde kasama erera: God nu rea mutari a ari sisira amo, sirorari barera. Amo eviri. God namonde Keriso da ambariimi ofusira ava sedo, amboda nune namonde unumbe bu yari, namonde dabade irarera, ava kasama erera. Ava sedo, namonde God da sonemba teria evia bu jighoro erorurari, natofo tomanako God da duro evia gosuse aındae sakai sarera.

*1:15-23 Paul Nu Rea Kotise Banungusira Ava, Nemokena Osa Sisira.*

<sup>15-16</sup> Nunda sonemba namondekena amo mindafuri; aındae sedo, na nendae sifo ghousa evia, God kena aiyakoe seraena. Ne Bajari Iesu tumonderaeva, a God da natofo isambu dubo buraeva. Ava ningido, aındae tuturo edo ne jo kote doya, banunguse God kena aiyakoe seraena.

<sup>17</sup> Na numokena eminge benunu seraena: nu nange nunda Asisi Kakara mutari nemokena vose asugedo, sonembururari ne dubo kotise, God nu kau mavegori, ava kasama aeteva, aındae benunu seraena. God resena emo, nu Bajari Iesu Keriso da God, a, numo usasa da Afari, kotugo Afa duroderi.

<sup>18</sup> A God Afakena nanda benunu eni mo, nu nange sonembururari nenda diti basari, ne God da usasa ava gaeteva, aındae seraena. Aminguse, nu nemokena rea mutari sisira amo, kau mavegori, a nunda natofo

amboda kau nange nange esimbuge gogoghombirira, ava kasama aetevu.

<sup>19-20</sup> A eni mo, namonde Iesu tumonderaera amo, namondeda dubo jokáda God nunda fakina tomanakoimi saramana eraira. Nunda fakina kau mavegori, ava kasama aetevu. Aındae numokena benunu seraena. Fakina resena daba eimi, God setiri Keriso ambarida ghe jebugedo erorusira. Kotugo daba aimi, God setiri Keriso utuda vitira, Numamo da ungo gimandukena anumbusira.

<sup>21-22</sup> Anumbetiri, God nu roera isambu kaifa are dae sedo, Keriso kena futusira. Keriso nu teria a iká bekádari: kokotofu, babojegari, evetu genembo, sukaru, a aneya, ne isambu Keriso da duruda irá gheraera. Oroko ne Keriso da duruda irera, a sifo amboda irarera. God nune setiri, Keriso nu roera isasambu da Bajari beká ava edo irira. Kotugo, nu God da natofo aında jiro beká ava edo irira.

<sup>23</sup> God da natofo mo, ne kau Keriso da ungo, ata, a nunda tamo ávavagori. Keriso da tamo mo, nunda jebugaimi bedo edo, inono beká edo irira. Enda a utuda barago, nunda jebugaimi bedo edo, inono beká edo irira.

## 2

*2:1-10 Keriso Da Fakinaimi, Namonde Jebuguseri.*

<sup>1</sup> A nemo, giti gogore edo ari ekoko use, God kotae use irevo, nenda asisi God kena amo ambududurusira.

<sup>2</sup> Evetu genembo fisi da uju use ari ekoko eraera aminga ava, ne sifo aminda amingedo ghusevu. Sukaru da bajari Satan aimi, seari nunda uju ava edo ghusevu. Sukaru da bajari resena emo, nu evetu genembo mave gogore edo, God da uju ava jo ae eraera, aında bajari numori.

<sup>3</sup> Namonde isambu giti kau daba aminga ava edo ghuseri. Namonde fisi da uju a kotari ava edo ghuseri. Aındae God amboda nunda janje eko mutari furarira ava, namonde evetu

genembo isambu ainde dabade itata-marera.

<sup>4-5</sup> Namondeda gogore eimi, namondeda jebuga God kena amo gajisira. Avata God da joka ari namondekena teria bekári, a nu namonde dubo bu gogogho eraira. God aindae sedo setiri, Keriso ambarida ghe jebugedo eroriri aimi, namonde dabade jebuguseri. God joka edo, tefo sonembetiri ne jebugusevu.

<sup>6</sup> Namonde Iesu de dabade tatedo irero gido, God nu namonde setiri eretero, budo vasa utuda fitiri irera.

<sup>7</sup> Nu amingusira da tuka mo: namonde evovodae utuda iroro, God nange namondedae joka teria usira ava, ijugari kasama arera. Natofu isambu, aneya a sukarude dabade kasama arera. Nunda joka ari resena amo, eviri. Nu namondedae joka teria edo sonembuse setiri, Iesu Keriso namondedae sedo fusira.

<sup>8</sup> Eregoseva, ne jo nenda fakinaimi jebugaeri. Nemokena eveva eni tefori. Ne taká tumonduseva ágido, God aindae joka edo sonembetiri jebugusevu.

<sup>9</sup> Avori, namonde Keriso de dabade irarera, avata amo jo totofo sakai sari da kaugo iraeri. Ne jo nenda fakinaimi jebugaeri. Ne God da fakinaimi jebugusevu.

<sup>10</sup> God setiri namonde siroruseri. A kotugo, jebuga irise ari eveva aoro dae sedo, nune setiri namonde Iesu Keriso de dabade ambarida ghe jebuge eroruseri. Ari eveva resena evia, namonde aoro dae sedo, nu anakora ainda emboro simbugusira.

*2:11-22 Iesu Nunda Ororoimi, Namonde Bu Tatetiri, Dubo Dabako Useri.*

<sup>11</sup> Kote gogoghombevu! Namane Jusi embo mo, God da tano ijugari dae sedo, namanenda vika mendo anoso ava gafugeraera. Amo namane ungoi tamonda eraera. Ne jo amingae eraeva. Ava sedo, namane ne gitofuva sedo ghuseri. A ne jo God da natofu iraeva sedo ghuseri. God kotae use, nunda tano ava jo fitae edo ghusevu.

<sup>12</sup> Sifo aminda, ne Keriso da natofu jo ae usevu. God namane Israel embokena rea beka gagojuse sisira amo, nemokena jo isagha ari bae usevu. Ne namanenda gitofuri. Ava sedo, ne enda da kotari ava use, God jo kotae iria ghusevu, a God namonde nange sonembari sisira, ava ne bunisevu.

<sup>13</sup> Ne giti ajagha iriavu. Avata oroko, ne Iesu Keriso de dabade tatetevu, a nunda ambariimi, ojigheva nu tambevu.

<sup>14</sup> Ne namane Jusi embo da gitofuri. Keriso tofo nune soretiri mainungido, ne namonde dabade tatedo natofu dabako useri. Namondeda osogoiimi, kau furu aminga namondeda soroda dighero ireira ava, Keriso nunda ambari da fakinaimi de bejisira.

<sup>15</sup> De bejise, nu tofo nunda tamoimi, namane Jusi embo da Agho Dari namonde dabade tatari da emboro gajedo ireira ava, afigusira. Aminguse, nu namonde, Jusi embo a Jusi embo da gitofu ava bu tate dabako edo, soretiri mainungosuseri.

<sup>16</sup> Keriso korosida ambududurusira, ainda fakinaimi namondeda osogo ari de bejetiri, namonde natofu dabako edo fera God de dabade tatiseri.

<sup>17</sup> Keriso nu amingari dae use, fira dubo jama da Bino Eveva ava, namondekena vironu sisira. Ne God kena ajagha fefetusevu, a namane God kena utua fefetuseri.

<sup>18</sup> Namane Jusi embori, kotugo ne namanenda gitofuri. Avata Keriso emboro afigetiri, God da Asisi Kakara dabakoimi eari, namonde God kena ya buvuraera.

<sup>19</sup> Ava sedo, ne God da natofu jokáda teredo, God da sasingu beká ava usevu. O giti mo, ne namanenda gitofu edo iriavu. Avata oroko emo, ne namonde dabade God da natofu edo ireva.

<sup>20</sup> Ne eregoseva: namonde mo, kau God da Kambo+ kakara da kaugori. God nu Iesu Keriso, kambo+ ainda tutumbi evevago dae sedo, fiti simbugusira. Ainda amboda, nunda



ambo jimbi a feroveta ava, kambo+ da suradae sedo tutumbi etoda fiti itutusira. Kau daba aminga ava, ne nunda sasingu etevo gido, nembarago budo aimi, nunda kambo+ itutuse irira.

<sup>21</sup> Bajari Iesu Keriso mo, nu namondeda susuri. A Iesu nunda fakina aimi, namonde ava bu tatedo, God da kambo+ kakara ava itutiri teria ari dae erira.

<sup>22</sup> Nembarago Keriso de dabade tatedo aimi, God nunda kambo+ kakara itutuse irira. Kambo+ aminda namonde dabade irore dae sedo, God da Asisiimi itutuse irira.

### 3

#### *3:1-13 Paul, Gitofu Jokáda Vironu Sare Dae Sedo, God Nu Gategusira.*

<sup>1</sup> Na Paul. Na nendae sedo diburada fiftuseri. Na Iesu Keriso da saramana use nemokena nunda vironu seno, na sandido diburada fiftuseri. Nemo kotise, na God kena banunguse irá gheraena.

<sup>2</sup> God nendae joka edo nemo sonembaono dae sedo, na gategetiri nunda aghi kato useni. Ainda bino ne anakora niningusevu, tano.

<sup>3</sup> God nu rea ari kotise, sifo ghousa ambari ava kivo etiri ireira ava, namokena ijugetiri kasama useni. (Na giti andae sedo geke tufako gefuseni.)

<sup>4</sup> Na rea tufako gefusena ava tegareva amo, God Keriso da geke kivo usira, ava kasama areva. God namokena rea ijugetiri gosusena ava, saono kasama areva.)

<sup>5</sup> Giti God Keriso da geke kivo ari setena amo, jo afigari evetu genembo kasama ae edo ghuseri. Avata oroko emo, God nunda aghi kakato a nunda feroveta kakara gatedo, nunda Asisi Kakara aimi geke emo nemokena ijugetiri ne kasama useri.

<sup>6</sup> God Keriso da geke kivo usira amo, eviri. Oroko, Jusi embo namenda gitofude dabade, God da Bino Eveva ava tumondedo nunda esimbugari barera. Budo, dabade edo nunda natofo kau tamo dabako da

kaugo arera. A eni mo: God namondekena Iesu Keriso da fakinaimi, rea mutari dae sedo beka gagojusira, ava mutari namonde dabade barera.

<sup>7</sup> God nu nandae joka edo, nunda fakina namokena mutudo setiri, Bino einda osa sari kato nane edo irena.

<sup>8</sup> Na genembo ijoghako bekári. God da natofo jokáda, ne isambu bebegori. Na ambo nembori. Avata God namoá sonembuse, namane Jusi embo da gitofukena geke emo, osa saono dae sedo, na gategusira. Bino Eveva resena amo eviri: namonde Iesu Keriso da ambariimi jebugedo, utuda susu iti fafode arera.

<sup>9</sup> A kotugo, namonde nange Iesu da ambariimi jebugusera, ainda geke ava God nune kivo edo ghusira. God nane geke ava saono evetu genembo ningoro dae sisira. God roera isambu setiri sirorusira aimi, Bino setena amo, susu einda kivo edo ghusira.

<sup>10</sup> God nunda uju mo: oroko sifo eminda, Jusi embo nenda gitofude dabade nange mainungido, natofo dabako aetera ava gosuse, aneya a sukaru isambu God da kotari eveva ainda mendo mendo ava, kasama e gogoghombaeteri.

<sup>11</sup> God sifo ghousa evia irise, rejo uju edo ghusira ava, namondeda Bajari Iesu Keriso da sonembaimi etiri sirorusira.

<sup>12</sup> Avori, Iesu tumonduse, namonde Iesu de dabade tatiseri. Ava sedo, namonde jo oju ae, tumo fainghedo ya God kena teredo, nunda dombuda fetarera.

<sup>13</sup> Avori, na nendae sedo mema eretafena, ava sedo, na nemokena geke itako evia resena. Na mema eretafena einda, ne erá bunise dubo mema eove! Ne ivuga aetevu! Na nemo sonembari dae sedo, mema emo eretafena.

#### *3:14-21 Paul Nendae Banunguse Kotedo Ghusira.*

<sup>14</sup> Na nemo sonembari dae sedo mema eretafena ava kotise, na kauboi dadarigedo, God Afakena benunu seraena.

<sup>15</sup> God Afa resena emo, nu namonde tumondari embo isasambu da Afari. Namonde isambu javono numoá gatise banungeraera.

<sup>16</sup> Avori, nanda benunu numokena mo eviri: God da duro a fakina mindafugo aimi sonembuse, nunda Asisi Kakara mutari yama fakina nemokena futururari, nenda janje jokáimi itatamedo fakina aove!

<sup>17-18</sup> Kotugo na benunu seraena amo, ne nange tumondururovo, Keriso nenda janje joká ava, nunda vasadae budo aminda irari, ne fakina numokena budo, nunda dubo bari jokáda irivu! A eni mo, na eminge benunu seraena: nenda janje jokáda, God dubo bu gogoghombuse dubo kotedo, Keriso da dubo bari namondekena kau nangego ava itatamaove! Nunda dubo bari ainda teria, ainda ghousa, beragha, kafuru kau nangego ava, kasama e tefo aove!

<sup>19</sup> Na uju erena amo, ne nunda dubo bari tomanako beká ava itatamuse kasama areva. Avata nunda dubo bari emo, jo namonde kasama e gogoghombari da kaugo iraeri. Avata nunda dubo bari kasama ari dae ururovo, God tofo nemokena vose asugedo, nenda janje joká ava nune bedo are.

<sup>20</sup> God namondeda janje jokáda, tofo mandi fakina futuse saramana eraira. Nu rea eraira amo, tomanako bekári. Jo namonde kote benunu sari da kaugo iraeri. Nu nusukako kotise namonde esimbugeraira.

<sup>21</sup> Ava sedo, nunda duro aindae, namonde a nunda natofo isambu sakai sise, evovodae nunda javo jighoro eroruse irare! A nunda duro futururari, namonde nunda natofo isambu a Iesu Keriso de dabade, nunda duro ava ijugururoro isagha edo aminge irare! Ai, bekári!+

## 4

*4:1-16 Paul Nu, Namonde Dubo Dabako Aoro Dae Sisira.*

<sup>1</sup> Bajari nu nange namonde bu tatedo natofo dabako usira ava, osa

sisena aindae sedo, na diburada fi-fituseri. Ava sedo, ne nanda geka ningaetevu. Na uju use, nemokena eminge resena: ne God da uju ava use iraetevu. Ne amingaeteva da susu mo: God tofo mandi ne aghi etiri, nunda natofo edo ireva. Ne jo evetu genembo eninda natofo iraeri. Ava kotise, ne nunda uju ava use iraetevu.

<sup>2</sup> Erama totofo sakai seove! Erama nenda kokomanadae dubo ekoko eove! Minonde minonde dubo ruruse, durumugedo tofo tofo sonembuse irivu!

<sup>3</sup> Asisi Kakara ne bu dabade etiri mainungido, dubo dabako useva ava kotise, kaifa e gogoghombevu! Erá dara nenda jokáda siroreuri, ne nunda nunda eóvo dae sise resena.

<sup>4</sup> Namonde mo, kau Bajari da tamo ainda kaugo ava edo irera. Nunda tamo resena emo, dabakori. Namonde isambu nunda Asisi dabako ruruseri. Kotugo, God aghi etiri, ne Bino dabako ava tumondedo kaifa use ireva.

<sup>5</sup> Namondeda Bajari dabako, tumondari dabako, a bafataito ari dabakori.

<sup>6</sup> Namondeda Bajari God Afa dabakori. God Afa resena emo, roera a evetu genembo isasambu, ainda Bajari numori. A kotugo, nu reighi isasambu nune bedo edo irira.

<sup>7</sup> Namonde dabako edo irera, avata namondeda joba jo dabako iraeri. Keriso nunda ujuda, namondekena nunda fakina ava, saramana nunda nunda aoro dae sedo, joba futusira.

<sup>8</sup> God da Geka aindae rea anakora gefusera amo, eminge resira:

“Nu utuda vivituse, evetu genembo mendeni bundisera ava, unumbe budo vitisira.

Vitíra, joba evetu genembo aikena futusira.”

<sup>9-10</sup> Kote givu! Geka ‘vitisira’ resira ainda susu mo, oroko ijugaono kasama areva. ‘Vitisira’ ainda susu mo: Keriso giti vose fusira. Fira ireira edo nunda ambari sifoda, enda jokáda vovosusira. Genembo vose fusira, enda jokáda vovosusira,

a vitisira amo, nu genembo daba avori. Nu utu enda bedo ari dae sedo, vitira utu iká bekáda buvurusira.

<sup>11</sup> Joba mutari kato resena emo, Keriso numori. Nune setiri, namondeda mendeni tuturo edo saramana eraera. Mendeni ne nunda aghi kakato eraera. Mendeni ne ferovetari. Mendeni Iesu da Bino ava, osa seraera. Mendeni God da natofo tavo use, dengoro indiraera.

<sup>12</sup> Nu joba futusira da beká mo, eviri: nange Keriso da natofo minonde minonde sonembari da fakina ava baoro dae sedo, joba futusira. Nunda tamo fakina bare dae sedo, futusira. Nunda tamo resena emo, namonderi.

<sup>13</sup> Kotugo, nu joba futusira da beká eni mo: nange namonde dubo dabako edo tumonduse, a God da Mandi kau nangego ava kasama e gogoghombuse, namonde evetu genembo beká edo dubo kote gogoghombaeteri. Aminguse, namonde kau Keriso avavaga aeteri.

<sup>14</sup> Amingarera amo, namonde sasingako da irari amo doyarera. Sasingako da irari amo, ne erego-seva. Sasingu ne geke seka ningido, 'bekava' sedo tumonderaera. Geke beká a geke sembae, isambu tumonderaera. Evetu genembo nemo dedeuse geke seraera amo, ne 'bekáva' sedo, tumonduse kosasaghedo dara eraera. Ava sedo, namonde sasingako da irari amo doyarera.

<sup>15</sup> Namonde nano namendi dubo ruruse, nemokena geke bekáda bekáda sarera, a ari beká bekáda arera. Aminguse, namonde sasingako da irari dodo, namondeda irari isambuimi, kau namondeda giti jighari Keriso da kau aminga ava arera. Aminguse, namonde Keriso de dabade tatarera.

<sup>16</sup> Nu namonde kaifa ururari, namonde kau nunda tamo da ungo, ata, vuvuro, a umbu isambu fakina edo, dabade saramana e gogoghombarira. Amingarera amo, namonde dubo minonde minonde

futururoro, Keriso da tamo isambu baji tomanako edo, saramana e gogoghombarira. Nunda tamo resena emo, namonderi.

*4:17–5:20 Namonde Fisi Da Uju Dodo, Dubo Jovereghedo Evetu Genembo Seka Sirorarigarera.*

<sup>17</sup> Erama mema itatameovo dae sise, Bajari da javoda eminge resena. Erama bunise, evetu genembo God dae osogo eraera, ainda kaugo use iriove! Evetu genembo amo, ne dubo kotari tefori.

<sup>18</sup> Ne gogore edo ghusera aindae, nenda kotari dadabetiri, ne God da jebuga jo bae useri.

<sup>19</sup> Nenda kotari dadabusira ava sedo, meka irae, fisi da uju a kombo yagera ava eraera!

<sup>20</sup> Keriso jo, amingaovo dae sedo, dengoro indaeri.

<sup>21</sup> Ne Iesu da natofo useva amo, nunda Bino a nunda Geke beká ava dengoro indero niningusevu.

<sup>22</sup> Ava sedo, gitida ari, fisi da uju, ava doyareri beká dovu! Aimi dederiri nenda dubo joká sembae edo irei.

<sup>23</sup> Dubo God kena futururovo, nu kotari seka futururari aimi, nenda dubo joká bedo edo irare!

<sup>24</sup> God nu nendae dubo joká seka, nunda avavaga muturaira, ava buvu! Dubo joká seka resena emo, nu jebuga bekári. Kotari seka evia budo, ne God da natofo kakara edo irise, veka eveva vanembo use irareva.

<sup>25</sup> Ava sedo, sekago gungubo erá seove! Minonde minonde geke bekáda nembo sedo ghevu! Ainda susu mo: namonde isambu dabade tatedo, kau Keriso da tamo ainda ungo, ata, vuvuro, umbu, a roera isambu ainda kaugo edo irera. Ava sedo, mema sirorarira amo, namonde isambu itatamarera.

<sup>26-27</sup> Dubo ekoko areva amo, erá nenda dubo ekoko aimi, nemo dereuri ari eko eove! Erá Satan dae goroto muteove! Ava sedo, dubo ekoko areva amo, erá dubo ekoko ainghae irióvo ungo bu eure!

<sup>28</sup> Evetu genembo nenda jokáda mave, giti bagia edo ghusira amo, nunda ari eko ava dodo, saramana nunda ungoimi ari, oka bayau sirorurari budo rise, makasi embo sonembedo ghare!

<sup>29</sup> Geka eveva sise, erá jokáda geka ekoko seove! Geka eveva vanembo sevu! Geka resena evia, evetu genembo ningido sonemba aikená budo, dubo jama use ivuga aore!

<sup>30</sup> God ne sifo amboda unumbe bu ya kaifa arira, ava kasama aovo dae sedo, nunda Asisi Kakara nemokena mutiri rurusevu. Asisi Kakara amo, God nune namonde nunda tofodae rurusira, aında tanori. Ava sedo, erama Asisi Kakarakena dubo mema muteove!

<sup>31</sup> Erama janje ekoko eove! Erama nenda janje ekoko undeóvo baji tomanako eure! Erama dubo ekokoghae iriove! Erama beisiga use, jijivu o aji seove! Erama kotari amo jumbeóvo ghousago euri, komanakena dara eove!

<sup>32</sup> Avata ne emingaetevu! Kau God joka edo Keriso futusira, a kotugo, nenda ari ekoko kote dotutusira aminga ava, tofo tofo joka use dubo ruruse, nenda ari ekoko minonde minonde kote dodo ghevu!

## 5

<sup>1</sup> God ne dubo buraira. Ne nunda sasinguri. Ava sedo ne, God eraira avavaga use irivu!

<sup>2</sup> Namane Jusi embo, giti joba mutari dae sedo, sino fuka dedo dungeoro avise muno ferugheari fumbudo, God namanenda ari ekoko kote dodo ghusira. Keriso namonde dubo ruruse, sino fuka ari ekokodae bu de joba dungeo ghusera aında vasa ava nune budo, namondedae sedo ambududurusira. Kau Keriso usira aminga ava use, namonde endada jebuga irise, evetu genembo dubo ruruse irarera.

<sup>3</sup> Ne God da natofori. Ava sedo, kombo yagera ari mo, erá koteove! Erá kusia bagia use, tafasara edo gheove! Moni a guguadae erá ghamo beove!

<sup>4</sup> Erama geka ekoko seove! Erá jijivu seove! Erá geka kotae kotae seove! Geka eveva vanembo sise, sifo ghousa evia God kena aiyakoe sise irivu!

<sup>5</sup> Ne monidae ghamo budo, nenda dubo aminda fitareva amo, inono, ne moni nenda ove a nenda godedae sise, moni ava tumonde bainghareva. Amingareva amo, ne God kotae edo doyareva. Kotugo, geka evia kasama aovo dae resena. Evetu genembo monidae ghamo buraera amo, o kombo yagera eraera amo, ne jo God da sasingu edo God da vasada teroro, Keriso a God Afa ne jo kaifa ae arera.

<sup>6</sup> Evetu genembo foama nemo dedeuse, geka beká irae ava sarera amo, erá ningido tumondeove! Evetu genembo mendeni geka avavaga ningido, God kena gogore arera amo, amboda God nunda dubo eko nemokena ijugari itatamarera.

<sup>7</sup> Ava sedo, evetu genembo avavaga eraera ainde dabade, erama tatedo, umo gamo use saramana eove!

<sup>8-10</sup> Giti, ne tofofo kau daba ava use tumbada iriavu. Avata oroko emo, ne Bajari da natofo edo, usasa jokáda irá gheraeva. Ava sedo, tumba da irari amo dodo, Bajari da uju ava kasama edo, usasa jokáda irise, ari eveva use irivu! Aında tuka mo: usasa da fakina aimi, ari eveva, ari dambu, a geka a ari beká amo siroreraira.

<sup>11</sup> Evetu genembo mendeni tumba da ari eraera, ovavaga erá eove! Ne usasada irise, nenda irari eveva ava ijugururuvu, gosuse, evetu genembo setena amo, nenda ari ekoko kote doyore!

<sup>12</sup> (Erá meka geove dae sedo, ne, rea evetu genembo tumbada irise ufena eraera, aındae geka jo sae areva.)

<sup>13</sup> Namonde rea bu foa usasada fitarera amo, nu tamo isagha ari garera.

<sup>14</sup> Kotugo usasa janimbarira amo, tumba dadabarira. Ava sedo, God da usasa evetu genembokena janim-

barira amo, ne usasa da sasingu arera. Namonde aindae sedo, eminge seraera:

“Diti fange ere! Ambarida ghe ere!  
Amingaresa amo, Keriso da  
usasa nimokena janimbarira.”

15-16 Oroko sifo emo, dara tomanako sirorerira. Ava sedo, durumuguse ari eveva use irivu! Erama evetu genembo dubo kotari iraede avavaga eove! Goroto ningiava tambareva amo, aminda ise, evetu genembokena veka eveva use sonembareva.

17 Dubo kotise, Bajari da uju ava kakova areva.

18 A eni mo: uvu fakara teria erá mindeóvo jiro birurugheure! Amin-gareva amo, guka dagaya arira. Ava dotutuse, benunu siruruvu, Asisi Kakara aimi nenda janje joká bedo ari irove!

19 Ne tofo tofo se nininguse God da yaru<sup>19</sup> didivururovo, Asisi Kakara aimi yaru seka rea mutarira ava budo didivuse, nenda dubo jokáimi Bajaridae sakai sise irivu!

20 Namondeda Bajari Iesu Keriso da javoda, roera isasambu dae God Afakena aiyakoe sise irivu, roera eveva a eko aindae!

### *5:21-33 Evetu Genemboghae Da Irariri.*

21 Keriso kakara use, kokomana da sariá jave nininguse, minonde minonde sonembuse dubo ruruse irivu!

22 Evevetu, nemokena eminge resena. Ne Bajari kakara use, nunda Geka ningiraeva. Kau daba aminga ava, nenda gegenembo kakara use, nenda geka ava ningareva!

23 Ainda beká mo: Keriso nunda ekaresia+ da bajari edo irira. Namonde nunda tamo ava sedo, nunda sari ningariri. Ai resira amo: nu namondeda bajari ari dae sedo, tofo mandi ambududuruse, namondeda ari ekoko da mino ava futusira. Kau daba aminga ava, gegenembo ne,

nenda evevetu da babojegari edo irera.

24 Ava sedo, kau namonde Keriso da Geka ningido, nunda uju ava eraera aminga ava, evevetu ne, nenda gegenembo da geka ningido, nenda sari ava edo ghareva!

25 Gegenembo, nemokena eminge resena. Keriso nunda natofo dubo budo, nendae sedo nunda jebuga futuse ambududurusira. Kau Keriso usira daba aminga ava, nenda evevetu dubo budo ghevu!

26-27 Ne eregoseva: kau gagara da natofoimi, numo vai ari da sifo aminda gogho eraera aminga ava, Keriso nunda natofo simbugeraira. Amo, nunda geka aimi, nunda natofo segheraira. Seghurureari, nenda ari ekoko isasambu dadabeari, ne nunda natofo garigo, usasa, a kakarago ava edo iriro budo kaifa eraira. Namonde avavaga edo iroro kaifa ari dae sedo, nu fira nunda ekaresiadae+ sedo ambududurusira.

28 Kau Keriso eraira aminga ava, gegenembo ne nenda evevetu kaifa use dubo budo ghevu! Ne tofo nenda tamo kaifa eraeva, kau daba aminga ava, nenda evevetu kaifa edo ghevu! Ne nenda evevetu dubo ruruse kaifa eraeva amo, tofo nemoá daba sonembuse eraeva.

29-30 Nenda tamo jo imboe ae eraeva. Nenda tamo kaifa e simbugeraeva. Kau daba aminga ava, Keriso namonde kaifa eraira. Namonde nunda tamo ava sedo, kaifa e simbugeraira. Aindae sedo, nenda evevetu kau daba aminga ava kaifa evu!

31 God aindae sedo, gekaé setiri gefuseri:

“Aindae sedo, genembo noi numamo dodo evetu fitido, nengae tamo fisi dabako arera.”

32 Geka ainda tuka mo, jungarida bekári. Amo nu, Keriso a nunda ekaresia+ nange tatedo irera, aindae resira.

19 **5:19:** Yaru divoro dae resira ainda kau mo etodaba nakári. Yaru **David da Yaru Buku** aminda anakora gefusera, kotugo, yaru mendeni namonde tofo God dae sakai sise gateraera, a kotugo, yaru Asisi Kakara aimi muturaira, isambu divarera.

<sup>33</sup> Avori, setena amo, eviri. Ne tofofo nenda tamo dubo buraeva, kau daba aminga ava, nenda evevetu dubo budo ghevu! A evevetu ne, nenda gegenembo kakara edo ghevu!

## 6

### *6:1-4 Sasingu Noi Numamode Nenda Irariri.*

<sup>1</sup> Sasingu, nemokena geka resena, ningivu! Ne Keriso de dabade tatedo nunda javoda, nei nimamo da geka ningido, nenda sari ava edo ghevu! Amo Bajari da ujuri.

<sup>2</sup> Bajari nu Agho Dari Ghabu Sovenisoveni futusira, ainda eni mo eviri:

“Nei nimamo kakara evu!”  
Geka ainda gitida, agho dari vanembo futusira. Namonde sonembari dae jo saeri. O agho dari emo futuse, nu nange namonde sonembarira ava sise, geka eni avagaya edo sisira.

<sup>3</sup> Sonemba da geka resena amo, eviri:

“Nei nimamo kakara areva amo, ne nane sonembururono eveva irise,

ghousago endada jebuga irareva.”

Ava sedo, namonde aya afa kakara arera amo, God namonde sonembururari, namonde eveva irise, ghoussago endada jebuga irarera.

<sup>4</sup> Aya afaghae, nemokena eminge resena. Nenda sasingu kaifa use, sasingukena veka eveva edo ghevu! Erá nenda sasingukena fakarago a sembae eóvo, sasingu dubo ekoko use sembae iriore! Nenda sasingukena Bajari da Geka, emboro eveva a veka eveva ava ijuguse dengoro indaetevu!

### *6:5-9 Saramana Kakato Nenda Babojegaride, Nenda Irariri.*

<sup>5</sup> Saramana kakato, nemokena eminge resena. Ne Keriso kakara use, nunda Geka ningiraeva. Kau daba aminga ava, nenda babojegari endada irera, ábarago kakara use dubo futuse, nenda sari ava e gogoghombareva!

<sup>6-7</sup> Saramana kakato mendeni ne tofofo, nenda javo jighoro erare dae sedo, evetu genembo da dombuda saramana e gogoghombareva. O ne nusuka nusuka fetarera amo, ne saramana jo e gogoghombareva arera. Erama amingeove! Nemo Keriso da saramana kakatori. Ava sedo, ne saramana rea areva amo, God da uju ava kotise, saramana ivugaghae e gogoghombedo ghevu!

<sup>8</sup> Evetu genembo, saramana kakato a babojegari, isasambu, mave saramana e gogoghombareva amo, nenda ari ava gido, God nendae mino mutarira. Ne ava kotise irá ghevu!

<sup>9</sup> Babojegari, ne dubo kotovo dae resena. Saramana kakato a babojegari, nenda Bajari dabako utuda irira. Ava sedo, kau nenda saramana kakato nemokena dubo mutaetera aminga ava, nenda saramana kakatokena dubo futuse irivu. Aminguse, erá totoi dombuda seove! Ai resira amo: Bajari amboda foa ne ategi arira amo, ni bajari o saramana kato o mavejo ava, isambu bu foa dabako edo ategi arira. Nu evetu genembo isambukena, ari kau daba ava use, bekáda bekáda ategi arira.

### *6:10-20 Satan Kena Isoro Arera.*

<sup>10</sup> Geka tano ari dae use, eminge resena. Bajari de dabade tatedo, nunda fakina budo aimi, fakina e fete gogoghombevu!

<sup>11</sup> Kau genembo isoro ari dae sedo, misi a bere buraira aminga ava, Satan da derari ava gajari dae sedo, fakina God kena buvu! God nu isoro da roera muturaira ava budo asugevu!

<sup>12</sup> Ainda tuka mo: namonde jo evetu genembokena isoro ae eraera. Namonde sukaru, aneya ekoko, a Satan da babojegari mendeni, aikena isoro eraera. Tumba da babojegari utuda irera, a kotugo enda eminda evetu genembo ekoko kaifa use irera, aikena isoro eraera.

<sup>13</sup> Ava sedo, God isoro da roera muturaira ava budo asugevu! Asugedo irovo, derari da sifo furarira amo, ne

fete gogoghombedo gitofukena isoro use, inononda irareva.

<sup>14</sup> Ava sedo, fete gogoghombevu! Geka beká, kau tasoso ifuda asugeraera, avavaga edo fakina evu! Ari eveva a ari dambu ari, kau isoro da karigha duboda asugeraera, avavaga edo nenda janje joká ava kaifa evu!

<sup>15</sup> Keriso mainungari bu fusira ainda Bino, kau ata asugari asugeraera avavaga, budo isorodae simbugevu!

<sup>16</sup> Tumondari, kau bere ungo ufada asugedo isoro eraera, avavaga asugedo sifo ghousa evia ainghae deinghevu! Aminguse, kau goroba avaraka buburaghae afeoro gido, fati sukaingheraera aminga ava, nenda tumondariimi Satan da derari ava gajevu!

<sup>17</sup> God namonde sonembuse, namondeda ari ekoko kote dodo jebuga muturaira. Ainda sonemba, kau tumboru jiroda asugeraera avavaga edo, tumo fainghedo isoro evu! Kau misi sagada fiti deinghuse isoro eraera avavaga, God da Geka nunda Asisi Kakara ai muturaira, ava bu deinghuse isoro evu!

<sup>18</sup> Aminguse, God kena nunda sonembadae banunguse irareva! Asisi Kakara de dabade tatedo nunda sonemba ruruse, nunda uju ava kotise, sifo ghousa evia banunguse irivu! Sifo ghousa banungari dae sedo, fakina edo diti fangevu! God da natofo isasambu endada irera evia kotise, evovodae banungevu!

<sup>19</sup> Namu kotise, nandae barago banungevu! Na uju erena amo: na dubo joká esimbugaono, God nunda Geka mutari budo, tumo fainghedo vironu saeteni. God nunda kotari giti kivo usira ava, tumo fainghedo osa saeteni. Aindae sise, ne nandae banungaovo dae resena.

<sup>20</sup> God da Geka setena, ainda vironu sari kato ava, nane edo irena. Na oroko dibura jokáda irena. Avata kotugo, na uju erena amo, na beka fainghedo, geka emo jo doyae, sido yaeteni. Ava sedo, na nange nange

tumo fainghedo, God da Geka ava osa saetena aindae, banungaovo dae resena.

*6:21-24 Paul Da Ategeri.*

<sup>21-22</sup> Tychicus nu nanda komana eniri. Nu Bajari da saramana e gogoghomberaira. Namanenda irari kau mavega ava kasama edo, tumo fainghaovo dae sedo, Tychicus dirigaono nemokena ya osa sari ningareva.

<sup>23</sup> Na uju erena amo, nange God Afa a namondeda Bajari Iesu Keriso nengae, nemokena a Keriso da natofo isambukena, dubo jama a dubo bari tumondarighae dabade mutoro baetevu!

<sup>24</sup> Kotugo na uju erena amo, Kuristini evetu genembo mave namondeda Bajari Iesu Keriso evovodae dubo bu gogoghomberaera aindae, God nendae joka edo, nunda sonemba a dubo bari mutari baetevu!

Avori, nanda geka tano eviri.

Na Paul.

## Paul Nunda Reta Filipai Embokena Gefusira, Amo Eviri.

Paul Rome aminda diburada irise, reta evia avose, ghaeko 62 A.D. ainda jokáda gefusira. Reighi Filipai aminda, beisiga Iesu tumondari+ embo jokáda sirorusira aindae, Paul reta emo gefusira. A kotugo, Filipai emboimi numo sonembedo, moni mutero rurusira aindae, nu aiyakoe sise, gefusira. Aminguse, nu kau reta beká da kaugo ava gefusira; jo dengoro indari vanembo gembraeri.

*Paul Nunda Reta Filipai Embokena Gefusira, Ainda Mendo Mendo Mo Eviri.*

1:1-11 Paul natofo ategi usira.

1:12-30 Paul da irari mo, eviri. Nu mema a bouvu tafurureari Keriso sonembedo ghusira aindae, Paul nu ivuga edo ghusira.

2:1-30 Kau Keriso durumuguse mema tambudo ghusira aminga ava, namonde arera.

3:1-21 Paul, erá ijuga a ijuga kakato sembae ava ningi tumondeóro dae sise resira.

4:1-23 Paul dengoro indido, tano usira.

<sup>1</sup> Arie, nanda nano namendi! Na Paul, namane Timothy ghae mo, Iesu Keriso da saramana kakatori. Namane ne ategi roro beká ava erera. Ne Iesu Keriso de dabade tatedo, God da natofo reighi Filipai aminda ireva, ne ategi beká ava erera. Yari budo givu!

A nenda ekaresia+ da giti jighari a ogababada barago, ategi beká ava erera. Yari budo givu!

<sup>2</sup> Namondeda Afa God a Bajari Iesu Keriso nemokena sonemba a dubo jama mutoro baove!

*1:3-11 Paul Nange Nange Filipai Embodae Banungedo Ghusira, Amo Eviri.*

<sup>3</sup> Na sifo reda ne koteraena amo, na nendae sedo nanda God kena aiyakoe seraena.

<sup>4-5</sup> Ainda beká mo: ne sonemburureovo, na God da Bino Eveva ava vironu sise deingheraena. Ne tutur-oda God da Bino Eveva nininguseva, sifo aminda ghedo na sonembudo refeva, oroko kau daba aminga ava use ireva. Na aindae sise, sifo reda ne koteraena amo, evovodae ivugaghae nendae sedo, banunguse irá gheraena.

<sup>6</sup> Aminguse, na kasama erena: God nunda saramana nenda dubo jokáda tuturo usira ava, bu jighi gogoghombururari, saramana ava ya dadabari ainda beká ava, Iesu Keriso da Sifo aminda sirorari, ne bareva.

<sup>7</sup> Nanda dubo jokáimi, ne kotise irá gheraena. Na aminguse irá gheraena amo, jo sembae iraeri. Amo evevari. Ainda beká mo: ne namonde dabade God da sonemba ava itatamuse, saramana eraera. Na diburada ireno, ne amingedo ghereva. Kotugo, na giti ya foa ghuse, God da Bino Eveva ava tumondaoro dae sedo, evetu genembo mendeninde dabade beisiga edo ghusena, a vironu seono tumondedo ghusera amo, ne saramana daba ava edo ghusevu.

<sup>8</sup> God nu kasama erera, kau Iesu Keriso ne dubo buraira aminga ava, Iesu da dubo bari namokena muturaira aimi, na ne dubo buraena.

<sup>9</sup> Na God kena nendae sedo benunu seraena da beká mo eviri: nange nenda dubo bari baji mindafu ururari, ne geka beká ava kasama edo bu jighi gogoghombuse, dubo kotari da emboro ava kasama use iratevu. Aindae sedo, benunu seraena.

<sup>10</sup> Aminguse irateva ainda beká mo: ne roera eveva, geka eveva, a emboro eveva ava kasama use gategarikena inono areva. Aminguse irareva amo, Keriso da Sifo aminda, God nemo ijugarira aindae, meka eni jo gae areva. Ainda susu mo: nenda ari eko eni jo gae arira.

<sup>11</sup> Sifo aminda, nenda dubo



jokáda, ari a kotari evevaimi bedo edo irarira. Ari a kotari eveva resena emo, Iesu Keriso nusuka nune mutari, nenda dubo jokáda sirorarira. Sirorurari gido, evetu genembo mendeni ne God dae sakai sise, nunda javo jighoro erarira.

*1:12-30 Jebuga Beká Mo: Namonde Iesu Keriso Kasama Use, Nunda Amboda Yarera.*

<sup>12</sup> Nanda nano namendi, na uju erena amo: ne evia kasama aetevu. Dara a mema siroretiri itatamusena aimi, sonembiri God da Bino Eveva ava ivegedo iri, evetu genembo mendeni ningido tumonduseri. Na Keriso da saramana kato aindae sedo, na diburada fitero, mema itatamuse irena.

<sup>13</sup> Nanda bino ava, Rome embo da kotofu teria aindae kambo da kaifa kakato isambu, a evetu genembo isambu eminda irera aimi, ningido kasama useri.

<sup>14</sup> Na diburada fitero ireno ava gosuse, namondeda nano namendi fakina use, Bajari tumonde gogoghomberera. Aminguse, ne tamo fakara etiri tumo fainghedo, God da Geka ava vironu sise deingheraera.

<sup>15</sup> Geka bekári: evetu genembo daba daba sembae kotise, nanda bino aindae bengoso edo beisiga use, totofo nenda javo jighoro erare dae sedo, Keriso da bino ava, nene seraera. O evetu genembo mendeni, Keriso da javo jighoro erare dae sedo, nunda Bino Eveva ava vironu seraera.

<sup>16</sup> Evetu genembo amboda setena amo, ne evia kasama erera. Bajari da Bino nange aono isagha aetira aindae, Bajari setiri na diburada fitero irena. Ne na dubo ruruse, vironu seraera.

<sup>17</sup> O evetu genembo giti setena amo, ne sembae kotise, totofo nenda binodae kotise vironu seraera. Na dibura eminda iriono, ne namokena osogo ururoro, dubo mema aono dae sedo, ne amingeraera.

<sup>18</sup> Avata na ava jo kotae arena. Aindae beká mo eviri: roera teriango

mo, Keriso ri. Jo namonde iraeri. Ava sedo, evetu genembo sembae o eveva kotise, Keriso dae vironu seraera, aindae na jo kotae arena. Evetu genembo ne Keriso da Bino aminge sirureoro, evetu genembo mendeni Keriso da Bino ava ningiraera. Ava sedo, na aiyakoe sise irena.

<sup>19</sup> Na aiyakoe sise irena, a sise irarena. Aindae beká mo: na kasama erena, ne nandae banungeraeva aimi, a Iesu Keriso da Asisi sonembiraira aimi, na jebugarena.

<sup>20</sup> Na uju beká ava use gigitereña amo, na nange jo gofuse meka gae aeteni. Na oroko a evovodae, tamo fakara edo nanda dubo a fakina isambuimi ururono, evetu genembo mendeni Keriso da duro ava gosuse, nunda javo jighoro eraeti. Na jebuga irarena, o na Keriso da javodae ambarena aindae jokáda, Keriso da javo nange teria aetira aindae uju beká ava erena.

<sup>21</sup> Givu! Jebuga mo rejori? Jebuga da susu mo, Keriso numori. Ava sedo, na jebuga irarena o ambarena aindae, na jo kotae arena. Aindae beká mo: na enda eminda irise, Keriso da jebuga budo irena. A nu evevari. Kotugo, nunda javodae sedo ambarena amo, na ya nangae dabade tatedo, eveva tafuse irarena. Amo eveva bekári.

<sup>22</sup> Na enda eminda jebuga irarena amo, na vironu sirurono ningido, evetu genembo mendeni Keriso da jebuga tambarera. Avata na erebunena: na emboro ningiava gategareni? Na diburada ghe foa buvudo, enda eminda saramana aone, ai, daoro ambudo Keriso kena yaone? Ava na erebunena.

<sup>23</sup> Na nange gategareni? Na bunise irena. A jo tofo nane gategari da kaugo iraeri. Na tofo nane uju eraena amo, eviri. Na ambudo ya Keriso ghae iraeteni. Amo, nandae sedo eveva beká aeti.

<sup>24</sup> Avata kotugo, enda eminda na jebuga iraetena amo, nemokena eveva aeti.

<sup>25</sup> Avori, na eminda irarena amo,

ne fakina namokena bareva, ava kasama use resena. Ava sedo, na kasama erena, na jo oroko nembo ambae arena. Nenda tumondari ava baji teria are dae sedo, a ne ivuga aovo dae sedo, Bajari sari na irarena.

<sup>26</sup> Nu amingarira ainda beká mo: na diburada ghe buvu ya nemokena buvono, nanda dombu gido ivuga use Iesu Keriso da jebuga ruruse, nundae sakai saovo dae sedo, nu amingarira.

<sup>27</sup> Avori, emingaovo dae sise resena. Ne Keriso da bino a ari eveva ava kotise, eveva vanembo use irivu! A Keriso da geka rea aovo dae resira, ava use irivu! Amingareva da beká mo: na ya nemokena buvarena o jo ya buvae arena amo, na geka evia ningaeteni. Ne fakina edo dubo dabako use, a kotari dabako use tofo tofo sonembuse, God da Bino Eveva ava, evetu genembo mendenii tumondaoro dae sedo, saramana use ireva ava ningaeteni. Ningido, ivuga aeteni.

<sup>28</sup> Erá, nenda gitofu nemokena mema futuse irera aindae, oju eove! Fakina edo tumo fainghuse irovo gido, nenda gitofuimi nemokena rea ari dae arera amo, jo aoro inono ae arira. Ava, nenda gitofu kasama arera. Kotugo, ne totofo jebuga jo bae, ambarera ava kasama arera. A kotugo, God nu tofo mandi sonembururari ne jebuga evovodae irari ava bareva, ábarago nenda gitofu kasama arera.

<sup>29</sup> Fakina aovo dae setena ainda beká mo, eviri. Keriso kavevera use emboro etoto naká nemokena afigusira. Numo tumondaovo dae sedo, emboro eni afigusira. Kotugo, nunda javodae mema tambovo dae sedo, emboro eni afigusira.

<sup>30</sup> Oroko, ne Keriso dae isoro use, nunda Bino sirureovo aindae, nenda gitofu nemokena fakarago use bouvu muteoro mema tafuse irá gheraeva. Amo, na kau daba ava use, mema ava itatameno gosusevu. A kotugo oroko aminguse, mema tafureono ainda bino ningiraeva.

## 2

*2:1-11 Keriso Tofo Fitiri Vovosusira Ava Sedo, God Nunda Javo Jighiri Erorusira.*

<sup>1</sup> Ne Keriso da natofu edo irise, fakina numokena ruruse, nunda dubo bari itatameraeva. God da Asisi aimi nenda dubo jokáda irise sonemburureari, nengae dabade geka se nininguse, umo gamo eraeva. Ne minonde minonde joka use, kavevera use ireva.

<sup>2</sup> Ava sedo, ne emingareva amo, na ivuga e gogoghombarena. Ne kotari dabako kotise, tofo tofo dubo ruruse, a dubo dabako edo irareva!

<sup>3</sup> Erá totofo nenda javo jighovo erare dae sise, saramana eove! Kau daba aminga ava, erá totofo sakai sari dae sise, saramana eove! Ne emingareva! Evetu genembo mendenidae sakai sise, nenda javo totofo dovu, vosare!

<sup>4</sup> Ne isambu totofo nenda uju vanembo jo kotae areva. Ne, nenda nano namendi da uju, a saramana barago kotareva.

<sup>5</sup> Keriso nu nange kotise irei, ne kau daba aminga ava kotise irareva. Amo eviri.

<sup>6</sup> Nu kau God avavaga use evovodae irei. Nunda fakina a God da fakina ava, inono edo irei.

Avata nunda irari a nunda fakina ava, nu jo mivedo, nune jighi fete kaifa ari dae saeri.

<sup>7</sup> Nu God ga ava use ireira ainda fakina ava, tofo nunda uju ava use, kosughe fiti dodo fira

sabua+ da irari ava budo, genembo beká ainda tamo ava asugedo sirorusira.

<sup>8</sup> Kotugo, nu genembo da tamo asugedo sirorusira aindae, nu kau namonde evetu genembo amburaera aminga ava edo, God da uju ava use, ambududurusira.

Nu tofo nunda javo ava fitiri vose-tiri, meka gosuse a mema teria tafuse, korosida ambududurusira.

<sup>9</sup> Nu amingusira aindae sedo, God nu jighiri iká bekáda viti fefetusira.

Aminge fetetiri, God numokena fakina teria futuse, nunda javo fakinaghae dabade ava futusira.

Jo javo o fakina eni utuda o endada, eni amingo iraeri.

<sup>10</sup> Amingusira da beká mo: Iesu da javo evia kakara use, evetu genembo isambu, aneya isambu, a sukaru isambu kauboi dadarigedo tumoi baingharera.

Utuda irera, endada irera, a enda jokáda irera amo, ne isambu amingarera.

<sup>11</sup> Aminguse, evetu genembo, aneya, a sukaru setena, ne isasambu beka afigedo eminge sarera, “Iesu Keriso, ni Bajariri!”

Aminge siruroro, God Afa da duro isagha arira.

*2:12-18 God da Natofu Kau Usasa Aminga Janimbururari, Evetu Genembo Mendeni Garera.*

<sup>12</sup> Avori, nanda nano namendi, na ena nemokena buvudo namonde irise, geke nane sisena ava ningido aminguseva amo, evevari. Kotugo oroko, na ajagha fefeterena. Ava sedo, na ajagha fefeturono, ne nanda geke ningareva amo, eveva bekári. Jebuga evovodae irari ava bari dae sedo, God igheghi use ungo ata dadadaghururari, saramana use irivu!

<sup>13</sup> Ainda beká mo: God nune nenda dubo jokáda saramana eraira. Aminguse, nunda uju seari ningido, nembarago ava uju eraeva. Kotugo nunda uju resena, ava ari da fakina barago, nune muturaira.

<sup>14</sup> Ne rea areva amo, jo dumo baughae ae areva.

<sup>15-16</sup> Aminguse, ne God da natofu eveva a kakara edo irise, ari eveva vanembo ururovo, ari ekoko embo a kotari sembae embo fuge nemo gosuse, ari eko eni jo tambae arera. Ne enda eminda God da Geka bu jighirise, kau damana tumbaghae

jaragheraira aminga ava, God da jebuga a usasa soro ururovo, evetu genembo setena amo, ne jebuga evovodae irari da emboro ava garera. Aminguse irareva amo, Keriso da Sifo aminda, na ivuga arena. Ainda beká mo: ne amingururovo, na saoro ningido kasama arena, na ena nenda jokáda janjagu edo ghusena amo, nanda fakina jo soesa fugae edo ghuseni. Nanda saramana da beká sireari gosuse, aindae edo ghuseni.

<sup>17</sup> Ne God tumonduse, nenda tumondari kau joba aminga ava God kena muturaeva. Kau abuamane giti vaini (wine) nenda joba etoda averegedo dungeoro avido ghusira aminga ava, gitofuimi na dedo nanda ororo, nenda joba setena, ainda etoda averegarera tano. Avori, amingarera amo, na ivuga ururono gido ne nandae ivuga areva.

<sup>18</sup> Nembarago kau daba ava use, nanda ambari aindae jo mema ae aetevu! Nembarago nandae ivuga aetevu! Namonde tofo tofo ivuga use iraeteri!

*2:19-30 Paul Nunda Nano Namendi Etoto Naká Dirigetiri, Filipai Embokena Iseri.*

<sup>19</sup> Bajari Iesu ‘avori’ sari, emboro afigarira amo, nenda bino saovo ningido, jovereghe foa sari ningido, na dubo jama ari dae sedo, na Timothy totoi dirigaono nemokena yarira. Na aminge kotise uju beká ava erena.

<sup>20</sup> Nu nangae dubo dabako use a kotari dabako kotise irera. Nune ne uju beká ava eraira. Evetu genembo eni jo numongo iraeri.

<sup>21</sup> Evetu genembo setena amo, nenda uju a saramana avanembo kotise irera. Ne Iesu Keriso da saramana jo kotae eraera.

<sup>22</sup> O Timothy mo, nu saramana e gogoghomberraira, ava ne kasama use ireva. God da Bino Eveva ivegedo yare dae sedo, nu nangae, kau genembo eni nunda mandighae saramana eraera aminga ava, nangae dabade saramana ero gosusevu.

<sup>23</sup> Avori, na diburada ghe foa bu-varena, ai, irarena? Ava kasama edo, nu dirigaono nemokena yarira.

<sup>24</sup> Kau daba aminga ava, Bajari 'avori' sari, emboro afigarira amo, nambarago totoi ya nemokena bu-varena.

<sup>25</sup> Epaphroditus nene dirigetevo fira, nenda javodae sedo na sonembusira. Numbarago dirigaono, jovereghedo nemokena yarira. Nu nangae dabade fetedo, Bajari da javodae saramana a isoro edo ghuseri.

<sup>26</sup> Nu nendae joka use, gari dae uju beká ava erira. A eni mo: nu kae rurusira, ainda bino iri nininguseva ava kasama use, nu nange ya ne gaetira andae uju beká ava erira.

<sup>27</sup> Nininguseva amo, geka bekári. Nu kae eko tambudo, ambari dae iri gido, God nundae a nandae joka usira. Nandae joka usira setena ainda beká mo: nu ambaetira amo, na dubo mema teria beká ava aeteni.

<sup>28</sup> Nu jebugusira ava sedo, oroko totoi ya nemokena buvari gido, dubo jama aovo dae, na uju beká ava erena. Amingururovo, nambarago dubo jama arena.

<sup>29</sup> Avori, nu Bajari da mandiri, a nenda namendi beká ava edo irira. Ava sedo, nu ya buvarira amo, ivuga use nati joká dedo, nu bu kaifa tavo areva. Evetu genembo numoá avavaga kakara use irivu!

<sup>30</sup> Ainda beká mo: Keriso da saramana ari dae sedo, nunda jebuga kotae usira. A ne reighi sokada ireva ava sedo, jo namoá sonembari da kaugo iraeri. Ava gido, nu nenda javoda na sonembusira. Aminguse, kae setena amo, budo ambari dae usira.

### 3

#### *3:1-11 Jebuga Bari Da Emboro Mo, Eviri.*

<sup>1</sup> Nanda nano namendi, geka emo tano edo dotutuse resena: Bajari nemokena ivuga ava mutari budo, ivuga evu! Na giti aminge siseni. Kotugo, ne geka amo ningaetevu!

Ava sedo, ivuga aovo dae, geka daba ava sise irarena andae, na jo oju ae arena. Geka ava sekago sarena, aimi ne sonembarira.

<sup>2</sup> Evetu genembo, nenda vika mendo anoso gafugaovo dae sise irera, andae oju use, ne darigedo ajagha fetovo dae sise resena. Ne kau gambari sino da kaugori. Evetu genembo avavaga jo tumondae areva. Nene seraera, tamo vika mendo anoso gafugari amo, God da tanori.

<sup>3</sup> Avata amo, jo God da tano beká iraeri. Nunda tano beká amo, nunda Asisiri. Nunda Asisi resena emo, evetu genemboá ne jo baeri. O namonde mo, nunda Asisi ava budo, nunda fakinaimi God tumonde bainghuse, nunda Mandi Iesu Keriso de dabade tatedo ivuga use irera. Rea dubo jokáda irira amo, susuri. O tano mendeni mendeni namonde tamonda fitido ditiimi giraera amo, jo susu iraeri.

<sup>4</sup> Kote givu! Evetu genembo resena emo, ne rea aovo dae seraera amo, na anakora useni. Ne jo nanda dombuda iraeri. Ava sedo, ne eredo, nenda vika mendo anoso gafugaovo dae sarera amo, erá ningeove! Eregoseva: na ari avavaga tumondaetena amo, inono, na anakora tuturo edo, tofo nanda javo jighono eraeti.

<sup>5</sup> Ainda beká mo: na kau, evetu genembo resena aminga ava siroreteno, sifo 8 ava dadabetiri, na budo era nanda vika mendo anoso gafuguseri. Kotugo, nambarago Israel embori. Nanda afa nu Israel embo da oro javo Benjamin, ainda eniri. Aya barago, nu Israel embo da vekari. Geka eni mo, eviri. Israel embo da fatu eni ava, Moses da Geka kaifa kakato+ seraera, ne Jusi embo da Agho Dari kaifa e gogoghomberaera. Na nenda eni edo, Jusi embo da Agho Dari ava kaifa e gogoghombuseni.

<sup>6</sup> Na giti kau nange nange tumondedo ghusena, ava e gogoghombuse, God da ekaresiakena+

fakarago use, bouvu muteono mema itatameoro, Jusi embo ava gosuse ivuga edo ghuseri. Genembo Agho Dari da emboroda+ ise, jebuga tambaetira amo, nane tambaeteni. Ainda beká mo: na Agho Dari isasambu kaifa e gogoghombedo ghuseri. Evetu genembo digari jo namongo ava, jo ae edo ghuseri.

<sup>7</sup> Avata kiki amo, giti nane tumondedo ghuseri ava, oroko na jo kotae eraena. Ainda beká mo: na giti aminguse, Keriso kosasaghuseni. Na tefo janjagu edo ghuseri. Ava sedo, Keriso bari dae sedo, na roera setena ava, isambu dotutuseni.

<sup>8-9</sup> Kotugo, kiki ava dodo, na roera isasambu enda eminda irira, ábarago do dadabedo, isambu kotae useni. Ainda susu mo: ne isambu veveyakori. O nanda Bajari Iesu Keriso kasama edo, nunda tofo ari amo, teriagori. Iesu Keriso de dabade tatedo numoá avavaga ari dae sedo, a tofo numoá bari dae sedo, na kiki a roera setena amo, kau sena da kaugo, ava sise fuge dotutuseni. Namonde Agho Dari da emboroda+ ise, tofofo eveva ari dae sise e gosuseri. Ainda emboro+ ava, na imboe edo dotutuseni. Oroko Keriso tumondururono gido, God nandae 'eveva' sare dae sedo, aindae edo giraena. Amo tofo nunda ariri. God nandae 'eveva' sarira amo, na taká tumondururono gido, nunda eveva namokena futuse, aminge sarira.

<sup>10</sup> Oroko nanda uju evia irira ava sarena. Na nange Keriso kasama edo, nunda tofo aeteni. A kotugo, na nunda tofo edo, nu ambarida ghe jebuge erorusira, ainda fakina ava itatamaeteni. Itatamuse, nune mema tafusira aminga ava, nane mema tambudo, numoá avavaga use ambaeteni. Na ava uju eraena ainda beká mo:

<sup>11</sup> na gigiteraena, kau God setiri Iesu ambarida ghe erorusira aminga ava, nune sari nambarago ambarida ghe eredo jebugarena.

*3:12-21 Namonde Kau Paul Usira Aminga Ava Use, E Gogoghombaeteri.*

<sup>12</sup> Na Keriso ghae tatedo, numoá avavaga ari dae setena, avata na jo aono inono aeri. Avata Iesu Keriso nune na, nunda tofo aono dae sedo, rurusira. Ava sedo, numoá avavaga ari dae sise, na e gogoghomberaena.

<sup>13</sup> Na setena, daba ava sari dae erena. Na Keriso avavaga jo aono inono aeri. Avata na saramana dabako evia use irena. Roera giti nane usena ava kotae edo dotutuse, roera amboda sirorari barena, ava tambari dae sedo, na ava edo giraena.

<sup>14</sup> Aminguse, kau genembo yaru jokáda teredo, beisi sufuse dambu sumburaira, aminga ava sufuse irena. Roera digari kotae edo dotutuse, God da mino ava bari dae sedo, nanda fakina ava edo giraena. Nunda mino resena emo, jebuga evovodae iriri ava, namonde Iesu Keriso da fakinaimi baetera, aindae resena.

<sup>15</sup> Avori, kau nane fakina edo gido, mino bari dae koteraena setena aminga ava, namonde isambu mave tuturo edo itako ghousa tumonduse, Keriso da amboda amboda use, sangai da kaugo edo irise, Keriso da saramana use irera amo, namonde kau daba ava kotaeteri. O ne kotari dombu eni kotareva amo, God amboda ijugururari, ne geka beká ava kasama areva.

<sup>16</sup> Avori, God iriri reja ava ijugetiri namonde kasama usera, ava kaifa use, a aminguse irarera.

<sup>17</sup> Nanda nano namendi, nane rea eraena, ava use irivu! Namane natofo mendeninde ari eveva eoro gido ghusevu. Ava sedo, mave amingeraera, ainda amboda amboda evu!

<sup>18</sup> Na aminge resena ainda beká mo, eviri. Na giti sedo ghuseri, a kotugo, oroko daba ava soraraghae resena. Evetu genembo digari fisi da uju ava use, Keriso da gitofu avavaga edo irera. Ne Keriso da gitofu resena ainda susu mo, eviri. Fisi da uju ainda fakina namondekena nange dadabaetira aindae sedo, Keriso korosida ambududurusira. Avata evetu genembo amo fisi da uju ava

use, ne gitofu use, Keriso korosida ambududurusira ainda tuka ava, nene ighagha use irá gheraera.

<sup>19</sup> Ne fisi da uju ava use, Bajari dotutuseri. Aminguse, ne fisi da uju ava tumonduse irera. Ne roera a ari mendeni mendeni eraera andae, meka gaeteri. Avata ne andae tofofo sakai sise irera. Andae sedo, sifo gombuda mo, ne God da bouvu ava itatamedo sirivo arera.

<sup>20</sup> O namonde mo, utu da natofori. Namondeda Sonemba Kato amboda utuda ghe vose furarira, ava kaifa use irera. Amo, namondeda Bajari Iesu Keriso dae resena.

<sup>21</sup> Nu fakina rurusira aimi, nune sari roera isasambu nunda sari ningari edo irarira. Amboda nu foama, fakina daba aimi, nune sari namondeda tamo betisira evia jovereghedo, kau nunda tamo durode aminga ava arira.

## 4

### *4:1-9 Geka Mendeniri.*

<sup>1</sup> Avori, nanda nano namendi! Ne jo gae irise, na dubo mema erira. Na ne dubo ruruse, gari dae uju beká ava eraena. Nene eveva eraeva, andae na ivuga use, nendae sakai seraena. Bajari de dabade tatedo fete gogoghombevu!

<sup>2</sup> Euodia nengae Syntyche ghae, nemokena resena. Nanda ghaghasovu, ne Bajari da natofo edo ireva. Na andae sedo eminge benunu resena: beisiga dovu! Dubo dabako edo irivu!

<sup>3</sup> Nanda umo komana nimokena resena. Ni nanda komana bekári. Evevetu setena ava sonembururaso, ne dubo dabako aeteri. Ainda susu mo: evevetu setena amo ne, Clement a nanda nano namendi mendeni, namonde dabade ya janjagu use, God da Bino Eveva ava vironu sedo ghuseri. Na kasama erena, nenda javo isambu, God da buku ainda jokáda irira. Buku resena ainda jokáda, maveda javo gembero irira amo, nu jebuga evovodae irari ava tuve barira. Ava sedo, nanda umo komana, nindae eminge resena.

Sonembururaso, evevetu amo, ne dubo dabako edo irarera.

<sup>4</sup> Ne Keriso de dabade tatisevu. Tatedo irise, ivuga aovo dae sise resena! Kotugo, na sekago resena: ne ivuga use irareva!

<sup>5</sup> Evetu genembo isambukena durumuguse irivu! Bajari totoi jovereghe furarira.

<sup>6</sup> Erá uvu bayau a roera mendeni andae sedo oju use, kotari teria futo koteove! Nemokena rejo ava daiva arira amo, God kena aiyakoe sise, benunu se bareva.

<sup>7</sup> Aminguse, Iesu Keriso tumondururovo, God da dubo jama vose foama aimi, nenda dubo joká a nenda kotari bedo edo irarira. Amingari, ne jo oju ae areva. Nunda dubo jama resena emo, jo evetu genembo duboimi kotise, kasama ari da kaugo iraeri.

<sup>8</sup> Avori, nanda nano namendi, geka emo tano e dotutuse, eminge resena. Roera eveva avanembo, nenda dubo jokáimi kotise irivu! Roera resena amo eviri: geka a ari beká, kotofu da kotari a ari, roera a kotari eveva a kakara, roera garigo, a roera binonde ava kotise irareva! Ari eveva vanembo use, evetu genembo sonembari dae sedo kotise irareva!

<sup>9</sup> Na rea dengoro induduse seono ningido ghuseva, a emboro eveva ijuguse, na rea eono gido ghuseva, avavaga use irareva! Aminguse irovo, God dubo jama muturaira amo, nemokena irarira.

### *4:10-20 Filipai Embo Joba Numokena Futusera Andae, Paul Nu Aiyakoe Sisira.*

<sup>10</sup> Ne sekago na kotise moniimi sonembuseva andae, na Bajari de dabade tatedo irise, ivuga beká ava erena. Ne ghousa ambari ava, na jo sonembae iriavu. Na kasama erena: ne na kotise iriavu. Avata goroto jo tambae iriava ava sedo, na jo sonembae usevu.

<sup>11</sup> Na jo dubo mema use, aminge saeri. Namokena roera tefo irarira amo, na ivuga arena. O na gugua de irarena ábarago, na ivuga arena.

<sup>12</sup> Sifo eninda, uvu bayaudae na ighoi itatamedo ghuseni. A sifo eninda, bayau dige fasedo ghusira. Sifo mendeni na inono edo ghuseni. A sifo mendeni mo, na jo inono ae edo ghuseni. Avata na 'avori' sedo, ivuga ari da emboro ava kasama useni. Edo roera daiva arira, o inono arira amo, na taká ivuga use irarena.

<sup>13</sup> Keriso fakina namokena futururari budo aimi, na roera isambu ari dae arena amo, namokena inono arira.

<sup>14</sup> Avata kotugo, na mema tafeno ainda jokáda, ne na sonembuseva aindae, na aiyakoe resena. Ne eveva ava usevu.

<sup>15</sup> Nanda natofo reighi Filipai aminda ireva, ne totofo kasama ereva, na anakora beká God da Bino Eveva ava sise, Frovensi Masedonia aminda ghedo isena amo, ne namonde kikiako sonemba minonde minonde edo ghuseri. Ekaresia+ mendeniimi na jo sonembaeri. Nesukako na moniimi sonembedo ghusevu.

<sup>16</sup> Na reighi Tesalonaika aminda iriana amo, ne jo umbu dabako o etoto naká aminga ava, na sonembae edo ghusevu. Namu, nene sonembevo iriani.

<sup>17</sup> Na geke resena emo, na jo moni mutovo bari dae sedo gambaeri. Ne God da fakina a esimbugari baovo dae sedo erekotena. Na, nenda joba futururovo gido, God ne esimbugae-tira, aindae erekotena.

<sup>18</sup> Avori, na nenda moni a joba rurusena aindae, eminge resena. Aiyakoe! Amo inono beká usira. Epaphroditus nenda joba isambu mutiri rurusena amo, inono beká ava usira. Kau, nanda abumane joba kau eni dungeoro avido, muno ferugheari God fufuse ivuga edo ghusira aminga ava, God nenda joba futuseva evia gido, ivuga erira.

<sup>19</sup> Edo, nemokena oka bayau, tamo asugari, o rejo daiva eraira ava, nanda God sonembururari bareva. Ne Iesu Keriso de dabade tatedo ireva aindae sedo, God nunda

guguaimi sonembururari, nenda gugua dige fasarira.

<sup>20</sup> Avori, namondeda God a Afa da javo jighoro eroruse, nunda usasa evovodae jaraghuse irarira. Ai, bekári!+

*4:21-23 Paul Nunda Nano Namendi Ategi Edo, Geka Se Tano Usira.*

<sup>21</sup> God da natofo Iesu Keriso de dabade tatedo irera ava, ne isambu nane ategi beká ava erena. Sevu ningore! Nanda nano namendi eminda irera aimi, ne ategi beká ava erera. Yari budo givu!

<sup>22</sup> God da natofo isambu eminda irera aimi, ne ategi erera. A kotugo, mendeni Rome embo da Kotofukokena saramana use irera aimi, ne ategi beká ava erera. Yari budo givu!

<sup>23</sup> Namondeda Bajari Iesu Keriso da sonemba nemokena irari, nenda dubo jokáimi itatamuse irivu!

Avori, nanda geke tano eviri. Na Paul.

## Paul Nunda Reta Kolosi Embokena Gefusira, Amo Eviri.

Paul diburada irise, reta evia avose, ghaeko 62 A.D. ainda jokáda gefusira. Kau Galesia aminda, ijuga sembae sirorusira aminga ava, Kolosi aminda sirorusira. Ijuga kakato mendeni era, agho dari mendeni mendeni kaifa aoro dae setero, Kolosi embo nenda geka tumonduseri. Paul erá amingeóro dae ijuguse, Keriso da duro a fakina ava ijuguse, nusuka numoá tumondaoro dae sedo gefusira.

*Paul Nunda Reta Kolosi Embokena Gefusira, Ainda Mendo Mendo Mo Eviri.*

1:1-7 Paul geka tuturo use, ne ategi usira.

1:8—2:19 Iesu kau mavega a nu namondedae rea usira aindae, Paul ijugusira.

2:20—4:6 Jebuga seka da irari a aito mo eviri.

4:7—4:18 Paul natofo ategi edo, tano usira.

1-2 Arie, nanda nano namendi! Na Paul, na God da ujuda, Iesu Keriso da aghi kato edo irena. Ne Keriso de dabade tatedo, numo tumonde gogoghombuse, God da natofo edo reighi Kolosi aminda ireva, na ne ategi beká ava erena. Kotugo, namondeda namendi Timothy barago, ne ategi beká ava erira. Yari budo givu!

Namondeda Afa God nemokena sonemba a dubo jama mutari baove!

*1:3-14 Paul Nu Banunguse, Kolosi Embodae Aiyakoe Sedo Ghusira Ainda Beká Mo, Eviri.*

3-4 Ne nange nange Iesu Keriso tumonduse ireva, a ne nange nange God da natofo isambu dubo buraeva aindae, namane nangae evovodae

aiyakoe sise irera. Namane banunguse nemo koteraera amo, namondeda Bajari Iesu Keriso da Afa God kena aiyakoe seraera.

<sup>5</sup> Ne God da natofo dubo buraeva ainda susu mo: ne amboda utuda rea bareva, ava gigituse ireva. Epaphras ira nemokena God da Bino Eveva a Beká ava vironu setiri ningido, ne tuturo edo, rea utuda bareva, ava gigituse ireva. Ava sedo, ne God da natofo dubo buraeva.

<sup>6-7</sup> A kau ne God da Bino Eveva ningido, nunda esimbugari budo ne digarigo useva, daba aminga ava, natofo isambu eraera. Kau Epaphras God da sonemba ainda beká ava, nemokena vironu setiri kasama useva aminga ava, natofo isambukena siroreraira. Epaphras mo, namane nangae dubo buraera a tumonderaera. Nu namane namonde dabade, Keriso da saramana kakato edo irera. Namane Timothy ghae, namanendae sedo, nu ira Keriso da saramana nenda jokáda edo ghusira.

<sup>8</sup> God da Asisi aimi nange sonembururari tofo tofo dubo buraeva, ainda bino ava, nune fira setiri namane nangae nininguseri.

<sup>9</sup> Ningido, tuturo edo nendae eminge banunguse irá gheraera. God nunda uju ava ijugari kasama aovo dae sedo, banunguse irá gheraera, a nunda Asisi aimi sonembururari, kasama teria budo, dubo kotise irovo dae sedo, banunguse irá gheraera.

<sup>10</sup> Amingareva amo, ne Bajari da uju ava use irovo gido, nu ivuga arira. A aminguse irareva amo, ne ari eveva use evetu genembo sonembuse, veka eveva use irareva. Kotugo, ne aminguse irareva amo, God nu kau mavega kasama e gogoghombuse irareva.

<sup>11</sup> A kotugo, namane nangae nemo kotise, banunguse irá gheraera da benunu eni mo eviri: God da fakina durode ava budo fakina use, ne dara a mema itatameraeva ainda jokáda, durumugedo irovo dae sedo, banunguse irá gheraera.



<sup>12</sup> Namane nangae aminge banunguse irá gheraera da beká mo eviri: ne ivuga use God Afakena aiyakoe sise iraetevu. Ainda susu mo: God nunda vasa usasade nunda natofo-dae esimbugusira. A nune sonembetiri, nembarago nunda natofo usevu. Ava sedo, nembarago God da vasada ya terarikená mo, inono arira.

<sup>13</sup> Nunda sonemba emingusira. Nu namonde, tumba da Bajari Satan da ungodá ghe saghimbe rurusira. Namonde budo, nunda Mandi dubo buraira, ainda natofo da jokáda fitiri, namonde dabade tatedo irera.

<sup>14</sup> Nunda Mandi resena emo, ambududurusira. Nunda ambariimi, namonde jebugedo irera. Nunda ororo averegusira andae sedo, God namondeda ari ekoko kote dotutúsira.

*1:15-23 Keriso Fira Ambududurusira Ainda Susu Mo, Eviri.*

<sup>15</sup> Namonde God mo, ditiimi jo gae eraera, avata Keriso ava gosuse, namonde God da dangio giraera. God roera isasambu jo ari sirorae iriri ainda gitida, God da Mandi Keriso nu irei. Roera isasambu amboda etiri sirorusira amo, jo eni numongo irairi.

<sup>16</sup> Ainda beká mo: God roera isasambu, utuda a endada irira ava, Keriso da fakinaimi etiri sirorusira. Roera ditiimi giraera a ditiimi jo gae eraera, asisi dombu eni dombu eni inono, aneya a sukaru nenda kokotofu a babojegaride dabade, isambu Keriso da fakinaimi etiri sirorusira. Roera amo isasambu Keriso da fakinaimi, a kotugo Keriso dae etiri sirorusira.

<sup>17</sup> Roera isasambu ainda gitida, Keriso nu irei. A roera isasambu nune bu jighirira.

<sup>18</sup> Ekaresia+ mo, inono nunda tamo avavagori. A numo ekaresia+ da jirori. Nunda tamo da jebuga da susu mo, tofo numori. Nu roera isasambu ainda jiro a ainda giti jighari ava are dae sedo, God setiri nu roera a evetu genembo isambu ainda gitida, ambarida ghe jebuge erorusira.

<sup>19</sup> Nu roera isasambu da jiro edo irira ainda beká mo: God nu tofo mandi uju usira amo, nange nune nunda Mandikena sembudo, tofo numoá ava siroraeti.

<sup>20</sup> God nu roera isasambu, utuda a endada irira, ainde dabade mainungari kotisira. Nunda Mandiimi nange emboro afigari mainungaitira, andae kotisira. Aminge kotise, nune setiri, nunda Mandi fira korosida ambiri gido, nune mainungari da emboro+ ava afigusira. Roera isambu utuda a endada irira, ainda mainungari da emboro+ ava afigedo irira.

<sup>21</sup> Giti, ne kotari sembae kotise a ari ekoko use, God kena gitofu use iriavu.

<sup>22</sup> Avata oroko, nunda natofo eveva a kakarago edo irovo dae, a kotugo nemoá aghi ari numokena ya nunda dombuda fetovo dae sedo, nunda Mandi dirigetiri fira, genembo beká edo ambududurusira. Aimi nune emboro afigedo mainungari, ne oroko nunda kokomana edo ireva.

<sup>23</sup> Ava sedo, ne God da Bino Eveva ava tumonduse, fakina edo jo manamana ae areva amo, ne ya nunda dombuda fetareva. Ne nunda Bino Eveva ava nininguse, jebuga evovodae irari ava bari dae gigituse irareva amo, nene bareva. Bino Eveva resena emo, evetu genembo endada irera aikena, vironu seoro ningiraera. A kotugo, Bino Eveva ainda aghi kato eni mo, na Paul nane edo irena.

*1:24–2:5 Paul Nu Rea Vironu Sise Deinghedo Ghusira Amo, Eviri.*

<sup>24</sup> Na nemo sonembari dae sedo mema itatameraena andae, na oroko ivuga erena. Nane Keriso da javoda nanda tamonda mema itatamuse nunda tamo sonembaetena sisira. Ainda mema ava nange aono inono aetira ava kotise, ivuga erena. Nunda tamo resena emo, nunda ekaresia dae resena. Amo nene Iesu tumonduse ireva, nendae resena.

<sup>25</sup> A God da ekaresia+ resena, ainda saramana kato aono dae, nune

setiri edo irena. Nemo sonembaono dae sedo, saramana namokena futusira. Saramana resena amo, eviri. Na nunda Geka isagha beká ava sirurono evetu genembo ningaeteri.

<sup>26</sup> Nunda Geka resena emo, nu giti evetu genembokena kivo edo ghusira. Avata oroko, nunda natofokena afigetiri, ningido kasama erera.

<sup>27</sup> God nunda Geka kivo usira ava, nunda natofokena ijugari kasama aoro dae kotisira. A kotugo, nunda Geka kivo usira ainda duro ava, evetu genembo nu jo kasama ae iriara aikena barago, ijugururari gaoro dae kotisira. Geka resena amo, eviri. Keriso nenda jokáda teredo irira, ava itatameraeva. Itatamuse, ne kasama eraeva; namonde God da usasa bari dae sedo gigiteraera amo, barera.

<sup>28</sup> Aindae sedo, namane evetu genembo isambukena, Keriso da bino ava vironu seraera. Aminguse, erama ne sirivo eore dae sedo, namane dubo kote gogoghombuse, ne ijugeraera. Namane uju erera: evetu genembo isambu Keriso de dabade tatoro, namane ne ijugururoro, God da evevetu a gegenembo beká ava edo, God da dombuda fete gogoghombarera.

<sup>29</sup> Ne amingaoro dae sedo, na saramana a janjagu use irena. Keriso nunda fakina teriaimi, nanda ghamo dereari ereari amingeraena.

## 2

<sup>1</sup> Na nange eraena ava saono ningareva. Ne reighi Kolosi aminda ireva, nendae, a Leodisia embodae, a kotugo nanda nano namendi mendeni ne na jo ditiimi gae eraera, ne isambudae, janjagu use irena.

<sup>2</sup> Na amingeraena da beká mo, eviri: ne tofo tofo dubo ruruse, dubo dabako edo tumo fainghaovo dae sedo eraena. A ne Keriso kasama e gogoghombedo, nu tumonde gogoghombaovo dae sedo amingeraena. Ne aminguse, emo kasama areva: God nu geka jungutusira, gembena amo, Keriso ava jungutusira.

<sup>3</sup> Kotugo, God dubo kotari a kasama beká ari da susu ava isambu, Keriso nunda dubo jokáda jungetiri irira. Ava sedo, dubo kotari a kasama beká ainda susu isasambu mo, Keriso numori.

<sup>4</sup> Na aminge resena da beká mo, eviri. Na uju erena amo, erá evetu genembo mendeniimi dedeuse geka sirureóro, nenda geka ava tumondeove dae sise resena.

<sup>5</sup> Ne namonde jo dabade iraeri. Na ajagha irá gheraena. Avata nanda dubo jokái nemokena futuse irena. Aminguse, na nenda tumondari eregosenena. Amo, ne durumugedo dabade irise, Keriso tumonde gogoghomberaeva aindae, na ivuga erena.

### *2:6-23 Namonde Mo Bundetero Iriara Ava, Keriso Vujegetiri Irera.*

<sup>6</sup> Ne Iesu Keriso, nenda Bajari are dae sedo, rurusevu. Ava sedo, ne Keriso de dabade tatedo irivu!

<sup>7</sup> Aminguse, Epaphras rea ijuge-tiri kasama useva, ava use irareva. Amo eviri. Keriso da jebuga jighi simbuguse, nunda fakina budo aimi fakina ururovo, nenda tumondari teria arira. A kotugo, ne ivuga use, aiyakoe sise irareva!

<sup>8</sup> Ava sedo, kaifa use, Keriso da ijuga avanembo tumondareva! O kotari mendeni mo, taká evetu genembokena ghedo foa gheraira. Kotari resena emo, evetu genemboimi tefo koteoro siroreraira, o nenda kiki ava koteoro siroreraira, o asisi ekoko a sukaru utuda a endada deinghuse irera, nene kotiroro ava sirore foa gheraira. Ava sedo, evetu genembo ne deroro, kiki ava tumondaovo dae sedo aminge ijugarera amo, erá evetu genembo ainda kotari a kiki ava tumondeove dae resena.

<sup>9-10</sup> Eregoseva: Keriso mo, nu aneya, sukaru, a kokotofu isasambu nenda dombu bekádari. Ainda beká mo: God da irari a nunda fakina isambu, Keriso da tamonda teredo irira. Amingedo iriri, Keriso nemonde dabade tatisevu. Tatise,

nembarago jebuga beká ava ruru-sevu.

<sup>11</sup> Avori, ne Keriso de dabade tatetevo, fisi da uju aimi bundetiri iriava ava, nune vujegetiri kosughedo ireva. Nu rea usira amo, jo Jusi embo da tano evetu genemboimi eraera, amingo iraeri. Jusi embo nenda vika mendo anoso gafugeoro, tamonda siroreari ditii giraera. O Keriso eraira amo, namonde dubo jokái itatameraera.

<sup>12</sup> Ainda beká mo: ne bafataito useva amo, inono, ne ambevo Keriso de dabade furugusera, ainda kauri. Kotugo, God nune irira a nunda fakina irira, ava tumondevo gido, nu emingusira. Kau nune setiri Keriso ambarida ghe jebugedo erorusira aminga ava, ne bafataito evo gido, nune setiri ne uvuda ghe vivituse jebugusevu.

<sup>13</sup> Ne giti fisi da ujuimi bundetiri irise, a Jusi embo da Agho Dari da geke jo ningae irise, nenda ari ekoko aimi ambarigedo iriava amo, sifo aminda, God nune setiri ne jebugusevu. God nenda ari ekoko isambu kote dodo setiri, ne Keriso de dabade jebugusevu.

<sup>14</sup> Namonde ari ekoko etero tegedo ijujusira aindae, nu namondekena mino eko mutaetira avata, tofo mandi nune kote dotutusira. Namonde ari ekoko usera ainda mino mo, jo namonde darigari da kaugo iraeri. Mino amo, namonde numokena mutaeteri. Avata ainda mino mo, tofo nune futusira. Amo, God emingusira. Nu namondeda ari ekoko budo, Keriso da korosida detiri, ainda fakina dadabusira. Aminguse, nu namondeda mino futusira.

<sup>15</sup> Korosi daba aminda, Keriso fakina edo, aneya a sukaru nenda babojegari a kokotofude dabade, isambu nenda fakina darige vitido, fakina amo nune isaghada de bejedo, atai fati fetetiri namonde gosuseri.

<sup>16</sup> Ava sedo, evetu genembo mendeni eredo, nenda irari aindae ne ijujarera amo, nenda geke erá ningeove! Ne uvu bayau dombu

eni dombu eni, kanangara aovo dae sarera amo, nenda geke erá tumondeove! O ekaresia+ da kirumo da sifo eninda, o Jangutari da Sifo aminda, rejo ava aovo dae sarera amo, nenda geke erá ningeove! O namane Jusi embo da abuamane, inua seka vitari da sifo aminda, kirumo edo ghusera ava, nene kaifa aovo dae sarera amo, erá amingeove!

<sup>17</sup> Roera amo, nu tefo dangio a etu vanembori. Susu mo Keriso numori. Keriso kasama aoro dae sedo, God roera amo setiri sirorusira.

<sup>18</sup> Evetu genembo mendeni, ne susu tefo totofo sakai sise, eminge seraera, “Namane roera God kena foa gheraira, ava diti mokoi giraera; ava sedo, namane Keriso da natofo eveva bekári. Namane, ne tumo darido irise, aneya tumonde bainghaovo dae sise resera. Mave jo amingae arira amo, nu jo Keriso da natofo eveva iraeri.” Aminge seraera amo, ne taká evetu genembo da kotariimi seraera. Kotugo, mave amingaovo dae sarira amo, erama nunda geke ningido tumondeove!

<sup>19</sup> Evetu genembo amo, ne ari ovia kaifa eraera. Avata aminguse, ne namondeda giti jighari Keriso mo, anakora dotutuseri. Keriso nu, nunda tamo da jirori. God rea koteraira ava use, Keriso fakina futureari aimi, nunda asida ghaseari ya, nunda tamo a ungo ata da umbu aminda, fakina budo bajiraira.

<sup>20</sup> Agho dari mendeni, enda a enda da gugua aindae seraira, ainda amboda amboda eraeva. Amo sembaeri. Erá amingeove! Kote givu! Ne Keriso de dabade ambudo, aneya sukaru utuda a endada deinghuse irera, ainda fakina ava darigusevu. Aminguse, ne enda da fakina ava darigedo sembudo, Keriso da tofo ava nene edo ireva. Ava sedo, agho dari mendeni mendeni, enda a enda da guguadae resira ava, erá sekago koteove!

<sup>21</sup> Erá bebete eóvo dae sise, agho dari eminge resira: “Erá roera

amo dereove! Omo erá mindeove! Roeraó erá dereove!” agho dari aminge resira. Avata na, agho dari ava erá tumondeóvo dae resena.

<sup>22</sup> Aında beká mo: roera erá beóro dae seraira, aında bebeta ari da fakina eni tefori. Roera deraresa amo, jo nange ae arira. O ni bu mindaresa amo, mindaso dadabarira. Avata aimi, jo ninda dubo jóká bebeta ae aresa. Agho dari avavaga amo, evetu genembo da kotariimi kotetero sirorusira.

<sup>23</sup> Agho dari avavaga, ninda gitida ningaresa amo, ni avose, ‘evevava’ saresa. Aında beká mo: nu tumonde bainghuse janjagu aoro dae seraira, tumo darido iroro dae seraira, a erá nenda tamo kotise, kaifa eore dae seraira. Avata agho dari amo, nu geka vanembori. Amingarera amo, namonde tofo namondeda javo jighoro erarira. Avata agho dari aimi, namonde fisi da uju a kotari eko jo buregae arera.

### 3

#### *3:1-17 Namonde Roera Utuda Iriira, Ava Kotise Irarera.*

<sup>1</sup> God setiri, ne Keriso de dabade ambarida ghe jebuge eredo ireva, aında sedo, roera utuda irira, ava tuve bari dae sedo nenda ghamo jóká isambuimi futuse irivu! Utu resena aminda, Keriso nu God da ungo gimandukena anumbirira.

<sup>2</sup> Ne roera utuda ovia, kotise iraetevu! Roera endada evia, jo kotise irae aetevu!

<sup>3</sup> Aında beká mo: ne Keriso de dabade ambududurusevu. A kotugo, oroko nenda jebuga beká ava, Keriso nu God ghae dabade irise, nene kaifa eraera. Nenda jebuga resena emo, Keriso God ghaekena jungedo irira.

<sup>4</sup> Avori, nenda jebuga beká mo, Keriso numori. Nu jovereghe foa isagha arira amo, nemonde dabade nunda duro a usasa aında jókáda fetareva.

<sup>5</sup> Ava sedo, nenda fisi da uju ava buregedo gajevu dadabare! Fisi da uju resena emo, kombo yagera, kusia bagia, fisi da uju

ekoko mendeni mendeni, dighighi ari a roera mendeni setena evavaga, aında resena. Dighighi ari resena aında beká mo: dighighi ari mo, ove tumonde bainghari da susu daba avori. Na aminge resena da beká mo: kau evetu genembo ove tumonduse, God kotae eraera aminga ava, evetu genembo mendeni roera a gugua bari dae sise, God kotae eraera. Ava sedo, dighighi ari a ove tumonde bainghari mo, ne ari dombu daba avori.

<sup>6</sup> Evetu genembo God da Geka ningido jo ae eraera amo, ne God da janje eko ava itatamarera. Roera setena amo, nene eraera aında, ne God da janje eko ava itatamarera.

<sup>7</sup> Nembarago giti kau daba ava use, ari setena, aında amboda amboda udo fusevu.

<sup>8</sup> Avata oroko, ne ari ovavaga imboe edo doyareva! Janje eko ari, mema komanakena mutari da emboro kakova ari, jijivu sari, geka eko sari, a ari avavaga imboe edo kote dovu!

<sup>9-10</sup> Erama tofo tofo gungubo seove! Aında beká mo: ne nenda kotari a irari manai ava kosughe dodo, kotari seka ava asugedo, irari seka da ari ava use ireva. Kotari a irari seka resena emo, God nune setiri sirorusira. Numo kasama e gogoghombaovo dae sedo, a numongo ava aovo dae sedo, God nenda kotari seka ava, nenda janje jókáda mutudo undiri babojerira.

<sup>11</sup> A ne kotari seka budo ireva, daba aında eminge resena. Mave nenda mendeni Jusi embo, a mave nanda natofo Jusi embo da gitofu, ava erá koteove! Kau daba aminga ava, ne mendeni nenda vika mendo anoso gafugedo ireva, a mendeni jo ae ireva, ava erá koteove! O nenda mendeni kunika embo, o reighi Sitia embo ava, erá koteove! Kau daba aminga ava, mendeni sabua a mendeni kokotofu edo ireva ava, erá koteove dae resena. Aında susu mo: ne isambu Keriso da tofo edo ireva; a kotugo, nu nenda dubo jókáda teredo irira.

<sup>12</sup> Ne isambu God da natofori. Ne, nune dubo ruruse gatededo, nunda tofodae rurusra. Ava sedo, joka ari, kavevera ari, tumo darido irari, robogho ai irari, a durumugari, ava use irareva!

<sup>13</sup> Ne tofo tofo sonembuse irareva. Nenda genembo eni, nunda namendi enikena dara arira o mema mutarira amo, nunda namendi amo genembo ainda dara kote doyarira. Kau Bajari nenda ari ekoko kote dotutusira aminga ava, ne minonde minonde kote doyareva.

<sup>14</sup> Ari setena amo, evevari. Avata eveva beká mo: ne tofo tofo dubo ruruse irovo dae sise resena. Dubo bari mo nu, nemonde tatedo dubo dabako ari, a dabade saramana ari da susuri.

<sup>15</sup> Keriso de dabade tatedo, nunda tamo edo, nunda dubo jama ava baovo dae sedo, God ne aghi usira. Ava sedo, nenda dubo joká ava, Keriso da dubo jamaimi kaifa use emboro ijugururari, itatamuse irivu! A ivuga use, aiyakoe sise irareva!

<sup>16</sup> Keriso da Geka nenda dubo jokáda kaifa ururovo, aimi sonembe gogoghombururari, ne fakina bareva. Dubo kotise, tofo tofo ijuguse, a dengoro induduse irareva. Yaru God da Geka jokáda gembero irira, o geka mendeni God dae sakai sari dae sedo yaruda gembero irira, o yaru mendeni Asisi da sonembaimi gembeoro siroreraira ava, nenda dubo jokái God kena didivuse aiyakoe sise irareva.

<sup>17</sup> Kotugo, ne ari reja areva o geka reja ava sareva amo, isambu Bajari Iesu da javoda, areva a sareva. Aminguse, nunda javoda, God Afakena aiyakoe sise irareva.

### *3:18—4:6 Namonde Irari Kau Eminguse Iraeteri.*

<sup>18</sup> Evevetu, nemokena eminge resena. Nenda gegenembo geka rea sarera ava, nininguse amingareva. Amo Bajari da ujuri.

<sup>19</sup> Gegenembo, nemokena eminge resena. Durumugedo robogho ai,

nenda evevetu dubo ruruse irareva! Erá fakarago nemokena eove!

<sup>20</sup> Sasingu, nemokena eminge resena. Nenda nei nimamo geka rea sarera ava, isambu nininguse irareva. Amingareva amo, God nu ivuga arira.

<sup>21</sup> Evetu genemboghae, nemokena eminge resena. Erá janje ekoko edo, nenda sasingu teria futo giseóvo, saramana ari dae barago eore!

<sup>22</sup> Saramana kakato, nemokena eminge resena. Nenda babojegari ne moniimi ombero, ne nenda tofo usevu. Ne nenda babojegari da geka rea sarera ava, isambu nininguse amingareva. Jo nenda babojegari gido ivuga aoro dae sise, amingareva. Ne nenda babojegari da dombuda saramana areva o esike saramana areva amo, ne aito kau daba ava use irareva. Nenda Bajari Iesu igheghi use, dubo isambu futuse, saramana areva.

<sup>23</sup> Ne saramana reja tuturo edo areva amo, dubo joká aminda futuse, saramana areva. Aminguse, ne jo evetu genembo da uju avanembo kotae areva. Bajari Iesu amingaovo dae sise resira ava kotise, dubo isambu futuse, Bajari Iesu dae saramana areva.

<sup>24</sup> Ainda susu mo: nenda bajari beká mo Keriso numori. Jo evetu genembo iraeri. A nenda mino, nune fitiri irira ava, nune tofo mandi amboda mutari bareva.

<sup>25</sup> Mave ari ekoko eraira aindae sedo, God numokena mino eko mutari barira. Ai resira amo: God evetu genembo isasambu kau daba ava ijujarira. Evevetu, gegenembo, sasingu, sabua, a kokotofu, kau daba ava ijujarira.

## **4**

<sup>1</sup> Babojegari, nemokena eminge resena. Nenda saramana kakato ofuseva ava, nemokena veka eveva use, kaifa use irareva. Nemo kau dabakori. Amo, nembarago, nenda Bajari utuda irira. Ne nunda saramana kakato edo ireva, ava kotise iraetevu!

<sup>2</sup> Banunguse irovo dae resena. A banungareva amo, dubo kote simbuguse, God Afakena aiyakoe sise banungareva.

<sup>3</sup> Aminguse, namanendae sise, eminge banungevu! God nu emboro afigari, namane yama nunda geka a Keriso da Bino, giti nune kivo edo ghusira ava, namane vironu saoro dae sedo, banungevu! Na ainda Bino ava vironu sisena aindae sedo, na diburada fitero irena.

<sup>4</sup> Na nange nange vironu saetena aindae, banungevu! Na vironu sise, geka isagha beká ijugururono, evetu genembo kasama e gogoghombaoro dae sedo banungevu!

<sup>5</sup> Evetu genembo God jo tumondae irera, ava tambareva amo, edo gido, God goroto ningiava mutarira ainda sifo aminda, evetu genembo ainde dabade geka sareva. Dubo kotise, geka se gogoghombareva.

<sup>6</sup> Aminguse, geka evevago a duroghae avanembo sareva. Aminguse, geka da susu kasama ari dae ategi arera amo, ne mino eveva a dambu sareva.

*4:7-18 Paul Evetu Genembo Mendeni Ategi Edo, Geka Tano Usira.*

<sup>7-8</sup> Namondeda namendi Tychicus ava, na dubo ererurena. Nu saramana e gogoghombuse, nangae dabade Bajari da aghi kakato edo irera. Na nu tumonderaena. Nu dirigaono yama, nanda irari kau mavega ava sirurari ningareva. Namane nange eraera ava, sari ningi ivuga aovo dae sedo, nu dirigaono nemokena yarira.

<sup>9</sup> Numo karonare dae sedo, Onesimus dirigaono nengae yarera. Na numbarago dubo ruruse tumonderaena. Nu nenda eniri; nu nemokena ghedo fusira. Nengae yama nemokena buvudo, namanenda irari ava nene se gogoghombaoro ningareva.

<sup>10</sup> Aristarchus nangae diburada irera. Nu, ne ategi beká ava erira. Yari budo givu!

Barnabas da ghatto Mark barago, ne ategi erira. Namane anakora

nundae gembero iri tege gosusevu. Nu ya nemokena buvarira amo, nati joká dedo, bu tavo e gogoghombareva! Yari budo givu!

<sup>11</sup> Joshua (o Justus seraera) numbarago, ne ategi erira. Yari budo givu! Namane eminda irise evetu genembo, God da natofo aoro dae sedo aghi eraera ainda jokáda, gegenembo etodaba naká setena amo, namane Jusi embori. Ne na sonembe gogoghombaera.

<sup>12</sup> Epaphras barago nemokena ghedo fira, Iesu Keriso da saramana kato edo irira, nune ne ategi erira. Nu fakina beká ava use, dubo futuse nendae banunguse irira. God ne sonembururari, numo tumonduse a nunda uju ava itatamedo, amingaovo dae sise banungeraira. A God da evevetu a gegenembo beká edo, fete gogoghombaovo dae sise banungeraira.

<sup>13</sup> Kotugo, nu saramana iri na tofo ditiimi gido, aindae resena. Nu Leodisia embodae, Hierapoles embodae, a ne reighi Kolosi aminda ireva, nendae sedo janjagu use irira. Yari budo givu!

<sup>14</sup> Dogeta (Doctor) Luke mo, namane nu dubo buraera aimi, ne ategi erira. Yari budo givu! Demas barago ne ategi erira. Yari budo givu!

<sup>15</sup> Namondeda nano namendi reighi Leodisia aminda irera ava, ategi erera. Sevu ningore! Nympha a namondeda nano namendi nunda kamboda totorugedo banungeraera, nembarago ategi erera. Sevu ningore!

<sup>16</sup> Reta emo tegevu, dadabari gido, mutuvu sembi yari, Iesu tumondari+embo Leodisia aminda nembarago tege gaore! A Leodisia embo nemokena reta mutarera ava, nene bu tegovo dae resena. Yari budo givu!

<sup>17</sup> Archippus sevu ningare: Bajari saramana rea are dae sisira, ava dadabare!

<sup>18</sup> Nenda ategi emo, na Paul nanda ungoi eregefena, givu! Na diburada

irena emo, erá kotae eove! God da  
sonemba nemokena irare!  
Averi, nanda geka tano eviri.  
Na Paul.

## Paul Nunda Reta Gitida, Tesalonaika Embokena Gefusira, Amo Eviri.

Paul reighi Tesalonaika aminda vironu sedo ainda amboda, nu eredo ira reighi Corinth aminda irise, reta evia gefusira. Amo avose, ghaeko 52 A.D. ainda jokáda gefusira. Bajari nange jovereghe furarira aindae, ne manamana etero gido, Paul reta evia gefusira.

*Paul Nunda Reta Gitida Tesalonaika Embokena Gefusira, Ainda Mendo Mendo Mo Eviri.*

1:1 Paul ne ategi usira.

1:2–3:13 Paul nenda tumondari a irari ava gosuse, ivuga use sakai sisira.

4:1-12 Ari eveva aoro dae sise, Paul dengoro indudusira.

4:13–5:11 Bajari jovereghe furari da sifo aminda rea sirorarira, aindae Paul sisira.

5:12–5:28 Tesalonaika embo nange fakina edo, Bajari da furari sifo kaifa aetera ainda geka sedo, Paul ne ategi edo, tano usira.

<sup>1</sup> Arie, nanda nano namendi! Namane Paul, Silas, a Timothy de dabade ne ategi erera. Ne reighi Tesalonaika aminda irise, God Afa a Bajari Iesu Keriso da ekaresia+ edo ireva ava, namane ne ategi beká ava erera. Sonemba a dubo jama nemokena irare! Yari budo givu!

*1:2-10 Tesalonaika Embo Ne God Tumonduse, Nunda Uju Ava Edo Ghuseri.*

<sup>2</sup> Namane evovodae nemo kotise, God kena nendae aiyakoe sise irera, a kotugo, nendae benunu sise irera.

<sup>3</sup> Ne God tumonduse, nunda saramana use ireva, aindae namane God kena aiyakoe sise irera. A kotugo, ne God da dubo bari budo natofu sonembuse ireva, a ne fakina edo, Bajari Iesu Keriso tumonduse kaifa use ireva, aindae aiyakoe sise irera.

<sup>4-5</sup> Namane era nemokena buvudo, God da Bino Eveva sisera amo, jo geka vanemboi saeri. Geka amo fak-inaghaeri. God nunda Asisi Kakara mutiri budo, ne kasama e gogoghom-busevu: geka amo geka bekári. Ava gido, namane evia kasama erera. Namanenda nano namendi, God ne dubo ruruse, nunda tofo aovo dae sedo, ne gategusira. Namonde sifo aminda dabade irise, ne namanenda irari ava gosusevu. Namane saramana edo ghusera amo, nene eveva itatamaovo dae sedo, aindae nemo saramana edo ghuseri.

<sup>6</sup> O nemo, namanenda amboda amboda, a Bajari da amboda amboda use iriavu. Ne aindae sedo, dara a mema mindafugo ava itatamusevu. Avata kotugo, Asisi Kakara ivuga muturaira ava budo, ainghae dabade ne namanenda geka ningido tumondusevu.

<sup>7</sup> Aminguse, ekaresia+ mendeni Frovensi Masedonia a Greece aminda irera aikena, ne ijugaboro eveva edo ireva.

<sup>8</sup> Na aminge resena da susu mo eviri. Bajari da Bino nemokena ghedo ivegedo iri, evetu genembo Frovensi Masedonia a Greece aminda irera, aimi nininguseri. Kotugo, jo aminda ainembo ningoro dadabaeri. Ne nange God tumonduseva, ainda bino ava ira reighi isambuda buviri, evetu genembo ningido fakina ruruseri. Ava sedo, nenda bino aindae, namane jo osa sae eraera. Ainda beká mo: evetu genembo anakora nininguseri.

<sup>9</sup> Ne nange namane bu kaifa use, nenda ove kevari ava ighagha e dodo God tumonduseva aindae, natofu isambu osa sise irera. Ne God beká jebuga irira ava tumonduse ireva aindae, osa sise irera.

<sup>10</sup> A ne nange God da Mandi utuda ghe vose furarira ava kaifa use ireva aindae, osa sise irera. Nunda Mandi Iesu resena emo, God nune setiri ambarida ghe jebuge erorusira. A kotugo, Iesu da fakina a sonembaimi, God da janje eko furari dae erira ava,



namonde darigarera.

## 2

*2:1-16 Paul, Silas, A Timothy Reighi Tesalonaika Isera Amo, Ne Jo Totofo Nenda Bino Aindae Sedo Yaeri.*

<sup>1</sup> Namanenda nano namendi, ne totofo kasama ereva. Namane nemokena era vironu sisera, ainda beká sirorusira.

<sup>2</sup> Ne kasama ereva. Namane nemokena isera ainda gitida, namane reighi Filipai aminda mema tafuseri. Gitofuimi namanekena mema futuse, namanendae aji siseri. A nenda reighi Tesalonaika aminda barago, evetu genembo digari namane bureguseri. Avata God sonembetiri namane fakina edo, Bino Eveva numokena ghedo foa gheraira ava, osa sari dae jo oju ae useri.

<sup>3</sup> Eregoseva! Namane jo totofo dedeuse, evetu genembokena aghi ae eraera. O namane jo fisi da uju ava use, natofo derari dae sedo, amingae eraera.

<sup>4</sup> Namane nunda Bino Eveva sarikena mo inonori. Ava sedo, God nunda Bino Eveva ava namane osa saore dae sedo futusira. Aindae sedo, namane God da uju ava use, nunda Bino Eveva ava osa seraera. God namondeda dubo joká ijujeraira, ava kasama erera. Ava sedo, namane jo evetu genembo ivuga aoro dae sedo, vironu sae eraera. Namane, God ivuga are dae sedo, vironu seraera.

<sup>5</sup> God da dombuda eminge resera. Ne kasama ereva, jo namane tumondaovo dae sedo, vivi udo yaeri. O namane jo nenda roera ava dighighi edo bari dae sedo, ne jo deraeri.

<sup>6</sup> Ne namanendae sakai saovo dae sedo, jo reju eni ae useri. A kotugo, evetu genembo mendeniimi namanendae sakai saoro dae sedo, jo reju eni ae useri.

<sup>7</sup> Namane Keriso da aghi kakatori. Ava sedo, namane nunda javoda nemokena, roera eni mutovo bari dae benunu saetera avata, namane jo benunu saeri. Namane, kau aya

nunda kokoi unduse geka robogho aimi sise, sainghiako kaifa eraira aminga ava, nemokena useri.

<sup>8</sup> Namane ne dubo bu gogoghombusera ava sedo, namane jo God da Bino Eveva avanembo nemokena mutae useri. Namane ne dubo ruruse totofo namanenda jebuga nemokena futuseri.

<sup>9</sup> Namanenda nano namendi, namane nemokena irise, namanenda uvu bayau ombari dae sedo, janjagu use iriara amo erekoteva tano! Erá nenda roera beore dae sise, namane sifo tumba ava saramana edo ghuseri. Aminguse, namane nemokena Bino Eveva God kena ghedo foa gheraira ava, vironu sirureoro ningido ghusevu.

<sup>10</sup> Namane nenda dombuda a God da dombuda resera. Ne mavejo mavejo God tumonduseva aikena, namane dara eni jo ae, geka bekáda bekáda siseri.

<sup>11-12</sup> Kau genembo nunda sasingu beká aikena veka eveva avanembo use irira aminga ava, ne kaifa edo ghuseri. Namane seoro fakina edo ghusevu, a eghovo dedo, ne isambu daba daba bu kaifa edo ghuseri. God nenda irari eveva ava gido, ivuga are dae sedo, a kotugo ne irari eveva ava irovo dae sise, namane ijuggedo ghuseri. God resena emo, nunda natofo aovo dae sedo a nunda duro ava gaovo dae sedo, ne aghi eraira.

<sup>13</sup> A namane sifo ghousa, God kena aiyakoe sise irera da susu eni mo, eviri. Namane God da vironu ava budo, nemokena era setero ningido eminge kotisevu, "Geka emo, jo evetu genembo da geka iraeri; geka emo, God da Gekari," ava kotise, ne ningido bu gogoghombusevu. A kotugo, geka bekári: geka amo, God da Gekari. God resena emo, nu tofo mandi, ne tumondari embo ainda dubo jokáda saramana eraira.

<sup>14</sup> Namanenda nano namendi, Frovensi Judia aminda, rea God da ekaresia+ jokáda a Iesu Keriso da natofokena sirorusira amo, kau daba aminga ava nemokena sirorusira.

Frovensi Judia aminda, Jusi emboimi ekaresia+ da natofokena bouvu futuse, fakarago useri. Kau daba aminga ava, nenda natofo mendeni reighi Tesalonaika aminda ai eredo, nemokena bouvu futuse, fakarago etero mema itatamusevu.

<sup>15-16</sup> Jusi embo resena eimi, nene Bajari Iesu detero ambududurusira, God da feroveta deoro sirivo edo ghuseri, a namane kotugo nene ondiseri. Erá nenda gitofu namanenda geka ningido jebuga beore dae sise, ne namanenda vironu sari ava bureguse, evetu genembo isambukena a God kena gitofu beká useri. Ava gido, God, “Inono etira,” ava sise, nunda janje eko nemokena mutiri itatamuseri.

*2:17–3:13 Paul Nu Yama, Tesalonaika Embo Gari Dae Kotisira.*

<sup>17</sup> Avori, namanenda nano namendi, geka beká mo: ne namonde tofo tofo dubo jokáimi kotise irera. Avata kotugo, namane ne sifo tufako ditiimi jo gae irise, dubo mema useri. Amingedo, nemokena yari kotise aindae, e gido ghuseri.

<sup>18</sup> Oroko na Paul nasuka nane resena. Na nasuka umbu nanjogo nemokena ya gari dae kotiseni! Avata Satan namane buregedo ghusira.

<sup>19-20</sup> Eregoseva, nemo gari dae uju beká ava erera da beká mo, namanenda ivuga da susu nemori. Bajari Iesu jovereghe furari da Sifo aminda, namane susu redae ivuga areri? Kotugo aindae Sifo redae gigitareri? Tuka redae Sifo aminda namanenda javo jighoro erari? Amo, nendae sedo amingarera. Namane Sifo aminda ivuga ururoro duro arira, aindae susu mo: ne God da jebuga budo ireva. Namanenda ivuga a duro ari da susu mo, nemori!

### 3

<sup>1</sup> Ava sedo, namane nemo gari dae sedo, dubo mema ambari eko ava use kotisera jo inono ae usira. Etiri, namane Silas ghae mo, reighi Athens aminda irise,

<sup>2</sup> Timothy dirigaoro yaetira, ava kotiseri. Timothy mo, namondeda nano namendi eniri. Nu namonde dabade God da saramana use, Keriso da Bino Eveva ava vironu seraira. Nemo sonembari, fakina edo tumonde gogoghombaovo dae sedo, namane Timothy dirigetero nemokena isira.

<sup>3</sup> Aindae beká mo: namane uju eraera, ne jo gofae aetevu. Ava kotise, Timothy dirigetero nemokena isira. Ne totofo kasama ereva amo, namonde Iesu da natofo bouvu a mema itatameraera. Amo God da ujuri. Ava sedo, jo darigari da kaugo iraeri.

<sup>4</sup> Namane namonde dabade irise sifo aminda, geka nemokena eminge siseri. Gitofuimi amboda foama, namondekena bouvu futuse fakarago aetera aindae, nemokena osa setero ningusevu. Setero ne ningevogido, aminge sirorusira.

<sup>5</sup> Aindae sedo, nenda tumondari irira, o kau mavega ereva, ava sari ningido kasama ari dae sedo, na Timothy dirigeteno nemokena isira. Erama Satan ya nemokena teredo dereuri gofeóvo, namanenda saramana beká irae eure dae sedo, oju useni.

<sup>6</sup> Avori, Timothy nemokena ghedo sife nembo fira osa eveva setiri ningido, namane ivuga umutari. Nenda tumondari a nenda dubo bari mindafu ava, osa setiri namane ningumutari. Ne namanekena dubo futuse ireva. A kau namane ne gari dae uju use irera aminga ava, ne namane gari dae uju ereva, ava nune simuta.

<sup>7</sup> Namane dara a mema eretafera einda jokáda, nenda tumondari da bino ava ningido, ghamo ferighetiri ivuga erera.

<sup>8</sup> Aindae beká mo: ne Bajari tumonduse fete gogoghombareva amo, namane ningido ghamo asegarera.

<sup>9</sup> Ne rea eraeva, aindae bino ava ningido, namondeda God da dombuda aiyakoe sise irera. Avata namanenda aiyakoe sari mo, jo God da sonemba teria ainghae inono iraeri.

<sup>10</sup> Namane nange yama nemo gido

dabade irise, sonembururoro nenda tumondari inono beká aetira aindae, sifo tumba evia, God kena banunguse irera.

<sup>11</sup> Namondeda God Afa a namondeda Bajari Iesu, namanenda emboro rerebaoro ya nemo gari dae sise banungeraera.

<sup>12</sup> Kau namane ne dubo buraera aminga ava, Bajari ne sonembururari, tofo tofo dubo baovo dae a evetu genembo isambu dubo baovo dae resera.

<sup>13</sup> Namane aminge resera da beká mo: namane uju eraera, namondeda God Afa fakina futururari, Bajari Iesu nunda natofode dabade jovereghe furarira da Sifo aminda, ne fakina edo eveva use, nenda dubo joká seghe simbugedo, ne tofo kakara edo irise, nunda dombuda fete gogoghombaovo dae uju eraera.

## 4

### *4:1-12 God Ivuga Are Dae Sedo, Namonde Emingarera.*

<sup>1</sup> Avori, nanda nano namendi, God ivuga are dae sedo, namonde rejo arera ava, namane ijugetero kasama edo aminguse ireva. Kotugo oroko, Bajari Iesu da javoda, namane dubo isambu futuse, nemokena eminge benunu resera. Namane rea ijugusera ava, e gogoghombaovo dae sise resera.

<sup>2</sup> Ai resira amo, namane Bajari da javoda rea ijugusera, ava ne kasama edo ireva.

<sup>3</sup> God da uju nemokena mo, eviri. Ne numoá kakara use, kusia bagia ava jo ae areva.

<sup>4</sup> Ne isasambu, mave evetu fitareva amo, ne ari eveva a kakara use, nearomanede irareva.

<sup>5</sup> Evetu genembo God da Geka jo ningae eraera aimi, nenda fisi da uju ava use irá gheraera. Ne ari avavaga jo ae areva.

<sup>6</sup> Geka daba ava sise eminge resena: erama fisi da uju ava ari dae use, nenda namendi Kuristini ava dereóvo dubo mema eure! Mave

amingarira amo, Bajari ainda mino mutari itatamarira.

<sup>7</sup> Ainda beká mo: God namonde jo, kombo yagera aoro dae sedo o namondeda nano namendi deroro dae sedo, aghi aeri. Ari eveva use iroro dae sedo, namonde aghi usira.

<sup>8</sup> Ava sedo, ijuga evia mave ighagha arira amo, nu jo evetu genembo da ijuga avanembo ighagha ae arira. Amo, God, Asisi Kakara muturaira, ainda ijuga ava ighagha arira.

<sup>9</sup> Ne nenda nano namendide dabade, tofo tofo dubo baeteva amo, redae sareri? Ainda beká mo: ne nange tofo tofo dubo ruruse irateva ava, God nu tofo mandi ijugetiri gosusevu.

<sup>10</sup> A geke beká mo: nenda nano namendi Frovensi Masedonia aminda dubo buraeva. Kotugo, namanenda nano namendi, ava e gogoghombaovo dae sise, namane nemokena benunu sise irera.

<sup>11</sup> Ne durumugedo irise, geke eveva sise irivu! Erá kokomana da irari ava ijujeove! Nenda ungoi saramana use, uvu bayau tofo ombovo dae sisera, ava sekago resera.

<sup>12</sup> Amingururovo, gitofu foa nenda irari ava gido, nendae sakai sarera. A nenda uvu bayau, jo ya evetu genembo mendenikena benunu se bae areva.

### *4:13-18 Bajari Jovereghe Furarira Amo, Kau Emingori.*

<sup>13</sup> Evetu genembo mendeni emingeraera. Nemokena tumondari tefo ava sedo, nenda mendeni amburaera aindae, sorara use dubo jama jo bae eraera. Erá amingeove! God da natofo ambarera, aikena rejoá sirorarira, ava kasama aovo dae sise, geke itako saoro ningareva.

<sup>14</sup> Namonde eminge tumonderaera: Iesu ambudo, kotugo sekago ambarida ghe jebuge erorusira. Iesu amingusira ava sedo, kau daba aminga ava, God sari evetu genembo Iesu tumondedo ambudo irera, nembarago ambarida ghe jebuge eredo

numokena yama, nemonde dabade jovereghe furarera.

<sup>15</sup> Eregoseva: Bajari tofo mandi rea ijugusira ava, namane nemokena resera. God da natofo mave jebuga iroro Bajari jovereghe furarira amo, ne jo giti vitae arera. God da natofo, ambari embo, ne giti aoro, jebuga embo ambo gayarera.

<sup>16</sup> Ai resira amo: God nu ghogho sise aghi ururari, aneya da giti jighari kori sirurari, God da tavuya fusirurari, Bajari nu tofo mandi utuda ghe vose furarira. Vose fururari, Keriso da natofo, ambari embo, ne giti eredo vitarera.

<sup>17</sup> Ainda amboda, namonde jebuga embo ambo gaedo vitiya dabade tatedo, foroga jokáda Bajari tambarera. Tambudo, evovodae Bajari de dabade irarera.

<sup>18</sup> Geka evia tofo tofo se nininguse dubo jamaghae irivu!

## 5

### *5:1-11 Namonde Bajari Da Furari Sifo Ava Kaifa Use Iraeteri.*

<sup>1</sup> Avata kotugo, nanda nano namendi, Bajari nu sifo reda furarira, o tambuno reda furarira, aindae namane nemokena geke rejo eni jo sae arera.

<sup>2</sup> Ainda beká mo: kau tafasara kato kambo ufena bejari, kambo ainda numamo dudukugharira aminga ava, Bajari da Sifo foa buvari namonde dudukugharera, ava kasama edo ireva.

<sup>3</sup> Evetu genembo mendeni eminge sise irarera, “Oroko sifo eveva, tataya a mema eni tefori,” ne aminge sise iroro, ainda Sifo foa buvarira. Kau evetu eni mandi sasingu fumbari dae itatamuse dudukugheraira aminga ava, Sifo aminda, evetu genembo setena aikena, mema a dara foa buvari ne itatamarera. Amo jo darigari da kaugo iraeri.

<sup>4</sup> Avata namanenda nano namendi, nemo jo tumba da sasingu iraeri. Ne usasa da sasingu edo ireva. Ava sedo, Bajari da Sifo resera evia foa buvarira aindae, jo

dudukughae aetevu. Kau tafasara kato tumbaghae furureari evetu genembo dudukugheraera aminga ava, Bajari furarira. Avata ne jo dudukughae areva.

<sup>5</sup> Ainda susu mo: ne jo tumba jokáda iraeri, ne usasa da sasinguri. A ne ari eveva use ireva. Namonde jo tumba da sasingu iraeri.

<sup>6</sup> Ava sedo, namonde jo, evetu genembo mendeni avise irera, aminga ava jo ae aeteri. Namonde diti fangedo, totofo kaifa use, a simbuguse iraeteri. Kau evetu genembo uvu fakara mindioro jiro birurughuse kotari dadaberaira, ainda kaugo jo ae arera.

<sup>7</sup> Ai resira amo: fase avari a uvu fakara mindoro jiro birurughari amo, evetu genembo tumba jokáda irera, ainda ariri.

<sup>8</sup> O namonde mo, iji a usasa da sasinguri. Ava sedo, namonde totofo dubo kote simbuguse irarera. Ari Ekoghae dabade isoro ari dae sedo, namonde da tumondari a dubo bari, kau bere gajarigedo irarira aimi, namondeda gitofu da goroto gagojuse irarira. A eni mo: namondekena jebuga evovodae irari ava mutarira, aindae gigituse irera. Ari Eko ghae isoro ari dae sedo, kau isoro use jiro gagara eraera avavaga, gigitari aimi bu jighi fetarera.

<sup>9</sup> Ainda beká mo: God namonde jo dari sirivo aoro dae sedo, aghi aeri. Namondeda Bajari Iesu Keriso da fakinaimi, jebuga baoro dae sedo, namonde aghi usira.

<sup>10</sup> Iesu ambududurusira amo, nu namonde dabade irari dae sedo ambududurusira. Nu furarira da Sifoda, namonde ambarera o jebuga irarera amo, namonde dabade irari dae sedo, nu amingusira.

<sup>11</sup> Ava sedo, tofo tofo fakina futuse, sonembuse irovo dae resera. Ne aminguse ireva. Kotugo, aminguse irovo dae sise, resera.

*5:12-28 Paul Nu Dengoro Induduse, Geka Mendeni Sedo Tano Usira.*

12 Avori, nanda nano namendi, evetu genembo mendeni nenda jokáda saramana use irera, ava kakara aovo dae sise resera. Nene kaifa aoro dae a dengoro indoro ningovo dae sedo, Bajari ne gategetiri fefetuseri. Ava sedo, ne kakara aovo dae sise resera.

13 Ne nenda saramana eraera aindae, ne dubo ruruse, a nendae igheghi use iratevu! Geka eni mo: erá tofo tofo beisiga eove!

14 Namane eminge resera. Guka dagaya embo ava, dombuda sevu saramana aore! Oju kakato ava sonembevu fakina aore! Evetu genembo fakina tefo ava sonembareva. Kotugo, evetu genembo avavaga aindae sedo, erá totoi dubo mema use janje ekoko eove!

15 Kaifa ururuvu, erama nenda eni, komana da dara aindae minonde minonde use, ari eko eni komanakena eure! Kotugo, ne sifo ghousa evia, edo gido tofo tofo ari eveva use irareva. Evetu genembo mendenikena barago, ari eveva vanembo use irareva.

16 Sifo ghousa evia, ivuga use irareva!

17 A kotugo, banunguse irareva, jo doyae areva!

18 Roera isasambu ainda jokáda aiyakoe sevu, eveva a eko ainghae dabade! Ainda beká mo: amo God da ujuri. Ne Iesu Keriso de dabade tatiseva aindae sedo, ne amingaovo dae uju erira.

19 Erama Asisi Kakara buregeove!

20 Evetu genembo mendeni feroveta edo God da geka eni sarera ainda geka ava, erá ighagha eove!

21 Avata kotugo, roera isambu ne ijujuse irareva, eveva amo a eko amo, isambu ijujuse irareva. Eveva tambareva amo, bu kaifa evu!

22 O eko furarira amo, gi darigevu!

23 God dubo jama mutari kato aimi, nenda ari ekoko seghe fugari, ne evetu genembo kakarago ari irove! A erama ne ari ekoko eove dae sise, nenda asisi a nenda ghamo joká

nenda tamo ainghae dabade, nune kaifa are! Amingururari, ne eveva a kakara irovo, namondeda Bajari Iesu Keriso jovereghe furarira amo, ne ata fete gogoghombareva.

24 Bajari ne aghi eraira aimi, roera setena amo, nune ari sirorarira. Ainda beká mo: nu rea ari sarira, amo arira.

25 Namanenda nano namendi, namanendae sedo banungareva. Yari budo givu!

26 Nenda nano namendi isambu nati joká doruse ategi<sup>26</sup> e gogoghombevu!

27 Bajari da javoda nemokena eminge resena. Reta emo, nano namendi isambukena tegevu ningore! Yari budo givu!

28 Namondeda Bajari Iesu Keriso da sonemba nemokena irare! Avori, nanda geka tano eviri. Na Paul.

26 5:26: Afige, Romans 16:16 ainda duruda tege garesa.

## Paul Nunda Reta Amboda, Tesalonaika Embokena Gefusira, Amo Eviri.

Paul nunda reta gitida, Tesalonaika embokena gefusira ainda amboda, nu itako kaifa edo, sekago ghaeko daba aminda nemokena gefusira. Bajari anakora jovereghe furariá sise oju usera aindae, nu sekago geka evia gefuse, Bajari da furari Sifo kau mavegori, ava se disugusira.

*Paul Nunda Reta Amboda Tesalonaika Embokena Gefusira, Ainda Mendo Mendo Mo Eviri.*

1:1-2 Paul natofo ategi usira.

1:3-12 Namonde Bajari da javoda mema itatamarera amo, evevari, jo eko iraeri.

2:1-17 God sari, nunda Asisi Kakara enda eminda irira ava darigari, Satan da fakina sekago isagha ari ainda amboda, Bajari jovereghe furarira.

3:1-15 Kuristini da irariri.

3:16-18 Paul ne ategi edo, tano usira.

<sup>1</sup> Arie, nanda nano namendi! Namane Paul, Silas, a Timothy aimi, ne ategi beká ava erera. Ne reighi Tesalonaika aminda God da natofo edo ireva ava, namane ategi roro beká ava erera. Ne Bajari Iesu Keriso de dabade tatedo, God Afa da tofo edo ireva aindae, ne ategi beká ava erera. Yari budo givu!

<sup>2</sup> God Afa a Bajari Iesu Keriso nemokena sonemba a dubo jama mutoro baove!

*1:3-12 Ategi Da Sifo Mo, Kau Emingori.*

<sup>3</sup> Nenda tumondari baji mindafu ari dae erira, a ne tofo tofo dubo bu gogoghombari dae ereva, aindae namane evovodae nemo kotise, God Afakena aiyakoe sise irarera.

<sup>4</sup> Kotugo, namane daba aindae sedo, God da ekaresia+ mendenikena nenda javo jigheoro

ereraira. Ne mema a bouvu itatameraeva, a evetu genembo mendeni nemokena bouvu futuse, fakarago eoro mema itatameraeva ainda jokáda, ne durumugedo tumonduse ireva. Aindae namane nenda javo jigheoro ereraira.

<sup>5-6</sup> Ne mema itatamuse ireva ava namane gido, kasama erera: God da kotari nemokena eveva vanembori. Ainda beká mo: ne mema oroko itatamuse ireva aimi, nemokena fakina futururari, ne inono aovo gido, God nendae 'eveva' sise, sari numokena yama irovo, ne kaifa use irarira. Tuka aindae, ne mema itatamuse ireva. God bekáda bekáda use, evetu genembo oroko nemokena bouvu futuse fakarago eraera aikena, mino use, bouvu futuse fakarago ari, ne mema itatamarera.

<sup>7</sup> Ne mave oroko mema itatamuse ireva ava, nune amboda sari mema dadabari, ne namonde dabade dubo jama barera. Nu amingarira ainda Sifo aminda, Bajari Iesu nunda aneya fakina kakato ainde dabade isagha edo, utuda ghe vose fururoro garera.

<sup>8</sup> Nu avaraka buburaghae budo vose fuama, evetu genembo namondeda Bajari Iesu da Bino Eveva jo ningido ae eraera, a God kasama ari dae jo uju ae eraera aikena, mino eko mutarira.

<sup>9</sup> Ne evovodae ari ekoko da mino mutari vasada irise, Bajari de dabade jo irae arera, a nunda fakina durode ava ne jo gae arera.

<sup>10</sup> Nu Sifo aminda furarira amo, nunda natofo nundae sakai saoro dae sedo, a tumondari embo nunda duro gosuse, nunda javo jigheoro erare dae sedo, furarira. Sifo aminda, nembarago nunda natofo jokáda irareva. Ainda beká mo: ne namanenda vironu ava ningido tumondu-sevu.

<sup>11</sup> Avori, namane eindae sedo banungeraera. God ne jebuga baovo dae sedo aghi usira. Ava sedo, nu nange sonembari, ne inono edo nunda jebuga baeteva aindae, namane banunguse irera. A kotugo, ne tumonduse, saramana rejo ava

eraeva, a ne ari eveva ningiava ari koteraeva ava, sonembururari beká aetira aindae barago, namane banunguse irera.

<sup>12</sup> Avavaga siroruse irarira aimi, ne Bajari Iesu da javo jighovo eroruse irarira. A nu kau daba aminga ava, duro nemokena futuse irarira. Kotugo, amo jo nenda ari da kaugo iraeri. Amo, God a Bajari Iesu Keriso da sonembaimi sirorarira.

## 2

### *2:1-12 Genembo Eko Beká Amboda Isagha Arira, Ainda Kiki Mo Eviri.*

<sup>1-2</sup> Nanda nano namendi, namondeda Bajari Iesu Keriso jovereghe foama, namonde bu dabade tatarira, ainda geke itako sari dae erena. Genembo eni gungubo gefuse, nanda javoda eminge saeti, “Bajari da Sifo anakora fira dadabusira. Nu fira edo isira,” mave kau aminga ava saetira amo, erá ningi dudukughedo tumondeove dae sise resena. O genembo eni feroveta da kaugo edo, avavaga saetira amo, erá nunda geke tumonduse manamana eove dae sise resena. Amo gungubo sarira.

<sup>3</sup> Erá derari avavaga tumondeove! Ainda beká mo: Ari Eko da Giti Jighari eredo isagha ari gido, evetu genembo digari nunda amboda amboda ise, God de dabade isoro ari sarera. Ainda amboda Bajari jovereghe furarira. Ari Eko da Giti Jighari resena emo, God sari nu amboda ambari da mema itatamuse evovodae irarira.

<sup>4</sup> Ove a gode mendeni mendeni evetu genembo tumonde baingheraera ava imboe use, Ari Eko da Giti Jighari resena emo, nenda vasa bari dae sedo, isoro arira. Amo ari ekori. Kotugo ainda amboda, nu God da vasa budo, evetu genembo numoá tumonde bainghaoro dae sedo, God da Tafaroro Kamboda+ teredo anumbarira. Amo ari eko bekári.

<sup>5</sup> Namane namonde dabade irise, ainda geke ava ijugeteno kasama

usevu. Avose, ne geke evia kotise ireva tanojo!

<sup>6</sup> Avavaga jo sirorae irira amo, susudae jo sirorae irira. Ainda susu ava ne kasama ereva. Roera eniimi, Ari Eko da Giti Jighari ainda furari ava bureguse irira. Avori, sifo God nune gategusira ava foa buvari gido, Ari Eko da Giti Jighari amo, nu isagha ari evetu genembo garera.

<sup>7</sup> Oroko mo, Ari Eko amo ufena saramana use irira ava, evetu genembo tomanako jo kasama ae eraera. Avata mave eni oroko Ari Eko bureguse irira setena aimi, do darigari, Ari Eko amo baji mindafu edo isagha arira.

<sup>8</sup> Isagha ururari, Ari Eko da Giti Jighari setena amo, nu isagha edo saramana ururari, Bajari Iesu nu eredo usasaghae dabade jovereghe foama, ghamo aseguise aimi fusari, Ari Eko da Giti Jighariá ambarira.

<sup>9</sup> Avata Iesu jovereghe furarira ainda gitida, Ari Eko da Giti Jighari resena emo, nu emingarira. Nu Satan da fakina budo foama, roera mendeni mendeni ururari, evetu genembo ne jo gae iriara ava, nenda gitida sirorari gido dudukugarera. A numo tumondaoro dae sedo, gungubo da tano mendeni mendeni ava ijugururari garera.

<sup>10</sup> A evetu genembo sirivo ari embo amo, nunda ari sembaeimi dedeururari, nunda amboda amboda ise sirivo arera. Kotugo evetu genembo resena e sirivo arera ainda beká mo, eviri: ne geke beká ningido ghusera avata, ne geke beká ava jo tumonduse, ivugaghae baeri. Ava sedo, ne jebuga jo bae arera.

<sup>11</sup> Ne geke beká jo tumondaed edo ghuseri. Aindae sedo, God evetu genembo amo, gungubo tumondaore dae sedo derari da ungodá fifiterira.

<sup>12</sup> Nu aindae sedo sari, evetu genembo mave geke beká jo tumondaed use, ari ekoko ari dae sedo ivuga edo ghusera amo, ne ainda bouvu ava itatamarera.

*2:13-17 Namonde Fakina Edo, God*

*da Geka Jighi Gogoghombuse Ireore!*

<sup>13</sup> Avori, namanenda nano namendi, Bajari ne dubo buraira. Giti tuturoda, ne geka beká tumonduse, jebuga evovodae irari ava baovo dae sedo, God ne gategusira. A kau daba aminga ava, nunda Asisi aimi sonembururari, nunda natofo kakara ava edo irovo dae sedo, ne gategusira. Aindae sedo, namane evovodae God Afakena, nenda aiyakoe sise irarera.

<sup>14</sup> Namondeda Bajari Iesu Keriso nunda usasa ghaseraira, ava nenda boanda baovo dae sedo, namane nunda Bino Eveva ava vironu sero, God ne aghi usira.

<sup>15</sup> Ava sedo, nanda nano namendi, namane reta gefuse o vironu sise, ijuga rea futusera ava, bu jighirovo dae sise resera. Fakina edo, bu jighirovo dae sise resera.

<sup>16</sup> God Afa namonde dubo budo sonembuse, evovodae tumo fainghaoro dae sedo, fakina futusira. A rea setiri namonde tumonderaera amo, jo gungubo iraeri. Beká siroraira ava, tumondedo gigituse irera.

<sup>17</sup> God daba aimi a namondeda Bajari Iesu Keriso ghae dabade, fakina nemokena mutore! Tumo fainghedo ari eveva aovo dae sedo, kotugo geka eveva avanembo saovo dae sedo, fakina nemokena mutore!

**3***3:1-5 Tesalonaika Embo Paul Nenda Banungaoro dae, Sisira.*

<sup>1</sup> Avori, nanda nano namendi, namane geka tano eminda dotutuse, eminge resera. Namanendae banungevu! Kau nemokena sirorusira aminga ava, Bajari da Geka nange ivegedo ya buvari, evetu genembo mendeni ningi tumondedo, geka rea resira ava, kakara use amingaetera aindae sedo, banungevu!

<sup>2</sup> Eni mo: erá evetu genembo sembae a ari ekoko emboimi namane deore dae sise, banungevu! Aminge banungaeteva da susu mo: evetu genembo mendeni namanenda geka jo ningi tumondae eraera.

<sup>3</sup> Avata Bajari nu inonori. Ne Bajari tumondururovo, nu sifo ghousa sonembururari irareva. Nune sonembururari ne fakina edo, Satan da fakina ava darigareva.

<sup>4</sup> Ne amingareva ava, Bajari anakora ijugetiri namane kasama erera. Ne namanenda sari ava ningido eraeva a aminguse irareva ava, namane tumonderera.

<sup>5</sup> Bajari sonembuse nunda dubo bari futururari, nenda dubo jokáimi itatamuse kasama use irove! A kotugo, Keriso sonembururari, nu nange durumuguse ambududurusira ava, nenda dubo jokáimi itatamuse irove!

*3:6-15 Namonde Saramana Jo Imboe Ae Arera.*

<sup>6</sup> Nanda nano namendi, namane Bajari Iesu Keriso da javoda eminge resera. Mave guka dagaya edo irira, a mave namanenda geka jo ningae eraira, ainde dabade erá umo use deingheove!

<sup>7</sup> Namonde dabade irise, namane nange nange edo ghusera ava, ne totofo kasama ereva. Namane jo saramana imboe ae edo ghuseri. Ne kau daba aminga ava use irivu!

<sup>8</sup> Erama namanendae bouvu fumbeove dae sise, namane sifo tumba evia inono, saramana mendeni mendeni use moni ruruseri. Aminguse, namane nenda uvu bayau jo tefo bu mindaeri, mino futuse ruruseri.

<sup>9</sup> Avata namane mo, nemo sonembari dae sedo iseri. Ava sedo, uvu bayau tefo benunu se baetera ábarago, eveva aeti. Avata namane jo amingae edo ghusera da beká mo, eviri. Namane nemokena ijugaboro ari dae sedo, saramana amingedo ghuseri.

<sup>10</sup> Namane namonde dabade irise, eminge sedo ghuseri, “Mave saramana imboe arira amo, era bayau muteóvo mindeure!”

<sup>11</sup> Namane oroko sekago geka daba ava resera da beká mo, eviri. Namanekena eminge seoro ningiraera, “Nenda mendeni guka dagaya edo,



tefo anumbirise o emboroda de-  
inghuse, komana da irari ava un-  
ongu seraera.”

<sup>12</sup> Avori, Bajari Iesu Keriso da  
javoda, namane evetu genembo  
avavaga nemokena kovionoghae  
resera, ningivu! Nenda irari sim-  
bugedo, saramana use nenda uvu  
bayau totofo ombuvu!

<sup>13</sup> Nanda nano namendi, eminge  
resera. Ari eveva ari dae use, erá  
imboe eove!

<sup>14</sup> Evetu genembo daba daba na-  
manenda geka evia jo ningae ar-  
era tanojo. Mave amingarira amo,  
dovu nusuka fetedo meka gare!  
Erá nemonde dabade umo use de-  
ingheove!

<sup>15</sup> Avata ne jo numokena gitofu  
da kaugo ae areva. Nu nenda na-  
mendiri. Ava sedo, nunda dara go-  
suse sonembari dae sedo, dengoro  
indareva. Amingaovo gido, nu dubo  
joveregharira.

*3:16-18 Paul Evetu Genembo Ategi  
Edo, Tano Usira.*

<sup>16</sup> Bajari nu tofo namondeda dubo  
jama da susuri. Ne dara rea tam-  
bareva ainda jokáda, nunda dubo  
jama ava evovodae futururari, ru-  
ruse irove! Kotugo nu tofo nemo-  
kena irare!

<sup>17</sup> Avori, givu! Na oroko nanda  
ungoimi gefuse, nemo ategi erena.  
Na Paul ri. Na reta gemburaena  
amo, nanda javo eminge gembu-  
raena. Yari budo givu!

<sup>18</sup> Namondeda Bajari Iesu Keriso  
sonemba nemokena mutare!  
Avori, nanda geka tano eviri.  
Na Paul.

## Paul Nunda Reta Gitida, Timothy Kena Gefusira, Amo Eviri.

Timothy noi mo, Jusi embori. O numamo mo, Jusi embo da gitofu Greek embori. Paul Iesu dae vironu setiri ningido, Timothy nu tumondedo bafataito usira. Etiri gido, Paul nu Timothy bu kaifa use, nunda mandidae rurusira. Nunda reta gitida Timothy kena gefusira amo, nu jo diburada irise gambaeri. O nunda reta amboda gefusira amo, nu diburada irise gefusira.

Avori, evetu genembo mendeni erekotera, Paul nu umbu dabako Rome aminda dibura usira. O evetu genembo mendeni erekotera amo, nu umbu etoto naká Rome aminda dibura usira. Nu umbu dabako dibura ari ava beká iratira amo, nu avose, ghaeko 64 A.D. ainda jokáda, nunda reta gitida Timothy kena gefusira. O nu umbu etoto naká dibura ari ava beká iratira amo, nu giti dibura usira ainda amboda, isaghada irise, avose, ghaeko 66 A.D. ainda jokáda gefusira.

Timothy mo, kau fristi+ o Iesu tumondari+ embo da bajari aminga ava use, ekaresia+ mendeni da giti jighido ghusira. Aindae sedo, Paul nu ekaresia+ da irari a saramana ainda geke mendeni mendeni Timothy kena gefusira.

*Paul Nunda Reta Gitida Timothy Kena Gefusira, Ainda Mendo Mendo Mo Eviri.*

1:1-2 Paul Timothy ategi usira.

1:3-20 Timothy nange God da Geka a ijuga beká avanembo ijugaetira aindae, Paul dengoro indudusira.

2:1-15 Kuristini nange God tumonde bainghari da aito ava edo ghaeteri.

3:1-16 Namonde, Iesu tumondari+ embo da babojegari a ogababada gategarera amo,

nenda irari aminda gosuse gategarera.

4:1—6:21 Timothy rea aetira, a nange ekaresia+ kaifa aetira, a kotugo ari rejo ava ighagha use imboe aetira, aindae Paul sisira.

1-2 Arie nanda mandi! Na Paul, ni roro ategi beká ava erena. Yari budo gi!

God namondeda Sonemba Kato, a Iesu Keriso setero, na nenda aghi kato edo irena. Iesu resena, nunda sonemba amboda barera aindae gigituse irera, aindae resena. Yari budo gi!

Timothy, ni kasama eresa, nimo, nane ena vironu seteno ningido tumonduse, kau nanda mandi avaga usesi. God Afa a nangaeda Bajari Iesu Keriso nindae joka edo, sonemba a dubo jama mutoro base!

*1:3-11 Namonde Ijuga Dombu Eni Dombu Eni Ava Nininguse Ijujedo, Eveva Vanembo Tumondaore!*

<sup>3</sup> Na Frovensi Masedonia aminda ise, rea nimokena sisena, kau daba ava, sekago sari dae erena. reighi Efesas aminda irise kaifa aso dae resena! Evetu genembo mendeni ijuga sembae ava, vironu sise ijugeraera. Ava saso doyoro dae sedo, ni aminda iraso dae uju erena.

<sup>4</sup> Evetu genembo resena emo, ne kiki gungubo mendeni mendeni se nininguse, aneya da javo kotugo nombuamane da javo tegutuse irá gheraera; jo itako doyae eraera. Amo saso doyarera. Ainda beká mo: ne tefo geke gungubo ava sise a manaka garuse, beisiga use jebuga eni jo tambae eraera. O God da uju mo: ne ainda geke dodo, emboro numokena ava ijugururoro, evetu genembo mendeni foa tumondedo God da sasingu aeteri.

<sup>5</sup> Na aminge resena da beká mo: na, God da natofu aminda irera, nenda ghamo derono erari ne dubo joká simbugedo nenda ari ekoko vujegedo tumonde gogoghombarerera. Aminguse, ne tofo tofo dubo ruruse irarerera.

<sup>6</sup> Eregosesa, evetu genembo mendeni ari avavaga dotutuse, emboro+ beká kosasaghedo, tefo geka vanembo seraera. Geka seraera, aında beká eni tefori.

<sup>7</sup> Evetu genembo aında uju mo eviri. Ne God da Agho Dari aında ijuga kakato edo fetaeteri. Ne eredo, geka vironu kovionoghae seraera. Avata ne rejodae seraera amo, ne jo kasama use sae eraera, a geka da tuka barago jo kasama e gogoghombae eraera.

<sup>8</sup> Kotugo, nangae kasama erera, God da Agho Dari mo evevari. Avata namonde jo Agho Dari ava budo aimi, namondeda ujuda geka ava sonembae arera.

<sup>9</sup> Namonde evovodae geka evia kotise irarera, God nunda Agho Dari jo evetu genembo eveva aında sedo mutae usira. Nunda Agho Dari evetu genembo ekoko dae futusira. Evetu genembo agho dari kotae use gogore eraera, evetu genembo God kotae use ari ekoko eraera, evetu genembo mave God da jebuga a asisi da jebuga jo kotae eraera, aında sedo, God nunda Agho Dari futusira. Evetu genembo mave noi numamo o evetu genembo mendeni deoro amburaera o jigheoro amburaera,

<sup>10</sup> evetu genembo kombo yagera eraera o sino fukade dabade kombo yaru eraera aında sedo, God nunda Agho Dari futusira. Evetu genembo mave kokomana sandi bundedo bu ya moni dae oriro eraera, gungubo kakato, evetu genembo mave komana sonembari dae sedo o moni bari dae sedo, koto use aında jokáda gungubo seraera, a evetu genembo mave ijuga beká ava buregeraera aında sedo, God nunda Agho Dari futusira.

<sup>11</sup> Ijuga beká resena emo, Bino Eveva durode, God futusira aında resena. God numo beká, sakai seraera aimi setiri na Bino Eveva aında aghi kato edo irena.

*1:12-20 Paul Bajari Da Joka Ari Ava Itatamuse, Numokena Aiyakoe Sisira.*

<sup>12</sup> Ava aono dae sedo, namondeda Bajari Iesu Keriso fakina futusira aında, na numokena aiyakoe sise irena. Nu nanda irari a fakina ijujuse, na tumondedo, nunda saramana kato aono dae sedo, gategusira.

<sup>13</sup> Giti, na nunda javo eko use, nunda natofokena fakarago use, a nundae aji sise iriani. Avata kotugo, amo na bunise, Iesu jo tumondae use amingedo ghusena aında, God nandae joka usira.

<sup>14</sup> Aminguse, namondeda Bajari nunda sonemba tomanako namokena futusira. Kau nu Iesu Keriso da natofo isambukena eraira aminga ava, tumondari a dubo bari numokena ghedo foa gheraira ava, nune mutiri ruruseni.

<sup>15</sup> Geka sari dae erena emo, geka beká vanembari. Jo mave manamana use bunari da kaugo iraeri. Iesu Keriso nu ari ekoko embo sonembari jebuga baoro dae sedo futusira. A ari ekoko embo resena aında jokáda, eni jo namongo iraeri. Namu, eko beká ava edo ghuseni.

<sup>16</sup> Kotugo na, evetu genembo ari ekoko rea eraera amo, na teriago edo ghuseni. Avata God nandae joka usira. Joka usira amo, Iesu Keriso durumugedo, namokena robogho ai use sonembusira. Amingusira da susu mo: evetu genembo mave amboda Iesu Keriso tumondarera amo, ne evia kasama aeteri. Kau Iesu namokena durumuguse robogho ai use sonembusira aminga ava, ne nune sonembururari jebuga evovodae irari ava barera.

<sup>17</sup> Ava sedo, namonde God kakara use nunda duro aında sakai saore! Nu namondeda kiniri. Nu irei, irira, a evovodae irarira. Nu God bekári, eni numongo tefori. A numo jo ditiimi gari da kaugo iraeri. Numokena evovodae sakai sise irore! Ai, bekári!

+

<sup>18-19</sup> Timothy, nanda mandi, na oroko sari dae erena emo, jo geka seka iraeri. God da feroveta eni anakora geka vironu sise, ni nan-gaetesa, ava sisira. Geka sisira amo,

kaifa e gogoghombuse, ninda dubo jokái simbugedo Bajari tumonduse, nunda javodae isoro aresa. Evetu genembo mendeni nenda dubo joká, jo kaifa esimbuge gogoghombae edo ghuseri. Aimi nenda tumondari bebeta etero sembae usira.

<sup>20</sup> Evetu genembo resena, nenda mendeni mo, Hymenaeus nengae Alexander ghaeri. Ne God da javo jo eko ae arera ava kasama edo doyoro dae sedo, na etoto naká amo, Satan da ungodá fiteno irera.

## 2

### *2:1-15 Tumonde Bainghari Da Kau Mo Emingori!*

<sup>1</sup> Avori, giti na eminge resena. Na uju erena amo, namonde evetu genembo isambudae banungaeteri. Nendae sedo, namonde God Afakena benunu sarera, banungarera, a aiyakoe sarera.

<sup>2</sup> Kau daba aminga ava, namonde durumugedo irise, a God kotise, veka eveva avanembo ari dae sedo, namondeda kini (king) a kokotofu gavana da saramana kaifa eraera ava kotise, banunguse irarera.

<sup>3</sup> Amo irari evevari. Namonde amingarera amo, namondeda Sonemba Kato God nu ivuga arira.

<sup>4</sup> God nunda uju mo, evetu genembo isambu geka beká da susu ava kasama edo, jebuga evovodae irari ava tuve baeteri.

<sup>5-6</sup> Geka beká resena amo eviri. God nu dabakori, eni numongo tefori. A emboro+ dabako tainako God kena aira buvudo irira ava, genemboi afigusira. Amo, na Iesu Keriso dae resena. Nu namonde evetu genembo isambu God de dabade tatoro dae sedo, tofo mandi futuse ambududurusira. God sifo gategusira aminda, Iesu namondeda ari ekoko da mino futusira. Mutiri gido, namonde kasama useri; God nunda jebuga evovodae irari isambukena mutari uju eraira.

<sup>7</sup> Ainda bino, tumondari a geka beká da bino, ava saono dae sedo, God na gategusira. Gategedo, nanda

natofu Jusi embo da gitofu ava, aghi edo ijugaono dae sedo, na dirigetiri nemokena iseni. Emo, na geka beká resena. Na jo gungubo saeri.

<sup>8</sup> Avori, na uju erena amo, gegenembo reighi isambuda janje ekoko a beisiga jo ae irise, ne dubo joká isambu mutudo tumonde bainghuse, nenda ungo jighoro erorurari banunguse irarera.

<sup>9</sup> Avori, nanda uju evia, evevetukena sari dae erena. Ne embo avi simbuguse deingharera. Ne jo nenda tamo gogho ari dae o embo bokadae sise, moni teria futo fugae arera. A erá evetu genembo nemoá sakai seore dae sise, ne sifo ghousa evia tamo a beo jo simbuguse irae arera.

<sup>10</sup> Ainda tuka mo: evevetu God da natofu edo irera amo, nenda duro jo embo boka o gogho iraeri. Ne ari eveva ururoro, nenda duro ava isagha ari, evetu genembo fuge gaore!

<sup>11</sup> Evevetu ne tumo darido beka dodo irise, ijuga ningaeteri.

<sup>12</sup> Na eminge sise seraena. Evetu eniimi jo eredo, gegenembo dengoro indae arira, o gegenembo da giti jighari jo nune ae arira. Evevetu ne beka dodo iraeteri!

<sup>13</sup> Ainda beká mo: God setiri, Adam giti sirorusira, a Eve amboda sirorusira.

<sup>14</sup> A eni mo: Adam nu jo giti dara aeri. Giti mo, Satan Eve deretiri, ari eko nune etiri sirorusira.

<sup>15</sup> Avata kotugo, evevetu robogho ai sise, tumonduse, dubo ruruse, irari kakarago ava use irarera, a kotae kotae jo ae arera. Amingarera amo, ne mandi sasingu fufuse jebugarera.

## 3

### *3:1-7 Iesu Tumondari+ Embo Da Giti Jighari Eminguse Iraeteri.*

<sup>1</sup> Geka emo geka bekári. Mave ekaresia+ da giti jighari<sup>1</sup> ari dae uju arira amo, evevari. Amo saramana bouvu a evevatori.

<sup>2</sup> Ekaresia da giti jighari resena emo, nu ari eko eni jo ari sirorae arira, a evetu dabako fitido irarira. Nunda fisi da uju ava bureguse dubo kotise, durumugedo irarira. Esa embo foa gheraera ava, nati joká dedo bu tavo arira. Nu dengoro indarikená inono arira.

<sup>3</sup> Nu jo uvu fakara teria mindari jiro birurughae arira. Nu jo tataya kato ae arira; durumuguse irarira. Nu monidae jo dighighi ae arira.

<sup>4</sup> Nunda evetu a mandi sasingu evevada kaifa tavo ururari, ne numoá kakara use nunda geka ningarera.

<sup>5</sup> Aında beká mo: genembo mave nunda evetu a nunda mandi sasingu jo kaifa e gogoghombuse, emboro eveva ijugae arira amo, nu nange God da ekaresia+ kaifa ari?

<sup>6</sup> Genembo sife nembo dubo jovereghedo, God da mandi usira ava, saramana resena emo, jo nune bari da kaugo iraeri. Erama nu gogore urureuri, God nu imboe edo ighagha eure dae sise resena. Eregosesa: Satan nu amingetiri, God nu ighagha usira.

<sup>7</sup> Geka eni mo: genembo giti jighare dae sedo gategarera amo, genembo eveva eni, ava gategarera. Genembo resena amo, evetu genembo God da natofo jo ae irera aimi tumonderaera, ava gategarera. Aında tuka mo: genembo avavaga jo totoi Satan da vaghoda teredo gofae arira.

### *3:8-13 Iesu Tumondari+ Embo Da Babojegari, Ne Kau Eminguse Iraeteri.*

<sup>1</sup> **3:1:** 1 Timothy 3:1-13 eminda, kotugo Titus 1:5-9 aminda, Paul Greek embo da geka isambu etodaba naká: *episkopos* (1Ti 3:1-7, Tit 1:7-9), *diakonos* (1Ti 3:8-12), *presbyterion* (Tit 1:5-6) gefuse, nenda saramana a nenda irari da geka se disugusira. Evetu genembo mendeni erekotera amo, geka etodaba naká aında tuka mo, jo nunda nunda beká iraeri. Inono namonde sifo eni *bajari* sedo, sifo eni *giti jighari* seraera. O mendeni, *episkopos* ekaresia 'church' etoto o etodaba naká kaifa ariá seraera. Kotugo *presbyterion* nengae *diakonos* ekaresia dabako jokáda *episkopos* da duruda saramana ariá seraera.

<sup>8</sup> Ekaresia+ da babojegari, ne kau daba aminga ava use iraeteri. Ne veka eveva avanembo use, geka gungubo jo sae arera. Ne vaini (wine) teria jo mindoro jiro birurughae arira. Ne dighighi jo ae arera.

<sup>9</sup> Ne dubo joká simbugedo a dubo isambu futuse, God nunda kotari mendeni giti jungedo amboda afigusira, ava tumonduse irarera.

<sup>10</sup> Nenda irari ava giti ijuje gogoghombedo, amboda saoro saramana amo nene barera.

<sup>11</sup> Kau daba aminga ava, nenda evevetu barago, veka eveva vanembo use irarera. Ne jo unongu sae arera. Ne fisi da uju ava bureguse irarera. A nenda kokomana jo derae arera.

<sup>12</sup> Genembo ogabada arira amo, nu evetu dabako fitido irarira. Nunda evetu a mandi sasingu kaifa e gogoghombururari, nunda geka ningarera.

<sup>13</sup> Gegenembo mave ogabada da saramana egogoghombarera amo, nenda bino teria ari, ne fakina edo, Iesu Keriso tumonderaera ava, osa sarera.

### *3:14-16 Namondeda Tumondari Da Susu Mo, Iesu Numori.*

<sup>14</sup> Na ya nimo gaetena ava kotise irena. Avata ijuga evia eregefena, aında beká mo:

<sup>15</sup> rejo eniimi na buregari fetarena amo, ekaresia+ nange iratira aında ni jo manamana ae aresa. Namonde, God jebuga irira, aında natofo jokáda nange iratera ava, reta evia tegutuse kasama aresa. God da natofo resena emo, nunda ekaresiadae resena. Kau tutumbiimi kambo da bouvu fumburaira aminga ava, ekaresiaini God da geka beká ava bu jighirise kaifa eraera.

16 A namondeda tumondari da susu, God giti jungetiri ireira amo, teriari. Amo jo ighagha use bunari da kaugo iraeri. Amo Keriso numori. Nu genembo da tamo budo, enda eminda sirorusira. Etiri, nunda geka beká a nunda ari dambu beká, ava God da Asisi-imi ijugetiri kasama useri. Nu endada iriri, aneya ne gosuseri. A nunda bino ivegedo iri, osa setero enda da oro oro isasambui nininguseri. Enda eminda, evetu genembo digarigo numoá tumonduseri, a God setiri nu sekago utuda vitira, nunda duro budo, aminda anumbusira.

## 4

*4:1-5 Ijuga Sembae Sirorarira Aindae, Namonde Jo Bunae Arera.*

<sup>1</sup> God da Asisi isagha beká eminge resira. Sifo amboda, evetu genembo mendeni namondeda tumondari ava, nene ighagha edo doyarera. Dodo, ne asisi derari kakato ainda geka ningido, sukaru da ijuga ainda amboda amboda udo yarera.

<sup>2</sup> Ijuga amo, evetu genembo gungubo kakato mendeniimi bu foa dedeuse ijugarera. Gungubo kakato resena, ainda dubo joká anakora ari ekokoimi bundetiri irera.

<sup>3</sup> Evetu genembo amo, ne eminge ijugeraera. Gimasa irise, jo evetu fitae aresa, a ade irise, jo genembo-kena vai ae aresa. A bayau dombu eni dombu eni kanangara aresa, ava nene ijugeraera. Avata God da uju mo: namonde mave numo tumonduse, geka beká kasama edo irira aimi, nu taká banunguse aiyakoe sise, bayau avavaga mindarira.

<sup>4</sup> Ainda beká mo: God roera eveva vanembo etiri sirorusira. Jo imboe use doyarari da kaugo iraeri. Namonde taká banunguse aiyakoe sise mindido gheteri.

<sup>5</sup> Ainda beká mo: God da Geka ainda fakinaimi banunguse esimbugaoro, God da dombuda bayau amo, kakara ari mindarera.

*4:6-16 Timothy Saramana Nange Aetira, Aindae Paul Dengoro Indudusira.*

<sup>6</sup> Ni geka ava nangaeda nano namendikena ijuguse iraresa amo, ni Iesu Keriso da aghi kato ainda saramana beká ava use iraresa. Ni tofo geka eveva tumonduse, ijuga eveva ainda amboda amboda udo yaresa amo, ni God da aghi kato eveva aresa.

<sup>7</sup> Avata nombuamane da kiki sembae se ningiraera ava, tuturoda setena amo, sino fuka da kikiri. Ava erá kotae kotae sumbu etoda viteose dae sise resena. Amo jo God da Geka iraeri. Nimo, God da uju ava ari dae sedo, gasegi use iraresa.

<sup>8</sup> Tamo da gasegi ari mo, itako evevari. O God da uju ava ari dae sedo, gasegi ari mo eveva bekári. Ainda beká mo: God da uju ava ari dae sedo, gasegi arera amo, namonde oroko jebuga eveva tuve barera. Kotugo jebuga daba ava amboda tuve barera.

<sup>9</sup> Geka resena emo, geka bekári. Ava tumondaresa amo, ni jo gofae aresa.

<sup>10</sup> God namonde gigituse tumonderaera amo, nu jebuga irira. Nu evetu genembo isambu da Sonemba Katori. Avata mokogo mo, nu namonde tumondari embo da Sonemba Katori. Namonde aindae sise, janjagu use saramana eraera.

<sup>11</sup> Geka amo ijuguse, amingaoro dae sise saresa.

<sup>12</sup> Ni genembo sekari. Ava sedo, erama doyeoso, natofo ni buneore dae sise resena. Ni giti jijighururaso, ekaresia+ tomanako ninda geka eveva, ninda irari, ninda dubo bari, a ninda tumondari ava gosuse, amboda amboda aeteri. A ni nange geka a ari sembae imboe eraesa ava gido, Iesu tumondari+ embo da natofo kau daba aminga ava use iraeteri.

<sup>13</sup> Ni natofo isambukena God da Geka ava tegutuse, vironu sise, a dengoro induduse iraetesi. Ni saramana use ninda fakina aminda futururaso, na ya nimokena buvarena.

<sup>14</sup> Eni mo: feroveta God da uju nimokena setero, ekaresia+ da babojegari nenda ungo ninda jiroda fitido banungero, God da Asisi nimokena fakina rea futusira amo, erá doyeose!

<sup>15</sup> Ninda joba a fakina resena aimi budo, ninda dubo futuse saramana ururaso, evetu genembo gaore!

<sup>16</sup> Ninda irari kaifa esimbuguse iraresa, a ninda ijuga ábarago kaifa aresa. Ni aminguse iraresa amo, ni tofo jebuga tuve baresa, a evetu genembo mave ninda geka ningarera, nembarago jebuga tuve barera.

## 5

*5:1–6:2 Iesu Tumondari+ Embo da Irari Kau Eminge Irarira!*

<sup>1</sup> Embabako erá dombuda seose! Embabako, kau nimamo avavaga kakara use, durumugedo dengoro indaresa. Gegenembo seka, kau ninda jamena beká avavaga kotise, tavo use iraresa.

<sup>2</sup> Evevetako, kau nei avavaga kotise, a evevetu seka, kau ninda ghaghasovu avavaga kotise, tavo use iraresa. A kotugo, evevetu seka gosuse, jo kotari sembae kotae aresa.

<sup>3</sup> Ekaresia+ tomanakokena eminge saso dae resena. Roriri mandi sasingu iraede, a ne sonemba eni iraede, ava kakara use sonembareva.

<sup>4</sup> Avata kotugo, rori enikena sasingu o imemesiri iraetera amo, ekaresia+ tomanako roriá jo sonembae arera. Ainda beká mo: rori ainda sasingu o imemesiri resena eimi, nene God da uju ava use, noi numamo da sonemba, o novia nombua da sonemba, giti nemokena futuse undudo ghusera, ainda mino ava futuse, noi numamo o novia

nombua resena ava, nene tofof sonembarera. Amingururoro gosuse, God nu ivuga arira.

<sup>5</sup> Ni eregosesa: evetu rori mandi sasingu iraede amo, nunda sonemba eni tefori. Nu anakora tuturo edo, God tumonduse sifo a tumba evia inono, nunda sonembadae sise, banunguse irá gheraira.

<sup>6</sup> O roriri mendeni, ne fisi da uju ava use irera amo, ne tamoi jebuga irera. Avata kotugo, God kena mo, ne kau ambudo irariguse irera.

<sup>7</sup> Ava sedo, erá ekaresiadae ungonu seore dae sise, ninda natofodae dengoro induduse, eminge saresa:

<sup>8</sup> mave nunda nano namendi, kotugo mokogo mo, nunda noi numamo o novia nombua jo kaifa use sonembae arira amo, eko bekári. Amo inono, nunda tumondari ighagha use fuge dodo, evetu genembo God da Geka jo tumondae irera, ainda ari ekoko ava darigedo, ari eko beká ava use irara.

<sup>9</sup> Ekaresia+ roriri da javo gemburaera<sup>9</sup> amo, rori kau eminga, ainda javo ava gembarera. Numo, genembo dabakokena vai edo irari nuvu ambari nu rori arira. Avata nunda sirorari da ghaeko 60 ava darigari irarira.

<sup>10</sup> Rori amo, nu kavevera edo ghusera ava, ururari evetu genembo ava gaeteri. Nunda sasingu kaifa use dengoro indudururari, ari eveva edo ghaeteri. God da natofo mendeni a esa embo mendeni foa gheraera ava, nune tavo use, nendae sabua+ use sonembedo ghaeti. Evetu genembo mave dara a bouvu eretafera ava, nune sonembedo ghaeti, a nu ari eveva mendeni mendeni ava use iraeli. Roriri avavaga ainda javo ava gembuvu, ekaresia+ da giti jighari nemokena sonemba mutore!

<sup>9</sup> **5:9:** Paul nu *“...roriri da javo gemburaera”* ava gefusira, ainda tuka mo eviri. Roriri evevetako nemo ekaresia da natofo aimi sonembedo ghuseri. A kotugo, nembarago ekaresia sonembedo ghuseri. Oroko mo, namonde tamo foyago da gekai, *“Visitation Sisters”* seraera. Avori, kau *‘Visitation Sisters’* eraera aminga ava, roriri aimi edo ghuseri. Amo, ne deinghuse kae evetu genembo sonembedo ghuseri, a ekaresia da saramana mendeni mendeni ava edo ghuseri. Ava sedo, nenda javo fefa eninda gefusera ava gosuse, ekaresia da natofo nemo sonembedo, nenda uvu bayau a irari da roera ava mutudo ghuseri. O roriri seseka mo, ne nange sekago vai aetera ava kotise, Paul nenda javo erá fefa aminda gembeore dae sisira.

<sup>11</sup> Roriri seseka ainda javo ava, erá gembeove dae sise resena. Ainda beká mo eviri: nenda fisi da ujuimi jumbari ainda amboda amboda use, sekago vai ari dae kotise, Keriso do-yarera.

<sup>12</sup> Aminguse, Keriso kotise, rea ari dae sise beka gagojusera, ava bejar-  
era.

<sup>13</sup> Eni mo: roriri seseka ne emingeraera. Ne jo Bajari kotise, saramana e gogoghombae eraera. Nemo tefo yabayabaghuse, guka dagaya ari irarera. O eko beká mo eviri: ne birurughuse aji sise, evetu genembo mendenidae unongu sido ya foa ghuse irarera. Aminguse, ne geke jo sari da kau irae ava sise deingharera.

<sup>14</sup> Ava sedo, na uju erena amo: namondeda gitofu da unongu a aji sari ava gafugari dae sedo, roriri seka, ne sekago vai aoro mandi sasingu siroredo, nenda kambo ava kaifa use iraeteri.

<sup>15</sup> Ai resira amo: roriri mendeni ne anakora jovereghedo, Satan da geke nininguse nunda amboda ya gheraera.

<sup>16</sup> O Iesu tumondari+ embo da evetu eni ainda noimane, nutatowane, noviamane, o imboboti eni rori edo iraetera amo, evetu daba aimi eredo, nunda jao tato ava sonembaeti. Ainda bouvu nune fufururari, ekaresia+ ne roriri mendeni, makasi embo beká, ava sonembarera.

<sup>17</sup> Ekaresia da babojegari giti eveva jighiraera ava, kakara use jo mino dabako mutae areva. Ne mino mutudo, etodago mutovo baetera amo, avori. Na mokogo mo, babojegari janjagu use vironu seraera a dengoro indiraera aindae resena.

<sup>18</sup> God da Geka aindae eminge resira:

“Ninda burumakava (ox) tino aso birurughuse, ninda farava vuji ava jasise irarira amo, erama vuji mindeure dae sise, beka digheose!”

A vasa eninda, kau daba ava resira:

“Ninda saramana kato ainda mino mutu bare!”

aminge resira.

<sup>19</sup> Evetu genembo mendeni foama ekaresia+ da bajari eninda irari aindae aji sise, ijujaso dae sarera amo, avori, emingaresa. Genembo dabako foa aminge saetira amo, erá nunda geke ningido ijujeose! O evetu genembo etoto o etodaba nunda dara gido foa osa sarera amo, ningido ya ijujaresa.

<sup>20</sup> Iesu tumondari+ embo tomanako oju edo, erá ari ekoko eore dae sise, emingaresa. Evetu genembo ari ekoko eraera ainda dara ava, natofu isambu da dombuda eredo bureguse dombuda saresa.

<sup>21</sup> God Afa, Iesu Keriso, a aneya kakara nenda dombuda fete resena: geke gembena emo, ava aso dae resena. Aminguse, ninda nano namendi o ninda gitofu sonembari dae aresa amo, inononda sonembuse iraresa. Kau daba aminga ava, mave kotofu edo irira o sabua edo irira ava, ni jo kotae aresa. Ni evetu genembo isasambu inononda kaifa use iraresa.

<sup>22</sup> Evetu genembo mendeni Bajari da saramana aoro dae sedo, erá totoi ungo jiroda fiteóvo ne feteore! Nenda irari giti gi gogoghombedo, amboda amingareva! Erama ari ekoko ari dae sise, ya genembo enighae tatise umo eove! Ari ekoko imboe use dariguse irareva!

<sup>23</sup> Ninda tini sembae urureari kae tamburaesa. Ava sedo, uvu avanembo erá mindeose dae resena. Tuturo edo, sifo daba daba vaini (wine) ava, fiyoghadae sedo, bu mindido ghe!

<sup>24</sup> Evetu genembo mendeni ari ekoko isagha beká urureoro gido, koto eraera. A evetu genembo mendeni ari ekoko ufena urureoro, amboda foa isagha eraira.

<sup>25</sup> Kotugo ari eveva kau daba avori. Ari eveva digari isagha urureoro giraera. A mendeni ufena eraera ava, amboda foa isagha eari giraera.



## 6

<sup>1</sup> Erá unongu sirureóro God da javo eko eure dae sise, a namondeda ijuga aindae unongu erama seore dae sise, ekaresia+ da jokáda, mave saramana kakato edo irera amo, ne nenda babojegari ava kakara use irarera.

<sup>2</sup> Kau daba aminga ava, saramana kakato mendeni, aindae babojegari barago, ne God da natofo edo irera. Saramana kakato emo, nembarago nenda babojegari Kuristini ava kakara use irarera. Nenda babojegari mo, Kuristini edo kau nenda nano namendi edo irera avata kotugo, nenda geka jo bu fugae arera, ne nininguse irarera. O eminge saone! Ne giti edo ghusera ava darigedo, kakara e gogoghombuse saramana e gogoghombare. Aindae beká mo: nenda babojegari sonembe gogoghombare amo, nenda dubo bari nano namendi, God da natofo edo irera, nemori.

*6:3-10 Namonde Moni Dighighi Futo Use Irarera Amo, Namonde Jebuga da Emboro Ava Kosasagharera.*

A geka evia ijuguse, vironu saso dae resena.

<sup>3</sup> Namondeda tumondari mo susughaeri, a namondeda Bajari Iesu Keriso da Geka mo, geka bekári. Ava sedo, mave ijuga dombu eni ijugurureari ningiraesa amo,

<sup>4</sup> nu tofo gogore edo, sakai sise amingeraira. Nunda kotari tufakori. Nu sembae kotise osogo use beisiga ari dae eraira. Amo sembaeri. Aimi, beisiga, jijivu sari, komana da binodae dubo ekoko ari, komanadae kotari eko kotari,

<sup>5</sup> a dumo bauso siroreraira. Evetu genembo mave amingeraera amo, ne geka beká ava kasiguse, nenda munju jo saramana e gogoghombare eraira. Nenda kotari mo, ne God da natofo arera amo, ne moni a esimbugari tomanako ava bariá koter-aera.

<sup>6</sup> Avori, geka beká mo: tumondari da emboroda ise, esimbugari mindafu eni torugharera. Amo dubo

jamari. Nimokena rea irira aindae ivuga aresa amo, ni dubo jamaghae iraresa.

<sup>7</sup> Ni eregosesa: namonde sirorusera amo, rejo eni jo bu furae useri. A ambarera ábarago rejo eni jo bu yae arera.

<sup>8</sup> Ava sedo, namonde oka bayau inononda rise a tamo asugari inononda asuguse irarera amo, namonde ivuga use irarera.

<sup>9</sup> O evetu genembo moni bari dae sedo, dighighi use irarera amo, Satan imi dederurari gofedo, fisi da uju aindae amboda amboda udo ya gofedo, jebuga kosasaghedo ambarera.

<sup>10</sup> Aindae beká mo: monidae dighighi ariimi, ari ekoko a dara isambu siroreraira. Evetu genembo mendeni moni bari dae kotise, tumondari da emboro+ dodo, totofo eredo mema tambari da emboro ava, bu foa gheraera.

*6:11-21 Paul Nu Geka Mendeni Sedo, Tano Usira.*

<sup>11</sup> Ni God da genembori. Ava sedo, ari setena amo darigaresa! Aminguse, ni God tumonde gogoghombuse, ari eveva a nunda uju ava use, evetu genembo isambu dubo budo ghe! Evetu genembo dubo ruruse, durumuge fete simbuge!

<sup>12</sup> Ni tumonduse, ninda fakinaga edo isoro use, jebuga evovodae irari ava tuve baresa. Aindae susu mo: jebuga amo tuve baso dae sedo, God ni aghi etiri, eredo natofo da dombuda, Bajari nange nange tumonduse, ava osa sisesi.

<sup>13</sup> God roera isambu dae jebuga muturaira aindae dombuda, a kotugo Iesu Keriso, Pontius Pilate da dombuda geka beká sise tumo fainghedo fetetusira, aindae dombuda fetirise, na nimokena emingaso dae resena.

<sup>14</sup> God ni rea aso dae sisira ava, kaifa e gogoghombuse iraresa. Eni jo kosasaghae iraso, Bajari Iesu Keriso da Sifo foa buvari gido, nu furarira.

<sup>15</sup> Nunda sifo beká gategusira aminda, God nune sari nu eredo jovereghe furarira. God resena emo,

nu dubo jama a ivuga da susuri. A kotugo, nu nusuka kotofukori. Giti jighari eni tefo bekári. Numo kini (king) isasambu ainda dombudari, a kotugo numo kokotofu isasambu ainda dombudari.

<sup>16</sup> Nu nusuka irei, irira, a evovodae irarira. Nu usasa tomanako ainda jokáda irá gheraira, jo evetu genembo enii ya numokena buvari da kau iraeri. Nu mave jo gae irira. A numo jo mave gari da kaugo iraeri. Numoá kakara use irore! Nunda fakina evovodae irare! Ai, bekári!+

<sup>17</sup> Evetu genembo iti susu fafode irera amo, nemokena eminge se! Erama gogore edo totofo sakai sise, nenda gugua a roera tumondeore dae sise resena. Gugua a roera amo, soesa urureoro ya dadaberaira. Ava sedo, ne God nusuka numoá tumondarera. God resena emo, ivuga aoro dae sedo, kavevera use roera muturaira.

<sup>18</sup> Saso ne kavevera use, veka eveva use irarera. Aminguse, nenda roera evetu genembo mendeninde dabade soro use irarera.

<sup>19</sup> Amingururoro, nenda gugua mendeni utu aminda, kau kambo da tutumbi aminga ava sirore fetarira. Sifo gombuda aindae sise amingarera amo, ne jebuga beká ava tuve barera. Yari budo gi!

<sup>20-21</sup> Timothy, geka a ijuga mendeni, God ninda ungodá fitiri irira, ava kaifa aso dae resena. Evetu genembo mendeni God kotae use, geka kotae kotae sise beisiga eraera. Nenda kotari 'eveva ariá' seraera. Avata ainda jokáda, kasama beká eni tefori. Aminge se nininguse, God da jebuga jo itako tambae arera. Evetu genembo mendeni kasama teria bari dae sise, tumondari da emboro ava kosasaghuseri. Geka kotae kotae amo 'eveva ariá' seraera, ava darigaso dae resena. God da sonemba nimokena irare! Yari budo gi!

Avori, nanda geka tano eviri.  
Na Paul.

## Paul Nunda Reta Amboda, Timothy Kena Gefusira, Amo Eviri.

Paul da reta 13 o 14 bu jighirera ainda jokáda, reta amboda beká gefusira amo, eviri. Nu diburada (o sekago diburada) irise, reta evia gembudo, sifo tufako avise ireira ava, Rome embo da kotofuko setiri nunda mendeni, Paul detero ambududurusira.

Evetu genembo mendeni, geka a ijuga sembae ijugedo ghusera, a kotugo amboda foa ijujarera ava kotise, Timothy nange fakina edo ata fete simbugaetira aindae, Paul dengoro indudusira.

*Paul Nunda Reta Amboda Timothy Kena Gefusira, Ainda Mendo Mendo Mo Eviri.*

1:1-2 Paul Timothy ategi usira.

1:3–2:26 Bouvu a mema dombu eni dombu eni sirorarira, a ijuga sembae siroredo isagha arira ainda jokáda, Timothy tumo fainghedo, geka bekáda bekáda ijugaetira aindae, Paul sisira.

3:1-17 Kuristini da ambí goroba mo, God da Gekari.

4:1-8 Namonde Bajari da javoda Satan ghae isoro use irooro gido, ainda mino nune mutarira.

4:9-22 Paul tofo nunda irari da geka daba daba se tano usira.

1-2 Arie, Timothy ko! Nanda mandi, na ni ategi beká ava erena. Yari budo gi!

Na Paul, nane ni dubo ererurena. God uju etiri, na Iesu Keriso da aghi kato edo irena. Namonde Iesu Keriso de dabade tatise jebuga tamburaera, ainda bino ava osa saono dae sedo, God na dirigeari ya foa ghedo ghuseni. Yari budo gi!

God Afa a namondeda Bajari Iesu Keriso nindae joka edo, sonemba a dubo jama mutoro base! Yari budo gi!

*1:3-18 Namonde Bajari Da Natofu Edo Irera Aindae, Meka Jo Ae Arera.*

<sup>3</sup> Kau nanda abuamane edo ghusera aminga ava, na nanda dubo joká simbuguse, God da saramana eraena. Na sifo tumba evia inono, banunguse nimoá kotise, numokena aiyakoe sise irá gheraena.

<sup>4</sup> Na ni dodo fusena amo, nange nange dubo mema etiri sorara usesa ava kotise, na ya nimo gido ivuga ari dae uju beká ava erena.

<sup>5</sup> Ni nange Bajari bekáda bekáda tumonde gogogho eraesa, ava kotise irena. Giti mo, nevia Lois a nei Eunice ghae, Bajari tumonde gogoghombedo ghuseri. A oroko mo, ni kau daba aminga ava, Bajari tumonduse iresa, ava na kasama erena.

<sup>6</sup> Na aindae eminge resena. Na ungo ninda jiroda fitido banungeno, God nunda fakina nimokena futusira. Ni fakina ava sekago bu tuturo edo, saramana aso dae resena!

<sup>7</sup> Ainda beká mo: God nunda joba, jo oju aoro dae sedo mutae usira. Namonde nange fakina edo, tofo tofo dubo ruruse, fisi da uju ava buregaetera aindae sedo, nunda Asisi amo futusira.

<sup>8</sup> Ava sedo, God da Bino ava osa sise, erá meka geóso dae resena! O namo, nunda Bino ava osa sedo ghusera aindae, na sandi diburada fitero irena. Avori, na diburada ffitusera aindae, ni jo oju use, meka gae aresa. Ni God fakina futururari, God da sasingu isambu bouvu a mema itatameraera ava, ninda boanda fumbaso dae resena.

<sup>9</sup> Jebuga budo nunda natofu aoro dae sedo, nu namonde sonembuse aghi usira. Nu amingusira amo, jo namondeda ari eveva edo ghusera aindae, jo aeri. Ainda beká mo: namondekena ari eveva eni tefori. Nu taká uju etiri, namonde sonembari dae sise amingusira. Iesu Keriso amboda rea aetira ava kotise, nu enda jo ae irise, anakora beká namonde sonembari dae sedo, emboro+ esimbugusira.

<sup>10</sup> Amingusira, ava refuira buviru, namondeda Sonemba Kato Iesu Keriso siroretiri, emboro+ amo isagha etiri eregoseru. Iesu nu Ambari da fakina ava de bejetiri dadabusira. Etiri, nunda Bino Eveva ava sise, jebuga evovoda irari ainda emboro+ ava afigetiri, isagha etiri namonde eregoseru.

<sup>11</sup> Bino Eveva resena ainda aghi kato a ijuga kato edo osa saono dae sedo, God na gategusira.

<sup>12</sup> Na amingeraena andae sedo, na dibura eminda irise, bouvu a dara evia itatameraena. Avata na jo bunise, tumo darido iraeri. Na tumonduse irena. Ainda beká mo: na Iesu tuturoda tumondusena, kau daba ava, refuana orokoé, nu kasama e gogoghombedo tumonderena. Tumonduse na kasama erena: na rea nunda ungodu ffitusena ava, nune kaifa ururari, nunda Sifo sisira ava foa buvarira.

<sup>13</sup> Na geka beká nimokena ijugedo ghusena ava kaifa use, nanda irari ava gosuse nanda amboda amboda aresa. Namonde Keriso de dabade tatedo irise, tumondari a dubo bari ava bu jighirise, kaifa aso dae resena.

<sup>14</sup> Asisi Kakara nu, namondeda dubo jokáda irira. Nunda fakinaimi, geka beká God nimokena futusira ava, kaifa aso dae resena.

<sup>15</sup> Namondeda nano namendi isambu Frovensi Asia aminda irera aimi, eredo na ighagha edo imboe useri, Phygelus a Hermogenes de dabade aminguseri.

<sup>16</sup> O Onesiphorus mo, na sonembeari tamo fegheari, ivuga edo ghuseni. Ava sedo, na uju erena amo, numo, noaro, a nunda mandi sasingude ava, God nendae sedo joka are! Na diburada irena andae, nu jo oju edo meka gae usira.

<sup>17</sup> Nu taká fira reighi Rome eminda buvudo, sifo daba aminda, tuturo edo kakova udo fira na tafusira.

<sup>18</sup> A eni mo: na reighi Efesas aminda nange sonembedo ghusira, ava ni kasama e gogoghomberesa. Andae sedo, Sifo amboda furarira

aminda, Bajari nundae joka are!

## 2

*2:1-13 Namonde Iesu Keriso Dae Sise, Isoro E Gogoghombaeteri.*

<sup>1</sup> Avori, nanda mandi, nimokena resena. Namonde Iesu Keriso de dabade tatedo irise, nunda sonemba muteari buraera. Nunda sonemba aimi, fakina aso dae resena!

<sup>2</sup> Na rea natofo da dombuda seono, ningido ghusesa ava budo, gegenembo tumonderaesa, a evetu genembo dengoro indarikená inono eraera ava gatedo, ijugururaso dengoro indido ghaore!

<sup>3</sup> Ni Iesu Keriso da isoro katori. Ava sedo, kau isoro kato beká mema a bouvu itatameraira, aminga ava use, Keriso da natofo bouvu a mema rea itatameraera ava, ninda boanda tofo mandi fumbaresa.

<sup>4</sup> Isoro kato beká nu, nunda giti jighari nange ivuga aetira ava kotise, ainda uju avanembo use irarira. Aminguse, isoro kato amo, fisi da uju o irari eveva da gugua bari dae jo kotae arira.

<sup>5</sup> Kau daba aminga ava, genembo eni beisi sumbari dae use, sumbu darigarira amo, ainda mino mo nune barira. O sumbari da agho dari irira, ava jo kotise sumbae arira amo, nu rejo eni jo bae arira.

<sup>6</sup> Eni mo: genembo mave vare je govuse, ainda saramana use janjagu arira amo, vare ainda bayau nune giti bu mindarira.

<sup>7</sup> Na oroko resena evia, ni kotaso dae resena. Ni kotiruraso Bajari sonembururari, ni roera isambu kasama aresa.

<sup>8</sup> Kini (King) David da imendi Iesu Keriso, ava kotaso dae resena. Nu ambiri, God setiri nu ambarida ghe jebugedo erorusira ainda Bino Eveva ava, vironu seraena.

<sup>9</sup> Na nunda Bino Eveva budo vironu sedo ghusena a seraena; andae sedo, na tafasara kato aminga ava eteno, seiniimi bundetero mema itatamuse irena. Avata kotugo, God da Geka jo buri aoro fetari da kaugo iraeri.

<sup>10</sup> Ava sedo, God evetu genembo gategusira aimi, nange Iesu Keriso de dabade tatedo, nunda jebuga a usasa baetera ava kotise, na memaé itatamuse durumugedo, ata fete simbugerena. Nunda jebuga a usasa resena emo, evovodae irarira.

<sup>11</sup> Geka emo geka bekári:

“Namonde mave Iesu de dabade tatedo ambarera amo, amboda ambarida ghedo jebugedo erarera.

<sup>12</sup> Namonde mave nundae sedo bouvu fufuse, durumuguse ata fete simbugarera amo, amboda Iesu de dabade kokotofu edo irarera.

O namonde mave Iesu ighagha arera amo, Iesu barago namonde ighagha arira.

<sup>13</sup> Avata kotugo, namondeda tumondari numokena tukugharira amo, nu namondekena jo amingae arira.

Nunda tumondari namondekena jo nune ighagha ari da kaugo iraeri.

Ainda beká mo: nunda tumondari namondekena ighagha aetira amo, inono, nu tofo ighagha ari da kaugo aetira. A nu jo tofo ighagha ae arira.”

*2:14-26 Paul Erá Kotae Kotae Gekadae Besiga Eore Dae Sisira.*

<sup>14</sup> Ni Iesu tumondari+ embo kaifa eraesa ava, saso ningaeteri! Ne jo beisiga ari dae sedo, geka se ningae arera. Ari avavaga doyoro dae sise, Bajari da javoda saso ningaeteri! Beisiga urureoro evetu genembo ningiraera amo, ne beisiga aimi bebeta eraera. Beisiga ainda jokáda, sonemba eni tefori.

<sup>15</sup> Ni saramana use, ninda fakinaimi edo gosururaso, God ava gido nindae ivuga aeti. Ni erá tofo meka geose dae sise, saramana e gogoghombaresa. Aminguse, God da Geka beká ava se simbugaresa. Eni jo kosasaghuse sae aresa.

<sup>16</sup> Geka mendeni feghako bekári, sino fuka da gekari. Ava sarera aimi, jo sonembari evetu genembo

foa God kena utua ae arera. Geka avavaga seraera aimi, emboro God kena ava kosasagheraera. Ava sedo, geka avavaga darigaso dae sise resena.

<sup>17</sup> Evetu genembo geka aminge ijugeraera amo, kau gambisi iso metegeraira aminga ava use, ekaresia+ mendeni bebeta eraera. Geka resena emo, Hymenaeus nengae Philetus ghae nene ijugeraera.

<sup>18</sup> Nengae geka beká da emboro dodo, geka evivaga sirureoro, evetu genembo mendeni da tumondari tukugheraira. Nengae eminge sise seraera, “Bajari sari nunda natofo ambarida ghe jebuga eraetera ainda Sifo amo, anakora fira darigedo dadabusira,” nengae aminge sise, gungubo seraera.

<sup>19</sup> Avata namonde jo oju ae arera. Ainda beká mo: Geka beká Bajari anakora sisira, kau nunda kambo da tutumbi dariri fefetusira amo, jo durege bari da kaugo iraeri. A tutumbi resena ainda tamonda, geka evia gembero irira:

“Evetu genembo mave Bajari da tofo edo irera ava, nune kasama erira.”

A eni mo eviri:

“Mave Bajari da javono gatari sarira amo, nu giti dubo jovereghedo nunda ari ekoko doyarira.”

Ava kotise, gegenembo etoto naká gungubo seraera andae, namonde jo oju ae arera.

<sup>20</sup> Kasia eni sari dae erena. Ni kambo eninda teredo, kambo ainda rooro irari fuge garesa amo, jo kau dabako gae aresa. Mendeni mo, auri ‘silver’ o ‘gold’ seraera aimi etero irira, ava garesa. Amo, kirumo o saramana tomanako ari da roerari. O rooro mendeni mo, ikai kevari a roera eniimi kevari ava irari garesa. Amboda setena amo, jo roera evavago eni iraeri. Sifo ghousa kotae kotae budo, bayau fiti mindiraera.

<sup>21</sup> Avori, mave nunda dubo joká esimbugedo nunda ari ekoko seghe fugarira amo, nu kau rooro eveva setena, ainda kaugo ava edo irarira.

Genembo amo, nunda Bajari dae sise, dubo joká esimbuguse, nu tofo Bajarikena futusira. Ava gido, nunda Bajari sari, saramana kakara dombu eni dombu eni nune arira.

<sup>22</sup> Gigimasa seka bajari fisi da ujuimi rea eraera, ainda ari ava gi darigaso dae resena. Ari eveva avanembo ururovo, nenda tumondari, nenda dubo bari, a nenda dubo jama baji mindafu are! Evetu genembo mave, Bajari nemo sonembare dae benunu sise, dubo seghe simbugedo irera, ainde dabade tatedo, aminguse irivu!

<sup>23</sup> Avata geka beká irae ava kotae kotae sise, beisiga ururoro ningaresa amo, gi darigaresa! Ainda beká mo: geka aindae beisiga ururoro gombuda, dumo bauso siroreraira.

<sup>24</sup> Avata ni Bajari da saramana katori. Ava sedo, ni eminguse iraresa. Ni jo dumo bauso ae arena. Ni evetu genembo isambukena durumugedo, dengoro indi simbuge gogoghombaresa.

<sup>25-26</sup> Evetu genembo ni buregeraera aikena, robogho ai sise, dombuda saresa. Ni eregosesa: Satan nunda uju ava aoro dae sise, ne bundetiri irera. Avata ni geka robogho ai sise, dombuda saresa amo, avose resena, God nemokena goroto afigari, dubo jovereghedo geka beká ava kasama edo, Satan da vaghoda ghe foa buvudo jebugarera tano.

### 3

*3:1-9 Sifo Gombuda Kau Evia Siorarira.*

<sup>1</sup> Geka emo kotasao dae resena! Sifo foa gombuda buvurutururari, mema a bouvu digari futo sirorarira.

<sup>2</sup> Sifo aminda, evetu genembo mave irarera amo, ne mokogo mo, nenda uju avanembo ari dae kotise irarera. Ne guguadae dighighi use, gogore edo, totofo nendae sakai sarera. Ne tofo tofo aji sise irarera. Noi numamo da geka jo ningae arera. Ne sonemba eni barera aindae, aiyakoe

jo sae arera. Ne God itako jo kotae arera.

<sup>3</sup> Ne kavevera jo ae arera, a evetu genembo mendenidae itako jo joka ae arera. Ne aji sise, tataya use, a evetu genembo je babaseguse irarera. Ne ari a geka eveva ava imboe use irarera.

<sup>4</sup> Aminguse, nenda nano namendi dederuse irarera. Ne gogore a bibita use, nemoá totofo sakai sise irarera. Ne fisi da uju ava kotise, God jo tumondae arera.

<sup>5</sup> God tumonde bainghari nu use irarera, avata ainda beká a fakina ava ighagha use, ne tefo tumonde bainghuse irarera. Evetu genembo mave amingeraera ava, darigaso dae sise resena.

<sup>6</sup> Evetu genembo avavaga mendeni, ne kamboda teredo emingeraera. Geka sirureoro, evevetu kotari irae nenda geka ava ningiraera. Evevetu resena emo, nenda ari ekokoimi bundetiri irise, fisi da uju ainda amboda amboda use irá gheraera.

<sup>7</sup> Evevetu amo ne deinghuse, geka beká ava bari dae tava eraera, avata jo tambae eraera.

<sup>8</sup> Kau Jannes nengae Jambres ghae, Moses da geka beká ava buregedo ghusera aminga ava, gegenembo ekoko gembena emo, ne geka beká imboe use, buregeraera. Gegenembo resena emo, ne tumondari jo inono ae etiri kotari dadabusira.

<sup>9</sup> Avata ne jo evovodae, evetu genembo derae arera. Ainda beká mo: kau Jannes nengae Jambres ghaekena sirorusira aminga ava, gegenembo aikena sirorari itatamarera. Nenda geka beká irae, ava kasama edo, natofo tomanako nenda geka jo tumondae arera.

*3:10–4:8 Paul Timothy Da Saramana Gategedo, Amingare Dae Sisira.*

<sup>10-11</sup> Na nange edo ghuse na ava, ni gido ghusesi. Nanda ijuga, nanda irari, a na redae saramana eraena ava, ni kasama usesi. Na nange nange durumugedo, itatamuse tumondedo ghuse na, ava ni kasama

usesi. Nanda dubo bari kau mavega, ábarago ni kasama eresa. Kau daba aminga ava, gitofu nange namokena bouvu futuse, fakarago urureoro mema itatamuse, na jo oju use gofae edo ghusena, ava ni kasama eresa. Reighi Antiok, Aikoniam, a Listra aminda, nanda gitofu nange urureoro itatamedo ghusena ava, ni kasama eresa. Dara, mema, a bouvu ava itatamedo ghuseni. Avata kotugo, Bajari na sonembeari jebugedo ghuseni.

<sup>12</sup> Ni eregosesa: evetu genembo mave Iesu Keriso de dabade tatedo, God da uju ava ari dae kotarera amo, nemokena gitofuimi bouvu futuse, fakarago ururoro mema itatamuse irarera.

<sup>13</sup> O evetu genembo mave tofofo ari ekoko use, kokomana dederurureoro nenda amboda amboda eraera amo, nenda ari ekoko giti edo ghusera ava, undoro bajari ari ekoko beká avanembo use irarera. Ne evetu genembo mendeni dederuse, a tofofo dederuse irarera.

<sup>14</sup> Avori, ni emingaresa. Namane nimokena rea ijugetero tumonde gogogho usesa ava use, tumonde gogoghombuse iraresa. Ainda susu mo: namane mave ni ijugusera ava, ni tumonduse kasama eresa.

<sup>15</sup> A ni sasingu iriasa da sifo aminda, ni tuturo edo, God da Geka kasama udo refesa. Ava tege kasama use, ni nange Iesu Keriso tumonduse jebuga baetesa, ava kasama udo refesa.

<sup>16</sup> God da Geka isambu, nu tofofo mandi sirureari gembudo ghuseri. Nu amingusira da beká mo: nunda Gekaimi fakina futururari namonde emingarera. Namonde geka beká ava ijugarera. Namonde ainda fakinaimi, ari ekoko embo ava dombuda sarera. Fakina daba aimi, namonde dengoro indudururoro, evetu genembo dubo jovereghari, ari eveva use irarera. A kotugo aimi, namonde ari eveva da emboro ava ijugururoro, evetu genembo gaeteri!

<sup>17</sup> Namonde kasama erera: God nunda Geka futusira da beká mo: nu

uju erira, nunda saramana kakato mo, ne kasama budo fakina edo, ari eveva kau eni kau eni, nene arikena inono aeteri.

## 4

<sup>1</sup> Na God da dombuda, a kotugo Iesu Keriso, amboda foama jebuga embo a ambari embo isambu ijujarira, ainda dombuda fetedo resena. Nu jovereghe foama, kotofu budo namonde kaifa arira, aindae resena, ni ningi!

<sup>2</sup> Nunda Bino ava, ni vironu sise iraresa. Evetu genembo ningari sarera, o ningari imboe arera, avata ni taká vironu sise iraresa. Nunda Bino Eveva ava tumondaoro dae sedo, ni evetu genembode dabade geka se ningaresa, a dombuda saresa. A kotugo, ni nange ghamo deraso erari evetu genembo ari eveva aetera ava kotise, durumugedo ijuguse iraso dae sise resena.

<sup>3</sup> Sifo amboda furarira amo, evetu genembo ijuga beká ava, jo ningae arera. Nemo fisi da uju ava use irarera. Aminguse, ijuga kakato mendeni tambu barera. Ijuga kakato amo, ne jo geka beká ijugae arera. Evetu genembo rea ningari uju arera, avanembo ijugururoro ne ningarera.

<sup>4</sup> Evetu genembo isambu, ne geka beká ava dodo, kiki gungubo ava sise a kotise irarera.

<sup>5</sup> Avata ni jo amingae aresa. Ni evovodae durumugedo, tofofo kaifa use iraresa. Dara a bouvu itatamaresa, ainda jokáda barago, ni durumugedo iraresa. God ninda saramana rea futusira ava use, Iesu Keriso da Bino Eveva ava sise, nundae sedo aghi use iraresa.

<sup>6</sup> O namo, nanda sifo refara buvira. Gitofui na daoro, God da javodae sedo ambarena. Na giti yarena, ni iraresa.

<sup>7</sup> Na fakina beká edo, isoro edo ghuseni. Na, kau beisi sumburaera aminga ava, sumbu gogoghombudo refuana tanonda buveni. Na tumonde gogogho use iriani.

<sup>8</sup> Ava sedo, na kasama erena: Bajari nanda mino fitiri irira. Mino resena emo, kotofu da yeye, kau kekesa avavaga, nandae sedo fitiri irira. Kekesa amo, ari eveva eraera ainembo amboda barera, aindae resena. Bajari nu bekáda bekáda use a sise ijujeraira aimi, eredo kekesa amo, sifo amboda furarira aminda, namokena mutari barena. Kotugo, jo nasuka nane bae arena. Evetu genembo isambu, mave nunda furari ava uju use, a kaifa gigita use irira, ainembo barera.

*4:9-18 Paul Nunda Irari Kau Mavega, Ainda Geka Ava Sisira.*

<sup>9</sup> Ni edo gido, namokena totoí furaetesi!

<sup>10</sup> Demas nu, enda a enda da gugua aindae dighighi use, na dodo reighi Tesalonaika aminda isira. Crescens nu Frovensi Galesia aminda isira. A Titus nu, Frovensi Dalmesia aminda isira.

<sup>11</sup> Ava sedo, Luke nu, nangae kikiako irera. Mark unumbedo nengae furovo dae resena. Ainda beká mo: nu na sonembuse, nangae saramana arera.

<sup>12</sup> Tychicus na dirigiteno, reighi Efesas aminda isira.

<sup>13</sup> Ni furaresa amo, nanda tamo asugari eni Carpus kena reighi Troes aminda dotutusena, ava budo fu! Nanda buku mendeni ava, edo gido bu furaresa, mokogo mo, sino fuka da anosoimi ari aindae resena. Yari budo gi!

<sup>14</sup> Genembo eni roera auriimi edo, oriro edo moni buraira, javo Alexander aimi eredo namokena ari ekoko dombu eni dombu eni edo ghusira. Bajari nune mino ururari itatamarira.

<sup>15</sup> Nimbarago, nundae oju edo kaifa aso dae resena. Ainda beká mo: namanenda geka ava nu imboe edo, eredo namanenda geka edo gido buregari dae usira. Yari budo gi!

<sup>16</sup> Na gitida koto usena amo, mave na jo sonembae usira. Ne isambu oju edo, na dotutuseri. God nenda ari

eko amo gido kote doyaetira, aindae resena!

<sup>17</sup> Avata kotugo, na koto usena amo, Bajari nangae irise, fakina futiri nunda geka ava se gogoghombeno, namane Jusi embo da gitofu ne nininguseri. Aminge seno niningero, God sonembetiri na dotero buvurutuseni. Na sino fuka eko, raiyoni (lion) kena mutoro na gambu mindaetira avata, dotero na jebuguseni.

<sup>18</sup> A kau daba aminga ava, Bajari na sonembururari, na ari eko da fakina isambu darigururono, na unumbedo bu nunda vasa utu aminda fitari, nangae dabade irarera. Nunda duro evovodae irare! Ai, bekári!+

*4:19-22 Paul Nu Tano Edo, Geka Se Dotutusira.*

<sup>19</sup> Aquila noaro Priscilla ghae ategi beká ava erena. Se ningore! A Onesiphorus nunda mendeninde barago, ategi erena. Se ningore!

<sup>20</sup> Erastus reighi Corinth aminda fefetusira. A Trophimus, nu reighi Mailitas aminda kae rurusira ava sedo, nu aminda dotutuseni. Yari budo gi!

<sup>21</sup> Yaura tambuno 'October' tuturo edo sumburaira. Ava sedo, ni nange edo gido, giti foa namokena buvaetesi. Ainda beká mo: eva yaura tuturo arira amo, ni jo foa buvari da kaugo ae aresa. Yari budo gi!

Eubulus, Pudens, Linus, a Claudia de dabade, ni ategi erera. A nano namendi mendeni barago, isambu ni ategi beká ava erera. Yari budo gi!

<sup>22</sup> Bajari ninda asisi ava, nune kaifa are! A God da sonemba ava nimokena irare! Avori, nanda geka tano eviri. Na Paul.



## Paul Nunda Namendi Titus Kena Reta Gefusira, Amo Eviri.

Titus mo, nu Paul da aghi kato eniri. Paul seari, nu Paul da javoda saramana mendeni mendeni edo ghusira. Paul nunda reta gitida, Timothy kena gefusira, sifo daba aminda, nu reta emo Titus kena gefusira tano. Titus ira, ekaresia+ mendeni butu javo Crete aminda kaifa use iriri, Paul numokena reta emo gefusira. Nu rea Timothy kena gefusira, kau daba aminga ava, Titus kena gefusira. Amo, nu ekaresia+ da babojegari da irari a ekaresia+ da irari, aindae gefusira.

*Paul Nunda Reta Titus Kena Gefusira, Ainda Mendo Mendo Mo Eviri.*

1:1-4 Paul Titus ategi usira.

1:5-16 Namonde gegenembo, ekaresia+ da babojegari aoro dae sedo gategarera amo, nenda irari aminda gosuse gategarera.

2:1–3:11 Titus dengoro induduse, geka rea saetira a nange ijugaetira, aindae Paul sisira.

3:12-15 Paul tofo nunda irari da geka sedo, Titus sekago ategi edo, tano usira.

<sup>1</sup> Arie, nanda mandi! Na Paul ri. God da saramana kato a Iesu Keriso da aghi kato edo irena. God nunda natofo gategusira ava, sonembururono tumonde gogoghombaoro dae, a ijugururono namondeda tumondari da susu a geka beká ava kasama aoro dae sedo, God na gategusira.

<sup>2</sup> Namondeda tumondari da susu a geka beká resena amo, eviri. Namonde rea gigituse irera amo, eviri: namonde jebuga evovodae irari ava amboda tuve barera. God gungubo jo sae eraira aimi, anakora beká beka gagojuse, jebuga amo mutari dae sisira.

<sup>3</sup> Amingedo, sifo gategusira ava fira buviri gido, nunda geka isagha sisira. Geka amo, na vironu saono dae setiri, tuturo edo vironu seno ainda jokáda, nunda jebuga rea mutari sisira, ava isagha usira. God namondeda Sonemba Kato aimi setiri, na nunda Geka ava, vironu sise irena. Yari budo gi!

<sup>4</sup> Nanda mandi Titus, na ni ategi beká ava erena. Ni nane ijugeteno, tuturo edo nangae dabade tumonduse irera. Na ni ategi beká ava erena. Yari budo gi!

God Afa a nangaeda Sonemba Kato, Iesu Keriso, nimokena sonemba a dubo jama mutoro base!

*1:5-16 Ekaresia+ Da Babojegari Mavejo Gategaetera Amo, Nenda Irari Kau Eminga Ava Aeteri.*

<sup>5</sup> Na ni butu javo Crete aminda dotutusena amo, ni emingaso dae sedo, dotutusen. Saramana mendeni jo sumbu gogogho ae ireira ava, saso aoro dadabare dae sedo, ni aminda dotutusen. A kotugo, ekaresia+ da babojegari<sup>5-9</sup> a giti jijighigari gategaso dae sedo, ni dotutusen. Avori, na ekaresia+ da babojegari da irari aindae rea sisena ava, sekago kotaso dae resena.

<sup>6</sup> Amo eviri. Genembo ekaresia+ da bajari are dae sedo gategareva amo, nunda irari kau eminga ava arira. Genembo amo, nu ari eveva avanembo use irarira. Nu evetu dabako fitido irarira. Nunda sasingu barago God tumondarera. A ne jo gogore edo ari ekoko ururoro gido, evetu genembo aindae unongu sae arera.

<sup>7</sup> Ni eregosesa: ekaresia+ da giti jijighigari, God da saramana ainda giti nene jijighuse irarera. Ava sedo, ekaresia+ da giti jighariá nu ari eveva avanembo use irarira. Nu jo gogore use, janje eko jo totoi ae edo gharira. Nu jo uvu fakara teria futo mindari jiro birurughae edo gharira. Nu jo tataya ae edo gharira. Nu jo

5-9 **1:5:** Afige, buku javo **1 Timothy** 3:1-13 ainda duruda tege garesa.

enda da gugua aindae dighighi ae edo gharira.

<sup>8</sup> Esa embo foa gharera ava, nune tavo edo gharira. Nu ari eveva ava uju edo gharira. Nu fisi da uju ava buregedo, ari dambu a kakarago ava use, bibita jo ae edo gharira.

<sup>9</sup> Iesu da aghi kakato bebede geke beká rea ya ijugedo ghusera ava, kaifa e gogoghombedo gharira. Amingarira amo, nu dengoro indari, evetu genembo mendeni geke beká ava, nene kasama edo fakina arera. A evetu genembo geke beká ainghae osogo eraera amo, nune dombuda sari, nenda dara ava kasama arera.

<sup>10</sup> Na aminge resena da beká mo: gogore kakato digarigo ava irera. Ne geke beká irae ava sise, evetu genembo mendeni dedeuse jufureoro nenda amboda ya gheraera. Gogore kakato resena emo, mokogo mo Jusi embo mendeni totofo nenda kiki ava, natofo isambu aoro dae sise irá gheraera aindae resena.

<sup>11</sup> Ne saso beka doyoro dae resena! Ne ijuga rea ijugeraera ava, ne jo ijugae aeteri. Ne taká moni bari dae sedo ijugururoro aindae sise, evetu genembo nenda mandi sasingude, a nenda nano namendi mendeninde sarigedo beisiga use irá gheraera.

<sup>12</sup> Ni butu Crete aminda iresa. Crete embo da feroveta eni anakora nunda totofodae eminge sisira, “Crete embo gungubo sise, saramana jo ae eraera. Ne guka dagaya etiri, saramana imboe use, bayau da oduso use irá gheraera,” aminge sisira.

<sup>13</sup> A nu geke beká sisira. Aindae sedo, ni emingaso dae resena! Ne tumonde gogoghombaoro dae sedo, dombuda siruraso tumonduse irore!

<sup>14</sup> Jusi embo da kiki mendeni mendeni kotae kotae seraera, a geke a agho dari, evetu genembo mendeni geke beká imboe use ijugeraera, aindae geke ava, Crete embo erá tumondeore dae sise, dombuda sise iraresa!

<sup>15</sup> Evetu genembo mave dubo joká esimbugedo irera amo, nenda dubo

joká jo totofo kotari ekoimi bebete ae arira. Aindae susu mo: ne rea tambarera amo, eveva vanembo ava kotise, God kena aiyakoe sise irá gheraera. O evetu genembo mave nenda dubo joká bebete use irera, a nenda dubo joká jo esimbugae irera amo, nemokena kotari eko totofo foa gheraira. Ne God da fakina jo tumondae eraera. Ava sedo, ne rea tambarera amo, eko vanembo kotiroro aimi, nenda janje joká bebete eraera.

<sup>16</sup> Ne totofo God tumondariva seraera. Avata nenda ari jo amingo iraeri. Ne imboe kakato a gogore kakatori. Saramana eveva eni ava, ne jo ae eraera.

## 2

### *2:1–3:11 Paul Nu Namonde Emingaoro Dae Sisira.*

<sup>1</sup> O nimo, eminguse iraresa. Ijuga eveva aindae amboda amboda use, ari eveva aoro dae sise, dengoro induduse iraresa.

<sup>2</sup> Afa koro saso, ne dubo kote simbugedo geke sarera. Ne totofo kaifa esimbuguse, fisi da uju ava buregarera. Ne fakina edo, evovodae tumonde gogoghombuse, a tofo tofo dubo ruruse irarera.

<sup>3</sup> Kau daba aminga ava, aya tata dengoro indaresa. Saso, ne evevetu kakara da irari ava use irarera. Ne jo unongu a aji sise irae arera, a ne jo vaini (wine) da oduso use irae arera.

<sup>4</sup> Aya tata amo, ne evevetu seka bajarikena, emboro eveva ijuguse emingaoro dae sarera. Amo, nuvumane a nenda ghagurude, dubo barera.

<sup>5</sup> Ne totofo kaifa esimbuguse dubo joká esimbugedo irarera. Ne kombo yagera da dubo ava jo kotae irarera. Nenda nati dendegu kaifa arera, a nuvumane da sari ava ningarera. Ava, nene ijugururoro, evevetu seka bajari amo, ava ningido amingururoro, evetu genembo mendeni ava gido, God da Bino aindae geke eko jo sae arera.

<sup>6</sup> Kau daba aminga ava, gegen-embo seka bajari dae dengoro in-daresa. Saso, ne tofofo kaifa esimbuguse, fisi da uju ava buregarera.

<sup>7</sup> Ni tofo rejo aresa amo, tofo mandi ijugaboro ffituse amin-garesa. Geka bekáda bekáda sise a dubo kotise ijugaresa.

<sup>8</sup> Ni geka beká avanembo sise iraresa. Amingaresa amo, ninda gitofu ava gosuse, meka gido beka doyarera. Ainda beká mo: ni sem-bae eni jo sae aresa ava sedo, nindae unongu sari da emboro eni jo tam-bae arera.

<sup>9</sup> Saramana kakatokena mo, emingaoro dae saresa. Saramana kakato ne, nenda babojegari da sari ava, sifo evia inono nininguse, nenda uju ava, ururoro ivuga arera. Ne jo nenda babojegari da geka ava bu fugedo, kovionoghae sae arera,

<sup>10</sup> o nenda roera eni jo bagia ae arera. Ne emingarera. Namondeda Sonemba Kato God da ijuga ava tumonduse, nunda javo jighoro er-are dae sedo, nenda babojegari da saramana e gogoghombururoro gido, babojegari amo nenda sara-mana kakato da irari eveva ava gosuse, tumonduse God da javo jighoro erarira.

<sup>11</sup> Ainda beká mo: evetu genembo isasambu jebuga evovodae irari ava baoro dae sedo, God nunda sonemba futusira. Ava nune ijugetiri namonde gosuseri.

<sup>12</sup> Ava sedo, God da sonemba ava itatamuse, namonde jo God kotae use, fisi da uju ainda amboda amboda udo yae arera. Namonde enda eminda irise, tofofo kaifa esimbuguse God kotise, veka eveva ava use irore!

<sup>13</sup> Aminguse, namondeda God a Sonemba Kato Iesu Keriso, nunda duroghae jovereghe foama namonde esimbugarira ainda Sifo ava, kaifa use gigitarera.

<sup>14</sup> Namondeda ari ekoko da mino mutari dae sedo, a namonde seghe simbugedo nunda tofo bari sedo,

nu fira tofo numoá mutudo, namondedae sedo ambududurusira. Namonde ari eveva avanembo uju use, aoro dae sedo, nu amingusira.

<sup>15</sup> Geka emo, God da gekari; ava sedo, ni fakina isambu futuse, ijugururaso natofo kasama arera. Amin-guse, ninda nano namendi dombuda sise iraresa, a kotugo fakina futururaso, diti fangoro dae sise iraresa. Erama doyeóso evetu genembo mendeni ninda geka ava bun-ore!

### 3

<sup>1</sup> Saso, ninda nano namendi sek-ago evia kotarera! Ne babojegari a gavana da sari ava ningarera. A ari eveva isambu ari dae sedo, kato use irarera.

<sup>2</sup> Ne jo mavedae aji sae arera. Ne edo gido, beisiga jo totoi ae arera, kokomana da uju ava use, evetu genembo isambu da dombuda duru-mugedo irarera.

<sup>3</sup> Ainda tuka mo: evetu genembo mendeni rea eraera ava, namonde barago giti amingedo ghuseri. Namonde giti ari kotae kotae use a gogore use, ari ekoko edo ghuseri. Namondeda uju a fisi da uju mendeni ainda fakinaimi, namonde bundetiri iriari. Namonde sifo aminda, kokomana da bino aindae dubo ekoko use, tofo tofo aji sise, mema futuse itatamedo ghuseri. Namonde tofo tofo imboe use irá ghedo ghuseri.

<sup>4</sup> Avata namondeda Sonemba Kato God da kavevera a dubo bari fira isagha usira.

<sup>5</sup> Isagha usira da sifo aminda, nune sonembetiri namonde jebuga evovodae irari ava tuve ruruseri. Nu namonde sonembusira amo, jo namonde ari eveva eni aoro gido, aindae aeri. Nu taká namondedae joka use sonembari dae sedo, nunda Asisi Kakara da fakinaimi, namondeda dubo joká ava seghe simbugusira. Seghe simbugetiri, namonde jebuga seka budo, kau God da sasingu seka sirorari da kaugo edo irera.

<sup>6</sup> Namondeda Sonemba Kato Iesu Keriso, mino futuse ambududurusira. Aindae sedo, God nunda Asisi Kakara namondekena mutiri, namondeda dubo joká bedo usira.

<sup>7</sup> Nu aminge uju usira da beká mo: namonde nunda sonemba baoro gido, namondedae 'eveva' sarira. Amingari, namonde jebuga evovodae irari gigituse irera, ava barera.

<sup>8</sup> Setena amo, geke bekári. Evetu genembo God tumonduse irera amo, ari eveva ari dae sedo, nenda fakina isambu mutarera. Ainda geke ava ijuge gogoghombaso dae resena! Aminguse irarera, amo evevari. Aimi, evetu genembo sonembarira.

<sup>9</sup> O evetu genembo geke kotae kotae sise irera, o nombuamane reda ghe siroredo fusera, ainda kiki ava sise irera, o gekadae beisiga use irera, o Jusi embo da agho dari da tuka jungarida ava tava use irera, ava darigaso dae resena. Ari ainda jokáda, sonemba a beká eni tefori.

<sup>10</sup> Genembo mave beisiga ururari, nano namendi aindae sari-garera amo, yasi, numokena umbu etoto naká erá amingeure dae sise buregase! Beisiga jo dodo dubo jovereghae arira amo, erá genembo ainde dabade umo gamo use deingheove!

<sup>11</sup> Evetu genembo amingeraera amo, nenda dubo joká anakora bebete eari irá gheraera. Nenda ari ekoko eraera aminda gosuse, kasama eraera.

*3:12-15 Paul Nu Evetu Genembo Ategi Roroimi Tano Usira.*

<sup>12</sup> Na eminge resena. Na yama reighi Nikapoles aminda buvudo irono, yavata tuturo edo didivudo yama doyarira. Ava sedo, na Artemas o Tychicus dirigaono ya nimokena buvari garesa amo, ni edo gido yama, na aminda tambaetesi. Yari budo gi!

<sup>13</sup> Eni mo: ni edo gido, agho dari da kasama kato javo Zenas, a kotugo Apollos sonembururaso, ne javi edo

yarera. Ne rejo ava bu yaetera amo, sonembaso ne budo yaeteri.

<sup>14</sup> Ijugururaso, namondeda nano namendi ari eveva a kavevera ari ava use, evetu genembo mema itatameraera ava, nene sonembarera. Amingarera amo, nenda fakina jo soesa fugae arera. Ainda beká mo: saramana amo evevatori. Yari budo gi!

<sup>15</sup> Evetu genembo namonde dabade irera eimi, ni ategi beká ava erera. Yari budo gi!

Namondeda kokomana tumondari embo, ava ategi erena. Se ningore! God nunda sonemba a esimbugari ava, ne isambukena irare! Avori, nanda geke tano eviri.

Na Paul.

## Paul Nunda Namendi Philemon Kena Reta Gefusira, Amo Eviri.

Philemon mo, nu reighi Kolosi embo da genembo eniri. Nu susu iti fafoderi. Avata kotugo, nu Kuristini edo irei, a nu Paul da komana bekári. Nunda saramana kato eni javo Onesimus, Philemon ava imboe edo, do sufusira. Sumbiri, evetu genembo mendeniimi nu sandi diburada fitero iriri, Paul nu tambudo, Bajari Iesu da Bino Eveva ava ijuge-tiri, Onesimus tumondedo Bajari da tofo usira. Nu nange jovereghe Philemon ghae mainungaetira ava kotise, Paul nu reta evia gefusira. Paul nu Rome aminda dibura edo irise, avose, ghaeko 60 A.D. ainda jokáda gefusira.

Namane geke einda mendo mendo, duruda jo gambaeri. Ainda bek mo: buku emo jo ghousa iraeri. Ava sedo, ni vose duruda tege garesa, geke ainda mendo mendo geke da jiroda irira, ava gido tege kasama aresa.

<sup>1</sup> Arie, nanda namendi! Na Paul. Na Iesu Keriso da javodae sedo diburada fitero irena. Nangaeda namendi Timothy ghae irise, reta emo eregefena. Yari budo gi!

Philemon, ni namane nangaeda namendiri. Namonde dabade saramana edo ghusera aindae, ni ategi beká ava erera. Yari budo gi!

<sup>2</sup> Ekaresia+ ninda kamboda totorugeraera ava, ategi beká erera. Se ningore! A kotugo, namondeda ghasovu Apphia barago ategi erera. Se ningare! Archippus barago, namane ategi beká ava erera. Archippus resena emo, nu namonde dabade Iesu dae isoro use irera. Nu ategi beká ava erera. Se ningare!

<sup>3</sup> Namondeda God Afa a namondeda Bajari Iesu Keriso sonemba a dubo jama nemokena mutoro baove!

<sup>4</sup> Arie, nanda namendi, Philemon ko! Na sifo reda banungeraena amo, na nimo kotise, nindae sedo God kena aiyakoe seraena.

<sup>5</sup> Ainda susu mo: ni nange Bajari Iesu tumonderaesa a God da natofo isambu dubo buraesa, ainda bino ava sirureoro na ningiraena.

<sup>6</sup> A na nindae sedo rea benunu seraena amo, eviri. Ni rea tumonderaesa ava, osa siruraso ningido, evetu genembo mendeni, Keriso nunda sonemba a kavevera nimokena futusira ava, ne itatamedo kasama arera.

<sup>7</sup> Arie, nanda namendiko! Ni ninda nano namendi dubo rurureaso ne fakina eraera ava gido, na ivuga a dubo jama beká ava eraena. Yari budo gi!

*8-22 Philemon Nu Onesimus Dae Joka Aetira, Aindae Paul Benunu Sisira.*

<sup>8-9</sup> Na Iesu Keriso da aghi kato Paul. Na nunda javodae sedo diburada fitero irena. A nangae mo, Iesu da jamenari. Ni nanda geke ava ningaetesi. Ava sedo, na oroko sari dae erena ava, kovionoghae Iesu da javoda saetena amo, avori. Avata ninda dubo bari kotise, na nimokena benunu sari dae erena. Veka eveva ava aso dae sise, nimokena benunu resena.

<sup>10</sup> Ninda saramana kato Onesimus, ni do sufusira, avata nundae joka aso dae sise benunu resena. Ainda beká mo: nu inono, nanda mandi da kaugo edo irira. Amo emingusira. Na diburada ireno, nu ni do sumbu fira namokena buviri, vironu seteno ningi tumondedo, nu Keriso da natofo use, nanda mandi edo irira.

<sup>11</sup> Ni giti Onesimus kena, saramana eni a sonemba eni jo bae edo ghusesi. Avata oroko mo, na nune sonembe gogoghombairira. Kotugo oroko jovereghe yarira amo, nimbarago sonembe gogoghombarira. Nu Iesu da natofo edo irira; ava sedo, nune ni sonembe gogoghombarira.

<sup>12</sup> Na oroko nu dirigiteno, nimokena yari dae erira. Nu nanda dubo

bari mandi ava sedo, nimokena erira amo, inono, tofo nanda dubo joká ava isambu nimokena erefutena.

<sup>13</sup> Na God da Bino Eveva ava vironu sedo ghusena aindae, na diburada fitero irena. Eminda irise, nu buregaono fetedo nangae irise, nu nindae sise, namokena saramana aeti.

<sup>14</sup> Avata jo amingae arena. Amo, ni tofo mandi namo sonembari dae sise, nu namokena mutari saresa amo, avori. O na Onesimus ghae irono, ni namo sonembuse saso, Onesimus irise na sonembarira amo, avori. Avata na Onesimus eminda bu jighirise, nangae dabade irari dae sedo, saono ningaresa amo, jo eveva iraeri. Ava sedo, na mandi dirigaono ya nimokena buvari gido, ni ari eveva use nange kotaresa, ava aresa.

<sup>15</sup> Avose, na eminge resena. Onesimus sifo tufako ni dodo esike ireira da tuka mo: nu oroko jovereghe ya, nengae evovodae dabade iratevu.

<sup>16</sup> Giti, nu ninda saramana kato edo irei. Avata oroko, nu jo amingo iraeri. Nu Keriso de dabade tatedo, nangaeda dubo bari namendi edo irira. Na nu dubo ruruse, uju beká ava eraena. A oroko nimbarago nu dubo ruruse, uju beká ava aresa. Nu ninda saramana kato, avata kotugo, ninda namendi ari, nengae dabade irareva.

<sup>17</sup> Ava sedo, na ninda komanana avavaga kotaresa amo, ni emingaresa! Kau na ya nimokena buvono, ivuga use nandae nati joká daetesa, aminga ava, Onesimus ya nimokena buvari gido, ni nati joká doruse, nu unumbe gogoghombaetesi.

<sup>18</sup> Nu giti nengae irise, dara o bagia usira ava, ni oroko kotise iraresa amota, saso furari ningido, ainda mino nane mutono yari baresa.

<sup>19</sup> Na sekago daba ava sise, nanda ungoi eregefena. Yari budo gi!

Amo, na Paul, nunda ari eko da mino ava, nane mutono yari baresa. (Avata kotugo, na nange nange ni sonembeteno, jebuga evovodae irari

ava rurusesa, ni kasama eresa. Ava sedo, ninda gugua isambu kau nanda roera da kaugo edo iraei.)

<sup>20</sup> Ava sedo, nanda namendi, Onesimus nati joká doruse, bu kaifa aso dae resena. Ni nangae dabade Keriso da natofu edo irera aindae sise, Bajari da javoda amingaresa amo, ni namokena dubo jama futuse, amingaso dae resena.

<sup>21</sup> Geka emo gefuse na itatamerena: na rejudae benunu resena, ava aresa. Kotugo, na kasama erena, na setena avanembo jo ae aresa. Ni Onesimus kaifa tavo e gogoghombaresa, ava itatamerena.

<sup>22</sup> Geka eni mo: na uju erena amo, ni nandae sise, avari vasa eni gategedo esimbugaetesi. Ainda beká mo: na uju use kotise irena, God nenda benunu isambu ningido, sari na diburada ghe buvudo nemokena yarena. Yari budo gi!

*23-25 Paul Ategi Roroimi, Geka Se Tano Usira.*

<sup>23</sup> Epaphras barago, Iesu Keriso tumonderaira aindae, nu bu diburada fitero nangae irira aimi, ni ategi erira. Yari budo gi!

<sup>24</sup> A Mark, Aristarchus, Demas, a Luke, namonde dabade saramana eraera aimi, nene ni ategi erera. Yari budo gi!

<sup>25</sup> Bajari Iesu Keriso nunda sonemba, ne isambukena irare!

Avori, nanda geka tano eviri.

Na Paul.

## Hebrew Embo (O Israel Embo Seraera), Nemokena Reta Gefusera, Amo Eviri.

Buku emo, ghaeko 60-70 A.D. ainda joká aminda, Paul o genembo eni-imi gefusira. Nu Israel embokena gefusira. God giti nemokena emboro+ eni nange yama numokena buvaetera, ava afigedo ijugusira. Emboro+ manai amo, Agho Dari kaifa ari da emborori. Avata buku einda jokáda, genembo buku gefusira aimi, emboro+ seka God afigusira, aindae gefusira. Emboro+ seka amo, God setiri Iesu ambiri, nunda ororoimi emboro+ seka afigusira. Buku einda jokáda resira: emboro+ seka ya God kena buvari amo, emboro+ eveva bekári. Emboro+ manai amo jo emboro seka amingo iraeri. Ava Israel embo isambu kasama aoro dae sedo, buku emo gefusira.

*Reta Hebrew Embo (O Israel Embo Seraera) Nemokena Gefusera, Ainda Mendo Mendo Mo Eviri.*

1:1-3 Genembo mave reta gefusira aimi, nunda natofo Israel embo ategi usira.

1:4–2:18 Keriso mo, nu teriari; o aneya mo, ne veveyakori.

3:1–4:13 Keriso mo, nu teriari; o Moses nengae Joshua ghae mo, ne veveyakori.

4:14–7:28 Keriso nu fristi+ iká bekádari. Fristi+ mendeni mo, jo numongo iraeri.

8:1–9:28 Emboro+ ya God kena buvari Iesu afigusira amo, eveva bekári. Emboro+ manai amo, jo amingo iraeri.

10:1-39 Keriso nunda ororo futusira amo, fakinago bekári. Joba mendeni God kena mutudo ghusera amo, jo amingo iraeri.

11:1-12:29 Namonde tumonduse, God da natofo anakora God tumondedo ghusera, ainda amboda amboda aoro dae sise sisira.

13:1-25 Genembo reta gefusira aimi, geke mendeni mendeni sise, ari eveva aoro dae sedo, tano usira.

<sup>1</sup> Anakora beká, God namondeda abuamanekena ari mendeni mendeni use, a geke mendeni mendeni sido fusira. Nu ferovetakena geke seari, ne budo namondeda abuamanekena ijugedo ghuseri.

<sup>2</sup> Avata oroko ava, nu tofo nunda Mandi dirigetiri ojighira, nunda geke namondekena siri niningerera. Nunda Mandi resena einda fakinaimi, God setiri utu a enda sirorusira. God nunda Mandi mo, sifo amboda roera isasambu, nunda tofo are dae sedo, nune gategusira.

<sup>3</sup> Mandi aikena, God da duro a usasa janimberaira. Kotugo, God irira ainda gari kau daba ava, nunda Mandikena irira. Jo dombu eni iraeri. Mandi ainda geke mo, fakina naghari. Aimi, nu utu a enda bu jighirise kaifa eraira. Nu evetu genembo da ari ekoko seghe fugutusira ainda amboda, nu utuda vitira, God Durode ainda ungo gimandukena anumbusira.

*1:4-14 God Da Mandi Mo, Nu Teriari, O Aneya Mo, Ne Veveyakori.*

<sup>4</sup> Aindae sedo, God nunda Mandi da javo tomanako jijighusira. Aneyamane da javo jijighusira amo, veveyakori. Kotugo geke bekári: God da Mandi mo, nu teriari, o aneyamane mo, ne veveyakori.

<sup>5</sup> God nunda Mandikena eminge sisira:  
“Na Nimamori, orokoá ni nanda Mandi etesi.”

A eni mo eminge sisira:

“Na numamori, a nu nanda Mandiri. Ava saono isagha arira.”

Geka resena emo, jo aneya enikena saeri. Geke emo nunda Mandikena sisira.

<sup>6</sup> Eni mo: God nunda Mandi bego enda eminda sirorare dae sedo, dirigari dae use, eminge sisira:

“Nanda aneya, ne isasambu numoá tumonde bainghaoro dae resena,”

nunda Mandi dae aminge sisira.

<sup>7</sup> O aneya mo, ne nunda Mandi da duruda irera. Ava ijuguse, nendae eminge sisira:

“Nanda aneya, yaura da kakaugo ava simbugeteno irera.

A nanda saramana kakato, avaraka bubura da kakaugo ava simbugeteno irera,”

aneyadae aminge sisira.

<sup>8</sup> Avata nunda Mandikena, God eminge sisira:

“Ni God ri. Nine bajari edo, evovodae ninda natofo kaifa use iraresa.

Ni geka beká sise a ari beká avanembo use, ninda reighi a natofo kaifa use iraresa.

<sup>9</sup> Ni geka sembae a ari ekoko ava imboe use, geka eveva a ari eveva avanembo uju eraesa.

Aindae sedo, God ninda God, nane ni gatededo, ivuga aso dae sedo, bino mindafugo nimokena futuseni.

Ninda bino mo mindafugori, kokomana da bino jo ninda amingo iraeri.”

<sup>10</sup> A geka eni mo, nunda Mandi rea usira a rea arira, aindae eminge sisira:

“Bajari, giti beká giti, ni enda eteso sirorusira. A ni tofo ninda fakinaimi, utu eteso sirorusira.

<sup>11</sup> Utu endaghae manjarira, avata ni evovodae iraresa.

<sup>12</sup> Kau embo boka manai ari seka bu-raera aminga ava, utu a enda manai edo, bakomba ari gido, gaghe esike fitido, utu a enda seka aso sirorarira. Avata ni jo kau eni ae aresa. Ni kau daba ava iraresa,”

God Afa nunda Mandikena aminge sisira.

<sup>13</sup> Avata nunda aneya enikena jo eminge saeri:

“Viti fu, nanda ungo gimandukena anumbe

kaifa ururaso, na ninda gitofu sandi bundedo, ninda ata duruda fitono fafasaore.”

Geka amo, jo nunda aneya enikena saeri. Nu nunda Mandikena sisira.

<sup>14</sup> Ava sedo, aneya resena aindae susu mo, rejori? Ne asisi kau

eniri. Ne God sonemberaera, a God ne dirigeari foama, evetu genembo sonemberaera. God evetu genembo mavejoá gatededo, jebuga evovodae irari ava baoro dae sedo sisira ava, aneya maneimi sonemberaera.

## 2

*2:1-18 God Da Sonemba Namondekena Futusira Amo, Kau Emingori.*

<sup>1-2</sup> Geka God aneyakena mutiri budo namondeda abumanekena osa sedo ghusera amo, geka bekári. Geka ava, mave ningido jo ae usera aikena, God mema a bouvu mutiri itatamuseri. Avata aneya da geka kitakori. O geka oroko nembo sirorerira amo, teria bekári. Aindae beká mo: God da Mandi mo, nu teriari. Aneya mo, ne veveyakori. Ava sedo, erama geka gungubo ningido, aindae amboda yeore dae sedo, namonde, geka beká oroko nembo siroretiri niningerera ava kaifa e gogoghombara.

<sup>3</sup> Geka eimi, jebuga da emboro+ava ijugerira. Amo sonemba teria bekári. Ava sedo, geka ava kotae edo jo tumondae arera amo, namonde jebuga kosasaghedo, tefo sirivo arera. Namonde nange nu tumonduse jebugaetera ava, Bajari nu tofo fira ijugedo ghusira. Aminguse, nu namonde jebugaoro dae sedo, geka rea sedo ghusira ava, nunda natofo mendeniimi bu fera namondekena ijugetero, namonde ava nininguse kasama useri. Geka amo geka beká, ava namonde kasama useri.

<sup>4</sup> Ne aminge ijugero sifo daba aminda, God nunda geka sonembusira. Geka amo tumondaoro dae sedo, nu ari mendeni mendeni a tano dombu eni dombu eni etiri, namonde jo gae iriara ava, aminda gido dudukughuseri. Geka daba ava tumondaoro dae sedo, God nunda uju ava use, Asisi Kakara da fakina a joba ghasetiri ruruseri.

<sup>5</sup> Iesu nu teriari, a aneya ne veveyakori, aindae geka mendeni sari dae erena. Endae namonde seraera mo, mave kaifa arira aindae geka,



God nu enda evia ari sirorare dae kotisira amo, jo edo aneyamaneimi kaifa aoro dae saeri.

<sup>6</sup> Geka eni setiri gembero, God da Geka jokáda irira amo eviri:

“God, ni teriari. Ava sedo, ni genembo redae erekotesi? A redae kaifa eraesi?”

<sup>7</sup> Sifo tufako, nu aneya da duruda irare dae sisesi. Usasa a bino numokena muteso biri,

<sup>8</sup> seteso roera isasambu aida bajari nune edo irira.”

“Roera isasambu aida bajari arira,” resira amo, nu roera isasambudae sisira. Avata oroko emo, geka da beká jo sirorae irira. Namonde evetu genembo, jo roera isasambu kaifa ae eraera.

<sup>9</sup> Avata Iesu kotovo dae resena. Nu sifo tufako aneya da duruda irare dae sedo, God setiri nu sirorusira. God nu, namonde evetu genembo isambukena sonemba mutari dae sedo, setiri Iesu namondeda ari ekokodae ambududurusira. Avata oroko mo, nu usasa a bino bu jighiriri eregoserá. Usasa a bino bu jighirira aida tuka mo: nu namondedae sedo, mema eko beká ava itatamuse ambududurusira. Ambiri gido, God numokena usasa a bino ava mutiri budo, roera isambu da bajari ava, nune edo irira.

<sup>10</sup> God roera isasambu setiri sirorusira, a nunda fakinaimi, roera isasambu bu jighirira. Ava sedo, evetu genembo digari nunda usasa budo, nunda sasingu aoro dae sedo, nune setiri Iesu fira genembo beká ava edo, mema itatamusira. Aminguse, Iesu nu namonde sonembarikena inono usira. God amingusira amo, evevari. Iesu mo, nu jebuga da emboro ijugari dae sedo, amingusira.

<sup>11</sup> Iesu nu evetu genembo da ari ekoko seghe fugetiri, ne God da dombuda eveva beká edo irera. Amingedo, evetu genembo a Iesu de dabade, God da sasingu edo irera. Aindae sise, Iesu namondekena nano namendi sise meka jo gae eraira.

<sup>12</sup> Iesu rea sarira ava kotise, nu God kena eminge sarira:

“Na, nanda nano namendi da dombuda, ninda javo jighono erarira.

Natofo totorugarera aida dombuda, nindae sakai sarena.”

<sup>13</sup> Nu geka eni resira amo, eviri:

“God tumonduse, tofo namoá nunda ungodá fitarena.”

A eni mo, nu eminge resira:

“Sasingu God nandae futusira amo, ne namonde dabade irera,”

Iesu aminge resira.

<sup>14</sup> Nunda sasingu mo, evevetu a gegenembo bekári. Ava sedo, Iesu fira genembo beká da tamo ava budo, kau nemoá avavaga sirorusira. Nu amingusira da beká mo: Satan Ambari da fakina bu jighireira ava, dari nunda fakina dadabare dae sedo, ambudo ambaridaghe jebuge erorusira.

<sup>15</sup> Evetu genembo digari ne Ambari dae oju edo ghusera amo, inono, ne Ambari da fakinaimi bundetiri iriari. Nemo vujegari jebugaoro dae sedo, nu genembo beká da tamo budo, siroredo ireira ambududurusira.

<sup>16</sup> Geka emo isaghari: nu jo aneya sonembari dae sedo amingaeri. Nu Abraham da sasingu ava sonembari dae sedo, fusira.

<sup>17</sup> E givu! Iesu nu God da uju ava use, evetu genembodae joka use, nenda fristi+ iká bekáda ari dae saetira amo, nu kau nunda nano namendi avavaga edo, nenda tamo budo nemoá avavaga siroraeti. A nenda ari ekoko da mino mutari God kote doyare dae saetira amo, nu nenda tamo budo aminge siroraeti.

<sup>18</sup> Kotugo Iesu amingusira. Ava sedo, evetu genembo Satan imi dederuse, nenda fakina dere gosome irá gheraira ava, Iesu nune ne sonemberaira. Orokoá, nemo sonembarikena mo, nu inonori. Aida beká mo: nu tofo mema tafusira, a Satan imi fira numoá dederusira amo, nu inono use jo gofaeri. Ava sedo, nemo sonembarikena mo, nu inonori.

### 3

#### *3:1-6 Iesu Mo, Nu Teriari, O Moses Nu Ijoghakori.*

<sup>1</sup> Avori, nanda nano namendi, God namoá aghi usira aminga ava, nembargo aghi usira. Ava sedo, Iesu nu kau mavegori, ava kotovo dae resena. Namonde tumondaoro dae sedo, God setiri Iesu namondeda fristi+ iká bekáda edo, fira aghi usira.

<sup>2</sup> God Iesu gategusira ainda uju avanembo, Iesu edo ghusira. Kau Moses God da Kamboda+ saramana use, God da uju ava edo ghusira aminga ava, Iesu barago God da uju avanembo edo ghusira. Kambo+ mo, na God da natofo isambudae resena.

<sup>3</sup> Ne kasama ereva: namonde jo kambodae sakai sae eraera. Nu, kambo itari kato andae sakai seraera. Andae sedo, namonde Moses da javo itako jighoro erarira, nu taká God da natofo da eniri. O Iesu mo, God da natofo ainda bajari ava sedo, nunda javo jighoro ere gogoghombarira.

<sup>4</sup> Ainda beká mo: kambo beká evetu genemboimi itiraera amo, kambo a roera digari ainda susu mo, God ri.

<sup>5</sup> Geka bekári: Moses nu God da saramana kato edo irise, God da uju ava edo ghusira. Aminguse, God amboda rea sari isagha aetira ava, Moses nu God da aghi use, osa sedo ghusira. Moses nu God da saramana katori.

<sup>6</sup> Avata Keriso mo, God da Mandiri. Nu God da kambo+ ainda bajariri. Nu God da uju ava use, God da kambo+ nune kaifa eraera. A God da kambo+ mo, namondeda sise resira. Namonde fakina edo, jo oju ae irise, namondeda gigitari a tumondari jo doyaerera amo, namonde nunda natofo edo irarera.

#### *3:7–4:13 God Namondeda Jangutari Da Vasa Ava Simbugerira.*

<sup>7</sup> Namonde nange God da natofo edo iraetera ava, Asisi Kakarai setiri God da Geka jokáda gefuseri. Amo eviri:

“Oroko God beka sirurari ningareva amo,

<sup>8-9</sup> erama gogore edo, God ighagha eove dae sise resena.

Kau nembuamane usera aminga ava, erá eove dae sise resena.

Nembuamane usera andae, God eminge resira,

‘Ne reighi uvu a evetu genembo irae da vasa aminda, na ighagha edo, nanda fakina ava ijujuseri.

Ne ghaeko 40 ainda jokáda nange nanda fakinaimi tavo eno gosusera ava kotae edo,

nanda fakina ava sekago ijujuseri.’

<sup>10</sup> Na andae sedo, nembuamandae janje eko etiri siseni,

‘Ne na sifo ghousa ighagha eraera, a nanda sari ava jo ningae eraera.’

<sup>11</sup> Aminge sedo, na dubo eko etiri, durumuguse beka gagojuse siseni,

‘Ne jo namokena foa terovo, namonde dabade jangutae eraera,’”

God da Geka aminge resira.

<sup>12</sup> Avori, nanda nano namendi, namondeda God nu jebuga irira. Ava sedo, nenda janje joká ava ijujevu! Erama nu kotae edo, ighagha eove dae sise resena. Fakina use, tumondaovo dae resena.

<sup>13</sup> God da Geka jokáda, geka ‘oroko’ rea resira ava gembena emo, jo oroko dabako andae sise, saeri. Nu tumondaoro dae sedo, goroto namondekena futusira, andae resira. Goroto einda jokáda, ne sifo evia inono, tofo tofo enjise saramana e gogoghombareva. Erama ari ekoko da derariimi dereuri gogore eove!

<sup>14</sup> Ai resira amo: fakina edo gigituse irarera amo, namonde dabade tatedo Keriso da natofo arera.

<sup>15</sup> God da Geka andae sise, eminge resira:

“Oroko God nu beka sirurari ningareva amo, erama gogore edo,

God ighagha eove dae sise resena.”

<sup>16</sup> Evetu genembo God da Geka ningido ighagha usera amo, mavedae resi? A kote givu! Evetu

genembo Moses unumbe reighi Egypt ghedo budo fusira aindae resira.

<sup>17</sup> A kotugo, evetu genembo daba aindae, geke evia resira: “Ghaeko 40 ainda jokáda, God evetu genembo-dae janje eko usira,” geke amo, evetu genembo daba aindae resira. Evetu genembo amo, ne ari ekoko ero gido, God siri ne sirivo udo fuseri.

<sup>18</sup> A evetu genembo daba aimi God ighagha usera aindae, God durumuguse, beka gagojuse eminge sisira, “Ne jo namokena foa terovo, namonde dabade jangutae arera,” aminge sisira.

<sup>19</sup> Avori, namonde kasama erera, ne God kena jo ya tere jangutae usera da beká mo: nemokena tumondari tefori.

#### 4

<sup>1</sup> Avata God nu namonde kaifa ururari jangutarera, aminge beka gagojuse sisira. Ava sedo, namonde nundae igheghi use irarerera! Erama gofedo, numokena ya jangutari ava kosasagheore dae sise, namonde igheghi use irarerera.

<sup>2</sup> Ainda beká mo: God da Bino Eveva seoro namondeda abuamane ningido ghusera aminga ava, God da Bino Eveva namondekena setero ningido irera. Jo dombu eni iraeri. Avata ne geke ava, dengoroimi nembo nininguseri. Ava sedo, ne aminda sonemba eni jo baeri. Ainda beká mo: ne ningido, jo tumondae useri.

<sup>3</sup> O namonde mave tumonderaera amo, God kena ya teredo, dabade jangutari dae erera. Nu namondedae sedo jangutari da vasa a sifo gategusira ava, jo ighagha use eminge saeri:

“Na dubo eko etiri, durumuguse, beka gagojuse eminge siseni, ‘Ne jo namokena foa terovo, namonde dabade jangutae arera.’ ”

Amo jo jangutari da vasa a sifo namondedae sedo gategusira ava, jo ighagha use saeri. God nu anakora saramana iri, utu enda siroretiri

nunda saramana dadabusira. Sifo aminda, nunda jangutari da vasa a sifo gategetiri fefetusira, ava irira. Ava sedo, geke bekári: evetu genembo eveva ainda jangutari da vasa a sifo gategetiri irira.

<sup>4</sup> Vasa eninda nunda Geka jokáda, God aindae sise, eminge resira:

“God nunda saramana sifo 6 ainda jokáda etiri isambu dadabetiri, sifo 7 aminda, nu jangutusira,”

God da Geka aminge resira.

<sup>5</sup> Kotugo, evetu genembo jo tumondae eraera aindae, eminge resira:

“Ne jo namokena foa terovo, namonde dabade jangutae arera,”

aminge resira.

<sup>6</sup> God evetu genembo jangutaoro dae sisira. Avata evetu genembo giti God da Bino Eveva niningusera amo, ne jo tumondae edo, God kena jo ya teredo, God de dabade jangutae useri. Avata mendeni amboda sirorusera aimi, ne ya teredo, God de dabade jangutarera.

<sup>7</sup> Evetu genembo mendeni da kotari mo: God nu jangutari da sifo sisira amo, nu Moses da ambo jimbi, Joshua nunda sifo aindae sariá sisira. Avata namonde kasama erera, amo jo geke beká iraeri. Ainda tuka mo: Joshua ambiri ainda amboda, God setiri David nu sifo eindae sise gefusira. God numoá tumondaoro dae sedo, sifo goroto emo afigusira. Avori, David anakora jebuga irise, sifo goroto seka afigedo irira, aindae ‘oroko’ sisira. Nunda geke, amo eviri:

“Oroko God nu beka sirurari ningareva amo, erá gogore eove!”

God setiri David aminge gefusira.

<sup>8</sup> Avori, Joshua nu giti, evetu genembo unumbe bu jangutari da vasa aminda ya teredo sifo aminda jangutaetera amo, God nu amboda, numokena ya teredo jangutari da geke jo sae aeti.

<sup>9</sup> Avata God amboda, jangutari da sifo aindae geke sisira. Ainda beká

mo: kau God sifo 6 ainda jokáda saramana etiri dadabetiri, sifo 7 aminda jangutusira aminga ava, God da natofo amboda jangutarera.

<sup>10</sup> Kau God nunda saramana dodo jangutusira aminga ava, mave God kena ya terarira amo, nu sifo aminda, nunda saramana dodo jangutarira.

<sup>11</sup> Ava sedo, God kena ya tere jangutari dae sedo, namonde fakina beká ava arera. Erama namonde eni God da Geka ningae edo, jangutari da vasa a sifo ava kosasagheore dae sise resena.

<sup>12</sup> God da Geka mo, jebuga irira. Geka ainda mendo sighonogori. Aimi gayari, genembo da duboá afigarira. Fisi da uju, nunda kotari, a nu rea dubo jokáda uju eraira a koteraira amo, foa isagha eraira. Amingurureari, God da Geka aimi evetu genembo da dubo jokáda rea irá gheraira, ava ijujeraira.

<sup>13</sup> God kena roera jungari eni tefori. Roera isasambu utuda a endada, God kena mo isaghari. Namondeda irari a ari aindae, nune ategi arira.

*4:14–5:10 Emboro+ Ya God Afakena Buvari Ava, Iesu Nune Afigusira.*

<sup>14-15</sup> Namondeda fristi+ iká bekáda Iesu numori. Nu namondeda dara a bouvu ava kasama eraira. Nu aindae sedo namondedae joka eraira. Kau derari namondekena foa gheraira aminga ava, Iesu kena foa ghedo ghusira. Avata Iesu nu jo gofedo, a ari eko eni jo ae usira. Nu teria bekári. Nu vitíra utu darigedo, God da dombuda teredo fefetusira. Ava sedo, namonde fakina beká ava use, tumonde gogoghobarera.

<sup>16</sup> Namonde tumo fainghedo, God da anumba vasa sonemba buraera aminda, ya buvarera. Aminda sonemba tafuse iroro, sifo reda sonemba barera, nu sifo daba aminda joka edo, namonde sonembarira.

## 5

<sup>1</sup> Fristi+ da giti jighari mo, nenda kokomana ainda jokáda eni gategeoro fetedo ghuseri. Amingedo ghusera da beká mo: ne ari ekoko da mino God kena mutari dae sedo, a sino fuka de ojedo, budo joba God kena mutari dae sedo, fetedo ghuseri.

<sup>2</sup> Fristi+ da giti jighari resena emo, ne taká gegenembori. Nembarago dara edo ghuseri. Ava sedo, evetu genembo mendeni bunise eraera a dara eraera aindae, ne joka edo, durumuguse eraera.

<sup>3</sup> Nembarago dara eraera; ava sedo, ne jo nenda natofo kikiako, ainda ari ekoko da mino mutae eraera. Ne totofo nenda ari ekoko ainda mino barago muturaera.

<sup>4</sup> Genembo nu jo tofo gatededo, fristi+ da giti jighari ae arira. Kau God setiri giti beká, Aaron fristi+ da giti jighari usira aminga ava, God seari nene fristi+ da giti jighari eraera.

<sup>5</sup> Kau daba aminga ava, Keriso jo tofo gatededo, viti fristi+ iká bekáda aeri. God nu ainda saramana are dae sedo, numoá gatedeguse eminge sisira: “Na Nimamori, orokoá ni nanda Mandi etesi,”

aminge sedo,

<sup>6</sup> nu vasa eninda eminge sisira:

“Kau Melchizedek aminga ava, ni fristi+ edo, evovodae amingedo iraresa,”

aminge sisira.

<sup>7</sup> God nu Iesu ambarida ghe saghimbe barikena inonori. Ava sedo, Iesu nu genembo edo endada irise, sorara janjagughae God kena banungedo ghusira. Banunguse, nu God kena igheghi use, nunda geka ningido ghusira aindae sedo, God nunda banungari niningusira.

<sup>8</sup> Nu God da Mandiri, avata nu nange sabua+ edo, geka nininguse ari ava kasama aetira aindae sedo, God setiri nu mema tafusira.

<sup>9-10</sup> Aminguse, Iesu fristi iká bekáda arikena inono usira. God numoá fristi+ iká bekáda edo evovodae

amingedo irare dae sisira amo, kau Melchizedek fristi+ usira aminga ava are dae sisira. Iesu mo, jebuga evovodae irari da susuri. Evetu genembo mave Iesu da geka ningarera amo, nemokena jebuga evovodae irari ava mutarira.

*5:11–6:12 Erá God Kotae Edo, Nenda Irari Manai Aminda Jovereghe Yeove!*

<sup>11</sup> Keriso nange namondeda fristi+ iká bekáda use irira aindae, na geka mendeni mendeni saeteni. Avata nenda kasama tufakori. Sarena, jo kasama ae areva ava sedo, na nange nemokena ijugareni? Nemokena ijugari mo, fakaragori.

<sup>12-13</sup> Ne tofofo kasama mendeni mendeni budo, anakora evetu genembo mendeni da ijuga kakato ava edo iraetevu. Avata ne jo inono ae ireva. Ava sedo, mave sekago yama, God da Geka mendeni anakora ningi kasama aeteva ava, dengoro indururari ningaetevu. Ne kau sasingu ami mindiraera ainda kaugori. Kau sasingu seka fumbari, bayau fakara jo mindae eraera aminga ava, ne God da Geka raugako ava jo tofofo kasama ae eraeva. Mave amingarira amo, nu sasingako irise, ari eveva a ari eko nu bunariri. Geka beká a geka sembae barago, nu bunariri.

<sup>14</sup> O evetu genembo beká, ne bayau fakara mindiraera. Evetu genembo beká, ne gasegi use, ari eveva a ari eko ne kasama eraera. Geka eveva a geka beká barago, ne kasama eraera. Avata ne jo amingae eraeva.

## 6

<sup>1</sup> Ava sedo, Keriso da bino ne anakora ningi kasama aeteva ava, jo sekago saono ningae areva. Amo dodo, namonde Keriso da Geka fakara a jungarida ava, mendeni se ningarera. Aminguse, geka raugo giti setena ava, oroko jo sekago sae arena. Amo nange nange ari ekoko vujegedo, God tumondaetera,

<sup>2</sup> kotugo bafataito da ijuga, ungo jiroda fitari da ijuga, evetu genembo

nange nangedo ambarida ghe jebuge erarera, a evetu genembo mendeni nenda ari ekoko da mino, nange nangedo evovodae irise itatamarera, ainda geka isambu jo eminda sae arena.

<sup>3</sup> Ava sedo, God ‘avori’ sarira amo, namonde sasingu da kotari a geka dodo, God da Geka fakara a jungarida ava, mendeni se ningarera.

<sup>4</sup> Na eminge resena ainda beká mo eviri. Mave God giti tumondedo, amboda God kotae arira amo, nu nange unumbaoro dubo jovereghari, foa sekago God tumondari? Evetu genembo aminga, ne giti God da usasada deinghuse, utu da joba ava itatamedo, Asisi Kakara ruruseri.

<sup>5</sup> Aminguse ne itatamuseri: God da Geka evevagori. A sifo amboda furarira, ainda fakina barago ne itatamuseri.

<sup>6</sup> Amingusera avata, ne amboda God kotae useri. Ava sedo, jo sekago dubo jovereghari, God tumondari da kaugo iraeri. Ainda beká mo: God kotae use irarera amo, inono, ne tofofo God da Mandi, natofofo da dombuda sekago arafa doruroro gido, natofofoimi ne dere jirarera.

<sup>7</sup> Evetu genembo kau enda da kaugori. Vareda boriija direari, roera veka batuno edo vitido beká eraira aimi, vare govani kakato da eveva bu foa gheraira. Beká eraira da susu mo: God vare amo esimbugusira.

<sup>8</sup> O tefofo vive a titifa ai viti gajari irarira amo, beká tefori. Avose, God vare simbora ari da sifo ojira utua erira. Amboda avarakai dungari avi dadabarira. Avori, evetu genembo mave giti God da Geka ningido irise, amboda God kotae arera amo, ne kau aminga ava arera.

<sup>9</sup> Nanda kokomana, na oroko geka fakarago seteni. Avata, ne dubo ruruse eminge resena. Na kasama erena, ne jo amingo iraeri. Jebuga da esimbugari eveva ava, nene bareva.

<sup>10</sup> Ainda tuka mo: God nu geka beká sari katori. Nenda saramana edo ghuseva ava, nu jo kotae ae arira. A nundae sise, ne

nunda natofo mendeni dubo ruruse, sonembedo ghuseva a sonember-  
aeva ava, nu jo kotae ae arira.

<sup>11</sup> Na uju beká ava erena amo, ne isambu nenda fakinaga ava ururovo, ne rea gigiteraeva ainda beká ava foa isagha ari bareva.

<sup>12</sup> Erama guka dagaya eove dae sise resena! Kau evetu genembo mendeni durumugedo, gigituse tumonde gogoghombraera, aminga ava areva amo, God nendae beka gagojuse, rea mutari sisira ava bareva.

### *6:13-20 God Beka Gagojusira Amo, Jo Gungubo Iraeri.*

<sup>13</sup> God Abraham dae rea ari sisira ava, tumondare dae sedo, God numokena beka gagojuse kotua gatisira. God teria bekári. Eni jo numongo iraeri. Ava sedo, nu tofo numoá, nunda javoda beka gagojusira.

<sup>14</sup> Aminguse, sisira, “Na beka gagojuse, nimokena eminge resena. Na ni esimbugururono, ninda sasingu a imemesiri digarigo sirorarera.”

<sup>15</sup> God aminge setiri, Abraham durumugedo gigitiri, God rea mutari sisira ava, fira siroretiri gosusira.

<sup>16</sup> Evetu genembo mendeni, kotofuko da javoda o God da javoda beka gajeraera. Nenda geke natofo tumondaoro dae sedo, amingeraera. Evetu genembo, ne kotofuko da javoda o God da javoda beka gajarera amo, natofo nenda geke tumonduse, jo dumo bauso ae arera.

<sup>17</sup> Kau daba aminga ava, God nunda beka gagojusira. Nu uju usira amo, evetu genembo kasama aeteri: nunda beka gajari ainda beká sirorarira, jo gungubo iraeri. Amo, evetu genembo God da jebuga baetera ava, nene barera. Nemokena rea mutari sisira ava, mutari ne barera. God ne jo doyae arira. Ava kasama aoro

dae sedo, nu jo tefo beka gajaeri. Nu beka gagojuse, kotua gatisira. Avata genembo teria eni jo numongo iraeri. Ava sedo, nu tofo nunda javoda beka gagojusira.

<sup>18</sup> Ava sedo, God nu roera etoto naká usira. Amo, nu beka gagojusira, kotugo nu tofo kotua gatisira. Ava sedo, nu jo nunda beka gajari doyae arira. Ainda beká mo: God rea seraira amo, isambu beká vanembori, numokena gungubo tefori. Aindae sedo, namonde mave giti endada oju use, nunda sonemba bari dae sedo, isambu gaghe numokena isera amo, nunda beka gajari ava tumondarera. Nu rea mutari sisira, ava bari dae kotise, gigituse irarera.

<sup>19</sup> Namonde ava gigituse irarera amo, namonde jo dubo bunae arera. Namonde fakina budo fetarera. Namondeda gigitariimi namondeda asisi sonemberaira. Namondeda ghamo jokáimi kaifa gigita emo mutero aira, God da vasada teredo irira. Kau ghaeko evia inono, God da Kambo+ jokáda, namonde Jusi embo da fristi+ da giti jighari joba da ororo budo ya, God da vasa kakara beká emboi gajetero irira, aminda tereraira aminga ava, namondeda kaifa gigita emo aira God kena teredo irira.

<sup>20</sup> Iesu nu kau fristi+ da giti jighari avavaga edo, namondedae sedo, nu namondeda fristi+ iká bekáda usira. Edo ira aminda teredo, God kena irira. A fristi+ iká beká ainda saramana ava, nune use evovodae irarira. Kau Melchizedek giti fristi+ da saramana edo ghusira aminga ava, Iesu nune fristi+ da saramana ava evovodae use irarira.

## 7

### *7:1-14 Melchizedek Da Kikiri.*

<sup>1</sup> Iesu nu kau Melchizedek setena, ainda beká mo eviri. Melchizedek nu reighi javo Selam<sup>1</sup> ainda kini

<sup>1</sup> 7:1: Reighi javo Selam resira amo, nu reighi oroko namonde Jerusalem seraera andae resira. Baiboro (Bible) jokáda, Melchizedek nunda noi numamo da javo jo saeri, a nu nange sirorusira, a nange ambududurusira, ábarago Baiboro jokáda jo saeri. Ava sedo, kau nu evovodae irari ainda kaugori. Avori, genembo reta evia gefusira ava kotise, ijugaboro Melchizedek kena fiftuse, Iesu dae sisira.

(king) edo irei, a kotugo, nu God Teria Beká ainda fristi+ edo irei. Avori, sifo eninda, Abraham nu isoro edo, kini mendeni detiri ambero jovereghe natida iri, Melchizedek fira emboro soroda Abraham tambudo, numoá esimbugusira.

<sup>2</sup> Etiri, Abraham isoro use, roera sosighi usira ava budo, diti ghabu sovenisoveni fitido, diti dabako budo, God da javoda Melchizedek kena futusira. Javo Melchizedek da tuka mo: 'Kini (King) Ari Eveva Eraira, A Geka Eveva Seraira', aindae seraera. Kotugo, nunda reighi Selam ainda javo da tuka mo 'Mainungari'. Ava kotise, 'Mainungari da Kini' barago nundae sedo ghuseri.

<sup>3</sup> Melchizedek dae, nunda kiki jo ghousa gambaeri. Nunda noi numamo da javo, novia nombua da javo eni jo gambaeri. A nanjigo sirorusira a ambududurusira, ábarago jo gambaeri. Kau God da Mandi avaga, nu fristi+ edo, evovodae ireira ava gefuseri.

<sup>4</sup> Melchizedek nunda teria kau mavego ava kote givu! Namonde Jusi embo da abua giti beká, Abraham nu eredo, God da javoda roera, nune isoro use sosighi e rurusira, ainda diti eni Melchizedek kena futusira.

<sup>5</sup> Oroko, namondeda mendeni Levi ondi+, ne namondeda fristiri. God nunda Agho Dari jokáda setiri ne fristi+ useri. A kotugo, Agho Dari irira; ava sedo, namondeda gugua diti ghabu sovenisoveni fitido, Levi ondikena+ ainda diti eni muteoro ne buraera. Levi ondi+, ne Abraham da sasinguri, kotugo namonde barago, Abraham da sasinguri. Ne namondeda totofori, avata ne namondekena gugua diti eni buraera.

<sup>6</sup> Avori, Melchizedek kote givu! Nu jo Levi ondi+ iraeri. Avata nu Abraham kena gugua diti dabako rurusira. Kotugo, geka eni mo, God nu Abraham kena sonemba mutari dae sise, beka gagojusira. Ava sedo, Abraham nu genembo teriari. Avata Abraham nune jo Melchizedek esimbugaeri. Melchizedek nune eredo,

Abraham esimbugusira.

<sup>7</sup> A namonde kasama erera: esimbugari mo, evetu genembo babai aimi, nene evetu genembo veveyakokena muturaera. Genembo ijoghako aimi jo eredo, kotofu ava esimbugae arira. Ava sedo, Melchizedek nu genembo teriari, a namondeda abua Abraham nu ijoghakori.

<sup>8</sup> Levi ondi+ da fristi+ oroko God da gugua diti eni buraera amo, ne amburaera. O Melchizedek, God da javoda gugua diti eni Abraham kena rurusira amo, nu jo ambae irira. God da Geka ava ijugerira.

<sup>9-10</sup> Namondeda fristi+ oroko irera, nembarago veveyakori, o Melchizedek nu teriari. Ainda beká mo: Melchizedek Abraham tafusira da sifo aminda, Levi jo sirorae iriri tafusira. Amo inono, Levi ondi+ oroko God da javoda, gugua diti eni buraera, ne nombua Abraham da tamonda irise, Abraham de dabade gugua diti eni nene Melchizedek kena futuseri.

<sup>11</sup> Levi ondi+ ne fristi+ edo, God da Kambo a joba ava, kaifa aoro dae sedo, God setiri Moses nunda Geka gembu mutiri, namonde Israel embo ruruseri. Avori, Levi ondi+ saramana ururoro inono aetira amo, God jo Levi ondi+ da genembo Aaron da oro dodo, fristi+ eni oro eni ajagha, Melchizedek avavaga gategae aeti. Avata Levi ondi+ da saramana aimi, jo natofo da ari ekoko seghe fugoro dadabari da kaugo iraeri.

<sup>12</sup> Avata God fristi+ da oro manai dodo, eni gategari fetaetira amo, nune agho dari seka eni barago nune sari fetaeti.

<sup>13</sup> Ainda beká mo: God da Geka ainda jokáda, fristi+ eni kau Melchizedek avavaga sirorare dae sisira amo, namondeda Bajari dae sisira. Kotugo, nu namonde Jusi embo da oro eninda vekari. Nunda totofo eni jo joba a sino fuka da ororo futuse, fristi+ da saramana jo aeri.

<sup>14</sup> Namondeda Bajari, nu Judah ondiri. Kotugo, Moses Judah ondi eni fristi+ are dae nu jo saeri.

*7:15-28 Fristi+ Kau Melchizedek Avavaga Sirorarira.*

15 Oroko ava, isagha eregosera. Geka bekári: God agho dari seka eni setiri fetetiri, fristi+ eni kau Melchizedek avavaga sirorusira.

16 Nu jo evetu genembo da kottariimi a agho dariimi, fristi+ aeri. Nunda jebuga evovodae irarira ainda fakina aimi, Iesu fristi+ usira.

17 God nunda Geka jokáda rea Iesu dae resira amo, eviri:

“Ni kau Melchizedek avavaga fristi+ edo, evovodae amingedo iraresa,”  
aminge resira.

18 Agho Dari manaikena mo, fakina a sonemba tefori. Ava sedo, God dotiri esike irira.

19 Ainda beká mo: giti Moses da Agho Dariimi, evetu genembo da dubo joká jo eveva aeri, a kotugo roera eni barago jo eveva aeri. Oroko God setiri namondeda tumondari eveva sirorumuta. Aimi, emboro+ afigusira aminda, namonde ya God kena buvudo, utua fetarera.

20-21 Gegenembo mendeni fristi+ usera amo, God jo geke eni sise beka gajaeri. O Iesu fristi+ are dae sedo, God beka gagojuse kotua gatisira amo, eviri:

“Bajari beka gagojuse kotua gatisira. Ava sedo, nu jo ighagha ae arira.

Nunda beka gajari eviri: ‘Ni fristi+ edo, ainda saramana ava evovodae use iraresa,’ ”  
Iesu kena aminge sisira.

22 God Afa nu aminge sise, beka gajetiri gido, namonde kasama era: emboro+ Iesu afigerira amo, emboro+ evevari. O emboro+ manai Moses da Agho Dariimi afigusira amo, jo emboro seka amingo iraeri.

23 Moses tano ghedo oroko, namonde da fristi+ da giti jighari jo daba etoto iraeri. Ne digariri. Ainda susu mo: Levi ondi+ eni vitido, fristi+ da giti jighari da saramana budo ireira ava ambiri, enii viti nunda vasa rurusira. Aminguse, ne

digarigo fristi+ da giti jighari da saramana edo ghuseri.

24 O oroko emo, Iesu nune fristi+ edo, ainda saramana ava evovodae use irarira. Ainda tuka mo: nu evovodae irarira; nu jo ambudo nunda saramana genembo enidae doyae arira.

25 Ava sedo, nu inonori. Mave nu tumondedo, nunda javoda God Afakena ya buvari sarera amo, Iesu sonembururari ne ya fakina budo fete simbugarera, oroko a evovodae. Ainda beká mo: Iesu evovodae God da dombuda irise, nendae sise benunu seraira.

26 Ava sedo, Iesu nu namondeda fristi+ iká bekáda edo, namonde sonembururari irarera. Ainda beká mo: nu kakara bekári. Nu eveva vanembori. Ari eko eni numokena tefori. God setiri nu, ari ekoko embo endada irera ava, dodo vitira utu darigedo, iká bekáda vitisira. Ava sedo, nu namondeda fristi+ iká bekáda edo, namonde sonembururari irarera.

27 Fristi+ da giti jighari giti iriara, ne jo numongo iraeri. Ne sifo ava inono, sino fuka de ojedo, ari ekokodae joba God kena mutudo ghuseri. Giti mo, totofo nenda ari ekokodae mutudo ghuseri. Ainda amboda, natofo isambu da ari ekokodae mutudo ghuseri. O Iesu mo, nu umbu dabako tofo mandi numoá mutudo, ari ekoko da mino mutiri inono usira.

28 Ai resira amo: Moses da Agho Dari aimi setiri, gegenembo fristi+ fefetusera amo, ne ari ekoko embori. Avata Agho Dari futusira ainda amboda, God beka gagojuse kotua gatedo setiri, nunda Mandi fristi+ iká bekáda usira. Nunda Mandi amo, nu ari ekoko tefori, a nu mino mutarikena inono bekári, oroko a evovodae.

## 8

*8:1-13 Iesu Nu, Namondeda Fristi+ Iká Bekádari.*

1 Na geke setena ainda tuka mo, eviri. Namondeda fristi+ iká bekáda amo, nu kau emingori.



Nu utuda God Durode ainda avo anumba aminda, ungo giman-dukenu anumbirira.

<sup>2</sup> God da vasa kakara beká ainda jokáda, nune fristi+ iká bekáda, ainda saramana ava use irira. Giti, namondeda abumane nene emboimi dobo dighido, aminda God tumonde bainghedo ghuseri. O vasa resena emo, God da vasa kakara beká utu aminda irira. Bajari nune tofo mandi etiri sirorusira.

<sup>3</sup> Fristi+ da giti jighari isambu, ne joba a sino fuka da ororo God kena mutari dae sedo fristi+ useri. Ava sedo, namondeda fristi+ iká bekáda, numbarago joba a ororo mutaeti. Nu rea futusira, ainda geka oroko sari dae erena.

<sup>4</sup> Namondeda fristi+ iká bekáda Iesu, nune endada iracetira amo, nu jo fristi+ ae aeti. Ainda beká mo: endada, fristi+ mendeni irera. Irise, Agho Dari manai, joba rea mutari resira, ava muturaera.

<sup>5</sup> Ne fristi+ da saramana eraera amo, tefo dangio vanembori. Beká a susu mo, utuda irira. Moses dobo iti simbugari dae sedo simbugiri, God numokena sisira, “Dobo da susu utuda irira, ainda dangio doriri aminda ijugeteno gosusesi. Dobo kau aminga ava iti simbuge!” aminge sisira.

<sup>6</sup> Avata Iesu jo, fristi+ setena, amingo iraeri. Saramana nune utuda eraira amo, teriango bekári. Nene endada eraera amo, kitakori. Namonde nu tumondedo, ya God kena buvudo jebuge gogoghombare. O Agho Dari manai tumondare amo, jo jebugae arera. Aindae sedo, emboro+ Iesu nune afigusira amo, evevari. O fristi+ emboro+ endada afigusera amo, jo amingo iraeri.

<sup>7</sup> Ya God Afakena buvari da emboro+ Iesu afigusira amo, evevari. Ainda beká mo: emboro+ giti ireira, aminda ya God kena buvaetera amo, nu jo emboro+ seka eni afigae aeti.

<sup>8</sup> Avata evetu genembo jo agho dari da emboro+ manai aminda ya

God kena buvae etero gido, aindae God eminge sisira:

“Bajari resira, ‘Sifo buvari dae erira. Sifo aminda, na Judah ondi a Israel embo isambudae, emboro+ seka afigarena.

<sup>9</sup> Na nembuamane unumbe ungodabudo, reighi Egypt ghedo furari dae use, emboro+ foa namokena buvari ava afiguseni.

Emboro+ seka oroko nembo afigari resena emo, evevatori.

Emboro+ giti nembuamandae afigusena amo, jo amingo iraeri.

Emboro+ foa namokena buvari giti afigusena ainda geka ava, ne jo ningae irise, gogore edo dotutuseri. Aindae sedo, na ne kotae useni.

<sup>10</sup> Avori, emboro+ seka Israel embo foa namokena buvoro dae sedo afigarena amo, kau emingori.

Nanda Geka a Agho Dari nenda jiroda fitono irarira, a nenda dubo jokáda gembono irarira.

Na nenda God arena. Ne nanda natofa arera.

<sup>11</sup> Ne nenda kokomanakena o nenda nano namendikena, jo eminge sae arera,

“Bajari kasama aso dae resena!” jo aminge sae arera.

Ainda beká mo: sifo aminda, ne isasambu na kasama arera.

Kokotofu a sabua mo, ne isasambu na kasama arera.

<sup>12</sup> Nenda ari sembae gido joka arena, a nenda ari ekoko ava kote doyarena,”

Bajari aminge sisira.

<sup>13</sup> God emboro+ sekadae sise, emboro+ manai amo dotiri, emboro+ gajari dae usira. A namonde kasama erera: emboro+ gajarira amo, gajari dadabarira.

## 9

*9:1-22 Enda Da Tumonde Bainghari A Utu Da Tumonde Bainghari Jo Dombu Dabako Iraeri, Dombu Nunda Nundari.*

<sup>1</sup> God emboro+ numokena ya buvari ava giti afigusira, ainda agho dari a tumonde bainghari da kambo enda eminda irei.

<sup>2</sup> Emboi, dobo eni simbuguseri. Dobo simbugusera aindae, Vasa Kakara sedo ghuseri. Ainda jokáda, ghagha a kandere (candle) rabari da bodaka fitero irei. A farava God kena mutari dae edo ghusera amo, aminda fitido ghuseri.

<sup>3</sup> Vasa Kakara ainda jokáda, embo eni soroda gagojuseri. Emboimi gagojusera amo, Vasa Kakara Beká aindae sedo ghuseri.

<sup>4</sup> Vasa Kakara Beká ainda jokáda, yabiyabina dungari da olta (altar), auri 'gold' imi ari, ava fitero irei. Roera eni barago aminda ffitusera amo, eviri. God emboro+ numokena ya buvari afigusira, ainda tano kau mauva avavagori. Mauva resena emo, auri 'gold' imi davetero irei. Mauva ainda jokáda, roera mendeni vendero irei. Eni mo, okia auri 'gold' imi ariri. Okia ainda jokáda, God ghaeko 40 ainda jokáda, bayau javo 'mena'<sup>4</sup> ava mungo jokáda muteari voseari, rete dabade edo mindido ghusera ainda mendeni ava budo, aminda vendero irei. Aaron da ketua ifuda batuno usira, ábarago ainghae dabade mauva daba aminda vendero irei. A kotugo, God nunda Agho Dari ghabu sovenisoveni ghamana etoto ainda tamonda gefusira, ainde dabade mauva aminda vendero irei.

<sup>5</sup> Mauva etoda, God Afa da usasa da tano, kau aneya durode etoto naká, Serubim seraera, ainda dangio ava keve fitero iriari. Serubim da ghabuimi, ari ekoko kote doyarri da vasa ava gajetero irei. Avori, ainda geke digari bekári. Ágido, jo oroko nembo saono dadabae arira.

<sup>6</sup> Avori, roera setena ava, simbugetero fetetiri, fristi+ tuturo edo dobo aminda teredo, nenda joba mutari da saramana use ya foa ghedo ghuseri, Vasa Kakara aminda.

<sup>7</sup> Avata Vasa Kakara Beká aminda, fristi+ da giti jighari nusuka ya teredo ghusera. Amo, ghaeko dabako ainda jokáda, nu sifo dabako aminda nembo ya teredo ghusera. A nu jo tefo terae edo ghusera. Tofo nunda ari ekokodae a natofo da ari ekokodae, nu sino fuka da ororo budo, joba mutari dae sise, ya teredo ghusera.

<sup>8</sup> Amingedo ghusera aimi, Asisi Kakara ijugerira: dobo manai irarira amo, Vasa Kakara Beká aminda ya terari da emboro+ jo afigae irira.

<sup>9</sup> Amo oroko namondekena ijugaboro eveva ijugerira. Ijugerira amo, eviri. Joba a sino fuka da ororo mutudo ghusera aimi, evetu genembo da dubo joká jo simbugari eveva ae arira.

<sup>10</sup> Joba a sino fuka da ororo mutudo ghusera da tuka mo: erá tamo uvu bayauimi bebete eure dae sedo amingedo ghuseri, a erá tamo dongonoimi eko eure dae sedo, tamo seghuse amingedo ghuseri. Avata jo aimi, evetu genembo da dubo joká simbugari eveva ae arira. Jo eveva ae etiri gido, God nu evetu genembo da dubo joká seghe simbugari dae sedo, a kotugo, emboro+ seka siro-rare dae sedo, sifo ffitusira ava fira buvurutusira.

<sup>11</sup> O Keriso mo, nu tumonde bainghari da dobo evevago aminda ira teterusira. Jo dobo enda eminda ireira, ainda kaugo iraeri. Endada ireira amo, evetu genembo da ariri. O dobo, Keriso ira teterusira amo, God da ariri. Dobo evevagori. Keriso, emboro+ seka ainda fristi+ da giti jighari, fristi+ iká bekáda edo, dobo aminda teterusira.

<sup>12</sup> Keriso ira Vasa Kakara Beká aminda teredo emingusira. Nu joba mutari dae sedo, gouti (goats) da ororo o burumakava (bulls) mamandi da ororo jo bu ya teraeri. Nu tofo nunda ororo ava budo ira tetereuse aimi, namondeda ari ekoko da mino futuse, namondedae sedo jebuga evovodae irari ava rurusira. Aminguse, nu inono beká ava usira.

<sup>4</sup> 9:4: Afige, buku javo **John Kakara** 6:49 ainda duruda tege garesa.

13 Evetu genembo nenda tamo bebeta edo ghusera aindae sedo, fristi+ ne gouti (goats) a burumakava (bulls) da ororo, a kotugo burumakava mamandi (calves) dungutusera ainda ibobóna ava budo, evetu genembo da tamonda jifeguse esimbugeoro, tamo fegheari sekago tumonde bainghedo ghuseri. Avata gouti a burumakava da ororo, o burumakava mamandi dungutusera ainda ibobóna aminda, fakina a beká eni tefori. Tamo nu inono usira, avata evetu genembo da dubo joká jo inono aeri.

14 O Keriso da ororo mo, fak-inagori. Asisi Kakara evovodae irira ainda fakinaimi, Keriso namondedae sise, tofo nunda ororoimi God kena joba futusira. Numokena ari eko eni tefori. Ava sedo, nunda ororoimi namondeda dubo joká seghuse, fisi da ari a ari manai ava seghe fugari dadabari, namonde tuturo edo, God evovodae irira ainda uju avanembo use irarera.

15 Ava sedo, Keriso emboro+ seka God kena ya buvari afigusira da beká mo, eviri. God da natofo nune aghi eraira, nange nunda esimbugari budo evovodae iraetera aindae, emboro+ seka afigusira. Nunda esimbugari oroko bari resira amo, susudae resira. Susu mo eviri: Keriso ambududurusira. Nu, evetu genembo emboro+ manaida isera amo, nenda ari ekoko edo ghusera ava seghe fugari dae sedo, ambududurusira.

16-17 Amo inono, ambari embo, natofo mendeniimi nunda gugua soro vesa aoro dae sedo, geke gembu fitaetira, amingori. Geke gembu fitari resena, avavaga jo tefo tefo afige gari da kaugo iraeri. Genembo ambari gido, afigarera. Avori, God nunda esimbugari futuse, emboro+ numokena ya buvari ava, afigari dae setiri gefusera, kau daba avori. Keriso ambiri gido, beká sirorusira. Jo ambae aetira amo, beká eni jo sirorari emboro+ seka afigae aeti.

18 Kau daba aminga ava, emboro+

manaida ise, fristi+ da giti jighari jo tefo Vasa Kakara Beká aminda ya terae edo ghuseri. Ne giti sino fuka deoro ambeoro, ainda ororo budo ya teredo ghuseri.

19 Moses nu Agho Dari da geke evetu genembo isambukena dengoro indiri niningusera ainda amboda, gouti (goats) a burumakava (bulls) da ororo budo uvughae baingoro edo, sifi (sheep) da buroro unju tamo a igi mendeni budo, ainghae dabade ororo uvughae baingoro usira aminda, fati budo jefegusira. Jifegusira amo, Moses nu natofo isambu, a God da geke bukuda gembero ireira, ainda tamonda jifegusira.

20 Jifeguse sisira, “God emboro+ numokena ya buvari ava afigari dae erira amo, nunda agho dari a geke ava ningido aovo dae resira. Ororo eimi, nune emboro afigerira,” aminge sisira.

21 Kau daba aminga ava, Moses nu ororo budo aimi, Emboro+ Manai da Dobo a olta (altar) a roera mendeni ainde dabade, aminda jifegusira.

22 Geke bekári: God da Geke Moses gefusira ainda jokáda ijugerira, roera digari ororoimi seghurureoro eveva a kakarago eraira. Kau daba aminga ava ari ekokodae ijugerira: joba jo je basoro ororo vosae arira amo, God ari ekoko jo kote doyae arira.

*9:23–10:18 Keriso Nunda Ambari Da Ororoimi, Ari Ekoko Seghe Fugutusira.*

23 Emboro+ Manai da Dobo ainda roera endada irira amo, jo susu iraeri. Amo dangio vanembori. Ava sedo, roera amo sino fuka da ororoimi segharera, a nu avori, eveva a kakarago arira. Avata roera utuda irira amo, susuri. Roera ava, sino fuka da ororoimi segharera amo, jo inono ae arira. Joba eveva beká ainda ororoimi seghaeti.

24 Ai resira amo: Keriso utuda teterusira. Tumonde bainghari vasa evetu genemboimi itutusera

aminda, nu jo teraeri. Evetu genemboimi itiraera amo, inono, tefo dangiori. Tumonde bainghari vasa utuda irira amo, susuri. Iesu aminda ira teterusira. Teredo, namondedae sedo banunguse, God da dombuda irá gheraira.

<sup>25</sup> Namonde Jusi embo da fristi+ da giti jighari mo, nu ghaeko evia inono, sino fuka da ororo budo yama, Vasa Kakara Beká aminda teredo muturaira. Avata Keriso mo, nu jo umbu digari nunda ororo mutaeri.

<sup>26</sup> Amingaetira amo, utu endaghae sirorusira ai tano ghedo, mema tafuse ambududurudo furaeti. Avata nu jo amingaeri. Oroko utu, enda, a sifo ojira tano ari dae erira einda sifoda, Keriso nu nange ambududuruse, ari ekoko seghe fugari dadabaetira ava kotise, tofo mandi fusira.

<sup>27-28</sup> Evetu genembo isambu ambarera. Ainda amboda, ne ya buvororo, God nemokena bekáda bekáda ategi arira. Kau daba aminga ava, Keriso nu umbu dabako ambududurusira. Evetu genembo digari, ainda ari ekoko seghe fugari dae sedo ambududurusira. Keriso ambududurusira, kotugo nune daba ai sekago furarira. Avata nu jovereghe furarira amo, jo ari ekoko seghe fugari dae sedo, furae arira. Evetu genembo mave nunda furari da sifo ava kaifa use irera amo, nemokena eveva a jebuga mutari dae sedo, jovereghe furarira.

## 10

<sup>1</sup> Ne eregoseva: Moses da Agho Dari mo, jo utu da roera a utu da ari ava jo ijuge gogoghombaeri. Dangio avanembo ijugusira. Ghaeko ava inono, sino fuka de ojedo ainda ororo aimi, joba muturaera. Evetu genembo God kena ya buvuraera amo, nenda dubo jóká jo ainda ororoimi seghari eveva ari da kaugo iraeri.

<sup>2</sup> Nenda dubo jóká seghari eveva aetira amo, ne umbu dabako nenda joba mutoro dadabaeti. Amboda sekago, joba eni jo mutae aeteri.

Ainda beká mo: ne eveva aetera amo, ne jo sekago ari ekoko da meka a bouvu itatamae aeteri.

<sup>3</sup> Avata, sino fuka de ojedo ainda ororoimi joba futuse, ne ghaeko ava inono nenda ari ekoko kotise irera.

<sup>4</sup> Ainda beká mo: burumakava (bulls) o gouti (goats) da ororo aimi, jo ari ekoko seghe fugari da kaugo iraeri.

<sup>5</sup> Aindae sedo, Keriso nu utu dodo foa endada sirorari dae use, numamokena sisira:

“Sino fuka da ororo aimi joba mutari mo, jo ninda uju iraeri.

Na siroredo, joba a sino fuka da vasa baono dae sedo, nanda tamo simbugusesi.

<sup>6</sup> Sino fuka nimokena joba futuse dungeoro avido ghusira, a ari ekokodae joba dungeoro avido ghusira aindae, ni jo ivuga ae edo ghusesi.

<sup>7</sup> Ava sedo, na siseni, ‘God, na evirere! Ninda Geka jókáda, rea aono dae sisesa, ava ari dae sedo refena. Ninda uju ava arena.’”

Keriso aminge sari dae use,

<sup>8</sup> nu giti eminge sisira, “Ni jo, joba dunedo ghusera, a sino fuka ari ekokodae dunedo ghusera aindae, jo ivuga aeri. A ni jo aindae uju aeri.” Agho Dari God setiri Moses imi gefusira ainda jókáda, joba amo mutoro dae sisira, avata sino fuka da ororo mutari mo, jo inono irae ava kotise, Keriso aminge sisira.

<sup>9</sup> Ainda amboda, nu eminge sisira, “God, na evirere! Ninda uju rea aono dae sisesa, ava ari dae sedo refena,” aminge sisira. Aminguse, emboro+ seka God kena ya buvari ava afigari dae sedo, nu ari ekoko seghe fugari da emboro+ manai ava gagojusira.

<sup>10</sup> Iesu Keriso nu, God da uju ava e gogoghombusira. Aindae sedo, Iesu umbu dabako namondeda ari ekoko dae sedo ambiri, ai inono usira. Nunda ambari da fakina aimi, namondeda ari ekoko seghe fugatusira.

<sup>11</sup> Namonde Jusi embo da fristi+, ne God da Kambo+ aminda fetedo, sifo evia inono sino fuka de ojedo,

God kena joba futuse dungeoro aviraira. Avata joba aimi, ari ekoko jo seghe fugae arira.

<sup>12</sup> O Keriso, nu umbu dabako ambuduruse, ari ekoko da mino mutiri dadabusira. Ava sedo, nu jo sekago mutae arira. Nunda ambari umbu dabako aimi, inono beká ava usira. Avori, nu ainda mino mutiri dadabetiri, God da ungo gimandukena anumbusira.

<sup>13</sup> God da ungo gimandukena anumbirise kaifa ururari, God nunda gitofu sandi bundedo, nunda ata duruda fitarira.

<sup>14</sup> Nunda natofo kakara aoro dae sise, nu umbu dabako ambudo, nenda ari ekoko seghe fugetiri, nenda dubo joká eveva a inono usira.

<sup>15</sup> Asisi Kakara barago, namondekena aindae sise, gitida emingesisira:

<sup>16</sup> “Bajari resira, ‘Sifo amboda furarira aminda, na emboro+eni, foa namokena buvari ava afigarena.

Amo eviri. Nanda Geka a Agho Dari nenda dubo jokáda fitono irarira, a nenda jiroda gembono irarira.’”

<sup>17</sup> Aminge sedo, nu amboda emingesisira:

“Na nenda ari ekoko a ari sembae ava kote doyarena,”

aminge sisira.

<sup>18</sup> Avori, ari ekoko kote doyarira amo, dadabarira. Ainda amboda, ari ekokodae, joba a ororo eni jo mutae arera.

### *10:19-39 God Da Natofo Nange Fakina Aeteri.*

<sup>19</sup> Avori, nanda nano namendi, Iesu da ambariimi, Vasa Kakara Beká aminda ya terari da emboro+ava afigusira. Oroko ya terarikenana, fakara eni tefori.

<sup>20</sup> Vasa Kakara Beká emboimi gagojusira ava, nunda ambariimi afigusira. God da jebuga ava baoro dae sedo, nunda tamoi namondeda emboro+ afigusira.

<sup>21</sup> A oroko, namondeda Bajari fristi+ tomanako edo, God da natofo kaifa eraira.

<sup>22</sup> Ava sedo, namonde dubo simbugedo, tumonde gogogho use ya God kena buvore! Nu namondeda tamo, uvu eveva aimi segbedo, namondeda ari ekoko dubo jokáda ireira ava, nunda ororoimi seghe fugutusira. Ava sedo, namonde numokena banunguse irarera!

<sup>23</sup> Namonde kasama erera: God nunda beka gajari mo jo ighagha ae arira. Amo, nu amingarira. Ava sedo, namonde rea tumonderaera ava, bu jighi fetedo osa sarera! Jo bunae arera!

<sup>24</sup> Namonde tofo tofo ghamo deroro erari, dubo ruruse ari eveva use irarera.

<sup>25</sup> Evetu genembo mendeni tuturo edo tafaroro ari dodo, ne jo banungari dae sedo totorugae eraera. Namonde jo amingae arera. Bajari da Sifo foa buvari dae erira. A gido, namonde tofo tofo ghamo deroro erari totorugedo, tumonde bainghedo gharera.

<sup>26</sup> Ainda beká mo: Iesu namondeda ari ekokodae ambududurusira ava namonde kasama erera. Avata ava ighagha edo ari ekoko use irarera amo, jo joba eniimi sonembari, namondeda ari ekoko seghe fugae arira.

<sup>27</sup> Namonde ari ekoko use irarera amo, namonde taká God da Ategi Ari namondekena a nunda avaraka aindae oju use irarera! Mave God da uju ava buregarera amo, avaraka setena aimi, ne avari sirivo arera.

<sup>28</sup> God da Geka Moses gefusira ava, mave de bejaetira amo, genemboá daoro ambaetira. Nu dara rea aetira ava, evetu genembo etoto o etodaba aimi nunda dara ava osa siruroro ningido, daoro ambaetira. Nundae jo joka ae aeteri.

<sup>29</sup> Ava sedo, genembo mave God da Mandi kotae eraira amo, nu inono, emingeraira. Keriso da ororoimi nundae sedo ari ekoko seghe fuggedo, God kena ya buvari da emboro+ afigusira ava, nune bebeta use kotae

eraira. A kotugo, God da Asisi genemboá sonembusira, ainda javo ava eko eraira. Avori, Geka Moses gefusira amo, kitakori. O God da Mandi mo, nu teria bekári. Ava sedo, genembo mave God da Mandi kotae edo ighagha eraira amo, numokena nangareri? Genembo mave amingeraira amo, nu bouvu mindafu beká ava fumbarira.

<sup>30</sup> Ainda beká mo: God namonde kasama erera aimi, nu eminge sisira, “Dara eraera, ainda mino nane mutarena. Ava jo mave darigae arira,” aminge sisira. A kotugo, nu geka evia sisira, “Bajari nunda natofo bekáda bekáda ategi arira,” aminge sisira.

<sup>31</sup> Ari eko embo mave, God jebuga irira ainda vaghoda terari barira amo, nu bouvu teriagio barira.

<sup>32</sup> Avori, God da usasa nange nemokena isagha etiri gido tumonduse iriava, ava kotovo dae resena. Evetu genembo nemokena bouvu futuse, fakarago etero mema tafusevu. Avata ne fete simbuguse, Bajari jo ighagha ae usevu.

<sup>33</sup> Umbu mendeni, evetu genembo mendeniimi nemoá dere jireoro, ne Bajari da javoda meka gido ghusevu, a umbu mendeni, natofoimi ne deoro nunda javoda mema itatamedo ghusevu. O umbu mendeni mo, nenda nano namendi kau aminga ava, mema itatamedo ghusera ava sonembuse, nenda bouvu fumbari dae kato edo ghusevu.

<sup>34</sup> Nenda nano namendi Bajari da javoda dibura edo ghusera ava, sonembedo ghusevu. A eni mo, gito-fuimi nenda roera a gugua isambu sosighi usera amo, ne jo dubo mema ae usevu. Ainda beká mo: ne kasama eraeva, nenda gugua utuda irira amo, eveva bekári, evovodae irarira.

<sup>35</sup> Ava sedo, oroko emo erama gofeove! Fakina evu! Amingareva aimi, roera mino evevago sirorari bareva.

<sup>36</sup> God da uju mo: ne durumugedo kaifa use iraetevu. Amingururovo, God nemokena rea mutari dae beka

gagojusira ava mutari bareva.

<sup>37</sup> God da Geka aindae eminge resira:

“Sifo tufako kaifa ururovo, genembo furari dae erira amo, foa buvarira. Nu jo itako gaimboghae furae arira.

<sup>38</sup> Nanda natofo eveva aimi na tumonduse jebuga ruruse irarera.

O mave na ighagha edo jovereghe yarira amo, na jo nundae sedo ivuga ae arena,”

God da Geka aminge resira.

<sup>39</sup> Avata namonde jo evetu genembo mendeni amingo iraeri. Namonde Bajari jo ighagha edo sirivo ae arera. Namonde numoá tumonduse jebugarera.

## 11

### *11:1-40 Abuamane Kau Eminguse, Tumondedo Ghuseri.*

<sup>1</sup> Tumondari da beká mo eviri: namonde tumondarera amo, namonde rea gigiterera aindae, jo manamana ae arera. Kotugo, tumondarera amo, rea jo sirorari gae irera ava amboda sirorari garera, ava kasama arera. Tumondari mo, kau amingori.

<sup>2</sup> Abuamane ne tumondedo ghusera ava gido, God ne uju edo ghusira.

<sup>3</sup> Namonde God tumonduse kasama erera: God setiri utu a enda sirorusira. Nunda geka jo gari da kaugo iraeri. Utu a enda mo, namonde giraera, avata God da geka jo gae eraera aimi, nu utu enda setiri sirorusira.

<sup>4</sup> Abel nu God tumonduse, joba evevago numokena futusira. Nunda joba evevagori; jo Cain da jobago iraeri. Aindae sedo, God nu Abel uju use, nundae ‘genembo eveva’ sise, nunda joba ava ivugaghae rurusira. Abel nu ambududurusira avata, nunda tumondari da bino ava, namonde oroko ningiraera.

<sup>5</sup> Enoch nu God tumonduse, endada jebuga iriri God nu rurusira. Nu jo ambaeri. A nunda tamo mo, mave jo tambaeri. Ainda beká mo: God nu rurusira. God da Geka

eminge resira. Enoch da irari gido, God nu ivuga usira.

<sup>6</sup> Genembo mave nu jo tumondae arira aindae, God nu jo ivuga ae arira. Ainda beká mo: mave God tava e tambari sarira amo, nu roera etoto naká evia tumondarira. God nu irira, ava tumondarira. A kotugo, mave God tava arira amo, God numokena mino eveva ava mutarira, ábarago tumondarira. Roera etoto ava tumondaresa amo, God tava e tambaresa. Ava jo tumondae areza amo, God jo tava edo tambae areza.

<sup>7</sup> Noah nu God tumonduse, usegha gisi da bino ningido, oju usira. Rejo eni jo sirorari gae iriri, God setiri ningido tumondusira. God rea sisira ava use, nunda natofode dabade jebuga irari dae sedo, Noah nu ghaka+ itutusira. Nu God tumondusira avata, evetu genembo digari endada iriara amo, ne God jo tumondae useri. Avata kotugo, nunda tumondari da beká ava isagha edo, evetu genembo da ari ekoko ava ijugetiri, ne gosuse sirivo useri. O Noah mo, nu tumondiri gido, God nunda dubo joká simbugetiri eveva usira.

<sup>8</sup> Abraham nu God tumonduse, nunda kori ava ningido, eredo reighi eninda isira. Amo, nunda reighi manaiá dodo, God numokena reighi eni mutari sisira, aminda isira. Nu emboro bunisira avata, nu taká isira.

<sup>9</sup> Reighi God numokena mutari dae beka gagojusira, aminda ira irise, Abraham nu God tumonduse, kau makasi embo o esa embo da kaugo ava use, doboda avido ghusira. Abraham, nunda mandi javo Isaac, a nunda imendi javo Jacob, ne isambu doboda avido ghuseri.

<sup>10</sup> Isaac a Jacob resena emo, nene God nunda beka gajari Abraham kena futusira ava, ruruseri. Ne doboda avido ghusera da beká mo: God vasa simbugedo, tutumbi darido simbuge gogoghombedo, bogu begaya itari sisira ava, Abraham nu kaifa use gigitedo ghusira.

<sup>11</sup> Abraham nu God tumondetiri,

evia sirorusira. Nu embako beká usira. Kotugo, noaro Sarah barago erova irise, evetako usira. Avata, ne God tumonduse, nengae dabade avise, Sarah Abraham da mandi fufusira. Abraham nu eminge tumondusira: God rea beka gagojuse mutari sisira, ava mutarira.

<sup>12</sup> Abraham nu embako edo, kau ambari da kaugo usira. Avata noaro mandi fumbiri sirorusira. Siroretiri ainda amboda, nunda imemesiri digarigo siroruseri. Kau utu da damana a eva da ghonesa da kaugo ava siroruseri. Jo tegari da kaugo iraeri.

<sup>13</sup> Evetu genembo tegetena emo, ne God tumonduse iriara edo, sirivo useri. God roera mutari sisira ava, ne jo enda eminda irise baeri. Kotugo, kau evetu genembo soka fetedo reighi giraera aminga ava, ne roera amo gosuseri. Gido, ne ivuga use eminge sedo ghuseri, “Fuvu, ominda yaore! Namonde enda eminda irise, kau esa embo a makasi embo da kaugo use irera,” aminge sedo ghuseri.

<sup>14</sup> Mave amingeraira amo, nu aminge sise ijugeraira: nu tofo nunda reighi a enda ava jo tambae, tava use irira.

<sup>15</sup> Abraham mane nenda reighi manai kotaetera amo, ne totoi jovereghe ya torughaeteri.

<sup>16</sup> Avata nenda reighi manai jo kotaeri. Amo, ne reighi eveva aminda yari dae kotiseri. God da reighi utuda irira, aminda yari dae kotiseri. Evetu genembo amo, ne God tumonduse, eminge javono gatedo ghuseri, “Arie, Afa God!” aminge seoro ningido, God aindae jo meka gae edo ghusira. Ainda beká mo: nu anakora nenda reighi a bogu begaya ava simbugusira.

<sup>17</sup> Abraham da imemesiri, sifo amboda digarigo sirorarera ava, God numokena ijuguse, beka gagojusira. Ainda amboda, God Abraham da tumondari ava dere gosusira. Aminguse, Abraham nunda mandi dabako tainako javo Isaac ava, de ojedo

numokena joba dungari avare dae sisira. Setiri, Abraham God tumonduse, nunda beka gajari ava kotise, nunda mandi dari ambare dae sedo simbugusira.

<sup>18</sup> God nu giti Abraham kena eminge sisira, “Ninda mandi Isaac kena, ninda imemesiri digari ava sirorarera,” aminge sisira.

<sup>19</sup> Nunda geka ava kotise, Abraham God da fakina ava tumonduse kotisira, “God sarira amo, Isaac ambarida ghe jebuge erarira,” ava kotiri, numokena sirorusira.

<sup>20</sup> Isaac nu God tumonduse, nunda sasingu Jacob nengae Esau ghae ava, God da javoda esimbugusira.

<sup>21</sup> Jacob nu God tumonduse, ambari dae use, ketuaimi gae fetirise tumo bainghuse, Joseph da sasingu etoto naká ava esimbugusira.

<sup>22</sup> Joseph God tumonduse ireira ava, ambari dae use sisira, “Israel embo ne amboda reighi Egypt do dumbudo yarera.” Aminge sise, nu dengoro indudusira. Numo ambarira ainda amboda, Israel embo jovereghe yarera amo, ne nange nunda etu ava budo, ainghae yaetera aindae, dengoro indudusira.

<sup>23</sup> Moses da noi numamo God tumonduse, Kini (King) Pharaoh da agho dari de bejise, nenda mandi Moses jungetero irise, tambuno etodaba naká dadabusira. Nu mandi dombúde a garigori. Aindae sise, ne Kini (King) Pharaoh da agho dari aindae jo oju aeri.

<sup>24</sup> Moses nu bajido genembo use, God tumonduse, Egypt embo ava ighagha use, Kini (King) Pharaoh da gagara numoá undusira aindae, “Na jo nunda mandi iraeri,” sisira.

<sup>25</sup> Ainda beká mo: nu ari ekoko endada iriari ai sifo tufako ivuga eraera ava ighagha e dodo, God da natofode dabade tatedo, mema dabade itata-mari dae kotisira.

<sup>26</sup> Moses da kotari mo: God Genembo amboda mutari sisira, ainda javoda meka garera amo, evevari. O reighi Egypt da gugua isambu bari amo, ekori. Ainda tuka mo: nu

mino rea amboda baetira ava bari dae sedo, edo ghusira.

<sup>27</sup> Moses nu God tumonde gogoghombuse, Kini (King) Pharaoh da janje eko aindae jo oju ae usira. God tumondusira amo, jo ditiimi gari da kaugo iraeri. Avata Moses jo oju ae edo ghusira amo, kau God ditiimi gosuse tumondarigo edo ghusira. Aminguse, nu reighi Egypt dodo fusira.

<sup>28</sup> Moses nu God da Geka tumonduse setiri, Israel embo ne guro békada, tutumbi tamonda ororoimi davuseri. Amingusera da tuka mo: aneya sasingu bebego avanembo dari sirivo aoro dae sedo fusira. Ava kasama edo, nu nange Israel embo da kambo gido, do jarigaetira ava kotise, ne aminguseri.

<sup>29</sup> Israel embo ne God tumondero, esuru javo ‘Kokoigo’ sedo ghusera, ainda eva sarigedo soveni soveni fetetiri, kau endada fete sembi ya vitariguseri. Amingero ainda amboda, Egypt embo nenda amboda sembi yari dae usera ava, eva fira gotonghedo fuge jarigetiri, mindi sirivo useri.

<sup>30</sup> Israel embo ne God tumonduse, sifo 7 ava reighi Jericho embo da furu gukada era birurughetero dadabetiri, furu amo gofedo, beje vovosusira.

<sup>31</sup> Evetu saghere kato javo Rahab, nu God tumonduse, jo ambae usira. Nune, gegenembo reighi kato e gari dae fusera, ava sonembusira. Aindae sedo, nu jo evetu genembo mendeni, God da Geka kotae usera, ainde dabade ambaeri.

<sup>32</sup> Avori, evetu genembo mendeni da geka saetena amo, sifo dadabaetira. Ava sedo, Gideon, Barak, Samson, Jephthah, David, Samuel, a feroveta da geka jo se tefo aono ningae areva.

<sup>33</sup> Ne God tumonduse, oro mendeni dedo ghuseri. Ne seoro ari eveva siroredo ghusira. God rea nemokena beka gagojusira ava, isagha etiri gosuseri. Ne seoro raiyoni (lion) beka gotedo ghusira.



<sup>34</sup> A kotugo, ne seoro avaraka bubura dukaghae amo soana edo ghusira. Ne God tumondero, gitofu jo kaiyaimi jaoro ambaeri. Ne jo fakina kakato irae avata, ne God tumonduse, fakina edo isoro use ainda jokáda, gitofu da oro mendeni da isoro kakato ava dedo ghuseri.

<sup>35</sup> Evevetu mendeni God tumondero gido, nu setiri nenda natofo mendeni ambarida ghe eredo jebuseri.

O mendeni God tumondero gido, God da gitofuimi nemokena bouvu futuse fakarago edo ghuseri. God ighagha aetera amo, ne doyoro ya jejebugaeteri. Avata ne jo amingaeri.

<sup>36</sup> Ágido, gitofuimi ne dere jiseri, ambími doruseri, seiniimi (chain) bundiseri, diburada fiftuseri,

<sup>37</sup> ghamanaimi detero sirivo useri, divetero ambududuruseri, a kaiyaimi jetero amomonjeguseri. God da natofo amo, ne makasi bekári. Ne sifi (sheep) a gouti (goats) da anosoi asugedo, deinghedo ghuseri. Evetu genembo mendeni, nemokena bouvu futuse fakarago edo ghuseri, dedo ghuseri, a mema muteoro itatamedo ghuseri.

<sup>38</sup> Avata geka bekári: ne evevagori. Evetu genembo endada irise, fisi da uju eraera amo, jo nemoá avavaga irakeri. God da natofo amo, reighi evetu genembo a uvu irae da vasa a doriri aminda deinghedo ghuseri. Ne ya beku a bako jokáda avido ghuseri.

<sup>39</sup> Evetu genembo resena emo, ne tumonde gogoghombusera ava sedo, nenda geka gembero irira. Avata God rea mutari sisira amo, ne jo baeri.

<sup>40</sup> Ainda beká mo: God nu namondeda sifo eminda, roera evevago eni ari sirorarira ava kotise, ne kaifa aoro dae sisira. Nunda kotari mo: jo nesukako eveva ae arera. Amo, ne namonde dabade, namondeda ari ekoko God nune seghe fuggedo, namondeda dubo jóká dambu ari inono arira.

## 12

*12:1-11 God Nunda Sasingu Deraira Amo, Ne Dubo Ruruse Amingeraira.*

<sup>1</sup> Evetu genembo tegetena, ainda kiki ningido namonde nangareri? Namonde fakina aore! A kotugo, evetu genembo tegetena, ne namondeda irari gosuse irera ava sedo, namonde saramana use, Bajari da emboroda sumbaeteri. Kotugo, sumbari dae use, erá ai dimbeure dae sise, tamo da roera rea irarira ava kosughe fiti dodo, namondeda ari ekoko vujegarera. Vujegedo, durumuge fuge gosuse sumbarera.

<sup>2</sup> Aminguse, namonde Iesu kotise irarera. Nu namondeda ijugaborori. Namondeda tumondari da susu mo, numori. Kau nune tumondusira aminga ava, namonde tumondarera. Iesu nu, amboda ivuga arira ava kotise, nu korosi da bouvu a meka gari ava jo kotaeri. Edo vitira, oroko emo, nu God da avo anumba ainda gimandukena anumbirira.

<sup>3</sup> Nu nange nange durumugedo fetetusira, a ari ekoko embo ne nange nange imboe use, numokena bouvu futuse fakarago etero, durumugedo itatamusira ava, kotareva. Kotise, ne, kau nune usira, aminga ava areva. Amo, ne jo oju use bunae areva.

<sup>4</sup> Ai resira amo: ne isoro use ari ekoko da fakina ava buregeraeva. Avata ne jo nenda fakina isambu futuse ororo gutae ireva.

<sup>5</sup> Ne God da sasinguri. Ava sedo, God da Gekaimi, dubo fakara edo fakina e fete gogoghombaovo dae sisira, ava kotareva:

“Nanda mandi, Bajari ni ari ekoko doyasoda dae dengoro indarira amo, ningi gogoghombe!

Ni dombuda sarira amo, erá dubo mema eose!

<sup>6</sup> Ainda beká mo: Bajari nu mavejoá dubo buraira amo, ne emboro eveva kasama aore dae sedo, deraira.

A mavejoá nunda sasingudae sedo barira amo, nemokena mema futuse emboro ijugarira.”

<sup>7</sup> Ava sedo, mema itatameraeva amo, Nimamo da ijuga nemokena muturaira. God nemokena eraira amo, kau genembo nunda sasingukena eraira, kau daba avori. Gegenembo isasambu, nenda sasingu dengoro induduse, deraera.

<sup>8</sup> God nunda sasingu isambu kau daba aminga ava, dengoro induduse deraira. Ava sedo, ne jo dae aetira amo, ne jo nunda sasingu irae aetevu. Ne tefo emboroda sirorari da kakaugo ava aetevu.

<sup>9</sup> Namondeda afamane beká endada irera emo, namonde dengoro induduse, dorureoro ne kakara eraera. Ava sedo, namondeda asisi da Afa utuda irira ava, kakara e gogoghombuse jebugaore!

<sup>10</sup> Namondeda afamane beká, nenda uju ava aoro dae sise, sifo tufako namonde dedo ghuseri. O God mo, nu namonde sonembuse, namondeda evevadae deraira. Eveva a kakara kau numongo ava aoro dae sedo, namonde deraira.

<sup>11</sup> Dorurarira amo, sifo aminda, namonde jo ivuga ae arera. Dubo mema arera. Avata, amboda mavejoá God darira aikena, dubo jama a veka eveva ava sirorarira.

*12:12-17 Erá Jovereghedo, Ari Manaikena Yeove!*

<sup>12</sup> Ava sedo, Bajari da emboro aminda yari dae use, ghamo ase-guse saga fainghedo kaubo fakara ari fetedo yasivu!

<sup>13</sup> Emboro rerebevu dambu ari yaove! Amingareva amo, ata ambariá jebugarira, jo disugae arira.

<sup>14</sup> Evetu genembo isasambude dabade irise, mainungari da emboro ava tava use, erá beisiga sireure dae sise, kaifa esimbuguse irivu! A nenda dubo joká seghe simbugedo, iriri eveva a kakara ava use irivu! Ainda beká mo: mave jo amingae arira amo, nu jo ya Bajari gae arira.

<sup>15</sup> Erama nenda enii jovereghe amboi tukughedo, God da sonemba

ighagha eore dae sise, kaifa esimbuguse irivu! A erama kotari sembae ava kotise, undeóvo teria edo, evetu genembo mendenikena isegeure dae sise, kaifa esimbuguse irivu!

<sup>16-17</sup> Avori, erá kombo yagera eove! Genembo Esau ava kote givu! Nu asisi da iriri jo kotaeri. Nu begori. Avata bego da esimbugari God numokena mutaetira ava kotae edo, bayau umbu dabako mutari mindaetira aindae sise, nunda esimbugari nunda namendi Jacob kena oriro usira. Ne kasama ereva: ainda amboda, nu numamo da esimbugari ava uju usira. Avata numamo numokena jo mutae usira. Nu aindae dubo mema use, sorara usira. Avata amo jo sekago tuve bari da kaugo iraeri. Avori! Erá ari kau daba ava nemokena sireure dae sise, kaifa esimbuguse irivu!

*12:18-29 Emboro+ Manai A Emboro+ Seka Mo, Kau Emingori.*

<sup>18</sup> Ne eregoseva: Israel embokena sirorusira amo, jo kau daba ava nemokena siroraeri. Israel embo doriri eni enda eminda irira, javo Sainai seraera, aminda era buvrutuseri. Buvero, doriri aminda avaraka bubura jaraghusira, a tumba jinjanghusira. Aminguse, yaura sufusira.

<sup>19</sup> A duka kau tavuya avavaga fusiri nininguseri, a beka siri nininguseri. Beka siri ningido oju useri. Oju use, God geke siri duka teria futo usira, ava tukughare dae sedo, numokena banunguseri.

<sup>20</sup> Ainda tuka mo: geke fakarago siri ningido, jo fakina ae useri. Eminge sisira, “Ne jo foa doriri derae areva. Nenda sino fuka barago jo foa derae arera. Derarera amo, nene ghamanaimi daovo sirivo arera,” aminge sisira.

<sup>21</sup> Avavaga siroriri fuge gido, Moses oju edo eminge sisira, “Na oju erena. Na ungo ata dadadagherira.”

<sup>22-23</sup> Avata nemo jo doriri Sainai aminda ya buvae usevu. Ne doriri

eni javo Saion<sup>22</sup> eminda feva bu-  
vurutusevu. God evovodae irira  
ainda reighi Jerusalem utu eminda  
feva buvurutusevu. Eminda, God  
da aneya digari beká, jo tegari da  
kaugo irae ava irera. Kotugo, God da  
sasingu totorugedo, umo gamo use  
ivuga eraera, einda jokáda teteru-  
sevu. God da sasingu resena emo,  
nune giti beká setiri nunda sasingu  
etero, nenda javo utuda gembero  
irira. Ne feva, God evetu genembo  
bekáda bekáda ategi eraira aikena  
buvurutusevu. A evetu genembo  
eveva nenda ari ekoko vujegetero,  
God nenda dubo joká etiri dambu  
usira, ainda asisi aikena barago feva  
buvurutusevu.

<sup>24</sup> A Iesu emboro+ God Afakena  
afigetiri irira, aikena feva buvurutu-  
sevu. Iesu da ororo budo jifegusira,  
ábarago vasa eminda irira. Iesu da  
ororo resena emo, jo Abel da ororo  
amingo irayeri. Abel da ororoimi,  
nunda ambari da mino mutare dae  
sedo, God kena kori resira. O Iesu  
da ororoimi, joka are dae sedo, God  
kena kori resira. Avori, ne, roera a  
natofu setena eminda feva buvudo,  
ainda jokáda teredo ireva.

<sup>25</sup> Geka doriri Sainai aminda sisira  
ava, mave ningido jo ae usera amo,  
ne sirivo useri. Ava sedo, God utuda  
ghe geka resira ava, jo ningae ar-  
era amo, namonde mino eko kau  
mavega ava bareri? Ni nunda geka  
jo ningae aresa amo, erá ni darigedo  
junge yariá koteose! Ava sedo, God  
geka resira ava, erá ighagha use ko-  
tae eove!

<sup>26</sup> Doriri Sainai aminda, nu geka  
siri aimi, enda daradaraghusira. Ko-  
tugo, oroko mo, nu eminge resira,  
“Na oroko jo enda vanembo jighono  
daraghae arira. Na oroko sekago  
kau daba ava, utu endaghae dabade  
jighono daradaragharira.”

<sup>27</sup> Geka “na oroko sekago kau daba

ava, utu endaghae dabade jighono  
daradaragharira.” setira ainda tuka  
mo: God rea etiri sirorusira ava,  
oroko jighari daradaraghuse aimi  
tano arira. Tano ari, roera eni susug-  
hae amo fetarira, jo daradaraghae  
arira.

<sup>28</sup> Ava sedo, namonde ivuga ae-  
teri. Ainda beká mo: God vasa  
namondekena mutari sisira amo,  
jo mave jighari daradaraghari da  
kaugo irayeri. Ava gido, namonde ain-  
dae ivuga use, God igheghi a kakara  
use, tumonde bainghururoro, nu  
ivuga are!

<sup>29</sup> Ai resira amo: namondeda God  
kau avaraka bubura nunda duk-  
aghae aviraira ainda kaugori. Eveva  
amo, doyarira fetarira. Kotugo ekoko  
amo, dungari avarira. Ava sedo, God  
Afa geka resira ava, erá ighagha edo  
kotae eove!

## 13

### *13:1-19 Ijuga Mendeniri.*

<sup>1</sup> Ambo bego da irari ava use, tofo  
tofo dubo ruruse irivu!

<sup>2</sup> Nenda esa embo dombu eni mave  
furarira amo, nati joká doruse, bu  
tavo areva. Eregoseva: evetu gen-  
embo mendeni aminguse, ne aneya  
ava evetu genembo bekái furari ava  
sedo, nati joká doruse unumbuseri.

<sup>3</sup> Nenda kokomana dibura jokáda  
irera ava kotise irivu! Kau ne  
totofu diburada irateva aminga ava,  
nenda kokomana dibura jokáda ir-  
era ava tavo use, nendae sise ba-  
nungaetevu. Kotugo, evetu gen-  
embo bouvu a mema itatamuse ir-  
era, nemoá kotaetevu. Ne kau daba  
aminga ava endada irise, mema  
a bouvu itatameraeva. Ava sedo,  
nenda kokomana bouvu a mema  
itatamuse irera ava kotise, sonem-  
buse irareva.

<sup>4</sup> Evetu genemboghae, nengae  
nemokena eminge resena. Nengae  
nenda fitari ava kotise, kakara use

<sup>22</sup> **12:22-23:** Baiboro (Bible) jokáda namonde reighi etoto naká javo Jerusalem tamburaera. Eni endada reighi Israel aminda irira. O eni, *Hebrew Embokena 12:22* eminda, God da irari vasa andae kasia sise, Jerusalem seraera. Doriri Sainai resira amo, Agho Dari da emboro manai andae resira. O geka evia tegaresa, “*Jerusalem utu eminda feva buvurutusevu,*” ainda beká mo: ya God kena buvari da emboro Iesu afigusira, avori.

iraetevu. Nengae tamo dabako edo irareva, amo evevari! Erá nivu o nearo dodo, kombo yagera eove! Evetu genembo kotae kotae kombo eraera o kombo yagera eraera aindae, God nemokena ategi arira.

<sup>5</sup> Monidae erá dighighi eove! Nemokena rea irira aindae ivuga use, dubo jamaghae irareva. Dubo eveva aeteva da susu mo eviri. God nu eminge sisira:

“Na ni jo doyae arena. Na ni jo fuge doyae arena.”

<sup>6</sup> Ava sedo, namonde tumo fainghedo, eminge sise irarera:

“Bajari nu nanda sonemba katori. Aindae na jo oju ae arena.

Evetu genemboimi namokena rea arera aindae, na jo oju ae arena,”

namonde aminge sise irarera.

<sup>7</sup> Nenda babojegari giti God da Geka nemokena vironu sedo ghusera, ava kotovo dae resena. Ne nange God tumonduse, enda eminda deinghedo ghusera, a nange God tumonduse iriara edo sirivo usera ava kotise, kau nene usera aminga ava aovo dae resena.

<sup>8</sup> Iesu Keriso nu jo dombu eni ae arira. Nu irei, irira, a kau daba aminga ava, nu evovodae irarira.

<sup>9</sup> Erama ijuga seka a ijuga sembae ava nininguse, emboro eveva kosasagheove! Ijuga sembae resena amo, eviri. Bayau kanagara use, reeta arera. Amingarera amo, namonde fakina jo bae arera. Kotugo, evetu genembo amingeraera amo, ne emboro eveva ava kosasaghuse, aminda sonemba eni jo bae eraera. Eveva mo: namondeda asisi God da sonemba budo aimi, fakina arera.

<sup>10</sup> Namonde mave Keriso tumonduse irera aindae olta (altar) mo, Iesu da korosiri.<sup>10</sup> Avori, namondeda Joba aminda irira ava, jo fristi+, Jusi

embo da Agho Dari vanembo kaifa eraera, aimi mindae arera.

<sup>11</sup> Ne eregoseva: Jusi embo da fristi+ da giti jighari nu, sino fuka joba muturaera, aindae ororo ava budo, Vasa Kakara Beká aminda teredo, aimi jifegeraira. Avata sino fuka joba muturaera aindae tamo mo, bu jumbu ya vasa isaghada fiti dungeoro aviraira.

<sup>12</sup> Iesu barago kau daba aminga ava use, reighi Jerusalem ghedo bu jumbudo era, vasa isaghada fiti detero ambududurusira. Evetu genembo da ari ekoko nunda ororoimi seghe fugari dae sedo, nu amingusira.

<sup>13-14</sup> Ava sedo, namonde Jusi embo da reighi ava dodo, ya numokena buvore! Eregoseva: enda eminda namondeda reighi beká eni tefori. Eminda, namonde jo evovodae irae arera. Reighi eni amboda sirorarira, aindae kaifa use irera. Ava sedo, namonde Jusi embo da Agho Dari<sup>13-14</sup> dodo, Iesu de dabade ajagha fetirise, meka garera.

<sup>15</sup> Iesu rea usira ava kotise, namonde God kena sakai sise irore! Sakai sari mo, namondeda joba God kenari. Namonde mave nundae javono gateraera aimi, beka fainghedo, nundae sakai sise irore!

<sup>16</sup> Veka eveva use, nenda guguaimi minonde minonde sonembuse irareva! Aindae beká mo: ne aminguse, joba numokena mutari da kaugo ava ururovo, God gido ivuga arira.

<sup>17</sup> Nenda babojegari da geka ningido, ne rea sarera, ava areva. Sifo amboda, God nenda babojegarikena, nenda saramana eraera aindae ategi arira. Ava kotise, nenda babojegari evovodae sifo tumba evia inono, nenda asisi kaifa eraera. Ava sedo, nenda babojegari

<sup>10</sup> **13:10:** Greek geka aimi, “*olta eni*” avanembo gefusira. O geka se disuguse, namane, “*olta mo Iesu da korosiri*,” ava gefuseri. Kau daba aminga ava, Greek geka aimi, “*doboda tumonde baingheraera*,” avanembo gefusira. O namane geka se disuguse, “*Jusi embo da Agho Dari vanembo kaifa eraera*,” ava gefuseri. **13-14** **13:13-14:** Greek geka aimi umbu etoto naká geka “*reighi*” gefusira. Avata geka se disuguse namane ikáda, “*Jusi embo da reighi*” gembudo, duruda, “*Jusi embo da Agho Dari*” ava gefuseri.

da geke ningareva amo, ne ivuga use saramana arera. O nenda babojegari da geke jo ningae areva amo, ne dubo memaghae saramana ururoro, ne nesuka irise, sonemba eni jo tambae areva.

<sup>18</sup> Avori, namanendae sise banunguse irivu! Namane itatamerera amo, namanenda dubo joká mo dambu ava erekotera. Ainda susu mo: namane ari eveva avanembo ari dae uju eraera. Avata namane dambu iroro dae sedo, namanendae banunguse irivu!

<sup>19</sup> Kotugo, nanda benunu teria mo eviri. Ne nandae sise banungaovo, God na dirigari totoi jovereghe ya nemokena buvaeteni!

*13:20-21 God Iesu Da Ambari Da Fakinaimi Sonembururari, Namonde Veka Eveva Use Irarera.*

<sup>20</sup> God nu dubo jama mutari katori. Nune setiri, namondeda Bajari Iesu ambarida ghe jebugedo erorusira. Iesu nunda ororoimi, emboro+ God kena ya buvari ava afigetiri, evovoda irira. Iesu nu namondedae ambududurusira aindae sedo, nu evetu genembo da kaifa ari kato teria edo irira.

<sup>21</sup> God dubo jama mutari kato setena aimi, nunda uju ava aovo dae sise, ne nune sonembare! Aminguse, inononda futururari eveva irove! Nu Iesu Keriso da fakinaimi, namondeda dubo joká simbugururari, nunda uju avanembo use irove! Amingururoro, nu ivuga are! Keriso nunda duro evovoda irare! Ai, bekári!+

*13:22-25 Emo Ategi.*

<sup>22</sup> Nanda nano namendi, na geke tufako gembena evia durumugedo tege gosuse kasama aovo dae resena. Ainda beká mo, emo jo reta ghousa iraeri.

<sup>23</sup> Kasama aovo dae eminge resena. Namondeda namendi Timothy diburada ireira ava, dotero fira buvurutusira. Nu totoi namokena furarira amo, nu nangae dabade nemokena yarera. Yari budo givu!

<sup>24</sup> Nenda babojegari ategi erena. Sevu ningore! A God da natofo isambu ategi erena. Sevu ningore! Kotugo, namondeda nano namendi Frovensi Italy ghe fusera aimi, ne ategi erera. Yari budo givu!

<sup>25</sup> God da sonemba, ne isambukena irare!

Avori, nanda geke tano eviri.

## James Nunda Reta Nunda Natofu Jusi Embokena Gefusira, Amo Eviri.

James retaé gefusira amo, namondeda Bajari Iesu da namendiri tano. Nu, avose, ghaeko 45-50 A.D. joká aminda gefusira. Nu ekaresia+ da irari, a Iesu tumondari+ embo nange dabade saramana aetera a iraetera, aindae dengoro indudusira.

Namane geka einda mendo mendo, jo eminda gambaeri. Avata, James da geka tegutuse, nunda gekada mendo faiya ingagoimi gefusera ava gosudo vose yaresa.

<sup>1</sup> Arie, nanda nano namendi! Na James ri. Na God a Bajari Iesu Keriso ghaeda saramana kato eniri. Nanda nano namendi Jusi embo, ne ategi beká ava erena. Namonde nunda oro oro 12 ainda evetu genembo Frovensi Judia ghedo gate soesa edo aeva, reighi reighi aminda dighido ireva ava, isambu ategi erena. Yari budo givu!

*1:2-8 Dara A Mema Foa Gheraira Aindae, Namonde Ivuga Edo Ghaeteri.*

<sup>2</sup> Nanda nano namendi, dara a mema foa gheraira, aindae ivuga aovo dae resena.

<sup>3</sup> Ainda beká mo: dara o mema aimi nenda tumondari ava dere garira amo, ne dara a mema tafuse fakina edo durumuguse fetareva.

<sup>4</sup> A kotugo, mema itatamuse, fakina edo irovo dae resena. Amin-guse irareva amo, ne evetu genembo beká da irari a kotofu da ari ava use, dambu irise dubo joká esimbuge gogoghombuse irareva.

<sup>5</sup> Avata, ne mavejo mavejoi dubo kotari ava bari dae sareva amo, God kena benunu saovo mutari bareva. Ainda beká mo: nu evetu genembo isambu sonembuse, kavevera eraira.

<sup>6</sup> Avata kotugo, rejo enidae benunu sareva amo, ne erá manamana

use banungeove! Nu roera amo mutari bareva, ava tumonduse banungareva. Ainda beká mo eviri: evetu genembo mave manamana arira amo, nu kau eva yauraimi bu sive ya foa gheraira, ainda kaugori.

<sup>7-8</sup> Evetu genembo avavaga amo, kotari etoto etoto kotise irá gheraira. Nu gungubo kato da kaugo edo irira. Ava sedo, Bajari numokena rejo eni mutari bari ava, nu jo kotae aeti.

*1:9-11 Gegenembo Guguade A Makasi Embo Da Gekari.*

<sup>9</sup> God da natofu makasi embo, ne ivuga use iraeteri. Ainda beká mo: God ne jighiri eredo, nunda sasingu edo irera.

<sup>10-11</sup> O God da natofu susu iti fafode amo, nembarago ivuga use iraeteri. God ne fitiri vosedo, nunda sabua+ edo, nunda javodae meka gosuse irera aindae ivuga aeteri. Ai resira amo: kau joka da vuji totoi gharasa edo, dore vose dadaberaira aminga ava, enda eminda duro rejo ava genembo susu iti fafode aikena irira amo, totoi dadabedo manjeraira. Kau iji viti jaraghurureari, joka da vuji amo avi gharasa edo, dore vose dadaberaira aminga ava, genembo guguade nunda saramana ururari, ainda jokáda God sari ambarira.

*1:12-18 Namonde Jo Mema a Bouvu Itatamuse, Gofedo Ari Eko Ae Arera.*

<sup>12</sup> Genembo mave mema a bouvu fufuse, jo gofae arira amo, nu ivuga arira. Ainda beká mo: nu mema a bouvu fufuse jo gofae arira ava gido, Bajari numokena kotofu da yeye kau kekesa avavaga mutari barira. Keke-saá mave barira amo, jebuga evovodae irari ava barira. God nu, evetu genembo mave nu dubo buraera aikena, kekesa ava mutari dae sedo, beka gagojusira.

<sup>13</sup> Genembo eni, mema a bouvu setena ava fufuse aindae, ari eko eni ari kotarira amo, erá, "God na dere-tiri ari eko eteni," seure dae resena! Ainda beká mo: God nu jo ari eko kotari da kaugo iraeri. A nu jo evetu

genembo, ari ekoko aoro dae sedo, jo derae eraira.

<sup>14</sup> Geka beká mo eviri. Evetu genembo ari ekoko eraera amo, ne fisi da ujuimi jumbeari ainda amboda amboda ise, ari ekoko eraera.

<sup>15</sup> Eregoseva: evetu genembo tofofo nenda fisi da ujuimi nemoá dereari ari ekoko eraera. A kotugo, ari ekoko baji mindafu arira amo, ambari ava unumbe bu furarira.

<sup>16</sup> Ava sedo, nanda dubo bari nano namendi, erá tofofo dereove dae sise resena!

<sup>17</sup> Roera evevago a joba isambu, God nune muteari utuda ghedo foa gheraira. Kotugo, usasa isambu utuda irira ava, nune etiri sirorusira. Numo usasa da numamori. Numokena tumba eni tefori. Kotugo, nu evovodae jaraghuse irá gheraira amo, jo tumbai nunda usasa gajari da kaugo iraeri.

<sup>18</sup> Nunda uju ava use, nunda geka beká da fakinaimi, setiri namonde sirouseri. Namonde evetu genembo mo, roera a sino fuka utu a enda eminda irera, ainda giti jighari aoro dae sedo, usira.

*1:19-27 Namonde Jo God Da Geka Ningari Vanembo Ae Arera, Namonde Ningido Amingarera.*

<sup>19</sup> Nanda dubo bari nano namendi, geka evia kotovo dae resena. Ivuga use dengoro afigedo, komana da geka ningovo dae sise resena. A mino roboghoi saovo dae resena. A kotugo, kau daba aminga ava, erá tofofo janje ekoko eove dae resena.

<sup>20</sup> Ainda beká mo: ne janje eko areva aimi, ne dimbari God da uju jo ae areva.

<sup>21</sup> Ava sedo, nenda ari ekoko evovodae eraeva, a nenda ari mendeniimi nenda tamo bebeta eraeva ava, seghe fugovo dae resena. Tumo darido, ne tofofo God da ungodá fitido, nenda dubo jóká afigedo, nunda geka ivugaghae bareva. Geka ava, God nenda dubo jókáda govári bu kaifa areva amo, jebuga evovodae irari ava tuve bareva.

<sup>22</sup> Erá God da Geka ningari vanembo eove! Nininguse, nu rea aovo dae resira ava kotise, aminguse irareva.

<sup>23</sup> Mave God da Geka ningari vanembo use, ainda aito jo fugae arira amo, nu kau emingori. Nu kau genembo eni, ya tofo nunda dombu itituda (mirror) fuge gido,

<sup>24</sup> Jovereghe ise, nunda dombu kau avega gira ava kotae eraira, ainda kaugori.

<sup>25</sup> Eregoseva: God da Agho Dari mo, numo bekári. Aminda, namonde jebuga tambarera. Ava sedo, genembo mave God da Agho Dari bu jighirarira amo, nu jo ningari vanembo use, Agho Dari jo kotae ae arira. Nu Agho Dari ava kotise, kaifa use irá ghedo gharira. Kotugo, nu Agho Dari ava kotise, kaifa use irarira andae, God nu esimbugarira.

<sup>26</sup> Genembo eni mave eminge ko-taetira, “Na God da uju ava use irena ágido, nu nandae ‘eveva’ sarira.” Nu aminge kotise, nunda aviva jo kaifa ae, geka kotae kotae seraira amo, nu tofo mandi dederuse irá gheraira. Nu God da Geka mendeni kaifa eraira ainda beká eni, jo siro-rari bae arira.

<sup>27</sup> God kakara use tumonde bainghe gogoghombári da emboro beká mo, eviri. Sasingu babate a roriri mema tafururoro gido, namonde sonembarera; a kotugo, fisi da uju a enda da irari ekoko ava imboe edo darigarera. God da kotari eviri: ari setena amo, numo kakara use tumonde bainghe gogoghombári da emboro bekári.

## 2

*2:1-13 Namonde Evetu Genembo Isambu, Inononda Kakara Use Iraeteri.*

<sup>1</sup> Nanda nano namendi, ne namondeda Bajari Iesu Keriso durode ava tumonduse, nunda natofo edo ireva. Ava sedo, ne jo evetu genembo fuge gosuse, evetu genembo durode aikena veka eove use, evetu genembo duro iraede aikena, veka

sembae ae areva. Evetu genembo isasambu gosuse, kau daba ava kotise, inonoda ne kaifa esimbugareva!

<sup>2</sup> Geka evia itako se disuguse, na ijugaboro eminge sari dae erena. Ne banungari dae sedo totorugururovo, genembo eni tamo asugari eveva asugedo, gogho edo<sup>2</sup> furarira. A kotugo ainda amboda, makasi embo eni boka sembae ujudo foa terarira.

<sup>3</sup> Avori, kotofu aikena, “Fu, ghaito durono anumbase!” saetevu. Aminge sise, makasi embo aikena, “Yasi, endada anumbase,” o “Ghaito gegori, aminda fete!” saeteva amo, sembaeri.

<sup>4</sup> Ne amingeraeva amo, evetu genembo da irari ava gosuse, jo inononda ae eraeva. Ne evetu genembo da irari gosuse, mendeni kakara eraeva, a mendeni jo kakara ae eraeva. Amo, ne sembae kotise amingeraeva.

<sup>5</sup> Nanda nano namendi, na, ne dubo buraena. Nanda geka evia ningaetevu! Ne kasama ereva: God sisira, “Mave na dubo barira amo, nu nanda mandi ari, undururono nunda tumondari teria ari, nanda vasada gugua irira ava barira,” aminge sisira. Kotugo nune seari, makasi embo mokogo nunda natofu edo irá gheraera.

<sup>6</sup> Avata nemo, makasi embo gukai muteovo meka giraera. Ne redae makasi embokena veka sembae eraevu? Mave nemokena fakarago eoro mema itatameraevu? A kotugo, mave ne jumbu bu ya fiteoro koto eraevu? Ava kote givu! Amo, susu iti fafodeimi, amingeraera.

<sup>7</sup> A Keriso da javo kakara use nunda javono gateraeva avata, evetu genembo guguae daba aimi seoro eko eraira.

<sup>8</sup> Bajari namondeda kiniri. Ava sedo, nunda agho dari evia, nene kaifa areva.

“Ni tofo dubo buraesa, kau daba ava, ninda komana dubo baresa,”

aminge resira.

<sup>9</sup> Avata ne evetu genembo da irari kotise, mendeni kakara eraeva, a mendeni kotae eraeva. Ne amingeraeva amo, ne God da Agho Dari ava bejise, ari ekoko eraeva. A kotugo, Agho Dari bejeraeva aimi, nenda ari ekoko ijujuse, isagha ijugeraira.

<sup>10</sup> Ai resira amo: mave Agho Dari da geka mendeni kaifa use, dabako tainako bejarira amo, nu aminguse, inono, isambu bejari da kaugo arira.

<sup>11</sup> Eregoseva: God eminge sisira, “Erá yagera eove!” Kotugo, God daba aimi sisira “Erá komana deóso ambeure!” Avori, saone? Ni yagera jo ae aresa, avata ni genembo eni daso ambarira amo, ni Agho Dari dabako ava bejise, dara edo jebuga kosasagharesa.

<sup>12</sup> Avori, Jusi embo da Agho Dari irira, ainda mendo mendeni oroko seteno tegetevu. Kotugo, Keriso namonde ari ekoko aimi bundetiri iriara ava gido, Keriso agho dari eni irira aimi namonde vujegusira. Agho dari amo, nu dubo bari da agho dariri. Amboda God nu agho dari aimi budo, namonde ijujarira. Ava sedo, agho dari amo kotise, namonde geka eveva sise, a ari eveva use irarera.

<sup>13</sup> Ainda beká mo: God namonde ijujarira da sifo aminda, nu emingarira. Mave nunda kokomanadae jo joka ae usira amo, God nundae barago jo joka ae arira. O mave enda eminda irise, joka use irarira amo, nu ijujari da sifo aminda jo oju ae arira.

### *2:14-26 Tumondari Mo, Jo Geka Vanembo Iraeri.*

<sup>14</sup> Nanda nano namendi, evetu genembo mendeni eminge seraera, “Na tumondari embori. Na God da jebuga barena.” A nu aminge seraera avata, ne rea eraera aimi, nenda tumondari jo ijugae eraira. Aminguse, ne ari eveva eni jo ae, ne sembae eraera. Tumondari avavagai, sonembari ne jebuga barera, ai?

<sup>2</sup> 2:2: Geka “...gogho edo furarira...” namondeda gekai gefusera amo, Greek geka aimi, “...bumbuki auri gold imi ariri...” ava gefusira. Nenda sifoda, evetu genembo guguaeimi bumbuki auri gold imi ari ava asugedo ghuseri.



15-16 E kote givu! Evetu o genembo eni, embo boka o uvu bayau tefo irari gido, eminge saetesi, “God ni kaifa are! Yasi, embo bu avido, bayau mindi jebugase!” aminge saetesa amo, ainda javo jo sonemba iraeri. O embo a uvu bayau mutaetesa aimi, ni sonemba beká ava aetesi.

17 Tumondari mo, kau daba avori. Mave tefo tumonduse, nunda tumondari andae rejo eni jo ae arira amo, nunda tumondari ainda beká eni tefo beká tefori.

18 O genembo eni osogo use, eminge saetira, “Namonde evetu genembo da kiki jo dombu dabako iraeri. Evetu genembo mendeni, ne God tumonde gogoghombraera. Avata evetu genembo mendeni, ne natofo sonembuse irá gheraera.” Nu aminge saetira amo, na eminge saeteni, “Ni tumonderaesa resesa amo, namane ninda tumondari nange kasama areri? O namo, natofo sonembururono, nanda tumondari da beká ava isagha ari garesa.”

19 O nu eminge saeti, “God Afa nusuka numoá God ava, na tumonderena. Ava sedo, na jebuga barena.” Nu aminge saetira amo, na eminge saeteni, “Amo nu gekari; avata kotugo, ni sukaru isambu ainde dabade tumonderaesa.” Ainda tuka mo: sukarumane ne, God irira ava anakora kasama edo, tumonduse irera. Tumonderaera andae, ne oju use ungo ata dadadagheraera.

20 Ava sedo, genembo mave aminge kotise irarira amo, nu daghariri. Mave tefo tumondariguse, nunda tumondari andae ari eveva eni jo ae arira amo, nunda tumondari ainda beká eni, tefo beká tefori.

21 Kote givu! Oroko geka resena, einda ijugaboro eni saono ningareva. Namondeda abua Abraham nangetiri God nundae ‘eveva’ sisira, ava kote givu! Nu jo tefo anumbirise tumondururari, God nundae jo ‘eveva’ sae usira. Nu

God da uju ava use, nunda mandi bundedo oltada fiti dungari dae iri gido, God nundae ‘eveva’ sisira.

22 Eregoseva? Nunda tumondari a nunda ari aimi tofo tofo sonembuse, inono usira. Nu rejo usira ai sonembiri, nunda tumondari isagha etiri gido, God nundae ‘eveva’ sisira.

23 God aminge siri, nunda geka eni gembero irira ava, beká usira. Amo eviri:

“Abraham God tumondusira andae, God nundae ‘eveva’ sisira.”

Avori, geka setena, ava kasama aetevu. Abraham jo tefo anumbirise God tumondururari, God nundae ‘eveva’ saeri. Abraham God tumonduse saramana iri gido, God nundae ‘eveva’ sisira. Kotugo aminguse, God setiri, Abraham nunda komana usira.

24 Avori, na ijugeteno gevu: namonde jo tumondari avanembo ururoro, God namondedae ‘eveva’ sae arira. Namonde eredo nunda uju ava ururoro gido, namondedae ‘eveva’ sarira.

25 O kotugo, evetu saghere kato javo Rahab, kote givu! Nu kau daba aminga ava use, jebuga rurusira. Rahab nu namonde Jusi embo da indiro kakato sonembuse emboro eni ijuge-tiri gitofu darigusera andae, God nundae ‘eveva’ sisira.

26 Ava sedo, na geka setena ava kotise, kasama areva. Genembo eni nunda asisi darigari ambu fasisari gareva amo, tamo amo otighi vanembori, beká eni tefori. Kau daba aminga ava, namonde tefo tumondariguse, namondeda tumondari andae rejo eni jo ae arera amo, namondeda tumondari amo, beká eni tefo beká tefori.

### 3

#### *3:1-12 Namondeda Aviva, Kaifa E Gogoghobarera.*

1 Nanda nano namendi, ne digari jo ijuga kakato ari dae sae areva! Ainda beká mo: namane

ijuga kakato ava, God sifo amboda ijuje gogoghombuse, ategi e gogoghombarira.

<sup>2</sup> Namonde isasambu ari ekoko eraera. Avata genembo mave nunda avivaimi, geka sembae eni jo sae arira amo, nunda fisi da uju isambu ava, buregarikena inono arira.

<sup>3-5</sup> Ainda beká mo: namondeda aviva jo teria iraeri. Avata aimi eari dara teria futo siroreraira. Aviva amo inono, auri kitako hosi (horse) da békada asugeraera, ainda kaugori. Namonde auri asugedo aimi jumbarera amo, hosi (horse) ainda amboda ise, namondeda uju ava arira. O ghaka+ kote givu! Ghanda ghaembo dimburaera amo, kitakori. Yaura da fakina mindafuri. Avata kotugo, namonde ghaka+ ningiaminda yare dae sedo dimbarera amo, ghakaá+ aminda yarira. Avori, namondeda aviva mo, kau daba avori. Nu kitakori. Avata roera mendeni aviva da fakinaimi eari foa isaghada buvuraira amo, mindafu bekári; aindae nu tofo sakai seraira. O avaraka kau daba avori! Avaraka ijoghako avata, dungarera amo, enda teria isambu avi dadabarira.

<sup>6</sup> Namondeda aviva mo, kau daba avori. Amo, nu inono enda da irari eko isambu, ainda kaugori. Aimi, namondeda dubo joká isambu bebete eraera. Aminguse, namondeda irari isambu barago bebete eraera. Kotugo, aviva da fakinaimi namonde dara eraera amo, Satan kena ghe foa gheraira.

<sup>7</sup> Namonde sino fuka dombu eni dombu eni, rika, jingabu, a oka isambu sandi undeoro tamo deraira.

<sup>8</sup> Avata namonde isambu, aviva kaifa arikena jo inono iraeri. Aviva amo, nu eko a kaeghaeri. Jo kaifa ari da kaugo iraeri.

<sup>9</sup> Umbu mendeni mendeni, namonde avivaimi namondeda Bajari a Afakena aiyakoe seraera. O sifo mendeni mendeni, namondeda aviva daba aimi, namonde nano namendidae jijivu seraera. God namondeda nano namendi kau numoá

avavaga, etiri siroruseri. Ava sedo, aminge eraera amo, eko bekári.

<sup>10</sup> Namonde aviva daba aimi, God kena aiyakoe seraera, kotugo daba aimi jijivu seraera. Amo eko bekári. Nanda nano namendi, namonde jo amingae arera.

<sup>11</sup> Namonde ya uvu bogu aminda dimbarera amo, namonde jo uvu beká dimbudo, kotugo sifo eni ya, vasa daba aminda karaje jo dimbae arera.

<sup>12</sup> Kau daba aminga ava, namonde jo ya ika kayuyu aminda kodurere bae arera. A usu aminda, namonde kayuyu jo bae arera. Kau daba aminga ava, namonde karajei bayau itarera amo, suka jo eveva mindae arera. Kau daba aminga ava, namondeda beka kaifa use, geka eveva vanembo sise irarera. Namondeda geka eveva jo geka ekoimi bebete ae aeteri.

*3:13-18 Dubo Kotari God Nune Mutturaira Aimi, Dubo Jama A Jebuga Sirorari Barera.*

<sup>13</sup> Nenda jokáda, genembo mave nu dubo kotari kato a kasama kato, ava kotarira amo, nu emingarira. Nu dubo kotise, tumo darido veka eveva use, ari eveva ururari garera!

<sup>14</sup> Avata ninda dubo jokáda, komanana da bino aindae bengoso use dubo eko aresa, o nisuka nimo vanembo kotaresa amo, erá “Na genembo evevari,” seose! Erá “Na dubo kotari katori,” sise, gungubo seose!

<sup>15</sup> Dubo kotari amo, jo utuda ghe vose foa ghae eraera. Amo enda da kotariri. Kotari amo, Satan kena ghedo foa gheraira.

<sup>16</sup> Ainda beká mo: evetu genembo kokomana da bino aindae bengoso eraera, a nesuka nemo vanembo kotise irá gheraera aminda, beisiga a ari ekoko dombu eni dombu eni siroreraira.

<sup>17</sup> O dubo kotari God nune mutturaira amo, kau emingori. Nu eveva vanembori. Aimi dubo jama sireari, evetu genembo tofo tofo kakara eraera. Aimi, ne tofo tofo joka edo sonembuse durumugedo

irá gheraera. Evetu genembo dubo kotari daba aimi, natofo isambukena inononda use, aito bekáda bekáda fugeraera.

<sup>18</sup> Evetu genembo resena emo, ne dubo jama ijugururoro aimi, ari eveva a veka eveva ava batuno edo vitarira.

## 4

### *4:1-10 Namonde Totofo God da Ungoda Fitaeteri.*

<sup>1</sup> Beisiga a dumo bauso, nenda jokáda siroreraira amo, reda ghe foa gherai? Kote givu! Saone? Fisi da uju, nenda tamonda aimi eari kosasagheraeva.

<sup>2</sup> Roera eni uju areva amo, ne ava bari dae sedo, kokomana deovo amburaera. Ne roera mendeni mendeni dighighi eraeva amo, ne ava bari dae sedo, beisiga use tataya eraeva. Avata roera amo jo bae ireva. Ainda susu mo: ne God kena jo benunu sae eraeva.

<sup>3</sup> O kotugo, benunu seraeva amo, ne jo bae eraeva. Ainda beká mo: ne sembae benunu seraeva. Amo, ne jo God da uju ava kotise benunu sae eraeva. Nenda tamo fisiimi rejo uju eraira, ava kotise benunu seraeva.

<sup>4</sup> Ne kotari etoto etoto evo nenda tumondari dadabetira. Ava sedo, God ne nange tumondari? Kasama aovo dae resena. Evetu genembo fisi da uju use irera ainde dabade, umo use deinghareva amo, ne God da gitofu use irareva. Mave aminguse irarira amo, nu God da gitofukena sembudo nenda eni edo irarira.

<sup>5</sup> God da Geka emo jo susu tefo saeri, susudae eminge resira:

“God namondeda asisi namondeda dubo jokáda fitiri irira amo, kotari ekoko beká aimi bedo edo irira. Aimi dereari namonde kokomanadae dubo ekoko eraera.”<sup>5</sup>

<sup>6</sup> Avata God da sonemba teria muturaira aimi, namondeda dubo eko sari

dadabari da kaugori. Nunda geka aindae sise, eminge resira:

“Gogore kakato ava God nu bu-regeraira. Avata evetu genembo tumo darido irera aikena, sonemba muturaira.”

<sup>7</sup> Ava sedo, ne tumo darido, totofo God da ungodá fitido irovo dae sise resena. Aminguse, Satan buregareva amo, ne darigedo sumbarira.

<sup>8</sup> Ne ya God kena utua areva amo, numbarago foa nemokena utua arira. Setena, daba ava sari dae erena. Ne kotari etoto etoto eraeva. Dubo jovereghedo, nenda ungo, ari ekokoimi bebeta edo irira ava seghuse, nenda dubo joká barago seghe simbugevu!

<sup>9</sup> Ne ari ekoko edo ghuseva aindae, sorara janjagughae aovo dae resena. Nenda gegha a umo gamo dodo, dubo mema aovo dae resena.

<sup>10</sup> Aminguse, Bajari da dombuda tumo darareva amo, Bajari nune jighari ne erareva.

### *4:11-12 Namonde Kokomana Jo Ijujae Aeteri.*

<sup>11</sup> Nanda nano namendi, erama nenda nano namendidae aji seove! God da Agho Dari erá amingeove dae sise resira. Ava sedo, mave Agho Dari da geka evia kotae edo, nunda namendi da ari ava ijujarira, o aindae aji sarira amo, nu Agho Dari ighagha use amingarira. Nu amingarira aindae beká mo: nu erekotira, nunda kotari amo teriari. O God da Agho Dari rea resira amo kitakori, nu ava erekotira. Avata amo kotari sembaeri.

<sup>12</sup> God nusuka Agho Dari futusira. A nusuka nune, sifo amboda evetu genembo da irari ava ijujarira. Sari jebugari a sari sirivo ari da fakina mo, God nusuka bu jighirira. Ava sedo, ni redae ninda komana da irari ijujaresi?

### *4:13-17 Namonde God Da Ungoda Ivera.*

<sup>5</sup> 4:5: James da geka eminda gefusira jo isagha beká iraeri. Evetu genembo mendeni koteraera, namane rea ikáda gefusera amo, geka einda tukari. A evetu genembo mendeni koteraera, geka einda tuka mo eviri: “God da Asisi namondeda dubo jokáda ffitusira aimi, namonde nunda tofodae bari uju beká ava eraira.”

<sup>13</sup> Ne eminge seovo ningiraena, “Fuvu, namonde sifode ere ya reighi eninda ghaeko dabako irise, oriro use moni digarigo baore!”

<sup>14</sup> Avata amo sembae seraeva. Sifode rea sirorarira ava, ne bunariri. Ne jebuga ghousa kau mavego irareva, ava kote givu! Ne kau rofoma da kaugori. Amo sifoghae gareva. Iji viti gayarira amo, dadabarira. Kau daba aminga ava, ne sifo tufako irovo, God sari sirivo areva.

<sup>15</sup> Ava sedo, ne eminge saetevu, “God uju arira amo, namonde irise, saramana rejo rejo arera.” Nenda gogore ava dotutuse, aminge saeteva amo, avori.

<sup>16</sup> Avata ne oroko gogore use, ne rea amboda ari erekoteva aindae, tofofo sakai sise ireva. Amo ari sembaeri.

<sup>17</sup> Kotugo ne ningiaminda ari eveva da goroto ava gido, kakage doyareva ábarago, ari ekori.

## 5

### *5:1-6 Namondeda Tumondari Jo Monikena Fitae Aeteri.*

<sup>1</sup> Evetu genembo mendeni iti susu fafode edo ireva, nemokena resena. Ne, dara a mema nemokena foa buvari dae erira aindae, sorara janjagughae aovo dae resena.

<sup>2</sup> Nenda gugua bakomba e dadabusira. Nenda embo jirikoimi mindi dadabusira.

<sup>3</sup> Nenda moni karakarajeka edo irira. Avata nenda moni digari bu dabade etevo irise, karakarajeka use irira aimi, God sari, kau avarakai kikisa aviraira aminga ava, ninda tamo mindi dadabarira. Ne sifo amboda furarira ava kotise, nenda moni bu dabade fiftuse, mino sembae ainghae dabade fitevo irira.

<sup>4</sup> Ai resira amo: nenda saramana kakato vare da bayau bamburaera ava, dederuse nenda mino ava jo mutae eraeva. Ava sedo, bayau bambari kakato ainda sorara ava, Bajari God Fakina Kato aimi ningido, nenda derari ovia imboe eraira.

<sup>5</sup> Ne enda eminda eveva avanembo tafuse, uvu bayau inononda rise, tamoghae ireva. Avata kau fuka uvu bayau eveva rise, tamoghae iriari sandi deoro amburaira aminga ava, God ne gido, kau fuka mane avavaga dari sirivo areva.

<sup>6</sup> Evetu genembo eveva ava, nene koto use daoro amboro dae sedo, aito etevo detero sirivo useri. Evetu genembo setena amo, ne nemokena rejo eni jo aeri. A ne jo buregae useri. Avata nene nendae amingusevu.

### *5:7-20 Namonde Durumuguse, God Tumonduse Iraeteri.*

<sup>7</sup> Avori, nanda nano namendi, namonde durumuguse kaifa ururoro, Bajari jovereghe furarira. Genembo vare goveraira, ava kote givu! Nu vare govedo, durumugedo kaifa urureari, boriya dirureari vitiraira. Viviturreari, ghaeko da sifo foa buvuraira.

<sup>8</sup> Namonde kau daba aminga ava use, durumugedo gigituse irarera. Ainda beká mo: Bajari jovereghe furari da sifo ojira utua erira.

<sup>9</sup> Nanda nano namendi, kote givu! God Ijujari Kato foa buvari dae erira. Ava sedo, God nemo ijujeure dae sise, erama tofo tofo beisiga use kokomana giseove!

<sup>10-11</sup> Nanda nano namendi, feroveta anakora endada deinghuse, Bajari da javoda nunda geka osa sedo ghusera, ava namonde kotaeteri. Ne mema a bouvu itatamusera ainda jokáda, ne durumuge kaifa edo ghuseri. Ne amingedo ghusera aindae, namonde God ne esimbuge gogoghombariá seraera. Ava sedo, namonde kau daba aminga ava, durumugedo kaifa use irore! Job da kiki ava kotaeteri. Job numbarago mema a bouvu itatamuse, durumugedo kaifa iri, amboda Bajari nu sonembusira. Ainda beká mo: Bajari nu sonemba kato a joka ari katori.

<sup>12</sup> Kotugo, geka teria eni mo, eviri. Nanda nano namendi, beka gagojuse, erama utu da javono o enda da javono o rejo eninda javono gateove!

Ni roera eni ari kotaresa amo, ni taká 'ai' sedo, amingaresa. O ni jo amingari da kaugo irae ava kotaresa amo, ni taká 'tefo' sedo, jo amingae aresa. Ni amingaresa amo, God ari ekoko ijujuse mema rea mutarira amo darigaresa.

<sup>13</sup> Nenda nano namendi eni dubo mema aetira, o bouvu eni fumbaetira amo, nu banungaeti. O nenda eni ivuga use iratira amo, nu God dae sakai sise, yaru divaeti.

<sup>14</sup> Nenda eni kae tambaetira amo, nu emingaeti. Nu aghi ari, ekaresia+ da kokotofu foama, Bajari da javoda nunda tamo ava usuimi davedo, banungaeteri.

<sup>15</sup> Tumonde gogoghombuse amingarera amo, kae embo amo nu jebugarira. Kotugo, Bajari nu, kae embo ainda ari ekoko rea usira ava kote dodo, sari nu jebugarira.

<sup>16</sup> Ava sedo, nenda ari ekoko tofo tofo vujegedo, ne nange jebugaeteva ava kotise, aindae tofo tofo banungareva. Ne eregoseva, genembo evevaimi banungarira amo, nunda banungari dika arira.

<sup>17</sup> God da feroveta Elijah kote givu! Nu taká genembo namondeda kauri. Nu nunda fakina avavaga edo, erá borija direure dae sedo, banungetiri borija jo dirae irise, ghaeko 3, tambuno 6 á dadabusira.

<sup>18</sup> Ainda amboda, nu sekago banungetiri, foroga darido borija disira. Diriri, bayau sekago batuno edo vitido beká usira.

<sup>19</sup> Nanda nano namendi, geka eni sari dae erena. Nenda eni geka beká ighagha edo, fisi da uju ava ururari, genembo eniimi nu sonembedo dengoro indari dubo joveregharira amo, evevari.

<sup>20</sup> Ne evia tumondaetevu. Genembo mave ari ekoko embo ava, unumbe bu jovereghe usasakena furarira amo, nu genemboá sonembe gogoghombarira. Ainda beká mo: nu amingari aindae sedo, God nu genembo ainda ari ekoko digari ava kote dodo, sari nu jebuga evovodae iriri, ava tuve barira.

Na ne ategi beká ava erena. Yari budo givu!

Avori, nanda geka tano eviri.  
Na James.

## Peter Nunda Reta Gitida, Kuristini Embokena Gefusira, Amo Eviri.

Iesu da ambo jimbi eni javo Peter, nu reta evia, avose, ghaeko 65 A.D. ainda jokáda gefusira. Nu reta jokáda, “Na reighi Babylon irise, reta emo eregefena,” sisira. Avata namonde erebunera, nu geka beká sisira, o nu reighi Rome kotise, kasia reighi Babylon kena fiftuse sisira, ava namonde bunariri. Keriso da gitofu fakarago use, Keriso da natofokena bouvu muteoro, ne mema itatamedo ghusera ava kotise, Peter nunda geka evia gefusira. Nu nemo sonembuse, erá bunendo dara jokáda teredo, Keriso ighagha eore dae sise gefusira.

*Peter Nunda Geka Gitida Kuristini Embokena Gefusira, Ainda Mendo Mendo Mo Eviri.*

1:1-2 Peter natofo ategi usira.

1:3–2:10 God namonde sonembairera, a amboda nunda jebuga mutari baoro dae resira. Ava sedo, namonde fakina edo fetarera.

2:11–5:9 Namonde God da natofo edo, Iesu da furari Sifo kaifa use, ari rea aetera, aindae Peter sisira.

5:10-14 Peter ne esimbugedo, tano usira.

<sup>1</sup> Arie, nanda nano namendi! Na Iesu Keriso da aghi kato Peter, nane God da natofo, dara nemokena sirorusira aindae, ne gatedo soesa edo aeva, Frovensi Pontus, Galesia, Kapadosia, Asia, a Bitinia aminda dighido ireva ava, ategi beká erena. Yari budo givu!

<sup>2</sup> God Afa nunda uju ava use, ne gategusira. Etiri, God da Asisi Kakara aimi setiri, ne God da natofo kakarago edo ireva. Amingusira da beká mo: ne Iesu Keriso da geka

ava niningururovo, nunda ororoimi nenda ari ekoko seghe fugutururari irovo dae sedo, amingusira.

Sonemba a dubo jama, ya nenda dubo jokáda vose bedo edo fumbu fetare!

*1:3-12 God Da Sonemba Teria Aindae, Namonde Sakai Saore!*

<sup>3</sup> Namondeda Bajari Iesu Keriso da God a Afadae aiyakoe sise irore! Ainda susu mo: nu namondedae joka edo, namondekena jebuga seka futusira. Amo, nu setiri Iesu Keriso ambarida ghe jebugedo erorusira ainda fakinaimi, namondekena jebuga seka ava futusira. Aindae namonde numokena aiyakoe sise irore! Ainda beká mo: namonde numo tumonduse, jo tefo tefo gigitae eraera. Namonde susudae gigiteraera.<sup>3</sup>

<sup>4</sup> Amo, God nunda koana nunda natofokena mutari sisira, aindae gigituse irera. Nunda koana resena emo, utuda irira. Koana utuda irira amo, jo bakomba use jaghe vose dadabae arira, a sifo reda jo manjae arira.

<sup>5</sup> Ainda koana ava nene amboda baovo dae sedo, God utuda bu jighirise, tavo use irira. A kotugo nembarago, God nunda fakinaimi tavo iri ireva. Amo, ne tumondururovo, nu, ne tavo ururari, nunda sonemba mindafu anakora simbugusira ava, sifo gombuda isagha ari bareva.

<sup>6</sup> Ava kotise, ne ivuga use iraetevu. Ne ivuga use iraeteva avata, oroko mo, ne dara a bouvu mendeni itatameraeva aindae, dubo mema use ireva.

<sup>7</sup> Dara a bouvu foa gheraira resena, ainda tuka mo eviri. Nenda tumondari fakinari, ai, gofariri, ava dere gosuse ijugari dae sedo, foa gheraira. Auri ‘gold’ ava kote givu! Amo, sifo gombuda, enda einghae dabade munje dadabarira. Avata nu roera evevatori. Nu eveva are dae sedo, avarakada ingeoro nunda

<sup>3</sup> 1:3: Peter nu “gigitari jebuga irari” avanembo gefusira. Avata namonde jebuga seka amboda barera ava gigituse irera, isagha siseri. Kau daba ava, duruda eminge resira, “Namonde susudae gigiteraera.” Aminge resira da beká mo: namondeda jebuga seka aindae resira.

jeka vose dadaberaira. 'Gold' nu roera evevatori, avata 'gold' mo, jo nenda tumondari amingo iraeri. Nenda tumondari resena emo, jo enda einghae dabade dadabae arira. Avata namonde 'gold' avarakada ingeoro nunda jeka vosari gari dae eraera aminga ava, God namondeda tumondari ava dere giraira. Amo, namonde dara a bouvu itatameraera aimi, nu namondeda tumondari dere giraira. Namondeda tumondari nange fakina ari tumonde gogoghombaetera aindae, namonde dere giraira. Avori, aminge dere gosururari, Iesu Keriso amboda foa isagha ururari nenda duro isagha ari, God nendae sakai sise ne jighari erareva.

<sup>8</sup> Iesu Keriso resena emo, ne jo nenda ditiimi gaeri. Avata ne nu dubo buraeva. Nunda tamo ne jo gae eraeva. Avata ne nu tumonduse ireva. A kotugo oroko barago, nu jo gae ireva. Avata ne numoá tumonduse, atai fefetuse, ivuga jo sari irae ava use ireva.

<sup>9</sup> Ne aminguse ireva, ainda beká mo: God nenda asisi da jebuga ava futiri ne rurudo refeva. A kotugo, ne jebuga ava bari dae sedo, Iesu tumondusevu.

<sup>10-11</sup> Asisi da jebuga resena, einda kau mavega ava kasama ari dae sedo, ferovetamane ne tava use ategi e ningido ghuseri. God nange mutarira, a nanjigo mutarira, ava kasama ari dae kotise, ne tava edo ghuseri. Ne tava ero, Asisi Kakara nenda dubo jokáda siri itatamedo, ne asisi da jebuga God amboda mutarira ava, nange nemokena ya buvari baeteva aindae, osa sedo ghuseri. A kotugo, Keriso nu nange nangedo foa mema tafuse ambudo, sekago jebuge eredo duro aetira ava, siri nininguse, nene osa sise gembudo ghuseri.

<sup>12</sup> Gekáá, jo totofo nenda evevadae sae ava, God ijugetiri, feroveta amo ne kasama useri. Amo, nene amboda jebuga tambovo dae sise, feroveta aminge gembudo ghuseri.

Amingetero dadabetiri ainda amboda, God nunda Asisi Kakara dirigitiri vose fira nunda fakina mutiri budo, Bino Eveva ainda aghi kakato era nemokena buvudo, osa setero ne niningusevu. Geka resena emo, aneya nemo kasama ari dae uju beká ava eraera.

*1:13-25 Namonde God Da Natofo Eveva A Kakarago Ava Edo Irise, Ari Eveva Use Irore*

<sup>13</sup> Ava sedo, ne kote simbuguse irivu! Iesu Keriso isagha ururari gido, God nunda esimbugari rea mutari baeteva, avanembo gigituse irivu!

<sup>14</sup> God da sari avanembo use irovo dae sise resena. Ne giti tumba jokáda irise, bunise fisi da uju ainda amboda amboda edo ghusevu. Ari daba ava erá sekago eove!

<sup>15</sup> Ainda irariá dodo, ne ari kakarago avanembo use irivu! God ne aghi usira amo, nu kau nange nange eraira aminga ava use, ari kakarago avanembo use irovo dae sise resena.

<sup>16</sup> Nunda Geka barago ari kakarago ava aovo dae eminge resira:

“Na ari kakarago avanembo use irá gheraena. Ava sedo, ne barago kau daba aminga ava use irovo dae resena,” aminge resira.

<sup>17</sup> Ne God kena banungari dae use, “Afa” seraeva. Avata nu evetu genembo isambu da ari inononda gosome ijujairaira. Ava sedo, ne jo ambae, enda eminda irise, God Afa kakara a igheghi use irareva!

<sup>18</sup> Ainda beká mo: ne nembuamane da ari a irari sembae ava darigaovo dae sise, God nu mino teria futusira, ava ne kasama ereva. Mino amo, jo namonde auri eni 'gold' o 'silver' aimi moni eraera, ainda kaugo iraeri. Auri resena emo, ya jeka edo munje dadabarira.

<sup>19</sup> O ne ari eko da fakina ava darigaovo dae sedo, God mino futusira amo, teria bekári. Jo monimi ombari da kaugo iraeri. Mino

amo, Keriso da ororo aindae resena. Evetu genembo giti sifi da mandi (lamb) eveva a garigo beká, kotugo gambisi da buvá irae de ava gatede, de ojedo God kena dungeoro aveari gido, nenda ari ekoko kote dodo ghusira. Kau daba aminga ava, God namondeda ari ekoko kote doyari dae sedo, nunda Mandi mutiri fira buviri, evetu genemboi nu detero ambududurusira.

<sup>20</sup> God nu enda jo ari sirorae iriri, giti mo, Kerisoá gategusira. Avata Keriso nu sife nembo, nendae sedo fira isagha usira. Etiri gido, nunda Bino sero nininguse kasama usevu.

<sup>21</sup> Kasama edo, ne Keriso tumondusevu. God Afa Keriso setiri ambarida ghe jebuge erorusira, kotugo setiri Keriso nunda duro ana sekago rurusira, numoá barago tumonduse ireva. Kotugo nu rea mutari dae sisira ábarago numokena bari dae gigituse ireva.

<sup>22</sup> Ne geka beká ava tumonduse a bu kaifa use, tofofo nenda dubo joká ava esimbuguse a dubo isambuimi futuse, nenda nano namendi dubo rurusevu. Ava sedo, nenda dubo isambuimi futuse, minonde minonde dubo ruruse irivu!

<sup>23</sup> Ainda beká mo: God veka govetiri, jebuga evovodae irari ava nenda dubo jokáda sirorusira. Veka amo, jo veka enda eminda bu goveoro irise heteraira, amingo irairi. Veka resena emo, God evovodae irira, ainda Gekari. Amo, nenda dubo jokáda govetiri ai jebuga siroretiri, nunda sasingu edo ireva.

<sup>24</sup> God da Geka aindae sise, eminge resira:

“Evetu genembo isambu, ne kau eke da kaugori.

A evetu genembo da duro amo, kau vare joka da kaugori.

Kau eke gharasa edo aviraira, o vare joka gharasa edo dore vose dadaberaira

aminga ava, namonde evetu genembo ambeoro tamo bete dadaberaira.

<sup>25</sup> Avata God da Geka mo, evovodae irarira.”

Avori, God da Bino Eveva nemokena vironu sisera avakori.

## 2

*2:1-10 Mave Iesu Da Amboda Yarira Amo, Nu Jebuga Tambarira. O Mave Iesu Imboe Arira Amo, Nu Ambarira.*

<sup>1</sup> Ari ekoko giti edo ghuseva ava, imboe edo doyoovo dae resena. Erá gungubo seove! Erá kokomana gesire use, ari ekoko eove! Erá kokomana da binó aindae dubo ekoko use, unongu a aji seove!

<sup>2</sup> Sasingu seka fumbari ava kote givu! Ne ami mindari avanembo kotise irá gheraera. Kau sasingako amida sorara eraera aminga ava, ne asisi da bayau evevago aindae uju use irareva. Aminguse, ne bayau ava rise diti basari, jebuga seka tambari dae sise, e gosuse irareva!

<sup>3</sup> Amingaovo dae resena da beká mo: Bajari da eveva kau mavego amo, ne anakora mino budo itatamusevu.

<sup>4</sup> Bajarikena furovo dae resena. Bajari resena emo, nu kau ghamana ava tutumbidae simbugeraera, ainda kaugori. Nu jebuga bekári. Evetu genembo nu imboe useri. Avata nunda eveva kau mavego ava gido, God nu gategusira. Ágido, Bajarikena furovo dae resena.

<sup>5</sup> Ne kau sagho amingori. Furovo budo, nunda tutumbi (Keriso setena), ainda etoda fitido, aminda nunda kambo+ kakara itari fetarira. Amboda, ne God da kambo+ kakara ainda jokáda fetedo, fristi+ da saramana avavaga use, Iesu Keriso da javoda, joba eveva mutareva. Asisi Kakara imi joba eveva, nene mutovo dae sarira ava, futururovo bu gido, God nu ivuga use irarira.

<sup>6</sup> God da Geka aindae eminge resira:

“Na ghamana eveva a garigo ava, nanda tutumbi are dae sedo gateguseni.



Gategedo, kambo+ da susu ava are dae sedo, oroko doriri Saion+ aminda dararena.

Evetu genembo mave nu tumondarera amo, ne jo aindae dubo mema ae arera.”

<sup>7</sup> Avori, ne Iesu tumonduse ireva. Numo, nenda tutumbi a susuri. Aindae sedo, ne Iesu uju beká ava erava. O evetu genembo mave jo tumondae irera amo, ne Iesu kena eveva eni jo tambae arera. God da Geka aindae eminge resira:

“Ghamana eni, kambo itari kakatoi imboe edo fugutusera ava, Bajari nune budo, tutumbidae sedo fiti simbugedo, aminda tuturo edo nunda kambo+ itari dae erira.”

<sup>8</sup> A ainda geka eni mo, eviri:

“Ghamana resena aimi, emboroda irari evetu genembo mendeni ya foa ghururoro, nenda atada dimbari durari dae arera.

A evetu genembo mendeni aimi, atada dari du fafasarera.”

Ne nunda geka imboe edo ghusera aindae, ne atada dimbiri du fafasuseri. God ne amingaoro dae uju usira.

<sup>9</sup> Avata kotugo, God ne gategetiri nunda natofo edo ireva. Ne kau Kini (King) da fristi+ avavaga ava use, nunda natofo kakarago ava edo ireva. Nunda saramana, nunda ari, a nunda tano evevago aindae osa saovo dae sedo, God ne gategetiri nunda natofo edo ireva. Ne giti tumba jokáda iriava ava, aghi etiri ne tumbada ghe buvudo, nunda usasa numo beká aminda ireva.

<sup>10</sup> Giti mo, ne jo nunda natofo ae iriavu. O oroko emo, ne nunda natofo edo ireva. Giti mo, ne God da joka ari jo itatamae edo ghusevu. O oroko ava ne itatamereva.

*2:11-17 Namonde Endada Irise, Emingarera.*

<sup>11</sup> Nanda nano namendi, enda emo jo namondeda reighi beká iraeri. Emo gitofu da reighiri. Ne enda eminda, esa embo da kaugo edo deinghuse ireva. Ava sedo, emingaovo dae resena. Erama fisi da uju ainda

amboda amboda use iriove! Ainda beká mo: fisi da uju aimi, asisi da jebuga ainghae tataya use irira.

<sup>12</sup> Ne ari eveva avanembo use, evetu genembo God jo tumondae irera ainde irareva! Ne amingururovo, evetu genembo mendeni nendae ari ekoko embova sise aji sarera, avata ne ari eveva ururovo gido kasama arera. Aminguse, God foa buvari da Sifo aminda, nundae sakai sarera.

<sup>13</sup> Bajari da javodae sedo, gavana enda eminda irira, ainda saramana kakato isambuda geka ava ningareva. Rome embo da kotofuko, nu iká bekádari. Nunda geka ava ningareva!

<sup>14</sup> Frovensi da gavana barago, God da gategariri. Ari ekoko embo dara eraera ainda mino futuse, a kotugo evetu genembo ari eveva eraera aindae, sakai saoro dae sedo, nune setiri fefetuseri.

<sup>15</sup> Ainda beká mo: God nu uju erira amo, ne veka eveva ururovo gido, evetu genembo mendeni kotae kotae nendae aji seraera amo, ne beka dodo iraeteri. Amo God da ujuri.

<sup>16</sup> Ne eregoseva: ne jo evetu genembo da sari ningari iraeri. Avata ne jo aindae sedo, gogore use nenda uju ava use, ari ekoko use jungae areva. Ne God da tofo edo ireva. Ava sedo, nunda uju ava use irareva!

<sup>17</sup> Evetu genembo isasambu kaka use irareva! Nenda nano namendide, tofo tofo dubo ruruse irivu! God Afa igheghi use, Rome embo da kotofuko ava kaka use irareva!

*2:18-25 Keriso Rea Edo Ghusira Ava Kotise, Namonde Kau Daba Aminga Ava Use Irore!*

<sup>18</sup> Sabua, nendae resena, ningivu! Ne evetu genembo mendeni imi ombu bero nenda saramana kakato edo ireva ava sedo, nenda babojegari kaka e gogoghombuse, nenda aghi areva! Ne jo, nenda babojegari nemokena durumuguse a roboghoi sise irá gheraera, aindae nembo kaka ae areva. Nenda

babojegari ekoko ábarago kaka use, nenda geka ningido aghi areva!

<sup>19</sup> Ne, God da uju setena evia ari dae ururovo, nenda babojegari susu a dara tefo ne daoro mema itatamareva amo, God ne aindae sedo esimbugarira.

<sup>20</sup> O ne dara aovo aindae sedo, nenda babojegari ne daoro mema itatamareva amo, God jo aindae sedo ne sonembae arira. Ne doruroro, mema itatamuse durumugedo irareva amo, God nu aindae sedo ne esimbugarira.

<sup>21</sup> God ne, amingaovo dae sedo aghi usira. Ne eregoseva: Keriso kau daba aminga ava, nendae sedo durumuguse mema itatamusira. A kotugo, ne kau daba ava aovo dae sedo, nu nenda ijugaboro evia futusira.

<sup>22</sup> Nu ari eko eni jo aeri. A gungubo eni jo sirurari, ave enii jo ningaeri.

<sup>23</sup> Mave numokena jivivu sisera, nu aindae mino jo saeri. Evetu genembo numokena mema futusera amo, nu mino ari jo saeri. Numo, God bekáda bekáda ijujeraira ava tumonduse, roera isambu nunda un-goda fiti dotutusira.

<sup>24</sup> Ari ekoko da fakina namondekena dadabari, namonde ari eveva avanembo use iroro dae sedo, Keriso namondeda ari ekoko da bouvu ava, nune tofo mandi fumbudo ira korosida ambududurusira. Nunda tamo da iso futusera aimi, ne jebuga tafusevu.

<sup>25</sup> Ne giti iriava amo, kau sifi (sheep) emboro kosasagheraera, ainda kaugo ava edo iriavu. O oroko emo, nenda asisi da tavo ari kato a kaifa katokena feva buvevo, ne budo kaifa iri eveva ireva.

### 3

*3:1-7 Evetu Genemboghae Da Irari, Aindae Resira.*

<sup>1</sup> Na gavana da geka ningovo dae seteni. Kau daba aminga ava, evevetu nemokena sari dae erena, ningivu! Nivumane da geka ava ningareva. Amingareva amo, nenda

gegenembo mendeni mave God da Geka jo tumondae irera amo, nenda irari a ari eveva ava gosuse, tumondarera. Nivumane dubo jovereghedo tumondaoro dae sedo, jo nene nivumane dengoro indarigo iraeri.

<sup>2</sup> Ainda beká mo: nivumane mo, nenda irari eveva a kakarago ava ururovo gido aindae, God da Geka tumondarera.

<sup>3</sup> Ne jo evetu genembo nemo gaoro dae sedo, beo gaedo, guri dighido, embo boka eveva uju avido ghae areva.

<sup>4</sup> Avata nenda gogho mo, nenda dubo joká simbugedo, robogho ai sise, durumugedo irareva avori! Gogho amo God da dombuda numo bekári, evovodae irarira.

<sup>5</sup> Ne kasama ereva: evevetu giti beká God tumondedo ghusera amo, nenda gegenembo kakara use a nenda geka nininguse aimi, gogho edo ghuseri.

<sup>6</sup> Abraham noaro Sarah ava kote givu! Nu amingedo ghusira. Nu nuvu da sari ava nininguse, nundae 'Bajari' sedo ghusira. Avori, nanda ghaghasovu, ne ari eveva use, jo oju ae irareva amo, ne Sarah da sasingu da kaugo edo, nunda amboda amboda use irareva.

<sup>7</sup> Gegenembo nemokena sari dae erena, ningivu! Ne kasama ereva: nearomane da fakina jo nenda fakina iraeri. Ava sedo, nearomane da bouvu fufuse, ne sonembuse irareva. A ne kasama ereva: God nunda joba evevago ava mutari, nenda evevetude dabade bareva. Joba evevago resena emo, jebuga evovodae irariri. Ava sedo, nenda banungari da emboro God kena nange afigedo iratira aindae sise, nearomane kakara use irareva!

*3:8-22 Namondekena Mema Rea Mutarera, Ainda Mino Jo Mutae Arera.*

<sup>8</sup> Nanda geka ojighira tano ari dae erira. Ne dubo dabako edo iratetu! Nenda kokomanadae joka edo, nenda bouvu ava fufuse irivu!

Nenda nano namendide dabade, minonde minonde dubo ruruse, veka eveva use tofo tofo tumonduse irivu!

<sup>9</sup> Evetu genembo nemokena mema mutoro itatamareva amo, ne kote dotutuse esimbugareva. O evetu genembo nendae jijivu sarera ábarago, ne kote dotutuse esimbugareva. Ainda beká mo: God ne aghi use, nemokena esimbugari mutari baovo dae sisira.

<sup>10</sup> God da Geka aindae eminge resira:

“Mave nunda jebuga jokáda, ivuga ari uju arira, a irari eveva tambari uju arira amo, nunda aviva kaifa use, geka eko eni jo sae arira.

A nunda beka kaifa use, jo evetu genembo dedeuse, gungubo jo sae arira.

<sup>11</sup> Genembo amo, nu ari eko da emboro darigedo, ari eveva avanembo udo yarira.

Nu mainungari ava torughari dae sedo, ainda amboda amboda udo yarira.

<sup>12</sup> Ainda beká mo: Bajari nu ari eveva embo da irari ava gosuse, nenda benunu isambu jave ningiraira.

O Bajari nu ari eko embokena, dombu fakara eraira,” nunda Geka aminge resira.

<sup>13</sup> Avori, ne ari eveva ari dae sedo e gosuse irareva amo, mave nemokena ari eko eni jo ae arira tanojo.

<sup>14</sup> Avata ne ari eveva use irovo, mave eredo nemokena dara eni arira amo, ne ivuga aetevu. Amingareva amo, God ne esimbugarira. Ava sedo, erá, evetu genembo nemokena ari ekoko arera aindae, oju eove!

<sup>15</sup> Ne emingaetevu! Keriso nenda Bajariri, ava sedo, nusuka numoá budo, nenda dubo jokáda fitido kakara use irareva! A ne God tumonduse, rea nemokena mutari baeteva, ava gigiteraeva. Gigiteraeva aindae, evetu genembo ategi arera amo, ne sifo ghousa evia ainda mino sari dae, anakora simbugedo kaifa use iraetevu.

<sup>16</sup> Avata, evetu genembo ava kakara use, ne mino roboghoi sareva. A kotugo, ari ekoko darigari dae sise, nenda dubo joká simbuguse iraetevu! Amingaeteva da beká mo eviri: ne Keriso da amboda amboda ise ari eveva ururovo, evetu genembo nendae aji sarera avata, nenda irari eveva ava gosuse, meka garera.

<sup>17</sup> Ainda beká mo: God nunda uju ava use ungo sokinembari, ne ari eveva ururovo, evetu genembo ne daoro mema itatamareva amo, avori. O ne ari ekoko ururovo aindae, ne daoro mema itatamareva amo, ekori.

<sup>18</sup> Ne eregoseva, Keriso numbarago ari eveva use, namondedae sedo mema itatamuse ambududurusira. Nu namondeda ari ekokodae sedo umbu dabako ambiri, inono beká ava usira. Nu evevari, a namonde ekokori. Avata nu namonde unumbedo God kena bu yari dae sedo, ambududurusira. Amingusira amo, nunda tamoá ambududurusira avata, God da Asisiimi setiri, nunda asisi jebugusira.

<sup>19</sup> Jebugedo ira, asisi bundetero iriara aikena, buvudo vironu sisira.

<sup>20</sup> Asisi resena emo, evetu genembo Noah da sifoda endada iriara, ainda asisiri. Noah nu ghaka+ itutiri, natofo tomanako God da Geka jo ningido tumondae irioro, God nu durumuguse kaifa edo ghusira. Avata sifo buviri, evetu genembo 8 ava era ghakada+ vivitusera, ainembo jebuguseri. Uvu gaunghe vivitiri, ainda etoda feghuse jejebuguseri.

<sup>21</sup> Uvu amo nu, bafataito edo jebugeraera da ijugaboro eniri. Namonde bafataito eraera amo, jo tamo da dongono seghoro dadabari jebugae eraera. Namonde bafataito use, dombu God kena jovereghedo, nu namondeda ari ekoko kote dodo, dubo joká seghari dambu are dae sedo, benunu seraera. Amingurureoro, Iesu Keriso ambarida ghe jebuge erorusira ainda fakina aimi, God seari namonde bafataito use jebugeraera.

<sup>22</sup> Iesu Keriso resena emo, nu utuda vitira, God da ungo gimandukena anumbusira. Aminda iri-ari, aneya a sukaru isasambu nenda kokotofude dabade, nunda sari ava eraera.

## 4

*4:1-6 Namonde Ari Manai Ava Dodo, Ari Seka Avanembo Use Irore!*

<sup>1</sup> Keriso nunda fisi da uju ava bureguse, tamoimi mema itatamusira; ava sedo, ne kau daba aminga ava kotise, fisi da uju ava bureguse, fakina use iratevu! Ai resira amo: mave tamoi mema itatamuse irarira amo, numokena ari ekoko da fakina dadabarira.

<sup>2</sup> Ava sedo, oroko tuturo edo, God da sari avanembo ningido, enda eminda irise nenda fisi da uju ava do darigareva.

<sup>3</sup> Evetu genembo mave jo foa God da natofo ae irera, ainda ari ava, nene giti teria futo edo ghuseva amo, dovu dadabare! Ari edo ghuseva resena amo, eviri. Ne nenda fisi da uju ava use, kombo yagera ava edo ghusevu. Ne uvu fakara teria futo mindido jiro birurugheari, ari ekoko a dara mendeni mendeni ava edo ghusevu. A kotugo, ne kotae kotae ove kevari ava tumonde bainghedo ghusevu.

<sup>4</sup> Ne giti amingedo ghuseva avata, oroko ne jo amingae eraeva. Ava, evetu genembo God da natofo jo ae irera setena aimi, gi dudukughedo ne dere jiraera.

<sup>5-6</sup> Avata God nu jebuga embo a ambari embo ava ijujari dae sedo, simbugedo irira. Ava sedo, evetu genembo ai ne dere jiraera; aindae sedo, God ne ategi edo mino mutarira. Keriso aindae sedo ira, ambari embokena God da Bino Eveva ava vironu sisira. Ne taká evetu genembo bekári. A God, evetu genembo isambu jebuga irioro ijujuse eminge seraira, “Ne ambarera.” Ava sedo, ne ambududuruseri. Avata nenda asisiimi jebugedo, kau God jebuga irira aminga ava, jebugedo iroro dae

sedo, Keriso ira, nemokena God da Bino Eveva ava vironu sisira.

*4:7-11 God Nunda Joba A Fakina Ghasisira Aimi Bu Saramana Use, Namonde Tofo Tofo Sonembuse Irore!*

<sup>7</sup> Utu a enda einda tano foa buvari dae erira. Ne inononda banungari dae sedo, diti fangedo, nenda fisi da uju ava bureguse iratevu!

<sup>8</sup> Mokogo mo, ne minonde minonde dubo bu gogoghombuse iratevu! Evetu genembo mave tofo tofo dubo ruruse irarera amo, ne totoi kokomana da ari ekoko kote doyarera. Ava sedo, minonde minonde dubo bu gogoghombuse irivu!

<sup>9</sup> Nenda nano namendi mendeni esa furarera amo, ivuga use, nati joká dedo bu kaifa tavo areva. Jo dubo etoto use, tavo ae areva!

<sup>10</sup> God nunda joba a fakina dombu eni dombu eni ghasetiri ruruseva aimi, ne isambu saramana e gogoghombaovo dae sise resena! Aimi saramana use, tofo tofo sonembuse irareva!

<sup>11</sup> Amo, ne emingareva. Mave vironu sarira amo, nu God da Geka avanembo sarira. Mave evetu genembo sonembarira amo, nu, God nunda fakina ghaseraira ainembo budo, natofo sonembuse irarira. Ne amingareva amo, ne Iesu Keriso da natofo edo irise, ari eveva setena ava ururovo gido, natofo tomanako God dae sakai sarera. Duro a fakina evovoda Iesu Keriso kena irare! Ai, bekári!+

*4:12-19 God Amboda Namonde Ijujarira; Ava Sedo, Namonde Veka Eveva Vanembo Use Irore!*

<sup>12</sup> Nanda nano namendi, ne mema a bouvu itatameraeva ava, namonde isambu, mave God da natofo edo irera, bouvu kau daba ava itatameraera. Erá buneove dae sise resena.

<sup>13</sup> Kau Keriso mema itatamusira aminga ava, itatameraeva; aindae sedo, ne ivuga aetevu. Amingareva amo, nu jovereghe foa isagha ari, ne nunda duro ava gido, ivuga areva.

<sup>14</sup> Ne Keriso da ambo jimbi edo, nunda amboda amboda ya gheraeva

aindae, evetu genembo mendeni ne dere jiraera. Ne aindae ivuga aetevu. Ainda beká mo: ne kasama ereva, ne Keriso da amboda amboda evo, God da Asisi durode aimi, nemokena asugetiri ireva.

<sup>15</sup> Ne mema itatamareva amo, jo ari eindae sedo mema itatamae areva. Ne jo genembo eni daovo ambae arira. Ne jo bagia ae areva. Ne jo ari eko ae areva. Ne jo tofo sakai sise, oro eninda geka vironu ava kosege sae areva. Ari resena emo, ekokori.

<sup>16</sup> Avata ne Keriso da natofo edo ireva, aindae sedo mema itatamareva amo, erá aindae meka eove! Ne Keriso da natofo edo ireva aindae, God Afakena aiyakoe sise irareva!

<sup>17</sup> God evetu genembo ijujari da sifo ojira buvira. Ava sedo, nu giti tuturo edo, nunda natofo ijujarira. Nu tuturo edo namonde ijujururari, namonde aindae bouvu ava fufuse mema itako itatamarera. Avata nu namonde ijujari dadabari, jovereghedo, evetu genembo mendeni, nunda Bino Eveva jo tumonda usera, ava ijujarira. Ijujururari, ne bouvu mindafugo beká ava itatamarera.

<sup>18</sup> God da Geka aindae eminge resira:

“God da jebuga bari mo, jo raugako iraeri. Evetu genembo ari eveva eraera, ne jebuga jo tofo bae arera.

Ava sedo, evetu genembo God jo tumonda use ari ekoko eraera amo, ne nangareri?

Saono ningivu! Ne jebuga itako jo bae beká arera!”

<sup>19</sup> Ava sedo, God nunda ujudungo sokinembari, evetu genembo mendeni nemokena fakaragoruroro itatamareva amo, ne emingareva. Ne ari eveva ava use, nenda asisi God da ungodafitaveva. God resena aimi, etiri ne sirorusevu. Ava sedo, ne numoá tumondareva amo, nu nunda beka gajari ava kaifa

use irá gheraira ava sedo, ne jo doyari durae areva.

## 5

*5:1-11 Peter Gegenembo Afa Koro, A Sasingu Seka Bajari Aikena Geka Sisira.*

<sup>1</sup> Ekaresia+ da babojegari nemokena resena, ningivu! Namane namonde Iesu tumondari+ embo da babojegari edo irera. Keriso mema tafiri na gosuseni. Kotugo, nu jovereghe nunda duroghae furarira amo, nambarago duro arena.

<sup>2</sup> God nunda sifi (sheep) nenda ungodafifitusira ava, kaifa aovo dae sise resena. Ne jo dumo use o moni bari dae kotise, kaifa ae areva! Ne dubo jóká futuse, natofo sonembari dae uju use ivugaghae kaifa areva.

<sup>3</sup> Nunda natofo, nene kaifa aovo dae sedo, God nenda ungodafifitusira ava, ne jo koviono sise kaifa ae areva. Ne roboghoi sise, tofo ijugaboro fifituse, ne kaifa areva.

<sup>4</sup> Aminguse irareva amo, ekaresia+ da kaifa kakato da giti jighari beká, amo Keriso dae resena, nune jovereghe foama nenda koana durode, kekesa avavaga mutari asugareva. Koana resena, aindae usasa mo, jo rejo eniimi fati sukainghari da kaugo iraeri. Evovoda amingedo irarira.

<sup>5</sup> Sasingu seka bajari nemokena resena, ningivu! Ne kau daba aminga ava use, roboghoi sise, afa koro da sari ava nininguse irareva! Ne isambu tofo ighagha use, nenda uju dodo, kokomana da uju ava use irivu! Amingareva da beká mo: God da Geka aindae resira:

“Mave tofo sakai seraera amo, God buregeraira.

O evetu genembo tofo ighighi use, durumugedo irá gheraera amo, ne sonemberaira,”

aminge resira.

<sup>6</sup> Ava sedo, tofo ighighi use God da ungo joghada irovo dae resena! Amingareva amo, nu sifo reda gategerira aminda, ne jighari erareva.

<sup>7</sup> Nu, nemo sonembari dae kotise irira. Ava sedo, nenda bouvu a mema isambu numokena dovu, nune fumbare!

<sup>8</sup> Diti fangedo, kaifa e gogoghombaovo dae resena! Ainda beká mo: kau raiyoni (lion) ighoi itatamuse, bayaudae dubo gangaraghae deingheraira aminga ava, nenda gitofu Satan goroto reda teredo, nemo bari dae kato eraira.

<sup>9</sup> God tumonduse, fete gogoghombuse Satan buregareva! Ai resira amo: ne rea itatameraeva amo, jo dombu eni iraeri. Kau enda eminda nenda nano namendi reighi mendeni mendenida irise, bouvu a mema itatameraera aminga ava, nembarago bouvu a mema daba ava itatameraeva.

<sup>10</sup> Avata sifo tufako mema itatamaovo dadabari, God ne sonembari, fakina edo fete gogoghombareva. Ainda beká mo: God nemo aghi eraira amo, nu sonemba da susuri. Aindae sedo, ne jo gofae areva. Nemo aghi eraira setena, ainda beká mo eviri: ne Keriso de dabade tatedo, nunda duro ava baovo dae sedo, ne aghi eraira. Nunda duro amo, evovodae irarira.

<sup>11</sup> A kotugo, nunda fakina barago evovodae irare! Ai, bekári!+

*5:12-14 Peter Nu Reta Gajari Dae Use, Ategi Roroimi Tano Edo Dotutusira.*

<sup>12</sup> Namondeda namendi Silas da sonemba ava na tumonderaena. Silas resena eimi, sonembiri reta emo eregefene. Yari budo givu!

Na geke tufako eregefena emo, gido diti fangedo, dubo kotove dae sedo eregefena. Na nemokena geke beká resena. Gembena emo, God namonde nange sonembari dae uju eraira ava, kasama aovo dae sedo gembeni. Nunda sonemba ava budo, fete gogoghombareva.

<sup>13</sup> Ekaresia+ da nano namendi reighi Babylon eminda irera aimi, ne ategi erera. Natofo resena emo, kau God ne gategetiri nunda natofo edo

ireva aminga ava, nune gategetiri ne nunda natofo edo irera. Natofo aimi, ne ategi erera. Nanda mandi Mark barago, ne ategi beká ava erira. Yari budo givu!

<sup>14</sup> Nenda dubo bari ava ijuguse, nenda nano namendi tofo tofo muno<sup>14</sup> use ategi e gogoghombevu! Ne Keriso da natofo edo ireva ava sedo, dubo jama nemokena irare! Avori, nanda geke tano eviri. Na Peter.

<sup>14</sup> 5:14: Afige, Romans 16:16 ainda duruda tege garesa.

## **Peter Nunda Reta Amboda, Kuristini Embokena Gefusira, Amo Eviri.**

Kau Paul nunda ambari sifo kaifa use, nunda reta amboda Timothy kena gefusira aminga ava, Peter nunda ambari sifo kaifa use reta evia gefusira. (Tege vosise 1:14 tege!) Nu avose, ghaeko 66 A.D. ainda jokáda, geka evia gefusira.

Evetu genembo mendeni amboda ijuga sembae bu furarera ava kotise, Peter geka a ijuga sembae ava, erá tumondeore dae sise reta evia gefusira.

*Peter Nunda Reta Amboda Ainda Mendo Mendo Mo Eviri.*

1:1-2 Peter natofo ategi usira.

1:3-21 Kuristini da irari emingori.

2:1-22 Ijuga sembae a derari mendeni amboda sirorarira, aindae Peter gefusira.

3:1-16 Bajari nange jovereghe furarira aindae, Peter dengoro indususira.

3:17-18 Peter ne esimbuguse, tano usira.

<sup>1</sup> Arie, nanda nano namendi! Na Iesu Keriso da saramana kato a aghi kato Simon Peter, namori. Yari budo givu!

Namondeda God a namondeda Sonemba Kato Iesu Keriso ghae, veka eveva use sonembetero, ne tumonduse ireva. Kau namane giti tuturo edo Iesu tumonduse iriara aminga ava, ne amboda tuturo edo nu tumonde gogoghombuse ireva. God da dombuda nenda tumondari a namanenda tumondari kau dabakori. Ne ategi beká ava erena. Yari budo givu!

<sup>2</sup> God a namondeda Bajari Iesu kasama e gogoghombururovo, nengae nenda sonemba a dubo jama nemokena mutoro ya, nenda dubo jokáda vose bedo edo fumbu fetare!

*1:3-15 Peter Nenda Ghamo Derari Erare Dae Sedo, Geka Mendeni Mendeni Sisira.*

<sup>3</sup> God, nunda duro a irari eveva ava baoro dae sedo, namonde aghi usira. Aghi etiri, namonde numokena era, God tofo nunda fakina ava mutiri budo nu kasama edo, aimi irari kakara beká ava use irera.

<sup>4</sup> A kotugo, nunda fakina futuse, nu joba teria a evevago, anakora beka gagojuse mutari dae sisira, ava futusira. Joba futusira da beká mo eviri. Evetu genembo endada irise guguadae teria futo dighighi use aimi, nenda dubo joká bebeta eraera ava, darigaoro dae sedo, nunda joba a fakina namondekena mutiri ruruseri. A kotugo, nu namonde dabade tatedo, nunda kaugo ava aoro dae sedo, amingusira.

<sup>5</sup> God ne aminge sonembusira ava sedo, ne minonde minonde dubo ruruse emingareva! Ne God tumonduse ireva. A nu evevari. Avata ne oroko edo gido, ari eveva edo ghareva. Ainda amboda, ne ari eveva use, evovodae dubo kotise irareva!

<sup>6</sup> Ne tuturo edo dubo kote gogoghombareva ainda amboda, ne edo gido, nenda fisi da uju ava bureguse irareva. Ne fisi da uju buregari kasama e gogoghombedo, evovodae aminguse irareva ainda amboda, ne edo gido, fakina edo ata fete gogoghombuse irareva! Ne dara, mema a derari foa gheraira aindae sise, sifo evia inono, tumonde bainghuse fete gogoghombareva.

<sup>7</sup> Aminguse, ne tuturo edo, nenda nano namendi dubo ruruse irareva. Nenda nano namendi dubo bu gogoghombareva ainda amboda, ne edo gido, evetu genembo isambu dubo ruruse irareva!

<sup>8</sup> Na ari setena ava use irareva amo, ne namondeda Bajari Iesu Keriso ava kasama e gogoghombuse, nunda uju ava ururovo, nenda saramana beká arira.

<sup>9</sup> Avata mave jo tuturo edo amingae arira amo, nunda kotari tufako

bekári. God nunda ari ekoko seghe fugutusira ava, kotae edo irira.

<sup>10</sup> Ava sedo, nanda nano namendi, nunda sasingu aovo dae sedo, God ne gatededo aghi usira. Ainda beká ava nange siroredo evovodae irae-tira andae, fakina beká ava areva. Aminguse irareva amo, ne jo gofae areva. Ne Bajari tumonduse irareva. Amingareva amo,

<sup>11</sup> God andae sedo ne sonembe gogoghombuse, namondeda Bajari a Sonemba Kato Iesu Keriso da vasada terovo dae sedo, nenda emboro rerebari, ne ya aminda teredo evovodae irareva.

<sup>12</sup> Geka setena amo, geka bekári. A na kasama erena, ne ainda geka anakora kasama edo, tumonde gogoghomberaeva. Avata na sifo evia inono, geka daba ava kotovo dae sedo, sirureono ningiraeva.

<sup>13</sup> Na jo ambae irise, geka ava kotovo dae sise irarena amo, evevari.

<sup>14</sup> Na kasama erena, namondeda Bajari Iesu Keriso rea namokena is-gha sisira ainda beká ava sirorari dae erira. Amo, nanda ambari sifo foa buvari dae erira.

<sup>15</sup> Ava sedo, na edo gido, geka setena ava kotovo dae sise, emboro simbugarena. Simbugedo, na ambono gido ainda amboda, ne nanda geka tufako eregefena evia kotise irareva.

*1:16-21 Iesu Da Duro Ava, Peter Nunda Ditiimi Gosusira; Ava Sedo, Namonde Nunda Geka Tumondaeteri.*

<sup>16</sup> Namondeda Bajari Iesu Keriso, nange jovereghe fakinaghae furariá seraera amo, beká seraera. Geka amo, jo namanenda kotariimi saeri, o jo evetu genembo mendeni da kotari ava siruroro ningido saeri. Ne eminge kotaetevu: namane nunda duro ava, ditiimi gosuseri.

<sup>17</sup> God Afa nu Iesu kakara use, numokena duro mutiri ruriri, namane aminda irise gosuseri. Namane aminda irise niningero, God nunda usasa teriango ainda jokáda, beka Iesu dae siri namane niningusera amo, eviri:

“Emo nanda dubo bari Mandiri. Na nundae ivuga beká use, aiyakoe resena.”

<sup>18</sup> God nu utuda irise aminge siri, namane doriri kakara aminda irise, nunda beka firi, totofo namanenda dengoroimi nininguseri.

<sup>19</sup> Namane ava gosusera andae sedo, ferovetamane anakora nenda geka rea andae sise sedo ghusera ava, namane tumonde gogoghomberaera. Nembarago, ferovetamane rea gembudo ghusera, ainda geka ava kotise irae-tevu! Ainda beká mo: geka sedo ghusera amo, nu kau tumba jokáda arivo injibeoro usasa eraira, ainda kaugori. Aimi usasa ururari, sifo atutururari, sifo da saura foa nenda dubo jokáda vosari dubo kotareva. Sifo da saura mo, na Iesu dae resena.

<sup>20</sup> Kotugo, feroveta da geka tegari dae simbuguse, ne geka evia kotareva! Namonde feroveta da geka ningiava tegarera amo, namonde jo nusuka nusuka ainda tuka sise, jo kasama ari da kaugo irae-ri.

<sup>21</sup> Ainda tuka mo: feroveta rea sedo ghusera amo, jo totofo nenda kotariimi saeri. Amo, Asisi Kakara ai ijugurureari, feroveta ne God da uju ava, osa sedo ghuseri.

## 2

*2:1-22 Feroveta Gungubo Kakato, Amboda Foama Evetu Genembo Mendeni Ava Derarera.*

<sup>1</sup> Anakora beká, Satan da feroveta gungubo kakato, namanenda natofo Israel embo, ainda jokáda siroredo irise, ne deredo ghuseri. Kau daba aminga ava, ijuga kakato sembae nenda jokáda sirorari gareva. Ne gungubo teria a ijuga sembae beká ava nemokena ijuarera. Ijuga sembae ava tumondareva amo, nenda asisi ambarira. A kotugo, ne aminge ijuguse, Bajari nenda ari ekoko da mino futusira ava imboe use ighagha arera. Amingururoro andae, God sari ne totoi sirivo arera.



<sup>2</sup> Avata nenda nano namendi mokogo mo, feroveta gungubo kakato resena ainda amboda amboda ise, kombo yagera use a ari eko dombu eni dombu eni ava use irarera. Nenda nano namendi, Keriso da natofo amo, aminguse iroro gido, evetu genembo mendeni, Keriso a nunda geke beká da emboro+ aindae dere jise imboe arera.

<sup>3</sup> Feroveta gungubo kakato amo, monidae dighighi use, mutovo bari dae sedo, geke mendeni mendeni nenda duboi kotise simbugarera ava, siruroro ningareva. Feroveta sembae amo amingarera, avata nenda Ijujari Kato anakora tuturo edo, nenda dara ainda mino simbugerira. Nenda ambari sifo ojira utua erira.

<sup>4</sup> Ne eregoseva: aneyamane ari ekoko usera aindae sedo, God jo joka ae usira. God ne ari ekoko mino mutari vasada fugetiri teteruseri. Teretero, ne bundetiri tumba jokáda irise, Ategi da Sifo ava kaifa use irera.

<sup>5</sup> Kau daba aminga ava, evetu genembo anakora ari ekoko use iriara aindae, God jo joka ae usira. O nu Noah dae joka usira. Noah resena emo, nu God da aghi use, ari eveva aoro dae sedo, vironu sedo ghusira. God nu Noah a evetu genembo 7 ava nembo sonembiri ne jejebuguseri. O evetu genembo mendeni ari ekoko edo ghusera aikená, usegha gisi ava mutiri buvudo aimi, fatiri sirivo useri.

<sup>6</sup> God kau daba aminga ava, Sodom a Gomora embokena usira. Ari ekoko embo nange sirivo arera ainda ijuga ava, natofo isambu baoro dae sedo, God reighi etoto naká amo, setiri avarakai avisira.

<sup>7-8</sup> Lot kote givu! Lot nu genembo evevari. Avata nu reighi Sodom aminda irise, evetu genembo ari ekoko rea edo ghusera ava gosuse, a nenda geke sembae ava nininguse, dubo mema ambarako ava usira. Amingiri, God sonembetiri nu dari-giri, avaraka reighiá avisira.

<sup>9</sup> Ava sedo, Bajari nu inonori.

Evetu genembo eveva ava, nange nangedo sonembururari derari mendeni mendeni darigarikena ava, nune ari inono arira. A kau daba aminga ava, evetu genembo ekoko Ategi da Sifo kaifa aoro dae sedo, nune ne sandi bundari dae arira amo, inonori.

<sup>10</sup> Evetu genembo ekoko setena amo, na mokogo evetu genembo God da sari ava imboe edo, fisi da uju ava use irera, aindae resena. Ijuga kakato sembae resena emo, gogore use meka jo gae eraera. Aneya durode irera ava, ne jo kakara ae eraera. Ne aneya aindae dere jiraera.

<sup>11</sup> Avata aneyamane, jo minonde minonde ae eraera. Ne teriagori, a nenda fakina mindafuri. Ijuga kakato sembae setena amo, jo nemongo iraeri. Avata aneyamane ne jo eredo, Bajari da dombuda fetedo, ijuga kakato sembae aindae aji sise, bino eko ava jo sae eraera.

<sup>12</sup> O ijuga kakato sembae resena emo, ne kau sino fuka aminga ava use, dubo jo kotise ae eraera. Ne kotae kotae eraera. Aminguse, ne roera mendeni jo tofofó kasama ae eraera, aindae aji sise dere jiraera. Avori, ne kau sino fuka aminga use irera aindae sedo, God ne, kau sino fuka bu deoro amburaera aminga ava, ne bu dari sirivo arera.

<sup>13</sup> Ne evetu genembo mendenikena mema futuse ari ekoko rejo edo gherera, ainda mino ava God mutari, ne mema kau daba aminga ava itatamarera. Ijuga kakato sembae nenda uju ava use, ne isagha beká fisi da uju ainda amboda amboda udo ya gheraera. Ne nenda uju ekoko ava urureoro, nemonde dabade tatedo Bajari kotise bayau mindiraeva amo, gari sembae beká ava eraera.

<sup>14</sup> Ijuga kakato sembae resena emo, ne evevetu ekoko ava fuge gosuse, nange nange nemonde kombo yaru aetera ava kotise irá gheraera. Ari ekoko ava, ne jo itako doyarí da kaugo iraeri. Evetu genembo

fakina tefo ava, nene dereoro gofedo ari ekoko eraera. Dighighi ari da emboro aindae, manaka garuse irá gheraera. Amingeraera ava gido, God ne simbora etiri,

<sup>15-16</sup> ne emboro dambuá dotutuse kosasaghuseri. Kau Beor da mandi Balaam<sup>15-16</sup> edo ghusira aminga ava, nene eraera. Balaam nu feroveta eniri, avata nu ari eko use, nange moni baetira aindae dighighi edo ghusira. Aminguse iriri, God nu dombuda sise, emingusira. Nu setiri Balaam da donki (donkey) beka afigedo, evetu genembo da bekaga siri ningido, nunda daghari da ari ava dotutusira. Avori, ijuga kakato sembae resena emo, kau Balaam edo ghusira aminga ava, nene eraera.

<sup>17</sup> Ne kau uvu gaunghedo irá gheraira, o kau yavatakena foroga darido diseraira, ainda kaugori. Ava sedo, nemokena sonemba a jebuga eni jo bae areva. Nendae sedo, God nu vasa eko beká ava, tumba jinjanghari ainda jokáda simbugetiri irira.

<sup>18</sup> Ai resira amo: ijuga kakato sembae amo, ne gogore use, geka jo beká irae ava seraera. Aminguse, ne, evetu genembo mendeni mave ari ekoko embo da jokáda ghe ya buvari dae kotedo ghusera ava, derari dae sedo, fisi da uju ekoko ava urureoro gido, evetu genembo setena amo, jovereghedo sekago ari ekoko eraera.

<sup>19</sup> Ijuga kakato sembae resena emo, ne eminge seraera, “Emo geka bekári. Namanenda geka tumondareva amo, ne ari ekokoimi bundetiri ireva ava, namane ne vujegarera,” ne gungubo sise aminge seraera. Amo gungubo resena ainda beká mo: ijuga kakato amo, nembargo ari ekokoimi bundetiri irera. Ainda tuka mo: mave fisi da uju ava ningido, ainda amboda amboda udo yarira amo, nu fisi da ujuimi bundetiri irira. Fisi da uju ava arira

amo, fisi da uju aimi nunda bajari arira.

<sup>20-21</sup> Ava sedo, evetu genembo mave namondeda Bajari a Sonemba Kato Iesu Keriso kasama use, nenda ari ekoko giti use, tofofobebeta edo ghusera ava dodo irera ava, sekago daba aimi dederururari, tuturo edo udo yarera amo, eko bekári. Ne giti ari ekoko use iriara amo, itako evevari. O God da emboro eveva kasama edo, sekago jovereghe, nunda Agho Dari kakara rurusera ava ighagha edo doyarera amo, eko bekári. Eveva mo: ne jo giti God da emboro eveva ava kasama ae aeteri.

<sup>22</sup> Avata kote givu! Namonde geka eni evetu genembo avavaga aindae seraera. Amo eviri:

“Sino bero tugarira amo, sekago jovereghe mindarira.”

O “Fuka budo ya uvu gutarera amo, sekago jovereghe ya davera gutarira.”

Avori, evetu genembo amo, kau daba ava use, nenda irari seka ava dodo, nenda irari manai ava use iroro gido, namonde, geka setena ava kotise, kasama arera, amo geka bekári.

### 3

*3:1-18 Bajari Jovereghe Furarira Aindae, Namonde Jo Manamana Ae Arera.*

<sup>1</sup> Nanda nano namendi, na, ne dubo buraena! Na reta giti gefuseni. A kotugo, oroko eregefena einghae dabade reta etoto erira. Geka a kotari eveva ava kotovo dae sise, giti gefuseni a oroko sekago eregefenere.

<sup>2</sup> Amo, feroveta kakara nenda geka a namondeda Bajari a Sonemba Kato da agho dari ava, nunda aghi kakatoimi era, nemokena vironu setero nininguseva, ava kotovo dae sise, siseni a kotugo resena.

<sup>3</sup> Giti mo, ne geka evia ko-taetevu! Sifo amboda, evetu genembo mendeni isagha foa buvoro

<sup>15-16</sup> **2:15-16:** Balaam resira emo, nu feroveta eni, reighi Petor, uvu teria javo Yufretis, aminda irei. Nu Moab da kini (king) javo Balak da moni bari dae sise, Israel embo simbora ari dae isira avata, God nu buregusira.

garera. Evetu genembo amo, nenda fisi da uju ainda amboda amboda use irarera. Bajari furarira ava jo tumondae use, evetu genembo amo ne dere jirururoro itatamareva.

<sup>4</sup> Ne eminge dere jise sarera, “Iesu jovereghe furari dae sisira amo, redari? Enda siroretiri abuamane sirivo udo refuara, ainda jokáda, roera seka eni jo sirorae irira,” aminge sise, ne God da fakina ava ighagha arera.

<sup>5</sup> Avata God tofo mandi setiri, utu enda sirorusira ava, ne gogore use kotae arera. A God nange setiri, enda siroredo uvu jokáda ghe viti fefetusira, ábarago ne kotae arera.

<sup>6</sup> A kotugo, God nange setiri, enda sifo aminda ireira ava, usegha a gisiimi fafutusra, ábarago ne kotae arera.

<sup>7</sup> Avata God gekai setiri, utu enda siroredo oroko irira emo, God nunda geka daba aimi utu enda bu jighirise kaifa eraira. Utu enda mo, nange amboda avarakai avari dadabaetira aindae sedo, nune bu jighirira. Amo, God amboda evetu genembo ekoko ijujarira da sifo aminda, avaraka sirorarira aimi, evetu genembo ekoko amo, utu enda ainghae dabade avarira.

<sup>8-9</sup> Avata, nanda dubo bari nano namendi, ne geka eni kotaetevu. Evetu genembo mendeni erekotera, Bajari furari dae sisira amo, gungubo sisira. Avata amo, jo geka beká iraeri. Bajari ghaeko 1,000 tegaetira amo, numokena kau sifo dabako da kaugo arira. Avata nu kaifa eraira da beká mo: ne nunda sasingu edo irareva, aindae sise, nu durumugedo kaifa eraira. Amo, nu jo evetu o genembo dabako dari ambare dae sedo, jo uju ae eraira. Nu uju eraira amo, nendae goroto futururari, evetu genembo dubo jovereghedo nenda ari ekoko vujegedo doyoro dae sedo, uju eraira.

<sup>10</sup> Avata kau tafasara kato ufena foa buvari nati embo dudukughera aminga ava, Bajari da Sifo foa

buvari, evetu genembo dudukughera. Sifo aminda, utu daradaraghururari, duka mindafu edo dadabari, iji, inua, a damana avarakai avari dadabarira. Amingururari, enda nunda roera isasambu ainde dabade, avarakai avari dadabedo manjarira.

<sup>11</sup> Roera resena emo, amingedo dadabarira ava kotise, ne nange arevu? Ne eminguse irareva! Nenda dubo God kena futuse, ari eveva a kakarago avanembo use irareva!

<sup>12</sup> Aminguse, God da Sifo ava kaifa use, Sifo amo totoi furare dae sise, saramana e gogoghombuse benunu sevu! God da Sifo ainda geka setena, daba ava sari dae erena. Sifo aminda, utu avarakai avari dadabarira. A iji, inua, a damana avaraka da veveraimi tive dadabarira.

<sup>13</sup> O namonde mo, God rea beka gagojuse mutari dae sisira, ava kaifa use irera. Amo, nu beka gagojuse, utu a enda seka mutari sisira, ava kaifa use irera. Utu a enda seka resena emo, ari eveva a geka eveva da vasari.

<sup>14</sup> Ava sedo, nanda kokomana, ne edo gido, God de dabade dubo dabako edo irise, ari eveva avanembo use dara dariguse irareva.

<sup>15</sup> Ne eminge kotareva! God namondekena durumuguse kaifa eraira amo, dubo jovereghe nunda jebuga evovodae irari ava tuve baovo dae sedo, goroto muturaira. God sonembiri, namondeda dubo bari namendi Paul, dubo kotise geka daba ava gembiri, ira buviri rurusevu.

<sup>16</sup> Nu aindae geka sise, nunda reta isambu ainda jokáda, kau daba aminga ava sise gemburaira. Nunda reta jokáda, geka mendeni iritirira, ainda tuka ava kasama ari itako fakaragori. Evetu genembo mendeni munju kitako, ne kotae kotae irise, Paul da geka amo a God da Geka mendeni amo, jighi joveregheoro geka da tuka amo sembae eraira. Aminguse, ne totofo nemoá bu am-

bari da emboroda fitiraera.

<sup>17</sup> Avori, nanda kokomana, ne erá daba ava eove dae sise resena! Geka evia kotise, kaifa e gogoghombaovo dae sise resena! Erá evetu genembo mave dara use agho dari jo kotae eraera, ainda amboda amboda ise, ari kotae kotae use gofeove!

<sup>18</sup> Avata ne edo gido, namondeda Bajari a Sonemba Kato Iesu Keriso da sonemba itako teria budo, nu kasama e gogoghombari dae sedo, aminguse irareva. Iesu Keriso da duro, oroko a evovodae numokena irare! Ai, bekári!+  
Avori, nanda geke tano eviri.  
Na Peter.

## John Nunda Reta Tuturoda Gefusira, Amo Eviri.

Iesu da ambo jimbi eni javo John, nu embako edo ghaeko 85-90 A.D. ainda jokáda, nunda geka evia gefusira. (2 John a 3 John avose, sifo daba aminda gefusira.) John gefusira amo, nu evovodae natofo ekaresia jokáda aikena roboghoi 'nanda sasingu' sise, geka gefusira.

Avata John da sifoda, evetu genembo mendeni tumondari beká dodo iriari. Ne totofo dedeuse nemo, tumondari embova sise, Iesu mo nu God beká ava, ne jo tumondaeri. A kotugo, God vose fira genembo beká edo sirorusira ábarago, ne jo tumondae useri. Evetu genembo resera eimi, ne asisi mo roera teriago sise, tamo fisighae mo, roera ijoghakova sedo ghuseri. Aminguse, fisida uju itatako jo buregae, ne ari ekoko mendeni mendeni isaghada edo ghuseri. Nemokena beisiga use, nenda geka da mino sise, John nunda geka fakarago emo, buku ainda jokáda gefusira.

*John Nunda Reta Tuturoda Gefusira, Ainda Mendo Mendo Mo Eviri.*

1:1-4 John geka tuturo usira.

1:5—2:29 God mo, usasa bekári. Namonde mave nunda sasingu arera amo, tumba da geka a irari ava ighagha edo, Iesu da amboda amboda use, ari eveva use irarera.

3:1-24 God da sasingu mo, ne ari eveva use, nenda nano namendi dubo ruruse irarera. O Satan da sasingu mo, ne ari ekoko use, nenda nano namendi jo dubo bae arera.

4:1-6 Evetu genembo God da Geka seraera, ai, Satan da geka seraera, ava dere garera.

4:7—5:21 Keriso da natofo rea tumondaetera, a nu redae tumondaetera, a kotugo nange use iraetera, ainda geka sedo, tano usira.

*1:1-4 Jebuga Da Susu Mo, Keriso Numori.*

<sup>1</sup> Tuturoda, Geka eni irei. Geka ava mave tumondarira amo, nu jebuga evovodae irari ava tuve barira. Geka amo namane nininguseri, a saramana iri, namane gosuseri. A kotugo, namane ditiimi gido, ungoi jighi gosuseri.

<sup>2</sup> Na Geka resena emo, Keriso dae resena. Numo, God dirigetiri fira isagha etiri namane gosuseri. Namane nu gido, andae nemokena osa sise irera. Jebuga giti God Afa kena ireira amo, numori.

<sup>3</sup> Nu isagha etiri gido, namane nunda bino ava osa seraera. Ainda tuka mo: ne namonde dabade tatedo iraeteri. A namane mo, God Afa nunda Mandi Iesu Keriso de dabade tatedo irera.

<sup>4</sup> Aindae sise, ne namonde dabade tatedo, ivuga ari dae sise resera.

*1:5-10 God Mo, Nu Usasa Bekári.*

<sup>5</sup> Geka namane Keriso kena ningido, nemokena sari dae erera amo, eviri. God mo, nu usasa bekári. Numokena a nunda jokáda, tumba eni tefori.

<sup>6</sup> Ava sedo, "Na God ghae dabade tatedo irena," sise, tumba da ari ava use irarera amo, namonde gungubo sarera. Ainda beká mo: namonde rea arera, a rea sarera, jo foa dabako ae arira. Amo, namonde gungubo sarera.

<sup>7</sup> O namonde, God de dabade usasada deinghuse irarera amo, namonde tofo tofo tatedo dabade iroro, nunda Mandi Iesu da ororoimi, namondeda ari ekoko seghe fugarira.

<sup>8</sup> Avata, "Namane eveva vanembo eraera," sarera amo, namonde totofo dedeuse irarera. Amo, namondekena geka beká eni tefori.

<sup>9</sup> O namondeda ari ekoko God kena vujegarera amo, nu rea beka gagojuse ari dae sisira ava, nune arira. Nu namondeda ari ekoko isasambu seghe fugedo, kote doyarira.

<sup>10</sup> O, "Namane eveva vanembo eraera," sarera amo, namonde kau God gungubo sariá sise sarera. Mave

aminge sarira amo, nu God da Geka eniko jo bae beká irira.

## 2

*2:1-6 Mave God Dubo Barira Amo, Nu God Da Geka Ningido, Amin-garira.*

<sup>1</sup> Nanda sasingu, na geka eregefena emo, erá ari ekoko eove dae sedo eregefena. Avata namonde ari eko mave arira amo, Iesu Keriso genembo aindae sedo, God Afakena sorega fumbarira. Ai resira amo: Keriso nusuka numoá, God da dombuda numo bekári.

<sup>2</sup> Nu tofo mandi namondedae rea usira aindae sedo, God namonde a evetu genembo isasambu da ari ekoko kote doyeraira.

<sup>3</sup> Namonde God da sasingu edo irera ava, nange kasama areri? Kote givu! Namonde nunda Geka a nunda uju ava kaifa use irarera amo, namonde nunda natofo edo irera ava, namonde kasama arera.

<sup>4</sup> O mave eminge sarira, “Na God kasama edo, nunda natofo jokáda teredo irena,” aminge sise, God da Geka a nunda uju jo ae arira amo, nu gungubo katori. Amo, nu geka beká eni jo bae irira.

<sup>5</sup> O mave God da Geka kaifa eraira amo, nu God ava inononda dubo buraira. Namonde God de dabade tatedo irera, ava kasama ari da emboro mo eviri.

<sup>6</sup> Mave “Na God ghae tatedo irena,” sarira amo, nu Iesu Keriso da amboda amboda ise, nunda ari avanembo use irarira. Amingururari gido, namonde kasama edo, “Geka bekári. Genemboá nu God ghae tatedo irera.” sarera.

*2:7-17 Namonde God Da Natofo Edo Irise, Nano Namendi Eni Jo Imboe Ae Arera.*

<sup>7</sup> Nanda kokomana, na ne dubo ererurena. Na rea oroko aovo dae resena emo, jo agho dari seka iraeri. Ne anakora tuturoda ningido ghu-sevu.

<sup>8</sup> Avata oroko tumba da sifo dadabari dae erira. Usasa beká ava

tuturo edo janimbari dae erira aindae, agho dari emo ojighira seka da kaugo edo irira. Ainda beká ava, Keriso ijugeari isagha edo ghusira, a kotugo nembarago kau daba ava eraeva.

<sup>9</sup> Mave nunda nano namendi eni imboe use, “Na usasa jokáda deinghuse irena,” sarira amo, gungubori. Nu giti tumba jokáda irá ghedo ghusira, a kotugo oroko barago, nu dombu daba ava irira.

<sup>10</sup> Mave nunda nano namendi dubo ruruse irarira amo, nu usasa jokáda irise deingharira. Nu usasa jokáda irise a ari eveva avanembo use, nunda komana jo itako derari, ari eko eni use gofae arira.

<sup>11</sup> O mave nunda nano namendi eni imboe use irarira amo, nu tumba jokáda deinghuse irarira. Amingururari, nunda diti gajari, jo gae ya emboro kasigarira.

<sup>12</sup> Nanda sasingu, Iesu da javoda, God nenda ari ekoko kote dotutusira aindae sedo, na nemokena geka emo eregefena.

<sup>13</sup> Afa koro, ne God tuturoda ireira amo, numoá kasama use ireva aindae sedo, nemokena eregefena. Gigimasa, ne Satan de dabade isoro edo de atai fati fefetuseva aindae sedo, nemokena eregefena.

<sup>14</sup> Nanda sasingu, ne God Afa kasama edo nunda aito ava kasama use ireva aindae sedo, nemokena eregefena! Afa koro, ne God tuturoda ireira, numoá kasama use ireva aindae sedo, nemokena eregefena. Gigimasa, God da Geka nenda ghamo jokáda iriri, ne fakina edo Satan de dabade isoro edo de atai fati fefetuseva aindae sedo, nemokena eregefena.

<sup>15</sup> Erama enda a enda einda gugua eni dubo beove! Mave enda dubo buraira amo, nu God Afa jo dubo bae eraira.

<sup>16</sup> Enda da gugua resena amo eviri: fisi da uju, gugua ditiimi gosuse dighighi ari, guguadae sakai sari, roera avavaga jo Afakena ghedo foa ghae eraira. Amo enda da guguari.

<sup>17</sup> A enda einda gugua evetu genembo dighighi eraera amo, enda einghae dabade dadabari dae erira. O mave God da uju ava use irarira amo, nu jebuga evovodae irarira.

*2:18-27 Genembo Eni Amboda Kerisokena Gitofu Ari dae Furarira.*

<sup>18</sup> Nanda sasingu, ningivu! Sifo buvari dae erira. Genembo tomanako eni amboda eredo, Keriso kena gitofu use fetarira, aindae setero niningusevu. Avori, evetu genembo digari eredo, Keriso da gitofu use fefetuseri. Avo gido, namonde kasama erera, Ategi da Sifo foa buvari dae erira.

<sup>19</sup> Giti, evetu genembo setena amo, ne namonde dabade iriari. Avata ne namonde dodo aera esike irera. Kotugo, ne jo namonde dabade tate gogoghombae useri. Amingaetera amo, ne namonde jo doyaer aeteri. Avata kotugo, ne eredo namonde dotutusera aindae, evetu genembo tomanakoi gido kasama erera, ne jo namonde dabade tate gogoghombae useri.

<sup>20</sup> O nemo, ne jo amingo iraeri. Keriso nunda Asisi Kakara ava nemokena mutiri budo ireva; ava sedo, ne geka beká ava kasama use ireva.

<sup>21</sup> Ne jo Geka Beká kasama ae irariá sise, gembae erena. Na nemokena eregefena, einda tuka mo eviri. Ne Geka beká anakora kasama edo ireva. A kotugo, geka beká aimi, gungubo eni jo sirorae eraira, ábarago kasama ereva.

<sup>22</sup> Avori, genembo eni Keriso kena gitofu arira, setena amo, mavejori? Kote givu! Mave gungubo sise, "Sonemba Kato God mutari sisira amo, jo Iesu iraeri," sarira amo, nu gungubo katori. Genembo amo, aminge sise, God Afa nunda Mandighae dabade, ava ighagha eraira.

<sup>23</sup> Ainda tuka mo: mave God da Mandi ighagha arira amo, nu aminguse, Numamo barago ighagha arira. Kotugo kau daba aminga ava, mave dubo jovereghedo, God da Mandi

dae ivuga use nati joká darira amo, nu aminguse, God Afakena barago kau daba ava arira.

<sup>24</sup> Avo gido, geka tuturoda nininguseva ava, jighi gogoghombedo tumonduse irareva. Aminguse irareva amo, ne God Afa nunda Mandighae dabade tatedo irareva.

<sup>25</sup> Kotugo, Keriso nune rea mutari sisira amo, jebuga evovodae irari ava mutari dae sisira.

<sup>26</sup> Na geka gembena emo, na, evetu genembo nemo dereraera, ava kotise gembeni.

<sup>27</sup> O nemokena mo, avori. Keriso nunda Asisi nemokena mutiri ruru-sevu. Ne Asisi de dabade tatedo irareva amo, na redae ne ijugareni? Ne inono edo irareva. Ainda beká mo: nunda Asisi ijugururari, roera isasambu ainda beká ava, ne kasama areva. A nu rea ijugeraira amo, geka beká vanembori. Aminda gungubo eni tefori. Ava sedo, Asisi da ijuga ava nininguse Keriso de dabade tatedo irivu!

*2:28-3:10 God Da Sasingu Kau Emingori.*

<sup>28</sup> Avori, nanda sasingu, sekago eminge resena. Erá nunda furari da sifo aminda meka geove dae sise, Keriso de dabade tatedo, tumo fainghevu!

<sup>29</sup> Keriso nu eveva vanembori. Ava sedo, evia kasama evu! Evetu genembo mave ari eveva avanembo use irera, nembarago God da sasinguri.

### 3

<sup>1</sup> Kote givu! God Afa da dubo bari namondekena mo, tomanako bekári! Nunda dubo bari namondekena ijuguse, namonde nunda sasingudae bari sisira. Sisira ava, beká siroretiri namonde nunda sasingu edo irera. Evetu genembo fisi da uju use irera, ne God a nunda irari ava jo kasama ae irera. Aindae sedo, ne namonde a namondeda irari barago, jo kasama ae eraera.

<sup>2</sup> Nanda nano namendi, namonde oroko God da sasingu edo irera. Avata sifo gombuda, namonde kau mavega arera ava, namonde jo

kasama e gogoghombae irera. Avata dabako kasama erera amo, eviri. Keriso jovereghe furarira ainda sifoda, nu kau mavega, ava fuge gido, namonde kau numongo ava edo irarera.

<sup>3</sup> Avori, namonde numongo arera ava, mave kasama use a tumonduse irarira amo, kau Keriso eraira aminga ava use, nu ari ekoko da emboro isasambu imboe use darigarira.

<sup>4</sup> Mave ari eko eni arira amo, nu God da Agho Dari ava bejarira. Ainda susu mo: ari ekoko rejo ava irira, ainda kau ava, Agho Dariimi ijugeraira.

<sup>5</sup> Ne kasama ereva, Keriso evetu genembo da ari ekoko seghe fugari dae sedo fusira. Numokena ari eko eni tefori.

<sup>6</sup> Ava sedo, evetu genembo mave Keriso de dabade tatarera amo, ne jo ari ekoko use irae arera. O mave ari ekoko use irarera amo, ne Keriso jo gae irera, a nu jo kasama ae irera.

<sup>7</sup> Nanda sasingu, evetu genembo mendeni da gungubo geke ava, erá tumondeove dae sise resena. Mave ari eveva use irarira amo, nu kau Keriso da kaugori.

<sup>8</sup> O mave ari ekoko use irarira amo, nu Satan da tofo edo irise, amingarira. Ainda beká mo: Satan nu tuturoda ghedo ari ekoko udo refira. Aindae sedo God da Mandi fusira. Amo, Satan da ari rea eraira a rejo etiri sirorusira ava, dari bejare dae sedo, fusira.

<sup>9</sup> Evetu genembo mave God da sasingu edo irera amo, ne jo ari ekoko use irae arera. Ainda beká mo: God nunda jebuga a nunda irari ava, nunda sasingu da dubo jokáda fitiri sembiri, nu nenda afa edo irira. Ava sedo, evetu genembo mave God da sasingu edo irera amo, ne jo ari ekoko use irari da kaugo iraeri.

<sup>10</sup> God da sasingu mavejori, kotugo Satan da sasingu mavejori, ava nange kasama areri? Amo kau evavagori! Evetu genembo mave ari ekoko use irarera, o nenda nano namendi imboe use irarera amo, ne jo God da sasingu iraeri.

*3:11-18 Namonde Minonde Minonde Dubo Ruruse Irarera.*

<sup>11</sup> Geka tuturoda setero nininguseva amo, eviri. Namonde minonde minonde dubo ruruse irarera.

<sup>12</sup> Kau Cain usira aminga ava, namonde jo ae arera. Nu Satan da tofo edo irise, nunda namendi detiri ambududurusira. Amingusira da beká mo: nu ari ekoko avanembo edo ghusira. O nunda namendi mo, ari eveva avanembo edo ghusira.

<sup>13</sup> Ava sedo, nanda nano namendi, evetu genembo fisi da uju ava use irera aimi eredo, kau Cain usira aminga ava use, ne imboe arera amo erá buneove!

<sup>14</sup> Namonde ambarida ghe fera jebugakena sembudo irera, ava kasama erera. Namonde ava kasama erera da beká mo: namonde nano namendi dubo ruruse irera. O mave nunda nano namendi jo dubo bae irira amo, nu ambari jokáda irira.

<sup>15</sup> Ai resira amo: mave nunda namendi imboe use irarira amo, kau nunda namendi dari ambaetira, ainda kaugo ava kotise iratira. A namonde kasama erera: evetu genembo mave kokomana daoro ambarera amo, ne jebuga evovodae irari ava jo bae arera.

<sup>16</sup> Keriso namondedae sedo rea usira ava kotise, namonde dubo bari da aito ava kasama arera. Keriso emingusira. Nu namondedae sedo fira ambududurusira. Ava sedo, namonde kau daba ava use, namondeda nano namendi sonembari dae sedo, ambaeteri.

<sup>17</sup> O makasi embo eni baimaraghae irari gido, nunda namendi eni susu iti fafode aimi jo sonembae irise, "Na God dubo ererurena," saetira amo, nu gungubo saeti. Ai resira amo: nu God da uju ava use nunda namendi sonembaetira, avata nu jo sonembaeri.

<sup>18</sup> Nanda sasingu, namonde tofo tofo dubo bari da emboro mo, jo geke sari vanembo iraeri. Namondekena dubo bari iratira amo, namonde evetu genembo sonembase saramana ururoro, namondeda



dubo bari ava isagha ari evetu gen-  
embo gido ghaeteri.

*3:19-24 Namonde Eveva Eraera  
O Sembae Eraera Ava, Dubo Jokáda  
Itatamarera.*

<sup>19</sup> Avori, namonde God da Geka beká ava tumonduse, jebuga budo irera ava, nange kasama areri? A namonde nange kasama use, dubo jama edo God dae jo oju ae areri? Amo, namonde emingarera.

<sup>20</sup> Namonde dubo jokái, “Arie, na dara eteni!” aminge itatamaetera amo, namonde oju use vujegaeteri. Aında beká mo: namondeda dubo joká aında kasama mo, kitakori. O God da kasama mo, teria bekári. Ava sedo, dara rea usera, nu anakora kasama edo irira.

<sup>21</sup> O namondeda dubo jokáda, ari eko eni jo itatamae arera amo, namonde fakina edo, God da dombuda fete gogoghombarera.

<sup>22</sup> Amingedo, namonde rejodae benunu sarera amo, mutari namonde barera. Mutari barera da beká mo: nunda geka a nunda uju ava urureoro gido, nu ivuga eraira.

<sup>23</sup> A God rea uju eraira amo, eviri. Namonde, nunda Mandi Iesu Keriso rea aoro dae sisira ava use, nunda javo fakinaghae ava tumonduse, tofo tofo dubo ruruse irarera. God nu, namonde amingaoro dae uju eraira.

<sup>24</sup> Mave God da geka a uju ava use irarira amo, nu God ghae dabade tatarira, a God numokena irarira. Kotugo, God namondekena irira ava, nange kasama areri? Amo, eminge kasama arera. Nunda Asisi namondekena mutiri rurusera aında, namonde kasama erera, God namondekena irira.

## 4

*4:1-6 Feroveta Geka Rea Seraera  
Ava Ijujarera.*

<sup>1</sup> Nanda nano namendi, evetu gen-  
embo digari eminge seraera, “Na-  
mane God da Asisi budo irera.”

Mendeni mo, ne geka beká ser-  
aera. A mendeni mo, gungubo ser-  
aera. Ava itatame gaovo dae re-  
sena. Ne, God da Asisiimi sonem-  
burureari geka seraera, ai, sukarui  
sonemburureari geka seraera? Kote  
givu! Aında beká mo: feroveta  
derari kakato digari mo, Satan da  
uju ava sari dae sedo, yama reighi  
mendeni mendeni aminda, geka vi-  
ronu seraera.

<sup>2</sup> O mendeni mo, God da Asisi-  
imi ijugurureari geka seraera. Ava  
sedo, geka beká ava nange kasama  
areri? Amo mave, “God da Mandi  
Iesu Keriso fira, namondeda tamo  
budo, enda eminda siroredo gen-  
embo beká usira,” ava dubo isam-  
buimi aminge isagha sarira amo, nu  
geka beká God da Asisi budo aimi  
sarira.

<sup>3</sup> O mave gekaá ighagha arira amo,  
nu God da Asisi jo baeri. Nu Keriso  
da Gitofu da asisi ava budo irira,  
ágido ighagha arira. Aında asisi eko  
furarira amo, setero ne niningusevu.  
Ava oroko ojighira irira.

<sup>4</sup> Avata nanda sasingu, ne God  
da natofo edo ireva. Ava sedo, ne  
feroveta gungubo kakato setena ava  
darigedo, atai fati fefetusevu. Aında  
beká mo: Asisi nene ruruseva amo,  
nu fakinaghaeri. O evetu genembo  
mendeni endada irise, fisi da uju use,  
asisi eni rurusera amo, jo amingo  
iraeri.

<sup>5</sup> Evetu genembo amo, ne enda da  
saramana, enda da uju, a enda da  
kotari aında seraera. Ne enda da  
tofori. Aında ne aminge sirureoro,  
evetu genembo mendeni endada ir-  
era aimi, nenda geka ningiraera.

<sup>6</sup> O namonde mo, God da to-  
fori. Mave God da natofo edo ir-  
era aimi, namondeda geka ningi-  
raera. A mave God da tofo jo ae  
irera amo, ne namondeda geka jo  
ningae eraera. Aminguse iroro gido,  
mave geka beká da Asisi rurusira, a  
mave derari da asisi rurusira ava,  
namonde kasama arera.

*4:7-21 God Namonde Dubo Ru-  
ruse, Nunda Mandi Dirigetiri Namon-*

*dekena Fusira.*

<sup>7</sup> Nanda kokomana, namonde tofo tofo dubo baeteri. Ainda beká mo: dubo bari isambu God kena ghe foa gheraira. Numo, dubo bari isambu da susuri. Ava sedo, mave nunda komana dubo barira amo, nu God kasama edo, nunda mandi o gagara edo irira a gido, nunda komana dubo buraira.

<sup>8</sup> O mave nunda komana jo dubo bae eraira amo, nu God jo kasama ae irira. Ainda beká mo: God nu dubo bari da susuri.

<sup>9</sup> God nunda dubo bari kau mavega ava, namondekena eminge ijugusira. Nu, namonde nange nunda Mandi da javoda jebuga tuve baetera ava kotise, nunda Mandi dabako tainako ava dirigetiri endada fusira.

<sup>10</sup> Dubo bari beká mo eviri: namonde numoá jo dubo bae irero, nu namonde dubo ruruse, namondeda ari ekoko kote doyari dae sedo, nunda Mandi dirigetiri fira, ari ekoko da mino futuse ambududurusira.

<sup>11</sup> Avori, nanda kokomana, God namonde dubo ruruse, amingusira. Ava sedo, namonde kau daba aminga ava use, tofo tofo dubo baeteri.

<sup>12</sup> Evetu o genembo eni God nunda ditiimi jo gae irira. Avata namonde tofo tofo dubo ruruse irarera amo, God nu tofo mandi namondeda jokáda saramana ururari, nunda dubo bari baji mindafu beká ava arira.

<sup>13</sup> Namonde God de dabade tatedo irera ava, nange kasama areri? Amo, saone? Nu nunda Asisi mutiri rusera ava, dubo jokái itatamuse kasama eraera, nu namonde dabade tatedo irera.

<sup>14</sup> God Afa nunda Mandi, evetu genembo isambu sonembari jebugaoro dae sedo, dirigetiri endada fusira ava, namane totofo gido, ainda bino ava osa seraera.

<sup>15</sup> Mave, "Iesu mo, nu God da Mandiri," sarira amo, God nu anakora genembo ainghae tatedo, nunda dubo jokáda irarira.

<sup>16</sup> Namonde God de dabade tatedo irera ava sedo, God namonde nange dubo buraira, ava kasama use tumonderaera. God nu dubo bari da susuri, aminge seteni. Ava sedo, mave dubo ruruse irarira amo, nu God ghae tatedo irari, God nunda dubo jokáda irarira.

<sup>17</sup> Avori, God ururari, namondeda dubo joká, nunda dubo bariimi bedo beká ava arira. Nu amingarira da beká mo eviri. Nu uju erira, namonde Ategi da Sifo aminda, fakina edo jo oju ae aeteri. A namonde jo oju ae arera da beká mo: Keriso nu namonde dabade tatise, namonde dubo ruruse, nunda jebuga mutiri budo, endada irise, namonde kau numongo ava ari dae use irera.

<sup>18</sup> Eregoseva? Mave ni dubo barira aindae, ni jo nundae oju ae aresa. O nundae oju aresa da beká mo, nunda dubo bari jo tumonde gogoghombae aresa. Nunda dubo bari tumonde gogoghombaetesa amo, ninda oju dadabaeti. Avori, God namonde dubo buraira. Nunda dubo bari tomanako itatamuse kotugo numoá minoda dubo ruruse, namonde nundae oju jo ae eraera. O oju arera amo, namonde susu eindae oju arera. Namonde nunda dubo bari jo tumonde gogoghombae irise, Ategi da Sifo aminda, nu namondekena fakarago ariá kotise oju arera.

<sup>19</sup> God nu giti namonde dubo rusera, aindae sedo, namonde nu dubo buraera.

<sup>20</sup> Mave, "Na God dubo ererurena," sise, nunda namendi eni imboe arira amo, nu gungubo sarira. Ainda beká mo: namonde God jo ditiimi gae eraera. O namondeda nano namendi mo, ditiimi giraera. Ava sedo, namonde God kena dubo bari ijugari sarera amo, fakaragori. Ai resira amo: namonde numo sonembari da goroto eni tefori. O namonde nano namendikena dubo bari ijugari sarera amo, raugakori. Ava sedo, mave nunda namendi eni imboe arira amo, nu God barago imboe arira.

<sup>21</sup> Keriso nu aindae sise, agho dari

evia futusira. Mave nu God dubo bari sarira amo, nunda namendi barago dubo barira.

## 5

### *5:1-5 Namonde God Da Mandi Iesu Ava Tumonduse, Fakina Arera.*

<sup>1</sup> God Genembo dirigari furare dae sisira amo, Iesu ri. Geka ava, mave tumonderaira amo, nu God da mandi o gagara edo irira. A mave genembo eni ava dubo barira amo, nu genembo ainda sasingu barago dubo barira.

<sup>2</sup> Avori, namonde God dubo ruruse, nunda Geka a Agho Dari kaifa arera amo, namonde kasama arera, namonde nunda sasingu barago dubo ruruse irarera.

<sup>3</sup> Kotugo, namonde God dubo bu-raera ava, nange ijugururoro isagha ari gaeteri? Namonde emingaore! Namonde nu dubo ruruse, nunda Geka a Agho Dari kaifa use irarera. A nunda Agho Dari namondekena jo fakarago iraeri. Namonde ari da kaugori.

<sup>4</sup> Ai resira amo: God da sasingu, ne irari eko enda eminda irira ainda fakina ava, nene de atai fati fetari sarera amo, inono arira. Ne Iesu Keriso tumonduse, amingarera.

<sup>5</sup> Iesu nu God da Mandi ava, mave tumondarira amo, nu nusukako irari eko endada irira ainda fakina ava, de atai fati fetarikenana barago, inono arira.

### *5:6-12 Emboro God Afakena Amo, Iesu Numori. Emboro Eni Tefori.*

<sup>6</sup> Iesu Keriso fusira, resena emo, nu uvu ororoghae fusira. Nunda tano uvu ororoghae aimi, ijugetiri namonde kasama erera: nu God da Mandiri. Nu jo uvu vanemboimi furaeri. Nu nange nange uvuimi bafataito usira, a nange nange nunda ororo avereguse ambududurusira ava gido, namonde kasama erera: nu God da Mandiri. Kotugo, Iesu mo, nu God da Mandi ava, God da Asisi barago namondekena ijugeraira. Ainda beká mo:

geka beká da susu, amo God da Asisi numori.

<sup>7-8</sup> Ava sedo, tano isambu etodaba naká aimi ijugeraira amo, Iesu nu God da Mandiri. Tano setena amo, God da Asisi, a uvu ororoghaeri. A nenda ijuga mo, jo nunda nunda iraeri, dabakori. Amo, Iesu nu God da Mandiri.

<sup>9</sup> Avori, namonde evetu genembo da osa sari ava tumonderaera; ava sedo, namonde God da osa sari barago tumondaeteri. Ainda beká mo: God da geka fakinaghaeri. O evetu genembo da geka mo, jo amingo iraeri. Ava sedo, tano etodaba naká setena ava, God nune tofo mandi nunda Mandi Iesu dae ijugetiri isagha usira; ava sedo, tano rea ijugeraira ava, namonde tumondarera.

<sup>10</sup> A mave God da Mandi tumondarira amo, nu nunda dubo jokáda evia itatamarira: tano rea ijugeraira amo, geka bekári. O mave God da osa sari evia jo tumondae arira amo, nu inono, God gungubo sariá sarira. Ainda tuka mo: God nu tofo mandi rea nunda Mandi dae sisira ava, gungubo sariá sise, nu jo tumondae eraira.

<sup>11</sup> God nunda Mandidae rea sisira amo, eviri. God namondekena jebuga evovodae irari futusira da susu mo, nunda Mandiri.

<sup>12</sup> God da Mandi, mave bu nunda dubo jokáda fitari nune kaifa ururari irarira amo, jebuga resena emo, nu anakora budo irira. O mave God da Mandi jo bae arira amo, nunda jebuga barago, jo bae arira.

### *5:13-21 God da Sasingu, Nenda Irari Kau Emingori.*

<sup>13</sup> Ne mave God da Mandiá tumonduse, nundae javono gateraeva, nemokena resena, ningivu! Ne aminge tumonduse, anakora jebuga evovodae irari torughe ruruseva ava itatamedo, kasama e gogoghombaovo dae sise eregefena.

<sup>14</sup> Namonde God da dombuda fetedo, tumo faingharera. Ainda beká mo eviri: namonde kasama erera, namonde God da uju ava ari

dae kotise, rejodae benunu sarera amo, nu ningarira.

<sup>15</sup> Kotugo namonde sifo reda banungarera amo, nu anakora dengoro jave ningarira. Avori, namonde ava kasama use itatameraera: namonde rejodae benunu sarera amo, nu anakora mutari barera.

<sup>16</sup> Namonde ari ekoko mendeni mendeni use, jo ambae arera. Ninda namendi eni ari eko eni ururari garesa amo, ninda namendidae sise, God kena banungaso ningido, nunda jebuga ninda namendikena mutarira. Avata ari eko eni irira, ava use irarera amo, namonde sifo gombuda ambari ava torugharera. Ninda namendi, ari eko resena evia ururari garesa amo, jo nundae banungaso dae sae arena.

<sup>17</sup> Ari ekoko isasambu mo, ekokori. Avata setena, daba ava sari dae erena. Ari ekoko isasambu eraera amo, namonde dara God da dombuda eraera. Avata ari ekoko mendeni mendeni use, jo ambae arera.

<sup>18</sup> Eregoseva: namonde kasama erera, God da sasingu ne jo ari ekoko use irae arera. Ainda beká mo: God da Mandi kaifa ururari, Satan jo foa ne dederururari ari ekoko use irae arera.

<sup>19</sup> A namonde kasama erera: evetu genembo a reighi isambu endada irera amo, Satan da sari ningariri. Avata kotugo, namonde kasama erera: namonde mo, God da tofori. Yari budo givu!

<sup>20</sup> A kotugo, namonde kasama erera: namonde God beká ava kasama aoro dae sedo, God da Mandi fira namondeda munju afigetiri dubo koterera. A namonde oroko God de dabade tatedo irera amo, namonde nunda Mandi Iesu Keriso barago namonde tatedo irera. Amo jo bunae arera. Numo God beká, a nu jebuga evovodae irari da susuri. Yari budo givu!

<sup>21</sup> Nanda sasingu, ove kevari a gode mendeni mendeni gi darigedo ghevu! Erá tumonde baingheove dae resena. Yari budo givu!

Avori, nanda geka tano eviri.

## John Nunda Reta Soroda Gefusira, Amo Eviri.

Nunda reta einda jokáda, John nunda javo jo isagha gembraeri, avata evetu genembo da kotari mo, John nu reta evia gefusira. Namenda kotari mo, nu gitofudae oju use, nunda javo jo isagha gembraeri. Kau daba aminga ava, nu ategi use, “nanda ghasovuko” sisira amo, nu ekaresia+ eni ava kotise, nunda javo kivo use, aminge sisira.

Geka teria beká tuturoda gefusira amo, eviri. Kuristini da tumondari bekári: Iesu jo asisi vanemboimi furae usira, nu tamoghae dabade fusira. Avata kotugo, nu jo ‘genembo eveva’ vanembo iraeri. Numo, God beká, a kotugo genembo bekári. Ava ijuguse, John reta evia gefusira.

<sup>1</sup> Arie, nanda ghasovuko!

Na ninda begori. God ni gategetiri nunda natofo jokáda iresa. Na ni ategi beká ava erena. Yari budo gi!

Ninda sasingu barago ategi erena. Na, ne dubo bu gogoghombereaena. Kotugo, jo nasuka nane ne dubo bae eraena. Evetu genembo isambu mave geka beká kasama edo irera aimi, eredo, ni ninda sasingude dabade ne dubo buraera.

<sup>2</sup> Ne dubo buraera da susu mo: geka beká namondeda dubo jokáda irira, a kotugo evovodae irarira.

<sup>3</sup> God Afa a nunda Mandi Iesu Keriso, namondekena geka beká futuse a joka use, namonde dubo ruruse, nenda sonemba a dubo jama mutoro namonde baore! Yari budo givu!

*4-11 Namonde Tofo Tofo Dubo Baeteri.*

<sup>4</sup> Ninda sasingu mendeni, Geka Beká ainda amboda amboda ero ningido, na ivuga beká ava useni. Ne, God Afa rea aoro dae sisira, ava eraera.

<sup>5</sup> Avori, nanda ghasovuko, na ni dubo ruruse, eminge resena. Namonde tofo tofo dubo ruruse irore! Amo jo agho dari seka eni iraeri. Amo, tuturoda ghe sero niningudo refera, daba avori.

<sup>6</sup> A dubo bari setena ava ari sarera amo, namonde God da agho dari ava kaifa use irarera! Agho Dari resena emo, tuturoda sido fusera, daba avori: amo, namonde tofo tofo dubo ruruse irarera!

<sup>7</sup> Derari kakato digari, ne vasada ghe buvudo era reighi mendeni mendeni aminda irise, nenda ijuga sembae ava ijugeraera. Aminguse, Iesu Keriso namondeda tamo evia budo siroreda, genembo beká usira ava, ne ighagha eraera. Evetu genembo amo, ne evetu genembo mendeni dederuse, Keriso kena gitofu eraera.

<sup>8</sup> Nenda dubo joká tofofo kaifa aovo dae sise resena. Erama God nemokena mino mutari erekotira ava, kosasagheove! Nenda saramana eraeva ainda mino ava, isambu baovo dae sise resena.

<sup>9</sup> Mave Keriso da ijuga darigedo, dombu eni ijugarira amo, nu God da jebuga jo bae arira. O mave Keriso da ijuga tumonduse irarira amo, nu God Afa nunda Mandighaekena jebuga barira.

<sup>10</sup> Evetu o genembo mave ijuga dombu eni budo nemokena furarira amo, erama nundae nati joká dedo bu kaifa use tavo eove! Nu erá itako ategi eove!

<sup>11</sup> Ainda beká mo: mave nu ategi arira amo, nunda ijuga a ari sembae ava sonembuse arira.

*12-13 John Evetu Genembo Ategi Edo, Tano Usira.*

<sup>12</sup> Na nimokena geka digarigo gembaeteni. Avata na retada gembari imboe erena. Nanda uju mo, na ya nimokena buvudo, nangae dombu dabade edo, geka dabade se nininguse ivuga beká ava aeteri. Yari budo gi!

<sup>13</sup> Ninda dubo bari gagarako God  
gategusira, ainda sasinguimi ni ategi  
erera. Yari budo gi!  
Avori, nanda geke tano eviri.

## John Nunda Reta Amboda Beká Gefusira, Amo Eviri.

Iesu da ambo jimbi javo John, nunda komana Gaius kena reta evia gefusira. Emo taká reta bekári.

John nunda reta evia gefuse, einda jokáda nunda javo jo isagha gembaeri, avata evetu genembo da kotari, Iesu da ambo jimbi javo John, buku emo nune gefusira.

Buku einda jokáda, geka mindafu eni, tuturo 9-11 aminda tege giraera. Amo eviri. Namonde dubo kotise, ekaresia+ da babojegari gategarera. Reighi da kokotofu ava, ekaresia+ da babojegari aoro dae sedo gategarera amo, avose, kau Diotrefhes ekaresia+ da giti sembae jigheari, Iesu tumondari+ embo da irari sembae edo ghusira aminga ava, namondeda ekaresia+ da irari sembae arira. Ava sedo, namonde gegenembo God dubo buraera ava, saoro vitido ekaresia+ da giti jijighururoro, namonde nenda amboda amboda arera.

<sup>1</sup> Arie, nanda namendi, Gaius ko! Ninda bego ni dubo bu gogoghomberraira amo, namori. Na ni ategi beká ava erena. Yari budo gi!

<sup>2-4</sup> Nanda namendi, na kasama erena, ninda dubo joká esimbuguse iresa. Na ava kasama erena da beká mo: nangaeda nano namendi mendeni fera, ni nange nange geka beká da amboda amboda ise, geka beká a eveva avanembo sise irá gheraesa ava, nene setero na nininguseni. Ava ningido, na ivuga beká ava useni. Nanda sasingu geka beká ainda amboda amboda ya gheraera ava ningido, na dubo eveva use ivuga beká ava eraena. Ivuga eni jo amingo iraeri. Avori, ninda asisi a dubo joká esimbuguse iresa. Ava sedo, na nindae eminge benunu serena, Bajari nange kau daba aminga

ava, ninda tamo esimbugari eveva iraeti, a ni eveva avanembo tafuse iraetesi.

<sup>5</sup> Nanda namendi, God da natofo esa nimokena ya gheraera ava, kaifa e gogoghomberraesa aindae, na ni tumondaraena. A God da natofo, oro eni oro eni ya gheraera, ábarago kaifa eraesa aindae, namane nindae sakai seraera.

<sup>6</sup> Nangaeda nano namendi resena emo, ne eminda fera, ninda dubo bari a kavevera aindae osa setero, Iesu tumondari+ embo eminda ne nininguseri. Avori, na eminge resena. Ni ne sonembedo ghusesa a sonemberaesa, kau daba ava use iri! Amingururaso, God nu ivuga use irarira.

<sup>7</sup> Ainda beká mo: evetu genembo avavaga Keriso da javodae sise, nenda reighi dodo nunda Bino ava vironu sise, ya foa gheraera. Aminguse, evetu genembo God jo tumondae eraera aimi, nemo sonembaoro dae sedo, jo benunu sae eraera.

<sup>8</sup> Ava sedo, evetu genembo avavaga fururoro gido, namonde nati joká dedo sonembuse iraeteri! Aminguse, ne namonde dabade saramana da bouvu fufuroro, geka beká da Binó aimi ivegedo yarira.

### *9-12 Diotrefhes Demetrius Ghae, Nenda Kikiri.*

<sup>9</sup> Na reta tufako ninda ekaresiakena+ gefuseni. Avata Diotrefhes, nenda giti jighari ari dae uju eraira aimi, na jo kakara use nanda geka itako jo ningae eraira.

<sup>10</sup> Na ya nemokena buvarena amo, nune rea eraira aindae, na eredo isagha saono niningururovo, ghoghora sarena. Nu nandae, geka eko a aji sise, gungubo seraira. A ainda teriango mo, nu emingeraira. Namondeda nano namendi vironu sise deingheraera ava, nune bureguse nati joká jo dae eraira. A ninda ekaresia+ da natofo mendeni, vironu sari kakatoá bu kaifa use tavo ari dae seraera amo, nune buregeraira. Aminguse, nu edo gido, ekaresia+ da natofo mendeni, vironu sari kakatoá

sonembari dae seraera, ábarago ondari dae eraira. Amo ari sembae bekári.

<sup>11</sup> Avori, nanda namendi, ni emingaetesi! Erá ijugaboro eko ainda amboda amboda eose! Ni ijugaboro eveva ainda amboda amboda udo yaetesi. Mave veka eveva use irarira amo, nu God da tofori. O mave veka sembae use irarira amo, nu God jo kasama ae irira.

<sup>12</sup> Evetu genembo isambu Demetrius dae sakai seraera. A nunda irari gido, namane erekotera amo, geka bekári. Kotugo, kasama aso dae sise, na kau daba ava, nundae sekago sakai resena. A ni kasama eresa, na geka beká vanembo seraena.

*13-15 John Geka Se Tano Usira.*

<sup>13</sup> Na geka digarigo nimokena gembaetena avata, na retada gefuse, sari imboe erena.

<sup>14</sup> Na gigitereña, na nange totoi ya nimokena buvudo, dombu dabade edo, nangae dabade geka se ningaeteri. Yari budo gi!

<sup>15</sup> Dubo jama nimokena irare! Ninda kokomana eminda irera aimi, ni ategi roro beká ava erera. Yari budo gi!

Namondeda kokomana aminda irera ava, ategi erena. Se ningore!

Avori, nanda geka tano eviri.



## Jude Nunda Reta Gefusira, Amo Eviri.

Jude reta evia gefuse, tofo mandi nunda kiki jo saeri. Avata Matthew Kakara (13:55) a Mark Kakara (6:3) tegedo, evetu genembo digari koter-aera, Jude mo, nu Iesu noi Mary da fumbariri. Ava sedo, nu Bajari Iesu da namendiri.

Peter nunda reta amboda gefusira ainda jokáda, nu ijuga sembae aindae ghoghora sisira. Jude nu geka daba ava kotise, reta emo gefusira. Avose, nu sifo daba aminda, nunda reta emo gefusira tano. Amo, nu ghaeko 66-67 A.D. joká aminda gefusira.

<sup>1</sup> Arie, nanda nano namendi!

Na Jude ri. Iesu Keriso da saramana kato eni namori. A kotugo, James<sup>1</sup> amo, nu nangae tini dabakori. Na nemokena eregefena. Yari budo givu!

God ne aghi etiri nunda natofo edo ireva. God Afa ne dubo buraira, a Iesu Keriso ne tavo eraira. Na ne ategi beká ava erena. Yari budo givu!

<sup>2</sup> Joka ari, dubo jama, a dubo bari ya nenda dubo jokáda vose bedo edo fumbu fetare!

*3-16 Namonde, Ijuga Sembae Ava Erá Tumondeore Dae Sise, Namonde Totofo Kaifa Arera.*

<sup>3</sup> Nanda dubo bari nano namendi, ne namonde dabade jebuga seka budo irera! Ainda geka evia, na nemokena retada gembari dae uju beká ava erena. Avata oroko, ainda geka jo sae arena. Na geka eni kotise, ava sari dae erena. Amo, ne fakina edo namondeda tumondari aindae, isoro aovo dae sise, nemokena eregefena. Tumondari resena emo, God mutiri nunda natofo ruruseri. Futusira amo, inononda futusira. Nu jo tumondari dombu eni amboda sekago mutae arira.

<sup>4</sup> Ne isoro aovo dae resena, ainda beká mo eviri. Evetu genembo mendeni God kotae eraera aimi, ufena teredo God da natofo ainda jokáda irera. God namonde nange sonemberaira ainda geka ava, nene jighi birurughe sembae sise irera. Totofo nenda fisi da uju, a kusia bagia ari dae sedo, ne amingeraera. Aminguse, namondeda Giti Jighari a Bajari dabako, Iesu Keriso ava ighagha use irera. God da Geka jokáda, anakora nendae sedo gembero irira amo, eviri: evetu genembo amingeraera aindae, God mino eko ava simbugetiri irira.

<sup>5</sup> God nu evetu genembo mendenikena mino eko muturaira, ava kotovo dae sise, kiki evia sekago sirurono ningareva. Ne kiki emo ningi tefo usevu; avata kotugo, sekago kotovo dae sise sari dae erena. Namane Jusi embo da abuamane ava isambu, Bajari unumbe bu reighi Egypt ghedo fusira. Avata amboda, namanenda abuamane mendeni nunda Geka jo ningi tumondae usera aindae, ne detiri sirivo useri.

<sup>6</sup> O aneya mendeni da kiki ava kote givu! Aneya amo, ne gogore edo, nenda saramana God futusira ava dariguseri. Aminguse, nenda irari vasa dotutuseri. Doterogido, God ne sandi seiniimi bundetiri irera. Amingedo iroro, amboda Sifo Teria foa buvari, nenda mino eko ava barera.

<sup>7</sup> Geka eni mo eviri. Sodom a Gomora embo a nenda kokomana mendeni, reighi utuako iriara, nenda kiki ava saono kotovo dae resena! Kau, aneya setena aimi usera aminga ava, Sodom a Gomora embo nene kusia bagia edo ghuseri, a ari ekoko beká mendeni edo ghusera aindae meka gaetera avata, ne meka itako jo gae edo ghuseri. Ne amingero gido, God eredo, namondeda ijugaboro mutari dae sise, avaraka fugetiri vose fira

<sup>1</sup> 1:1: Tuturo 1 jokáda, James dae resira amo, Iesu da natofo Jerusalem aminda iriara ainda giti jighari nune edo irei. Kotugo, Jude reta eregefira emo, nengae James ghae mo, Iesu da jamena bekári.

aimi, natofo a nenda reighi isambu gambu avisira. Avaraka aimi evovoda avirurari, ne mema itatamuse irarera.

<sup>8</sup> Kotugo, evetu genembo ufena namondeda jokáda teredo, ijuga sembae ijugeraera setena, ne kau daba aminga ava eraera. Ne sono ruruse a diti mokoi gosuse, tuturo edo kotari sembae kotise irá gheraera. Nenda kotari sembae aimi eari, ari ekoko urureoro, nenda tamo fisi ava bebete use irá gheraira. Ne gogore edo, God da sari ava ne jo ningae eraera, a aneya durode aindae aji sise irá gheraera.

<sup>9</sup> Aneyamane da giti jighari javo Michael, nu Moses da tamo bari dae sedo, Satan ghae dabade beisiga usera amo, nu jo numoá ijujuse dombuda geke eko eni jo sae usira. Nu taká eminge sisira, “Bajari ni buregare!” aminge sisira. (Ne eregoseva: aneyamane nenda fakina a duro teriari. Ijuga kakato sembae setena amo, jo nemongo iraeri. Avata ne gogore use, aneyadae aji sise irá gheraera. Amo sembae bekári.)

<sup>10</sup> Ne roera mendeni, totofo jo kasama ae eraera, aindae aji sise dere jiraera. A ne kau sino fuka aminga ava use, dubo jo kotise ae eraera. Ne nenda fisi da uju avanembo urureoro, ari daba aimi bebete eari sirivo eraera.

<sup>11</sup> Arie, dara! Ne taká amboda nenda mino tambarera amo, jo kitako iraeri. Eko beká ava tambarera. Kau Cain<sup>11</sup> irari sembae da emboro gatededo aminda isira, aminga ava use, nenda uju ava eraera. O Balaam\* saone! Kau Balaam moni dighighi use bari dae sedo, God da Geka kotae usira aminga ava, nene dara eraera. A kotugo, kau Korah\* gogore use, tofo nunda javo

jighari erari, nu giti jighari ari dae kotisira aminga ava, nene gogore eraera. Avata kau God setiri Korah ambududurusira aminga ava, nemo-kena sirorarira.

<sup>12</sup> Ne nemonde dabade Bajari kotise, bayau mindari dae sedo totorugeraeva amo, ijuga kakato sembae ne kirumo rise bayau da oduso use, meka jo ae eraera, a jiro birurugheari ari sembae eraera. Ijuga kakato resena emo, ne totofo kotise, nenda uju avanembo eraera. Ne kau yavatakena foroga darido diseraira, aindae kaugori. O ne kau ika eni, vuji jo jighae ireira, avi gharasa etiri, besisighae dabade durege rurusera, aindae kaugori. Namonde ijuga kakato sembae aindae ijugakena, jebuga o sonemba eni jo bae arera.

<sup>13</sup> Ne kau eva eko fumbasa babai jo tukughae, sumburaira aindae kaugori. Jo mave eniimi buregari da kaugo iraeri. A kotugo, kau eva bejise foro eraira aminga ava, nenda ari ekoko beje foa gheraira. Nenda ari ekoko eraera, ne aindae meka gaeteri. O eni mo sarena! Kau isiágo utuda donembe sumbu ya dadabeari jo gae eraera aminga ava, ne sifo tufako duroghae irise ya dadabarera. Nendae sedo, God vasa tumba eko beká jinjanghari aindae jokáda simbugetiri irira. Ne aminda ya teredo, evovoda irarera.

<sup>14</sup> Namondeda abua Adam aindae imendi agira da imendi agira beká aindae mandi Enoch ri. Nu anakora eredo, Bajari amboda rea ijuga kakato sembae aikena ari kotisira ava, nune osa sisira. Bajari sonembiri, Enoch nu eminge sisira, “Givu! Amboda Bajari nunda aneya kakara digari ambari ainde dabade furarera.

<sup>15</sup> Nu evetu genembo ijujari dae

<sup>11</sup> **1:11:** Genembo javo Cain resira emo, nu Adam da mandi begori. Nunda mandako nune detiri ambududurusira. A Balaam resira emo, nu ferogeta eni, reighi Petor, uvu teria javo Yufretis, aminda irei. Nu Moab embo da kini javo Balak da moni bari dae sise, Israel embo simbora ari dae isira avata, God nu buregusira. A genembo javo Korah, nu Levi ondiri. Avata nu nange Moses nengae Aaron ghae da vasa budo, Israel embo da giti jighaetira, ava kotise, Moses Aaron ghaekena aji sise dubo eko etiri gido, God setiri enda beka angetiri, Korah nunda natofode dabade aminda vose sirivo useri.

sedo furarira. Foa, evetu genembo nu kotae edo ari ekoko eraera ava, ijujarira. A kotugo, evetu genembo nundae aji sise geke ekoko seraera ábarago, ijujarira,” Enoch nu aminge sisira.

<sup>16</sup> Ijuga kakato sembae resena emo, ne evovodae dumo bauso use, evetu genembo mendeni da ari ekoko ava ijujuse irá gheraera. Ne sifo ghousa nenda uju ekoko ainda amboda amboda use irá gheraera. Ne tofofo sakai seraera. A evetu genembo mendeni nemo sonembuse, nenda uju ava aoro dae sise, ijuga kakato aimi sakai tefo tefo sise irá gheraera.

*17-23 Namonde Fakina Edo Fetarera.*

<sup>17</sup> Avata nanda dubo bari nano namendi, ijuga kakato sembae setena aindae, erá buneove! Aghi kakato namondeda Bajari Iesu Keriso gategusira aimi, rea nemokena anakora sisera ava kotovo dae sise resena.

<sup>18</sup> God nemokena geke afigetiri ne eminge siseri, “Sifo amboda foa buvarira amo, evetu genembo mendeni eredo, God kotae use, nenda uju ava use, dere jiriroro ne mema itatamareva,” Bajari da aghi kakato nemokena aminge siseri.

<sup>19</sup> A kotugo, beká siroretiri eregosera amo, evetu genembo resena eimi, ne oroko God da natofo jokáda teredo irera. Ne God da Asisi jo bae irise, fisi da uju ava use irera. Aminguse nene God da natofo ava jighi sarigetero, nunda nunda irera.

<sup>20</sup> Avata nanda kokomana, ne emingaovo dae sise resena. Nenda tumondari kakara aimi, tofofo fakina use fete gogoghombuse irareva! Aminguse, Asisi Kakara da fakina aimi banunguse irivu!

<sup>21</sup> Tofofo kaifa use, God da dubo bari jokáda irivu! Namondeda Bajari Iesu Keriso joka edo, jebuga evovodae irari mutari barera da sifo ava kaifa use, amingaovo dae resena.

<sup>22</sup> Evetu genembo mave manamana use erebunera amo, edo gido joka use sonembareva!

<sup>23</sup> Kau roera eni avarakada dudo avirureari sire bu ajagha fitiraeva aminga ava, evetu genembo amo Satan da ungodá ghe saghimbe baovo, ne ari ekoko da mino darigaore! Evetu genembo mendeni ari ekoko beká eraera ava, nene sonembari dae sareva amo, tofofo nenda irari se ningido ya sonembareva. Erama tofofo bebete eove dae sise, nenda ari ovía imboe beká ava use, ne ojughae dabade ya sonembareva.

*24-25 Jude Nu Banunguse, Tano Usira.*

<sup>24-25</sup> Avori, God Afa, nu namondeda God dabako tainakori. God eni tefori. Nu namondeda Sonemba Katori. Nune, erama ne gofeove dae sise, nunda fakinaimi, ne kaifa e gogoghombarira. A kotugo, nenda ari ekoko seghe fugari ne eveva a kakarago aovo, unumbe bu ya nunda dombuda fitari, riria beká ava use, nunda usasa jokáda fetirareva. Nu amingarira amo, inono beká arira. Aindae sedo, namonde God Sonemba Katodae sakai saore! Nu namonde sonembari dae sedo, Iesu Keriso namondeda Bajari ava mutiri fira sonembusira. Ava kotise, namonde nundae sakai sise eminge saore: numokena usasa, duro, fakina, a javo binonde ireira a irira amo, evovodae irare! Ai, bekári!+

Avori, nanda geke tano eviri. Na Jude.

## John, Sifo Amboda Rea Sirorarira Ava Gido, Gekaé Gefusira.

Buku emo, genembo javo John gefusira. Ekaresia+ da babojegari giti sirorusera ainda kotari mo: Bajari Iesu da ambo jimbi John, nune buku emo gefusira. Gefusira da sifo aminda, Rome embo da gavana aimi Kuristini evetu genembo-kena fakarago edo gitofu use, bouvu muteoro mema itatamedo ghuseri. Ne fakina edo dubo jama use, erá bunendo gofeore dae sise, John geka emo gefusira. Rea amboda God da gitofukena sirorarira, a God nange nunda natofo amboda sonembedo, vasa eveva nendae mutarira ainda geka ava ijuguse, John buku ainda jokáda gefusira.

*John, Sifo Amboda Rea Sirorarira, Ava Gido, Gekaé Gefusira, Ainda Mendo Mendo Mo Eviri.*

1:1-8 John Bajari da javoda natofo ategi edo, geka tuturo usira.

1:9–3:22 John diti mokoi gosiri, Bajari Iesu ekaresia+ 7 ainda geka ava numokena setiri ningido sisira.

4:1–8:1 Bajari fefa bondoghae ava beje afigari dae iri, bouvu a mema kau eni kau eni endada sirorusira ava, John diti mokoi gido sisira.

8:2–11:19 Aneya isambu 7 aimi tavuya fusero, roera dombu eni dombu eni sirorusira ava, John gido sisira.

12:1-13:18 Satan a nunda feroveta etoto naká, sino fuka da tamo ava bu asugedo, ya endada isagha arera, ainda kikiri.

14:1-15:8 John ari mendeni mendeni diti mokoi gosusira.

16:1-21 Aneya rooro isambu 7 ava averegero, rea sirorusira ava, John diti mokoi gido sisira.

17:1–20:10 God reighi Babylon de bejari vose dadabari, Bajari

jovereghe Satan bu avaraka jokáda fugari vosarira.

20:11-15 Ategi da Sifori.

21:1–22:5 Utu enda seka a Jerusalem seka, God da irari vasa ava, John gido aindae osa sisira.

22:6-21 Bajari rea numokena se tano usira ava, John ijugedo tano usira.

<sup>1-2</sup> Na geka sari dae erena emo, Iesu Keriso ijugusira. Amo, rea amboda jo soka irae, oroko nembo sirorarira, ainda gekari. Ava, nunda saramana kakato kasama aoro dae sedo, God nu, Keriso kena mutiri budo emingusira. Nunda aneya dirigetiri fira, geka ainda beká ava, namokena ijugetiri gi kasama useni. Ainda geka ava osa sise, buku eminda eregefenerere. Na Iesu da saramana kato, John ri.

<sup>3</sup> Ni buku evia tege garesa amo, ni ivuga aresa. Ni Geka evia ningi tumondaresa amo, ni dubo jama aresa. Ainda beká mo: sifo foa buvari dae erira.

*1:4-8 John Nu, Iesu Tumondari+ Embo Frovensi Asia Aminda Iriara Ava Ategi Usira.*

<sup>4-5</sup> Ekaresia+ 7 Frovensi Asia aminda ireva, na John nane ne ategi erena. God, nunda Asisi <sup>74-5</sup> nunda avo anumba ainda dombuda fetirera, a Iesu Keriso, nemonde dabade sonemba a dubo jama mutoro nemokena irare! God resena emo, nu oroko irira, giti irei, a kotugo amboda evovodaer irarira. Iesu Keriso, nu geka beká vanembo seraira ava sedo, numoá tumonderaera. Evetu genembo ambarida ghe jebuge erarera da bego mo, numori. Nu enda da kini (king) a kokotofu nenda Bajariri. Nu namonde dubo buraira. Nunda ambariimi, namondeda ari ekoko da mino mutiri, namonde jebuguseri.

<sup>6</sup> A kotugo, nu namonde gatededo, nunda God a nunda Afa da saramana aoro dae sedo, nune setiri namonde nunda fristi edo irera. Iesu Keriso

4-5 **1:4-5:** 'God nunda Asisi 7' resira emo, Asisi Kakara aindae resira.

kena usasa a fakina evovodae irare!  
Ai, bekári!

<sup>7</sup> Givu! Bajari forogaghae vose firi eregosenere.

Evetu genembo isasambu, nu vose fururari garera.

Mave nu ighagha edo arafa dorusera, a kotugo evetu genembo isasambu garera.

Nu vose fururari fuge gosuse, nunda oro oro isambu enda eminda irera amo, ne oju use sorara arera.

Avori, aminge sirorare!

<sup>8</sup> God nu ireira, irira, a evovodae irarira aimi, geka resira. Namondeda Bajari God Fakina Kato aimi eminge resira, “Roera isasambu ainda tuturoda a gombuda amo, namori,” aminge resira.

*1:9-20 John Nu Tuturo Edo, Rea Diti Moko Gosusira Ava, Isagha Sisira.*

<sup>9</sup> Na John, nenda namendiri. Namonde isambu Iesu da natofori. Na namonde dabade tatedo, mema Iesu da gitofuimi muturaera ava, itata-muse durumugeraera. Na God da Geka a geka beká Iesu ijugusira ava, vironu sedo ghusena aindae sedo, na sandi budo fera, butu javo Petmos eminda fiti dotero irena.

<sup>10</sup> Fura Tomanako eninda, Asisi Kakara aimi namokena vose asugusira. Asugiri, beka teria kau tavuya da dukago ava, nanda gukakena siri nininguseni.

<sup>11</sup> Eminge sisira, “Ni rea eregosesa ava, gembudo buku amo mutaso, ekaresia+ reighi 7 aminda irera aikena yarira. Reighi resena amo, eviri: Efesas, Simona, Pergamas, Taiyataira, Sardis, Filadelfia, a Leodisia ri. Aminda mutu yare!”

<sup>12</sup> Aminge setiri dadabetiri, geka mave sisira ava gari dae sedo, jovereghuseni. Jovereghedo, nanefa (lamp) fitari da bodaka isambu 7 ava,

fetirero gosuseni. Kasagogo amo, auri ‘gold’ imi ariri.

<sup>13</sup> Nanefa (lamp) fitari da bodaka 7 ainda jokáda, genembo da kaugo ava fetiriri gosuseni. Nunda tamo asugari koburu edo fetiriri ava gosuseni. A nunda ifu dighari mo, auri ‘gold’ imi ari, ai dighido fetiriri gosuseni.

<sup>14</sup> Nunda beo mo, foyago beká, angiagori. Nunda diti mo, avaraka bubura da kaugori.

<sup>15</sup> Nunda ata barago, kau auri avarakada ingeoro kokoigo edo tiritaragheraira, ainda kaugori. Nunda beka sisira amo, uvu usegha da dukagori.

<sup>16</sup> Nunda ungo gimandukena, damana 7 ava bu jighiriri gosuseni. Nunda beka jokáda ghe buvurutiri gosusena amo, roera eni kaiya da kaugo, ambo a dombu isambu dika vanembori. Nunda dombu mo, iji da usasa avavaga janimbusira.

<sup>17</sup> Na numoá gido, nunda ata duruda du fase, ambari embo da kaugo useni. Fasireno gido, nunda ungo gimanduimi siregedo, nanda tamonda jijighuse sisira, “Erama oju eose! Namori! Roera isasambu ainda tuturoda a gombuda amo, namori.

<sup>18</sup> Na jebuga da susuri. Geka bekári: na ambududuruseni. Avata kote gi! Na ambarida ghe jebugedo irena, a evovodae irarena. Ambari ava, nanda sari ningariri, a ambari embo da vasa ainda guro da boraga (bolt) ava, nane bu kaifa erenere.

<sup>19</sup> Ava sedo, rea ninda diti moko garesa, ava gembu! Amo, roera rea siroredo irira a amboda sirorarira ava, isasambu buku jokáda gembu irare!

<sup>20</sup> Damana 7 nanda ungo gimandui bu jighireno eregosesa, einda tuka mo eviri: ekaresia+ 7 setena, ainda aghi kakato <sup>720</sup> nemori. A nanefa (lamp) fitari da bodaka 7 auri ‘gold’ imi ari ava eregosesa, einda tuka

<sup>20</sup> **1:20:** Namonde geka etoto naká *aneyá* a *aghi kato* seraera aindae, Greek embo ne geka dabako ‘angelon’ sedo ghuseri. Mokogo mo, namonde geka da gharogho gosuse, kasama eraera, aneyadae resira, ai, aghi katodae resira. O buku javo, ‘**Amboda Sirorarira**’ einda jokáda, John nu *aneyá* kotise sisira, o *aghi kato* kotise sisira, ava jo kasama aeri.

mo eviri: ekaresia+ 7 setena amo, nemori,” aminge sisira.

## 2

*2:1-7 Iesu Tumondari+ Embo Efesas Aminda Iriara Aikena, Bajari Iesu Geka Sisira.*

<sup>1</sup> Aminge sedo, Iesu sekago namokena eminge sisira, “Ekaresia+ reighi Efesas aminda irira, ainda aghi katokena<sup>1</sup> gembu mutu yari, nune budo osa sirurari ningore! Mave damana 7 ava, nunda ungo gimandui bu jighirira, a nanefa (lamp) fitari da bodaka 7 auri ‘gold’ imi ari ainda jokáda deingherira amo, namori. Na nemokena geka evia resena.

<sup>2</sup> Ne rea edo ghuseva amo, na kasama erena. Ne saramana fakarago use jo doya, bouvu fufudo fuseva ava, na kasama erena. Ne ari ekoko embo imboe use, erama nenda jokáda tereore dae sise, ondiraeva. Evetu genembo mendeni era, nemo dederuse siseri, “Namane Iesu da ambo jimbiri,” siseri. Avata ne evetu genembo ijujuseva amo, ne gungubo kakatori, ava kasama usevu.

<sup>3</sup> Eni mo: ne fakina edo, nandae sedo gitofu da diti kosisevu. Aminguse, mema itatamuse, na jo ighagha ae usevu.

<sup>4</sup> Avata nenda dara eni mo, emingeraeva. Giti ne, na dubo bu gogoghombuse irá ghusevu. Avata oroko emo, nanda tamo kaka use, na jo dubo bu gogoghombae eraeva.

<sup>5</sup> Ava sedo, nenda ari ekoko emo vujege dodo, giti rea edo ghuseva, kau daba ava areva! Jo amingae areva amo, na nemokena yama, nenda nanefa (lamp) fitari da bodaka bu fugono, nenda fakina dadabarira.

<sup>6</sup> Avata kotugo, nenda ari eveva eni edo ghereva amo, eviri! Nicolas nunda ambo jimbide na imboe eraena ava, nembarago nu imboe eraeva.

<sup>7</sup> “Avari, Asisi Kakara rea ekaresiakena+ resira ava, ningi gogoghombevu!

“Mave nandae sedo isoro use, gitofu de atai duboda fati fetarira amo, na numokena jebuga evovodae irari ainda ika vuji ava mindare dae sedo, emboro afigedo ijugarena. Ika amo, nu God da vasa aminda vitoraira,” Iesu aminge sisira.

*2:8-11 Iesu Tumondari+ Embo Simona Aminda Iriara Aikena, Bajari Iesu Geka Sisira.*

<sup>8</sup> Aminge sedo, Iesu sekago namokena sisira, “Ekaresia+ reighi Simona aminda irira, ainda aghi katokena<sup>8</sup> gembu mutu yari, nune budo osa sirurari ningore! Roera isambu ainda tuturoda a gombuda amo, namori. A na ambudo, ambarida ghe jebuge eroruseni. Nane nemokena geka evia resena.

<sup>9</sup> Ne mema itatamereva amo, na eregosena. Na kasama erena, ne makasi embori. Avata nemokena geka beká resena: ne Afakena mo, susu iti fafoderi. Evetu genembo mendeni era, nendae aji sise, natofokena eminge sedo ghuseri, “Namane Jusi embori; ava sedo, namanenda geka ningivu! O Iesu da natofu da geka jo ningae areva,” aminge sedo ghusera ava, na kasama erena. Avata geka bekári: evetu genembo resena amo, ne Satan da mendeniri.

<sup>10</sup> Erama dubo mema oroko nembo fururari itatamareva aindae, oju eove! Geka evia ningivu! Nenda fakina dere gari dae sedo, nenda nano namendi ava, Satan da mendeniimi bu ya diburada fitarera. Dara resena emo, sifo isambu ghabu sovenisoveni ainda jokáda itatamururovo ya dadabarira. Ne nandae sise ambari dae oju jo ae areva amo, na jebuga evovodae irari da koana, kotofu da kekesa da kaugo ava, nemokena mutono bu asugareva. Koanaá mave bu

<sup>1</sup> 2:1: Afige, buku javo **Amboda Sirorarira** 1:20 ainda duruda tege garesa. <sup>8</sup> 2:8: Afige, buku javo **Amboda Sirorarira** 1:20 ainda duruda tege garesa.

asugarira amo, nu jebuga evovodae irari ava tuve barira.

<sup>11</sup> “Asisi Kakara rea ekaresiakena+ resira ava, ningi gogoghombevu!

“Mave nandae sedo isoro use, gitofu de atai duboda fati fetarira amo, sifo amboda furarira aminda, jo sekago ambudo, ainda mema itatamae arira,”  
Iesu aminge sisira.

*2:12-17 Iesu Tumondari+ Embo Pergamas Aminda Iriara Aikena, Bajari Iesu Geka Sisira.*

<sup>12</sup> Aminge sedo, Iesu sekago namokena sisira, “Ekaresia+ reighi Pergamas aminda irira, ainda aghi katokena<sup>12</sup> gembu mutu yari, nune budo osa sirurari ningore! Genembo nunda békada ghe kaiya buvudo irira aimi, nemokena geke evia resira. Kaiya resena emo, ambo a dombu dika vanembori.

<sup>13</sup> Reighi Pergamas aminda ireva amo, ne Satan da vasa beká aminda irá gheraeva, ava kasama erena. A na kasama erena: ne namo tumonduse, na jo ighagha aeri. Satan da vasa daba aminda, Satan da mendeniimi nanda saramana kato Antipas detero ambududurusira. Ainda sifoda, na jo ighagha ae usevu.

<sup>14</sup> Avata ne dara eni emingeraeva. Nenda mendeni, Balaam rea ijugusira, ava eraera. Balaam resena emo, nu Israel embo da gitofu Balak sonembuse emboro ijugetiri, Balak nu eredo Israel embo deretiri, ne kombo yagera edo ghuseri, a ove da dombuda tumonde bainghuse, bayau joba fitido, ava bu mindido ghuseri.

<sup>15</sup> Kau daba aminga ava, nenda jokáda, evetu genembo mendeni mo, Nicolas nunda ambo jimbide rea ijugeraera ava, tumonduse eraera. Ava na imboe erena.

<sup>16</sup> Nenda ari ekoko resena emo, vujegedo doyaeva! Jo amingae areva amo, na bibitai yama, kaiya nanda

békada ghe buvudo irira eimi, evetu genembo aikena isoro arena.

<sup>17</sup> “Asisi Kakara rea ekaresiakena+ resira ava, ningi gogoghombevu!

“Mave nandae sedo isoro use, gitofu de atai duboda fati fetarira amo, na numokena, bayau eveva javo ‘mena’<sup>17</sup> jungetiri oroko God da vasa aminda irira ava, mutono barira. A eni mo: na numokena ghamana foyago, ainda tamonda javo seka gembero irira ábarago, mutono barira. Javo amo, mave ghamanaá barira, ainembo kasama arira.”  
Iesu aminge sisira.

*2:18-29 Iesu Tumondari+ Embo Taiyataira Aminda Iriara Aikena, Bajari Iesu Geka Sisira.*

<sup>18</sup> Aminge sedo, sekago namokena sisira, “Ekaresia+ reighi Taiyataira aminda irera, ainda aghi katokena<sup>18</sup> gembu mutu yari, nune budo osa sirurari ningore! Geka emo, God da Mandi nane resena. Nanda diti mo, avaraka bubura da kaugori, a nanda ata barago, kau auri avarakada ingero avi kokoigo edo tiritaragheraira, ainda kaugori. Aimi nane resena.

<sup>19</sup> Ne rea eraeva, ava na kasama erena. Ne kau nange dubo buraeva, tumonderaeva, kavevera eraeva, a durumuguse irá gheraeva amo, na giraena. Giti, ari resena emo, ne itako edo ghusevu. Oroko, ne e gogoghomberaeva.

<sup>20</sup> Avata ne dara emingeraeva: evetu eni Jezebel nenda jokáda gungubo sise, ‘Na God da ferovetari,’ seraira avata, ne nu jo buregae eraeva. Nu nanda dorevarekena dengoro induduse dedeuse irira. Nu seari kombo yagera eraera, a nu seari, evetu genembo mendeni ove da dombuda tumonde bainghuse, bayau joba fitiraera ava bu mindiraera.

<sup>12</sup> **2:12:** Afige, buku javo **Amboda Sirorarira** 1:20 ainda duruda tege garesa. <sup>17</sup> **2:17:** Afige, buku javo **John Kakara** 6:49 ainda duruda tege garesa. <sup>18</sup> **2:18:** Afige, buku javo **Amboda Sirorarira** 1:20 ainda duruda tege garesa.

<sup>21</sup> Nunda ari ekoko dodo, dubo jovereghare dae sedo, goroto futuseni. Avata nu kombo yagera dodo, namokena jovereghe furari imboe usira.

<sup>22</sup> Ava sedo, na saono, Jezebel nunda kombo yagera kakato ainde dabade, mema tomanako itatamara. Nenda ari ekoko jo vujegae arera amo, na oroko amingarena.

<sup>23</sup> Nunda ambo jimbi barago, daono sirivo arera. Amingururono gido, nanda ekaresia+ isambu evia kasama arera: evetu genembo nenda dubo jokáda rea koteraera, a uju eraera ava, na kasama erena. Ne rea eraeva, aminda kasama use, mino inononda nemokena mutarena.

<sup>24</sup> “Avata ne natofo mendeni, Jezebel da geke eko jo tumondae usevu. Nunda geke eni aindae, evetu genembo mendeni ne, amo Satan da geke jungarida bekáva seraera. Avata nunda geke amo, ne jo ningi tumondae ireva. A Satan da kasama jungarida ava, ne jo bae ireva. Amo evevari. Avori, saramana tomanako eni jo mutono ae areva. Ne saramana dabako evia use irovo, na jovereghe furarena. Amo eviri.

<sup>25</sup> Nenda tumondari kau mavega eraeva amo, aminguse irareva. Nenda tumondari ava kaifa use irovo dae resena.

<sup>26-27</sup> “Mave nandae sedo isoro use, gitofu de atai duboda fati fetarira, a nanda uju vanembo use iria, sifo gombuda tano arira amo, avori, na numokena fakina mutarena. God Afa fakina namokena futusira aindae fakina kau daba ava, numokena mutarena. Na ketua auriimi ari ava, numokena mutono bu jighirise, nunda oro oro enda eminda irera ava, nune kaifa arira. Kau okia fugeoro du de bejeraira aminga ava, nu natofo ekoko aikená arira. Amo, nenda fakina ava nune de bejarira.

<sup>28</sup> A eni mo: na numokena sifo da saura aindae usasa ava mutono

barira.

<sup>29</sup> “Avori, Asisi Kakara rea ekaresiakena+ resira ava, ningi gogoghombevu!” aminge sisira.

### 3

*3:1-6 Iesu Tumondari+ Embo Sardis Aminda Iriara Aikena, Bajari Iesu Geke Sisira.*

<sup>1</sup> Aminge sedo, Iesu sekago namokena sisira, “Ekaresia+ reighi Sardis aminda irira, aindae aghi katokena<sup>1</sup> gembu mutu yari, nune budo osa sirurari ningore! Genembo mave God da Asisi 7<sup>1</sup> bu jighirira, a kotugo damana 7 ava bu jighirira amo, namori. Na nemokena geke evia resena. Ne rea eraeva amo, na kasama erena. Evetu genembo ne jebuga iririá seraera. Avata nenda janje jokáda mo, ne anakora ambududurusevu.

<sup>2</sup> Ava sedo, diti fangevu! Nenda jebuga itako irira ava kaifa use, unduvu bajare! Erá doyeóvo ambeure! Ne rea edo ghuseva a eraeva amo, jo inono iraeri. Amo, ne nanda God da dombuda kosasagheraeva.

<sup>3</sup> Ava sedo, giti rea ijugero gosuseva, a kau nange ningido aminguseva ava kotise, sekago kau daba ava areva. Ava jo kotae areva amo, na tafasara kato ufena foa gheraira aindae kaugo ava edo, nemokena yarena. Nanda furari sifo ava kotae irareva amo, na foa buvono dudukughareva.

<sup>4</sup> O ne reighi Sardis aminda ireva aindae jokáda, evetu genembo daba daba nemokena eminge resena. Satan ne derari dae usira avata, ne jo gofae usevu. Amo, kau genembo tauyada fetedo ise, nunda tamo asugari erá fororo eure dae sise kaka eraira aminga ava, nenda dubo joká erama ari ekoimi sembae eure dae sise, ne kaifa eraeva. Ne sifo amboda tamo asugari foyagoimi asugaovo, namonde deingharera. Aindae tuka

<sup>1</sup> 3:1: Afige, buku javo **Amboda Sirorarira** 1:20 aindae duruda tege garesa. <sup>1</sup> 3:1: ‘God da Asisi’ resira emo, Asisi Kakara aindae resira.



mo: ne e gogoghombuse, inononda ireva.

<sup>5</sup> “Mave nandae sedo isoro use, gitofu de atai duboda fati fetarira amo, na tamo asugari foyago emo budo, numokena asugarena. Kotugo nunda javo, jebuga evovodae irari da buku ainda jokáda gembero irira, ábarago na jo ghajae arena. A kotugo, nu nanda tofo edo irira ava, na God Afa a nunda aneya isambu da dombuda fetedo ijuguse, isagha sirurono ningarera.

<sup>6</sup> “Avori, Asisi Kakara rea ekaresiakena+ resira ava, ningi gogoghombevu!” aminge sisira.

*3:7-13 Iesu Tumondari+ Embo Filadelfia Aminda Iriara Aikena, Bajari Iesu Geka Sisira.*

<sup>7</sup> Aminge sedo, Iesu sekago namokena sisira, “Ekaresia+ reighi Filadelfia aminda irira, ainda aghi katokena<sup>7</sup> gembu mutu yari, nune budo osa sirurari ningore! Genembo kakara, a geka beká ainda susu mo, namori. Na nemokena geka evia resena. David da ki (key) ava nane bu jighirenere. Ki (key) resena emo, David da fakinadae resena. David nu fakina use, God da natofo kaifa edo ghusira. Ainda fakina ava budo, na God da natofo kaifa use irena. Na aminguse, jebuga evovodae irari da emboro afigarena amo, mave jo foa gajae arira. O gajarena ábarago, mave jo foa afigae arira.

<sup>8</sup> Ne rea eraeva amo, na eregosena. Na kasama erena: nemokena fakina itako irira, a na rea ijugusena ava, ningi tumonduse amingeraeva; ne na jo ighagha ae usevu. Avori, na nandae emboro afiguseni. Emboro amo, mave jo foa gajae arira.

<sup>9</sup> Kote givu! Na kasama erena: evetu genembo mendeni era, gungubo sise eminge siseri, ‘Namane Jusi embori. Ava sedo, namanda geka ningivu!’ aminge siseri. Avata geka bekári: nemo Satan da mendeniri. Avori, na saono

gungubo kakatoá ya buvudo, nenda ata duruda tumonde bainghururoro gareva. Nanda natofo, na nemoá dubo buraena. Ava ijugururono, gungubo kakato amo nemokena gogoghombuse kasama arera.

<sup>10</sup> Ne fakina edo durumuguse, nanda geka kaifa aovo dae sisena ava, ne e gogoghombedo ghusevu. Ava sedo, na sonembururono, sifo amboda dara endada sirorarira ava, ne jo itatamae areva. Dara resena emo, evetu genembo isasambu endada irera ava dere gari dae sedo, sirorarira.

<sup>11</sup> Avori, na totoi nemokena yarena. Tumondari a geka nemokena irira ava, kaifa e gogoghombevu, erá nenda mino, koana kau kekesa da kaugo baeteva ava, kosasagheóvo mendeni beore dae sise resena!

<sup>12</sup> “Mave nandae sedo isoro use, gitofu de atai duboda fati fetarira amo, nu nanda God da Kambo+ ainda tutumbidae bu darono, fetirise ivuga arira. Aminguse, evovodae aminda irarira. Na nunda tamonda, javo etodaba naká gembarena. Eni mo, nanda God da javo ava gembarena. A eni mo, God da reighi seka, Jerusalem utu ominda God kena ghedo vose furarira, ainda javo barago nunda tamonda gembarena. A kotugo, tofo nanda javo seka ábarago nunda tamonda gembarena.

<sup>13</sup> “Avori, Asisi Kakara rea ekaresiakena+ resira ava, ningi gogoghombevu!” aminge sisira.

*3:14-22 Iesu Tumondari+ Embo Reighi Leodisia Aminda Iriara Aikena, Bajari Iesu Geka Sisira.*

<sup>14</sup> Aminge sedo, Iesu sekago namokena sisira, “Ekaresia+ reighi Leodisia aminda irira, ainda aghi katokena<sup>14</sup> gembu mutu yari, nune budo osa sirurari ningore! Geka beká da susu, a God da Aghi Kato geka beká seraira amo, namori. A kotugo, roera

<sup>7</sup> 3:7: Afige, buku javo **Amboda Sirorarira** 1:20 ainda duruda tege garesa. <sup>14</sup> 3:14: Afige, buku javo **Amboda Sirorarira** 1:20 ainda duruda tege garesa.

isambu God etiri sirorusira ainda susu mo, namori. Na nemokena geke evia resena.

<sup>15-16</sup> Na nenda ari kasama erena. Evetu genembo mendeni na kotise, imboe eraera. A kotugo, evetu genembo mendeni namo kotise, dubo joveregheari na dubo buraera. Ne soroda fetireva. Ne kau mavegori? Ne na tumondari da kaugo use ireva, avata na jo dubo bu gogoghombae eraeva. Ne kau uvu jo vevera beká irae, a kotugo jo jama beká irae, ainda kaugori. A kotugo, kau genembo eni dubo saghurreari uvu vevera o uvu jama uju eraira aminga ava, ne na kotise iraetevu, o na imboe edo doyaetevu. Avata ne jo amingae eraeva. Ava sedo, kau genembo setena amo, nu uvu yuvayuva mindi kosiva eraira aminga ava, na ne kosiva aono, vose tefo areva.

<sup>17</sup> Ne bunise, 'Namane susu iti fafoderi. Namane inono bekári,' seraeva. Avata geke bekári: nemo makasi embori, tamo asugari tefo a, diti tefori.

<sup>18</sup> Na nemokena eminge resena: moni da susu, auri 'gold' seraera amo, namokena irira. Jo roera enighae baingoro edo iraeri, 'gold' bekári. Ava namokena ombu budo, guguade aovo dae sise resena. Erá meka geove dae sedo, tamo asugari foyago, namokena ombu asugevu! Diti eveva are dae sedo, fiyogha ombudo, ditida fitido gareva.

<sup>19</sup> Evetu genembo mavejoá dubo buraena amo, na nemokena dombuda sise, ari dambu aore dae sise deraena. Durumuguse, dubo jovereghari nenda ari ekoko vujegedo dovú!

<sup>20</sup> "Avari, kote givu! Na guro békada fete goingoingheraena. Ni nanda beka ningido, guro afigaresa amo, na nimokena teredo, nangae kirumo dabade use irarera.

<sup>21</sup> Na giti isoro use, gitofu de atai duboda fati feteteno, God Afa setiri numokena viti nangae irise, nunda kini (king) da avo anumba aminda

anumbedo kotofuko useni.

"Kau daba aminga ava, mave nandae sise isoro use, gitofu de atai duboda fati fetarira amo, na saono nu viti nanda kini (king) da avo anumba aminda anumbedo, numbarago kotofuko arira.

<sup>22</sup> "Avari, Asisi Kakara rea ekaresiakena+ resira ava, ningi gogoghombevu!" aminge sisira.

## 4

### *4:1-11 God Nunda Avo Anumba Aminda Anumbiriri, John Gosusira.*

<sup>1</sup> Iesu aminge setiri dadabetiri ainda amboda, na utu aminda guro afigedo iriri sekago ditii mokoi goseno, beka tavuya da dukago giti setiri niningusena aimi, sekago namokena siri nininguseni, "Eminda namokena viti fu! Rea amboda sirorarira ava, ijugaono gase!" aminge siri

<sup>2</sup> ainghae dabade, Asisi Kakara namokena vose asugusira. Asugeti, utu aminda, kini (king) da avo anumba fetiriri gosuseni. A kotugo, aminda mave enii anumbiriri gosuseni.

<sup>3</sup> Nunda dombu kau avaraka da serigo beká ava jaraghusira. A kotugo, taraufo, katiki tamo avavagai avo anumba aminda dari birurughedo iriri gosuseni.

<sup>4</sup> Avo anumba amo, soroda fefetusira. Avo anumba mindafu soroda fefetusira resena ava, avo anumba veveyako 24 aimi jimbe birurughusira. Avo anumba 24 aminda, babojegari 24 tamo asugari foyago asugedo, koana eni kekesa avavaga asugedo anumbirero gosuseni.

<sup>5</sup> Avo anumba soroda fefetusira, aminda ghe biria tarighedo, barara fugutiri gosuseni. Avo anumba ainda dombuda, arivo 7 ava injibetero jaraghiri gosuseni. Arivo 7 resena emo, God da Asisi<sup>5</sup> 7 ri.

<sup>6</sup> A kotugo, avo anumba da dombukena, roera eni gosusena

<sup>5</sup> 4:5: 'God da Asisi 7' resira emo, Asisi Kakara aindae resira.

amo, ainda gari kau uvu bogu teria da kaugori. Avata aminda, uvu beká tefori, gharita (glass) da kaugo ava gosuseni. Avo anumba ainda dombukena, ambokena, a dengesi sovenisoveni aminda, God da serubim<sup>6</sup> avononde naká ava fefetuseri. Serubim resena emo, dombukena a ambokena, nenda diti digariri.

<sup>7</sup> Ne jo dombu dabako iraeri. Eninda dombu mo, kau raiyoni (lion) da dombugori. Eninda dombu mo, kau burumakava (bull) seka fumbari ainda dombugori. Eninda dombu mo, kau genembo da dombugori. A eninda dombu mo, kau riduna da dombugori.

<sup>8</sup> Serubim avononde resena emo, nenda ghabu isambu 6, kau rika da ghabugori. Ghabu jokakena a fokakena mo, diti digariri. Avori, serubim resena emo, ne evovodae sifo tumba evia inono, eminge sise yaru divuraera:

“Bajari God Fakina Kato, nu kakara, kakara, a kakara bekári.

Nu irei, irira, a kotugo evovodae irarira,”

aminge sise yaru divuraera.

<sup>9</sup> Aminguse, ne, mave avo anumba soroda anumbirira a evovodae irarira aikena, duro mutari dae sise, numo kakara ari dae sise, a numokena aiyakoe sari dae sise, yaru divuraera.

<sup>10</sup> Amingurureoro, babojegari 24 setena aimi, mave avo anumbada anumbirira ainda ata duruda, du fafaseraera. Aminguse, mave evovodae irira aikena tumonde baingheraera. A nenda koana eni, kau kekesa avavaga setena amo, nunda avo anumba ainda dombuda fugeoro voseraira. Fugutuse, ne eminge seraera:

<sup>11</sup> “Arie, namanenda Bajari a God! Ni seteso roera isasambu sirorusira.

Ni uju eteso, siroredo jebuga irira.

Aindae sedo, usasa, duro, a fakina, mutoro nine baresa amo, inonori!”  
aminge seraera.

## 5

*5:1-14 Sifi Da Mandi (Lamb) Aimi Fira Fefa Bondoghae Ava, Nune Afigusira.*

<sup>1</sup> Ainda amboda, na goseno, mave avo anumba aminda anumbirisira aimi, fefa bondoghae jighiriri gosuseni. Fefa bondoghae resena emo, sovenisoveni gembu ruvedo, finje 7 aimi békada fiti fatero takegha usira.

<sup>2</sup> Ava gosuse, na aneya fakina kato eni gosuseni. Nu beka teria siri nininguseni, “Mave inono irarira ai ya, fefa bondoghae omo budo, finje fefa békada fiti fatero takegha usira ovia, jighi afigaeti?” aminge sisira.

<sup>3</sup> Setiri, fefa bondoghae ovia mave afigaetira aindae sedo, genembo o aneya fakina eni utuda, endada, a enda jokáda tava useri. Avata mave eni jo tambaeri. Mave jo fefa ruvusera ava afigedo, joká gari da kaugo iraeri.

<sup>4</sup> Mave eni jo tambae irero aindae, na sorara janjagughae useni.

<sup>5</sup> Amingeno gido, babojegari 24 setena, ainda eniimi namokena sisira, “Erá sorara eose! Diti fainghe gi! Raiyoni (lion) eregosesa omo, nu Judah ondi da eniri, a kotugo David da imendi tomanako eniri. Nu isoro use, fakina edo gitofu da fakina ava de bejisira. Ava sedo, nu fefa bondoghae budo, finje fefa békada fiti fatero takegha usira ava, jighi afigarikena inonori,” aminge sisira.

<sup>6</sup> Aminge siri nininguse, na sino fuka sifi (sheep) seraera, ainda Mandi (Lamb) eni fetiriri gosuseni. Nu avo anumba a serubim avononde naká ainda soroda, a kotugo babojegari 24 ainda soroda fetiriri gosuseni. Sifi da Mandi resena ava gosuse kotisena amo, nu daoro

<sup>6</sup> **4:6:** John nu taká *jebuga irari kakato* ava gefusira. Nenda kau ava ijugetiri tege gido, Ezekiel 10:14 aminda serubim dae gefusira ava kotise, namane *serubim* eminda gefuseri.

ambudo iria edo, aimi foa buvariá kotiseni. Sifi da Mandi amo, nunda kore isambu 7 ri. A kotugo, nunda diti barago 7 ri. Diti 7 ainda tuka mo: God da Asisi 7<sup>6</sup> ava, nune dirigetiri enda eminda reighi isasambuda isera amo, nemori.

<sup>7</sup> Sifi da Mandiá, nu ira, mave avo anumba aminda anumbirisira aikena buvudo, fefa bondoghae nunda ungo gimandui bu jighirisira ava, nune bu fefetusira.

<sup>8</sup> Amingiri, serubim avononde naká a babojegari 24, ne Sifi da Mandi ainda ata duruda du fafasuseri. Nenda gitá (guitar) a rooro auri 'gold' imi ari ava budo, eminguseri. Rooro resena ainda jokáda, yabiyabina vendido dungetero avisira. Yabiyabina da imbosi vivitiri gosusena amo, inono, God da natofo nenda banungariri.

<sup>9-10</sup> Avori, ne isambu du fafause, Sifi da Mandi aikena yaru seka eminge didivero nininguseni:

“Ni inono ava sedo, fefa bondoghae finje békada fiti fatero takegha usira amo, nine jighi afgaresa.

Ainda beká mo: ni detero ambududurusesi. Ambudo ninda ambariimi,

evetu genembo God dae sedo ofusesi.

Evetu genembo resera emo, ne oro oro isambu, geka isambu, a natofo isasambu ainda jokáda siroruseri.

Evetu genembo tamo yaghogo, ingago, a foyago, ava nine ofusesi.

Ni evetu genembo amo, unumbe bu tatedo seteso, ne namondeda God da saramana ari dae sedo nunda fristi+ useri.

A kotugo, ne amboda jovereghe endada vose ya, kokotofu edo enda omo nene kaifa arera.

Ava sedo, fefaé nine budo békada finje fatari evia, nine jighi afgaresa amo, avori,”

<sup>11</sup> Aminge setero dadabetiri, na diti fange goseno, aneya digari

ambari, jo tegari da kaugo irae aimi, yaru didivero nininguseni. Avo anumba soroda fetiriri, serubim avononde naká ainda dengesida fete birurughuseri. Serubim ainda gukakena, babojegari 24 aimi fete birurughuseri. Ainda gukakena, aneya digari setena aimi totorugedo, ne isambu dabade jimbe birurughuseri.

<sup>12</sup> Edo yaru beka teriango fuge eminge didivero nininguseni:

“Sifi da Mandi detero ambududurusira amo, nu inono bekári.

Ava sedo, fakina, gugua, dubo kotari, duro, usasa, a sakai sari isambu mutoro nune bare!”

aminge didivero nininguseni.

<sup>13</sup> Ainda amboda, roera utuda, endada, enda jokáda, a evada, isasambu yaru didivero nininguseni. Aneya, sukaru, evetu genembo, sino fuka a oka, roera jebuga irira, isasambu aimi, yaru eminge sise didivero nininguseni:

“Mave kini (king) da avo anumbada anumbirira aikena, a Sifi da Mandi aikena,

sakai sari, duro, usasa, a fakina evovodae irare dae sise resera!”

aminge sise didivero,

<sup>14</sup> serubim avononde naká aimi, “Ai, bekári! +” siseri. Setero, babojegari 24 aimi du fafasedo tumonde bainghuseri.

## 6

### *6:1-17 Finje 6 Ava Jighi Afigusira.*

<sup>1</sup> Ainda amboda, Sifi da Mandi aimi ere finje dabako ava jighi afigetiri, serubim avononde setena ainda eniimi, giti eredo beka teria koko barara fugariguse, “Fu!” sisira.

<sup>2</sup> Aminge setiri, hosi (horse) eni foyago beká ava fira buvurutiri gosuseni. Genembo eni hosi ainda gukada anumbiriri gosuseni. Genembo amo, nu feva ungoi bu jighiriri gosuseni. Numokena koana eni, kotofu da kekesa avavaga mutero bu

<sup>6</sup> 5:6: 'God da Asisi 7' resira emo, Asisi Kakara aindae resira.

karigha gambudo, nunda gitofu dari dae isira.

<sup>3</sup> Iri, Sifi da Mandi finje eni ava jighi afigusira amo, ira etoto naká usira. Afigetiri, serubim eni eretiri ira etoto naká usira aimi, geka eminge siri nininguseni, “Fu!”

<sup>4</sup> Aminge setiri, hosi (horse) eni kokoigoimi fira buvurutiri gosuseni. Genembo eni hosi ainda gukada anumbiriri gosuseni. Genembo aikena sari, evetu genembo isoro edo tofo tofo de sirivo ari da fakina ava futuseri. Futuse, kaiya teria ava numokena mutero rurusira.

<sup>5</sup> Ainda amboda, Sifi da Mandi finje eni ava jighi afigusira amo, ira finje etodaba naká usira. Afigetiri, serubim eni eretiri ira etodaba naká usira aimi, eminge siri nininguseni, “Fu!” setiri, hosi (horse) eni ingago aimi fira buvurutiri gosuseni. Genembo eni hosi (horse) ainda gukada anumbirise, bouvu inono ari kato (scales) ava bu jighiriri gosuseni.

<sup>6</sup> Goseno, serubim avononde ainda jokáda, beka eminge siri nininguseni, “Raisi (rice) doghari dabako, ainda mino+ viti K10.00 arira. O ambe doghari kitako, ainda mino+ viti K10.00 arira. Avata usu da muka ainda mino, a vaini (wine) da mino jo vitae arira,” aminge sisira.

<sup>7</sup> Ainda amboda, Sifi da Mandi finje eni ava jighi afigusira amo, ira finje avononde naká usira. Afigetiri, serubim avononde setena, ainda ambo nemboimi eminge siri nininguseni, “Fu!”

<sup>8</sup> Setiri, hosi (horse) eni tamo esago aimi fira buvurutiri gosuseni. Genembo hosi ainda gukada anumbiriri gosusena, ainda javo mo ‘Ambariri’. A Ambari da amboda genembo eni firi gosusena, ainda javo mo ‘Ofofori’. Ambari nengae Ofofoghae, nemokena fakina mutero ruruseri. Evetu genembo isambu endada irera ava gategaoro, ya diti avononde naká fetoro, diti eni ava budo daoro amboro dae sedo nemokena fakina futuseri. Amo, ne saoro, isoro, baimara, taono furari budo sirivo

ururoro, a sino fuka ekoko, nombura avavagaimi foama gambari sirivo arera. Ainda fakina ava mutero, Ambari nengae Ofofo ghae ruruseri.

<sup>9</sup> Avori, amboda, Sifi da Mandi finje eni ava jighi afigusira amo, ira finje ghabu soveni usira. Afigetiri, na olta (altar) duruda evetu genembo mendeni da asisi ava gosuseni. Evetu genembo amo, ne God da Geka ava osa sise, nunda saramana e gogoghombetero gido, aindae gitofuimi era ne detero sirivo useri.

<sup>10</sup> Ne eminge koko siseri, “Bajari, ni Fakina Katori! Mave eni jo nimgo iraeri! Ni kakarari, a ni geka beká vanembo seraesa. Ni nanjigo vose yama, evetu genembo endada irera aikena, bekáda bekáda ategi edo, namanenda ambari da mino mutaresi?” aminge setero dadabetiri,

<sup>11</sup> God nemokena tamo asugari foyago mutudo sisira, “Kaifa ururuvu! Gitofuimi nenda nano namendi mendeni daoro sirivo ururoro, nanda natofo nanjigo nanda javoda amboro dae anakora gategusena ava ya tambarira amo, na vose ya evetu genembo endada irera ava, ategi use nenda mino arena,” aminge sisira.

<sup>12</sup> Ainda amboda, Sifi da Mandi, finje ghabu soveni dabako ava afigiri gosuseni. Etiri, dumo eko beká javi iri enda daraghetiri, iji jovereghedo ingavayago beká ava usira. A inua jovereghedo, kokoigo beká edo ororogo usira.

<sup>13</sup> Kau yaurai foa vaivai jajo-vari vose fafaseraira aminga ava, damana utuda ghe dore, endada vovosiri gosuseni.

<sup>14</sup> A kotugo, kau namonde ghaito gaghe bu darigeraera aminga ava, God setiri utu manjisira. Manjetiri, enda da doriri a butu isambu gígisedo iseri.

<sup>15</sup> Ava gido, enda da kini, kokotofu, isoro embo da babojegari, evetu genembo babaimi, susu iti fafode, a evetu genembo isasambu ainde

dabade era doriri da beku jokáda a ghamana duruda jungutuseri.

<sup>16</sup> Amingedo, doriri a ghamanakena kori eminge siseri, “Fu, namanenda etoda du gagara ase! Mave avo anumbada anumbirira, a Sifi da Mandi, nenda janje ekoko erá namanekena ijugeóro mema itatameore dae sise, fu, namanenda etoda du, namane gagara ase!

<sup>17</sup> Ainda susu mo: nenda janje ekoko da sifo ojira buvira. Ava sedo, nenda dombuda mave jo fetae arira,” aminge siseri.

## 7

*7:1-8 Jusi Embo 144,000 Ainda Dombuda, Aneya Mendeni Ne Faiya Gefuse, God Da Tano Fifituseri.*

<sup>1</sup> Ainda amboda, na aneya avononde gosuseni. Ne iji vitarikena, iji vosarikena, foriforimanakena, a yavatakena aminda fetedo, yaura da toka ava gajetero, ika isambu, enda a eva isambu, yaura jo bae ero gosuseni.

<sup>2</sup> God nu anakora aneya avononde aikena, enda a evakena mema mutari da fakina ava futusira. Ainda amboda, aneya eni mo, iji vitarikena ghe fira buvurutiri gosuseni. Buvudo, aneya avononde aikena sisira,

<sup>3</sup> “Enda, eva, a ikamanekena, mema erá muteove! Namane giti God da saramana kakato da dombuda, faiya gefuse God da tano fitoro dadabari gido, amboda ne mema mutareva.

<sup>4</sup> Israel embo da oro oro isambu ainda jokáda, evetu genembo mendeni budo, nenda dombuda God da tano fifituseri. Evetu genembo nanjogo God da tano rurusera, ava sero nininguseni. Evetu genembo amo, isambu 144,000, nenda dombuda God da tano fifituseri.

<sup>5</sup> Judah ondi mo, isambu 12,000 ri. Reuben ondi mo, isambu 12,000 ri. Gad ondi mo, isambu 12,000 ri.

<sup>6</sup> Asher ondi mo, isambu 12,000 ri. Naphtali ondi mo, isambu 12,000 ri. Manasseh ondi mo, isambu 12,000 ri.

<sup>7</sup> Simeon ondi mo, isambu 12,000 ri. Levi ondi+ mo, isambu 12,000 ri. Issachar ondi mo, isambu 12,000 ri.

<sup>8</sup> Zebulun ondi mo, isambu 12,000 ri. Joseph ondi mo, isambu 12,000 ri. Benjamin ondi mo, isambu 12,000 ri. Israel embo isambu 144,000 aimi, nene God da tano amo ruruseri.

*7:9-17 Evetu Genembo Digari, God Afa A Sifi Da Mandi Aikena Totoruguseri.*

<sup>9</sup> Ainda amboda, na fuge evetu genembo digari, jo tegari da kaugo irae ava gosuseni. Tamo ingago mendeni, yaghogo mendeni, foyago mendeni, a oro nunda nunda mendeni, reighi nunda nunda a geke isambu ainda mendeni aimi fera, avo anumba a Sifi da Mandi ainda dombuda totoruguseri. Ne tamo asugari foyago ava asedo, oibo ungoi bu fetirero gosuseni.

<sup>10</sup> Aminda fetirise, beka mindafu koko sise, eminge siseri, “Namanenda sonemba mo, God avo anumbada anumbirira a Sifi da Mandi, aikena ghedo furureari buraera.”

<sup>11</sup> Aminge setero, God da avo anumba avo, serubim avononde a babojegari 24 soroda fetetero aneya totorugusera amo, isambu fokakena fete jimbe birurughedo, nemonde dabade avo anumba da dombuda du fafasedo, God tumonde bainghuseri.

<sup>12</sup> Bainghuse, “Ai, bekári!+ Sakai sari, usasa, dubo kotari, a fakina isambu God kena evovodae irare! A kotugo, numokena aiyakoe sise, kakara use irarera, evovodae! Ai, bekári!+” aminge siseri.

<sup>13</sup> Setero, babojegari 24 setena, ainda eni namokena ategi usira, “Evetu genembo tamo asugari foyago asugedo irera emo, ne mavejori, a reda ghe fuseri?” aminge setiri,

<sup>14</sup> na siseni, “Bajari, na erebunena. Ni kasama eresa. Ava sedo, nine se ningone!” aminge seteno, nu sisira, “Evetu genembo eregosesa emo, ne mema tomanako avo itatamuse irero dadabetiri, ne ainda jokáda ghe buvudo fuseri. Ne, nenda tamo asugari avo, Sifi da Mandi ainda ororoimi

seghetero foyago usira. Amo, ne Iesu da ororoimi, nenda ari ekoko seghe fugetero, eveva useri.

<sup>15</sup> Ne aindae sedo, God da avo anumba ainda dombuda fetirise, sifo tumba evia inono, ne numoá tumonde bainghuse, nunda saramana eraera. Amingurureoro, God nu nemonde irise, ne tavo eraira.

<sup>16</sup> Ne jo sekago bayaudae baimara gae arera, a uvudae dubo saghae arira. A kotugo amboda, ne iji da veveraimi jo avari itatamae arera, a vevera eni barago jo itatamae arera.

<sup>17</sup> Ainda beká mo: Sifi da Mandi avo anumba ainda soroda fetirira aimi, tofo mandi nenda kaifa kato edo, ne unumbedo bu ya uvu iju-garira. Uvu resena emo, kau eni bekári. Mave mindarira amo, jebuga evovodae irari ava tuve barira. A kotugo, God nenda jivu ava, nune ghajarira,” aminge sisira.

## 8

### *8:1-5 Sifi Da Mandi, Nu Finje Ambo Bekáda Ava Jighi Afigusira.*

<sup>1</sup> Ainda amboda, Sifi da Mandi finje ambo bekáda ava jighi afigetiri, utu aminda beka a javi dotutusira. Dotiri, iji goroto soveni taukaka (one half hour) sembu darigetiri

<sup>2</sup> ainda amboda, na, aneya 7 ava God da dombuda fetirero gosuseni. Tavuya nemokena inononda mutero ruruseri.

<sup>3</sup> A kotugo, aneya eni yabiyabina da rooro ava bu jighiriri gosuseni. Yabiyabina da rooro resena emo, nu auri ‘gold’ imi ariri. Avori, aneya aimi eredo ira, olta (altar) da dombuda fefetusira. Olta (altar) amo, God da dombuda irira. Amo auri ‘gold’ imi ariri. Aneya aikena yabiyabina teria futusera ava nune budo, God da natofo isambu nenda banungarighae dabade bu tatedo, oltada dungari avare dae sedo, aneyakena futuseri.

<sup>4</sup> Mutero budo, dungetiri avíri, nunda ungodá ghe yabiyabina da

imbosi a God da natofo nenda banungari ainghae dabade tate vivitusira, God da dombuda.

<sup>5</sup> Vivitiri, aneya amo, olta (altar) da avaraka mendeni budo, yabiyabina da rooro aminda vendido fugetiri endada duduriri, biria tarighuse barara fugutusira. Amingetiri, enda daradaraghúsira.

### *8:6–9:21 Tavuya Fusiseri.*

<sup>6</sup> Etiri, aneya 7 setena aimi, nenda tavuya fusari dae kato useri.

<sup>7</sup> Aminguse, nenda eni tuturo edo, nunda tavuya fusisira. Fusetiri, borija yaura, aisi (ice) da kaugo, ‘hail’ seraera ava, avarakaghæ ororo ainde dabade tatedo endada vovosusira. Aimi vosedo, roera endada ireira ava, diti etodaba gatege fitido, diti etoto dodo, diti eni amo gambu avisira. Roera resena emo, enda diti eni gambu avisira, ika diti eni gambu avisira, a eke kikisa isambu gambu avisira.

<sup>8</sup> Dadabetiri, aneya eni ira etoto naká usira aimi, nunda tavuya fusisira. Fusetiri, roera eni, kau doriri mindafu aminga ava, avaraka aminda gambu aviri, sofughe budo fugetero, ira evada tifughúsira. Etiri, eva diti etodaba naká sarige ira fefetusira, eni jovereghedo ororo usira.

<sup>9</sup> Amingetiri, eva da oka, bangu, a roera, diti eni gategetero sirivo usira. Amingetiri, diti etoto naká fefetuseri. A ghaka+ evada sufusira, diti eni gategetero beje vovosusira. Amingetiri, diti etoto naká fefetuseri.

<sup>10</sup> Dadabetiri, aneya eni ira etodaba naká usira aimi, nunda tavuya fusetiri, damana tomanako arivo da kaugo utuda avise, jaraghuse ireira ava, donembe vose fira, uvu a uvu da doin aminda dorusira. Detiri, uvu resena emo, uvu diti etodaba naká sarige fefetusira, ainda eni ava jovereghedo, dokegha beká usira.

<sup>11</sup> (Damana setena ainda javo beká mo, ‘Dokeghari’.) Uvu ava dokegha etiri, evetu genembo digari ava mindido sirivo useri.

12 Dadabetiri, aneya eni ira avononde naká usira aimi, nunda tavuya fusetiri, iji da usasa, inua da usasa, a damana da usasa ava sarigedo, diti etodaba naká usira, ainda diti eni jo janimbae usira. A kotugo, sifo dabako ainda jokáda, usasa diti etodaba naká gategusera ava, dabako jo usasa ae usira. A kotugo, tumba dabako ainda jokáda, inua a damana da usasa ainda diti etodaba naká gategusera ava, dabako jo usasa ae usira.

13 Amingiri goseno, riduna eniimi iká bekáda ghufuse, beka tomanako eminge siri nininguseni, “Dara! Amo taká dara bekári! Dara teria beká endada sirorarira. Amo, aneya etodaba naká tavuya jo fusae irera. Nene fusarera amo, evetu genembo endada irera aikená, dara a dubo mema teria beká ava sirorarira,” aminge sisira.

## 9

1 Aminge setiri, aneya eni ira ghabu soveni usira aimi, nunda tavuya fusionsira. Fusiri ainghae dabade, damana eni donembe vose fira endada du fasetiri gosuseni. Bako tomanako da guro ainda ki (key) ava, damana aikená mutero rurusira.

2 Budo, nu bako ainda guro afigetiri, imbosí fira buvurutusira. Imbosí amo, nu inono yaumo fuge dungari da kaugo usira. Imbosí aimi, viti iji a utu gajetiri reighi itumu usira.

3 Imbosí ainda jokáda ghe, sisi beje buvudo, endada vose fuseri. Sisi aikená, enda da begara da fakina avavaga mutero ruseri.

4 Kikisa, eke, bayau, vive, a ika ainda igi, erá dereore dae siseri. A evetu genembo maveda dombuda faiyaimi gembudo God da tano fi-fitusera, nemokena mema erá mutore dae siseri. O evetu genembo mendenikena, God nunda tano jo mutae usira, nemokena sisi aimi mema mutore dae siseri.

5 Avata aminge sise, erama evetu genembo amo gambeóro ambeore

dae sise bureguseri. Tambuno ghabu soveni ainda jokáda, kau enda da begara gambeoro mema itatameraera aminga ava, sisiimi gamboro mema itatamururoro ya dadabarira.

6 Tambuno ghabu soveni resena, ainda jokáda, evetu genembo daba aimi mema teria futo itatame bune Jaredo, ambari dae uju arera. Avata ambari mo, ne kakage dodo yarira.

7 Sisi resena, ainda gari kau mo, hosi (horse) da kaugori. Isoro ari dae use, hosi gogho eraera, ainda kaugori. Kokotofu da koana kau kekesa avavaga, sisi da jiroda asugetero iriri gosuseni. Kekesa amo, auri ‘gold’ imi ariri. Sisi ainda dombu mo, kau evetu genembo da dombu da kaugori.

8 A nenda beo yaforeghaeri. Nenda dika mo, raiyoni (lion) da dikagori.

9 Karigha auri aiyan (iron) imi ari ava asugetero, yafakoda fasiriri gosuseni. Ne javi edo ghumbari dae usira amo, nenda ghabu javi mo inono, hosiimi isoro da ghaka+ dighi bu jufureari javi eraira, ainda dukagori.

10 Nenda jimbi gorobaghaeri. Aimi gayarira amo, enda da begaraimi gambeari mema itatameraera, kau daba avori. Tambuno ghabu soveni setena ainda jokáda, nenda jimbi da goroba aimi, evetu genembokena mema mutarera.

11 Sisi resena, ainda kini (king) barago iriri gosuseni. Numo aneya eniri. Nu bako tomanako ainda bajariri. Nunda javo mo, Jusi embo da gekai ‘Abaddon’ seraera, a Greek embo da gekai ‘Apollyon’ seraera. Ainda tuka mo, namondeda gekaimi ‘Dari Sirivo Ari Kato’ seraera.

12 Dara etodaba sirorarira ava, riduna aimi sisira, eni evia dadabetira. Etoto amboda furarira.

13 Ainda amboda, aneya eni ira ghabu soveni dabako usira aimi, nunda tavuya fusionsira. Avori, olta (altar) God da dombuda fetirira setena amo, ainda tingú avononde



naká aminda nunda goroba mendo avononde viti fetirira. Aneya tavuya fusetiri, olta (altar) da goroba avononde naká ainda jokáda, beka siri nininguseni.

<sup>14</sup> Aneya oroko nembo nunda tavuya fusariá setena aikena, beka eminge siri nininguseni, “Yasi, uvu tomanako javo Yufretis aminda, aneya avononde naká bundetero irera, ava vujegase!” aminge sisira.

<sup>15</sup> Setiri, nu eredo ira ne vujegusira. God nu kotise, aneya evia sifo goroto daba eindae gateguse simbugusira. Nu ghaeko jokáda, tambuno eni gatededo, tambuno einda jokáda sifo eni gatededo, sifo einda jokáda sifo goroto daba evia gategusira. Aneya avononde naká setena amo, evetu genembo mendeni daoro sirivo aoro dae sedo, aneya giti setena aimi ne vujegusira. Evetu genembo resena emo, evetu genembo endada irera, ne gategaoro diti etodaba fetarera. Avori, diti dabako ava, aneyaimi daoro sirivo aoro dae sedo sisira.

<sup>16</sup> Isoro kakato nanjogo hosida viti anumbedo fusera amo, isambu 200 million.

<sup>17</sup> A kotugo, nenda gari mo, kau emingori. Ne isambu karigha asugetero yafakoda fasiriri gosuseni. Karigha nunda kau mo, kokoigo, gorerago, a kafuru tamo ava gosuseni. Hosi (horse) da jiro mo, kau raiyoni (lion) da jirogori. Hosi (horse) da békada ghe avaraka bubura, imbosi a nunda masaghae ava buvurutusira.

<sup>18</sup> Avaraka bubura, imbosi a nunda masaghae dabade aimi, evetu genembo diti eni setena amo, detiri sirivo useri.

<sup>19</sup> Hosi (horse) setena amo, nenda fakina mo, beka a jimbi jokáda irira. Nenda beka ekori, bekaimi mema muturaira. Kotugo, nenda jimbi barago ekori, aimi mema muturaira. Hosi (horse) da jimbi mo, jingabu da kaugori. Aimi, evetu genembokena mema muturaera.

<sup>20</sup> Avori, isoro kakato aimi eredo,

evetu genembo diti dabako setena ava, nene detero sirivo useri. Natofu diti etoto naká dubo mema a ambari darigusera amo, ne jo dubo jovereghaeri. Nenda roera totofo etero sirorusira, a nenda ove totofo kevusera amo, jo itako doyaeri. Amo, ne sukaru a nenda ove kevari ava tumonde bainghedo ghuse iriara ava, jo itako doyaeri. Ove resena emo, ne auri, ghamana, a ika aimi keve simbuguseri. Ava sedo, aikena jebuga eni tefori. Ne ditiimi jo gae eraera, dengoroimi jo ningae eraera, a ataimi jo ya foa ghae eraera. Avata evetu genembo amo, nenda ove da dombuda tumonde bainghuse iriari. Aminguse irero, nenda kokomana sirivo etero gosusera avata, nenda ari sembae jo itako doyaeri.

<sup>21</sup> A nenda ari ekoko mendeni jo vujegedo doyaeri. Ari ekoko resena amo eviri. Ne evetu genembo deoro ambudo ghuseri, kae jighido simbora edo ghuseri, kombo yagera edo ghuseri, bagia a tafasara edo ghuseri. Ne ari ava jo vujegedo doyaeri.

## 10

*10:1-11 Aneya Eniimi Fira Fefa Bondoghae Mutiri, John Budo Risira.*

<sup>1</sup> Ainda amboda, na aneya fakina kato eni utuda ghe vose firi gosuseni. Nu foroga aimi doghetiri, taraufu nunda jiroda dari birurughetiri gosuseni. Nunda dombu mo, kau iji da kau aminga ava janimbusira. Nunda ata kau avaraka da bubura dambu vitiraira, ainda kaugo ava gosuseni.

<sup>2</sup> Nu fefa bondoghae kitako afige jighiriri gosuseni. Nu vose fira, ata gimandui evada fefetuse, ata umbefui endada fefetusira.

<sup>3</sup> Fetedo, nu beka teria, kau raiyoni (lion) da beka duka avavagai kori sisira. Kori setiri, barara 7 aimi minonda duka teria beká ava fugutusira.

<sup>4</sup> Etiri dadabetiri, bararaimi rea sisira ava, gembari dae eno, beka eni utuda ghe eminge siri nininguseni,

“Barara 7 siri ningesa amo, kivo aresa. Erá gembeose!” aminge sisira.

<sup>5</sup> Setiri dadabetiri, aneya vose fira evada a endada fefetusira amo, ungo gimandui ikáda jighiri eretiri,

<sup>6</sup> eminge sisira, “God evovodae irira aimi, nune setiri roera isasambu sirorusira, utuda, endada, a evada. God ainda javoda eminge resena. Sifo buvira! Jo kaifa ae arera!”

<sup>7</sup> Aneya ambo nembo nunda tavuya fusarira amo, God nunda kotari giti kivo usira ava, sari sirorarira. Nunda kotari emo, anakora nunda ferovetakena osa setiri niningusera ava, oroko sari sirorarira,” aminge sisira.

<sup>8</sup> Setiri dadabetiri, beka sekago namokena utuda ghe eminge siri nininguseni, “John, aneya evada a endada fetirira omo, eregosesa? Yasi, fefa bondoghae afige jighirira, ava base!” aminge setiri ningido,

<sup>9</sup> na ena aneyakena fefa bondoghae kitako ava mutari bari dae seteno, nu namokena sisira, “Bu mindi! Bu mindaresa amo, janje gharigharira. O vose ya tininda fasarira amo, yaya dokegha arira,” aminge sisira.

<sup>10</sup> Setiri, fefa bondoghae kitako ava budo riseni. Bu rise, nu rea sisira ava, itatamuseni. Reno janje gharighuse, vosira tininda fasusira amo, yaya dokegha beká ava usira.

<sup>11</sup> Amingetiri, aneya daba aimi sekago namokena sisira, “Ni sekago feroveta edo, roera amboda sirorarira ava, osa saresa. Amo, ni oro nunda nunda, reighi nunda nunda, geka nunda nunda, a kini (king) mendeni mendeni aikena, rea sirorari itatamarera ava, nine osa siruraso ningarera,” aminge sisira.

## 11

*11:1-14 Gegenembo Etoto Naká Aimi, God Da Geka Osa Siseri.*

<sup>1</sup> Ainda amboda, mave fira buvudo, inono fiti bari kato eni, kau

ambí da kaugo, ava namokena futuse sisira, “Ere yasi, God da Kambo+ a olta (altar) ava inono edo base! A evetu genembo nanjogo aminda banunguse irera, ábarago tege gi!

<sup>2</sup> Avata God da Kambo+ ainda atu a dendegu ava, erá inono fiti beose! Ainda beká mo: God tambuno 42 ainda jokáda vasa amo nunda gitofudae mutari, nene vasa aminda dighi anumbarera. Amo, ne God da reighi kakara ava sosighi edo tambuno 42 ainda jokáda nenda uju ava arera.

<sup>3</sup> Na saono, nanda osa sari kakato etoto naká bohora gae asugarera. Asugedo, ne ya endada buvudo, evetu genembokena, God nu rejo amboda arira ava, osa siruroro, sifo isambu 1,260 ava dadabarira, tambuno 42 setena, daba avori.” aminge sisira.

<sup>4</sup> Osa sari kakato etoto setena amo, nengae ika orivi etoto a nanefa etoto naká, enda ainda Bajari da dombuda fetirera, oviri.

<sup>5</sup> Osa sari kakato etoto ainda beka jokáda ghe avaraka foa buvarira. Aimi, nenda gitofu daoro ambarera. Ava sedo, mave eredo nemo-keno mema mutari dae arira amo, avaraka setena aimi, nenda békada ghe foa buvudo avari ambarira.

<sup>6</sup> Osa sari kakato aikena fakina dombu eni dombu eni ava irira. Ne saoro, borija gajedo irari, God da geka saoro ya dadabarira. Nenda fakina eni mo: reda ya simbora arera amo, uvu doin reda ghe refira, aminda ghe jovereghedo ororo jinarira. A eni mo: ne uju arera amo, saoro taono dombu eni dombu eni sirorarira.

<sup>7</sup> Avori, osa sari kakato amo, ne God da geka setero dadabetiri ainda amboda, roera eni, kau sino fuka da kaugo, bako tomanako setena aminda ghe viti firi gosuseni. Nu viti fira, reighi tomanako Bajari arafa dorusera aminda, isoro edo osa sari kakato etoto naká ava detiri,

<sup>8</sup> emboro dengesida ambu fafasuseri. Kasia sise, reighi resena ainda javo mo, Sodom o Egypt ser-aera.

9 Reighi isasambu ainda oro oro isambu ainda mendeni, tamo yaghogo, ingago, a foyago, ne isambu osa sari kakato etoto naká ava erá bu ya furugeóro dae sise bureguseri. Nenda tamo fasiriri gosero, sifo etodaba naká a sifo eni atedo ira isonga usira.

10 Osa sari kakato amo, nengae jebuga irise, natofo endada irera aikena, mema futusera ava sedo, ne ambero gido, natofo isambu ivuga use minonde minonde joba futuseri.

11 Amingero, sifo 3 1/2 setena amo dadabetiri, God nunda jebugai fusetiri, osa sari kakato amo jebugedo ere fefetuseri. Ere fefetero gido, evetu genembo isambu oju use beka dadabusira.

12 Etero, beka mindafu utuda ghe, osa sari kakato etoto naká aikena, “Eminda viti fuvu!” sisira. Setiri, foroga jokáda teredo utuda vivitero, nenda gitofu gosuseri.

13 Gosero ainghae dabade, dumo teria beka ava sufiri enda daradaraghusira. Amingiri reighi tomanako aminda kambo digari ava dumoimi jighi gofetiri,<sup>13</sup> evetu genembo 7,000 ava sirivo useri. Evetu genembo jebuga fefetusera aimi isambu, ava gido dudukughedo oju edo, God utuda irira aikena sakai siseri.

14 Dara etodaba sirorarira ava, riduna aimi sisira. Eni etiri dadabusira. A kotugo, eni etiri dadabetira. Avata givu! Dara eni oroko buvari dae erira!

### *11:15-19 Aneya Amboda Nemboimi, Nunda Tavuya Fusisira.*

15 Ainda amboda, aneya amboda nemboimi nunda tavuya fusetiri, utuda beka teria ava sero nininguseni, “Oroko namondeda Bajari a nunda Genembo Keriso ghae enda da fakina evia nene budo, nene enda evovodae kaifa use irarera.”

13 **11:13:** Tamo foyago da gekaimi resira amo, reighi aminda kambo isambu *one tenth* gofaetira. Ava sedo 10 iratira amo, dabako gofaetira, o 100 iratira amo, 10 gofaetira, avavagori. **1-18 12::** Duregon mo, nombura teria eko eni ghabughae ghumburaera, ainda kaugori.

16 Aminge setero, babojegari 24 God da dombuda irera aimi, nenda kokotofu da avo anumbada ghe eredo, God da dombuda dudo tumonde bainghuse,

17 eminge siseri: “God namanenda Bajari Fakina Kato, ni giti beka iriasi, a oroko iresa.

Namane nimokena aiyakoe resera. Ainda beka mo: ninda fakinaimi, tuturo edo enda kaifa eresa.

18 Ninda sifo foa buvari dae usira aindae, ninda gitofu janje ekoko useri.

Ninda sifo eminda, ni janje eko use, ambari embo isambu, beka beka beka ategi aresa.

A oroko sifo eminda, feroveta ninda saramana edo ghusera, aikena mino eveva mutaresa.

A kotugo, ninda natofo kokotofu a sabua isambukena mino eveva mutaresa.

Avata sifo daba eminda, evetu genembo mendeni enda bu sembaeda fitiraera amo, nine daso sirivo arera,”

aminge setero dadabusira.

19 Dadabetiri, God da Kambo+ utuda irira ainda guro afigetiri, mauva eni isagha usira. God da Geka numokena ya buvari da emboro+ ijugeraira ava, mauva ainda jokáda irira. Mauva ava isagha etiri gosuseri. Ainda amboda, biria taritarighedo barara fugetiri, dumo sufiri enda daradaraghusira. Amingedo, borija yaura, aisi (ice) da kaugo, ava vovosusira.

## **12**

### *12:1-18 Evetu Nengae Duregon (Dragon) 1-18 Ghae Da Kikiri.*

1 Ainda amboda, na tano tomanako eni jo gae iriana ava, utuda isagha etiri gosuseni. Amo, na evetu ava gosuseni. Nunda embo mo, ijiri. Inua mo, nunda ata fetariri.

Nunda koana kau kotofu da kekesa aminga ava jiroda asugusira. Kekesa amo, damana 12 aimi ariri.

<sup>2</sup> Evetuá mandi sasingu fumbari dae use, mema saviri koko sisira.

<sup>3</sup> Amingiri, roera eni na jo gae iriana amo, kau nombura avavagai, utuda isagha etiri gosuseni. Nombura resena emo, tamo kokoigo a teria bekári. Nunda jiro isambu 7, a nunda kore isambu ghabu sovenisoveniri. Nunda jiro isambu aminda, nu koana kau kotofu da kekesa avavaga asugetiri gosuseni.

<sup>4</sup> Nombura amo, utu da damana diti etodaba ava gategetero fetetiri, nu diti eni ava nunda jimbiimi asuge fugetiri endada vovosusira. Amingedo, nu endada vose fra, evetu ainda dombuda fefetusira. Fetedo, mandi fumbarira ava mindari dae sedo, kato usira.

<sup>5</sup> Kato iri, evetuá mandi fufusira. Mandi resena emo, nu siroredo, natofo endada irera isambu ava, nune kaifa arira. Ketua auriimi ari ava budo ise aimi, evetu genembo kaifa arira. Nombura mandia mindari dae kotisira avata, God setiri nunda mendeni mandia saghimbe budo God kena era buvudo, nunda kotofu da avo anumba aminda fifituseri, God da dombuda.

<sup>6</sup> Amingero, evetuá eredo, uvu a evetu genembo irae da vasa aminda sumbudo isira. Vasa resena emo, God anakora nundae sedo esimbugusira. Nu aminda sumbudo isira. Vasa aminda, nu tavo ururoro sifo 1,260 ava dadabarira.

<sup>7</sup> Avori, utu aminda isoro bejisira. Amo, aneya da kotofu Michael nunda aneya mendeninde dabade soveni fetetero, nombura nunda sukarude dabade soveni fetedo, isoro useri.

<sup>8</sup> Isoro edo, Michael nunda aneyade eredo, nombura nunda sukarude ava dedo katiyavara edo, utuda jo irae aoro dae siseri.

<sup>9</sup> Aminguse, Michael nunda aneyade dabade, nombura ava utuda ghe fugetero, nunda sukarude dabade endada vovosuseri. Nom-

bura resena emo, jingabu giti beká dara usira, a kotugo, natofo derairira amo, nu daba avori. Nunda javo mo, Satan ri.

<sup>10</sup> Amingiri, na beka mindafu utuda eminge siri nininguseni, “Oroko God da Sonemba ojira buvira. God nu kini (king) edo, nunda fakina ijugetiri isagha erira. A God nunda Genembo Keriso dirigetiri fusira amo, numbarago nunda fakina ijugetiri isagha erira. Eminge isagha erira. Nu nombura setena ava, utuda ghe fugetiri vovoserira. Nombura amo, nu sifo tumba ava inono, God da dombuda fetirise, God nunda natofo imboe are dae sedo, nenda ari ekoko ava isagha sise fetirá ghedo gharira. Avata oroko emo, nu fugetero utuda ghe vosetira.

<sup>11</sup> Namondeda nano namendi, Sifi da Mandi da ororo aimi, a nunda geka beká ne osa sedo ghusera aimi, fakina edo nomburade isoro edo, de atai fati fefetuseri. Ne Iesu da javoda ambari dae jo oju aeri.

<sup>12</sup> Avori, utu nimokena resena. Ni ivuga aresa. A kotugo, ne mave utuda ireva, nembarago ivuga areva. Ainda beká mo: Satan oroko ne dotira. Avata enda a eva nemokena resena. Darakoé rejo budo, ne mema itatamarevu! Ainda beká mo: Satan nemokena vosetirare! Nu kasama erira, nunda sifo tufako etira. Ava sedo, nu janje eko beká ava erira,” beka utuda aminge setiri ningeno dadabusira.

<sup>13</sup> Numoá utuda ghe endada fugetero gido, nombura aimi eredo, evetu mandi fufusira ava sandari dae sedo, nunda amboda isira.

<sup>14</sup> Avata God evetuá reighi uvu a evetu genembo iraeda vasa aminda ghumbu yare dae sedo, ghabu kau riduna da avavaga mutero rurusira. Evetuá ya vasa aminda buvari, nu tavo ururoro sifo 1,260 dadabarira.

<sup>15</sup> Avori, evetuá sufiri, nombura aimi beka angedo kosiva etiri, uvu usegha buvurusira. Evetu ava bu sivare dae sedo, amingusira.

<sup>16</sup> Avata evetuá endaimi sonembuse enda beka angetiri, uvu usegha

aminda vose ira dadabusira.

<sup>17</sup> Amingetiri, nombura nu evetu aikena dubo eko beká ava usira. Amingedo, evetu ainda imemesiri mendenikena isoro ari dae sedo isira. Evetu resena, ainda imemesiri mo, mave God da Geka nininguse, nunda uju ava use irera, a Geka Beká Iesu fira osa sisira ava, tumonduse kaifa use irera amo, nemori. Nombura amo nemokena isoro ari dae sedo, eredo isira.

<sup>18</sup> Ira, eva tinguda buvu fefetusira.

## 13

### *13:1-18 Sino Fuka Etoto Naká Dara Usera Ainda Kikiri.*

<sup>1</sup> Ainda amboda, sino fuka eko eni evada ghe fira vivitiri gosuseni. Nunda kore isambu ghabu sovenisoveni, a nunda jiro isambu 7 ri. Nunda kore isambu ghabu sovenisoveni aminda, koana kau kotofu da kekesa avavaga asugedo iriri gosuseni. A nunda jiroda, javo eni gembiri iriri gosuseni. Javo aimi, God da javo eko eraira.

<sup>2</sup> Sino fuka resena emo, nunda gari kau mo, fusi (cat) tomanako eni refadi (leopard) seraera, ainda kaugori. Nunda ata mo, kau sino fuka eni bea (bear) seraera, ainda atagori. Nunda beka mo, kau raiyoni (lion) da bekagori. Avori, nombura aimi eredo, nunda fakina, nunda kini (king) da avo anumba, a nunda kotofu da tano sino fuka aikena mutiri rurusira.

<sup>3</sup> Sino fuka da jiro 7 ainda eni ava detero, ambari dae uroghe edo jebugusira. Ava gido, natofo endada iriara isambu, dudukughe oju edo, sino fuka ainda amboda amboda iseri.

<sup>4</sup> A kotugo, evetu genembo isambu, nombura ava tumonde bainghedo ghuseri. Ainda susu mo: nunda fakina sino fuka aikena futusira. Sino fuka ábarago tumonde bainghedo ghuseri. Aminguse, siseri, “Mave jo sino fuka ainda inono ae arira. Mave enii nu jo gisae arira,” aminge sedo ghuseri.

<sup>5</sup> Nombura aimi sonemburureari, sino fuka resena emo, eredo nunda javo tofo jigheari erorureari, God da javo ava eko edo ghusira. Sifo aminda, God nu sino fuka amo jo buregae dotiri, nu fakina edo, enda nune kaifa iri, tambuno 42 ava dadabusira.

<sup>6</sup> Tambuno 42 resena ainda jokáda, sino fuka amo tuturo edo, God a nunda javo, kotugo nunda irari vasa, a nunda natofo utuda irera, aindae jijivu sedo ghusira.

<sup>7</sup> God sino fuka amo jo buregae iriri, aimi eredo God da natofo-kená isoro edo detiri sirivo useri. Sirivo etero, nu oro oro isambu tamo ingago, yaghogo, foyago, a reighi isambu da geka ainda kotofuko nune usira.

<sup>8</sup> Sifo aminda, evetu genembo endada irarera aimi, mokogo sino fuka ava tumonde bainghedo gharera. O evetu genembo mendeni, jo sino fukaá tumonde bainghae arera. God nu enda jo sari sirorae iriri, evetu genembo resena ainda javo ava, Sifi da Mandi setena, ainda buku jokáda gefusira. Buku resena emo, Jebuga Evovodae Irari da Bukuri. Evetu genembo emo, ne kikiako God tumonduse, sino fukaá jo tumonde bainghae arera.

<sup>9</sup> “Geka evia kote gogoghombevu!

<sup>10</sup> Ni diburada teraso dae sedo gategusera amo, ni amingaresa, jo darigae areasa.

Ni kaiyaimi daoro ambaso dae sedo gategusera amo, ni kaiyaimi daoro ambaresa, jo darigae areasa.

Geka emo fakaragori. Ava kotise, God da natofo tumo fainghedo durumuguse,

God tumonde gogoghombuse irarera.”

<sup>11</sup> Avori, ainda amboda, sino fuka eni, endada ghe vivitiri gosuseni. Nunda kore etoto nakári. Ainda gari kau mo, sifi da mamandi da koregori. Nunda beka sisira da duka mo, kau nombura beka seari ningido ghusena, daba avori.

<sup>12</sup> Sino fuka aimi eredo, sino fuka giti ambari dae uroghe edo jebugusira, ainda dombuda fefetusira. Nunda dombuda fetirise, nunda javoda a nunda fakinaimi saramana urureari, natofo isambu nunda geke ningido ghuseri. Nu seari natofo endada iriara isasambu, sino fuka giti ambari dae uroghe edo jebugusira ava, tumonde bainghedo ghuseri.

<sup>13</sup> Sino fuka endada ghe vivitusira aimi, nune tano mendeni mendeni eari evetu genembo ne jo gae iriara ava, aminda gido ghuseri. Nu evetu genembo isambu da dombuda fetedo setiri, avaraka utuda ghe endada vose fusira.

<sup>14</sup> God nu jo buregae iriri, nu evetu genembo dederuse, sino fuka ambari dae uroghe edo jebugusira ainda dombuda, tano mendeni mendeni eari natofo gido ghuseri. Aminguse, nu setiri evetu genembo isambu eredo ove kevuseri. Ove resena emo, sino fuka giti kaiyaimi jetero ambari dae uroghe edo jebugusira, ainda kaugo ava kevuseri.

<sup>15</sup> Etero dadabetiri, God jo buregae iriri, sino fuka endada ghe vivitusira aimi, ghamo aseguse yaura fusise jebuga mutiri, ove amo javi javi use, jebuga iriri da kaugo usira. Ava edo, ove aimi beka sise, evetu genembo mendeni detiri sirivo useri. Mave oveá jo tumonde bainghae usera amo, ove aimi eredo detiri sirivo useri.

<sup>16</sup> Eni mo: sino fuka amboda endada ghe vivitusira aimi setiri, evetu genembo isasambu nunda tano ava ruruseri. Evetu genembo susu iti fafode a makasi embo, kokotofu a sabua, ne isasambu tano ava ruruseri. Tano resena emo, faiyaimi evetu genembo da dombuda o ungod gembarera.

<sup>17</sup> Mave tanoá jo bae arira amo, nu bisnis (business) jo ae arira, roera eni jo ombae arira a jo oriro ae arira. Tano amo: sino fuka ainda javo a ainda tegari da tanori.

<sup>18</sup> Geke emo jo totoi kasama ari da

kaugo iraeri. Avata ni dubo kotaresa amo, ni sino fuka da tegari da tano ainda tuka kasama aresa. Ainda tuka mo: tegari da tano mo, genembo da javokena seraera. Tegari da tano amo, 666 ri.

## 14

*14:1-5 Evetu Genembo Mendeni God Da Dombuda Fetedo, Yaru Seka Ava Didivuseri.*

<sup>1</sup> Ainda amboda, Sifi da Mandi amo, doriri Saion+ aminda evetu genembo mendeni ainde dabade fetiriri gosuseni. (Sifi da Mandi mo, na Iesu dae resena.) Evetu genembo digari, 144,000 ava gosuseni. Nenda dombuda, Sifi da Mandi da javo a nunda Numamo da javo gembero iriri gosuseni.

<sup>2</sup> Goseno, beka eni utuda ghe siri nininguseni. Beka amo teria beká, kau usegha da kaugo, a kau barara fugeraira, ainda kaugori. Avata garigo bekári. Kau feku o gitá (guitar) da kaugori.

<sup>3-4</sup> Evetu genembo 144,000 resena emo, ne avo anumba kotugo serubim avononde naká a babojegari aimi nenda dombuda fiti fetirero gosuseni. Aminda fetirise, yaru seka ava didivuseri. Yaru amo, jo evetu genembo isambu endada irera aimi, kasama edo divari da kaugo iraeri. Evetu genembo yaru ava divarera amo, ne evevetude jo avae eraera. Ne sifo ghousa Sifi da Mandi de dabade deingheraera. God nemo, natofo endada irera ainda jokáda ofusira. Ne giti beká, God a Sifi da Mandi da natofo nene useri.

<sup>5</sup> Ne gungubo eni jo siruroro ningae eraera. A ne ari ekoko tefori.

*14:6-13 Aneya Etodabai Fera, Dara Sirorarira, Ainda Bino Ava Osa Siseri.*

<sup>6</sup> Ainda amboda, aneya eni iká bekáda ghufiri gosuseni. Bino Eveva evovodae irarira ava, bu firi gosuseni. Bino amo, evetu genembo isambukena, oro oro isambukena, geke isambukena, a natofo isambukena osa sari dae sedo, budo

fusira. Tamo ingago, foyago, a yaghogo, isambu ningoro dae sedo, bu fusira.

<sup>7</sup>Fira buvudo, beka mindafu sisira, “Ategi da Sifo buviro! God oroko evetu genembo bekáda bekáda ategi arira. Ava sedo, God kakara use, nundae oju evu! Nu teria beká gido, nundae sakai sevu! Numoá tumonde bainghevu! Nu setiri utu, enda, eva, a uvu da doin sirorusira; ava sedo, numoá tumonde bainghevu!” aminge sisira.

<sup>8</sup>Setiri, aneya eni nunda amboda fira buvudo sisira, “Duriro! Reighi tomanako Babylon, makoede duriri dadabetira! Kau evetu eko komana da genemboghae yagera ari dae sedo, genemboá dereraira aminga ava, reighi Babylon da babojegari oro oro isambukena dereoro nenda geke ningido ari ekoko edo ghuseri,” aminge sisira.

<sup>9</sup>Aneya etoto naká geke aminge setero dadabetiri, ainda amboda, aneya eni fira buvudo, beka teria eminge sisira, “Mave nu sino fuka a kotugo sino fuka da ove tumonde bainghuse, ‘avori’ sedo, sino fuka da tano nunda ungodá o dombuda barira amo,

<sup>10</sup>nu God da janje eko ava nune itatamarira. Kotugo, evetu genembo God da janje eko resena evia itatamarera amo, ne mema teria ambari eko ava itatamarera. Ne God da aneya kakara ainda dombuda, a Sifi da Mandi ainda dombuda mema itatamururoro garera. Mema itatamarera amo, ne avaraka imo kaeghae ainda jokáda irise, imbosi masa eko beká ava fufuse mema itatamarera.

<sup>11</sup>Ne sino fukakena a sino fuka ainda ovekena tumonde bainghuse, nunda tano ruruseri. Ava sedo, avaraka jokáda, evovodae mema itatamuse irarera. A kotugo, avaraka ainda imbosi sifo tumba evia inono vivituse, evovodae irarira aimi, nemokena mema mutarira,” aneya aminge setiri dadabusira.

<sup>12</sup>Geka emo fakaragori. Ava kotise, God da natofo mave nunda

geke ningido, nunda uju ava use, Iesu tumonderaera amo, ne tumo fainghedo durumuguse God tumonde gogoghombuse irarera.

<sup>13</sup>Amboda, na beka eni utuda ghe eminge siri nininguseni, “Geka evia gembu! Orokoá tano etira. Oroko evetu genembo mave Bajari da saramana use ambududurudo yarera amo, ne ivuga arera,” aminge setiri dadabusira. Kotugo, Asisi Kakara sonembedo geke daba ava sise, eminge sisira, “Ai, geke bekári! Bajari da natofo oroko ambududurudo yarera amo, ne ivuga beká ava arera. Ainda beká mo: ne janjagu dodo jangutarera. Amo, nenda saramana da mino budo, ya jangutarera,” aminge sisira.

*14:14-20 Bajari Evetu Genembo Ekoko Ava Ategi Ari Dae Sedo, Setiri Nunda Aneya Era Bariseri.*

<sup>14</sup>Ainda amboda, genembo da kaugo ava fuge gosuseni. Genembo amo, koana kau kotofu da kekesa avavaga auri ‘gold’ imi ari ava asugedo, kaiya mendo birurughari a dika ambari ava ungoi bu jighirise, forogada anumbiriri gosuseni. Foroga amo foyago bekári.

<sup>15</sup>Avori, amboda aneya eni God da Kamboda+ ghe fira buvudo, forogada anumbirisira aikena, beka mindafu eminge sisira, “Kaiya budo vareda yasi, bayau bambase! Ghaeko da sifo buvira! Endada bayau beká etira!” aminge sisira.

<sup>16</sup>Setiri, forogada anumbirisira aimi eredo, kaiyai endada afe jetiri, beká isambu ghasaghe vovosusira.

<sup>17</sup>Etiri dadabetiri, aneya eni ábarago, kaiya mendo birurughari a dika ambari ava bu jighirise, God da Kamboda+ ghe fira buvurutiri gosuseni.

<sup>18</sup>Aneya amo buviri, aneya eni avaraka kaifa eraira amo, nu olta (altar) da ghe fira buvurutiri gosuseni. Nu, aneya kaiya bu jighirise nunda dombuda God da Kamboda+ ghe fira buvurutusira aikena, beka mindafu sise, eminge sisira, “Ninda kaiya bu

yasi, asi vuji da vare enda aminda, asi vuji isambu divase! Ainda beká mo: asi vuji beká etira! Sifo buvira!” aminge setiri,

<sup>19</sup> aneya nu asi vuji ava, kaiyai divedo God da ivi aminda fugetiri vosetiri fati sifuseri. (God da ivi resena ainda tuka mo: kasia sise, God nunda janje eko ijugari da vasa aindae, ivi siseri. A asi vuji fati simbari sisera amo, evetu genembo ekoko aindae siseri.)

<sup>20</sup> Ivi resena emo, reighi tinguda fefetusira. Vuji fatero ororo ava, kau usegha buvarigusira. Usegha buvarigedo isira ainda ghousa mo, 320 kirometa (kilometres), a gaunghe fefetusira da kafuru mo, genembo vose daiva ariri.

## 15

*15:1-8 Aneya 7 Aimi Mema Mendeni Mendeni Budo Fera, Isagha Useri.*

<sup>1</sup> Ainda amboda, roera tomanako eni na jo gae iriana ava, utuda siroretiri gido, dudukughuseni. Aneya 7 aimi, nene dara a mema daba daba nemo inono ava bu fera isagha etero gosuseni. Dara a mema giti setena foa dadabari, dara a mema resena emo, amboda beká sirorarira. Sirore ya dadabururari, God da janje eko ainghae dabade ya dadabarira.

<sup>2</sup> Aneya isagha etero gosusena ainda amboda, na uvu bogu teria eni ava gosuseni. Avata amo jo uvu beká iraeri. Nunda gari mo, kau gharita (glass) avarakaghae bagega ari da kaugori. Evetu genembo mendeni, uvu bogu ainda tinguda fetirero gosuseni. Evetu genembo resena emo, isoro edo, sino fuka eko nunda oveghae ava de atai fati fefetuseri. A kotugo, fakina edo, nunda javo tegari da tano ava, ne jo bae useri. Ne sino fuka nunda mendeninde dabade isoro use, God jo ighagha ae etero gido, God nemo-kena gitá (guitar) mutiri bu jighirise, uvu bogu teria ainda tinguda fetirero gosuseni.

<sup>3</sup> God da saramana kato Moses da yaru, a Sifi da Mandi da yaru ava, didivero niningusena amo, eviri:

“Arie, God, namanenda Bajari Fakina Kato,

ni rea eteso sirorusira amo, teriago a numo bekári.

Reighi isasambu ainda kotofuko nimori. Ninda ari isambu, dambu a bekáda bekáda er- aesa.

Ni evetu genembo bekáda bekáda ategi use, mino muturaesa.

<sup>4</sup> Ava sedo, evetu genembo isambu nindae oju use ni kakara arera.

Namane isambu nindae sakai sarera.

Nisuka nimoá kakara bekári. Evetu genembo isambu jo kakara iraeri.

Ni ari dambu a bekáda bekáda er- aesa.

Ava sedo, reighi isambu foa buvudo, ni tumonde baingharera.”

<sup>5</sup> Ainda amboda, utu aminda God da Kambo+ afigedo iriri gosuseni. Kambo jokáda, na God da dobo ava gosuseni. Dobo ainda tuka mo eviri: namonde dobo ava gido, God nu irira ava kasama eraera.

<sup>6</sup> Aneya 7 dara a mema budo fusera amo, ne God da Kambo+ ainda jokáda ghe fera buvurutero gosuseni. Nenda tamo asugari amo, foyago beká aimi asugetero tiritaraghusira. Roera eni tasoso avavaga asugetero, viti fira yafakoda fasusira amo, beragha, auri ‘gold’ imi ariri.

<sup>7</sup> Etiri, serubim avononde setena, ainda eni eredo aimi, aneya 7 resena eikena, rooro 7 tevo da kakaugo, auri ‘gold’ imi ariri, ava futusira. Roro resena ainda jokáda, God evovoda irira aimi, nunda janje eko averegetiri vose rooro amo bedo usira.

<sup>8</sup> Roro amo mutiri bero, God da usasa a fakina, kau imbosi da kaugo aimi, vose God da Kambo+ amo bedo usira. Bedo etiri, evetu genembo a aneya God da Kamboda+ terari buniseri. Aneya 7 aimi, rooroá budo averegaoro, dara sirorari dadabari



ainda amboda, sekago foa God da Kambo+ aminda terarera.

## 16

*16:1-21 Aneya 7 Aimi, God Da Janje Eko Rooro Jokáda Ava Budo Era, Endada Averegetero Vovosusira.*

<sup>1</sup> Ainda amboda, aneya 7 aikena beka tomanako God da Kambo+ joká aminda ghe siri nininguseni, “Ere yasivu, rooro 7 ava averegaovo, God da janje eko endada vosare!” aminge setiri dadabusira.

<sup>2</sup> Dadabetiri, aneya eni eredo ira, tuturo edo nunda rooro endada averegetiri vovosusira. Vosetiri, evetu genembo mave sino fuka da ove setena ava, tumonde bainghedo ghusera a sino fuka da tano rusera ainda tamonda, bedo a gambisi sirorusira.

<sup>3</sup> Amingetiri, aneya eni ira etoto naká usira aimi eredo, ira nunda rooro evada averegetiri vovosusira. Vosetiri, eva jovereghe ambari embo da ororo avaga usira. Etiri, oka, bangu, a eva da roera isambu sirivo useri.

<sup>4</sup> Etiri, aneya eni ira etodaba naká usira aimi eredo, ira nunda rooro ava uvu da doin a uvu isambu aminda averegetiri vovosusira. Vosetiri, uvu isambu jovereghe ororo usira.

<sup>5</sup> Etiri, aneya eni uvu kaifa eraira aimi eredo, eminge sisira, “Arie, God Kakara Bekári! Ni iriasi, a kotugo iresa. Nine etesa emo, eveva beká ava etesi.

<sup>6</sup> Amo, evetu genembo endada irera, ne ninda natofo a ninda feroveta detero ambero nenda ororo vovosusira. Etiri gido, ni nenda ari oinda mino futuse, seteso uvu jovereghedo ororo etiri, natofo amo ne ororo ava rise sirivo erera. Amo aira inono etira!” aminge sisira.

<sup>7</sup> Setiri, beka eni oltada (altar) ghe eminge siri nininguseni, “God, Bajari Fakina Kato Beká, ni bekáda bekáda ategi edo, evetu genembo a reighi isambu ainda mino inononda muturaesa.”

<sup>8</sup> Aminge setiri dadabetiri, aneya eni ira avononde naká usira aimi eredo, ira nunda rooro ava ijida averegetiri vovosusira. Vosetiri, God setiri, iji fakina edo, nunda vevera teria beká edo aimi, evetu genembo avisira.

<sup>9</sup> Iji da vevera teria edo aimi, evetu genembo avíri, ne mema itatamuse God dae jijivu siseri. Ainda susu mo: mema mendeni mendeni evia, nune setiri sirorusira. Ne nundae jijivu sise, nenda ari ekoko edo ghusera, ava jo doyae irise, God da usasadae jo sakai saeri.

<sup>10</sup> Amingero, aneya eni ira ghabu soveni taukaka usira aimi eredo, ira nunda rooro ava, sino fuka eko ainda avo anumbada averegetiri vovosusira. Vosetiri, reighi mendeni mendeni sino fuka aimi kaifa edo ghusera aminda, usasa dadabetiri tumba usira. Tumba etiri, evetu genembo mema tafuse gambisi mema siri, aviva gambu gafuseri.

<sup>11</sup> Amingusera avata, ne jo dubo jovereghedo, nenda ari ekoko edo ghusera ava jo vujege doyaeri. Nenda gambisi mema sisira aindae sedo, God utuda irira, aikena jijivu siseri.

<sup>12</sup> Amingero ainda amboda, aneya eni ira ghabu soveni dabako usira aimi eredo, ira nunda rooro ava uvu mindafu javo Euphrates aminda averegetiri vovosusira. Vosetiri, uvu javo Euphrates resena ava gasumbusira. Amingusera da beká mo: nu, kini (king) mendeni iji vitarikena ghedo furari dae erera, ainda emboro afigari dae sedo, God setiri gasumbusira.

<sup>13</sup> Ainda amboda, na sukaru ekoko etodaba naká ava gosuseni. Nenda gari mo, kau geraku da kakaugori. Sukaru ekoko ainda eni mo, nombura setena ainda békada ghe fira buvurutiri gosuseni. Eni mo, sino fuka ambari dae uroghe edo jebugusira ainda békada ghe fira buvurutiri gosuseni. A eni mo, feroveta gungubo kato ainda békada ghe fira buvurutiri gosuseni. Feroveta resena

emo, nu sino fuka amboda endada ghe vivitusira, avori.

<sup>14</sup> Geraku emo, ne sukaru ekoko ainda dangiori. Nenda fakina mo, ne tano mendeni mendeni aoro evetu genembo jo gae iriara ava, nenda gitida sirorari gido dudukugarera. Avori, ne era setero enda da kini (king) a kokotofu isambu, God Fakina Kato aikena isoro ari dae sedo, God da Sifo tomanako aminda toruguseri.

<sup>15</sup> God da Sifo tomanako ava kotoero dae sise, Bajari Iesu namondekena eminge resira, “Dengoro javuruvu! Kau tafasara kato fururari kambo numamo bunarira aminga ava, na jovereghe endada yarena. Ainda sifo ava, mave jo kasama aeri. Mave diti fange irise, nunda tamo asugari kaifa use irarira, a ari ekoko jo ae irise, nu meka jo gae arira amo, nu ivuga beká ava arira,” Bajari aminge resira.

<sup>16</sup> Avori, sukaru etodaba naka setena aimi, enda da kini (king) a kokotofu nenda ambo jimbide dabade jumbero, reighi Jusi embo da gekaimi Armageddon seraera, aminda totoruguseri.

<sup>17</sup> Etero, aneya ambo nembo aimi eredo ira, God da janje eko rooróda ava jighi averegetiri yaurada vovosusira. Vose dadabetiri, kini (king) da avo anumba God da Kamboda+ fetireira, aminda ghe beka mindafu eminge siri nininguseni, “Etiri, re-fara inono etira!”

<sup>18</sup> Aminge setiri, biria tarighedo barara fugutiri, dumo endada siroredo enda daradaraghusira. God setiri evetu genembo sirorusera ai tano ghedo, dumo eviviga eni jo sirorae ireira ava, tuturoda emo sirorusira. Dumo javi edo enda daradaraghusira amo, eko bekári. Evetu genembo jo gae iriara ava, siroretiri nenda gitida gosuseri.

<sup>19</sup> Enda daradaraghetiri, enda da reighi tomanako nenda bogu begaya, a frovensi isambu nenda bogu begaya isambu du dadabusira.

Etiri, reighi Babylon ábarago God kotisira. Nu vaini (wine) nunda aghada averegusira ava, sireguse setiri reighi Babylon risira. Vaini (wine) agha jokáda resena emo, inono God da janje ekori. Avori, God amingetiri, reighi mindafu Babylon amo saredo, sogho etodaba naká usira.

<sup>20</sup> Sifo aminda, eva da butu a enda da doriri isambu manjisira.

<sup>21</sup> Borija yaura, aisi (ice) da kaugo ava vovosusira. Aisi (ice) vovosusira amo, daba daba da bouvu, 50 kiro (kilos) avavaga vovosusira. Aimi evetu genembo detiri sirivo use, God dae jijivu siseri. Ainda susu mo: nu aisi (ice) eko futuse, mema eko beká evetu genembokena mutiri, ne sirivo useri.

## 17

### *17:1-18 Evetu Saghere Kato Da Gekari.*

<sup>1</sup> Aneya 7 rooro averegusera, ainda eniimi namokena fira sisira, “Fu! Evetu saghere kato eko enié, nange mema tambarira, ava ijugaono gase! Saghere kato resena emo, na reighi Babylon, uvu digari ainda dengesida itero irira, aindae resena.

<sup>2</sup> Enda da kini (king) a kokotofu isambu saghere kato ainde dabade irise, ari ekoko edo ghuseri. Natofu isambu endada irise, nunda vaini (wine) mindioro jiro birurugheari nunda sari ava edo ghuseri.”

<sup>3</sup> Aminge setiri, Asisi Kakara namokena asugusira. Etiri, aneya setena aimi na unumbe budo, nange era reighi uvu a evetu genembo irae da vasa aminda buvurutuseri. Aminda, evetu sino fuka da gukada anumbiriri gosuseni. Sino fuka ainda tamo mo, kokoigori. Nunda tamonda javo mendeni mendeni gefusera aimi, God da javo eko eraira. A nunda jiro isambu 7, a nunda kore isambu ghabu sovenisoveni ava gosuseni.

<sup>4</sup> Evetu ainda tamo asugari kokoigo a unju tamori, ainda mino

mo, teriagori. Nu gogho edo, guri dombu eni dombu eni eveva gaveva ava asedo iriri gosuseni. Guri mendeni mo, auri 'gold' imi ariri, kotugo mendeni mo, ghamana gharita da kaugoimi ariri, a mendeni mo, bangu fuitiimi ariri. Guri ainda mino mo, teriago bekári. Avori, evetu ainda ungodá, nu agha auri 'gold' imi ari ava bu jighiriri gosuseni. Agha jokáda, nunda ari ekoko beká a kombo yagera aimi bedo edo iriri gosuseni.

<sup>5</sup> Nunda dombuda, javo eni gembero iriri gosuseni. Javo ainda tuka mo jo isaghada iraeri. Javo amo eviri: "Reighi tomanako Babylon, kombo yagera kakato a kusia bagia kakato, ainda noi numori. Kotugo roera ekoko aimi, evetu genembo bebeta eraera, ainda noi barago numori."

<sup>6</sup> Evetuá ororo mindiri jiro birurughusira amo, inono, vaini (wine) mindioro jiro birurugheraira, ainda kaugo ava usira. Ororo risira amo, eviri. God da natofo Iesu tumonduse, nu jo ighagha ae etero gido, evetu genembo mendeniimi eredo, ne detero sirivo usera, ainda ororori. Ororo ava vovosiri, evetuá ira bu mindiri jiro birurughetiri gosuseni. Na evetuá gido dudukughuseni.

<sup>7</sup> Dudukugheteno gido, aneya namo karona usira aimi sisira, "Ni redae dudukughetesi? Evetu sino fuka da gukada anumbirira, ainda tuka jungarida ava saono ningaresa. A kotugo, sino fuka jiro 7 a kore ghabu sovenisoveni aimi, numo bu deingheraira, ainda tuka jungarida ábarago saono ningaresa.

<sup>8</sup> Sino fuka gesa amo, giti ireira ava ambiri, God setiri nu bako tomanako aminda vovosusira. Oroko eminda, nu tefori. Avata nu sekago bako tomanako aminda ghe javi edo, foa buvari dae erira. Buvudo, nu yari daoro dadabarira. Avori, evetu genembo mendeni, ne sino fuka ava gido dudukugharera. Evetu genembo resena emo, God giti enda jo

ae irise, nenda javo jo Jebuga Evovodae Irari da Buku aminda gembraeri. Evetu genembo amo, ne sino fuka ava gido dudukugharera. Ainda beká mo: nu ireira edo ambududurusira, avata sekago furarira, aindae ne dudukugharera.

<sup>9</sup> "Geka sari dae erena emo, dubo kotedo kasama aresa. Kote gi! Sino fuka da jiro 7 irira, ainda tuka mo etoto nakári. Eni mo: nunda jiro 7 amo, inono doriri 7 ri. Evetu o reighi setena amo, nu doriri 7 ainda etoda anumbirira. A eni mo: jiro 7 setena amo, inono reighi ainda kini (king) 7 aindae seteni.

<sup>10</sup> Kini (king) 7 ainda mendeni ghabu soveni ava, ambu tefo useri. Dabako irira, a eni jo furae irira. Numo furarira ainda amboda, jo umbu ghousa irise, reighi kaifa ae arira.

<sup>11</sup> Na sino fuka da jiro ainda tuka seteni. Kotugo oroko mo, sino fuka ainda tuka sari dae erena. Nu endada ireira edo ambududurusira, ainda tuka mo: kini 7 setena, ainda eni nune edo ireira, ambududurusira. O jebugedo jovereghe furarira, ainda tuka mo: nu tofo jebuge eredo jovereghe furarira amo, kini 7 ainda amboda, nu kini 8 arira. Edo yari daoro ambari dadabarira.

<sup>12</sup> "Sino fuka ainda kore ghabu sovenisoveni gesa amo, ne inono kini mendeni isambu ghabu sovenisoveniri. Ne jo furae irera. Ne amboda foa reighi kaifa ururoro, God ne jo buregae, doyari ne fakina edo, sino fuka setena ainde dabade, o saone, kini ambo nembo ainde dabade reighi kaifa use irarera. Kini ghabu sovenisoveni sino fuka ainde dabade, iji goroto dabako (1 hour) aminda reighi kaifa arera.

<sup>13</sup> Kini ghabu sovenisoveni resena emo, geka dabako a dubo dabako use, sino fuka sonembari dae sedo, nenda fakina isambu numokena mutoro barira.

<sup>14</sup> Nene eredo, Sifi da Mandi aikena isoro arera. Ne isoro arera, avata Sifi da Mandi aimi eredo, ne de atai

duboda fati fetarira. Nunda natofo ainde dabade eredo, kini ghabu sovenisoveni ava de atai duboda fati fetarera. Natofo resena emo, nune gatededo kori setiri, nunda natofo edo, nunda geke nininguse irera. Avori, nu kini ghabu sovenisoveni ava de atai duboda fati fetarira da tuka mo: babojegari isambu ainda Bajari, a kini isambu ainda Kini numori,” aminge sisira.

<sup>15</sup> Aneya sekago tuturo edo namokena eminge sisira, “Uvu gesa aminda saghere kato anumbirira amo, inono, reighi nunda oro oro a geke mendeni mendeni amingori. A kotugo inono, evetu genembo tamo ingago, foyago, a yaghogori.

<sup>16</sup> Sino fuka a nunda kore ghabu sovenisoveni gesa aimi, amboda saghere kato ava imboe arera. Saghere kato da gugua a roera sosighi aoro, nu tefo tamoi fetarira. Nunda tamo fisi mindido, nu fugoro avarakada viti avi dadabarira.

<sup>17</sup> Ava nene arera amo, God da ujuri. Nu rejo aoro dae uju usira ava, God nune nenda dubo jokáda fitiri sirorusira, amo eviri. Kini ghabu sovenisoveni amo dubo dabako edo, nenda fakina sino fukakena futuse iroro, God da Geka einda beká sirorari garera.

<sup>18</sup> Avori, evetu saghere kato gesa amo, reighi eni teria beká avavagori. Enda eminda, reighi isambu nunda sari ningariri.

## 18

### *18:1–19:4 God Reighi Babylon De Bejarira.*

<sup>1</sup> Ainda amboda, aneya eni utuda ghe vose firi gosuseni. Nunda fakina mindafu ainda usasaimi vose endada gaetiri, reighi jaraghusira.

<sup>2</sup> Nu beka mindafu sise, eminge siri nininguseni, “Reighi dadabetiro! Reighi tomanako Babylon, makoede dadabetira! Oroko, reighi aminda evetu genembo tefori. Asisi ekoko a sukuru ekoko aimi aminda irera. Rika ekoko dombu eni dombu eni ábarago aminda iritirera.

<sup>3</sup> Reighi Babylon dadabetira da tuka mo eviri: nunda vaini (wine) fakarago oro oro isambukena futuse setiri riseri. (Vaini futusira emo, kau joka mutarigusira. Natofo isambu nange, nunda ari edo ghusira ovia, edo ghaetera ava kotise, mutudo ghusira.) Enda da kini (king) isambu ainda vaini (wine) fakarago ava mindido, eredo reighi Babylon ainde kombo yaru edo ghuseri. Kombo yaru ari resena emo, inono: ne reighi aminda ya foa ghuse, nunda gugua fuge gosuse, tuturo edo dighighi edo ghuseri. Kotugo, bisnis (business) embo barago, ne aminda ya foa ghuse, Babylon embo roera dighighi edo ghusera, ava kasama edo aminda oriro edo, susu iti fafode useri,” aneya aminge sisira.

<sup>4</sup> Ainda amboda, beka eni utuda ghe eminge siri nininguseni:

“Nanda natofo, fuvu buvove! Reighi Babylon do buvovo dae resena!

Nunda ari ekoko da mino, erá nene itatameove dae sise resena: nunda ari ekoko ava ne jo ae areva.

<sup>5</sup> Ainda tuka mo: nunda ari ekoko digari ava God kotise irira.

Amo jo kote doyaee arira.

<sup>6</sup> Babylon a Babylon embo rea nemokena usera, kau daba aminga ava, Babylon embo-kenareva!

Amingareva, a kotugo, ainda etoda ari bouvu mendeni nemokena areva!

Mema nemokena mutero itatamuseva, kau daba aminga ava, mema futuse, begogo mutovo Babylon embo itatamarera.

Babylon embo nemokena uvu kaeghae mutero mindido mema itatamusevu.

Oroko, ne kae eko beká ava budo uvughae baingoro edo, nemokena mutovo mindido mema teriango itatamarera.

<sup>7</sup> Babylon embo tototofo nenda duroá irari dae sedo, gugua a roera evevago ava dere ruruse dubo jama tambudo ghuseri.

Oroko, roera dere budo ghusera, ainda mino mutari dae sedo, nemokena mema a dara mindafu ava mutovo barera.

Ai resira amo: ne gogore edo totofo nenda reighidae sakai sise, eminge seraera,

‘Namondeda reighi kau kotofu evetu kuini (queen) seraera avavagori.

Nu usasa a ivugaghaeri. Nu jo evetu rori da kaugo iraeri.

Namonde reighi eminda, jo sorara use, dubo mema itatamae arera.’

<sup>8</sup> Babylon embo ne gogore use, aminge seraera.

Aindae sedo, sifo dabako ainda jokáda, nunda mema sirorari itatamarira.

Amo, taono bejari dubo mema a baimara garera.

Reighi Babylon avarakai gambu avarira.

Ainda beká mo: Bajari God nu fakina katori, a nu nenda ari ekoko ava, tofo mandi ijujarira.”

geka aminge setiri dadabusira.

<sup>9</sup> Enda da kokotofu a kini (king) isambu, ne Babylon embode dabade roera a guguadae ghamo ruruse dighighi use, ari ekoko edo ghuseri. Aindae sedo, avarakai reighi Babylon gambu avise imbosi vivitururari, ava fuge gido, ne dubo mema use, dimbia sorara arera.

<sup>10</sup> Ne Babylon embo da mema gido oju beká ava use, soka fetedo eminge sarera, “Aiya, darago, darako emo! Emo taká dara bekári. Reighi emo dombu jovereghedo, eko beká etira! Babylon embo nenda reighi evevago a nenda fakina teria beká ireira avata, iji goroto dabako (1 hour) ainda jokáda, nemokena mema a dara siroretiri, namane eregoserá.”

<sup>11</sup> Enda da reighi isambu, nenda bisnis (business) embo barago, Babylon da imbosi gido, dubo mema use, dimbia sorara arera. Nenda roera a gugua mave jo foa sekago ombae arera, aindae ne sorara arera.

<sup>12</sup> Nenda auri garigo a evevago (‘gold’ a ‘silver’ seraera), a nenda ghamana a bangu fuiti garigo aimi guri eraera ava, mave sekago jo foa nemokena ombae arera. Nenda embo boka nunda gari kau eni kau eni, foyago, kokoigo, a unju tamo ava, mave sekago jo foa nemokena ombae arera. Nenda ika garigo, mosou avaga, a nenda ove, koreimi, ikaimi, auri mendeniimi, a ghamana (marble) imi, totofo etero sirorusera ava, mave sekago jo foa nemokena ombae arera.

<sup>13</sup> Nenda mosou a yabiyabina, nenda usu a fiyogha mendeninde dabade, nenda vaini (wine), nenda orivi (olive) da muka, a nenda farava ava, mave sekago jo foa nemokena ombae arera. Nenda burumakava (cattle), nenda sifi (sheep), nenda hosi (horses) a roera evetu gen-embo fendoro hosiimi jumburaera ava, mave sekago jo foa nemokena ombae arera. A kotugo, nenda saramana kakato barago, mave sekago jo foa nemokena ombae arera.

<sup>14</sup> Aindae sedo, bisnis (business) embo sorara use, Babylon embodae sarera, “Agá! Ne roera dighighi edo uju edo ghuseva ava, nange isambu dadabeti! Nenda gugua a roera evevago dadabetira, jo sekago sirorari bae areva! A kotugo nenda irari eveva ava dadabetira!” aminge sarera.

<sup>15</sup> A bisnis (business) embo mendeni, ne totofo reighi Babylon aminda bisnis (business) use, susu iti fafode usera, ne reighi Babylon da mema a dara aindae oju edo soka fetedo, dimbia sorara use,

<sup>16</sup> eminge sarera, “Aiya, darago, darako emo! Emo taká dara bekári! Reighi tomanako emo eko etira! Namonde Babylon ominda, sifo ghousa embo boka eveva a garigo, unju tamo a kokoigo, ava uju avido ghuse, a guri auri ‘gold’ imi ari a ghamana garigo a bangu fuitiimi ari ava dighido, umo use deinghedo ghuseri.

<sup>17</sup> Oroko eminda, iji goroto dabako (1 hour) ainda jokáda, namondeda

gogho a gugua isambu dadabe tefo etira!” aminge sarera.

A kotugo ghaka+ da babojegari, ghaka+ da saramana kakato, a evetu genembo mendeni evada saramana eraera aimi,

<sup>18</sup> ne soka fetedo, reighi Babylon da imbosi vivitururari gido, sorara use sarera, “Giti endada, reighi eni jo ovavaga iraeri. Ava nange dadabeti!”

<sup>19</sup> aminge sedo, dubo mema use, vava gutedo fonja bu jiroda dav- edo dimbia sorara use sarera, “Aiya, darago, darako emo! Emo taká dara bekári! Reighi tomanako emo dombu jovereghedo, eko etira! Mave nunda ghaka+ budo, reighi Babylon aminda roera tige ya ghedo ghusira amo, nu susu iti fafode usira. Avata oroko eminda, iji goroto dabako (1 hour) ainda jokáda, emo nange emingetiri dadabeti!”

<sup>20</sup> “Ne utuda ireva amo, dubo jama use ivuga areva! Ainda beká mo: Babylon bejetiri dadabetira! A God da natofo, Bajari da ambo jimbi a feroveta, nembargo ivuga areva! Ainda beká mo: Babylon embo nemokena mema futusera ain- dae sedo, God ne ategi use ijujetira. Ava sedo, ne ivuga areva!”

<sup>21</sup> Ainda amboda, aneya fakina kato eni fira, ghamana beragha ava bu jighiri eretiri evada fuge- tiri tifughusira. Tifughetiri, ge- ka sise, eminge siri nininguseni, “Kau ghamana beragha bu jigheno ere- tiri, gaiga gae afeteno aira evada tifughe baghimbetira aminga ava, reighi Babylon de bejari, evetu gen- embo sekago jo gae arera.

<sup>22</sup> Aminda jo feku fusise, sino tavuya sekago ae arera. Saramana kakato jo sekago aminda tuturo edo saramana use, javi ururoro ningae arera, a evevetu aminda bayau jo ituturoro gae arera.

<sup>23</sup> Avaraka arivo aminda jo usise injibururoro gae arera, a evetu gen- embo vasa aminda, jo gagara eni datu dighido mutoro fitae arera.

Ainda beka mo: Babylon da bisnis (business) embo babai a fakinago bekári, reighi mendeni da bisnis (business) embo jo Babylon da bisnis (business) embogo iraeri. Ne yeye bu ya foa ghuse aimi, evetu genembo isambu deredo ghuseri.

<sup>24</sup> A eni mo: reighi Babylon da evetu genembo aimi, God da fer- oveta, God da natofo, a evetu gen- embo mendeni detero sirivo useri. Amo, evetu genembo mave endada detero sirivo usera, isasambu ainda ororo Babylon aminda vosetiri God tafusira. Aindae sedo, God nune Babylon de bejetira,” aneya aminge setiri dadabusira.

## 19

<sup>1</sup> Ainda amboda, kau evetu gen- embo natofogoi utuda fetedo, beka fainghedo sarigo ero nininguseni, “God dae sakai sise resera! Sonemba, usasa, a fakina tofo nundari.

<sup>2</sup> Nu sifo ghousa, evetu genembo nenda ari ekoko eraera, aindae ategi use, mino inononda eraera. Nu aindae sedo, evetu saghere kato, o reighi Babylon seraera, nunda ari ekokodae ategi edo de bejetira. God nu amingetira da beká mo: reighi Babylon aimi nunda sara- mana kakato detiri sirivo useri.”

<sup>3</sup> Aminge sedo, sekago beka fainghedo eminge siseri, “God dae sakai resera! Reighi mindafu Babylon aminda avarakai avise, sifo ghousa imbosi vivitururari gosuse irarera!”

<sup>4</sup> Aminge sero, babojegari 24 nemonde serubim avononde ainde dabade du fafasedo, God tumonde bainghuseri. God nunda avo anumbada anumbiriri, tumonde bainghuse siseri, “Ai, bekári! + God dae sakai resera!” aminge siseri.

*19:5-10 Sifi Da Mandi Evetu Fitare Dae Sedo, Bajari Kirumo Simbugerira.*

<sup>5</sup> Setero dadabetiri, beka avo anumbada ghe eminge siri nininguseni, “Namondeda God dae

sakai saore! Kokotofu, sabua, a nunda saramana kakatode dabade, namonde numoá kakara use tumonde bainghaore!”

<sup>6</sup> Aminge setiri dadabetiri, kau evetu genembo natofogo ai utuda fetedo, beka fainghedo sarigo ero nininguseni. Ainda javi mo, kau uvu usegha o utuda barara fugeraira, ainda kaugo ava ero nininguseni, “God dae sakai saore! Ainda beká mo: namondeda Bajari God Fakina Kato Beká, nu Kini (King) etira!

<sup>7</sup> Aindae sedo, namonde dabade dubo eveva use ivuga aore! Nu teria bekári, aindae namonde sakai saore! Ainda beká mo: sifo ojira buvuruterira! Sifi da Mandi oroko, nunda evetu fitarira. Aindae sedo, nunda datu gagara amo simbugedo gigiterira.

<sup>8</sup> Numo simbugare dae sedo, embo eveva, foyago beká tiritaragherira, ava mutero asugetira,” beka aminge siri nininguseni. (Sifi da Mandi ainda evetu resena emo, na Iesu da natofo aindae resena. Nunda embo eveva a foya beká amo, inono, ari eveva God da natofoi eraera, amingori.

<sup>9</sup> Avori, aneya sekago namokena eminge sisira, “Eminge gembu: Sifi da Mandi datu didighuse kirumo ari dae erira.

God ne ava mindove dae sedo aghi arira amo, ivuga areva!”

aminge sedo, geka emo ainghae dabade avagaya use sisira:

“Emo geka beká, God da Gekari,” aminge sisira.

<sup>10</sup> Aminge setiri, na numo tumonde bainghari dae sise, nunda dombuda du fasuseni. Avata nu na bureguse sisira, “Erá amingeose! Ni nangae kau dabakori. Nangae mo, God da saramana kakatori. Ninda nano namendi, God da Geka Iesu ijugusira ava tumonderaera, ainda komana eni namori. God nusuka numoá tumonde baingharsa.” Ai resira amo: geka beká Iesu setiri isagha usira aimi, giti feroveta da

ghamo dereari erorureari, ne osa sedo ghuseri.

*19:11-21 Kotofu Teria Eni, Javo ‘God Da Geka’, Aimi Firi John Gosusira.*

<sup>11</sup> Ainda amboda, utu afigetiri, genembo hosi (horse) etoda anumbedo vose firi gosuseni. Hosi amo, foyago bekári. Genembo nunda javo mo, ‘Saramana E Gogoghombari Kato’ a ‘Geka Beká Sari Katori’. Genembo emo, tefo tefo jo isoro ae eraira, nu ategi e gogoghombedo susudae isoro eraira.

<sup>12</sup> Nunda diti mo, kau avaraka bubura da kaugori. Koana digari, kau kotofu da kekesa avavaga, nunda jiroda asedo vose firi gosuseni. Nunda tamonda, javo eni gembiri irei. Avata javo amo, mave jo kasama aeri, nu nusuka kasama usira.

<sup>13</sup> Nunda embo ororoimi dave asugedo, vose firi gosuseni, a nunda javo seraera amo, ‘God da Gekari’.

<sup>14</sup> Utu da isoro kakato isambu nunda amboda amboda fuseri. Ne embo foyago beká ava asedo, hosi (horse) foyago ainda etoda anumbedo, nunda ambo gaedo vose fero gosuseni.

<sup>15</sup> Genembo da békada ghe, kaiya dikago ava buvurutiri gosuseni. Aimi, nu enda da natofo isambu de atai duboda fati fetarira. Nunda ketua aurii ari ava budo ise, aimi natofo kaifa arira. Kau namonde asi vuji fati simbeoro vaini (wine) rooro, kau ivi da kaugo, aminda vose faseraira aminga ava, Genemboá evetu genembo endada irera nemokena, God Fakina Kato ainda janje eko ava ijuguse, ne de atai duboda fati fetari, mema teriagio ava itatamarera.

<sup>16</sup> Genembo ainda tamo asugarida a nunda furada, javo eni gembero iriri, gosuseni:

‘Kini Isasambu Ainda Kini A Kokotofu Isasambu Ainda Koto-fuko’  
geka ava gembero irira.

<sup>17</sup> Ainda amboda, aneya eni ijida fetiriri gosuseni. Aneya amo, beka mindafugo sise, rikamane nunda duruda ghufusera aikena sisira, “Fuvu totorugedo, God da kirumo mindafu evia mindove!

<sup>18</sup> Kini mendeni, isoro kakato da babojegari a gegenembo fakina kakatode dabade, hosi (horse) nenda gegenembode, a sabua kokotofude, evetu genembo isambu ainda tamo da fisi ava mindovo dae resena,” aminge sisira.

<sup>19</sup> Ainda amboda, sino fuka jiro 7 a nunda kore ghabu sovenisoveni setena avo, kotugo enda da kini isambu a isoro kakato ainde dabade totorugero gosuseni. Ne, genembo hosi (horse) etoda anumbirise, nunda isoro kakatode dabade utuda ghe vose furariá setena, ainde isoro ari dae sedo totoruguseri.

<sup>20</sup> Avata utuda ghe vose fusera aimi eredo, sino fuka eko a nunda feroveta gungubo kato ainghae sanduduseri. (Feroveta gungubo kato resena emo, nu giti sino fuka da dombuda, tofo sino fuka da fakinaimi tano a ari mendeni mendeni eari sireari, natofo nenda gitida gido, dukukughedo ghuseri. Dudukughedo, sino fuka ava tumonde bainghedo, a sino fuka da ove kau numoá avavaga simbugusera ava tumonde bainghedo ghuseri. Evetu genembo amo, ‘avori’ setero, nenda tamonda sino fuka eko da tano ava gembero fefetusira.) Avori, sino fuka nunda feroveta gungubo kato ainghae dabade, jebuga sandi fugetero avaraka imo kaeghae, a masa eko beká, ainda jokáda vovosuseri.

<sup>21</sup> Sino fuka da isoro kakato ava, Genembo hosi (horse) etoda anumbirisira, ainda békada ghe kaiya buvurutusira aimi, detiri sirivo useri. Sirivo etero gido, rika mane isambu fera mindero inono usira.

## 20

*20:1-6 Keriso Ghaeko 1,000 Enda*

*Evia, Kaifa Use Irarira.*

<sup>1</sup> Ainda amboda, aneya eni seini (chain) bouvugoá budo, a bako tomanako ainda ki (key) budo ghe vose firi gosuseni.

<sup>2</sup> Nu nombura setena amo, (inono, jingabu o Satan seraera) ava sandido, ghaeko 1,000 bako jokáda irare dae sedo bundisira.

<sup>3</sup> Bundedo, bako tomanako aminda fugetiri vosetiri, guro gaje vatetena usira, erá Satan foa buvudo, natofo sekago dereure dae sedo. Satan nu ghaeko 1,000 ava aminda iria edo, amboda sifo tufako foa buvarira.

<sup>4</sup> Ainda amboda, evetu genembo mendeni kini (king) da avo anumba mendeninda anumbirero gosuseni. Evetu genembo resena eikena, evetu genembo ijajari da fakina ava futuseri. A roera eni gosusena amo, evetu genembo mendeni da asisi ava gosuseni. Evetu genembo resena emo, ne God da Geka a Geka Beká Iesu ijugusira ava, vironu sedo ghusera aindae, evetu genembo mendeniimi ne doruse, duboda gafetero sirivo useri. Ne sino fuka a nunda ove kevusera ava jo tumonde bainghaeri, a sino fuka da tano faiyaimi dombuda o jiroda gefusera ava, ne jo baeri. Avori, ne jebuge eredo, kokotofu edo Keriso de dabade, ghaeko 1,000 setena amo, nene enda evia kaifa edo gharera.

<sup>5</sup> Evetu genembo emo, ne giti beká jebuge erarera. (Evetu genembo isambu, sifo aminda jo jebuge erae arera. Evetu genembo setena amo, ne giti jebugedo erarera. Mendeni iroro ghaeko 1,000 dadabari ainda amboda, ne jebugedo erarera.)

<sup>6</sup> Evetu genembo giti beká jebuge erarera amo, ne ivuga beká ava arera. Ainda beká mo: God ne esimbugari, jo sekago ambae arera. Evetu genembo mendeni amboda jebuge eredo, nenda ari ekoko dae sekago ambarera. Avata evetu genembo giti jebuge erarera amo, ne evovoda irarera. Ne God a Keriso da fristi+



ava use, Keriso de dabade enda kaifa ururoro ghaeko 1,000 dadabarira.

*20:7-10 Satan Sandi Bu Fugetero Avaraka Jokáda Vovosusira.*

<sup>7</sup> Ghaeko 1,000 setena amo, dadabari guro afigaoro, Satan bundetero ireira ava, vujegaoro foa buvarira. Buvudo, natofo isambu derari dae sedo, yarira.

<sup>8</sup> Yama, natofo reighi isambu eminda irera, oro javo Gog a Magog ava dedeuse sari, ne isoro ari dae sedo totorugarera. Evetu genembo digari, eva da kora avavagori, jo tegari da kaugo irae aimi totorugarera.

<sup>9</sup> Avori, gosusena amo, evetu genembo setena aimi, ne isoro ari dae sedo, ghasedo God da natofo a nunda reighi nu dubo buraira, ava jimbe birurughuseri. Jimbe birurughetero, avaraka utuda ghe vose fira, evetu genembo reighi jimbe birurughusera ava, aviri sirivo useri.

<sup>10</sup> Sirivo etero, Satan nemokena dedeusira ava, God da mendenii sandi bu fugetero avaraka imo kaeghae, a imbosi masa eko ainda jokáda vovosusira. Avaraka resena daba aminda, sino fuka nunda feroveta gungubo kato ainghae dabade giti fugetero vovosuseri. Ne evovodae, sifo tumba evia inono, aminda irise mema itatamuse irarera.

*20:11-15 Ategi Da Sifori.*

<sup>11</sup> Ainda amboda, God nu kini (king) da avo anumba tomanako eni aminda anumbiriri gosuseni. Avo anumba amo, foyagori. Utu a endaghae dabade nunda dombuda fetarikená jo inono ae etiri gido, ira manjisira.

<sup>12</sup> Etiri, evetu genembo giti ambududurusera, sabua, kokotofu, evetu genembo isasambu, God da dombuda fetirero gosuseni. Buku mendeni afe fitero dadabetiri, amboda buku eni afigusera ainda javo mo, 'Jebuga Evovodae Irari Da Bukuri'. Ava afigetero, God nu, evetu genembo da ari eveva a ari

ekoko, buku mendeninda gefusera ava, bekáda bekáda ategi usira.

<sup>13</sup> Evetu genembo evada ambududurusera, aminda ghedo jebuge eroruseri. Ambari embo da vasa barago afigetiri, evetu genembo isambu aminda ghedo jebuge eroruseri. Ne isasambu avo anumba tomanako aminda totorugetero, God nenda ari eveva a ari ekoko ava, bekáda bekáda ategi usira.

<sup>14</sup> Etiri dadabetiri, Ambari a Ambari Embo da Vasa ava fugetero, avaraka imo kaeghae, a imbosi masa eko ainda jokáda vovosusira. (Avaraka resena emo, mave nunda ari ekokodae sekago ambududurusera aimi vovosuseri.)

<sup>15</sup> Mave nunda javo 'Jebuga Evovodae Irari Da Buku' ainda jokáda jo tambae usira amo, nemo budo avaraka jokáda fugetero vovosuseri.

## 21

*21:1-8 Utu A Enda Seka Ava, John Gosusira.*

<sup>1</sup> Ainda amboda, utu a enda manai, eva ainde dabade manjetiri, na utu a enda seka ava gosuseni.

<sup>2</sup> Avori, kau gagara vai ari dae sedo, gogho edo gari evevago arira aminga ava, God nunda reighi kakara simbugedo gogho etiri, gari evevago usira. Reighi ainda javo, nunda reighi manai Jerusalem kotise, nunda reighi seka barago Jerusalem jijighusira. Jerusalem seka ava, utuda ghe vose firi gosuseni.

<sup>3</sup> Vose firi, beka eni God da avo anumbada ghe eminge siri nininguseni, "Oroko God evetu genembode dabade irira. Nu nemokena irari, ne nunda natofo edo irarera. Nu evetu genembode dabade irise, nenda God arira.

<sup>4</sup> God nu tofo mandi nenda jivu ghajari, nenda dubo mema dadabarira. Nune sari dubo mema, ambari, sorara, a mema isambu dadabarira. Ainda beká amo, roera sembae isasambu enda manaida ireira

amo, utu a enda manai ainde dabade manjetira.”

<sup>5</sup> Aminge setiri, avo anumbada anumbirisira aimi sisira, “Na oroko roera isasambu simbugaono seka sirorarira,” aminge sedo, sekago namokena sisira, “Oroko sari dae erena emo, geka bekári. Oroko rea sarena evia, sirorarira. Ava sedo, gembu irare!”

<sup>6</sup> Aminge sedo, nu tuturo edo sisira, “Utu a enda manai, roera manai a irari manai dadabetira! Roera isasambu ainda tuturoda a gombuda amo, namori. Mave uvu mindi jebugari uju arira amo, numokena nanda uvu tefo mutarena. Uvuá mave mindarira amo, jebuga evovoda irari ava tuve barira.

<sup>7</sup> Mave nandae sedo isoro use, gitofu de atai fati fetarira amo, roera isambu evia nune barira. Nu nanda mandi arira, a kotugo, na nunda God edo, nu tavo arena.

<sup>8</sup> Avata mendeni mo: oju kakato, evetu genembo mave nenda natofo ighagha use indiga o aito eraera, evetu genembo mave ari kau meka gari da kaugo ava eraera, evetu genembo mave komana deoro amburaera o simbora use kae jigheoro amburaera, kombo yagera kakato, evetu genembo mave ove a gode mendeni tumonde baingheraera, a gungubo kakato isambu ava, budo fugono avaraka imo kaeghae, a masa eko ainda jokáda vosedo, nenda ari ekokodae sekago ambarera,” aminge sisira.

*21:9–22:5 Reighi Seka Jerusalem Kau Nangego Ava, John Gosusira.*

<sup>9</sup> Setiri dadabetiri, aneya 7 giti God da janje eko ava rooróda bu jighi averegusera, ainda eni fira namokena buvudo sisira, “Fu, Gagara Sifi da Mandikena ya vai ari dae sedo simbugerira ava, ijugaono gase!” sisira. (Gagara sisira amo, reighi Jerusalem dae sisira.)

<sup>10-11</sup> Setiri, Asisi Kakara namokena vose fira asugetiri dubo koteno, aneya daba aimi na unumbe budo,

nangae doriri mindafu beká aminda iseri. Era buvudo, reighi kakara Jerusalem ava ijugetiri gosuseni. Reighi amo, God nune seka simbugedo, nunda usasa futusira aimi, reighi usasa beká ava use, utuda ghe vose firi gosuseni. Usasa janimbusira amo, kau ghamana garigo ainda tamonda iji gayeari tiritaragheraira aminga ava usira.

<sup>12</sup> Furu tomanakoi dighi birurughetero irei. Furu ainda guro mo, isambu 12 ava basiseri. Aneya 12 aimi ne, guro ava inono kaifa edo ghuseri. Guro ava inono, Israel embo da oro 12 ainda javo ava gembero irei.

<sup>13</sup> Iji vitarikena guro etodaba, iji vosarikena guro etodaba, borimanakena etodaba, a kotugo yavatakena etodaba nakári.

<sup>14</sup> Ghamana babaimi 12 ainda etoda ghamanai furu dighi vitero irei. Ghamana resena einda tamonda, Sifi da Mandi ainda ambo jimbi 12 nenda javo, ghamana ava inono gembero irei.

<sup>15</sup> Aneya na unumbe budo ira reighi ijugusira aikena, reighi da inono fiti bari kato, auri ‘gold’ imi ari ava irei. Reighi da mindafu, guro da beragha, a furu da mindafu ainghae dabade inono fiti bari dae sedo, inono fiti bari katoá budo fusira.

<sup>16</sup> Reighi ainda beragha a ainda ghousa, kau dabakori. Aneya tegetiri na gosusena amo, reighi ainda beragha, ainda ghousa, a ainda mindafu kau dabakori. Amo, 2,400 kirometa (kilometres) ri.

<sup>17</sup> Furu ainda mindafu barago tegutusira amo, 72 mita (metres) ri. Evetu genemboimi inono fiti bari kato bu inono eraera aimi, bu inono use tegutusira.

<sup>18-20</sup> Furu ghamanaimi dighi vitero irei. Ainda ghamana a ghamana babaimi furu da fumjino fitero ireira ava, jo tefo bari da kaugo iraeri. Mino mindafu bekári. Furu resena emo, ghamana eni javo jesfa (jasper), aimi itutuseri, nunda gari kau mo, gharita (glass) da kaugori. Reighi

amo, auri 'gold' imi dighi anum-buseri. 'Gold' resena emo, evevago bekári. Nunda gari kau mo, gharita (glass) da kaugori. Ghamana 12, furu da fumjinodae fitero ireira, ainda eni duru bekáda amo, jesfa (jasper), ainda gari kau gharita (glass) da kaugori. Ainda etoda eni mo, sefaiya (sapphire), kafuru tamori. Ainda etoda eni mo, eget (agate), tamo foyagori. Ainda etoda eni mo, emerod (emerald), katiki tamori. Ainda etoda eni mo, oniks (onyx), kokoigo foyagoghae bagega ariri. Ainda etoda eni mo, kanirian (carnelian), tamo kokoigori. Ainda etoda eni mo, kuots (quartz), tamo yaghogori. Ainda etoda eni mo, beroro (beryl), kafuru tamori. Ainda etoda eni mo, tofes (topaz), tamo goragori. Ainda etoda eni mo, saosedoni (chalcidony) o krisofres (chrysoprase), tamo boaturi. Ainda etoda eni mo, tokois (turquoise), tamo yasagori. Iká bekáda amo, ematist (amethyst), tamo unju tamori. Ghamana setena isambu 12 ava, furu da fumjinodae fitero irei.

<sup>21</sup> Furu da guro mo, roera eni yova jokáda siroreraira, ainda javo 'pearl' seraera, ava budo guro 12 isambu inononda gagojuseri. Reighi da emboro mo, auri 'gold' imi ariri, garigo beká, gharita (glass) avavagori.

<sup>22</sup> Reighi aminda, tumonde bainghari kambo eni na jo gaeri. Ainda beká mo: Bajari God Fakina Kato Beká a Sifi da Mandi ne reighi aminda irera, nemo kau tumonde bainghari kambo da kaugori.

<sup>23</sup> Iji a inua barago, aminda tefori. Ainda beká mo: usasa aminda God kena fuse janimberaira; a kotugo, usasa Sifi da Mandikena foa gheraira amo, reighi da arivori.

<sup>24</sup> Aimi, reighi da usasa mutari janimburrurari, enda da natofo isambu usasa ainda jokáda deinghuse irarera. Enda da kini (king) a kokotofu isambu eredo, nenda gugua a roera reighi Jerusalem aminda budo ya gharera.

<sup>25</sup> Reighi da guro isambu, sifo evia inono afigaoro irarira, a kotugo evovodae afigedo irarira. Ainda beká mo: aminda tumba jo jirae arira.

<sup>26</sup> Enda ainda oro oro isambu, nenda duro a usasaghae foa tere buvudo ghururoro, nenda duro a usasa reighi aminda irarira.

<sup>27</sup> Avata roera ekoko jo reighi aminda bu ya terae arera. Kotugo, evetu genembo ari kau meka gari da kaugo ava eraera o gungubo seraera, nembarago reighi aminda jo ya terae arera. Mave da javo Sifi da Mandi da buku 'Jebuga Evovodae Irari Da Buku' aminda gembero irira ainembo, ya reighi Jerusalem aminda terarera.

## 22

<sup>1</sup> Ainda amboda, aneya namokena uvu eni ijugetiri gosuseni. Uvu amo gari evevagori, gharita (glass) da kaugori. Uvu ava mave mindarira amo, jebuga evovodae irari ava tuve barira. Uvu irira ainda doin mo, God a Sifi da Mandighae nenda avo anumba ainda durudari.

<sup>2</sup> Uvu aminda tuturo edo, reighi Jerusalem ainda emboro tomanako soroda vose refira. Ainda betu soveni soveni aminda, jebuga da ika vitido irira. Ika ainda vuji ava, mave bu mindarira amo, nu jebuga evovodae irari ava tuve barira. Nu ghaeko dabako ainda jokáda, tambuno evia inono, beká jighiraira. Ika ainda igi mo, evetu genembo da fiyoghari. Aimi sonemburrurari, enda da natofo jejebugarera.

<sup>3</sup> Roera mendeni God giti simbora use setiri eko usira amo, jo vasa aminda irae arira. God a Sifi da Mandi da avo anumba reighi aminda irari, God da saramana kakato avo anumba aminda, numoá tumonde bainghuse, saramana use irarera.

<sup>4</sup> Ne God da dombu ava, nene gosuse irarera, a nunda javo nenda dombuda gembari irarira.

<sup>5</sup> Reighi aminda, tumba jo sekago jirae arira ava sedo, usasa dombu

eni a iji aminda jo gae arera. Ainda beká mo: usasa mo, namondeda Bajari God nune nunda natofokena futururari gosuse irarera. God da natofu, kau kini o kokotofu edo, enda evovoda nene kaifa use irarera.

### 22:6-21 Geka Da Tanori

<sup>6</sup> Geno dadabetiri ainda amboda, aneya sekago namokena sisira, “Geka niningeresa emo, geka bekári. Geka rea resira amo, beká sirorarira. Namondeda Bajari God nunda Asisi muteari, nunda ferovetakena vose asugeari dubo koterera. God resena eimi, tofo nune nunda aneya dirigetiri, orokoá rea sirorari dae erira ava, nunda natofokena sari ningoro dae sedo, nimokena vose fusira,” aneya aminge setiri dadabusira.

<sup>7</sup> Avori, Iesu resira, “Dengoro javuru! Na jovereghe nemokena yari dae erena. Na seteno, nanda feroveta John geka rea buku eminda gefusira ava, mave ningido kaifa arira amo, nu ivuga arira,” Iesu aminge resira.

<sup>8</sup> Na John, nane rea dengoro nininguse a ditii gosusena ava, eregefenere. Roera resena emo, aneya namokena ijugetiri, nininguse ditii gosuseni. Ijugetiri dadabiri, na numokena tumonde bainghari dae sedo, nunda ata duruda du fasuseni.

<sup>9</sup> Amingenno, nu bureguse namokena sisira, “Do! Erá amingeose! Ni nangae kau dabakori, namonde God da saramana kakatori. Ninda nano namendi mendeni, God da feroveta a nunda natofu isambu, buku einda geka ningiraera, ainda eni namori. God nusuka numoá tumonde baingharsa!”

<sup>10</sup> Aminge sedo, sekago eminge sisira, “God geka nimokena ijugetira evia, erá kivo eose! Ainda susu mo: sifo amo foa buvari dae erira.

<sup>11</sup> Avori, genembo eko amo, nu ari eko use irari, sifo amo foa buvarira. Genembo ari sembae eraira amo, nu ava use irari, sifo amo foa buvarira. O genembo eveva amo, nu ari eveva ava use irari, sifo amo foa buvarira.

A genembo kakarago amo, nu ari kakarago a eveva use irari, sifo amo foa buvarira,” aminge sisira.

<sup>12</sup> Avori, Iesu geka eni resira amo, eviri: “Dengoro jave ningivu! Na jovereghe nemokena yari dae erena. Na evetu genembo isambukena, nenda ari ainda mino ava bu yarena, mendenikena mino evevari a mendenikena mino ekori.

<sup>13</sup> Roera isasambu ainda tuturoda a gombuda amo, namori. A roera isambu ainda susuda a doinda amo, namori.

<sup>14</sup> “Mave nunda ari ekoko, kau embo boka avavaga segharira amo, nu nane esimbugaono ivuga arira. Ainda beká mo: nu sonembaono, jebuga da ika vuji ava mindido, reighi Jerusalem aminda teredo, ivuga use eveva irarira.

<sup>15</sup> Avata evetu genembo ari sembae eraera, simbora use kae jighiraera, kombo yagera kakato, evetu genembo kokomana deoro amburaera, evetu genembo ove a gode ekoko mendeni mendeni ava tumonde baingheraera, a kotugo, mave gungubo sise kokomana dereraera amo, ne ajagha fetarera.

<sup>16</sup> “Na jo genembo kitako iraeri. Na Iesu, namori. Geka evia, nanda ekaresia+ nange ningaetera ava kotise, na nanda aneya dirigeteno, nemokena osa sari ningovo dae sedo isira. David da veka a imendi amo, a kotugo, sifo da saura vitiraira amo, namori,” Iesu nunda ekaresiakena+ aminge resira.

<sup>17</sup> A kotugo, Asisi Kakara a Bajari da Datu Gagara, ne eminge sise irá gheraera, “Fuvu!” aminge sise irá gheraera. Bajari da Datu Gagara resena emo, na nunda ekaresiadae resena. Ekaresia+ amo, nu Bajarikena vai ari dae erira. Avori, Asisi Kakara a Bajari da Datu Gagara aminge siruroro ningareva amo, nembarago kau daba ava, sise irá ghareva, “Fuvu!” sise irá ghevu! Mave dubo saghari uvu mindari dae uju arira amo, nu furare dae resena.

Nu eminda foa jebuga da uvu mino irae de ava mindarira.

<sup>18</sup> Na John ri. Nane resena: mave tofo nunda kotariimi geka mendeni budo, buku eminda tate fitari sembarira amo, God numokena mino eko mutarira. Roera ekoko a mema buku jokáda gembena amo, nune itatamarira.

<sup>19</sup> O mave buku einda geka mendeni ghajarira amo, jebuga da ika vuji aindae buku jokáda gembena ava, nu jo bae arira. A

kotugo reighi kakara aindae buku jokáda gembena aminda, nu jo ya terae arira.

<sup>20</sup> Genembo mave setiri ningido eregefena aimi, resira, “Avori! Geka bekári: na nemokena yari dae erena,” nu aminge resira. A kotugo, nunda jovereghe furari da sifo aindae uju use, na eminge resena, “Avori, aminge! Bajari Iesu, fu!”

<sup>21</sup> Bajari Iesu nunda sonemba, ne isambukena evovodae irare!  
Avori, nanda geka tano eviri.